


Yompor Po'ñoñ ñeñf attõ Yepartseshar

Jesucristo e'ñe etserra a'pochtaterrnay

Yomporesho



New Testament in Yanesha' (PE:ame:Yanesha')

**Yompor Po'ñoñ ñeñĩ attō Yepartseshar Jesucristo e'ñe etserra a'pochtterrñay
Yomporesho
New Testament in Yanesha' (PE:ame:Yanesha')**

copyright © 2008 Wycliffe Bible Translators, Inc.

Language: Yanesha'

Translation by: Wycliffe Bible Translators, Inc.

Yanesha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanesha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

SAN MATEO	1
SAN MARCOS	87
SAN LUCAS	139
SAN JUAN	230
HECHOS	286
ROMANOS	356
1 CORINTIOS	394
2 CORINTIOS	430
GÁLATAS	453
EFESIOS	466
FILIPENSES	479
COLOSENSES	488
1 TESALONICENSES	496
2 TESALONICENSES	503
1 TIMOTEO	507
2 TIMOTEO	517
TITO	524
FILEMÓN	529
HEBREOS	531
SANTIAGO	559
1 PEDRO	569
2 PEDRO	579
1 JUAN	585
2 JUAN	593
3 JUAN	595
JUDAS	597
APOCALIPSIS	600

COHUEN ÑOÑETS ÑEÑT̃ QUELLCA' SAN MATEO

*Arrpa' all aquellcaret allohuen pa'so'chñechno ñeñt̃ pa'tañneshañ pen Jesús
(Lc. 3.23-38)*

¹ Arrpa' all aquellcaret Jesucristo pa'tañneshañ e'ñe pa'so'chñechnohuenet. Jesucristopa' David po'm'reneñ, e'ñe Abrahamoteñ. Allohuen añ so'chñetspa' ñeñtara mereñtsorecmuet.

² Abrahampa' chemere'tana Isaac. Isaacña' chemere'tana Jacob. Jacobña' chemere'tana Judá epuet ñaña pa'mo'nasheñechno.

³ Judaña' chemere'tana Fares epuet ñaña Zara. Ñet pachoretpa' añ pa'so'cheñ Tamar. Faresña' chemere'tana Esrom. Esromña' chemere'tana Aram.

⁴ Aramña' chemere'tana Aminadab. Aminadabña' chemere'tana Naasón. Naasónña' chemere'tana Salmón.

⁵ Salmónña' chemere'tana Booz. Ña pachorpa' añ pa'so'cheñ Rahab. Boozña' chemere'tana Obed. Ña pachorpa' añ pa'so'cheñ Rut. Obedña' chemere'tana Isaí.

⁶ Isaíña' chemere'tana David ñeñt̃ añcha'tarettatset̃. Davidña' chemere'tana Salomón. Ñeñt̃pa' arrot Urías puetaporot̃.

⁷ Salomónña' chemere'tana Roboam. Roboamña' chemere'tana Abías. Abíasña' chemere'tana Asa.

⁸ Asaña' chemere'tana Josafat. Josafatña' chemere'tana Joram. Joramña' chemere'tana Uzías.

⁹ Uzíasña' chemere'tana Jotam. Jotamña' chemere'tana Acaz. Acazña' chemere'tana Ezequías.

¹⁰ Ezequíasña' chemere'tana Manasés. Manasésña' chemere'tana Amón. Amónña' chemere'tana Josías.

¹¹ Josíasña' chemere'tana Jeconías epuet ñaña pa'mo'nasheñechno. Ñehua, Josíaspa' alla chemere'tos allempo ačhapatarettet allañar all anetso ñeñt̃ pa'so'cheñ Babilonia.

¹² Allempo huacherret Babiloniotpa' Jeconíasña' chemere'tuerrana Salatiel. Salatielña' chemere'tana Zorobabel.

¹³ Zorobabelña' chemere'tana Abiud. Abiudña' chemere'tana Eliaquim. Eliaquimña' chemere'tana Azor.

¹⁴ Azorña' chemere'tana Sadoc. Sadocña' chemere'tana Aquim. Aquimña' chemere'tana Eliud.

¹⁵ Eliudña' chemere'tana Eleazar. Eleazarña' chemere'tana Matán. Matánña' chemere'tana Jacob.

¹⁶ Jacobña' chemere'tana José ñeñt̃pa'tcha' puerrollar pa' María. Maríaña' cheyore'tana Jesús, ñeñtara ñeñt̃ Cristotats.

¹⁷ Allempoteñ corre't Abraham tarrempohua allempo corre't ñaña David, ñeñt̃ña allpónsheña chemere'shatnomuetspa' allo'tsenca'ye čharrasheña puechenet pa'tatssheña. Ñaña allempoteñ corre't David tarrempohua allempo ačhapatarettet Babilonio, ñeñt̃pa'čo'ña allo'tsenererrr čharrasheña puechena pa'tatssheña ñeñt̃ allpónsheña chemerasha'terrtserr allempo. Ñaña allempoteñ ačhapatarettet Babilonio tarrempohua allempo eñalleta Cristo, ñeñt̃pa'čo'ña allo'tsenererrr čharrasheña puechenet pa'tatssheñet ñeñt̃ allpónsheña chemerasha'tnerrtserr tarrempohua allempo eñalleta ñaña Cristo.

*Arrpa' atto eñalleta Jesucristo
(Lc. 2.1-7)*

¹⁸ Te'pa' o'ch neserrpare'tatas atto allempo eñalleta Jesús. Allempoña María ñeñtcha' pachor pa' Jesús pa' añca'ye o'patenaya José ño'ch yore'. Ama yoreña'pa' Maríañapa' ahuepa't achomenta Parets Puecamquëñoť.

¹⁹ Joséña ñeñtcha' puerrollar pa'pa' ñaña'pa' e'ñe cohuen acheñer ñeñto'marña ñapa' ama mueno o'ch pencach. Ñaña'pa' atet cotape'ch o'ch ser e'ñe a'nahuota.

²⁰ Allempoña atet cotape'chenpa' machayoťo' orrtoña Yompor po'mllañoťeñer. Ñeñť orrtoya puečhopoñopa' atet otos:

—José Davidna'tare, amach pa'llpatsto; pocte'ca'ye o'ch peyore María ñeñtcha' peťapor pepa' tarro'mar ñapa' o'ca'ye achomenta Parets Puecamquëñoť.

²¹ Te'pa' eñalletatancha' asheñorr, ñeñťña'pa' pesocho' Jesús tarro'mar ñapa' ñeñtcha' a'queshpaterre' pa'cheñer po'chñaroťet. Arrpa' allohua ñeñť atet och mellañoťeñ.

²² Ñeñťpa' tarro'mar atet pa' attoch etsota ñeñť atet eñorana'tane'ť Isaiás ñeñť a'mtahuete'ť Yompor po'ñoñ, ñeñťpa' atet ote'ť:

²³ Ñeñťña shopshesha'pa' amach a'plaretote'ye' achomento; cheyore'tanach asheñorr, ñeñťña'pa' sochetcha' Emanuel.

Ñeñť ña so'chñetspa' atet oten: Te'ña Paretspa' e'ñe parro'tseney.

²⁴ Allempoña José oyerr ñemoť, atet och Yompor po'mllañoťeñerpa' ñaña'pa' atetcho' pa'. Yoran María ñeñtcha' puetapor pa'.

²⁵ Tarraña ñapa' ama a'pñeñe tarremphua allempoch emare'tua; ñeñťña asheñorrpa' soch JESÚS.

2

Atto eñotañnesha'pa' huačha'tet o'ch enteñeta' Jesús allempo eñalleta

¹ Allempo eñalleta Jesús all Beléño, e'ñe alla Judeopa' añ añcha'tarettatse'ť Herodes. O'ña eñalletuapa' eñotañnesha'ña huačha'tet allot huena atsrreťpa' o' čhačha'tet Jerusaléño.

² Ñetña'pa' atet otyesoset:

—¿Erro'tsena'tña ñeñť eñalletatsa ñeñtcha' pa'mcha'tareťer pa' judionesha'? Yapa' yeñoteñ o' eñalleta tarro'mar yapa' o' yentoñ po'rantor allot huena atsrreť; yapa' ñeñťecopña yehuena o'ch yeconcorpana'teña'.

³ Allempoña añcha'tareť Herodes e'man atet ñoñetspa' ñaña'pa' ñeñťa na' pueyočhro ama eñmato pueyočhro. Allohuen jerusaléño'marnesha'pa'cho'ña ama esesha' eñmatatseto ñamet pueyočhreto.

⁴ Allempoñapa' agotatan añcha'tareťnesha' ñeñťara judioneshet; o'ch apčhet allohuen cornanesha' ñeñť atarr sherba'yets judioneshacop. O'ch apčhet ñaña ñeñť atarr etsotayene' ñoñets ñeñť atet anareť judioneshacop. Allña a'pťo'tyesanet:

—¿Erra't otete'ťña allcha' eñalletaña ñeñtcha' Cristoterrets?

⁵ Ñetña'pa' atet ochet:

—Arr anetso Beléño allara Judeo tarro'mar quellcopa' atet anuareť, atet quellquë'ť ñeñť a'mtaye'ť Yompor po'ñoñ. Ñeñťpa' Yomporña atet otatse'ť:

⁶ Añ Beléñ ñeñť judana'tarnesha' po'patseñ, e'ñe po'ñočh ñeñť anetser ñeñť atarr asherben entyeñet allohuen ñeñť añcha'tareťetyetsa allo'marnesha'. Tarro'mar all Beléño allcha' eñalleterra ñaña ñeñtcha' atarr añcha'tareťterrtsa ñeñtcha' cohuanperre' allohuen neyochreshachno ñeñťara israelnesha'.

7 Allempoña otuuset atetpa' Herodesña'pa' e'ñe a'nahua agotaterran ñaña po'potantañ eñotañnesha' ñeñt' cha'cha'tats allempo Jerusaléno. Allña'pa' e'ñe aco'pa a'p'to'tare'tyesapanet:

—Rantopa' ¿e'ñe'tña esempoteñña señch ñeñt' sorrtoya ñenma't?

8 Allempoña eñotatosetpa' ñaña'pa' otanet:

—Te'pa' o'ch ahues Beléño, e'ñech aco'pa se'nyesos ñeñt' cheshatoll. Ñerra'm o'ch señchpa' o'ch sotuerren allochña'pa' napa'cho'ña o'ch ahuen o'ch neconcorpana'teña' ñaña.

9 Ñetña'pa' allempo e'mhuanmuet atet otanet añcha'tare'tpa' allempoña'pa' ahuanmuet. Rantona' ñeñt' entnenet allot huena atsrre'tpa' ta'netsa allenet senet, atfo'tapa' o' chap e'ñe allo'tsen cheshatoll. O'ña chap allo'tsen cheshatollpa' o' muechchosa e'ñe alla ento e'ñe pocto.

10 Allempoña enterreterr rantopa' atarr nanac coshet.

11 Allempoña'pa' o' be'tososet pocollo, allña entoset cheshatoll epuet pachor María. Concorpana'tosyetpa' ma'yochosyet. Toram'pesyesoset po'tsapotpa' aposet e'ñe atfa oro, aposet tsach puese' ñeñt' atarr eñmosa't. Aposet ñaña eñmosa't puerets.

12 Allempoña ñetpa' eñotatanet Yompor pue'chopoño allochña'pa' attoch ama oñerreto Herodesesho'mar. Allempo puerrerrret pa'nyetopa' aña coterret po'poñ toñ.

Allempo cheshatoll Jesús'pa' anmet Egipto allcha' a'queshpachet

13 Puerra'cherrtsetpa' Yomporña po'mllaño'teñerpa' alla orrterranerr José pue'chopoño't. Ñeñt'pa' atet otererr:

—Petantaye'cha o'ch pa'yech cheshatoll pachore'na, orraye'chap all anetso Egipto allcha' sey'chosa. Esemphuañenñapa' o'ch alla noterrperr atet'cha' pe'pa. Herodes po'ño'chpa' e'natan'cha' añ cheshatoll attoch muetsatach.

14 Allempoña o' tantapa' anman cheshatoll, pachore'na yeta tsapo, ahuanmuet Egipto.

15 Allña'pa' alleneta atfo'taña'pa' o' rromuen Herodes. Atfoña etsota Yompor po'ñoñ atet ote't ñeñt' a'mtaye't po'ñoñ; ñeñt'pa' Yompor atet otatse't: “Egipto'tcha' nagotater Nechemer.”

Allempo Herodes'pa' mueñan ñeñt'cha' muetsue' allohuen asheñorro'tollesha'

16 Ñehua, allempoña Herodes'pa' o' eñoch cha sheca'ne'm eñotañnesha'pa' ñaña'pa' ñeñta atarr atsrre'mate'. Atfo atsrre'ma nanacpa' allempoña'pa' mueñan ñeñt'cha' muetsue' allohuen asheñorro'tollesha' ñeñt' Beléño'tsa'yen ñaña ñeñt' allohuen allampaño'tsa'yen Beléño. Allohuen asheñorro'tollesha' ñeñt' echene' epa po'charña ama't ñaña allohuen ñeñt' eñalletyetsa chenta' e'ñe poctacma muetsanatuet. Ñehua, ñeñt' atet eñotatos eñotañnesha'pa' ñaña'pa' atet cotape'ch ahuo'te' epa char eñalletuaña ñeñt' cheshatoller.

17 Atfoña etsota ñeñt' atet ote't Jeremías ñeñt' a'mtaye't Yompor po'ñoñ ahua't; ñeñt'pa' atet ote't:

18 Ñeñt' anetser Ramopa' atarr'cha' e'morrterra yahueñets, atarr gogatstena; allpa' Raquelca'ye ya'na'tene' puechyoresha'; ama mueno o'ch esesha' emya'te' tarro'mar puechyoresha'pa' ama eñallmeñe, o' e'ñe muetsanatuet.

19 Allempoña rroma Herodes'pa' Yomporña po'mllaño'teñerpa' alla orrterranerr José pue'chopoño all Egipto.

20 Allña'pa' otererr:

—Te'ña'pa' o'ch petanterra, o'ch alla paner cheshatoll pachore'na o'ch alla pepuerrerra israelnesha' pa'nyo; o'ca'ye colla'huaña ñeñt' o'pataye't añ cheshatoller ñeñto'ch muetsayeñ.

21 Atet otuepa' ñaña'pa' allenta tantena o' alla anerran cheshatoll pachore'na alla ahuerret israelnesha' pa'nyo.

²² Allempo ahuerretpa' ñetñapa' e'mare'tueret añ añcha'tarettertsa Judeo ñeññ Herodesoñ puechemer ñeññ sochetsa Arquelao. Ñeñño'marña mecha'tenet serrtset all. Pueçhopoñoñapa' alla eñotatererr ñeñño'marña allempopa' alla serr Galileo.

²³ Cherr Galileopa' ahuer pa'terr anetso ñeññ pa'so'cheñ Nazaret. Allñapa' alla yeçha'huerra. Atfo'tca'yeña etsotaña ñeññ atet otyese't ñeññ a'mta'yesaye't Yompor po'ñoñ; ñetpa' atet otyesete't ñeññcha' Cristoterretsapa' "oteñetcha' nazareto'marnesha'."

3

Allempo orrta Juan ñeññ serrpare'tosets all amayo
(Mr. 1.1-8; Lc. 3.1-9, 15-17; Jn. 1.19-28)

¹ Allempoñapa' orrta Juan ñeññ apatose' acheñenesha' Yomporecop. Ñañapa' arr serrpare'tatosanet amayo e'ñe alla Judeo.

² Allñapa' atet otosanet:

—Te'pa' o'ch soçtape'cherr ello cohuen Yomporecop tarro'mar o' çhapmoch allem-poch ayochreshatterra Yompor ñeññ pue'ntañ'o'tsen.

³ Ñehua, añmapa' ñocopca'ye eñose'tña Isaías ñeññ a'mtaye't ahua't Yompor po'ñoñ. Allempopa' atet ote't:

E'morrterrach puecheñarr po'ñoñ all amayo allcha'ña serrpare'taterranña acheñenesha'.

Puerranaro'tpa' añcha' toma'ntaterranet toñ, ñeññpa' atet'cha' oterranet: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'paçharretyesoñ pa'te'p." Arrpa' allohua ñeññ atet aquellcare't ahua'toteñ Cristocop.

⁴ Ñeñña Juanpa' camello pue'ch apomotare't ñeññ pa'shtam pen. Allo chanena ñeññpa' pa'rrom. Allñapa' rra'yesane't ahuañchenclla* ñeñña puerran pe't epuet pets po'moñ.

⁵ Allempoña jerusaléño'marnesha'pa' çhocma huaçha'tyenet ñesho ñaña allohuen judeo'marnesha'. Huaçha'tyeññaña ñaña allohuen jordanaso'marnesha'.

⁶ Allña ñetpa' a'meta'yesoset po'chñaret, Juanñapa' apatyapanet Yomporecop. Ñeñña oñ all apatyapanet añ pa'so'cheñ Jordanas.

⁷ Allempoña entapan shonte' saduceonesha' ñaña fariseonesha' ñeññareta ñeññet judioneshet. Ñetpa' tarro'mar huaçhenet añ muenenet o'ch apatapanet Juan. Juanña serrpare'tatapanetpa' otapanet:

—Sapa' ama cohuenayayso atarr ashcarña'tes, çha sottena ñerra'mrrate' shechpa som-por sepen. Po'ñoçhca' ama eseshaye' sotenaye e'ñech sapatareteño'ta o'ch sequeshperra allochñapa' amach coñchatuerrso Yompor allempoch yoroçhtatuer tsapa'one't.

⁸ Napa' añcha'ña notapas o'ch sorrtatyes ñeññ e'ñe cohuen enten Yompor ñeññ atet pena ñeññ po'ñoçh o' co'tape'cherran ello cohuen Yomporecop.

⁹ Sapa' çha soteneñ seyoçhro año' es sepallteno, sapa' año' e'ñe seyemtena satañ Abrahamañ. Tarraña napa' o'ch notas amach atet soçtape'chatsto tarro'mar ñeññpa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeññ senten arr o'ch a'pnasereñ Abraham po'mreneñ.

¹⁰ Ñeñño'marña napa' o'ch notas ñerra'm amach soçtape'cherro cohuen Yomporecop o' mameshamerra o'ch çhaponasa atfoç coñchaterres Yompor. O'ch netma'ntatasa atet ñerra'mrrate' allempo o'ch a'mata'tmochet tsach. O' e'ñe onañchachet gach allcha' tet e'ñe allohua huañen puepallactar. Ñeññ allohuen tsacheçhno ñeññ ama cohuenaye' me'tetsopa' a'mata'tueretcha' saproçhetcha' all huorten tso' allcha' e'ñe a'poyatatueret.

¹¹ Elloña Juanpa' atet otterrantederr:

—Ñeññes co'tape'cherre' cohuen Yomporecop napa' ama't e'ñe po'ñoçh napatensoñ Yomporecop, napa' e'ñeca'ye oñochaya napatenes. Tarraña Cristo ñeññcha' huapatsa

* 3:4 Ñeññ ahuañchenclapa' arrapo' enteñ palestino'marnesha'.

chenta'pa' ñapa' añcha'ca'ye chorratossa Parets Puecamquëñ ñeñt atet ñerra'm tso'. Ñapa' ñeñt atarr ahuamencatesha' nañapa' ama tama ahuamencateyayno. Ñapa' ñeñtña atarr sherbets, nañapa' ama es nesherbena attoch ama't po'sapatapa' o'ch nanmoñ.

¹² Ñapa' atarr ahuamencat ñapa' ñach acrerre' allohuen acheñenesha'. Ñapa' añ toma'ntena ñeñt orrene' puehoshnat alloch shoshnan po'trigo o'ch e'ñe pue'llomrochayama. Ñeñtña pue'llomerpa' o'ch a'yapache' o'ch añño'ch allecma añño'teñ e'ñe cohuen. Pue'she'marñapa' o'ch huapore'ch tso allcha' e'ñe poyhua. Ñeñtña tso'pa' ama emaya'pahuo ama't errponaña. Ñeñt'pa' allohua atet serrpare'tatanet Juan.

Allempo apatareta Jesús Yomporecop

(Mr. 1.9-11; Lc. 3.21-22)

¹³ Allempo huapa Jesús Galileot, chap Jordanaso allo'tsen Juan, ñapa' añ muenen o'ch apatañ Juan Yomporecop.

¹⁴ Juanñapa' eñoratsa cha mueneñeñ o'ch emman Jesús. Ñeñt'pa' atet otañ:

—Ama pocteyaye o'ch napatapañ pa, añña poctetsa pachña napatose'. Papa' eso'maruachñaca'ye ponna nesho, paca'yeña ñeñteñ atarr sherbets.

¹⁵ Jesúsñapa' atet otererr:

—Papatapno'tach Juanacha' tarro'mar atetca'ye poctetsa o'ch yetso allohuen ñeñt poctetsa Partsocop.

Allempoña Juanpa' e'ñe pocte' eñch,

¹⁶ allempoñapa' apatapan Jesús. E'ne apatue'pa' o' cha'nerrña Jesús oño, enetñapa' ahuepa't atorareta. Alotña e'ñe sohua'nma Parets Puecamquëñ, Jesúsñapa' e'ñe atet entañ ñerra'mrrate' yeñ o' sohua'nma ento, e'ñe chap ñesho.

¹⁷ Allempoñapa' cha e'morrtatsa ñaña ñoñets ento atet eñorena Yompor. Ñeñtña ñoñetspa' atet oten:

—Añmapa' ñeñtña Nechemer ñeñt atarr nemorrentena. Ña atarr nanac nocshatene'.

4

Allempo oneñt'pa' topatenan Jesús, mueneñ o'ch atet patan Jesús ñeñt ama pocteye' enteno Yompor

(Mr. 1.12-13; Lc. 4.1-13)

¹ Allempoña Parets Puecamquëñpa' anman Jesús all amayo. Ñeñt'pa' añecop atet pa attochña allpa' o'ch huapoña oneñeñ, tarro'mar ñapa' añ mueneñ o'ch atet patyes ñeñt ama pocteye' enteno Yompor.

² Allñapa' ama rreno e'ñe aña torrena attoch etsotuan ora allohuen ñeñt cohuentetsa Pomporecop. Ñeñto'marña ama't o' pa'tatsoch charramatpa' ama't coñe'tapa' ama es rreno yeño ama't ñaña tsapo. O'ña pa'tatsoch charramatuapa' cho cheporratsa.

³ Allempoñapa' huapoña oneñeñ. Atto topatosan Jesúsapa' atet otos:

—Pa ñerra'm po'ñochte' Parets Puechemereppa' o'ch pot: Añ mapue' puenasepa' pan.

⁴ Jesúsñapa' atet otañ:

—Napa' ama nemno o'ch atet neña tarro'mar Yompor po'ñoñ ñeñt anuaret ahuatoteñ ñeñt'pa' atet oteney: “Allohueney acheñeneshohueneypa' ama e'ñe rreñtsa ñapueñ yocram yepeno. Añe'naña yocram yepen yecamquëñecop ñeñt allohuen allpon oteney Yompor.”

⁵ Allempoña oneñt'pa' o' anem all Jerusaléño, ñeñt anetserpa' anaret Partsocop. Allñapa' a'tapatos nanac eno allohuanen Parets pa'paquell.

⁶ Allñapa' otuererr:

—Papa' ñerra'm po'ñochte' Parets Puechemerep te'pa' pomacha arroñ tarro'mar amach pa'tserrpo tarro'mar Parets po'ñoñ ñeñt anuaret ñeñt'pa' ama'tña atet oten:

Yomporpa' o'ch mueñonaḡ po'millañoḡeñnaneschar ñeñtcha' pecuamḡsapue'. Ñetcha' ḡagapapuet, o'ch enatapapet attoch amach ḡa'tserrḡatca'toso mapyo.

⁷ Allempoña Jesúsḡpa' alla otererr:

—Añḡa'cho'ña anuaret Yompor po'ñoño: “Amach ya'llocchame'tatsche Yompor ñeñt Yepartseshar yepen.”

⁸ Allempoña oneñeḡpa' o' alla anerranerr Jesús all atarr aspenḡo e'ñe a'noso. Alloḡña gatyuesuererr allohuen ñeñt allpon all amḡcha'taretetyena pa'namen acheñenesha' ñeñt yeḡha'yetsa erraḡaren añe patsro, gatyuesuererr all atarr cohuentatyeñet.

⁹ Oneñeñḡapa' alla otuererr:

—Ñerra'm na pema'yocheñoḡen o'ch peconcorpana'tna, napa' napaḡcha' ora allohuen ñeñt cohuen pentyen arr.

¹⁰ Jesúsḡapa' alla otererr:

—Te'pa' o'ch orrerreḡ oneñeḡe. Napa' ama nemno o'ch atet neḡa ḡarro'mar Yompor po'ñoñ ñeñt anuaret ñeñḡpa' atet oteney: “Añach ñapueḡ yema'yochena Yompor ñeñt Yepartseshar yepen, e'ñech ñapḡa yesherbe'.”

¹¹ Allempoña oneñeḡ topatuahuan Jesúsḡpa' o' ahuerr o' queḡhpa'ner. Allempoñapa' ḡhaḡha'toña Yompor po'millañoḡeñnaneschar; ñetḡapa' e'ñe cohuen sherḡoset Jesús all. Arrpa' allohua huañ atto oneñeḡpa' topatenan Jesús allempo.

Allempo e'ñe ñenmaḡ ḡorrena Jesús Partsocop all Galileo

(Mr. 1.14-15; Lc. 4.14-15)

¹² Allempoña Jesús e'mare'tan Juan o' yottamḡset, ñañapa' allenta ahuerr Galileo.

¹³ Cherr Galileopa' ama a'pohuerro anetso Nazareto, arraña serr Capernaumo, allña yeḡha'huerra. Ñeñt Capernaumpa' e'ñe sa'patopño'tsen, allara ñeñt otenet Zabulónnanesha' pa'netser ñañña Neftalenesha' pa'netser.

¹⁴ Ñeñḡpa' allña yeḡha'huerra allochñapa' attoch etsota Isaías po'ñoñ ñeñt a'mḡtayeḡ Yompor po'ñoñ; ñeñt ñapa' atet oteḡ ñeñḡe anetsrecop:

¹⁵ Ñeñt Zabulónnanesha' pa'netsro ñañña Neftalenesha' pa'netsro ñeñt all sa'patopño all Jordanas yomḡta'n, allara Galileo all yeḡha'yena pa'namen acheñenesha' ñeñt ama judioneshayayeto.

¹⁶ Ñeñt acheñenesharpa' ñetpa' añña yeḡha'yenet ñeñt ama cohuenaye' enteno Yompor; ñetpa' ḡha ottenet ñerra'm checmeto'tseneta. Tarraña te'ñapa' o' enteret ñeñtcha' e'ñe cohuen a'puetarsamḡperrahuet poḡtaḡñet. Ñetña ama't añña o'patyesahuetañeḡ rromueñets ñeñḡara chenqueñets, te'ñapa' ama't ñocpuetpa' o' a'puetarsamḡsaretterret e'ñe cohuen. Arrpa' allohua atet naneḡ Isaías po'ñoñ.

¹⁷ Allempo ḡherr Jesús Galileo allempoña e'ñe ñenmaḡ serrpare'tatuerranet all. Ñeñḡpa' atet otuerranet:

—Te'pa' o'ch soḡtape'cherr ello cohuen Yomporecop ḡarro'mar te'pa' o' ḡherrmoch allempoch ayochreshatterra Yompor ñeñt pue'ntaño'tsen.

Atto Jesúsḡpa' ḡhore'tosan pa'tatssheña ñeñt e'ñe caca ḡorrenet rromuet

(Mr. 1.16-20; Lc. 5.1-11)

¹⁸ Allempo Jesúsḡpa' chopeñe'chyen all sa'patopño'mar; ñeñḡña sa'ppa' añ pa'so'cheñ Galileas. Allñapa' entosan acheñ epsheña; ñeñḡña puesheñarrpa' añ pa'so'cheñ Simón ñeñḡara soḡhetsa Pedro epuet pa'mo'nasheñ Andrés. Ñetḡapa' terrayetsset e'ñe alla sa'po ḡarro'mar ñetpa' e'ñe ñeñḡa po'taruas penet.

¹⁹ Jesúsḡapa' atet otosanet:

—Te'ñapa' o'ch notas, soḡta'n na attoch neyochresha' neperres. Ñeñt atet sepena ahuatoteñ e'ne' cac te'ñapa' o'ch neyḡhatterres attoch se'nerr ñañña acheñ ñeñtcha' same'ñaterra.

²⁰ Ñetñapa' allorocma na'nmuert po'terrayapa' o' co'tet Jesús.

²¹ Allempoña meterrerr allotpa' entuerranerr po'poñ acheñ epsheña; ñeñña puecheñarrpa' añ pa'so'cheñ Jacobo* epuet pa'mo'nasheñ Juan; ñeñtpa' Zebedeo puechemerasha'. Ñetñapa' po'noñto'tsa'yenet; allo'tsen ñaña pomporet all a'cohuenetyenet po'terraya. Jesúsñapa' chore'tuerraneterrpa' atet otuerraneterr ñamet: —Te'pa' o'ch socta'n saña.

²² Ñetpa'cho'ña e'ñe allorocma na'nmuert po'noñt ñaña pomporet o' co'tet ñamet Jesús attoch pueyochresha' perranet ñamet.

Allempo Jesúsapa' ye'chatenan shonte' acheñenesha'

(Lc. 6.17-19)

²³ Allempoñaapa' chopeñe'chyes Jesús errañaren Galileo'mar. Ye'chatyesosan judionesha' e'ñe ñet po'prahueto. Allñapa' serrpare'tatosanet cohuen ñoñets atto ayochreshattena Yompor. A'crratyesosan acheñenesha'; ama't pa'namen osyenahuet, ama't pa'namen a'prrama'yenahuet, ñañaapa' e'ñe a'crratyesuosanet.

²⁴ Atteñaapa' e'mare'tuet errañaren ama't Sirio'mar. Huapatyesoñet allohuen ñeñt muerochtatyen atsañets. Huapatyesoñet ñeñt osyen pa'namen atsañets ñaña ñeñt atserrpañachno. Huapatyesoñet ñaña ñeñt chorra'yena oneñet ñaña ñeñt o'tañachno ñaña echarrañachno. Allohuenetpa' ñañaapa' e'ñe a'crratyesuerranet.

²⁵ Shonte' acheñenesha' ñeñt cota'yese'. Cota'yese galileo'marnesha', ñaña decapoliso'marnesha' ñaña jerusaléño'marnesha', ñaña judeo'marnesha'; ama't ñeñt ye'chetsa Jordanaso yon'ta'npa' o' e'ñe cota'yese.

5

Allempo Jesúsapa' serrpare'tatosanet all aspento

¹ Allempoña entan shonte' acheñenesha' ñeñt co'tene', Jesúsñapa' ahua' aspento. Allña anorrospa' huacha'toña allohuen pueyochreshachno.

² Ñañaapa' ye'chatapanetpa' atet otapan acheñenesha' ñeñt po'ño'ch atarr cosheñtso'tsa'yenet:

Acheñenesha' ñeñt po'ño'ch atarr cosheñtso'tsa'yenet

(Lc. 6.20-23)

³ —Nanac cosheñtso'tsa'yen allohuen ñeñt ama esoye' asherbenaye' entyetso pueyochreto Yomporecop tarro'mar ñetpa' o'paterretcha' Yompor po'cohuenña atto ayochreshattena pue'ntañot.

⁴ Nanac cosheñtso'tsa'yen allohuen ñeñt lleca'yetsa Yomporecop tarro'mar ñetpa' coshaterranetcha' Yompor.

⁵ Nanac cosheñtso'tsa'yen allohuen ñeñt ama a'ñeye' e'neneto ñeñt e'ñe ñocpueta tarro'mar ñetpa' o'pataterranetcha' Yompor allohuanen pats.

⁶ Nanac cosheñtso'tsa'yen allohuen ñeñt nanac muenene' o'ch e'ñe orrtatyenet ñeñt e'ñe pocte' enten Yompor. Ñetpa' e'ñe atet mueneñet ñerra'mrrate' cho nanac yachporrena ñaña nanaccha' yo'ñpa'ten. Nanac cosheñtso'tsa'yenet ñet tarro'mar Yomporña e'ñe atet muenaterranet.

⁷ Nanac cosheñtso'tsa'yen allohuen ñeñt nanac cohuen muerannetsa tarro'mar elloña Yomporpa' atarrcha' muererranet ñet.

⁸ Nanac cosheñtso'tsa'yen allohuen ñeñt e'ñe pueyochretopa' ama eñalle sosya'tsañ ama't coñe'ta tarro'mar ñetpa' enteretcha' Parets.

⁹ Nanac cosheñtso'tsa'yen allohuen ñeñt chocma amo'tstanna'tatenahuet tarro'mar ñetpa' po'ño'chcha' Yompor puechemer perranet.

* **4:21** Jacobopa' ñeñfara ñeñt sochenet Santiago.

10 'Nanac cosheñtso'tsa'yen allohuen ñeñt e'moñe'tyenet atto ñetpa' e'ñe pocte' es pa'yenet Yomporecop. Nanac cosheñtso'tsa'yenet tarro'mar ñetpa' o'paterretcha' Yomporecop po'cohuenña atto ayochreshattena pue'ntañot.

11 'Sapa'cho'ña nanac cosheñtso'tsa'yenes ñerra'm esempo erroñuanen penset no'mar. Nanac cosheñtso'tsa'yenes ñerra'm cho sapa' sasare'tyenset, e'moñe'tyenset, pa'namen sosey toma'tam̄pesyenset.

12 Chocmuepa'chña socsha tarro'mar shonte' ñeñt o'patatensa Yomporecop pue'ntañot; ñeñtcha'ña atarr socshaterre'. Ama't ahuatoteñ allempo ama se'ñalletena' attecma e'moñe'tyesete't ñaña ñeñt a'n̄ta'yesaye't Yomporecop po'ñoñ.

Acheñenesha' ñeñt sherbets Yomporecop arr patsro ñetpa' atet atma'ntatarettenet ñerra'm pos ñaña puetare'
(Mr. 9.50; Lc. 14.34-35)

13 'Sapa' ñeñtes name'ñenaya añ netma'ntatensa atet ñerra'm pos ñeñt atarr sherbene' allohuen acheñenesha' arr patsro. Tarraña pospa' ñerra'm o'ch huañer po'poserrteña amach erroñenot ellopa' ya'poserrtatere. Allempopa' o'huañcha' es sherba' acheñeneshacop; añecpach sherberr o'ch yehuapore'ch a'yo allcha' atmama'ch acheñenesha'.

14 'Ñaña añ netma'ntatensa puetare' elloña ñeñtña atarr sherbene' acheñenesha' arr patsro. Sapa' chocmach cohuen es sorrattyen. Atetcha' sepene ñerra'mrate' paterr anets ñeñt e'ñe a'noso'tsen aspeno. Ñeñtña anetserpa' chocmach cohuen orrtena allemateñ, amach erroñenot ma'natacheto.

15 'Ñaña ñerra'm esempo ya'llchaten lampareña' ñeñtpa' ama tarrecpaye' ya'llchateñe o'ch ye'rramañpes coym̄o. Ñeñtpa' añecopña ya'huortateñ o'ch yene' enonet attoch e'ñe choyo'tam̄pesuan allohuen ñeñt pocollo'tsa'yen.

16 Sapa' attecmuepa'chña sorrattyen ñeñt cohuen enten Yomporecop. Allochñapa' po'potantaña'cho'ña e'ñech cohuenare' entennaset atet es sorrattyen cohuen. Attochña ñetpa'cho'ña cohuentatapreternasetcha' Seyomporecop ñeñt pue'ntañot'sen.

Atto Jesúsapa' ye'chatosanet atarr sherben Yomporecop po'ñoñ ñeñt atet anaret ahuatoteñ

17 Jesúsapa' atet otterraterre:

—Amach soctape'chatsto napa' añecop'te' nohuapa o'ch nehuapore'taterr Yomporecop po'ñoñ ñeñt ahuatoteñ atet anaret atet ñerra'm Moisés po'ñoñ ñaña añ po'ñoñ ñeñt quellca'yese't ñeñt a'n̄ta'yesaye't Yomporecop po'ñoñ. Napa' ama añecpaye' nohuapo o'ch nehuapore'tach, napa' e'ñechca'yeña netsotatuer.

18 E'ñe po'ño'ch notenes: Ama ahuapore'tpahuoyaye Yomporecop po'ñoñ ñeñt atet anaret ahuatoteñ, ama't tayoteñ tarrempohuach esempohuañencha' chenca'huerra pats ñaña enet. Ama't patrra ñoñets ñeñt atet anaretpa' amach chenquerro ama't e'ñe patrra quellec pueshempotollohuenpa' amach chenquerro ama't tayoteñ tarrempohuach esempohuañencha' e'ñe etsotuerre ñeñt atet oten ahuatoteñ.

19 'Ñeñto'marña ñerra'm esesha' o'huañ e'ñeye' ame'ña'po' entan ama't patrratolla ñoñets ñeñt atet anaret ahuatoteñ ñaña ñerra'm attach ye'chatan po'potantañ, ñeñtña acheñerpa' amach tama sherbeno Yomporecop ñeñt atto ayochreshattena ña pue'ntañot. Tarraña ñerra'm esesha'chña e'ñe etsoterre' ñaña ñerra'm e'ñech atet ye'chatan po'potantañ, ñeñtña acheñerpa' ñeñtcha'ña atarr sherberrets Yomporecop attoch ayochreshatterre ña.

20 Napa' o'ch notas, po'ño'chca'ye sa atet e'ñe pocte' es sorrattyen, ellochña sem̄tana'tuerepa'ch atet es cohuen orrtatyeneñ fariseonesha' ñaña añ ñeñt atarr etsotayenayeñ ñoñets ñeñt atet anaret. Ñerra'm amach sem̄tana'tuerranetopa' amach

errotenoŧ so'pataprechoña Yompor po'cohuenña atto ayochreshattena ña pue'ntañof. Attoña ama't ahuaŧapa' amach seŧherro all añcha'tareŧttena pue'ntañof.

*Atto Jesúsŧpa' yeŧchatosanet ama e'moñe'tanna'tpahuoyaye
(Lc. 12.57-59)*

²¹ Jesúsŧapa' alla yerpaterraneterr ñeñŧ atet anareŧtete't ahuaŧoteñ ñoñets, ñeñŧpa' atet oterraneterr:

—Sa ahuaŧoteñpa' se'marte'ña atet otareŧte't ahuaŧ acheñenesha'. Ñeñŧpa' atet otareŧtete't: “Amach muetsatsteto acheñ. Ñerra'm esesha' muetsene' acheñpa' ñapa'cho'ña muetsereŧcha' tarro'mar ñeñŧotcha'ña o'patateret coñcheñets.”

²² Elloña na te'pa' o'ch noterres, ama't ñeñŧ atŧa e'moñe'tene' pamo'tspa' ñapa'cho'ña ñeñŧotach o'patateret coñcheñets. Ñaña ñerra'm esesha' atarr sosyoŧ sochatse'teñet pamo'ts ñeñŧpa'cho'ña ñeñŧotach o'patateret coñcheñets allo'tsa'yen añcha'tareŧneshachno allecma a'pocatenet ñoñets. Ñaña ñerra'm esesha' puepencare'teñoŧ atarr sosyoŧ sochatse'teñet pamo'ts ñeñŧpa'cho'ña acheñerpa' añ o'patenaya tso' ñeñŧ parrarets erraŧaren.

²³ Ñeñŧo'marña napa' o'ch notas: Ñerra'm esempo cho es pa'puen Yomporecop allecma sherbeñet Yompor allña' taya o' peyerposya pa'mo'tsña' cha pa'srre'mateñ,

²⁴ pañapa' ñeñŧcha' pa'p Yomporpa' pena'ner alla. O'ch ahuerreŧ, pemo'nasheñña ñanom pa'mo'tsterra'. Allempochña pepuerrerra allecma sherbeñet Yompor allem-pochña pa'phuer Yompor ñeñŧ po'patateña.

²⁵ Ñaña ñerra'm esempo esesha' setmantene' o'ch anmaset añcha'tareŧesho allcha' sa'pocataerra' señoñ, sañapa' e'ñech allorocma samo'tstera ñeñŧ se'moñe'tene' tayepa'tña' ama seŧhena' añcha'tareŧesho. Chosachña amo'tsterraya ñeñŧ setmantene' te't attot pomataterrset añcha'tareŧesho ñaña'pa' o'ch pomuensa' guardiyesho ñeñŧcha' seyottamŧse'.

²⁶ Po'ñoŧcha'ye o'ch notas, ñerra'm choŧh yottamŧpsasetpa' allenasachca'ye o'pono al-lotpa' amachca'ye ahuen cha'nmaterrseto. Esemphuañencha' choŧh seŧcha'nmaterrset ñerra'm esempoŧh e'ñe setsa'tuerra ora allohuen ñeñŧ allpon quelle muenenet. Ama't e'ñe eptalla centavoŧollña ñerra'm ama setsa'tueña'pa' amachca'ye cha'nmaterrseto al-lot. Ñeñŧo'marña notenes o'ch e'ñe cohuen samo'tstera ñeñŧ se'moñe'tene' tayepa'tña' ama chennasa' ñeñŧ atarr yoroŧhen senten socop.

Atto Jesúsŧpa' yeŧchatosanet ama achtapreŧpahuoyaye taporets

²⁷ Ñaña sapa' ahuaŧoteñ se'marte'ña atet otareŧte't acheñenesha': “Amach chetapre-tatsteto taporets.”

²⁸ Elloña na te'pa' o'ch noterres, ñerra'm esesha' cohue' coyanesha' pueye'cheñoŧ, o'ca'ye ochña'tet pueyoŧhreto.

²⁹ Ñeñŧo'marña notenes: Ñerra'm seclle' pa'tyenes ñeñŧ ama pocteye' enteno Yompor, añ poctetsa o'ch sequeŧhpuerr ñeñŧ seye'chena seclloyoŧ. Ñeñŧpa' e'ñe atet ñerra'mrrate' cho serroten seclle' o'ch sehuapore'ch, ama't ñeñŧ seclle' secohuenrote'tsen ñeñŧ atarr sesherbene'. Añña ama tama yoroŧhenayaye socop o'ch sa'ypo'ñer e'ne tayecma ñeñŧ soctape'chatene' sosya'tsañ. Añcha'ña atarr yoroŧhen socop ñerra'm ama tayecma sa'ypo'ñerepa' esempohuañenpa' orach huapore'terrset coñcha'puetso all parraren tso'. Ñeñŧpa' añ toma'ntena atet ñerra'mrrate' o' ya'chencaterr pa'terr yechets ama't yeclle' ama't yot, te't esempohuañen ora yechtsohuenpa' huapore'terryet coñcha'puetso.

³⁰ Attecma ñaña ñerra'm sotpa' pa'tyenes ñeñŧ ama pocteye' enteno Yompor añ poctetsa o'ch sequeŧhpuerr ñeñŧ atet choŧcma pa'tse'tatyenes sot. Ñeñŧpa' e'ñe atet ñerra'mrrate' cho sepechen sotpa' o'ch sehuapore'ch, ama't ñeñŧ secohuenrote'tsen sot ñeñŧ atarr sesherbene'. Ñeñŧpa' o'ch alla noterrser. Añña ama tama yoroŧhenayaye

socop o'ch sa'ypo'ñer e'ñe tayecma ñeñt' soctape'chatene' sosya'tsañ. Añcha'ña atarr yoro'chen socop ñerra'm ama tayecma sa'ypo'ñerepa' esempohuañenpa' orach hua-pore'terrset coñcha'puetso.

Atto Jesús'pa' ye'chatosanet ama asanna'tpahuoyaye

(Mt. 19.9; Mr. 10.11-12; Lc. 16.18)

³¹ 'Ñaña te'pa' o'ch noterrser po'poñ: Sapa' ahua'ototeñpa' se'noteñe'tña atet' otarettete't: "Ñerra'm esesha' serre' puetaporpa' apa'nme'pa'ña papell all aquellcare't attoch que'chpuerran puetapor."

³² Elloña na te'pa' o'ch noterres: Ñerra'm ama añe'cpaye' que'chpuerrano puetapor atto ama 'choye' agu'enanano po'pshe'ñeñ yacma, ñerra'm att'ota serran puetapor, ñaña'pa' ochña'taterrancha' puetaporeshe'mañ po'pshe'ñesho't; ñeñt'pa' ama cohuenaye' ente'ñe Yompor. Ñaña ñerra'm esesha'ña yorerre' ñeñt' asare'tpa' ñeñt'ña yacmarpa' 'chach chetapretenan po'pshe'ñeñ puetapor; ñeñt'pa'cho'ña ama cohuenaye' ente'ñe Yompor.

Atto Jesús'pa' ye'chatosanet amach natsteto po'ñoñ Parets pa'so'chño

³³ 'Ñaña te'pa' o'ch noterrser po'poñ: Sa ahua'ototeñpa' se'mare'tña ñeñt' atet' otarettete't: "Amach e'ñe orrena na'yeneto po'ñoñet Parets pa'so'chño tarro'mar ñerra'm erra'tsen nene' po'ñoñ Parets pa'so'chño ñeñt'pa' atarr huomenc ñoñets amach atta puesatscheto, 'chocmachña e'ñe a'poc'atayenet ñeñt' atet' o' nohuetña po'ñoñet Parets pa'so'chño." Ñeñt'pa' atetca'ye otarettete'tña ahua'ototeñ.

³⁴ Tarraña elloña na te'pa' o'ch noterres: Ama't e'ñe erra'tsena pa'so'chño'pa' amach senatsto señoñ. Amach sotatsto o'ch sena' señoñ Yompor pue'ntañ pa'so'chño; ñeñt'pa' ama tama huomencaye' sente'ñe ñeñt'ecop atet' senen señoñ. Tarro'mar napa' o'ch notas ama't pue'ntañpa' ñeñt' po'conañ pen Parets ñeñt'o'marña attera atarr huomenc ñerra'm Pamo'mte'.

³⁵ Ñaña amach sotatsto o'ch sena' señoñ Yompor po'patseñ pa'so'chño tarro'mar ñeñt'pa'cho'ña attera atarr huomenc tarro'mar ñeñt'pa' ñeñt'ña nen Parets pa'tconet. Ñaña amach sotatsto o'ch sena' señoñ Jerusaléñ pa'so'chño tarro'mar ñeñt'pa'cho'ña attecma atarr huomenc tarro'mar ñeñt'pa'cho'ña ñeñt' pa'netser pen Parets.

³⁶ Ñaña amach sotatsto o'ch sena' señoñ e'ñe sa soñ pa'so'chño tarro'mar ñeñt'pa'cho'ña ama soyaye seye'chcatar. Ama't e'ñe pue'parra se'chpa' amate' erro'teno't sello'tacheña sa. Ñaña ñerra'm esempo'ch sello'tenpa' amach erro'teno't alla sa'quelluetatereña sa.

³⁷ Ama't erro'tena se'pa'yesa'chpa' atet'cha' sotanna'tyesa: Ñeñt'pa' atet'cha'ca'ye yepe'. Ama palltenoña o'ch sena'yen señoñ ama't e'ñe esa pa'so'chño tarro'mar ñerra'm atet' se'pa'yenapa' ñeñt'pa' one'ñe'eshota huena.

Atto Jesús'pa' ye'chatosanet ama atsa'tatpahuoyaye atto e'moñe'tenyet

(Lc. 6.29-30)

³⁸ 'O'ch alla noterrser po'poñ: Ñaña sapa' ahua'ototeñ se'mare'tña ñeñt' atet' otete't: "Ñerra'm esesha' pochocle'che' pamo'ts, semoñseñoñ ñeñt' apochocle'chare'tpa' se'pochocle'ch ñaña ñeñt' pochocle'chene' pamo'ts. Ñaña ñerra'm esesha' pue'moñe'teñoñan a'cayam'psan pamo'ts pa'spa' semoñseñoñpa' sa'cayam'pes ñaña pa's ñeñt' a'cayam'pene' pamo'ts pa's." Ñeñt'pa' atetca'ye otarettete'tña ahua't.

³⁹ Tarraña na te'pa' o'ch notas ellonet: Amach semoñsatstoña sa e'ñe sañeña ñerra'm esempo e'moñe'tyenset. Atet' ñerra'm esempo esesha' pue'moñe'teñoñetas o'ch tacllaset setsa'po secohuenro't, sañapa' poc'tepa'chña señch tacllerrserre'pa' ñaña po'pshe'ntañ.

⁴⁰ Ñaña ñerra'm esempo esesha' muenene' o'ch temantaset attoch puerratañpsaset seshtam, sañapa' poctepa'chña señch puerratañpsasetepa' seshtam ñeññ muenenet ama't ñaña po'pmañ seshtam allo sepmatena.

⁴¹ Ñaña ñerra'm esesha' sanmatsre'tatene' e'ñe atta paterr kilómetro, sañapa' poctepa'chña señch o'ch sanmatsre'ch ama't epa kilómetro.

⁴² Ñaña ñerra'm esesha' es senamuene', sañapa' sapepa'ch. Ñaña ñerra'm esesha'ch senamuene' o'ch es sarchapa' sañapa' sarchepa'ch.

*Atto Jesúsapa' ye'chatosanet amorrentpo'ch yeñch ñeññ ye'moñe'tyene'
(Lc. 6.27-28, 32-36)*

⁴³ Ñaña sapa' se'marte'ña atet otete't ahuat: "Mueryetcha' pamo'tset ñeññ muere-nahuet. Tarraña ñeññ e'moñe'tenahuetpa' ñetpa'cho'ña o'ch e'moñe'chet ñamet." Ñeññpa' atetca'ye otete't ama't ahuatoteñ.

⁴⁴ Tarraña naña te'pa' elloña o'ch noterres: Semueryach ama't ñeññ se'moñe'tene'. Ñaña ñeññ sarrnomare'tenaya sañapa' o'ch senamaterrñañ Yompor pa'nateña. Ñaña ñeññ erroť sepene'pa' sañapa' añcha' atet sepoñ ñeññ atarr cohuen enten ña. Ñaña ñeññ sa'muerochtatene' sañapa' o'ch sema'yocham'pesya.

⁴⁵ Attochña sapa' eñotenset po'ño'ch puechemer penes Yompor ñeññ pue'ntañ'o'tsen tarro'mar sapa' añ sorrtatyen cohuen ama't e'ñe allohuenacop e'ñe atet pena Sompör ñapa' e'ñe cohuenare' es orrtatyen ama't allohuenacop. Atet ñapa' chocma huap-ata'muenane't po'puetarenña allohuenacop ama't atsrre'mña'ecop ñaña ñeññ cohuenacop acheñer. Ñaña ñapa' chocma huatateñ añecop ñeññ e'ñe pocte' es pets ama't ñaña añecop ñeññ ama pocteye' es pa'yetso.

⁴⁶ Ñeñño'marña notenes: Ñerra'm aña e'ñe semorrentena ñeññ semorrentenaya samña ñeññpa' amach e'ñeye' sorrtatenoña ñeññ e'ñe po'ño'ch cohuentetsa, attoña Yomporpa' amach es apuerrso ñeññcha' atarr socshaterre'. Tarro'mar ñeññ ama ame'ñenayo Yompor, ñetpa' aña morrentenet ñeññ e'ñe morrentenahuet ñamet. Sapa' e'ñeca'ye seño'teñ e'ñe atet pena ñeññ pueshquẽño'te'na cobrenan acheñenesha' shonte' quelle. Añña atarr cohuentetsa ama't ñeññ ama yemorrentenayepa' o'ch yemorreñcha e'ñe cohuen.

⁴⁷ Ñaña ñerra'm e'ñe aña cohuen saguën ñeññ e'ñe samo'ts sepen, ñeññpa' amach erro'tenoť señtanoña ñeññ ama ame'ñetso, tarro'mar ñetpa' e'ñe aña cohuen aguënet ñeññ e'ñe pamo'ts penet.

⁴⁸ Ñeñño'marña napa' notenes: Sapa' e'ñepa'chña cohuenare' es sorrtatyen allohuena-cop e'ñe atet pena Sompör ñeññ pue'ntañ'o'tsen e'ñe cohuenare' es orrtatyenña ña.

6

Atto Jesúsapa' ye'chatosanet amach pommo'cheño'te'na es cohuen orrtatatsteto

¹ Jesúsña'pa' atet o'terraneterr:

—E'ñech seño'ta, amachña e'ñe sommo'cheño'te'naña es sorrtatyeno cohuen Yompor-cop attoch acheñenesha'pa' o'ch entenset sapa' atarro' cohuen acheñeseñ. Tarro'mar ñerra'm ñeññtecpa'na es sorrtatyen cohuen, Yomporña ñeññ pue'ntañ'o'tsenpa' amach es apuerrsoña sa ñeññcha' atarr socshaterre'.

² Ñerra'm esempo es sapueñ huocchañnesha'pa' e'ñechña a'nahua sapuenanet. Sommo'cheño'tpa' amach sotatsto entasepa' allohuen acheñenesha' attoch e'ñe cohuen entasetañ. Tarro'mar ñeññpa' ommoñañenesha' atet petsa. Ñeññ ommoñañenesha'pa' ñerra'm esempo es apueñet huocchañnesha'chnopa' o'ch orrtachet allo'tsa'yen allohuen acheñenesha' all puerahuo'mar ama't ñaña toño'mar; attochña allohuen acheñenesha'pa' e'ñech cohuen entenanetañ. Tarraña napa' o'ch notas, ñeññ atet petsapa' Yomporña'pa'

amach es apuerraneto ñeñtcha' atarr coshaterrahuet. Tarro'mar ñetpa' aña e'nenet acheñenesach cohuentatenahuet. Ñetpa' e'ñech alla atsa'taretterret.

³ Tarraña sapa' ñerra'm esempo es sapueñ huocchañnesachno amach esesha' so-taṗsa'tatsto ama't ñeñt e'ñe parro seyemtannena.

⁴ E'ñechña a'nahua es cohuen seṗa'yen, allochñapa' Sompor ñeñtña entene' allohuen ñeñt a'nahua es seṗa'yen, ñachña sapuerre' ñeñtcha' ello atarr socshaterre'.

*Atto Jesúsapa' yeḥatosanet e'ñech cohuen ma'yochet
(Lc. 11.2-4)*

⁵ Jesúsñapa' atet oterraneterr:

—Ñaña ñerra'm esempo sema'yochena sapa' amach atet seṗatsto atet pena om-moñañenesha'. Ñetpa' añecpaña ma'yochenet attoch acheñenesha'pa' e'ñech cohuen entenanetañ. Ñeñto'marña allempo ma'yochenetpa' arrach tomyesoset all shontena acheñenesha' puerahuo'mar amapa' all etsape'tyena toñ allecma huaçhena shonte' acheñenesha' attochña allohuen acheñenesha'pa' e'ñech cohuen entenanetañ. Tarraña napa' po'ñoçhpa' o'ch notas: Ñeñt atet ommo'chetsa Yomporñapa' amach apuerraneto ñeñtcha' coshaterrahuet tarro'mar ñetpa' aña e'nenet acheñenesach cohuentatenahuet. Ñetpa' e'ñech alla atsa'taretterret.

⁶ Sañapa' ñerra'm esempo sema'yochenapa' o'ch sebe'tosyes so'ponro çhochña seyot-taṗsa attochña sapa' amach sommo'cheñoña sema'yocheñoña Sompor, ñeñtpa' e'ñech ñapueñ allo'tsenes epas. Allochñapa' Sompor ñeñt e'ñe ñapña sentene' ñachña sapuerre' ñeñtcha' ello atarr socshaterre'.

⁷ Sa ñerra'm çho sema'yochenapa' amach atta nanac señosatsto atarr aton e'ñe orrena ñeñt atet pena po'poñ acheñenesha' ñeñt ama ame'ñenayo ñeñt ya Yeyomporer. Ñetpa' atarr tematen ma'yochenetaña' tarraña ñeñtach alla oterrete't. Cha'e' otenapuetañ ñerra'm atarr tematen eñosetpa' e'ñete' cohuen entenanet Yompor attoch e'ñe cohuen e'mñnotenamet.

⁸ Sañapa' amach atet seṗatsto atet penet ñet tarro'mar sapa' ama't ama es senamuena' sema'yocheñoñ, Somporña e'ñe eñotuennas ñeñt sepallta'yena.

⁹ Sañapa' atetcha'ña cohuen sema'yochaña sa:

Yompore Partso ñeñteṗ pe'ntaño'tsen, yentapepa'ch ṗa atarr Partsoṗ.

¹⁰ Chapuepa'ch Nompore allempoch atarr ṗa'yochreshatterra arr patsro. Yetsoton-apepa'ch arr patsro ñeñt atet pemnen ṗa Nompore ñeñt atet penet ñaña all pe'ntaño.

¹¹ Chocmuepa'ch Nompore ṗapueney ñaña yocrrañ ñeñt allpon yepallta'yena pate'tets yet.

¹² Peṗretna'huonayepa'ch Nompore allohuen yo'chñar ñeñt ama pocteye' pentapretenye atto Nompore yapa'çho'ña yeṗretnannena ñerra'm esempo erroñ yeṗannena.

¹³ Ñaña amach Nompore pemnatatsche sosya'tsañ o'ch atarr topateney. Añcha'ña çhoch Nompore ṗa'ypo'ñataterrey allohuen sosya'tsañeçhno. Tarro'mar e'ñe ṗa Nompore ayochreshattetsa ñeñteṗ atarr Partseshatets, e'ñe ṗapña ñeñteṗ Nompore aye'choçhtataretetsa e'ñe errponañohuen. Ñeñtach nenamaṗ; ñeñtapa' attepa'ch Nompore.

¹⁴ Ñerra'm sa çhocma seṗretnannena atto erroñ seṗannenapa' sapa'çho'ña çhocmach peretnerresña Sompor ñeñt pue'ntaño'tsen.

¹⁵ Tarraña ñerra'm ama çho seṗretnannenopa' Somporpa'çho'ña amach peretnerrna-soña saña so'chñar.

Atto Jesúsapa' yeḥatosanet ñeñt e'ñech po'ñoçh tore'teñets Yomporecop

¹⁶ Jesúsñapa' atet oterraneterr:

—Ñaña ñerra'm esempo semneñ sema'yocheñoñ Yompor o'ch sequeçhpa' serrar ñeñtpa' e'ñe pocte'. Tarraña ñeñtpa' ama añecpayaye attoch entas acheñenesha' ñerra'm cha sellca'huenta. Tarro'mar ñeñtpa' ommoñañenesha'ña atet petsa. Ñetpa' ñerra'm esempo queçhpunenet puerrar Yomporecop ñetpa' attach atsocloyayenet allochñapa' attoch eñotenanet acheñenesha' ñetpa' Yomporecop' atet penet. Tarraña na po'ñoçhpa' o'ch notas: Ñeñt atet ommo'chetsa puefore'teñoñ Yomporñapa' amach es apuerraneto ñeñtcha' atarr coshaterrahuet. Tarro'mar ñetpa' aña e'nenet acheñeneshach cohuentate-nahuet. Ñetpa' e'ñech alla atsa'taretterret.

¹⁷ Tarraña sa ñerra'm esempo e'ñe sema'yocheñoñ Yompor o'ch sequeçhpa' serrar sapa' atterachña sorrtena e'ñech cohuen satsamio'tyena ñaña se'pacle'chyena.

¹⁸ Allochña acheñenesha'pa' amach cha eñotaseto sapa' cho sequeçhpunen serrar ma'yochaya Yompor. Sapa' e'ñech ñapña Sompor sentene' ñeñt pue'ntañotsen. Allochñapa' Sompor ñeñt e'ñe ñapña sentene' ñachña sapuerre' ñeñtcha' ello atarr socshattere'.

Atto ñeñtcha' seshonterr ñeñt atarr sherbets arrca'ye seshonten all Yompor pue'ntañon (Lc. 12.33-34)

¹⁹ Jesúsapa' alla oterrer:

—Ñaña amach seshonta'yestatsto checmañats aña patsro ñeñtcha' atarr semorrentena. Ñeñtpa' atarr apomñpere'chña atarr aptsaña. Ama't eñetpa' o'ch be'tosamñsonasapa' o'ch yoratsre'tamñpesuas.

²⁰ Yompor pue'ntañochña seshonta'yesthesia ñeñt e'ñe po'ñoçh sherbets. Ñeñtpa' ama apomñpere'chño ñaña ama aptsaño. Allpa' ama't eñetapa' ama be'teno attoch yoratsre'tamñpesuas.

²¹ Tarro'mar ñerra'm all Yompor pue'ntañon seshonta'nen ñeñt atarr cohuen senten, yeñoteñ e'ñe ñeñta paterr senen seyoçhro ñeñtña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñta paterr senen seyoçhro ñeñtñapa' ama es sherbenoña Yomporecop.

Atto yecle'pa' añ toma'ntena ñeñt po'lampareñ pen allohuen yechets (Lc. 11.34-36)

²²⁻²³ Jesúsñapa' alla oterraneterr:

—Yecle'pa' añ toma'ntena atet ñerra'm ñeñt po'lampareñ pen ora yechets. Ñerra'm e'ñe cohuen huomech yecle'pa' e'ñech cohuen entateney puetare'. Allochñapa' attoch e'ñe cohuen torratyenana allemeñ yechets tarro'mar e'ñe cohuen a'puetarsamñpsarettenet. Tarraña yecle'ña ñerra'm ama e'ñe cohuen huomñcheyayepa' amach e'ñe cohuenaye' entateney puetare' attochña amach eshcaye' torratyenano allemeñ yechets tarro'mar cha ottena ñerra'mrrate' checmeto'tsa'yeneta. Attecma pena ñaña yeyoçher. Ñerra'm e'ñe cohuen yoctape'chyen yeyoçhro, ama aña es ye'nyeno ñeñt e'ñe yocpa, attoña chennayaña e'ñe ora allohuen Yompor poçtañña ñeñt po'cohuenña pen. Attoña ora yoctaññapa' e'ñech a'puetarsamñpsarettena Yomporeshot. Tarraña ñerra'm ama cohuenaye' yoctape'cheno yeyoçhro, ñerra'm aña ye'nyen ñeñt e'ñe yocpa ñeñtpa' amach errotenot a'puetarsamñpenyeña ñeñt yoctañña yepen. Ñeñtña yoctañña yepenpa' atarrcha' a'checmetañpenay yeyoçher.

Amach aña yema'yochratsto ñeñt e'ñe yocpa attoch yegana aton quelle; ñeñt atetpa' amach errotenot yema'yochroña ñaña Yomporecop (Lc. 16.13)

²⁴ 'Ñeñtpa' atetcha' yetma'ntacha: Ama't puesheñarroçeyapa' amach errotenot e'ñe cohuen yetaruasoña epsheño'mar yamo'mtayecop. Tarro'mar ñerra'm atet

yeḡapa' puesheñarr e'ñech cohuen yemorrenteñoť yocsheñeshocmañen yesherbeñ, po'psheñeññapa' amach e'ñeye' yemorrenteño; ċhach yottena ñerra'm ċha yetsena'teñ. Ñeñto'marña ñeñtpa' amach cohuenaye' yesherbeñe. Ñerra'm aña e'ñe sema'yoċhrena ñeñť e'ñe socpa attoch segana aton quelle, ñeñť atetpa' amach errotenoť sema'yoċhrona ñaña ñeñfecop atarr sherbets Yomporecop.

*Atto Yomporpa' ñach e'ñe cohuen cohuanġpene' ñeñť puechemeresha' pen
(Lc. 12.22-31)*

²⁵ Ñeñto'marña te'pa' o'ch noterrser: Amach aña sellcatsto ñeñť atto yocrrena arr patsro. Ama't seyoċhrapa' amach sotatsto, esuachca' yerrerrerte' tsapaonet, esuachca' yorrte'. Ñaña amach aña sellcatsto ñeñť e'ñe sechtsocpa. Amach sotatsto, esuachca' yechorraťe'. Tarro'mar Yompor ña yapuene' yo'rrerrña allo yocrrena ñeñťña atarr nanac sherbets. Ñeñto'mar yeñoteñ ña yapuene' ñaña yerrar ñeñťña ñocoppa' ama esoye' enteñe. Ñaña ña yeċhcatene' ye'chets ñeñť atarr sherbets. Ñeñto'mar yeñoteñ ña yapuene' ñaña ama't ñeñť yechorra'yena ñeñťña ñocop ama esoye' enteñe.

²⁶ Senteñte' atto correna otneshaċhno ñeñť anomċha'tyetsa entoneť. Ñetpa' ama ċhoye' nare'tatse'teneto ñaña ama ċhoye' apċha'yeneto puerrar ñeñťcha' rra'yenet. Ñetpa' ama es echenaye allcha' es añaño'tyenet. Ama't atto correnet Somporna ñeñť pue'ntaño'tsenpa' e'ñe yeċhcatyesuanet ñeñťcha' puerrar pa'yenet. Elloña sa Yomporpa' atarr morrentensa sa; ello semťtaneñ ñeñť atto atarr morrentenana otneshaċhno.

²⁷ Ñaña amach sellcatsto attoch amach serromo tarro'mar ama't sellquenañ attoch atarr atomat socra arr patsro, tarraña ama't e'ñe puesheñarroťesapa' amaťe' errotenoť so'chtatoña socreña ama't e'ñe pamtarra.

²⁸ 'Eso'mare'tcha' ña sellca'yesaña attoch sepashta. Senteñte' atet yeċhquena roreċhno ñeñť chopyets ñota allemeñ. Ñetpa' ama ċhoye' taruasa'yeneto ama't mamesha ama ċhoye' taneneto ñeñť chorra'yenet atto e'ñe cohuen orretyenet.

²⁹ Tarraña napa' o'ch notas: Ama't amċha'tareť Salomón atto e'ñe a'cohuentate't ahuat, ama't ñapa' ama chorrane'teña ñeñť atarr cohuen ñeñť atet atarr cohuentena ror.

³⁰ Ñaña ñeñť ror pue'chorpa' ñeñťara ta'te' ñeñť chopyets allemeñ ñeñť sentyen te' tarraña ñeñťpa' mamecpa. Ama't cohuen chopyleneñ te'pa' tsapaonetña'pa' o'ch etomanġperetpa' e'ñech colla'huerrapa' o'huañcha' cohuenta. Ñehua, Yompor atto cohuentatyenan ama't ñeñť e'ñe mamecpa, elloña sapa' atarr chorratyensañ saña; sañapa' eso'marťe'ña amaña e'ñeye' seyemteño.

³¹ Ñeñto'marña notenes: Amach atarr sellca'yesatsto. Amach sotatsto: "Esuachca'ye yerra'te'. Esuachca'ye yorrte'." Amach sotatsto: "Esuachca'ye yechorraťe'."

³² Tarro'mar allohuen acheñenesha' arr patsro ñeñť ama ame'ña'yetso, ñetpa' ñeñťña e'ñe paterr e'nenet. Ñehua, Somporna ñeñť pue'ntaño'tsen ñapa' e'ñe entuenes ñeñť allpon pa'namen sepallta'yena arr patsro.

³³ Sapa' añaña e'ñe ñanom sema'yoċhrena Yomporecop attoch atarr ayochreshattena ña. Ñaña añaña ña sema'yoċhrena ñeñť e'ñe pocte' enten ña, allochña'pa' ñachña sapa'yene' ñeñť allpon sepallta'yena saña.

³⁴ Amach e'ñe tayecma sellca'yesatsto ñeñťcha' setantyesoya tsapaonet. Tarro'mar ama't e'ñe tayoteña'pa' ċhocma eñall ñeñť allcatañetyetsa ama't e'ñe pate'tets yet.

7

*E'ñe attotapa' amach yotteñe'channa'tatsto
(Lc. 6.37-38, 41-42)*

¹ Jesúsapa' atet oterraneterr:

—Sapa' e'ñe attotapa' amach sottene'chatsche po'psheñeñ allochñapa' amach otteñe'cherreso samña Yompor.

² Tarro'mar ñerra'm atet sottene'chyeñ po'potantañ, Yomporpa'cho'ña e'ñech attecma otteñe'cherres samña. Ñerra'm errponochcha' sottene'chyeñ po'potantaña' sapa'cho'ña e'ñech allponoch otteñe'cherres samña Yompor.

³⁻⁵ Amach atet sentatsche po'potantañ ñerra'm ñetpa' ama cohuenaye' es peneto, ama't sapa' ama sentenoña ñeñt atet sepa'yena sa ñeñtpa' ello semtaneña po'potantañ ñeñt atet es pa'yenet ñet. Ñerra'm ama cohuenaye' es sepeno samña' amach sotatscheña po'potantañ: “Napa' o'ch noctape' chatuerres e'ñe cohuen.” Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr ñeñt ama cohuenaye' sepeno sa, allochñapa' attoch seño'ch cotape'chate' samo'ts e'ñe cohuen. Ñeñtpa' añ toma'ntena o'ch sentoñ po'psheñeñ pa'clloyo'tsen puepachña ama't sa seclloyopa' allo'tsen tsach; ñeñtñapa' ama senteñe. Ñerra'm atetpa' amach errotenot socheña po'psheñeñ napa' o'ch nechterrnañ pecloyot pepachña tarro'mar añ tsach ñeñt seclloyo'tsenpa' cha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyot allochñapa' attoch e'ñe cohuen es sentyen. Attochña e'ñe cohuen sechterrñañ po'psheñeñ puepachña pa'clloyot.

⁶ Jesús'pa' atet oterraneterr po'poñ:

—Ñeñt ama quechpuenaye pachmāreñ ñaña patpareñ amach alla seserpare'taterranete'te Parets po'cohuenña. Tarro'mar ñetpa' atta penet ñerra'mrate' ochec. Ñehua, ochec ñerra'm esempo ama'tcha' atarr cohuen ya'ppa' ya'nach rrema'pes chach achota'teypa' o'ch shetsay. Ñaña ama't atet ñerra'm chañcho ñerra'm esempo es yena' ñesho ama'tcha' atarr cohuen yenten ya, yeser, chañchoñapa' attach atmama'tamñsey tarro'mar chañchopa' ama esoye' entenano ama't ñeñt atarr cohuen.

Chocmach es yenamueñ Yompor ñaña chocmach ye'neñ

(Lc. 11.9-13; 6.31)

⁷ Jesús'pa' alla ye'chaterraneterr po'poñ, ñeñtpa' atet oterraneterr:

—E'ñe senamueño't, Yomporñapa' apascha'. Se'name'teño'tpa' señchcha'; se'chore'teño't, Yomporñapa' e'ñe pue'mñoteño'tespa' e'ñech cohuen toramñsapas.

⁸ Tarro'mar ñeñt es enamare'tetspa' ñetña es aguë'tset; ñaña ñeñt es e'name'tets ñetñapa' chocmach eñchet ñaña erra'tsen ñeñt chore'tyene' ñetñapa' e'ñe e'mñotenanet Yompor.

⁹⁻¹¹ 'Yompor ñeñt pue'ntaño'tsen chocmach e'ñe cohuenare' es apa'yeney ñerra'm esempo es yenamueñ. Ñapa' amach añ apuene ñeñt ama cohuenaye' yenteno ya. Ama't sa ñeñtes arromñates atet sepeñ samña sechemer, e'ñech cohuen es sapueñ ñerra'm esempo es enamuenes. Atet ñerra'm allempo pa'chporrño't es enamuenes, o'ch enamas mam* ñeñtcha' rra', sapa' ama't puesheñarro'tesapa' amach añ sapueñeña sechemer mapue' ñeñt ama arrapahuoyaye. Amapa' ñerra'm cac enamuenes sañapa' ama't puesheñarro'tesapa' amach añ sapueñeña sechemer sheche'p ñeñt atarr amue-rochtatañ. Ñeñto'marña sa ama't arromñates ama't ñaña atsrre'mñates sapa' e'ñe seño'teñ apa'yese' sechemerasha' e'ñe cohuenare'. Añña ñeñt Seyomporer sepen samña ñeñt pue'ntaño'tsen elloña ñapa' e'ñe eñoteñ atto e'ñe cohuenare' es apa'yenes samña ñeñtes es enamueñe'.

¹² 'Ñeñto'marña atet notenes: Ñerra'm erra'tsente' e'ñe cohuen senten ñeñt semnen sa ñeñtcha' atet ponas po'psheñeñ, sapa'cho'ña e'ñech attecma sepanet samña. Tarro'mar ñeñtpa' atet otene' Yompor po'ñoñ ñeñt ahuatoteñ, ama't Moisés po'ñoñ ñeñt atet anaret ama't ñaña ñeñt a'mta'yese't Yompor po'ñoñpa' e'ñe attecma otyesete't.

* **7:9-11** Ñehua, Jesús añ toma'ntatanet pan ñeñt puerrar penet all pa'nyo.

Atto Jesúsapa' toma'ntaterraneterr ñerra'mrrate' yetarrotollo yebe'ten esheccha' yeçhap Yomporesho

(Lc. 13.24)

¹³ Jesúsñapa' atet toma'ntaterraneterr; ñeñtpa' atet otanet:

—Sebe'tos yetarro añetoll tarro'mar ñeñt atarr yetarr; atarr toñ ñeñtpa' alla sen chenca'puetso. Shonte' acheñenesha'pa' e'ñe alla be'toscha'tyenet.

¹⁴ Ñeñña añetoll yetarr; añetoll toñ ñeññapa' arr sen corra'puetso allña sapa' corret-sasach. E'ñe puesheña'ttsa entene'ña ñeñt toñer.

Ñeñtpa' añ toma'ntena attoch yocter Cristo, çoch yesuanemña ñeñt ama cohuenaye' entapretenye.

Allohuen acheñ ñeñt e'ñe po'ñoçh cohuen acheñer; ñetñapa' añcha' orrtatyenet ñeñt e'ñe cohuenare'

(Lc. 6.43-44)

¹⁵ Jesúsñapa' atet oterraneterr:

—Sapa' señota'tach tarro'mar huaponasach ñeñtcha' aycha'natatsa ñetpa' a'mñteneto' Yompor po'ñoñ. Ñetpa' puehquëñoçetpa' ottenetañ atet ñerra'm atarr cohuen acheñret e'ñech attetañ ñerra'mrrate' carrnero ñeñt ama erroçt a'pañeyaye ama't mamesha. Tarraña ñetpa' atta shequënet tarro'mar e'ñe po'ñoçh ñetpa' e'ñe attet ñerra'mrrate' ma'yarr ñeñt añach e'nyen ñeñt e'ñe ñocpa. Attoçha'ña e'ñe a'chencatuerran acheñenesha'.

¹⁶⁻²⁰ Tarraña sapa' attotcha'ña e'ñe sechme'tyesanet. Tarro'mar allohuen acheñenesha' ñeñt e'ñe po'ñoçh cohuen acheñenesha', ñetpa' añcha'ña orrtatyenet ñeñt e'ñe cohuenare'. Tarraña po'potantañ acheñenesha' ñeñt po'ñoçh ama cohuenayaye, ñetñapa' añach orrtatyenet ñeñt ama cohuenayaye. Ñeñtpa' atetcha' netma'ntacha. Ora allohuen ñeñt e'ñe cohuenare' narmetsocheçhno'pue'merpa'cho'ña e'ñech cohuenare'. Ama't parrochapa' amach me'toña ñeñt ama cohuenayaye. Añña po'pchañeçhno narmetsocheçhno ñeñt ama cohuenayaye, pue'merpa'cho'ña amach cohuenayaye. Ñeñtpa'cho'ña ama't parrochapa' amach me'tenoña e'ñe cohuen. Ñaña yapa' e'ñe yeñoteñ ama't erroçtenapa' ama arroteye' yetoquënoña llo'm ajchoç. Ñaña ama't erroçtenapa' ama arroteye' yetoquënoña ap rrenagachot.† Ñeñto'marña attoña yeñoteñ erra'tsente' ñeñt e'ñe cohuenare' narmetsoch, ñaña ñeñt ama cohuenayaye; pue'merotaña yechme'teñ. Ñaña allohuen narmetsocheçhno ñeñt ama cohuenaye' me'tyetsopa' a'mata'tueretcha' saprrotueretcha' tso.

Atto amach allohuenacmaye' çhapueto all añcha'tareçttena Yompor pue'ntaño

(Lc. 13.25-27)

²¹ Jesúsñapa' atet oterraneterr:

—Ñeñt notyenayeñ: “Papa' po'ñoçh na'yochreshater nepeneç”, tarraña amach allohuenacmaye' çhapueto all añcha'tareçttena Nomporets ñeñt pue'ntaño'tsen. Añach çhapyerrets all ñeñt e'ñe po'ñoçh atet pene' ñeñt atet muenen Nomporets ñeñt pue'ntaño'tsen.

²² Allempopa' shonte'ch acheñenesha' ñeñtcha' notyerrayeñ: “Po'ñoçh Ayochreshate e'ñe peso'chñopa' çhocmaca'ye ya'mtonape'tña peñoñ. Ñaña yeçhore'teñoçep peso'chñopa' çhocmaca'ye yequeçhpatache'tña shonte' oneñeçhno. Ñaña yeçhore'teñoç peso'chñopa' epaye'ca'ye yorrtatyese'tña partsoteñets.”

²³ Naña allempopa' na'meta'huerranetcha', notyerranetcha': “Ama't ahuatapa' amantearso, ama neyochreshayayso. Te'pa' orrerres, sapa' añ setsoten ñeñt ama cohuenaye' nenteno.”

† 7:16-20 Ñehua, Jesús añ toma'ntatanet uva ñaña higo ñeñt puenareñ penet all pa'nyo.

Atto Jesús toma'ntatana acheñ ñeñ e'ñe eñotene' ñeñ po'ñoçh sherbets ñaña ñeñ ama eñotenaye ñeñ sherbets

(Lc. 6.47-49; Mr. 1.22)

²⁴ Jesúsña'pa' atet oterraneterr:

—Allohuen ñerra'm erra'tsencha' e'mñotene' neñoñ ñeñ atet e'ñe cohuen neyçhatenanet, ñerra'm ñetña e'ñech atet penet, ñetña'pa' e'ñech eñoteñet ñeñ e'ñe po'ñoçh sherbets. Ñeñ acheñer ñeñ atet petsapa' ñapa' e'ñe atet ñerra'mrrate' puesheñarr yacma ñeñ atarr es eñotets. Ñaña'pa' tomatan pa'paquëll, e'ñe echarr pe'.

²⁵ E'ñe tomatue'pa' huata huomenc, apellchena oñ, orrnota, pocollña'pa' orrnotam̃psa. Ama a'matam̃pse tarro'mar quellpachpa' e'ñe echarr atomataret.

²⁶ Tarraña po'potantaña ñeñ e'mñotene' neñoñ ñetña ñerra'm amach atteye' peneto ñeñ notenanet, ñetña'pa' e'ñech atteta ñerra'mrrate' puesheñarr yacma ñeñ ama es eñoteno. Ñapa'cho'ña tomataneñcha'ña pa'paquëll, tarraña amach echarroye' pe.

²⁷ E'ñe tomatue'pa' huata huomenc, apellchena oñ, orrnota, pocollña'pa' orrnotam̃psatsapa' chepa'tcha' mata'nerretspa' e'ñe muellotsetuerra.

²⁸ Allempo serrpare'tatuanet Jesús, acheñenesha'ña'pa' epaye' cohuanrrorteñet ñeñ atet yeçhatenanet ña.

²⁹ Tarro'mar ñapa' atarr cohuen yeçhatenanet ñerra'mrrate' ñeñ allsensarettetsa Partsesho'. Judionesha' pa'mcha'tareternesha' ñeñ atarr etsotayenayeñ ñoñets ñeñ atet anaret, ñetña'pa' ama e'ñeye' atteye' yeçhateneto.

8

Atto Jesús a'crraterran puesheñarr yacma ñeñ aptsarñã

(Mr. 1.40-45; Lc. 5.12-16)

¹ Allempoña err Jesús aspentotpa' cota'huanererr acheñenesha' nanac shonte'.

² Allña'pa' huapoña puesheñarr ñeñ osen puetsarñats ñeñ otenet lepra. Chap Jesúseshopa' allenta concorposana Jesús'pa' atet otos:

—Ayochreshate ñerra'm ãa muenats ãapa' ñeñteþ atarr ahuanencateshaþ ãa'crrataye'cherren allochña'pa' attoch e'ñe cohuen entuerren acheñenesha'.

³ Jesúsña anretapa' allenta a'þlle', atet och:

—Napa' nemneñca'ye, metuerrepa'ña peptsarña allochña'pa' attoch e'ñe cohuen entuerreþ allohuen acheñenesha'.

Yacmaña'pa' allorocmuepa'tcha' metuerña pueptsarña'pa' cha cohuenterrtsa.

⁴ Jesúsña'pa' alla otererr:

—Te' atto o' na'crraterreþpa' po'ñoçh ama't e'ñe puesheñarrapa' amach þotaþsa'tatsche ama't mamesha. Corneshachña pegatena' all peptsarse't. Atet nane't Moisés ñoñets añ acheñrecop ñeñtcha' a'crrataretterrtsapa' te'ña'pa' o'ch es þanom ñeñtcha' þapos all ñeñ Yomporecop allochña'pa' attoch e'ñe cohuen enterreþ allohuen acheñenesha'.

Atto Jesús a'crraterran puesheñarr capitán pueñañra; ñeñpa' romo'marnesha'

(Lc. 7.1-10)

⁵ Allempoña çherr Jesús Capernaumopa' allña'pa' huapoña puesheñarr solltar po'cap'taner, ñeñtña'pa' romo'marnesha' ama judioneshayaye. Ñaña'pa' atarr otare'tosan Jesús,

⁶ ñeñtña'pa' atet otos:

—Nompocha' nepacllopa' atarr pa'nattenapa neñañra. Alla þanena po'mayo nanac mueroçhtena cha echarrtena.

⁷ Jesúsña'pa' atet och:

—Ama'tpa' napa' o'ch ahuen o'ch na'crratera'.

⁸ Capitánña puepatare'teñoþpa' atet och:

—Na Nompurcha'pa' ama cohuenayayno attoch pebe'tosapo'tañpesna nepacлло. Arrotach pot: "Ama'tpa' correrrepa' peñañra", neñañrañapa' acrrerroche'ch.

⁹ Tarro'mar napa' ñeñten ñeñt atet petsa ñeñt atet otenen ñeñt neyechenaya na. Napa'cho'ña eñall ñeñt neyechena namã ñeñt nesolltarer nepen. Ñerra'm puesheñarr solltar noteñ: "Papa' o'ch ahuep̄ a'yo", ñañaapa' o'chcho' ahuo'. Ñaña po'psheñeñ solltar ñerra'm noch: "Papa' apon arr", ñañaapa' o'chcho' huapa. Ñaña po'psheñeñ na'taruasañer ñerra'm noch: "Papa' arrcha' petaruasa'muen", ñapa' allcha'cho' taruasa'muen. Ñeñto'marña napa' neñotenep̄ ñerra'm erroten potenpa' e'ñechca'ye atet pena.

¹⁰ Allempo e'man Jesús ñeñt atet oten capitán, ñañaapa' atet otan allohuen acheñenesha' ñeñt cota'nene':

—Ñapa' atarrca'ye yemtenna, ama't ñapa' amaca'ye judioneshayaye. Napa' po'ñoçh o'ch notas: Ama't ahuatapa' ama nentareña acheñ ñeñt e'ñe atet neyemtenaya, ama't allohuen israelena'tarnesha'pa' ama't puesheñarra ama nentareña ñeñt atet atarr neyemtenaya.

¹¹ Ñeñto'marña te'pa' o'ch notas: Shonte'ch acheñenesha' ñeñt ama judioneshayaye ñeñtcha'ña e'ñe neyemterraya. Allochñapa' esempohuañenpa' ñetñapa' allemateñcha' e'ñe huacha'tuerret ñeñtcha' anorrcha'tyesuerrets all e'ñe Yomporesho all añcha'tareñtena ña pue'ntaño. Allcha'ña rrallme'chapreteret yatañnesha'çhno Abraham, ñaña Isaac ñaña Jacob.

¹² Shonteñña judionesha' ñetcha'ña çhapatsetañ all añcha'tareñtena Yompor, tarraña ñetñapa' amach çhapueto all tarro'mar ñetpa' ama naye' yemteneto. Ñetñapa' allach ahupore'tareñterret a'yoç checmeto. Allñapa' allcha' yahuanrrorterret, panmueñoçet atserrpa' rraso'tyesosetcha'pa's.

¹³ Allempoña Jesúsapa' alla oterranerr capitán:

—Te'pa' o'ch ahuerreç pepacлло, e'ñe atto atarr peyemtennapa' attetepa'ch pocop. Pueñañrañapa' e'ñe allempocma correrra.

Allempo a'crratosan Jesús Simón Pedro pa'so'mue

(Mr. 1.29-31; Lc. 4.38-39)

¹⁴ Allostñapa' çhap Jesús Pedro pa'pacлло. Allñapa' entosñañ pa'so'mue alla panena po'mayo çha atsna'ten, çha hueraten.

¹⁵ Jesúsñapa' allenta a'p̄llosñañ potpa' çha metuerretsña po'urateña. Allenta tantapa' o' yema'tallme'chaça.

Allempo Jesúsapa' a'crraterran shonte' pa'namen atsnañeçhno

(Mr. 1.32-34; Lc. 4.40-41)

¹⁶ Ñeñte yetrocma allempo ellerrenpa' huacha'tateññañeterr shonte' ñeñt chorra'yena oneñeç. Jesúsñapa' e'ñe po'ñoñoça queçpatuerranet oneñeç ñeñt chorra'yenahuet. Ñaña allohuen ñeñt atsna'tyetspa' o' a'crratyasapanet.

¹⁷ Ñeñtpa' tarro'mar atet pa' allochñapa' attoch etsota Isaías po'ñoñ ñeñt a'mtayeç Yompor po'ñoñ; ñapa' atet ote'ç: "Ñapa' ñach yahuanmanperre' ñeñt yemueroçhtatyene', ñapa' ñach ahuanerre' allohuen ñeñt ya'tserrpa'yene'."

Allempo Jesúsapa' yeçhatan ñeñt muenene' o'ch coter

(Lc. 9.57-62)

¹⁸ Po'pocheño allempo Jesúsapa' entapuenanerr shonte' acheñenesha' çha emchorra'hueñerr, ñañaapa' atet otan pueyochresha':

—Te'pa' o'ch ahuañp̄sey yomta'n.

¹⁹ Allñapa' huapoña puesheñarr ñeñt atarr etsotene' ñoñets ñeñt atet anareç. Ñañaapa' atet otos:

—Na te'pa' Maestrocha' nemneñ o'ch noctare'tyeseṣ ama't errohuanencha' pe-
chopeñe'chyes.

²⁰ Jesúsñapa' atet och:

—Te'pa' napa' peñotenchá' ama't nepacllapa' ama necheñe allcha' neyçhenañ.
Ro'quëṣpa' çhocma eñall pa'pon allecma yeçhena.* Oteçhnopa'çho'ña çhocma eñall
pa'ma' allecma yeçha'yenet. Tarraña naña Ñeñten Acheñetosetspa' ama eñalle ñeñ e'ñe
nepaquëll nepen allcha' neṣanena.

²¹ Po'pocheño Jesúsapa' atet otenanerr po'psheñeñ pueyochresha':

—Te'pa' o'ch ṣocta'n attoch e'ñe po'ñoçh neyochresha' neperreṣ.

Tarraña ñeñña acheñerpa' atet otan Jesús:

—Te'pa' arrcha'ña ñanom pemnaterren o'ch ahuerren apuesho o'chña
nepampa'huera' apañpa' allempochña nohuerrapa' o'ch noctaṣ.

²² Tarraña Jesúsapa' atet otererr:

—Acheñeneshá' ñeñ ama yerpa'penaye Yompor, ñetñapa' pampanna'tetepa' parro
arromñaatecmuet. Tarraña ṣocoppa' ñeñteṣ o' peyerpuera Yompor añ poctetsa o'ch
ṣocta'n attoch po'ñoçh e'ñe neyochresha' neperreṣ.

*Allempo a'mchecherran Jesús huomenquësha' ñaña sa'p ñeñ emo'yarertetsa
(Mr. 4.35-41; Lc. 8.22-25)*

²³ Allempoña Jesúsapa' a'tapos noñto pueyochresha'ñapa' co'ta'huanmet, ahuañṣset
roçha'sonet atarr sa'po.

²⁴ Allñapa' machayotepa'tcha' huomenquëshatañpesnomuet. Emo'yare'ña çha
esha'tena noñto, atteña oññapa' chorramoch noñto. Jesúsñapa' çha muen.

²⁵ Atteña pueyochresha'ñapa' ponemñyet Jesús all muenpa' opueret atet ochet:

—¡Pa'quesṣpataye'chey Ayochreshate po'ñoçhuachca'ye yoclla'huerrate'!

²⁶ Ñañaapa' atet otanet:

—Eso'mare'tña nanac seyoren. Sapa' ama e'ñeye' seyemtenno.

Jesúsña tanterrapa' e'ñe po'ñoño'ta a'mtsoññetueran huomenquësha' ama't ñaña
emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen mueçhettañperret.

²⁷ Atta cohuanrrorteñet ñetñapa' atet otanna'tyeset:

—Ta'mca'ye, añ acheñerpa' esona'tarte'ca'ye. Atarrepá't es a'mchechaten, ama't
po'ñoño'tapa' a'mchechaterran huomenquësha' ama't ñaña emo'yare' oñ.

*Atto gadaro'marnesha' ñeñ chorrena oneñet ñetñapa' huapuet Jesúsesho
(Mr. 5.1-20; Lc. 8.26-39)*

²⁸ Allempoñapa' o' etsotaset yom'ta'n all sechenet. Allpa' añ pa'ney pene'
gadaro'marnesha'. Allñapa' huapoña ñaña epsheña acheñ tarraña ñetpa' añ
chorrenahuet oneñet. Ñeñpa' arro't huenet allecma pampa'yeñet arromñaateçhno.
Allenetñapa' ama eseshaye' setso tarro'mar ñeñ chorra'yena oneñet ñetpa' atarr
añcha'noçhetyenet allenet.

²⁹ Allempoñapa' rranare'tapet Jesús, atet ochet:

—Eso'maruachca'ye, Parets Puechemerecha' pa'tsrre'moçhtana'tosey. Papa' añecop'te'
pehuena o'ch peçoñchaterrey ama't ama çhena' allempoch ya'coñchatare'terra.

³⁰ Ñehua, allpa' a'yente'tsa'yen shonte' chañchoçhno all rratse'tyen.

³¹ Ñeñto'marña oneñeteçhnopa' atet otare'tapet Jesús:

—Ñerra'm çoch pequeçhpatosey acheñpa' arrña pemñaye'chosey chañchesho al-
lochñapa' o'ch yehorra'yererr ñaña chañchoçhno.

³² Jesúsñapa' allenta otanet:

—Ama'tca'yepa' orrasca'ye.

* 8:20 Ñehua, Jesús añ toma'ntacha zorra ñeñ berrotets all pa'nyo.

Allempoña oneñeñechnopa' quechpa'neret acheñpa' o' chorrereterr ñaña chañchočno. Chañchoña allempo chorrosya oneñeñechnopa' chepa'tcha' matrra'tua allohuen ñegoneñ, shorcha'tuos allotpa' e'ñe ño'shrra'tuosa oño.

³³ Acheñenesha'ña ñeññ cohuam̃pene' chañcho, ñetñapa' allenta matrra'tet ñamet po'yorñoñ, ahuanmuet anetso. Allñapa' serrpare'tyesoset ora atet o' perra ñeññ chorra'yese't oneñeñ.

³⁴ Allentepa'tcha' ahuanmaña allohuen anetso'marnesha' ahuo'ch enteñeta' Jesús. Ñetña entoset Jesúsapa' atet otoset:

—Te'pa' o'ch ahuerreṽ arroñ, yenyot.

9

Atto Jesúsapa' a'crraterran ñaña ñeññ echarraña
(Mr. 2.1-12; Lc. 5.17-26)

¹ Allotña Jesúsapa' a'terr noñtopa' pechaterra, cherr anetso all a'puena.

² Allñapa' huapatam̃psoñet echarraña, puechecnape'na. Jesúsñapa' eñotapanet ñetpa' atarr nanac yemteñet. Allempoña ñapa' otapan echarraña:

—Chochña neyochre p̃ocsherra tarro'mar te' ñeññ p̃o'chñarpa' aṽretna'huare'tterra.

³ Puesheña'tetsña ñeññ etsotayenayeñ ñoñets ñeññ atet anaret ñetñapa' atta otatse'tyeset pueyo'chreto e'ñe ñagattseta, ñeññpa' atet otet: “Añ acheñerpa' cha achmenan Yompor.”

⁴ Jesúsñapa' o' eñotanet ñeññ atet otyenet ñocop, ñañaapa' atet otanet:

—Sapa' eso'mare'tcha'ña atet soctape'chatse'tyesña seyo'chro.

⁵ Sapa' chate' soten ñeññ atet o' notue echarraña po'chñar o' aṽretna'huare'tta ñeññpa' ama torrapahuoyaye. Sapa' añña atarr torrapo' senten attoch na'crrater choncha'ña ote': “Petantena pechope'chnen.”

⁶ Ñehua, napa' o'ch neñotatas na Ñeññen Acheñetosets, napa' ñeññen apareten llesens attoch nach peretnerre' ochñarets añe patsro.

Ñeñño'marña Jesúsapa' atet otteranerr echarraña:

—Te'pa' o'ch petantena, pechta'nen pemue'pa' pechope'chnen, ahuenep̃ pepaclo.

⁷ E'ñe otue' atetpa' echarrañañapa' cha tantetsa allorocma, ahuer pa'paclo.

⁸ Acheñenesha'ña all ñeññ entene' ñetñapa' cha yorenet, elloñapa' alla cohuentaterrñañet Yompor. Atet otyenet:

—Yomporca'yena o' llesenserran ñeññ ama't e'ñe acheña.

Allempo Jesúsapa' hua'ña'nman Mateo attoch pueyochresha' per
(Mr. 2.13-17; Lc. 5.27-32)

⁹ Jesúsña meterrerr allotpa' entnoman puesheñarr acheñ ñeñññapa' añ pa'so'cheñ Mateo. * All anen allecma cobra'yenan acheñenesha' quelle ñeññ gobiernocop. Jesúsñapa' atet otosan Mateo:

—Te'pa' o'ch p̃octa'n attoch neyochresha' neperreṽ.

Mateoñapa' cha tantnomtsapa' allenta cotan Jesús.

¹⁰ Allempoña chap ñaña allempoch rrallme'chen Jesús pocollo. Allñapa' hua'cha'ta po'potantañ shonte' ñeññ po'taruas pene' o'ch cobra'yenet acheñenesha' quelle ñeññ gobiernocop. Ñeññpa' atarr ashcañnesha' entyeñ allohuen acheñenesha'. Ñaña epuet po'potantañ ochñañenesha'čno ñetñapa' all anorrcha'tyesoset all anen Jesús epuet pueyochresha'čno.

¹¹ Añña fariseonesha' ñeññ allo'tsa'yen ñetña allempo atet eñchetpa' allenta otoñet pueyochresha':

* 9:9 Mateopa' ñeññara ñeññ sochenet Leví.

—Eso'mare'tña ñeñt semaestror sepenpa' rrallme'chapretenanña añ acheñeneshar ñeñt pueshquëño'te'na cobra'yene' acheñenesha' ñaña epuet acheñenesha' ñeñt atarr ochña'atenesha'chno.

¹² Atto e'manet Jesús, ñaña'apa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt at-sna'tetspa' ñetña'apa' chocma e'nenet ñeñt'cha' a'crraterrahuet.

¹³ Napa' ama añecpaye' nohuapo attoch nechore'tos ñeñt e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch nechore'tos ñeñt atarr ochña' entyetsa. Allochña'apa' attoch o'ch cotape'cherret ello e'ñe cohuen Yomporecop. Socoppa' añ poctetsa ñerra'm o'ch ahuerrespa' señotuerrepa'chña ñeñt atet ye'chateney añ Yompor po'ñoñ ñeñt atet anaret ahuatoteñ. Ñeñt'pa' atet oteney Yompor: “Napa' ama e'ñe añña cohuen nenteno o'ch sapuenen sayara ñeñt semtsen nocop. Añe'ñaña atarr cohuen nenten o'ch semuereña allohuen samo'tsesha'.”

Allempo Jesús'pa' eñotatanet atet'cha' tore'tet Yomporecop ñeñt po'ño'ch sherbets (Mr. 2.18-22; Lc. 5.33-39)

¹⁴ Allempoña'apa' ñeñt pueyochresha' pen Juan ñeñt apataye't acheñenesha' ñetña hua'cha'toñet Jesús'apa' atet otoset:

—Yapa' tore'tetsay Yomporecop ñaña fariseonesha'pa'cho'ña tore'tetset. Paña'apa' ¿eso'mare'tña ama tore'tenoña peyochresha'?'†

¹⁵ Jesús'ña'apa' alla toma'ntatanet, atet otanet:

—Ñeñt ahua'ñare'echno all rrallme'chapreteñet ñeñt errte' sena'tetsa, ama pocteyaye o'ch yotamet amach es serra'yesatsto. Amach yellcatatstaneto tarro'mar atet coshapreteñet ñeñt sena'tetsa. Tarraña ñerra'm esempo machayota sa'nerranet ñeñt sena'tetsa, ñeñtña parro yemuetyena allempoña ñetpa' e'ñe puellquëño'tet que'chpa'huerret'cha' puerrar, amach arrenaye' enterreto. Ñeñt'pa' attochña tore'terret allempo Yomporecop e'ñe po'ño'ch. Arrpa' allohua huañ ñeñt atet Jesús toma'ntata ña sena'tostsa.

¹⁶ Elloña'apa' alla toma'ntaterraneterr ñeñt atet ye'chen judionesha' arr patsro, ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet ye'patse'chpa' ñeñt'pa' e'ñech orrena yellteñ tarro'mar ñeñt emarr lletamuetspa' ñerra'm esempo yatsama'tañpespa' chach chellama'ta chach martse'tatanña shetamtoshe'm. Ñeñtña yelltenpa' allo'nach sen rrarrtse'tats nanac.

¹⁷ Jesús'ña'apa' alla toma'ntaterraneterr po'poñ ñeñt atet ye'chen judionesha' o'ch ye'chcatenet pa'rrom orrot. Ñeñto'marña atet otanet:

—Ama't puesheñarro'teyapa' amach yeshatstoña vinos emasa mellasha'mañ orroto ñeñt aye'chcataret pa'rrom. Tarro'mar ñerra'm atet ye'pe'pa' o'ch chasa'ña vinospa' chach a'ptsan orrot, vinosña'apa' e'ñech shebhua, ñeñtña orrotpa' ama't mameshapa' amach es sherberro. Añña ñerra'm emasa vinos, arrcha'ña yeshe' emerra orroto ñeñt aye'chcataret pa'rrom. Allochña'apa' ama't'cha' chasa' vinospa' amach cha potsa'psoña vinos, ñeñt'pa' allach ye'chen epo'mar.

Ñeñt'pa' attoña Jesús'apa' eñotatanet ña poctapña e'ñe etserra.

Atto Jesús'pa' tantaterran Jairo po'señ ñaña all a'crratnoman puesheñarr coyanesha' ñeñt a'plla'nmue' pa'shtam (Mr. 5.21-43; Lc. 8.40-56)

¹⁸ Allempo atet eñorena Jesús'apa' huapa ñaña puesheñarr ñeñt añcha'tare'ttetsa judioneshacop, concorposña'apa' atet otos:

† **9:14** Añ tore'teñetspa' añecop o'ch yetorra Yomporecop. Amach añecpaye atomat, ñeñt'pa' añecpa mameshacop o'ch ye'que'chpa' yerrar.

—Nesñeñpa' e'ñe errte' rromuets. Tarraña ama't o' rromañpa' te'pa' o'ch p̄oçterren, ama't attapa' o'ch pa' p̄lleña' p̄otoç attoch o'ch alla correrra.

¹⁹ E'ñe otue'pa' allempoñapa' allenta co'ta'ner Jesús epuet pueyochresha'.

²⁰ Allña'pa' co'ta'nmanet ñaña puesheñarr coyanesha' ñeñt̄ atsna'tets. Charra' puechena epa char ñeñt̄ atto çhocma yella'yena. Ñaña'pa' allenta co'ta'nenan Jesús chenta' pa'che'ñoñ, allña'pa' a'p̄llerrñaña' pa'shtam pa'rrpe'mot.

²¹ Tarro'mar, ñapa' atet̄ oten pueyoçhro: "Ama't pa'shtama na'p̄lloñpa' ñeñtach na'crraterre'."

²² Allempo atto a'p̄lla'huoñ pa'shtampa' Jesúsña allenta puetallerra pa'che'ñone'pa' entan coyanesha', ñeñt̄pa' atet̄ och:

—Choña nesñeshacha' p̄oçsherra tarro'mar atto atarr peyemtenna na, attoña te'pa' o' e'ñe na'crratnomuep̄.

Coyanesha'ñapa' allorocma correrra.

²³ Jesúsña allempo çhap añcha'taret̄ pa'paclo allña'pa' entosan ñeñt̄ pen-clla'tam̄pesyene' arromñañ llequẽntsoreçho, entosan ñaña shonte' acheñenesha' all puellquẽñoçet atarr ano'tatse'tyenet.

²⁴ Jesúsña'pa' atet̄ otosan acheñenesha':

—Sahuanerra arroç, añ shopshesha'pa' amaca'ye çchoye' rromueno, çhaca'ye muen.

Ñetña'pa' pachm̄are'teñoçetpa' at̄ta che'tatsetyesapet tarro'mar ñetpa' e'ñeca'ye eñoçet̄et çhoca'ye rromuen.

²⁵ Allempoña çha'nmaçha'tatuosan ñeñt̄ shontetsa all, ñaña'pa' be'tosos o'pono. Allempoña Jesús'pa' rromota'tosan shopsheshañ potot̄ ñaña'pa' çhepa'tcha' tanterrtsa.

²⁶ Allempoñapa' e'mare'tuet erraḗaren anetso'mar Jesús'pa' o' tantaterran arromñañ.

Atto Jesús'pa' a'crraterran epsheña aporo'yet̄

²⁷ Ahuerrerr Jesús allotpa' co'ta'neñ ñaña epsheña aporo'yet̄. Rranare'tneñet chenta' atet̄ otneñet:

—Pemueraye'cherrya ñeñt̄eḗ Davidna'tare.

²⁸ Chap Jesús pocollopa' all be'tosos allña rromuera'ña ñaña aporo'yet̄. Jesús'pa' a'p̄to'tapanet:

—¿Seyemtenna'te' napa' ahuanencaten attotcha' necuaterres?

Ñetña'pa' atet̄ otoset:

—Yeyemtenḗaca'ye, Ayochreshate.

²⁹ Allempoñapa' allenta a'p̄llacle'chanetpa' atet̄ otanet:

—Atto atarr seyemtennapa' attetepa'ch socop.

³⁰ Allempocma e'ñe cohuen cohuerret. Jesús'pa' atet̄ otanet:

—Po'ñoçh te'pa' o'ch notas: Amach esesha' sotaḗsa'tatsto, ama't e'ñe puesheñarra.

³¹ Elloña ñetña'pa' ahuanmuet a'metare'tyeset Jesús. Erraḗaren allampaño'mar e'mare'tuet Jesús atet̄ pena.

Atto Jesús'pa' a'crraterran ñaña ñeñt̄ opanatets

³² Allempo ahuen epsheña aporo'yet̄ allña Jesúseshopa' huapaterrñañeterr ñaña opan ñeñt̄ chorrena oneñet̄.

³³ Jesús'pa' allenta queçhpatan oneñet̄ ñeñt̄ atto opanatateñ, opanña'pa' allenta eñorerra. Acheñenesha'ñapa' cohuanrrorteñetpa' atet̄ otyenet:

—Israelnesha'pa' ama't ahua'tapa' ama puentarano ñeñt̄ atet̄ pena te' Jesús.

³⁴ Fariseonesha'ñapa' puesasare'teñoçetpa' atet̄ otyeset:

—Oneñet̄te' pompor ahuanencat̄ pene' attot̄ queçhpatenan oneñet̄eçhno acheñenesha'.

Atto Jesús'pa' atarr muerenana allohuen acheñenesha'

³⁵ Alloitña'p' asuahuanom Jesús allohuen anetso ama't ñaña all ama tama eñalle acheñ. All yeçhatyesosanet puerahuo'mar. Serrpare'tatosanet ñeñt cohuen ñoñets atto ayochreshattena Yompor. A'crratyesosan ñeñt osyen pa'namen atsnañets ñaña ñeñt pa'namen atsotyenet.

³⁶ Allempo entosan shonte' acheñenesha'pa' ñaña'p' nanac muerenanet. Tarro'mar e'ñe atet entenanet ñerra'mrrate' carrnero ñeñt ama acuam̃psareteyaye; ñeñto'marña nanac allpatatarettenet tarro'mar ama eñalle ñeñtcha' ahuaencañ penahuet.

³⁷ Ñeñto'marña atet otan pueyochresha':

—Shonte' narmets ñeñt nanac ellom̃re'tets ñeñtcha' a'yapaçhetañ. Tarraña ataruasañña ñeñtcha' a'yapaçhe'pa' ama atarr atonayayeto.

³⁸ Te'pa' añcha'ña sanamoñ pamo'mte' mueñanepa'ña ñeñtcha' a'yapaçherrets pa'mro.

Ñeñt'pa' atet toma'ntatanet Jesús atto atarr shonte' acheñenesha' ñeñtcha' ame'ñerrtsañ tarraña ñeñtcha' ame'ñaterrahuetpa' ama atarr atonayayeto. Añcha'ña yanam Yompor ñeñt Yamo'mte' yepen mueñanepa'ña pa'taruasañer ñeñtcha' torra'yerrtsa ñocop allemeñ anetso'mar.

10

Allempo Jesús'p' acran çharrasheña ñeñt puechetsa epsheña ñeñtcha' llesensa'
(Mr. 3.13-19; Lc. 6.12-16)

¹ Allempo çhapa'muen allempo Jesús agota'muenan pueyochresha' çharrasheña ñeñt puechetsa epsheña. E'ñe apçha'huet ñeshopa' ñaña'p' apanet llesens attoch queçhpatyeset oneñeteçhno acheñenesha'. Ñaña llesensanet attoch a'crratyaset acheñenesha' ñeñt osyen allohuen pa'namen atsnañtsoçhno ñaña ñeñt pa'namen atso-tyenet.

² Ñehua, ñetpa' arro'tsa'yenet pa'so'chñeçhno; allohuenetpa' çharrasheñet puechena epsheña ñeñt llesensa'. Ñeñt ñanom atarr sherbets ñeñt'pa' Simón ñeñtara sochetsa Pedro, allotpa' ñaña Andrés ñeñt e'ñe pa'mo'nasheñ; allotña'p' ñaña Jacobo ñeñt Zebedeo puechemer epuet pa'mo'nasheñ Juan.

³ Alloitña'p' ñaña Felipe ñaña Bartolomé; allotña'p' ñaña Tomás ñaña Mateo ñeñt co-braye't acheñenesha' quelle ñeñt gobiernocop; allotña'p' Jacobo ñeñt Alfeo puechemer, allotpa' ñaña Tadeo.

⁴ Alloitña'p' ñaña Simón ñeñt cananistanesha' ñeñt nanac torratse't pa'netsrecop, allotpa' ñaña Judas Iscariote ñeñtcha' pomuerre' tsapañonet Jesús.

Allempo Jesús'p' llesensan pueyochresha' o'ch ahuanemyeset allcha' serrpare'tyeneta'
(Mr. 6.7-13; Lc. 9.1-6)

⁵ Ñeñtña çharrasheña puechena epsheña llesensanet attoch ahuanemyeset pa'namen anetso'mar, ñeñt'pa' atet otapanet:

—Amach arrenta setatsto all yeçha'yena ñeñt ama judioneshayaye. Ñaña amach arrenta setatsto samario'marnesha' pa'netsro all yeçha'yenet.

⁶ Arrcha'ña seta all yeçha'yena israelena'tarnesha'. Ñetpa' e'ñe atet nentenanet ñerra'mrrate' carrneroçhno ñeñt paya'tyetsa.

⁷ Allcha' soñemyespa' seserrpare'tatyestnomanetcha' atetcha' sotyestnomanet: “Te'pa' o' çherr allempoch ayochreshattena Yompor ñeñt pue'ntaño'tsen.”

⁸ Ñaña alla oterranerr pueyochresha':

—Ñeñt atsna'tyetspa' sa'crratyestnomanetcha', ñeñt rromayetspa' setanta-tyestnoma'ña, ñeñt osyen puetsarñatspa' sa'crratyestnoma'ña attoch e'ñe cohuen entuerranet acheñenesha', sequeçhpatatyestcha' ñaña oneñeteçhno ñeñt chorra'yenaya acheñenesha'. Sapa' e'ñe atta aparetes huomencñats atto es cohuen sorratyent

Yomporecop, ñeñto'marña sapa'choña e'ñech atta sapa'yesanet samña, amach secobratstaneto ñeñ atet o' sepa'yesanet.

⁹ Ñaña o'ch notas: Ñerra'm o'ch sahuamapa' ama't puetallarrapa' amach se-sha'tatsetnomo quelle. Ama't orotlillen, ama't huallatlillen, ama't cobretlillen amach sesha'tatsetnomo.

¹⁰ Ama't e'ñe coñe'ta amach es sanmatsto allcha' sechopeñe'chyes, ama't sebolsa, ama't e'ñe epma seshtam, ama't sesapata, ama't secarra, amach sanmatsche tarro'mar ñeñfescha' torra'yetsapa' e'ñe pocte' rratyesapasetcha'.

¹¹ 'Ama't erra'tsena anetser ama't ñaña all ama tama eñalle acheñ ñerra'm erra sechapa'chpa' chochña ñanom sa'pto'tyesosanet erro'tsente' cohuen acheñpa' allcha'ña sechhap. Allña'pa' allcha'ña sa'posa tarremphuach esempoch seserrerr ñaña allot.

¹² Ama't erra'tsena pocoller allcha' sechhap, e'ñe sehuom'cha'teño' o'ch senamatosanet Yompor pa'nateña.

¹³ Ñetña ñerra'm e'ñe cohuen acheñret, Yomporña'pa' a'natenanetcha'. Ñerra'm ama cohuenayaye acheñretpa' Yomporña'pa' o'ch alla apuerres sa pa'nateña.

¹⁴ Ñerra'm erra anetsro ñeñ allot'marnesha'ña ama cohuenaye' agapaseto tarro'mar ñetpa' amach mueneto o'ch e'mñotapaset ñeñ atet seserrpare'ten, sañapa' o'ch sem'terrerr ñaña allot. Ñerra'm allempo sem'terrerrña ñaña allot, ñeñña setco'tsa'yen pañe'te' patspa' choch sepa'shetca'tyesnomña setac. Attochña allot'marnesha'pa' o'ch señotatnomanet ñetpa' amaca'ye pocteye' entenanetoña Yompor.

¹⁵ Po'ño'ch te'pa' o'ch notas: Eempohuañen allempoch acraretetuerra allohuen acheñenesha'pa' añ anetso'marnesha' ñeñtcha' ama cohuenaye' sagapaye te', ñetña'pa' nanaccha' a'coñchatare'tterretña allempo. Ama't sodomo'marnesha' ñaña gomorro'marnesha' ñetpa' amach tama a'coñchatare'tterreto atet ñerra'm ñeñt anetso'marnesha' ñeñtcha' ama cohuenaye' sagapaye te'.

Allempo Jesús'pa' eñotatenan pueyochresha' chochmach eñall ñeñtcha' e'moñe'tahuet

¹⁶ Ñaña sapa' ñerra'm o'ch ahues te'pa' seño'chcha' po'ño'ch chochmach eñall ñeñtcha' se'moñe'te' ama't sapa' amach cho erro't sepenaneto ñet. Ñeñto'marña notenes te'pa' o'ch nemñas e'ñech attes ñerra'mrrate' carrnero o'ch ahuo' allot'sa'yen ma'yarro'chno. Ñeñto'marña sapa' seño'ta'tach atet ñerra'm sheche'ppa' atarr eñote'. Tarraña sapa' amach erro't a'pañso atet ñerra'm ye'ppa' ama erro't a'pañeyaye.

¹⁷ Ñeñto'marña notenes: Seño'ta'tach tarro'mar acheñenesha'pa' erro'tuanencha' perrset, sanmare'tterrach añcha'tare'tesho allcha' otteñe'cherrset. Nalle'tyerrsetcha' all judionesha' po'prahuo'mar.

¹⁸ Po'ño'ch e'ñe no'marpa' rremanaterrsetcha' attoch muero'chtatyerrset, sanmare'tterrach añcha'tare'tesho ñaña allot'sa'yen ñeñt nanac añcha'tare'te'chno allcha'ña sa'meta'yesosnancha' neñoñ. Ñaña arrcha' sa'meterrnan neñoñ allot'sa'yen ñeñt ama judioneshayaye.

¹⁹ Ñaña allempoch sanmare'tetyesapa' ama't mameshapa' amach cha sellca'psatsto, amach sotapsa'tatsto: Erro'tuachca'ye notoste' añcha'tare'tesho ñerra'm o'ch a'pto'tare'tapuen. Tarro'mar allempopa' Somporcha'ña Puecamquëñ seño'tatyesose'ña all.

²⁰ Attoña amach e'ñe sochaya se'ñora'yese, añcha'ña Sompor Puecamquëñ ñeñtcha'ña se'ñoratyese'.

²¹ 'Allempoch atet perrsetpa' ñeñt e'ñe semo'nasheñ sepen ñato' ñeñtchca'ye sepo-muerre' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' patparño'pa' o'paterranach pamo'mte' attoch muetsatater.

22 Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. Ama'tcha' atarr muerochtaterrsetpa' tarraña esesha'ch e'ñe ahuanta'huanmue' e'ñe pueyemteñoñen na, ñeñtcha'ña a'queshpatare'terrtsa.

23 Ñerra'm esempo e'moñe'terrset ñeñt anetsro allo'tsenes o'ch seyetañpsanetpa' o'ch sahuanna po'poñ anetso. Allpa'cho'ña ñerra'm attecma e'moñe'terrseterrpa' o'ch seyetañperraneterr o'ch sahuannerrerr ñaña po'poñ anetso. E'ñe po'ñoñ notenes: Amach e'ñe sepa'huenta' ora allohuen israelnesha' pa'netsropa' na Ñeñten Acheñetosets o'ch alla norrterra.

24 Ñaña o'ch noterrser: Ñeñt yochreshatspa' ñerra'm e'moñe'teññañet po'maestror, e'ñech attecma e'moñe'terrñañet ñaña ñeñt pueyochresha'chno pen. Ñaña ñeñt ñañañretsotyets ñerra'm e'moñe'teññañet pamo'mte' e'ñech attecma e'moñe'terrñañet ñaña pueñañresha'chno.

25 Ñeñt yochreshatso'chnopa' e'ñepa'chña pocte' entyeñet o'ch atet a'paretterret atet ñerra'm po'maestror. Ñaña ñeñt ñañañretso'chnopa' e'ñepa'chña pocte' entyeñet ñaña o'ch atet a'paretterret atet ñerra'm pamo'mte'. Ñaña señoche'pa'ch ñerra'm na puesochatse'teñoñetan otennet napa' oneñeño' pomporen ñeñt otenet Beelzebú, sapa'cho'ña ellochña atarr sochatse'terrset. Ama't na ñeñten e'ñe samo'mte' sepenen atto atarr sochatse'tennet na, sapa'cho'ña ñeñtes nechemereshachno nepen, elloña sapa' atarrcha' nanac sochatse'terrset saña.

Atto amach yemcha'tatsto ñeñtcha' muetse'yechets, añcha'ña yemcha'na't Yompor (Lc. 12.2-9)

26 'Ama't atteñpa' tarraña sapa' amach semcha'tatstaneto tarro'mar yapa' yeñoteñ allohuen ñeñt atto e'ñe a'nahua shecare'tyenet te', esempohuañenñapa' a'metañpsaretterretcha'. Ama't allohuen ñeñt e'ñe a'nasotyenet te'pa' esempohuañenñapa' e'ñech eñotatare'tetuerret.

27 Ñeñto'marña ama't erra'tsena neserrpare'tatyenes te' e'ñe saptoche', esempoña sapa' e'ñech señoatuer ora allohuen acheñenesha'. Ama't erra'tsen ñeñt atet neserrpare'tatyenes te' e'ñe a'nahua o'pono pocollo, esempoña sapa' seserrpare'terrcha' allcha' e'ñe cohuen e'muerres allohuen acheñenesha' atet ñerra'mrate' enot seserrpare'ten shelletot.

28 Amach aña semcha'tatsto ñeñtcha' semtse'. Tarro'mar añach muetsonaset sechets, secamquëñña' amach errotenot muetsonaseto. Añcha'ña semcha'na't Yompor tarro'mar ñerra'm ña muenatspa' e'ñe ña po'huaenco'tpa' o'ch a'chencatonay ye'chets yecamquëñpa'cho'ña o'ch a'chencatonay coñcha'puetso all parraren tso'.

29-31 'Elloña te'pa' napa' o'ch notas: Chocmach seyemcha Yompor, po'ñoñ ñapa' ñach secuam'pene'. Ama't otetollesha'pa'cho'ña chocma cohuañpeñ. Ñehua, ama't yapa' yeñoteñ otetollpa' ama tama sherbeno. Ama't yepomatset epa otetollesha'pa' ñeñt'pa' ama tsa'teyaye, e'ñe puetallarratolla centavo tsa'tena. Tarraña ama't atteñpa' ama't patrira otetoll amach rromo attoch shora'nom ñerra'm ama Sompor muenataye atet. Ñeñto'marña notenes: Ama't mameshapa' amach semcha'tatsto, Yomporcha'ña e'ñe seyemta. Atto atarr morrentenana otetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

Atto ama a'nasotpahuo Jesucristo acheñesho'mar (Lc. 12.8-9)

32 'Elloña napa' o'ch noterrser: Allohuen ama't erra'tsencha' ñeñtcha' ama na'nasotenaye acheñeneshesho, napa'cho'ña Ñeñten Acheñetosetspa' amach na'nasotuerraneto namña Nompore'sho all pue'ntaño.

³³ Tarraña ñerra'm esesha' na' nasotenaya na arr patsro acheñeneshesho, napa'cho'ña na' nasoterranetcha' Nomporecho all pue'ntaño.

*Atto Jesúsapa' orrtatosan e'ñe ño'mar elloptanna'teñets
(Lc. 12.51-53; 14.26-27)*

³⁴ 'Sapa' chate' sotenapañ añecopte' nohuapa o'ch e'ñe cohuen namo'tstanna'tatera acheñenesha' arr patsro. Ñeñtpa' ama atteyaye. Añecpa'ñaña nohuapa allochñapa' e'ñe no'marpa' acheñenesha'ñapa' o'ch atta elloptanna'tyeset.

³⁵⁻³⁶ Ñehua, ñeñt noten te' ama't ñeñt e'ñe pamo'tsna'tarecmuet ñato' no'marach e'moñe'tannerret. Tarro'mar ñato' eñallcha' ñeñtcha' name'ñerraya, pamo'tshetñapa' ñato' amach ame'ñerrneto. Ñeñto'marña notenes e'ñe no'marpa' ñato' puechemerpa' o'ch epatare'tenan pompor, ñaña ñato' puechoyorpa' o'ch epatare'tenan pachor, ñaña ñato' ñeñt pa'to'ñen pen o'ch epatare'tenan ñaña pa'so'mue.

³⁷ 'Tarraña ñerra'm erra'tsencha' nemorrenterrayañ ñerra'm ñetña pompora atarr morrentenet ñamet pachoret ñeñtña acheñerpa' ama e'ñeye' pocte' nenteñe attoch neyochresha' neperranet. Ñaña po'potantañ ñeñtcha' nemorrenterrayañ ñetpa'cho'ña ñerra'm puechemera atarr morrentenetpa' ñaña po'sñet ñeñtpa'cho'ña acheñerpa' ama e'ñeye' pocte' nenteñe attoch e'ñe neyochresha' neperranet.

³⁸ Tarro'mar ñerra'm erra'tsen ama e'ñeye' sehuanmaye ñeñt atet muenenet e'ñe ñocpueta attoch coterrnet e'ñe poctacma, ñaña' amach pocte' nenteñe o'ch neyochresha' neperranet. Ñeñtpa' añ toma'ntena atet ñerra'mrrate' cho sechechnen secorsoch alloch semueroçhta saña.

³⁹ Tarraña ñerra'm esesha' e'ñe añ e'nenet o'ch correna atomat attoch e'ñe coshenet arr patsro, ñetñapa' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet nocop ñeñt atet muenenet ñeñt e'ñe ñocpueta arr patsro ñeñtña acheñerpa' corretsach pocsheñeshocmañen e'ñe tayoteñ errponañohuen.

*Ñeñtcha' apuerrey Yompor attoch atarr coshaterrey
(Mr. 9.41)*

⁴⁰ Jesúsapa' alla oterranerr pueyochresha':

—Ñerra'm o'ch sahanma, ñerra'm esesha'ch e'ñe cohuen sagapue' sa, ñetpa' na'naca'yeña aguënet e'ñe cohuen. Ñaña ñeñt e'ñe cohuen naguëne' na, ñetpa' Nompore'naca'yeña aguënet ñeñt nellsensene' na.

⁴¹ Ama't erra'tsena ñeñt e'ñe cohuen aguëne' ñeñt a'mtene' Yompor po'ñoñ tarro'mar ñapa' Yomporca'ye po'ñoñ a'mten, ñeñtña acheñer ñeñt e'ñe cohuen aguëne'pa' Yomporcha'ña apuerre' ñeñtcha' atarr coshaterre'. E'ñech attecma apuer ñeñt atet coshatenan ñeñt a'mtene' po'ñoñ. Ñaña ama't erra'tsena ñeñt e'ñe cohuen aguëne' ñeñt e'ñe pocte' es orrtatyets Yomporcop tarro'mar ñapa' Yomporcopca'ye e'ñe pocte' es orrtatyen, Yomporcha'ña apuerre' ñeñtcha' atarr coshaterre'. E'ñech attecma apuer ñeñt atet coshatenan ñeñt e'ñe pocte' es orrtatyets Yomporcop.

⁴² Ñaña añ ñeñt ama esoshe'maye' enteneto, erra'tsencha' apapue' ñeñtcha' orros tarro'mar ñapa' noca'ye neyochresha', ama't coñe'ta oñ apapet, napa' po'ñoñ o'ch notas, Yomporcha'ca'yeña apuerrahuetña ñeñtcha' atarr coshaterrahuet.

11

*Juan ñeñt apatañtate'tpa' mueñan pueyochresha' Jesúsesho
(Lc. 7.18-35)*

¹ Yechatuahuan Jesús pueyochresha' ñeñt charrasheña ñeñt puechetsa epsheña atetcha' pa'yeset, allempoñapa' ahua' ñaña Jesús allot yechatysets; serrpare'tatyesan acheñenesha' all pa'netsreto.

² Añña Juanpa' allo'tsena all yottampeñet. Allñapa' o' e'mare'tan Cristo atet p̄a'yena, allen̄ta mueñan pueyochresha' Jesúsesho.

³ Ñetña o' chapuet allpa' atet otoset:

—Ñato' p̄ate'ña ñeñteḡ e'ñe po'ñoçh Cristotets ñeñt atarr yecuen ahuaḡoteñ o'ch huapa. Ñerra'm amate' ñeñteyaypepa' o'ch e'ñe p̄otey allochñapa' añcha' yecua' po'psheñeñ ñeñtcha' huapatsa ñeñt e'ñe Cristo.

⁴ Jesúsñapa' anapanetpa' atet otapanet:

—Te'pa' o'ch ahuerres seserrpare'tatuercha' Juan ora allpon ñeñt atet sentyesuennana' arr ñaña ora allpon ñeñt atet se'myesuennana' arr.

⁵ O'ch e'ñe seserrpare'tatuer ora ama't atto aporo'yetechnopa' te'ñapa' o' e'ñe necuatyuesuerranet ñaña ñeñt checa'repayetspa' te'pa' o' e'ñe chope'chyesuerret cohuen, ñaña ñeñt a'ptsaresyen leprapa' te'ñapa' o' e'ñe a'cohuentataretetuerret ñamet, ñaña ñeñt paquetneshachnopa' ama't ñetpa' te'ñapa' o' e'ñe e'myesuerret cohuen, ama't ñaña ñeñt rromayets te'ñapa' o' alla atantataretetuerret, ñaña ama't ñeñt huocchañneshachno te'ñapa' o' e'ñe neserrpare'tatuerranet añ cohuen ñoñets alloch qeshperret ñamet.

⁶ Jesúsñapa' alla oterranerr Juan pueyochresha':

—Ñaña ellonetpa' o'ch sotuer Juan ñeñt atet notenes, atarr cosheñtso'tsen ama't allohuen ñeñt atarr neyemtenaya na, ñeñt ama e'nenaye po'psheñeñ ñeñtcha' coshater-rahuet.

⁷ Allempoña Juan pueyochresha'pa' o' ahuanerret. Jesúsñapa' alla serrpare'taterranerr acheñenesha' ñeñt atet pe't ahuaña Juan, ñeñtpa' atet otanet:

—Ahuaña allempo sete't amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yma'tateñ m̄orr.

⁸ Ñaña amaca' añecpaye' sete'teña all o'ch senteña' ñeñt atarr coçhnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt atarr coçhnesha'tetsa pa'shtam. Yapa' yeñoteñ arrña yentenña ñeñt atarr coçhnesha' chorra'yenaya sheta-muets añcha'taretepahuo.

⁹ Sapa' añecopca'yena sete'tña amayo o'ch senteña' all ñeñt po'ñoçh a'm̄tene' Yompor po'ñoñ. Napa' o'ch notas: Juanpa' atto atarr sherbenan Yomporpa' ello metana'tuan allohuen ñeñt atto a'm̄tenet Yompor po'ñoñ.

¹⁰ Tarro'mar Juanpa' ñocop eñose't Yompor ahuaḡ. Ñehua, allempopa' atet otne't na ñeñt atetcha' p̄osa Juan nocop esempoch huapa, ñeñtpa' atet anare't ñoñets ahuaḡoteñ: Papa' peñoche'pa'ch napa' o'ch nemñonaḡ puesheñarr ñeñtcha' ñanom otatsa ñeñtcha' p̄a'cohuentatyese' p̄ocop allcha' p̄oñmos.

¹¹ Ñeñto'marña na te'pa' e'ñe po'ñoçh atet notenes: Allohuen allpon acheñenesha' ñeñt eñalletetsa arr patsro ama't puesheñarra ama eñalleña ñeñt atarr sherbets atet ñerra'mrrate' Juan ñeñt apatyese'ḡ ahuaña acheñenesha' Yomporecop. Tarraña ñeñt ama esoshe'maye' enteneto ama't mamesha, tarraña ñerra'm pueyochresha' peñ Yompor ñeñt pue'ntaño'tsen atto te'pa' ayochresha'ttena ña, ñeñtña acheñerpa' atarrca'ye sherben, ello metanenan atto atarr sherben Juan.

¹²⁻¹³ Tarro'mar añña ñoñets, Moisés po'ñoñ ñeñt atet anare't ñaña añ ñoñets ñeñt quellca'yese't ñeñt a'm̄ta'yese'ḡ Yompor po'ñoñ, ñetpa' ñeñtña serrpare'tete't attoch atarr ayochresha'tterra Yompor tarremphua allempo orrtosa Juan. Ñaña allempoteñ serrpare'tatosanet Juan ama't teme'ttsen e'ñe po'huamencocma serrpare'tatyese't atet penaña Yompor po'cohuenña attoch ayochresha'tterra ña ñeñt pue'ntaño'tsen. Ama't atsrre'mñañnesha'pa' e'ñe ñeñt atarr muenet pueyoçhrocmañen.

¹⁴ Ñaña ñerra'm po'ñoçh same'ñyañcha' Juanpa' ñaca'yena Elíasoterrets ñeñt atarr secuen ñeñtcha' sehuerroya.

15 Allohuenes ñeñtes ne'mñotene' neñoñ, çhaponasepa'chña seyoçhro ñeñt atet notenes.

16-19 Jesúsña'pa' atet oterranerr acheñenesha':

—Ñehua, napa' o'ch neñotatas ñeñt atet pena patantarr acheñenesha' ñeñt yentyen te' ñeñt ama't errotena ama acshatpoteneto. Ñeñtpa' fariseonesha' atet petsa. Tarro'mar ama't allempo orrta Juan ñeñt apatañtase't ñapa' ama rrane'te ñeñt yocrrañ yepen allohueney, ama orrane'te ñeñtecma yorren allohueney. Ñeñto'marña ñapa' çha so-tyese't çho'te' chorreña oneñet; ama't e'ñe mameshapa' ama pocteye' señche'te. Te'ñapa' o' norrtterra naña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen naña atarro' arratsñaaten ñaña atarro' orranñaaten napa' año'chña e'ñe neyemuetyena ñeñt atarr ochñaatenesha' ñaña ashcarñaateçhno ñeñt atarr cobra'yene' acheñenesha' quelle. Tarraña ama't atet sepennoñpa' Nomporña e'ñe eñotene' ñeñt po'ñoçh atarr sherbets ñocop. Ñaña allohueney ñeñtey e'ñe puechemerasha' pohueney ñeñtey co'tene' ña poctapña yapa'cho'ña e'ñe yeñotuenña ñeñt po'ñoçh atarr sherbets. Ñeñto'marña yorrtatyennña ñeñt cohuen enten ña. Saña'pa' ama't e'ñe mameshapa' ama acshatpahuoyayso, e'ñe attes ñerra'mrrate' cheshanesha' ñeñt çhocma po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetña'pa' amach mueneñeto o'ch coshaprechet pacmachoresha'. Ñeñto'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o' yerequërca'hua allo yocshame'tenapa' saña'pa' amaña seshe'raramñpenye; allotpa' ama't o' yepoctorare'tua ñeñt ya'chpeñtsoreçh allo yellcanrrortenapa' saña'pa' amaña sellcapretenyo."

*Atto Jesús'pa' eños epo'mar anetsocop all ama ame'ñyeto
(Lc. 10.13-15)*

20 Allempoña Jesús'pa' çha muene' che'ptare'tyenan acheñenesha' all pa'netsreto all epaye' entatyenanet po'partsoña ahuañmo'çoteñ. Ama't entatyenanetañ po'partsoña ñetña'pa' ama es cotape'chenaye ello cohuen Yomporecop, ñeñto'marña allpa' çha muene' che'ptare'tyesanet. Ñeñtpa' atet otyesanet:

21 —Nanaccha' llequëntso'tsa'yenes coraziño'marneshacha', nanaccha' llequëntso'tsa'yenes saña betsaido'marneshacha'. Tarro'mar ama't atarr norrtatyennaseñ nepartsoña sesho, saña'pa' amaña soctape'cherroña ello cohuen Yomporecop. Ñerra'm arrcha'ña norrtatañ nepartsoña tiro'marneshesho ñaña sidóno'marneshesho, ñetña'pa' ahuatoteñte' cotape'cherretañ e'ñe cohuen Yomporecop. Ñetpa' attoch e'ñe orrtetañ çha llecatenanet po'chñaret, cotnashe'mach chorra'yetañ, tsapñach epachshema'tyenetañ all anorrçha'tyenet puellquëño'tet.

22 Ñeñto'marña te'pa' notenes: Esemphuañen allempoch acrare'tetuerra allo- huen acheñenesha'pa' tiro'marnesha' ñaña sidóno'marnesha' ñetña'pa' amach tama a'coñchatare'tterretoña allempo. Coraziño'marneshacha' ñaña betsaido'marneshacha' saña allempopa' atarrcha' a'coñchatare'tes.

23 Ñaña sa capernaumo'marneshacha' çhate' sotenapañ atto e'ñe cohuen sentyena sañeña, Yomporña'pa' allentach a'tapaterres pue'ntaño. Ñeñtpa' amachca'ye atteye' perrsoña Yompor, allachca'ye huapore'terres o'pono coñcha'puetso all parraren tso'. Tarro'mar ama't atarr norrtatonaseñ nepartsoña sesho, saña'pa' amaña semnoña o'ch soctape'cherr cohuen Yomporecop. Ñerra'm arrcha' ñanom norrtatañ ahuatoteñ nepartsoña sodomo'marneshesho ñetpa' allorocmate' cotape'cherretañ cohuen Yomporecop. Allempopa' amate' a'poyatatare'tterretañeña pa'netser. Ora'te' allo'tsenaraña.

²⁴ Ñeñto'marña te'pa' notenes: Esemphuañen allempoch acrareretuerra allohuen acheñenesha'pa' sodomo'marnesha' ñetpa' amach tama a'coñchatareñterretoña allempo. Capernaumo'marneshacha' saña allempopa' atarrcha' a'coñchatareñes.

Jesúspa' atet oten, e'ñe same'ñeñoten na, napa' na'huañañperrescha' ñeñt atarr amue-rochtatañ sentyen

(Lc. 10.21-22)

²⁵ Allempoña Jesúspa' ma'yochenana Pompor, ñeñt'pa' atet oten:

—Na Apacha' o'ch na'ye'chochtatonap, p'apa' p'a ñeñtep atarr ayochreshattetsa pe'ntaño ama't ñaña arr patsro. Na'ye'chochtatonap tarro'mar ora añechno ñeñt pecohuenña pepen, ñeñt'pa' ama arreye' pechapateñe pueyoçhro ñeñt atarr eñotañ entyetsa. Papa' aña pechapaten pueyoçhreto ñeñt ama eñotañeye' entyetso.

²⁶ Tarro'mar Apa e'ñe pemuereño' ñeñt'pa' atetña e'ñe pocte' penten p'a. Arrpa' allohua ñeñt atet ma'yochenana Pompor.

²⁷ Jesúspa' alla oterranerr acheñenesha':

—Nomp' allohuen po'cohuenña e'ñe eñotatuenen. Na ñeñten Puechemerenpa' ama po'ñoçh eseshaye' neñotenaye, ñapña Nomp' e'ñe eñotenen. Nomp'pa'cho'ña ama po'ñoçh eseshaye' eñotenaye napña na ñeñten Puechemeren e'ñe neñoteñ Nomp', ñaña erra'tsencha' ñeñt e'ñe pocte' nenten na ñeñten Puechemeren ñeñt'pa' o'ch neñotater Nomp'.

²⁸⁻³⁰ Sehua'cha'ta nesho allohuenes ñeñtes nene' seyoçhro ñeñt atarr amue-rochtatañ sentyen. E'ñe same'ñeñoten na, napa' na'huañañperrescha' ñeñt atarr amue-rochtatañ sentyen. Napa' aña'ña nenerrnas ñeñt amach cha mue-rochtaterrso; ñeñtña sapa' e'ñech pocte' senteñ. Attochña sapa' señotenen napa' atarr nemuerensa ama at-srre'moçhen entño ama't e'ñe pueheñarrocpa. Ama't e'ñe mamesha ama añaeye' ne'nen ñeñt e'ñe nocpa. Attochña e'ñe cohuen nocshatterres seyoçhro ama't e'ñe secamquëñohuen.

12

Allempo Jesús pueyochresha' taso'tañpesyesnomuet trigo aña yetro allempocma amesen judionesha'

(Mr. 2.23-28; Lc. 6.1-5)

¹ Allempoña çherrerr pam'tarr allempo çhocma amesen judionesha'. Allempoña Jesúspa' arr oñem chetso'mar epuet pueyochresha'chno. Allempo oñenet pueyochresha'ñapa' e'ñe pa'chporrño'tetpa' taso'tañpesyesnomuet puechña'tets trigo o'rra'yetsomet.

² Fariseonesha'ña ñeñt entahuet atet p'a'nmueta'pa' ñet'ña'pa' allenta otyeset Jesús:

—Pecue'ñaca'yeña añ peyochresha' taso'tañpesyesnomuet trigo; atet penet ñeñt ama pocteyaye o'ch atet ye'pa taruasats aña yetro tarro'mar te'pa' aña yetro ñeñt atet anaret ahua'oteñ allempocmach yamesen.

³ Jesúsña'pa' atet otanet:

—Sapa' ama'trra selleyareña ñeñt atet p'a ahua't David allempo cheporra'nma epuet ñaña allohuen ñeñt cotene'.

⁴ Ña allempopa' be'tosos Yomp' pa'paclo allña'pa' rrosan pan ñeñt atma'ntataret atet ñerra'mrrate' ñeñt nenet all Partsocop. Ñehua, ñeñt panpa' ama pocteyayñe o'ch rros David ñaña ñeñt epuet. Ñeñt'pa' añach ñapue't rrene' cornaneshachno; ñeñt'pa' atet anua'ret judioneshacop.

⁵ Ñaña ama't selleyareña ñoñets ñeñt atet anaret ñeñt Moisés po'ñoñ all oten atet pena ñaña cornanesh'a' Parets pa'paclo. Ñehua, ñet pueherbeño'tetpa' ama ameseneto

añe yetro allempocma yamesen. Ñetpa' ama't atet penetpa' Yomporñapa' e'ñe pocte' entenanet.

⁶ Napa' o'ch notas: Napa' ñeññen arro'tsenen nanac nasherben ello nemñtaneñ ñeññ atet sherben Parets pa'paquëll.

⁷ Ñehua, añ ñoñetspa' ñeññña atet ote't Yompor ahuat: "Napa' ama e'ñe aña cohuen nenteno o'ch sapuenen sayara ñeññ semtsen nocop. Añe'naña atarr cohuen nenten o'ch semuereña allohuen samo'tsesha'." Ñerra'm cho çhennasañ seyoçhro ñeññ atet oteneY Yompor, amach erro't sotatscheña ama't erra'tsena acheñer ñeññ e'ñe pocte' enten Yompor.

⁸ Ñeñño'marña te'pa' o'ch notas, na Ñeññen Acheñetosets ñeññen allsensareten, naca'yeña atet otets este' poctetsaña ñeññcha' atet yeña añe yetro allempocma yamesen.

Allempo Jesúsapa' a'crraterran ñeññ chelletsap
(Mr. 3.1-6; Lc. 6.6-11)

⁹ Metuerrerr Jesús allotpa' be'tosuerrerr judionesha' po'prahuo.

¹⁰ Allñapa' allo'tsen puesheñarr yacma ñeññ cha chellena pot. Fariseonesha'ñapa' allenta a'p'to'chet:

—Añe yetro allempocma yamesenpa' ta'm ¿pocte'te' penteñ o'ch pa'crrateñerr acheñ? Tarro'mar atet a'p'to'teñet allochñapa' esheccha' otteñe'chet.

¹¹ Ñañapa' atet otanet:

—Sapa' ñerra'm cho shora'nen ama't puemocarra secarrneror añe yetro allempocma yamesen, ama'tcha'ña allenta sechtere ama't ñeññe yetro allempo yamesen allohueney.

¹² Ñehua, acheñpa' elloca'ye metanenanña ñeññ atto sherben carrnero. Ñeñño'marña napa' notenes e'ñe pocte' o'ch atet yeña ñeññ cohuentetsa ama't añe yetro allempocma yamesen.

¹³ Allempoña Jesúsapa' atet otan yacma ñeññ chelletsap:

—Te'pa' o'ch notap petapuer p'tot.

E'ñe otue'pa' ñañapa' allente'pa'tcha' tapuerran pot, e'ñe allorocma cohuenterra pot e'ñe attecmaterr ñerra'm po'pshemñtañot pot.

¹⁴ Fariseonesha'ña cha'nmaçherretpa' cotape'chatanna'tyesnerret, atarr o'pateñet Jesús attoch muetsatachet.

Atet ote't Yompor ahuat Jesúsocop

¹⁵ Jesúsña eñotanetpa' ahuerr allot. Shonte' acheñeneshaçhno co'ta'huanereter. Allohuen ñeññ atсна'tyetsapa' e'ñe a'crratyesuerranet.

¹⁶ Atet otyesamet:

—Po'ñoçh amach esesha' sota'psa'tatsto napa' na ñeññen Yompor Puechemeren.

¹⁷ Ñehua, ñeññpa' atet pa' allochñapa' attoch etsota Isaías po'ñoñ ñeññ a'mñtaye't Yompor po'ñoñ, ñeññpa' atet ote't Yompor Puechemerecop ñeññcha' Cristoterrets:

¹⁸ Añmapa' ñeññcha' atarr torrerrtsa nocop, ñapa' ñeññ nenen ñeññcha' atarr sherberrets. Ñapa' ñeññ atarr nemorrentena ñeññ e'ñe nocshatene'. Ñapa' ñach ahuamencat neperr necamquëñot, ñach eñotaterre' allohuen pa'namen acheñenesha' ama't ñeññ ama judioneshayaye. Añcha' eñotaterranet ñeññ e'ñe cohuen ñoñets attochña e'ñe pocte' nentuerranet.

¹⁹ Ñapa' amach es otnare'tyerraneto ama't mameshapa' amach ama'toçhetyerro. Ama't mameshapa' amach che'çhame'tyerraneto ama't allecma chopeñe'chyen acheñenesha'.

²⁰ Ama't ñeññ mueroc'hetyetsapa' ñapa' e'ñech muererranet. Ñeññpa' atetcha' netma'ntacha ñerra'mrrate' ama't puecharra cho'ne'ch tsopa'ne'pa' ñañapa' amach cha a'meyatere. Ñaña ñerra'm lampareñ cha muene' mayen ñeññpa'cho'ña

amach emayater. Ñapa' amach cha es añcha'nochtana'tyerro, tarraña esempohuañenpa' e'ñech atta a'mchechatuerran ora allohuen ñeñt ama pocteye' enteno Yompor.

21 Ñeñto'marña allohuen pa'namen acheñenesachno ñachña e'ñe yemuetuerret. Arrpa' allohua huañ atet ote't Yompor ñeñt quellquë't Isaías.

Atto puesheña'tets oteñet Jesús ñapa' oneñeño' po'huamencot quechpatenanña po'potantañ oneñeñechno acheñenesha'
(Mr. 3.19-30; Lc. 11.14-23; 12.10)

22 Jesúsapa' alla huapaterrñañeterr puesheñarr yacma ñeñt aporo'yet ñeñt chorrena oneñeñt cha opanatateñ. Jesúsñapa' a'crrataþ, ñeñtña opanerpa' o' alla eñorerra, ñaña o' e'ñe cohuen cohuer.

23 Allohuenña acheñenesha'pa' atarr cohuanrrorteñet, ñetñapa' atet otyeset:

—Ñato' añte'ca'yeña David po'mreneñ ñeñtcha' Cristotosets.

24 Fariseonesha'ña allempo e'mare'chetpa' ñetñapa' atet otyeset:

—Atto quechpatatyenan oneñeñechno acheñenesha' añaca'ye ahuamencat pene' Beelzebú ñeñt pompor pen allohuen oneñeñechno.

25 Jesúsñapa' eñotanet ñeñt atet cotape'chatse'tyenet pueyoçhreto ñocop ñeñt atto otyeñet ñapa' oneñeña pompor po'huamencot quechpatatenan oneñeñechno acheñenesha'. Ñeñto'marña ñapa' atet otanet:

—Ñerra'm puesheñarr añcha'taret elloptannena pa'cheñer e'ñe ñagattsetpa' e'ñech poctacma a'clatanna'tuerret. Attecmach þannerra ñeñt parro yeçhetsa pa'terr anetso, ñerra'm çho elloptannenet e'ñe ñagattsetpa' ñeñtña atto huomencatenetpa' ñeñtþa'çho'ña çhachca'ye huañerrets. Attecmach þannerra ama't ñeñt e'ñe pamo'tsna'tarecmuet ñerra'm elloptannerret e'ñe ñagattsetpa' ñeñtña atto huomencatenetpa' ñeñtþa'çho'ña çhachca'ye huañerrets.

26 Attecmach þanna'ta ñaña oneñeñt pueyochreshachno ñerra'm oneñeñechno e'moñe'tannenet, ñerra'm huapore'tannenet e'ñe ñagattseta amach errotenot allo'na atarr huomencatneneto. Po'ñoçh oneñeñtþa' amaca'ye huapore'tanneno.

27 Sapa' atet sotenen napa' Beelzebo' po'huamencot nequechpateññañ e'ñe ña pueyochresha', ñehua, te'pa' o'ch notas: Ñeñt seyochresha' sepen sa ñeñt eñotene' ñamet o'ch quechpatachet oneñeñechno acheñenesha', ñetþa'çho'ña amaña Beelzebú po'huamencoteye' quechpateñetña oneñeñechno acheñenesha'. Ñetþa'çho'ña Yomporoña po'huamencot quechpateñetña oneñeñt. Ñeñtña o' eñotatas ñeñt atet sotenoñ ñeñtþa' amaca'ye po'ñoçh atteyaye.

28 Po'ñoçhca'ye Yompor e'ñe Puecamquëño't ñeñtña ahuamencat nepene' attot nequechpateñña oneñeñechno acheñenesha', ñeñtcha'ña señotate' te'pa' o' neçhapatonas Yompor po'cohuenña ñeñt atto po'ñoçh atarr ayochreshattena ña.

29 'Ñehua, yapa' yeñoteñ ñeñt atarr ahuamencattetsa atto atarr ahuamencattena oneñeñt, ñaña'pa' e'ñe po'huamencot cohuanþesyenan allohuen e'ñe cohuen ñeñt pa'paquëll þa'yen. Tarraña ñerra'm esempo o'ch huapoña ñeñt atarr ahuamencatesha' ñeñtcha' metanose'ña po'huamenc atet ñerra'm na Nompör, ñeñtcha'ña rromose' o'ch huancos, allochñapa' o'ch be'tosos all ñeñt pa'paquëll þa'yen o'ch e'ñe puerrataþpsos ñeñt allpon o'patyena ña.

30 'Ñeñto'marña te'pa' o'ch notas allohuenes: Ñerra'm eseshas ñeñtes ama ne'torrapretenaye ñeñtña acheñerpa' çhaca'ye epatare'tennan ñeñt atet ne'torra'yena na. Ñeñtþa' o'ch netma'ntatasa atet: Ñerra'm esesha' ama na'yapaçhapretenaye ñeñt na'yapaçhen na, ñeñtña'pa' cha a'parratse'tañpenen a'yenet.

31 'Ñeñto'marña te'pa' o'ch notas: Allohuen pa'namen sosya'tsañechno ñeñt ama pocteye' enteno Yompor ama't ñaña achmāre'tanna'teñets ñeñtpa' aṗretna'po' nenteñ.

32 Ñaña ñerra'm esesha' nesasene' na Ñeñten Acheñetosets ñeñtpa' aṗretna'po' nenteñ. Tarraña ñerra'm esesha' añ achmāre'teññañet Parets Puecamquēñ ñeñtña' amaca'ye aṗretna'pahuoye' nenteñe. Ñeñtpa' amach aṗretna'pahuoterro e'ñe tayoteñ errpono-huañen.

Allohuen acheñ ñeñt e'ñe po'ñoçh cohuen acheñer, ñetña'pa' añcha' orrtatyenet ñeñt e'ñe cohuenare'

(Lc. 6.43-45)

33 'Ñehua, yeñoteñ allohuen acheñ ñeñt e'ñe po'ñoçh cohuen acheñer, ñetcha'ña orrtatenet ñeñt e'ñe cohuenare'. Tarraña po'potantañ acheñenesha' ñeñt po'ñoçh ama cohuenayaye ñetña'pa' añach orrtatenet ñeñt ama cohuenayaye. Ñeñtpa' atetcha' netma'ntaterra: Ora allohuen ñeñt e'ñe cohuen narmetsoch pue'merpa'cho'ña e'ñech cohuenare'. Añña po'pchañ narmetsoch ñeñt ama cohuenayayepa' pue'merpa'cho'ña amach e'ñe cohuenayaye. Ñeñto'marña attoña yeñoteñ erra'tsente' ñeñt e'ñe cohuenare' narmetsoch ñaña ñeñt ama cohuenayaye narmetsoch, pue'meroña e'ñe yechme'tenanet.

34-35 Sapa' ama cohuenayayso. Cha sottena ñerra'm shechṗa e'ñe sompor sepen allohuenes. Ñeñto'marña amach errotent señooso cohuen tarro'mar sapa' po'ñoçhpa' ama cohuenayayso. E'ñe atet atarr soctape'chatse'tyen seyoçhro ñeñt ama cohuenayaye, attotca'yeña señosatse'tyen. Ama't erra'tsena acheñer ñeñt e'ñe po'ñoçh cohuen ñapa' añcha'ña orrtatyenet ñeñt e'ñe cohuenare' cotape'chen pueyoçhro tarro'mar pueyoçhroña all cotape'chenan shonte' ñeñt e'ñe cohuentetsa. Tarraña po'poñ acheñer ñeñt po'ñoçh ama cohuenayaye, ñapa'cho'ña añach orrtatyenet ñeñt atet cotape'chen pueyoçhro ñeñt ama cohuenayaye tarro'mar pueyoçhroña all cotape'chenan shonte' pa'namen sosya'tsañ. Tarro'mar ñerra'm shonte' yoctape'chen yeyoçhro ñeñt cohuentetsa, ñeñtpa' e'ñech ñeñta cohuen yeserrpare'ten. Tarraña ñerra'm shonte' yoctape'chen ñaña yeyoçhro ñeñt ama cohuenayayepa' ñeñtpa'cho'ña e'ñech ñeñta yemnen o'ch yeserrpare'tyen.

36 Po'ñoçh napa' o'ch alla noterrser, esempohuañen allempoch acrare'tetuerra allohuen acheñenesha'pa' allohuen ñoñets ñeñt atta otatse'tyen acheñenesha' ñeñtña'pa' a'metatatyeretcha'.

37 Tarro'mar ñerra'm e'ñe cohuenare' seserrpare'tyen te' Yomporña'pa' e'ñech pocte' entuerrnas señoñ allempo. Tarraña te'pa' ñerra'm cha señosatse'tyen ñeñtña señoñerpa' ñeñtña señoñchatterre' allempo.

Atto Jesús'pa' otan acheñenesha' ñeñt ama cohuenaye' cotape'chetso ñetña'pa' chocma e'nenet partsoteñets

(Mr. 8.12; Lc. 11.29-32)

38 Allempoña allponsheña ñeñt atarr etsotayenayeñ ñoñets ñeñt atet anare't epuet ñaña allpon fariseonesha' ñetña e'ñe puehquēño'tetpa' atet ochet Jesús:

—Yapa' Maestrocha' yemneñ o'ch ṗorrtatonay pepartsoña ñeñtcha' yeñotate' ṗapa' po'ñoçhte' Parets Puechemereṗ ñeñteṗte' Cristotosets.

39 Ñaña'pa' atet otanet:

—Acheñenesha' ñeñt corra'yetsa te' ñetña'pa' ama cohuenaye' cotape'chyeneto, ama añeye' cosheneto Yompor ñeñto'marña ñetpa' e'ñe orrena otennet ahuo'ch norrtatanet nepartsoña. Tarraña amach es norrtataneto. Napa' añach paterr neñotatanet atet eñotatane't Jonás ahua't nínivo'marnesha' allempo a'mtane't Yompor po'ñoñ.

⁴⁰ Ñehua, yeñoteñ Jonás allempopa' allo'tsena cacacotmo ma'pamuet, yefo ama't ñaña tsapo ñeñt añecmuen cac. Atetcha' neperra ñaña Ñeñten Acheñetosets, napa'cho'ña nema'pamuetcha' o'pono e'ñe allohuanen patso, yefo ama't ñaña tsapo. Ñeñtcha'ña eñotaterrahuet atet penaña ñeñt huetsa Yomporeshot.

⁴¹ Tarro'mar ahuat allempo serrpare'tatane't Jonás nínivo'marnesha', ñetñapa' allempocma cotape'cherret e'ñe cohuen Yomporecop. Te'ña arr seshopa' allo'tsenen na ñeñten ello metanene' ñeñt atet serrpare'tate't Jonás. Tarraña sañapa' amaña soctape'chenoña ello cohuen Yomporecop. Ñeñto'marña esempohuañen allempoch acrare'tetuerra allohuen acheñenesha' ñeñtña nínivo'marnesha' ñeñt e'ñe cohuen cotape'cherrets Yomporecop ahuat, ñetpa'cho'ña orrterretcha', ñeñtcha'ña señotaterre'ña sapa' ama't mameshapa' ama pocteyayeña ñeñt atet sepa'yese't tarro'mar ama soctape'cherro ello cohuen Yomporecop.

⁴² Ñaña te'pa' o'ch neyerpatasa ñeñt atet pa ahuat puesheñarr coyanesha' ñeñt amcha'tarettatset atarr baçhayo allohuanen pats sa'ponet. Ñeñtña coyanesha'pa' alloteñ on o'ch e'mñotenana' Salomón pueserrpareñ ñeñt atet atarr eñotañte't. Te'ña arr e'ñe seshopa' allo'tsenen ñeñten puesheñarrana ñeñten atarr es neñoten ñaña, ello nemitanen atto eñotañte't Salomón. Tarraña sañapa' amaña es sotapoteno. Ñeñto'mar esempohuañen allempoch acrare'tetuerra allohuen acheñenesha', ñeñtña coyanesha' ñeñt e'ñe cohuen e'mñotatset ñapa'cho'ña orrterrach, ñeñtcha'ña señotaterre' sapa' ama pocteyayeña ñeñt atet sepa'yese't tarro'mar sapa' ama es same'ñe'te ama't e'ñe mamesha.

Atto Jesús'pa' eñotatanet ñato' oneñetpa' o'ch alla chorrerranerr acheñ allot cha'nom ahuaña

(Lc. 11.24-26)

⁴³⁻⁴⁵ 'Ellonetpa' o'ch alla neñotaterrser po'poñoneñ ñeñtcha' atet a'pare'tterra acheñenesha' ñeñt te'pa' ama e'ñeye' cohuen cotape'cheneto Yomporecop. Ñehua, oneñt ñerra'm esempo cha'nom acheñeneseshoñ, ñeñtña oneñetpa' o'ch auyes erraparen ama't amayo'mar e'nyese' po'psheñeñ allcha' yeçherrerr allcha' e'ñe amesurrerr cohuen. Tarraña ñerra'm amach erra eñche'pa' atteñapa' o'ch ot: "Napa' o'ch alla ahuerren nepaclo allot necha'nom ahuaña." Atetcha'cho' pa. O'ch alla ahuer allot cha'nom ahuaña. Allña o'ch çherrpa' e'ñech cohuen entuerran pa'paquëll, e'ñech cohuen atarrapo'tuaret, e'ñech cohuen añño'tyesaret, tarraña amach eseshaye' yeçhetso all. Allempoñapa' o'ch alla ahuer allot'sa'yen pamo'tsesha'pa' o'ch enana' po'poñ cançherrsheña oneñeteçhno ñeñt nanac sosyare', ñeñt ello metana'tuene' ñeñt atet sosyaten ñeñt hua'ñene' o'ch yeçhaprecha. Allohuenetpa' o'ch chorreñet ñeñt acheñer. Allempoña tsapatonetpa' allo'nach sen ñeñt acheñer sosyatnomuets huomenc. Elloch metanerran ñeñt atet patse'tyese't ñenmañ. Po'ñoçhcha'ca'ye atet perraña acheñenesha' ñeñt te'pa' ama e'ñeye' cohuen cotape'cheneto Yomporecop.

Allempo huapoña Jesús pachor ñaña pa'mo'nasheñnesha'

(Mr. 3.31-35; Lc. 8.19-21)

⁴⁶ Allempo atet eñorana'tenana acheñenesha'pa' o' huapa Jesús pachor epuet ñaña pa'mo'nasheñnesha'. O' çhapuet allpa' ñetñapa' alla tomçhenet a'yot. Añ muenenet ahuo'ch serrpare'tatoset.

⁴⁷ Allempoña puesheñarrpa' atet otan Jesús:

—O'ca'ye huapaña pachor ñaña pemo'nasheñnesha'. Ñetpa' a'yote'tsa'yenet, mueneñet o'ch serrpare'tatospet.

⁴⁸ Ñaña'pa' atet otan ñeñt otene':

—¿Ama't seño'teñe ñeñt e'ñe po'ño'ch nachor nepen ñaña ñeñt e'ñe po'ño'ch nemo'nasheñ nepen?

⁴⁹ Allempoñapa' yochan pueyochresha'pa' atet otanet:

—Napa' añca'yeña ñeñt e'ñe po'ño'ch nachor nepen ñaña ñeñt e'ñe po'ño'ch nemo'nasheñnesha' nepen.

⁵⁰ Ñehua, ama't erra'tsena ñeñt'cha' e'ñe atet pohuene' ñeñt atet muenen Nompör ñeñt pue'ntaño'tsen ñeñt'ca'yeña e'ñe po'ño'ch nemo'nasheñ nepen ñeñtña noch nepen ñeñtña nachor nepen.

13

All toma'ntatanet Jesús ñeñt a'parre'tene' puerets

(Mr. 4.1-9; Lc. 8.4-8)

¹ Ñeñte yetropa' cha'nerrerr Jesús pocolotpa' anorruerr sa'patopño.

² Allñapa' emchorra'huererr shonte' acheñenesha' ñeñto'marña Jesús'pa' a'tap noñtopa' ahuanpes mame' allpononet allñapa' anorros noñto. Acheñenesha'ña allohuenetpa' alla tomcha'tet sa'patopño.

³ Allñapa' esocmañen yechatyenan acheñenesha' pa'namen toma'nteñtso'chno. Ñeñt ñanompa' atet otanet:

—Ñeñtña a'parrene' puerets ñaña'pa' ahua' allcha' a'parre'tyenana' puepuer.

⁴ All a'parre'tyeñ patanta'tetsñapa' alla chapyes toño'mar. Allñapa' hua'cha'tyesa ot e'ñe añyallmechuenana' puerets.

⁵ Po'poñe'chnoñapa' alla chapyes mapuetro'meso'mar all ama tama eñalle pats. Ama nanac o'pono'tseno patso ñeñto'marña mame'tollapa' cheparesuañ.

⁶ O'ña enome'ta'muen atsrretpa' alla a'uyatuer. Ama ercha'tena' ñeñto'marña alla hueya'huerra.

⁷ Po'potantañña pueretspa' alla chapyes allcha' chepares aj. Allpa'cho' mameshapa' cheparesuañpa' ajñapa' mameshapa' atesha'tua alla ca'matuerrañña narmets alla a'c'latuer.

⁸ Po'potantañe'chno ñeñtñapa' arr chapyes all e'ñe cohuen patso. Ñeñtñapa' e'ñe cohuen chepares. Allempoña atesha'tuapa' ñeñtñapa' atarr aton ellonire'tyes—puecha'tetspa' charroch charra' pue'llomer, po'pchañe'chnopa' pechapoch charra' pue'llomer, po'pchañe'chnopa' ma'poch charra' pue'llomer.

⁹ Allempoña Jesús'pa' alla oterraneterr:

—Ñeñtes po'ño'ch ne'mñotene', chaponasepa'ch seyo'chro ñeñt atet netma'ntatensa añ ñoñets.

Atet otanet Jesús ñeñtecop atet toma'ntatyenanet

(Mr. 4.10-12; Lc. 8.9-10)

¹⁰ Allempoñapa' ponemña pueyochresha'pa' atet otoset:

—¿Eso'mare'tña peserrpare'teño'tpa' atta es petma'ntatyenanet?

¹¹ Jesús'pa' atet oterraneterr:

—Sa te'pa' Yompörña o' muenaterres attoch seño'terr ñeñt ama eñotpahuoyaye ama't ahuatoteñ ñeñt atet penaña Yompör po'cohuenña atto ayochreshattena ña pue'ntaño't. Tarraña po'potantañe'chnoñapa' ñeñt atta es pue'cha'yetsa, ñocpuetñapa' amach erro'tenot eñoterrñañeto Yompör po'cohuenña.

¹² Esha'te' o' cherranet pueyo'chreto ama't e'ñe allpona Yompör po'ñoñ elloña Yompörpa' allo'nach eñotatnenanet nanac shonte'. Tarraña esesha'ña ñerra'm ama chenaneo pueyo'chro tarro'mar ñetpa' ama po'ño'chaye' aguññañeto Yompör po'ñoñ, ama't allpon eñotyenetañ pueyo'chro ñeñtñapa' chach puerratañperranet Yompör.

13 Ñeñto'marña ama't neserrpare'tatenanet toma'nteñtso, ñocpuetñapa' ama eñoteñetoña ñeñt atet netma'ntatenanet. Attoña ama't enteñetañ, ñetñapa' ama amnataretteneto o'ch es chapahuet pueyoçhreto. Ama't e'mueñetañ amaña çhenanetoña pueyoçhreto ñeñt atet yeçhateney Yompor po'cohuenña.

14 Atet penet ñetpa' te'ñapa' po'ñoçh o' etsotua Isaías po'ñoñ ñeñt a'mtaye't Yompor po'ñoñ ahuat. Ñeñtpa' atet ote't Yompor:

Ama'tcha' po'ñoçh e'mueñetañ ama't e'ñe ahuatapa' amach çhapanetoña pueyoçhreto. Ñaña ama'tcha' çho e'ñe es entenetaña' amach çhapanetoña pueyoçhreto.

15 Tarro'mar ñeñt acheñenesar te'ña ñet pueyoçhretopa' nanac echarrtenet attoçhña amach es çhenahueto pueyoçhreto. Te'ña ñetpa' amach mueneñeto o'ch es e'mñotet taye'to'te' es çhenahueto pueyoçhreto. Te'ñapa' amach mueneñeto o'ch es entet taye'to'te' çherranet pueyoçhreto. Attoçhña amach es cotape'cherreto nocop ama't e'ñe mamesha attoçhña na'quesp̄aterranetañ.

16 Allempoña Jesúsapa' alla oterranerr pueyoçhresha':

—Saña po'ñoçhpa' atarr cosheñtso'tsenes sa tarro'mar atto o' senterrñañ Yompor po'cohuenña seclloyot te'ñapa' o' e'ñe çherrnasa seyoçhro. Ñaña atto se'muerrñañ Yompor po'ñoñ, te'ñapa' o' e'ñe çherrnasa seyoçhro.

17 Po'ñoçhca'ye notenes e'ñe ahuatoteña' shonte' ñeñt a'mta'yesaye't Yompor po'ñoñ ama't ñaña ñeñt e'ñe pocte' es p̄a'yestse't allempo, ñetñapa' atarr muenetañe't o'ch enterrñañetañ Yompor po'cohuenña ñeñt o' senter sa te'. Tarraña allempo ñetpa' amaña eseshaye'ña enterrapaye Yompor po'cohuenña. Ama't atarr muenetañe't o'ch e'mñoterrñañet Yompor po'ñoñ ñeñt o' se'muerr sa te'. Tarraña allempo ñetpa' amaña eseshaye'ña e'muerrapayeña Yompor po'ñoñ.

*Arrpa' all eñotatanet Jesús ñeñt toma'ntatenanet ñeñt a'parre'tene' puerets
(Mr. 4.13-20; Lc. 8.11-15)*

18 Jesúsñaapa' alla oterranerr pueyoçhresha':

—Ñeñto'marña te' sapa' se'mñoten o'ch neñotatas ñeñt atet yeçhateney ñeñt atet o' netma'ntatua atet ñerra'mrrate' puesheñarr ñeñt a'parrene' puerets.

19 Ñehua, añ puerets ñeñt çhapyesets toño'mar, ñeñtpa' añ notenes acheñenesha' ñeñt e'mñotenayeñ Yompor po'ñoñ ñeñt atto ayochreshattena ña. Ama't e'mñotenetañ tarraña ama çhenaneto pueyoçhreto ñeñt po'ñoçh atet oteney Yompor. Ñeñto'mar allorocmach huapa oneñetpa' o'ch alla puerratamperranet Yompor po'ñoñ e'ñe pueyoçhretot.

20-21 Ñaña ñeñt çhapyesets mapuetro'meso'mar ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech allorocma pocsheñsha' aguëññañetañ Yompor po'ñoñ. E'ñech cohuen ame'ñeretañ tarraña ñeñtpa' mamecpach atet penet. Tarro'mar ñetpa' e'ñe atet penet ñerra'mrrate' narmets ñeñt chepuets mapyo amach eñalle puereçh. Tsapatoneña ñerra'm o'ch huapanet topateñets ñeñtcha' mueroçhtatahuet tarro'mar ñetpa' o' ame'ñeretañ Yompor po'ñoñ, ñetñapa' allorocmach alla queçhpuerretña Yompor po'ñoñ.

22 Ñaña puerets ñeñt çhapyesets ajmo'mar, ñeñtpa' añ netma'ntatena po'potantañ acheñenesha' ñeñt e'mñotenayeñ Yompor po'ñoñ. Ama'tcha' çhapanetañ pueyoçhreto, tarraña ñetpa' allo'nach senet e'ñech añ atarr cotape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es echyenet, tarraña ñeñtpa' çhaca'ye shequënanet. Attoña ñetpa' amach errotenot orrtatyesñañetoña ñeñt e'ñe cohuen enten Yompor. Ñetpa' e'ñe atteta ñerra'm narmets ñeñt cha a'cllaten ajma' ñeñto'marña amach errotenot me'teneto o'ch ellom̄re'tyeset.

23 Ñaña añ puerets ñeñt çhapyesets e'ñe cohuen patso ñeñt e'ñe cohuen chep-arsatspa' ñeñtña toma'ntenaya po'potantañ acheñenesha' ñeñt e'mñotene' Yompor

po'ñoñ, ñoñetspa' e'ñech cohuen chenonet pueyoçhreto. Ñetñapa' ñeñtet po'ñoçh orrtatyetnet ñeñt atarr sherbets Yomporecop. Attoña ñetpa' e'ñe atet penet ñerra'm narmets ñeñt atarr aton ellomre'tyets—pate'tets çharroch çharra' pue'llomer, po'poñpa' pechapoch çharra' pue'llomer, po'poñpa' ma'poch çharra' pue'llomer.

Atto Jesúsapa' toma'ntaterranet atet pena ñeñt a'parre'tene' ta'tllom e'ñe all a'parraret cohuen trigo

²⁴ Allempoña Jesúsapa' alla toma'ntaterraneterr, ñeñtpa' atet oterraneterr:

—Yompor po'cohuenña ñeñt atto te' ayochreshattena ña pue'ntañot, ñeñtpa' atet pena ñerra'mrrate' pueheñarr yacma ñeñt a'parrene' cohuen puerets pa'mro.

²⁵ E'ñe cohuen a'parre'tuepa' tarraña allempo manrrenet allohuenet, e'ñe't a'nahua huapa ñeñt e'moñe'tene'pa' allñapa' ahuo't a'parre'tyesuenana' ta'tllom e'ñe all a'parraret cohuen trigo. Ahuo'tña a'parre'tueña'pa' o' ahuer a'nahua.

²⁶ Narmetsñapa' o' cheparesua o' me'tyesuapa' allempoñapa' entet ñaña ta'te' o' chepares epuet trigo.

²⁷ Allempoñapa' huacha'ta pamo'mte' pa'taruasañer, ñetñapa' atet otoset: “¿Ama't, Nomporcha' cohuenaye' pa'parrenoña puerets pa'mro? Erroteno'tuañaca'ye o' chopña ñaña ta'te' all.”

²⁸ Ñaña'pa' atet otanet: “E'ñeca'ye cohuen na'parrañña nepuer all. Ñeñt ne'moñe'tene'pa' ñeñte'ca'yeña o' atet pampsen.” Pa'taruasañerñapa' atet ochet: “¿Ama't pemno o'ch ahuey o'ch ya'mare'tuerra'ña ta'te'?”

²⁹ Ñaña'pa' atet otanet: “Amachca'ye sa'mare'tatsche te't cha sa'marampennan netrigor.

³⁰ Allepa' chepuepa' epuet. Esemepoch pomella'hua trigopa' allempochña noch ñeñtcha' a'yapa'che' trigo: Ñanomcha' añ sa'yapa'cha' ta'te' o'ch sehuancachmech attoch ya'poyatater. Sehuanca'huepa' çoscha'ña a'yapa'che'ña ñaña trigo o'ch sañño'teña' allecma neshontateñ.”

Atto Jesúsapa' toma'ntaterranet atet pena pue'llomer ñeñt otenet mostazllom (Mr. 4.30-32; Lc. 13.18-19)

³¹ Allempoña Jesúsapa' alla oterraneterr:

—Añ Yompor po'cohuenña ñeñt atto ayochreshattena ña pue'ntañot, ñanompa' e'ñech pueheña'ttsa ame'ña'yetsa. Allempoteñapa' allo'nach sen atonetnomtsa ñeñtcha' ame'ñerrtsa attochña e'ñe epa'huerra erracmañen Yompor po'cohuenña.

Ñeñtpa' añ toma'ntaterraneterr mostazllom:

—Ñeñtña pue'llomretollpa' pueheñarrñapa' o' anem pa'mro allcha' nare'teña'.

³² Ñehua, e'ñe yeñoteñ mostazllom ñeñtpa' atarrca'ye nanac añeñolleshallmerr, tarraña ñerra'm o'ch yenare'chpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ narmetsoçhno. Ñeñtña narmetsocherpa' o'ch huacha'toña o'çhno ñeñtcha' ama'tanatyesosets puetacro'mar.

Atto Jesúsapa' toma'ntaterranet ñeñt atet pena chase' (Lc. 13.20-21)

³³ Jesúsapa' alla serrpare'taterraneterr ellonet ñeñt atet pena Yompor po'cohuenña ñeñt atto atarr ayochreshattena ña pue'ntañot. Ñeñtpa' ama'tcha' añeñolla ñeñtcha' ñanom orrtatsa tarraña e'ñe ña po'huamenco't mame'tollapa' o'ch e'ñe epa'hua ora erraparen. Ñeñtpa' añ toma'ntaterraneterr atet pena chase':

—Ñeñt chase'pa' allo tsetenan coyanesha' harina' ñeñt oñetsetstaten attoch a'chasatan harina' esheccha' e'ñe a'muesatue. Ñeñtña chase'pa' ama'tcha' añeñolla net, ama'tcha' aton harina' ñeñt ma'pa arroga, mame'tollapa' o'ch e'ñe a'muesatuanña ama't atarr aton harina'.

Jesúsapa' ora allpon ñeñt atet yechatyenanan acheñenesha' ñeñtpa' attoña pa'namenot es toma'ntatyenanet

(Mr. 4.33-34)

³⁴ Ora allpon ñeñt atet yechatenan Jesús acheñenesha', ñeñtpa' atto es toma'ntatyenanet. Allempopa' ama serrpare'tataneto e'ñe atta, chocmaña serrpare'tatenanet toma'nteñtso.

³⁵ Attoña o' etsoterra ñeñt atet ote't ñeñt a'mtaye't Yompor po'ñoñ ahuat ñeñt atetcha' yechaterr Cristo:

Napa' neñerrcha' e'ñe toma'nteñtso; na'poterrcha' ñeñt ama a'potareteyaye ama't ahuatoteñ allempoteñ Yompor yeçcatan añ patser.

Atto Jesúsapa' eñotaterranet ñeñt atma'ntatarettetsa ta'tllom epuet trigo

³⁶ Alotña Jesúsapa' sa'nman acheñenesha'pa' o' çherr pocollo. Allña huaçha'toña pueyochresha'pa' atet otoset:

—Te'pa' o'ch potey e'ñe eñotoçhen ñeñt toma'ntena ta'te' ñeñt chepuets pa'mro.

³⁷ Ñañapa' atet otanet:

—Ñeñt nare'tene' e'ñe cohuen pueretspa' ñeñtpa' naca'ye Ñeñten Acheñetosets.

³⁸ Ñeñt na'muer nepenpa' ñeñtca'yeña aña patser. Ñeñt cohuen pueretspa' ñeñtca'yeña Yompor pueyochresha' ñeñtcha'ña çherrets all añcha'tarettena Yompor. Ñeñt ta'te'pa' ñeñtca'yeña oneñet pueyochresha'.

³⁹ Ñeñt e'moñe'tene' ñeñt nare'tamipse' ta'te' ñeñtca'yeña oneñet pompor. EsemPOCH çherr allempoch pomella'huapa' ñeñtpa' añ toma'ntena allempochña mellapoterra. Ñeñtcha'ña a'yapaçherretspa' ñeñtca'yeña mellañoteñnanesha' ñeñtcha' huaçha'ttsa entot.

⁴⁰ Atet apçhenet ta'te' te' o'ch a'poyatachet tsopa' atetcha' perrñañetña oneñet pueyochreshaçhno allempoch mellapoterra.

⁴¹ Ñehua, na Ñeñten Acheñetosetspa' nach mueñerre' nemllañoñeñnanesha' ñeñtcha' a'yapaçha'tuerre' allohuen ñeñt cotape'chatyenahuet sosey ñaña allohuen ñeñt e'ñe aña etsotayen patpareñ. Arrotcha' a'yapaçharettterra allo'tsa'yen ñaña Yompor pueyochreshaçhno, ama't e'ñe all ayochresha'tttena ña.

⁴² O'ch e'ñe a'yapaçharetetuerretpa' allempochña asaprrotarettet o'pono all huorten tso'. Allñapa' allcha' yahuanrrorterret, panmueño'tet atserrpa' rraso'tyerretcha' pa's.

⁴³ Allempoña allohuen ñeñt e'ñe pocte' es pa'yets ñetñapa' poptetsetach e'ñech atet ñerra'm atsrret. E'ñech cohuen popuetyenet all añcha'tarettena ñeñt pompor penet. Allohuenes ñeñtes ne'mñotene' neñoñ çhaponasepa'chña seyoçhro ñeñt atet notenes.

Atto Jesúsapa' toma'ntaterraneterr shonte' quelle ñeñt e'potarettetsa patso

⁴⁴ Po'pocheño Jesúsapa' alla toma'ntaterranet po'poñoneñ. Ñeñtpa' añ toma'ntatanet Yompor po'cohuenña atto atarr ayochresha'tttena ña, ñeñtñapa' atarr aye'choçhen. Ñeñtpa' atet toma'ntatanet ñerra'mrrate' shonte' quelle ñeñt e'potarettetsa e'ñe patso. Ñeñtña quelle puesheñarr yacmapa' machayotach entos. O'ña entuepa' o' alla pampa'ner ñañapa' o' ahuerr e'ñe pocsheñesha' allenta pomhuahuerran ora ñeñt allpon eçhyen allochñapa' attoch echan quelle alloch rañterrana ñeñt patser allo'tsen quelle. Attochña ganam'perrana atarr shonte' quelle ñeñt atarr ye'chena.

Atto Jesúsapa' toma'ntaterraneterr ñeñt atarr coçhnesha' serets

⁴⁵ Po'pocheñoapa' atet toma'ntaterraneterr:

—Yompor po'cohuenña atto atarr ayochresha'tttena ña ñeñtpa' atarr aye'choçhen atet ñerra'mrrate' ñeñt atarr coçhnesha' serets. Puesheñarrña ñeñt pomatsre'tyetsa ñeñtach atarr e'nyen ñeñtcha' rañña.

⁴⁶ Pamtarrñapa' entosan serets ñeñt' atarr nanac cochnesha' ñeñt'ñapa' atarr tsa'te'. Ñaña'pa' allentach ahuerr o'ch pomhuahuerran ora ñeñt' allpon echyen allochñapa' attoch echan quelle alloch rañt'errana serets ñeñt' atarr nanac cochnesha'.

Atto Yompor po'cohuenña e'ñe atet pena ñerra'mrrate' añecmuen terraya

⁴⁷ Jesús'pa' alla toma'ntaterraneterr; ñeñt'pa' atet otanet:

—Yompor po'cohuenña atto atarr ayochreshattena pue'ntañot' ñeñt'ñapa' e'ñe atet ñerra'mrrate' terraya añecmuen. O'ch terrayet sa'popa' o'ch e'ñe ap'cha'huan allohuen pa'namen caca'chno.

⁴⁸ Ñerra'm o'ch e'ñe chorra allempoñapa' o'ch chetam'peret top'ñaso, o'ch anorr'cha'tet allcha' acret ñeñt' e'ñe cohuenare' ñeñt'cha'ña esha'tanetet puecañtro. Ñeñt'ña ama cohuenayayepa' o'ch saprochet.

⁴⁹ Ñeñt'pa' atet'cha'ca'ye perraña allempoch mellapoterra. Cha'nma'cha'tcha' mel-lañoteñnesha' ñeñt'cha' ellopa'tetstaterre' ñeñt' atsrre'mñañnesha' ñaña ñeñt' e'ñe pocte' es pa'yets.

⁵⁰ Ñeñt'ña atsrre'mñañnesha'pa' huapore'teretcha' o'pono all huorten tso'. Allñapa' allcha' yahuanrrorterret, panmueño'fet atserrpa' rraso'tyerretcha' pa's.

Attoch e'ñe cohuen yorrtatyen co'ap'ñats ñeñt' ahuatoteñ atarr sherbets ñaña attoch e'ñe cohuen yorrtatyen co'ap'ñats ñeñt' e'ñe etserra atarr sherbets

⁵¹ Allempoñapa' allenta a'p'to'tanet:

—¿Eñoto'chena't sentenña allohuen ñeñt' atet notyenes?

Ñet'ñapa' atet ochet:

—Eñoto'chenca'ye yenteñ.

⁵² Allempoñapa' atet otanet:

—Ñeñto'marña ama't allohuen erra'tsen ñeñt' atarr etsotene' ñoñets ñeñt' atet anaret' ahuatoteñ, ñerra'm elloña ay'chatarettet ñamet ñeñt' atet pena Yompor po'cohuenña atto atarr ayochreshattena ña, ñeñt'ña acheñer atarr'cha' cohuen orrtatenan co'ap'ñats ñeñt' ahuatoteñ, elloña cohuencha' orrtaterran ñaña ñeñt' e'ñe etserra co'ap'ñats. E'ñech atet pena ñerra'mrrate' ñeñt' apacllatesha'. All añño'tyenan ñeñt' atarr morrentena erro'tenopa' o'ch orrtatenan ñeñt' errete' añño'ten all; erro'tenoñapa' o'ch orrtatyenan ñaña ñeñt' añño'ten ahuatoteñ all pa'paclo.

*Allempo serrpare'tatan Jesús acheñenesha' all Nazareto
(Mr. 6.1-6; Lc. 4.16-30)*

⁵³ Serrpare'tatuanet Jesús ñeñt' atet toma'ntatyesanet, ñaña'pa' ahuererr' allot.

⁵⁴ Cherr pa'nyo all Nazareto ye'chatuerraneterr all po'prahueto. Allñapa' nanac cohuanrrorteñet, atet otyeñet:

—Ñapa' errahuañaca'yeña eñotanña ora allohuen ñeñt' atet pa'yena. Esha'huañaca'yeña eñotatene'ña atto' orrtatenan partsoteñets.

⁵⁵ Ñapa' aña puechemer ñeñt' po'taruas pene' o'ch torrenana tsach attoch es ye'chcatyen pa'namen. Pachorpa' aña María. Pa'mo'nasheñpa'cho'ña aña Jacobo, José, Simón, Judas.

⁵⁶ Allohuen po'chanesha'pa' e'ñeca'ye yechme'tuenanet parro'marneshayarramche'. Ta'm ñaña'pa' erro'tenotte'ña atarr es eñotyen.

⁵⁷ Ñeñto'marña all e'ñe ña pa'nyo ama eseshaye' acua'penaye entenaye. Allempoña Jesús'pa' atet otanet:

—Ñeñt' a'm'tene' Yompor po'ñoñpa' chocmaca'ye añcha'na'tpo' entyeñña allohuen acheñenesha', arrña pa'nyo allo'tsen e'ñe ña pamo'tsna'tarnesha' ñet'ñapa' ama

acua'penaye' enteñeto. Ama't ñaña ñeñt parro yeçhenet pa'paclette, ñetpa'cho'ña ama acua'penaye' enteñeto.

⁵⁸ Ama ame'ñeñeto ñeñto'marña allpa' ama atonocheye' orrtataneto po'partsoña.

14

Allempo e'ñe cohuen es orrtatyes Jesús, Herodesñapa' cha otapañ Juanañe' o' tanterra ñeñt apataye't acheñ Yomporecop

(Mr. 6.14-29; Lc. 9.7-9)

¹ Allempoña añcha'taret Herodespa' e'mare'tenan atet pa'yena Jesús. Ñehua, Herodespa' all añcha'tare'tena anetso Galileo.

² Allempoñapa' atet otan ñeñt sherbene':

—Añepa'tca'yeña Juanañ ñeñt apataye't acheñ Yomporecop; ta'mca'ye cha'te'ca'ye tanterraña rromot. Ñeñto'marte'ca'yeña te'pa' orrtaterranña partsoteñets.

³ Ñehua, allempopa' ahuañmo'chacma rrematenana' Juanañ o' huancachpa' allña yottam̄psach attoch coshatan Herodías ñeñt pa'mo'nasheñ Felipe puetapor.

⁴ Tarro'mar Juanañpa' ña otaye't Herodes:

—Amaca'ye pocteyaye o'ch peyoram̄pes pemo'nasheñ puetapor.

⁵ Ama't atarr mueneñeñ o'ch muetsatacheñ e'ñe allempocma tarraña Herodespa' mecha'tenan acheñenesha' ñeñto'marña ama eshcaye' muetsatache. Tarro'mar acheñenesha'pa' e'ñe cohuen enteñet Juanañ atet ñerra'mrrate' ñeñt a'mítene' Yompor po'ñoñ.

⁶ Allempoña coshame'tapreteñet Herodes allempo eñalletña allñapa' o' tancsosa Herodías puechoyor.

⁷ Herodesñapa' ñeñta atarr cohuen ent. Ñeñto'marña och:

—Na po'ño'chpa' o'ch nena' neñoñ e'ñe Parets pa'so'chño, ama't es penamuenpa' napa' napa'pcha'.

⁸ Pachorñapa' allenta otare'ch e'ñe a'nahua:

—O'hua p̄ochte' añcha'taret: “Añcha' p̄apuen Juan poñ.”

Allempoña shopshesha'pa' atet otan Herodes:

—Napa' añ nemnen o'ch pepechennana' Juan poñ ñeñt apataye't acheñenesha', o'ch penon platopa' o'ch p̄aphuerren e'ñe arrma.

⁹ O'ña enamhuepa' añcha'tare'tñapa' cha lleca. Tarraña ama't llecañpa' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñt hua'ñen ñeñt e'muene' atet oten ñeñto'marña otanet:

—Te'pa' o'ch sañ Juan poñ.

¹⁰ Allempoñapa' o' mueñan pa'cheñer o'ch pecheñeta' Juan all yottam̄peñet.

¹¹ Allempoña o' huapaterrñañet poñ platopa' aphueret shopshesha'. Ñaña'pa' anem̄ pachorecho o'ch apueña'.

¹² Allempoñapa' ahuanma Juanañ pueyochresha' o' aneret apecharet o'ch pam-puereta'. O'ña pampa'huereta'pa' o' ahuanerret o'ch e'mare'tateñeta' Jesús.

Allempo Jesús'pa' rratenan shonte' acheñenesha'; ñeñña acheñenesha'pa' allo'tsen am-naroch mil

(Mr. 6.30-44; Lc. 9.10-17; Jn. 6.1-14)

¹³ Jesús'pa' allempo e'mare'tan Juanañ, ñaña'pa' ahuañpes noñto o' sa'nman acheñenesha' o'ch ahuo' all ama acheñempaño'ye. Acheñenesha'ñapa' allempo e'mare'chet ñetñapa' allenta ahuanmuet ñamet. Allohuen anetso'tpa' e'ñe ahuanmuet o'ch entereta' Jesús. Ñetñapa' alla oñmacha'tet patso'mar.

14 Allempoña sehuosa Jesús noñtōtpa' alla entuerraneterr o' alla shonta'huerrerr acheñenesha'. Ñañaapa' atarr nanac muera'huerraneterr. Allñaapa' o' alla a'crratyesuerraneterr patsnañēter.

15 Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempañoayē ñaña o'ca'ye ellerren. Te'pa' o'ch pōch acheñenesha' ahuanemyerretepa' anetso'mar allcha' rañña'yesuerret puerraret ñeñtcha' rra'yesuerret.

16 Jesúsñapa' otanet:

—Amachca'ye ahuanmatsterreto. Sachca'ye apa'yesahuet ñeñtcha' rret.

17 Ñetñapa' atē ochet:

—Ya arrpa' amaca'ye es yechenoña ama't coñē'ta; yapa' e'ñeca'ye amnara pan yechen ñaña epatoll cac.

18 Allempoña Jesúsapa' atē otanet:

—Sanmon arrma o'ch sapuenna'.

19 Allempoñapa' otan acheñenesha':

—Te'pa' o'ch sanorrcha'tyes e'ñe all cohuen emmo'ratyen pasetma'.

Allempoña agapan ñeñt amnar pan ñaña epatoll cac, o' cohua' enonet, parasyoso'tam̄psan pan alloñña' shota'tan pan, apanatyesan pueyochresha'. Ñetñapa' o' epatyeset allohuen acheñenesha'.

20 E'ñe epa'huet, allempoña o' rrallme'chet allohuenet e'ñepa'tcha' yettra'tuahuet. E'ñe yetuahuetpa' cha a'pchatyeset ñeñtñapa' a'yapacheret. Ñeñtña a'yapacherretepa' chepa'tcha' chorrats charra' puechena epa cañter e'ñe tamo'yare'.

21 Ñeñtña rrallme'chatspa' atarr shonte' acheñenesha'; ñato' allo'tsente' amnaroch mil ñeñt e'ñe yacmaneshoche'. Ellonetpa' allo'tsa'yen ñaña coyaneshachno ñaña cheshaneshachno.

*Atto Jesúsapa' e'ñe cohuen chope'chnen enot oño
(Mr. 6.45-52; Jn. 6.16-21)*

22 Allempoña Jesúsapa' otan pueyochresha':

—Te'pa' o'ch sa'tacha't noñto o'ch sota sanom o'ch sepchatterra yoť. Napa' o'ch neso'tnom̄ ora acheñenesha'.

23 O'ña so'tuanmanetpa' ñañaapa' ahuo' aspeno e'ñe ñapueť allña ma'yochosa. Ama't o' tsapuenpa' ñañaapa' allo'tsena ñapueť.

24 Noñtñapa' ñeñtña rrochaso'tsenara sa'po, emo'yare'ñapa' cha anmape'cham̄penanet, a'puerrame'tam̄penanet orno.

25 Atteña allempoña puetarenmochpa' huenanet Jesús cha chope'chnen enot oño.

26 All chope'chnen allempoña entapueñ pueyochresha', ñetñapa' cha toratsetyeset pueyochret, atē otanna'tyeset:

—Choyeshe'matste'ca'ye huaponaya.

Pueyorñotetpa' atta rrannartet.

27 Jesúsñapa' eñorana'tuenanet, atē otuenanet:

—Choñaca'ye socshapuenna, naca'ye o' nohuapa, amach atta señcha'tatstapno.

28 Allempoña Pedropa' eñorana'cha ñeñtapa' atē och:

—Ñerra'm po'ñochte' pa Partseshacha', te'pa' o'ch pōtosēn, aponca'ye nesho, pe-chope'chnom p̄ama enot oño.

29 Jesúsñapa' allenta och:

—Aponca'ye.

Ñañaapa' allenta sohua noñtōtpa' o' chope'chnom ñaña enot oño o'ch ahuo' Jesúsesho.

³⁰ Chope'chnomtsapa' o' cohua'nman huomenquësha' ñeñt' cha emo'yartatenan sa'ppa' cha yore'ch. Cha yore'chpa' alla muene' esha'ta oño. Allñapa' rranare'ta atet otan Jesús:

—iPa'queshpatosen Partseshacha'!

³¹ Jesúsña tecma rrema'ppa' atet och:

—Papa' ama't e'ñeye' peyemtenno. Eso'mare't cha pe'charrtatenña peyo'cher.

³² E'ñe a'tacha'tatseta noñtopa' huomenquësha'ñapa' chepa'tcha' muetsoñeñterrtsa.

³³ Ñeñña noñto'tsa'yenpa' allentepa'tcha' concorpanrrortana'tapetpa' atet otyeset:

—Po'ño'che'pa't p'apa' e'ñe Parets Puechemerep'.

Allempo Jesúsapa' a'crratyesosan pa'namen atsnañe'echno all Genesareto

(Mr. 6.53-56)

³⁴ Allempoña pechatam'psetpa' arr etsotoset all oteñet Genesareto.

³⁵ Ñeñña ane'tañesha' allpa' o' cheme'tapet Jesús. Atto cheme'tapetpa' ñetñapa' allenta mueñet acheñ, o'ch e'mare'tatenana' acheñesha' allampaño'mar. Allotñapa' huapatyesoñet allohuen atsnañe'echno.

³⁶ Ñeñña atsnañe'echnopa' o' enamyoset ama't poso'mota o'ch a'p'lla'yesosñañet pa'shtam. Allpon ñeñt' a'p'lla'yese' Jesús pa'shtam allpon'cho' e'ñe corra'yesuerrtsa.

15

Atto Jesúsapa' eñotatenanet ama añeye' ya'sosyatenaye Partsocop ñeñt' yerra'yen yenamot

(Mr. 7.1-23)

¹ Allempoña fariseonesha' ñaña ñeñt' atarr etsotayenayeñ ñoñets ñeñt' atet anaret judioneshacop ñetñapa' arrot hua'cha'tet Jerusalénoñ. Cha'cha'tet Jesúseshopa' atet otyeset:

² —Eso'mare'tña peyochresha'ñapa' que'chpuerretña ñeñt' atet yey'che't ya ahuat yatañeshohuen. Ñeñto'mar o'huañ e'pota'tetña Partsocop allempo rrenet.

³ Ñaña'apa' atet otanet:

—Sapa'cho'ña ñeñto'mare'trraña satpare'teññañña saña Yompor po'ñoñ ñeñt' atet anaret allochñapa' e'ñech sañeña sey'cheña e'ñe setsotayen.

⁴ Ñehua, po'ño'chca'ye yeñoteñ Yomporpa' atet otene: “Semorrenteño'tpa' sem'cha'na'chcha' sompor ñaña sachor.” Elloña ñaña po'poñone't atet otene: “Ñerra'm esesha' sasare'tene' pompor ñaña pachor ñeñtpa' muetsetepa'.”

⁵ Tarraña sañapa' amaña atteye' sepeno tarro'mar sapa' chaña atet sotyen:

—Ñerra'm esesha' atet otene' pompor ñaña pachor: “Ñeñt' nechen o'ch napapeña' tarraña amach napape te'pa' o'ch nene' Yomporecop”

⁶ ñeñña acheñerpa' sañapa' atet'cha' soteñ: “Pocoppa' ama pallteno o'ch es p'ap' pamo'mte'.” Sapa' attoca'yeña sehuapore'teññañña Yompor po'ñoñ allochñapa' e'ñech aña setsoten ñeñt' e'ñe sañeña sey'cheña.

⁷ Sapa' atarrca'ye ommoñañeshas tarro'mar atarr seshcare'ten amaña Yomporeye'ña sesherbena. Isaiáspa' e'ñe cohuen a'mtane't Yompor po'ñoñ, saña te'pa' e'ñe atet sepena atet ote't; allempopa' atet ot Yompor:

⁸ Ñeñt' acheñesharpa' e'ñe puenamota cohuentatennanetañ; pueyo'chretoñapa' ama chenaneo ñeñt' cohuen nenten na.

⁹ E'ñe orrena ma'yochennet, ñeñt' atet ye'chatannenetpa' ñeñtpa' e'ñe acheña naye't ahuat po'capña.

¹⁰ Allempoña Jesúsapa' chore'tan acheñesha' ñeñt' shontetsa, ñetñapa' atet otanet:

—Sañapa' e'ñepa'chña cohuen se'mñoten allochñapa' attoch e'ñe cohuen chaponasa seyo'chro.

11 Ama añeye' ya'sosyatenaye Partsocop ñeñt' yerra'yen yenamoť. Añca'yeña ya'sosyatene' yeñoñ ñeñt' čha'nets yenamoť ñeñt' atet yeñosatse'tyen.

12 Allña'pa' atet oteña' pueyochresha':

—¿Peñoteñe't fariseonesha'ñapa' allempo e'monapet peñoñ ñeñt' atet ptyenanet ñetña'pa' čha' atsrre'muet?

13 Ñaña'pa' atet toma'ntatanet ñeñt'cha' atet a'paretterra fariseonesha', ñeñt'pa' atet otanet:

—Allohuen narmetsočno ñeñt' ama añeye' nare'taye Apa ñeñt' pue'ntaño'tsen ñeñt'ña'pa' a'mare'taretetuerrach.

14 Ñetpa' ottetepa'ta. Ñetpa' e'ñe atet penet ñerra'mrrate' puesheñarr ñeñt' aporo'yetpa' ñapa' o'ch echa'nman po'psheñeñ ñeñt' parro aporo'yetecmuet. Allempo atet penet ñerra'm arroroťonťa echa'nmanna'tnomuet epsheño'maret čhach shora'nmoset arroroťo. Arrpa' allohua ñeñt' atet toma'ntatanet atet ñerra'm ya allempo ama yocťape'cherra' ñeñt' cohuentetsa Yomporecop amach erroťenot yocťape'chache po'psheñeñ ñeñt' ama eñotenaye ñeñt' cohuen enten Yompor.

15 Allempoña Pedropa' atet ot:

—Yapa' čochña peserrpare'tatey e'ñe cohuen eñotochen ñeñt' atet petma'ntatena ñorra'.

16 Ñaña'pa' atet otanet:

—Ama't sapa'čho'ña ama'tña señoťeña'.

17 Sapa' ama't čhennasoña seyočhro ñeñt' yerra'yen yenamoťpa' alla sen yaťo ñeñt'pa' čhocmach yener a'yo.

18 Añña ñeñt' čha'nets yenamoť ñeñt' atťo yeñosatse'tyen ñeñt'pa' e'ñe yeyočhroť huena ñeñt'ña' chocma ya'sosyatene'ña Partsocop.

19 E'ñe yeyočhroť huena cota'pñats ñeñt' ama't mameshapa' ama cohuenayaye, ñeñt'pa' añ: muetsanna'teñets, četapretanna'teñets, cañoresha'teñets, etatsre'tyeñets, toma'tam'psanna'teñets, sasare'teñets.

20 Ñeñt' allohuen sosya'tsañečno ñeñt' huetsa yeyočhroť ñeñt'ña' po'ñočh ya'sosyatene' Partsocop. Tarraña allempo yerrallme'chyen ama't ama ye'pota'tyesopa' ñeñt'pa' amaña ñeñt'eye'ña ya'sosyatenayeña Partsocop.

Atťo puesheñarr coyanesha' ñeñt' ama judioneshayaye ñapa' atarr yemtapana Jesús (Mr. 7.24-30)

21 Ahuerrerr Jesús allotpa' alla čhap allampaño anets Tiro ñaña Sidón.

22 Allña'pa' o' huapa puesheñarr coyanesha' ñeñt' allo'marnesha' ñeñt' canano'marnesha'. Ñaña'pa' allenta rranare'tospa' atet otos:

—Pemueraye'chosna, Nepapareshacha' p'apa' ñeñt'ep Davidna'tarep. Na nacñe'terpa' atarr mueročhtateñ oneñet.

23 Jesúsña'pa' ama't mameshapa' ama eñorana'teño. Atteña'pa' o' ponemña pueyochresha' otoset:

—Pe'mñochñaca'ye tecma allochña'pa' o'ch ahuerri, čhaca'ye cota'neney perranare'tnomue'.

24 Ñaña'pa' atet otanet:

—Napa' e'ñe añecpa allsensareten ñeñt' israelena'tarneshacop; ñetpa' e'ñe atet nentenanet ñerra'm carrneročno ñeñt' paya'tyetsa.

25 Coyanesha'ña ñeñt' ama israelena'tareyayepa' ñaña'pa' allenta on e'ñe ñesho concorposña'pa' atet otos:

—Choña Nepapareshacha' pebensam'psaye'cherrnan nacñe'ter.

26 Jesúsña'pa' toma'ntatana achenesha' ñeñt' ama israelena'tarneshayaye ñeñt'o'marña atet och:

—Ama pocteyaye o'ch yeprratam̄pes yacñeñar puerrar o'ch yehuapore'tam̄pes allo'tsen ochec o'ch rre' ñaña ochec.

²⁷ Coyaneshañapa' atet otererr:

—Ama't atteñ Nepapareshacha' tarraña ama't ochecpa'cho'ña rra'yenan ñeññ a'shore'tatyen pamo'mte' po'mesaḡna'cho.

²⁸ Allempoña Jesúsapa' atet otererr:

—Chepa't nesñeshacha' atarr nanac peyemtenna ñeññepñapa' attetepa'ch pocop atet pemnen ḡa.

Pacñe'terñapa' allorocma correrra.

Atto Jesúsapa' a'crraterranerr po'potantañ atснаñe'te'chno

²⁹ Ahuerrerr Jesús allotpa' alla oñem sa'patoḡño'mar e'ñe Galileaso. Allotpa' ahuo' aspen̄to allñapa' anorros.

³⁰ Allñapa' alla hua'cherrñañerr shonte' acheñenesha'. Huapatyerrñañeterr checa'repa'chno, manco'chno, aporo'yete'chno, opananeshachno ñaña huapatoñet shonte' po'potantañe'chno. Ñeñññapa' alla nanatyesosñañet pa'rḡḡot. Ñañapa' e'ñe a'crratyesuerranet.

³¹ Allña acheñenesha'pa' ḡha atarr cohuanrrorteñet allempo eñchet atto opana'chno ḡha eñora'yerrtsa, manco'chnopa'cho'ña ḡha cohuenetyerrtsa, checa'repa'chnopa'cho'ña ḡha chope'chyerrrets, aporo'yete'chnopa'cho'ña ḡha e'ñe cohuen cohua'yerrrets. Atet e'ñe cohuen eñchetpa' allohuenetñapa' cohuentateññañet israelnesha' Po'yomporer.

Allempo Jesúsapa' rratenan shonte' acheñenesha', ñeññña acheñenesha'pa' allo'tsen pa'tatsoch mil

(Mr. 8.1-10)

³² Allempoña Jesúsapa' agotan pueyochresha'pa' atet otapanet:

—Napa' ḡha atarr nemuereña allohuen acheñenesha' ñeññ shontetsa arr. O' ma'pamtoset nesho ama eñallmeñeto ñeññcha' rret. Ama pocteye' nenteñe o'ch ahuanerret e'ñe pa'chporrñesha' te't ama a'ñshe'mterreto ḡño.

³³ Pueyochreshañapa' atet otoset:

—Errahuachca'ye yentña allpon rreñets ñeññcha' yerrach shonte' acheñ, arrpa' amayaca'ye.

³⁴ Jesúsñapa' atet oterraneterr:

—Sapa' ḡerrpona't sechenña pan?

Ñetñapa' otereterr:

—E'ñeca'ye can'chrra ñaña coñe't cacatollesha'.

³⁵ Allempoñapa' otan acheñenesha':

—Te'pa' sanorr'cha'tyes patso.

³⁶ Allñapa' agapan ñeññ can'cherr pan ñaña cacatollesha'. Agaphuepa' o' parasyoso'tenanerr Pompor allotñapa' o' shota'tan pan, shetse'tan ñaña cac, apanatyesan pueyochresha'. Ñetñapa' o' epatyaset ñamet allohuen acheñenesha' e'ñe epa'huet.

³⁷ Allempoñapa' o' rrallme'chet allohuenet, e'ñe yettra'tuahuet. O' e'ñe yetuahuetpa' ḡha a'pchatyaset ñeñññapa' a'yapa'cheret. Ñeññña a'yapa'cherretpa' ḡhepa'tcha' chorrats can'cherr cañter e'ñe ḡamo'yare'.

³⁸ Ñeññ rrallme'chats atarr aton acheñenesha' ñato' allo'tsente' pa'tatsoch mil ñeññ e'ñe yacmaneshoche'. Ellonetñapa' allo'tsa'yen ñaña coyaneshachno ñaña cheshaneshachno.

³⁹ Allempoña Jesúsapa' so'tnerran acheñenesha'pa' ahuer, a'tapos noñtopa' ahuañperr o'ch ahuo' anetso ñeññ pa'so'cheñ Magdala.

16

Atto fariseonesha' ñaña saduceonesha' enamaset Jesús gatapanetepa'to' po'partsoña (Mr. 8.11-13; Lc. 12.54-56)

¹ Fariseonesha' ñaña saduceonesha' ñetpa' o' ahuanmuet o'ch enteñeta' Jesús. Cha'cha'tet Jesúsesho ñetña puehquëno'tetpa' atet otyesoset:

—Yapa' añ yemnen o'ch pegatapuey peparsoña entot allochñapa' attoch yeñotosep po'ño'ch p'apa' Parets Puechemerep.

Ñetpa' cha mueneñet o'ch topatoset Jesús.

² Ñaña' añ yerpatapanet ñeñt atet otyenet ñet pa'nyeto:

—Sapa' ñerra'm esempo sentnen o'ch tsatatetnena enet, saña'pa' chocmach atet so-tyesnene't: "Tsapa'tpa' atarrcha' char."

³ Aromtaña'ña' ñerra'm esempo senta'muen enet cha tsatatta'muena, saña'pa' chocmach atet sotyesa'muene't: "Choch huata'muena ñeñto'mar o' cha rrenarsa'muen." Sapa' atarr señoteneña ñeñt sentyen ento ñeñtña señotatene'. Tarraña ñeñt atet norrtatyennas nepartsoteña eso'marte'ña ñeñtña'p' amaña eñotatensoña ñeñt atet pennas Yompor te' o'ch orrtatonas po'cohuenña. Ñeñt'pa' attate' seshquën.

⁴ Acheñenesha' ñeñt corra'yetsa te' ñetña'p' ama cohuenaye' cotape'chyeneto, ama añeye' cosheneto Yompor ñeñto'marña ñetpa' e'ñe orrena otennet ahuo'ch norrtatanet nepartsoña. Tarraña amach es norrtataneto. Napa' añach paterr neñotatanet atet eñotatane't Jonás ahua't nínivo'marnesha'.

Jesúsña'p' sa'nerranetpa' ahuer.

Atto Jesús toma'ntaterraneterr ñeñt po'chaser pen fariseonesha' (Mr. 8.14-21)

⁵ Allempoña pechatra'tet yom'ta'n o' chapuet all, pueyochresha'ñapa' o' yerpuerret ñetpa' ama anmueto pan ñeñt'cha' rrosset all.

⁶ Jesúsña'p' atet otapanet:

—E'ñech señota ñato't semeñe'teña'ña fariseonesha' ama't ñaña saduceonesha' po'chaser allo tsetenet pan.

⁷ Ñetña cotape'chyasetpa' atet otanna'tyeset:

—Amaca'ye yanmoña pan ñeñto'marte'ca'yeña oteney año'ch yemeñe'tatscheña fariseonesha' po'chaser.

⁸ Jesúsña'p' allempo eñotanet atet cotape'chyenet ñaña'p' atet oterraneterr:

—Eso'mare't sellquëñesha' sotanna'tyena año' eñalle ñeñt'cha' serra'. Sapa' ama'tña e'ñeye' seyemtenno.

⁹ Teme'ttsena'tña ama es sechenoyoña seyo'chro. Ama'tña seyerpuenoña allempo natontat amnar pan ñeñt nerratallme'chpa' allo'tsen amnaroch mil acheñenesha'. Ama't seyerpuenoña ñaña ñeñt allpon chorrarerrrets cañtro ñeñt sap'cherr allempo.

¹⁰ Ama't ñaña allempo natontaterrerr ñeñt can'cherr pan ñeñtña nerratallme'cherrerra' allo'tsen pa'tatsoch mil acheñenesha'. Ñaña ñeñt allpon chorrarerrrets cañtro ñeñt sap'cherrerr allempo.

¹¹ Erroteno'uaña'ca'yeña ama señotenoña ñeñt atet notas ñorra' attoch ama semeñe'tatsche fariseonesha' ama't ñaña saduceonesha' po'chaser ñeñt'pa' ama rreñtsoye' notenso.

¹² Allempoña ñetpa' o' chapamet pueyo'chreto, atet otanna'tet:

—Amuepa'tca'ye añeye' otenye pan po'chaser; añepa'tca'yeña oteney amach yemeñe'tatsche fariseonesha' ama't ñaña saduceonesha' po'capña ñeñt atet ye'chatannenet ñeñt ama cohuenayaye, te't mamesha epa'hua erracmañen e'ñe atet pena chase' mameshapa' o'ch a'chasa'huan ora all yeneñ.

*Atto Pedropa' otan Jesús, p̄apa' p̄aña Yompor Puechemerep̄ ñeñtep̄ Cristotosets
(Mr. 8.27-30; Lc. 9.18-21)*

¹³ Allempoña chap Jesús all Cesarea ñeñfara Filipo, allñapa' otosan pueyochresha':
—¿Errofena't otyenenña allohuen acheñenesha', na Ñeñten Acheñetosets eseshante'?

¹⁴ Ñetñapa' atet otyeset:

—Patantarr acheñenesha'pa' atetca'ye otyenpet p̄apa' Juanañpo'te' ñeñtepo' apatañtatset̄ Yomporecop. Po'potantaññapa' atet otyenpet p̄apa' Elíasopo'te'; po'potantaññapa' atet otyenpet p̄apa' Jeremíasopo'te' amapa' añeño'te' po'psheñeñ ñeñt̄ a'mtaye't̄ Yompor po'ñoñ ahuat̄.

¹⁵ Allempoñapa' alla a'p̄to'terraneterr:

—Sañapa' ¿errofena'tña sotenenña sa?

¹⁶ Simón Pedroñapa' eñoratsapa' atet och:

—Papa' ñeñtep̄ca'ye atarr yecuen ama't̄ ahuatoteñ; ñeñtep̄ca'ye Parets Puechemerep̄ ñeñtep̄ Cristotosets. Ñeñña Parets ama arromñaateshayaye.

¹⁷ Jesúsñapa' atet och:

—Nanac cosheñso'tsenep̄, Simóna ñeñtep̄ Jonás puechemerep̄ tarro'mar atto peñotenenpa' ñeñtpa' ama arromñaateshaye' peñotatenaye; naña Nompor peñotatene' ñeñt̄ pue'ntaño'tsen.

¹⁸ Napa'cho'ña te'pa' o'ch notap̄ p̄aña, p̄apa' añcha' nesocherrepep̄ Pedro. (Ñehua, añ so'chñets Pedropa' añ toma'ntena ñeñt̄ atarr es echarr atet ñerra'm mapue'.) Ñaña p̄a e'ñe peyemteñoften na, na po'ño'chpa' naña Cristotosets, ñeñtpa' allochca'yeña norrtaterrña allohuen ñeñt̄cha' name'ñerraya ñeñt̄cha' ap̄cha'yerrtsa e'ñe na pame'ñeño'tet. Atarrcha' huomenc echarr nep̄a'yerranet allohuenet ñeñt̄etcha' ap̄cha'yerrtsa pame'ñeño'tetan na attochña ñocpuetpa' amach eñalle ñeñt̄cha' huapore'terrahuet, ama't̄ ahuata. Ama't̄ rromueñets po'huamencpa' amach erroteno't̄ metanerranetoña ñet po'huamenc.

¹⁹ Ñaña na te'pa' o'ch napuerrepep̄ llesens attoch p̄a'poterrñañ Yompor po'cohuenña ñeñt̄ atto ayochreshattena ña pue'ntaño't̄; ñeñtpa' añ toma'ntena atet ñerra'mrrate' llave alloch petorañper allohuen ñeñt̄ muenene' o'ch pueyochresha' perranet. Ñaña ñerra'm erra'tsencha' e'ñe pocte' pent ñeñt̄cha' pena'yes arr patsropa' Yomporpa'cho'ña ñeñt̄ ento'tsen e'ñech attecma pocte' enterranet. Ñaña ñeñt̄cha' ama pocteye' penteno ñeñt̄cha' pena'yes arr patsro, Yomporpa'cho'ña ñeñt̄ ento'tsen e'ñech attecma amach pocteye' enterraneto.

²⁰ Allempoñapa' otan pueyochresha':

—Amach esesha' sota'psa'tatsto ama't̄ puesheñarra napa' na ñeñten Cristotosets.

*Atto Jesúsapa' eñotatan pueyochresha' ñapa' amtsare'terrach
(Mr. 8.31-9.1; Lc. 9.22-27)*

²¹ Jesúsña e'ñe allempoteñpa' motetnom̄ eñotatyenomue' pueyochresha' ñeñt̄ atet anare't̄ ñocop, ñapa' muero'chtateretcha'; o'ch ahua' Jerusaléño allñapa' allcha' muero'chtateret. Añcha' erro'tuanen perre' ñeñt̄ pompornesha' pen allohuen judionesha' ñaña ñeñt̄ pa'm̄cha'tare'ternesha' pen allohuen po'cornaneshar ñaña ñeñt̄ atarr etso'tayenayeñ ñoñets ñeñt̄ atet anare't̄ judioneshacop. Allñapa' allcha' muetsatateret tarraña puema'pamtañoña Pomporpa' o'ch alla tantater.

²² Pedroñapa' allenta anem̄ a'yene'tpa' allñapa' atet otos:

—Arep̄a'chña Partseshacha' atteye' perrpeto ama't̄ errponaña. Yomporepa'chña e'ñe pecuañpene'.

²³ Ñaña'pa' puetallsa a'yene't̄ mame'pa' atet otan Pedro:

—Orraṗ a'yo neshoṭ oneñete, ṗapa' e'ñe orrena pepatare'tenen; ṗapa' amaca'ye Yomporeye' atet ṗoctape'chatenaye, ñeñṗa' acheñarramche' poctaṗña.

²⁴ Allempoña Jesúsṗa' atet otan pueyochresha':

—Ñerra'm esesha' muenene' o'ch coṭerrnet na e'ñe po'ñoṅh attoch neyochresha' neper-ranet, añ poctetsa sehuanmueteṗa'ña ñeñṗ atet muenenet e'ñe ñocpueta. Attochña ñetṗa' o'ch e'ñe toma'nteret ñeñṗ chechnene' po'corsoch allcha' mueroṅhtet ñamet. Attochña coṭerrnet e'ñe po'ñoṅh.

²⁵ Tarro'mar ñerra'm esesha' e'ñe añña muenenet o'ch correna atomat attoch e'ñe coshenet arrpatsro, ñetñaṗa' ṅhach a'chencatenet e'ñe ñañañeta. Tarraña ñerra'm esesha' e'ñe pocte' entene' o'ch es sohuanerret e'ñe pocreñohuenet nocop, ñeñña acheñerṗa' ñañaṗa' corretsach pocsheñeshocmañen e'ñe tayoteñ errponañohuen.

²⁶ Ama't errponenaṗaren esocmañen es yeyoratse'tyes ora allpon ñeñṗ yentyen añe patsro, tarraña ñerra'm ñeñṗach e'ñe ya'chencaterre' yecamquëñohuen, ñeññaṗa' ama't coñe'tapa' amach es sherberrye. Tarro'mar ama eñalle po'poñ ñeñṗ atarr sherbets, añña atarr nanac sherbets ñeñṗcha' a'queshṗaterre' yecamquëñ. Tarro'mar yocoppa' ama es eñalle ñeñṗcha' yepomuerr alloch alla yerañterra yecamquëñ.

²⁷ Po'ñoṅh napa' Ñeñṗen Acheñetosets o'ch nohuerra epan ñaña nemillañoṭeñnaneshar. E'ñech Nompör po'cohuenñoṭ nohuerra. Allempochña netsa'terranet e'ñe puesheña'ttsocmuet erroṭente' ṗa'yesete't.

²⁸ Po'ñoṅhca' te'pa' o'ch notas, patanta'ttsos ñeñṗes arro'tsa'yenes ama't ama serromhuena'pa' o' senterrñañ Yompör po'cohuenña atto napa' Ñeñṗen Acheñetosetsṗa' atarrcha' na'yochreshatterra.

17

Allempo Jesúsṗa' po'poñetañṗsana pueyochresha'
(Mr. 9.2-13; Lc. 9.28-36)

¹ Allempo pechapmaterrerr, Jesúsñaṗa' ahuanerranerr pueyochresha'; añ anem Pedro ñaña Jacobo ñaña Juan ñeñṗ Jacobo ṗa'mo'nasheñ. Ñetṗa' arr anmanet atarr aspenṭo e'ñe ñaṗṭochayet.

² Allña Jesúsṗa' machayoteṗa'tcha' po'poñetañṗsosanet. Pa'clloyoṭṗa' ṅha poṗtosa e'ñe atet ñerra'mrrate' atsrreṗ poṗtetsa. E'ñe ṗa'shtamohuen atarr huallama'to poṗtosa ṅha a'puetaresue a'yohuen.

³ Allñaṗa' machayoteṗa'tcha' orrtanet Moisés ñaña Elías. Ñetñaṗa' alla serrpare'toset epuet Jesús.

⁴ Pedroña eñoratsapa' atet otan Jesús:

—Atarruaca'ye Partseshacha', cohueno'tseneyte' arr. Ama't pocte' penteñe napa' o'ch naṭomatonas ma'ṗṗahua quërpachet—pueṗahuarrṗa' ṗocopcha', po'ṗṗahueñṗa' Moisésocopcha', po'ṗṗahueñṗa' Elíasocopcha'.

⁵ Allempo eñorena Pedropa' ṅha orrtosahuet os ñeñṗ atarr cohuen poṗtetsa ṅheṗa'tcha' a'ṗomañṗsosanet. ṅha e'morrtostsa ñoñets osoṭ; ñeñña ñoñetsṗa' Yompör otosahuet; ñeñṗa' atet ot:

—Añmapa' ñeñṗ no Nechemer ñeñṗ atarr nemuerena ñeñña atarr nocshatene', ñeñṗcha'ña e'ñe cohuen se'mñoterr.

⁶ Allempo atet e'muet ñoñets pueyochresha'ñaṗa' alla rrema'rrtet patso atarr nanac yorenṭ.

⁷ Jesúsñaṗa' allenta ponerranetṗa' a'ṗlla'huerranet, atet otanet:

—Setanterra, amach ṅha seyorenatsto.

⁸ Allempoña o' cohuerreṗa' areṗa'tcha' eseshaye' enterreto, ñaṗña enteret Jesús.

⁹ Allempo onaṅherret aspenṭoṭ Jesúsñaṗa' atet otnerranet:

—Te'pa' amach esesha' sotaṗsa'tatsto ama't e'ñe puesheñarra ñeñt atet o' sentua. Tarrempohuach allempoch netanterra rromot na Ñeñten Acheñetosets, allempochña seserrpare'taterña allohuen acheñenesha'.

¹⁰ Pueyochresha'ñapa' atet otnerret:

—¿Eso'mare'tña otenña ñeñt atarr etsotene' ñoñets ñeñt atet anaret, Elíaso'ch ñanom huerrtsa?

¹¹ Ñaña'pa' atet otnerret:

—Elías po'ñoçhpa' ñachca'yeña huerrtsa, ñapa' e'ñechca'ye a'cohuentatuer ora allohuen.

¹² Tarraña napa' o'ch notas: Elíaspa' o'ca'ye huaphuerrañ arr tarraña amaca'ye eseshaye' cheme'tapueraye ñeñtapa' çhaña erroṭuanen ṗapueret ñeñt atet muena'yenet ñet. E'ñech attecma perrnet namña Ñeñten Acheñetosets.

¹³ Allempoñapa' o' çhapanet pueyoçhreto ñeñt otenanetpa' añepa'tca'ye Juanañ ñeñt apataye't acheñenesha' Yomporecop ñeñtapa'tca'yeña Elíasoterrets.

Atto Jesús'pa' a'crraterran cheshachor ñeñt otetsa

(Mr. 9.14-29; Lc. 9.37-43)

¹⁴ Cherretter all shontena acheñenesha' puesheñarrña yacmapa' ponmapuerrana Jesús concorposñaña.

¹⁵ Atet otos:

—Pemueraye'chosnana, Ayochreshate, nacñe'ter çha o'tena, nanac mueroçhtena. Epaye' coya'nmame'tateñ tso, erroṭenopa' o'ch coya'nmame'tach ñaña oño.

¹⁶ Nanomhue peyochresheshopa' ñetñapa' ama erroṭeye' peto attoch a'crrateret.

¹⁷ Jesúsñapa' atet ot:

—Sa ñeñtes acheñres ama't mamesha'pa' ama ayemtenaye' sentpenno; çhach po'poñ sentuena seyoçhro nocop. O' allponmatuanen allo'tsenen arr patsro napa' atta atarr na'huantennas, atta necuenes ñato' attoṭpa' o'ch same'ñerrna.

Allempoñapa' atet otanet:

—Ama'tpa' sanmonca'ye chesha' arr.

¹⁸ Jesúsñapa' atet otapan oneñeñ ñeñt otatene':

—Te'pa' po'ñoçh o'ch notaṗ, pequeçhpuer cheshachor.

Oneñeñtapa' allentepa'tcha' queçhpa'ner. Cheshachorñapa' allorocma correrra.

¹⁹ Allempoñapa' ponenña pueyochresha', e'ñe ñaptoçhayetpa' atet otoset:

—Yañapa' ¿eso'mare'tña ama eshcaye' yequeçhpaterena oneñeñ atto otatenan cheshachor?

²⁰ Ñaña'pa' atet otanet:

—Tarro'marca'ye amaca' e'ñeye' seyemtenno ñeñt atet notenes. Napa' o'ch notas, ñerra'm po'ñoçh e'ñe na seyemtenañ napa' e'ñeca'ye na'pocatenña neñoñ ñeñt atet notenes. Ama'tcha' allponatollota seyemtenna ñerra'mrrate' mostazllometoll sañapa' ama't erra'tsena senamuennonñ ama't ñeñt atarr echarr sentenpa' nañapa' atetcha' nepennaseñ. O'ch netma'ntatasa atet ñerra'm o'ch sot: “Añ aspenetpa' rrote'tepa' a'yenet”, aspenetñapa' atetcha'çho'ña pennasañ ñeñt e'ñe atet soteñ. Ama't mameshapa' amach eñalleña ñeñt torrapo' senten ñerra'm e'ñe po'ñoçh na seyemtena.

²¹ Ñehua, ñeñt atet oneñeñtapa' amach erroṭenot yequeçhpatacheña acheñ e'ñe atta. Chochña yema'yochena ñaña yema'yochreñot ama't yerrarpa' o'ch yequeçhpue' mame'. Attoçha'ña yequeçhpaterña oneñeñ ñeñt atet.

Jesús'pa' eñotaterraneterr puepocheño ñapa' çhocmach muetseret

(Mr. 9.30-32; Lc. 9.43-45)

²² Allempo chopeñe'chyenet parro all Galileo'mar, Jesúsña allpa' eñotatan pueyochresha', ñeñtapa' atet otnomanet:

—Na Ñeñten Acheñetosetspa' pomuerrnetcha' attoçhña erroṭuanencha' perrnet.

²³ Atteñapa' o'ch muetsataterret tarraña poma'pamtañoña' o'ch alla netanterra. Ñetñapa' ñeñña atarr nanac lleca'rrtatyehuet.

Atto Jesús'pa' tsa'ta impuesto añecop Parets pa'paclecop

²⁴ Allempoña Jesús epuet pueyochreshachnopa' o' alla cha'cherretterr Capernaumo. Allñapa' huapanet ñeññ tsa'tatenaya acheñenesha' quelle ñeññ impuesto; ñeññpa' Parets pa'paclecop. Ñetpa' atet otoset Pedro:

—Semaestrorpa' ¿ama't pomuenana'ña quelle impuesto añecop Parets pa'paclecop?

²⁵ Pedroñapa' atet otanet:

—Chocmach tsa'ta.

Allempo chap pocolopa' Pedroñapa' ama otenana'ña Jesús, ñaña'ña ñanmacma otapan Pedro:

—¿Erroña't, Simóna, penteña ña? Ñeññ añcha'tarete'chno ñeññ añe patsro'tsa'yen, ¿esha'tña cobrenetña quelle ñeññ impuestocop, ñato' añate' cobrenet ñeññ e'ñe ñet pamo'tsna'tarecmuet amapa' añte' cobrenet ñeññ ello'marnesha'?

²⁶ Pedroña atet otan Jesús:

—Añca'ye cobrenet ñeññ ello'marnesha'.

Jesúsñapa' atet och:

—Ñeññepñapa' ñeññ e'ñe pamo'tsna'tarecmuetpa' ama'trra ñeññeye' cobreneto.

²⁷ Ama't poctey amach netsa'tatsto tarro'mar napa' ñeññen Puechemeren ñeññ pa'paquell pene' ñeññecop tsa'tenet, tarraña attoch ama ya'tsrre'matanetopa' e'ñeca'ye pocte' o'ch netsa'ta. O'ch ahuep oño o'ch pego'tena' all. Erra'tsencha' ñanom pechta' pegoroñ ñeññapa' o'ch pechete. Puenamopa' allcha'ca'ye pent puetallarr quelle. Ñeññña quellepa' o'ch ñaner ñeññapa' alloch petsa'tanet nocop ama't ñaña pocop.

18

All eñotateney ñeññ acheñer e'ñe po'ño'ch atarr asherben enteñ Yompor

(Mr. 9.33-37; Lc. 9.46-48)

¹ Allempoña Jesús'pa' a'p'to'teña' pueyochresha', ñeññpa' atet ochet:

—Ñeññey allponey ñeññcha' e'ñe pueyochresha' perr Yompor ñeññ pue'ntañotsen, yapa' añ yemnen te'pa' o'ch potey, ¿erra'tsenoteyte'ñaca'yeña ñeññey atarr sherbets ñeññey atarr añcha'taretuyen entyenyet?

² Jesúsñapa' cheshatolla chore'tpa' tomach e'ñe allo'tsa'yenet.

³ Allempoñapa' atet otanet:

—Po'ño'ch napa' o'ch notas: Ñerra'm ama cho sequechpa'huerro sommo'cheña attoch o'ch atet sepena cohuen ñerra'mrrate' añ cheshatoll ñeññ ama eñotenana' o'ch ommo'chena, sañapa' amate' errotent es so'paterroña atto atarr ayochreshatena Yompor pue'ntañot.

⁴ Ñeññ allpon ñeññcha' e'ñe pueyochresha' perr Yompor ñeññña acheñer atto o'huañ cohuen enta ñañaña ñeññpa' o' e'ñe atet perra ñerra'm cheshatoll ñeññ ama eñotenana' pommo'cheña. Ñeññapa' atarr nanac asherben enteñ Yompor.

⁵ Erra'tsenotes sa ñerra'm e'ñe same'ñeñoten na e'ñe cohuen saguëñ ama't ñeññ ama asherbenaye' entyeneto atet ñerra'm añ cheshatoll, na'ñaña e'ñe cohuen saguën.

Atto chocmach huaponaya ñeññcha' yetpatyene' o'ch atet patyeseñ ñeññ ama pocteye' enteno Yompor

(Mr. 9.42-48; Lc. 17.1-2)

⁶ Ama't erra'tsena ñeññ ama pommo'cheño'teye' ame'ñenno atet ñerra'm cheshatoll ñeññ ama eñotenana' o'ch ommo'chena, tarraña ñerra'm esha'ña po'psheñeñ o'ch atet patach ñeññ ama pocteye' enteno Yompor, ñeññña acheñerpa' atarrcha' yoro'cheno'tsen

tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet p'atenana' po'psheñeñ, e'ñech allorocma o'ch çharachetañ mapue' añecmuen pa'çhnoþo allpon ñerra'm puetse'tamets o'ch huapore'chet oño epo allcha' ño'shach mapue'.

⁷ Atarr llequëñets acheñeneshacop arr patsro ñerra'm esempo esesha'pa' o'ch atet p'atyenanet ñeñt ama pocteye' enteno Yompor. Tarro'mar çhocmach huaponaya ñeñtcha' yetpatyene' o'ch atet p'atey ñeñt ama pocteye' enteno Yompor. Tarraña napa' o'ch notas, atarrcha' yoroçheno'tsen ama't erra'tsena acheñer ñeñt orrtatene' ñeñtcha' topatyene' po'psheñeñ ñeñt name'ñenaya o'ch atet p'atyenanet ñamet ñeñt ama't mameshapa' ama pocteye' enteno Yompor.

⁸⁻⁹ Ñaña o'ch noterrser: Ñerra'm sechets p'atyenes ñeñt ama pocteye' enteno Yompor atet ñerra'm sot, setac, seclle', añ poctetsa o'ch sequeçhpuerr ñeñt çhocma atet p'atse'tatyenes sechets. Ñeñt'pa' e'ñe atet ñerra'mrrate' e'ñe allorocma o' sepecherr sot, setac, o' serrotterr seclle', o'ch sehuapore'ter. Añ cohuen socop ama't e'ñe sepo'yota'teñoç corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch huapore'terrset coñcha'puetso all parraren tso' ñeñt ama ahuañaño ama't errponaña. Ñaña añ cohuen socop ama't e'ñe setco'tpa' sepshem'tatquëñoç corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeñt ama ahuañaño ama't errponaña. Ñaña añ cohuen socop ama't seclloyot sepshem'tacllo'yeñoç corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'.

Acheñ ñeñt ama ame'ñetsopa' arrpa' all atma'ntatarettet atet ñerra'm carrnero ñeñt chenquëtsa

(Lc. 15.3-7)

¹⁰ Jesús'pa' alla o'terranerr pueyochresha':

—E'ñech seño'ta, añepa'chña atarr asherben senten ñeñt ama ommo'chetso ñeñt atet petsa ñerra'm chesha'toll ñeñt'ñapa' e'ñech pueñmañesha' yemtenna. Tarro'marña te'pa' o'ch notas, ñeñt ama pommo'cheño'teye' name'ñenayo ñocpuetpa' eñalletca'yeña po'millaño'teñer ñeñtcha' cohuan'penahuet. Ñeñt'ña po'millaño'teñretpa' çhocma Yomprosho'tsenet allña e'ñe cohuen e'mñotenanetña Yompor pue'ntaño.

¹¹ Po'ñoçh na Ñeñten Acheñetosets añecopña nohuapa attoch na'queshp'atyesos acheñenasha' ñeñt chenquëtsa.

¹² Ñehua, ¿ama't atet senteñeña? Ama't erra'tsen acheñer ñeñt echene' shonte' po'carrneror, çharroch çharra' echen tarraña ñerra'm puemocarrña machayo'ta a'chencachpa' pamo'mte'ñapa' o'ch sa'nman allohuen po'potantañ ñeñt o' noventa nueñaña all aspento o'ch ahuo' e'nerraya' puemocarr ñeñt chenquëtsa. Allcha' e'name'tyera'pa' attotach enter.

¹³ Ñerra'm ña o'ch enterpa' ñeñtcha'ña atarr coshaterre'. Elloch metanan atto coshenana po'potantañ noventa nueve po'carrneror ñeñt ama paya'tetso.

¹⁴ Atetca'ye penaña ñaña Sompör ñeñt pue'ntaño'tsen; ñapa'çho'ña amaca' mueno o'ch chenca ama't puesheñarro'tolla acheñ.

Attoch e'ñe cohuen yamo'tstera yemo'nasheñ

(Lc. 17.3)

¹⁵ Jesús'ña'pa' alla o'terraneterr; ñeñt'pa' atet otanet:

—Ñerra'm erroten pōnas semo'nasheñpa' o'ch ahues ñesho e'ñech sapuet o'ch soctape'chatera' e'ñe cohuen. Ñerra'm cho e'mñoterrespa' allempoñapa' o'ch amo'tsoť senterra.

¹⁶ Ñerra'm soctape'chatueña' amach e'mñotasopa' se'ñ puesheñarr amapa' epsheña ñeñtcha' sa'pocatatapreterre'. Atetcha' sepa allochñapa' ñeñtcha' eñosets epsheña amapa' ma'psheño'marescha' eñosets allempopa' e'ñech po'ñočh same'ña ñeñt ñoñets tarro'mar e'ñech attecma otenet.

¹⁷ Ñerra'mña atetña o' sephuerña' amach e'mñoterrisopa' allempoñapa' o'ch soch allohuenet ñeñt chocma apchetsa pame'ñeñoť Yompor. Cotape'chateretepa' ñamet. Ñerra'm o'ch cotape'chatuet allohuenetña', ama't ñetña amach e'mñoterranetopa' sañapa' e'ñech atta senter ñerra'm po'poñ acheñer ñeñt ama semo'nasheñeyaye. E'ñech atet senteñ ñeñt acheñer ñeñt ama ame'ñetso, atet ñerra'mrrate' ñeñt puehquēñoťe'na cobra'yene' acheñenesha' quelle ñeñt gobiernocop.

¹⁸ 'Ñehua, te' po'ñočhpa' o'ch alla noterriserr: Ñerra'm errotencha' e'ñe pocte' sent ñeñtcha' sena'yes arr patsro, Yomporpa'cho'ña ñeñt ento'tsen e'ñech attecma e'ñech pocte' enterranet. Ñaña ñeñtcha' ama pocteye' senteno ñeñtcha' sena'yes arr patsro, Yomporpa'cho'ña ñeñt ento'tsen e'ñech attecma amach pocteye' enterraneto.

¹⁹ 'Ñaña o'ch alla noterriserr: Po'ñočh ñerra'm epsheñas arr patsro o'ch e'ñe sa'pocataue epsheño'mares ñeñtcha' senamuennan Nompor ñeñt pue'ntaño'tsen ñapa' ama't erra'tsena senamueñ chocmach e'ñe atet pennas.

²⁰ Tarro'mar ñerra'm erro'tsen ama't e'ñe epsheña amapa' ma'psheña ñeñt apchetsa e'ñe pame'ñeñoťetan na, ñaña allpa' allo'tsenencha' e'ñe ñesheto.

²¹ Allempoña Pedropa' a'pťo'tenana' Jesús, ñeñtapa' atet otos:

—Partseshacha', ñerra'm chocma epaye' erroť penen namo'ts, ta'm ¿errponoche'tcha'ña neťretne' ñato' e'ñech cančhrocha neťretne'?

²² Jesúsña' atet och:

—Napa' ama notenpe e'ñech cančhrocha peťretne', añña noteneť atonochcha' peťretne'—ama't cančhrochcha' čharra', ñaña po'poñ cančherr, allponochcha' seťretne'ña samo'ts.

Atto Jesús'pa' eñotatanet ñerra'm amach e'ñe cohuen yeťretnannenopa' Yomporpa'cho'ña amach peretnerrye yaña

²³ Jesús'pa' atet oterraneterr:

—Ñeñto'marña Yompor po'cohuenña ñeñt atto ayochreshattena ña pue'ntañoť ñeñtapa' atet ñerra'mrrate' puesheñarr añcha'tareť. Ñeñtña'pa' añcha' muenen o'ch a'pocatyesan atto teba'yeñ allohuen pa'taruasañrečno.

²⁴ Allempoña all e'ñe a'pocatyesanetpa' allña'pa' huapatoñet puesheñarr pa'cheñer ñeñt tebene' patoner quelle ñeñt allpon tebenpa' ñeñt oteñet shonte' millones.

²⁵ Ñaña'pa' ama echenano allpon quelle alloch tsa'terra ñeñt allpon teben. Po'patronarña'pa' atet otanet: “Te'pa' o'ch sepomuer epuet pueťapor epuet ñaña puechemerasha' ñaña o'ch sepomhuerrñañ errponte' echyen allochñapa' ama't allapa' o'ch tsa'terrna atto tebenen.”

²⁶ Allempoñapa' allenta concorpana'cha pa'taruasañer ñeñt tebene', ñeñtapa' atet otare'ch: “Amach nomporcha' pema'yore'tatsetno, netsa'tuerrpach aco'pa.”

²⁷ Po'patronarña'pa' alla morrentera allenta a'rroyer allempocma e'shohuerrñañ all quellquēññañet ñeñt allpon teben.

²⁸ Ñeñtña pa'taruasañerpa' o' cha'nerr entuerran po'psheñeñ ñeñt parro ataruasatarettenet ñeñt tebene' ñaña, ñeñtapa' e'ñe coñe'ta quelle. Ñaña'pa' cha rrema'huerre'pa' allenta mueñoche' atet otuer: “Petsa'terrnañaca'ye ñeñt allpon petebenen.”

29 A'rroyerpa' ñaña'pa' allenta concorpana'tana ñaña ñeñt' o' mueño'cho'tue. Allña'pa' atet och: "Amach pema'yore'tatsetno, netsa'terrpach aco'pa allpon ñeñt' netebene'p."

30 Ñaña'pa' ama't mameshapa' ama pocteye' eñche, ñeñt'apa' anem' allcha' yottam'psach. Allña'pa' allach esempohuach e'ñe tsa'tuerra ñeñt' allpon teben.

31 Añña po'potantañe'chnoña ñeñt' parro ataruasata'rettenetpa' ñetña'pa' ama't mameshapa' ama pocteye' eñcheto ñeñt' atet pa' ñeñt' e'ñe atta e'shohuarettertsa ñeñt' allpon tebane't po'patronar. Allempoña ñetpa' allenta ahuanmuet po'patronaresho. Allña'pa' a'metam'peret.

32 Allempoña'pa' o' alla agotater po'patronar. O' cherr po'patronareshopa' atet otapuer: "Pa na'taruasañre, ama't mamesha ama cohueneshayape. Paña'pa' atta potare'ten napa' ahuo'ch ne'pretnerre'p naña'pa' e'ñe atta ne'shohuerrna'p ñeñt' allpon petebenen.

33 Ama't e'ñe poctey' papa'cho'ña o'ch pemueryañ ñeñt' parro petaruasen. Atet nepena na e'ñe cohuen nemuererr'pa."

34 Allempoña po'patronarpa' e'ñe patsrre'mueñesha' pomuer, o' apuer ñeñt'cha' coñchate' esempohuañen allcha'ña e'ñe tsa'tuerrana ñeñt' allpon teben.

35 'Sapa'cho'ña e'ñe puesheña'ttsosña ñerra'm amach se'pretnerre samo'tspa' e'ñech atecma perres sam'a Nomp'or ñeñt' pue'ntaño'tsen. Chocmuepa'ch e'ñe cohuen se'pretnannenaña sa e'ñe seyo'chrocmañen.

19

Atto Jesús'pa' ye'chatosanet ama asanna'tpahuoyaye

(Mr. 10.1-12; Lc. 16.18)

1 Serrpare'tuanerr Jesús'pa' err Galileo't. Arr cherr Judeo, ñeñt'ña Judeapa' e'ñe alla Jordanaso yom'ta'n.

2 Co'ta'huanererr shonte' acheñenesha' allña'pa' a'crratyesuerraneterr allohuenet pat-sñañe'feret.

3 Allña'pa' o' alla huacherrñañerr ñaña fariseonesha'. Ñetpa' añ muenenet e'ñe pue'shqueño'fetpa' o'ch eñorachet ñeñt' ama cohuenayaye. Attoña ñetpa' atet otoset:

—Ta'm ¿pocte'te' o'ch yeser yetapor ñerra'm esempo erroteno't?

4 Jesús'pa' atet otapanet:

—Ama't selleyareña atet oten Yomp'or po'ñoñ ñeñt' aquellcare't ahuatoteñ. Ñehua, allpa' atet oten, Yomp'orpa' e'ñe ahuatoten allempoteñ es ye'chcatyes allempo ye'chcatan ñaña asheñorr, ye'chcatan ñaña peno.

5 Allempo Yomp'orpa' atet ot: "Ñeñto'marña yacmapa' ñerra'm esempoch sena'ta, coyanesha'pa' o'ch echan puerrollar, añ pocte' o'huañcha' tama yemteñet pamo'mte' al-lochña'pa' yacmapa' attochña e'ñe parrocmat epuet puetapor. Attoña epsheño'maretpa' e'ñech patrra po'chets penet."

6 Attotcha'ña o'huañcha' puesheña'tetstet, allochña'pa' o'ch e'ñe puesheñarratet. Ñeñt' atto Parets e'ñe patrratatan yacma epuet puetapor amach cha ellopa' alla sannerreto.

7 Ñetña'pa' atet otereterr:

—Ñerra'm po'ño'ch atetpa' ¿eso'mare'tña nanña Moisés ñoñets all oteney o'ch yap yetapor papell aquellcare't attoch yesannerra, allempoña'pa' e'ñech pocte' o'ch yeser?

8 Ñaña'pa' atet otarraneterr:

—Sapa' ama es se'chenoyo seyo'chro ñeñto'marca'yeña Moisés'pa' muenatas o'ch sese' setapor. Ama't atet muenataseña'pa' tarraña Yomp'or e'ñe ahuatoteña'pa' amaca'yeña atteye' oteno.

9 Na te'pa' o'ch notas: Ñerra'm esesha' serre' puetapor, puetaporña'pa' ñerra'm ama cho aguënano po'psheñeñ yacma, ñeñt' e'ñe atta serre' puetapor, ñaña'pa' chach

ochña'tam̄perrana puetaporeshe'mañ ñerra'm o'ch alla yorerranerr po'poñ coyanesha'. Ñeñtpa' ama pocteye' enteñe Yompor. Ñaña ñeñtcha' yorerre' coyanesha' asaret, ñeñña yacmarpa' chach chetapreten taporets. Ñeñtpa'cho'ña ama pocteye' enteñe Yompor.

¹⁰ Pueyochresha'ñapa' atet ochet:

—Ñerra'm amate' asapahuo yetapor ama't ahuatapa' amate' tama pocteyayeña yocop o'ch yeyore coyanesha' ñeñtcha' yetapor ye'pa'.

¹¹ Ñaña' atet otanet:

—Tarraña atetpa'cho'ña e'ñeca'ye poctet tarraña ama allohuenacmaye' chennasoña seyochro atet tarro'mar ama allohuenacmaye' seychenoña atet. Ñeñtpa' aña eñotene' ñeñt atet cotape'chaten Yompor.

¹² Ñehua, atet ñerra'm puesheña'tets yacma ñeñt atta eñalletenet e'ñech atta ye'chquenet po'chets amach mueneñeto coyanesha'. Ellonetpa' eñall ñaña po'potantañ yacmanesha', ñetñapa' choch acaparettenet ñeñto'marña amach mueneñeto coyanesha'. Ellonetpa'cho'ña eñall ñaña po'potantañ yacmanesha', ñetñapa' añepach ama mueneñeto coyanesha' esheccha' e'ñech aña ma'yo'chrenet Yomporecop attoch atarr ayochreshatena ña pue'ntañot. Ñeñt atet cotape'chenet Yomporecop ñeñtpa' e'ñe pocte'. Attepa'chña pet ñerra'm Yompor cotape'chatenahuet atet.

*Atto Jesús'pa' bensare'tam̄psapan cheshanesh' ñeñt huapatoñet
(Mr. 10.13-16; Lc. 18.15-17)*

¹³ Allempoñapa' hua'cha'tachet ñaña shonte' cheshatollesha' Jesúsesho. Ñetpa' añecopña hua'cha'tachet o'ch a'plla'yesapanet Jesús attoch bensare'tam̄psapanet. Jesúsña pueyochresha' allempo entapan ñeñt hua'cha'tate' cheshaneshachno ñetñapa' ama pocteye' eñcheto o'ch anmoset cheshatollesha' Jesúsesho ñeñto'marña ama amnataretapueto.

¹⁴ Tarraña Jesúsñapa' atet otanet:

—Pocte'ña'cho' semnachñaca'yeña cheshanesh' onosetepa' e'ñe nesho. Amachca'ye cha sepatare'tatstapaneto tarro'mar allohuen ñeñt atarr neyemtenaya na e'ñe atet ñerra'mrrate' cheshatoll, ñetcha' o'patenetña Yompor po'cohuenña ñeñt atto ayochreshatena ña pue'ntañot.

¹⁵ Allempoña Jesús'pa' a'plla'yesapan cheshanesh' allohuenet e'ñe puesheña'ttset. Allempoñapa' ahuer allot.

*Atto puesheñarr ñeñt huepueshameñ ñeñt atarr ec'llayoret ñaña'pa' eñorana'tosana Jesús
(Mr. 10.17-31; Lc. 18.18-30)*

¹⁶ Allempoñapa' huapa puesheñarr yacma Jesúsesho, ñeñtpa' ora huepueshameñ. Ñaña'pa' atet otos:

—Maestro, p'apa' atarr cohuen acheñre'p, te'pa' o'ch potapuen ¿errofena'tcha'ña ne'pañña na e'ñe cohuen attochña napa' corretsanach e'ñe tayoteñ ama't errponañohuen?

¹⁷ Jesúsñapa' atet otap:

—Eso'mare't potenenña napa' atarro' cohuen acheñren. Arr arromñañenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñapñaña Yompor ñeñt e'ñe po'ño'ch cohuen. Ñerra'm añte' pemnen attoch p'apa' corretsapach e'ñe tayoteñ ama't errponañohuen añ poctetsa pocop o'ch e'ñe pe'pohuon ñeñt atet oten Yompor.

¹⁸ Huepuesha'ñapa' alla a'p'to'tererr:

—¿Erra'tsente'ña ñoñets ñeñtcha' atet ne'pohua?

Jesúsñapa' atet otererr:

—Ñeñtpa' añca'ye, amach pemtsatsto acheñ, amach pechtapretatsto taporets, amach petyesatsto, amach petoma'tam̄psatsche p'amo'ts e'ñe atta.

19 Ñaña e'ñe pemorrenteño'tpa' peñcha'na'chcha' p'omp'or ñaña p'achor. Ñaña añcha' atarr cohuen pemorrenta p'amo'ts e'ñe atet atarr pemorrentena e'ñe p'añeña.

20 Huesha'ñapa' alla oterranerr Jesús:

—E'ñe cheshoteñ ora añechnopa' napa' e'ñeca'ye netsotueñ. Ta'm ¿erra'tsenmeñte'ña ñeñt nepalltena?

21 Jesúsñapa' atet otererr:

—Ñerra'm añ pemnen o'ch e'ñe petsotua ñeñt pepalltenmeñ te'pa' añcha'ña atet peperra, o'ch ahuerreppa' o'ch pepomhuerr ora allpon ñeñt pechyen o'ch p'apa'yera' huocchañeshachno ñeñt atarr es pallta'yetsa, attochña p'apa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch p'octerren attoch e'ñe neyochresha' neperreñ e'ñe poctacma.

22 O'ña e'mhuan huesha' ñeñt atet och Jesúsapa' ñaña'puellquëñsha' ahuer tarro'mar ñapa' shonte' esocmañen echen.

23 Jesúsñapa' atet otan pueyochresha':

—Po'ño'ch napa' o'ch notas: Ñeñt atarr eçllayore'tpa' atarrca'ye nanac echarr attoch agapoñet Yompor po'cohuenña ñeñt atto ayochreshattena ña pue'ntaño.

24 Ñeñt'pa' atet'cha' netma'ntacha. Yapa' yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añetollponatollo atet ñerra'mrate' acosh puetatollo. Ñeñt'pa' atet'ca'ye penaña acheñ ñeñt eçllayore't ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

25 Pueyochresha'ña allempo e'met Jesús atet oten, ñetñapa' cha muene' lleca'rrtetpa' atet otanna'tyenet:

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteñca'ye huaquëshpa' amaca' esho'tenoña acshequeto.

26 Allempoña Jesúsapa' atta cohua'yesanetpa' atet oterraneterr:

—Sa arromñañeneshaspa' amach es errotenaye' apen senteno. Tarraña Yomporpa' ama eñalle ñocop ñeñt atarr torrapo' enten.

27 Allempoña Pedropa' atet och:

—Parteshacha', po'ño'ch yapa' o' e'ñe yesuanom ora allohuen attoch e'ñe yocterreñ. Yapa' ¿eso'tcha'ña apuerreyña Yompor?

28 Jesúsapa' atet otanet:

—Po'ño'ch notenes, allempoch etserraterr pats allempoch nanorruerr neconaño allcha' necohuenetuerra nepartsoteño' na Ñeñten Acheñetosets sapa'cho'ña allcha' sanorryesurr seconañechno e'ñe puesheña'ttsos charra' puechena epa seconañ ñeñtes noctene'. Sa ñeñtes noctene' allcha' sanorryesos allotcha'ña sa'mcha'tare'tterraña añecop ñeñt charra' puechena epa Israel po'mñrenñenesha'.

29 Jesúsapa' alla oterraneterr:

—Allohuen erra'tsencha' acheñer ñeñt'cha' e'ñe sehuanmue' allohuen ama't pa'paclohuen, ama't pa'mo'nasheñnesha' ñato' po'chanesha' ñato' pomp'or, pachor ñato' po'patseñ, attochña na e'ñech cohuen sherberrnet, ama't erra'tsencha' ñeñt'cha' sehuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen. Ama't allponapa'tets sehuanomyesnomuet, elloña charrochcha' charra' alla agapyerret. Elloña tsapa'onetpa' o'ch aguërret ñeñt alloch ñetpa' corretsetach beñecpuen pocsheñeshocmañen.

* 19:24 Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrate' huaquësh.

³⁰ Te'pa' señoche'pa'ch, eñall shonte' acheñ ñeññ ama esoye' senteno sa te' tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeññ atarr asherben sentyen sa te', tarraña ñetña allempopa' amach asherbenaye' enterraneto Yompor.

20

Atto Jesús'pa' toma'ntaterraneterr e'ñech allponeshacma atsa'tare'tta allohuen ataru-asañe'chno pam'tarr yet'

¹ Yompor po'cohuenña ñeññ atto ayochreshattena ña pue'ntañot, ñeññpa' añ toma'ntena ñeññ atet pena puesheñarr ane'tañ. Ñaña'pa' ahua'tecma ahua'muen e'nyenaya' acheñ ñeññcha' taruasat pa'mro o'ch toteññañeta' puenarenñ.

² Ñeññ allpon entospa' atet otosanet: "Ama't semno o'ch setaruasena' na'mro. Pam'ta'tetspa' netsa'tasach allpon quelle ñeññ paterr denario."* Ñetña'pa' e'ñe pocte' eñchet allenta mueñanet pa'mro, allcha' totoset narmetsmo.

³ O'ña enome'ta'muenpa' o' alla ahuererr allecma shontena acheñenesha' ñeññ e'nyene' taruas. Allña'pa' entuerranerr tama allponsheña, ñetpa' ama es otteneto.

⁴ Ñaña'pa' atet otosanet: "Sapa'cho'ña ñerra'm semne'pa' o'ch setaruasa' na'mro; napa' netsa'tasach allpon ñeññ poctetsa." Ñetpa'cho'ña allenta ahuanmuet pa'mro allcha' totoset ñamet narmetsmo.

⁵ Allempo chap poctopa' alla ahuererr ane'tañ, alla entuerranerr po'potantañ acheñ. Ñetpa'cho'ña attecma otuerraneterr ñeññ atet otan ñorra' po'potantañ. Ñetpa'cho'ña allenta mueñerraneterr pa'mro allcha' totoset ñamet narmets. O'ña ellerrenmochpa' o' alla ahuererr, allña'pa' entuerranerr po'potantañ acheñ. Ñetpa'cho'ña e'ñe attecma otuerraneterr ñeññ atet otan ñorra' po'potantañ. Ñetpa'cho'ña allenta mueñerraneterr pa'mro.

⁶ Atteña o' ellerrenpa' o' alla ahuererr, allña'pa' entuerranerr po'potantañ acheñ, ñetpa'cho'ña ama es otteneto. Ñetpa'cho'ña atet otuerraneterr: "Sapa' ¿eso'mare'tña atta sellapene't tom'cha'tyesetsña arrma? Amaña es sotteno."

⁷ Ñetña'pa' atet ochet: "Yapa' amaca'yeña eseshaye' yetaruasatenaye ñeñño'marca'ye ama es yotteno." Ñaña'pa' atet otanet: "Ñehua, sapa'cho'ña o'ch ahues na'mro, ama't mameshapa' setaruasa'nen. Napa' netsa'tasach allpon ñeññ poctetsa."

⁸ O'ña puenaso'tenpa' ane'tañña'pa' otosan ñeññ cohuañpene' allohuen pa'taruasañer: "Te'pa' o'ch pe'chore'ter ataruasañnesha', o'ch petsa'tyesapuerranet e'ñe puesheña'ttso'cmuet. Añcha' ñanom petsa'tapuerra ñeññ taruasosets chenta' alloteñach pamo'tech tsa'tyesapuerrahuet atotach petsa'tuanet ora allohuenet ama't ñeññ aromtañohuen."

⁹ Ñeññña taruasosets ellerronet ñetña'pa' o' hua'cherret. E'ñe allponeshacma atsa'tare'tetyesapuerret ñeññ paterr denario.

¹⁰ Atteña allempo o' hua'cherra ñaña ñeññ taruasosets ahua'tecma, ñetña'pa' cha otenapuetañ ñato' atoncha' atsa'tare'ttapuerret. Tarraña ñetpa'cho'ña e'ñe puesheña'ttso'cmuetpa' e'ñe allponeshacma atsa'tare'ttapuerret ñeññ paterr denario.

¹¹ Allempo agapetpa' ñetña'pa' cha po'poñ entet, cha e'moñe'tueret ane'tañ.

¹² Ñeñño'marña atet ochet: "Añenesha' ñeññ huapatsa chenta'pa' ñetña'pa' mamesha taruasoset. E'ñe allponeshacma petsa'tapuerranet ñeññ e'ñe allpon petsa'tapuerria yaña. Ama't yapa' o' yellapen ya'ñetse' yetaruas, nanac etay atsrret all yetaruasen. Eso'mare'tña e'ñe allponeshacma petsa'tapuerria ñeññ allpon petsa'tapuera ñaña ñeññ taruasosets mame'."

* **20:2** Denariopa' quelle ñeññ allpon tsa'tenet pam'tarr ñeññ taruasets all pa'nyo.

13 Allempo atet otuer ataruasañ, ane'tañña'pa' atet och: "Ama, masheñcha', choye' neshquënpe, e'ñe allpona netsa'tenpa ñeñt allpon ya'pocata'muen aromtaña.

14 Te'pa' panerr peçllayor, orrerreþ. Napa' e'ñe pocte' nenteñ na allponcha' netsa'cha ñeñt huapatsa chenta' allpon netsa'tasa samña.

15 Sapa' ama't pocteye' senteñe allpon ñeñt e'ñe nocma napa' e'ñech atet nepe' ñeñt atet nemnen na. Ñato' tarro'marte' cha muene' se'moñe'tenenña' napa' atarrca'ye amuerañan."

16 Ñeñto'mar te'pa' o'ch noterrser: Ñeñt ama esoye' senteno sa te' tarraña ñetña allempopa' atarrcha' asherben enterranet Yompor. Ñeñña atarr asherben sentyen te', ñetña allempopa' amach tama asherbenaye' enterraneto Yompor. Ñeñto'mar te'pa' o'ch alla noterrser: Ama't shonteñña ñaña ñeñt ahua'ñareñ ñeñtcha' neyochresha' neperreñ, tarraña ñetpa' e'ñe puesheña'ttseta ñeñtcha' e'ñe pocte' nenterr na ñeñtcha'ña e'ñe neyochresha' neperr pocacma.

*Allempo Jesús'pa' alla eñotaterraneterr ñapa' chocmach amtsaretterra
(Mr. 10.32-34; Lc. 18.31-34)*

17 Jesús'pa' ahuenerr Jerusalénoneñ pueyochreshohen. O' ahuanenan pueyochresha' a'yente'ye' allña'pa' atet otnenanet:

18 –Te' po'ñoçh o' ahueney Jerusaléno, allcha' pomataterrnet na Ñeñten Acheñetosets. Añcha' nerrmaterre' ñeñt pa'mcha'tareternesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anareñ. Ñetña'pa' atetcha' otyesnet na'mtsaretterrepa'to',

19 o'ch pomuerrnet po'poñ acheñesho ñeñt ama judioneshayaye. Ñetña pueche'tatseteño'fetanpa' allcha'ña achm'are'terrnet, ashterrnetcha', attotcha'ña o'ch corso'tamperrnet, tarraña poma'pamtañoçh alla netanterra.

*Ñeñt pachor pen Jacobo ñaña Juan, ñaña'pa' enamuenan Jesús attoch anorr'cha'tyesuerr
puechoyoresha' Jesúsesho
(Mr. 10.35-45)*

20 Allempoñapa' ponmosya ñeñt pachor pen Jacobo ñaña Juan ñeñt Zebedeo puechemeresha'. Huapa epuet epsheño'mar puechoyor, ñaña'pa' concorpana'tosana Jesús attoch es enamos.

21 Jesús'ña'pa' atet otaþ:

–¿Eso'tña pemnen?

Ñapa' atet otos:

–Napa' añ nemnen te'pa' o'ch pemnatapon añ nechoyor epsheño'mar o'ch anorruerret pesho allcha' pa'mcha'tareterra e'ñe pecohuenño. Puesheñarrpa' anorrosepa'ch pecohuenroñ, po'psheñeñña'pa' anorrosepa'ch pe'chcooterot, allcha' cohuentapreterpet.

22 Jesús'ña'pa' atet otanet:

–Sapa' amaca'ye señoñe ñeñt po'ñoçh senamuenen. Añca'yeña senamuenen attoch semueroçhtapreterrna samña. Ta'm ¿e'ñeñe' po'ñoçh pocte' senteñ o'ch semueroçhterra samña tarro'mar napa' chocmach na'mueroçhtatareterra?

Ñeñt mueroçhteñetspa' Jesús'pa' atet toma'ntatanet ñerra'mrrate' atarr pesherr es yorren orranitso ñaña atto yapatareñtana e'ñe atet ñerra'mrrate' cho ya'mtsareterra Yomporecop. Ñetña'pa' atet ochet:

–Yapa'cho'ña atetcha'ca'ye yepe'.

23 Ñaña'pa' alla otarraneterr:

–Ñehua, po'ñoçhpa' sa'mueroçhtatareterrach samña attescha' ñerra'm na, sa'mtsareterrach samña. Tarraña añña attoch sanorryesos nesho necohuenroñ ñaña

ne'chcoterot allcha' secohuentapreterrna ñeñt'pa' amachca'ye naye' semnaterraye. Añcha'ña anorryesuerrets all ñeñt' e'ñe o'patatenna Nompör.

²⁴ Añña po'potantañ pueyochresha' ñeñt' çharrasheña allempo e'met ñeñt' atet ena-muen Jacobo epuet pa'mo'nasheñ Juan, ñetñapa' ama pocteye' eñcheto çha muene' e'moñe'chet.

²⁵ Allempoña Jesús'pa' alla çhore'terranet allohuen e'ñe ñesho ñeñt'pa' atet otanet:

—Sapa' señoñe' ñeñt' atet pena po'poñ acheñenesha' ñeñt' ama judioneshayaye. Ñet ñeñt' pa'm'cha'tareter penet e'ñech pa'm'cha'noçhteñocmañen pomnaren p'a'yenan allohuen pueyochresha'chno.

²⁶ Sapa' arepa'chña atteye' sepanna'tatsto e'ñe sommo'cheñoç. Socoppa' añña poctetsa o'ch atet sepena. Ñerra'm erra'tsenotes ñeñtes atarr añcha'taretoyen entetsañ ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt' atet pena ñeñt' atta atarr taruaset po'potantañecop.

²⁷ Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñrespa' añ poctetsa o'ch atet senterra ñerra'm ama esoyayso allochñapa' attochña e'ñech cohuen setorrna po'potantañecop atet ñerra'mrate' acheñ ñeñt' atarr taruaset e'ñe atta.

²⁸ Atet ñerra'm na Ñeñten Acheñetosets, napa' ama añecpaye' nehuapo añe patsro allochñapa' sapa' o'ch atta atarr sasherbapuen na atet ñerra'mrate' napa' atarr añcha'taret sentenen. Napa' añecopña nehuapa allochñapa' nachña sasherbose'ña sa, ñeño'marña napa' naña pomosta nañeña o'ch nerromos socop attochña netsa'tuerrnasa so'chñar ñeñtes shontes pa'namen acheñres. Attochña sapa' amach sañeña rromatso so'chñarecop.

Allempo Jesús a'crraterranerr epsheña aporo'yet

(Mr. 10.46-52; Lc. 18.35-43)

²⁹ Alotñapa' alla meterreterr Jericó'tpa' co'a'huanererr shonte' acheñenesha'.

³⁰ Allcha' oñmuetpa' allñapa' ahuepa't anorros epsheña aporo'yet e'ñe toñeto'pño. Ñetña eñotatare'ttet añ huetsa Jesús. Ñeñtña aporo'yetpa' allenta rranare'tapet Jesús, ñeñt'pa' atet otapet:

—Pemueraye'chnomya, Ayochreshate, p'apa' ñeñte'p Davidna'tarep.

³¹ Acheñenesha'ñapa' çha muene' che'ptare'tnometña aporo'yet, atet otoset:

—O'hua semma.

Aporo'yetñapa' elloña alla rranare'terreterr atet otereterr:

—Pemueraye'chnomyañaca'ye, Ayochreshate, p'apa' ñeñte'p Davidna'tarep.

³² Jesúsñapa' alla tomos o' çhore'tanetpa' atet otanet:

—¿Eso'tña semnen ñeñt'cha' atet ne'poses?

³³ Ñetñapa' alla otereterr:

—Ayochreshate, yapa' añ yemnen o'ch pecuatnomuey attoch o'ch cohuen yenterrapa.

³⁴ Jesúsñapa' allenta muerosanet attoña ñapa' a'p'laclle'chosanet. A'p'laclle'chuanetpa' aporo'yetñapa' allorocma enterret e'ñe cohuen. E'ñe cohuertsetpa' çha co'a'n'muet ñamet Jesús.

21

Allempo çhap Jesús Jerusaléño

(Mr. 11.1-11; Lc. 19.28-40; Jn. 12.12-19)

¹ Atteñapa' o' çha'cha'tet allame'tets Jerusaléño. Chapuet aspeno ñeñt' pa'so'cheñ Olivopen. Allñapa' allo'tsen anets ñeñt'pa' añ pa'so'cheñ Betfagé. O'ña çhapmochet all anetso,

² Jesúsñapa' atet otnoman epsheña pueyochresha':

—Sapa' o'ch sota o'ch sečhap a'yente'ye' e'ñe allara anetso. Allña'pa' allcha' sentos ashen all huanquëñet epuet ñaña puechoyor ñeñt rre'ptor. Ñeñtña ashenpa' o'ch sepyam̄psospa' o'ch sanerrnan.

³ Ñerra'm esesha' erroť sotapue' saña'pa' atet'cha' sotosanet: “Yepartsesharca'ye muenene'ña añ ashen. Mameshapa' o'ch alla apuerrsa'.”

⁴ Ñeñt'pa' tarro'mar atet' pa' allochña'pa' attoch etsota añ po'ñoñ ñeñt a'mtaye't ahuat Yompor po'ñoñ. Ñeñt'pa' Yompor eñorataye't atet':

⁵ Atet'cha' soch sióno'marnesha' ñeñt'ara jerusaléno'marnesha': “Secue'tach, te'chca'yeña huaponasaña ñeñt'cha' Sa'mcha'tareter seperr. Atto huena ñapa' amaca'ye pommo'cheñoťeye' čhapaña all, ñeñto'marña ama't rre'ptorechora ashenpa' ñeñt'achca'ye monta'nena.” Arrpa' allohua huañ añ po'ñoñ ñeñt a'mtaye't ahuat Yompor po'ñoñ.

⁶ Allempoña pueyochresha'ña ñeñt' mueña'pa' ñetña'pa' allenta ahuanmuet all anetso. E'ñe atet' otapanet Jesús, ñetña'pa' e'ñečo' atet' p̄oset.

⁷ Allempoña'pa' huapaterrñañet ashen epuet ñaña puechoyor. Ñetña'pa' nohuerret pa'shtam ashnache'ño'pa' montatueret Jesús.

⁸ Shonte' acheñenesha' ñetña'pa' toťma'tyesoñet pa'shtam toño allcha' oñem Jesús. Po'potantañečhnoña'pa' tsorrmo're'tyeset tsach pue'mo'rer allo topanetyeset toñ.

⁹ Allohuen acheñenesha' ñeñt' otachetsa ñaña ñeñt' coťa'huanene' chenta' ñetña'pa' puerrannarteñoťetpa' atet' atarr cohuentatyesneññañetpa' atet' otenet:

—¡Acsherrapo'ch allohueney! ¡Aye'chočhtaterrapo'ch Jesús ñeñt' añcha'taret David po'm̄reneñ! ¡Aye'chočhtaterrapo'ch Jesús ñeñt' llesensen Yompor! ¡Ya'ye'chočhtaterrñañepa'ch Yompor Parets ñeñt' pue'ntaño'tsen!

¹⁰ Atteña'pa' o' čhap Jesús Jerusaléno. Chap allpa' allohuen anetso'marnesha' epaye' cohuanrrortapet. Ñetña'pa' atet' otyeset:

—¿Esesha'te'ña añ acheñer?

¹¹ Acheñenesha' ñeñt' coťa'nene'pa' ñetña'pa' atet' otoset:

—Añca'yeña Jesús ñeñt' a'm̄tene' Yompor po'ñoñ. Ñapa' Galileoťca'ye huena allara anetso Nazareto.

*Atto Jesús'pa' a'cohuentatosan Parets pa'paquëll
(Mr. 11.15-19; Lc. 19.45-48; Jn. 2.13-22)*

¹² Alloña Jesús'pa' be'ťosos Parets pa'paclo. Allña'pa' mueño'tuosan allohuen ñeñt' pomatsre'tetsa all ñaña allohuen ñeñt' rañta'yetsa. E'ñe čha'nmačha'tatosanet al- loť, a'coye'tam̄psosanet po'mesačhno allecma cam̄yatyenet po'čllayoret, a'coye'tuosan ñaña allecma anorryen ñeñt' pomuene' yepečhno.

¹³ Allempoña'pa' atet' otosanet:

—Yompor po'ñoñ ñeñt' atet' anuaret ahuatoteñ allña'pa' atet'ca'ye oten Yompor: “Añ ñeñt' nepaquëll nepenpa' añecpaca'yeña sherben allecmach ma'yochennet.” Tarraña saña'pa' e'ñe atet' sepeññañña Yompor pa'paquëll ñerra'mrrate' eñeñ ñeñt' epotyetsa mapuetpono.

¹⁴ Allña Parets pa'paclo'pa' huačha'toña aporo'yetečhno ñaña ñeñt' checa'repayets. Ñaña'pa' e'ñe a'crratyesapanet.

¹⁵ Añña ñeñt' pa'm̄cha'tareťernesha' pen allohuen judionesha' po'cornaneshar epuet ñaña ñeñt' atarr etsotayenayeñ ñoñets ñeñt' atet' anaret, ñetña'pa' entoñet ñeñt' atarr cočhnesha' atet' orrtatyen Jesús ñeñt' ama't eseshapa' ama puentareto. Ñaña e'mueññañet cheshanesha' all Parets pa'paclo puerranarotetpa' atet' otyenet:

—¡Aye'chočhtaterrapo'ch Jesús ñeñt' añcha'taret David po'm̄reneñ!

Ñetña'pa' atet' entetpa' ñeñt'epa'tcha' atarr atsrre'matahuet.

¹⁶ Allempoña'pa' atet' ochet Jesús:

—¿Ama't pe'muenoña atet otachre'tapař cheshanesha'?

Jesúsñapa' otanet:

—Ne'mueñca'ye. Sañapa' ama't selleyareña Yompor po'ñoñ. All anaret ñoñetspa' ñeñña atet oten:

Ama't cheshatollesha' e'ñe puenamotet e'ñech cohuen pe'ñoratos achotačhre'teñtso.

Ama't ñeññ ora momuenmeñ pe'morrtatoscha' e'ñe cohuen pocop.

¹⁷ O'ña yerpatuerranet añ ñoñets ñeññ atet anaret ahuaťoteñ ñocop, allempoña sa'nerranet ñeññe anetsrotpa' o' alla ahuererr Betanio. Allpa' allecma ommuena.

Allempo Jesúsapa' eñora higočecop amach eñalletatsto pue'mer

(Mr. 11.12-14, 20-26)

¹⁸ Tsapat puetaren alla ahua'muenerr Jesús anetso Jerusaléño. Toñoñapa' čha chep-orra'nma.

¹⁹ Allñapa' entnoman higoč toñetořño'tsen. Ponmosya ama entoñe pue'mer, pasopan-repa'tcha' entosñañ. Jesúsña čhepa'tcha' eñorotsa higočecop, ñeññpa' atet otos:

—¡Arepa'ch eñallettero pue'mer ama't e'ñe ahuaťa!

E'ñe otue'pa' allorocmuepa'tcha' hueya'huaña pasopaner.

²⁰ Pueyochresha'ñapa' e'ñe enteñet o' hueya'huaña higočpan. Ñetñapa' atťa cohuanr-orteñet, atet otanna'tet:

—Erroťenoťuañaca'yeña o' a'uyatačña e'ñe mamecmaťe'.

²¹ Jesúsña atet otanet:

—Po'ñočca'ye o'ch notas: Ñerra'm seyemteña Yompor, ama čhoye' se'charrtateno seyočher, amach añayaya atet sepo atet nepa' higoč. Añe'nachña e'ñe setsoten ñeññ ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspenťecop, "Añ aspenetpa' rroťe'tepa'ch arroť, arrepa'chña esha'tosa sa'po allcha' e'ñe chencosa", aspenetñapa' atetča'čho' pónasa.

²² Ama't allohuen erra'tsencha' es senamñ Yompor e'ñe sema'yocheñoť, ñerra'm čho senamueñ e'ñe seyemteñocmañen, ñeññña' sagařcha'.

Atťo allsensareťtena Jesús

(Mr. 11.27-33; Lc. 20.1-8)

²³ Allempoña Jesúsapa' o' alla čherrerr Jerusaléño, allñapa' beťosuerrerr Parets pa'paclo. Allñapa' yečhatuerranerr acheñenesha'. Atťo yečhatenan acheñenesha'pa' allempoña huačha'toña ñaña ñeññ pa'mčha'tareťernesha' pen allohuen judionesha' po'cornaneshar epuet puesheña'tets ñeññ pompornesha' pen allohuen judionesha'. Ñetñapa' atet otoset:

—Ñehua, yapa' añecop yohuena yemneñ o'ch pōtey ¿erroťe't apuenpetña llesens? ¿Esha'tña pāpuene'ña llesens atťoť pōrrtatyenña ñeññ čhocma atťecma pepa'yena?

²⁴ Jesúsñapa' atet otapanet:

—Ñehua, napa'čho'ña nemneñ o'ch na'pťo'tapas samña ama't paťrra ñoñets. Ñerra'm sanaposencha'pa' napa'čho'ña atťočña notapas namña allot apuennetña llesens ñeñño'mar atet nepena.

²⁵ Sapa'čho'ña o'ch sotosen, ahuañmo'cha allempo apate't Juanañ Yomporecop, ñapa' ¿esha'tña llesense' ñato' Yompor amapa' acheñaťe' apue'ña llesens? Nemnen o'ch sotosen ñeññ atet soctape'chen sa.

Ñetñapa' e'ñe a'nahua otanna'tyeset:

—Ta'm erroťča'ca'ye yochťe'. Ñerra'm čha yoch Yomporeshotca'ye apetña llesens, ñapa' čate'ca'ye otey: "Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'."

26 Elloña ñerra'm cha yoch acheñeshoña apet llesenspa' acheñenesha'ñapa' chate' e'moñe'tyete, tarro'mar ñetpa' e'ñe cohuen eñchete't Juanañ, chocma otyeñet ñapa' ñeñtca'yeña a'mtose' Yompor po'ñoñ.

Ñeñto'marña ñetpa' mecha'teñet acheñenesha'.

27 Ñeñto'marña ñetpa' atet ochet Jesús:

—Ta'm yapa' amaca'yeña yeñoteñe; errotte' huapaña Juanañ, errotte' apetña ñaña llesens.

Allempoña Jesúsapa' atet oterraneterr:

—Napa'cho'ña te'pa' amach notaso samña allot apareten namña llesens attot atet nepa'yena.

Atto Jesúsapa' toma'ntaterraneterr puesheñarr yacma atet penaña epsheña puechemer

28-32 Jesúsñapa' alla oterranerr judionesha' pa'mcha'tareternesha':

—Ahuamno'cha allempo huapa Juanañ, ñapa' añecop huapa attoch ñach seyçhaterre' allohuen ñeñt e'ñe pocte' enten Yompor. Tarraña sañapa' ama same'ñyo. Aña e'ñe cohuen ame'ñapaya ñeñt atarr ochñañenesha'chno atet ñerra'm añ ñeñt po'taruas pa'yene' e'ñe puehquëñotet cobra'yeñet acheñenesha'chno quelle ñeñt gobiernocop ñaña aña e'ñe cohuen ame'ñapayaña Juanañ ñeñt atarr ecañoresha'echno. Allempo sentanet atto ñetpa' cotape'cherret ello cohuen Yomporecop, sañapa' amaña eseshas cotape'cherrayeña cohuen Yomporecop attoch o'ch same'ñera samña. Ñeñtña te'pa' o'ch netma'ntacha. Ñehua, puesheñarr yacma eñall epsheña puechemer. Ñañaapa' atet otenana' puesheñarr puechemer: “Te'pa' nechemere, o'ch ahua'mueneþ ya'mro allcha' petaruasa'muen.”* Ñañaapa' ellonta otapan pompor: “Amaca'ye nemno, amachca'ye neto.” Tarraña elloñapa' cotape'cherran cohuen allempoñapa' ahuo' pompor pa'mro taruasats. Allempoña pomporpa' ahuo' ñaña po'psheñeñ puechemeresho, ñapa'cho'ña atet otos atet otuan po'psheñeñ puechemer: “Te' nechemere, o'ch ahua'mueneþ ya'mro allcha' petaruasa'muen paña.” Ñañaapa' e'ñe cohuen otapan pompor: “Ñehua, apacha' o'ch ahuen o'ch netaruasa'muen ya'mro.” Tarraña ñañaapa' ama't atet otañpa' ama to.

Jesúsñapa' alla oterraneterr:

—Te'pa' o'ch na'þto'tas sa, ñeñt epsheña puechemer, ¿erra'tsena't sentenña sa ñeñt e'ñe po'ñoñ atet petsa ñeñt atet muenen pompor?

Judionesha'ña pa'mcha'tareternesha'pa' ñetñapa' atet ochet:

—Añca'ye ñeñt ñanom, ñeñt otapue' ñapa' año'ch to taruasats tarraña elloñapa' allenta ahuo' taruasats pa'mro. Ñeñtca'yeña etsotene'ña ñeñt atet muenen pompor.

Jesúsñapa' atet oterraneterr:

—Ñeñto'marña te'pa' o'ch notas: Ñeñt puehquëñote'na cobra'yene' acheñenesha'chno ñaña ñeñt atarr ecañoresha'echno, ñetñapa' po'ñoñ allenta aguërrer Yompor po'cohuenña ñeñt atto ayochreshattena ña. Sañapa' amaña allentaye' saguëreña samña tarro'mar sapa' chaña atarr se'charrtatenña seyoçher.

Atet atma'ntatareñteta ñeñt ataruasañechno ñeñt ama cohuenayaye

(Mr. 12.1-12; Lc. 20.9-19)

33 Jesúsñapa' alla oterranerr judionesha' pa'mcha'tareternesha':

—Te'ñapa' se'mñnotencha', napa' o'ch netma'ntatasa po'poñ. Eñall puesheñarr ane'tañ, ñañaapa' nare'tanatatnoman shonte' uvach; pa'muerñapa' e'ñe ora uvachmatatue. E'ñe concha'tamþesue allotñapa' eñan ñaña allcha' a'pecho'toñet uvas po'ñer. Allñapa' tomatatnoman torrepo' allotcha' cohuanþsoñet pa'muer.

'Tomatuepa' na'nman ñeñtcha' taruasatats ñeñtcha' coyerrahuet allpon ñerra'm es-empoch toteñet. O'ña nare'tanatatuepa' o' ahuo' po'poñ anetso þachayo.

* 21:28-32 Ñeñt po'taruas penet ñetpa' toteneta' uva.

³⁴ Chap allempo yen uvachllom̄pa' ñaña'pa' mueñerran po'psheññechno pa'taruasañer ñetcha' enamuertseta' uvachllom̄ po'psheññ pa'taruasañresho ñeññ cohuañpene' uvachma'.

³⁵ Allempoña chenet allpa' enamosan ñeññ allpon o'patena pamo'mte', arepa'tcha'ña es apapuenayeña uvachllom̄, elloña ñeññapa' cha rremapoñet pa'taruasañer, cha nalle'tapueñet puesheñarr, cha muetsapet po'psheññ, po'psheññpa'cho'ña cha rolle'tapoñet.

³⁶ Allempoña ñeññ pamo'mte' pen uvachma'pa' o' alla mueñerranerr po'psheññechno pa'taruasañer shonte'. Allempo chapuet ñamet allpa' attecma erro'tuanen a'pare'tapuet ñamet.

³⁷ Allempoña ñeññ pamo'mte' penetpa' ñaña'pa' atet ot: "Te'pa' o'ch nemñe all ñeññ e'ñe na nechemer. Ñato'rraña ñeññpa' mecha'na'tapetcha'."

³⁸ Ñeññpa'cho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetñapa' atet otanna'tyeset: "Añmapa' ñeññca'yeña puechemer ñeññcha' o'paterraya pompor puenarem̄ esempo. Ñapa'cho'ña te'pa' o'chca'ye yemtsa'p allochñapa' yachca'yeña e'ñe o'paterrayaña pompor puenarem̄. Te'pa' o'ch ahuey o'ch yemtsa'p ñaña."

³⁹ Allempoñapa' o' rromapet o' chetare'tnomet narmetsmo't a'yenet, allña muetsapetña ñaña. Arrpa' allohua atet toma'ntata Jesús e'ñe ñañaña.

⁴⁰ Allempoña Jesús'pa' atet o'terraneterr:

—Ñehua, ñerra'm esempoch huerra ñeññ pamo'mte' pen ataruasañechnopa' ¿señoteñe'tña ñetpa' atetcha' a'pare'tterret?

⁴¹ Judionesha'ña pa'mcha'tare'ternesha'pa' atet o'terretererr:

—Ñerra'm huerrachpa' ñeññña ama matsrre'mño'pa' e'ñech a'cllatuerranet pamo'mte', nanaccha' coñchatuerranet; narmetsmoñapa' elloch nerranerr po'potantañ ñeññcha' taruaserrtserr all uvachmo. Nerranerrcha' ñeññcha' e'ñe po'ño'ch apuerre' pue'mer ñerra'm esempoch yen.

⁴² Allempoña Jesús'pa' atet o'terraneterr:

—Sapa' ama't ahuatapa' ama'tña selleyareña ñeññ atet anuaret Yompor po'ñoñ ahuatoteñ. Tarro'mar ñeññpa' atet oten nocop, na atma'ntataret mapue'. Ñeññpa' atet oten:

Añ mapue' ñeññ ama pocteye' entyeno ñeññ tomatyene' pocoll, ñeññña te'pa' o' anare'tterra ñeññcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll. Ñeññpa' Yomporca'yeña atet patene', ñeñño'marña yapa' e'ñe cohuen yenteñ. Arrpa' allohua atet toma'ntaterrerr Jesús e'ñe ñañaña.

⁴³ Ñeñño'marña sa ñeññes judioneshaspa' te'ña Yomporpa' puerratanñperrescha' po'cohuenña ñeññ atto ayochreshattena ña. Añcha'ña apuerr ellonet po'potantañ acheñenesha' ñeññ ama judioneshayaye ñeññcha' po'ño'ch orrtaterre' e'ñe ña po'cohuenña atto atarr ayochreshattena ña.

⁴⁴ Allohuen erra'tsencha' atetsa añ mapyo ñeññña mapue'pa' e'ñech a'yosatse'tuanet. Ñaña ñerra'm eseshesho shora'nom ñeññ mapyerpa' e'ñech a'pe'ptse'tuosanet.

Attoña Jesús'pa' toma'ntatanet ñerra'm ama esesha' pocteye' entenaye Cristo ñerra'm erra'tsencha' ama aguerraye, ñeññña acheñerpa' chocmach huapoña ñeññcha' atarr mue-rochtaterrahuet.

⁴⁵ Allempo atet e'myes ñeññ pa'mcha'tare'ternesha' pen allohuen judionesha' po'cornaneshar ñaña fariseonesha', ñeññ atet toma'ntatenanet Jesús, ñetña allempopa' chapamet pueyo'chreto ñocpuetepa't serrpare'tenña Jesús.

⁴⁶ Ñetñapa' mueneñetañ o'ch rremuetañ tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús ñapa' po'ñoçh ñeñt' a'mtene' Yompor po'ñoñ.

22

Atto atma'ntatarettena puesheñarr amcha'taret puetare'tatan shonte' rreñets ñeñtcha' rret allempoch sena'ta puechemer

¹ Jesúsñapa' alla toma'ntaterraneterrpa' atet oterraneterr:

² —Yompor po'cohuenña ñeñt' atto ayochreshattena ña pue'ntañeñ ñeñt'pa' o'ch netma'ntacha atet ñerra'mrrate' puesheñarr amcha'taret. Ñeñt'ña amcha'taretpa' o' puetare'tatan shonte' rreñets ñeñt'cha' nanac rret allempoch sena'ta puechemer.

³ O'ña a'potatuan rreñetspa' o' mueñan pa'taruasañrenesha' o'ch otyeñeta' ñeñt' ahua'ñaref' o'ch rrapreteneta' rreñets. O'ña otyesuarettetpa' ñetñapa' arepa'tcha' eseshaye' sechatso o'ch ahuet all.

⁴ Po'pocheño'pa' o' alla mueñerranerr po'potantañ pa'taruasañrenesha'. Ama seneta'pa' atet otapanet: “Sotoscha' acheñenesha' ñeñt' ahua'ñaref': ‘Amcha'taretca'ye sagotatene', atetca'ye oten: Rreñetspa' o' e'ñe na'potatue. Huacshečno ñaña beserečno ñeñt' ne'soya'tatyen o' e'ñe nemtsatue ñaña o'ca'ye e'ñe na'potatue. Te'pa' sona'cha'tepa'to' ahuo'ch serrapreteña.' ”

⁵ Ahua'ñaref'nesha'ñapa' arepa'tcha' a'cua'psenaye' eñchetoña ñeñt' hua'ñenahuet. Ñeñt'apa' ahuanemyeset ñopa'tets. Puesheñarrpa' ahuo' pa'mro, po'psheñeñpa' ahuo' pomatsre'tatsa.

⁶ Po'potantañña'pa' ñeñt'apa' o' rremapoñetña pa'taruasañrenesha'pa' erro'tuanen pet, atteñapa' o' muetsanatuet.

⁷ Amcha'tareñapa' ñeñt'ña atarr atsrre'mate'. Allempoñapa' o' mueñan ñaña po'solltarrenesha' ñeñt'cha' a'cllatenaya' ñeñt' amtsañečno, ñeñt'cha' a'poyatatuenaya' ñaña pa'netser.

⁸ Allo'tña amcha'taretpa' atet oterranerr po'potantañ pa'taruasañrenesha': “Rreñtsoçhnoña po'ñoçhpa' epaye'ca'ye. Tarraña ñeñt'ña ahua'ñaref'pa' ñetpa' amaca'ye cohuenaye' nentenaneto.

⁹ Te'pa' orras samña allo'tsen toñečno tarro'mar allpa' shonte' chopeñe'chyen acheñenesha'. Allohuen errponcha' sentyes o'ch sotyapanet onetepa' arr o'ch rrapreteneta' rreñets ñeñt' shonte' na'potaten.”

¹⁰ Allempoña alla ahuanerrerr pa'taruasañrenesha', ñetñapa' añ co'ta'yeset toñ. Ñeñt' allpon pocta'yeset toño'mar e'ñe sechatyesuahuet, ama't atsrre'mñatečno ñaña ñeñt' cohuen acheñ. Atteñapa' o' cha shontosa ñeñt' hua'ñenet. Allña pocollo all sena'tena puechemerpa' e'ñe quechcosa ñeñt' ahua'ñaref'.

¹¹ 'Amcha'tareñapa' allenta be'tos o'ch entapan ñeñt' hua'ñatyen ñeñt'cha' rrallme'chosets all. Allña'pa' entan puesheñarr yacma. Ñaña'pa' ama aye'ye' chorreno shetamuets emarr ñeñt'ecma chorrenet all atto coshapreteñet ñeñt' sena'tetsa.

¹² Amcha'tareñapa' atet och: “Eso'mare'tña masheñe pebe'teña arr amaca'ye aye'ye' pechorreno shetamuets emarr attoch p'ocshaprecha ñeñt' sena'tetsa.” Ñaña'pa' ama eñoro.

¹³ Allempoña amcha'taretpa' otan pa'taruasañrenesha': “Sehuancoñ pa'tac ñaña potpa' chosa huapore'terre' a'yo't checmetof. Allña'pa' allcha' yahuanrrorterret, panmueño'tet atserrpa' rraso'tyerretcha' pa's.”

¹⁴ Tarro'mar ama't shonteñña ñeñt' ahua'ñaref'pa' tarraña puesheña'ttsaña ñeñt' e'ñe cohuen a'craref'.

*Atto a'pto'chet Jesús, pocte'te' o'ch tsa'tet impuesto
(Mr. 12.13-17; Lc. 20.20-26)*

¹⁵ Allempoña fariseonesha'pa' ahuanerra. Ñetñapa' čha atarr coťape'chatanna'teneta'. Ñetpa' aña atarr e'nenet attoch e'ñe puehquẽñoťetpa' ama't parrochapa' o'ch eñorachet Jesús ñeñť ama pocteyaye. Allochñapa' attotcha'ña otteñe'chet.

¹⁶ Ñetñapa' e'ñe a'nahua mueñet ñet pueyochresha' epuet ñaña pueheña'tets Herodes pueyochresha'. Ñetña čhapuet Jesúseshopa' e'ñe puehquẽñoťet atet otoset:

—Maestrocha' yapa' yeñoteneř p̄apa' ama peshquẽno ama't mamesha ñaña ñeñť atto peyčhaten Yompor poctap̄ña ñeñťpa'čho'ña e'ñe cohuenacma, ama shequẽntsoyaye ama't mamesha. Ñaña p̄apa' ama aña ñapueť pemorrenteno ñeñť atarr am̄cha'na'tpo' entyen allohuen acheñenesha'. Allohuen acheñ e'ñe cohuen pentueñ.

¹⁷ Ñeñťo'marña te'pa' yapa' yemneñ o'ch peñotatapuey erra'tsente'ña e'ñe po'ñočh cohuentetsa. ¿Pocte'te' penteñña p̄a o'ch yetsa'ta impuestos añecop ñeñť am̄cha'tareťtetsa all anetso Romo ñeñť ama judioneshayaye? Ñato' amate' pocteyayeña yocop ñeñťey judioneshay o'ch yetsa'cha am̄cha'tareť romo'marnesha' ñeñť ama judioneshayaye.

¹⁸ Jesúsñapa' eñotapanet ñeñť atet coťape'chyenetañ ñocop, ñañaapa' atet otanet:

—Sapa' atarr ashcarñaates, eso'mare'tña semneñña o'ch seshcare'tenen.

¹⁹ Ñehua, ama't atteseñpa' segatenca'ye puetallarr quelle ñeñť alloch setsa'ta impuestos.

Allempoñapa' gachet puetallarr quelle ñeñť otenet denario.

²⁰ Ñañaapa' atet oterraneterr:

—Ñehua, sapa' o'ch soten, ¿essha't sentenña ñeñť atma'ntareťtetsa all? ¿Esesha't pa'so'cheñ aquellcareťtetsa all?

²¹ Ñetñapa' atet ochet:

—Am̄cha'tareťca'ye atma'ntareťtetsaña all, ñaña ñoca'yeña pa'so'cheñ ñeñť aquellcareťtetsa all.

Jesúsñapa' alla oterraneterr:

—Ñeñťepñapa' añ poctetsa o'ch yař am̄cha'tareť ñeñť ño ñeñť atet poctetsa gobier-nocop, tarraña ellonetña ñeñť Yomporo o'ch yař ñaña ñeñť atet poctetsa ñocop.

²² Ñetña atet e'mueñet Jesús atet anapuenanetpa' atta cohuanrrorteñet tarro'mar Jesúsapa' atarrca'ye cohuen anapuenanet. Atteñapa' quečpa'huaneretpa' ahuanerret.

Atto a'pto'chet Jesús, ñerra'm po'ñočhte' atanterrapo' rromot, ta'm, allempopa' er-rotencha'ña yeperra

(Mr. 12.18-27; Lc. 20.27-40)

²³ Ñeñťe yetrocma huacha'toña ñaña patantarr ñeñť saduceoneshatets. Ñehua, ñeñť saduceoneshatets ñetñapa' ellonet echenet poctap̄ña ñeñťo'marña ñetpa' atet otenet amate' errotenoť yetanterroña rromot ama't errponaña. Ñetñapa' atet otoset Jesús:

²⁴ —Añ Maestrocha' ñeñťca'yeña atet otye'tña Moisés ñeñť poctetsa ñeñťcha' atet yeřa. Ñerra'm esempo rroma yacma o'ch sa'nman puetapor tarraña ñerra'm ama chemere'tnomopa', añ poctetsa pa'mo'nasheñcha' alla yorerre'ña po'norrar allochñapa' attoch eñalletteraña ñeñťcha' puechemer perr pa'mo'nasheñeñ. Ñeñťpa' atetca'ye quellca'nmonayña ahuať Moisés.

²⁵ Ñehua, te'pa' eñall cančherrsheña yamo'ts ñeñť e'ñe poctacma pa'mo'nasheñecmuet. Ñeñť pueheñarr popo'nareťpa' o' yoran coyanesha' ñeñť puetapor p̄a'. E'ñe allpon-matatsapa' o' rroma, atta sa'nman puetapor ama chemere'tnomo. Allempoña ñeñť po'rročho'merpa' o' yoreran pa'mo'nasheñeñ puetapor.

26 E'ñe allponmatatsapa' ñapa'cho'ña o' rromuerrerr ñaña, ñeñtpa'cho'ña ama chemere'tnomo. Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña, ñeñtpa'cho'ña ama chemere'tnerrero o' atta rromuerrerr. E'ñe attecma pohuet cancherrsheño'maretpa' e'ñe pueyoruarochetña ñeñtara puesheñarr coyanesha'. Allohuenetpa' e'ñe attecma pet rromayestset ama't puesheñarrofetapa' amaca'yeña chemere'tnomueto.

27 Allempoñapa' cho rromatsña ñaña coyanesha'.

28 Te'ña ñerra'm po'ñochte' atanterrapo' rromotpa' añña coyanesha'ñapa' allempopa' ¿essha'tcha'ña e'ñe ñapueñ puetapor perre' tarro'mar allohuenet cancherrsheño'maretpa' e'ñeca'ye pueyoruarochet?

29 Jesúsñapa' atet otapanet:

—Chaca'ye atarr sepanteñ tarro'mar amaca'ye chennasoña seyoçhro ñeññ e'ñe po'ñoçh atet yeçhateney Yompor po'ñoñ ñeññ atet anuaret ahuatoteñ. Ñaña aña sepantatene' tarro'mar sapa' ama sepoctenñañe Yompor po'huamenc.

30 Tarro'mar esempohuañen allempoch tanterret po'pocheño, allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuer-raye ñeñtcha' yorerrahuet. Tarro'mar allempopa' e'ñech attet ñerra'm Yompor po'millañoñeñnaneshar ñeññ pue'ntaño'tsa'yen.

31 Sapa' ama'tña selleyare ñeññ atet ote't ahuañ Yompor e'ñe socop attoch señoçh po'ñoçhpa' ama't ñeññ o' colla'huapa' ñetñapa' corretseta.

32 Ñehua, ñeñtpa' atet oteney Yompor: “Napa' na ñeñten Po'yomporer pen Abraham ñaña Isaac ñaña Jacob ama't ñetpa' o' rromhuet ahuatoteñ.” Ñehua, yapa' yeñoteñ Yomporpa' ama aye' Po'yomporer penaye ñeññ rromuets e'ñe poctacma, ñapa' aña'yeña Po'yomporer pene' acheñ ñeññ corretsetach. Attoña Yomporpa' e'ñe allame'tsa entenanet allohuen ñetñapa' e'ñe bettetseta.

33 Allempoña allohuen acheñenesha' ñeññ e'muene' Jesús atto emma'huan saduceonesha', ñetñapa' atet otanna'tyeset:

—¡Erroñeñotuañaca'yeña atarr es eñoten, atto atarr cohuen yeçhatyeney!

Añmapa' ñeññ ñoñets ñeññ atarr sherbets, e'ñe metana'tuenan allohuen po'poñeçhno ñoñets
(Mr. 12.28-34)

34 Ñaña allempo fariseonesha' e'mare'chet atto Jesús emma'huan saduceonesha' ñetñapa' apçhanna'tet parro.

35 Allempoña puesheñarrofet ñeññ atarr etsotene' ñoñets ñeññ atet anaret ñaña'apa' otenana' Jesús. Ñeñtpa' tarro'marña atet a'p'to'tos ñetpa' çhoca'ye mueneñet o'ch topachet Jesús.

36 Ñeñtpa' atet otos:

—Maestrocha' ¿erra'tsena't ñoñtsor ñeññ atet anaret ñeññ atarr sherbets ñeññ ello metana'tuene' ora allohuen po'poñeçhno ñoñets ñeññ e'ñe parro attecma anaret?

37 Jesúsñapa' atet otaþ:

—Aña'yeña ñeññ ello atarr sherbets, ñeññ ñoñetspa' atet oten: “Atarropa'ch yemor-renteña Yeyomporer ñeññ Yepartseshar yepen e'ñe ora yeyoçhrocmañen. Ñaña e'ñe yecamquëñoñ yemorrenchach, ama't ñaña ora yocþaññohuen.”

38 Ñeñtpa' ñeñtca'ye ñoñets ñeññ po'ñoçh atarr sherbets, ñeñtpa' elloca'yeña metana'tuenan po'poñeçhno ñoñtsoçhno.

39 Allotpa' po'poñ ñoñets ñeññ atarr sherbets ñeñtpa' atet oten: “Atarrcha' yemor-renteña yamo'ts e'ñe atet atarr yemorrentena yañeña.”

⁴⁰ Añ epo'mar ñoñets ñeñtña e'ñe etsotatuene' allohuen po'poñechno ñoñtsochno ñeñt atet ana'yese't, ñaña allohuen Yompor po'ñoñ ñeñt a'mta'yese't ahuat.

Atto Cristo ñeñt Po'partseshar pe't David ahuat, elloñapa' o' alla po'mreneñ per (Mr. 12.35-37; Lc. 20.41-44)

⁴¹ Allempoña fariseonesha'pa' ñetñapa' allo'tsenareta all apchenet e'ñe ñochayet,

⁴² Jesúsña allpa' atet otanet:

—Sapa' ¿errofena't sotenña sa añecop ñeñtcha' Cristotosets? ¿Essha't soten ñeñtcha' po'mreneñ perre'ña ñeñtcha' Cristotosets?

Ñetñapa' atet ochet:

—Davidcha'ca'ye po'mrenñoñ huapaña ñeñtcha' Cristotosets.

⁴³ Ñañapa' alla oterraneterr:

—Ñerra'm po'ñoñcha' David po'mreneñ perre'pa' sapa' ama't señoñeña Davidpa' allempo eñorache't Parets Puecamquëñ ñapa' atetca'ye ote't po'mrenñecop ñeñtara ñeñtcha' Cristoterrets: “Napa' ñeñtca'yeña Nepartseshar nepen.” David allempopa' atetca'ye eñose'tña añecop ñeñtcha' Cristoterrets:

⁴⁴ Yompor Paretspa' atet otennan ñeñt e'ñe Nepartseshar nepen na (ñeñtara ñeñtcha' Cristoterrets): “Te'pa' o'ch ñanorruerr arr necohuenro't allcha' pecohuentapreterra. Attochña ama't ñeñt pe'moñe'tene' napa' o'ch e'ñe name'ñatuerranet allochñapa' o'ch atet perret ñeñt pemnen ña.”

⁴⁵ Ñeñtapa' atetca'ye ote'tña David, ñeñtcha' Cristoterretspa' ñeñtca'yeña Po'partseshar pe'tña ama't allempoteñ. Ñehua, ama't señoñeña Cristo ñeñt Po'partseshar pe't Davidpa' ñeñtña te'pa' o' alla po'mreneñ per ñaña.

⁴⁶ Ñetñapa' ama't puesheñarrofetapa' ama eseshaye' anapuenaye' entaye. Ñeñto'marña allempoteña' ama't puesheñarrofetapa' ama eseshaye' a'p'to'tenaye' enterraye.

23

Atto Jesúsapa' a'metare'tenan fariseonesha' ñeñt atet yechenet ñetpa' ñeñtapa' ama cohue-naye' entapretenaneto Yompor

(Mr. 12.38-40; Lc. 11.37-54; 20.45-47)

¹ Allempoña Jesúsapa' alla serrpare'taterran allohuen acheñenesha' ñaña e'ñe ña puey-ochresha'chno. Ñeñtapa' atet otanet:

²—Añña fariseonesha' epuet ñaña ñeñt atarr etsotayene' ñoñets ñeñt atet anare't, ñetpa' añecpa anare'ttenet ñetcha' señoñatene' ñoñets ñeñt atet nonase't Moisés ahuat.

³ Ñeñto'marña socoppa' e'ñe pocte' o'ch sephoñena ñeñt atet otenset, amachña chaña satpare'teñe. Tarraña sapa' amachña atet sepatsto ñeñt atet patse'tyenet ñet. Tarro'mar ama't atarr cohuen serrpare'tenetaña' amaca'yeña e'ñeye' atet peneto ñeñt atet serrpare'tatenset.

⁴ Ñetpa' chaca'ye atarr atontatennasetña ñoñets ñeñtcha' e'ñe atet sephoñeneñ ñetpa' ñeñtaca'yeña nennaset ñeñt atarr torrapo' sentyen. Ñeñtapa' atetcha' netma'ntacha ñetpa' chaca'ye ottenet ñerra'mrrate' añ huanquënnaset ñeñt atarr eñerr se'muen attoch sechechnomñ. Tarraña ñet ama't mameshapa' amaña anmapretenseto, ama't pota'p'otetapa' ama echantapretnenseto ñeñt chechatnenset.

⁵ Fariseonesha' allohuen ñeñt atet etsotayeneña' ñeñtapa' e'ñe pommo'cheñoñeta atet penet allochñapa' acheñenesha'ña' e'ñech cohuen entyeñet ñeñt atto atarr torra'yenetañ Yomporecop. Tarraña ñeñtapa' e'ñeca'ye orrena. Ñaña ñetpa' chaca'ye ateshatomuerrtatenet poreñ allñapa' all quellquëññañetañ Yompor po'ñoñ ama't ñeñtapa'cho'ña alloca'yeña huancato'tenet. Tarraña ñeñtapa' e'ñe añecpa atet penet

attoch acheñenesha'pa' e'ñech cohuen entenanet. Tarraña ñeñtpa' e'ñe orrena atet penet ñeñ atto ommo'chenet. Ñaña ñetpa' añe'naca'yeña allpocha'ptatenet ñeñ çhera'rrtenet pa'shtamueto pa'rrpe'monet. Tarraña ñeñtpa'cho'ña e'ñe añecpa atet penet e'ñe pommo'cheñoet.

⁶ Ñaña ñetpa' ñerra'm çho rrallme'chapretenetpa' añaca'ye atarr muenenet o'ch anorrça'tyenet allecma anorryen ñeñ atarr amcha'na'tpo' entyen allohuen acheñenesha'. Ñaña ñetpa' e'ñe attecma penet ama't all judionesha' po'prahuo.

⁷ Ñaña ñetpa' e'ñe pommo'cheñoet añe'naña atarr muenenet acheñenesha'pa' o'ch huomcha'tyesapanet pue'mcha'nañoet ñerra'm esempo chopeñe'chyenet toño'mar allecma shontena acheñenesha'. Ñaña pommo'cheñoetpa' añe'naña atarr muenenet o'ch otanet acheñenesha' ñetpa' e'ño' partsesharerochet.

⁸ Tarraña saye'ña neyochreshacha' ñato'tña semnena'ña o'ch otas acheñenesha' sapa' e'ño' partseshareroches. Ñaña sa allohuenespa' e'ñechña semo'nasheñecma sepanna, tarro'mar sa allohuenacpaspa' naptaca'yeña Separtseshar sepenen na ñeñten Cristotsets.

⁹ Ñaña arr patsro ama't puesheñarra amach seyomporer sepatstaneto. Tarro'mar sapa' e'ñeca'ye patraña Sompör ñeñ pue'ntaño'tsen.

¹⁰ Ñaña sapa' amach semnatsche ama't puesheñarra e'ñe pueçhore'teñoetaspa' o'ch otaset: Na'yochreterneshacha'. Tarro'mar sa allohuenacpaspa' naptaca'yeña Sa'yochreshater sepenen na ñeñten Cristotsets.

¹¹ Tarro'mar ñeñ po'ñoç cohuen amcha'tarettetsa sesho ñeñtpa' ñeñtca'yeña atarr torretsaña po'potantañecop attoch orrtatanet ñeñ atarr sherbets ñocpuet.

¹² Tarro'mar allohuen ñeñ e'ñe cohuen entetsa e'ñe pommo'cheño ñeñña tsapaonetpa' amach esoshe'maye' entereto. Tarraña allohuen ñeñ ama esoshe'maye' entetso te' ñeñña tsapaonetpa' atarrcha' cohuen enteret.

¹³ 'Atarr nanac llequëntso'tsenes fariseoneshacha' ñaña samã ñeñtes e'ñe etsotayenayeñ ñoñets ñeñ atet anaret judioneshacop tarro'mar sapa' sommo'cheño'e'na atarr seshcare'tyen. Tarro'mar ama't sapa' amaca'ye senteññaña Yompor po'cohuenña, ellonetpa'cho'ña çhocma sepatate'ña po'potantañ ñeñ e'nene' Yompor po'cohuenña. Cha sa'npampeña acheñenesha' attoch ñetpa'cho'ña amach enterrñañeto Yompor po'cohuenña ñeñ atto atarr ayochreshattena ña pue'ntaño't.

¹⁴ 'Atarr nanac llequëntso'tsenes fariseoneshacha' ñaña samã ñeñtes e'ñe etsotayenayeñ ñoñets ñeñ atet anaret judioneshacop, tarro'mar sapa' sommo'cheño'e'na seshcare'tyeñ. Ama't rretorrnaneshapa' ñeñe'naña seprratam pesyenña pa'paquell. Elloña e'ñe sommo'cheño'pa' aña atarr semnen o'ch atet sepena ñerra'm atarr cohuen achepes ñeñto'marña all sema'yochena allecma shontena acheñenesha'pa' amach tematenayaya sema'yocheno. Ñeñto'marña na te'pa' o'ch notas, sapa' elloña atarrcha' sa'coñchataretterra.

¹⁵ 'Atarr nanac llequëntso'tsenes fariseoneshacha' ñaña samã ñeñtes e'ñe etsotayenayeñ ñoñets ñeñ atet anaret tarro'mar sapa' sommo'cheño'e'na atarr seshcare'tyen. Sapa' çhocma sechopeñe'chyen erracmañen patso'mar, sechatyena ama't ñaña sapo'mar. Ñeñtpa' añecpa atet sepena attoch same'ñatyasya ama't e'ñe puesheña'ttsa e'ñe sa soçtaña ñeñtes judioneshas. Ñeñ allpon same'ñatyenapa' ñetña'pa' aña seychatyenenet ñeñ ama cohuenayaye ñeñ e'ñe atet sepena samã. Ñeñto'mar ñetpa'cho'ña ello atarr nanac o'patatarettenet coñcheñets, e'ñe epoche'ttsocma so'patatenenet coñcheñets.

¹⁶ 'Atarr nanac llequëntso'tsenes tarro'mar ama't ñeñ ama sechenoyo seyoçhro sañapa' ñeñtara seyçhateña po'potantañeçhno. Ñeñtpa' e'ñe atet sepena ñerra'mrate'

aporo'yotecmas echa'nmannetsa. Ama't seychateneñ ñeñt po'ñoçhpa' amaca'ye atteyaye. Ñeñtpa' atet soteneñ: “Ñerra'm esesha' nene' po'ñoñ ñerra'm aña Parets pa'paquëll pa'so'chño nenan po'ñoñ saña ñeñtpa' cha soten año' esoyaye ama pallteno o'ch e'ñe po'ñoçh a'pocatan po'ñoñ.” Tarraña po'poñpa' atet soteneñ: “Ñerra'mña añ oro pa'so'chño yena' yeñoñ ñeñt Parets pa'paclo'tsen allempoña po'ñoçhpa' chocmach e'ñe ya'pocatat yeñoñ.”

¹⁷ Sapa' atarr otatsñañes, ama añeye'ña sechenoyoña seyoçhro ñeñt cohuen enten Yompor. Chaca'ye sottena ñerra'mrrate' aporo'yotecmas. Ama't señoñeña atet sherben oropa' e'ñeca'ye attecma sherbenña ñaña Parets pa'paquëll. Tarro'mar allempo nete't oro Parets pa'paclo, ñeñña oropa' añca'ye e'ñe cohuen a'pocatatye't Partsocop ñeñtara Partso'.

¹⁸ Ñaña po'poñpa' atet soteneñ: “Ñerra'm esesha' nene' po'ñoñ e'ñe altar pa'so'chño allecma neñet ñeñt amsarettetsa Yomporecop, ñeñtpa'cho'ña cha soten año' esoyaye, ama pallteno o'ch e'ñe po'ñoçh a'pocatan po'ñoñ.” Tarraña po'poñpa' atet soteneñ: “Ñerra'mña añ pa'so'chño yena' yeñoñ ñeñt amsarettetsa Yomporecop ñeñt nenet altarro enot, allempoña po'ñoçhpa' chocmach e'ñe ya'pocatat yeñoñ.” Tarraña ama't atet sotatse'tyeneñpa' ñeñtpa' amaca'ye po'ñoçhoyaye.

¹⁹ Sapa' ama añeye' sechenoyoña seyoçhro ñeñt cohuen enten Yompor. Cha sottena ñerra'mrrate' aporo'yotecmas. Ama't señoñeña altarpa'cho'ña atarrca'ye sherben. E'ñe attecma sherben ñerra'mrrate' ñeñt amsarettetsa Yomporecop ñeñt nenet all altarro enot. Tarro'mar altarpa' ñeñtca'yeña a'pocatatene'ña Yomporecop ñeñt nenet all.

²⁰ Ñeñto'marña yeñoñeñ ñerra'm esempo yenen yeñoñ altar pa'so'chño, ama e'ñe ñapña altar pa'so'chño yenenoña yeñoñ; añohuenca'yeña yenenña yeñoñ e'ñe pa'so'chño allohuen ñeñt na'yenet all, allecma sherba'yenet Yompor.

²¹ Ñaña ñerra'm esempo yenen yeñoñ Partso' pa'so'chño, ama e'ñe ñapña Partso' pa'so'chño yenenoña yeñoñ. Yompore'naca'yeña pa'so'chño yenenña yeñoñ tarro'mar ñapa' e'ñeca'ye ño pa'paquëll.

²² Ñaña ñerra'm yenen yeñoñ Yompor pue'ntañ pa'so'chño, Yompore'naca'ye pa'so'chño yenenña yeñoñ ama't ñaña Yompor po'conañe'naca'ye pa'so'chño yenenña yeñoñ tarro'mar enetpa' Yomporca'ye po'conañ pene' tarro'mar allpa' allo'tsenca'yeña Yompor.

²³ Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop tarro'mar sapa' sommo'cheñoñe'na atarr se-shcare'tyen. Ora allohuen ñeñt senarem sepen ama't chocma sapueñeñ Yompor allpon ñeñt pocetsa ñocop –mentapan, anísopan, cominopan—sapa' cha sepsenña ñeñt ñoñtsor ñeñt atet anaret ñeñtca'yeña ello nanac sherbets. Ñeñtpa' attoch e'ñe cohuen es sepa'yeññañ po'potantañ. Ñeñña sapa' chaña sepseñ. Ñaña attoch semueranna'ta ñeñtpa'cho'ña sañapa' chaca'yeña sepseñ. Ñaña attoch po'ñoçh e'ñe cohuen same'ñañatena Yomporecop ñeñtpa'cho'ña sañapa' chaca'yeña sepseñ. Sapa' e'ñe ñeññaña sepalltena. Ñaña atto chocma es sapa'yen Yomporecop ñeñtpa'cho'ña chocmach atet sepena amach cha sepsatstere.

²⁴ Sapa' ama't ama çoye' çhennaso seyoçhro ñeñta atarr semneñ o'ch seyçhach po'potantañ acheñenesha'. Ñeñtpa' e'ñe atet sepena ñerra'mrrate' aporo'yotecmas echa'nmannetsa. Añ ñoñets ñeñt atet anaret socop ñeñt setseten e'ñe so'na soçta'ña ama't ñeñtpa' atarr coñe'tot sherben Yomporecop, sañapa' ñeñtaca'ye atarr semneñ o'ch seyçhateñ po'potantañ. Tarraña añ ñoñtsor ñeñt atarr nanac sherbets Yomporecop, saña ñeñtpa' ama çhennasoña seyoçhro ama't e'ñe mamesha. Ñeñtpa' o'ch netma'ntacha atet ñerra'mrrate' ñeñt atarr es añetoll allpon ñerra'm çhoyo'yetoll saña ñeñtpa' chaca'yeña

seyorasoteñ tarraña ñeñña atarr añecmuen allpon ñerra'm huaquësh* sapa' ñeññaña sañyen e'ñe atfa.

25 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop. Sapa' e'ñe se'pame'teneñña setaza enotpa' o'ponotñapa' ama se'parro'teñe. Seplatopa'cho'ña enota e'ñe se'pata'teñ o'ponotñapa' ama se'pata'teñe. E'ñe atet sepena saña. E'ñe sa'cohuentatena ñeñt eno'mar ñeñt atet seyçhena sa allochñapa' attoch entenes allohuen acheñenesha' sapa' e'ño' cohuenes, tarraña o'pono seyoçhropa' amaca'yeña sa'cohuentateñe, allñapa' e'ñe chorren shonte' sosya'tsañeçhno ñeñt atto e'ñe seshquëñote'na çhocma es seprratam̄pesyen, atarr es seye'chapretannena, ñeñtñapa' e'ñeca'ye socpa.

26 Ñeñtes fariseoneshas, sapa' ama añeye' seçhenoyoña seyoçhro ñeñt cohuen enten Yompor. Chaca'ye sottena ñerra'mrrate' e'ñe aporo'yeteçmas. Socoppa' añca'yeña poçtetsa, ñanomcha'ña o'ponot se'pame'tña setaza, seplatopa'cho'ña ñanomcha'ña o'ponot se'patach. Allochñapa' o'ch e'ñe cohuenta emoshem̄to'mar.

27 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop. Sapa' e'ñe ates ñerra'm apampaña ñeñt a'huallama'ttam̄penet. Enotpa' e'ñech cohuen orrtenañ. O'ponotñapa' e'ñech chorren arromña'ap ñaña pa'namen ñeñt nanac sosey.

28 Sapa'cho'ña e'ñerramche' atesña saña. Po'ñoçhca'ye ñeñt atet sorratyen acheñenesha'ñapa' e'ñe atet entenset ñerra'mrrate' sapa' e'ñe cohuenare' es sepa'yen. Tarraña o'ponoña seyoçhropa' e'ñe aña shontetsa alloch sommo'chyena, atarr seshcare'tanna'tyena, pa'namen sorratyen ñeñt ama't mamesha ama cohuenaye' entapretenso Yompor.

29 'Atarr nanac llequëntso'tsenes fariseoneshacha' ñaña sa ñeñtes e'ñe etsotayenayeñ ñoñets ñeñt atet anaret judioneshacop tarro'mar sa te'pa' satomaten enot ñeñt atarr cohuen senten sa all pampa'yesete't ñeñt a'mta'yesaye't Yompor po'ñoñ. Ñaña añe'na sa'cohuentam̄pesyen all pampa'yesete't ñeñt acheñeneshar ñeñt e'ñe poçte' es pa'yesete't.

30 Saña te'pa' atet sotyeneñ: "Ñerra'm allempocmach ye'ñalletañ allempo corre't yatañneshañ, atto ñetpa' muetsanachete't ñeñt a'mta'yesaye't Yompor po'ñoñ, yañapa' amate' eso'mar yemtsapretaneto."

31 Ñeñt atet sotyeneñpa' te'ña e'ñe sa señoño'tpa' o' sa'metam̄psa e'ñe sañeña po'ñoçh sapa' po'mrenñesca'ye ñeñt muetsanataye't ahua't ñeñt a'mta'yesaye't Yompor po'ñoñ.

32 Ñeñto'marña sa te'pa' ñeñtaca'yeña e'ñe setsoteññañ satañneshañ ñeñt allpon sosya'tsañeçhno ñeñt e'ñe mo'tetnomnas ahua'toteñ e'ñe sa satañneshañ.

33 'Sapa' ama cohuenayayso atarr ashcarña'ates, çha sottena ñerra'mrrate' shechpa sompor sepen. Sapa' erro'tenohuachñaca'yeña sequeshperrate'. Sapa' añaca'ye so'patenaya coñcheñets ñeñt parrare' tso' all o'pono.

34 Ñeñto'marña te' napa' o'ch nemñernas ñeñtcha' a'mta'yerre' neñoñ, ñaña ñeñt atarr eñotañ nepa'yen, ñaña ñeñt atarr etsotayene' neñoñ ñeñt atet anaret ahua'toteñ. Tarraña saña ñeñt'pa' çhachca'yeña semtsanatuerrnan ñeñt patanta'tets, po'potantañña' e'ñech secorso'tam̄pesuerrnan. Po'potantañña sapa' çhach senalle'tyesuerrnan e'ñe all sa seprahuo'mar. Atarr se'moñe'tenanet ñeñto'marña çhocma soçtare'tenanet anetso' o'ch sa'yetatuanet ñetñapa' o'ch ahuanemyeset po'poñ anetso'mar.

35 Attoca'yeña ora allohuen ñeñt e'ñe poçte' es pa'yestse't ñeñt amtsanatyesare'ttatse't ashatare'teyesete't po'rrias, sañapa' allempoteñ e'ñe sa'yohuare'ttena ama't teme'ttsen, sa ñeñtes corre'tsa te', ama't allempoteñ amtsaretta Abel ñeñt ama es yeçhcatetso ama't

* 23:24 Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

coñe'ta tarremphua allempo semtser ñaña Zacarías ñeñt Berequías puechemer. Ñeñña sapa' alla semtser Parets po'ponro puecha'petarot allo'tsen altar allotecma sherbete't Yompor. Ama't allohuen ñeñt amtsanatyesearettatse't allempo sañapa' e'ñe allempoteñ sa'yohuare'tterra.

³⁶ Po'ñoçhca'ye notenes, acheñenesha' ñeñt corretsa te' ñetñapa' atsa'tatare'tterretcha' e'ñe ora allpon atserrp'atse'tyesonete't ñeñt e'ñe pocte' es p'a'yestse't Yomporecop.

Atto Jesúsapa' puellquëñoñan jerusaléño'marnesha' atarr ya'na'tosanet
(Lc. 13.34-35)

³⁷ 'Te'pa' e'ñe nellquëñoñ o'ch notas sa ñeñtes jerusaléño'marneshas, ñeñtes muetsanatyeseaye't ñeñt a'mta'yeseaye't Yompor po'ñoñ, sa ñeñtes rrollapechyesaye't ñeñt amñare'ttatse't sesho, te'ña napa' o'ch notas: Napa' atarr atonoche'tats nemneñeñ o'ch na'yapa'cha'huerrsoñ allohuenes nesho attoch e'ñe cohuen necuan'pensoñ. Nemneñeñ o'ch na'yapa'cha'huerrses atet ñerra'mrrate' atollop a'yapa'chene' puechoyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno.

³⁸ Te'ñapa' all seyçhena sa, Yomporñapa' o'ch a'ypo'ñerres.

³⁹ Tarro'mar te'pa' o'ch alla noterrser: Na po'poche'ño'pa' amach alla senterrne'te. Esemphuañenñapa' senterrencha', allempoñapa' atet'cha' soterren: "Aye'choçhtatpahuepa'ch Jesucristo ñeñt huapatsa ñeñt llesensen Yeyomporer."

24

Atto Jesúsapa' eñotatanet e'ñech a'mata'tare'tetuerra Partsopo' all Jerusaléño
(Mr. 13.1-2; Lc. 21.5-6)

¹ Jesúsñapa' cha'nerrerr Parets pa'pacclot. Alla ahuenerr allempoñapa' ponem'ya pueyochresha'. Ñetñapa' allenta cohuatyese't ñeñt atarr coçhnesha'tyetsa allo orratarettena Partsopo'.

² Allempo Jesúsapa' atet otanet:

—Ama't senteñeñ ora allohuen ñeñt coçhnesha're' tarraña napa' o'ch notas: Po'ñoçhca'ye çherrcha' allempoch e'ñe a'mata'tare'tetuerra. Ama't e'ñe puen'arra mapyetpa' amach a'puerroña all allo orratenet Partsopo' e'ñechca'ye poctacma a'coye'tare'tetuerra.

Atto Jesúsapa' eñotatanet shonte'ch entyerret pa'namen ñeñtcha' eñotaterrahuet o' çherrmoch allempoch mellapoterra

(Mr. 13.3-23; Lc. 21.7-24; 17.22-24)

³ Ñeñña otuanenanetpa' allenta ahuen Olivo'pno. Allñapa' anorrueñ, pueyochresha'ñapa' o' alla huacherrñañeterr, e'ñe ñap'ochayet. Ñetñapa' atet otuereterr:

—Yapa' yemneñca'ye o'ch potey ¿esempo'tcha'ña atet perra? Ñaña ¿eso'tcha' yentyerrña ñeñtcha' yeñotaterre' allempoch pehuerrmocha o'ch mellapoterra?

⁴ Jesúsñapa' atet otanet:

—E'ñech seño'terra, allochñapa' amach esesha' seshquërraye.

⁵ Tarro'mar shonte'ch orrterrtsa ñeñtcha' ay'cha'nataterre' neso'cheñ, ñeñtcha' otyerrets: "Napa' ñeñtenca'yeña Cristotets." Ñetñapa' shonte'ch shequëret acheñenesha'.

⁶ Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora errap'aren anetso'mar. Saña allempopa' amach cha seyorenatsto ama't e'ñe mamesha. Ñeñt'pa' atet'cha'ca'ye e'ñe po'ñoçh perra. Tarraña allempopa' amach çhena' allempoch e'ñe mellapoterra.

⁷ Pa'namen acheñ ñeñt e'ñe po'poñe'ttsocma mereñtsoret'pa' ñetpa' quellaranna'terretcha'. Ñaña pa'namen anetso't an'cha'tare'technopa' quellaraterrancha' pueyochreneshachno. Orrterrach allemeñ muecheñets o'ch e'ñe chaporrñatsotyerr

erraparen. Ñaña orrterrach pa'namen atsnañtsočno ñeñt atarr apatanna'tpo'. Pella'yerrach pats ora erraparen.

8 Ñeñt atet o' notuas te'pa' ñeñña allempopa' ñeñtcha'ña ñanom muerochtaterahuetña allempo.

9 'Allempoña sapa' pomuerrsetcha' attoch errotuaten perrset allcha'ña muetsatyerrset. Atarrcha' e'moñe'terres allohuen acheñeneshačno tarro'mar sapa' naca'yeña e'ñe same'ñena.

10 Ñaña shonte'ch acheñ allempo ñeñtcha' quechpuerre' Yompor. E'ñe ñagattsetapa' e'moñe'tanna'terretcha' attotcha' pomatatanna'tyerret.

11 Ñaña allempopa' orreyerrach shonte' ñeñtcha' aycha'naterrtsa ñetpa' año' a'mtenet Yompor po'ñoñ. Tarraña po'ñoñ amach Yomporeye' po'ñoñ a'mterreto, ñetpa' atachña shequëretña shonte' acheñenesha'.

12 Allempopa' atonterrach erraparen pa'namen sosya'tsañečno allochña atarr atpare'terrñañet Yompor po'ñoñ. Ñeñto'marña shonte' acheñpa' o'huañcha' allo'na morrentanna'tnenet.

13 Tarraña ama'tcha' errotuaten aparetterret, esesha'ch e'ñe ahuenta'huanmue' ñeñtcha' ama nequechpuerraye, ñeñtña'pa' ñeñtcha'ña a'queshpataretterrtsa.

14 Ñaña allempopa' añ cohuen ñoñets atto ayochreshattena Yompor ñeñtcha'ña ñanom serrpare'tatyeretña acheñenesha' ora erraparen allohuanen añe patsro. Attochña eñotateretña ora allohuen pa'namen acheñenesha' ñeñt po'ñoñ atet otene' Yompor. Allempochña po'ñoñ mellapoterra.

15 'Ñehua, ahua't Daniel ñeñt a'mtaye't Yompor po'ñoñ, ña po'quellcopa' atet ote't: "Cherrcha' allempo ama't ñeñt ama masosyaye' enteno Yomporpa' ñeñtña'pa' cherrcha' all ama't ñeñt e'ñe Partsocpa anareteñ. Ñeñtpa' ñeñtachca'yeña e'ñe a'chencatuerrahuet." Ñehua, ñeñtcha' lleyerre' añ ñoñetspa' ñetña'pa' eñoteretepa'ch. Ñeñto'marña ñerra'm esepoch senter o' chap all ñeñt e'ñe Partsocpa anaretpa'

16 allempoña ñeñt allpon Judeo'tsa'yen ñetña'pa' allorocmuepa'ch yetrra'terret, ahuanerretepa'ña aspentaronet.

17 Atet ñerra'mrate' puesheña'tets ñato' ñetña' allempopa' eno'tsa'yenetcha' pa'pacclato, ñetña'pa' sohuetepa'chña tecma tarraña amachña be'tosatsetnomuetoña po'ponreto attoch yoratsre'tnomuet.

18 Ñaña puesheña'tets ñeñt pa'mro'tsenpa' allempoña ñetpa' amachña onatsterreto attoch erreta' pa'shtamuet.

19 Allempopa' atarrcha' llequëñets añecop ñeñt a'chomenare' coyanesha' ñaña ñeñt allohuen emaretetolleshačno. (Tarro'mar ñocpuetpa' atarr torrapo' attoch yetrra'tet ñamet.)

20 Ñaña Yomporcha'ña sema'yocha allochña'pa' amach cha huapoto allempoch seyetañpesya ñaña amachca'ye añe yetro seyetatsto allempocma samesen.

21 Allempopa' orrterrach muerochteñets ñeñtcha' atarr muerochtaterre' allohuen acheñenesha'. Ñeñt ama't ahua'tapa' ama puemuerochtareto atet atarr nanac huomenc. Ama't allempoteñ e'ñe errte' aye'chcataretta añ patser ama puemuerochtareto atet. Allempoña ellopa' amach atet alla muerochterrete'te ama't errponaña.

22 Allempoch atarr amuerochtataretterret. Tarraña allempoña Yomporpa' ñach oterrets te'pa' allohuach. Ñerra'm amach oto allohuachpa' allempoña ama't puesheñarrapa' amach esesha' qeshperrtso. Tarraña ñeñtña' ame'ñenaya ña ñeñt acrenpa' ñocpuetña'pa' oterrrcha' te'pa' allohuach.

23 'Ñehua, allempoch orameñ muerochteñetspa' ñerra'm esesha' sote': "Arro'tsenca'yeña Cristo", amapa' o'ch otaset: "Tarro'tsenca'ye Cristo", sañapa' amach same'ñatstaneto.

²⁴ Orretyerrachca'ye ñeñtcha' otyerrets ñapa' ño'ña Cristotets. Tarraña ñeñtcha' attachca'ye shecare'tyerranña acheñenesha'. Orretyerrach ñaña ñeñtcha' otyerrets ñapa' ño'ña a'mtene'ña Yompor po'ñoñ, tarraña ñeñtcha'cho'ña e'ñech attecma shecare'tyerran acheñenesha', amachña Yomporeye'ña po'ñoñ a'mteno. Ñeñtcha' atet shecare'tyerrets, ñetñaapa' orrtatyerretcha' ñeñt ama't ahuata acheñenesha'pa' ama puentare, attochña cohuanrrortateretña acheñenesha'. Ama't ñeñt Yompor pa'carnesharpa' mueneñetañcha' ñeñte'nachña shequëret.

²⁵ Señoche'pa'ch ama't ama' chena' muerochteñetsopopa' napa' o' e'ñe notuas sa.

²⁶ Ñeñto'mar te'pa' notenes: Ñerra'm allempoch atet oterret: "Tarro'tsenca'yeña Cristo a'yo all amayo", sañapa' ñato'tña sesena'ña all o'ch senteña'. Amapa' ñerra'm atetcha' oterretter: "Tarro'tsenca'ye Cristo o'pono pocollo", sañapa' ñato'tña sesena'ña all o'ch senteña'.

²⁷ Tarro'mar ñerra'm esempo cherr allempoch nohuerra na Ñeñten Acheñetosets e'ñe allohuen acheñenesha'pa' entapuerrnetcha' tarro'mar allempopa' atetcha' ne'pater ñerra'mrrate' meratste', o'ch meratsta huomencpa' e'ñech a'puetaresuan ora enet erraparen, ama't allot huena atsne' ama't e'ñe allohuanen emuena.

²⁸ Ñeñtcha' e'ñechca'ye atet perraña ñeñt atet senten te' ñerra'm erro'tsen ñeñt rromuepa' allcha'ca'yeña shonterraña tse'm.

*Atetcha' perra allempoch huerra Cristo Ñeñt Acheñetosets
(Mr. 13.24-37; Lc. 21.25-33; 17.26-30, 34-36)*

²⁹ O'chña huañerr ñeñt muerochteñetspa' allempoñapa' e'ñech allorocma mayerr atsne'. Arrorrapa'cho'ña o'huañcha' atsnom. Rantochnopa'cho'ña shorcha'terrcha' entot. Ñaña ñeñt huomenc orra'yetsa ento te' allempoña ama't ñeñtcha' pella'yerrach.

³⁰ Allempoñapa' orrtarrach ento ñeñtcha' seño'taterre' naca'yeña o' nohuerra Ñeñten e'ñe Acheñetosets. Allempochña nanac llecannrrorterra allohuen pa'namen acheñenesha'chno ñeñt añe patsro'tsen. Entapuerrnetcha' na Ñeñten Acheñetosets o'ch nesuam'perra oso't e'ñe entot. E'ñe nepartsoteñohuen e'ñech necohuenteñesha' nohuerra.

³¹ Nemñercha' nemllaño'teñnaneshar ñetcha'ña poctora'nerrtset atarr huomenc. Ñetcha'ña a'yapa'cha'huerret allemateñ ñeñt acren Nompor nocop e'ñech pa'tatsshemto'marohuen allotecma orrnotena. E'ñech allemateñ a'yapa'cha'huerretcha' e'ñe allohuanen añ patsro't.

³² Ñaña te'pa' señoche'pa'ch ñeñt atet pena higo'ch. Ñehua, esempo'ch senteñ higo'ch o'ch em'cachyen pueta'cretollesha' allotcha' o'ch alla tapna'tyerrerr pasopaner, sañapa' ñeñtcha'ña seño'tatene' o' chenmoch allempoch huorateterrerr.

³³ Attec'mach perra ñerra'm esempo'ch sentyerr ñaña ñeñt allpono' notuas, sapa' ñeñtcha'ña seño'taterre' po'ño'ch o'ca'ye cherrmoch allempoch e'ñe etsotuerria, o'ca'ye e'ñe allame'tsamerra.

³⁴ Napa' po'ño'ch o'ch notas, acheñenesha' ñeñt e'ñe corretsa te' ñetña amach e'ñe rromhueneta'pa' allempocmach e'ñech etsoterra allohuen añe'chno.

³⁵ Esemphuañen añ enet ñeñt senten te'pa' e'ñech chenca'huerra; patspa'cho'ña attec'mach perra e'ñech chenca'huerra. Tarraña ñaña ñeño'ña' amach chenquërrero ama't e'ñe ahuata.

³⁶ Tarraña ñeñt yetroch nohuerrapa' ñeñtña'pa' ama eseshaye' eñotenaye. Ama't erro'tsente' atsne' ama't erro'tsen tsapro ñeñtcha'pa' ama't mellaño'teñnesha' ñeñt pue'ntañ'o'tsa'yen ñetpa'cho'ña ama't puesheñarro'tetapa' amaña eseshaye'ña eñotenaye allempoch nohuerrerr po'pocheño. Ama't na ñeñten Yompor Puechemeren napa'cho'ña te'pa' ama ñeño'teñe, ñapñaña Nompor Parets eñotene'.

³⁷ Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet pete't ahuat allempo corre't Noé.

38 Ñehua, allempopa' ama es puecha'yeneto aña e'ñe cotape'chete't atto atarr pa'namen muenenet ñeñtcha' rra'yenet, orrare'tyesete't, sena'tanatyena yacmaneshachno, coyanesachnopa'cho'ña apanatyese'te't ñeñt yoranatyeshahete't. Ñetñapa' ñeñta e'ñe cohuen entete't. Atteñapa' chap allempo be'tosos Noé po'huarcopahuo.

39 Ama es puecha'yese'te'te machayotepa'tcha' cho'pa oñ erracmañen, attoña añyanatuerranet oñ allohuenet. Attecmach perra ñerra'm esempoch nohuerra na Ñeñten Acheñetosets. Machayotachca'ye nohuerra.

40 Ñaña allempopa' atetcha'ca'ye perra; puesheña'tetspa' anmare'terrach; ama't ñeñt e'ñe pamo'ts pannenetañ ñeñtñapa' allach asa'nmare'terra. Ñato' allempopa' allo'tsencha' epsheña yacma pa'mro, puesheñarrñapa' anmare'terrach po'psheñeññapa' allach asa'nmare'terra.

41 Amapa' ñato' allempo allo'tsencha' epsheña coyanesha' ñeñt parro puetse'tets mapyo, ñeñtpa'cho'ña puesheñarrpa' anmare'terrach po'psheñeññapa' allach asa'nmare'terra.

42 Ñeñto'marña te'pa' o'ch notas: Chocmuepa'ch señose'rtena tarro'mar sapa'cho'ña ama señotenno esempoch nohuerra na ñeñten e'ñe Separtseshar sepen.

43 Napa' e'ñech machayota nohuerra atet pena eñe't allempo atta es sepcha'yena machayotach huaponasa o'ch yoratsre'tensa'. Tarraña sa ñeñtes apacllates señochepa'ch ñerra'm señoteñeñ e'ñech esempo tsapro huaponasa eñe't, sapa' chochña señose'rtenañ attoch amach semnacheña o'ch torañpsas sepaclo o'ch be'tosañpsasa o'ch yoruennasa' ñeñt allpon semorrentyena.

44 Ñeñto'mar notenes sapa'cho'ña chocmuepa'chña señose'rtena tarro'mar allempoch atta es sepcha'yenapa' allempochña nohuerra na Ñeñten Acheñetosets.

Atetcha' apare'terra ataruasañ ñeñt e'ñe cohuen etsotene' atet yecheña pamo'mte' ñaña atetcha' apare'terra po'poñ ataruasañ ñeñt ama etsotaye ñeñt atet yecheña pamo'mte' (Lc. 12.41-48)

45 Jesúsñapa' alla toma'ntaterraneterr po'poñone't, atet o'terraneterr:

—Allohuenespa' atetcha' se'pa e'ñe cohuen atet ñerra'mrrate' puesheñarr yacma ñeñt atarr ame'ñañatetsa ñaña e'ñech eñotenan ñeñt atarr sherbets. Ñeñtña yacmarpa' añ yechenaya pamo'mte' e'ñe alla pa'paclo. Añcha' po'taruas pen chocmach apa'yesan allohuen po'potantañ pamo'mte' pa'taruasañer puerraret allpon ñeñt poctetsa puesheña'ttso'cop. Ñapa' attecmach penanet, chocmach apuenanet ñerra'm esempoch cherrerr allempo atet anaret ñocop o'ch alla apa'yerraneterr po'pocheño. Ñapa' chocmach atet pena amach quechpuenaneto tarro'mar ñapa' e'ñe eñoteñ attoch e'ñe coshatenan pamo'mte'.

46 Ñeñtña ataruasañpa' atarrcha' coshatapuerran pamo'mte'. Ñerra'm esempoch huerra o'ch alla entuenan pa'taruasañer ama cho quechpuenano ñeñt po'taruas apa'ne'm ahuañmo'choteñ.

47 Po'ño'ch o'ch notas, ñeñtña yacmar atarrcha' coshatueñ pamo'mte'. Añcha' coshaterre' o'ch nohuer añcha'taret ñeñtcha' cohuañpsaprete' ñeñt allpon echyen pamo'mte'.

48-49 Tarraña ñeñtña ataruasañer allempo ama huerra' pamo'mte' ñerra'm ñapa' atta oten pueyo'chro, namo'mte'pa' amach ahuen huerro, allempoña ñapa' chach ash-tapechyenan ataruasañe'chno ñeñtcha' rratañ. Ñaña' ñerra'm attach allemeñ rrapretyen ñaña attach orrare'tapretyen allcha' atarr posa'tare'tyen, ñeñtña ataruasañ atetpa' ama't mameshapa' ama cohuenayaye.

50 Ñeñtña ataruasañer ñerra'm ñapa' attach ottatse'tyena amach es puecha'yeno amach eñoteñe ñeñte yetroch huerra pamo'mte' ama't erro'tsencha' yetro huena.

⁵¹ Machayotachña huerra pamo'mte'pa' atarrcha' coñchatuer, allach mueñuer all ñeññ o'patenaya allohuen ñeññ po'ñoçh ama ame'ñetso ñeññ atta shecare'tyets. Allñapa' allcha' yahuanrrorterret panmueño'tet atserrpa' rraso'tyesosetcha' pa's.

25

All atma'ntatare'tta ñeññ atet pena çharrasheña shopshare'

¹ Jesúsñapa' alla yeçhaterraneterr, ñeññpa' atet otanet:

—Allempoch amcha'taretterra Yompor ñeññ pue'ntaño'tsen allempoch nohuerra na, ñeññña allempopa' atetcha' perra e'ñech atet ñerra'mrrate' çharrasheña shopshare' ñeññcha' tatsa allcha' cohuoset allempoch huerranet ñeññ e'ñe errte' sena'tetsa. Ñetñapa' anomyeset po'lampareñ alloch poctapueñet ñerra'm esempoch huerra.

²⁻⁴ Ñeññña amnarsheña ñetpa' atta es pueçha'yenet ñeñño'marña ama anmuetoña po'poñ aceite' alloch a'huortaterret po'lampareñ allempoch huañ ñeññ anmanñset po'lamparñeño. Po'potantañ amnarsheña ñetpa' atarr eñotenet attoch eñose'rtet e'ñe cohuen, ñeñño'marña ñet e'ñe ellonetpa' anomyeset aceite' puetellño alloch a'huortaterret po'lampareñ ñerra'm esempo huañañset ñeññ po'lampareñeño'tsenet.

⁵ Allña ñetpa' cohueñet, ama ahuenaye' huerranetoña ñeññ sena'tetsa. Ñetña all machayota moñe'tyesetpa' çhepa'tcha' manrra'tuatset.

⁶ O'ña ñarenen tsappa' allempoñapa' machayota e'muet rranarets, ñeññña' atet oten: “Tayaca'yeña huennasaña ñeññ sena'tetsa ñeññ atarr secuen. Seçha'nomñaca'ye' o'ch sepocetñ.”

⁷ Allempoñapa' allenta tantrra'tuaña allohuen shopshare' ñetñapa' a'cohuenetyeset po'lampareñ.

⁸ Amnarsheñaña ñeññ ama yerpa'pesnomaye aceite' ñetñapa' atet otare'chet po'potantañ amnarsheña ñeññ çhocma anmue' aceite': “Te'pa' o'ch socya'y yanña aceite' ñeññcha' ya'huortatnom. Yapa' o' maya'huaña yelampareñ.”

⁹ Ñeññña e'ñe cohuen eñotene' eñose'rtatsapa' ñetñapa' atet ochetña po'poñ amnarsheña ñeññ enamuenahuet aceite': “Amachca'ye yocyaso te't yehuañapen yanña. Sapa' arrña seta all pomueñet o'ch serañteña' samña socop.”

¹⁰ Ñet ahuanmatset o'ch rañteñeta'pa' ñeññña sena'tetsapa' e'ñe allorocma çhen. Ñeññña po'poñ amnarsheña ñeññ e'ñe po'ñoçh çhocma eñose'rtetsa, ñetñapa' be'toscha'tet parro epuet ñeññ sena'tetsa. Allñapa' allcha' atarr coshame'tapreteret. Allñapa' e'ñe echarr yottamñset.

¹¹ Allña e'ñe o'chtatsapa' o' huaçherraña po'potantañ amnarsheña shopshare' ñeññ ahuanmatsa ñorra'. Ñetñapa' atet otuerret: “Petoramñsaye'chapuerrey Nepapare-shacha'.”

¹² Ñañapa' atet otapueranet: “Te' napa' o'ch notapuerres, sa amaca'ye po'ñoçhaye' seyemtenno.”

¹³ Jesúsñapa' alla oterranerr ñeññ e'mñotene':

—Ñeñño'marña na te'pa' o'ch notas: Sapa' çhocmuepa'chña e'ñe cohuen seño'sertena, tarro'mar sapa' amaca'ye seño'teñe erra'tsencha' yetñatsro allempoch nohuerra na Ñeññen Acheñetosets, ñaña erro'tsencha' yetro ama't ñeññpa' ama seño'teñe.

All atma'ntatare'tta ataruasañeçhno ñeññ apare'ttatsa puesheña'tets quelle ñeññ otenet talento

¹⁴ Jesúsñapa' alla yeçhaterraneterr po'poñ, ñeññpa' atet oterraneterr:

—Allempoch amcha'taretterra Yompor ñeññ pue'ntaño'tsen allempoch nohuerra na, ñeññña allempopa' e'ñech atet perra ñerra'mrrate' puesheñarr yacma o'ch ahuo' ñaçhayo. Ñeññña yacmarpa' o'ch agotnoman pa'taruasañrenesha'pa' o'ch apa'yeshomanet quelle

ñeñt̃ allpon echen; ñetñapa' o'ch cohuañp̃soñet tarrem̃pohuach esempohuañencha' huerra.

15 'Puesheñarrpa' apa'neñ amnarmeta talento, ñeñt̃pa' atarr shonte' quelle allpon ñerra'm amnar mil. Ñapa' añecop apa'neñ attoch ellopa' o'ch atontatan po'patronar po'çllayor. Po'psheñeñpa' apa'neñ epmeta talento, ñeñt̃pa' allpon quelle allpon ñerra'm epa mil. Po'psheñeñpa' apa'neñ puetemarr talento. Ñeñt̃pa'cho'ña allpon quelle ñerra'mrrate' paterr mil. Ñehua, puesheña'ttsetpa' e'ñe allpona apa'yesnomanet ñeñt̃ e'ñe allpona eñotyenet attoch ellonetpa' atontatet quelle. Ñeñta apa'yesuanmanetpa' ñañaapa' allenta ahuo' ßachayo.

16 Ñeñt̃ agapue' amnar mil ñañaapa' allorocma ahuo' allcha' taruasatan quelle; attoña ellonetpa' o' alla ganerrerr po'poñ amnar mil quelle.

17 Atet̃ pa' ñaña ñeñt̃ agapue' epa mil. Ñapa'cho'ña ellonetpa' ganerrerr po'poñ epa mil quelle.

18 Tarraña añña ñeñt̃ agapue' paterr mil ñañaapa' allenta aneñ allcha' pampueña'; attoça'yeña ñapa' cha e'potanña quelle.

19 'O'ña atomatpa' o' huerranetña po'patronaret, allenta agotatuerranet attoch entueranet po'taruas errotente' taruasa'yeset e'ñe puesheña'ttset.

20 Ñeñt̃ña agapue' amnar mil ñañaapa' huapapa' apapuenan po'patronar po'poñ amnar mil quelle, ñeñt̃pa' atet̃ otapueñ: "Añña Nompocha' ñeñt̃ p̃apa'ñmuen amnar mil quelle ahuaña, napa' elloca'ye neganerrerrña peçllayoroť po'poñ amnar mil quelle."

21 Po'patronarpa' atet̃ och: "E'ñe pocte' neyochrecha'; p̃apa' atarr cohuen pesherbeneñ. Papa' e'ñe cohuen petsoton ñeñt̃ atet̃ notnomuep̃. Ama't allponatolla napa'ñmaṣ ahuaña, p̃añaapa' atarro't cohuen pesherbatoñ. Ñeñto'marña te'pa' o'ch nenuerreṣ p̃ach necuañpsapreterre' ñeñt̃ atarr aton. Te'ña p̃apa' pebe'tos allcha' atarr p̃ocshapreterrna."

22 Allempoñapa' ñeñt̃ agapue' ñaña epa mil, ñapa'cho' huapapa' apapuenan po'patronar po'poñ epa mil quelle. Ñapa'cho'ña atet̃ otapueñ: "Nompocha' ñeñt̃ p̃apa'ñmuen ñaña epa mil, napa'cho'ña elloca'ye neganerrerrña peçllayoroť po'poñ epa mil quelle."

23 Ñapa'cho'ña po'patronarpa' atet̃ och: "E'ñe pocte'; p̃apa'cho'ña atarro't cohuen pesherbeneñ. Papa'cho'ña e'ñe cohuen petsoton ñeñt̃ atet̃ notnomuep̃. Ama't allponatolla napa'ñmaṣ ahuaña, p̃añaapa' atarro't cohuen pesherbatoñ. Ñeñto'marña te'pa' o'ch nenuerreṣ p̃aña p̃ach necuañpsapreterre' ñeñt̃ atarr aton. Papa'cho'ña te'pa' pebe'tos p̃aña allcha' atarr p̃ocshapreterrna."

24 Allempoñapa' huapa ñaña ñeñt̃ agapue' paterr mil quelle. Ñañaapa' atet̃ otapueñ: "Napa' neñoteneṣ Nompocha'. Papa' amaca'ye matsrre'mñape; p̃apa' chocmaca'ye peprratam̃pesyen ama't ñeñt̃pa' ama p̃oyaye ñaña chocmaca'ye p̃ocsechatyenña ñeñt̃ ama p̃aye' nare'tatyenaye; chocma es p̃a'yapa'cha'yen ama't ñeñt̃pa' amaca'ye p̃aye' na'yenaye.

25 Ñeñto'marña napa' cha neñcha'teneṣ. Ñeñto'marña ñeñt̃ p̃apa'ñmuen ahuaña paterr mil quellepa' ñañaapa' cha nepamponaṣ. Te'ñapa' o'ch alla napapuerreṣ ñeñt̃ e'ñe p̃o."

26 Allempoña po'patronarpa' atet̃ och: "Paña po'ñoçhpa' amaca'ye cohuenaye' pesherbenno ama't mamesha; atarrca'ye quellañt̃soṣ. Ñerra'm e'ñe po'ñoçh peñotenoñ chocma es neprratam̃pesyeneñ ñeñt̃ ama noyaye; ñerra'm po'ñoçh chocma nocsechatyeneñ ñeñt̃ ama naye' nare'tatyenaye; ñerra'm po'ñoçh chocma es na'yapa'cha'yeneñ ñeñt̃ ama naye' na'yenayñe, ñerra'm e'ñe po'ñoçh atet̃ pentenoñpa'

27 eso'maruañaca'ye amaña bancoye' penennanoña neçllayor allochñapa' te'ña o' nehuerrapa' nagaphuerreñcha' ñaña allo atontatonet neçllayor."

28 Allempoñapa' atet otan ñeñt' tomcha'tyets all: "Te'pa' çhosa puerratañperre'ña ñeñt' pa'terr mil quelle o'ch sapuer ñeñt' echene' çharra' mil quelle."

29 Ñeñto'marña te' napa' o'ch notas: Ñeñt' es echets shonte' e'ñe puesherbateño'tet pamo'mte', ñetña ellonetpa' o'ch alla apare'tterret po'poñ aton. Tarraña ñeñt' ama es echetsopa' ama't allponatolla ñeñt' echyenetañ aprratam'psaretterretcha'.

30 Ñaña añ ataruasañer ñeñt' ama nesherbena'ye, te'ñapa' çhosaña huapore'te' a'yo't checmeto't. Allñapa' allcha' yahuanrrortenet panmueño'tet atserrpa' rraso'tyesosetcha' pa's."

Allempoch ellopa'tetstataretterra ñeñt' toma'ntenaya carrneroçhno ñaña ñeñt' toma'ntenaya cabraçhno

31 Allempoch nohuerra na Ñeñten Acheñetosets, nohuerrach e'ñe nepartsoteño'huen epan allohuen nemillaño'teñnaneshar. Allempopa' nanorruerrcha' neconaño allcha'ña e'ñe nepartsotuerr e'ñe necohuenteñesha'.

32 Allempoñapa' e'ñech nesho apçherra allohuen pa'namen acheñ ñeñt' yeçha'yetsa arr patsro. Allempochña nellopa'tetstaterranet e'ñe atet pena ñeñt' pamo'mte' pen carrnero, ñaña'apa' o'ch ellopa'tetstatenan carrneroçhno ñaña cabraçhno.

33 Acheñenesha'ña ñeñt' e'ñe cohuenpa' ñetñapa' necohuenrotcha' nenuerranet ñeñt' e'ñe atet ñerra'm carrneroçhno. Ñaña ñeñt'ña ama cohuenayayepa' ñetñapa' ne'chcoterotach nenuerranet ñeñt' e'ñe atet ñerra'm cabraçhno.

34 Naña allempoch atarr na'mcha'taretterrapa', atetcha' noter ñeñt' necohuente'ronte'tsa'yen: "Sapa' sona'cha't allohuenes tarro'mar Nompör o'ca'ye atarr ben-sare'tam'perres. Te'ña sapa' o'ch saguërr ñeñt' o'patatensa ahuatoteñ. Ama't allempoteñ Nompörpa' errte' yeçcatene' pats saña'apa' allempoteñ o'patatasa attoch sa'mcha'tarettapretera.

35 Tarro'mar napa' allempo nachporre'tpa' saca'yeña nerratallme'chaye't. Allempo no'ñpa'te'tpa' saca'yeña nonayesaye't. Allempo neçhapue't sesho all ama nentare saña'apa' çhocma e'ñe cohuen sagapne't.

36 Allempo nemuelle'tpa' saca'yeña nepashtaye't. Allempo natsna'te'tpa' saña'apa' çhocma secuam'pesne't. Allempo yottam'pesnete'tpa' saca'yeña e'ñe cohuen nemo'taye't."

37 Allempoña ñeñt' e'ñe cohuen es ne'pa'yesaye'tpa' ñetñapa' atetcha' o'terrnet: "Ta'm Partseshacha', ¿esempo'tña yentape't allempo p'achporre't allempo yerratallme'chape't? ¿Esempto'tña yentape't allempo po'ñpa'te't allempo yonape't?"

38 ¿Esempto'tña yentape't allempo peçhapue't yesho all ama pentare allempo e'ñe cohuen yagapape't? Ta'm ¿esempo'te'ña yentape't allempo pemuelle't allempo yepash-tape't?"

39 ¿Esempto't yentape'tña allempo p'atsna'te't ñaña allempo yottam'psapete't allempo yemo'tape't?"

40 Allempoña na ñeñten Partseshanpa' atetcha' noterres: "Te' napa' o'ch notas: Po'ñoçhpa' allempo e'ñe cohuen atet se'pa'yesnane't na nemo'nasheñnesha' na'naca'yeña e'ñe cohuen atet sepen. Ama't puesheñarra ñeñt' ama esoshe'maye' entyese'te acheñenesha' allempo, tarraña saña allempopa' atto e'ñe cohuen es se'pa'yesanete't, na'naca'yeña e'ñe cohuen atet sepen allempo."

41 'Allempoña ñeñt' ne'chcoteronte'tsenpa' atetcha' noterranet: "Sapa' orrerres arro't, sapa' aña so'patenaya ñeñt' atarr yoroçhen. Te'ñapa' orras all huorten tso' erraparen ñeñt' ama amayaño ama't errponaña. Ñeñt'ña tsorpa' añ o'patateñet oneñe't e'ñe puey-ochreshohuen.

⁴² Tarro'mar na allempo nachporre'tpa' sapa' amaca'ye saye' nerratallme'chaye'te. Allempo no'ñpa'te'tpa' amaca' saye'ña nonaye'te.

⁴³ Allempo nechapue't sesho all ama nentare sapa' amaca'ye cohuenaye' sagapne'te. Allempo nemuelle'tpa' sapa' amaca'ye saye' nepashtaye'te. Allempo natsna'te't ama't ñaña allempo yottam'pesnete'tpa' sañapa' amaca'ye semo'tne'te."

⁴⁴ Allempoña ñetpa' atet'cha' oterrnet: "¿Esempohuañaca'ye, Partseshacha', yentape't allempo pachporre't ñaña allempo po'ñpa'te't ñaña allempo pechapue't yesho all ama pentare ñaña allempo pemuelle't ñaña allempo patsna'te't, ñaña allempo yottam'psapete't? ¿Esempo'tña yentape't atet allempo yapa' ama't coñe'tapa' ama es yapape'te?"

⁴⁵ Allempoña napa' atet'cha' noterranet: "Te'pa' o'ch notas: Po'ño'ch sa allempo ama a'cua'psenaye' sentone'te allohuen na nemo'nasheñnesha', na'naca'yeña atet sente'tña allempo."

⁴⁶ Allempoña acheñenesha' ñeñt' ne'chco'teron'te'tsen, ñet'ñapa' ahuanerret'cha' all'cha' coñcherret e'ñe errponohuañen. Añña ñeñt' e'ñe cohuen es pa'yestse't ñet'ñapa' ahuanerret'cha' Yomporesho allña ñetpa' corretsetach pocsheñeshocmañen errponañohuen.

26

*Atto atarr o'pateñet Jesús o'ch muetsatateret
(Mr. 14.1-2; Lc. 22.1-2; Jn. 11.45-53)*

¹ Jesúsñapa' allempo serrpare'tatuahuanet allohuen añ ñoñetspa' allempoñapa' atet otan pueyochresha':

² —Sapa' seño'teñ o'ca'ye epomtañapa' o'ch chapa'muen pascuapo. Allempoña na Ñeñten Acheñetosetspa' allempochña pomuerrnet attot'cha'ña corso'tam'perrnet.

³ Allempoña allohuen judionesha' pa'm'cha'tare'ternesha' ñet'ñapa' ap'chet. Añ ap'chatsa allohuen ñeñt' judionesha' po'cornaneshar pa'm'cha'tare'ternesha' epuet ñaña ñeñt' atarr etsotayenayeñ ñoñets ñeñt' atet anaret epuet ñaña ñeñt' pompornesha' pen allohuen judionesha'. Ñet'ñapa' arr ap'chenet cornesha' pa'paclo, ñeñt'ña cornesha'pa' ñaca'yeña atarr nanac pa'm'cha'tare'ter penet, ñeñt'pa' añ pa'so'cheñ Caifás.

⁴ Allña ñetpa' cotape'chatannenet, Jesús a'tarr o'patenet. Ñet'ñapa' atet otanna'tyeset: —Errotuachca'ye yepe'te' attoch yeshcach e'ñe a'nahua esheccha' yerrmach attot'cha' yemtsatach.

⁵ Ñet'ña allempopa' alla otanna'tyerretter:

—Tarraña te' pascuapo allempo shontena acheñenesha' amachca'ye yerrmatsche alañaca'ye cha yatsrre'mo'chtateñ acheñenesha'.

*Atto puesheñarr coyanesha'pa' shosan eñmosa't Jesús poño
(Mr. 14.3-9; Jn. 12.1-8)*

⁶ Pam'tarrña Jesús pa' Betanio'tsen all Simón pa'paclo, ñeñt'ña Simón pa' ñeñt' ose't puetsarñats.

⁷ Jesúsñapa' alla anen all rrallme'chen. Allña pa' huapoña puesheñarr coyanesha', huapatan eñmosa't ñeñt' ama matsa'to; huapatam'pes puetell'mo ñeñt'ña puetell'm'pa' añ socheñet alabastro. Ñeñt'ña eñmosa'tpa' alla she' Jesús poño.

⁸ Pueyochresha'chñoña ñet'ña eñchetpa' cha atsrre'muet, atet otyeset:

—Eso'mare'tña at'a a'pertatosanña eñmosa't. Ñeñt' eñmosa'terpa' amaca'ye matsa'to.

⁹ Chochña'cho' pomoseñpa' ganañcha' shonte' quelle allempoñapa' apa'yeseñcha' ñaña allohuen huocchañnesha'chño.

¹⁰ Jesúsña e'manetpa' ñañapa' atet otanet:

—Eso'mare'tcha' cha muene' satsrre'mo'chtana'ta'p'ña coyanesha'. Ñapa' atarrca'ye cohuen p'osen.

11 Tarraña ama'tcha' cho pomosaneñ eñmosať alloch es apa'yesaneñ huocchañneshačno, tarraña chocmachca'ye eñallña huocchañneshačno arr patsro. Nañapa' po'ñočpa' amachca'ye allo'na sentenno arr patsro.

12 Ñeñť atto shosnan te' eñmosať nechtso, ñeñťpa' añečpa'naca'ye sherben tarremphua allempoch a'yana'terrneterr ñeñťcha' epuet pampa'pesnet.

13 Po'ñočca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'chetcha' ñaña atet penen te' añ coyanesha', attochña ña'nach yerpunen.

Atto Judaspa' pomuerran Jesús

(Mr. 14.10-11; Lc. 22.3-6)

14 Allempoña pueyochresha' ñeñť čharra' puechetsa epsheña, puesheñarrña ñeñť pa'so'cheñ Judas Iscariote, ñañaapa' allenta ahuo' allo'tsa'yen ñeñť pa'm'cha'tareťernesha' pa'yen allohuen judionesha' po'cornaneshar.

15 Chap allpa' ñañaapa' atet otosanet:

—Ñerra'm o'ch negatas Jesús attoch serrmue'pa' ¿errpona'tcha'ña setsa'tna?

Ñetñaapa' atet ochet:

—O'chca'ye yapař ma'poch čharratlla quelle.

16 Allempoña ñapa' aña e'ñe cotape'chyen errotenoťcha' pomuerranña Jesús.

Atto Jesúsapa' rrallme'chatnenan pueyochresha' attoch chocmach yerpueret ñeñť yoten te' Santa Cena

(Mr. 14.12-25; Lc. 22.7-23; Jn. 13.21-30; 1Co. 11.23-26)

17 Allempoña čhapa'muen ñeñť yetñatsro allempoch rrerretter pan ñeñť ama anareťeyaye chase'. Chapa'muen ñeñť yeterpa' Jesúsñaapa' huacha'toña pueyochresha' ñetñaapa' atet otoset:

—Te'pa' ¿erra't pemneñ allcha' ya'potonař ñeñťcha' perra' pascuapo?

18 Ñañaapa' atet otanet:

—Te'pa' o'ch ahues anetso; o'ch sečhap allo'tsen puesheñarr aheñ. Ñeñťpa' atetcha' sotos: “Ñeñťña Maestro Jesúsapa' atetca'ye oten: ‘Te'pa' o' čhappoch allempoch nerroma, te' pascuapopa' arrcha' nerra'nom pepacllo neyochreshohuen.’ ”

19 Atet otanet Jesúsapa' ñetñaapa' atetcho' pet. Allca'yeña añño'tosñañetña rreñets allcha' rrallme'chet.

20 O'ña ellerrotenapa' Jesúsñaapa' anorros allcha' rrallme'chatnenan pueyochresha' ñeñť čharrasheña puechena epsheña.

21 Allña rrallme'chetsetpa' Jesúsñaapa' atet otanet:

—Po'ñočca'ye notenes: Puesheñarroťes sa ñeñťescha'ca'ye nepomuerre'.

22 Ñetñaapa' čha atarr lleca'rrtet. A'řto'tyeset e'ñe puesheña'ttset:

—Parteshacha' ta'm ¿amaťe' na nepomuerrmochape?

23 Ñañaapa' atet oterraneterr:

—Ñeñť netsapechapretene' nerrarpa' ñeñťcha'ca'yeña nepomuerre'.

24 Po'ñočca'ye te'pa' allo'na sen etsotnomtsa ñeñť atet anuaret Yompor po'ñoño nocop Ñeñťen Acheñetosets; attoťcha' muetsaterrnet. Tarraña nocoppa' e'ñe pocte'; añña po'ñoč aheñer ñeñťcha' nepomuerre' ñocopñaapa' atarr llequēñets. Añ aheñerpa' e'ñeca'ye poctet ñocop amachñačho' eñalletatstañe.

25 Judasña ñeñťcha' pomuerre'pa' ñañaapa' atet och:

—Maestrocha' ta'm ¿amaťe' na nepomuerrmochape?

Jesúsñaapa' atet och:

—Paťe'ca'ye atetca' řoten.

²⁶ All rrallme'chenet, Jesúsñapa' chetan pan parasyoso'tan Pompor. Parasyoso'tuepa' shota'tan panpa' apa'yesan pueyochresha'. Ñeñtpa' atet otanet:

—Sagapyes o'ch serre' añmapa' ñeñtcha'ña nechets sepen.

²⁷ Allotñapa' chetan ñaña orramets parasyoso'tuerrerrpa' apa'yerraneterr. Ñeñtpa' atet oterraneterr:

—Sorr ñaña añ narmetsos allohuenes.

²⁸ Añpa' nerrasca'ye sepeñ ñeñtcha' ashatarettatsa shonte' acheñeneshacop alloch a'pre'tnaretterret po'chñaret. Añ nerraspa' alloch e'ñe etserra a'poclaterra acheñenesha' Apuesho.

²⁹ Napa' o'ch notas: Te'pa' amach alla norrerre'te añ narmetsos tayoteñ tarremphuach allempoch alla ello yorrerrerr parro allempoch añcha'tarefetueterra Apa.

Atto Jesúsapa' eñotatan Pedro ñapa' chocmach a'nasocha

(Mr. 14.26-31; Lc. 22.31-34; Jn. 13.36-38)

³⁰ Allempoña o' morrechuanmuet Yomporecoppa' ahuaneneter Olivo'pno.

³¹ Allñapa' atet otosanet Jesús:

—Añ tsaprocma sa allohuenespa' sa'ypo'ña'huanmuencha' tarro'mar Yompor po'ñoñopa' atetca'ye anuaret, ñeñtpa' atet ote't Yompor nocop: "O'ch nemtsater ñeñt cohuanpene' carrnero, po'carrnerorñapa' chach matrra'tyesa allemeñ."

³² Jesúsñapa' atet oterraneterr:

—Tarraña esempoch alla netanterra napa' nanomcha' oterrtsa Galileo.

³³ Allempoña Pedropa' atet och:

—Ama't allohuenet ñerra'm a'ypo'ña'huerrpetcha'pa' ñaña ama't ahua'apa' amach na'ypo'ñerrepe.

³⁴ Jesúsñapa' atet otererr:

—Po'ño'chca'ye o'ch nota'p, añe tsaprocma amach eñena' atolloppa' pañapa' o'ch ma'poch pa'nasotenna.

³⁵ Pedroñapa' alla otererr:

—Ama'tcha' yerromhuanen parropa' ñaña'pa' ama't parrocha amach na'nasota'po. Allohuen pueyochresha'pa' ñetpa'cho'ña e'ñe attecma otyeñetañ ñamet.

Atto Jesúsapa' ma'yochuena all oteñet Getsemaní

(Mr. 14.32-42; Lc. 22.39-46)

³⁶ Allotñapa' chap Jesús pueyochreshohuen all narmetsmo, ñeñtpa' añ pa'so'cheñ Getsemaní. Allñapa' otosanet:

—Te' sapa' allach sanorrcha'tos arrma, napa' o'ch nema'yochena' tarron'teye'.

³⁷ Allñapa' añ anmos Pedro ñaña Zebedeo puechemerasha', epsheña. Jesúsñapa' cha nanac llequëna, nanac allpatena.

³⁸ Allempoñapa' atet otosanet:

—Napa' cha chepo'chenen nellquëña neyo'chro, cha muene' nerromuen nellquëño't. Sapa' allasa'tach arr secuapretosno'tach.

³⁹ Ñaña'pa' ahua' a'yenteye' all rremosa patso atet ma'yochosa:

—Apa, ñerra'm erroteno'tpa' arepa'chña pemnatatsche o'ch chapona ñeñt atarr amue-rochtatañ nenten.* Tarraña ñerra'm pach muenats añepa'chña atet pe'paton ñeñt pemnen pa, amachña añeyaye ñeñt nemnen na.

⁴⁰ O'ña atet ma'yochuapa' o' ahuer allo'tsa'yen pueyochresha' ma'psheña. O' cherr allpa' alla entueranet ñetñapa' cha atarr manrrenet. Allempoñapa' otueran Pedro:

* **26:39** Ñeñt amue-rochtatañ ñeñtpa' po'ño'ch arr atma'ntataret ñerra'mrrate' ñeñt atarr pesherr yorren orram'tso.

—Ama't mamesha are'tcha'ña acuenaye' sentoso. Amahuachñaca' secuapretosnote' ama't mamesha.

⁴¹ E'ñe señose'rteño'tpa' choña sema'yochosa allochñapa' attoch amach sañeña a'puerrataterro topateñets ñeñtcha' sehuapoya atarr huomenc. Ñeñt'pa' ama't atarr semneñeñ tarrña sechetsñapa' amaca'ye ahuaencateye' penso, ñeñto'marña notenes chocmach sema'yochena.

⁴² Jesúsñapa' alla ahuerterr puepocheño o'ch ma'yocherrerr, ñeñtara atet otuerterr:

—Ñerra'm Apacha' aña pemnaten o'ch chapona ñeñtcha' atarr na'muerochtate', ñerra'm ama errotenot pa'huañatamperrno, ñeñt'pa' e'ñe pocte'. Añepa'chña atet pepaton ñeñt pemnen pa.

⁴³ O'ña alla ma'yochuerrerrpa' allempoñapa' huerrerr alla entuerranerr pueyochresha' ñetñapa' o' alla manrrerretter, cha nanac atserr moñe'tenet.

⁴⁴ Jesúsñapa' alla sa'nerraneterrpa' ahuerterr ma'yochatsa poma'pocheño'hua. E'ñe attecma ma'yochuerrerr atet otua ñorra'.

⁴⁵ O'ña ma'yochuerrapa' allempoñapa' alla huerrerr pueyochreshesho, atet otueraneterr:

—Ama't teme'ttsenpa' alla't semanrren; ama'tpa' alla sames. Te'pa' señochepa'ch o' chap allempoch pomataterret na Ñeñten Acheñetosets atotcha' errotuanen perren ñeñt atarr ochñañenesha'.

⁴⁶ Te'ñapa' setanterra o'ch ahuey o'ch yepocte'. Secue'ca'ye ñeñtcha' nepomue' ñeñt'pa' alla'tsena.

Allempo rromoset Jesús

(Mr. 14.43-50; Lc. 22.47-53; Jn. 18.2-11)

⁴⁷ All atet eñorena Jesús'pa' cha huapatsa pueheñarr ñeñt pueyochresha' peneñ ñeñt a'pchenahuet epsheña, ñeñtñapa' añ Judas. Ñaña'pa' huacha'tatan shonte' acheñenesha' occhelletareret ñaña etsachperetareret. Ñehua, añ ñeñt huacha'ttsapa' añ mueñenahuet ñeñt pa'mcha'tareternesha' pen allohuen judionesha' po'cornaneshar ñaña ñeñt pomornesha' pen allohuen judionesha'. Ñetca'yeña mueñene'ña ñeñtcha' rremuenaya' Jesús.

⁴⁸ Ñehua, Judas ñeñt pomuerre' Jesús'pa' ñaña'pa' atet otnoman acheñenesha' ñeñt anom attoch cheme'toset Jesús. Ñeñt'pa' atet otnomanet:

—Erra'tsencha' nehuomcha'tos e'ñe netso'ttsapa'teño'tpa' ñeñtca'yeña Jesús. Sañapa' ñeñtcha'ña serrmos.

⁴⁹ Allempoña huapapa' cha ponmosaya Jesús huomcha'tos e'ñe puetso'ttsapa'teñesha' atet otos:

—Tsapo, Maestrocha'.

⁵⁰ Jesúsñapa' atet otañ:

—Eso'maruañaca' masheñe, penña arr nesho.

Allempoña acheñenesha'pa' ponmosyet Jesús'pa' rromoset e'ñe po'huamencocma.

⁵¹ Allempoña pueheñarr ñeñt epuet Jesús'pa' ñaña'pa' po'cchella cheta'pa' o'ch chonto'tapanen cornesha' pueñañra, puetepa'tcha' tsorroñ. Ñeñt'pa' año pueñañra ñeñt pa'mcha'tareter pen allohuen judionesha' po'cornaneshar.

⁵² Allempoña Jesús'pa' atet och:

—Penerr alla p'occhell allecma peneñ. Allohuen ñeñt orrotetsa po'cchellopa' cochlochca'ye colla'huerret.

⁵³ Papa' chate' p'otenapañ amate' errotenot es nenameña Nomp'or. Ama't peñoteñe ñerra'm cho nenañpa' ñapa' allorocmach mueñoneñ shonte' nanac po'millañoñeñaneshar ñeñtcha' nemoñsayañ,

⁵⁴ tarraña ñerra'm atet neþapa' amate' errotenot etsotoña ñeñt atet anuaret Yompor po'ñoño nocop. Allña oten ñeñtpa' atetcha'ca'ye perra.

⁵⁵ Allempoña Jesús pa' atet otan acheñenesha':

—Eso'mare't sehuača'tennanaña e'ñe occhelletareroches ñaña etsach-peretareroches attoch serrma'n. Napa' ¿e'ñe't atet sentenen ñerra'mrrate' eñeten? O' allponmatuanen nanorryen Parets pa'paclo'mar, all neychatyen, eso'mare'tña ama allempocmaña serrma'ne'te.

⁵⁶ Ama'tpa' attepa'ca'ye perra allochñapa' attoch e'ñe etsotuerra ñeñt allpon quellca'yese't nocop ñeñt a'mta'yesaye't Yompor po'ñoñ.

Allempoña allohuen pueyochresha'pa' allorocma a'ypo'ña'huanmet, ñetñapa' yetrra'tuet.

Allempo chapata'mueñet Jesús all apcha'muena allohuen judionesha' pa'micha'tareternesha' ñeñt a'pocatyene' ñoñets ñocpuet (Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Acheñenesha' ñeñt rromose' Jesús pa' ñetñapa' anmet allo'tsen Caifás ñeñt pa'micha'tareter pen allohuen judionesha' po'cornaneshar. Allñapa' all apchenet parro allohuen ñeñt atarr etsotayenayeñ ñoñets ñeñt atet anaret epuet ñaña ñeñt pompornesha' pen allohuen judionesha'.

⁵⁸ Pedroñapa' co'ta'nmanet tarraña ñapa' chenta' en a'yo't. E'ñe cornesha' po'pampohua allñapa' anorros epuet ñeñt guardianesha' allochñapa' esheccha' entan Jesús attoch erro'tuanencha' pet.

⁵⁹ Cornaneshana' pa'micha'tareternesha' ñaña ñeñt pompornesha' pen allohuen judionesha' ñaña allohuen ñeñt a'pocatyene' ñoñets ñocpuet ñetñapa' aña atarr e'nenet ñeñtcha' toma'tamþse' Jesús allochñapa' attoch muetsatachet.

⁶⁰ Ama't shonte' huapatsañ ñeñtcha' toma'tamþsosayeñpa' amicha'taretnesha'ña ama't puešeñarrotetapa' ama eseshaye' entayeña attoch muetsatachet. Atteñapa' huapa ñaña epsheña ñeñtcha' toma'tamþse'.

⁶¹ Ñetñapa' atet otoset:

—Añ acheñer ahuañapa' atetca'ye oten: “Napa' atarr ahua'mencaten attoch na'materrñañ Parets pa'paquell. Allo'tña poma'pamtañopa' o'ch alla na'tomater.” Ñapa' atetca'ye otña allempo.

⁶² Allempoña pa' cornesha' ñeñt nanac amicha'taret allenta tompa' atet otan Jesús:

—Pañapa' ¿ama'tcha'ña þanapaneto? ¿Erro'tenote'tña otteñe'chenpet?

⁶³ Jesúsñapa' ama eñoreno. Allempoña cornesha'pa' alla otererr:

—Te'pa' o'ch notap o'ch þotey e'ñe Yompor pa'so'chño ñeñt ama arromña'teshayaye, þapa' ¿þa'tña ñeñteþ Parets Puechemereþ, ñeñteþte' Cristotosets?

⁶⁴ Jesúsñapa' atet och:

—Napa' po'ño'chca'ye ñeñten e'ñe atet þoten. Elloña napa' o'chca'ye notas, o'ca'ye e'ñe chapmoch allempoch e'ñe senterren na Ñeñten Acheñetosets o'chca'ye alla nanorruerr Parets po'cohuenrot allcha' nepartsotapretera. Ñaña po'pocheño o'ch sentapuerren o'ch nesuañperra oso Yompor pue'ntañot.

⁶⁵ Cornesha'ñapa' ñeñta e'mpa' allenta rrarre'tan pa'shtam e'ñe patsrre'mueño't, ñeñtpa' atet ot:

—O'ca'ye cha achm're'tanña Yompor. Ñeñteþña' amach ye'natsche po'psheñeñ ñeñtcha' a'metamþsose'. Te' ama't sapa' o'ca'ye se'm atet achm're'tenan Yompor. ¿Erro'tena't senteñña sa?

⁶⁶ Ñetñapa' atet otyeset:

—Ñã po'ñoçhpa' atarrca'ye nanac achmãare'tenan Yompor, pocte'ñãcho' te'pa' o'ch semtsatach.

⁶⁷ Allempoñapa' a'coshare'tyeset e'ñe pa'clloyot, çho'ña çhota'tyeset; po'potantañeçhnoñapa' taclapechyeset.

⁶⁸ Pachmãare'teñoŧetpa' atet otyeset:

—Te'ña ñerra'm po'ñoçhte' Cristoŧpa' eñoratenperrepa' Parets allochñapa' attoch ŧotey esesha'te'ña peçhota'tyene'.

Atto Pedropa' a'nasotana Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedropa' a'yote'tsen all anen pampo. Allñapa' huapoña coyanesha' ñeñt cornesha' pueñañra, ñaña'pa' atet otosan Pedro:

—Paca'ye e'ñe coŧaye'tña Jesús ñeñt galileo'marnesha'.

⁷⁰ Pedroñapa' anapue'pa' çha a'nasocha. Allohuenetñapa' e'ñe e'mhueñet atet ot:

—Napa' amaca'ye neñoteñe ñeñt atet ŧotenen.

⁷¹ Allempoña Pedropa' ahuerr, çherr allotecma be'tenet o'ch çhapuet o'pono pampo. Allñapa' entuererr po'psheñeñ coyanesha' ñeñt cornesha' pueñañra. Ñaña'pa' atet otan ñeñt parro allo'tsa'yenet:

—Añ acheñerpa' ñeñtca'ye coŧene'ña Jesús ñeñt nazareto'marnesha'.

⁷² Pedroñapa' alla a'nasotererrpa' atet otterrerr:

—Te' napa' o'ch notas e'ñe Yompor pa'so'chño, napa' amaca'ye nentareña añ yacmar ñeñt ŧotenen.

⁷³ O'ña o'çhterrerrpa' huapoña ñaña ñeñt tomçha'tyets all, ñetpa'çho'ña atet otoset:

—Po'ñoçhca'ye ŧapa' Jesúsca'ye pueyochreshaŧ. E'ñe atet peñen ñerra'mrrate' galileo'marnesha', ñeñto'marca'yeña o' yeñotaŧ.

⁷⁴ Allempoña Pedropa' e'ñe puehquëñoŧanetpa' atta otatse'tyerraneterr, ñeñt'pa' atet otanet:

—Napa' e'ñe Yompor pa'so'chño notenes, ñerra'm amate' po'ñoçhoye' notensopa'te'pa' nerromuepa'. Napa' po'ñoçhca'ye ama nentareña añ yacmar.

Ñeñta otuanetpa' e'ñepa'tcha' allempocma eñenña atollop.

⁷⁵ Allempoña Pedropa' alla yerpuerrana ñeñt atet oteñ Jesús: “Amach eñena' atollop ŧaña'pa' o'ch ma'poch ŧa'nasotenna.” Allempoña Pedro çha'nom allotpa' ahuo' a'yenet allñapa' all atarr yahuosa huomenc.

27

Allempo çhapata'mueñet Jesús allo'tsen amçha'tareŧ Pilato

(Mr. 15.1; Lc. 23.1-2; Jn. 18.28-32)

¹ Tsapañña puetarenpa' ñeñtña pa'mçha'tareternesha' pen allohuen judionesha' po'cornaneshar ñetñapa' apçha'mueneterr parro epuet ñeñt pompornesha' pen judionesha'. Allña apçhenetpa' ñetña allohuenetpa' coŧape'chatanna'tet attoçha' muet-satateret Jesús.

² Jesúsñapa' o' huancota'tuet allempoñapa' anma'mueñet allo'tsen amçha'tareŧ Poncio Pilato (ñeñt nen gobierno Romot ñeñt amçha'tarettetsa allo'marneshacop). Allca'ye poma'mueñetña Jesús.

Atto tsomerra Judas e'ñe ñañaña

³ Judasña ñeñt pomue' Jesús'pa' allempoña ñapa' eñoch Jesús'pa' çhochca'ye muet-seret. Allempoña puellquëñoŧpa' ello alla coŧape'cherran cohuen. Allempo atet coŧape'cherrpa' ñaña'pa' alla pomuerran quelle ma'poch çharratlla. Alla apuerrana' cornaneshap' pa'mçha'tareternesha' ñaña ñeñt pompornesha' pen allohuen judionesha'.

⁴ Allñapa' atet otuerranet:

—Napa' o' cha norrtaterr ñeñt ama cohuenayaye, o'ca'ye cha nepomuer acheñ attoch muetseret ama't ñapa' ama't coñe'ta amaca'ye eñalleña po'chñar.

Ñetñapa' atet anaprra'tet:

—Ñeñt'pa' amaca'ye errotenoña yocop, ñeñt'pa' p'ocpaca'ye.

⁵ Allempoña ñapa' atta huapore'terrana' quelle o'pono Parets pa'paclopa' o' alla ahuer, e'ñe puellquëño'tpa' tsonña'huerra ñañeña.

⁶ Cornaneshar ñapa' o' alla cheterret quelle. Ñetñapa' atet otanna'tyeset.

—Añ quellepa' alloca'ye atsa'tare'tta attoch shataterrñañet acheñ po'rras. Ñeñto'marña te'pa' amate'ca'ye pocteyaye o'ch alla yenererr allecma apchenet quelle Parets pa'paclo.

⁷ Allempoña e'ñe ñagattsetapa' atet a'p'octachet o'ch rañtoñet allo añ po'patseñ ñeñt ye'chcatyene' patsrro' allochñapa' allcha' pampa'yeret ama't erra'tsena acheñer ñeñt ahuaña ñerra'm esempo rromayenet allampaño.

⁸ Ñeñto'marña ñeñt patserpa' añ sochet Errasatsotnanen tarro'mar ñeñte quellayero rañtyet allo ashatare'tterra errasats. Ama't teme'ttsen ñeñt patser socheñet Errasatsotnanen.

⁹ Atto'ca'yeña etsotaña atet ote't Jeremías ñeñt a'm'taye't Yompor po'ñoñ ahuañ, ñeñt'pa' atetca'ye quellquë't Cristocop: “Cheterretcha' ñeñt ma'poch charratlla quelle ñeñt allpon po'tsa' nen israelena'tarnesha' atto muetsatateret.

¹⁰ Ñeñtña quellepa' allochca'ye rañterrñañet po'patseñ ñeñt ye'chcatene' patsrro'. Atetca'ye otenenña Partsesha' o'ch atet ne'pa.”

Atto Jesús'pa' a'p'to'tare'teñ am'cha'taret Pilato

(Mr. 15.2-5; Lc. 23.3-5; Jn. 18.33-38)

¹¹ Allempo chapachet Jesús am'cha'taret Pilatesho, allñapa' all am'cha'tare'tña'pa' allenta a'p'to'tap:

—Papa' ¿pa'tña am'cha'tare'ttetsaña judioneshacop?

Jesúsñapa' atet och:

—Napa' ñeñtenca'ye atet p'oten.

¹² Ñeñt pa'm'cha'tare'ternesha' pen judionesha' po'cornaneshar ñaña ñeñt pomporne'sha' pen allohuen judionesha' ñetña allpa' atarr otteñe'chyesoset Jesús. Ñaña'pa' ama't mameshapa' ama eñoreno, ama't parrocha ama anapuenaneto ñeñt atto a'metare'teñet.

¹³ Allempo Pilatopa' atet och:

—¿Ama't pe'muenoña atet a'metare'tenpetpa' esocmañen otenpet?

¹⁴ Ñaña'pa' ama anapuenaneto ama't e'ñe parrocha. Ñeñto'marña am'cha'tare'tpa' nanac cohuaña'teñ. Ama eñoteñeto eso'marte' ama eñoreno ñocop.

Atto am'cha'taret Pilatopa' otanet ama'tpa' ch'osa muetse'ña Jesús

(Mr. 15.6-20; Lc. 23.13-25; Jn. 18.38-19.16)

¹⁵ Ñehua, ñetpa' atetca'ye ye'chenet. E'ñe pate'tets char allempoch cherrerr pascuapo, ñeñtña am'cha'taret ñeñt nen gobierno Romo'tpa' ñaña'pa' chocmach a'rroyerran puesheñarr judioneshacop ñeñt ayottam'psare'ttetsa allempo, ñeñtara ñeñt pamo'ts penet ñet. O'ch apamet erra'tsencho' enamuenet ñeñt muenenet ñet. Ñeñt'pa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'.

¹⁶ Ñaña e'ñe allempopa' allo'tsen puesheñarr judionesha' ñeñt ayottam'psare'ttetsa ñeñt'pa' añ pa'so'cheñ Barrabás. Allohuenetpa' e'ñe eñotueñet añecopña yottam'peñet ñapa' chocma atpare'tane't am'cha'taret ñeñt nen gobierno Romo't.

¹⁷ Ñeñto'marña allempo ap'cha'hua allohuen acheñenesha'pa' am'cha'tare'tña Pilatopa' a'p'to'tapanet:

—¿Erra'tsena't semnenña ñeñtcha' na'rroyonas, ñato' añcha' Barrabás amapa' Jesús ñeñt otenet Cristo?

¹⁸ Ñehua, Pilatopa' eñotapan judionesha' pa'mcha'tareternesha' ñetpa' e'ñe pue'moñe'tateñme'chatsa o' pomueret Jesús. Ñeñto'marña Pilatopa' añ muenen o'ch a'p'to'tan allohuen acheñenesha' tarro'mar ñapa' añca'ye e'nen attoch a'rroyerran Jesús.

¹⁹ Ñaña tarro'mar allempo anorros po'conaño allcha' a'pochtatan ñoñets, puetaporñapa' oñmach po'ñoñ all oteñ: “Amach erroť peřatsche Jesús ñeñt e'ñe cohuen acheñer tarro'mar ama't añ tsapro napa' o' neçhopo'teñ; napa' ñeñtña atarr neyore'te'.”

²⁰ Tarraña ñeñt pa'mcha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñetñapa' añ atarr coťape'chatenet acheñenesha' attoch ñetpa' allohuenetpa' o'ch ochet Pilato:

—Añcha' p'a'rroyerrnay Barrabás, Jesúsñapa' pemtsatachepa'ch.

²¹ Allempoña añcha'tareť Pilatopa' o' alla a'p'to'terraneterr:

—¿Erra'tsena'tña po'ñoçh añ epsheño'mar semnen ñeñtcha' na'rroyernas?

Ñetña anaprra'tetpa' atet ochet:

—Añcha'ca'ye p'a'rroyerrnay Barrabás.

²² Pilatoñapa' alla o'terraneterr:

—Ñehua, añ Jesús ñeñt otenet Cristopa' ¿erroťe'tcha'ña nepe'?

Allohuenetñapa' alla otereterr:

—¡Ñapa' pecorso'tamřsachñaca'ye!

²³ Pilatoñapa' atet o'terraneterr:

—Ñapa' ¿eso'tña pen ñeñt ama't mameshapa' ama pocteye' sentapreteñe?

Ñetñapa' alla rrannarterreterr huomencpa' atet oterreterr:

—Ñapa' ¡çhořañaca'yeña corso'tamřsate'!

²⁴ Pilatoñapa' e'ñe eñoteñ attoch ñapa' amach erroť pe, elloña acheñenesha'pa' çha atarr atsrre'moçhtana'teñet. Allempoñapa' chetan oñpa' e'pota'ta allochñapa' attoch eñotatanet ñapa' amaca'ye ñaye'otteñe'chenaye, ñeñtpa' atet o'terraneterr:

—Napa' amach seyohuatsetno attoch rroma añ acheñer ñeñt ama't coñe'ta ama çoye' erroť es peno. Ñeñtpa' ama nocpa'nayaye, ñeñtpa' e'ñeca'ye saptecpa.

²⁵ Allohuenña acheñenesha'pa' ñetñapa' alla otereterr:

—Attoch rromapa' ama'tpa' yohua'yetepa'—ya ñaña ama't yemrenñohuen.

²⁶ Allempoñapa' a'rroyerranet Barrabás, Jesúsñapa' ashtach allempoñapa' otan po'sollarneshar:

—Te'pa' o'ch secorso'tamřpeña'.

²⁷ Ñehua, sollarnesha'ña ama aneñeta' allcha' corso'tamřsaset ñetñapa' arrña ñanom anmet Jesús añcha'tareťepahuo. Allña agotachet allohuen po'potantañ sollarnesha' ñeñt allo'tsa'yen o'ch e'ñe apçhet Jesúsesho.

²⁸ Allñaapa' pa'llocchame'teñoťet Jesúsapa' rrotamřpes pa'shtam, chorrachet shetamuets tsamamuen ñeñt pa'shtam pen ñeñt po'ñoçh añcha'tareťtetsa.

²⁹ Pellta'toñet ñaña choyo'mets agreçpa' ñeñtña choyo'mtachet ñeñt atet choyo'mtena ñeñt po'ñoçh añcha'tareťtetsa. Orrachet ñaña tsacheř pota po'cohuenroť ñeñt atet orren ñeñt po'ñoçh añcha'tareťtetsa. Allempoñapa' concorpa'yesyet. Pa'llocchame'teñoťetpa' e'ñe atet p'achet ñerra'mrrate' ñeñt e'ñe po'ñoçh añcha'tareťtetsa. Pachm're'teñoťetpa' atet oteñet:

—Puetare' añcha'tareťecha', atarruaca' cohuenep'te' p'a' ñeñteř judionesha' pa'mcha'tareťereř.

³⁰ Pueche'tatseteñoťet a'coshare'teñetpa' o' chetamřperetña ñaña tsacheř pototpa' alloña asto'tame'teñet poño.

³¹ O'ña achmāre'tuahuetpa' allempoñapa' rrotan̄peret shetamuets tsamamuen chorateret e'ñe ña pa'shtam. Allempoñapa' anmet a'yo allcha' corso'tam̄peñeta'.

Atto corso'tam̄psoset Jesús

(Mr. 15.21-32; Lc. 23.26-43; Jn. 19.17-27)

³² E'ñe ahuanmatsetpa' allña oñenetpa' o' poctet puesheñarr yacma ñeññ cireneo'marnesha' ñeññpa' añ pa'so'cheñ Simón. Ñaña'pa' allenta chechatnomet Jesús po'corsoch.

³³ Chapachet all socheñet Gólgota ñeññ yoten yeñoño Poñetallepno.

³⁴ O' chapachet all Jesús'pa' aposetañ vinos ñeññpa' añ atsetare't pueretso ñeññ atarr pesherr. Atta añlle'pa' ama mueno o'ch orr.

³⁵ Allempoña o' corso'tam̄pesuetpa' solltarnesha'ñapa' allenta yellsheñe'chatoñet pa'shtam po'suertot attoch orrtet e'ñe puesheña'ttsetpa' o'ch yorayesñañet pa'shtam puema'tets. Atfoña etsoterra añ ñoñets ñeññ a'mtaye't ahua't Yompor po'ñoñ. Ñehua, allempopa' e'ñe atet ñerra'mrrate' Cristo otatset, ñeññpa' atet oten: "Yellsheñe'chaterrnanetcha' neshtam po'suertot attoch orrtet e'ñe puesheña'ttsetpa' o'ch yorayesonet neshtam puema'tets."

³⁶ Allempoña solltarnesha'pa' alla anorrcha'tet o'ch cohuan̄pset.

³⁷ Ñehua, poñoñ all corsocho all noñet tsachtall aquellcare't attochña eñoteñet ñeññecop corso'tam̄peñet. Ñeññña quellecpa' atet oten: "Añ Jesús'pa' ñeññca'yeña judionesha' Pa'm̄cha'tareter."

³⁸ Allña'pa' corso'tam̄pset epuet ñaña epsheña eñet, puesheñarrpa' nosñañet po'cohuenrot, po'psheñeññapa' nosñañet pue'chcoterot.

³⁹ Ñeññña oñmāchets allpa' ñetpa'cho'ña chocma achmāre'tneñet. Pachmāñnoñetpa' coño'coñtana'tyesneñet,

⁴⁰ ñeññpa' atet otyesneñet:

—Pa ñeññep̄ p̄ommo'cheñoñpa' p̄otatsete't p̄o'ch a'materrayen̄ Parets pa'paquell, poma'pamtañocmo'ch alla p̄atomatereñ, te'ñapa' p̄a'queshp̄aterrañaca'ye e'ñe p̄añeña. Ñerra'm po'ñoçhte' Parets Puechemerep̄pa' pesuerrañaca'yena tayecma corsocho't.

⁴¹ E'ñe attecma achmāre'teñ ñaña ñeññ pa'm̄cha'tareternesha' pen judionesha' po'cornaneshar ñaña ñeññ etsotayenayeñ ñoñets ñeññ atet anaret ñaña ñeññ pompornesha' pen allohuen judionesha', ama't allohuenet fariseoneshohuen. Ñetñapa' pachmāre'teñoñpa' atet otatsetyeñet:

⁴² —Te'ña p̄apa' o' p̄a'queshp̄atyep̄ po'potantañ, p̄aña'pa' eso'mare'tcha'ña ama eshcaye' p̄a'queshp̄aterroña e'ñe p̄añeña.

E'ñe pachmāre'teñoñetpa' atet otyereter:

—Papa' ñeññep̄o'ca'ye israelnesha' Pa'm̄cha'taretere'p̄pa' pesuerrañaca'ye corsocho't allochñapa' attoch yame'ña'pa yañ.

⁴³ Papa' p̄a yemtenaya Yomporpa' te'ñapa' a'queshp̄aterrpepa'ñaca'ye ñerra'm po'ñoçhte' e'ñe cohuen muerenp̄a. Papa' ñeññep̄ po'ñoçh atet otets Yomporo' Puechemerep̄.

⁴⁴ E'ñe attecma pe' ñaña eñet ñeññ epuet corso'tam̄peñet ñetpa'cho'ña atarr esotnare'chet allot po'corsocho't.

Atto rroma Jesús all po'corsocho

(Mr. 15.33-41; Lc. 23.44-49; Jn. 19.28-30; Heb. 9.11-14)

⁴⁵ O'ña chap poctopa' o'huañ atsnom o' e'ñe checmetua ora errap̄aren añe patsro, o'ña ellerrotenmochapa' o' alla puetarerr.

⁴⁶ Allempoña ellerrotnenmochapa' Jesúsñapa' rrana huomenc, ñeññpa' atet ot e'ñe ña po'ñoño:

—Elí, Elí, lama sabactani. Ñeññañoñtsorpa' atet oten: Eso'maruachñaca'ye Neyomporrecha' pa'ypo'ñerren.

⁴⁷ Puesheña'tetsña ñeññ tomchets all ñeññ e'mue' atet oten Jesús, ñetñapa' amaca'ye e'mueññañeto po'ñoñ ñeññ atet oten, ñeñño'marña ñetpa' cha otyeset:

—O' cha chore'tante' Elías ñeññ a'mtaye't ahuat Parets po'ñoñ.

⁴⁸ Allempoñapa' mata puesheñarr ñeññ allo'tsen, e'chomosan chella'so ñeññ atsotso'tpo' o'ne' tsachpopa' alloña tsotso'tatosanña Jesús.

⁴⁹ Po'potantañña' atet ochet ñeññ tsotso'tatene':

—Amach es papatsche, te'pa' attachca'ye yecue' ñato'rraña huapa Elías ñach a'queshpatose'.

⁵⁰ Allempoña Jesús'pa' o' alla rranerrerr huomencpa' rroma.

⁵¹ Allempoña besom allo yottampeññañet Parets pa'paquell o'ponopa' ahuepa't rrrarra'nom e'ñe poctacma, ellopa'tetsta enoteñ e'ñe sotatsohua. Allempoñapa' o' pella pats atarr huomenc, rrrarna'tyes mapuetačno.

⁵² Torna'tampesyes apampaña. Shonte' ñeññ pueyochresha' pen Parets ñeññ o' colla'huañ, ñetñapa' ahuepa't e'ñe tanrra'tuerret.

⁵³ Allempoña tanterra Jesús'pa' ñetpa'cho'ña o' sohuanerretña all apamparettete't o' alla ahuanerret anetso Jerusaléño ñeññ anaret Partsocop, allña'pa' shonte' acheñ ñeññ entapuerrahuet.

⁵⁴ E'ñe allempo rroma Jesús, solltarnesha'ña epuet po'captaner ñeññ allpon cohuanmpene' Jesús, ñetñapa' e'ñe enteñet ñeññ atet pa'yesa allempo, atto pella pats. Ñeñño'marña ñetpa' atarr yorenet. Allempoñapa' atet otet:

—Po'ñochuaca'ye añmapa' Partsepa'tca'ye Puechemer.

⁵⁵ Allo'tsa'yen ñaña shonte' coyaneshačno, ñetñapa' a'yota cohuanrrorteñet. Ñetpa' ñetca'yeña co'a'huanmue'ña Jesús Galileoteñ ñeññ sherba'yesaye't.

⁵⁶ Ñeñtpa' María Magdalena ñaña po'psheñeñ María ñeññ Jacobo pachor ñaña José. Allo'tsen ñaña ñeññ pachor pen Zebedeo puechemerasha', ñaña po'potantañečno coyaneshačno.

Atto pampuet Jesús

(Mr. 15.42-47; Lc. 23.50-56; Jn. 19.38-42)

⁵⁷⁻⁵⁸ Atteñapa' o' ellerren. Puesheñarr ñeññ eçllayore't ñeññ pa'so'cheñ José ñeññ arimateo'marnesha' ñeññara Jesús pueyochresha' ñaña'pa' ahuos Pilateshopa' o'ch oteña' pocte'ch eñch ñach asuatose' Jesús ñeññ rromuets corsocho. Pilatopa' atet otan pa'cheñer:

—Te'pa' o'ch sa'rroyoñ arromñañ anerepa'.

O'ña ellerren Joséñapa' o' cherr corsocho,

⁵⁹ a'suatuerran Jesús corsocho't all rromuen. Allempoñapa' epatse'ch shetamtso ñeññ e'ñe cohuen emarr. Allempoñapa' anemñ allcha' pampueña'.

⁶⁰ All e'ñe errte' eñatene' mapuetspon ñeññpa' e'ñe pamo'tsna'tarneshacpañ allca'yeña nenana'ña Jesús. Allempoñapa' attome'terrñañ mapue' añecmuen allo yottampesner ñeññ puepampuer pach. O'ña yottampesuanerpa' Joséñapa' ahuer.

⁶¹ Allña'pa' allo'tsen María Magdalena ñaña po'psheñeñ María. Ñetñapa' alla anorrcha'toset allame'tets all pampueñet.

Atto guardianesha'pa' cohuanmpene't all pampuet Jesús

⁶² Met añ yeter allempo chocmach año'terreter ñeññ tsapatecop allempocma amesen judionesha'. Tsapañña'pa' ñeññ pa'mcha'tareternesha' pen judionesha' po'cornaneshar ñaña fariseonesha' ñetñapa' e'ñe alla shontenet parro all Pilatesho.

⁶³ Ñeñtpa' atet otoset:

—Nomporcha' yapa' o'ca'ye yeyerpuera añ acheñer ñeñt atarr ashcañpa' allempo corre'tpa' atetca'ye otye't: "Napa' ama't puema'pamtañopa' netanerrachca'ye rromot."

⁶⁴ Te'pa' pemñaye'chñaca'ye ñeñtcha' nanac cohuanpsose' puepampro e'ñe puema'pamtañohua, te't huapa pueyochresha'pa' chate'ca'ye e'ñe a'nahua ereta'. Allempoña ñetpa' chate' ochet acheñenesha' Jesús'pa' o'ca'ye tanterra rromot. Ello'te'ña ñet allempopa' nanacte' shecare'teret acheñenesha'. Ello'te' metanerret ñeñt atto shecare'tyesete't ahuaña acheñenesha'.

⁶⁵ Pilatoñapa' atet otapanet:

—Añca'yeña guardianesha', te'pa' orras parro, ñetpa' o'ch cohuanpsose't, e'ñech echarr se'pamposña' puepampuer, erro'tencha' e'ñe pocte' sent sa.

⁶⁶ Ñetñapa' ahuanmuet puepampro. Mapue' allo yottampeñetpa' e'ñe cohuen yomrarampsose't attochña e'noteret ñerra'm esesha'ch toramperre'. O'ña e'ñe cohuen pampesuetpa' allempoñapa' na'neret guardia all ñeñtcha' cohuanpse'.

28

Atto tanterra Jesús

(Mr. 16.1-8; Lc. 24.1-12; Jn. 20.1-10)

¹ O'ña huañ yetñats allempocma amesenet allempoña taya puetaren temenc allempo motta'muena yetñatspa' Maríaña Magdalena ñaña po'psheñeñ María ñetñapa' ahua'tecma ahuanma'muenet o'ch enta'mueñet Jesús puepampro.

² Allempoña machayotepa'tcha' pella pats huomenc; añ sohuatsa Yompor po'millaño'teñer ento't. O' sohuapa' a'rrote'tosan mapue' a'yenet ñeñtña mapue'pa' allña anorros.

³ Nañapa' atarr nanac poptosa e'ñe atet orrtosa ñerra'mrrate' meratste'. Pa'shtamñapa' atarr nanac huallama't.

⁴ Guardianesha'ñapa' ñeñtña atarr yore'tose'. Puenmchaño'tetpa' cha yonshema'tyeset cha o'ta'yese't e'ñe atet ñerra'm cho rromuenet.

⁵ Allempoña mellaño'teñpa' atet otapan coyanesha'chno:

—Amach cha seyorenatsto. Napa' neñotenes añca'ye semnen o'ch senta'mueñ Jesús ñeñt corso'tam'pset.

⁶ Amaca' arro'tsenaro arr, ñapa' atet otase'tpa' te'ñapa' o'ca'ye tanterra. Sonca'ye secueña' all panet amaca' eñalle.

⁷ Secua'huepa' orrerres sema'yoreñ o'ch soterrñaña' pueyochresha': "O'ca'ye tanterraña Jesús rromot. Ñapa' ñanomcha' otatsa o'ch ahuen Galileo. Sapa' allcha'ña sentuer."

⁸ Allempoñapa' puema'yoreñ ahuanerret puepampro't. Ama't yorenetañpa' pocsheñesha' mattra'teret o'ch oteññañeta' pueyochresha'.

⁹ Matachetsetpa' Jesúsñapa' ahuepa'tcha' poctanet, huom'cha'tapanet. Ñetñapa' allenta ponem'yet, rromoset pa'rrp'o't concorposñañet.

¹⁰ Allempoña Jesús'pa' atet otanet:

—Amach sem'cha'tatsetno. Orrerres sotennana' nemo'nasheñnesha'chno ahuanmuetepa' Galileo, allcha'ña e'ñe enternet.

Atto solltarnesha'pa' serrpare'tatyesan allohuen cornanesha'chno ñeñt atet entet ñet

¹¹ Ahuanmatsetpa' puesheña'tetsña guardiapa' ahuanmuet ñamet anetso. Allña'pa' serrpare'tatoset cornanesha' pa'm'cha'tare'ternesha' allohuen atet o' entuet.

¹² Ñetña allempo ap'chenet epuet ñeñt pompornesha' pen judionesha' ñetñapa' cotape'chatanna'tet. O'ña cotape'chatanna'tuetpa' allempoñapa' apet solltarnesha' shonte' quelle.

¹³ Ñeñt'pa' atet ochet solltarnesha':

—Te'pa' atetcha' sot: “Yaña tsapopa' muetsye'tpa' pueyochresha'ñapa' ahuo't huapuet a'nahua't ereta'ña arromñañ.”

¹⁴ Ellopa' alla oterranerr solltarnesha':

—Ñerra'm amcha'taret čha e'mare'te' yapa' ya'pocatonascha' e'ñe cohuen ñesho attochña sapa' amach erroť paseto.

¹⁵ Ñetña allempo agaphuet quellepa' atet otarettetpa' atetcho' pet. Ñeñto'marña ñet pueserrparñetpa' e'ñe allempoteñ epa'hua judioneshesho'mar.

*Atto Jesús'pa' otnerran pueyochresha'čno ñetpa' atetcha' pa'yerret
(Mr. 16.14-18; Lc. 24.36-49; Jn. 20.19-23)*

¹⁶ Ñeñ čharra' puechena paterr pueyochresha'pa' ñetña'pa' ahuanerret Galileo. Arr ahuanmuet all aspeno all otanet Jesús allcha' tet.

¹⁷ Allempo entosetpa' ñetña'pa' čha concorpa'rretyesoset. Puesheña'tetsña'pa' čha echartanet pueyočhro.

¹⁸ Allempoña Jesús'pa' ponmanet atet otapanet:

—Napa' apareten allohuen llesens aña patsrecop ñaña Yompor pue'ntañecop.

¹⁹ Ñeñto'marña te'pa' orras o'ch seyčhatyes ora allohuen pa'namen aheñ attoch neyochresha' neperranet. O'ch sapatamet Yompor Parets pa'so'chño ñaña Yompor Puechemer pa'so'chño ñaña e'ñe Yompor Puecamquëñ pa'so'chño allochña'pa' attochña e'ñe pueyochresha' perranet Yompor Parets.

²⁰ Ñaña chocmach o'ch e'ñe seyčhatyesanet allochña'pa' attoch e'ñe cohuen ame'ñerrnanet e'ñe ora ñeñ allpon o' notuas. Ñaña señoche'pa'ch napa' e'ñe pate'tets yet chocmach allo'tseney parro attoch chocma nebensare'tañpenes ama't tarremphuach esempohuañen allempoch mellapoterra. Ñeñtpa' attetepa'ch Nompore. Allohua.

COHUEN ÑOÑETS ÑEÑT̃ QUELLCA' SAN MARCOS

*Allempo orrta Juan ñeñt̃ serrpare'tosets all amayo
(Mt. 3.1-12; Lc. 3.1-9, 15-17; Jn. 1.19-28)*

¹⁻² Te' arr napa' o'ch nequellconas ñeñt̃ e'ñe cohuen ñoñets alloch yequeshperra e'ñe yame'ñeñoña Jesucristo ñeñt̃ Puechemer pen Yompor. Ñehua, ñeñt̃ ñanom orrtatsa ñeñt̃pa' e'ñe atet o' perra e'ñe atet quellquë't̃ Isaiás ñeñt̃ a'mtaye't̃ ahua't̃ Yompor po'ñoñ. Isaiáspa' ñapa' a'ñca'ye quellquë't̃ ñeñt̃ atet Yomporpa' otan Puechemer ñeñt̃ara Cristo, ñeñt̃pa' atet och:

Te'pa' peñoche'pa'ch napa' nemñerrna'pcha' puesheñarr ñeñt̃cha' p̃otam̃perraya. E'ñe ña pueserrpare'teño'tpa' a'ño'terrna'pcha' allcha' p̃oñmos p̃aña esempo.

³ Ñapa' e'morrterrach po'ñoñ all amayo allcha'ña serrpare'taterranña acheñenesha'. Puerranarotpa' a'ñcha' toma'ntaterranet toñ, ñeñt̃pa' atetcha' oterranet: "Te'pa' o'ch sa'cohuenetyes toñ allcha' oñmos Partsesha', o'ch e'ñe sa'pa'charretyesoñ pa'te'p̃." Arrpa' allohua ñeñt̃ atet quellquë't̃ Isaiás.

⁴ E'ñe atet anuaret̃ ahua'toteñpa' ñeñt̃ña'pa' e'ñe'cho' atet perra allempo orrtosa Juan ñeñt̃ apatose' acheñenesha' Yomporecop. Ñapa' alla orrta amayo allña serrpare'tatosanña acheñenesha'. Ñeñt̃pa' atet otosanet:

—Te'pa' o'ch soctape'cherr ello cohuen Yomporecop allochñapa' e'ñech cohuen sapataret̃terra e'ñe same'ñeño't̃ Yompor. Attochña Yomporpa' o'ch peretna'huernas so'chñar.

⁵ Ñeño'marña shonte' acheñenesha' chocma hua'cha'tyenet ñesho o'ch e'mñoteñeta'. Allohuen ñeñt̃ judeo'marnesha' ñaña allohuen ñeñt̃ jerusaléno'marnesha' chocma hua'cha'tyenet ñesho. Allña ñetpa' a'meta'yesoset po'chñaret, Juanñapa' apatyapanet Yomporecop. Ñeñt̃ña oñ all apatyapanet añ pa'so'cheñ Jordanas.

⁶ Ñeñt̃ña Juanpa' camello pue'ch apomotaret̃ ñeñt̃ pa'shtam pen. Allo chanena ñeñt̃pa' pa'rrom. Allñapa' rra'yesane't̃ ahuañchenclla* ñeñt̃ña puerrar pe't̃ epuet pets po'moñ.

⁷ Juanñapa' atet serrpare'tatanet:

—Cristoña ñeñt̃cha' huapatsa chenta'pa' ñapa' atarrca'ye ahua'mencatesha', nañapa' ama tama ahua'mencateyayno. Ñapa' ñeñt̃ña atarr sherbets, nañapa' ama es nesherbeno attoch nemo'ca pa'rrop̃ot̃ ama't̃ po'sapatre'chapa' o'ch nepyoñ.†

⁸ Ñaña napa' ama't̃ napatensoñ Yomporecoppa' e'ñeca'ye oño'chaya napatyenes. Tarraña Cristoñapa' a'ñcha'ca'ye chorratossa Parets Puecamquëñ.

*Allempo apataret̃ta Jesús Yomporecop
(Mt. 3.13-17; Lc. 3.21-22)*

⁹ Allempoña huapa Jesús Nazaretot̃ allara Galileo. Chap Juanesho allñapa' apata'p̃ Juan oño Jordanaso.

¹⁰ E'ñe apatue'pa' o' cha'nerrña Jesús oño'tpa' allenta entan enet atoraret̃. Allo'tña e'ñe sohua'nmaña Parets Puecamquëñ e'ñe atet enta'p̃ ñerra'mrrate' ye'p̃ o' sohua'nma entot̃. E'ñe arr chap Jesúsesho.

¹¹ Allempoñapa' cha e'morrtsatsa ñaña ñoñets entot̃ atet eñorena Yompor. Ñeñt̃ña ñoñetspa' atet oten:

—Papa' ñeñt̃e'p̃ Nechemere'p̃ ñeñt̃e'p̃ atarr nemorrentena, p̃a atarr nocshatene'.

* **1:6** Ñeñt̃ ahuañchencllapa' arrapo' enteñ palestino'marnesha'. † **1:7** Ñeñt̃ atet po'taruas pe't̃ esclavos o'ch pueyam̃psan pamo'mte' po'sapatre'ch.

Allempo oneñeipa' topatenan Jesús, mueneñ o'ch atet p'atan Jesús ñeñi ama pocteye' enteno Yompor

(Mt. 4.1-11; Lc. 4.1-13)

¹² Allempoña Parets Puecamquẽña' allenta anman Jesús all amayo.

¹³ Pa'tatsoch çharramat allo'tsena amayo; allña'pa' allo'tsa'yen pa'namen berroçhno. Attoña allpa' o' huapoña oneñeñ mueneñ o'ch atet p'atyes ñeñi ama pocteye' enteno Pompor Parets. O'ña topatuahueña'pa' allempoña'pa' huaçha'toña ñaña Yompor po'mllañoñeñaneshar; ñetña sherboetña Jesús all.

Allempo e'ñe ñenmañ torrena Jesús Partsocop all Galileo

(Mt. 4.12-17; Lc. 4.14-15)

¹⁴⁻¹⁵ Allempoña yottam̄pset Juan allcha' mueroçhtachet, Jesúsña'pa' allenta ahuerr Galileo. O'ña çherr all ñaña'pa' serrpare'tatuerranet ñeñi e'ñe cohuen ñoñets ñeñi huetsa Yomporeshot alloch yequeshperra. Ñeñiña'pa' atet otuerranet:

—Te'ña'pa' o' etsoterra yetñats, o' çherrmoch allempoch atarr ayochreshaterra Yompor. Socoppa' añ poctetsa o'ch soçtape'çherr ello cohuen Yomporecop ñaña o'ch same'ñerra ñeñi e'ñe cohuen ñoñets allochca'yeña sequeshperra.

Atto Jesús'pa' çhore'tosan pa'tatssheña ñeñi e'ñe caca torrenet rromuet

(Mt. 4.18-22; Lc. 5.1-11)

¹⁶ Allempo Jesús'pa' chopeñe'chyen all sa'patopño'mar; ñeñiña sa'ppa' añ pa'so'cheñ Galileas. Allña'pa' entnoman Simón epuet pa'mo'nasheñ Andrés. Ñetña'pa' all terrayenet e'ñe all sa'po tarro'mar ñetpa' ñeñi po'taruas penet.

¹⁷ Jesús'pa' atet otosanet:

—Te'ña'pa' o'ch notas: Soçta'n na attoch neyochresha' neperres. Ñeñi atet sepene ahuatoteñ e'ne' cac te'ña'pa' o'ch neyçhaterres attoch se'nerr ñaña acheñ ñeñiçha' same'ñaterra.

¹⁸ Ñetña'pa' allorocma na'nmuet po'terrayapa' o' cotet Jesús.

¹⁹ O'ña meterrerr a'yenteye'pa' allña'pa' entuerranerr ñaña Jacobo‡ epuet pa'mo'nasheñ Juan; ñeñi'pa' Zebedeo puechemerasha'. Ñetña'pa' po'noño'tsa'yenet all a'cohuenetyenet po'terraya.

²⁰ Jesús'pa' çhore'tuerraneterrpa' atet otuerraneterr ñamet:

—Te'pa' o'ch soçta'n saña.

Ñetña'pa' allenta sa'nmet pomporet Zebedeo all po'noño epuet ñaña pa'taruasañret. Ñetpa'çho'ña cotet Jesús attoch pueyochresha' perranet ñamet.

Allempo Jesús'pa' entap̄ puesheñarr yacma ñeñi chorrena oneñeñ

(Lc. 4.31-37)

²¹ Atteña'pa' ahuanmuet ñaña anetso Capernaumo. O'ña çhap añ yetñatsro allempocma amesen judionesha', allña Jesús'pa' be'tosos judionesha' po'prahuo, all yeçhatyesosanet.

²² Allempo serrpare'tatuanet Jesús, acheñenesha'ña'pa' epaye' cohuanrrorteñet ñeñi atet yeçhatenanet ña. Tarro'mar ñapa' atarr cohuen yeçhatenanet atet ñerra'mrrate' ñeñi allsensarettetsa Partseshot. Judionesha' pa'mcha'tareternesha' ñeñi atarr etso-tayene' ñoñets ñeñi atet anaret, ñetña'pa' ama e'ñeye' atteye' yeçhateneto.

²³ Puesheñarrña yacma ñeñi allo'tsen puerahuo, ñeñiña'pa' añ chorrenaya oneñeñ. Ñaña rranare'tapa' atet otapan Jesús:

²⁴—Eso'mare'tcha'ña erroç peposey Jesús, pa' ñeñi'p̄ nazareto'marnesha'p̄. ¿Añecop̄te' pehuena o'ch pa'çhencaterrey? Napa' o' neñotapa'p̄. Papa' atarr Partso'p̄ añ pellsensene' Pompor ñeñi atarr nanac Parets.

‡ 1:19 Jacobopa' ñeñi'ara ñeñi sochenet Santiago.

25 Tarraña Jesúspa' ama muenache o'ch eñorana'cha. Ñañapa' atet och:

—Pemma, te'pa' chopaña quechpa'nerre'ña añ acheñer.

26 Oneñeññapa' cha atanman yacmapa' alla o'shshe'ma. Oneñeññapa' cha rranare'tnoma allempo quechpa'nerran acheñ.

27 Acheñenesha'ñapa' cha atarr torats panet pueyochret. Ñetñapa' atet otanna'tyeset:

—Ta'mca'ye, errotente'ca'yeña Jesús po'ñoñ; po'poñontpa'tca'ye yechatyen. Ñeñpa' errotente'ca'ye. E'ñe atet pena po'ñoñ atet ñerra'mrrate' ñeñt allsensarettetsa Yomporeshot. ¡Ama't oneñeñ errot otenpa' atetcho' pateñ, e'ñech ame'ñateña!

28 E'ñe mamecmapa' o' e'ñe serrpare'tuahuet allampaño'mar Galileo atet pa'yena Jesús.

Allempo a'crratosan Jesús Simón Pedro pa'so'mue

(Mt. 8.14-15; Lc. 4.38-39)

29 Allempoña cha'nmacherret puerahuotpa' arr ahuanmuet all yechena Simón ñaña pa'mo'nasheñ Andrés. Allñapa' añ cota'nmue' Jacobo ñaña Juan.

30 Allña Simón pa'so'muepa' cha atsna'ten, cha huoraten, alla panapa' po'mayo. Otpapet Jesús:

—Simón pa'so'muepa' cha atsna'ten.

31 Allempoña Jesúspa' ponmosana atsnañepa' rremota'tos pototpa' cha echantose' cha metuerretsña atto huoraten. Allempoña o' metua po'urateñapa' allenta tanta o' agapapanet e'ñe cohuen o' yema'tapanet.

Allempo Jesúspa' a'crraterran shonte' pa'namen atsnañechno

(Mt. 8.16-17; Lc. 4.40-41)

32 Ñeñte yetrocma allempo ellerren o' emuena atsrrepa' acheñenesha'ña huap-atyesnenet Jesúsesho allohuen ñeñt atsna'tyets ñaña ñeñt chorra'yena oneñeñ.

33 Huacha'tyesoña allohuen anetso'marnesha', ñetñapa' alla shontoset allotecma be'tenet pocollo.

34 Jesúsña allempopa' e'ñe a'crratyesuapanet, ama't shonte' pa'namen atsnañtsochno ñeñt osyenahuet. Ama't ñaña shonte' acheñenesha' ñeñt chorra'yena oneñeñ ñeñpa'cho'ña e'ñe quechpatyesuapanet oneñeñ ñeñt chorra'yenahuet. Jesúsñapa' ama muenatano oneñeñ attoch eñorana'tnomet, tarro'mar ñetpa' e'ñe eñoteñet ñapa' ñeñtca'ye Cristotets.

Allempo Jesúspa' serrpare'tatyesnoman acheñenesha' erraparen Galileo'mar

(Lc. 4.42-44)

35 Tsapaña e'ñe ahuatecma tanta'muena Jesús, ama e'ñe orretuena' cha'nma'muen ñeñte anetsrot ahua'muen all ama acheñempañoyaye allcha' ma'yocha'muena.

36 E'ñe o'chtatsapa' ahua'muen ñaña Simón ñaña po'psheñchno ñeñt epuet ta'muena. Ñetpa' o'ch e'nereta' Jesús.

37 Allempoña entosetpa' atet otoset:

—Papa' allohuen acheñenesha' chocmaca'ye e'nenpet.

38 Ñañapa' otapanet:

—Te'pa' o'ch ahuey po'poñ anetso ñeñtara allampaño'mar allpa'cho'ña o'ch neserrpare'tatyesnomanet tarro'mar napa' ñeñtecopca'yeña nohuapa.

39 Allempoñapa' chopeñe'chyes Jesús erraparen Galileo'mar, serrpare'tatyesanet e'ñe ñet po'prahuet. Ñaña ñeñt chorra'yena oneñeñ, ñañapa' e'ñe quechpatyesuerranet.

Atto Jesús a'crraterran puesheñarr yacma ñeñt aptsarña

(Mt. 8.1-4; Lc. 5.12-16)

40 Allempoñapa' huapoña ñaña puesheñarr yacma ñeñt osen puetsarñatats ñeñt otenet lepra. Chap Jesúseshopa' concorpana'tosana Jesúspa' atet otos:

—Ñerra'm p̄a muenatspa' p̄a ñeñteṑ atarr ahuaменcateshap̄ p̄a'crrataye'cherren allochñapa' attoch e'ñe cohuen entuerren acheñenesha'.

⁴¹ Jesúsñapa' e'ñe cohuen muerapya ñeñto'marña anretapa' allenta a'ṑlle', atet och:

—Napa' nemneñca'ye, metuerrepa'ña peptsarña allochñapa' attoch e'ñe cohuen entuerreṑ allohuen acheñenesha'.

⁴² Yacmañapa' allorocmuepa'tcha' metuerña pueptsarña čha cohuenterrtsa.

⁴³⁻⁴⁴ Jesúsñapa' alla otererr:

—Te' atto o' na'crraterreṑpa' po'ñočh ama't e'ñe puesheñarrapa' amach ṑotaṑsa'tatsche ama't mamesha. Corneshachña pegatena' all peptsarse'ṑ. Atet nane'ṑ Moisés ñoñets añ acheñrecop ñeñtcha' a'crratare'tterrtsapa'te'ñapa' o'ch es ṑanom ñeñtcha' ṑapos all ñeñt Yomporecop. Allochñapa' attoch e'ñe cohuen entuerreṑ allohuen acheñenesha'.

Attotca'yeña Jesúsapa' mueñe o'ch ahuo' corneshesho.

⁴⁵ Ñañaapa' allempo ahuo'pa' e'ñe serrpare'tatyesianman allohuen acheñenesha' ñeñto'marña e'ñe ña pa'metare'teñoṑpa' o' erracmañen eñotuet ñeñt atet ṑa'yena Jesús. Ñeñto'marña Jesúsapa' ama eshcaye' seno anetso all shontena acheñenesha'. Ñapa' alla chopeñe'chyen a'yo'mar all ama acheñempañooyaye. Tarraña ama't atet penañ acheñenesha'ñapa' allemateñ huačha'teññañet ñeñt shontenoya ama't all.

2

Atto Jesús a'crraterran ñaña ñeñt echarraña (Mt. 9.1-8; Lc. 5.17-26)

¹ O'ña met allponmat Jesúsñapa' o' alla čherrerr anetso Capernaumo. Acheñenesha'ñapa' e'mare'chet o' alla čherrerr pocollo.

² Allempoñapa' o' alla shonterrñañerr acheñenesha'. Atteñapa' o'huañ epuet o'pono pocollo. Ama't allot be'tenet pocollapa' o'huañ epuet. Jesúsña allpa' serrpare'tatapan acheñenesha' Yompor po'ñoñ.

³ Atteñapa' huapatañṑsoñet ñaña echarraña ñeñtñapa' pa'tatssheña ñeñt anmanṑpene' puechecnaṑot.

⁴ Ñetpa' añ muenenetañ o'ch be'tososet o'ch e'ñe noset Jesúsesho, tarraña shonte' acheñenesha' ñeñto'marña ama eshcaye' abe'tosetoña atsñañet attoch čhapachet e'ñe Jesúsesho. Atteña a'tapatoset enot pocollato, ñeñtña pocollpa' patsopo'. Ñetñapa' rrorosetña ñeñt pocollatar enot e'ñe ñeñtecoptaro'tsen Jesús all patsot. Alloña a'suatañṑsosetña echarraña e'ñe puechecnape'na. Attoña čhapachet e'ñe rročo allo'tsen Jesús.

⁵ Jesúsñapa' eñotapanet ñetpa' atarr nanac yemteñet. Allempoña ñapa' otapan echarraña:

—Te'ña neyochre, ṑa ṑo'chñarpa' o' aṑretna'huare'tterra.

⁶ Ñehua, allñapa' allo'tsa'yen ñaña puesheña'tets ñeñt atarr etsotayenayeñ ñoñets ñeñt atet anaret judioneshacop. All anorrčha'tyenet ñetñapa' atet otatse'tyeset pueyočhreto:

⁷ “Eso'mare'tña atet eñeña añ acheñer. Ñeñt atet otenpa' ñapa' čhaca'ye achm̄are'tenanña Yompor tarro'mar arr patsropa' ama't e'ñe puesheñarra ama eñalleña ñeñt peretnene' ochñarets ñaṑtaña Yompor peretnene' ochñarets.”

⁸ Jesúsña pueyočhropa' eñotanet ñeñt atet otyenet ñet pueyočhreto ñocop. Allempoña Jesúsapa' atet otanet:

—Sapa' eso'mare'tcha'ña atet soctape'chatse'tyesña seyočhro.

⁹ Sapa' čhate' soten ñeñt atet o' notue echarraña po'chñar o' aṑretna'huare'tta, ñeñtṑa' ama torrapahuoyaye. Sapa' añña atarr torrapo' senten attoch na'crrater, čhoncha'ña ote': “Petantena, pechta'nen pemue'pa' o'ch pechope'chnen.”

10 Ñehua, napa' o'ch neñotatas na Ñeñten Acheñetosets, napa' ñeñten apareten llesens attoch nach peretnerre' ochñarets añ patsro.

Ñeñto'marña Jesús allempopa' atet otan echarraña:

11 —Te'ña napa' o'ch notaþ: Petantena, pechta'nen pemue'pa' o'ch pechope'chнен, ahuenepþ pepaclo.

12 E'ñe otue' atetpa' echarrañaña' cha tantetsa e'ñe allorocma, o' cheta'nenan po'mue'pa' cha'nen allot. Allohuenña acheñenesha' e'ñe entueñet; ñetña' cha atarr cohuanrrortapueñet. Ñeñto'marña ñet allempopa' atarr cohuentatyehñañet Yompor. Ñetña' atet otyenet:

—Yapa' ama't ahuatapa' ama yentareña atet ñeñt atarr cohuen.

*Allempo Jesús'pa' hua'ña'nman Leví attoch pueyochresha' per
(Mt. 9.9-13; Lc. 5.27-32)*

13 Jesúsña'p' alla ahuerterr sa'patoþño. Allohuen acheñenesha'p' alla hua'cherrñañeterr, ñaña'p' ye'chatyapanet.

14 O'ña ye'chatuanetpa' o' meterrerr Jesús allot, allña oñenpa' entnoman ñaña Leví* ñeñt Alfeo puechemer. Ñaña'p' alla anen allecma cobra'yenan acheñenesha' quelle ñeñt gobiernocop. Jesúsña'p' atet otosan Leví:

—Te'pa' o'ch þocta'n attoch neyochresha' nepperþ.

E'ñe otue' Jesús atetpa' Levíña'p' cha tantnomtsapa' allenta coñan Jesús.

15 Allempoña chap ñaña allempo Jesús'pa' alla rrallme'chen Leví pa'paclo. All rrallme'chapreteñ shonte' acheñenesha' ñeñt po'taruas þa'yenet ñamet o'ch cobra'yenan acheñenesha' quelle ñeñt gobiernocop. Ñetpa' atarr ashcañnesha' entenanet acheñenesha'. Ñaña allo'tsa'yen shonte' po'potantañe'chno ñeñt atarr ochñañenesha' entyen acheñenesha'. Ñetña'p' all anorr'cha'tyenet all anen Jesús epuet pueyochresha'. Tarro'mar shonte' acheñenesha' ñeñt co'ta'huanene' Jesús.

16 Añña fariseonesha' ñeñt allo'tsa'yen ñaña ñeñt etsotayenayeñ ñoñets ñeñt atet anare't ñeñtareta judioneshet, ñetña allempo enteñet Jesús all rrallme'chapretenan ñeñt atarr ochñañenesha' ñetña'p' allenta otoñet pueyochresha':

—Eso'mare'tña ñeñt semaestror sepenpa' rrallme'chapretenanña añ acheñeneshar ñeñt puehquëñote'na cobra'yene' acheñenesha' ñaña epuet acheñenesha' ñeñt atarr ochñañenesha'chno.

17 Atet e'manet Jesús, ñaña'p' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt at-sna'tetspa' ñetña'p' chocma e'nenet ñeñt'cha' a'crraterrahuet. Napa' ama añecpaye' nohuapo attoch ne'chore'tos ñeñt e'ñe atet entetsañ ñetpa' e'ño' cohuen es þa'yenet. Napa' añecopña nohuapa attoch ne'chore'tos ñeñt atarr ochñañ entyetsa. Allochña'p' attoch o'ch co'tape'cherret ello e'ñe cohuen Yomporecop.

*Allempo Jesús'pa' eñotatanet atet'cha' tore'tet Yomporecop ñeñt po'ño'ch sherbets
(Mt. 9.14-17; Lc. 5.33-39)*

18 Parrochña allempo tore'tyena† Juan pueyochresha' Yomporecop ñaña fariseonesha' pueyochresha', pueheña'tetsña acheñpa' hua'cha'tet Jesúsesho, ñetña'p' atet otoset Jesús:

—Juan pueyochresha'p' tore'tetset Yomporecop; fariseonesha' pueyochresha'p'cho'ña tore'tetset ñamet Yomporecop. Paña peyochresha'p' eso'mare'tña amaña tore'teneto.

19 Jesúsña'p' atet toma'ntatanetpa' ñeñt'pa' atet otanet:

* 2:14 Levípa' ñeñfara ñeñt sochenet Mateo. † 2:18 Añ tore'teñetspa' añecop o'ch yetorra Yomporecop. Amach añecpaye atomat, ñeñt'pa' añecpa mameshacop o'ch yeque'chpa' yerrar.

—Ñeñt ahua'ñaretechno all rrallme'chapreteñet ñeñt e'ñe errte' sena'tetsa, ama pocteyaye o'ch yotamet "amach es serra'yestatsto" tarro'mar ñeñtpa' atet coshapreteñet ñeñt sena'tetsa. Amachña cha tore'teno allempo allo'tsenmeñ parro ñeñt errte' sena'tetsa.

²⁰ Tarraña ñerra'm esempo machayota sa'nerranet ñeñt sena'tetsa, ñeñña parro yemuetyenapa' allempoña ñetpa' e'ñe puellquëñotet quechpa'huerretcha' puerrar, amach arrenaye' enterreto. Ñeñtpa' attochña tore'terret allempo Yomporecop e'ñe po'ñoçh. Arrpa' allohua huañ ñeñt atet Jesús toma'ntata ña sena'tostsa.

²¹ Elloñapa' o' alla toma'ntaterraneterr ñeñt atet yeçhen judionesha' arr patsro ñeñto'marña atet otanet:

—Yapa' ñerra'm mellashañ yeshtampa' amach yelltatsche emarr lletamtso. Tarro'mar ama't atet yeçatsechpa' ñeñtpa' e'ñech orrena yellteñ tarro'mar ñeñt emarr lletamuetspa' ñerra'm esempo yatsama'tañpespa' çhach chellama'ta çhach martse'tatanña shetamtsoshe'm. Ñeñña yelltenpa' allo'nach sen rrarrtse'tats nanac.

Ñeñtpa' attoña Jesúsapa' eñotatanet ña poçtaña e'ñe etserra.

²² Jesúsñaapa' alla toma'ntaterraneterr po'poñ ñeñt atet yeçhen judionesha' o'ch yeçcatenet pa'rrom orroç. Ñeñto'marña atet otanet:

—Ama't puesheñarroçeyapa' amach yeshatstoña vinos emasa mellasha'mañ orroçto ñeñt ayeçcataret pa'rrom. Tarro'mar ñerra'm atet yepe'pa' o'ch chasa'ña vinospa' çhach a'ptsan orroç, vinosñaapa' çate' e'ñe shebhua, ñeñña orroçpa' ama't mameshapa' amach es sherberro. Añña ñerra'm emasa vinos arrcha' yeshe' emerra orroçto ñeñt ayeçcataret pa'rrom.

Ñeñtpa'çho'ña attoña Jesúsapa' eñotatanet ña poçtaña e'ñe etserra.

Allempo Jesús pueyochresha' taso'tañpesyesnomuet trigo añe yetro allempocma amesen judionesha'

(Mt. 12.1-8; Lc. 6.1-5)

²³ Allempoña çherrerr pamtarr allempo çhocma amesen judionesha'. Allempoña Jesúsapa' arr oñem chetso'mar epuet pueyochresha'chno. Allempo oñenet chetso'mar pueyochresha'ñapa' taso'tañpesyesnomuet puechna'tets trigo.

²⁴ Fariseonesha'ñapa' ñeñt entahuet ñetñapa' allenta otyeset Jesús:

—Pecue' eso'mare'tña peyochresha'ñapa' atet penet ñeñt ama pocteyaye o'ch atet yeça tarro'mar te'pa' añe yetropa' ñeñt atet anaret ahuatoteñ allempocmach yamesen.

²⁵ Jesúsñaapa' atet otanet:

—Sapa' ama'trra selleyareña ñeñt atet pa' ahua't David allempo pallta'psa ñeñtcha' rret allempo cheporra'nma epuet ñaña allohuen ñeñt cotene'.

²⁶ Ña allempopa' be'tosos Yompor pa'paclo, allñaapa' rrosan pan ñeñt atma'ntataret atet ñerra'mrrate' ñeñt nenet all Partsocop. Ñehua, ñeñt panpa' ama pocteyayñe o'ch esesha' rre'. Ñeñtpa' añach ñapue't rrene' cornaneshachno, ñeñtpa' e'ñe atet anuaret judioneshacop. Ñeñña panpa' o' rros David, rratosan ñaña allohuen ñeñt epuet. Ñehua, ñeñtpa' tarrempo atet pe't David allempo judionesha' po'cornanesharpa' añ pa'mñcha'tareter pete't Abiatar.

²⁷ Jesúsña alla oterraneterr:

—Añ yetro allempo yamesen ñeñtpa' añecop anaret acheñeneshacpay ñeñtcha' yesherbene'. Amaña añecpaye' anareteña yetñats ñeñtcha' yesherbene ya.

²⁸ Ñeñto'mar na Ñeñten Acheñetosets, ñeñten allsensareten, naca'yeña atet otets este' poctetsaña ñeñtcha' atet yeça añe yetro allempocma yamesen.

3

*Allempo Jesúsapa' a'crraterran ñeñ chelletsa pot
(Mt. 12.9-14; Lc. 6.6-11)*

¹ Po'pocheñoña Jesúsapa' alla be'tosuenerr judionesha' po'prahuo. Allñaapa' allo'tsen puesheñarr yacma ñeñ čha chellena pot.

² Fariseonesha'ña allpa' Jesúsapa' atarr cohuanatyenet attoch eñchet ñato'rraña a'crratenanerrcha' acheñ añe yetro allempocma amesenet. Ñerra'm o'ch a'crratenanerr ama't puesheñarra añe yetro allempo amesenet, allempoñapa' esheccha' a'metanipeñeta' añcha'taretesho.

³ Allempoña Jesúsapa' otan ñeñ chelletsa pot:

—Apon, patomos arrma.

⁴ Jesúsapa' atet otanet:

—¿Errotena'tña ñeñ e'ñe pocte' senten ñeñtcha' atet yeḡa añ yetro allempo yamesen? Ñato' o'ch atet yepe' e'ñe cohuen po'psheñeñ, amapa' ñato' o'ch atet yeḡoñ ñeñ ama cohuenayaye. ¿Ñato' añte' pocte' senten o'ch ya'crrach acheñ amapa' añte' pocte' senten amach ya'crratatsche čhachña yemtsatach?

Ñetñaapa' ama't puesheñarrofetapa' ama eseshaye' anapaye.

⁵ Allempoña Jesúsapa' cohua'yesanet, ama't mamesha ama pocteye' entenaneto, atarr llecateñet tarro'mar ñetpa' ama mueneneto o'ch čhapanet cohuen pueyočhreto. Allempoña Jesúsapa' otan yacma ñeñ chelletsa pot:

—Te'pa' o'ch notaḡ, petapuerr ḡot.

E'ñe otue'pa' ñañaapa' allentepa'tcha' tapuerranña pot, o' e'ñe cohuenterra pot.

⁶ Fariseonesha'ña čha'nmačherretpa' cotape'chatanna'tet epuet Herodes pueyočhresha', ñetñaapa' Jesúsapa' atarr o'patenet attoch muetsatachet.

Shonte' acheñenesha' ñeñ huačha'tatsa sa'patopño all enteñeta' Jesús

⁷⁻⁸ Allempoña Jesúsapa' ahuerr sa'patopño'mar pueyočhresha'na. Shonte' acheñ galileo'marnesha'pa' cota'huanmet ñamet. Ñaña shonte' po'potantañečno acheñenesha' ñetña allempo e'mare'teñet Jesús ñapa' atarr cohuen orrtatyen ñetpa'čo'ña allenta huačha'tyesoñet ñamet. Allenateñ anetsot huačha'tyeset Judeot, Jerusalénoč, Idumeot, Jordanas yonita'noč, ñaña allo'marnesha' ñeñ huetsa Tiroč ñaña Sidonoč. Ñetpa' añ atarr muenenet o'ch enteñeta' Jesús.

⁹ Shonte' nanac acheñenesha'. Attoch ama atarr quečhcare'teñe Jesús acheñenesha' ñeñ shontetsa, ñañaapa' otan pueyočhresha':

—Chocmach sehuapaton noñ.

¹⁰ Allempo Jesúsapa' a'crratyesan shonte' atsnañeččno ñeñto'marña allohuen ñeñ atsna'tyets ñetña allempopa' atarr emchorreñet Jesús, añ atarr muenenet o'ch a'ḡlloset Jesús.

¹¹ Añña oneñeččno ñeñ chorra'yenaya acheñ ñeñtpa'čo'ña allempo entoset Jesúsapa' allepa'tcha' rromanḡpsosyet pa'rrḡot, rranare'tyesosetpa' atet otoset:

—¡Pepa'tña Parets Puechemereḡ!

¹² Jesúsapa' ama muenatano oneñeččno o'ch oteñet ñapa' po'ñoč Parets Puechemer.

*Allempo Jesúsapa' acran čharrasheña ñeñ puechetsa epsheña ñeñtcha' llesensa'
(Mt. 10.1-4; Lc. 6.12-16)*

¹³ Allempoña Jesúsapa' ahuo' aspeno. Alločña agotatosan ñeñ e'ñe cohuen enten ña ñeñtcha' pueyočhresha' ḡa'. Ñeñ agotatenpa' ñetña allenta ahuanmuet ñesho. O'ña čhačha'tuetpa'

14 ñaña'apa' napanet ñeñtet çharrasheñet ñeñt puechetsa epsheña, ñetña'apa' ñeñtcha' e'ñe parro chopeñe'chyen ñaña ñeñtcha' llesensen attoch serrpare'tyerret Yompor po'cohuenña.

15 Ñaña o'ch apuerranet llesens attoch queçhpatyeret oneñe'etchno acheñenesha'.

16 Ñeñt llesensa' ñeñt'pa' añ pa'so'chñe'chno: Simón ñeñtara o' sochererr Pedro,

17 allotpa' ñaña Jacobo ñaña pa'mo'nasheñ Juan ñeñt Zebedeo puechemerasha'; ñetña'apa' o' soherraneterr Boanerges ñeñt yoten yeñoño Tecorena'tar.

18 Allostpa' ñaña Andrés, ñaña Felipe, ñaña Bartolomé, ñaña Mateo, ñaña Tomás, ñaña Jacobo ñeñt Alfeo puechemer, ñaña Tadeo, ñaña ñeñt po'psheñeñ Simón ñeñt cananistanesha' ñeñt atarr torrattse't pa'netsrecop.

19 Allostpa' ñaña Judas Iscariote ñeñtcha' pomuerre' tsapatonet Jesús.

Atto puesheña'tets oteñet Jesús ñapa' oneñe'eto' po'huamencot queçhpatenanña po'potantañ oneñe'etchno acheñenesha'

(Mt. 12.22-32; Lc. 11.14-23; 12.10)

Allempoña Jesús'apa' o' alla çherrerr pocollo pueyochresha'na.

20 Allña'apa' o' alla shonterrñañerr allohuen acheñenesha', ñeñto'marña allempo'apa' ama eshcaye' rreneto.

21 Allempo e'mare'ch Jesús pamo'tsesha' atet ña'yenapa' ñetña'apa' hua'cha'tet o'ch ereta' Jesús tarro'mar ñetpa' otenapuetañ ñato' çhote' o' mospaña Jesús.

22 Puesheña'tetsña ñeñt atarr etsotayenayeñ ñoñets ñeñt atet anaret ñetpa' Jerusaléño' hua'cha'tet. Ñetña'apa' atet otyesoset Jesúsocop:

—Añ yacmarpa' añaca'ye chorrenaya Beelzebú ñeñt pompor pen allohuen oneñe'etchno; ñeñtca'yeña ahuamencat pene' attot queçhpatenanña oneñe'etchno acheñenesha'.

23 Allempoña Jesús'apa' çhore'tan acheñenesha', allempoña'apa' atet otapanet:

—O'ch notas, po'ño'ch oneñe'etpa' amaca'ye huapore'tanneno.

24 Atet ñerra'm paterr añcha'taret ñerra'm çho elloptannena pueyochresha' ñeñtña atto añcha'tarettena çhach huañerrets amach allo'na huomencatneno.

25 Attecmach ñannerra ñaña ñeñt e'ñe pamo'tsna'tarecmuet ñannenet ñerra'm çho elloptannenet e'ñe ñagattsetapa' ñeñtña atto huomencatenetpa' ñeñt'pa'çho'ña çhachca'ye huañerrets.

26 Attecmach ñannerra ñaña oneñe'et pueyochresha'chno, ñerra'm oneñe'etchno e'mone'tannenet, ñerra'm tantanna'ta oneñe'etchnopa' ñeñtña atto huomencatenetpa' ñetpa'çho'ña çhachca'ye huañerrets amach allo'na huomencatneno. Ñeñto'marña po'ño'ch oneñe'etpa' amate' erro'tenot huapore'tanna'teto e'ñe ñagattseta.

27 'Ñehua, yapa' yeñoteñ ñeñt atarr ahuamencattetsa atto atarr ahuamencattena oneñe't, ñaña'apa' e'ñe po'huamencot cohuañpesyenan allohuen e'ñe cohuen ñeñt pa'paquell ña'yen. Tarraña ñerra'm esempo o'ch huapoña ñeñt atarr ahuamencatesha' ñeñtcha' metanose'ña po'huamenc atet ñerra'm na Nompör, ñeñtcha'ña rromose' o'ch huancos, allochña'apa' o'ch be'tosos all ñeñt pa'paquell ña'yen o'ch e'ñe puerratañpsos ñeñt allpon o'patyena ña.

28 Jesús'apa' alla otarraneterr:

—Napa' o'ch notas, po'ño'ch allohuen pa'namen sosya'tsañe'chno ñeñt ama pocteye' enteno Yompor ama't ñaña achm'are'tanna'teñets ñeñt'pa' a'pretna'po' nenteñ.

29 Tarraña ñerra'm esesha' añ achm'are'teññañet Parets Puecamquëñ ñeñtña'apa' amaca'ye a'pretna'pahuoye' nenteñe. Ñeñtña po'chñaretpa' amachca'ye a'pretna'pahuoterro e'ñe tayoteñ errponohuañen.

30 'Ñehua, ñeñt'pa' atet otanet Jesús tarro'mar ñetpa' atet otyeñet Jesús, ñapa' año' chorrenaya oneñe't ñeñto'ña ahuamencat pene'.

Allempo huapoña Jesús pachor ñaña pa'mo'nasheñnesha'
(Mt. 12.46-50; Lc. 8.19-21)

³¹ Allempoñapa' huapa Jesús pachor epuet ñaña pa'mo'nasheñnesha'. Chapuet allpa' ñetñapa' alla tomcha'toset a'yot, allotña agotatoset Jesús.

³² Ñeñt anorrcha'tyets epuet Jesús ñeñt arrotampenaya, ñetñapa' atet ochet:
—O'ca'ye huapa pachor ñaña pemo'nasheñnesha'. Ñetpa' a'yote'tsa'yenet, paca'ye e'nenet.

³³ Jesúsñapa' atet otanet:
—Ama't seño'teñe ñeñt e'ñe po'ño'ch nachor nepen ñaña ñeñt e'ñe po'ño'ch nemo'nasheñ nepen.

³⁴ Allempoñapa' cohua'yesan acheñenesha' ñeñt arrotampenaya all anorrchenet. Allempoñapa' atet oterraneterr:

—Napa' aña'yeña ñeñt po'ño'ch nachor nepen ñaña ñeñt po'ño'ch nemo'nasheñnesha' nepen.

³⁵ Ñehua, ama't erra'tsena ñeñt e'ñe atet p'ohuene' ñeñt atet muenen Nomp'or ñeñt pue'ntaño'tsen ñeñtca'yeña e'ñe po'ño'ch nemo'nasheñ nepen ñeñtña noch nepen ñeñtña nachor nepen.

4

All toma'ntatanet Jesús ñeñt a'parre'tene' puerets
(Mt. 13.1-9; Lc. 8.4-8)

¹ Jesúsñapa' alla ye'chaterranerr acheñenesha' e'ñe alla sa'pato'ño. Allña emchorra'huererr shonte' acheñenesha'. Ñeñto'marña Jesús'pa' a'tap noñtopa' ahuañpes mame' allpononet allña'pa' anorros noñto e'ñe all sa'po. Acheñenesha'ña allohuenetpa' e'ñe sa'pato'ño'tsa'yenet all masto.

² Allña'pa' esocmañen serrpare'tatenan acheñenesha' pa'namen toma'nteñtso'chno. All ye'chatyenanetpa' atet otanet:

³ —Se'mñoton añ ñeñt atet notenes: Ñeñtña a'parrene' puerets ñaña'pa' ahua' allcha' a'parre'tyenana' puepue.

⁴ All a'parre'tyeñ patanta'tetsñapa' alla chapyes toño'mar. Allña'pa' huacha'tyesa ot e'ñe aña'llme'chuenana' puerets.

⁵ Po'poñe'chnoñapa' alla chapyes mapuetro'meso'mar all ama tama eñalle pats. Ama nanac o'pono'tseno patso ñeñto'marña mame'tollapa' cheparesuañ.

⁶ O'ña enome'ta'muen atsrre'tpa' alla a'uyatuer. Ama ercha'tena' ñeñto'marña alla hueya'huerra.

⁷ Po'potantaña pueretspa' alla chapyes allcha' chepares aj. Allpa'cho' mameshapa' cheparesuañpa' ajña'pa' mameshapa' atesha'tua alla ca'matuerranña narmets all a'cclatuer, ñeñto'marña ama ellom're'to.

⁸ Po'potantañe'chno ñeñtña'pa' arr chapyes all e'ñe cohuen patso. Ñeñtña'pa' e'ñe cohuen chepares. Allempoña atesha'tuapa' o' ellom're'tyes. Atarr atonapa'tets ellom're'tyes—puecha'tetspa' ma'poch charra' pue'llomer, po'pchañe'chnoñapa' pechapoch charra' pue'llomer, po'pchañe'chnoñapa' charroch charra' pue'llomer.

⁹ Allempoña Jesús'pa' alla oterraneterr:
—Ñeñtes po'ño'ch ne'mñotene', chaponasepa'ch seyo'chro ñeñt atet netma'ntatensa añ ñoñets.

Atet otanet Jesús ñeñtecop atet toma'ntatyenanet
(Mt. 13.10-17; Lc. 8.9-10)

¹⁰ Allempoña patmuerra acheñpa' o' ñap'amañ Jesús epuet ñaña pueyochresha' ñaña puesheña'tets po'potantañ ñeñt allo'tsa'yen, ñetñapa' atet ochet Jesús:

—Ta'm ¿este'ña petma'ntatenyaña ñorra'?

¹¹ Jesúsña' atet oterraneterr:

—Sa te'pa' Yomporña semnatene' attoch señoterr ñeñt ama eñotpahuoyaye ama't ahuatoteñ atet penaña Yompor po'cohuenña atto ayochreshattena ña. Tarraña po'potantañechno ñeñt atta es puecha'yetsa, ñocpuetpa' ama eñoteñeto ñeñt atet atma'ntataret ñoñets.

¹² Attoña ama't enteñetañ ñetña' amach errotenot es chapahueto pueyoçhreto. Ama't e'mueñetañ amach çhenanetoña pueyoçhreto ñeñt atet yeçhateney Yompor po'cohuenña. Attoña amach cotape'cherreto ello cohuen Yomporecop attoch ñach peretnerrahuet po'chñaret.

*Arrpa' all eñotatanet Jesús ñeñt toma'ntatenanet ñeñt a'parre'tene' puerets
(Mt. 13.18-23; Lc. 8.11-15)*

¹³ Jesúsña' alla oterraneterr:

—Sapa' ama't mameshapa' are't señothenoña ñeñt o' netma'ntatuasa ñorra'. Ñerra'm ama çhennaso seyoçhro ñeñt o' netma'ntatuasa ñorra'pa' errotenotuachñaca'yeña çhaponasaña seyoçhro allohuen po'poñechno ñeñtcha' netma'ntaterrser tsapaonet.

¹⁴ Allempoña Jesús'pa' eñotatanet ñeñt atet o' toma'ntatuanet ñoñets ñocpuet, ñeñtpa' atet otanet:

—Ñeñt a'parre'tyene' puerets, ñeñtña pueretspa' añca'ye notenes Yompor po'ñoñ allempo serrpare'teñet.

¹⁵ Añ puerets ñeñt çhapyets toño'mar ñeñtpa' añ notenes acheñenesha' ñeñt e'mñotenayey Yompor po'ñoñ. Allempo e'mñotuetpa' allorocmach huapa oneñeñ o'ch alla puerratanperranet Yompor po'ñoñ ama't allpon ñeñt eñotetañ pueyoçhreto.

¹⁶⁻¹⁷ Ñaña ñeñt çhapyesets mapuetromeso'mar ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech allorocma pocsheñesha' aguëññañetañ Yompor po'ñoñ. E'ñech cohuen ame'ñeretañ tarraña ñeñtpa' mamecpach atet penet. Tarro'mar ñetpa' e'ñe atet penet ñerra'mrrate' narmets ñeñt chepuets mapyo amach eñalle puerech. Tsapaonetña ñerra'm o'ch huapanet topateñets ñeñtcha' mueroçhtatahuet tarro'mar ñetpa' o' ame'ñeretañ Yompor po'ñoñ, ñetña'pa' allorocmach alla quechpuerrñañet Yompor po'ñoñ.

¹⁸ Ñaña po'poñechno puerets ñeñt çhapyets ajmo'mar ñeñtpa' añ netma'ntatena po'potantañ acheñenesha' ñeñt e'mñotenayey Yompor po'ñoñ.

¹⁹ Ama'tcha' çhapanetañ pueyoçhreto tarraña ñetpa' allo'nach senet e'ñech añ atarr cotape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es echyenet tarraña ñeñtpa' çaca'ye shequënanet. Attach pa'namen ye'chatse'tyenet. Attoña huenanet topateñets ñeñto'marña ñetpa' amach errotenot orrtatoñetoña ñeñt e'ñe cohuen enten Yompor. Ñetpa' e'ñe atteta ñerra'm narmets ñeñt cha ca'mateñ ajma' ñeñto'marña amach errotenot me'teneto o'ch ellomre'tyeset.

²⁰ Ñaña añ puerets ñeñt çhapyesets e'ñe cohuen patso ñeñt e'ñe cohuen chep-arsatspa' ñeñtña toma'ntenaya po'potantañ acheñenesha' ñeñt e'mñotene' Yompor po'ñoñ. Ñoñetsña'pa' e'ñech cohuen çhenanet pueyoçhreto. Ñetña'pa' ñeñtet po'ñoçh orrtatenet ñeñt atarr sherbets Yomporecop. Attoña ñetpa' e'ñe atet penet ñerra'm narmets ñeñt atarr me'tets—pate'tets ma'poch çharra' pue'llomer, po'poñpa' pechapoch çharra' pue'llomer, po'poñpa' çharroch çharra' pue'llomer.

*Arrpa' all toma'ntatanet lampareñ atto çhoyo'tamipeney
(Lc. 8.16-18)*

²¹ Jesúsña' alla toma'ntaterraneterr, ñeñtpa' atet oterraneterr:

—Ñerra'm esempo ya'llchaten lampareñ, ñeñtpa' ama añecpaye' yehuapateñe o'ch alla ye'rramañpsos coymño. Ñaña ama añecpaye' ya'huortatenoña lampareñ o'ch yene' o'ponot yemayepnacho. Añecopña ya'huortatenña lampareñ o'ch yene' enonet attoch choyo'tamipesuan allohuen ñeñt' allo'tsa'yen.

²² Tarro'mar allohuen pa'namen ñeñt' ama eñotpahuoyaye ama't ahuatoteñ, te'ñapa' o'ch e'ñe orrtataretterra attochña o'ch e'ñe eñotatarettuerrret e'ñe poctacma.

²³ Ñeñtes po'ñoçh ne'mñotene' chaponasepa'ch seyochro ñeñt' atet netma'ntatensa añ ñoñets.

²⁴ Jesús pa' alla oterraneterr:

—Sapa' señotenañe' e'ñeñe' po'ñoçh cohuen se'mñoteññañ Yompor po'ñoñ ñato'pa' amate'. Tarro'mar ñerra'm errof sepoñ po'psheñeñ ñeñt' ama cohuenayaye Yomporñapa' attecmaç perres saña. Ñaña ñerra'm e'ñe cohuen sepenanet, Yomporñapa' e'ñech cohuen perres saña ama't ellonet o'ch apuerres ñeñt' e'ñe cohuen.

²⁵ Tarro'mar esesha'te' chena pueyoçhro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esesha'ña ñerra'm ama chenaneo pueyoçhreto tarro'mar ñetpa' ama po'ñoçhaye' aguëññañeto Yompor po'ñoñ, ama't allpon eñotyenetañ pueyoçhro ñeñt'ñapa' chach puerratamperranet Yompor.

All toma'ntatanet puerets ñeñt' e'ñe cohuen chepyets

²⁶ Jesús pa' alla toma'ntaterraneterr, ñeñtpa' atet oterraneterr:

—Yompor po'cohuenña ñeñt' atto ayochreshattena ña, ñeñtpa' atet pena ñerra'mrrate' puesheñarr acheñ ñeñt' nare'tene' puepuer. O'chña nare'tuepa' o'ch ahuer pa'paclo.

²⁷ Allach allponmaterra' o'ch tsapuenpa' allach muene't, yetoñapa' chocmach tanta'muene't, puepuerñapa' atteñapa' o'ch chepua o'ch atesha'ta. Pamo'mte'ñapa' amach e'ñeye' eñoteñe errotenotte'ña chepyen.

²⁸ Ñehua, yeñoteñ patspa' ñeñtca'ye a'chpatene' yepuer e'ñe ñoña. Choch ñanom cho'pe'chyes allempoñapa' o'ch atarrchet choch potsets attoch ellom're'tyes, attochcho' e'ñe po'nuen.

²⁹ E'ñe errte' po'netspa' e'ñech allorocma mueñan ñeñtcha' tsorrenaya'. O'ca' chen allempoch apchenetña ñeñt' narmetser.

Atto Jesús pa' toma'ntaterranet atet pena pue'llomer ñeñt' otenet mostazllomñ

(Mt. 13.31-32; Lc. 13.18-19)

³⁰ Jesúsña ellonetpa' atet oterraneterr:

—Añ Yompor po'cohuenña ñeñt' atto ayochreshattena ña —ñanompa' e'ñech puesheña'ttsa ame'ña'yetsa, allempoteñña' allo'nach sen atonetnomtsa ñeñtcha' ame'ñerrtsa, attochña e'ñe epa'huerra erracmañen Yompor po'cohuenña. Ñeñtña te'pa' o'ch netma'ntatasa ñeñt' atet pena ña.

³¹ Ñeñtpa' atet pena ñerra'mrrate' añ pue'llomer ñeñt' atarr añeñolleshallmerr ñeñt' otenet mostazllomñ. Ñeñtña pue'llom're'tollpa' o'ch nare'chet patso. Ñehua, e'ñe yeñoteñ mostazllomñ ñeñtpa' atarrca'ye nanac añeñolleshallmerr.

³² Tarraña ñerra'm o'ch nare'chetpa' allempoña choppa' allo'nach sen rrorranmats cohuen, atarrchetnomuets, elloch metana'tuan po'pchañ narmetsoçhno. Puetacre'nach ateshatacrerrtsa. Allña'pa' o'ch huaçha'toña oteçhno o'ch rrema'rrartosa puetacro'mar po'mañero.

Jesús pa' ora allpon ñeñt' atet yeçhatyenan acheñenesha' ñeñtpa' atto pa'namen es toma'ntatyenanet

(Mt. 13.34-35)

³³ Shonte' po'poñechno ñeñt' alla toma'ntaterraneterr atto serrpare'tatenanet Yompor po'ñoñ. Attoña e'ñe allpona serrpare'tatanet ñeñt'ñapa' e'ñe cohuen eñotatanet pueyochreto.

³⁴ Ama serrpare'tatenaneto atfa, añña chocma serrpare'tatenanet toma'nteñtso. El-lonetpa' chocma e'ñe eñotochen serrpare'tatenan pueyochresha'.

Allempo a'mchecherran Jesús huomenquësha' ñaña sa'p ñeñt' emo'yarertetsa (Mt. 8.23-27; Lc. 8.22-25)

³⁵ Ñeñte yetrocma e'ñe ellerronet Jesúsñapa' otan pueyochresha':
—Te'pa' o'ch ahuañpsey yomta'n.

³⁶ Pueyochresha'na sohuanmet acheñenesha'. Ñeñt'ara noñto allo'tsen Jesúsapa' alloña anmampeñet Jesús o'ch ahuañpset yomta'n. Allñapa' cota'huanmanet po'pnañechno noñtechno.

³⁷ Allempo ahuañpset allñapa' machayotepa'tcha' huomenquëshatañpesnomuet. Emo'yare'ña cha esha'tena noñto atteña oññapa' chorramoch noñto.

³⁸ Jesúsñapa' alla muen puepopato alla ñotena. Pueyochresha'ña opueretpa' atet ochet:
—¡Maestro, amahuaca'ye pellquënyote' o'rramche' yoclla'huamocha!

³⁹ Jesúsña tanterrapa' e'ñe po'ñoñoña a'mtsoññetueran huomenquësha'. Ñaña po'ñoñoña a'mtsoññeterran sa'p ñeñt' emo'yartetsa, ñeñt'pa' atet ot:

—¡Muecheherrepa', muetsoññeterra'!

E'ñe otue'pa' cha muecheherrtsaña huomenquësha'. Attoña ñetpa' o' alla muechettamperret e'ñe cohuen.

⁴⁰ Allempoña Jesúsapa' atet otanet:

—Sapa' eso'mare'tña cha atarr seyoren. Eso'mare'tña ama e'ñeye' seyemtenno.

⁴¹ Ñetñapa' cha atarr nanac yoren, atet otanna'tyeset:

—Ta'mca'ye añ acheñerpa' esona'tarte'ca'ye. Atarropa't es a'mchechaten, ama't po'ñoñoñapa' a'mchechaterran huomenquësha' ama't ñaña emo'yare' oñ.

5

Atto gadaro'marnesha' ñeñt' chorrena oneñt'pa' huapa Jesúsesho (Mt. 8.28-34; Lc. 8.26-39)

¹ Allempoñapa' o' etsotoset yomta'n all sechenet. Allñapa' añ pa'ney pene' gadaro'marnesha'.

² Jesúsñapa' sehuosa all noñtot, allñapa' huapoña puesheñarr yacma tarraña ñapa' añ chorrenaya oneñt'. Ñeñt'pa' arrot huapa allecma pampa'yeñet arromñañechno.

³⁻⁴ Ñehua, ñapa' alla yeçhena all pampueñet arromñañechno. Ama't puesheñarrapa' ama eseshaye' errot penaye attoch a'mchecheret. Ama't chocma huanquëñetañ asrerecho pa'tcot ñaña potot, ñaña'pa' chach tsepe'tuerranña asrerech allo huanquëñet potot ñaña pa'tcot chach rrollapecheñ o'ch e'ñe tsepe'tatue. Ñeñto'marña ama't e'ñe eseshapa' ama eshcaye' a'mchecheñeto.

⁵ Allñapa' ellapene'tcha' ñaña arepene'tcha' chopeñe'chyesets apampaño'mar ñaña aspentarero'mar. Allñapa' allecma atarr ama'tochtana, tsotse'tyena mapyo e'ñe ñañaña.

⁶ Tarraña allempo entapan Jesús a'yoteñ allentepa'tcha' matosa concorpana'tosana Jesús.

⁷⁻⁸ Allempoña Jesúsapa' atet otosan oneñt' ñeñt' chorrenaya ñeñt' yacmar, atet otos:

—O'ch oneñete notosep te'ñapa' ¡pequechpa'ner añ acheñer!

Ñeñto'marña ñeñt' chorrena oneñt'pa' rranosa huomencpa' atet otapan Jesús:

—Eso'maruachca'ye Jesúsocha' patsrre'mochtana'tosna, p'apa' ñeñtep' Ñeñt' nanac Parets Puechemerep'. Te'pa' o'ch notapap' e'ñe Parets pa'so'chño, amach cha pecoñchatatstosno.

⁹ Jesúsñapa' alla oterranerr ñeñt chorrena oneñeñt:

—Papa' ¿eso'tña peso'cheñ?

Ñaña'apa' atet oterranerr Jesús:

—Napa' añ neso'cheñ Legión tarro'mar yapa' nanac patonrey.

¹⁰ Allempoña ñeñt chorrena oneñeñtapa' ñaña'apa' atet otare'tapan Jesús:

—Amach pemño'tatsterrye allañar ñachayo.

¹¹ Ñehua, allpa' a'yente'tsa'yen shonte' chañchochno ñeñt rratse'tyets aspenonet.

¹² Ñeño'marña oneñeñechnopa' atet otare'tapet Jesús:

—Ñerra'm choch muene' erroten peposeypa' arrña pemñaye'chosey chañchesho allochñapa' o'ch yechorra'yerr ñaña' chañchochno.

¹³ Jesúsñapa' allenta otanet:

—Ama'tca'yepa' orrasca'ye.

Allempoña oneñeñechnopa' quechpa'neret acheñ o' chorrereterr ñaña' chañchochno. Chañchoña allempo chorrosya oneñeñechnopa' chepa'tcha' matrra'tua ñegoneñ, shorcha'tuos allotpa' e'ñe ño'shrra'tuosa oño. Ñeñtña chañchochnopa' allo'tsente' epoch mil.

¹⁴ Acheñenesha'ña ñeñt cohuanmpene' chañcho, ñetñapa' allenta matrra'tet ñamet po'yorñoñ ahuanmuet anetso. Allñapa' serrpare'tyesoset ñaña' ora allohuen allampaño'mar. Acheñenesha'ñapa' allenta ahuanmuet ahuo'ch enteñeta'.

¹⁵ O' cha'cha'tet Jesúseshopa' allñapa' entoset yacma ñeñt chorre't oneñeñechno alla anen ashtamañ, o' eñoterra, o' cohuenterra. Ñetñapa' cha atarr mecha'na'toset.

¹⁶ Añña ñeñt entene' Jesús atto quechpaterran oneñeñ acheñ, o' alla mueñererr chañchesho, ñetñapa' allenta serrpare'tatyesapet ñeñt hua'cha'ttsa anetsoñ.

¹⁷ Allempoña acheñenesha' ñeñt yechetsa allpa' atet ochet Jesús:

—Te'pa' ahuerreñ arroñ yenyot.

¹⁸ Allempoña Jesúsapa' a'terr noñto o'ch ahuer, yacmaña ñeñt chorre't oneñeñ ñaña'apa' allenta otan Jesús:

—Napa' nemneñca'ye te'pa' o'ch nocterreñ.

¹⁹ Tarraña Jesúsñapa' ama muenache atet och:

—Allañach, te'pa' o'ch ahuerreñ pepaclo pamo'tsesho'mar o'ch peserpare'tatuerranet ora allohuen atto Yomporpa' atarr yenposeñ ñaña' atto atarr muerospa.

²⁰ Ñaña'apa' atet otue Jesúsapa' atetcho' pa. Allenta ahuer serrpare'tyesnerrets ora anetso'mar ama't all oteñet Decapoliso atto Jesúsapa' atarr nanac yempos. Allohuenña acheñenesha'pa' atta atarr cohuanrrorteñet.

Atto Jesúsapa' tantaterran Jairo po'señ ñaña' all a'crratnoman puesheñarr coyanesha' ñeñt a'plla'nmue' pa'shtam

(Mt. 9.18-26; Lc. 8.40-56)

²¹ Allempoñapa' ahuanmperrerr Jesús noñto, o' alla cherrerr añeñta'n allot ta ahuaña. Allñapa' o' alla emchorra'huererr shonte' acheñenesha' e'ñe all sa'patopño.

²² Allñapa' huapoña puesheñarr amcha'taret ñeñtapa' añ pa'so'cheñ Jairo. Ñapa' ñeñt puesheñarr ñeñt amcha'tarettetsa judionesha' po'prahuo. Allempo entosan Jesúsapa' ñaña'apa' alla rromosa Jesús pa'rrpõt.

²³ Allñapa' atet otos:

—Nesñetollaña'cho' o' cha a'po'ntsena. Ñeño'marña napa' nohuennaña o'ch pöcterren nepaclo. Ama't poto'tapa' o'ch pa'pñeña' attoch pa'crrater o'ch alla huomcherra.

²⁴ Jesúsñapa' allenta cota'ner, allenta cota'huanemñ ñaña' shonte' acheñenesha' cha emchorratse'tnomet, cha to'mama'tneñet.

²⁵ Allñapa' coṭa'nmanet ñaña puesheñarr coyanesha' ñeñĩ atсна'tets. Charra' puechena epa char ñeñĩ atṭo ṭhocma yella'yena.

²⁶ Epaye' mueroṭhtateñ shonte' apartañeṭhno ñeñĩ partenayeñ. Ama't o' a'gasta'huahuan ora allpon quelle echen atṭo partatena ñaña'apa' attera ama't mameshapa' ama ṭhoye' pasateñe. Elloña allo'na sen a'po'ntsa'nmatṣa.

²⁷ Ñeñĩ coyanesha'pa' o' e'mare'tan Jesús ñeñĩ atṭo ṭhocma a'crratyenan at-snañeṭhno. Ñeñto'marña allempo coṭa'huanemñ Jesús acheñenesha'pa' ñapa'ṭho'ña allenta coṭa'nman Jesús chenta' pa'che'ñoṭ. Atṭoña allpa' a'ṭlla'nmoñ pa'shtam.

²⁸ Tarro'mar ñapa' atet coṭape'chen pueyoṭhro: "Ama't pa'shtama na'ṭlloñpa' ñeñĩachca' na'crraterre'."

²⁹ E'ñe a'ṭlla'hue' pa'shtampa' allorocmuepa'tcha' maserrña po'rras. Ñapa' e'ñe eñotena po'chtso o' metueña ñeñĩ mueroṭhtatene'.

³⁰ Jesúsñapa' eñotnoñ e'ñe ña po'huamencoṭpa' o' a'crratnoman puesheñarr atсна'ñeṭ. Ñaña'apa' allenta puerraperra alla acheñenesheñeñ ñeñĩ coṭa'huanene', allñapa' atet otanet:

—¿Esesha'tña o' a'ṭlla'nmuena neshtamoṭ?

³¹ Pueyoṭhresha'ñapa' atet ochet:

—Pentente' shonte' acheñenesha' ñeñĩ allotemeña peto'mama'tnene'. Eso'mare'tña ṭpotenña esesha'te' ṭpa'ṭllene' peshtamoṭ.

³² Jesúsñapa' alla cohua'yesanet o'ch entan ñeñĩ a'ṭllene' pa'shtamoṭ.

³³ Ñeñĩña coyanesha'pa' ñapa' o' eñotnoma Jesúsca'yeña o' a'crratnoñ. Ñaña'apa' ṭcha pa'shmuena po'yorñoṭ allempoñapa' concorposa Jesús pa'rrṭoṭ. Allñapa' e'ñe a'meṭa'nman ora allpon ñeñĩ po'ñoch atet coṭape'chen.

³⁴ Jesúsñapa' atet otapan coyanesha':

—Papa' nesñeshacha' atṭo atarr peyemtenna na, atṭoña te'pa' o' e'ñe na'crratnomueṭ. Te'ñapa' o'ch ahuerreṭ peñmañesha', tarro'mar amach alla mueroṭhtaterrperro at-snañets.

³⁵ Allempo eñorena atetpa' allñapa' huaṭha'ta ñeñĩ huetsa añcha'taret Jairo pa'paclloṭ. Ñetña huapuetpa' atet otoset Jairo:

—Peseña' o'ca'ye rroma. Te'ñapa' amach allo'na ṭpatsrre'moṭhtana'tatsche Maestro o'ch coṭerreṭ pepaclo.

³⁶ Jesúsña ama't e'man atet otoset Jairopa' ñaña'apa' atet otan Jairo ñeñĩ añcha'tareṭtetsa judionesha' po'prahuo:

—Papa' amach ṭcha pe'charrtatatsto peyoṭher, nachña e'ñe peyemta.

³⁷ Jesúsñapa' añña muenat Pedro ñaña Jacobo ñaña pa'mo'nasheñ Juan. Ñeñĩach coṭa'nmue'.

³⁸ Allempoñapa' ahuanmuet añcha'taret Jairo pa'paclo. O'ña ṭhaṭha'tet allpa', allñapa' entoset shonte' acheñenesha' ñeñĩ ano'tatse'tets, all yahuanrrortenet, atarr ya'na'teñet arromñaṭ.

³⁹ Jesúsñapa' be'tosos pocollo, ñaña'apa' atet otosanet:

—Sapa' eso'mare'tña atarr sano'tatsen, ṭcha atarr seyhuanrrortena. Añ shopshe-sha'pa' amaca'ye ṭhoye' rromueno, ṭhaca'ye muen.

⁴⁰ Ñetña pachmare'teñoṭetpa' atṭa che'tatsetyesapet tarro'mar ñetpa' e'ñeca'ye eñotenet ṭhoca'ye rromuen. Allempoña Jesús'pa' ṭcha'nmaṭha'tatosan allohuen acheñenesha' pocolloṭ. Ñaña'apa' be'tosos o'pono allo'tsen shopshe-sha' ñeñĩ rromuets. Ñapa' añña muenatos arromñaṭ puepapar ñaña pachor ñaña ñeñĩ coṭa'huanene', ñeñña epuet be'tosṭha'toset allo'tsen arromñaṭ.

⁴¹ Allempoña Jesús'pa' rromota'tosan shopshe-shañ pototpa' atet otos e'ñe ña po'ñoño:

—Talita cumi—ñeñĩ yoten ya yeñoño: O'ch nesñeṭolle notoseṭ te'pa' ṭhoṭpa tanterrtsa.

⁴² E'ñe otue' atetpa' allentepa'tcha' tanterra, čha chope'cherrets. Ñehua, ñeñt' shopshe-sharpa' čharrá' puechena epa po'charña. Allohuenetñapa' čha atarr cohuanrrorteñet.

⁴³ Allempoña Jesúsapa' atet otanet:

—Po'ñočh te'pa' amach esesha' señoatatsto ama't e'ñe puesheñarra.

Alla oterraneterr:

—Te'pa' serratallme'cherñaca'ye.

6

Allempo serrpare'tatan Jesús acheñenesha' all Nazareto

(Mt. 13.53-58; Lc. 4.16-30)

¹ Jesúsña ahuerrerr allotpa' o' alla čherrerr pa'nyo all Nazareto. Pueyochresha'ñapa' alla coťa'huanererr.

² Allñapa' allempo čherr yet allempocma amesenet, ñañapa' arr yečhatuerraneterr judionesha' po'prahuo. Shonte' acheñenesha' ñeñt' e'mñotapuerre' atet serrpare'tatuerranet all, ñetñapa' nanac cohuanrrortapueret, allempoñapa' atet otyeset ñocop:

—Ñapa' errahuañaca'yeña eñotanña ora allohuen ñeñt' atet pa'yena. Esesha'huañaca'yeña eñotatene'ña attoť orrtatenan partsoteñets. Errotuaca'yeña huenaña ñeñt' eñoteñtsor ñeñt' orrtatyen ña.

³ Ñapa' añaca'ye ñeñt' po'taruas pene' o'ch torrenana tsach attoch es yečcatyen pa'namen. Ñapa' añaca'ye María puechoyor. Pa'mo'nasheñpa'čo'ña añaca'ye Jacobo, José, Judas, ñaña Simón. Ñaña po'čhanesha'pa' e'ñeca'ye yechme'tenanet, parro'marneshayarramche'.

Ñeñto'marña all e'ñe ña pa'nyopa' ama eseshaye' acua'penaye entenaye.

⁴ Allempoña Jesúsapa' atet otanet:

—Ñeñt' a'mtene' Yompor po'ñoñpa' čhocmaca'ye añcha'na'tpo' entyeñña allohuen acheñenesha'; arrña pa'nyo allo'tsen e'ñe ña pamo'tsna'tarnesha' ñeñt' e'ñe pamo'tsna'tar penpa' ñetñapa' ama acua'penaye' enteñeto. Ama't ñaña ñeñt' parro yečhenet pa'pacleto, ñetpa'čo'ña ama acua'penaye' enteñeto.

⁵ Ama ame'ñeñeto ñeñto'marña allpa' ama atonocheye' orrtataneto po'partsoña. Allpa' aña orrtatyen attoch a'plla'yenan puesheña'tets atснаñeť allpa' attoca'yeña a'crratenanet.

⁶ Ñeñto'marña Jesús atarr coťape'chateñ pamo'tsesha' atto ñetpa' ama acua'penaye' enteñeto, ñapa' čha muene' llecateñet. Allempoña Jesúsapa' alla chopeñe'chyerrerr yečhatyerrtserr allemeñ anetso'mar.

Allempo Jesúsapa' llesensan pueyochresha' o'ch ahuanemyeset allcha' serrpare'tyeneta'

(Mt. 10.5-15; Lc. 9.1-6)

⁷ Allempo čhapa'muen allempo Jesús agota'muenan pueyochresha' čharrasheña ñeñt' puechetsa epsheña. E'ñe apčha'huet ñeshopa' ñañapa' apanet llesens attoch quečhpatyeset oneñeťečhno atto chorra'yenana acheñenesha'čhno. Attoña llesensanet ñetpa' o'ch ahuanemyeset e'ñe epsheña'ttsocmuet.

⁸⁻⁹ Ñaña atet otapanet:

—Ñerra'm o'ch sahuanmapa' amach es sanmatsto ama't coñe'ta allcha' sechopeñe'chyeyes—ama't sebolsa, ama't ñeñt'cha' serra'yenom, ama't sečllayora. Ama't e'ñe epma seshtampa' amach sanmatsche. Añach sanem secarr, sena'nomcha' ñaña sesapat.

¹⁰ Alla oterraneterr:

—Ama't errach pocollro sečhap allach sommosa allponmat esempohuach ahuerrerr po'poñ anetso.

11 Ñerra'm erra anetsro ñeñt̃ allo'marnesha'ña ama cohuenaye' agapaseto ñerra'm amach mueneto o'ch e'mñotapasetpa' o'ch semterrrer ñaña allot. Ñerra'm allempo semterrrer ñaña allot, ñeñt̃ña setco'tsa'yen pañe'te' patspa' choch sepa'shetca'tyesnomña setac. Attochña allo'marnesha'pa' o'ch señotatnomanet ñetpa' amaca'ye pocteye' entenanetoña Yompör. Po'ño'ch o'ch notas: Esemphuañen allempoch acrare'tetuerra allohuen acheñenesha', añña anetso'marnesha' ñeñt̃ ama sagapaye ñetñapa' atarrcha' a'coñchatare'terret. Elloch metana'tueret ñeñt̃ atto a'coñchatare'terra sodomo'marnesha' ñaña gomorro'marnesha'.

12 E'ñe ñeñt̃ña otare'tetuetpa' ñetñapa' allenta ahuanmuet o'ch chopeñe'chyeset eracmañen anetso'mar. Allñapa' serrpare'tyesnomuet ñeñt̃ poctetsa allohuenacop o'ch cotape'cherret ello cohuen Yomporecop.

13 Ñaña all chopeñe'chyeset erracmañenpa' ñetpa' allña quechpatyeset shonte' oneñe'te'chno atto chorra'yenana acheñenesha'chno. Ñaña shonte' po'potantañe'chno acheñenesha' ñeñt̃ atsna'tyets all, ñetñapa' a'yana'tyesoset atsnañe'te'chno olivoso'yo* e'ñe a'crratyesoset.

Allempo e'ñe cohuen es orrtatyes Jesús, Herodesña'pa' cha otapañ Juanañe' o' tanterra ñeñt̃ apataye't acheñ Yomporecop
(Mt. 14.1-12; Lc. 9.7-9)

14 Allempoña añcha'tare't Herodes ñaña'pa' atet e'mare'tenan Jesús ñeñt̃ atet pa'yena, tarro'mar Jesús allohuen acheñenesha'pa' e'ñe e'mare'tueñet ñeñt̃ atet pa'yena. Ñaña'pa' atet ot:

—Añepa'tca'yeña Juanañ ñeñt̃ apataye't acheñ Partsocop. Ta'mca'ye cha'te' tanterraña rromot. Ñeñto'marepa'tca'yeña te'pa' orrtaterranña partsoteñets.

15 Po'potantaññapa' atet otyenet:

—Añepa'tca'yeña Elías ñeñt̃ a'mtaye't Yompör po'ñoñ ahuat̃.

Po'potantaññapa' ñetpa'cho'ña atet otyenet:

—Añepa'tca'yeña ñeñt̃ a'mtene' Yompör po'ñoñ, e'ñeca'ye atet ñerra'm ñeñt̃ a'mtaye't Yompör po'ñoñ ahuat̃.

16 Herodesña allempo e'mare'ch ñaña'pa' atet ot:

—Añepa'tca'yeña Juanañ ñeñt̃ nepechat ahuañmo'cha, chepa'trramche' tanterraña rromot.

17 Ñehua, allempo Herodespa' ahuañmo'chacma rromatenana' Juanañ o' huancachpa' allña yottam̃psach attoch coshatan Herodías ñeñt̃ pa'mo'nasheñ Felipe puetapor. Tarro'mar allempo Herodespa' o'ca'ye puerraterran pa'mo'nasheñ puetapor.

18 Juanañpa' ñaca'ye otaye't Herodes:

—Amaca'ye pocteyaye o'ch peyoram̃pes pemo'nasheñ puetapor.

19 Ñeñto'marña allempo Herodíaspa' atarr e'moñe'tane't Juan, atarr mueneñe't o'ch muetsatacheñ tarraña ama erro't pe.

20 Tarro'mar Herodespa' mecha'na'tane't Juan, eñoche't ñapa' e'ñe pocte' es pa'yese't. Eñoche't ñapa' añecpa'na atarr torrena Partsocop. Ñeñto'mare'naña e'ñe cohuen cohuanm̃psache't allochñapa' amach muetseto. Allempo e'mñotenan Juan atto serrpare'te't atarr cohuen enteñeñ, tarraña ama e'ñeye' eñotenanoña ñeñt̃ atet cotape'chateñ Juan e'ñe cohuen.

21 Atteñapa' chapa'muen pamtarr allempoch Herodías eñoteñ attotcha' muetsateran Juan. Ñeñt̃pa' tarrempo atet pa' allempo chapa'muen Herodes pue'ñalletño ñeñt̃ puerrollar pen Herodías. Allempoña Herodespa' hua'ñatyesan acheñenesha' ñeñt̃cha' rrallme'chapretenaya'. Añ hua'ñatyes ñeñt̃ añcha'tare'te'chno ñaña ñeñt̃ solltar po'ca'tanrenesha' ñaña ñeñt̃ atarr ec'llayore'tenesha' ñeñt̃ galileo'marnesha'.

* 6:13 Olivo ñeñt̃ tsach allot yoreñet puerets pue'merot̃.

²² Allempo rrallme'chetpa' allña be'tososña ñaña shopshesha' ñeñt' Herodías puechoyor. Ñaña' allña tancsare'tosa. Herodesña' ñeñta atarr cohuen ent ama't ñaña ñeñt' ahua'ñare'techno. Ñeñto'marña añcha'taret Herodespa' atet otan shopshesha':

—Ama't erra'tsena penamuenenpa' napa' napa'pcha'.

²³ Elloña' e'ñe Yompor pa'so'chño nan po'ñoñ, allempoña' alla otererr:

—Po'ño'chca'ye napa' ama't es penamuen napa' napa'pcha' ama't pueshmet nepatseñ all na'mcha'tarettena.

²⁴ Allempoña shopshesha'pa' cha'nerr ahuer pachoresho, atet otosan pachor:

—Ta'm ¿escha' nenañña añcha'taret?

Pachorña' atet och:

—Añcha' penañ Juan poñ ñeñt' apataye't ahuaña acheñ.

²⁵ Allempoña shopshesha'pa' materra alla añcha'taret Herodesesho atet otuerran añcha'taret:

—Napa' añ nemnen o'ch pepechennana' Juan poñ ñeñt' apataye't acheñenesha' o'ch penon platopa' o'ch paphuerren e'ñe arrma.

²⁶ Allempo enamhue shopshesha' Juan poñpa' añcha'taretña' cha lleca. Tarraña ama't llecaña' o' nohuanña po'ñoñ huomenc e'ñe Yompor pa'so'chño ñaña allo'tsa'yen ñeñt' hua'ñen ñeñt' e'muene' atet oten ñeñto'marña chocmach a'pocatan po'ñoñ atet otuan ñorra' shopshesha'.

²⁷ Allempoña' allenta otan po'solltarer:

—Te'pa' o'ch pepecheñña' Juan poñ all neyottam'psateñ; poñña' pehuapater arma.

²⁸ Solltarña' allenta ahuo' pechenana' Juan poñ, o' huapater plato, aphuerran shopshesha'. Shopshesha'ña' apuenana' ñaña pachor.

²⁹ Allempoña Juan pueyochresha'pa' o' e'mare'chet o' pecheret pa'yochresha'teret Juanañ, allempoña ñet ahuanmuet all pecheret Juanañ allempoña ñetpa' ereta' apecharet o'ch pampueñeta'.

Allempo Jesús'pa' rratenan shonte' acheñenesha'; ñeñña' acheñenesha'pa' allo'tsen amnaro'ch mil

(Mt. 14.13-21; Lc. 9.10-17; Jn. 6.1-14)

³⁰ Attotaña'pa' o' cha'cherr ñeñt' llesensen Jesús. Ñetña'pa' serrpare'tatueret Jesús allohuen ñeñt' atet pa'yeset. Serrpare'tatueret ñaña atet ye'chatyeset acheñenesha' Yompor po'ñoñ.

³¹ Jesúsña'pa' atet oterranerr pueyochresha':

—Te'pa' o'ch ahuey e'ñe yaptoche' all ama'acheñempa'ñoyaye; sapa' allcha'ña samesuerr allponmat.

Ñeñt' allempopa' atet otan Jesús pueyochresha' tarro'mar allempo shonte' acheñenesha' ñeñt' hua'cha'tyetsa ñaña ñeñt' chocma ahuanemyetsa ñeñto'mar ama't mameshapa' ama eshcaye' rreneto.

³² Allempoña'pa' e'ñe ñaptochayet ahuanmam'pset noñto, o'ch ahuanmuet all ama'acheñempa'ñoyaye all otenanet Jesús.

³³ Allempoña shonte' acheñenesha'pa' alla enterraneterr all oñmam'penet. Allempoña achme'tare'tapuetpa' acheñenesha'ña'pa' o' alla matrra'terrerr allohuen ñeñte anetso't. Ñetña'pa' patso'mara oñma'cha'tet ñanmacmueta cha'cha'tet all sechena Jesús pueyochreshohuen.

³⁴ Allempoña sehuosa Jesús allpa' alla entuerraneterr o' alla shonta'huerrerr acheñenesha'. Atarr nanac muera'huerraneterr Jesús, tarro'mar ñetpa' e'ñe atet entuerraneterr ñerra'mrrate' carrnero ñeñt' ama acuan'psare'teyaye. Allempoña Jesús'pa' alla ye'chatuerraneterr pa'namen esocmañen ñeñt' Yompor po'cohuenña.

35 Atteñapa' ellerren pueyochresha'ñapa' oteñeta' Jesús:

—Te'pa' arro'tseney all ama acheñempaño'yaye ñaña o'ca'ye ellerren.

36 Te'pa' o'ch p'och acheñenesha' ahuanemyerretepa' anetso'mar allcha' rañña'yesserret puerraret ñeñtcha' rra'yesserret tarro'mar arrpa' ama es eñalle.

37 Tarraña Jesúsñapa' otan pueyochresha':

—Sachca'ye apa'yeshahuet ñeñtcha' rret.

Ñetñapa' atet ochet:

—¿Añe't pemnen o'ch ahuey o'ch yepomuena' shonte' quelle ñeñt doscientos denario† alloch yerañtēna' pan ñeñtcha' yerratuerranet allohuenet?

38 Jesúsñapa' atet otterraneterr:

—Ñehua, secua' pan, ¿errponte' sechen?

Ñetña cohuet panpa' atet otereterr:

—E'ñeca'ye amnara pan eñall ñaña epatoll cac.

39 Allempoña Jesúsapa' atet otan acheñenesha':

—Te'pa' o'ch sanorrcha'tyes e'ñe sopa'ttsocma e'ñe all cohuen emmo'ratyen pasetma'.

40 Ñetñapa' atetcho' pet. Anorrcha'tyeset e'ñe ñopa'ttsocmuet—charrasheña'ttsocma charrapa'tets ñaña amnarsheña'ttsocma charrapa'tets ñeñt anorrcha'tyesets.

41 Allempoña Jesúsapa' agapan ñeñt amnar pan ñaña epatoll cac, cohua' enonet parasyoso'tamñsan pan. Allempoñapa' shota'tan panpa' apanatyesan pueyochresha', ñetñapa' epatyaset allohuen acheñenesha' ñeñt anorrcha'tyets all, e'ñe epa'huet. Ñaña shetse'tan cac attoch epatyesanet allohuenet.

42 Allempoñapa' o' rrallme'chet allohuenet e'ñepa'tcha' yetrra'tuahuet.

43 E'ñe yetuahuetpa' elloña cha a'pchatyaset cac ñaña pan ñeñt ashota'tyesaret. Ñeñña a'yapa'cherretepa' chepa'tcha' chorrerrets charra' puechena epa cañter.

44 Ñeñña rrallme'chats atarr shonte' acheñenesha' allo'tsen amnaroch mil ñeñt e'ñe yacmaneshoche'.

Allempo Jesúsapa' e'ñe cohuen chope'chnen enot oño

(Mt. 14.22-27; Jn. 6.16-21)

45 Allempoña Jesúsapa' otan pueyochresha':

—Te'pa' o'ch sa'tacha't noñto o'ch sota sanom o'ch se'pchaterra yot o'ch se'cherr anetso ñeñt pa'so'cheñ Betsaida.

Allempoña Jesúsapa' o' so'tnoman acheñenesha'.

46 So'tuanmanetpa' ñaña' ahua' aspento, allcha' ma'yochosa.

47 Atteñapa' o' tsapuen, ñapa' allo'tsenara e'ñe ñapuet aspento. Noñtpa'cho'ña ñeñña rrochaso'tsenara sa'po.

48 Alotña entenan pueyochresha' ñeñt noñto'tsa'yen. Ñetñapa' e'ñe po'muerochenñoteta echotnenet oñ tarro'mar orrnoñapa' cha a'puerrame'tamñpanet. Atteña allempoña puetarenmochpa' huenanet Jesús cha chope'chnen enot oño. Ahua'ch metanenanetañ,

49 allempoña pueyochresha'pa' entapueñet cha chope'chnen enot oño. Ñetñapa' cha otenapuetañ choyeshe'matsste' huapanet. Cha rrannartet puenchañot.

50 Allohuenetpa' e'ñe entuapet nanac yore'tosanet. Jesúsñapa' eñorana'tuenanet, atet otuenanet:

—Choñaca'ye socshapuenna, naca'ye o' nohuapa, amach atta señcha'tatstapno.

51 Allempoña Jesúsapa' a'tapos noñto allo'tsa'yen pueyochresha'. Huomenquēsha'ñapa' chepa'tcha' muetsoñeñtertsa. Ñetñapa' cha atarr cohuanrrortapueñet.

† 6:37 Denariopa' quelle ñeñt allpon tsa'tenet pamtarr ñeñt taruaset all pa'nyo.

⁵² Ama çhenaneto pueyoçhreto ama't atfo Jesús'pa' atontatan pan, amaca'ye es çhenahueto pueyoçhreto.

Allempo Jesús'pa' a'crratyesosan pa'namen atsnañe'čhno all Genesareto (Mt. 14.34-36)

⁵³ Allempoña pechatam'psetpa' arr etsotaset all oteñet Genesareto.

⁵⁴ Allempo sohuača'toset noñtoť, añña acheñenesha' ñeñť allo'tsa'yen, ñetñapa' cheme'tapet Jesús'pa'

⁵⁵ allenta matrra'tyeset ora erracmañen all yeča'yena acheñenesha'. Atfoťca'yeña huapatañpesyesoñetña atsnañe'čhno allemateñ. Ama't erra e'mare'teñet o' çhap all, allcha'cho' anmoñetña patsnañe'fer puechecnape'na.

⁵⁶ Ama't erra çhapyen all shontena acheñenesha' ñaña ñerra'm arr çhen all ama tama eñalle acheñ, ama't allecma oñen acheñenesha' ñetñapa' allcha'cho' na'yeneta' patsnañe'feret allcha' enamapet ama't poso'moťa o'ch a'płlaponet pa'shtam. Allpon ñeñť a'płla'yepue' Jesús pa'shtampa' allponçho' e'ñe corra'yepuerřtsa.

7

Atfo Jesús'pa' eñotatenanet ama ańeye' ya'sosyatenaye Partsocop ñeñť yerra'yen yenamot (Mt. 15.1-20)

¹ Allempoña allpa' huača'toña fariseonesha' epuet ñaña puesheña'tets ñeñť huaçheta Jerusalénoť ñeñť atarr etsotayenayeñ ñoñets ñeñť atet anaret judioneshacop.

² Ñetña allpa' entosñañet Jesús pueyochresha' atfa rra'yenet ama e'pota'tyeneto pot Partsocop allempoch rrallme'chet.

³ (Ñehua, allohuen fariseonesha' ama't ñaña allohuen judionesha' ñetpa' atet yeçhenet amach rreneta'pa' o'ch e'pota'tyeset Partsocop. Tarraña ñeñťpa' pa'tañneshaña yeçhatnomahuet.

⁴ Ñaña po'poñ ellonetpa' atet yeçhatanete't pa'tañneshañ ñerra'm esempo huerret allotecma pomatsre'tyenet, amach rreneta'pa' çhoch ñanom a'cohuentatenetañ Partsocop. Ñaña shonte' po'poñe'čhno ñeñť e'ñe yeçhatyesanete't pa'tañneshañ. Ama't ñeñť porret pa'yenet ñaña po'pajoçhnetpa' çhochña e'ñe e'pame'tyeñetañ Partsocop, e'parro'tyenetañ ama't ñaña pa'srerroga'čhno Partsocop. Ama't ñaña all pñanrame'tyenet e'ñech e'pata'tueñetañ Partsocop.)

⁵ Añña fariseonesha' ñaña ñeñť atarr etsotayenayeñ ñoñets ñeñť atet anaret judioneshacop ñetña allempo entosñañet Jesús pueyochresha' atfa rra'yenet ama e'pota'teneto Partsocop ñeñťo'marña ñetpa' atet otoset Jesús:

—Peyochresha'çhnoñapa' eso'mare'tña ama esesha' yeçhenayeña ñeñť atet yeçhe't yatañneshañ. Ñetpa' atfa rra'yenet ama e'pota'teneto Partsocop allempo rrenet.

⁶ Jesús'ña'pa' atet otanet:

—Sapa' atarruaca'ye ommoñañeshaste'tarro'mar atarr seshcare'ten, amaña Yompor-eye' sesherbena. Isaías'pa' e'ñe cohuen a'mtane't Yompor po'ñoñ, saña te'ñapa' e'ñe atet sepena atet ote't allempo atet ot Yompor:

Ñeñť acheñenesharpa' e'ñe puenamoťa cohuentatennanetañ; pueyoçhretoñapa' ama çhenaneto ñeñť cohuen nenten na.

⁷ E'ñe orrena ma'yochennet, ñeñť atet yeçhatannenetpa' ñeñťpa' e'ñe acheña naye't ahuat poçta'pña.

⁸ Jesús'pa' alla otarraneterr:

—Sapa' çhaca'ye sequeçhpuenña ñeñť atet oteney Yompor ñeñťcha' atet ye'pa'yen cohuen; sapa' añaca'yeña atarr setsotayen ñeñť atet yeçhatyesnomues sa'tañneshañ;

ñeñña atet sepa'yen orrotechno e'pame'tyese' ñaña sepajochno. Ñaña po'poñechno pa'namen sepatse'tyeneñ ñeññ soten Partsoçpaño'.

⁹ Jesúsapa' alla oterraneterr:

—Sapa' añaca'ye atarr señoten attoch sehuapore'toñ Yompor po'ñoñ ñeññ atet oteneñ ña ñeññcha' atet yeña cohuen; ñeñño'marña sapa' e'ñe ña setsotayen ñeññ yeçhatyesnomues satañneshañ.

¹⁰ Ñehua, Moisésapa' atetca'ye ote't: “Semorrenteño'tpa' semcha'na'chcha' sompor ñaña sachor.” Elloña ñaña po'poñone'tpa' atet ote't Moisés: “Ñerra'm esesha' sasare'tene' pompor ñaña pachor ñeññpa' muetsetepa'.”

¹¹ Tarraña sañapa' atet sotyen ñerra'm esesha' atet otene' pompor ñaña pachor: “Ñeññ nechen o'ch napapeña' tarraña amach napape te'pa' o'ch nene' Yomporecop ñeññ otenet Corbán”,

¹² ñeññña acheñerpa' sañapa' atetcha' soteñ: “Pocoppa' ama pallteno o'ch es pa'p pamo'mte'.” Attoña sapa' ama semnateñe ñeññ acheñer e'ñe ña puemorrenteño'tpa' o'ch es apuenan pompor ñaña pachor.

¹³ Attoca'yeña sehuapore'teññaña Yompor po'ñoñ allochñapa' e'ñech ña setsoten ñeññ e'ñe sa seycheña. Ama't ellone'tpa'cho'ña shonte' po'poñechno ñeññ atet sepatse'tyena pa'namena'tsocma.

¹⁴ Allempoña Jesúsapa' chore'tan acheñenesha' ñeññ shontetsa, ñetñapa' atet otanet:

—Sañapa' po'ñoñ allohuenes e'ñepa'chña cohuen se'mñnoten allochñapa' attoch e'ñe cohuen çhaponasa seyoçhro.

¹⁵ Ama a'ye' ya'sosyatene' Partsocop ñeññ yerra'yen. Añca'yeña ya'sosyatene' e'ñe ya yocape'chatse'teño't ñeññpa' yeyoçhrotca'ye huena.

¹⁶ Ñeññes po'ñoñ ne'mñotene' çhaponasepa'ch seyoçhro ñeññ atet netma'ntatensa añ ñoñets.

¹⁷ Allempoña Jesúsapa' sa'nerran acheñenesha'pa' ñaña' be'tosuerrerr pocollo allña pueyochresha'pa' atet otoset:

—¿Eso'tña petma'ntatyeneña ñorra'?

¹⁸ Jesúsña'pa' atet otanet:

—Sapa'cho'ña e'ñe'tña attecma'sa'ña, ama es sechenoyo seyoçhro. Sapa' ama't señotenoña ñeññ yerra'yen yenamot ñeññpa' amate' errotenot a'sosyatene' Partsocop.

¹⁹ Tarro'mar ñeññ yerra'yenpa' amaca'ye yeyoçhroye' çheno, ya'taca'ye çhen. Ñeññpa' çhocmachca'ye yener a'yo.

Ñehua, ñeññpa' atet eñotateney Jesús allohuen rreñtsoçhnopa' e'ñeca'ye cohuenacma e'ñe arrapahuocma.

²⁰ Jesúsña'pa' alla oterraneterr:

—Añña ñeññ cha'nets yenamot ñeññ atto yeñosatse'tyen ñeññpa' e'ñe yeyoçhrot huena ñeññña çhocma ya'sosyatene'ña Partsocop.

²¹ E'ñe yeyoçhrot huena cotapñats ñeññ ama't mameshapa' ama cohuenayaye, ñeññpa' añ: çhetapretanna'teñets taporets, cañoresha'teñets, muetsanna'teñets,

²² etatsre'tyeñets, ye'çhapretanna'teñets, atsrre'mueñets, shecare'tanna'teñets, otatse'teñets, moparrñats, sasare'teñets, ommo'cheñets, otatse'teñets.

²³ Ñeññ allohuen sosya'tsañechno ñeññpa' yeyoçhrotca'yeña huena, ñeññca'yeña ya'sosyatene'ña Partsocop.

Atto puesheñarr coyanesha' ñeññ ama judioneshayaye ñapa' atarr yemtapana Jesús (Mt. 15.21-28)

²⁴ Allempoña'pa' ahuerrerr Jesús allotpa' alla çhap allampaño anets Tiro ñaña Sidón. Allempo çhap all pocollopa' ñapa' mueneñeñ e'ño'ch a'nahua çhapañ. Tarraña ama errotenot çhapo a'nahua,

²⁵ tarro'mar e'ñe allempo chap cha e'mare'te' puesheñarr coyanesha' ñeññ achoyoret. Puechoyorñapa' penochor ñeñññapa' cha chorreña oneñeñ. Ñeññña coyanesha' huapapa' rromosa Jesús pa'rrpōt.

²⁶ Ñeññña coyanesharpa' ama judioneshayaye, ñapa' po'poñ acheñ ñeññ sirofencio'marnesha'. All rromosa Jesús pa'rrpōtpa' atet otos:

—Nepapare, pequechpatataye'chapon nechoyor oneñeñ.

²⁷ Jesúsñapa' atet toma'ntatana acheñenesha' ñeññ ama judioneshayaye ñeñño'marña atet och:

—Ñanomcha' ya yacñeñar ya'yeta' tarro'mar ama pocteyaye o'ch yeprratamipes yacñeñar puerrar o'ch yehuapore'tamipes allo'tsen ochec o'ch rre' ñaña ochec.

²⁸ Coyanesha'ñapa' atet otererr:

—Ama't atteñ nepapareshacha'tarraña ama't ochecpa'cho'ña rra'yenan cheshanesha' puerrar ñeññ a'shore'tatyenet po'mesapnacho.

²⁹ Allempoña Jesús pa' atet otererr:

—E'ñe pocte' atet pe'ñorena; e'ñepa't pame'ñenna. Ñeñño'mar te'pa' o'ch ahuerreñ e'ñe peñmañesha', te'ña oneñetpa' o' quechpa'nerrnañ pechoyor.

³⁰ Allempoña coyanesha'pa' ahuer pa'paclo, o' cherrpa' alla entuerran puechoyor alla panena e'ñe cohuen po'mayo, oneñeññapa' o' quechpa'ner.

Allempo Jesús pa' a'crraterran paquet ñeññ opanatets

³¹ Allempo puerrerra allot ñeññ allampañoñ Tiroñ, arr oñemhuanom anetso Sidón allot ñaña po'poñ anetso Decapoliso'mar. Attoña o' alla ahuer sa'ponet all Galileyas.

³² O' cherr allpa' huapaterrñañeterr puesheñarr yacma ñeñññapa' paquet ñaña ama e'ñeye' cohuenaye' eñeno. Ñeññña huapate'pa' atet otosan Jesús:

—Añecopca' nehuapateñ o'ch pa'pñle' potoñ attoch correrra.

³³ Jesúsñapa' allenta anemñ ñapueñ a'yenet, allñapa' esho'tosan potañ paquet pueto; ñaña o' senmare'pa' o' alla a'pñlerrñañer ñaña pueñeñ.

³⁴ Allempoña Jesús cohua' enonetpa' enara. Allempoñapa' atet ot e'ñe ña po'ñoño:

—Efata —ñeññ yoten yeñoño: Pota'nerrepa' pet allochñapa' o'ch pe'muerra e'ñe cohuen.

³⁵ E'ñe otue'pa' cha pota'nerrets puetpa' e'ñe cohuen e'muerra. Ama't ñeññ echarrtatene' pueñeñpa' o' a'rroyer cha eñorerrtsa e'ñe cohuen.

³⁶ Jesúsñapa' atet otanet:

—Te'pa' amach esesha' sotañsa'tatsto ama't e'ñe puesheñarra.

Ama't atet otanetañ elloña ñetpa' a'metare'teñet.

³⁷ Allñapa' atarr nanac cohuanrrorteñet, atet otyenet:

—Jesús pa' atarro'trra cohuenña ñeññ allohuen atet es pa'yen. Ama't paquetnesha'pa' chocma e'ñe cohuen e'matuenanet. Ama't ñaña opananesha'chnopa' chocma e'ñe cohuen eñoratyenanet.

8

Allempo Jesús pa' rratenan shonte' acheñenesha' ñeññña acheñenesha'pa' allo'tsen pa'tatsoch mil

(Mt. 15.32-39)

¹ Allempoña po'pocheño shonterrerr acheñenesha' Jesúsesho. Allempopa'cho'ña ama eñalle ñeññcha' rret. Ñeñño'mar Jesús pa' agotan pueyochresha'pa' atet otapanet:

² —Napa' cha atarr nemuereña allohuen acheñenesha' ñeññ shontetsa arr. O' ma'pamtoset nesho ama eñallmeñeto ñeññcha' rret.

³ Ama pocteye' nenteñe o'ch ahuanerret e'ñe pa'chporrñesha' te't ama a'ñshe'mterreto toño tarro'mar patanta'tetspa' atarr ba'chayot huapyenet.

⁴ Pueyochresha'ñapa' atet ochet:

—Errahuachca'ye yentña rreñetsē' ñeñtcha' yerrach shonte' acheñ arrpa' amayaca'ye.

⁵ Jesúsñapa' atē oterraneterr:

—Sapa' ¿errpona't sechenña pan?

Ñetñapa' atē otereterr:

—E'ñeca'ye cançhrra yechen.

⁶ Allempoñapa' otan acheñenesha':

—Te'pa' sanorrcha'tyes patso.

Allñapa' agapan ñeññ cançherr pan. Agaphuepa' o' parasyoso'tenanerr Pompor alloñapa' o' shota'tan pan, apanatyesan pueyochresha'. Ñetñapa' o' epatyaset ñamet allohuen acheñenesha' e'ñe epa'huet.

⁷ Apuanet panpa' eñall ñaña pate'tets cacatollesha'. Jesúsñapa' alla parasyoso'tamperranerr ñaña cacatollesha' allempoñapa' oterranerr pueyochresha':

—Sepatyerraneterr ñaña cacatollesha'.

⁸ Allempoñapa' o' rrallme'chet allohuenet, e'ñe yetrra'tuahuet. O' e'ñe yetuahuetpa' cha a'pchatyaset ñeññapa' a'yapaçheret. Ñeñña a'yapaçherretpa' chepa'tcha' chorrats cançherr cañter e'ñe tamo'yare'.

⁹ Ñeññ rrallme'chats atarr aton acheñenesha' ñato' allo'tsente' pa'tatsoch mil acheñenesha'. Allempoña Jesúsapa' so'tnerran acheñenesha'pa' ahuerr,

¹⁰ a'tapos noñño pueyochreshohuen ahuanmpset o'ch ahuanmuet anetso ñeññ pa'so'cheñ Dalmanuta.

*Atto fariseonesha' enamaset Jesús gatapanetepa'to' po'partsoña
(Mt. 16.1-4; Lc. 12.54-56)*

¹¹ Allempoña Jesúsapa' huaçherrñañerr ñaña fariseonesha' ahuo'ch otnare'chet Jesús. Ñetñapa' cha mueneñet o'ch topachet Jesús. Ñeñño'marña atē otoset:

—Yapa' añca'ye yemnen o'ch pegatapuey pepartsoña entoñ allochñapa' attoch yeñotosep po'ñoçh pãpa' Parets Puechemerep.

¹² Jesúsñapa' allenta enara cha muene' po'poñ entanet pueyoçhro ñeñño'marña atē otanet:

—Eso'marte'ca'ye acheñenesha' ñeññ corra'yetsa te' ñetñapa' aña atarr e'nenet o'ch norrtatanet nepartsoña entoñ. Po'ñoçhca'ye na te'pa' o'ch notas, ama't coñe'ta amach es negataneto.

¹³ Allempoña Jesús sohuanerranetpa' a'taphuerr noñtopa' ahuanmpes, pechaterra yomta'n.

*Atto Jesús toma'ntaterraneterr ñeññ po'chaser pen fariseonesha'
(Mt. 16.5-12)*

¹⁴ Pueyochresha'ñapa' cha puesnomuet o'ch anmuet pocrrañ, noñtopa' ama es eñalle ñeññcha' rret, e'ñe pañrra pan eñall.

¹⁵ Jesúsñapa' alla toma'ntaterraneterr, ñeññapa' atē otanet:

—E'ñech señoña ñato't semeñe'teña'ña fariseonesha' ama't ñaña Herodes po'chaser allo tsetenet pan.

¹⁶ Ñetña cotape'chyasetpa' atē otanna'tyaset:

—Amaca'ye yechenoña pan ñeñño'marte'ca'yeña oteneñ año'ch yemeñe'tatscheña fariseonesha' po'chaser.

¹⁷ Jesúsña allempo eñotanet atē cotape'chyenet ñañaapa' atē oterraneterr:

—Eso'mare't sellquēñesha' sotanna'tyena año' eñalle ñeññcha' serra'. ¿Ama't señoñe? ¿Ama't chennasoña seyoçhro? Teme'ttsena't se'charrtatenña seyoçher.

18 Sapa' ama't aclo'yeteseñpa' chaca'ye sottena ñerra'mrrate' ama senteno. Ama't etateseñpa' chaca'ye sottena ñerra'mrrate' ama se'mueno. Ama't mameshapa' are'tña es seyerpueno.

19 Ñehua, ahuaña allempo neshota't amnar pan e'ñeca'ye epa'hua amnaroch mil yacmanesha'. Ellopa' ¿errpona'tña sapcha'huerrña ñeñt ashota'tyesare't allempo e'ñe seyetua? ¿Errpona'tña cañter se'chorrerr?

Ñetñapa' atet ochet:

—Charra'ca'ye puechena epa cañter.

20 —Ñaña allempo neshota't cancherr pan pa'tatsoch mil acheñ ñeñt rre' ¿errpona'tña sapcherrerrña ñeñt ashota'tyesare't allempo e'ñe seyetuerrerr? ¿Errpona'tña cañter se'chorrerrerr?

Ñetña atet ochet:

—Cancherrca'ye cañter ye'chorrerrerrña allempo.

21 Jesúsñapa' alla oterraneterr:

—Te'ñapa' ¿ama'tña o' chaponasoña seyo'chro? Ñeñt neñotatenes ñeñtapa' ama serrarec-paye' notenso.

Allempo Jesúsapa' a'crraterran aporo'yet all Betsaido

22 Allempoña cha'cha'tet anetso Betsaido, allñapa' huapaterrñañeterr aporo'yet, ñeñtapa' atet otoset Jesús:

—Añecopca'ye yehuapateñña o'ch pa'pñlacle'chap attoch pecuater.

23 Allempoña Jesúsapa' echa'nman aporo'yet pototpa' aneñ a'yenet all ama eñalle pocoll. Allñapa' a'yacle'chos pa'snemo, attoña a'pñlacle'chos, allñapa' atet och:

—¿Ama't coñe'tapa' ama't o' pento?

24 Aporo'yetña cohua'yestsapa' allenta otan Jesús:

—O'ca'ye nent acheñ alla chopeñen tarraña e'ñe atet nentyenanet ñerra'mrrate' tsach tom'cha'tyets.

25 Jesúsñapa' alla a'pñlacle'chererr, aporo'yetñapa' cohua'yerrtserrpa' chepa'tcha' e'ñe cohuenterrtsaña pa'cñle'. E'ñe cohuen es entyesuahuer allohuen.

26 Allempoña Jesúsapa' atet och:

—Te'ña ñerra'm o'ch ahuerre'p pepacñlopa' tarraña amach pñmatsterroña anetso'mar, allochñapa' amach esesha' pñotap'sa'tatsetnerro ama't e'ñe puesheñarra.

Atto Pedropa' otan Jesús, p'apa' p'aña Yomp'or Puechemere'p ñeñte'p Cristotosets (Mt. 16.13-20; Lc. 9.18-21)

27 Allempoña ahuererr Jesús pueyochreshohuen. Arr sechenet all oteñet Cesarea ñeñtara Filipino allcha' chopeñe'chyeneta' all anetso'mar. Allña toñopa' a'pñto'tnoman pueyochresha' ñeñtapa' atet otnomanet:

—¿Erro'tena't otyenenña allohuen acheñenesha', napa' eseshante'?

28 Ñetñapa' atet otyeset:

—Patantarr acheñenesha'pa' atetca'ye otyenpet p'apa' Juanañpo'te' ñeñte'po' apatañtatset Yomporecop. Po'potantañña'pa' atet otyenpet p'apa' Elíasopo'te'; po'potantañña'pa' atet otyenpet p'apa' añe'po'te' po'psheñeñ ñeñt a'mtaye't Yomp'or po'ñoñ ahuat.

29 Allempoñapa' alla a'pñto'terraneterr:

—Sañapa' ¿erro'tena'tña sotenenna sa?

Pedroña eñoratsapa' atet och:

—Papa' ñeñte'pca'ye Cristotosets.

30 Allempoñapa' otan pueyochresha':

—Amach esesha' sotap'sa'tatsto ama't puesheñarra napa' na ñeñten Cristotets.

Atto Jesúsapa' eñotatan pueyochresha' ñapa' amtsare'terrach
(Mt. 16.21-28; Lc. 9.22-27)

³¹ Jesúsña e'ñe allempoteñpa' mo'tetnom' eñotatyeshomue' pueyochresha' ñeñ' atet anaret' ñocop, ñeñ'pa' atet otanet:

—Na Ñeñ'ten Acheñetosetspa' atet anaret' nocop, nanaccha' na'mueroçhtataretterra. Amach esesha' pocteye' nenterraye—ama't ñeñ' pompornesha' pen judionesha', ama't ñeñ' pa'm'cha'tareter pen judionesha' po'cornaneshar, ama't ñaña ñeñ' etsotayenayeñ ñoñets ñeñ' atet anaret' judioneshacop—ama't ñetpa' amach eseshaye' neyemterraye. Attochña napa' muetsataterretcha'. Tarraña poma'pamtañoch o'ch alla netanterra.

³² Ñeñ'pa' e'ñe eñotochen otnomanet ñapa' atetcha' a'pare'tterra. Pedroña' allenta anem' a'yenetpa' allña'pa' atet otos:

—Arepach Partseshacha' atteye' perrpeto ama't errponaña.

³³ Jesúsña'pa' alla puerraperra cohuos pueyochresheshonet allña'pa' atet otan Pedro:

—Orrap a'yo neshot oneñe'e; papa' amaca'ye Yomporeye' atet poctape'chatenaye; ñeñ'pa' acheñarramche' poctapña.

³⁴ Allempoña Jesúsapa' agotan acheñenesha' ñaña pueyochresha' ñeñ'pa' atet otanet:

—Ñerra'm esesha' muenene' o'ch co'terrnet na e'ñe po'ñoçh attoch neyochresha' neperranet añ poctetsa sohuanmuete'pa'ña ñeñ' atet muenenet e'ñe ñocpueta ama't e'ñe pocreñohuenet. Attochña ñetpa' o'ch e'ñe toma'nteret ñeñ' chechnene' po'corsoch allcha' mueroçhtet ñamet. Attochña co'terrnet e'ñe po'ñoçh.

³⁵ Tarro'mar ñerra'm esesha' e'ñe añña muenenet o'ch correnet atomat attoch e'ñe coshenet arr patsro, ñetña'pa' çhach a'chencatet ñañeñeta. Tarraña ñerra'm esesha' e'ñe pocte' entene' o'ch es sohuanerret e'ñe pocreñohuenet nocop attoch epatuerret cohuen ñoñets ñeñ'pa' alloch sequeshperra, ñeñ'ña acheñerpa' ñaña'pa' corretsach e'ñe cohuen tayoteñ errponañohuen.

³⁶ Ama't errponena'paren esocmañen es yeyoratsetyes ora allpon ñeñ' yentyen añe patsro, tarraña ñerra'm ñeñ'tach e'ñe ya'chencaterre' yecamquëñohuen, ñeñ'ña'pa' ama't coñe'tapa' amach es sherberrye. Tarro'mar ama eñalle po'poñ ñeñ' atarr sherbets, añña atarr nanac sherbets ñeñ'tcha' a'queshpaterre' yecamquëñ.

³⁷ Tarro'mar yocoppa' ama es eñalle ñeñ'tcha' yepomuerr alloch alla yerañterra yecamquëñ.

³⁸ Tarraña ñerra'm erra'tsencha' nepenquë'naya na te', neñoñpa'çho'ña çha apenco'chen entennanet, napa'çho'ña nepenca'huerranetcha' esempoch nohuerra. Shonte' acheñenesha' ñeñ' corra'yetsa te' arr patsro ñetña'pa' atarr ochña'teneshet tarro'mar ñetpa' po'poña po'yomporer pa'yenet. Tarraña ñerra'm esesha'ch puepenquëño'tetan na amach a'metenneto all, ñeñ'ña acheñerpa' napa'çho'ña çhach nepenca'huera ñerra'm esempoch nohuerra. Po'ñoçh napa' Ñeñ'ten Acheñetosetspa' nohuerrach e'ñe Nompore po'cohuenño' epan ñaña po'mllaño'teñnaneshar ñeñ' e'ñe torra'yetsa Partsocop.

9

¹ Allempoña Jesúsapa' alla o'terraneterr:

—Po'ñoçhca'ye te'pa' o'ch notas, patanta'ttsos ñeñ'tes arro'tsa'yenes te'ña ama't ama serromhuena'pa' o'ch senterrñañ Yompor po'cohuenña atto atarrcha' ayochresha'tterra ña e'ñe po'huamenco't.

Allempo Jesúsapa' po'poñeta'm'psana pueyochresha'
(Mt. 17.1-13; Lc. 9.28-36)

² Allempo pechapmaterrerr, Jesúsña'pa' ahuanerranerr pueyochresha'; añ anem Pedro ñaña Jacobo ñaña Juan. Ñetpa' arr anmanet atarr aspen'to e'ñe ñap'tochayet all aspen'to. Allña Jesúsapa' machayote'pa'tcha' e'ñe po'poñeta'm'psosanet.

³ Pa'shtampa' čha popta atarr nanac huallama't. Arr patsropa' ama eñalle alloch ya'huallama'ttat yeshtam atet ñerra'm ña pa'shtam atarr huallama'to poptena.

⁴ Allñapa' machayotepa'tcha' orrtanet Elías ñaña Moisés. Ñetñapa' alla serrpare'toset epuet Jesús.

⁵ Pedroña eñoratsapa' atet otan Jesús:

—Atarruaca'ye Maestrocha' cohueno'tseneyte' arr. Ama't pocte' penteñe yapa' o'ch ya'tomatonas ma'ppahua quërpachet, puepahuarrpa' p'ocopcha' po'ppahueñpa' Moisésocopcha', po'ppahueñpa' Elíasocopcha'.

⁶ Ñehua, Pedroña pueyorñot' atta muene' otatse't, ama eñoche errotencha' ot.

⁷ Allempo eñorena Pedropa' čha orrtosahuet os ñeñ't atarr cohuen poptetsa čhepa'tcha' a'pomañposanet. Čha e'morrtostsa ñoñets osot; ñeñ'tña ñoñetspa' Yompor otosahuet; ñeñ'tpa' atet ot:

—Añmapa' ñeñ't no Nechemer ñeñ't atarr nemuerena, ñeñ'tcha'ña e'ñe cohuen se'mñoterr.

⁸ Allempoña o' cohua'yerretpa' arepa'tcha' eseshaye' enterreto, ñap'ta enteret Jesús.

⁹ Allempo onačherret aspen'tot Jesúsñapa' atet otnerranet:

—Te'pa' amach esesha' sota'psa'tatsto ama't e'ñe puesheñarra ñeñ't atet o' sentua. Tarremphuach allempoch netanterra na rromot' na Ñeñ'ten Acheñetosets, allempochña seserrpare'taterña allohuen acheñenesha'.

¹⁰ Ñetña atet otanet Jesúsapa' atet'cho' pet, ama a'meteññañeto po'ñoñ. Tarraña ñetñapa' atta a'p'to'tanna'tyesnerret:

—Ta'm ¿este'ña oteneyña Jesús o'ch tanterra rromot'?

¹¹ Allempoña pueyochresha' atet otnerret:

—¿Eso'mare'tña otenña ñeñ't atarr etsotene' ñoñets ñeñ't atet anaret, Elíaso'ch ñanom huerrtsa?

¹² Ñañapa' atet otnerraneterr:

—Elías po'ñoč'pa' ñachca'yeña huerrtsa ñanom, ñapa' e'ñechca'ye a'cohuentatuer ora allohuen. Tarraña sapa' ama't seño'tenoña ñaña ñeñ't atet anaret quellco e'ñe nocop. Ñeñ't allpa' atetca' oten na Ñeñ'ten Acheñetosets atarrcha' na'mueroč'tataretterra, atarrcha' tsena'terrnet.

¹³ Tarraña napa' o'ch notas, Elíasapa' o'ca'ye huaphuerrañ arr, ñeñ'tapa' čhaña erro'tuanen p'apueret ñeñ't atet muena'yenet ñet. At'toca'yeña etsoterraña ñaña ñeñ't atet anaret quellco ñocop.

*Atto Jesúsapa' a'crraterran cheshachor ñeñ't otaten oneñ't
(Mt. 17.14-21; Lc. 9.37-43)*

¹⁴ Allempoña čhačherret allo'tsa'yen pueyochresha' allñapa' alla entuereterr shonte' acheñenesha' ñeñ't emchorrenaya po'potantañ pueyochresha'. Ñeñ'tña etsotayenayeñ ñoñets ñeñ't atet anaret'pa' alla entuerraneterr all es otnare'teññañet pueyochresha'.

¹⁵ Allempoña entapuer allohuen acheñenesha'pa' čha atarr cohuanrrortapueret, m'arra'tet ñeshopa' huom'cha'tapueret.

¹⁶ Jesúsñapa' allenta otuerranet:

—Sapa' ¿errofena'tña sotanna'tyena?

¹⁷ Puesheñarrña ñeñ't allo'tsenpa' ñañapa' atet ota'p:

—Maestrocha' napa' o'ca'ye nohuapatonapeñña nechemer, čhaca'ye chorreña oneñ't čha opanatateñ.

¹⁸ Ñerra'm erro'teno rremueñpa' čhachca'ye ata'tateñ patso, čhach amtan pa'po'pa' o'ch rraso'tan pa's, o'ch e'ñe ečharra. O' notuosna'ña peyochresha' o'ch queč'pateret oneñ't ñesho'tpa' tarraña ñetpa' amaca'ye eshcaye' queč'pateñeto.

¹⁹ Jesúsñapa' atet otanet:

—Sa ñeñtes acheñres ama't mameshapa' ama ayemtenaye' sentpenno. O' allponmatu-
anen allo'tsenen arr patsro, napa' atfa atarr na'huantennas, atfa necuenes ñato' atfo'tpa'
o'ch same'ñerrna.

Allempoñapa' atet otanet:

—Ama'tpa' sanmonca'ye chesha' arr.

²⁰ Allempoña anmoñet chesha'pa' oneñeñña'pa' entosan Jesús'pa' chepa'tcha' otatosanña
chesha'pa' alla ata patso, cha pomero'ta, amtan ñaña pa'po'.

²¹ Jesús'ña'pa' allenta otoñ pompor:

—¿Esempoñeñe'tña atet perra?

Ñaña'pa' atet och:

—Cheshoñeñca'ye atet perra.

²² O'te' epaye' ata'tater ama't tso ama't ñaña oño attoch muetsereñ. Paña te'pa' ñerra'm
erroteno'tpa' e'ñe pemuereño't pebensañpsaye'cherrnan nechemer allochñapa' attoch
metuer atfo muerochtena.

²³ Jesús'ña'pa' atet och:

—Ñerra'm na peyemtena amaca'ye eñalleña ñeñ't torrapo' añecop ñeñ't e'ñe neyemte-
naya na.

²⁴ Allempoña ñeñ't pompor pen chesha'pa' rranapa' atet otererr:

—Napa' neyemtenpañca'ye, te'ñapa' peyenpa'n Ayochreshate attoch neyemterrpa e'ñe
pochtacma.

²⁵ Allempoña Jesús'pa' entapan shonte' acheñenesha' ñeñ't matachetsa ñeshone't, ñaña'pa'
allenta otan oneñe't:

—Pa oneñe'te, opanatatañe'p, a'paquetatañe'p, te'ñapa' o'ch nota'p: Pequechpa'ner
cheshachor e'ñe tayecma, ama't errponaña amach alla pechorrere'te.

²⁶ E'ñe otue' atet oneñe'tña'pa' chepa'tcha' rrana'nmatasa, alla otatnerranerr chesha-
chorpa' cho quechpa'nmue' o' ahuerr.

Cheshachorpa' ama pelleno cha otta ñerra'mrrate' o' rroma. Acheñenesha'ñapa' atet
otyes:

—Po'ño'ch te'pa' o'ca'ye rroma.

²⁷ Jesús'ña'pa' allenta chete' pototpa' o' tantach, chesha'ñapa' cha terrets e'ñe cohuen.

²⁸ Allempoña Jesús'pa' ahuerr pueyochreshohuen, o' be'toscha'tuerret pocollo, allpa'
e'ñe ñaptochayet, pueyochresha'ñapa' allenta otueret Jesús:

—Yapa' ¿eso'mare'tña ama eshcaye' yequechpatatereña oneñe't?

²⁹ Ñaña'pa' atet otanet:

—Ñeñ't atet oneñe'tpa' amach erroteno't yequechpatatereña e'ñe atfa. Chochña
yema'yochena ñaña yema'yochreño't ama't yerrarpa' o'ch yequechpue' mame'.
Atto'tcha'ña yequechpatatereña oneñe't ñeñ't atet.

Jesús'pa' eñotaterraneterr puepocheño ñapa' chocmach muetseret

(Mt. 17.22-23; Lc. 9.43-45)

³⁰ Ahuanerretterr allotpa' arr oñemhuanerret Galileo'mar. Jesús'ña'pa' mueneñeñ
a'nahuoto'ch metañ

³¹ tarro'mar ñapa' mueneñ o'ch ye'chatnoman pueyochresha'. Ñeñ'tpa' atet otno-
manet:

—Na Ñeñ'ten Acheñetosetspa' pomataterrnetcha' attochña erro'tuanencha' perrnet.
Atteñapa' o'ch muetsaterrnet tarraña poma'pamtañoñapa' o'ch alla netanterra.

³² Ñeñ'tña ñoñets ñeñ'tapa' ama't puesheñarro'tetapa' ama eseshaye' eñotenaye' enteñeto
ñeñ'to'marña ama a'p'to'tenaye' enteñeto.

All eñotateney ñeñ't acheñer e'ñe po'ño'ch atarr asherben enteñ Yompor

(Mt. 18.1-5; Lc. 9.46-48)

³³ Allempoña čhača'tet ñaña Capernaumo. Allempoña čhapuet pocollo Jesúsñapa' otanet:

—Sapa', ¿eso't sotanna'tyesnenaña ñorra' toño?

³⁴ Ñetñapa' ama eseshaye' anapuenaye' entaye tarro'mar ñetpa' añca'ye otanna'tyesnenetña toño:

—Yapa' erra'tsenoteyte'ñaca'yeña ñeñtey atarr sherbets, ñeñtey atarr amcha'taretuyen enteney acheñenesha'.

³⁵ Jesúsñapa' all anorrospa' allenta chore'tan allohuen pueyochreshačhnopa' atet otanet:

—Ñerra'm erra'tsenotes ñeñtes atarr amcha'taretuyen entetsañ, ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt atet pena ñeñt atfa atarr taruaset po'potantañecop, ama't ñaña allohuenacop.

³⁶ Jesúsñapa' chesha'tolla chore'tpa' tomach e'ñe alla, allenta enachpa' atet otanet:

³⁷ —Erra'tsenotes sa ñerra'm e'ñe cohuen saguëñ ama't ñeñt ama asherbenaye' entyeneto atet ñerra'm añ chesha'toll tarro'mar sapa' na same'ñena, na'ña e'ñe cohuen saguëñ. Elloña ñaña erra'tsenotes sa ñeñtes naguëne' na, ama e'ñe naptocheyey' saguëno, añe'ña saguënnan Nompör ñeñt nellsensene'.

Atto eñotateney ñeñt ama čhoje' yepatare'tenaye ñeñtña po'ñočpa' e'ñe parrocmayeyenpanna

(Lc. 9.49-50; Mt. 10.42)

³⁸ Allempoña pueyochresha' ñeñt Juanpa' atet otan Jesús:

—Maestro, ya ahuañapa' atet yeñch puesheñarr yacma ñeñt quečpatene' oneñeñ. E'ñe puečhore'teñoťeř pa peso'chñopa' quečpatan oneñeñ. Yañapa' ama pocteye' yeñche tarro'mar ñapa' ama parroje' yeyemteno. Ñeñto'marña yapa' atet yoch:

—Amach atet peřatsto.

³⁹ Jesúsñapa' atet ot:

—Sapa' amachca'ye sepatare'tatsche tarro'mar ñerra'm erra'tsencha' orrtate' part-soteñets e'ñe na neso'chño, ñeñtña acheñer tsapa'toneřpa' amachca'ye muenere alla o'ch achmare'terren.

⁴⁰ Ñaña ñerra'm ama čho epatare'tenye yaña, ñeñtña po'ñočpa' e'ñeca'ye parrocmayeyenpanna.

⁴¹ Po'ñočca'ye notenes: Ama't erra'tsena acheñer ñeñtcha' sapue' ama't coñe'ta oñ tarro'mar sapa' e'ñe na neyochresha' nepenes, ñeñtña acheñerpa' čhocmach atsa'tare'terra ñeñtcha' atarr coshaterre' ña.

Atto čhocmach huaponaya ñeñtcha' yetpatyene' o'ch atet řatyeseñ ñeñt ama pocteye' enteno Yompör

(Mt. 18.6-9; Lc. 17.1-2)

⁴² 'Ama't erra'tsena ñeñt ama pommo'cheñoťeye' ame'ñenno atet ñerra'm chesha'toll ñeñt ama eñotenana' o'ch ommo'chena, tarraña ñerra'm esesha'ña po'psheñeñ o'ch atet řatach ñeñt ama pocteye' enteno Yompör, ñeñtña acheñerpa' atarrcha' yoročheno'tsen tarro'mar ñapa' añ o'patenaya coñcheñets ñeñt atarr huomenc. Ama't ñocoppa' ama tama yoročhenayayñe ñerra'm ama atet řatenana' po'psheñeñ, e'ñech allorocma čharachetañ mapue' añecmuen pa'čhnořo allpon ñerra'm puetse'tamets o'ch huapore'chet oño epo allcha' ño'shach mapue'.

⁴³⁻⁴⁸ Ñaña o'ch noterrser: Ñerra'm sechets řatyenes ñeñt ama pocteye' enteno Yompör atet ñerra'm sot, setac, seclle', añ poctetsa o'ch sequečpuerr ñeñt čocma atet řatse'tatyenes sechets. Ñeñtpa' e'ñe atet ñerra'mrate' e'ñe allorocma o' sepecherr sot, setac, o' serroterr seclle', o'ch sehuapore'ter. Añ cohuen socop ama't e'ñe sepo'yotateñoř corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar sotpa' o'ch sečherr coñcha'puetso all parraren tso'

ñeñt ama emaya'pahuoyaye. Allpa' ama't pueñmochapa' ama rromueno; tso'pa'cho'ña ñeñt allo'tsenpa' ama amayaño ama't errponaña. Ñaña añ cohuen socop ama't e'ñe setcotpa' sepsheñtatquëñoñ corretsasach tayoteñ errponohuañen. Añña ama cohuenayaye socop esempohuañenpa' e'ñech ora epo'mar setacpa' o'ch huapore'terrset coñcha'puetso all parraren tso' ñeñt ama emaya'pahuoyaye. Allpa' ama't pueñmochapa' ama rromueno; tso'pa'cho'ña ñeñt allo'tsenpa' ama amayaño ama't errponaña. Ñaña añ cohuen socop ama't seclloyot sepsheñtaclo'yeñoñ o'ch secherr all añcha'tarettena Yompor. Añña ama cohuenayaye socop esempohuañenpa' e'ñech ora epo'mar seclle'pa' o'ch huapore'terrset coñcha'puetso all parraren tso'. Allpa' ama't pueñmochapa' ama rromueno; tso'pa'cho'ña ñeñt allo'tsenpa' ama amayaño ama't errponaña.

⁴⁹ Ñeñña Jesúsapa' atet toma'ntaterraneterr:

—Allohuen ñeñtcha' cohuenterrtsapa' añcha'ca'ye a'cohuentatene' tso'; ñaña allohuen ayarračno ñeñt amtsarettetsa Yomporecoppa' añca'yeña a'cohuentatene' pos.

⁵⁰ Ñehua, yapa' yeñoteñ pospa' atarr cohuen sherbeney. Tarraña ñerra'm posña po'poserrteña huañerretspa' yapa' amate' erroñ yepe o'ch alla ya'poserrtater attoch alla sherberrey. Sapa' e'ñepa'chña cohuen sesherbannena e'ñech attes ñerra'm pospa' atarrcha' sherbeney. Attochña e'ñe cohuen sentannena e'ñech muechet seycha'yena.

10

*Atto Jesúsapa' yeçhatosanet ama asanna'tpahuoyaye
(Mt. 19.1-12; Lc. 16.18)*

¹ Allempoña Jesúsapa' err Capernaumotpa' ahuerr anetso Judeo ñaña arre'na sen Jordanas yomta'n. Allñapa' alla shonterrñañerr acheñenesha', ñañaapa' yeçhaterraneterr Yompor po'ñoñ ñeñt chocma attecma penanet.

² Allñapa' o' alla huaçherrñañerr ñaña fariseonesha'. Ñetñapa' añña atarr e'nenet e'ñe puehquëñoñotet po'ñoñotetpa' o'ch eñorachet ñeñt ama cohuenayaye. Ñeñto'marña ñetpa' atet otoset:

—Ta'm ¿pocte'te' o'ch yeser yetapor?

³ Ñañaapa' atet otapanet:

—Sapa' ¿ama't señotenoña Moisés po'ñoñ ñeñt atet nonase't?

⁴ Ñetñapa' atet ochet:

—Moisés po'ñoñpa' atetca'ye oten, chocch yequellcoñ yetapor papell ñeñtcha' yañ allempochña yeser.

⁵ Jesúsñapa' atet otanet:

—Tarraña sa seyoçhropa' çhocmaca'ye po'poñ sentuena ñeñto'marca'yeña Moisésapa' atet quellconase't attoch sese' setapor.

⁶ Ama't atet muenataseña'pa' tarraña Yomporpa' e'ñe ahuatoteñ allempoteñ es yeçcatyes “allempo yeçcatan ñaña asheñorr, yeçcatan ñaña peno.”

⁷ Allempo Yomporpa' atet ot: “Ñeñto'marña yacmapa' ñerra'm esempoch sena'ta, coyanesha'pa' o'ch echan puerrollar, añ pocte' o'huañcha' tama yemteñet pamo'mte' allochñapa' yacmapa' attochña e'ñe parrocmat epuet puetapor.

⁸ Attoña epsheño'maretpa' e'ñech pañra po'chets penet.” Attoçha'ña o'huañcha' pueheña'tetstet, allochñapa' o'ch e'ñe pueheñarratet.

⁹ Ñeñt atto Parets e'ñe pañratatan yacma epuet puetapor amach cha ellopa' alla sannerreto.

¹⁰ Allempo çhaçherret pocollo, allña pueyochresha'pa' atet otueret:

—¿Errofente'ña ñeñt atet ñoten ñorra' año' asanna'tpahuo?

¹¹ Ñañaapa' oterraneterr:

—Ñerra'm esesha' serre' puetapor o'ch alla yorerran po'psheñeñ ñeñtcha' puetapor perr, ñeñña yacmarpa' chachca'ye ochña'tam'perrana puetaporeshe'mañ. Ñeñtpa' ama pocteye' enteñe Yompor.

¹² Ñaña coyanesha' ñerra'm serran puerrollar o'ch yorer po'psheñeñ yacma ñeñtcha' puerrollar perr, ñeñña coyanesarpa' chachca'ye ochña'tam'perrana ñaña puerrolareshe'mañ. Ñeñtpa'cho'ña ama't mameshapa' ama pocteye' enteñe Yompor.

Atto Jesús'pa' bensare'tam'psapan cheshanesh' ñeñ hupatoñet (Mt. 19.13-15; Lc. 18.15-17)

¹³ Allempoñapa' hua'cha'tachet ñaña shonte' cheshatollesha' Jesúsesho. Ñetpa' añecopña hua'cha'tachet o'ch a'p'lla'yesapanet Jesús. Jesúsña pueyochresha' allempo entapan ñeñt hua'cha'tate' cheshaneshachno ñetñapa' ama pocteye' eñcheto o'ch anmoset cheshatollesha' Jesúsesho ñeñto'mañña ama amnataretapueto.

¹⁴ Tarraña Jesúsña allempo entan pueyochresha' cha epatare'tapan cheshatollesha', ñaña'pa' ama't mameshapa' ama pocteye' entaneto. Ñaña'pa' atet otanet:

—Pocte'ña'cho' semnachña'yeña cheshanesh' onosetepa' e'ñe nesho. Amachca'ye cha sepatare'tatstapaneto tarro'mar allohuen ñeñt atarr neyemtenaya na atet ñerra'mrrate' cheshatoll, ñetcha' o'patenetña Yompor po'cohuenña ñeñt atto ayochreshattena ña.

¹⁵ Po'ño'chpa' o'ch notas, ñerra'm esesha' ama e'ñeye' pueyemteño'teye' aguëññañeto Yompor po'cohuenña amach atet perreto ñerra'm cheshatoll e'ñech yemtenana ñeñt cohuan'pene', ñetñapa' amach o'patenetoña Yompor po'cohuenña atto atarr ayochreshattena ña.

¹⁶ Allempoña Jesús'pa' a'chono'tyesapan cheshanesh'pa' allña a'p'lla'yesapanetña e'ñe ña potot attoña bensare'tam'psapanet.

Atto puesheñarr ñeñt hupueshameñ ñeñt atarr ec'llayoret ñaña'pa' e'ñorana'tosana Jesús (Mt. 19.16-30; Lc. 18.18-30)

¹⁷ Allempoña Jesús'pa' o'ch ahuenñerr allenet sechena. Allentepa'tcha' huapa'muena puesheñarr yacma e'ñe matenacma huapa. Alla concorpana'tosana Jesús'pa' atet otos:

—Maestro, p'papa' atarr cohuen acheñre'p, te'pa' o'ch potapuen ¿erro'tena'tcha' nepaña na ñeñt e'ñe cohuen attochña napa' corretsanch e'ñe tayoteñ ama't errponañohuen?

¹⁸ Jesúsña'pa' atet otap':

Eso'mare't potenenña napa' atarro' cohuen acheñren. Arr arromñañenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñapñaña Yompor ñeñt e'ñe po'ño'ch cohuen.

¹⁹ Papa' e'ñe peñotuen Yompor po'ño'ñ all otene' ñeñtcha' atet yepena e'ñe cohuen, ñeñt atet otene': "Amach yechtapretyesatsto taporets, amach yemtsanna'tatsto, amach yetyesatsto, amach yetoma'tam'psatsche yamo'ts e'ñe atta, yeshquëño'tpa' amach es yeprratam'psatsche po'psheñeñ, ñaña yemorrenteño'tpa' yem'cha'na'chcha' yompor ñaña yachor."

²⁰ Ñeñña a'p'to'tene'pa' atet otererr:

—Maestrocha' napa' e'ñeca'ye cheshoteñ ora añe'chnopa' e'ñeca'ye netsotueñ.

²¹ Jesúsña e'ñe puemorrenteño't cohue'pa' atet otererr:

—Eñallmeñca'ye paterr ñeñt pepalltena ñeñt ama atteye' pepeno. Te'pa' añcha'ña atet pe'pa o'ch ahuerre'p o'ch pepomhuerr ora allpon ñeñt pechyen o'ch p'papa'yera' huocchañeshachno ñeñt atarr es pallta'yetsa, attochña p'papa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch potterren attoch e'ñe neyochresha' neperre'p e'ñe poctacma.

²² O'ña e'mhuan ñeñt atet och Jesúsapa' ñañaapa' cha atarr nanac lleca tarro'mar ñapa' shonte' esocmañen echyen. Ñeñto'marña e'ñe puellquëñesha' ahuerr.

²³ Allempoña Jesúsapa' cohua'yesanetpa' atet otan pueyochresha':

—Ñeñt atarr eçllayoretpa' atarrca'ye nanac echarr attoch agapoñet Yompor po'cohuenña ñeñt atto ayochreshattena ña.

²⁴ Pueyochresha'ñapa' cha muene' yore'tanet ñeñt atet otenanet. Jesúsñapa' alla oterraneterr:

—Nechemerneshacha' o'ch notas: Añ acheñer ñeñt añach e'ñe yemtana ñeñt allpon echyen arr patsro ñeñtña acheñerpa' atarrca'ye nanac echarr o'ch agapoñet Yompor po'cohuenña ñeñt atto ayochreshattena ña.

²⁵ Ñehua, ñeñtpa' atetcha' netma'ntacha. Po'ñoçh yapa' yeñoteñ berr añecmuen allpon ñerra'm huaquësh* atarrca'ye torrapo' o'ch esho'tosa añeñollponatollo atet ñerra'mrrate' acosh puetatollo. Ñeñtpa' atetca'ye penaña acheñ ñeñt eçllayoret, ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁶ Pueyochresha'ña allempo e'met Jesús atet oten, ñetñapa' cha muene' lleca'rrtetpa' atet otanna'tyeset:

—Tarraña ñerra'm atette'pa' amate' esesha' a'queshpataretterrtso ama't puesheñarra tarro'mar yapa' yeñoteñca'ye huaquëshpa' amaca' esho'tenoña acshequeto.

²⁷ Allempoña Jesúsapa' atta cohua'yesanetpa' atet oterraneterr:

—Sa arromñaateneshaspa' amach es errotenaye' apen senteno. Tarraña Yomporpa' ama eñalleña ñocop ñeñt atarr torrapo' enten.

²⁸ Allempoña Pedropa' atet och:

—Partseshacha' po'ñoçh yapa' o' e'ñe yesuanom ora allohuen attoch e'ñe yoc'terreþ.

²⁹ Jesúsñapa' alla oterraneterr:

—Allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ama't pa'mo'nasheñnesha' ñato' po'chanesha' ñato' pompor, pachor ñato' puetapor, ñato' pacñeñar ñato' po'patseñ attochña napa' e'ñech cohuen sherberrnet pueserrpare'teñoñet cohuen ñoñets alloch a'queshpataretterra acheñenesha',

³⁰ elloña ñetpa' o'ch alla aguërrerret shonte' esocmañen ñeñt atarr cohuen. Ama't allponapa'tets sehuanomyesnomuet, elloña çharroch çcharra'ch alla agapyerret, ama't e'ñe tayoteñ allempo correnet arr patsro—ama't ñeñtcha' pa'pacllaçhno perret ñaña ñeñtcha' pa'mo'nasheñneshaçhno perret, ñaña ñeñtcha' po'chaneshaçhno perret, ñaña ñeñtcha' pachorneshaçhno perret ñaña ñeñtcha' pacñeñareçhno perret, ñaña ñeñtcha' po'patseñ perret. Tarraña ama'tcha' atet aparetterretaña' çhocmach amuerochtataretterret pame'ñeñoñetan na. Elloña tsapatoneña ñetñapa' aguërretcha' ñeñt alloch corretsetach beñecpuen pocsheñeshocmañen.

³¹ Te'pa' señoche'pa'ch eñall shonte' acheñ ñeñt ama asherbenaye' senteno sa te'tarraña ñetña allempopa' atarrcha' asherben enterranet Yompor. Ñaña eñall shonte' acheñ ñeñt atarr asherben sentyen sa te', tarraña ñetña allempopa' amach asherbenaye' enterraneto Yompor.

*Allempo Jesúsapa' alla eñotaterraneterr ñapa' çhocmach amtsaretterra
(Mt. 20.17-19; Lc. 18.31-34)*

³² Allempo ahuaneneter ñaña Jerusaléñoneñ, all oñenet toño'mar Jesúsñapa' ña otetsa. Pueyochresha'ñapa' cha toratsetyesnenet pueyoçhret, e'ñe pueñcha'nañoña

* **10:25** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquësh.

coteñ. Pueyochresha' ñeñt'charra' puechena epsheña ñeñt'ñapa' ahuanemñ Jesús ellonet, allñapa' eñotaterraneterr ñeñt'cha' huapoya ñocop.

³³ Ñeñt'pa' atet otanet:

—Te'ña po'ñoçhpa' o'ca'ye ahueney Jerusaléño. Allcha' pomataterrnet na Ñeñten Acheñetosets. Añcha' nerrmuerre' ñeñt' pa'm'cha'tareternesha' pen allohuen judionesha' po'cornaneshar ñaña ñeñt' atarr etsotayenayeñ ñoñets ñeñt' atet anaret. Ñetñapa' atet'cha' otyesnet na'mtsaretterrepa'to' o'ch pomuerrnet po'poñ acheñesho ñeñt' ama judioneshayaye.

³⁴ Ñetña pueche'tatseteñoñetanpa' allcha'ña achm'are'terrnet, ashterrnet'cha', a'coshare'terrnet'cha' attot'cha'ña o'ch corso'tam'perrnet, tarraña poma'pamtañoçh alla netanterra.

Atto Jacobo ñaña Juan ñet'pa' enamueñet Jesús attoch anorr'cha'tyesuerret ñesho (Mt. 20.20-28)

³⁵ Allempoñapa' atet oteña' Jacobo ñaña Juan ñeñt' Zebedeo puechemeresha' ñeñt'pa' atet otoset:

—Maestrocha' yapa' añca'ye yemnen o'ch atet pe'pa'y ñeñt'cha' yota'p.

³⁶ Ñañapa' atet otanet:

—Sapa' ¿errot'ena'tña semnen atet'cha' ne'pas?

³⁷ Ñetñapa' atet otereterr:

—Yapa' añca'ye yemnen te'pa' o'ch pemnatey o'ch yanorruerr pesho pecohuenño, puecheñarro'teypa' pecohuenrot'cha' yanorryesuerr, po'psheñeñpa' pe'chcoterot'cha' anorruerr allcha' yecohuentapreterr'pa.

³⁸ Jesúsñapa' atet otanet:

—Sapa' amaca'ye seño'teñe ñeñt' po'ñoçh senamuenen. Añca'yeña senamuenen attoch semueroçhtapreterrna samña. Ta'm ¿e'ñete' po'ñoçh pocte' senteñ o'ch semueroçhterra samña tarro'mar napa' çhocmach na'mueroçhtataretterra?

Ñeñt' mueroçhteñetspa' Jesús'pa' atet toma'ntatanet ñerra'mrrate' atarr pesherr es yorren orram'tso ñaña atto yapataret'tena e'ñe atet ñerra'mrrate' çho' ya'mtsaretterra Yomporecop.

³⁹ Ñetñapa' atet ochet:

—Yapa'çho'ña atet'cha'ca'ye ye'pa.

Ñañapa' alla o'terraneterr:

—Ñehua, po'ñoçhpa' sa'mueroçhtataret'terrach samña attescha' ñerra'm na, sa'mtsaret'terrach samña.

⁴⁰ Tarraña añña attoch sanorryesuerr nesho necohuenrot' ñaña ne'chcoterot' allcha' secohuentapreterrna ñeñt'pa' amaca'ye naye' semnatenaye. Añcha'ña anorryesuerrrets all ñeñt' e'ñe o'patatenna Nompör.

⁴¹ Añña po'potantañ pueyochresha' ñeñt' çharrasheña allempo e'met ñeñt' atet enamuen Jacobo epuet pa'mo'nasheñ Juan, ñetñapa' ama pocteye' eñcheto çha muene' e'moñe'chet.

⁴² Allempoña Jesús'pa' alla çhore'terranet allohuenet ñesho ñeñt'pa' atet otanet:

—Sapa' seño'teñte' ñeñt' atet pena po'poñ acheñenesha' ñeñt' ama judioneshayaye. Ñet ñeñt' pa'm'cha'tareter penet e'ñech pa'm'cha'noçhteñoçmañen pomnaren p'a'yenan allohuen pueyochresha'çhno.

⁴³ Sapa' arepa'chña atteye' se'panna'tatsto e'ñe sommo'cheñoñ. Socoppa' añña poctetsa. Ñerra'm erra'tsenotes atarr am'cha'taretoyen entetsañ ñeñtes acheñres socoppa' añ poctetsa o'ch atet senterra ñerra'm ama esoshe'mayayso ñeñt' atet pena ñeñt' at'a atarr taruassets po'potantañecop.

⁴⁴ Ñaña ñerra'm erra'tsenotes ñeñtes muenene' o'ch atarr asherben entenset ñeñtesña acheñrespa' añ poctetsa o'ch atet senterra ñerra'm ama esoyayso allochñapa' attochña e'ñech cohuen setorrena po'potantañecop ama't ñaña allohuenacop atet ñerra'mrrate' acheñ ñeñt atarr taruaset e'ñe atfa.

⁴⁵ Atet ñerra'm na Ñeñten Acheñetosets, napa' ama añecpaye' nehuapo añe patsro allochñapa' sapa' o'ch atfa atarr sesherðapuen na atet ñerra'mrrate' napa' atarr añcha'taret sentenen. Napa' añecopña nehuapa allochñapa' nachña sesherbose'ña sa, ñeñto'marña napa' naña pomostsa nañeña o'ch nerromos socop attochña netsa'tuerrnasa so'chñar ñeñtes shontes pa'namen acheñres. Attochña sapa' amach sañeña rromatso so'chñarecop.

Allempo Jesúsapa' a'crraterran puesheñarr aporo'yet ñeñtpa' añ pa'so'cheñ Bartimeo (Mt. 20.29-34; Lc. 18.35-43)

⁴⁶ Allempoñapa' o' cha'cha'tet Jericó. Allempo meterrerr Jericó't epuet pueyochresha' ñaña shonte' acheñenesha' e'ñe allpona serreterrpa' allña e'ñe toñetopñopa' ahuepa't anorros puesheñarr aporo'yet ñeñt chocma enamare'tets quelle. Ñeñtpa' añ pa'so'cheñ Bartimeo ñeñtpa' Timeo puechemer.

⁴⁷ Ñaña'pa' e'notatoset añ huetsa Jesús ñeñt nazareto'marnesha'. Ñeñña aporo'yetpa' allenta rranare'ch atet otapan Jesús:

—¡Pemueraye'chnomna Jesúsocha' namã! Papa' ñeñteþ Davidna'tareþ.

⁴⁸ Acheñenesha'ñapa' cha muene' che'ptare'tnometña aporo'yetpa' atet otoset:

—O'hua pemma.

Aporo'yetñapa' ello alla rranare'terrerr atet oterrerr:

—¡Pemueraye'chnomnañaca'ye Ayochreshate! Papa' ñeñteþ Davidna'tareþ.

⁴⁹ Jesúsñapa' alla tomos atet otosan acheñenesha':

—Seçhore'chñaca'ye onepa' arr.

Ñetña chore'chet aporo'yetpa' atet ochet:

—Te'pa' choþa cosherrtsa, ñapa' o'ca'ye agotoseþ. Petantnoma e'ñe tayecma.

⁵⁰ E'ñe atet otuetpa' cha tantatsa cha a'meyanmue' allo ca'maþna'tenapa' allenta ahuo' Jesúsesho.

⁵¹ Jesúsñapa' atet otaþ:

—Papa' ¿eso'tña pemnen ñeñtcha' atet neþoseþ?

Aporo'yetñapa' atet och:

—Añca'ye Maestro nemnen o'ch pecuatnomuen attoch o'ch cohuen nenterrapa.

⁵² Jesúsñapa' alla otererr:

—Te'pa' ahuerreþ e'ñe peñmañesha' tarro'mar atto atarr peyemtapna na ñeñtca'yeña o' e'ñe a'crraterreþ.

E'ñepa'tcha' allorocma e'ñe cohuen enterra. E'ñe cohuerrtsapa' cha co'ta'nmue' ñaña Jesús allenet sen.

11

Allempo chap Jesús Jerusaléno (Mt. 21.1-11; Lc. 19.28-40; Jn. 12.12-19)

¹ Atteñapa' o' cha'cha'tet allame'tets Jerusaléno. Chapuet aspeno ñeñt pa'so'cheñ Olivopen. Allñapa' allo'tsen anets ñeñtpa' añ pa'so'cheñ Betfagé, po'poñpa'cho' allo'tsen anets ñeñtpa' añ pa'so'cheñ Betania. O'ña chapmochet all anetso,

² Jesúsñapa' atet otnoman epsheña pueyochresha':

—Sapa' o'ch sota o'ch seçhap a'yente'ye e'ñe allara anetso. Allñapa' allcha'sentos ashen rre'ptor all huanquëñet; ñeñtpa' ama't puesheñarra acheñ amaca'ye monteña'. Ñeñña ashenpa' o'ch sepyañþospa' o'ch sanerrnan.

³ Ñerra'm esesha' sotapue': "¿Eso'mare't sepyam̄penña ashen?" sañapa' atetcha' sotosanet: "Yepartsesharca'ye muenene'ña añ ashen. Mameshapa' o'ch alla apuerrsa'."

⁴ Allempoña ñetpa' allenta ahuanmuet. O'ña chapuet anetsopa' all entoset ashen ehuanca'ret e'ñe opellrron̄ta'note'tsen all ten e'ñe toñoŋ. Ñetñapa' pueyam̄psoset.

⁵ Allempoña puesheña'tets ñeññ tom̄cha'tyets allpa' atet otapanet:

—¿Eso't sottenña arr? ¿Eso'mare'tcha' sepyam̄psosña ashen?

⁶ Ñetña atet otapanet Jesús'pa' atetcho' otoset. Allempoña'pa' atet otarettet:

—Ñeññepñapa' sanerca'ye.

⁷ Allempoña'pa' allenta anerretña ashen Jesúsesho. Nohuerret pa'shtam ash-nache'ñopa' Jesúsñapa' allenta monta'nmana ashen.

⁸ Shonte' acheñenesha' ñetñapa' totma'tyesoñet pa'shtam toño allcha' oñem Jesús. Po'potantañechnoñapa' tsormo're'tyeset tsach pue'mo'rer allo topanetyeset toñ.

⁹ Allohuen acheñenesha' ñeññ otachetsa ñaña ñeññ cota'huanene' chenta' ñetñapa' puerrannarteño'tetpa' atet atarr cohuentatyenesneññañetpa' atet otenet:

—¡Acsherrapo'ch allohueney! ¡Aye'chochtaterrapo'ch Jesús ñeññ llesensen Yompor!

¹⁰ ¡Aye'chochtaterrapo'ch Jesús ñeññcha' am̄cha'tarettterrsa! Te'pa' o'ca' huerraña yatañ David pa'm̄cha'taretteña. ¡Aye'chochtaterrapo'ch ñaña Yompor Parets ñeññ pue'ntaño'tsen!

¹¹ Atteñapa' chap Jesús Jerusaléno'pa' allenta ahuos Parets pa'paclo, all be'tosos, cohua'yesosan ora allohuen ñeññ allo'tsa'yen. Cohua'yesueña'pa' o' cha'nerrpa' ahuo' anetso Betanio allohuen pueyochreshohuen ñeññ charra' puechena epsheña tarro'mar allempopa' o'ca'ye ellerren.

Allempo Jesús'pa' eñora higohecop amach eñalletatsto pue'mer
(Mt. 21.18-19)

¹² Tsapa't allempo ona'cha'ta'muenet Betanio't, Jesúsñapa' cheporra'nma.

¹³ All oñenet Jesúsñapa' a'yoteñ entosan higoch ñeññ taya o' asopanre'terr. Ñaña'pa' al-lenta ponem̄ya o'ch enteña' ñato' e'merette'. O'ña chap allame'tetspa' pasopanrepa'tcha' entosñañ tarro'mar ama chena' allempo me'ten.

¹⁴ Jesúsña chepa'tcha' eñorosta higohecop, ñeññpa' atet otos:

—Ama't errponañapa' amuepa'ch esesha' tsumuerraye añ higoch pue'mer.

Pueyochresha'ñapa' e'ñe e'mueñet atet eños higohecop.

Atto Jesús'pa' a'cohuentatosan Parets pa'paquell
(Mt. 21.12-17; Lc. 19.45-48; Jn. 2.13-22)

¹⁵ Allempo entuanman Jesús higoch allempoña'pa' o' alla cha'cheneterr Jerusaléno. Jesúsñapa' be'tosuener Parets pa'paclo, allña'pa' allentepa'tcha' mueño'tuosan allohuen ñeññ pomatsre'tetsa all ñaña allohuen ñeññ raña'yetsa. E'ñe cha'nma'cha'tatosanet al-lot, a'coye'tam̄psosanet po'mesa'chno allecma cam̄yatyenet po'çllayoret, a'coye'tuosan ñaña allecma anorryen ñeññ pomuene' yepe'chno.

¹⁶ Allempo Jesús'pa' ama't puesheñarrota ama muenaterraneto o'ch es oñmatet all Parets pa'paclo'mar.

¹⁷ Allempoña ye'chatosanetpa' ñapa' atet otosanet:

—Yompor po'ñoñ ñeññ atet anuaret ahuatoteñ allña'pa' atetca'ye oten Yompor: "Añ ñeññ nepaquell nepenpa' añe'pacaya'ña sherben allecmach ma'yochennet ama't allohuen pa'namen acheñenesha'." Tarraña sañapa' e'ñe atet sepeññañña Yompor pa'paquell ñerra'mrrate' eñeñ ñeññ e'potyetsa mapuetpono.

¹⁸ Añña ñeññ pa'm̄cha'tareternesha' pen allohuen judionesha' po'cornaneshar ñaña añ ñeññ atarr etsotayenayeñ ñoñets ñeññ atet anaret, ñetñapa' allempo atet e'mare'tetpa' Jesús'pa'tcha' atarr o'patet o'ch muetsatachet. Tarraña allempopa' ama erro't peto cha

mecha'na'chet tarro'mar allohuen acheñenesha'pa' atarrca'ye cosheññañet ñeñt atet yeçhatenanet, nanac cohuen enteñet.

¹⁹ Allempoña o' ellerrenpa' onaçheneterr Jerusaléño'pa' ahuaneneterr Betanio.

Arrpa' atto entuerret higoch o' e'ñe hueya'hua
(Mt. 21.20-22)

²⁰ Tsapaña ahuatema alla oñma'mueneterr allo'tsen higoch. Entueneterrpa' o' e'ñe hueya'huenaña higoch e'ñe puerçohuen.

²¹ Allempoña Pedro allenta yerpana atet eños ellerro Jesús higochecop, ñaña'pa' allenta otosan Jesús:

—Maestro, pecua' añ higoch ñeñt potnom ellerro ama't esesha'pa' amach tso-muerrñañeto pue'mer, te'ñapa' o' hueya'hua.

²² Jesúsña'pa' atet otnomanet:

—Sapa'çho'ña e'ñeñaca'yeña seyemteraña Yompor.

²³ Po'ñoçhca' na te'pa' o'ch notas: Ñerra'm ama çhoye' se'charrtateno seyoçher, ñerra'm po'ñoçh e'ñe seyemteña Yompor, ñachca'yeña atet pene'ña ñerra'm erroten es soten. Añe'nachña e'ñe setsoten ñeñt ello atarr torrapo' senten. O'ch netma'ntacha atet ñerra'mrrate' añ aspenet. Ñerra'm eseshascha' otets aspentecop “Añ aspenetpa' rrote'tepa'ch arrot, arrepachña esha'toso sa'po allcha' chencosa”, aspenetña'pa' atetçha'çho' pónasa.

²⁴ Ama't allohuen erra'tsencha' es senam sema'yocheño, ñerra'm çho senam e'ñe seyemteñocmañen, ñeñtña'pa' saga'pcha'.

²⁵ Ñaña te'pa' o'ch notnomues: Ñerra'm sema'yocheño çho saten ñerra'm çho se'moñe'teñ po'psheñeñ çosach peretnerre' seyoçhro allorocma, allochña'pa' Sompor ñeñt ento'tsen peretnerrnascha' saña ñeñt atet sepatse'tyen ñeñt ama pocteye' enteno ña.

²⁶ Tarro'mar ñerra'm ama sepretnannenopa' Somporpa'çho'ña ñeñt ento'tsen amach peretnerrnaso saña ñeñt atet sepatse'tyen ñeñt ama pocteye' enteno ña.

Atto allsensarettena Jesús
(Mt. 21.23-27; Lc. 20.1-8)

²⁷ Allempoña'pa' alla çhaçha'ta'mueneterr Jerusaléño. Jesúsña'pa' all chopeñe'chen Parets pa'paclo. Allña'pa' huaçha'toña ñaña shonte' amcha'tareñnesha' ñeñt pa'mcha'tareñnesha' pen allohuen judionesha' po'cornaneshar ñaña ñeñt atarr etsotayenayeñ ñoñets ñeñt atet anaret ñaña po'potantañ ñeñt pompornesha' pa'yen allohuen judionesha'.

²⁸ Ñetña'pa' atet otoset Jesús:

—Ñehua, yapa' añecop yehueña yemneñ o'ch potey ¿erroçet apuenpetña llesens? ¿Esesha'tña papuene'ña llesens atto' porrtatyenña ñeñt çhocma atecma pe'pa'yena?

²⁹ Jesúsña'pa' atet otapanet:

—Ñehua, napa'çho'ña nemneñ o'ch na'p'to'tapas saña ama't pa'rra ñoñets. Ñerra'm sanaposencha'pa' napa'çho'ña attoçña notapas naña allot apuennetña llesens ñeñto'marña atet nepena.

³⁰ Sapa'çho'ña o'ch sotosen ñeñt atet soçtape'chen sa, ahuañmo'cha allempo apate't Juanañ Yomporecop, ñapa' ¿esesha'tña llesense' ñato' Yompor amapa' acheñate' apue'ña llesens? Nemnen o'ch sotosen ñeñt atet soçtape'chen sa.

³¹ Ñetña'pa' e'ñe a'nahua otanna'tyeset:

—Ta'm errotcha'ca'ye yochte'. Ñerra'm çha yoch Yomporshotca'ye apetña llesens, ñapa' çate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.”

³² Elloña amach yotatsche acheñeshoťa apet llesens.

Ñehua, acheñenesha'ñapa' čhate' e'moñe'chet amčha'tareñnesha' tarro'mar acheñenesha'pa' e'ñe cohuen eñchete't Juanañ ñeñto'marña čhocma otyeñet ñapa' ñeñtca'yeña po'ñoč a'mtose' Yompor po'ñoñ.

³³ Ñeñto'marña amčha'tareñnesha'pa' atet ochet Jesús:

—Ta'm yapa' amaca'yeña yeñoteñe; erroťte' huapaña Juanañ, erroťte' apetña ñaña llesens.

Allempoña Jesúsapa' atet oterraneterr:

—Napa'čho'ña te'pa' amach notaso samña allot apareten namña atťot atet nepa'yena.

12

Ateť atma'ntatareťtena ñeñť ataruasañečhnopa' ama cohuenayaye

(Mt. 21.33-46; Lc. 20.9-19)

¹ Allempoña Jesúsapa' alla serrpare'taterranerr acheñenesha' toma'nteñtso, ñeñťpa' atet otanet:

—Eñall puesheñarr acheñ ñeñť nare'tanatatnomue' shonte' uvach; pa'muerñapa' e'ñe ora uvachmatatue. E'ñe cončha'tam̄pesue allotñapa' eñan ñaña allcha' a'pecho'toñet uva po'ñer. Allñapa' tomatatnoman torrepo' allotcha' cohuan̄psoñet pa'muer. Tomatuepa' na'nman ñeñťcha' taruasatats ñeñťcha' coyerrahuet allpon ñerra'm esempoch tōteñet.

'O'ña nare'tanatatuepa' o' ahuo' po'poñ anetso řachayo.

² Chap allempo yen uvachllom̄pa' ñañaapa' mueñerran po'psheñeñ pa'taruasañer o'ch enamuerra' uvachllom̄ po'psheñeñ pa'taruasañreneshesho ñeñť cohuan̄pene' uvachma'.

³ Allempoña čhen allpa' enamosan ñeñť allpon o'patena ña, arepa'tcha'ña es apapuenayeña uvachllom̄, elloña ñeñťapa' čha rremapueññañet pa'taruasañerpa' o' nalle'tapueñet, o' alla mueño'teret e'ñe atťa.

⁴ Allempoña ñeñť pamo'mte' pen uvachma'pa' o' alla mueñerranerr po'psheñeñ pa'taruasañer. Allempo čhenerr ñaña allpa' ñapa'čho'ña čha rrolle'tapetpa' o' at-serrp̄apueñet poñopa' čha es otnatapueñet.

⁵ Allempo o' alla mueñerranerr po'psheñeñ pa'taruasañer. Ñeñťpa'čho'ña allempo čhenerr ñaña allpa' ñañaapa' čhepa'tcha' muetsapueñet. E'ñe atťecma řa'yaset po'potantañečno—patanta'tetspa' nalle'tapueñet, po'potantañečnoñapa' čha amt-sanatareťtapuenet.

⁶ Ñeñť pamo'mte' penetpa' eñallmeñ ñaña puesheñarr ñeñť e'ñe ño puechemer ñeñť atarr morrentena. Allempoñapa' atet ot: “Te'pa' o'ch nemñe all ñeñť e'ñe na nechemer. Ñato'rraña ñeñťpa' mecha'na'tapetča'.”

⁷ Ñeñťpa'čho'ña ama't mameshapa' arepa'tcha'ña mecha'na'tapeto. Allempo entapoñet puechemer ñetñapa' atet otanna'tyeset: “Añmapa' ñeñťca'yeña puechemer ñeñťcha' o'paterraya pompor puenareñ esempo. Ñapa'čho'ña te'pa' o'chca'ye yemtsař allochñapa' yachca'yeña e'ñe o'paterrayaña pompor puenareñ. Te'pa' o'ch ahuey o'ch yemtsař ñaña.”

⁸ Allempoña o' rremapoñet ñaña puechemerpa' o'cho' muetsapet, huapore'teret allot uvachmoť. Arrpa' allohua atet toma'ntata Jesús e'ñe ñañaña.

⁹ Jesúsñapa' atet oterranerr acheñenesha':

—Ñehua, te'pa' o'ch notas, ñeñť pamo'mte' pen ataruasañečhnopa' ama't señoteñeña sa atetča' řohuerranet. Ñerra'm esempoch huerranet, pamo'mtayetpa' a'cclatuerranetča', narmetsma'ñapa' o'ch apuerran po'potantañ.

¹⁰ Allempoña Jesúsapa' atet oterraneterr:

—Sapa' ama't ahuatapa' ama'tña selleyareña ñeñt atet anuaret Yompor po'ñoñ ahuatoteñ. Tarro'mar ñeñtpa' atet oten nocop, all atma'ntatareten mapue'. Ñeñtpa' atet oten:

Añ mapue' ñeñt ama pocteye' entyeno ñeñt tomatyene' pocoll, ñeñña te'pa' o' anareterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

¹¹ Ñeñtpa' Yomporca'yeña atet patene' ñeñto'marña yapa' e'ñe cohuen yenteñ.

¹² Ñeñt e'moñe'tene' Jesús ñetña'pa' eñoteñet ñeñtpa' ñetca'ye atma'ntataretenet, ñeñtpa' ñocpuetca'ye atet eñoreñaña Jesús. Allempoña ñetpa' atarr mueneñetañ o'ch rromuet Jesús e'ñe allorocma tarraña ama esesha' rromaye tarro'mar ñetpa' cha mecha'teñet acheñenesha'. Ñehua, acheñenesha' e'ñeca'ye cohuen enteñet Jesús. Ñeñto'marña ñetña'pa' quechpa'huaneret Jesús'pa' ahuanerret.

*Atto a'pto'chet Jesús, pocte'te' o'ch tsa'tet impuesto
(Mt. 22.15-22; Lc. 20.20-26)*

¹³ Atteñapa' chap allempo po'pocheño e'ñe a'nahua mueñeññañet puesheña'tets fariseonesha' ñesho ñaña puesheña'tets Herodes pueyochresha', tarraña ñetpa' añecpa amñareñtenet attoch e'ñe puehquëñofoet po'ñoñofoetpa' o'ch eñoratoset ñeñt ama cohue-nayaye. Allochñapa' attotcha'ña otteñe'chet.

¹⁴ Ñeñto'marña ñetpa' allempo chapuet ñeshopa' atet otoset:

—Maestrocha' yapa' yeñoteneñ papa' ama peshquëno ama't mamesha ñaña ñeñt atto peychaten Yompor pocta'ña ñeñtpa'cho'ña e'ñe cohuenacma, ama shequëñtsoyaye ama't mamesha. Papa' allohuen acheñpa' e'ñe cohuen pentueñ; ama aña ñapueñ pemorrenteno ñeñt atarr añcha'na'tpo' entyeno allohuen acheñenesha'. Ñeñto'marña te'pa' yapa' yemneñ o'ch peñotatapuey erra'tsen'te'ña e'ñe po'ño'ch cohuentetsa. ¿Pocte'te' penteña pa' o'ch yetsa'ta impuestos añecop ñeñt añcha'tarettetsa all anetso Romo ñeñt ama judioneshayaye? Ñato' amate' pocteyayeña yocop ñeñtey judioneshay o'ch yetsa'cha añcha'tareñ romo'marnesha' ñeñt ama judioneshayaye.

¹⁵ Jesúsñapa' eñotapanet ñetpa' chaca'ye shecare'teñet, ñaña'pa' atet otapanet:

—Sapa' eso'mare'tña semneña o'ch seshcare'tosen. Ñehua, ama't atet setpatennoñpa' sorrtatca'yeña puetallarr quelle o'ch necue'.

¹⁶ Ñetña apetpa' ñaña'pa' atet oterraneterr:

—Ñehua, sapa' o'ch soten, ¿esesha't senteña ñeñt atma'ntatarettetsaña all? ¿Esesha't pa'so'cheñ aquellcarettetsa all?

Ñetña'pa' atet ochet:

—Añcha'tare'tca'ye atma'ntarettetsaña all, ñoca'yeña pa'so'cheñ ñeñt aquellcarettetsa all.

¹⁷ Jesúsñapa' alla oterraneterr:

—Ñeñte'pñapa' añ poctetsa o'ch ya'p añcha'tareñ ñeñt ño ñeñt atet poctetsa gobier-nocop, tarraña ellonetña ñeñt Yomporo o'ch ya'p ñaña ñeñt atet poctetsa ñocop.

Ñeñña shequënayeñ atta cohuanrrorteñet tarro'mar Jesús'pa' atarrca'ye cohuen ana-puenanet.

*Atto a'pto'chet Jesús, ñerra'm po'ño'chte' atanterrapo' rromot, ta'm, allempopa' er-rotencha'ña yeperra
(Mt. 22.23-33; Lc. 20.27-40)*

¹⁸ Allempoñapa' hua'cha'toña ñaña patantarr ñeñt saduceoneshatets. Ñehua, ñeñt saduceoneshatets ñetña'pa' ellonet echenet pocta'ña ñeñto'mar atet otenet amate' er-rotenot yetanterroña rromot ama't errponaña. Ñetña'pa' atet otoset Jesús:

19 –Maestrocha' ahuať Moiséspa' atet quellconay ñoñets ñeñť poctetsa ñeñťcha' atet yepa. Ñeñťpa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa', añ poctetsa pa'mo'nasheñcha' alla yorerre'ña po'norrar allochñapa' attoch eñalletteraña ñeñťcha' puechemer perr pa'mo'nasheñ. Ñeñťpa' atetca'ye quellca'nmonayña Moisés ahuať.

20 Ñehua, te'pa' eñall cancherrsheña ñeñť e'ñe poctacma pa'mo'nasheñecmuet. Ñeñť puesheñarr popo'naretpa' o' yoran coyanesha' ñeñť puetapor pa'. E'ñe allponmatatsapa' o' rromaña, yacma ama chemere'tnomo.

21 Allempoña ñeñť po'rrocho'merpa' o' yorerran pa'mo'nasheñeñ puetapor. E'ñe allponmatatsapa' ñapa'cho'ña o' rromuerrerr ñaña, ñeñťpa'cho'ña ama chemere'tnomo. Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña ñeñťpa'cho'ña ama chemere'tnerrero o' atta rromuerrerr.

22 E'ñe attecma p̄ohuet cancherrsheño'maretpa' e'ñe pueyoruarochet ñeñťara puesheñarr coyanesha'. E'ñe allohuenetpa' e'ñe attecma pet rromayestset ama't puesheñarrofetapa' ama chemere'tnomueto. O' rromapesuaña cancherrsheño'mar puerrollaresha'pa' cho rromatsña ñaña coyanesha'.

23 Te'ña ñerra'm po'ñochte' yetantena rromotpa' añña coyanesha' allempoñapa' ¿ese-sha'tcha'ña puetapor perre' tarro'mar allohuenet cancherrsheño'maretpa' e'ñe pueyoruarochet?

24 Allempoña Jesúsapa' atet oterraneterr:

–Sapa' ñeñťo'marca'yeña čha atarr sepanteñ tarro'mar amaca'ye čhennasoña seyočhro ñeñť e'ñe po'ñočh atet yečhateney Yompor po'ñoñ ñeñť atet anuaret ahuaťoteñ. Ñaña aña sepantatene' tarro'mar sapa' ama sepocteññañe Yompor po'huamenc.

25 Tarro'mar esempohuañen allempoch tanterret po'pocheño, allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuer-raye ñeñťcha' yorerrahuet. Tarro'mar allempopa' e'ñech attet ñerra'm Yompor po'mllañoťeññaneshar ñeñť pue'ntaño'tsa'yen.

26 Sapa' ama'tña selleyareña ñeñť atet quellquë't ahuať Moisés attoch señočh ama't ñeñť o' colla'huapa' ñetñapa' corretseta. Ñehua, all aquellcareť tsachmo'r ñeñť e'ñe ñoťa huortets. Alloťñaca'yeña Yomporpa' eñorana'tanaña Moisés; ñeñťpa' atetca' o'tña Yompor allempo: “Napa' ñeñťen Po'yomporer pen Abraham ñaña Isaac, ñaña Jacob.”

27 Jesúsñaapa' alla oterraneterr:

–Ñehua, yapa' yeñoteñ Yomporpa' ama aňeye' Po'yomporer penaye ñeñť rromuets e'ñe poctacma, ñapa' aňca'yeña Po'yomporer pene' ačheñ ñeñť corretsach. Attoña Yomporpa' e'ñe allame'tsa entenanet allohuenet ñetñapa' bettetseta. Ñeñťo'marca'yeña sapa' atarr sepanteñ.

Añmapa' ñeñť ñoñets ñeñť atarr sherbets, e'ñe metana'tuenan allohuen po'poñečhno ñoñets
(Mt. 22.34-40)

28 Allempoña huapoña ñaña puesheñarr ñeñť etsotene' ñoñets ñeñť atet anaret, ñañaapa' e'mosan ñeñť atet a'p̄to'tare'teñet Jesús. Ñañaapa' e'mosan Jesús e'ñe cohuen anapuenanet. Ñeñťo'marña ñapa'cho'ña allenta a'p̄to'tos, ñeñťpa' atet otos:

–¿Erra'tsena't ñoñtsor ñeñť atet anaret ñeñť atarr sherbets, ñeñť ello metana'tuene' ora allohuen po'poñečhno ñoñets ñeñť e'ñe parro attecma anuaret ahuaťoteñ?

29 Jesúsñaapa' atet otaṑ:

—Ñeñt ñoñtsor ñeñt atarr sherbets ñeñt ello metana'tuene' po'poñechno ñoñetspa' ñeñtpa' atet oten: “Se'mñot israelneshacha' attoch señoç: Ñeñt Yeyomporer yepenpa' ñapa' e'ñeca'ye patrpa ñeñt Yepartseshar yepen.

³⁰ Ñeñto'marña atarropa'chña yemorrenteña Yeyomporer ñeñt Yepartseshar yepen e'ñe ora yeyochrocmañen. Ñaña e'ñe yecamquëñoñ yemorreñchach, ñaña yocpaññoñhuen, ama't ñaña e'ñe ora yehuamencohuen.”

³¹ Allotpa' po'poñ ñoñets ñeñt atarr sherbets ñeñtpa' atet oten: “Atarrcha' yemorrenteña yamo'ts e'ñe atet atarr yemorrentena yañeña.” Añ epo'mar ñoñetspa' ñeñtca'yeña atarr sherbets, ñeñtña ello metana'tuene'ña po'poñechno ñoñets ñeñt atet anaret.

³² Allempoña ñeñt etsotene' ñoñets ñeñt atet anaret, ñaña' atet oterraner Jesús:

—Maestrocha' papa' e'ñeca'ye po'ñoç atet pten. Po'ñoç Yomporpa' e'ñeca'ye patrpa ama eñalleña po'poñ Yeyomporer patrpa'ye.

³³ Ñerra'm çoch yemorrenteña Yompor e'ñe yeyochrocmañen e'ñe yeñoteñoñhuen, ñaña e'ñe yecamquëñoñ yemorreñchach e'ñe yehuamencohuen ñaña ñerra'm atarr yemorrenteña ñaña yamo'ts e'ñe atet atarr yemorrentena yañeña, ñeñtca'yeña atarr nanac sherbets. Elloca'yeña metana'tuenan allohuen po'poñechno ama't ayarraçhno ñeñt yemtsayen Yomporcop, ama't ñaña allohuen ñeñt yachamuen allo yesherbeñ Yompor.

³⁴ Jesúsña' atet eñch ñapa' atarr eñotenan ñeñt atarr sherbets Yomporcop, ñeñto'marña atet otererr:

—Papa' amaca'ye atarr atonaye' pepallteno attoch e'ñe pagaphuerrñañ Yompor po'cohuenña atto ayochreshattena ña.

Allempoña' ama't puesheñarrotetapa' ama eseshaye' a'p'to'tenaye' enterrayeña Jesús.

*Atto Cristo ñeñt Po'partseshar pe't David, elloña' o' alla po'mreneñ per
(Mt. 22.41-46; Lc. 20.41-44)*

³⁵ Allempoña Jesús'pa' alla yeçaterraneterr all Parets pa'paclo. Ñeñtpa' atet oterraneterr:

—Ñeñt atarr etsotayenayeñ ñoñets ñeñt atet anaret, ñetpa' eso'marte'ña otyenet ñeñtcha' Cristotosets ñapa' aña po'mreneñ pene' David tarro'mar ñeñtcha' Cristoterrets ama aña po'mreneñ pene' David tarro'mar ñapa' Po'partseshare'ñaña pe't David.

³⁶ Tarro'mar ama't Davidpa' allempo eñorache't Parets Puecamquëñ, allempopa' atetca'ye eñose'tña añecop ñeñtcha' Cristoterrets:

Yompor Parets atet otennan ñeñt Nepartseshar nepen na (ñeñtara ñeñtcha' Cristoterrets): “Te'pa' o'ch panorruerr arr necohuenrot allcha' pecohuentapreterrna. Attochña ama't ñeñt pe'moñe'tene' napa' o'ch name'ñatuerranet allochña'pa' o'ch atet perret ñeñt pemnen pa.”

³⁷ Ñeñtpa' atetca'ye ote'tña David, ñeñtcha' Cristoterrets'pa' ñeñtca'yeña Po'partseshar pe'tña ama't allempoteñ. Ñehua, ama't señoñeña Cristo ñeñt Po'partseshar pe't Davidpa' ñeñtña te'pa' o' alla po'mrenñ per ñaña.

Ñeñto'marña Jesús allempo yeçatendan shonte' acheñenesha' ñetpa' e'ñe pocsheñesha' e'mñoteñet.

*Atto Jesús'pa' a'metare'tenan ñeñt etsotayenayeñ ñoñets ñeñt atet anaret, ñeñt atet yeçenet ñetpa' ñeñtpa' ama cohuenaye' entapretenaneto Yompor
(Mt. 23.1-36; Lc. 11.37-54; 20.45-47)*

³⁸ All yeçaterraneterr ñeñtpa' atet oterraneterr:

—Amach semeñe'tapretatsche ommoñatenesha' pockapña ñeñtareta ñeñtet atarr et-sotayenayeñ ñoñets ñeñt atet anaref. Tarro'mar ñetpa' añe'naña atarr cohuen entenet o'ch chorrenet atarrom shetamuets o'ch atfa yorma'tatsetenet pa'shtam. Ñaña pommo'cheñoñetpa' atarrcha' mueneñet o'ch e'ñe pueñcha'na'teñoñ e'ñech cohuen huomñcha'tenanet acheñenesha' all chopeñe'chyenet.

³⁹ Ñaña ñetpa' añe'nach atarr muenenet o'ch anorrcha'tyenet judionesha' po'prahuo allecma anorryen ñeñt atarr añcha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet.

⁴⁰ Tarraña ñetñapa' rretornanesha'naña puerratañpesyenetña pa'paquell. Elloña e'ñe pommo'cheñoñetpa' añe atarr muenenet o'ch atet penet ñerra'mrrate' ñetpa' atarr cohuen acheñret ñeñto'marña arr ma'yochyenet all shontena acheñenesha'pa' amach tematenayaya ma'yocheneto. Ñeñto'marña te' napa' o'ch notas ñeñt atet petsa pommo'cheñoñ elloña atarrcha' a'coñcha'taretterret.

Atto rretornanesha' ñeñt atarr huocchañetets ñapa'cho'ña nosan quelle ñeñt Yomporecop

(Lc. 21.1-4)

⁴¹ Allempo Jesúsapa' alla anen a'yente'ye' allecma na'yenet quelle Parets pa'paclo. Allñapa' shonte' entenan acheñenesha' ñeñt na'yene' quelle Partsocop, shonte' ecñlayoretenesha' ñeñt na'yene' shonte' po'cñlayor Partsocop.

⁴² Jesúsña allpa' atfa cohuenanet, huapa ñaña puesheñarr rretornanesha' ñeñt atarr huocchañetets. Ñapa'cho'ña nosan eptallatoll quellayetoll ñeñt cobretall, ñeñt quellayerpa' ama tsa'teno, ama es sherbeno.

⁴³ Allempoña Jesúsapa' agotan pueyochresha'pa' atet otanet:

—Te'pa' o'ch notas, añ rretornaneshar ama't atarr huocchañpa' ñapa' po'ñoñca'ye atarr aton nosan quelle, ello metana'tuosan allohuen po'potantañechno allpon quelle ñeñt na'yenet ñet.

⁴⁴ Tarro'mar allohuenet ñeñt na'yenet quellepa' añaca'ye na'yenet ñeñt a'pcha'tyenet, ñañaapa' ama't atarr huocchañpa' e'ñe pomhuahuospan allohuen ñeñt echyen ñeñt muenatenaneñ attoch yoran alloch correna arr patsro.

13

Atto Jesúsapa' eñotatanet e'ñech a'mata'taretetuerra Partsopo'

(Mt. 24.1-2; Lc. 21.5-6)

¹ Allempo cha'nerrerr Jesús Parets pa'pacloñ puesheñarrña pueyochresha'pa' atet och:

—Maestro, pecuaye'ch, atarruaca' coñnesha'te' mapyet ñeñt allo orratyenet Partsopo', atarr coñnesha'chnote' Parets pa'paclechno.

² Jesúsñaapa' atet och:

—Ama't sentyeñ te' ñeñt atarr coñneshare' pocollechno tarraña esempopa' cherrcha' allempoch e'ñe a'mata'taretetuerra. Ama't e'ñe pueñarra mapyetpa' amach a'puerroña all allo orratenet Partsopo'.

Atto Jesúsapa' eñotatanet shonte'ch entyerret pa'namen ñeñticha' eñotaterrahuet o' cherrmoch allempoch mellapoterra

(Mt. 24.3-28; Lc. 21.7-24; 17.22-24)

³ Allempoña ahuenerr Olivopnopa' anorruenerr all, e'ñe alla yot Parets pa'pacloñ. Allempo anen all e'ñe ñaptochayet allpa' añe epuet Pedro ñaña Jacobo ñaña Juan ñaña Andrés. Ñetñapa' atet oteñet:

4—Te'pa' yemneñ o'ch p̄otey, ¿esempo'tcha'ña atet perra? Ñaña allempopa' ¿eso'tcha'ña yentyerr ñeñtcha' yeñotaterre' po'ñoçhpa' o'ch çherrmoch allempoch e'ñe etsotuerra ñeñt atet p̄oteneý te'?

5 Jesúsñapa' atet otanet:

—E'ñech señoterra allochñapa' amach esesha' seshquërraye.

6 Tarro'mar shonte'ch orrterrtsa ñeñtcha' ayçha'nataterre' neso'cheñ, ñeñtcha' otyerrets: “Napa' ñeñtenca'yeña Cristotets.” Ñetñapa' shonte'ch shequëret acheñenesha'.

7 Ñaña allempoña sapa' se'mare'tyerrcha' o' quellareñtsotyerr allampaño'mar, ñaña se'mare'tyerrcha' o' quellareñtsotyerra ora errañaren anetso'mar. Saña allempopa' amach çha seyorenatsto ama't e'ñe mamesha. Ñeñtpa' atetcha'ca'ye e'ñe po'ñoçh perra. Tarraña allempopa' amach çhena' allempoch e'ñe mellapoterra.

8 Pa'namen acheñ ñeñt e'ñe po'poñe'ttsocma mereñtsoretpa' ñetpa' quellaranna'terretcha'. Ñaña pa'namen anetso't añcha'tareteçhnopa' quellaterrancha' pueyochreneshaçhno. Pella'yerrach pats ora errañaren. Orrterrach allemeñ muecheñets o'ch e'ñe chaporrñatsotyerr errañaren. Orrterrach ñaña atpare'teñtsoçhno attoçhña atarrcha' ama'toçhtatanna'terret. Ñeñt atet o' notuas te'pa' ñeñtña allempopa' ñeñtcha'ña ñanom mueroçhtaterrahuetña allempo.

9 Sapa' señota'tach allempoch atet perrset. Sanmare'terrach añcha'taretesho allcha' otteñe'cherrset. Sashtare'terrach all judionesha' po'prahuo'mar. E'ñe same'ñeñoten na sapa' çhapaterrsetcha' añcha'taretneshesho'mar ñaña allo'tsa'yen ñeñt nanac añcha'taretnesha'; sapa' allcha' sa'metosnanña neñoñ.

10 Ñaña allempoch ama mellapoterra'pa' añ cohuen ñoñets alloch sequeshperra ñeñtcha' ñanom serrpare'tatyeretña allohuen pa'namen acheñenesha' ora errañaren allohuanen aña patsro.

11 Ñaña allempoch sanmare'tetyesa allcha' otteñe'cherrset ama't mameshapa' amach çha sellca'p̄satsto, amach sota'p̄sa'tatsto errotuachca'ye notoste' añcha'taretesho allempoch a'p̄to'tare'tapuen. Allempopa' añcha'ña se'ñoratosé Parets Puecamquëñ. Attoçhña amach e'ñe sotaye' se'ñoroso, añcha'ña se'ñoratosé Parets Puecamquëñ.

12 Allempoch atet perrsetpa' ñeñt e'ñe semo'nasheñ sepen ñato' ñeñtachca'ye sepo-muerre' attoch muetsaterres tarro'mar ñapa' amaca'ye ame'ñenno. Amapa' ñato' pomporpa' o'ch pomuerran ñaña puechemer. Ama't ñaña puechemerpa' ñato' patparño'tpa' o'paterranach pamo'mte' attoch muetsatater.

13 Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena. Ama'tcha' atarr mueroçhtaterrsetpa' tarraña esesha'ch e'ñe ahuanta'huanmue' e'ñe pueyemteño'ten na, ñeñtcha'ña a'queshpatare'tterrtsa.

14 'Ñehua, ahua't Daniel ñeñt a'mtaye't Yompor po'ñoñ, ña po'quellcopa' atet ote't: “Cherrcha' allempo ama't ñeñt ama masosyaye' enteno Yomporpa' ñeñtñapa' çherrcha' all ama't ñeñt e'ñe Partsocpa anareteñ. Ñeñtpa' ñeñtachca'yeña e'ñe a'çhencatuerrahuet.” Ñehua, ñeñtcha' lleyerre' añ ñoñetspa' ñetñapa' eñoteretepa'ch. Ñeño'marña ñerra'm esempoçh senter o' çherr all ñeñt ama pocteyaye allempoña ñeñt allpon Judeo'tsa'yen ñetñapa' allorocmuepa'ch yettra'terret, ahuanerretepa'ña aspentarerone't.

15 Atet ñerra'mrrate' puesheña'tets ñato' ñetña allempopa' eno'tsa'yenetcha' pa'pacllato, ñetñapa' sohuete'pa'chña tecma tarraña amachña be'tosatsetnomuetoña po'ponreto attoch yoratsre'tnomuet.

16 Ñaña puesheña'tets ñeñt pa'mro'tsenpa' allempoña ñetpa' amachña onatsterreto attoch erreta' pa'shtamuet.

17 Allempopa' atarrcha' llequëñets añecop ñeñt' ačhomenare' coyanesha' ñaña ñeñt' allohuen emaretetolleshačno. (Tarro'mar ñocpuetpa' atarr torrapo' attoch yetrra'tet ñamet.)

18 Ñaña Yomporcha'ña sema'yocha allochñapa' amach čha huapoto allempoch seyeta.

19 Allempopa' orrterrach mueročhteñets ñeñt'cha' atarr mueročhtaterre' allohuen acheñenesha'. Ñeñt' ama't ahuařapa' ama puemueročhtareto atet atarr nanac huomenc, ama't allempoteñ e'ñe errte' yečcatyene' Yompor allohuen pa'namen ñeñt' yentyen arr patsro. Allempoña ellopa' amach atet alla mueročhterrete'te ama't errponaña.

20 Allempoch atarr amueročhtataretterret. Tarraña allempoña Yomporpa' ñach oterrets "te'pa' allohuach." Ñerra'm amach oto allohuachpa' allempoña ama't puesheñarrapa' amach esesha' qeshperrtso. Tarraña ñeñt'ña ame'ñenaya ña ñeñt' acrenpa' ñocpuetñapa' oterrcha' "te'pa' allohuach."

21 'Ñehua, allempoch orameñ mueročhteñetspa' ñerra'm esesha' sote': "Secueña', arro'tsenca'yeña Cristo", amapa' o'ch otaset: "Secueña' tarro'tsenca'ye Cristo", sañapa' amach same'ñatstaneto.

22 Orretyerrachca'ye ñeñt'cha' otyerrets ñapa' ño'ña Cristotets. Tarraña ñeñt'pa' atřachca'ye shecare'tyerranña acheñenesha'. Orretyerrach ñaña ñeñt'cha' otyerrets ñapa' ño'ña a'mtene'ña Yompor po'ñoñ, tarraña ñeñt'pa'čho'ña e'ñech attecma shecare'tyerran acheñenesha', amachña Yomporeye'ña po'ñoñ a'mteno. Ñeñt'cha' atet shecare'tyerrets, ñetñapa' orrtatyerretcha' ñeñt' ama't ahuařa acheñenesha'pa' ama puentare, attochña cohuanrrortateretña acheñenesha'. Ama't ñeñt' Yompor pa'crarnesharpa' mueneñetañcha' ñeñt'e'nachña shequërret.

23 Señochepa'ch ama't ama čhena' mueročhteñetsopopa' na allohuenpa' o' e'ñe notuas.

*Atetcha' perra allempoch huerra Cristo ñeñt' Acheñetsosets
(Mt. 24.29-35, 42-44; Lc. 21.25-36)*

24 O'chña huañerr ñeñt' mueročhteñetspa' allempoñapa' čhoch mayerrets ñaña atsne'. Arrorrrpa'čho'ña o'huañcha' atsnom.

25 Rantočhnopa'čho'ña shorčha'terrcha' entoř. Ñaña ñeñt' huomenc orra'yetsa ento te' allempoña ama't ñeñt'pa' pella'yerrach.

26 Allempoñapa' entapuerrnetcha' na Ñeñten Acheñetsosets o'ch nesuanñperra osoř e'ñe nepartsoteño huen e'ñe necohuenteñesha'.

27 Nemñercha' nemllañořeñnaneshar, ñetñapa' a'yapačha'hueretcha' allemñateñ ñeñt' acren Nompor nocop e'ñech pa'tatsshemto'marohuen allotecma orrnotena. E'ñech allemñateñpa' a'yapačha'hueretcha' e'ñe allohuanen añ patsroř.

28 'Ñaña te'pa' señochepa'ch ñeñt' atet pena higočh. Ñehua, esempoch senteñ higočh o'ch emčachyen puetaçretollesha' allotcha' o'ch alla tapna'tyerrerr pasopaner, sañapa' ñeñt'ña señoatene'ña o' čhenmoch allempoch huorateterrerr.

29 Attecmach perra ñerra'm esempoch sentyerr ñaña ñeñt' allpono' notuas, sapa' ñeñt'cha'ña señoataterre' po'ñočh o'ca'ye čherrmoch allempoch e'ñe etsotuerra, o'ca'ye e'ñe allame'ttsamerra.

30 Napa' po'ñočh o'ch notas, acheñenesha' ñeñt' e'ñe corretsa te' ñetña amach e'ñe rromhueneta'pa' allempocmach e'ñech etsoterra allohuen añečno.

31 Esemphuañen añ enet ñeñt' senten te'pa' e'ñech chenca'huerra; patspa'čho'ña attecmach perra e'ñech chenca'huerra. Tarraña ñaña neñoñpa' amach chenquërro ama't e'ñe ahuařa.

32 'Tarraña ñeñt' yetroch nohuerrapa' ñeñt'ñaapa' ama eseshaye' eñotenaye. Ama't erro'tsente' atsne' ama't erro'tsen tsapro ñeñt'pa' ama't mellañořeñnesha' ñeñt' pue'ntaño'tsa'yen ñetpa'čho'ña ama't puesheñarrořetapa' amaña eseshaye'ña eñotenaye

allemPOCH nohuerrerr po'pocheño. Ama't na ñeññen Yompor Puechemeren napa'cho'ña te'pa' ama neñoteñe, ñapñaña Nompor Parets eñotene'.

³³ 'Sapa' seño'tach ñaña chocmach seño'srtenna ñaña chocmach sema'yochena tarro'mar sapa' amaña seño'teñe esempoch cherr ñeññeño allemPOCH nohuerra.

³⁴ Ñeññpa' e'ñe atet ñerra'mrrate' puesheñarr yacma ñerra'm esempo ta baçhayopa' o'ch na'nman pa'taruasañreçhno pa'paclo ñeññcha' apa'yesnom taruas e'ñe puesheña'ttsoçmuet. Ñaña po'poñ pa'taruasañer ñeññcha' cohue'ts yetarro't ñapa' atet'cha' otnom' pamo'mte': "Papa' chocmach peño'sretna."

³⁵ Ñeñño'marña te'pa' o'ch notas: Chocmuepa'ch seño'srtenna na ñeññen Samo'mte' sepen ñeññen sena'nmue' na nepaclo tarro'mar sapa'cho'ña ama seño'tenno esempoch nohuerra. Ñato' ellerrone'tcha' nohuena, ñato' rroçh tsapo, ñato' puetarenmoch allemPO eñen atollop, amapa' ñato' aromtañach nohuena.

³⁶ O'ch alla noterr'serr: Chocmuepa'ch seño'srtenna, ñerra'm machayota nohuerrapa' ñato'rraña alla nentuerres sapa' cha atarr semanrren.

³⁷ Ñeññ atet notenes sa ñeññpa' allohuenacpasca'ye, ñeñño'marña o'ch alla noterr'serr: Chocmuepa'ch seño'srtenna allohuenes.

14

*Atto atarr o'pateñet Jesús o'ch muetsatateret
(Mt. 26.1-5; Lc. 22.1-2; Jn. 11.45-53)*

¹ Epomtameñ palltena o'ch alla cherrerr pascuapo allemPOCH rrerranerr judionesha' pan ñeññ ama anare'teyaye chase'. Ñeññña pa'mñcha'tare'ternesha' pen allohuen judionesha' po'cornaneshar epuet ñaña ñeññ etsotayenayeñ ñoñets ñeññ atet anare't, ñetñapa' aña atarr e'nenet attoch shequët Jesús e'ñe a'nahua esheccha' rremuetpa' o'ch muetsatachet.

² Ñetñapa' otanna'tyenet:

—Tarraña te' pascuapo allemPO shontena acheñesha'pa' amachca'ye yerrmatsche allañaca'yeña cha ya'tsrre'moçhtateñ acheñenesha'.

*Atto puesheñarr coyanesha'pa' shosan eñmosa't Jesús poño
(Mt. 26.6-13; Jn. 12.1-8)*

³ Pam'tarrña Jesús'pa' Betanio'tsen all Simón pa'paclo, ñeññña Simónpa' ñeññ ose't puetsarñats. Jesús'ña'pa' all anen all rrallme'chen. Allña'pa' huapoña puesheñarr coyanesha', huapatan eñmosa't ñeññpa' e'ñe ñeññoche' ñeññ otenet nardo puese' ñeññ ama matsa'to. Huapatam'pes puetellm'ño ñeññña puetellen'pa' añ socheñet alabastro. AllemPOña ñeññ coyanesharpa' potam'psosan eñmosa't; ñeññña eñmosa'tpa' alla she' Jesús poño all rrallme'chen.

⁴ Puesheña'tetsña'pa' ñeññña cha atsrre'matanet, atet otanna'tyeset:

—Eso'mare'tña atta a'pertatosañña eñmosa't.

⁵ Ñeññ eñmosa'terpa' amaca'ye matsa'to. Chochña'cho' pomoseña'pa' ganañcha' shonte' quelle chachca'ye metananeñña ñeññ trescientos denario. AllemPOña'pa' apa'yesaneñcha' ñaña allohuen huocchañnesha'çhno.

Ñeññpa' atet sasare'chet coyanesha'.

⁶ AllemPOña Jesús'pa' atet otanet:

—Semnachña'ca'yeña coyanesha' ñeññ atet penen. Eso'mare'tcha' cha muene' sat-srre'moçhtana'tapa. Ñapa' atarrca'ye cohuen p'osen.

⁷ Tarraña ama'tcha' cho pomosaneñ eñmosa't alloch es apa'yesaneñ huocchañnesha'çhno, tarraña chocmachca'ye eñallña huocchañnesha'çhno arr patsro. Ñerra'm

esempo semneñ o'ch e'ñe cohuen sorrtyesamet ñocpuet čhocmach atet seřpanet. Tarraña nañapa' po'ñočpa' amachca'ye allo'na sentenno arr patsro.

⁸ Añ coyanesarpa' añca'ye apuenen ñeñt allpon ehyen. Ñeñt atto shosnan te' eñmosat nechtso, ñeñtpa' añecpa'naca'ye sherben tarremphua allempoch a'yana'terrnaneterr ñeñtcha' epuet pampa'pesnet.

⁹ Po'ñočca'ye notenes: Ora erracmañen añ patsro errach serrpare'tatyenet añ cohuen ñoñets allempopa' serrpare'chetcha' ñaña atet penen te' añ coyanesha', attochña ña'nach yerpuenet.

Atto Judaspa' pomuerran Jesús
(Mt. 26.14-16; Lc. 22.3-6)

¹⁰ Allempoña pueyochresha' ñeñt čharra' puechetsa epsheña, puesheñarrña ñeñt pa'so'cheñ Judas Iscariote, ñañaapa' allenta ahuo' allo'tsa'yen ñeñt pa'mcha'tareternesha' pa'yen allohuen judionesha' po'cornaneshar. Ñañaapa' añecpa sen attoch pomatateran Jesús.

¹¹ Ñeñtña atarr coshatenahuet. Ñetñaapa' allempocma a'pochtachet čhocca'ye tsa'chetña Judas allpon quelle. Allempoña ñapa' aña e'ñe cotape'chyen errotenotcha' pomuerranña Jesús.

Atto Jesúsapa' rrallme'chatnenan pueyochresha' attoch čhocmach yerpueret ñeñt yoten te' Santa Cena
(Mt. 26.17-29; Lc. 22.7-23; Jn. 13.21-30; 1Co. 11.23-26)

¹² Allempoña čhapa'muen ñeñt yetñatsro allempoch rrerreterr pan ñeñt ama anareteyaye chase' allempoch muetserreterr ñaña carrnero; ñeñtpa' pascuapo. Chapa'muen ñeñt yeterpa' pueyochresha'ñapa' atet ota'mueñet Jesús:

—Te'pa' ¿erra't pemneñ allcha' yeta'muena allcha' ya'potonap ñeñtcha' perra' pascuapo?

¹³ Allempoña ñeñt epsheña pueyochresha' ñeñtcha' mueña, Jesúsñaapa' atet otapanet:

—Te'pa' o'ch ahua'muenes anetso allcha' sepocte' puesheñarr yacma ñeñt anmamñene' oñ porrtó. Ñeñtña acheñerpa' o'ch socta'ner.

¹⁴ Allcha' be'tosuerr allcha'ña sebe'tosos saña. Allñaapa' atetcha' sotos ñeñt apacllatesha': "Yemaestorpa' atet oteney atetcha' yotosep: '¿Erro'tsena'tña pecuarto allcha' nerrallme'chos pascuapo epan neyochresha'?" "

¹⁵ Ñeñt apacllatesha'pa' gatapascha' eno po'cuarto ñeñt atarr a'yohuen e'ñe cohuen a'paret. Allcha'ña sañño'tosña ñeñtcha' yerra' pascuapo.

¹⁶ Allempo atet otuanet Jesúsapa' pueyochresha'ñapa' atetcho' pet, čha ahuanmatset. O'ña čhačha'tet anetso, e'ñe atet otapanetpa' ñetñaapa' e'ñečo' atet entoset. Allña añño'tosñañetña rreñets allcha' rrallme'chet ñeñte pascuapo.

¹⁷ Allempoña o' puenaso'tenpa' o' čhap ñaña Jesús all epuet pueyochresha' ñeñt čharrasheña puechena epsheña.

¹⁸ All anorrčhenet all rrallme'choset, Jesúsñaapa' atet otanet:

—Po'ñočca' notenes: Puesheñarrotes sa ñeñtescha'ca'ye nepomuerre'. E'ñe puesheñarr ñeñt e'ñe parro nerren ñeñtcha'ca'yeña nepomuerre'.

¹⁹ Ñetñaapa' čha atarr lleca'rrtet. A'p'to'tyeset e'ñe puesheña'ttset:

—Ta'm amate' na nepomuerrmochape.

²⁰ Ñañaapa' atet otarraneterr:

—E'ñe puesheñarrotes ñeñtes čharrasheñas sepchena epsheña ñeñtña netsapechaprene' nerrar, ñeñtcha'ca'ye nepomataterre'.

²¹ Po'ñočca'ye te'pa' allo'na sen etsotnomtsa ñeñt atet anuaret Yompor po'ñoñ nocop na Ñeñten Acheñetosets; attočha' muetsaterrnet. Tarraña nocoppa' e'ñe pocte'; añña

po'ñoçh acheñer ñeñtcha' nepomuerre' ñocopñapa' atarr llequëñets. Añ acheñrecoppa' e'ñeca'ye poctëñ amachñaçho' eñalletatstañe.

²² All rrallme'chenet, Jesúsñapa' chetan pan parasyoso'tan Yompor. Parasyoso'tuepa' shota'tan panpa' apa'yesan pueyochresha'. Ñeñtpa' atëñ otanet:

—Sagapyes, aña' mapa' ñeñtcha'ña nechets sepen.

²³ Alloitña' chetan ñaña orramets parasyoso'tuerrerrpa' apa'yerraneterr. Ñetña allohuenetpa' e'ñe orryesuahuet.

²⁴ Jesúsñapa' atëñ otarraneterr:

—Aña' nerrasca'ye sepeñ ñeñtcha' ashatareñtatsa shonte' acheñenesha' cop. Añ nerraspa' alloch e'ñe etserra a'pocataerra acheñenesha' Apuesho.

²⁵ Na te'pa' o'ch notas: Amach alla norrerre'te añ narmetsos tayoteñ tarremphuach allempoch alla ello yorrerrerr parro allempoch añcha'tareñtetuerra Yompor.

*Atto Jesús'pa' eñotatan Pedro ñapa' çhocmach a'nasocha
(Mt. 26.30-35; Lc. 22.31-34; Jn. 13.36-38)*

²⁶ Allempoña o' morrechuanmuet Yomporecoppa' ahuaneneterr Olivoño.

²⁷ Allña'pa' atëñ otosanet Jesús:

—Añ tsaprocmach sa allohuenespa' sa'ypo'ña'huanmuencha' tarro'mar Yompor po'ñoñopa' atëñca'ye anuareñ, ñeñtpa' atëñ ote't Yompor nocop: "O'ch nemtsater ñeñt cohuanpene' carrnero, po'carrnerorña'pa' çhach matrra'tyesa allemeñ."

²⁸ Jesúsñapa' atëñ otarraneterr:

—Tarraña esempoch alla netanterra napa' nanomcha' otarrtsa Galileo.

²⁹ Allempoña Pedro'pa' atëñ och:

—Ama't allohuenet ñerra'm a'ypo'ña'huerrpetcha'pa' ñaña ama't ahuañapa' amach na'ypo'ñerrepe.

³⁰ Jesúsñapa' atëñ otererr:

—Po'ñoçhca'ye o'ch notañ, aña tsaprocmach ama't e'ñe epocha amach eñena' atollop pañapa' o'ch ma'poch pa'nasotenna.

³¹ Pedroña'pa' alla otererr:

—Ama'tcha' yerromhuanen parro'pa' ñaña po'ñoçhpa' ama't parrocha amach na'nasotaño.

Allohuen pueyochresha'pa' ñetpa'çho'ña e'ñe attecma otyenetañ ñamet.

*Atto Jesús'pa' ma'yochuena all oteñet Getsemaní
(Mt. 26.36-46; Lc. 22.39-46)*

³² Alloitña'pa' çhap Jesús pueyochreshohuen all narmetsmo, ñeñtpa' añ pa'so'cheñ Getsemaní. Allña'pa' otosanet:

—Te' sapa' allach sanorrça'tos arrma, napa' o'ch nema'yochena'.

³³ Allña'pa' aña anmos Pedro ñaña Jacobo ñaña Juan. Jesúsñapa' ama't mameshapa' ama eñmateno pueyoçhro, çha nanac allpatena.

³⁴ Allempoña'pa' atëñ otosanet:

—Napa' çha chepoçhenen nellquëña neyoçhro, çha muene' nerromuen nellquëñoñ.

³⁵⁻³⁶ Ñaña'pa' ahua' a'yenteye' all rremosa patso atëñ ma'yochosa:

—Apa, pocoppa' ama eñalle ñeñt ama erroten apen penteno; ñeñto'mar te'pa' noteneñ amach pemnatatsche o'ch çhapon a ñeñt atarr amuroçhtatañ* nenten na. Tarraña ñerra'm paçh muenatspa' añepa'çña atëñ peñaton ñeñt pemnen pa, amachña añeyaye ñeñt nemnen na.

* **14:35-36** Ñeñt amuroçhtatañ ñeñtpa' po'ñoçh ñeñtpa' añ atma'ntatareñ ñerra'mrrate' ñeñt atarr pesherr yorren orranitsoñ.

³⁷ O'ña atet ma'yochuapa' o' ahuerri allo'tsa'yen pueyochresha' ma'psheña. O' cherr allpa' alla entuerranet ñetñapa' cha atarr manrrenet. Allempoñapa' otuerran Pedro:

—Cha't Simóna atarr pemos. Ama't mamesha are'tña acuenaye' penteno.

³⁸ E'ñe señose'rteño'tpa' choña sema'yochosa allochñapa' attoch amach sañeña a'puerrataterro topateñets ñeñtcha' sehuapoya atarr huomenc. Ñeñtpa' ama't atarr semneñeñ tarraña sechetsñapa' amaca'ye ahuamenca'teye' penso, ñeñto'marña notenes chocmach sema'yochena.

³⁹ Jesúsñapa' alla ahuerri puepocheño o'ch ma'yocherrerr, ñeñtara atet otuerrerr.

⁴⁰ O'ña alla ma'yochuerra'pa' allempoñapa' huerrerr, alla entuerranerr pueyochresha' ñetñapa' o' alla manrretererr, cha nanac atserr moñe'tenet. Ama eñoteñeto errotencha'ña otapuerete't.

⁴¹ Jesúsñapa' alla ahuerri ma'yochatsa. O'ña ma'yochuerra'pa' allempoñapa' alla huerrerr poma'pocheño'hua, atet otuerranerr pueyochresha':

—Ama't teme'ttsenpa' alla't semanrren; ama'tpa' alla sames. Te'pa' ñeñtapa'ta, señoche'pa'ch o' chap allempoch pomataterri na Ñeñen Acheñetosets atto'tcha' errotuanen perren ñeñt atarr ochña'tenesha'.

⁴² Te'ñapa' setanterra o'ch ahuey o'ch yepocte'. Secue'ca'ye ñeñtcha' nepomue' ñeñtpa' alla'tsena.

Allempo rromoset Jesús

(Mt. 26.47-56; Lc. 22.47-53; Jn. 18.2-11)

⁴³ All atet eñorena Jesús'pa' cha huapatsa puesheñarr ñeñt pueyochresha' peneñ ñeñt a'pchenahuet epsheña, ñeñtñapa' añ Judas. Ñaña'pa' huacha'tatan shonte' acheñenesha' occhelletareret ñaña etsachperetareret. Ñehua, añ ñeñt huacha'ttsapa' añ mueñenahuet ñeñt pa'mcha'tare'ternesha' pen allohuen judionesha' po'cornaneshar ñaña ñeñt etsotayenayeñ ñoñets ñeñt atet anaret ñaña ñeñt pompornesha' pen allohuen judionesha'. Ñetca'yeña mueñene'ña ñeñtcha' rromuenaya' Jesús.

⁴⁴ Ñehua, Judas ñeñtcha' pomuerre' Jesús'pa' ñaña'pa' atet otnoman acheñenesha' ñeñt anom attoch cheme'toset Jesús. Ñeñtpa' atet otnomanet:

—Erra'tsencha' nehuomcha'tos e'ñe netso'ttsapa'teño'tpa' ñeñtca'yeña Jesús. Sañapa' ñeñtcha'ña serrmospa' o'ch sanem' e'ñe sehuamencocma.

⁴⁵ Allempoña huapapa' cha ponmosaya Jesús huomcha'tos e'ñe puetso'ttsapa'teñesha', atet otos:

—Tsapo, Maestrocha'.

⁴⁶ Allempoña acheñenesha'pa' ponmosyet Jesús'pa' rromoset e'ñe po'huamencocma.

⁴⁷ Allempoña puesheñarr ñeñt Jesús pueyochresha' ñaña'pa' po'cchella cheta'pa' o'ch chonto'tapanen cornesha' pueñañra puetepa'tcha' tsorroñ. Ñeñtpa' año pueñañra ñeñt pa'mcha'tare'ter pen allohuen judionesha' po'cornaneshar.

⁴⁸ Allempoña Jesús'pa' atet otan acheñenesha':

—Eso'mare't sehuacha'tennanaña e'ñe occhelletareroches ñaña etsachperetareroches attoch serrma'n. Napa' ¿e'ñe't atet sentenen ñerra'mrrate' eñeten?

⁴⁹ O' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaña serrma'ne'te. Ama'tpa' atepa'ca'ye perra allochñapa' attoch e'ñe etsotuerra ñeñt allpon quellca'yese't nocop ñeñt a'mta'yese't Yompor po'ñoñ.

⁵⁰ Allempoña allohuen pueyochresha'pa' allorocma a'ypo'ña'huanmet, ñetñapa' yetra'tuet.

Atto a'yetachet puesheñarr huepuesha' allempo muene' rromuetañ ñaña

⁵¹ Ñehua, allempopa' allo'tsen ñaña puesheñarr huepueshachor ñeñt epuet ta Jesús. Ñaña'pa' cha muelle'mquèn atta epamco'tnoma. Ñapa'cho'ña ahuo'ch rremuetaña'

⁵² aña a'meyampereta' allo eþamco'tena, hupeshachorñapa' muelle'mcota a'yetachet.

Allempo chapata'mueñet Jesús all apcha'muena allohuen judionesha' pa'mcha'tareternesha' ñeñt a'pocatyene' ñoñets

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Acheñenesha'ña ñeñt rromose' Jesúsapa' ñetñapa' arr anmet allo'tsen ñeñt pa'mcha'tareter pen allohuen judionesha' po'cornaneshar. Allñapa' all apcha ñaña ama't allohuen cornaneshachno ñeñt pa'mcha'tareternesha' pen judionesha' po'cornaneshar ñaña ñeñt pompornesha' pen allohuen judionesha' ñaña allohuen ñeñt atarr etsotayenayeñ ñoñets ñeñt atet anaret judioneshacop. Ñetña allohuenet e'ne all apchenet.

⁵⁴ Pedropa' ñapa'cho'ña cote' tarraña ñapa' chenta' en a'yot. Cornesha' po'pampopa' allñapa' anorros epuet ñeñt guardianesha' all a'torenet tso' all shotoset parro.

⁵⁵⁻⁵⁶ Cornaneshana' pa'mcha'tareternesha' ñaña allohuen ñeñt chocma a'pocatyene' allohuen ñoñets ñeñt judioneshacop, ñetñapa' aña atarr e'nenet ñeñtcha' a'metare'tamþose' Jesús allochñapa' attoch muetsatachet. Ama't shonte' huapatsañ ñeñtcha' toma'tamþosayeñpa' añcha'taretnesha'ña ama't puesheñarrotetapa' ama eseshaye' entayeña attoch muetsatateret tarro'mar allohuenet ñeñt toma'tamþosayeñpa' ama e'ne attecmaye' otosetofña Jesúsocop.

⁵⁷ Allempoña tomcha'tos ñaña po'potantañ; ñetpa'cho'ña toma'tamþoset Jesús; ñetñapa' atet otoset:

⁵⁸ —Ya ahuañapa' ye'me'tca'yeña Jesús atetca'ye ote't: “Napa' o'chca'ye na'materrñañ añ Parets pa'paquell ñeñtapa' acheñaca'ye pueyeçhcatar; tarraña poma'pamtañoñapa' napa' o'chca'ye alla natomater po'poñ ñeñtapa' amachca'ye añeyaye ñeñt yeçhcaten acheñ.”

⁵⁹ Tarraña ama't atet toma'tamþesyesosetañpa' ama e'ne attecmaye' otoseto.

⁶⁰ Allempoña cornesha' ñeñt nanac añcha'taret allenta'tompa' atet otan Jesús:

—Pañapa' ¿ama'tcha'ña þanapaneto? ¿Errofenote'tña otteñe'chenpet?

⁶¹ Jesúsñapa' ama eñoreno, ama anapuenaneto. Allempoña cornesha'pa' alla otererr:

—Te'pa' o'ch notap, nemneñ o'ch þoten þapa' ¿þa'tña ñeñteþte' Cristotosets? ¿Ñeñteþte' Parets Puechemereþ, ñeñt Parets chocma ya'ye'choçhtateññañ?

⁶² Jesúsñapa' atet och:

—Napa' ñeñtenca'ye. Elloña napa' o'chca'ye notas, senterrencha' na Ñeñten Acheñetosets o'chca'ye alla nanorruerr Parets po'cohuenrot. Ñaña po'pocheño o'ch sentapuerren o'ch nesuanþerra osot Yompor pue'ntañot.

⁶³ Cornesha'ñapa' ñeñta e'mpa' allenta' rrarre'tan pa'shtam e'ne patsrre'mueñoñ, ñeñtapa' atet ot:

—Te'pa' amachca'ye ye'natsche po'psheñeñ ñeñtcha' a'metamþose'.

⁶⁴ Te' ama't sapa' o'ca'ye se'm atet achmare'tenan Yompor. ¿Errofena't senteñña sa?

Ñetña allohuenetpa' atet otyeset:

—Ña po'ñoçhpa' atarrca'ye nanac achmare'tenan Yompor, pocte'ñaçho' te'pa' o'ch semtsatach.

⁶⁵ Allempoñapa' a'coshare'tyeset, huancacalle'chet pa'clloyotpa' çhota'tyeset. Pachmare'teñoñet atet otyeñet:

—Te'ña eñoratenperrepa' Parets allochñapa' attoch þotey esesha'te'ña peçhota'tyene'.

Ama't guardianesha' ñetpa'cho'ña o' çhota'chet.

Atto Pedropa' a'nasotana Jesús

(Mt. 26.69-75; Lc. 22.56-62; Jn. 18.15-18, 25-29)

⁶⁶ Pedroña allempopa' patsote'tsen pampatollo. Allempoña allpa' huapa puesheñarr coyanesha' ñeñt sherbene' cornesha'.

⁶⁷ Ñaña' entosan Pedro all shotenana tso'. Cohuana'tospa' atet och:

—Paca'ye e'ñe cotaye'tña Jesús ñeñt nazareto'marnesha'.

⁶⁸ Pedroña anapue'pa' cha a'nasochapa' atet och:

—Napa' amaca'ye nentareña, ama't napa' amaca'ye neñoteñeña ñeñt atet potenen.

Allempoña Pedropa' ahuer, cherr allotecma be'tenet o'ch chapuet o'pono pampo. Allempoña allenta eñen atollop.

⁶⁹ Allña' entuererr coyanesha' ñeñt cornesha' pueñañra. Ñaña' atet oterranerr ñeñt parro allo'tsa'yenet:

—Añ acheñerpa' ñeñtca'ye e'ñe parro yemtenet ahuaña.

⁷⁰ Pedroñapa' alla a'nasotererr. O'ña o'chterrerrpa' ñeñt tomcha'tyets all, ñetpa'cho'ña atet otererr:

—Po'ño'chca'ye p'apa'cho'ña e'ñeca'ye parro seyemtena tarro'mar p'apa'cho'ña galileo'marnesha'pca'ye ñeñto'mar e'ñe atet peñen ñerra'm ña.

⁷¹ Allempoña Pedropa' e'ñe puehquëñoñanetpa' atta otatse'tyerraneterr, ñeñtpa' atet otanet:

—Napa' e'ñe Yompor pa'so'chño notenes, ñerra'm amate' po'ño'choye' notensopa'te'pa' nerromuepa'. Napa' po'ño'chca'ye ama nentareña añ yacmar.

⁷² O'ña atet otuanetpa' e'ñepa'tcha' allempocma puepocheño eñeña atollop. Allempoña Pedropa' alla yerpuerrana ñeñt atet oteñ Jesús: “Ama't e'ñe epocha amach eñena' atollop p'aña'pa' o'ch ma'poch p'anasotenna.” Allempoña Pedropa' allenta atarr yahuenta huomenc.

15

Allempo chapata'mueñet Jesús allo'tsen amcha'taret Pilato (Mt. 27.1-2, 11-14; Lc. 23.1-5; Jn. 18.28-38)

¹ Tsapa't o' taya puetarenpa' ñeñña pa'mcha'tareternesha' pen allohuen judionesha' po'cornaneshar ñetña'pa' apcha'mueneterr parro epuet ñeñt pompornesha' pen allohuen judionesha' ñaña añ ñeñt atarr etsotayenayeñ ñoñets ñeñt atet anaret epuet ñaña po'potantañ ñeñt po'taruas pene' o'ch a'pocatan ñoñets judioneshacop. Ñetña'pa' cotape'chatannetset, attoña o' e'ñe a'pocata'mueñet atetcha' p'a'mueñet Jesús. Jesúsña'pa' o' huancota'tuet allempoñapa' anma'mueñet allo'tsen amcha'taret Pilato (ñeñt nen gobierno' Romot ñeñt amcha'tarettetsa allo'marneshacop).

² Pilatoña a'p'to'tapan Jesús'pa' atet och:

—Papa' ¿p'a'tña amcha'tarettetsaña judioneshacop?

Jesúsña'pa' atet och:

—Napa' ñeñtenca'ye atet poten.

³ Ñeñt pa'mcha'tareternesha' pen allohuen judionesha' po'cornaneshar, ñetña' allpa' shonte' pa'namenot otteñe'cha'mueñet Jesús.

⁴ Pilatoña'pa' atet otererr:

—Papa' ¿are'tcha'ña panapaneto? ¿Ama't pe'muenanetoña ñetpa' pa'namenot a'metare'tam'penpet?

⁵ Jesúsña'pa' ama't e'ñe parrocha ama anapuenaneto. Ñeñto'marña Pilatopa' cha atarr cohuana'tapan Jesús.

Atto amcha'taret Pilatopa' otanet, ama'tpa' chosa muetse'ña Jesús (Mt. 27.15-31; Lc. 23.13-25; Jn. 18.38-19.16)

⁶ Ñehua, ñetpa' atetca'ye ye'chenet. E'ñe pate'tets char allempoch cherrerr pascapo, ñeñña amcha'taret ñeñt nen gobierno' Romotpa' ñaña'pa' chocmach a'rroyerran

puesheñarr judioneshacop ñeñt ayottam̄psarettetsa allempo, ñeñtara ñeñt pamo'ts penet ñet. O'ch apanet erra'tsencho' enamuenet ñeñt muenenet ñet. Ñeñtpa' añecop a'rroyenanetña puesheñarr pamo'tset attoch e'ñe cohuen coshatenan allohuen judionesha'.

⁷ Ñaña e'ñe allempopa' allo'tsen puesheñarr judionesha' ñeñt ayottam̄psarettetsa ñeñtpa' añ pa'so'cheñ Barrabás. Ñehua, ñeñt Barrabás ahuañmo'choteñ yottam̄peñet epuet po'potantañ tarro'mar ñetpa' ñetca'ye yeçhatenetña acheñenesha' atpare'chetepa'to' am̄cha'tareñ ñeñt nen gobierno' Romoñ. E'ñe pa'tpare'teñoñet o' muetset ñaña acheñ.

⁸ Allempoña acheñenesha'pa' cha'cha'tet Pilateshopa' ñetñapa' atet otoset:

—Te'pa' o'ch pa'rroyerrnay puesheñarr ñeñt atet chocma peperrnaye't.

⁹ Pilatoñapa' atet otapanet:

—Sapa' ¿añe'tña semnen o'ch na'rroyerrnas ñeñt am̄cha'tarettetsa judioneshacop?

¹⁰ Ñehua, Pilatopa' atet otapan acheñenesha' tarro'mar ñapa' eñotenan cornaneshachno pa'm̄cha'tareñenesha'pa' ñetpa' e'ñeca'ye pue'moñe'tateñme'chatsa pomueñetña Jesús.

¹¹ Tarraña ñeñt pa'm̄cha'tareñenesha' pen judionesha' po'cornaneshar ñetñapa' añ a'tarr co'tape'chatenet acheñenesha' attoch ñetpa' allohuenetpa' o'ch ochet Pilato: “Añcha' pa'rroyerrnay Barrabás.”

¹² Allempoña Pilatopa' alla o'terraneterr:

—Ñehua, añ ñeñt soten judionesha' pa'm̄cha'tareñer, ñapa' ¿erroñe'tcha'ña nepe'?

¹³ Ñetña puerranare'teñoñetpa' atet otyeset:

—Ñapa' ¡pecorso'tam̄psachñaca'ye!

¹⁴ Pilatoñapa' atet o'terraneterr:

—Ñapa' ¿eso'tña pen ñeñt ama't mameshapa' ama pocteye' sentapreteñe?

Ñetñapa' alla rrannarterreterr huomencpa' atet o'terreterr:

—Ñapa' ¡cho'pañaca'yeña corso'tam̄psate'!

¹⁵ Pilatoñapa' añ a'tarr muenen o'ch coshatan acheñenesha' ñeñto'marña a'rroyerranet Barrabás ñeñt enamueñet. Allempoña ashtatan ñaña Jesús allotñapa' otan po'solltarneshar:

—Te'pa' o'ch secorso'tam̄peña'.

¹⁶ Ñehua, solltarnesha'ña ama aneñeta' allcha' corso'tam̄psoset arrña ñanom anmetña Jesús am̄cha'tareñepahuo. Allña agotachet allohuen po'potantañ solltarnesha' ñeñt allo'tsa'yen o'ch e'ñe apçhet Jesúsesho.

¹⁷ Allñapa' pa'llocchame'teñoñet Jesús chorrachet shetamuets tsamamueno' queluamamtena ñeñt pa'shtam pen ñeñt po'ñoçh am̄cha'tarettetsa. Pellta'toñet ñaña choyo'mets agreçhpa' ñeñtña choyo'mtchet ñeñt atet choyo'mtena ñeñt po'ñoçh am̄cha'tarettetsa.

¹⁸ Pachm̄are'teñoñetpa' atet oteñet:

—¡Puetare' am̄cha'tareñecha' atarruaca' cohuenep̄te! pa' ñeñte'p̄ judionesha' pa'm̄cha'tareñere'p̄.

¹⁹ Pueche'tatseteñoñet asto'tame'teñet tsachpo poño, a'coshare'teñet, allempoña con-corpana'teñet, ottenetañ ñerra'mrrate' cho' muechatse'teñet.

²⁰ O'ña achm̄are'tuahuetpa' allempoñapa' rrotam̄peret shetamuets tsamamuen chor-rateret e'ñe ña pa'shtam. Allempoñapa' anmet a'yo allcha' corso'tam̄peñeta'.

Atto corso'tam̄psoset Jesús

(Mt. 27.32-44; Lc. 23.26-43; Jn. 19.17-27)

²¹ E'ñe ahuanmatsetpa' allña oñenetpa' o' poctet puesheñarr yacma ñeñt cire-neo'marnesha' ñeñtpa' añ pa'so'cheñ Simón ñeñt errte' huerrtsa a'yoñ. Ñaña'ña' allenta

chechatnomet po'corsoch. Ñeñña Simónpa' ñeñtpa' añ pompor pen Alejandro ñaña Rufo.

²² Chapachet all socheñet Gólgota ñeñt yoten yeñoño Poñetallepno.

²³ O' chapachet allpa' Jesúsapa' aposetañ vinos ñeñtpa' añ atsetaret pueretso ñeñt atarr pesherr ñeñt otenet mirra tarraña Jesúsapa' ama mueno o'ch orr.

²⁴ Allempoña o' corso'tam̄pesuetpa' solltarnesha'ñapa' allenta yellsheñe'chatoñet pa'shtam po'suertot attoch orrtet e'ñe puesheña'ttsetpa' o'ch yorayesñañet pa'shtam puema'tets.

²⁵ O'ña enome'ta'muen atsne' allempoca'ye corso'tam̄psa'mueñetña Jesús.

²⁶ Ñehua, poño'tpa' all corsocho all noñet tsachtall aquellcaret attochña eñoteñet ñeñtecop corso'tam̄peñet. Ñeñña quellecpa' atet oten: "Añpa' ñeñtca'yeña judionesha' pa'm̄cha'tareter."

²⁷ Allña corso'tam̄pset epuet ñaña epsheña eñet, puesheñarrpa' nosñañet po'cohuenrot, po'psheñeñña' nosñañet pue'chcoterot.

²⁸ Attoca'yeña etsoterraña Yompor po'ñoñ ñeñt atet anuaret ahuatoteñ Cristocop; ñeñtpa' atetca'ye oten: "Ñapa'cho'ña e'ñech attecma enteret ñerra'mrrate' ñeñt atet p̄atse'tyene' ñeñt ama pocteyaye."

²⁹ Ñeñña oñmachets allpa' ñetpa'cho'ña chocma achm̄are'tneñet. Pachm̄arño'tetpa' coño'coñtana'tyesneñet, ñeñtpa' atet otyesneñet:

—Pa ñeñteḗ p̄ommo'cheño'tpa' p̄otatse'te't p̄o'ch a'materrayen̄ Parets pa'paquell, poma'pamtañocmo'ch alla p̄atomatereñ,

³⁰ te'ñapa' p̄a'queshp̄aterrañaca'ye e'ñe p̄añeña, pesuerrañaca'yeña tayecma corsocho't.

³¹ E'ñe attecma achm̄are'teñ ñaña ñeñt pa'm̄cha'tareternesha' pen judionesha' po'cornaneshar ñaña ñeñt etsotayenayen̄ ñoñets ñeñt atet anaret. Ñetñapa' e'ñe parrocma pachm̄are'teño'tpa' atet otatse'tyeñet:

—Te'ña p̄apa' o' p̄a'queshp̄atyets po'potantañ, p̄añapa' eso'mare'tcha'ña te'pa' ama errotenot̄ p̄a'queshp̄aterroña e'ñe p̄añeña.

³² E'ñe pachm̄are'teño'tetpa' atet otyereter:

—Papa' ñeñteḗpo'ca'ye Cristotostañ, ñeñteḗpo'ca'ye israelnesha' pa'm̄cha'tareterpeñ, pesuerrañaca'ye corsocho't allochñapa' attoch yame'ñaḗa yam̄a.

E'ñe attecma pe' ñaña eñet ñeñt epuet corso'tam̄peñet, ñetpa'cho'ña atarr es otnare'chet allot po'corsocho't.

Atto rroma Jesús all po'corsocho

(Mt. 27.45-56; Lc. 23.44-49; Jn. 19.28-30; Heb. 9.11-14)

³³ O'ña chap poctopa' o'huañ atsnom o' e'ñe checmetua ora errap̄aren añe patsro, o'ña ellerrotenmochapa' o' alla puetarerr.

³⁴ Allempoña ellerrotnenmochapa' Jesúsñapa' rrana huomenc, ñeñtpa' atet ot e'ñe ña po'ñoño:

—Eloi, Eloi, lama sabactani. Ñeñña ñoñtsorpa' atet oten: Eso'maruachñaca'ye Neyompor-recha' p̄a'ypo'ñerren.

³⁵ Puesheña'tetsña ñeñt tom̄chets all ñeñt e'mue' atet oten Jesús, ñetñapa' amaca'ye e'mueññañeto po'ñoñ ñeñt atet oten, ñeñto'marña ñetpa' cha otyeset:

—Se'mueñe't o' cha chore'tante' Elías ñeñt a'm̄taye't ahuañ Parets po'ñoñ.

³⁶ Allempoñapa' mata puesheñarr ñeñt allo'tsen, e'chomosan chella'so ñeñt atsotso'tpo' o' ne' tsachp̄opa' allotña tsotso'tatosanña Jesús. Ñaña' atet otanet:

—Te'pa' o'ch yecue' Elías ñato'rraña o'ch huapapa' ñach a'suatose'.

³⁷ Allempoña Jesúsapa' o' alla rranerrerr huomencpa' rroma.

³⁸ Allempoña besom allo yottañpeññañet Parets pa'paquëll o'ponopa' ahuepa't rrrarra'nom e'ñe poctacma, ellopa'tetsta enoteñ e'ñe sotatsohua.

³⁹ Capitánña ñeññ romo'marnesha'pa' ñeññ tets allame'tets ñaña'pa' e'ñe entenan Jesús atto rroma, allempoña ñapa' atet ot:

—Po'ñočuaca'ye añ acheñerpa' Partsepa'tca'ye Puechemer.

⁴⁰⁻⁴¹ Allo'tsa'yen ñaña shonte' coyanesha'chno, ñetñapa' a'yoña cohuanrrortenet. Ñetpa' ñetca'yeña cota'huanmue'ña Jesús Galileoteñ ñeññ sherba'yesaye't. Ñeñtpa' María Magdalena ñaña po'psheñeñ María ñeññ Jacobo pachor ñaña José. Ñehua, ñeññ Jacobopa' puechoyomer peñ José. Allo'tsa'yen ñaña shonte' po'potantañ coyanesha'chno ñeññ cota'yesaye't Jesús Jerusaléño.

Atto pampuet Jesús

(Mt. 27.57-61; Lc. 23.50-56; Jn. 19.38-42)

⁴² Atteñapa' o' ellerren. Ñehua, ñeññ yetñatsropa' allempoca'ye chocma añño'tena judionesha' ñeññ tsapatecop allempoch ameserretter.

⁴³ Ñeñño'marña allempopa' Joséña ñeññ arimateo'marnesha'pa' ñaña'pa' ama pueñcha'ñoñeye' ahuoso Pilatesho o'ch oteña' pocte'ch eñch ñach a'suatose' Jesús ñeññ rromuets corsocho. Ñehua, ñeññ Josépa' atarr cohuen acheñ, atarr añcha'na'tpo' enteñ allohuen ñeññ parro a'poctatenet ñeññ llequëna allohuen judionesha'. Ñapa'cho'ña ñeññ atarr cohueñ Yompor esempohuañencha' o'ch atarr ayochreshatterra.

⁴⁴ Allempo atet enamosan Pilato, Pilatoñapa' atet ot:

—Ta'm ¿po'ñoçhte' o' rromaña e'ñe mamecma?

Allempoñapa' agotan solltar po'cañtanerpa' a'p'to'ch:

—¿Po'ñoçha't o' rromaña Jesús?

⁴⁵ Capitánña'pa' atet otos:

—Po'ñoçhca'ye o'ca'ye rroma.

Pilatoñapa' atet otan José:

—Ñeñteñapa' pa'suater corsocho'tpa' pañerca'ye.

⁴⁶ Joséña'pa' allenta rañtosana emarr shetamuets, çherr corsochopa' a'suaterranña Jesús corsocho't all rromuen. Epatse'ch shetamtso ñeññ e'ñe cohuen. Allempoñapa' aneññ allcha' pampueña'. All eñatenan mapuetpon allca'yeña nenana'ña Jesús. Allempoñapa' attome'tuerrñañ mapue' allo yottañpesner ñeññ puepampuer pa'ch.

⁴⁷ All cohueñ María Magdalena ñaña po'psheñeñ María, José pachor. Ñetñapa' e'ñe enteñet all na'neret Jesús.

16

Atto tanterra Jesús

(Mt. 28.1-10; Lc. 24.1-12; Jn. 20.1-10)

¹ O'ña huañ yet allempo amesenet, María Magdalena ñaña Salomé ñaña po'psheñeñ María ñeññ Jacobo pachor, ñetñapa' rañta'yesnenet eñmosañ ñeññcha' anma'muenet tsapat Jesús puepampro alloch a'yana'tereta' ama't rromota.

² Tsapat allempo motta'muena yetñats temenc ñetñapa' e'ñe ahuatecma ahuanma'muenet Jesús puepampro. O' taya huapa'muena atsne'pa' allempo ahuanma'muenet.

³ Ñetñapa' otanna'tyesnomuet:

—Ta', esesha'ch a'rrote'te'ña mapue' añecmuen ñeññ allo yottañpeñet attoch yebe'tos all puepampro esheccha' ya'yana'tera' eñmosaño.

⁴ Ñetña çhapatseta all, cohuoostseta entoset mapue' o' a'rrote'tare'ttena a'yenet, ama't ñeññ mapue'pa' añecmuen.

⁵ Ñetña allempo be'tososet puepampro allñapa' all entoset puesheñarr huepuesha' all anen po'cohuenrot. Pa'shtamñapa' atarr huallama't, cha torats panet pueyoçhret.

⁶ Ñeñña mellañoñerpa' atet otapanet:

—Amach cha seyorenatsto. Napa' neñotenes añca'ye semnen o'ch senta'mueñ Jesús ñeññ otenet nazareto'marnesha' ñeññ o' corso'tamperret. Tarraña ña te' o'ca'ye tanterra, ama arro'tsenaro. Secueña'ca'ye all neretañ, amaca'ye eñalle.

⁷ Allempoña mellañoñeñña' alla oterraneterr:

—Te'pa' o'ch ahuerres o'ch sotuer Pedro ñaña po'potantañ pueyochresha', Jesús oten o'ch ota o'ch ahuer Galileo. Choscha'ña ahuanmatsa saña allochñapa' allcha' senter ñeññ atet otase't ahuaña.

⁸ Allempoña coyaneshachno atet otarettet all Jesús puepampro, ñetña cha'nmaçherretpa' matenacma ahuanerret po'yorñoñetpa' cha yonshema'tyesnerret. Pomchañotet ama't e'ñe eseshapa' ama errotenaye' otenaye' entnerreto.

*Allempo tanterra Jesúsapa' añ ñanom orrterra María Magdalena
(Jn. 20.11-18)*

⁹ Ñehua, ahuaçecma tanterra Jesús aña yetro allempo motta'muenerr yetñats temenc. Allempo tanterrapa' añ ñanom orrterra María Magdalena. Ñeñña Mariapa' cançherrsheña oneñeñ ñeññ chorraye't Jesúsñapa' e'ñe queçhpatamñpsatuer.

¹⁰ Mariñaapa' allenta ahuo' o'ch otenana' ñeññ epuet yemte't Jesús all puellquëñoñet atarr yahuanrrortenet.

¹¹ Ñetña allempo e'mare'chet o' tanterra Jesús, Mariapa' o'ca'ye enter, ñetñaapa' arepa'tcha' ame'ñyeto.

*Allempo Jesúsapa' orrterrana ñaña epsheña pueyochresha'
(Lc. 24.13-35)*

¹² Po'pocheño Jesúsapa' e'ñe po'poñot orrterrana epsheña pueyochresha' allempo chopeñe'chenet allampaño'mar.

¹³ Ñetñaapa' allenta puerrerret o'ch otueret po'potantañ, arepa'tcha'ña ame'ñare'ttauerreto ñeññ atet enteret ñamet Jesús.

*Atto Jesúsapa' otnerran pueyochreshachno ñetpa' atetcha' pa'yerret
(Mt. 28.16-20; Lc. 24.36-49; Jn. 20.19-23)*

¹⁴ Po'pocheño Jesúsapa' alla orrterrannerr pueyochresha' çharrasheña ñeññ puechetsa paterr all rrallme'chenet. Ñañaapa' atet cotape'chatuenanetpa' atet otuenanet:

—Sapa' eso'mare'tña ama same'ñeñoña po'potantañ ñeññ sotene' napa' o'ca'ye ne-tanterra tarro'mar ñetpa' çhoca'ye enternnet. Tarraña sapa' amaca'ye es seçhenoyo seyoçhro.

¹⁵ Allempoña Jesúsapa' atet oterraneterr:

—Te'pa' o'ch auyeses ora erra'paren allohuanen añ patser, seserrpare'tach allohuen acheñenesha' añ cohuen ñoñets alloch a'queshpataretterret.

¹⁶ Allohuen ama't erra'tsena ñeññcha' ame'ñerraya añ cohuen ñoñets ñaña ñeññ pame'ñeñoñetpa' apataretterretcha' ñetñaapa' a'queshpataretterretcha'. Tarraña ñeññcha' ama ame'ñerrtso, ñetñaapa' amñare'tterrach coñcheñtso.

¹⁷ Ñeññcha' name'ñerraya ñocpuetpa' norrtaterranetcha' nepartsoña. E'ñe na neso'chñoch queçhpatyasetcha' oneñeñeçhno, ñaña eñosyasetcha' po'poñe'ttsocma ñoñtso.

¹⁸ Ñaña ñerra'm e'ñe pototet chetetcha' sheche'p, tarraña amach erro't paneto; ñaña ama'tcha' añ orret ñeññ amtsañtetsa tarraña amach erro't paneto. Ñaña ñerra'm esempoch a'plla'yenet atsñañe't, atsñañe'tñaapa' acrrerroche'ch.

Allempo a'terr Jesús pue'ntañ
(Lc. 24.50-53)

¹⁹ O'ña atet otuanerranet Partsesha' Jesús pa' allenta a'tapater Pompor pue'ntañ, allñapa' anorruen e'ñe Pompor po'cohuenrot, all partsotapretuera.

²⁰ Pueyochresha'ñapa' ahuanomyeset, serrpare'tyesnomuet errañaren. Partsesha' Jesús pa' čhocma torrapretenanet, orrtatenanet po'partsoña attoch acheñenesha' e'ñech eñotenanet ñeñť atet serrpare'tyenet, ñeñťpa' e'ñe po'ñočh Parets po'ñoñ. Ñeñťpa' attetepa'ch Nompore. Allohua.

COHUEN ÑOÑETS ÑEÑT̄ QUELLCA' SAN LUCAS

Ñehua, añpa' ñeñtca'yeña e'ñe pa'moter penña serrparñats

1-4 Masheñe Teófilo, ðapa' peñoteñ ahuañmo'chapa' pa'namen esocmañen ñeñt̄ atet etsotayese't̄ Jesús acheñenesesho ñeñt̄ e'ñe ñanom ame'ñaya ña, ama't̄ teme'ttsen yocpa'naña ñeñtey o' yame'ñera yaña. Ñaña allempoteñ Jesús pa' orrtana pa'namen acheñenesha' ñeñt̄ entyesaye't̄ e'ñe allame'tets. Ñetñapa' e'ñe entuoñete't̄ allohuen ñeñt̄ atet ða'yese't̄. Ñetñapa' serrpare'tyesete't̄ atet oten Yompor po'ñoñ. Attoña eñotaterryetña yaña. Ñeñt̄ atet eñotatyenet ñetpa' shonte' acheñenesha' quellca'yese'ta'ñ ñeñt̄ atet ðosa Cristo allempo huapa. Ñeñto'marña napa'cho'ña e'ñe pocte' nenteñ o'ch nequellconañ e'ñe ora allpon ñeñt̄ atet orrtatos Jesús, tarro'mar napa' ahuañmo'choteñ atarr noctape'cheñ o'ch e'ñe neñoch erro'tente'ña ñeñt̄ e'ñe po'ño'ch atet ða'yese'ta' Jesús. Ñeñto'marña te' arrpa' o'ch e'ñe neñotata'ñ ora allpon ñeñt̄ o' etsotua allochñapa' attoch e'ñe peñotuer ðaña ñeñt̄ allpon ye'chatenpetpa' ñeñt̄pa' e'ñe po'ño'ch atet. Ñehua, arrpa' atet o' etsotua.

Ñehua, te'pa' o'ch neserrpare'tata'ñ atto mellaño'te'ña' eñotatanet o'ch eñalleta Juan ñeñtcha' apatañtatsa Yomporecop

5 Ahuat allempo añ am'cha'tare'ttate't̄ Herodes all anetso Judeo, eñall ñaña puesheñarr ñeñt̄ judionesha' po'corneshar. Ñeñt̄pa' añ pa'so'cheñ Zacarías ñeñt̄ chocma yemtenana po'potantañ cornaneshachno ñeñt̄ otenet Abíasona'tar ñeñt̄ torrattse't̄ Yompor pa'paclo. Zacarías puetapor añ pa'so'cheñ Elisabet; ñapa'cho'ña corneshañnor ñeñt̄ po'm'reneñ pen Aarón ñeñt̄ corneshatate't̄ ahuat.

6 Ñetña epsheño'maretpa' Yomporñapa' e'ñe pocte' entenanet ñeñt̄ atet penet ñet, e'ñe cohuen etsotueññañet ora po'ñoñ ñeñt̄ atet anaret ahuatoteñ acheñeneshacop ñeñtcha' atet ðohuenet. Ñeñto'marña ama't̄ puesheñarrapa' amach erro'tenot otare'tteto, "ama pocteyaye ñeñt̄ atet sepena."

7 Ñetpa' ama eñalleto ama't̄ puesheñarra pacñe'ter tarro'mar Elisabetpa' ama achoy-ore'tañeyaye. Ama't̄ ñaña puerrollar epsheño'maret o' atta po'nme'tuenet.

8-9 Atteñapa' chap allempo torrena allohuen cornaneshachno ñeñt̄ epuet parro yemtena Zacarías atto corneshatenet Yomporecop. Ñehua, allempopa' allohuen ñeñt̄ corneshatate't̄ Yomporecop, ñetñapa' añ ye'chete't̄ ahuo'ch yellsheñe'chenet allohuenet attoch eñochet po'suertot erra'tsencha' puesheñarrer ñeñtcha' be'tosets Yompor pa'paclo allcha' a'crratan ñeñtcha' eñmosañtatsa Yomporecop. Allempoña pam'tarrpa' aña orrtatsa Zacarías ñeñtcha' be'tosets Yompor pa'paclo allcha' a'crratan ñeñtcha' eñmosañtatsa Yomporecop.

10 Ñehua, allempo chap allempoch be'tosos puesheñarr Yompor pa'paclo shonte' acheñenesha' ñetñapa' allach tom'cha'tet a'yot allcha' ma'yochrra'toset. Ama't̄ allempo be'tosos Zacarías pa' atterach ma'yochrra'tet a'yot.

11 Ñehua, Zacarías allempo sherbenan Yompor o'pono, allñapa' machayotepa'tcha' orrtaña Yompor po'millaño'te'ñer. Arr tomos altar po'cohuenrot, ñeñt̄ altarpa' allecma a'crratenet ñeñt̄ eñmosañtatsa Yomporecop, ñeñt̄pa' atto sherbete't̄ Yompor.

12 Allempo orrtaña mellaño'te'ñer, Zacaríasñapa' atarr yoren, atarr nanac mecha'ch.

13 Mellaño'te'ñer atet otosan Zacarías:

—Zacarías, amach peyorenatsto tarro'mar Yomporpa' e' muennaþ ñeñt atet penamueñ pema'yocheñoñ. Ñeñto'marña te' petapor Elisabetpa' eñalletaterrancha' paterr asheñorr ñeñt e' ñe þo pechemer, ñeñtña' pesochocha' Juan.

14 Papa' atarrcha' þocshena nanac. Shonte'ch acheñenesha' ñeñtcha' nanac þocshapretaya atto o' eñalleta pechemer.

15 Ñapa' atarrcha' asherben enteñ Yompor. Ñapa' amach orrarñañeyaye, ama't vinosapa' amach orreñe. Ama't ñaña pa'namen ñeñt aposa'tpotetsapa' amach orreñe ama't mamesha. Ñapa' e'ñech aña chorraya Parets Puecamquëñ. Ama't allempoteñ pachor pa'to'tsen ñapa' e'ñech chorreña Parets Puecamquëñ.

16 Allempoña mellañoñeña' alla otererr:

—Ñapa' cohuencha' cotape'chaterran shonte' israelena'tarnesha' allochñapa' attoch cotape'cherret e'ñe cohuen Yomporecop ñeñtcha' Po'partseshar perret.

17 Ñeñña Juanpa' ñeñtcha'ña ñanom orrtatsa Yomporecop. Ñapa' aña' ahuamencat pene' Yompor Puecamquëñ atet pe't ahuat Elías ñeñt a'mtaye't Yompor po'ñoñ. Allochñapa' attoch e'ñe cohuen amo'tstaterrana achemereþeþno puechemeresha'. Allochñapa' ama't ñeñt atpare'tetsapa' o'ch ame'ñaterranet ñeñt e'ñe pocte' es pets. Attochña cotape'chaterranet cohuen, allochñapa' attoch agapueret Partsesha' ñerra'm esempoch orrtá.

18 Zacaríasña' ahua' a'þto'tan mellañoñeñ, ahua' och:

—Ta', ¿erroñenochña neñoñ e'ñeþe' po'ñoñ o'ch eñalleta chesha'toll? Tarro'mar napa' o' nepo'nme'ten; neþaporpa'cho'ña e'ñe attecmay o' atarr yepo'nme'tuen.

19 Mellañoñeñña' alla otererr:

—Napa' ñeñten Gabriele'tets ñeñten sherbene' Yompor. Napa' ña nellsensene' attoch ne'ñorana'tapa' o'ch neñotataþ aña cohuen ñoñets.

20 Tarraña þapa' ama þame'ñenno ñeñt atet noteneþ, ñeñto'marña te' þapa' o'ch þo'panat, amach eshec pe'ñorero tayoteñ tarremphuach allempoch eñalleta pechemer; allempochña pe'ñorerra. Tarro'mar po'ñoñ etsoterrach ñeñt atet o' notuaþ o'ch þap allempo onañchare't. Arrpa' allohua ñeñt atet ot mellañoñeñ.

21 Atto' ellapes Zacarías o'ponopa' acheñenesha'ña' cohueñet a'yo't ama þa'nerro. Atto' cohueñetpa' otanna'tet:

—¿Eso'marte' amo' þa'nerroña Yompor pa'paclo't?

22 Allempoña þa'nerpa' ama eshcaye' eñorana'tuerraneto. Ñeñña' otyenet pueyoþhreto, ñato' cho'te' es orrtoya Yomporecop ñeñto'marte'ña atarr ellapes o'pono Yompor pa'paclo. Ñaña' ama eshcaye' eñorana'tuerraneto, potota eñotatuerranet ñeñt atet ent Yompor pa'paclo.

23 Allempoña o' þap allponmat ñeñt atto sherbenet Yompor pa'paclo, Zacaríasña' o' ahua' pa'paclo.

24 E'ñe allponmatatsapa' o' aþhomenta puetapor. Allempoteñña Elisabetpa' ama mueno o'ch orrterra acheñeneshesho. Ama't o' amnarña arrorpa' ñaña' ama orrteno. Ñaña' atet oten:

25 —Te'ña' atarr cohuen muera'na Yepapar, allochñapa' o'huañcha' allo'na pencna'ntatnennet tarro'mar napa' otyennet mueþhopeno'.

Atto mellañoñeñña' eñotatanet o'ch eñalleta Jesús

26 Allempoña o' pechapña arrorr aþhomenta Elisabet, Yomporña' o' alla mueñerranerr po'mllañoñeñer ñeñtara Gabriel. Arr mueñe anetso Nazareto ñeñtara Galilea.

27 Allempoña þap Nazareto, allña' orrtosana puesheñarr shopshesha' ñeñt ama a'þllareteyaye. Ñehua, ñeñt shopshesha'pa' aña o'patenaya yacma ñeñtapa' aña pa'so'cheñ

José, ño'ch yore'. Ñeñña shopshesha' arrot eñalletña David po'mrenñoť; ñeñtpa' añ pa'so'cheñ María.

²⁸ Mellañoťeñña allempo chap e'ñe ñeshopa' atet otos:

—O'ch nocha nehuomcha'tosep. Yompor e'ñe puemuereñoťep papa' atarrcha' coshaterrep, ñapa' e'ñe pesho'tsen. Yomporpa' atarr bensare'tam̄penep. Ello pemtana'tueñ allohuen pacmanesha' atto bensare'tam̄penanet ñet.

²⁹ Allempo e'man atet och mellañoťeñ, ñaña' cha moñne'tacha, cha cotape'ch pueyo'chro:

—Ta', ¿esťe' otenenña ñeñť atet huomcha'tenen?

³⁰ Mellañoťeñña' alla otererr:

—María, amach pemcha'tatsto, Yomporpa' atarr o' morrenterrpa.

³¹ Te'pa' pachomentach, pechyore'tcha' ñeñtpa' asheñorrcha'. Ñeñña' peso'chcha' JESÚS.

³² Ñeñtcha' nanac amcha'tarettata. Otyesetcha' ñapa' ña Ñeñť Nanac Parets Puechemer. Pomporña ñeñtara Paretpa' ñachña ne' amcha'tareť atet amcha'tareťteť pa'tañ David.

³³ Atteña ñapa' amcha'tarettach Jacob po'mrenñecop ñeñtara israelnesha'. Ama't errponaña' amach huañerro ñeñť atto amcha'tarettena ña.

³⁴ Maríaña' atet otapan mellañoťeñ:

—Ta'm ¿erroťenoťcha'ña nechyore'tña? Napa' ama't puesheñarra encanesha' amar-ramtso yoreña'.

³⁵ Mellañoťeñña' alla otererr:

—Paretscha'ca'ye Puecamquēñ pechapoya. Ñeñť Nanac Parets po'huamencpa' a'pomam̄psosepa' atet ñerra'mrrate' os pa'pomam̄pene'. Ñeñto'marña cheshatoll ñeñtcha' pe'ñalletatpa' ñapa' añach e'ñe ma'yochrosa ñeñť atet muenen Parets. Otyesetcha' ñapa' ña e'ñe Yompor Puechemer.

³⁶ Ñaña Elisabetña ñeñť pamots pepen, ñapa'cho'ña o' totana asheñorroťoll, ama't o' po'nme'ten. Ñaña ama't oteñet muecho'pa' te'ña' o' pechapña arrorr o' a'chomenta.

³⁷ Tarro'mar Yomporpa' ama eñalle ñocop ñeñť atarr torrapo' enten.

³⁸ Allempoña María'papa' alla oterranerr mellañoťeñ:

—Ñehua, napa' e'ñe pocte' nenteñ o'ch nesherber Yepapar ñeñť Nepartseshar nepen. Ñeñtpa' attetepa'ch nocop ñeñť atet potenen.

Allempoña mellañoťeñpa' o' ahuerr.

Atto María'papa' emo'tenana' Elisabet ñeñť e'ñe pamots pen

³⁹⁻⁴⁰ Maríaña' allenta ahua' poma'yorñecma o'ch emo'tenana' Elisabet. All ye'chenapa' all shonte' aspentarer allara Judeo. Allempoña chap anetso all sechenapa' be'tosos Zacarías pa'paclo, huomcha'tosan Elisabet.

⁴¹ Ñaña' allempo e'mapan María ñeñť atet huomcha'tospa' pue'maretollña ñeñť pa'to'tsenpa' allentepa'tcha' pella. Pachorña' e'ñe chorreña Parets Puecamquēñ.

⁴² Ñeñña eñoratene', pocsheñeshocmañen eñorena huamencpa' atet otapan María:

—Papa' o' atarr coshaterrep Yepapar. Papa' o' e'ñe pemtana'tue ora allohuen yacmanesha'chno atto coshatenanet ñet Yepapar. Ñaña Yeparpa' atarrcha' bensare'tam̄penna'p pechoyoretoll.

⁴³ Ama't na Yeparpa' atarr coshatenen atto pemo'tenen ama't ñeñťep pachor pen ñeñtcha' Yepartseshar yeperr.

⁴⁴ Tarro'mar e'ñe allempocma ne'mapona'p peñoñ atet pehuomcha'tosen, ne'maretollpa' e'ñe pocsheñesho'pa' allentepa'tcha' pella nato.

45 Paña te'pa' atarr cosheñtso'tseneþ tarro'mar þapa' e'ñe þame'ña'huoña ñeñt atet otuenþa' Yepapar. Ñeñto'marña ñeñtþa' e'ñech atet etsoterra þocop.

46 Maríañapa' alla otererr:

—Te'ñapa' e'ñech neyoçhrocmañen na'ye'choçhtatoñ Yepapar.

47 Necamquëñohuen atarr noçsheña Yepapar ñeñt Ya'queshþatañer yepen.

48 Yepapar e'ñe puemuereñoñen ñapa' entenen ama esoyayno, añana ñeñten torretsa ñocop. Tarraña te'pa' allohuen acheñenesha' ñeñtcha' mererrtsa arr patsro ñetñapa' atarrcha' coshapreterrnet atto Yepaparpa' o' atarr coshaterren na.

49 Tarro'mar ñapa' ñeñt atarr ahuañencattetsa attoña o' orrtaton ñeñt nanac sherbets, ñeñtara Yepapar ñeñt otenet Ñeñt atarr nanac Parets.

50 Allohuen ñeñt amcha'na'tpo' entene' Yepapar, ñaña'pa' çhocmach atarr muererranet ama't tayoteñ errponañohuen ama't allpon allohuen acheñenesha' ñeñtcha' mererrtsa arr patsro.

51 Ñaña ñapa' e'ñe etsotuenan ama't ñeñt atarr nanac echarr entyenet, ñaña allpon allohuen acheñ ñeñt atarr asherben entyetsa, ñaña'pa' e'ñech pomnaren þohuerranet.

52 Ñaña ñeñt atarr ahuañencat entyetsa ñaña'pa' e'ñech a'suatanrrortatuerranet allot amcha'tarettenet. Tarraña ñeñt ama esoshe'maye' entyetsopa' ñetñapa' Yepaparcha' nohuerrahuet attotcha' amcha'na'tpo' enter allohuen acheñenesha'.

53 Ñaña ñeñt nanac es pallta'yetsa, ñetñapa' Yepaparcha' esocmañen aphuerahuet. Tarraña ñeñt atarr esocmaneñ es echyets, ñetñapa' Yepaparcha' puerratañpesuerrahuet, amach es anerreto ama't coñe'ta.

54-55 Yepaparpa' añach çhocma yenpuen israelena'tar ñeñt pueyochresha' pen ña. Amach pueserrano ñeñt atet otane't ahua't yamo'mtayñeneshañ ñeñtcha' atet per-ranet ñaña allohuen ñeñtcha' po'mñreneñ perret. E'ñe atet otane't ahua't Abraham po'mñrenñecop. Attoch çhocma muerenanet ama't errponohuañen. Arrpa' allohua ñeñt atet açhotan María Yompor.

56 Allempoñapa' ñato' ma'pñate' arrorr alla a'pa Elisabetesho. Allotña Mariapa' ahuer pa'paclo.

Arrpa' atto eñalleta Juan ñeñt apatañtatse't Yomporecop

57 Allempoña çhap allempoch emare'ten Elisabet. Ñeñtña pue'marpa' asheñorroñoll.

58 Allohuen acheñenesha' ñeñt yeçhetsa all ñesho ñaña allohuen pamo'tsesha' ñetñapa' e'ñe coshaprechet. Tarro'mar eñoteñet Yomporpa' o' orrtatoñ atto ñapa' atarr muereña.

59 Allempoña o' posocmata'muen ñeñtña asheñorroñollpa' o' tsorratolle'ta'mueñet tarro'mar ñetpa' atetca'ye yeçhenet ñeñtjudioneshet.* Allempopa' añ soçhetañ Zacarías o'ch anmatoñetañ pompor pa'so'cheñ.

60 Tarraña pachorpa' otanet:

—Napa' ama nemno o'ch sesochon ne'mar Zacarías. Napa' añcha' nesoch Juan.

61 Allempoña acheñenesha'pa' atet ochet:

—¿Eso'mare't pemneñña o'ch pesoch Juan tarro'mar ama't puesheñarra þamo'tspa' ama eñalle ñeñt soçhetsa Juan?

62 Allempoña acheñenesha'pa' e'ñe pototeta a'þto'toñet ematoll pompor escha' sochanña puechemeretoll.

63 Ñapa'çho'ña potota eñotatan acheñenesha' o'ch apet quellcatets allcha' quellcan ñeñtcha' sochan puechemeretoll. Allempoñapa' apet quellcatets, allña'pa' atet quellca': "Añcha' yesoch Juan." Acheñenesha'ñapa' atta cohuanrrorchet.

* 1:59 Añ ñoñets "atsorrare't", añ ñeñt otets atet yeçhe't judionesha'. Ñeñtþa' atet: Ñerra'm allempo eñalletena asheñorroñollesha' ñeñt e'ñe judionesha'pa' añña pomporpa' o'ch tsorrateñet po'çhtso. Ñehua, ñeñt tsorratenetpa' ematollach o'ch çhapa'muen po'psocmatño. Ñehua, po'çhtso allcha' tsorret asheñorroñollpa' all e'ñech poteretollo e'ñe po'ñoç parrmatollo.

64 E'ñe allempocma Zacaríasña'p' allenta eñorerra. Allorocma aye'chochtaterran Yompor.

65 Acheñenesha'ña ñeñt' yeçheta allpa' allohuenet atarr mecha'na'teñet Yompor. Ñetña'p' serrpare'tatanna'tyeset all aspentarero Judeo.

66 Ñaña ama't allohuen ñeñt' e'mare'tyese' ñetña'p' co'tape'chyaset pueyoçhreto, atet otyenet:

—Añ chesha'tollpa' po'ñoçhcha' atarr sherberran Yompor tsapa'tonet.

Tarro'mar Yomporpa' atarr muereña.

Atto Zacarías atarr açhotenan Yompor Parets

67 Chesha'tollña pompor ñeñt' Zacaríaspa' añ chorrenaya Parets Puecamquëñ ñeñt'ña eñoraterre' Yomporecop ñeñt'cha' atet perra ama't esempo. Ñeñt'pa' atet ot Zacarías:

68 —Aye'chochtaterrapo'ch Yompor, ñeñt'ara ñeñt' Po'partseshar pen allohuen israelnesha', tarro'mar te'ña'p' o' orrtaterrnay puemuereña ñeñt'cha' ya'qeshp'aterre' ñeñt'ey puechemer pen.

69 Ñapa' o' orrtatonay ñeñt'cha' a'qeshp'atanterrtsa ñeñt' atarr ahua-menca'tesha' ñeñt'ara ñeñt'cha' eñalletatsa David po'mrenñoç, ñeñt'ara David ñeñt' atarr sherb'aye't' ahua't Yompor.

70 Ñeñt'pa' ahua'toteñ atet eñoratyesane't' ñeñt' a'mta'yese't' po'ñoñ, ama't allohuen ñeñt' e'ñe ma'yoçhra'yestse't' Partsocop.

71 Ama't ñaña allohuen allpon ñeñt' ye'moñe'tene' ñeñt' añcha'noçhetyetsa yocop, ñachña ya'rroyataterre'.

72 Attochña etsotaterrnay ñeñt' atet otane't' ahua't yatañneshañ ñeñt'cha' atto çhocma muererrya. Atteña ñapa' amach pueserrano ñeñt' atet a'poc'tat ahua'toteñ yocop tarro'mar ñeñt'pa' e'ñe Partsesho't' a'poc'tataretta.

73 Ñehua, añpa' atet p'a allempo Yomporpa' ahua't otan yatañ Abraham ñeñt'cha' atet perrnay e'ñe po'ñoçh.

74 Ñeñt'pa' atet ote't' Yompor yocop ama't ñeñt' allpon ñeñt' ye'moñe'tene' ñeñt' añcha'noçhen yentyen ya, ñaña'p' ñach ya'rroyataterre'. Allochña yapa' o'huañcha' yem'cha'nañof yesherber Yompor.

75 Attoch yetsotoñ ñeñt' e'ñe pocte' enten Parets allochña'p' attochña pocte' enteney ñaña acheñenesha' atto e'ñe cohuen es ye'pa'yen e'ñech tarremphua esempohuach yocrrena arr patsro.

76 Te'pa' o'ch nechemeretolle nota'p': Papa' oterrpetcha' ñeñt'ep'o' ñeñt'cha' eñorana'tena ñeñt' nanac Parets. Tarro'mar p'apa' p'anomcha' orrtatsa attoch p'a'cohuentatyesoñ allcha' oñmos Partsesha'.

77 Ñeñt'pa' attoch p'oc'tape'chater acheñenesha' e'ñe cohuen allochña ñetpa' esheccha' a'p'retnare'tterret po'chñaret attoch a'qeshp'atare'tterret.

78 Te'pa' çhapcha' allempoch Yompor e'ñe puemuereñoçey çhapaterrnaycha' ñeñt' huetsa entot ñeñt'cha' yoçtape'chaterre' e'ñe cohuen, ñeñt'ña co'ta'p'ñatserpa' ñeñt'cha' ya'puetarsam'perre'.

79 Attochña a'puetarsam'psare'tterra allohuen acheñenesha' ñeñt' checmeto'tsa'yeneta, ñeñt' ama eñotenaye Yompor, ñetña'p' aña o'patenahuet rromueñets ñeñt'ara coñcheñets. Ñeñt' atto a'puetarsam'psare'tey ñeñt'cha'ña yeñotatene' attoch e'ñe cohuen yocsheñeshocmañen yeyçhena arr patsro. Arrpa' allohua huañ atto Zacaríaspa' açhotenan Yompor e'ñe pocsheñeshocmañen.

80 Añña chesha'toll Juanpa' allo'na sen atarretnomtsa. Puecamquëño'p'a' atarr ahua-menca'tetnena. Ñaña'p' alla yeçhena alla'par amayo tarremphua allempo orrta israelena'tarneshesho.

2

*Atto eñalleta Jesús
(Mt. 1.18-25)*

¹ Allempopa' añ amcha'tarettatset' romo'marnesha' ñeñt'pa' añ pa'so'cheñ Augusto. Ñaña'pa' nenan po'ñoñ ñeñt'pa' atet oten: Allohuen acheñenesha' errañaren añe patsropa' quellcatyesetepa' pa'so'cheñ.

² Ñehua, allempo ñanom quellcatyeset pa'so'cheñpa', arrña anets Siriapa' añ amcha'tarettetsa ñeñt'pa' añ pa'so'cheñ Cirenio ñeñt' pa'mcha'tareter pen allohuen judionesha'.

³ Ñehua, allohuenet ahuanerret pa'tañnesha' pa'netsro allochñapa' allcha' quellcatyereta' pa'so'cheñ.

⁴ Ñeñto'marña Josépa' on Nazaretoñ allara anets Galileo, o'ch ahua' all pa'netser pe't pa'tañneshañ, ñeñña anetserpa' añ pa'so'cheñ Beléñ, allara Judeo, tarro'mar Beléño eñalleta ahua't pa'tañ David. Tarro'mar Josépa' Davidna'tarca'ye.

⁵ Allempoña Josépa' ahua' epuet María o'ch quellcateneta' pa'so'cheñ. Mariapa' José o'patenaya ño'ch yore'. Allempoña Mariapa' achomenepa'to'.

⁶ Allempoña allo'tsa'yenet Beléño, Maríañapa' ahuepa't chen allempoch emare'ten.

⁷ Alla emare't, ñeñña pue'maretollpa' asheñorrotoll ñeñt' e'ñe po'moter pa'. Epe' po'ño'mopa' alla panatolle'ch huacshepahuo allotecma apueñet huaquesh puerrar. Ñehua, tarro'mar alla emare'tos huacshepahuoña' muetsopahuopa' ama esesha' epatso e'ñe poctacma eshepena acheñ ñeñt' manrra'tosets all.

Atto Yompor po'mllañoñerpa' orrtana ñeñt' cohuanpene' po'carrneror

⁸ Allempo emare'ten María all Beléño ñeñt' tsaprocma allampaño'tsen ñaña ñeñt' cohuanpene' po'carrneror pastemo.

⁹ Allñapa' machayotepa'tcha' orrtanet Yompor po'mllañoñer, cha poptana'tosanet. Ñeñt'pa' Yompor po'cohuenña ñeñt' cha a'puetarsañposahuet. Ñeñt'apa' atarr nanac mecha'trra'tapet.

¹⁰ Mellañoñeñña' otosanet:

—Amach semcha'tatsetno choña se'mñoten na, o'ch neñotatoses ñeñt'cha' atarr socshaterre' sa ama't ñaña allohuen errañaren acheñenesha' cop.

¹¹ Te'pa' socop o' eñalleta ñeñt'cha' Sa'queshpatañer seperr ñeñt'pa' ñeñt'cha' Cristotats ñeñt' Yepartseshar yepen. Ñeñt'ña cheshatollpa' arr eñalleta David pa'netsro allara Beléño.

¹² Te'pa' o'ch noterrser attoch señoñ ñeñt' cheshatoller. Ñeñt'cha' sentos cheshatoll eparet po'ño'mo all panatolle'teñet huacshepahuo, ñeñt'ca'yeña Yompor Puechemer.

¹³ Allempoñapa' machayotepa'tcha' orrterrerr po'potantañ shonte' mellañoñenesha' ñeñt' o' sohuaçherrerr entot. Ñeñt'ña mellañoñenesha'pa' atarr aye'chochtatosñañet Yompor.

¹⁴ Atet otoset:

¡Aye'chochtaterrapo'ch Yeyomporer ñeñt' pue'ntañ'tsen! Ama't ñaña acheñenesha' ñeñt' añe patsro'tsen cosha'rrtetepa' ñamet ñeñt' coshaten Yompor.

¹⁵ Allempoña mellañoñenesha'pa' sohuanerret ñeñt' cohuanpene' po'carrneror, ñeñt'apa' o' ahuanerret pue'ntañ. Allempoña ñeñt' cohue' po'carrnerorpa' allenta otanna'tyeset:

—Errotenuaca'yeña ñeñt' otenya' Yompor. O'ch ahuey Beléño o'ch yenteña' ñeñt' atet otenyeta'.

¹⁶ Allempoñapa' poma'yorñecma ahuanmuet, o'ña chapuet Beléño'pa' all entoset María ñaña José ñaña cheshatoll all panatolle'tena huacshepahuo.

17-18 Allempo entoset ñetñapa' serrpare'toset ñeñt atet o' otuenaneta' mellañoñeñ cheshatollecop. Allohuen ñeñt e'muene'pa' nanac cohuanrroretyeset, otanna'tyeset:

—Ta'm errotenofte'ñaca' o' serrpare'tosña atet.

19 Maríañapa' e'ñe ñeñta nen pueyoçhro e'ñe ñeñta cotape'chen ñeñt allpon o' entua ahuañoñeñ.

20 Allempoña ñeñt cohue' po'carrnerorpa' o' ahuanerret. Atet otenaneta' mellañoñeñsha'pa' ñetñapa' e'ñe po'ñoçh entoset. Allpon ñeñt atet e'muet, ama't ñaña ñeñt atet entet, ñeñto'marña ñetpa' e'ñe pa'ye'choçhtateñeshet ahuanerret, attoña ñetpa' atarr cohuentatnerrñañet Yompor.

Atto anmet cheshatoll Jesús Parets pa'paclo attoch a'poc Tateñeta' ñeñt Partsocop

21 Ñehua, allempoña o' posocmata'muen, ñeñt asheñorroçollpa' o' tsorratatolle'chet, ñeñtpa' atet yeçhenaña allohuen judionesha'. Allempo ñeñtña cheshatollpa' o' sochet JESÚS. Ñehua, ñeñt so'chñets ñeñtpa' atet otenana' mellañoñeñ María ama't ahuañmo'choñeñ allempo ama açhomentena'.

22-24 Allempoña çhap allempoch a'poc tachel ñeñt atet nane't Moisés po'ñoñ ñeñtcha' atet yeçha' judionesha'. Ñehua, ñeñtña ñoñetspa' atet oten: “Ñerra'm esempoch cheyore'ten coyanesha', ñerra'm asheñorr pue'mare'toll ñeñt e'ñe po'moterpa' neñetepa' Partsocop.” Ñaña po'poñ Moisés po'ñoñ ñeñt atet ne't, ñeñtpa' atet oten: “Muetsatenetepa' epña arot amapa' epña yepeçho'ye' ñeñtcha' net Yomporecop.” Ñeñto'marña allempo çhap allempoch a'poc tatet Yomporecop ñeñt atet anaret po'ñoñ, ñeñtña cheshatollpa' allenta anmet Jerusaléño, allcha' a'poc tachel Yomporecop.

25-27 Allempoña çhapuet Jerusaléño'pa' o' be'tososet Parets pa'paclo attoch a'poc tateneta' ñeñt atet yeçhenet ñeñt atet oten ñoñets ñeñt anaret ahua'toteñ. Allña'pa' huapa puesheñarr yacma añ pa'so'cheñ Simeón ñeñtpa' jerusaléño'marnesha'. Tarro'marña ñapa' allempocma huapaña' ñapa' añ eñotate' Parets Puecamquëñ. Tarro'mar ñeñt acheñerpa' atarr cohuen ñeñt atarr ma'yoçhrenaya ñeñt cohuentetsa Yomporecop. Ñapa' ñeñt atarr cohue' esempoch huapa ñeñtcha' a'rroyataterre' israelena'tarnesha' allochña'pa' o'ch alla atarr cosherret. Atto çhapoña Parets Puecamquëñ ñeñtña eñotate' ñapa' amach rromuena'pa' enterrancha' Yompor Puechemer ñeñt Cristo ñeñtcha' llesenserr esempo.

28 Huapsapa' allenta enatatolle'tosan cheshatoll, atarr aye'choçhtatosan Yompor. Ñeñtpa' atet otos:

29-30 Te'ña po'ñoçh Nompore ama'tcha' nerromapa' e'ñech nocsheñeshocmañen nerroma tarro'mar te'pa' po'ñoçh o' nenterrnaç ñeñt o' pemñernay ñeñtcha' ya'queshpaterre' e'ñe atet potne't ahuañmo'choñeñ na ñeñten atarr pesherbene'.

31 Ñeñtña o' porrtaterrnay allohuenacpay ñeñtey pa'nameney acheñenesacpay añe patsro.

32 Ñapa' ñach sherberrets atet ñerra'mrrate' puetare' ñeñtcha' a'puetarsañperre' allohuen acheñenesha' ama't ñeñt ama israelena'tareyaye attoch ñetpa'cho'ña o'ch eñoteret ñeñtcha' a'queshpatañterrtsa e'ñe po'ñoçh. Allochña'pa' attotcha' e'ñe cohuen aye'choçhtaterrnaç ñaña peyochresha'çhno ñeñtara israelena'tarnesha'.

33 Ñeñtña pamo'mte' pen cheshatollpa' ñetñapa' atta cohua'nteñet Simeón atet eñorana'tenanet pue'maretollet.

34 O' eñorana'tuanet pue'maretolletpa' allempoña'pa' enamatanet ñamet ñocpuet Yompor pa'nateña. Allempoña'pa' otoñ pachor María, ñeñtpa' atet och:

—Peñoche'pa'ch añ cheshatoll ñeñtpa' ñeñtña onañche't ahua't Yompor. Ñocoppa' shonte'ch israelena'tarnesha' ñeñtcha' ama ame'ñerrayo ñeñtcha' chenquërrtsa. Tarraña eñall ñaña shonte' po'potantañ ñeñtcha' ame'ñerrayo ñeñtcha' cohueno'tsenterrtsa.

Tarro'mar Pomporpa' añecopña mueñer allochñapa' ñach eñotaterrahuet ñapa' Pompore-shoñ huapa. Tarraña shonte'ch acheñ ñeñtcha' achma're'erre'.

³⁵ Papa' ñeñtcha'ña atarr pellcaterre'ña pa. Atarrcha' atserr pe'muerr pellquëña e'ñech atet pe'muerr puellquëña atet ñerra'mrrate' cochllo patenpet peyoçhro. Elloña puesheña'tetspa' eñotaterranetcha' errotente' ñeñt atet cotape'chyenet pueyoçhreto.

³⁶ Allñapa' allo'tsen ñaña puesheñarr coyanesha' ñeñtpa' añ pa'so'cheñ Ana ñeñtecma a'mtene' Yompor po'ñoñ. Ñapa' año' po'señ ñeñt sochetsa Fanuel, ñeñtpa' Aserna'tar.* Ñeñña Anapa' o' atarr nanac po'nme'ten. Ñehua, allempo shopshena'pa' some'ta, e'ñe cançherr charohua yeçhañ epuet puerrollarpa' o' rromapes.

³⁷ Ñeñña rretorrnanesha'pa' atta correna ñapueñ. O' poscoch çharra' puechena pa'tats char allponmat correna atta. Ñapa' e'ñe ellapene't sherbe' Yompor ama't ñaña tsapome'tets. All Yompor pa'paclo'tpa' amach çha'nen. All atarr ma'yochenana Yompor. Erroteno e'ñe puema'yocheñot Yomporpa' amach rreno ama't coñe'ta.

³⁸ Ñapa'çho'ña allempocma huapa all o' çapachet cheshatoll Jesús. Ñaña'pa' ma'yochosa, atarr parasyoso'tenan Yompor cheshatollecop. Ñeñto'marña ñapa' atarr serrpare'tatosan acheñenesha' ñeñt cheshatollecop tarro'mar o' huapa ñeñt atarr cohuen allohuen acheñenesha' ñeñtcha' a'qeshpatose' israelnesha' ñeñt pa'netser pene' Jerusalén.

Allempo alla puerret anetso Nazareto

³⁹ Allempoña o' a'pocstatuet ora allpon ñeñt atet anaret Yompor po'ñoño ñeñtcha' e'ñe yeçha' judionesha' ñetña'pa' ahuanerret pa'nyeto Nazareto allara Galileo.

⁴⁰ Cheshatollña' allo'na sen rrorranmats, allo'na sen huomencatnomuets, nanac eñotnenan ñeñt atarr cohuen enten Pompor Parets, ñeñto'marña Yomporpa' atarr muereña.

Allempo alla a'pa cheshachor Jesús Parets pa'paclo

⁴¹ Ñehua, ñeñt cheshachor pamo'mte' ñetpa' atet yeçhenet pate'tets char pascuapopa' çhocmach senet Jerusaléño o'ch coshapreteneta' pascua ñeñt atet yeçhena judionesha'.

⁴² Allempo çhap Jesús po'charña çharra' puechena epa ahuanerreterr Jerusaléño, ñetpa' atetca'ye yeçhenet.

⁴³ O'ña huañ pascuapa' ñetña'pa' o' ahuanerret. Ñeñña cheshachor Jesús'pa' alla't a'pa' Jerusaléño. Pomporña ñaña pachorpa' ama eñoteñeto o'te' alla a'pa.

⁴⁴ Cha otapuetañ añte' co'ta'nen po'potantañ ñeñt parro onaçhenet. O'ña chope'cherret pamtarrpa' allempoñapa' o' yerpueret, e'name'tyereta' pamo'tsesho'mar. E'name'tyereta' allo'tsen ñeñt e'ñe cheme'tyen pompor ñaña pachor.

⁴⁵ O'ña e'name'tuet ama es enterrayepa' o' alla ahuerret Jerusaléño. Allpa'çho' e'name'tuereterr.

⁴⁶ Poma'pamtañoña'pa' alla entereta' Parets pa'paclo. All anen e'ñe parro maestrone-sha' ñeñt atarr eñotyene' Yompor po'ñoñ ñeñt atet anaret. Jesús'ña'pa' all e'mñotyenanet ñeñt atet serrpare'tyeneta' o'çcho' a'p'to'tyerranet.

⁴⁷ Ñeñto'marña allohuen ñeñt e'muene'pa' çha atarr cohuanrrorteñet, otyenet:

—Erroteno'tuañaca'yeña atarr es eñoten ñeñto'mar atarr cohuen es anapyen.

⁴⁸ Allempo enter pompor ñaña pachorpa' atta cohua'noset. Pachorña'pa' atet otos:

—¿Eso'marte'ña ne'mare o' atarr pellcatya? ¿Ama't peñoteñe atarr yellquëñesha' ye'namene'p?

⁴⁹ Ñaña'pa' otapanet:

* 2:36 Ñeñña Aserpa' Jacob puechemer.

—Eso'mare'tña se'name'tenen. Ama't señothenoña napa' ñeñt̃ poctetsa nocop o'ch ne'torreññaña ñeñt̃ poctetsa Nomporecop.

⁵⁰ Ñetñapa' ama es eñotaye ñeñt̃ atet otanet.

⁵¹ Allempoñapa' o' co'terran pamo'mte' o' cha'cherret Nazareto, ñapa' e'ñe cohuen ame'ñenana pompor ñaña pachor. Pachorñapa' allohuen ñoñetspa' e'ñe eñotueñ pueyo'chro.

⁵² Jesúsñapa' allo'na sen rrorranmats atarretnomtsa. Allo'na nanac eñotañetnena. Pomporña Paretspa' atarr cohuen enteñ, ñaña acheñenesha'pa' atarr cohuen enteñet.

3

Allempo orrta Juan ñeñt̃ serrpare'tosets all amayo (Mt. 3.1-12; Mr. 1.1-8; Jn. 1.19-28)

¹ Ñehua, allempo chap allempoch añcha'tare'tta ñaña ñeñt̃ pa'so'cheñ Tiberio all Romo. Allempo chap o' añcha'tare'tta charra' puechena amnar char allempoña Judeopa' añ añcha'tare'ttatsa ñaña Poncio Pilato. Galileoñapa' añ añcha'tare'ttatsa Herodes. Pa'mo'nasheñña Felipepa' ñapa' epa anetsocop añcha'tare'tta, ñeñt̃pa' arr añcha'tare'tta Iturea ñaña Traconite. Lisanciasñapa' arr añcha'tare'tta Abilinio.

² Ñehua, allempopa' judionesha' añ po'corneshar penet Anás ñaña Caifás, ñeñt̃ po'corneshar pen ora allohuen cornaneshachno. E'ñe ñeñt̃e chararocma añcha'tare'tetyenet allemeñ anetso'mar e'ñe allempocma Yomporpa' eñorana'tana ñaña Juan ñeñt̃ Zacarías puechemer ñeñt̃ amayo'tsen.

³ Ñeñto'marña Juan allempopa' o' chopeñe'chyes erracmañen Jordanaso'mar, all serrpare'tyesnom. Ñeñt̃pa' atet otyesnomanet:

—Te'pa' o'ch soctape'cherr e'ñe ello cohuen Yomporecop attoch Yomporpa' o'ch peretnerrnas allohuen so'chñar, allochñapa' o'ch sapatare'tterra Yomporecop.

⁴ Ñeñt̃pa' añ serrpare'tatosanet attoch etsoterra ñoñets ñeñt̃ anaret ñeñt̃ atet eñose't̃ ahuat̃ Isaiás ñeñt̃ a'mt̃aye't̃ Yompor po'ñoñ. Ñeñt̃ Isaiás po'ñoñ ñeñt̃pa' atet oten:

E'morrterrach pueheñarr po'ñoñ all amayo allcha'ña serrpare'taterranña acheñenesha'. Puerranarotpa' añcha' toma'ntaterranet toñ, ñeñt̃pa' atetcha' o'terranet: “Te'pa' o'ch sa'cohuenetyes toñ allcha' oñmos Partsessa', o'ch e'ñe sa'pa'charretyesoñ pa'te'p̃.

⁵ All rrapatse'tyen patspa' o'ch e'ñe sa'muepñetyes, all pocmo'yaretyenapa' o'ch e'ñe sa'muepñetuahue, all terepe'parretyenapa' o'ch e'ñe sa'pa'charretyes, all arro-ro'tetyena toñpa' o'ch e'ñe sepampa'huahue.

⁶ Allempoña allohuen acheñenesha'pa' enteretcha' ñeñt̃ o' mueñerrnay Yompor ñeñt̃cha' ya'queshpaterre'.” Arrpa' allohua ñeñt̃ atet aquellcare't̃ ahuat̃oteñ Cristocop.

⁷ Allempoñapa' shonte' acheñenesha' hua'cha'tet Juanesho. Ñetpa' tarro'mar hua'chenet añ muenenet o'ch apatapanet Juan Yomporecop. Juanña serrpare'tatapanetpa' o'tapanet:

—Sapa' ama cohuenayayso atarr ashcarña'es, cha sottena ñerra'mrrate' shechp̃a sompor sepen. Po'ño'chca' ama eseshaye' sotenaye e'ñech sapatare'tteño'a o'ch sequeshperra allochñapa' amach coñchatuerrso Yompor allempoch yoro'chtatuer tsapa'onet.

⁸ Napa' añcha'ña notapas o'ch sorrtatyes ñeñt̃ e'ñe cohuen enten Yompor ñeñt̃ atet pena ñeñt̃ po'ño'ch o' co'tape'cherran ello cohuen Yomporecop. Sapa' cha soteneñ seyo'chro año' es sepallteno sapa' año' e'ñe seyemtena satañ Abraham. Tarraña napa' o'ch notas amach atet soctape'chatsto tarro'mar ñeñt̃pa' ama esoye' enteñe Yompor. Tarro'mar o'ch notas ñerra'm Yompor muenetseñ ama't añ mapue' ñeñt̃ senten arr o'ch a'pnasereñ Abraham po'ñreneñ.

9 Ñeñto'marña napa' o'ch notas ñerra'm amach soctape'cherro cohuen Yomporecop o' mameshamña o'ch çhaponasa attoch coñchaterres Yompor. O'ch netma'ntatasa atet ñerra'mrrate' allempo o'ch a'matamochet tsach. O' e'ñe onañchachet gach allcha' tet e'ñe allohua huañen puepallactar. Ñeñt allohuen tsacheçhno ñeñt ama cohuenaye' me'tetsopa' a'mata'tueretcha' saprochetcha' all huorten tso' allcha' e'ñe a'poyatatueret.

10 Allempoña acheñenesha'pa' a'p'to'tyeset Juan, ochet:

—Ñehua, ¿eso'tña poctetsaña yocop attoch e'ñe yorrtatyees ñeñt cohuentetsa Yomporecop?

11 Ñaña' anapanetpa' otanet:

—Ñerra'm eseshas echene' epma seshtam o'ch saþ ñeñt ama echenaye ñeñtcha' chorrena. Ñaña ñerra'm eseshas echene' serrar o'ch saþ ñeñt ama echenaye ñeñtcha' rrenet.

12 Allempoña huaçha'ta ñaña acheñenesha' ñeñt po'taruas pene' atto cobrenan acheñenesha' quelle ñeñt gobiernocop. Ñetpa'çho'ña añecop huenet Juanesho o'ch apatarettet Yomporecop. Ñetpa'çho'ña o' a'p'to'toset Juan, atet otoset:

—Yocop Nomporcha' ¿eso'tña poctetsa attoch yorrtatyees yaña ñeñt cohuentetsa Yomporecop?

13 Ñaña' anapanetpa' atet otanet:

—Ñeñt allpon quelle ñeñt e'ñe allpona enamuen gobiernopa' e'ñech allpona secobreña acheñenesha', amachña allo'na atarr aton secobra'neñe acheñenesha' quelle ñeñt e'ñech socpa'na.

14 Allempoña patantarr guardianesha' ñeñt allo'tsa'yenpa' a'p'to'toset ñamet, ñetpa' atet otet:

—Yocoppa'çho'ña ¿eso'tña poctetsa ñeñtcha' attoch yorrtatyees yaña ñeñt cohuentetsa Yomporecop?

Ñaña anapanetpa' atet otanet:

—Sapa' amach es seprratamþsatsche acheñenesha' e'ñe se'mueñocma ñaña sa'metanþeño' e'ñe seshqueno'tpa'çho'ña amach es seprratamþsatsto e'ñe attota. Ñaña ñeñt allpon tsa'tenset gobierneshotpa' e'ñepa'chña ñeñta cohuen socshena.

15 Acheñenesha'ñapa' atta cohueñet, pueyoçhretoñapa' atta cotape'chyenet çha otenapuetañ Juanpa' ñeñt'e'ña Cristotets ñeñt cohuenet ahuatoteñ ñeñtcha' mueñerranet Yompor.

16 Juanña' atet otanet:

—Napa' ama añeyayno ñeñt Cristotets, tarro'mar napa' ama't napatensoñ Yomporecop e'ñe oñoçhaya napatenes. Tarraña Cristo ñeñtcha' huapatsa chenta'pa' ñapa' añcha'ña chorratossa Parets Puecamquañ ñeñt atet ñerra'm tso'. Ñapa' ñeñt atarr ahuamencatesha', nañapa' ama tama ahuamencateyayno. Ñapa' ñeñtña atarr sherbets, nañapa' ama es nesherbena attoch ama't po'sapatreçhapa' o'ch nepyoñ.*

17 Ñapa' atarr ahuamencat, ñapa' ñach acrerre' allohuen acheñenesha'. Ñapa' añ toma'ntena ñeñt orrene' puehoshnat alloch shoshnan po'trigo o'ch e'ñe pue'llomroçhayaña. Ñeñtña pue'llomerpa' o'ch a'yapaçhe' o'ch añno'ch allecma añno'teñ e'ñe cohuen. Pue'she'marña'pa' o'ch huapore'ch tso allcha' e'ñe poyhua. Ñeñtña tso'pa' ama emaya'pahuo ama't errponaña.

18 Juanña allpa' atet serrpare'tatyenanet cohuen ñoñets ñeñt huetsa Yomporeshot alloch yequeshperra. Ellonetña'pa' shonte' pa'namen serrpare'tatan acheñenesha' ñeñt ama pocteye' enteno Yompor.

* 3:16 Ñeñt atet po'taruas pe't ahuat esclavos o'ch pueyan pamo'mte' po'sapatreçh.

*Allempo apatareŕta Jesús Yomporecop
(Mt. 3.13-17; Mr. 1.9-11)*

19-22 Allempoña o' atarr apatareŕta shonte' acheñenesha' Yomporecoppa' cho apatareŕtatsa ñaña Jesús. E'ñe apatareŕtetuatsapa' o' ma'yocha. Allempoña ma'yochenapa' enetña' ahuepa't atorareŕta. Alloŕña e'ñe sohua'nma Parets Puecamquẽ e'ñe atet entapet ñerra'mrrate' yeŕ o' sohua'nma entoŕ. E'ñe arr chap Jesúsesho. Cha e'morrtatsa ñoñets entoŕ atet eñorena Yompor. Ñeñña ñoñetspa' atet oten:

—Papa' ñeñŕeŕ Nechemereŕ ñeñŕeŕ atarr nemorrentena, ŕa atarr nanac nocshatene'.

Allempoña ańcha'tareŕ Herodespa' o' yottańŕsatan Juan ŕarro'mar Juanpa' eñotach ama pocteye' enteñe ñeñŕ atet ŕatse'tyena. Ama't pa'mo'nasheñ Felipe puetaporpa' o' yorańŕer. Ama't shonte' pa'namen ñeñŕ atet ŕatse'tyena Herodespa' elloña'pa' o'cho' yottańŕsaterranerr ñaña Juan.

*Arrpa' all aquellcareŕ allohuen pa'so'chñechno ñeñŕ pa'tañneshañ pen Jesús
(Mt. 1.1-17)*

23 Ñehua, Jesús'pa' allempo orrta o' torra'mochana ñeñŕ po'taruas pen Pompporecop, allempoña po'charña'pa' ñato' o'te' chap ma'poch charra' char. Acheñenesha'ña'pa' aña pompor ŕateñet ñeñŕ José. Ñehua, José'pa' Elí puechemer,

24 Elí'pa' Matat puechemer, Matatpa' Leví puechemer, Leví'pa' Melqui puechemer, Melquipa' Jana puechemer, Janapa' José puechemer,

25 José'pa' Matatías puechemer, Matatías'pa' Amós puechemer, Amós'pa' Nahum puechemer, Nahumpa' Esli puechemer, Esli'pa' Nagai puechemer,

26 Nagaipa' Maat puechemer, Maatpa' Matatías puechemer, Matatías'pa' Semei puechemer, Semeipa' José puechemer, José'pa' Judá puechemer.

27 Judá'pa' Joana puechemer, Joanapa' Resa puechemer, Resapa' Zorobabel puechemer, Zorobabel'pa' Salatiel puechemer, Salatiel'pa' Neri puechemer,

28 Neripa' Melqui puechemer, Melquipa' Adi puechemer, Adipa' Cosam puechemer, Cosampa' Elmodam puechemer, Elmodam'pa' Er puechemer,

29 Erpa' Josué puechemer, Josué'pa' Eliezer puechemer, Eliezer'pa' Jorim puechemer, Jorimpa' Matat puechemer,

30 Matatpa' Leví puechemer, Leví'pa' Simeón puechemer, Simeón'pa' Judá puechemer, Judá'pa' José puechemer, José'pa' Jonán puechemer, Jonán'pa' Eliaquim puechemer,

31 Eliaquim'pa' Melea puechemer, Melea'pa' Mainán puechemer, Mainán'pa' Matata puechemer, Matatapa' Natán puechemer,

32 Natán'pa' David puechemer, David'pa' Isaí puechemer, Isaí'pa' Obed puechemer, Obed'pa' Booz puechemer, Booz'pa' Salmón puechemer, Salmón'pa' Naasón puechemer,

33 Naasón'pa' Aminadab puechemer, Aminadab'pa' Aram puechemer, Aram'pa' Esrom puechemer, Esrom'pa' Fares puechemer, Fares'pa' Judá puechemer,

34 Judá'pa' Jacob puechemer, Jacob'pa' Isaac puechemer, Isaac'pa' Abraham puechemer, Abraham'pa' Taré puechemer, Taré'pa' Nacor puechemer,

35 Nacor'pa' Serug puechemer, Serug'pa' Ragau puechemer, Ragaupa' Peleg puechemer, Peleg'pa' Heber puechemer, Heber'pa' Sala puechemer,

36 Salapa' Cainán puechemer, Cainán'pa' Arfaxad puechemer, Arfaxad'pa' Sem puechemer, Sempa' Noé puechemer, Noé'pa' Lamec puechemer,

37 Lamec'pa' Matusalén puechemer, Matusalén'pa' Enoc puechemer, Enoc'pa' Jared puechemer, Jared'pa' Mahalaleel puechemer, Mahalaleel'pa' Cainán puechemer,

38 Cainán'pa' Enós puechemer, Enós'pa' Set puechemer, Set'pa' Adán puechemer, Adán'pa' Yompor puechemer.

4

Allempo oneñeĩpa' topatenan Jesús, mueneñ o'ch atet p̄atan Jesús ñeñĩ ama pocteye' enteno Yompor

(Mt. 4.1-11; Mr. 1.12-13)

¹ Allempoña Jesús pa' o' err Jordanasot. Ñaña pa' añ e'ñe chorrenaya Parets Puecamquẽñ ñeñĩña anmue'ña all amayo.

² Attoña allpa' o' huapoña oneñeñ, mueneñ o'ch atet p̄atyes ñeñĩ ama pocteye' enteno Pompor. Allña pa' ama rreno e'ñe añ torrena attoch etsotuan ora allohuen ñeñĩ cohuentetsa Pomporcop. Ñeñĩto'marña ama't o' pa'tatsoch çharramatpa' ama't coñe'ñapa' ama es rreno. O'ña pa'tatsoch çharramatuapa' çho cheporratsa.

³ Allempoña oneñeñ atto topatosan Jesús pa' atet otos:

—Pa ñerra'm po'ñoçhte' Parets Puechemerep̄pa' o'ch p̄ot: Añ mapue' puenasepa' pan.

⁴ Jesúsña pa' atet otaḗ:

—Napa' ama nemno o'ch atet neḗa tarro'mar Yompor po'ñoñ ñeñĩ anuaret ahuatoteñ ñeñĩpa' atet oteneñ: “Allohueney acheñenesohueneypa' ama e'ñe rreñtsa ñapueñ yocrrañ yepeno. Añe'ñaña yocrrañ yepen yecamquẽñecop ñeñĩ allohuen allpon oteneñ Yompor.”

⁵ Allempoña oneñeñpa' o' aneñ all atarr aspen̄to e'ñe a'nos. Allotña gatyuesuererr allohuen ñeñĩ allpon all añcha'taretetyena pa'namen acheñenesha' ñeñĩ yeçha'yetsa errañaren añe patsro. Allotña ama't mamesha cohuospa' e'ñe orre'tuena erracmañen.

⁶⁻⁷ Oneñeñña pa' alla otteranerr Jesús:

—Ora allohuen ñeñĩ o' pentyesua ñeñĩpa' e'ñe nocma tarro'mar ñeñĩpa' na aparet. Ñerra'm esesha' nemnen o'ch naḗpa' napa' naḗcha'ca'ye. Ñeñĩto'mar te'pa' o'ch no-taḗ, ñerra'm na pema'yocheñoten o'ch peconcorpana'tna, napa' napaḗcha' ora all añcha'taretetyenet all atarr cohuentatyeneñ, e'ñe ora allohuen ñeñĩpa' e'ñech p̄ocma.

⁸ Jesúsña pa' alla otererr:

—Te'pa' o'ch orrerreḗ oneñeñe. Napa' ama nemno o'ch atet neḗa tarro'mar Yompor po'ñoñ ñeñĩ anuaret ñeñĩpa' atet oteneñ: “Añach ñapueñ yema'yochena Yeyomporer ñeñĩ Yepartseshar yepen, e'ñech ñap̄ta yesherbe'.”

⁹ Allempoña oneñeñpa' o' anerranerr Jesús Jerusaléño. Allña pa' a'tapatos nanac eno allohuanen Parets pa'paquẽll. Allña pa' otuererr:

—Papa' ñerra'm po'ñoçhte' Parets Puechemereḗ te'pa' p̄omacha arroḗ tarro'mar amach p̄a'tserrḗ

¹⁰ tarro'mar Parets po'ñoñ ñeñĩ anuaret ñeñĩpa' ama'tña atet oten:

Yomporpa' o'ch mueñonaḗ po'millañoḗeñrenesha' ñeñĩcha' pecuañḗsapue'.

¹¹ Ñeñcha' p̄agapapuet o'ch enatapapet attoch amach p̄a'tserrḗpatca'toso mapyo.

¹² Allempoña Jesús pa' alla otererr:

—Añpa'çho'ña anuaret Yompor po'ñoño, ñeñĩpa' atet oten: “Amach ya'llocchame'tatsche Yeyomporer ñeñĩ Yepartseshar yepen.”

¹³ Allempoña oneñeñ topatuahuan Jesús pa'namenotpa' o' ahuer o' caçhpa'ner allpon-mat tarro'mar oneñeñ çhocma topach.

Allempo e'ñe ñenmã torrena Jesús Partsocop all Galileo

(Mt. 4.12-17; Mr. 1.14-15)

¹⁴ Allempoña Jesús pa' o' alla ahuer Galileo. Ñapa' añ atarr ahuaencañ pene' Parets Puecamquẽñ. Errañaren Galileo'mar o' e'ñe e'mare'tuet ñeñĩ atet p̄a'yena Jesús.

¹⁵ All ap̄cha'yena judionesha' po'prahuetopa' ñaña pa' all yeçhatyenenet. Attoña allohuen acheñenesha' pa' atarr cohuen enteñet.

*Allempo serrpare'tatan Jesús acheñenesha' all Nazareto
(Mt. 13.53-58; Mr. 6.1-6)*

¹⁶ Atteñapa' o' alla çherr Nazareto all yeçhache't pompor allempo cheshena'. Pamtarrña allempo çhap yet allempo çhocma amesen judionesha', Jesúsñapa' o' ahuo' judionesha' po'prahuo, ñapa'çho' atet yeçhena. O' çhap puerahuopa' allñapa' tomos allcha' lleyatan acheñenesha' Yompor po'ñoñ.

¹⁷ Allñapa' añ apet libro ñeñt allo'tsen Isaías po'ñoñ ñeñt a'mtaye't Yompor po'ñoñ ahua't. Ñaña' toran libropa' all entan ñoñets ñeñt atet aquellcare't ñocop, ñeñtñapa' atet oten:

¹⁸ Napa' añ nechorrenaya Nompor Puecamquëñ tarro'mar ña nellense' nach serrpare'taterre' ora allohuen acheñenesha' ñeñt atarr es palltetsa. Napa' añcha' neñotatteranet cohuen ñoñets ñeñt'pa' alloch queshperret. Ñaña añecopña llesenserren attoch nach a'crratyerre' allohuen ñeñt mueroçhetyetsa puellquëño' pueyoçhreto. Nach eñotaterre' ñaña ñeñt ayottam'psare'tetyetsa allochñapa' o'çh atoram'psare'terret. Nach eñotaterre' ñaña ñeñt ama entetso allochñapa' o'çh enterret. Ñaña ñeñt amueroçhtatare'tetyetsa nachña a'rroyataterahuet.

¹⁹ Ñaña napa' añecopña llesenserren nach eñotaterahuet te'pa' o' çhap allempo pocte' enteñ Yompor o'çh atarr orrtatteranet puemuereña. Ñehua, arrpa' allohua ñeñt allpon lleyatanet Isaías po'ñoñ.

²⁰ O' lleyatuanetpa' o' alla e'tam'perran libro apuerran ñeñt sherbets all puerahuo. Allempoñapa' o' alla anorruerr. Allohuenña acheñenesha' ñeñt puerahuo'tsa'yen ñetñapa' atarr cohuanrrorteñet Jesús.

²¹ Ñaña' atet otanet:

—Atto' o' se'mhua añ ñoñetspa' te'ñapa' o' e'ñe çherr attoch e'ñe etsoterra ñeñt atet aquellcare't ahua'toteñ.

²² Allohuenña acheñenesha'pa' e'ñe cohuen eñora'yenet Jesúsocop. Atarr coçhnesha' enteññañet po'ñoñ ñeñt atet serrpare'tatyenanet. Ñetñapa' atet otanna'tyenet:

—Errotenotuañaca'yeña atarr coçhnesha' serrpare'tatyeney. Ñapa' añaca'ye José puechemer.

²³ Jesúsñapa' atet oterraneterr:

—Sapa' ñeñt atet o' se'mare'ton ñeñt atet norrtatyena' ahuaña Capernaumo te'ña sapa' çha semneñ o'çh soten añ ñoñets ñeñt'ecma muene' yotannena ama't ahua'toteñ: “Pa ñeñt'ep a'crratañtetsa te'pa' o'çh pa'crrata e'ñe pañeña”, tarro'mar sapa' añte' semnen o'çh atet norrtat ñaña arr cohuen e'ñe ya ya'netsro atet norrtatena' ahuaña Capernaumo.

²⁴ Tarraña napa' po'ñoçh o'çh notas:

—Ñeñt a'mtene' Yompor po'ñoñ ama't puesheñarra ama eñalleña ñeñt e'ñe cohuen enten allohuen pamo'tsesha' ñeñt parro yeçhenet all e'ñe ñet pa'netsreto.

²⁵⁻²⁶ Napa' po'ñoçh te'pa' añcha' neyerpatasa ñeñt atet pe't Elías ñeñt a'mtaye't Yompor po'ñoñ ahua't. Ñehua, allempopa' o' ma'pa char ñaña po'poñ puehmet charpa' nanac chares ama't mameshapa' ama huateno ñeñto'marña orrta muecheñets erracmañen all anetso ñeñt Israel all yeçhe't Elías. Ñaña ama't shonteñ israelena'tar ñeñt rretorraneshatyets allempo, tarraña Yomporñapa' ama alleye' mueñanoña Elías attoch yenposan ama't puesheñarra rretorranesha' ñeñt e'ñe pamo'ts pen ña. Arra mueñe po'poñ anetso ñeñt pa'so'cheñ Sarepta ñeñt allara Sidón allo'tsen puesheñarr rretorranesha', ñaña'pa' ñeñta yenpos.

²⁷ Elloña o'çh alla neyerpaterserr po'poñ ñeñt atet pe't ñaña Eliseo, ñapa'çho'ña ñeñt a'mtaye't Yompor po'ñoñ ahua't. Ñehua, allempopa' shonte' israelena'tarnesha' ñeñt osyen puetsarñats ñeñt otenet lepra all anetso Israel all yeçhe't Eliseo. Tarraña

ama't atteñ ama't puesheñarro'tapa' ama a'crratereña Eliseo e'ñe all Israelo. Ñapa' aña a'crraterr ñeñt' po'poñena'tar acheñ ñeñt'pa' añ pa'so'cheñ Naamán ñeñt'pa' po'poñ anetso'marnesha'; ñeñt' pa'netser penpa' añ pa'so'cheñ Siria.

²⁸ Acheñenesha'ña allempo e'met ñeñt' atet yerpatanet Jesús'pa' ñeñt'ña atarr at-srre'matahuet allohuenet ñeñt' puerahuo'tsa'yen.

²⁹ Ñetña tantrra'tetpa' o' muevo'teret allo't pa'netsreto't. Cheta'neret, allo'tpa' arr anmet allohua huañen pocoll allo't e'ñe atserettena allcha' huapore'chet attoch muet-satachet.

³⁰ Tarraña ama't huapore'chetañ, Jesús'ña'pa' o' chope'chnerr ama't all shontena acheñenesha'. Ñaña'pa' all cheta'tnerra rro'chopa' o' ahuer.

Allempo Jesús'pa' enta'p puesheñarr yacma ñeñt' chorrena oneñt'
(Mr. 1.21-28)

³¹ Allempoña'pa' o' alla ahuererr anetso Capernaumo allara Galilea. Pam'tarrña allempo chap yetñats allempo amesen judionesha' ñaña'pa' o' ahuo' po'prahuet. Allña'pa' ye'chatyesosan acheñenesha'.

³² Ñeñt' atet ye'chatenanet, acheñenesha'ña'pa' atta cohuanrrorteñet. Tarro'mar ñapa' atet ye'chatenanet ñerra'mrrate' ñeñt' allsensarettetsa Partsesho't.

³³ Puesheñarrña yacma ñeñt' allo'tsen puerahuo, ñeñt'ña'pa' añ chorrenaya oneñt'. Ñaña rranare'tapa' atet otapan Jesús:

³⁴—¿Eso'mare'tcha'ña erro't pe'posey Jesús'o, pa' ñeñt'ep nazareto'marnesha'p? Añecop'te' pehuapa o'ch pa'chencaterrey. Napa' o' neñotapa'p. Papa' atarr Partso'p añ pellsensene' Pomp'or ñeñt' atarr nanac Parets.

³⁵ Tarraña Jesús'pa' ama muenache o'ch eñorana'cha. Ñaña'pa' atet och:

—Pemma, te'pa' cho'paña ca'chpa'nerre'ña añ acheñer.

Oneñt'ña'pa' cha atanman yacmapa' alla o'shshe'ma e'ñe all shontena allohuen acheñenesha'. Allempoña'pa' o' ca'chpa'ner e'ñe atta, ama erro't pa'nme.

³⁶ Acheñenesha'ña'pa' cha atarr torats'panet pueyo'chret. Ñetña'pa' atet otanna'tyeset:

—Ta'mca'ye, erro'tente'ca'yeña Jesús po'ñoñ, atarrep'a't huomenc po'ñoñ pen. E'ñe atet ñerra'mrrate' ñeñt' allsensarettetsa ñeñt' atarr ahua'mencatesha'. Ama't oneñt' erro't otenpa' atet'cho' p'ateñ. Po'ño'chca'ye te'pa' o' cha'nerr oneñt'.

³⁷ Allempoña'pa' erracmañen allampaño'mar serrpare'tyeset ñeñt' atet pena Jesús.

Allempo a'crratosan Jesús Simón Pedro pa'so'mue
(Mt. 8.14-15; Mr. 1.29-31)

³⁸ Allempoña Jesús'pa' cha'nerr puerahuo't o' ahuo' ñaña Simón pa'paclo. Allña Simón pa'so'muepa' cha atsna'ten, cha atarr nanac hueraten. Otapet Jesús:

—Te' yapa' yemneñ o'ch pa'crratos atsnañe't.

³⁹ Allempoña Jesús'pa' o' ponmosana atsnañe'tpa' cha a'huañam'psose'ña po'urateña. Allempoña o' metua po'urateña'pa' allenta tanta o' agapapanet e'ñe cohuen o' yema'tapanet.

Allempo Jesús'pa' a'crraterran shonte' pa'namen atsnañe'te'chno
(Mt. 8.16-17; Mr. 1.32-34)

⁴⁰ Ñeñte yetrocma allempo o' emuena atsne'pa' acheñenesha'ña allohuenet ñeñt' atsna'tyets pamo'tsesha' ñetña'pa' o' huapatyesnenet atsnañe't e'ñe Jesúsesho. Ñaña'pa' na'yapanet pot ñesheto puesheña'ttset, attoña a'crratyesapanet allohuenet.

⁴¹ Ñaña shonte' acheñenesha' ca'chpatatyesapanet oneñt' ñeñt' puerranaro't otnomue' Jesús:

—Papa' ñeñt'ep e'ñe po'ño'ch Parets Puechemere'p.

Tarraña Jesús pa' a'mtsoñeñtanet, ama muenataneto o'ch eñorana'tnomet, tarro'mar ñetpa' e'ñe eñotnomet ñapa' ñeññ Cristotets.

Allempo Jesús pa' serrpare'tatyesnoman acheñenesha' erraḡaren Galileo'mar
(Mr. 1.35-39)

⁴² Tsapatña o' puetarenpa' Jesúsña pa' ahua'muen a'yo all ama acheñempaño yaye. Acheñenesha' ñapa' e' name'ta'mueñet. Atteña pa' o' čhapa'muenet allo'tsen Jesús. Ñetña pa' ama mueneñeto o'ch erra sa'nmanet.

⁴³ Ñaña pa' atet otapanet:

—Napa' añ poctetsa nocop o'ch ahuen po'poñ anetso'mar, allpa'čho'ña o'ch neserrpare'tatyesnomanet ñeññ cohuen ñoñets, o'ch neñotatyesosanet Yompor po'cohuenña ñeññ attoch ayochreshattena ña, tarro'mar napa' ñeññecopña llesenserren Nompor.

⁴⁴ Atteña pa' o' serrpare'tatyesnoman acheñenesha' erraḡaren Galileo'mar all apča'yenet po'prahueto.

5

Atto Jesús rromatosanet shonte' cac
(Mt. 4.18-22; Mr. 1.16-20)

¹ Allempoña po'pocheño Jesúsña pa' e'ñe sa'patopño ten, ñeññña sa'ppa' añ pa'so'cheñ Genesaretas. Allña pa' huača'toña shonte' acheñenesha' o' čha echta'tatsetanna'toset. Attoña ama't Jesús pa' o'čha echta'toset. Ñetpa' añ muenenet o'ch e'mñotosñañet Yompor po'ñoñ.

² Jesúsña pa' all entosan epna noñ e'ñe all sohua'puetso. Ñeññña po'taruas pene' ñeññ rremuene' cacpa' ñetña pa' ama po'noñto'tsa'yeneto. Ñetpa' o' ahuanmuet a'yenet allcha' tsama'teneta' po'terraya.

³ Jesúsña allpa' a'tapos puenarr noñto, ñeññ Simón po'noñto. A'tapos pa' otan Simón:

—Pechtañpsen mame' rroča'sonet.

Jesúsña anorros noñtopa' allotña yečhatosan allohuen acheñenesha'.

⁴ Allempoña serrpare'tatuanet, o' alla o'terranerr Simón:

—Te'pa' o'ch ahueḡ rroča'sonet epopa' o'ch alla peterrayererr, te'pa' perrma'ch shonte' cac.

⁵ Simónña pa' atet och:

—Yapa' o' Maestroča' e'ñe yarepen torratta terrayats e'ñe orrena ama't parra cac ama yerrmueñe. Te'ña ḡaca' notene' o'ch alla neterrayererr ama'tpa' atetča' neḡa o'ch alla neterrayererr.

⁶ Allempoña pa' atetčo' pet, o' alla terrayerreterr. Terrayaña pa' shonte' rroman cac nanac aton, čha muene' rrarre'tatan terraya.

⁷ Atteña pa' agochet po'potantañ pamo'tset ñeññ po'noñto'tsa'yen o'ch huapuet ñeññča' rromapretahuet cac. O'ña čhapuet o' esha'tanatet cac noñto e'ñe epno'mar chorreres cac noñto, čha muene' esha'tatan noñto.

⁸ Allempoña atet eñch Simón Pedro ñaña pa' poma'yorñecma ponmana Jesús, concorposa pa'rrpōt, all otos:

—Amach Partseshacha' allo'na peyemtatsenneno tarro'mar napa' ñeññen atarr ochñañen.

⁹ Atet otan Jesús pueyorñoñ tarro'mar eñoteñ ñeññ atto rreman shonte' cacpa' Parets atet ḡatene'. Ama't allohuen ñaña ñeññ epuet taruasetpa' atarr nanac yorenet.

¹⁰ Ama't ñaña Jacobo ñaña Juan ñeññ Zebedeo puechemerasha' ñeññ parro taruasen Simón, atarr nanac yorenet. Allempoña Jesús pa' atet o'terranerr Simón:

—Amach čha peyorenatsto. Ñeññ atet pepena ahuaťoteñ e'ne' cac te'ña pa' atetča' peperra e'nerre' ñaña acheñ ñeññča' ḡame'ñaterra.

11 Allempoñapa' ahuañperret o'ch etsotuerret allecma etsotenet. Ñetñapa' allem-pocma sohuanmuet allohuen ñeññ allpon echyenet. Allempoñapa' coteret Jesús attoch pueyochresha' perranet.

Atto Jesús a'crraterran puesheñarr yacma ñeññ aptsarñañ
(Mt. 8.1-4; Mr. 1.40-45)

12 Allempo po'pocheño Jesúsñapa' alla çherrerr po'poñ anetso. Allñapa' huapoña puesheñarr yacma ñeññ osen puetsarñats ñeññ otenet lepra, atarr apoçhtateñ. Entosan Jesúsapa' alla rromañpsosya. Allña rromuenapa' allotña enamosan Jesús, atet otos:

—Ayochreshate ñerra'm pa muenatspa' pa ñeññep atarr ahuañencateshap pa'crrataye'cherren allochñapa' attoch e'ñe cohuen entuerren acheñenesha'.

13 Jesúsña anretapa' allenta a'pille', atet och:

—Napa' nemneñca'ye, metuerrepa'ña peptsarña attoch e'ñe cohuen enterreñ allohuen acheñenesha'.

Yacmañapa' allorocma metuer pueptsarña.

14 Jesúsñapa' alla otererr:

—Te' atto o' na'crraterreppa' ama't e'ñe puesheñarrapa' amach pota'psa'tatsche. Corneshachña pegatena' all peptsarse't. Atet nane't Moisés ñoñets añ acheñrecop ñeññcha' a'crratere'tterrtsapa' te'ñapa' o'ch es panom ñeññcha' papos all ñeññ Yomporecop. Allochñapa' attoch e'ñe cohuen enterreñ allohuen acheñenesha'.

15 Elloña atarr nanac serrpare'tyeñet, o' erracmañen epa'hua atto' pena Jesús. Ñeñño'marña shonte' acheñenesha' huaçha'toñet attoch e'ñeñotoñet po'ñoñ ñaña attoch a'crratyesapanet allohuen pa'tsnañe'teret.

16 Tarraña ñapa' errotenopa' o'ch ahuer a'yo all ama acheñempaño'yaye allcha' ma'yochena.

Atto Jesús a'crraterran ñaña ñeññ echarraña
(Mt. 9.1-8; Mr. 2.1-12)

17 Po'pocheño allempo Jesúsapa' all yeçhaterranerr shonte' acheñenesha', allña allpononetpa' all anorrçha'tyen ñaña patantarr fariseonesha' ñaña ñeññ atarr etsotayenayeñ ñoñets ñeññ atet anaret judioneshap. Ñetpa' pa'namen anetso't huaçha'tyenet—Galileo't ñaña Judeo't ñaña Jerusaléno't. Jesúsñapa' atarr ahuañencat peñ Pompor, attoña a'crratyesan shonte' ñeññ atsna'tyets.

18 Atteña o' huapatoñet ñaña echarraña, huapatamñset puechecna'po't. Ñetpa' añ muenenetañ o'ch be'toset o'ch e'ñe noset Jesúsesho.

19 Tarraña shonte' acheñenesha' ñeñño'marña ama eshcaye' abe'tosetoña atsnañeñ attoch çhapachet e'ñe Jesúsesho. Atteñapa' a'tapatoset eno't pocollato. Allñapa' o' a'rrote'toset pateprarr echet allotña a'suatañset echarraña puechecnape'na. Attoña çhapachet e'ñe rroçho allo'tsen Jesús.

20 Jesúsñapa' eñotapanet ñetpa' atarr nanac yemteñet, ñeñño'marña atet otapan echarraña:

—Masheñcha' te'ña pa po'chñarpa' o' a'pretna'huareta.

21 Otue' atetpa' añña fariseonesha' ñaña ñeññ atarr etsotayenayeñ ñoñets ñeññ atet anaret judioneshap, ñetñapa' otatse'tet ñañeñeta:

—Esesha'huañaca'ye o' achm'are'tañña Yompor. Arr patsropa' ama't puesheñarra ama eñalleña ñeññ peretnene' ochñarets, ñaptaña Yompor peretnene' ochñarets.

22 Jesúsñapa' eñotanet ñeññ atet otenet ñocop, ñañaapa' atet otanet:

—Sapa' eso'mare'tcha'ña atet soçtape'chatse'tyesña seyoçhro.

23 Ñehua, sapa' çha soten ñeññ atet o' notue echarraña po'chñarpa' o' a'pretna'huareta, ñeññpa' ama torrapahuoyaye. Sapa' añña atarr torrapo' senten attoch na'crrater çhoncha'ña ote': "Petantena, pechope'chnen."

²⁴ Ñehua, napa' o'ch neñotatas na Ñeñten Acheñetosets, napa' apareten llesens attoch nach peretnerre' ochñarets añ patsro.

Ñeñto'marña Jesús allempopa' atet otan echarraña:

—Te'ña napa' o'ch notap: Petantena, pechta'nen pemue' o'ch pechope'chnen, ahuenep pepaclo.

²⁵ E'ñe otue' atetpa' echarrañaña' cha tantetsa e'ñe allorocma. Allohuenña acheñenesha' e'ñe entueñet. O' cheta'nenan po'mue' pa'ye'chochtateñesha' Yompor o' ahuen pa'paclo.

²⁶ Allohuenña acheñenesha'pa' cha atarr cohuanrrortapueñet. Attoña ñetpa'cho'ña atarr cohuentatyehñañet Yompor. Allohuenetña'pa' atarr nanac yorenet, atet otyenet:

—Te'pa' o' yenterr ñeñt ama't ahua'apa' ama yentareña ya ñeñt atarr cohuen.

Allempo Jesús'pa' hua'ña'nman Leví attoch pueyochresha' per

(Mt. 9.9-13; Mr. 2.13-17)

²⁷ Allempoña'pa' o' ahuererr Jesús. All oñempa' all entnoman puesheñarr ñeñt po'taruas pene' o'ch cobrenan acheñenesha' quelle ñeñt gobiernocop. Ñeñtña'pa' añ pa'so'cheñ Leví*. Alla anen allecma apchenet quelle ñeñt gobiernocop. Jesúsña'pa' otosan Leví:

—Te'pa' p'octa'n attoch neyochresha' neperrep.

²⁸ E'ñe otue' atet Levíña'pa' cha tantnomtsa o' cotan Jesús. Attoña ñapa' e'ñe sohuanman ñeñt allohuen pa'namen.

²⁹ Allempoña'pa' chapa'muen ñaña pamtarr allempo Leví pa'paclopa' yechcatatan shonte' rreñets attoch coshame'tampesyet Jesús. All rrallme'chapreteñ shonte' acheñenesha'. Allo'tsa'yen ñaña ñeñt parro yemtena Leví. Ñetpa'cho'ña ñeñtareta ñeñt po'taruas penet o'ch cobra'yeñet acheñenesha' quelle ñeñt gobiernocop, tarraña ñetpa' puehquëño'te'na cobreñet acheñenesha' aton. Ñeñt rrallme'chapretene' Jesús.

³⁰ Fariseonesha' ñaña ñeñt atarr etsotayenayeñ ñoñets ñeñt atet anaret, ñetña'pa' sasare'teññañet Jesús pueyochresha'. Atteña'pa' otarettet:

—Ta'm, eso'marte'ña serrallme'chapreteña añ acheñeneshar ñeñt puehquëño'te'na cobra'yene' acheñenesha' aton quelle ñaña epas acheñenesha' ñeñt atarr ochña'atenesha'chno.

³¹ Atet e'manet Jesús, ñaña'pa' atet toma'ntatanet:

—Ñeñt e'ñe huomech entetsapa' ñetpa' ama e'neñetoña apartañ. Añña ñeñt at-sna'tetspa' ñetña'pa' chocma añ e'nenet ñeñt'cha' a'crraterrahuet.

³² Napa' ama añecpaye' nohuapo attoch neçhore'tos ñeñt e'ñe atet entetsañ ñetpa' e'ño' cohuen es pa'yenet. Napa' añecopña nohuapa attoch neçhore'tos ñeñt atarr ochña' entyetsa. Allochña'pa' attoch o'ch cotape'cherret ello e'ñe cohuen Yomporecop.

Allempo Jesús'pa' eñotatanet atet'cha' tore'tet Yomporecop ñeñt e'ñe po'ño'ch sherbets

(Mt. 9.14-17; Mr. 2.18-22)

³³ Ñetña'pa' alla otereterr Jesús:

—Ñeñt Juan pueyochresha'pa' chocma tore'tenet Yomporecop,† chocma ma'yochenet. Ñaña fariseonesha' pueyochresha'pa'cho'ña attecma penet. Tarraña paña peyochresha'pa' eso'mare'tña ama atteye' peneto. Ñetpa' atta es rratse'tyenet, atta es orryenet.

³⁴ Jesúsña'pa' alla toma'ntaterraneterrpa' atet otanet:

—Ñeñt ahua'ñare'ch'no all rrallme'chapreteñet ñeñt e'ñe errete' sena'tetsa, ama pocteyaye o'ch yotanet “amach es serra'yestatsto”, tarro'mar ñeñt'pa' atet coshapreteñet ñeñt sena'tetsa.

* **5:27** Leví'pa' ñeñtara ñeñt sochenet Mateo. † **5:33** Añ tore'teñetspa' añecop o'ch yetorra Yomporecop. Amach añecpaye atomat, ñeñt'pa' añecpa mameshacop o'ch yeque'chpa' yerrar.

³⁵ Tarraña ñerra'm esempo machayoŧa sa'nerranet ñeñŧ sena'tetsa, ñeñŧña parro yemuetyena allempoña ñetpa' e'ñe puellquẽnoŧet caŧhpa'huerretcha' puerrar, amach arrenaye' enterreto. Ñeñŧpa' attochña tore'terret allempo Yomporecop e'ñe po'ñoŧh. Arrpa' allohua huañ ñeñŧ atet Jesús toma'ntata ña sena'tostsa.

³⁶ Elloñapa' o' alla toma'ntaterraneterr ñeñŧ atet yeŧhen judionesha' arr patsro ñeñŧo'marña atet otanet:

—Ñehua, ñerra'm yeŧhen epma yeshtam, paŧerr emarr ñaña po'poñ mellashañpa' amach yerrarratstoña emarr yeshtam alloch yellta' yeshtam mellashañ all rrrarra'nen. Tarro'mar ama't atet yeŧatsechpa' ñeñŧpa' e'ñech orrena. Ama't yeshtam emarrpa' o'huañcha' cohuenta all yerrarreñ. Ñaña yeshtam mellashañ ama't o' yelltereñ emarropa' amach alla cohunterro tarro'mar ñeñŧ allo o' yellterpa' ama mellashañecmayaye, ñeñŧo'marña amach ñeñŧtatare.

Ñeñŧpa' attoña Jesúsapa' eñotatanet ña poŧtaŧña e'ñe etserra.

³⁷ Jesúsñaapa' alla toma'ntaterraneterr po'poñ ñeñŧ atet yeŧhena judionesha' o'ch yeŧcatenet pa'rrom orroŧ. Ñeñŧo'marña atet otanet:

—Ama't puesheñarroŧeyapa' amach yeshatstoña vinos emasa mellasha'ñañ orroŧo ñeñŧ ayeŧcataret pa'rrom. Tarro'mar ñerra'm atet yepe'pa' o'ch chasa'ña vinospa' ŧhach a'ptsan orroŧ, vinosñaapa' e'ñech shebhua, ñeñŧña orroŧpa' ama't mamesha'pa' amach es sherberro.

³⁸ Añña ñerra'm emasa vinos, arrcha'ña yeshe' emerra orroŧo ñeñŧ ayeŧcataret pa'rrom. Allochñaapa' ama'tcha' chasa' vinospa' amach ŧha potsa'ŧsoña vinos ñeñŧpa' allach yeŧhen epo'mar.

Ñeñŧpa'ŧho'ña attoña Jesúsapa' eñotatanet ña poŧtaŧña e'ñe etserra.

³⁹ Po'poñoñetpa' alla toma'ntaterraneterr Jesús, ñeñŧpa' atet oterraneterr:

—Ñeñŧ e'ñe yeŧhenaya o'ch orran co'nes ñeñŧ atarr chase'pa' ñapa' ama mueno o'ch orran co'nes emasa, tarro'mar ñapa' atet oten ñeñŧ atet yeŧhena ahuatoteña' ñeñŧa e'ñe cohuen enten.

6

Allempo Jesús pueyochresha' taso'tamŧpesyesnomuet trigo añe yetro allempocma amesen judionesha'

(Mt. 12.1-8; Mr. 2.23-28)

¹ Allempoña ŧherrerr allempo ŧhocma amesen judionesha'. Allempoña Jesúsapa' arr oñem chetso'mar epuet pueyochresha'ŧhno. Allempo oñenet chetso'mar pueyochresha'ñaapa' taso'tamŧpesyesnomuet puechña'tets trigo a'she'ŧhallme'ŧhyesnomet attoŧ rrocllome'ŧchachet o' rra'yeshomet.

² Ñeñŧña patanta'tets fariseonesha'pa' che'ptare'tanet, atet otarettet:

—Eso'mare'tña atet sepena ñeñŧ ama poŧteyaye o'ch atet yeŧa tarro'mar te'pa' añe yetro ñeñŧ atet anaret ahuatoteñ allempocmach yamesen.

³ Jesúsñaapa' otanet:

—Sapa' ama'trra selleyareña añ ñoñets all oten ñeñŧ atet ŧa ahuaŧ David allempo cheporra'nma epuet ñaña allohuen ñeñŧ coŧene'.

⁴ Ña allempopa' be'tosos Yompor pa'paclo, allñaapa' chetosan pan ñeñŧ atma'ntatareŧ atet ñerra'mrrate' ñeñŧ nenet all Partsocop. Ñehua, ñeñŧ panpa' ama poŧteyayñe o'ch esesha' rre'. Ñeñŧpa' añach ñapueŧ rrene' cornaneshachno; ñeñŧpa' e'ñe atet anuareŧ judioneshacop. Ñeñŧña panpa' o' chetos David, rros, rratosan ñaña allohuen ñeñŧ epuet.

⁵ Allempoña alla oterraneterr Jesús, ñeñŧpa' atet otanet:

—Ñeñŧo'marña te'pa' o'ch notas, na Ñeñŧen Acheñetosets ñeñŧen allsensareten, naca'ye atet otets este' poŧtetsaña ñeñŧcha' atet yeŧa añe yetro allempocma yamesen.

Allempo Jesúsapa' a'crraterran ñeñt chelletsa pot

(Mt. 12.9-14; Mr. 3.1-6)

⁶ Allempoñapa' çherrerr po'pocheño ñeñt yetñatsro allempocma amesenet. Jesúsñapa' be'tosuenerr judionesha' po'prahuo. Allñapa' yeçhatyesuenanerr acheñenesha'. Allñapa' allo'tsen ñaña puesheñarr yacma ñeñt çha chellena pot po'cohuenrot.

⁷ Acheñenesha'ña ñeñt atarr etsotayenayeñ ñoñets ñeñt atet anaret epuet ñaña fariseonesha' ñetña allpa' Jesúsapa' atarr cohuanatyenet attoch enteñeterr ñato'rraña o'ch a'crratenanerr acheñ aña yetro allempocma amesenet. Ñerra'm o'ch a'crratenanerr ama't puesheñarra acheñ aña yetro allempo amesenet, allempoñapa' esheccha' a'metamñeñeta' añcha'taretesho.

⁸ Jesúsñapa' eñotanet ñeñt atet cotape'chatse'tyenet pueyoçhreto. Ñañaapa' atet otan yacma ñeñt chelletsa pot:

—Apon ãatomos arrma.

Yacmaña huapapa' o' tomos all rroçho.

⁹ Jesúsñapa' atet otanet:

—Ñehua, napa' o'ch na'p̃to'tas: ¿Erra'tsena'tña ñeñt e'ñe pocte'senten ñeñtcha' atet yeña añ yetro allempo yamesen? Ñato' o'ch atet yepe' e'ñe cohuen po'psheñeñ, amapa' ñato' o'ch atet yepoñ ñeñt ama pocteyaye. Ñato' aña'e' pocte'senten o'ch ya'crrach acheñ amapa' aña'e' pocte'senten amach ya'crratatsche çhachña yemtsatach.

Ñetñapa' ama't puesheñarroñetapa' ama eseshaye' anapuenaye entaye.

¹⁰ Ñañaapa' cohua'yesan allohuen ñeñt anorrçhets all, allempoñapa' otan ñeñt chelletsa pot:

—Te'pa' o'ch notaþ: Petapuerr þot.

E'ñe otue'pa' ñañaapa' allentepa'tcha' tapuerran pot, o' e'ñe cohuenterra pot.

¹¹ Fariseonesha'ñapa' ñeñtña atarr atsrre'matahuet. Allempoñapa' cotape'chatanna'tet, atarr o'pachet Jesús.

Allempo Jesúsapa' acran çharrasheña ñeñt puechetsa epsheña ñeñtcha' llesensa'

(Mt. 10.1-4; Mr. 3.13-19)

¹² Allempoña Jesúsapa' o' alla ahuerrerr a'yo aspeno allcha' ma'yochena'. Allñapa' arepen ma'yochaya Pompor.

¹³ Tsapaña puetarenpa' agota'muenan allohuen ñeñt pueyoçhresha'çhno pen. Allempo çhaçha'tet ñeshopa' ñañaapa' o' acrapan ñeñt çharrasheña ñeñt puechetsa epsheña ñeñtcha' llesensa' ñeñtcha' serrpare'tyetsa' allemeñ anetso'mar.

¹⁴ Ñeñt llesensa' ñeñtapa' añeçhno: Simón ñeñt socherr Pedro, allotpa' ñaña pa'mo'nasheñ Andrés, allotpa' Jacobo* ñaña pa'mo'nasheñ Juan, allotpa' Felipe, ñaña Bartolomé,

¹⁵ ñaña Mateo ñaña Tomás ñaña Jacobo ñeñt Alfeo puechemer, ñaña ñeñt po'psheñeñ Simón ñeñt cananistanesha' ñeñt atarr torrattse't pa'netsrecop,

¹⁶ allotpa' ñaña Judas† ñeñt Jacobo pa'mo'nasheñ, allotpa' ñaña po'psheñeñ Judas Iscariote ñeñtcha' pomuerre' tsapaonet Jesús.

Allempo Jesúsapa' yeçhatenan shonte' acheñenesha'

(Mt. 4.23-25)

¹⁷ Allempoña huerra Jesús aspeno't epuet pueyoçhresha', tomçha'tuerret all aspenet pacñe'tpener poño po'mopñero. Allñapa' o' çhaçha't shonte' po'potantañ acheñenesha' ñeñt pueyoçhresha' pen. Ñaña allo'tsa'yen shonte' acheñenesha' ñeñt huaçhetsa allemeñ anetso't—Judeot ñaña Jerusaléño't, ñaña sa'patopño'marnesha' ñeñt huetsa Tiro't ñaña

* 6:14 Jacobopa' ñeñfara ñeñt sochenet Santiago. † 6:16 Judaspa' ñeñfara sochenet Tadeo.

Sidónoť. Ñetpa' añecopña huačhenet o'ch e'mñoteret ñamet Jesús ñeñt atet serrpare'ten ñaña añecpa'ñaña huačhenet attoch a'crratyapanet Jesús patsnañeteret.

¹⁸ Ama't ñaña allohuen ñeñt muerochtatyen oneñet ñaña'pa' e'ñe a'crratyapanet.

¹⁹ Allohuenña acheñenesha'pa' atarr mueneñet o'ch a'p'lloset Jesús tarro'mar ñapa' ña atarr ahuamencatesha', e'ñe ña po'huamencoť a'crratyenan allohuen acheñenesha'.

*Atto atarr cosheñtso'tsa'yen patantarr ñaña atarr llequēñtso'tsa'yen po'potantañ
(Mt. 5.1-12)*

²⁰ Allempoña Jesús'pa' cohua'yesan ñeñt pueyochresha' pen, ñaña'pa' atet otanet:

—Ñeñtes atarr huocchañnesha' entetsa ñeñtescha'ña atarrcha' cosheñtso'tsa'yenes tarro'mar sapa' o'pataterr'sach Yompor po'cohuenña atto atarr ayochreshatena ña.

²¹ Ñaña sapa' ñeñtes cheporrare'tyetsa te' ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe señmataterre'.

Ñaña sapa' ñeñtes yahuetsa te' e'ñe sellquēñoť ñeñtescha'ña atarrcha' cosheñtso'tsa'yenes tarro'mar Yomporcha'ña e'ñe seche'taterre' socsheñoť.

²² Ñaña sapa' atarr cosheñtso'tsa'yenes ñerra'm esempo e'moñe'tenset no'mar ñerra'm esempo mueño'tenset, ñerra'm esempo puesasare'teñoťetas sochatse'tenset tarro'mar sapa' na same'ñena Ñeñten Acheñetosets.

²³ Allempo atet penset ñeñt ama cohuenayaye, sañapa' socshepa'ch nanac ñaña señoche'pa'ch shonte' ñeñt o'patatensa Yompor pue'ntaño ñeñtcha'ña atarr socshaterre'. Ñehua, ñetpa' pa'tañneshañpa' attecma muerochtatyese'te' ñaña ñeñt a'mta'yese'te' Yompor po'ñoñ ahuat.

²⁴ 'Tarraña te'pa' o'ch notas sa ñeñtes atarr ečllayoretes ñeñtes echene' ora allpon ñeñt e'ñe socpa. Sapa' ñeñtescha'ña atarr llequēñtso'tsa'yenes tarro'mar esempopa' huañerrcha' ñeñt socshatene'.

²⁵ Ñaña atarr llequēñtso'tsa'yenes ñeñtes atarr esocmañen es echyets allo e'ñe señmatena seyeteñoť. Cherrcha' allempoch atarr sepallterra ñeñtcha' serrar seperr.

Ñaña atarr llequēñtso'tsa'yenes sa ñeñtes te'pa' e'ñe socsheñesha' seche'tatsetyena. Cherrcha'ña allempoch seyhuerria sellquēñoť.

²⁶ Ñaña atarr llequēñtso'tsa'yenes ñerra'm esempo allohuen acheñenesha' e'ñech cohuen entapretenset, e'ñe cohuen eñosyenet socop. Tarro'mar ñetpa' atet pete't pa'tañneshañ ahuat, e'ñe cohuen eñosyese'te' añ acheñreneshacop ñeñt ama't ama Yomporeye' po'ñoñ a'mta'yese'te.

*Atto Jesús'pa' yečhatosanet amorrentpo'ch yeñch ñeñt ye'moñe'tyene'
(Mt. 5.38-48; 7.12)*

²⁷ Sa ñeñtes ne'mñotene' o'ch notas ñeñtcha' atet sepa e'ñe cohuen, semueryach ama't ñeñt se'moñe'tene'. O'ch atet sepe' e'ñe cohuen.

²⁸ Ñaña ama't erra'tsen ñeñt sarrnomare'tenaya sañapa' o'ch senamaterrñañ Yompor pa'nateña. Ñaña ñeñt sesasare'tene' sañapa' o'ch sema'yochamñpenanet.

²⁹ Nehua, atet ñerra'm esempo esesha' pue'moñe'teñoťetas o'ch tacllaset setsa'po, sañapa' poctepa'chña señch tacllerrserrepa' ñaña po'pshemñtañoť. Ñaña ñerra'm esempo esesha' seprratamñpse' seshtam, sañapa' poctepa'chña señch puerrratamñpsasetepa' sesh-tam ñeñt muenenet ama't ñaña po'pmañ seshtam allo sepmatena.

³⁰ Ñerra'm esesha' es senamuene' sañapa' sapepa'ch ama't esesha. Ñaña ñerra'm esesha' seyoratsre'tamñpse' sañapa' amach alla senamatstere apuerrsetepa' alla.

³¹ Ñehua, ñerra'm erra'tsente' e'ñe cohuen senten ñeñt semnen sa ñeñtcha' atet ponas po'psheñeñ, sapa'cho'ña e'ñech attecma sepanet saña.

³² 'Ñaña sa ñerra'm aña semorrentena ñeñt atarr semorrentenaya samña, ñeñtpa' amach e'ñeye' sorrratenona ñeñt e'ñe po'ñoçh cohuentetsa, tarro'mar ñeñt ama ame'ñenayo Yompor ñetpa aña morrentenet ñeñt e'ñe morrentenahuet ñamet. Añña atarr cohuentetsa ama't ñeñt ama yemorrentenayepa' o'ch yemorrencha e'ñe cohuen.

³³ Ñaña ñerra'm aña e'ñe cohuen seyenpa'yen ñeñt seyenpa'yene' samña, ñeñtpa' ama e'ñeye' sorrratenona ñeñt e'ñe po'ñoçh cohuentetsa, tarro'mar ñeñt ama ame'ñenayo Yompor ñetpa' aña yenpa'yenet ñeñt yenpa'yenahuet ñamet.

³⁴ Ñaña ñerra'm añecpa es sartanna'tyena attoch ellopa' o'ch alla apuerrset samña, ñeñt atet sepenapa' ama e'ñeye' sorrratenona ñeñt e'ñe po'ñoçh cohuentetsa; añcha'ña es saretyena po'psheñeñ ama't ñetpa' ama'tcha' ama apuerrseto ama't coñe'ta, tarro'mar atet pena ñeñt ama ame'ñenayo Yompor ñerra'm eñoteñet o'ch alla aparetterret ñamet esheccha'ña archet po'psheñeñ.

³⁵ Tarraña napa' o'ch notas, sapa' aña'nachña semorrentena ama't ñeñt se'moñe'tene'. Ñaña sapa' aña'nachña seyenpuen ama't ñeñt ama seyenpuenaye. Ñaña sapa' aña'nachña es saretyena ama't ñeñtcha' ama sapuerraye. Ñerra'm atetcha' sepa Yomporña' apuerrescha' ello ñeñtcha' atarr socshatuerre'. Ñapa' allempoch e'ñe puechemer perres, ñeñtara Yompor Ñeñt Nanac Parets. Tarro'mar ñapa' aña'naña muerena ama't ñeñtcha' ama coshaterraye ña, ñeñtara ñeñt ama cohuenaye' es petso.

³⁶ Sapa'cho'ña atarrepa'chña semueranna'ta e'ñe atet pena ñeñt Yeyomporer yepen atarr muerenya yaña.

E'ñe attotapa' amach yotteñe'channa'tatsto

(Mt. 7.1-5)

³⁷ 'Sapa' amach sotatsche po'psheñeñ "ama pocteyaye ñeñt atet sepa'yena", allochñapa' amach otuerrso samña Yompor ama pocteyaye ñeñt atet sepa'yena samña. Ñaña e'ñe attotapa' amach sottene'chatsche po'psheñeñ allochñapa' Yomporpa'cho'ña amach otteñe'chuerrso samña, chochña e'ñe cohuen sepretnannena allochñapa' Yomporpa'cho'ña e'ñech cohuen peretna'huerres samña.

³⁸ Ñaña sapa' e'ñech cohuen es sapanna'tyena allochñapa' Yomporpa'cho'ña e'ñech cohuen es apuerres samña. Shonte'ch nanac es apuerres, atet ñerra'mrrate' cho es e'chorratenset soshaco atet ñerra'm chop e'charet. O'ch chorrapa' o'ch a'rrapuet esheccha' esha'tereter po'poñ, ñerra'm o'ch chorrerrerrpa' o'ch pa'shmuet attoch e'ñe a'tamo'yonaset. Ñeñtpa' añ toma'ntena atto es apueney Yompor nanac aton. Ñaña errponcha' sañ po'psheñeñ, sapa'cho'ña e'ñech allpon apuerres samña Yompor.

³⁹ Allempoña Jesúsapa' atet toma'ntaterraneterr, ñeñtpa' atet otanet:

—Ñeñt aporo'yetpa' ñapa' amach errotenot echa'nmano po'psheñeñ ñeñt parro aporo'yetecmuet. Tarro'mar ñerra'm atet penet, ñerra'm arrotonta echa'nmanna'tnomuetpa' epsheño'maret chach shora'nmuet arrototo. Arrpa' allohua ñeñt atet toma'ntatanet atet ñerra'm ya allempo ama yoctape'cherra' ñeñt cohuentetsa Yomporecop amach errotenot yoctape'cache po'psheñeñ ñeñt ama eñotenaye ñeñt cohuen enten Yompor.

⁴⁰ 'Ñeñt ayçhatarettetsapa' ama't puesheñarra amach errotenot metanetoña ñeñt allpon eñoten ñeñt yeçhatene'. Ama't allempo e'ñe ayçhatarettapa' e'ñech allpona yeçha' ñeñt allpon eñoten ñaña ñeñt yeçhate'.

⁴¹⁻⁴² Amach atet sentatsche po'potantañ ñerra'm ñetpa' ama cohuenaye' es peneto ama't sapa' ama sentenoña ñeñt atet sepa'yena sa; ñeñtpa' ello señtaneñña po'potantañ ñeñt atet es pa'yenet ñet. Ñerra'm ama cohuenaye' es sepeno samapa' amach sotatscheña po'potantañ: "Masheñcha' napa' o'ch noctape'chaterreñ e'ñe cohuen." Tarro'mar ñerra'm atet sepenapa' cha sommo'chena. Ñanomcha'ña añ sehuapore'terr

ñeñt̃ ama cohuenaye' sepeno sa, allochñapa' attoch seño ch cotape'chate' samo'ts e'ñe cohuen. Ñeñtpa' añ toma'ntena o'ch senten po'psheñeñ pa'clloyo'tsen puepachña ama't sa seclloyopa' allo'tsen tsach; ñeñt̃ñapa' ama senteñe. Ñerra'm atetpa' amach er-roteno't socheña po'psheñeñ: "Masheñcha' napa' o'ch nechterrnaḡ pecloyo't pepachña." Tarro'mar añ tsach ñeñt̃ seclloyo'tsenpa' cha a'npuennasña attoch e'ñe cohuen es sentyen. Ñanomcha'ña añ sehuapore'terr tsach seclloyo't allochñapa' attoch e'ñe cohuen es sentyen. Attochña e'ñe cohuen sechterrñañ po'psheñeñ puepachña pa'clloyo't.

Allohuen acheñ ñeñt̃ e'ñe po'ño ch cohuen acheñer, ñetñapa' añcha' orrtatyenet ñeñt̃ e'ñe cohuenare'

(Mt. 7.17-20; 12.34-35)

⁴³ Tarro'mar allohuen acheñ ñeñt̃ e'ñe po'ño ch cohuen acheñer, ñetñapa' añcha' orrtatyenet ñeñt̃ e'ñe cohuenare'. Tarraña po'potantañ acheñenesha' ñeñt̃ po'ño ch ama cohuenayaye ñetñapa' añach orrtatyenet ñeñt̃ ama cohuenayaye. Ñeñtpa' atetcha' netma'ntaterra: Ora allohuen ñeñt̃ e'ñe cohuen narmetsoch, pue'merpa'cho'ña e'ñech cohuenare'. Añña po'pchañechno narmetsoch ñeñt̃ ama cohuenayayepa' pue'merpa'cho'ña amach e'ñe cohuenayaye.

⁴⁴ Ñeñto'marña attoña yeñoten erra'tsente' ñeñt̃ e'ñe cohuenare' narmetsoch ñaña ñeñt̃ ama cohuenayaye, pue'mero'tña e'ñe yechme'teñ. Ñaña yapa' e'ñe yeñoteñ ama arroteye' yetoquënoña llo'm ajcho't. Ñaña ama arroteye' yetoquënoña ap rrenagachot.‡

⁴⁵ Ama't erra'tsena acheñer ñeñt̃ e'ñe po'ño ch cohuen, ñapa' añcha'ña orrtaten ñeñt̃ e'ñe cohuenare' cotape'chen pueyo'chro tarro'mar pueyo'chro allña shonte' cotape'chenan ñeñt̃ cohuentetsa. Tarraña po'poñ acheñer ñeñt̃ po'ño ch ama cohuenayaye, ñapa'cho'ña añach orrtaten ñeñt̃ atet cotape'chen pueyo'chro ñeñt̃ ama cohuenayaye tarro'mar pueyo'chro allña shonte' pa'namen cotape'chenan sosya'tsañ. Tarro'mar ñerra'm shonte' yocape'chen yeyo'chro ñeñt̃ cohuentetsa, ñeñtpa' e'ñech ñeñta cohuen yeserrpare'ten. Tarraña ñerra'm shonte' yocape'chen ñaña yeyo'chro ñeñt̃ ama cohuenayayepa' ñeñtpa'cho'ña e'ñech ñeñta yemnen o'ch yeserrpare'teñ.

Atto Jesús toma'ntatana acheñ ñeñt̃ e'ñe eñotene' ñeñt̃ po'ño ch sherbets ñaña ñeñt̃ ama eñotenaye ñeñt̃ sherbets

(Mt. 7.24-27)

⁴⁶ Sapa' eso'maruañaca'yeña soten napa' Sa'yochresha'tero' sepenen, sapa' amaca' choye' same'ñenno ñeñt̃ atet o' notuas.

⁴⁷ Allohuen erra'tsencha' huapatsa nesho ñeñt̃cha' name'ñenaya na ñaña ñerra'm e'mñotennanet neñoñ ñeñt̃ atet cohuen ney'chatenanet ñerra'm atet e'ñe penet, ñetñapa' atarrcha' eñotenet ñeñt̃ e'ñe po'ño ch sherbets.

⁴⁸ Ñeñt̃ acheñer ñeñt̃ atet petsa o'ch netma'ntacha atet ñerra'mrrate' puesheñarr yacma ñeñt̃ atarr es eñotets ñeñt̃ tomatene' pocoll ñeñt̃ e'ñech echarr penan pa'paquëll. Ñaña' atarrcha' o'pono eñan pats attoch e'ñe echarr pan po'quëllpach. Atteñapa' o' chap allempo apellchena oñ, pocollñapa' ama a'mato apellche' tarro'mar quëllpachpa' atarr huomenc a'omataret̃.

⁴⁹ Tarraña po'potantañ ñeñt̃ e'muene' neñoñ ñetña ñerra'm ama atteye' peneto ñeñt̃ atet notenanet, ñetñapa' e'ñech attet ñerra'mrrate' puesheñarr yacma ñeñt̃ ama es eñoto. Ñapa'cho'ña o' tomataneñ pa'paquëll tarraña ñaña' ama atarr o'ponoye' eñanoña pats attoch e'ñe echarr pan po'quëllpach. Allempoñapa' apellcha oñ apellche'ñapa' chepa'tcha' a'matamḡsos pa'paquëll. Pocollñapa' e'ñe poctacma muello'tstosa.

‡ 6:44 Ñehua, Jesús añ toma'ntatanet uva ñaña higo ñeñt̃ puenarem̃ penet all pa'nyo.

7

Atto Jesús pa' a'crraterran capitán pa'taruasañer; ñeñt capitán pa' romo'marnesha' (Mt. 8.5-13)

¹ Allempoña Jesús pa' serrpare'tatuerranerr allohuen acheñenesha' ñeñt e'mñotene', ñaña pa' ahuererr; o' çherrer Capernaumo.

² Allña pa' allo'tsen puesheñarr yacma ñeñt solltar po'cañtaner, ñeñt pa' romo'marnesha', ama judioneshayaye. Ñeñña capitán pa' echenan puesheñarr pa'taruasañer cha atsnat'en atarr pa'nattena, ñaña pa' atarr morrentenana pa'taruasañer.

³ Ñeñña capitán pa' allempo e'mare'tan Jesús o' alla çherr Capernaumo, ñaña pa' o' mueñan patantarr acheñ ñeñt pompornesha' pen judionesha', o'ch oteñeta' Jesús atto agotateñ capitán o'ch a'crraterrñaña' pa'taruasañer.

⁴⁻⁵ Allempoña çhapuet Jesúseshopa' ñetña pa' atet otoset:

—Ñeñt capitán pa' ñapa' atarr cohuen acheñ, ñapa' atarr morrentenya ya ñeñtey israelena'tarey, ama't yeprahuapa' o' tomatatuosnay. Ñeñto'marña ama't yapa' e'ñe pocte' yenteñ o'ch peyenpueña' ñaña, ñapa' ama't ama judioneshayaye. Attoña atarr enamueñet Jesús attoch yenpuenana' capitán.

⁶ Allempoña pa' co'a'nerranet Jesús. Chapmochet capitán pa'paclo, capitánña pa' mueñerranerr po'potantañ acheñ ñeñt parro yemtena ñeñtcha' otapue' Jesús atet oten capitán:

—Yapa' atet otapuey capitán atto'ch yotapañ: “Amach Ayochreshate atsrre'moçhen nentatatstapape tarro'mar napa' ama cohuenayayno attoch pebe'tosapo'tamñesna nepaclo.

⁷ Napa' ama cohuenayayno ñeñto'marña aña nemñen po'psheñeñ ñeñtcha' nepoctatapañ, ñeñtcha' potap correrrepa' na'taruasañer, ñaña pa' acrrerroche'ch.

⁸ Tarro'mar napa' ñeñten ñeñt atet petsa ñeñt atet otenen ñeñt neyechenaya. Ñaña napa' cho'ña eñall ñeñt neyechena ñaña ñeñt nesolltarer nepen. Ñerra'm puesheñarr solltar noteñ: Papa' o'ch ahuep a'yo, ñaña pa' o'chcho' ahuo'. Ñaña po'psheñeñ solltar ñerra'm o'ch noch: Papa' apon arr, ñaña pa' o'chcho' huapa. Ñaña po'psheñeñ na'taruasañer ñerra'm o'ch noch: Papa' arrcha' petaruasa'muen, ñaña pa' allcha'cho' taruasa'muen. Ñeñto'marña napa' neñotenep ñerra'm erroten potenpa' e'ñechca'ye atet pena.”

⁹ Allempo e'man Jesús ñeñt atet oten capitán, ñaña pa' alla cohua'yesan allohuen acheñenesha' ñeñt co'a'nene'. Ñaña pa' atet otanet:

—Errotenotuañaca'yeña atarr yemtena, ñapa' amaca'ye judioneshayaye. Napa' o'ch notas, ama't ahuatapa' ama nentareña acheñ ñeñt e'ñe atet neyemtenaya, ama't allohuen israelena'tarnesha'pa' ama't puesheñarra ama nentareña ñeñt atet atarr neyemtenaya. Ama'tpa' correrrepa' pa'taruasañer.

¹⁰ Allempoña ñeñt pocte' Jesús o' ahuanerret capitán pa'paclo. Ñetña pa' entuerrñañet capitán pa'taruasañer o' e'ñe correrra.

Atto Jesús pa' tantaterran arromñañ ñeñt rretorrnanesha' puechoyor

¹¹ Allempo allponmaterrerr, Jesúsña pa' ahuererr po'poñ anetso, ñeñt añets añ pa'so'cheñ Naín. Alla co'a'huanererr pueyochresha' ñaña shonte' po'potantañ acheñenesha'.

¹² O' çhapmochet all allotecma be'tenet attoch çhapuet anetso. Allotña pa' cha'nmaçha'tos ñeñt anene' arromñañ, o'ch pampueñeta'. Arromñañña pa' asheñorr ñeñt e'ñe po'patror pen pachor. Pachorña pa' rretorrnanesha'. Shonte' acheñ ñeñt allo'marnesha' ñeñt llecapretnenaya rretorrnanesha' all co'a'neñet.

13 Partsesha'ña Jesús allempo entapan rretorrnanesha' puellcapreteño'pa' atarr muerosya. Ñaña'pa' atet otapan rretorrnanesha':

—Amach no'cha peyahuatsto.

14 Allempoña ponmapana arromñañ, a'plata'tosñañ po'cajon. Ñeñña anene'pa' alla tom'cha'toset. Jesúsña'pa' otan huepuesha' ñeññ rromuets:

—Napa' o'ch notap: ¡Te'pa' o'ch petanterra!

15 E'ne otue'pa' ñeñña arromña'pa' allenta tanterra 'cha eñorerrtsa. Jesúsña'pa' o' alla apuerrñañ pachor.

16 Acheñenesha'ña'pa' atarr nanac yorennet. Po'yorño'feta'pa' atarr aye'chochtateññañet Yompor. Ñeñña'pa' atet otyenet:

—Te'pa' o' orrtonaya puesheñarr ñeññ atarr sherbets ñeññ a'mtene' Yompor po'ñoñ. Yomporpa' o' yerpuerrya ñeññey e'ne pueyochreshay peney.

17 Attoña acheñenesha'ña'pa' epaye' serrpare'tyesuerret ñeññ atet pa'yena Jesús. O' e'ne epa'hua ora Judeo'mar ñaña ora erracmañen allampaño'mar.

*Juan ñeññ apatañtase'tpa' mueñan pueyochresha' Jesúsesho
(Mt. 11.2-19)*

18 Añña Juan ñeññ ayottam'psaret, ñaña'pa' 'chocma serrpare'tateñ pueyochresha' ñeññ atet pa'yena Jesús.

19 Atteña Juanña'pa' agotatan epsheña ñeññ pueyochresha' pen ñeññcha' mueña Jesúsesho ñeññcha' a'p'to'tenaya' Jesús po'ño'chte' ñapa' ñeññ Cristotets ñeññ atarr cohuenet ahuatoteñ, ñato' amate' ñeññeyayepa' añcha' cohuet po'psheñeñ ñeññcha' huapatsa.

20-21 Allempoña ñetpa' ahuanmuet. Allempo 'chapuet allo'tsen Jesús, Jesúsña'pa' añ torra'yena a'crratanatyese' shonte' acheñenesha' ñeññ atsna'tyets ñeññ pa'namen muerochtatyenahuet. Ñaña ñeññ chorra'yena oneñeñ ñapa' o' e'ne ca'chpatatuerranet oneñeñ. Ñaña shonte' aporo'yete'chno ñaña'pa' o' alla e'ne cohuatyesuerranet. Ñeñña Juan pueyochresha'pa' a'p'to'toset Jesús, atet otoset:

—Juan ñeññ apatañtase't Yomporecop yapa' ñeñña yemñene' o'ch yotenpa', ñato' p'ate'ña ñeññepte' e'ne po'ño'ch Cristotets ñeññ atarr yecuen ahuatoteñ o'ch huapa; ñerra'm amate' ñeññeyayepa' o'ch e'ne p'tey allochña'pa' añcha' yecua' po'psheñeñ ñeññcha' huapatsa ñeññ e'ne Cristo.

22 Jesúsña'pa' otapanet:

—Te'pa' o'ch ahuerres seserrpare'tatuercha' Juan ora allpon ñeññ atet sentye-suennana' arr ñaña ora allpon ñeññ atet se'myesuennana' arr. O'ch e'ne seserrpare'tatuer ora ama't atto aporo'yete'chnopa' te'ña'pa' o' e'ne necuatyesuerranet, ñaña ñeññ checa'repayetspa' te'pa' o' e'ne chope'chyesuerret, ñaña ñeññ osyen puet-sarñats, te'pa' o' e'ne a'cohuentataretetuerret ñamet, ñaña paquetneshachnopa' ama't ñetpa' te'ña'pa' o' e'ne e'myesuerret cohuen, ama't ñaña ñeññ rromayets te'ña'pa' o' alla atantataretetuerret, ñaña ama't ñeññ huocchañneshachno te'ña'pa' o' e'ne neserrpare'tatuerranet añ cohuen ñoñets alloch queshperret ñamet.

23 Jesúsña'pa' alla oterranerr Juan pueyochresha':

—Ñaña ellonetpa' o'ch sotuer Juan ñeññ atet notenes: Atarr cosheñtso'tsen ama't allohuen ñeññ atarr neyemtenaya na, ñeññ ama e'nenaye po'psheñeñ ñeññcha' coshater-rahuet.

24 Allempoña Juan pueyochresha'pa' o' ahuanerret. Jesúsña'pa' alla serrpare'taterranerr acheñenesha' ñeññ atet pe't ahuaña Juan, ñeññpa' atet otanet:

—Ahuaña allempo sete't amayo all serrpare'ten Juan, sapa' amaca' añecpaye' sete'teña all o'ch sentena' amuesma' atet a'yma'tateñ ñorr.

25 Ñaña amaca' añecpaye' sete'teña all o'ch sentena' ñeñt' atarr cochnesha'tetsa pa'shtam all, tarro'mar yeñoteñ amayopa' amaca'ye eñalleña all ñeñt' atarr cochnesha'tetsa pa'shtam. Yapa' yeñoteñ arrña yentenña ñeñt' atarr cochnesha' chorra'yenaya shetamuets amcha'taretepahuo.

26 Sapa' añecopca'yeña sete'tña amayo o'ch sentena' all ñeñt' po'ñoçh a'mtene' Yompor po'ñoñ. Napa' o'ch notas, Juanpa' atto atarr sherbenan Yomporpa' ello metana'tuenan allohuen ñeñt' atto a'mtenet Yompor po'ñoñ.

27 Tarro'mar Juanpa' ñocop eñose't Yompor ahua't. Ñehua, allempopa' atet otne't na ñeñt' atetcha' p'osa Juan nocop esempoch huapa, ñeñtpa' atet anaret' ñoñets ahua'toteñ: Papa' peñoche'pa'ch napa' o'ch nemñoña' p'uesheñarr ñeñt'cha' ñanom otatsa ñeñt'cha' p'a'cohuentatyese' p'ocop allcha' p'ñoñmos.

28 Ñeño'marña na te'pa' atet notenes: Allohuen allpon acheñenesha' ñeñt' eñalletetsa arr patsro ama't p'uesheñarra ama eñalleña ñeñt' atarr sherbets atet ñerra'mrrate' Juan ñeñt' apatyese't' ahuaña acheñenesha' Yomporecop. Tarraña ñeñt' ama esoshe'maye' enteneto ama't mamesha, tarraña ñerra'm pueyochresha' peñ Yompor atto te'pa' o' ayochreshattena, ñeñña acheñerpa' atarrca'ye sherben, ello metanenan atto atarr sherben Juan.

29 Allohuen acheñenesha' ama't ñaña ñeñt' ashcañetyestse't' atto atarr cobra'yese't' quelle ñeñt' gobiernocop ñeñt' apatyese' Juan, ñetña'pa' atto e'mñnoteneta' otyeset: "E'ñe pocte' atet oteney Yompor."

30 Tarraña fariseonesha' epuet ñaña ñeñt' atarr etsotayenayeñ ñoñets ñeñt' atet anaret' judioneshacop, ñetña'pa' ama't e'ñe mamesha ama pocteye' enteñeto ñeñt' atet muenen Yompor ñocpuet, ñeño'marña ñetpa' ama apataneto Juan Yomporecop allempo.

Partsesha'ñapa' atet oterraneterr:

31-35 —Ñehua, napa' o'ch neñotatas ñeñt' atet pena patantarr acheñenesha' ñeñt' yentyen te' ñeñt' ama't erro'tena ama acshatpoteneto. Ñeñtpa' fariseonesha' atet petsa. Tarro'mar ama't allempo orrta Juan ñeñt' apatañtase't' ñapa' ama rrane'te ñeñt' yocrrañ yepen allohueney, ama orrane'te ñeñtecma yorren allohueney. Ñeño'marña ñapa' cha sotyese't' cho'te' chorreña oneñe't, ama't e'ñe mameshapa' ama pocteye' señche'te. Te'ñapa' o' norrterra namña Ñeñten Acheñetosets. Napa' pa'namen nerra'yen ñaña norryen. Saña te'pa' atta sesochatse'tyenen ñaña atarro' arratsña'ten ñaña atarro' orrarña'ten napa' año'chña e'ñe neyemuetyena ñeñt' atarr ochña'tenesha' ñaña ashcarña'te'chno ñeñt' atarr cobra'yene' acheñenesha' quelle. Tarraña ama't atet sepennoñpa' Nomporña e'ñe eñotene' ñeñt' po'ñoçh atarr sherbets ñocop. Ñaña allohueney ñeñt'ey e'ñe puechemeresha' p'ohueney ñeñt'ey cotene' ña pocta'pña yapa'cho'ña e'ñe yeñotuenña ñeñt' po'ñoçh atarr sherbets. Ñeño'marña yorrtatyeyña ñeñt' cohuen enten ña. Sañapa' ama't e'ñe mamesha ama acshatpahuoyayso, e'ñe ates ñerra'mrrate' cheshanesha' ñeñt' chocmach po'poñ entanna'tuenet amach mueno o'ch yemtana all yellsheñen po'potantañ pacmachoresha' all plazo all shontena acheñenesha'. Ñetña'pa' amach mueneñeto o'ch coshaprechet pacmachoresha'. Ñeño'marña ñetpa' atto yellsheñenetpa' atet oteñet po'potantañ pacmachoresha': "Yapa' ama't o'yerequerca'hua allo yocshame'tenapa' sañapa' amaña seshe'rarampenye; allotpa' ama't o'yepoctorare'tua ñeñt' ya'chpeñtsore'cho allo yellcanrrortenapa' sañapa' amaña sellcapretenyo."

Allempo Jesús'pa' rrallme'chos fariseo pa'paclo ñeñt' sochetsa Simón

36 Allempoña Jesús'pa' o' huapoña ñaña p'uesheñarr fariseo o'ch otenana' Jesús rrallme'chapreteñepa' pa'paclo. Jesús'ña'pa' allenta coterran fariseo. Allempoña chapach pa'paclo anorrcha'toset parro allcha' rrallme'chapretos.

³⁷ Puesheñarrña coyanesha' ñeñt allo'marnesha' ñeñt atarr ecañoreshať, ñaña'pa' o' e'mare'ch o' chap Jesús fariseo pa'paclo all rrallme'chen. Ñaña'pa' huapa, huapatan ñeñt atarr eñmosať ñeñt nanac tsa'te'; huapatañpes puetellmño ñeñt otenet alabastro.

³⁸ Allña'pa' pueya'chpeñesha' huapa, ponmosana Jesús pa'tco. All atarr yahuosa, puese'ña'pa' cha tsopsa'tos Jesús pa'tco. Allempoña chetosanña pue'chpa' alloña alla a'porrarra'tquër, tso'tsteca'tosan pa'tac, she'tatca'tos eñmosaťo.

³⁹ Añña fariseo ñeñt hua'ñene' Jesús, ñaña'pa' eñchpa' atet ot pueyo'chro: Tarraña añ yacma ñerra'm po'ño'ch ñeñt a'mtenayeyñ Yompor po'ño'ña' eñotapaneñcha'ña añ coyanesha' ñeñt a'pñlene'pa' atarr ecañoreshať, amach muenacheñe o'ch a'pñllosñañ ama't pa'tca.

⁴⁰ Jesúsña'pa' atet otan fariseo:

—Napa' nemneñ o'ch masheñe Simóna nota'p allpon ñoñets.

Fariseoña'pa' atet och:

—E'ñe pocte' nenteñ Maestrocha' o'ch pñoten.

⁴¹ Jesúsña'pa' alla toma'ntacha, atet och:

—Napa' o'ch not, allo'tsen puesheñarr acheñ ñeñt artetsa quelle. Ñaña'pa' artana puesheñarr acheñ nanac shonte' quelle ñeñt otenet quinientos denario*; po'psheñeñña'pa' archa po'poñ quelle ñeñt ama tama atonayaye ñeñt otenet cincuenta denario.

⁴² Attoña epsheño'maretpa' ama eshcaye' tsa'tuerreto ñeñt allpon te'ba'yenet tarro'mar ama echeneto alloch tsa'terret. Ñaña'pa' e'ñe atta peretna'huerranet epsheño'maret, e'ñe attecma ama eseshaye' tsa'terrtso. Te'ña masheñe Simóna o'ch na'pñto'ta'p, añ epsheño'mar ñeñt amorrentareť attoch peretnerranet allpon tebenet çerra'tsena't pentenña'pa ñeñt atarr morrentenaya ñeñt peretnene', ñato' añte' acheñer ñeñt tebene' quinientos denario amapa' añte' ñeñt e'ñe cincuenta denario tebene'?

⁴³ Simónña'pa' alla anapuerranerr Jesús, atet otererr:

—Ñehua, añte'ca'ye atarr morrentenaya ñeñt ap shonte' quelle, tarro'mar ñapa' shonte' o' atta a'pñretna'etterra ñeñt allpon shonte' teben.

Jesúsña'pa' alla otererr:

—Atetca'ye masheñe.

⁴⁴ Allempoña Jesús'pa' cohua' allente'tsen coyanesha' allo'tña'pa' alla oterranerr Simón:

—Pecue' añ coyanesha' ñeñt atet pñosen. Allempo ne'chap pepacllopa' pa'ña'pa' ama es pñapapno ama't oñapa' ama pñapapno alloch ne'patca'tosa. Tarraña añña coyanesha'pa' ñaña ne'patca'tose' e'ñe ña puese'yo allempoña'pa' alla a'porrarra'tquërren e'ñe ña pue'cho.

⁴⁵ Ñaña allempo ne'chap pepacllopa' pa'ña'pa' ama't pñuomñcha'teño'tapa' ama petso'ttsa'pa'tapno. Tarraña añ coyanesha' e'ñe allempo ne'chap pepacllo ama atta ca'chposno allorocma tso'tsteca'tosen attoña orrtatosan pñuorrenteña nocop.

⁴⁶ Papa' ama't coñe'tapa' ama es peshapono noño ama't olivoso'ya ñeñt ama tsa'teyaye. Tarraña ñaña'pa' eñmosaťo she'tatca'tosen ñeñt atarr tsa'te'.

⁴⁷ Attoña te'pa' atarr orrtatosnan ñeñt atto morrentosna. Napa' neñoteññañ ama't shonte' po'chñar te'ña'pa' o' e'ñe a'pñretna'huare'tta. Tarraña po'psheñeñ ama't ama tama ochña'feyaye attoña a'pñretna'huare'tta po'chñarpa' ñaña'pa' ama e'ñeye' morrentapanoña ñeñt o' peretnerrñañ po'chñar.

⁴⁸ Allempoña Jesús'pa' otan coyanesha':

—Te'ña po'ño'chpa' o' e'ñe a'pñretna'huare'tterra pño'chñar.

⁴⁹ Allempoña'pa' ñeñt parro rrallme'chenet, ñetña'pa' otanna'tyeset:

—Esesha'huañaca'yeña añ yacmar atto peretnerranña ochñarets.

* **7:41** Denariopa' quelle ñeñt allpon tsa'tenet pamtarr ñeñt taruasets all pa'nyo.

⁵⁰ Jesúsñapa' alla oterranerr coyanesha':
 —Papa' atto atarr peyemtena ñeñña o' a'queshpaterreḡ. Te'ñapa' o'ch ahuerreḡ e'ñe peñmañesha'.

8

Atto coyaneshačhno'pa' es apa'yese't Jesús ñeññ allpon echyenet

¹ Allempoñapa' chopeñe'cherrerr Jesús erraḡaren serrpare'tyesnomue' cohuen ñoñets attoch chap allempo ayochreshattena Yompor. Erracmañen chopeñe'chyen, ora allemeñ anetso'mar all shonta'yena acheñenesha' ñaña all ama tama shonteyaye acheñ. Allñapa' co'a'huanererr pueyochresha' čharrasheña ñeññ puechetsa epsheña.

² Allñapa' co'a'huanemñ ñaña patantarr coyaneshačhno ñeññ a'crratyesua Jesús ahuañmo'cha, puesheña'tetspa' ñeññ cačhpatatyerr oneñeñ ñeññ chorrahuete't, po'psheññečhno'pa' ñeññ a'crratyees ñeññ pa'namen atsnañtsor mueročhtatyehuate't. Puesheñarr coyanesha' ñeññpa' añ pa'so'cheñ María Magdalena. Ñeññ Mariarpa' Jesúsñapa' puecačhpatataroñ cančherr oneñeñ.

³ Ñehua, po'psheñeñ coyanesha' añ pa'so'cheñ Juana. Puerrollarñapa' añ pa'so'cheñ Chuza añ po'taruas pen atto sherbenan añcha'tare't Herodes. Alloña po'psheñeñ coyanesha' ñeññ co'a'nene' Jesús ñeññpa' añ pa'so'cheñ Susana. Ellopa' shonte' po'potantañ coyaneshačhno ñeññ es apa'yese't Jesús ñeññ allpon echyenet ñet.

All toma'ntatanet Jesús ñeññ a'parre'tene' puerets

(Mt. 13.1-9; Mr. 4.1-9)

⁴ Alleñateñ anetso' huača'tyena acheñenesha' ñeññ čačhets Jesúsesho. Allempoñapa' o' čha shontose't nanac, Jesúsñapa' serrpare'tatapanet, atet toma'ntatapanet:

⁵ —Ñeñña a'parrene' puerets ñaña'pa' ahua' allcha' a'parre'tyenana' puepue. All a'parre'tyeñ patanta'tetsñapa' alla čhapyes toño'mar, ñeññapa' atta a'mama'tyes acheñenesha'. Allñapa' huača'tyena ñaña o't e'ñe añyallme'chuenana' puerets.

⁶ Po'poñečhnoñapa' alla čhapyes mapuetromeso'mar. Ñeññapa' mameshapa' cheparetuañ, tarraña mameshapa' alla hueya'huerra tarro'mar all mapuetromesopa' ama eñalle ama't coñe'ta oñ ñeññča' a'yamosañpse' narmets ñeññ o' cheparetua all.

⁷ Po'potantaña pueretspa' alla čhapyes allcha' chepare aj. Allpa'čo' mameshapa' cheparetuaña' ajña'pa' mameshapa' atesha'tua alla ca'matuerraña narmets alla a'cllatuer.

⁸ Po'potantañečhno ñeññapa' arr čhapyes all e'ñe cohuen patso. Ñeññapa' e'ñe cohuen chepare. Allempoña atesha'tuapa' atarr aton ellomre'tyes. Puecha'tetspa' čharroch čharra' pue'llomer.

Allempoña serrpare'tatapanet atetpa' o' alla oterraneterr. E'ñe huomencocma eñorana'tanet, atet otanet:

—Ñeñtes po'ñočh ne'mñotene', čhaponasepa'ch seyočhro ñeññ atet netma'ntatensa añ ñoñets.

Atet otanet Jesús ñeññecop atet toma'ntatyenanet

(Mt. 13.10-17; Mr. 4.10-12)

⁹ Allempoña pueyochresha'pa' ochet Jesús:

—Ta'm ¿este'ña petma'ntatenya? Yañapa' ama yeñoteñe.

¹⁰ Jesúsñapa' alla oterraneterr:

—Sa te'pa' Yomporña o' muenaterres attoch seño'terr ñeññ ama eñotpahuoyaye ama't ahua'toteñ atet penaña Yompor po'cohuenña atto atarr ayochreshattena ña. Tarraña po'potantañečhnoña ñeññ atta es puecha'yetsa, ñocpue'tpa' ama eñoteñeto ñeññ atet atma'ntatare't ñoñets. Attoña ama't enteñetañ ñetña'pa' amach es čhenahueto

pueyočhreto. Ama't e'mueñetañ amaña čhenanetoña pueyočhreto ñeñt atet yečhateney Yompor po'cohuenña.

*Arrpa' all eñotatanet Jesús ñeñt toma'ntatenanet ñeñt a'parre'tene' puerets
(Mt. 13.18-23; Mr. 4.13-20)*

¹¹ Ñehua, ñeñt atet netma'ntatasa ñorra'pa' ñeñtpa' atet notenes: Ñeñt a'parre'tyene' puerets, ñeñt pueretspa' añ notenes Yompor po'ñoñ allempo serrpare'teñet.

¹² Añ puerets ñeñt čhapyesets toño'mar ñeñtpa' añ notenes acheñenesha' ñeñt e'mñotenayeñ Yompor po'ñoñ. Allempo e'mñotuetpa' allorocmach huapa oneñet o'ch alla puerratañperranet Yompor po'ñoñ pueyočhreto. Attoña amach mueneñeto o'ch ame'ñenet, attochña ñetpa' amach a'qeshpatare'tterreto.

¹³ Ñaña ñeñt čhapyesets mapuetro'meso'marpa' ñeñtpa' añ notenes acheñenesha' ñerra'm esempo e'mñoteññañet Yompor po'ñoñ e'ñech pocsheñesha' aguerrñañetañ Yompor po'ñoñ. E'ñech cohuen ame'ñeretañ tarraña ñetpa' mamecpach atet pet. Tarro'mar ñetpa' atet penet ñerra'mrate' narmets ñeñt chepuets mapyo amach eñalle puerech. Tsapañoneña ñerra'm o'ch huapanet topateñets, ñetñapa' o'ch alla cačhpurrñañet Yompor po'ñoñ.

¹⁴ Ñaña puerets ñeñt čhapyesets ajmo'mar, ñeñtpa' añ netma'ntatena po'potantañ acheñenesha' ñeñt e'mñotenayeñ Yompor po'ñoñ. Ama'tcha' čhapanetañ mame' pueyočhreto, tarraña ñetpa' allo'nach senet aña atarr coťape'chenet ñeñt lleca'yenet arr patsro ñeñt e'ñe ñocpueta. Añach muenenet o'ch esocmañen es ečyenet attoch allo e'ñe cosha'yenet. Attoña ñetpa' amach errotenoť orrtatoñeto ñeñt atarr sherbets Yomporecop. Ñetpa' e'ñe atteta ñerra'm narmets ñeñt čha ca'matuerr ajma' amach errotenoť ellomre'tyeseto.

¹⁵ Ñaña añ puerets ñeñt čhapyesets e'ñe cohuen patso ñeñt e'ñe cohuen chep-arsatspa' ñeñtña toma'ntenaya po'potantañ acheñenesha' ñeñt e'mñotene' Yompor po'ñoñ. Ñetñapa' atto ame'ñeññañet Yompor po'ñoñ amach puesereto čhoch eñochet pueyočhreto attoch e'ñe cohuen ma'yočhroñet Yompor po'ñoñ. Chocmach orrtatyenet ñeñt atarr sherbets Yomporecop amachña čha cačhpueñeto. Attoña ñetpa' e'ñe atet penet ñerra'm narmets ñeñt atarr aton ellomre'tyets.

*Arrpa' all toma'ntatanet lampareñ atto čhoyo'tampeney
(Mr. 4.21-25)*

¹⁶ Jesúsapa' alla toma'ntaterraneterr po'poñoneť; ñeñtpa' atet otanet:

—Ñerra'm esempo ya'llchaten lampareñ ñeñtpa' ama añecpaye' ya'huortateñe o'ch alla ye'rramanper coyño. Ñaña ama añecpayaye o'ch alla yener o'ponoť yemayeñnačo. Añecopña ya'huortatenña lampareñ o'ch yene' enonet attoch čhoyo'tampesuan allo-huen acheñ ñeñt be'ťosčhets o'pono pocollo.

¹⁷ Tarro'mar allohuen ñeñt ama eñotpahuoyaye ama't ahuatoteñ, te'ñapa' o'ch e'ñe orrtatare'tterra attoch e'ñech eñotatare'tetuerret e'ñe poctacma.

¹⁸ Ñeño'marña sapa' señotenafe' e'ñefe' po'ñočh cohuen se'mñoteññañ Yompor po'ñoñ ñato'pa' amate'. Ešesha'te' čhena pueyočhro ama't e'ñe allpona Yompor po'ñoñ, elloña Yomporpa' allo'nach eñotatnenanet nanac shonte'. Tarraña esesha'ña ñerra'm ama čhenaneto pueyočhro tarro'mar ñetpa' ama po'ñočhaye' aguēññañeto Yompor po'ñoñ ama't allpon eñotenetañ pueyočhro ñeñtñapa' čhach puerratañperranet Yompor.

*Allempo huapoña Jesús pachor ñaña pa'mo'nasheñnesha'
(Mt. 12.46-50; Mr. 3.31-35)*

19 Allempoñapa' huapa Jesús pachor epuet ñaña pa'mo'nasheñnesha'. Chapuet allpa' shonte' acheñenesha' ñeñt emchorrenaya Jesús. Ñeñto'marña ñetpa' ama eshcaye' entosetoña Jesús allame'tets.

20 Allempoña acheñenesha' ochet Jesús:

—O'ca'ye huapaña pachor ñaña pemo'nasheñnesha'. Ñetpa' a'yote'tsa'yenet, mueneñet o'ch entenpeta'.

21 Ñaña' atet otanet:

—Allohuen ñeñt e'mñotene' Nompore po'ñoñ ñetña ñerra'm atet pohuenet ñeñt atet oteney, ñeñña e'ñe po'ñoñ nachor nepen ñaña ñeñña e'ñe nemo'nasheñ nepen.

Allempo a'mchecherran Jesús huomenquësha' ñaña sa'p ñeñt emo'yarertetsa
(Mt. 8.23-27; Mr. 4.35-41)

22 Allempo cherrerr pamtarr Jesúsña' a'tapos noñto epuet ñaña pueyochresha'. Ñaña' atet otanet:

—Te'pa' o'ch ahuañpsey yomta'n.

Allempoñapa' ahuañpset noñto.

23 Allempo ahuañpset Jesúsña' alla ma' noñto. All muenpa' machayoña huomenquëshatañpesnomuet. Emo'yare'ña' cha esha'tena noñto, atteña' chorramoch oñ noñto cha muene' esha'tatan noñt.

24 Atteña pueyochresha'ña' ponemiyet Jesús all muenpa' opueret, atet ochet:

—Maestro, po'ñoñhuachca'ye yoclla'huerrate'.

Jesúsña tanterrapa' e'ñe po'ñoña a'mtsoññetuerran huomenquësha' ama't ñaña emo'yare'pa' o' e'ñe a'mtsoññetuer. Attoña ñetpa' o' alla e'ñe cohuen muechettanperret.

25 Allempoña Jesús'pa' otanet:

—Eso'mare'tña sapa' ama e'ñeye' seyemtenno.

Ñetña' cha atarr nanac yorenet. Atta cohuanrrorteñet ñetña' atet otanna'tyeset:

—Ta'mca'ye añ acheñerpa' esona'tarte'ca'ye. Atarrepa't es a'mchechaten, ama't po'ñoña'pa' a'mchechaterran huomenquësha' ama't ñaña emo'yare' oñ.

Atto gadaro'marnesha' ñeñt chorrena oneñetpa' huapa Jesúsesho
(Mt. 8.28-34; Mr. 5.1-20)

26 Allempoñapa' o' etsotaset yomta'n all senet. Allpa' añ pa'ney pene' gadaro'marnesha' alla yot Galileot.

27-29 Allña sohuosa Jesús noñto'pa' allña' huapoña puesheñarr yacma ñeñt allo'marnesha', tarraña ñapa' añ chorrenaya oneñet patoner. Ñeñña' ahuañtoñeñ atta chopeñe'chyen muelle'mcot, ama shetamteno. Ñapa' alla ye'chena all pampueñet arromña'fecho ama pocolloye' ye'cheno. Ñehua, oneñetpa' allempo rromuenan yacmapa' epaye' ottatse'tache't allempoteñ. Pamo'tsesha'ña' ahua'ch rromuetpa' o'ch huanquëtañ attoch cohuañpeñet. Ñaña' chach tsepe'tuanman allo huanquëññañet pot ñaña pa'tac oneñetña' ahua'chcho' matach a'yo amayo. Allempoña entapan Jesús'pa' rrananma huomenc, mata Jesúsesho, rromosñaña allame'tets. Allempoña Jesús'pa' otosan oneñet ñeñt chorrenaya yacma:

—Te'pa' o'ch peca'chpa'ner añ acheñer.

Ñeñña chorrena oneñetpa' ñaña'pa' atet otapan Jesús:

—Eso'maruachca'ye Jesús'pa' tsrre'mo'chtana'tosen, papa' ñeñte'p Ñeñt Nanac Parets Puechemere'p. Te'pa' notapa'pcha' amach pecoñchatatstosno.

30 Jesúsña'pa' alla oterranerr ñeñt chorrena oneñet:

—Papa' ¿eso'tña peso'chena?

Ñaña'pa' atet oterranerr Jesús:

—Napa' añ neso'cheñ Legión.

Ñehua, añ so'chñets ñeññ otenet shonte' nanac, tarro'mar ñeññ nanac patoner oneñeñ ñeññ chorrenaya.

³¹ Ñehua, oneñeñechnoñapa' atet otare'tapet Jesús:

—Amach arra pemñatstosye o'pono coñcha'puetso.

³² Ñehua, allpa' a'yente'tsa'yen shonte' chañchočno ñeññ rratse'tyets aspentonet. Ñeñño'marña oneñeñechnopa' atet otare'tapet Jesús:

—Ñerra'm choch muene' erroten peposeypa' arrña pemñaye'chosey chañchesho allochñapa' o'ch yechorra'yererr ñaña chañchočno.

Jesúsñapa' allenta otanet:

—Ama'tca'ye orrasca'ye.

³³ Allempoña oneñeñechnopa' cachpa'huaneret yacmapa', alla chorrereterr ñaña chañchočno. Chañchoñapa' allempo chorrosya oneñeñechnopa' chepa'tcha' matrra'tua allohuen ñegoneñ shorcha'tuos allotpa' e'ñe ño'shrra'tuosa oño.

³⁴ Acheñenesha'ña ñeññ cohuanpene' chañcho allempo eñchet atet pa' chañcho o' shorcha'tua oño, ñetñapa' allenta matrra'tet ñamet pueyorñoñ ahuanmuet anetso. Allñapa' serrpare'tyesoset ñaña ora allohuen allampaño'mar.

³⁵ Acheñenesha'ñapa' allenta ahuanmuet ahuo'ch enteñeta'. O' cha'cha'tet Jesúseshopa' allñapa' entoset yacma ñeññ chorre't oneñeñ. Alla anen allame'tets Jesús pa'tcot ashtamañ. O' eñoterra o' cohuenterra. Ñetñapa' cha atarr mecha'na'toset.

³⁶ Añña ñeññ entene' Jesús atto cachpatatenan oneñeñ acheñ, ñetñapa' allenta serrpare'tatapet ñeññ huacha'ttsa anetsoñ.

³⁷ Allempoña allohuen acheñenesha' ñeññ ye'cha'yetsa all ñeññ gadaro'marnesha' ñetñapa' pueyorñoñtet atet otoset Jesús:

—Te'pa' o'ch ahuerreñ arroñ.

Allempoña Jesúsapa' a'terr noñño o'ch ahuer.

³⁸ Yacmaña ñeññ chorre't oneñeñ ñaña'ña' allenta otan Jesús:

—Napa' nemneñca'ye te'pa' o'ch nocterreñ.

Tarraña Jesúsñapa' ama muenache, atet och:

³⁹ —Allapach, te'pa' o'ch ahuerreñ pepaclo pamo'tsesho'mar o'ch peserrpare'tatuerranet ora allohuen atto Yompor atarr yenposeñ.

Ñaña'ña' atet otue Jesúsapa' atetcho' pa. Allenta ahuer serrpare'tyesnerrets ora anetso'mar atto Jesúsapa' atarr nanac yempos.

Atto Jesúsapa' tantaterran Jairo po'señ ñaña all a'crratnoman puesheñarr coyanesha' ñeññ a'plla'nmue' pa'shtam

(Mt. 9.18-26; Mr. 5.21-43)

⁴⁰ Allempoña alla cherr Jesús añeñta'n alloñ ta ahuaña. Acheñenesha'ña allpa' e'ñe pocsheñesha' agapapueñet tarro'mar o' atarr cohueret o'ch huerra.

⁴¹ Allempoña allpa' huapoña puesheñarr añcha'taret añ pa'so'cheñ Jairo. Ñapa' ñeññ puesheñarr ñeññ añcha'tarettetsa judionesha' po'prahuo. Ñaña'ña' alla rromosa Jesús pa'tcotpa' atet otosan Jesús:

—Napa' nemneñ o'ch pocterren nepaclo,

⁴² tarro'mar neseñ ñeññ nepatrorpa' cha atsna'ten o' a'po'ntsa'mocha.

Ñehua, ñeññ po'señpa' allponte' echenan po'charña charra' puechena epa char.

⁴³ Allempo cota'ner Jesús cota'huaner ñaña shonte' acheñenesha' cha emchorratse'tnomet, cha to'mama'tneñet. Allñapa' cota'nmanet ñaña puesheñarr coyanesha' ñeññ atsna'tets. Charra' puechena epa char ñeññ atto chocma yella'yena. Ama't epaye' partata o' a'gasta'huahuan po'çllayor atto parteñet amaña eseshaye' a'crraterraye.

⁴⁴ Ñaña'apa' all cota'nenan Jesús pa'che'ñoť, allña'apa' a'płlerrñaña' pa'shtam pa'rrpe'moť. E'ñe a'płla'hue' pa'shtampa' allorocma maserrña po'rras, o' metuer ñeñť atto mueročhtena.

⁴⁵ Jesúsña'apa' atet otanet:

—¿Esesha'tña o' a'płla'nmuenna neshtamoť?

Ama eseshaye' eñoratsó. Pedroña ñaña ñeñť epuet yemtena, ñetña'apa' atet ochet Jesús:

—Maestrocha' ppa' penteñte' shonte' acheñenesha' ñeñť allotemeña peto'mama'tnene'. ¿Eso'mare'tña póteneña esesha'te' pa'płlene' peshtamoť?

⁴⁶ Tarraña Jesús'apa' atet oterraneterr:

—Napa' neñoteñ po'ñoťh puesheñarr acheñ e'ñe puemnenñoť a'płlenen neshtamoť tarro'mar napa' neñotena napa' o' na'crrach e'ñe na nehuamencoť atto a'płlenen.

⁴⁷ Coyanesha'ña allempo ñapa' eñotena amach errotenoť a'nasoto. Ñapa' cha pa'shmuena pueyorñoť concorposa Jesús pa'rrpóť. Allña'apa' e'ñe a'meta'huosan ñapa' añecopña a'płlanan Jesús pa'shtam attoch correrra e'ñe cohuen. Allña'apa' atet otan allohuen acheñenesha':

—Na allempo na'płloñ Ayochreshať pa'shtampa' ñeñťña na'crraterre' allorocma.

⁴⁸ Jesúsña'apa' atet otan coyanesha':

—Papa' nesñeshacha' atto atarr peyemtena na attoña te'pa' o' e'ñe na'crratnomuep. Te'ña'apa' o'ch ahuerrep e'ñe peñmañesha'.

⁴⁹ Allempo eñorena atetpa' allña'apa' hua'cha'ta ñeñť huetsa añcha'tareť Jairo pa'pacłloť. Ñetña huapuetpa' atet otoset Jairo:

—Peseña' o'ca'ye rroma. Te'ña'apa' amach allo'na pa'tsrre'močhtana'tatsche Maestro o'ch coťerrep pepacłlo.

⁵⁰ Jesúsña'ama't e'man atet otoset Jairo'apa' ñaña'apa' atet otan Jairo:

—Papa' amach cha pe'charrtatatsto peyo'cher, nachña e'ñe peyemta attoch correrraña peseñ.

⁵¹⁻⁵³ Allempoña'apa' ahuanmuet Jairopahuo. Chapuet pocollo allña'apa' allo'tsa'yen shonte' acheñenesha' all yahuanrrortenet, ya'na'teñet arromñať. Jesúsña'apa' otosanet:

—Amach atarr seyahuatsto. Añ shopshesha'pa' amaca'ye čoye' rromueno čaca'ye muen.

Ñetña pachmare'teñoťetpa' atta che'tatsetyesapet tarro'mar ñetpa' e'ñeca'ye eñoteñet čoca'ye rromuen. Allempoña Jesúsña'apa' ama muenatano allohuen acheñenesha' o'ch be'toset allo'tsen arromñať. Ñapa' aña muenat Pedro ñaña Juan, ñaña Jacobo ñaña arromñať pueparar ñaña pachor ñeññaña epuet be'tos'cha'toset allo'tsen arromñať.

⁵⁴ Allempoña Jesús'apa' rremota'tosan shopsheshañ pototpa' po'huamencocma otos:

—O'ch nesñe notosep, te'pa' čho'pa tanterrtsa.

⁵⁵ E'ñe otue' atetpa' allentepa'tcha' o'rrerrerra čha tanterrtsa. Jesúsña'apa' otanet:

—Te'pa' o'ch serratallme'cher.

⁵⁶ Puepararña ñaña pachorpa' ñetña'apa' atta cohuanrrorteñet. Jesúsña'apa' atet otanet:

—Amach esesha' sota'psa'tatsto ama't puesheñarra ñeñť atet o' norrtatennasa' sepacłlo.

9

Allempo Jesús'apa' llesensan pueyochresha' čharrasheña ñeñť puechetsa epsheña (Mt. 10.5-15; Mr. 6.7-13)

¹ Allempo čhapa'muen allempo Jesús agota'mueanan pueyochresha' čharrasheña ñeñť puechetsa epsheña. E'ñe ap'cha'huet ñeshopa' ñaña'apa' atarr ahuamencat pa'yesanet, attoña apanet ñaña llesens attoch ca'čpatatyeret oneñe' acheñenesha' ama't erra'tsena ñeñť atarr mueročhtatyenahuet. Ñaña ahuamencat panet attoch a'crratyaset acheñenesha' ama't erra'tsena ñeñť osyenahuet.

² Attoña llesensanet attoch ahuanemyeset pa'namen anetso'mar ser-
rpare'tyesnomuet Yompor po'cohuenña atto atarr ayochreshattena ña. Ñaña
añepa'ñaña llesensenanet attoch a'crratyesoset acheñenesha'.

³ Ñaña atet otapanet:

—Amach es sanmatsto ama't coñe'ta allcha' sechopeñe'chyes—ama't secarra, ama't
sebolsa, ama't ñeñtcha' serra'yesnom ama't seçllayora ama't e'ñe epma seshtampa'
amach sanmatsche sechope'chpayo.

⁴ Alla oterraneterr:

—Ama't errach pocollro seçhap allach sommosa allponmat esempohuach ahuerreserr
po'poñ anetso.

⁵ Ñerra'm erra anetsro ñeñt allo'marnesha'ña ama cohuenaye' agapasetopa' o'ch
sem'terrerr ñaña allot. Ñerra'm allempo sem'terrerrña ñaña allot ñeñtña setco'tsa'yen
pañe'te' patspa' choch sepa'shetca'tyesnomña setac. Attochña allo'marnesha'pa' o'ch
señotatnomanet ñetpa' amaca'ye pocteye' entenanetoña Yompor.

⁶ E'ñe ñeñta otaretetuetpa' ñetñapa' allenta ahuanmuet o'ch chopeñe'chyeset errac-
mañen anetso'mar. Allñapa' añ serrpare'tyesnomuet cohuen ñoñets alloch yequesh-
perra. Ñaña all chopeñe'chyeset erracmañenpa' allña a'crratyesnomet ñeñt atsna'tyets.

*Allempo e'ñe cohuen es orrtatyes Jesús, Herodesña'pa' cha otapañ Juanañte' o' tanterra
ñeñt apataye't acheñ Yomporecop*

(Mt. 14.1-12; Mr. 6.14-29)

⁷ Am'cha'taretña Herodespa' ñaña'pa' atet e'mare'tenan Jesús ora ñeñt allpon atet
pa'yena. Ñaña'pa' cha atarr llequëna tarro'mar patanta'tets acheñenesha'pa' atet otyenet
te'pa' o' orrterra Juanañ, o' tanterra rromot. (Herodespa' añña atarr llecatene'
tarro'mar ñapa' ña pechate' Juan ahuaña.) Ñeñto'marña ñapa' ñeñta nen pueyoçhro atto
acheñenesha' otenet ahuo' tanterra Juan rromot.

⁸ Po'potantañña'pa' atet otyenet:

—Elíasoñca'ye o' orrterra.

Po'potantañña'pa' ñetpa'cho'ña atet otyenet:

—Añpa' ñeñtca'ye a'ñtaye't Yompor po'ñoñ ahuañ, te'ñapa' o' tanterra rromot.

⁹ Am'cha'taretña Herodespa' atet ot:

—Napa' neñotena naca'ye pechate'ña Juan ahuaña. Esesha'huañaca'yeña ñeñt or-
rtatene' ñeñt ama't ahuañapa' ama yentare ñeñt atet atarr ne'mare'ten.

Ñeñto'marña ñapa' atarr mueneñ o'ch entan ñeñt Jesúsotets ñeñt orrtatyene' ñeñt ama
puentare acheñenesha'.

*Allempo Jesús'pa' rratenan shonte' acheñenesha'; ñeñtña acheñenesha'pa' allo'tsen am-
naroch mil*

(Mt. 14.13-21; Mr. 6.30-44; Jn. 6.1-14)

¹⁰ Allempo huacherra Jesús pueyochresha' ñeñt llesensa'yes ahuaña. Ñetñapa' o'
chaçherret Jesúsesho, serrpare'tatyesuere't Jesús allohuen allpon atet pa'yeset allemeñ
anetso'mar. Allempoña Jesús'pa' ahuanman pueyochresha' e'ñe ñaptoçhayet, çhapuet all
ama acheñempaño'yaye all allame'tets anetso, ñeñt anetspa' añ pa'so'cheñ Betsaida.

¹¹ Tarraña acheñenesha'ña'pa' allempo e'mare'chet o' ahuanmuet all, ñetpa'cho'ña
allenta ahuanmuet ñamet. Chaçha'tet Jesúsesho ñaña'pa' e'ñe cohuen agapanet. Allñapa'
serrpare'tatyesapuerraneterr atet penaña Yompor po'cohuenña atto atarr ayochre-
shattena ña. Ñaña allpa' a'crratyesapuerranerr ñeñt atsna'tyets.

¹² Atteñapa' o' ellerren. Añña pueyochresha' çharrasheña ñeñt puechetsa epsheña
ñetñapa' oteñeta' Jesús:

—Te'pa' o'ch pemueñhuer acheñenesha' ahuanemyerretepa' anetso'mar allampaño allcha' mayesuerret allcha' entyesuerret puerrar ñeñtcha' rra'yuesuerret. Tarro'mar te'pa' arro'tseney all ama acheñempaño'yaye.

¹³ Tarraña Jesúsña'pa' otan pueyochresha':

—Sachca'ye apa'yeshahuet ñeñtcha' rret.

Ñetña'pa' atet ochet:

—Ya arrpa' amaca'ye es yecheno ama't coñe'ta. Yapa' e'ñe amnara pan yechen ñaña epatoll cac. Ñato' yapa' o'ch ahuey anetso allcha' yerañtēna' rreñets ñeñtcha' yerrach allohuen shonte' acheñenesha'.

¹⁴ Nehua, allo'tsen shonte' acheñenesha' amnarochte' mil yacmanesha'. Allempoña Jesús'pa' atet otan pueyochresha':

—Te'pa' o'ch soch acheñenesha' anorrcha'tyesetepa' e'ñe ñopa'ttsocmuet, e'ñech amnaroche'ttsocma çharrapa'tets anorrcha'tyeset.

¹⁵ Pueyochresha'ña'pa' atetcho' pet, anorrcha'tatieset acheñenesha' allohuenet.

¹⁶ Allempoña Jesús'pa' agapan ñeñt amnar pan ñaña epatoll cac, cohua' enonet parasyoso'tamñsan pan. Allempoña'pa' shota'tan pan, shetse'tan ñaña cac. Apanatyesan pueyochresha', ñetña'pa' epatieset allohuen acheñenesha' ñeñt anorrcha'tyets all.

¹⁷ O'ña epa'huet allempoña o' rrallme'chet allohuenet, e'ñe yetrra'tuahuet. O'ña yetuahuetpa' cha a'pchatyeset ñeñtña'pa' a'yapaçheret. Ñeñtña a'yapaçherretepa' chepa'tcha' chorrats çharra' puechena epa cañter e'ñe tamo'yare'.

Atto Pedropa' otan Jesús ðapa' ðaña Yompor Puechemereð ñeñteð Cristotosets (Mt. 16.13-19; Mr. 8.27-29)

¹⁸ Allempoña pamtarrpa' allo'tsen Jesús all ma'yochena e'ñe ñaptochayet pueyochresha' epuet allo'tsen. Allña'pa' atet otan pueyochresha':

—¿Erroñena't otyenenña allohuen acheñenesha' napa' eseshante'?

¹⁹ Ñetña'pa' atet otyeset:

—Patantarr acheñenesha'pa' atetca'ye otyenpet ðapa' Juanañpo'te' ñeñtepo' apatañtatsēt Yomporcop. Po'potantañña'pa' atet otyenpet, ðapa' Elíasopo'te'. Po'potantañña'pa' atet otyenpet ðapa' ñeñtepo' ñeñt a'mtaye't Yompor po'ñoñ ahua't. Te'ña'pa' ahua' alla petanterra perromño't.

²⁰ Allempoña'pa' alla a'p'to'terraneterr:

—Saña'pa' ¿erroñena't sotenēña sa?

Pedroña'pa' eñoratsapa' atet och:

—Papa' ñeñtepa'ye Parets Puechemereð ñeñteð Cristotosets.

Atto Jesús'pa' eñotatan pueyochresha' ñapa' amtsare'tterrach (Mt. 16.20-28; Mr. 8.30-9.1)

²¹ Jesúsña'pa' alla o'terraneterr:

—Ama't puesheñarroña amach esesha' sotaþsa'tatsto napa' ñeñten Yompor Puechemeren ñeñten Cristotets. E'ñe po'ñoç notenes amach esesha' sotaþsa'tatsto.

²² Elloña'pa' alla o'terraneterr:

—Napa' Ñeñten Acheñetosets, atet anare't nocop, nanaccha' na'mueroçhtatare'tterra. Amach esesha' pocteye' nenterraye—ama't ñeñt pompornesha' pen allohuen judionesha', ama't ñeñt pa'mcha'tare'ternesha' pen allohuen judionesha' po'cornanesha', ama't ñaña ñeñt etsotayenayeñ ñoñets ñeñt atet anare't judioneshacop. Ama't ñetpa' amach eseshaye' neyemterraye. Attachña napa' muetsataterretcha'. Tarraña poma'pamtaño'pa' o'ch alla tantaterren Nompor.

²³ Elloña'pa' alla o'terraneterr allohuenet:

—Ñerra'm esesha' muenene' o'ch coterrnet na e'ñe po'ñoch attoch neyochresha' neper-ranet, añ poctetsa sehuanmuetepa'ña ñeñt atet muenenet e'ñe ñocueta. Attochña ñetpa' o'ch e'ñe toma'nteret ñeñt chechnene' po'corsoch ama't pate'tets yet allcha' muerochtet ñamet. Attochña coterrnet e'ñe poctacma.

²⁴ Tarro'mar ñerra'm esesha' e'ñe añ muenenet o'ch correna atomat attoch e'ñe coshenet arr patsro, ñetña'pa' chach a'chencatet ñañeñeta. Tarraña ñerra'm esesha' e'ñe pocte' entene' o'ch sohuanmuet ñeñt atet muenenet ñeñt e'ñe ñocueta arr patsro attochña ñetpa' añach ma'yoçhret ñeñt cohuentetsa nocop, ñeñtña' acheñerpa' corretsach pocsheñeshocmañen tayoteñ e'ñe errponañohuen.

²⁵ Ama't errponenañaren esocmañen es yeyoratsetyes ora allpon ñeñt yentyen añe patsro, tarraña ñerra'm ñeñtach e'ñe ya'chencaterre' yecamquëñohuen ñeñtña'pa' ama't coñe'tapa' amach es sherberrye.

²⁶ Tarraña ñerra'm erra'tsencha' nepenquënaya na te' neñoñpa'cho'ña cha apencoçhen entennanet, napa'cho'ña nepenca'huerranetcha' esempoch nohuerra. Po'ñoch napa' Ñeñten Acheñetosets nohuerrach e'ñe na necohuenñoñ, ñeñtara Nompör po'cohuenña epan ñaña po'mllañoñeñnaneschar ñeñt e'ñe torra'yetsa Partsocop.

²⁷ Po'ñoçhca' te'pa' o'ch notas: Patanta'ttsos ñeñtes arro'tsa'yenes te'ña ama't ama serromhuena'pa' o'ch senterrñañ Yompör po'cohuenña atto atarr ayochreshatterra ña.

Allempo Jesús'pa' po'poñetañpana pueyochresha'
(Mt. 17.1-8; Mr. 9.2-8)

²⁸ Allempo met allponmat ñato' po'psocmatño Jesús'pa' ahuanman pueyochresha'; añ anem Pedro ñaña Juan ñaña Jacobo. Arr anmanet aspento allcha' ma'yochena' Jesús.

²⁹ Allña ma'yochosapa' machayotepa'tcha' po'poñetañpsosanet. Pa'clloyotpa' cha po'poñ orrtosanet. Pa'shtamohuen atarr huallama'to poptosa.

³⁰⁻³¹ Allña'pa' machayotepa'tcha' orrtanet Moisés ñaña Elías. Ñetpa'cho'ña atarr cohuen orretyenet. Allña'pa' serrpare'toset epuet Jesús. Ñetpa' añ serrpare'tenet atto o' chapmoch attoch rroma Jesús o'ch ahuer pue'ntaño. Ñetpa' atet otyenet, arrcha' atet peret Jerusaléño.

³² Ñehua, Pedro ñaña ñeñt epuet allo'tsen, ñetña'pa' ama't atarr moñe'tenetañpa' alla e'ñe achñesuerrret, attoña entoñet Jesús po'cohuenña ama't ñeñt parro tomçhen.

³³ O' ma'naterrmocha Moisés ñaña Elías attoch sa'neret Jesús. Pedroña'pa' allenta eñora, atet otan Jesús:

—¡Atarruaca'ye Maestrocha' cohueno'tseneyte' arr! Ama't pocte' penteñe o'ch ya'tomatonas ma'ppahua quërpachet, puepahuarra' p'ocopcha', po'ppahueñpa' Moisésocopcha', po'ppahueñpa' Elíasocopcha'.

Pedropa' pueyorñoñ atta muene' otatse't, ama eñocherrottencha' ot.

³⁴ Allempo eñorena Pedropa' cha orrtosahuet os chepa'tcha' a'pomañpsosanet. Atto a'pomañpsosanet ospa' ñetña'pa' atarr nanac yorennet.

³⁵ Cha e'morrtostsa ñoñets osoñ; ñeñtña' ñoñetspa' Yompör otosahuet; ñeñt'pa' atet ot:

—Añmapa' ñeñt no Nechemer ñeñt atarr nemuerena ñeñtcha' e'ñe cohuen se'mñoterr.

³⁶ Allempo o'huañ e'morrra ñoñetspa' o' e'ñe ñapñamerra Jesús. Pueyochresha'ña allempopa' atta a'nasoteñet. Ama't puesheñarroñetapa' ama otuerreto ñeñt atet o' entuahuet.

Atto Jesús'pa' a'crraterran cheshachor ñeñt otaten oneñt
(Mt. 17.14-21; Mr. 9.14-29)

³⁷ Tsapatña allempo huachenet aspento'tpa' allña'pa' shonte' acheñenesha' ñeñt huacha'ttsa ñeñt pocterrahuet.

³⁸ Allo'tsen puesheñarr yacma ñaña'pa' atet otosan Jesús:

—Maestro, napa' atarr nemneñ o'ch pentennana' nacñe'ter. Napa' e'ñe ñeñtētollapa nepatror.

³⁹ Ñapa' ñerra'm esempo rromueñ oneñe'pa' čhach rranare'ta o'ch o'tachpa' o'ch ata'tach patso čhach amtan pa'po'. Attoña atarr atserrpatse'tateñ. Ama mueno o'ch a'rroyer.

⁴⁰ Napa' o' notuosna'ña peyochresha' o'ch cačhpatateret oneñe'ñ tarraña ñetña'pa' ama erro't peto attoch cačhpatateret oneñe'ñ ñeñ't atarr mueročhtatene'.

⁴¹ Jesúsña'pa' atet ot:

—Sapa' ñeñtes acheñres ama't mameshapa' ama ayemtenaye' sentpenno, čhach po'poñ sentuena seyočhro nocop. O' allponmatuanen allo'tsenen arr patsro napa' atta atarr na'huantennas, atta necuenes ñato' atto'pa' o'ch same'ñerra.

Allempoña'pa' atet otan yacma ñeñ't otene' o'ch a'crratoñ puechemer:

—Te'pa' o'ch pañmon pechemer arr.

⁴² Allempo aneñ Jesúseshopa' oneñe'ñapa' alla rromuerranerr cheshachor o' alla o'tatererr alla ata'tatererr patso. Jesúsña'pa' atet otapan oneñe'ñ:

—Te'pa' po'ñočh o'ch nota'p, pecačhpa'nerñaca'yeña añ cheshachor.

Allempo a'crrater Jesús o' alla apuerrñañ pompor.

⁴³ Allohuen acheñenesha'pa' atta cohuanrrorteñet. Ñetpa' e'ñe eñoteñet Yompor po'partsoña orrtetsa.

*Arrpa' atto Jesúsapa' eñotaterraneterr puepocheño ñapa' čhocmach muetseret
(Mt. 17.22-23; Mr. 9.30-32)*

Atta epaye' cohuanrrorteñet atarr cohuen enteññañet po'partsoña, tarraña Jesúsña'pa' alla yerpaterranerr pueyochresha', ñeñ'tpa' atet otanet:

⁴⁴ —Te'pa' se'mñoten e'ñe cohuen, amach sepsatsterrnano neñoñ ñeñ't atet notenes te'. Na Ñeñten Acheñetosetspa' pomataterrnetcha' attochña erro'tuanencha' perrnet.

⁴⁵ Ñeñ'tña ñoñetspa' ñetña'pa' ama't puesheñarrotetapa' ama eshcaye' eñotenaye' enteñeto tarro'mar ama čhena' allempoch čhapanet pueyočhreto. Ñetña pueyorñotetpa' ama eseshaye' a'p'to'tenaye este' otenanetña atto eñorana'tenanet.

*All eñotateney ñeñ't acheñer e'ñe po'ñočh atarr asherben enten Yompor
(Mt. 18.1-5; Mr. 9.33-37)*

⁴⁶ Po'pocheñoña pueyochresha'pa' e'ñe ñagattseta otanna'tyeset:

—Ta'mca'ye erra'tsenoteyte'ñaca'ye ñeñ'tey atarr sherbets ñeñ'tey atarr añcha'taretoyen enteney acheñenesha'.

⁴⁷ Jesúsña'pa' e'ñe eñotenanet ñeñ't atet cotape'chatse'tyenet ñet pueyočhreto atto e'ñe cohuen entyenet e'ñe ñañeñeta. Ñaña'pa' chesha'tolla chore'tpa' tomach e'ñe ñesho,

⁴⁸ allempoña'pa' atet otanet:

—Erra'tsenotes sa ñerra'm e'ñe cohuen saguëñ ama't ñeñ't ama asherbenaye' enteneto atet ñerra'm añ chesha'toll tarro'mar sapa' na same'ñena, na'naña e'ñe cohuen saguën. El-loña ñaña erra'tsenotes sa ñeñ'tes naguëne' na, ama e'ñe naptocheye' saguëno, añe'naña saguënnan Nompore ñeñ't nellsensene'. Tarro'mar ñerra'm erra'tsencha' pocte' entene' o'ch yenpuenan ama't ñeñ't ama esoye' enteneto, ñetña'pa' atarrcha' po'ñočh asherben entenanet Yompor.

*Atto eñotateney ñeñ't ama čhoye'yepatare'tenaye ñeñ'tña po'ñočhpa' e'ñe parrocmayeyenpanna
(Mr. 9.38-40)*

⁴⁹ Allempoña pueyochresha' ñeñ't Juanpa' atet otan Jesús:

—Maestro, ya ahuañapa' atet yeñch puesheñarr yacma ñeñt' cachpatatene' oneñeñt' acheñ. E'ñe puechore'teñotep' pa peso'chñopa' oneñeñpa' cachpa'nerran acheñ. Yañapa' ama pocteye' yeñche tarro'mar ñapa' ama parroye' yeyemteno. Ñeñto'marña yapa' yoch:

—Amach atet pepatsto.

⁵⁰ Jesúsñapa' atet otanet:

—Amachca'ye sepatare'tatsche tarro'mar ñerra'm ama cho epatare'tenye yaña ñeñña po'ñoçpa' e'ñeca'ye parroçma yeyenpanna.

Allempo Jesúsapa' cotape'chaterran cohuen pueyochresha' epsheña, ñeñtpa' Jacobo ñaña Juan

⁵¹ Chapmoch allempoch o'ch alla ahuerri Jesús pue'ntañopa' ñañaapa' atarr sechena o'ch ahuerri Jerusaléno. Ñeñto'marña mueñan pueyochresha' ñeñt'cha' otrra'tatsa

⁵² o'ch ahuet samario'marnesha' pa'netsro o'ch e'noset muets allcha' chap ñaña Jesús allcha' amesnom epuet pueyochresha'.

⁵³ Tarraña samario'marnesha'ñapa' ama mueneto o'ch agaparettet all pa'netsreto, tarro'mar ñetpa' eñoteñet arr sechenet o'ch ahuet Jerusaléno.*

⁵⁴ Ñeñto'marña Jacobo ñaña Juan ñetñapa' atet ochet Jesús:

—Parteshacha' ¿ama't pocte' penteñe yapa' o'ch yenam huapuepa' tso' entot? al-lochñapa' ñeñt'cha' a'poyatuerrahuet ñeñt'cha' e'ñe a'chencatuerrahuet ñeñt' atet pe't Elías ñeñt' a'mtaye't Yompor po'ñoñ ahuañ.

⁵⁵ Jesúsñapa' atta cohuanetpa' atet otanet:

—Ñeñt' atet soctape'chatse'tyenpa' ama't mameshapa' ama pocteyaye. Ama't señoteñeña Yomporpa' ama atteye' cotape'chatenyeña Puecamquëñoñ. Ñeñt' semnen sapa' po'poña cotapñats.

⁵⁶ Na Ñeñten e'ñe Acheñetosetspa' amaca'yeña añecop nohuapo o'ch na'chencatos acheñenesha'. Napa' añecopca'yeña nohuapa o'ch na'queshpatos allohuen acheñenesha'.

Allempoñapa' o' metaçha'tet allotpa' ahuanmuet po'poñ anetso.

Allempo Jesúsapa' yeçhatan ñeñt' muenene' o'ch coter

(Mt. 8.19-22)

⁵⁷ Po'pocheñoña' allempo oñemyenet toño'mar allñapa' poctanet puesheñarr yacmapa' ñañaapa' atet otapan Jesús:

—Na te'pa' nemneñ o'ch noctare'tyeseþ ama't errohuanencha' pechopene'chyeyes.

⁵⁸ Jesúsñapa' atet och:

—Te'pa' napa' peñotencha' ama't nepacllapa' ama necheñe all neyçhenañ. Ro'quëþpa' çhocma eñall pa'pon allecma yeçhena.† Oteçhnopa'çho'ña çhocma eñall pa'ma' allecma yeçha'yenet. Tarraña naña Ñeñten Acheñetosetspa' ama eñalle ñeñt' e'ñe nepaquëll nepen allcha' nepanena.

⁵⁹ Po'pocheñoña Jesúsapa' atet oterranerr po'psheñeñ acheñ:

—Te'pa' o'ch poçta'n attoch po'ñoçh neyochresha' neperreþ.

Tarraña ñeñt'ña acheñerpa' atet otan Jesús:

—Te'pa' arrcha'ña ñanonom pemnaterren o'ch ahuerren apuesho, o'chña nepampa'huera' apañpa' allempochña nohuerrapa' o'ch noctap.

⁶⁰ Tarraña Jesúsapa' atet och:

—Acheñenesha' ñeñt' ama yerpa'penaye Yompor, ñetñapa' pampanna'tetepa' parro arromñañecmuet. Tarraña þocoppa' ñeñteþ o' peyerpuera Yompor añ poçtetsa o'ch auyeseþ serrpare'tyese' Yompor po'cohuenña ñeñt' atto atarr ayochreshattena ña.

* **9:53** Ñehua, yapa' yeñoteñ samario'marnesha'pa' ama mueno o'ch amo'tstana jerusaléno'marnesha' ñeñfara judionesha'. † **9:58** Ñehua, Jesús añ toma'ntacha zorra ñeñt' berrotets all pa'nyo.

⁶¹ Po'pocheño allempo serrpare'ten Jesús epuet ñeñt ame'ñenaya, ñeñtña acheñerpa' atet otan Jesús:

—Napa' Ayochreshate po'ñoçhcha'ca'ye noctañ. Te'pa' ato't nasuerra' nepacillo attoch neso'tera' namo'tsesha'; allempochña alla nohuerrerrpa' o'ch noctañ.

⁶² Jesúsñapa' atet och:

—Ñeñt ama e'ñeye' ma'yoçhrenaye attoch torrenet e'ñe cohuen Yomporecop, ñeñtña acheñerpa' amach e'ñe cohuenaye' sherbeno attoch e'ñe epatuan Yompor po'cohuenña ñeñt atto atarr ayochreshattena ña. Ñeñt acheñerpa' atetcha' netma'ntacha: Ñerra'm esesha' orrene' etamapets attoch etaman pats e'ñe cohuen paçharr pa'mro, ñerra'm pa'che'ñoña cohua'nom ama't mameshapa' amach etsotanoña etamapets attoch e'ñe paçharr etaman pats allcha' nare'tatse't pa'mro.

10

Atto Jesúsapa' mueñan pueyochresha' ñeñt cançhroch çharrasheña ñeñtcha' otatsa

¹ Allempoña Partseshapa' alla llesenserranerr po'potantañ pueyochresha' cançhroch çharrasheña ñeñtcha' otrra'tatsa o'ch serrpare'tyesnomuet. Ñetpa' atetcha' pa'nmuet e'ñech epsheña'ttsocma tet. Arrcha' ta'yeset ora allohuen anetso'mar ñaña ama't allampaño'mar; allochñapa' allcha' oñem ñaña tsapañonet Jesús.

² Ama ahuaneneta' Jesúsñapa' atet otanet:

—Shonte' narmets ñeñt nanac ellomre'tets ñeñtcha' a'yapaçhetañ. Tarraña ataruasaña ñeñtcha' a'yapaçhe'pa' ama atarr atonayaye. Te'pa' añcha'ña sanamoñ pamo'mte' mueñanepa'ña ñeñtcha' a'yapaçherrets pa'mro. Ñeñtpa' atet toma'ntatanet Jesús atto atarr shonte' acheñenesha' ñeñtcha' ame'ñerrtsañ tarraña ñeñtcha' ame'ñaterrahuetpa' ama atarr atonayaye. Añcha'ña yenam Yompor ñeñt Yamo'mte' yepen mueñanepa'ña pa'taruasañer ñeñtcha' torra'yerrtsa ñocop allemeñ anetso'mar.

³ Ñaña sapa' ñerra'm o'ch ahues te'pa' señoçhcha' po'ñoçh çhocmach eñall ñeñtcha' se'moñe'te' ama't sapa' amach çho erro't sepenanetañe ñet. Ñeñto'marña notenes te'pa' o'ch nemñas e'ñech ates ñerra'm carrnero o'ch ahuo' allo'tsen ma'yarroçhno.

⁴ Ñaña amach sanmatsto quelle, ama't sebolsa, ama't po'ptaña sesapatpa' amach sanmatsche. O'ch ahues sema'yorñecma. Ama't esesha'ch sehuomcha'tyesnom toño'marpa' amach alla so'chtatsto.

⁵ Allempoch seçhap ama't erra'tsena anetsro all sesen, ama't erra'tsena pocoll allcha' seçhappa' ñanomcha' atet seposa. E'ñe sehuomcha'teñoñ ñeñt apaçllesha'pa' o'ch senamatosñañ Yompor pa'nateña. Ñerra'm ñetña po'ñoçh e'neññañet Yompor pa'nateña, Yomporñapa' a'natenanetcha'.

⁶ Tarraña ñerra'm ñetña ama e'neññañeto Yompor pa'nateñapa' Yomporñapa' o'ch alla apuerres sa pa'nateña.

⁷ Ñeñte pocollro allcha' e'ñe cohuen agapaset allach sa'posa. Ñeñt rrenet ñet ñeñtcha' rratapaset, ñeñtach serros saña. Tarro'mar ñeñtes torretsa e'ñe pocte' atetcha' tsa'tenset. Amach sommare'tyesatsto allemeñ pocollo'mar, allach e'ñe sommosa puepahuarro.

⁸ Ama't erra'tsena anetsro allcha' seçherrerr allcha' e'ñe cohuen aguërrseterr, ama't errofena rreñets apasetpa' ñeñtach serros.

⁹ Allñapa' sa'crratyesoscha' ñaña ñeñt atsna'tyets. Allcha' seserrpare'tatyesosanet, atetcha' sotos: “Te'pa' o' yeçhapatonas Yompor po'cohuenña ñeñt atto ayochreshattena ña. Aña palltetsa o'ch same'ñera attoch e'ñe çhaponasa seyoçhro.”

¹⁰ Tarraña ñerra'm erra anetsro allcha' seçhap ñeñt allo'marnesha'ña ama cohuenaye' agapaseto, allña toño allecma chopeñe'chyenet ñet o'ch señoñtatnomanet. Ñeñtpa' atetcha' sotnomanet:

11 “Ama’t pats ñeñt o’ cheta yetco arr sa’netsro, te’ñapa’ o’ch yepa’shetca’tyesnoma attoch seño ch sapa’ ama’t mameshapa’ ama pocteye’ entenso Yompor. Tarraña ama’t atteña’ te’pa’ o’ch neñotatnomues Yompor po’cohuenña autsa chaponasañ ñeñt atto ayochreshattena ña.”

12 Allempoña Jesúsapa’ alla oterranerr pueyochresha’ allempo ama seneta’:

—Po’ño ch te’pa’ o’ch notas, esempohuañen allempoch a’craretetuerra allohuen acheñenesha’pa’ añ anetso’marnesha’ ñeñt ama cohuenaye’ sagapaye te’, nanaccha’ yoro cheno’tsenterret allempo. Ama’t sodomo’marnesha’pa’ amach tama yoro cheno’tsenterreto atet ñerra’m ñeñt anetso’marnesha’ ñeñt ama cohuenaye’ sagapaye te’.

*Atto Jesúsapa’ eños epo’mar anetsocop all ama ame’ñyeto
(Mt. 11.20-24)*

13 Allempoña Jesúsapa’ alla oterrerr:

—Nanaccha’ llequēñtso’tsa’yenes coraziño’marneshacha’; nanaccha’ llequēñtso’tsa’yenes saña betsaido’marneshacha’. Tarro’mar ama’t atarr norrtatyennaseñ nepartsoña sesho, sañaapa’ amaña soctape’chuerroña ello cohuen Yomporecop. Ñerra’m arrcha’ña norrtatañ nepartsoña tiro’marneshesho ñaña sidóno’marneshesho, ñetñaapa’ ahuatoteñte’ cotape’cherretañ e’ñe cohuen Yomporecop. Ñetpa’ attochña e’ñe orrtetañ cha llecatenanet po’chñar, cotnashe’mach chorra’yeseañ, tsapñach epachshema’tyenetañ all anorrcha’tyenet puellquēñoñet.

14 Ñeñto’marña te’pa’ notenes, esempohuañen allempoch a’craretetuerra allohuen acheñenesha’pa’ tiro’marnesha’ ñaña sidóno’marnesha’ ñetñaapa’ amach tama a’coñchatare’tterreto allempo. Coraziño’marneshacha’ ñaña betsaido’marneshacha’ saña allempopa’ atarrcha’ coñchaterrset.

15 Ñaña sa capernaumo’marneshacha’ chate’ sotenapañ atto e’ñe cohuen sentyena sañeña, Yomporñaapa’ allentach a’tapaterres pue’ntaño. Ñeñtpa’ amachca’ye atteye’ perrsoña Yompor, allachca’ye huapore’terres o’pono coñcha’puetso.

16 Jesúsña allempo ama sena’ pueyochresha’ o’ch serrpare’tyeneta’ anetso’mar ñañaapa’ alla oterraneterr:

—Ñerra’m esesha’ch se’mñnotapue’ sa, na’ñaña e’mñnotenet. Tarraña ñerra’m esesha’ch ama sagapaye sa, na’ñaña ama aguēneto. Ñaña ñerra’m esesha’ ama mueno o’ch agapnet na, Nompore’ñaña ama mueneñeto o’ch agapet tarro’mar ñapa’ ña nellsensene’.

Arrpa’ allohua ñeñt atet otan pueyochreshachno ñeñt canchroch charrasheña. Allempoñaapa’ mueñanet allcha’ serrpare’tatyesnomuet.

Atto huacherra Jesús pueyochresha’ ñeñt canchroch charrasheña

17 E’ñe allponmatatsapa’ o’ alla huacherra pueyochresha’ ñeñt canchroch charrasheña. Ñetñaapa’ e’ñe pocsheñeshocmañen huachenet Jesúsesho. Atet serrpare’tatueñet:

—Partseshacha’ ama’t oneñeñechnopa’ e’ñe ye’cha’nma’cha’tatue e’ñe ye’chore’tetñoñt pa peso’chño.

18 Ñañaapa’ otapuenanet:

—Napa’ neñchca’ye oneñeñt allempo aprratañpsaretta po’huamenc. E’ñe attema’t ñerra’m ñapa’ o’ cha’nmachet entoñ atet pena meratste’ huetsa entoñ o’ch chap añe patsro.

19 Po’ño chca’ye napa’ atarr ahua mencañ neña’yepas. Ama’t allohuen ñeñt se’moñe’tyene’ sañaapa’ ñeñtecopña nellsensa’yepas allochñaapa’ attoch e’ñe sa’mchechatyesuena’ allohuen pa’namen, ama’t shechpechno ñaña yellasochno, e’ñe satmama’tetño’pa’ e’ñe sa’pe’ptse’tatse’tueña’. Allochñaapa’ amach eñallete’te ñeñtcha’ semuerochtate’ ama’t patra.

²⁰ Ama't atarr ahuamencañeseñ atto o' sa'mchechatyehuahue oneñetechno, amachña ñeñña atarr socshatsto. Añcha'ña e'ñe socshena atto aquellca'yeharetes seso'cheñ Yomporesho ñeñt' pue'ntañ'o'tsen.

Atto Jesús'pa' atarr pocsheñesha' ma'yochena
(Mt. 11.25-27; 13.16-17)

²¹ E'ñe allempoña Jesús'pa' atarr coshateñ Parets Puecamquëñ. Ñeñto'marña ñapa' e'ñe pocsheñesho' ma'yochenana Pompor, ñeñtpa' atet oten:

—Na Apacha' o'ch na'ye'chochtatonap, p'apa' p'a ñeñtep atarr ayochreshattetsa pe'ntañ'o ama't ñaña arr patsro. Na'ye'chochtatonap tarro'mar ora añechno ñeñt' pecohuenña pepen, ñeñtpa' ama arreye' pechapateñe pueyo'chro ñeñt' atarr eñotañ entyetsa. Papa' añña pechapaten pueyo'chreto ñeñt' ama eñotañeye' entetso. Tarro'mar Apa e'ñe pemuereño' ñeñtpa' atetña e'ñe pocte' penten p'a. Arrpa' allohua ñeñt' atet ma'yochenana Pompor.

²² 'Nomp'or allohuen po'cohuenña e'ñe eñotatuenen. Na ñeñten Puechemerenpa' ama po'ño'ch eseshaye' neñotenaye, ñapñaña Nomp'or eñotenen. Nomp'orpa'cho'ña ama po'ño'ch eseshaye' eñotenaye, napñaña na ñeñten Puechemeren e'ñe neñoteñ Nomp'or, ñaña erra'tsencha' ñeñt' e'ñe pocte' nenten na ñeñten Puechemeren ñeñt'ña'pa' o'ch neñotater Nomp'or.

²³ Allempoñapa' alla cohueranerr pueyochresha'pa' atet otanet e'ñe ñocueta:

—Atarr cosheñtso'tsa'yenes sa tarro'mar e'ñe sa seclloyotpa' o' senterrñañ Yompor po'cohuenña.

²⁴ Po'ño'chca'ye notenes e'ñe ahuatoteñpa' shonte' ñeñt' a'mta'yehaye't Yompor po'ño'ñ ama't ñaña ñeñt' añcha'tarettatset' allempo, ñetña'pa' atarr muenetañe't o'ch enterrñañetañ Yompor po'cohuenña ñeñt' o' senterr sa te'. Tarraña allempo ñetpa' amaña eseshaye'ña enterrapaye Yompor po'cohuenña. Ama't atarr muenetañe't o'ch e'mñoterrñañet Yompor po'ño'ñ ñeñt' o' se'muerr sa te' tarraña allempo ñetpa' amaña eseshaye'ña e'muerrapayeña Yompor po'ño'ñ.

Atto atarr cohuen orrtatos puesheñarr samario'marnesha'

²⁵ Allempoña puesheñarr ñeñt' atarr etsotene' ñoñets ñeñt' atet anaret judioneshacop, ñaña tantapa' atet otan Jesús attoch eñoch erro'tente' ye'chaten ña, ñeñtpa' atet och:

—Maestrocha' ta', ¿erro'tena'tcha' ne'pañña na e'ñe cohuen attoch napa' corretsanach e'ñe tayoteñ ama't errponañohuen?

²⁶ Jesúsña ana'ppa' atet och:

—¿Erro'tena't otenña ñoñets ñeñt' atet anaret ahuatoteñ? ¿Eso'tña ñoñtsor pelleyenña p'a ñeñt' anaret all?

²⁷ Ñaña'pa' atet och:

—Ñeñt' ñoñetspa' atet oten: “Atarrcha' yemorrenteña Yeyomporer ñeñt' Yepartseshar yepen e'ñe yeyochrocmañen. Ñaña e'ñe yecamquëño' yemorrenchach e'ñe yehuamencohuen, ama't ñaña ora yoc'apñohuen.” Ellonet po'poñpa' atet oten: “Atarrcha' yemorrenteña yamo'ts e'ñe atet atarr yemorrentena yañeña.”

²⁸ Jesúsña'pa' atet och:

—Atetca'ye e'ñe atet p'oten. Ñerra'm atetcha' e'ñe pe'pohuapa' p'añapa' corretsa'pach e'ñe tayoteñ ama't errponañohuen.

²⁹ Ñeñt'ña acheñerpa' añña atarr muenen o'ch e'ñe cohuen enteñ Jesús ñaña allohuen acheñenesha'. Ñeñto'marña alla a'p'to'terranerr Jesús:

—Ñehua, te'pa' o'ch p'oten ¿eseshatña ñeñt' e'ñe po'ño'ch namo'ts nepen?

³⁰ Attoch eñotach ñeñt' e'ñe po'ño'ch amotso't entetsa ñeñt' e'ñe pamo'ts p'annena, Jesúsña'pa' atet toma'ntacha, ñeñtpa' atet serrpare'tach:

—Eñall puesheñarr judionesha' ñeñt huetsa Jerusaléñoť, ñapa' arr sen Jericó. Toñoñapa' alla rromañ eñe e'ñe puerratañpsatsre'tuet ama't pa'shtam. Atarr atserrpet. Autsa muetsapuetañ allempoña ñeñt atserrpapue'pa' ahuanerret.

³¹ Allempoña tematenpa' puesheñarr judionesha' ñeñt cornesha' ñapa'cho'ña all oñem. Ñaña' ama't entospa' atfa oñmatse'tam̄pesya a'yo'marpa' o' metane.

³² Allempoña tematenpa' huapa ñaña po'psheñeñ judionesha' ñeñt levitaneshatets. Ñapa'cho'ña ama't entospa' atfa oñmatse'tam̄pesya a'yo'mar o' metane ñaña.

³³ Allempoña tematerre o' huapa ñaña puesheñarr ñeñt ama judioneshayaye ñeñtpa' samario'marnesha'. Ñapa' ñeñt pamo'tsesha' pen ama amo'tstenano judionesha'. Tarraña ñapa' allempo entosan puesheñarr judionesha' ñeñt atserrpenetpa' atarr muerosya.

³⁴ Allenta ponmosya, shosñañ olivose* ñaña vino allo partosñañ all atserrpeñet.

Allempoñapa' huanquerrñañ all atserrpeñet. Tantaterpa' montacha pashanoropa' anem̄ allcha' mos. Allña'pa' all cohuañpsos.

³⁵ Tsapatña'pa' cheta'muenan epa denario apa'muenan apacllatesha' atet ota'mueñ: "Te'pa' pecuañpescha', errponcha' pa'gasta' ello peçllayor, napa' netsa'tuerrpach esempoch nehuerra."

³⁶ Jesúsña'pa' alla oterranerr ñeñt acheñer:

—Ma'psheño'maretpa' papa' ¿erra'tsena'tña pentenña ñeñt atarr amo'tsoť entetsa ñeñt e'ñe pamo'ts pene' ñeñt rroma' eñeť?

³⁷ Ñeñña acheñerpa' atet oterranerr Jesús:

—Añca'ye e'ñe pamo'ts pene' ñeñt e'ñe puemuereñoť partatse'terre'.

Jesúsña'pa' atet och:

—Te'pa' atetcha' peperra paña. O'ch ahuerrepa' atarrcha' pemorrentera ora allohuen acheñenesha'.

Allempo Jesús'pa' chap pocollo all yeçhena Marta epuet pa'mo'nerr María

³⁸ All oñen Jesús'pa' o' chap paterr anetso. Allña puesheñarr coyanesha' añ pa'so'cheñ Marta, ñaña'pa' e'ñe cohuen agapapan Jesús pa'paclo.

³⁹ Ñeñña Martapa' eñall ñaña pa'mo'nerr ñeñtpa' añ pa'so'cheñ María. Maríaña'pa' all anen Partsesha' Jesús pa'rrpōť allōť e'mñoteññañ ñeñt atet serrpare'tatenanet.

⁴⁰ Pa'mo'nerrña Martapa' aña e'ñe ma'yochrena a'toram̄pse' all puetare'tallme'chen. Ñaña'pa' ponmana Jesús'pa' atet otos:

—Ayochreshate, amate' pocte' penteñe napta neptare'tallme'chen; nemo'nerrña'pa' ama yenpuenno. Te'pa' o'ch pōch a'toram̄psapretnepa' natar.

⁴¹ Jesúsña'pa' atet och:

—Nocha Marta, shonte' pa'namen ñeñt petorra'yena, papa' ñeññaña atarr pellcatene'.

⁴² Tarraña e'ñe patraña ñeñt atarr sherbets; ñeñtpa' atto e'ñe cohuen socshennana neñoñ. Pemo'nerr María'pa' ñapa' ñeñña atarr e'nen. Ñeñtpa' ama't e'ñe esesha amach errotenoť puerratañpereto.

11

Atto Jesús'pa' yeçhatan pueyochresha' atetcha' ma'yochet (Mt. 6.9-15; 7.7-11)

¹ Po'pocheño Jesús'pa' alla ma'yocherrerr. O' ma'yochuapa' puesheñarrña pueyochresha'pa' atet och:

—Partseshacha' te'pa' o'ch peyçhatey ma'yochatsa atet peť Juanañ, ñapa' çhocma yeçhataneť ña pueyochresha' atetcha' ma'yochet.

* **10:34** Olivo ñeñt tsach allōť yoreñet puerets pue'merot.

² Jesúsñapa' atet otanet:

—Ñehua, ñerra'm esempoch sema'yochena atetcha' sot:

Yompore Partso ñeñteḡ pe'ntañotsen, yentapepa'ch ḡa atarr Partsoḡ. Chapuepa'ch Nompore allempoch atarr ḡa'yochreshatterra arr patsro. Yetsotonapepa'ch arr patsro ñeñt atet pemnen ḡa Nompore atet penet ñaña pe'ntañ.

³ Chocmuepa'ch Nompore ḡapueney ñaña yocrramñ ñeñt allpon yepallta'yena pate'tets yet.

⁴ Peḡretna'huonayepa'ch Nompore allohuen yo'chñar ñeñt ama pocteye' pentapretenye, atto Nompore yapa'cho'ña yeḡretnannena ñerra'm esempo erroḡ yeḡannena. Ñaña amach Nompore pemnatatsche sosya'tañ o'ch atarr topateney. Añcha'ña ḡhoch Nompore ḡa'yopo'ñataterrey allohuen sosya'tsañechno.

⁵ Elloñapa' alla yeḡhaterraneterr ñeñt atto e'ñe yenamueñoḡ Yompor apueycha'. Ñeñtpa' atet serrpare'taterraneterr toma'nteñtso.

—Ñerra'm eñall puesheñarr ñeñt e'ñe cohuen yeyemtenaya, ama't rroḡh tsapo o'ch ahuey pa'paclo yeḡhore'teñoḡpa' atetcha' yotos: “Napa' masheñcha' añecop nohuena o'ch ḡapuen ama't coñe'ta rreñets,

⁶ tarro'mar o' ḡchap puesheñarr namo'ts ñeñt huetsa ḡaḡhayoḡ, napa' ama es necheno ama't coñe'ta alloch neyema'cha.”

⁷ Tarraña ñapa' po'ponroḡpa' ñato' ḡhach otapuey: “Amach ḡa'tsrre'moḡhtana'tatstosno tarro'mar o' e'ñe echarr neyottañpesuena, allohuen nacñeḡaretolleshohuena' o' yemanrra'tuen. Ñeñto'marña ama eshcaye' atantenno o'ch neḡha'nmonaḡa attoch es napaḡ.”

⁸ Tarraña napa' o'ch notas, ama't ñeñt atarr yeyemtenaña' ñerra'm ama ḡha'nmaponayopa' yañapa' ñerra'm alla yenamuere'tpa' ḡha'nmaponayach attoch apapuey ama't erra'tsena ñeñt atarr yenamueñ attoch amach alla ya'tsrre'moḡhtana'tneñe es enamare'te'.

⁹ Ñeñto'marña napa' o'ch notas: E'ñe senamueñoḡ, Yomporñapa' apascha'. Se'name'teñoḡpa' señchcha', seḡhore'teñoḡ, Yomporñapa' e'ñe pue'mñoteñoḡespa' e'ñech cohuen toramḡsapas.

¹⁰ Tarro'mar ñeñt es enamare'tetspa' ñetña es aguḡtset; ñaña erra'tsen ñeñt es e'nyetspa' ñetñapa' enteretcha', ñaña erra'tsen ñeñt ḡhore'tyene' ñetñapa' e'ñech e'mñotenanet Yompor.

¹¹⁻¹³ 'Yompor ñeñt pue'ntañotsen ḡhocmach e'ñe cohuenare' es apa'yeney ñerra'm esempo es yenamueñ. Ñapa' amach aña apuenye ñeñt ama cohuenaye' yenteno ya. Ama't sa ñeñtes arromñaḡes atet sepeñ saña sechemer, e'ñech cohuen es sapueñ ñerra'm esempo es enamuenes. Atet ñerra'm allempo pa'chporrñoḡ es enamuenes, o'ch enamas mam* ñeñtcha' rra', sapa' ama't puesheñarroḡesapa' amach aña sapueñeña sechemer mapue' ñeñt ama arrapahuoyaye. Amapa' ñerra'm cac enamuenes sañapa' ama't puesheñarroḡesapa' ama aña sapueñeña sechemer shecheḡ ñeñt atarr amue-roḡhtatañ. Amapa' ñerra'm pa'me' enamuenes sañapa' ama't puesheñarroḡesapa' ama aña sapueñeña sechemer yellas. Ñeñto'marña sa ama't arromñaḡes ama't ñaña at-srre'mñaḡes sapa' e'ñe señoḡteñ apa'yese' sechemerasha' e'ñe cohuenare'. Añña ñeñt Sey-omporer sepen saña ñeñt pue'ntañotsen elloña ñapa' e'ñe eñoteñ atto e'ñe cohuenare' es apa'yenes saña. Ama't Puecamquēñ ñeñt e'ñe cohuen Parets attoña e'ñe cohuen chorratensa allohuenes ñeñtes enamyene' ña.

* **11:11-13** Ñehua, Jesús añ toma'ntatanet pan ñeñt puerrar penet all pa'nyo.

Atto puesheña'tets oteñet Jesús ñapa' oneñeto' po'huamencoť cachpatenanña po'potantañ oneñetečno acheñenesha'

(Mt. 12.22-30; Mr. 3.19-27)

14 Po'pocheño allo'tsen puesheñarr acheñ ñeñť chorrena oneñet, čha opanatateñ. Allempoña Jesús pa' cachpatosan oneñet atto chorrenana acheñ. Atto cachpa'ner oneñet ñeñťña opanpa' o' alla eñorerra. Acheñenesha'ña allpa' atta cohuanrrorteñet, atarr cohuen enteñet.

15 Tarraña po'potantañečnoña acheñenesha'pa' ama't mameshapa' ama pocteye' eñcheto. Ñetñapa' atet otyeñet:

—Atto cachpatatenan oneñet acheñpa' añaca'ye ahuamencat pene' Beelzebú ñeñť pompor pen allohuen oneñetečno.

16 Po'potantañ acheñenesha' ñetñapa' čha mueneñet o'ch topachet Jesús. Ñetpa' atet ochet:

—Yapa' añ yemnen o'ch pegatey pepartsoña entoť allochñapa' attoch yeñotař po'ñočh řapa' Parets Puechemereř.

17 Jesúsñapa' eñotanet ñeñť atet cotape'chatse'tyenet pueyočhreto ñocop ñeñť atto otyeñet ñapa' oneñeta pompor po'huamencoť cachpatenanetña oneñetečno. Ñeñťo'marña ñapa' atet otanet:

—Ñerra'm puesheñarr amčha'tareť elloptannena pa'cheñer e'ñe ñagattsetapa' e'ñech poctacma a'cclatanna'tuerret. Attecmach řannerra ama't ñeñť e'ñe pamo'tsna'tarecmuet ñerra'm elloptannerret e'ñe ñagattsetpa' e'ñech a'cclatanna'tuerret.

18 Attecmach řannerra ñaña oneñet pueyochreshačno ñerra'm oneñetečno e'moñe'tannenet e'ñe ñagattseta, ñetña atto huomencatenetpa' čhach huañerrets amach allo'na huomencatneneto. Ñeñťpa' atet o' notuas tarro'mar sapa' čha sotenen napa' Beelzebo' po'huamencoť necachpatateñña e'ñe ña pueyochresha' ñeñť pompor pen allohuen oneñetečno. Po'ñočh oneñetpa' amaca'ye huapore'tanneno.

19 Sapa' atet sotenen napa' Beelzebo' po'huamencoť necachpatateñña e'ñe ña pueyochresha', ñehua, te'pa' o'ch notas: Ñeñť seyochresha' sepen sa ñeñť eñotene' ñamet o'ch cachpatachet oneñet acheñenesha' ñetpa'čho'ña amaña Beezebú po'huamencoteye' cachpatateñetoña oneñet acheñenesha'. Ñetpa'čho'ña Yomporoña po'huamencoť cachpatatenetña oneñet. Ñeñťña o' eñotatas ñeñť atet sotennoñ ñeñťpa' amaca'ye po'ñočh atteyaye.

20 Po'ñočhca'ye Yompor po'huamencoť necachpatateñña oneñetečno acheñenesha' ñeñťcha'ña señotate' te'pa' o' nečhapatonas Yompor po'cohuenña ñeñť atto po'ñočh atarr ayochreshattena ña.

21 'Ñeñťpa' o' e'ñe notuas atet tarro'mar yeñoteñ ñeñť atarr ahuamencattetsa atto atarr ahuamencattena oneñet, ñaña'pa' e'ñe po'huamencoť cohuanřpesyenan allohuen e'ñe cohuen ñeñť pa'paquell řa'yen. Ñapa' po'huamencocmañen na'yenan ñeñťcha' e'ñe cohuanřpene' all amčha'tarettena ña.

22 Tarraña ñerra'm esempo o'ch huapoña ñeñť atarr ahuamencatesha' ñeñťcha' ello metanose'ña po'huamenc atet ñerra'm na Nompor, ñeñťcha'ña e'ñe a'mchechatose'. Attoña e'ñe puerratanřposña ñeñť allpon moñenaya ñeñť atarr yemuetyena ña. Allochñapa' o'ch be'tosos all ñeñť pa'paquell řa'yen o'ch e'ñe puerratanřpeshuos ñeñť allpon o'patyena ña.

23 'Ñeñťo'marña te'pa' o'ch notas allohuenes: Ñerra'm eseshas ñeñťes ama neťorrapretenaye ñeñťña acheñerpa' čhaca'ye epatare'tennan ñeñť atet neťorra'yena na. Ñeñťpa' o'ch netma'ntatasa atet: Ñerra'm esesha' ama na'yapačhapretenaye ñeñť na'yapačhen na, ñeñťñapa' čha a'parratse'tañpenen a'yenet.

Atto Jesús pa' eñotatanet ñato' oneñeĩpa' o'ch alla chorrerranerr acheñ allot ÷ha'nom ahuaña

(Mt. 12.43-45)

²⁴ 'Ellonetpa' o'ch alla neñotaterrser po'poñoneĩ: Oneñeĩ ñerra'm esempo ÷ha'nom acheñeshoĩ, ñeñña oneñeĩpa' o'ch auyes errañaren ama't amayo'mar e'nyese' po'psheñeñ allcha' yeçherrerr allcha' e'ñe amesuerrerr cohuen. Tarraña ñerra'm amach erra eñchepa' atteñapa' o'ch ot: "Napa' o'ch alla ahuerren nepacillo allot necha'nom ahuaña."

²⁵ Atetcha'cho' pa. O'ch alla ahuer allot ÷ha'nom ahuaña. Allña o'ch çherrpa' e'ñech cohuen entuerran pa'paquell, e'ñech cohuen atarrapo'tuaret, e'ñech cohuen añño'tyesaret.

²⁶ Allempoñapa' o'ch alla ahuer allot'sa'yen pamo'tsesha'pa' o'ch enana' po'poñ cançherrsheña oneñeĩeçhno ñeññ nanac sosyare', ñeññ ello metana'tuene' ñeññ atet sosyaten ñeññ hua'ñene' o'ch yeçhaprecha. Allohuenetñapa' o'ch chorreñet ñeññ acheñer. Allempoña tsapaonetpa' allo'nach sen ñeññ acheñer sosyatnomuets huomenc. Elloch metanerran ñeññ atet patse'tyese't ñenmañ.

²⁷ Jesús allempo atet serrpare'tatenan acheñenesha'pa' puesheñarrña coyanesha'pa' machayotepa'tcha' rrana, ñeññpa' atet ot:

—Ama't ñeññ pãchor pepen pãpa' atarr cosheñtso'tsen tarro'mar ñapa' ñeññ pe'ñallete' pã ñeññep atarr cohuen es peyeçcaten ñaña ñapa' e'ñe cohuen cohuanpãsa' allempo chesatollenpã'.

²⁸ Jesúsñapa' atet och:

—Elloña allohuenetpa' atarr cosheñtso'tsa'yenet ñeññ pue'mñnoteñoet Yompor po'ñoñ e'ñe atet pohuenet.

Atto Jesús pa' otan acheñenesha' ñeññ ama cohuenaye' cotape'chetso ñetñapa' ÷hocma e'nenet partsoteñets

(Mt. 12.38-42; Mr. 8.12)

²⁹ Allempoña acheñenesha' emchorreñet Jesús, ñaña'pa' atet otanet:

—Acheñenesha' ñeññ corra'yetsa te' ñetñapa' ama cohuenaye' cotape'chyeneto. Tarro'mar ñetpa' aña e'nenet ahua'ch norrtatanet nepartsoteña atto'chña eñotnet napa' po'ñocho'te' Parets Puechemeren ñeññeno'te' Cristotosets. Tarraña amach es norrtataneto. Napa' añach pãterr neñotatanet atet eñotatane't Jonás ahua't nínivo'marnesha' allempo a'ñtane't Yompor po'ñoñ.

³⁰ Tarro'mar atto eñotatane't Jonás nínivo'marnesha' ahua't ñapa' Yomporesho't huena, napa'cho'ña te'pa' atetcha' neñotach ñaña acheñenesha' ñeññ corretsa te' napa'cho'ña Yomporesho't nohuena.

³¹⁻³² Tarro'mar ahua't allempo serrpare'tatane't Jonás nínivo'marnesha' ñetñapa' allempocma cotape'cherret ello e'ñe cohuen Yomporecop. Te'ña arr seshopa' allot'senen na ñeññen ello metanene' ñeññ atet serrpare'tate't Jonás. Tarraña sañapa' amaña soctape'chenoña ello cohuen Yomporecop. Ñeñño'marña esempohuañen allempoch a'craretetuerra allohuen acheñenesha', ñeñña nínivo'marnesha' ñeññ e'ñe cohuen cotape'cherrets Yomporecop ahua't, ñetpa'cho'ña orrterretcha', ñeññcha'ña señotaterre'ña sapa' ama't mamesha ama pocteyayeña ñeññ atet sepa'yese't tarro'mar sapa' ama soctape'cherro ello cohuen Yomporecop. Ñaña te'pa' o'ch neyerpatasa ñeññ atet pã ahua't puesheñarr coyanesha' ñeññ añcha'tarettatse't atarr baçhayo allohuanen patsa'ponet. Ñeñña coyanesha'pa' allot'eñ on o'ch e'mñnotenana' Salomón pueserrpareñ ñeññ atet atarr eñotañte't. Te'ña arr e'ñe seshopa' allot'senen ñeññen puesheñarrana ñeññen atarr es neñoten ñaña, ello nemtaneñ atto eñotañte't Salomón. Tarraña sañapa' amaña es sotapoteno. Ñeñño'marña esempohuañen allempoch a'craretetuerra allohuen

acheñenesha', ñeñña coyanesha' ñeñ e'ñe cohuen e'mñotatse't ñapa'cho'ña orrterrach, ñeñcha'ña señotaterre' sapa' ama pocteyayeña ñeñ atet sepa'yese't tarro'mar sapa' ama es sotapote'te ama't e'ñe mamesha.

Atto yecle'pa' añ toma'ntena ñeñ po'lampareñ pen allohuen yechets
(Mt. 5.15; 6.22-23)

³³ Jesús pa' alla serrpare'taterraneterr, ñeñtpa' atet oterraneterr:

—Ñerra'm esempo ya'llchaten lampareñ, ñeñtpa' ama tarrecpaye' ya'huortateñe o'ch yene' o'pono e'ñe a'nareto. Ñaña ama añecpaye' ya'llchateñe o'ch ye'rramañpes coymo. Ñeñtpa' añecopña ya'huortatenña lampareñ o'ch yene' enone't attochña e'ñech çoyo'tamñesuan allohuen acheñenesha' ñeñ be'tosçhets all pocollo.

³⁴⁻³⁵ Yecle'pa' añ toma'ntena atet ñerra'm ñeñ po'lampareñ pen allohuen yechets. Ñerra'm e'ñe cohuen huomech yecle'pa' e'ñech cohuen entateney puetare' allochñapa' attoch e'ñe cohuen torratyenana allemeñ yechets tarro'mar e'ñe cohuen a'puetarsamñsarettenet. Tarraña yecle'ña ñerra'm ama e'ñe cohuen huomñcheyayepa' amach e'ñe cohuenaye' entateney puetare' attochña amach eshcaye' torratyenano allemeñ yechets tarro'mar cha ottena ñerra'mrrate' checmeto'tsa'yeneta. Attecma pena ñaña yeyoçher. Ñerra'm e'ñe cohuen yoctape'chyen yeyoçhropa' attoña çhennayaña yeyoçhro e'ñe ora allohuen Yompor pocta'ña ñeñ po'cohuenña pen. Attoña ora yocta'ñapa' e'ñech a'puetarsamñsarettena Yomporeshot. Tarraña o'ch yeñota e'ñe yañeña tarro'mar ñerra'm ama cohuenaye' yoctape'cheno yeyoçhro, ñeñtpa' amach errotenot a'puetarsamñpenyeña ñeñ yocta'ña yepen. Ñeñña yocta'ña yepenpa' çhach a'checmetamñpennay yeyoçher.

³⁶ Tarraña ñerra'm po'ñoçh e'ñe cohuen yoctape'chen yeyoçhro, attoña çhennayaña yeyoçhro e'ñe ora allohuen Yompor pocta'ña attochña yeñoteñ orrtatyese' ñeñ e'ñe cohuen enten ña. Attoña e'ñech cohuen es ye'pa'yen atet ñerra'mrrate' lampareñ e'ñe cohuen çoyo'tamñpeney attoch e'ñe cohuen es yentyen. Allempopa' o'huañcha' allo'na yechecmetamñpesnen.

Atto Jesús pa' a'metare'tenan fariseonesha' ñeñ atet yeçhenet ñetpa' ñeñtpa' ama cohuenaye' entapretenaneto Yompor
(Mt. 23.1-36; Mr. 12.38-40; Lc. 20.45-47)

³⁷ O' serrpare'tatuanet Jesús pa' puesheñarrña fariseonesha'pa' hua'ña'nerran Jesús o'ch rrallme'chapreteña' pa'paclo. Allempo çhap Jesús allpa' be'tosos anorros allcha' rrallme'chapretosan ñeñ hua'ñene'.

³⁸ Ñeñña fariseopa' entenan Jesús atto ñapa' ama e'pota'to ñeñ atet yeçhena judionesha'. Ñehua, ñetpa' atet yeçhenet, amach rrallme'cheneta'pa' o'ch e'pota'tyeset Partsocop. Ñeñto'marña fariseopa' atet cotape'ch Jesúsocop:

—Ta'm, eso'marte'ca'ye amaña e'pota'tenoña ñeñ atet poctetsa Partsocop.

³⁹ Partsesha'ña Jesús pa' atet toma'ntatana ñeñ atet pena allohuen fariseonesha', ñeñtpa' atet otan ñeñ hua'ñene':

—Ñeñtes fariseoneshas sapa' e'ñe se'pame'teneñña setaza eno'tpa' o'pono'tñapa' ama se'parro'teñe. Seplatopa'cho'ña enota e'ñe se'pata'teñ o'pono'tñapa' ama se'pata'teñe. E'ñe atet sepena samña. E'ñe sa'cohuentatena ñeñ eno'mar ñeñ atet seyçhena sa allochñapa' attoch entenes allohuen acheñenesha' sapa' e'ño' cohuenes, tarraña o'ponot seyoçhropa' ama sa'cohuentateñe, allñapa' e'ñe chorren shonte' sosya'tsañeçhno ñeñ atto e'ñe seshquëño' çhocma es seprratamñpesyen, seshonten pa'namen ñeñ ama pocteye' entapretenso Yompor.

⁴⁰ Cha sottena ñerra'm erra'tsen puesheñarr acheñ ñeñ ama es eñoteno. Ama't señoteñeña Yomporña ñeñ yeçhcatyene' allohuen ñeñ allpon yentyen arr patsro, ñeñ

a'yote'tsa'yen yeshot ñeñtara Yompor ñeñt yeçhcate' ñaña yeyoçher alloch e'ñe cohuen yoctape'chen o'pono yeyoçhro.

41 Ñerra'm o'ch po'ñoçh soctape'cherr cohuen seyoçhro Yomporecop attochña e'ñe cohuen seyoçhrocmañen es sapa'yen attoch seyepa'yey po'potantañ. Ñerra'm atetcha' seperrapa' Yomporña' e'ñech cohuenare' enterres.

42 'Atarr llequëñtso'tsenes sa ñeñtes fariseoneshas tarro'mar ama atteye' sepeno ñeñt atet o'notuas. Ora allohuen ñeñt senareñ sepen ama't çhocma sapueñeñ Yompor allpon ñeñt poctetsa ñocop—mentapan ñaña rudapan. Tarraña añña ñeñt nanac sherbets Yomporecop e'ñech pocte' es yepeññañ po'psheñeñ ñaña e'ñech cohuen yemorrenteña Yompor. Ñeñt atetpa' sañapa' ama soctape'cheñe ama't mamesha. Sapa' ñeñtña sepalltena o'ch e'ñe atet sephua. Tarraña ñeñt atto çhocma es sapa'yen Yomporecop ñeñtpa'çho'ña amach secaçhpatsche.

43 'Atarr llequëñtso'tsa'yenes sa ñeñtes fariseoneshas tarro'mar sapa' e'ñe sommo'cheñot atarr semneñ allohuen acheñenesha'pa' o'ch e'ñe cohuen entenset. Ñeñto'marña sapa' añña atarr semnen o'ch sanorrçha'tyen judionesha' po'prahuo allecma anorryen ñeñt atarr amcha'na'tpo' enten allohuen acheñenesha'. Ñaña sapa' añña atarr semnen allohuen acheñenesha'pa' o'ch huomcha'tenset pueñcha'nañot ñerra'm esempo sechopeñe'chen toño'mar allecma chopeñe'chyen allohuen acheñenesha'.

44 'Atarr llequëñets socop, tarro'mar sapa' e'ñe attes ñerra'mrrate' apampaña ñeñt amach orrteno enot all apampareñtena arromñañ o'pono patso. Ñeñto'marña acheñenesha'pa' allach chopeñe'chyenet all ama esesha' eñotenaye o'ponopa' allo'tsa'yen arromñañat all e'ñe chorren sosya'tsañ.

45 Allempoña puesheñarr ñeñt atarr etsotenayeñ ñoñets ñeñt atet anaret judioneshacop, ñaña'pa' atet otan Jesús:

—Maestro, ñeñt atet pōten ya'ñaña çha muene' pepencaten.

46 Jesúsña'pa' atet och:

—Sapa' ñeñtes atarr etsotenayeñ ñoñets ñeñt atet anaret judioneshacop, sapa'çho'ña atarr llequëñets socop, tarro'mar sapa' atarr es sena'yeyñañ acheñenesha' ñeñt atarr echarrare' entyenet ñet, po'ñoçhpa' amach errotent e'ñe atet phueto. Sapa' ama't mamesha' ama ayenpueñaye' sentpenaneto.

47 'Llequëñtsa ñaña socop tarro'mar sa te'pa' satomaten enot ñeñt atarr cohuen senten sa all pampa'yese't ñeñt a'mta'yese't Yompor po'ñoñ ahuañ ñeñt muetsanatyese't ñeñt satañneshañ sepe't.

48 Sapa' e'ñe señoñeññañ sa'tañneshañ atto ñetpa' muetsanachete't ñeñt a'mta'yese't Yompor po'ñoñ tarraña sapa'çho'ña ñeññaña e'ñe pocte' senten samña ñeñto'mar te'pa' e'ñe sa'cohuentampananet all apampareñtenet.

49 'Ama't Yompor ahuañ, e'ñe pueñoñeñt'pa' atet ote't: “Napa' o'ch nemñe acheñeneshesho ñeñtcha' a'mtene' neñoñ ñaña ñeñt nellsensarnesha' neña'yen. Tarraña patantarrña acheñenesha'ña'pa' çha muetsanatanet, po'potantañña'pa' çha cotare'tyese't.”

50 Attoña e'ñe allempoteñ ayeçhcataretta añ pats, ora allohuen ñeñt a'mta'yese't Yompor po'ñoñ allpon ñeñt amtsanatyese'tatse't ashataretetyese't po'rras, sañapa' allempoteñ e'ñe sa'yohuarettena teme'ttsen sa ñeñtes corretsa te'.

51 E'ñe allempoteñ muetseret Abel tarremphua allempo muetseret ñaña Zacarías ñeñt'pa' alla semtser Parets po'ponro puecha'petarot allo'tsen altar allotecma sherbete't Yompor. Po'ñoçhca'ye notenes añenesha' ñeñt corretsa te' atarr ayohuarettenet.

52 'Llequëñtsa socop ñeñtescha' e'ñe etsotenayeñ ñoñets ñeñt atet anaret judioneshacop tarro'mar sapa' çha seprratampeñ acheñenesha' ñeñt alloch enteret ñeñt e'ñe po'ñoçh alloch qeshperret. Tarro'mar ama't sapa' amaca'ye senteññañaña Yompor

po'cohuenña, ellonetpa'cho'ña chocma sepatare'teñña po'potantañ ñeñt'e'nene' Yompor po'cohuenña.

⁵³ Allempoña ñetpa' e'ñe pa'tsrre'mueñoť atarr es a'pťo'tare'tyeset Jesús.

⁵⁴ Ñetpa' añ atarr e'nenet attoch otatse'tachet allochñapa' ñato' po'tatse'tateñoťetpa' attoch otteñe'cheñet.

12

Atto Jesúsapa' yečhatan pueyochresha' amach eñotatstoñeto fariseonesha' pommo'cheña

¹ Shonte' acheñenesha' ñeñt' huačhenoya Jesús, shonte' nanac patoner. Cha che'muechoset Jesúsesho atťa atťmatca'tanna'tyesoset. Jesúsña ñanompa' alla serpare'taterranerr pueyochresha', ñeñt'pa' atťet otanet:

—E'ñech señota ñato't semeñe'teña' fariseonesha' poctapña, tarraña ñeñt' poctapña penet ñetpa' ñeñt'pa' ommo'cheñtsa. Ñeñt'pa' mameťollapa' o'ch epa'hua erraparen e'ñe atťet pena ñerra'mrrate' chase' mameťollapa' o'ch e'ñe es a'chasa'hua.

² Tarro'mar yapa' yeñoteñ allohuen ñeñt' allo e'ñe a'nahua shecare'tyenet te' esempohuañenñapa' a'metamřsaretterretcha'. Ama't allohuen ñeñt' e'ñe a'nasotyenet te'pa' esempohuañenñapa' e'ñech eñotatareťetuerret.

³ Ñeñto'marña ama't erra'tsena seserrparen e'ñe a'nahua te' esempopa' señotatuercha' ora allohuen acheñenesha'. Ama't erra'tsena ñeñt' atťet seserrpare'tyen te' e'ñe a'nahua o'pono pocollo, esempopa' seserrpare'tatcha' allcha' e'ñe cohuen e'mhuerres allohuen acheñenesha' atťet ñerra'mrrate' enoť seserrpare'ten shelletoť.

Atto amach yemcha'tatsto ñeñt'cha' muetse'yechets, añcha'ña yemcha'na't Yompor (Mt. 10.28-31)

⁴ Te'pa' o'ch notas masheñeshacha', amach aña semcha'tatsto ñeñt'cha' semtse'. Tarro'mar añach muetsonaset sechets, secamquēññapa' amach errotenoť muetsonaseto.

⁵ Añcha'ña semcha'na't Yompor tarro'mar ñerra'm ña muenats e'ñe ña po'huamencotpa' o'ch a'chencatonay ye'chets, yecamquēñpa'cho'ña o'ch mueñonay coñcheñtso all parraren tso'. E'ñe po'ñočh notenes, Yomporcha'ña semcha'na'ten.

⁶⁻⁷ Elloña te'pa' napa' o'ch notas, chocmach seyemcha Yompor, po'ñočh ñapa' ñach secuamřpene'. Ama't oťetollesha'pa'cho'ña chocma cohuañpeñ. Ñehua, ama't yapa' yeñoteñ oťetollpa' ama tama sherbeno. Ama't yepomatset, amnar oťetollesha'pa' ñeñt'pa' ama tsa'teyaye, e'ñe eptallaťolla centavo tsa'tena. Tarraña ama't atteñ Yomporña ama't patřra oťetollpa' ama pueseñe. Ñeñto'marña notenes, ama't mameshapa' amach semcha'tatsto, Yomporcha'ña e'ñe seyemta. Atto atarr morrentenana oťetollesha' elloña sapa' atarr nanac morrentensa. Ñehua, ama't allpon sechetollesha' allpon soño'tsen ñapa' e'ñe eñotennas.

Atto ama a'nasotpahuo Jesucristo acheñesho'mar (Mt. 10.32-33; 12.32; 10.19-20)

⁸ Elloña napa' o'ch noterrserř, allohuen ama't erra'tsencha' ñeñt'cha' ama na'nasotenaye acheñeneshesho, napa'cho'ña Ñeñten Acheñetosetspa' amach na'nasotuerraneto namña Nomporesho allo'tsa'yen epuet po'millañoťeññaneshar.

⁹ Tarraña ñerra'm esesha' na'nasotenaya na arr patsro acheñeneshesho, napa'cho'ña na'nasoterranetcha' Nomporesho allo'tsa'yen epuet po'millañoťeññaneshar.

¹⁰ Ñerra'm esesha' nesasene' na Ñeñten Acheñetosets ñeñt'pa' a'pretna'po' nenteñ. Tarraña ñerra'm esesha' añ achmāare'tenet Parets Puecamquēñ ñeñt'ñapa' ama a'pretna'pahuoye' nenteñe.

11 Ñaña o'ch noterrser, ñerra'm esempoch anmaset judionesha' po'prahuo allcha' a'metare'tam̄psaset am̄cha'taretesho, sañapa' amach cha sellca'psatsto, amach cha sota'psa'tatsto: Errotuachca'ye notoste' attoch cohuen nanapos, esuachca'ye notte'.

12 Sapa' añcha'ña se'ñoratose' Parets Puecamquëñ e'ñe allempo a'p̄to'tare'tenset all.

Ñeñt e'ñe añña muenen o'ch esocmañen echyes, ñeñt'pa' atarr yoro'cheno'tsen

13 All che'muechen shonte' acheñenesha' Jesúsesho, puesheñarrñapa' atet otan Jesús:
—Maestro, te'pa' o'ch p̄oton nemo'nasheñ nepo'nar apuerrnepa'ñaca'yeña ñaña ñeñt allpon o'patatnomna nomporeñ.

14 Tarraña Jesúsñapa' atet och:

—Masheñcha' napa' ama eseshaye' nenaye ñeñt'fench'a' a'p̄octatene' ñoñets attoch soten o'ch napa'yesas allpon o'patatyenset.

15 Alla oterraneterr Jesús:

—E'ñech seño'ta sañeña, ama't seyo'chrpa' amach es seye'chapretanna'tatsto ama't e'ñe coñe'ta tarro'mar atto yocrrena arr cohuen añe patsropa' ñeñt'pa' ama añecpayaye alloch esocmañen es yechyerr ñeñt'cha' atarr yocshaterre' tsapa'onef.

16 Ñeñt'pa' atet otanet toma'nteñtso:

—Eñall puesheñarr acheñ atarr nanac eçllayoref. Allña po'patsñopa' shonte' nanac aton a'yechcaten.

17 Ñeñt'ña eçllayoref'pa' atet co'tape'chen pueyo'chrpa' atet oten: “Errotuachca'ye ne'pa'ña, ñeñt atarr nanac aton ne'totaten amaca'ye eñalleña allcha' e'ñe nañño'tue.”

18 Allempo atet co'tape'chenpa' alla oterrrer: “Te'pa' o'ca' neñoch atet'cha'ca'ye ne'pa. O'chca'ye na'materrña pocollashe'm allecma nañño'te't coñe'ta'tets te'ñapa' o'ch alla na'tomaterr atarrpo' allcha' e'ñe nañño'tua allohuen ñeñt allpon ne'totaten ama't ñaña allohuen ñeñt allpon pa'namen esocmañen nechyen.

19 Allempoñapa' atet'cha' not neyo'chro: Napa' ama es nepallteno ama't e'ñe mamesha. Ñeñt allpon shonte' o' nañño'tuapa' atarrcha' atomat char amach es nepallterre'te. Te'pa' o'ch names e'ñe p̄octacma. Nellapene'tcha' rrats, nellapene'tcha' orrare'tats; ñeñt'cha'ña e'ñe nocshatene'ña na.”

20 Tarraña ñeñt acheñerpa' Yomporpa' atet och: “Papa' atarr otatsña'ef, ama es peñoteno ama't mamesha. Te'pa' añe tsaprocmach o'ch perromuen. Ñeñt'ña shonte' o' pañño'tuapa' te'ñapa' esesha'huachñaca'ye o'paterraya.”

21 Ñeñto'mar yeñoteñ, ñeñt añño'tene' shonte' esocmañen ñeñt e'ñe ñocpa, ñeñt'ña acheñer atet'pa' ama echenanoña ñeñt sherbets Yomporecop.

Atto Yomporpa' ñach e'ñe cohuen cohuan̄ipene' ñeñt puechemerasha' pen (Mt. 6.25-34)

22 Allempoña Jesúsapa' alla oterranerr pueyo'chresha':

—Ñeñto'marña te'pa' o'ch noterrser, amach añña sellcatsto ñeñt atto yey'chena arr patsro. Ama't seyo'chra amach sotatsto, esuachca'ye yerrerrerrte' tsapa'onef. Ñaña amach añña sellcatsto ñeñt e'ñe sechtsocpa, amach sotatsto, esuachca'ye yechorra'te'.

23 Tarro'mar Yomporpa' ña yapuene' yo'rrerrña allo yocrrena ñeñt'ña atarr nanac sherbets. Ñeñto'marña yeñoteñ ña yapuene' ñaña yerrar, ñeñt'ña ñocoppa' ama esoye' enteñe. Ñaña ña yechcatene' yechets ñeñt atarr sherbets. Ñeñto'marña yeñoteñ ña yapuene' ñaña ama't ñeñt yechorra'yena, ñeñt'ña ñocop ama esoye' enteñe.

24 Sentente' atto correna pa'namen oñesha'chno. Ñetpa' ama çhoye' nare'tatse'teneto ñaña ama çhoye' ap'cha'yeneto puerrar ñeñt'cha' rra'yenet. Ñetpa' ama es echenaye allcha' es añño'tyenet. Ama't atto correnetpa' Yomporña e'ñe yechcatyesuanet ñeñt'cha' puerrar pa'yenet. Elloña sa Yomporpa' atarr morrentensa sa; ello sem̄taneñ ñeñt atto atarr morrentenana oñesha'chno.

²⁵ Ñaña amach sellcatsto attoch amach serromo, tarro'mar ama't sellquënañ attoch atarr atomat socrra arr patsro tarraña ama't e'ñe puesheñarrotesapa' amate' errotenoñ so'chtatoña socreña ama't e'ñe pamtarra.

²⁶ Ñehua, atto ama't e'ñe sellquëñoña sa ama erroñ es sepeno, ñeñtepñapa' amach pa'namena es sellca'yesatsto tarro'mar ñeñtpa' e'ñech orrena es sellca'yena.

²⁷ Ñaña sentente' atet yeçquëna roreçhno. Ñetpa' ama çhoye' taruasa'yeneto ama't mamesha, ama çhoye' taneneto ñeñt chorra'yenet atto e'ñe cohuen orretyenet. Tarraña napa' o'ch notas, ama't añcha'tareñ Salomón atto e'ñe a'cohuentate't ahuat, ama't ñapa' ama chorrane'teña ñeñt atarr cohuen ñeñt atet atarr cohuentena ror.

²⁸ Ñeñt ror pue'chorpa' ñeñtara ta'te' ñeñt chepyets allemeñ ñeñt sentyen te' tarraña ñeñtpa' mamecpa. Ama't cohuen chepyeneñ te'pa' tsapañoneñapa' o'ch etomanperetpa' e'ñech colla'huerra o'huañcha' cohuenta. Ñehua, Yompor atto cohuentatyenan ama't ñeñt e'ñe mamecpa, elloña sapa' atarr chorratyensañ saña; sañapa' eso'marte'ña amaña e'ñeye' seyemteño.

²⁹ Amach e'ñe patrira se'nenno ñeñt atto serren ñaña ñeñt atto es sorryen. Amach ñeññaña e'ñe paterr sellca'yesatsto.

³⁰ Tarro'mar allohuen acheñenesha' arr patsro ñeñt ama ame'ña'yetso, ñetpa' ñeññaña e'ñe paterr e'nenet. Ñehua, Somporña ñeñt pue'ntaño'tsen ñapa' e'ñe entuenes ñeñt allpon pa'namen sepallta'yena arr patsro.

³¹ Sapa' añcha'ña e'ñe ñanom sema'yoçhrena Yomporecop attoch atarr ayochreshatterra ña allochñapa' ñachña sapa'yene' ñeñt allpon sepallta'yena saña.

Atto ñeñtcha' seshonterr ñeñt atarr sherbets arrcha'ca'ye seshonteñ all Yompor pue'ntaño

(Mt. 6.19-21)

³² 'Amach neyochreneshaçhnocha' es sellcatsto ama't ama atarr shonteyayso, Yomporña atarr cohuen secuanpene' atet ñerra'mrrate' e'ñe po'carrneror penes. E'ñe pocsheñesho'pa' apascha' attoch e'ñe cohuen socshapreterrñaña po'cohuenña attoch atarr ayochreshatterra.

³³ Te'pa' o'ch sepomyen ñeñt allpon sechyen allochñapa' o'ch sapa'yese ñaña ñeñt atarr es pallta'yetsa. Ñerra'm atet sepena allo'nach atarr aton seshonta'nen ñeñt e'ñe po'ñoçh atarr sherbets Yomporecop. Ñeñtpa' ama atteyaye ñerra'mrrate' ñeñt seçllayepo'rer sepen arr patsro, ñeñtpa' atarr añllasha'tña. Tarraña ñeñt seshonta'nen ñeñt atarr sherbets ñeñt ama ahuañaño, ñeñtpa' arr seshonteñ Yompor pue'ntaño. Allña ama't eñetapa' amach çheno o'ch etatsre'tas ñaña ama't pom'papa' amach eñalle ñeñtcha' rrrere' ñeñt seshonten all.

³⁴ Tarro'mar ñerra'm all pue'ntaño seshonta'nen ñeñt atarr cohuen senten, yeñoteñ e'ñe ñeñña paterr senen seyoçhro ñeñtña atarr sherbets Yomporecop. Tarraña arr patsro ñerra'm aña seshonta'nen ñeñt atarr semorrentena, yeñoteñ e'ñe ñeñña paterr senen seyoçhro ñeñtña' ama es sherbenoña Yomporecop.

Atto çhocmach yeñose'rteña Yepartseshar Cristo esempoch huerra

³⁵⁻³⁶ Te'pa' o'ch notas po'poñ: Chocmuepa'ch señosere'tna esempohuañenpa' o'ch alla nohuerra. Ñato' o'ch netma'ntatasa atet ñerra'mrrate' puesheñarr yacma ñeñt atarr ayochreshat. Ñapa' ahuo' allcha' rrallme'chapretenana' pacma ñeñt sena'tetsa. Pueyochresha'ñapa' alla cohuet pa'paclo esempoch huerra. Allempoña ñetpa' a'huortatyaset po'lampareñ allochñapa' attoch ñerra'm esempoch huerra ñeñt pamo'mte' penet ñerra'm o'ch çhore'tuenanetpa' ñetña'pa' allorocmach toram'psapueñet attoch sher'apueñet.

³⁷ Atarr cosheñtso'tsa'yen pueyochresha' ñerra'm esempoch huerret pamo'mte' allña'pa' entuenanet çho atarr eñose'rteñet. Po'ñoçhpa' napa' o'ch notas, ñachca'yeña

sherba'huene'ña ñeñt̃ pueyochresha' pen ña. O'ch chana'huenta ña'ñapa' o'ch anorrcha'tatuenanet allcha' rrallme'chatuenanet.

³⁸ Ñeñt̃pa' atetcha' perranet ama't rroch tsapopa' o'ch huenanet amapa' o'ch puetarenmochpa' o'ch huenanet. Ñeñt̃o'marña notenes, ñerra'm alla entuenanet cho atarr eñose'rteñet, ñeñt̃ña atarr eñose'retyenayapa' atarrcha' cosheñtso'tsa'yenet.

³⁹ E'ñech machayota nohuerra atet pena eñeñ allempo atta es sepcha'yena machayotach huaponasa o'ch yoratsre'tensa'. Tarraña sa ñeñtes apacllates ñerra'm señoñeñ e'ñech esempo huaponasa eñeñ amach cha semanrra'teno attoch amach semnacheña o'ch toram̃psas sepaclo o'ch be'tosam̃psasa o'ch yoruennasa' ñeñt̃ allpon semorrentyena.

⁴⁰ Ñeñt̃o'mar notenes, sapa'cho'ña chocmuepa'chña señoñe'rtena tarro'mar ñerra'm allempo atta es sepcha'yenapa' allempochña nohuerra na Ñeñten Acheñetosets.

Atetcha' apareterra ataruasañ ñeñt̃ e'ñe cohuen etsotene' atet yecheña pamo'mte' ñaña atetcha' apareterra po'poñ ataruasañ ñeñt̃ ama etsotaye ñeñt̃ atet yecheña pamo'mte' (Mt. 24.45-51)

⁴¹ Allempoña Pedropa' atet a'pto'ch:

—Parteshacha' ñeñt̃ atet petma'ntatena te' ñeñt̃pa' ¿eseshacpa'tña, ñato' yocpate' ñeñt̃ey peyochreshay pepeney amapa' ñato' allohuenacpa'nate'?

⁴² Partesha'ñapa' alla toma'ntaterraneterr po'poñonẽt, atet oterraneterr:

—Allohuenespa' atetcha' sepa e'ñe cohuen atet ñerra'mrrate' puesheñarr yacma ñeñt̃ yechena ñeñt̃ pamo'mte' pen all pa'paclo. Ñeñt̃cha' po'taruas pene' chocmach apa'yesan allohuen po'potantañ pamo'mte' pa'taruasañer puerraret allpon ñeñt̃ poctetsa puesheña'ttsoch. Ñapa' attecnoch mach pena chocmach apuenanet ñerra'm esempoch cherrerr allempo atet anaret ñocop o'ch alla apa'yerraneterr po'pocheño. Ñapa' chocmach atet pena amach cachpuere tarro'mar ñapa' eñoteñ attoch e'ñe coshatenan pamo'mte'.

⁴³ Ñeñt̃ña ataruasañpa' atarrcha' coshatueñ pamo'mte'; ñerra'm esempoch huer-rapa' alla entuenan pa'taruasañer ama cho cachpuenano ñeñt̃ po'taruas apa'neñ ahuañmo'choñeñ.

⁴⁴ Po'ñoch o'ch notas, atarrcha' coshatueñ. Añcha' coshaterre' o'ch nohuer pamo'mte' añcha'taret ñeñt̃cha' cohuañpsaprete' ñeñt̃ allpon echyen pamo'mte'.

⁴⁵ Tarraña ñeñt̃ ataruasañer allempo ama huerra' pamo'mte' ñerra'm ñapa' atta oten pueyochro, namo'mte'pa' amach ahuen huerro, allempoña ñapa' chach ashtapechyenan ataruasañechno ñeñt̃cha' rratañ ama't ñaña coyaneshohuen. Ñaña'pa' attach allemeñ rrapretyen ñaña attach orrare'tapretyen allcha' atarr posa'tare'tyen.

⁴⁶ Ñeñt̃ña ataruasañer ñerra'm ñapa' attach ottatse'tyena amach es puecha'yeno amach eñoteñe ñeñte yetaroch huerra pamo'mte' ama't erro'tsencha' yetro huena. Machayotachña huerra pamo'mte'pa' atarrcha' coñchatuer, allach mueñuer all ñeñt̃ o'patenaya allohuen ñeñt̃ ama es otapotetso ama't mamesha.

⁴⁷ 'Elloña napa' o'ch notas, ama't erra'tsena ataruasañer ñerra'm eñotenan ñeñt̃ atet muenen pamo'mte' tarraña ñerra'm ama cohuen ame'ñenano pamo'mte' ñerra'm ama e'ñe cohuenaye' es pa'yeno attoch e'ñe cohuen aguerran pamo'mte' esempoch huerra, ama't erra'tsena ataruasañerpa' ñeñt̃ atet petsapa' atarrcha' ashtaretterret.

⁴⁸ Tarraña erra'tsencha' ataruasañer ñeñt̃ ama eñotano ñeñt̃ atet muenen pamo'mte' ama't ñetpa'cho'ña aña atet pa'yenet ñeñt̃ ama cohuenayaye ama't e'ñe poctet̃ attecnoch ashtaretterretañ ñamet, tarraña ñetpa' mamesha'ttsach ashtapecharetetyerret tarro'mar ñetpa' ama eñoteneto ñeñt̃ atet muenen pamo'mte'. Allohueney erra'tsenotey ñeñt̃ey atarr aparetey attoch atarr yeñoterrñañ ñeñt̃ atarr sherbets Yomporecop,

ñeñteycha'ña atarrcha' cohueney Yompor o'ch e'ñe yesherbatuon shonte' allohuen ñeñt atarr eñotateney. Ñaña allohueney erra'tsenotey ñeñtey atarr yemtenya Yompor elloña allempopa' atarrcha' cohueney o'ch allo'na e'ñe cohuen yesherba'neñ.

Atto Jesús pa' orrtatosan e'ñe ño'mar elloptanna'teñets
(Mt. 10.34-36)

⁴⁹ "Te'pa' o'ch neñotaterrser po'poñ. Napa' atto nohuena arr patsro o'ch norrtatos elloptanna'teñets ñeñt atarr huomenc atet ñerra'm tso' atarr atserrtetsa. Pocte' nenteñ o'ch orrtet e'ñe tayecma.

⁵⁰ Ñaña nocoppa' e'ñe atet anareñ na'muerochtataretterrach e'ñe atarr huomenc atet ñerra'mrrate' cho chorratenet ñeñtcha' atarr nemuerochtaterre'. Ñeñto'mar napa' ñeñtña atarr nellcatene' te' atta atarr na'huanteñ esempoch e'ñech etsotuerra.

⁵¹ Sapa' chate' sotenapañ añecopte' nohuapa o'ch e'ñe cohuen namo'tstanna'tatera acheñenesha' arr patsro. Ñeñtpa' ama atteyaye. Añecpa'ña nohuapa allochñapa' e'ñe no'marpa' acheñenesha'ñapa' o'ch atta elloptanna'tyeset.

⁵² Ñehua, ñeñt noten te' e'ñe tayoteñ ñato' all yeçhena amnarsheña puepahuarro pocollopa' ñato' ñetpa' o'ch ellopa'tetstatet pocta'ña. Ñato' allo'tsen ma'psheña ñeñtcha' name'ñerraya, ñato' epsheñañapa' amach mueno o'ch ame'ñerrnet. Amapa' ñato' epsheñach allo'tsen ñeñtcha' name'ñerraya, ma'psheñañapa' amach mueno o'ch ame'ñerrnet.

⁵³ Ñato' e'ñe no'marpa' o'ch ellopa'tetstatenet pocta'ña. Ñato' pompor o'ch epatare'tenan puechemer, amapa' ñato' puechemerñapa' o'ch epatare'tenan ñaña pompor, ñaña ñato' pachorpa' o'ch epatare'tenan puechoyor amapa' puechoyor o'ch epatare'tenan pachor, ñaña ñato' pa'so'mue o'ch epatare'tenan pa'to'ñen amapa' ñato' pa'to'ñenñapa' o'ch epatare'tenan pa'so'mue.

Atto Jesús pa' orrtatosan ñeñtcha' eñotatahuet o' chapamet Yompor po'cohuenña
(Mt. 16.1-4; Mr. 8.11-13)

⁵⁴ Allempoña Jesús pa' atet yerpatana acheñenesha' ñeñt atet otyenet ñet pa'nyeto:
—Sapa' ñerra'm esempo senten arr chorren os all emuena atsne', sañapa' chocmach atet sotyen: "Te'pa' chach huatena." Atetcha'cho' pa, o'chcho' huatena.

⁵⁵ Ñaña ñerra'm esempo senten huena mōrr topo'ot, ñeñtpa'cho'ña atetcha' sotyen: "Te'pa' o' charenmoch." Atetcha'cho' pa, o'chcho' huorater huomenc.

⁵⁶ Sapa' atarr señoteneña ñeñt sentyen ento ñeñtña señotatene'; ama't ñaña ñeñt atet sentyen ñaña arr patsro ñeñtpa' e'ñe señotueñeñ. Tarraña ñeñt atet norrtatyennas nepartsoteña, eso'marte'ña ñeñtñapa' amaña eñotatensoña ñeñt atet pennas Yompor te' o'ch orrtatonas po'cohuenña. Ñeñtpa' attate' seshquēñ.

Atto eñotatanet choyach amo'tsterraya e'ñe mamecma ñeñt ye'moñe'tene'
(Mt. 5.25-26)

⁵⁷ 'Elloña e'ñe so'ta seño'tepa'chña ñeñt pocte' enten Yompor socop ñeñtcha' atet sepannena.

⁵⁸ Ñato' o'ch netma'ntatasa atet ñerra'mrrate' esesha' setmantene' ñeñtcha' sanmue' amcha'taretesho allcha' sa'poctaterr señoñ. Añ poc'tetsa allempo ama seçhena' amcha'taretesho o'ch poch ñeñt petmantene': "O'ch ya'poctaterr yeñoñ e'ñe cohuen tayecma tayepa'tña ama yeçhena' amcha'taretesho." Tarro'mar ñeñt petmantene' ñerra'm o'ch chapata' amcha'taretesho, amcha'tareñapa' chate' poma' policeyaneshesho, ñetñapa' chate' abe'tapet cárcelo allcha' muerochtaterret.

⁵⁹ O'ch notas, ñerra'm choch yottam'psasetpa' allasach o'pono, allotñapa' amach ahuen cha'nmaterrseto. Esemphuañencha' choch secha'nmaterret ñerra'm allempoch e'ñe setsa'tuerra ora allohuen ñeñt allpon quelle muenenet. Ama't e'ñe eptalla centavo'tollña

ñerra'm ama setsa'tueña' amachca'ye čha'nmaterrseto allot. Ñeñto'marña notenes o'ch e'ñe cohuen samo'tstera ñeñt se'moñe'tene' tayepa'tña'pa' ama čhennasa' ñeñt atarr yoročhen senten socop.

13

Añ poctetsa yocop o'ch yoctape'cherr ello cohuen Yomporecop

¹ Allempo huapa puesheña'tets acheñenesha' Jesúsesho, ñetña'pa' serrpare'tatoset Jesús atet entenet ñet; ñeñtpa' atet otoset:

—Allpónsheña ñeñt galileo'marnesha' allo'tsa'yenet allecma muetsatenet berr ñeñt Yomporecop. Allempoña'pa' huapanet ñeñt mueñen añcha'taret Pilato ñetña'pa' čha muetsanatosanet e'ñe all allempo muetsatenet berr ñeñt Yomporecop. Attoña ñetpa' allña atsetatse'tatarettet ñet po'rras epuet pueberreret po'rras.

² Jesúsña'pa' atet otanet:

—Sapa' čhate' sotenapañ ñeñt galileo'marnesha' allempo atet ařaretet ñato' ñetpa' atarrte' nanac ochña'tet ellote' metana'tueñet allohuen po'potantañ galileo'marnesha' po'chñaret. Chate' sotenapañ ñeñto'marte'ña atet ařaretet ñeñt atarr sosey apencočhen.

³ Tarraña napa' o'ch notas: Ama't allohuenes saña ñerra'm amach e'ñe cohuen soctape'cherro ello Yomporecop, sapa'čo'ña attecnoch seperra sechenca'huerrach e'ñe poctacma.

⁴ Ñaña ñeñt čharra' ñeñt puechetsa posocsheña ñeñt colla'huatsa ahuaña ñeñt a'tpsete't pocoll torrepo' allempo mata'nerr Jerusaléño e'ñe all oteñet Siloé. Ñehua, sapa' čhate' sotenapañ ñeñt a'cllaterr torrepa' ñetpa' atarrte' atparña'tet ellote' metana'tueñet allohuen po'potantañ ñeñt atto atpare'tena jerusaléño'marnesha'.

⁵ Tarraña napa' o'ch notas: Ama't allohuenes saña ñerra'm amach e'ñe cohuen soctape'cherro ello Yomporecop, sapa'čo'ña attecnoch seperra sechenca'huerrach e'ñe poctacma.

Arrpa' all toma'ntatanet Jesús atet pena partech ñeñt ama me'tetso

⁶ Allempoña Jesúsapa' alla toma'ntaterraneterr po'pocheño, ñeñtpa' atet oterraneterr:

—Puesheñarr acheñ all puenareñmopa' allña'pa' ahuañmo'choteñ nare'tatenan ñaña puecharr partech.* Atteña'pa' chap allempo huapa e'nosñañ pue'mer. Tarraña ama't pueñarrapa' ama entosñañe pue'mer. Partayechpa' ama me'teno.

⁷ Allempoña'pa' atet otan ñeñt cohuañpene' puenareñma': “Te'pa' o' met ma'pa char čhocma nohuena e'nene' partech pue'mer. Teme'ttsen ama't pueñarra pue'merpa' ama nenteññañe. Te'pa' o'ch pa'mater farro'mar e'ñe orrena quečhcare'tennay yepatseñ atto ama yenare'teno po'poñ narmets all.”

⁸ Tarraña ñeñt cohuañpene' narmetspa' atet otan pamo'mte': “Allach nomporcha' añ char ñeñt o' huerrerrpa' napa' o'ch na'mueñtsetañpes pats o'ch nenoñ amar.

⁹ Ñato'rraña atet nepe'pa' o'ch cohuen me't tsapa't charo. Tarraña ñerra'm ama me'topa' pocte'ñačo' allempopa' o'ch pa'matater.”

Atto Jesúsapa' a'crraterran coyanesha' ñeñt atta mo'quetsa ama't añe yetro allempocma amesenet

¹⁰ Allempo čhapa'muenerr allempo amesenet, Jesúsña'pa' yečhatenanet judionesha' po'prahueto.

¹¹ Allña'pa' allo'tsen puesheñarr coyanesha' ñeñt čha mo'quena, ama eshcaye' pačharrenteno. Ñeñtpa' oneñet atet patene'. Ahuañoteñ atta pena o' čharren char puechena posoc atta mo'quena.

* 13:6 Ñehua, Jesús añ toma'ntatanet higo ñeñt puenareñ penet all pa'nyo.

12 Jesúsñapa' all eñchpa' o' chore'tospa' atet och:

—Nocha te'pa' pasaterreṽcha' ñeñt atto atarr pemueroçhtena.

13 Allempoñapa' a'ṽllamco'ch. A'ṽllamco'tue'pa' allorocma e'ñe cohuen paçharrterra. Ñaña'pa' atarr aye'choçhtaterran Yompor.

14 Allempoña ñeñt añcha'tarettetsa all judionesha' po'prahuo, ñapa' allempo entan atet o' a'crratan Jesús atsnañet, ñaña'pa' ñeñta atarr atsrre'mate'. Ama't mameshapa' ama pocteye' eñche o'ch a'crratan acheñ ñeñte yetro allempo amesenet. Ñeñto'marña ñapa' atet otan acheñenesha':

—Eñall pechapmat yet allempo pocte' o'ch yetaruasen. Ñeñtpa' pocte' o'ch sehuapa allempo attoch sa'crrater atsnañet. Tarraña añ yetro allempo yamesen amach sehuap-atsto a'crrate' atsnañet.

15 Partsesha'ñapa' atet och:

—Sapa' ñeñtes e'ñe sommo'cheñoṽpa' atarr seshcare'ten. Sapa'cho'ña ama't añe yetro allempocma yamesen çhocma setaruasen samña. Sepyañpeñ sehuacsher, sashanor allecma serrateñ o'ch sanemñ ñaña oño allcha' sonayeñ oñ.

16 Añ coyanesha' ama't ñeñt po'mreneñ pen yatañ Abraham ama't çharra' puechena posoc char ñeñt allponmat o' huanquër oneñet, pocte'ca'ye o'ch ya'rroyatater ama't añe yetro allempo yamesen.

17 Acheñenesha' allohuen ñeñt e'moñe'tene' ñetpa' ñeñtña atarr pencatahuet. Po'potantañña acheñeneshaçhnopa' ñetñapa' atarr nanac coshenet. Atarr nanac cohuen entenet ñeñt atet ṽa Jesús.

*Atto Jesús'pa' toma'ntaterranet atet pena pue'llomer ñeñt otenet mostazllomñ
(Mt. 13.31-32; Mr. 4.30-32)*

18 Ñeñto'marña allempopa' alla oterraneterr:

—Añ Yompor po'cohuenña ñeñt atto ayochreshattena ña, ñanompa' e'ñech pueשה'ntsa ame'ña'yetsa, allempoteñña'pa' allo'nach sen atonetnomtsa ñeñtcha' ame'ñerrtsa attochña e'ñe epa'huerra erracmañen Yompor po'cohuenña. Ñeñtña te'pa' o'ch netma'ntatasa ñeñt atet pena ña.

19 Ñehua, ñeñtpa' atet pena ñerra'mrrate' pue'llomer ñeñt atarr añetolleshallmerr ñeñt otenet mostazllomñ. Ñeñt pue'llomñretollpa' pueשה'ñarrña'pa' o' anemñ pa'mro allcha' nare'teña'. E'ñe allponmatatsapa' o' chop, ñeñtña'pa' allo'na sen rrorranmats e'ñe cohuen atarrchetnom. Ñeñtña narmetsocherpa' o'ch huacha'toña oteçhno ñeñtcha' ama'tanatyesosets puetacro'mar.

*Atto Jesús'pa' toma'ntaterranet ñeñt atet pena chase'
(Mt. 13.33)*

20 Elloña alla oterraneterr:

—Po'poñonet o'ch netma'ntatasa ñeñt atet pena Yompor po'cohuenña ñeñt atto atarr ayochreshattena ña. Ñeñtpa' ama'tcha' añetolla ñeñtcha' ñanom orrtatsa tarraña e'ñe ña po'huamencoṽpa' mametollapa' o'ch e'ñe epa'hua ora erraṽaren.

21 Ñeñtpa' añ toma'ntaterraneterr atet pena chase':

—Ñeñt chase'pa' allo tsetenan coyanesha' harina' ñeñt oñetsetstaten attoch a'chasatan harina' esheccha' e'ñe a'muesatue. Ñeñtña chase'pa' ama'tcha' añetolla net, ama'tcha' aton harina' ñeñt ma'pa arroga, mametollapa' o'ch e'ñe a'muesatuanña ama't atarr aton harina'.

*Atto Jesús'pa' toma'ntaterraneterr ñerra'mrrate' yetarroṽollo yebe'ten esheccha' yeçhap
Yomporesho
(Mt. 7.13-14, 21-23)*

²² All oñemyen Jesús e'ñe ora asuahuanom allohuen anetso'mar all shonta'yena acheñenesha' ama't ñaña all ama tama eñalleyaye acheñenesha'. Allña e'ñe ser-
rpare'tatyesnomanet. Allempo oñemyen allemeñ anetso'mar ñapa' arr sen Jerusaléño
all sechena.

²³ All oñen toñopa' allempoña pueheñarrpa' a'p'to'tnom, atet och:

—Ayochreshate, ñeñtcha' allpon a'qeshpataretterrtsapa' ta'm ñetpa'
¿pueheña'ttsetate' ñato' amapa' atarrcha' shonte'?

Jesúsñapa' atet och:

²⁴ —Sapa' añcha'ña e'ñe cohuen sema'yochrena ñeñt cohuen enten Yompor attochña
sesuanom ñeñt ama cohuenaye' enteno ña. Ñeñtpa' o'ch netma'ntacha atet ñerra'mrrate'
allcha' yebe'tos esheccha' yechap ñesho ñeñtpa' atarr añetoll, atarr torrapo' o'ch yebe'tos
all. Ñaña o'ch notas esempohuañen ama'tcha' shonte' acheñenesha' ñeñtcha' atarr
muenatseñ o'ch be'terretañ all attoch cherretañ Yomporesho tarraña allempopa' amach
eshec be'terreto attoch cherret all tarro'mar allempopa' o'ch huañerr atto atarr co-
hueney Yompor.

²⁵ Ñeñtpa' o'ch netma'ntacha atet ñerra'mrrate' esempo o'ch chen ñeñt apaclatesha'
ñañapa' o'ch tantuena o'ch e'ñe echarr yottanpesuena. Allempopa' ama't e'ñe ese-
shapa' amach eshec be'tosoña all. Allempoña ama'tcha' shonteseñ o'ch sehua'cha'ta
all petotach sechorros allotcha' sechore'tos apaclatesha'. Allña sapa' atetcha' sotos:
“Ayochreshate petorampsapuey.” Ñapa' atetcha' otapas: “Napa' ama nentarlo, errofte'
sehuenaña sa.”

²⁶ Sañapa' atetcha' sotererr: “Ama't parrocmayerrallme'chyese'teña ahuañmo'cha
ñaña ama't ya ya'netsro'mar allecma chopeñe'chyenet allca'yeña peychatyese't.”

²⁷ Tarraña ñapa' atetcha' oterrserr: “Te'pa' o'ch notas, napa' amaca'ye po'ño'ch
nentarlo, errofte' sehuenaña sa. Te'pa' orrerres arro't neshot allohuenes ñeñtes
ma'yochrenaya ñeñt ama pocte' enteno Yompor.”

²⁸ O'ch ahues all ñeñt o'patatenset sa. Allñapa' allcha' seyahuanrrortosa, sanmueño't
atserrpa' serraso'tyesoscha' sas. Allotcha'ña sentosña satañnesha'chno—Abraham ñaña
Isaac ñaña Jacob ñaña allohuen ñeñt a'mta'yese't Yompor po'ño'ñ. Ñetñapa' e'ñe
Yomporesho'tsa'yenet all am'cha'tarettena ña. Sañapa' cha'petotaña huapore'tenset.

²⁹ Allñapa' allemateñcha' hua'cha'ta shonte' ñeñt ama judioneshayaye ñeñtcha'
anorr'cha'tyesosets all e'ñe Yomporesho all am'cha'tarettena ña allcha' rrallme'choset all
e'ñe cohuentena Yompor.

³⁰ Te'pa' seño'chcha' eñall acheñenesha' ñeñt ama asherbenaye' senteno sa te' tarraña
allempoña ñetpa' atarrcha' asherben enterranet Yompor. Ñaña eñall acheñenesha'
ñeñt atarr asherben sentyen sa te', tarraña allempoña ñetpa' amach asherbenaye'
enterraneto Yompor.

*Atto Jesús pa' puellquëño'tan jerusaléño'marnesha' atarr ya'na'tenanet
(Mt. 23.37-39)*

³¹ E'ñe ñeñte yetrocma allempo hua'cha'toña patantarr fariseonesha'. Ñetñapa' atet
otoset Jesús:

—Te'pa' o'ch peyeta arro't tarro'mar am'cha'taret Herodespa' o'patenpa' ahuo'ch muet-
satap.

³² Jesúsñapa' atet otapanet:

—O'ch ahuerrespa' atetcha' sotuer Herodes ñeñt atarr eñotene' shequëñets: “Te'pa'
o'ch peño'ch, napa' atterach necachpatateññañ acheñenesha' po'neñeter ñaña atterach
shonte' na'crratyes ñeñt atsna'tyets. Atet nepena te', tsapa'onetpa'cho'ña attecma'ch
nepena, o'chña tsapa'onterrerrpa' o'ch e'ñe netsotatue allohuen.”

³³ Nocoppa' añ poctetsa chocmach nesen ama't te', ama't tsapaonetpa'cho'ña, ama't ñaña o'ch tsapaonterrerra' chocmach nesen. Attofach necherr Jerusaléño, tarro'mar allpa' allecma chocma muetsayesete't ñeñt a'mta'yesaye't Yompor po'ñoñ.

³⁴ Allempoña Jesús e'ñe puellquëño't judionesha'pa' atet eñorena ñocpuet, ñeñto'marña atet otanet:

—Sa jerusaléño'marneshacha' ñeñtes muetsanatyeyaye't ñeñt a'mta'yesaye't Yompor po'ñoñ, sa ñeñtes rrollapechyesaye't ñeñt amñare't sesho. Atarr atonoche'tats nemneñeñ o'ch na'yapa'cha'huerrsoñ allohuenes nesho attoch e'ñe cohuen necuanpensoñ. Nemneñeñ o'ch na'yapa'cha'huerres atet ñerra'mrrate' atollop a'yapa'chene' puechyoresha' o'ch e'ñe seto'tuanet. Tarraña sañapa' ama't e'ñe mameshapa' amaña semno.

³⁵ Te'ñapa' all seyçhena sa, Yomporñapa' o'ch a'ypo'ñerres. Tarro'mar te'pa' o'ch alla noterrser: Na po'pocheño'pa' amach alla senterrno te'. Esemphuañenñapa' senterrencha' allempoñapa' atetcha' soterren: “Aye'chochtatpahuëpa'ch Jesucristo ñeñt huapatsa ñeñt llesensen Yeyomporer.”

14

Atto Jesús'pa' a'crraterran puesheñarr yacma ñeñt cha ananen

¹ Allempoña çherrerr pamfarr allempo amesenet. Jesúsñapa' ahuo' allcha' rrallme'chapretenana' puesheñarr fariseo ñeñt atarr amcha'tarettetsa. Chap all pa'paclopa' po'potantaña fariseonesha' ñetñapa' atarr cohua'nyesapet Jesús.

² Allña'pa' allo'tsen puesheñarr yacma ñeñt cha ananen.

³ Jesúsñapa' all serrpare'tos epuet fariseonesha' ñaña ñeñt allo'tsa'yen ñeñt atarr et-sotene' ñoñets ñeñt atet anaret judioneshacop. Ñaña'pa' atta a'pto'tosanet e'ñe po'tomña, allochña'pa' o'ch eñoch ñato' errotencha' anapet. Ñeñt'pa' atet otosanet:

—¿Errotena'tña sotenna sa, ta'm pocte'te' o'ch na'crratos atsnañe't aña yetro allempo yamesen? ¿Atte't otenña ñoñets ñeñt atet anaret, ñato' amate'?

⁴ Fariseonesha'ñapa' ama eseshaye' anapuetso ama't puesheñarroña. Allempoña Jesús'pa' a'p'llamco'tosan atsnañe't. E'ñe a'p'llamco'tue'pa' cha corrrrtsa allenta mueñer pa'paclo.

⁵ Allempoña Jesús'pa' alla oterranerr fariseonesha':

—Sapa' ñerra'm sashanor amapa' sehuacsher shora'nets arroro'to all chorren oñ, ama'tcha'ña sechtereña allot e'ñe allorocma ama't aña yetro allempocma yamesen.

⁶ Ñetñapa' ama errotenaye' otenaye' enteñeto ama't e'ñe puesheñarroña.

Atto ahua'ñarettet o'ch rrallme'chapreteña' ñeñt sena'tetsa

⁷ Allempoña ñeñt ahua'ñareñnesha' ñetñapa' aña atarr muenenet o'ch anorryesoset allecma anen ñeñt atarr amcha'na'tpo' entyenet. Jesúsñapa' entapanet ñeñt atet muenenet ñet o'ch cha ommo'chyesoset. Allempoñapa' atet otapanet:

⁸ —Ñerra'm esempo ahua'ñaretes o'ch serrallme'chapreteña' ñeñt sena'tetsa, sommo'cheño'tpa' amach arra sanorratsetyesoso allecma anen ñeñt atarr amcha'na'tpo' entyenet. Ñetña chenta'pa' o'ch huapuet ñamet.

⁹ Ane'tañ ñeñt sehua'ñene' allohuenes ñaña'pa' o'ch huapa pesho o'ch ota'p: “Te'pa' o'ch petanterra arro't, all panen te'pa' o' huapaña ñeñt panorrrpue' pene' all panen ñeñt atarr amcha'na'tpo' entyenet.” Paña allempopa' atarrcha' pepenquëño't petanterra o'ch ahue'p allcha' panorros allecma anorryen ñeñt ama esoshe'maye' entyenet.

¹⁰ Sapa' atetcha'ña se'pa ñerra'm esempo hua'ñenset. Allempo se'chap all hua'ñenset sapa' allach sanorros allecma anorrrcha'tyen ñeñt ama esoshe'maye' entyenet. Allña'pa' o'ch huapa ane'tañ, ñapa' atetcha' otose'p: “Masheñcha' papa' arrcha' panorros allecma

anen ñeñt atarr añcha'na'tpo' entyenet." Attochña allohuen ahua'ñareñnesha'pa' o'ch entapet ñapa' atarr añcha'na'tpo' entyenet.

11 Tarro'mar allohuen ñeñt e'ñe cohuen entetsa e'ñe pommo'cheñoñ ñetña tsapañone'pa' amach esoshe'maye' entereto. Tarraña allohuen ñeñt ama esoshe'maye' entetso te', ñeñña tsapañone'pa' atarrcha' cohuen enteret.

12 Allempoñapa' atet otan ane'tañ ñeñt hua'ñene':

—Ñerra'm esempoch porrtaten rreñets ñeñtcha' serra'muen aromtaña amapa' elleronet amach e'ñe aña pehua'ñatsto ñeñt e'ñe parro peyemtena ñaña ñeñt pemo'nasheñ pepen ñaña po'potantañ ñeñt e'ñe ñamo'tsesha' pepen ama't ñaña allo'marnesha' ñeñt atarr eçllayoretet. Tarro'mar ñerra'm ñeñña pehua'ñenpa' ñetpa'cho'ña tsapañone' o'ch alla hua'ñerrpet ñaña. Attoch tsa'terrpet.

13 Tarraña ñerra'm esempoch porrtat rreñets aña'nachña pehua'ña'yes ñeñt atarr huocchañetyets ñaña achocrañachno ñaña ñeñt checa're'pa'chno ñaña aporo'yetechno.

14 Attochña ñapa' atarrcha' cosheñtso'tsenep tarro'mar ñetpa' amach errotenoñ alla tsa'terrpeto. Ñapa' esempohuañencha'ña atsa'tarete'p allempoch atantaretterra allohuen ñeñt e'ñe pocte' es ña'yestse't.

Arrpa' all atma'ntatarettena ane'tañ ñeñt atarr aton yeçhcatatene' rreñets

15 Allempo e'mueñet Jesús atet serrpare'tatuanet, puesheñarrña ñeñt parro anorrchenet ñeñt parro rrallme'chenet, ñaña'pa' atet otan Jesús:

—Atarrcha' cosheñtso'tseney allohueney ñeñteycha' rrallme'chapreterre' Yompor all añcha'tarettena pue'ntaño.

16 Jesúsña'pa' toma'ntaterraneterr, ñeñt'pa' atet oterraneterr:

—Eñall puesheñarr ane'tañ ñaña'pa' o'ch yeçhcatatan atarr shonte' aton rreñets. Allempoñapa' otyesan shonte' acheñenesha' ñeñtcha' rrallme'chapretenaya' esempoch e'ñe a'potatuan rreñets.

17 O'ña çhap allempo e'ñe a'potatuan rreñetspa' ñaña'pa' mueñan pa'taruasañer ñeñtcha' hua'ña'yenaya' allohuen acheñenesha' ñeñt otarettatsa ahuaña. Ñeñña pa'taruasañerpa' atet otosan acheñenesha':

—Te'pa' o'ca'ye e'ñe a'potarettetuaña rreñets sona'cha't o'ch serrallme'chapretena'.

18 Tarraña ñeñt ahua'ñaretechnopa' ñetña'pa' ama esesha' tatso. Ñehua, ñeñt ñanom puesheñarrpa' atet ot: "Ñapa' te'pa' o'ca'ye neraña pats, o'chca'ye ahuen o'ch necua'yeha'. Potuercha' ñamo'mte' peretnerrnepa', ñapa' amachca'ye neto."

19 Po'psheñeñpa'cho'ña atet ot: "Ñapa'cho'ña o'ca'ye neraña çharrana toro po'yuntohuen e'ñe epna'ttso'ca; o'chca'ye ahuen o'ch netpach taruasate'. Potuercha' ñamo'mte' peretnerrnepa', ñapa' amachca'ye neto."

20 Po'psheñeñpa'cho'ña atet ot: "Ñapa' errtenca'ye sena'tetsa ñeñto'marña ñapa' amachca'ye eshec neto."

21 Ñeñña ataruasañer atet otyes acheñenesha'pa' ñaña'pa' ahuerr pamo'mtayesho, serrpare'tatuerran pamo'mte' atet otyeset ñeñt hua'ña'yeseñ. Ane'tañña'pa' ñeñña atarr atsrre'mate'. Patsrre'mueño'pa' atet oterranerr pa'taruasañer: "Te'pa' o'ch ahuerrperr e'ñe tayecma ñaña all anetso allecma atarr chopeñe'chyen shonte' acheñenesha'. Al-lotcha'ña pehuapaterr huocchañneshachno ñaña achocrañachno ñaña aporo'yetechno ñaña checa're'pa'chno."

22 Pa'taruasañerña'pa' atetcho' perrerr. Allempo huerra atet otuerranerr pamo'mte': "Nompocha' ñeñt atet ñotenpa' te'pa' o' e'ñe atet ne'pohua. Tarraña allcha' anorrcha'tyes ñeñtcha' rrallme'chosetspa' orameñ."

²³ Pamo'mte'ñapa' atet otererr: "Te'pa' o'ch alla ahuerrperr allampaño'mar all shonte' toñechno allecma chopeñe'chyen acheñenesha'. Allñapa' atarrcha' potare'tyes acheñenesha' onetepa' arr nepaclo attoch e'ñe chorra acheñenesha' arr nepaclo.

²⁴ Po'ñoch te' napa' o'ch notas, ñeñt' ñanom nehua'ñatyeseñpa' ñetña te'ñapa' ama't e'ñe puesheñarrotetapa' amach rrallme'chapreterrneto attoch cosherret nesho."

Añ poctetsa o'ch e'ñe yesuanem ñeñt' e'ñe yocpa attoch yocter Cristo e'ñe poctacma

²⁵ All oñemyen Jesúsapa' shonte' acheñenesha' co'a'huanene'. Ñaña'p' cohua'nmanet allenet shontenetpa' atet otnomanet:

²⁶ –Ñerra'm esesha' muene' o'ch coterrren e'ñe po'ñoch, añ nemnen o'ch atarr nanac morrentennet. Elloch metaneñet atto atarr morrenteñet pompor, ama't ñaña pachor, ama't ñaña puetapor ñaña puechemeresha', pa'mo'nasheñnesha', po'chanesha'. Atto atarr morrentennet ello metaneñet atto atarr morrentenet ñañeñeta ñeñt' atto correnet arr patsro. Ñerra'm erra'tsen ama atteye' nemorrentenayepa' ñaña'p' amach errotenot neyochresha' neperraneto.

²⁷ Tarro'mar ñerra'm erra'tsen ama e'ñeye' sehuanmaye ñeñt' atet muenenet e'ñe ñocpueta attoch coterrnet e'ñe poctacma, ñaña'p' amach errotenot neyochresha' neper-raneto. Ñeñt'apa' añ toma'ntena atet ñerra'mrrate' cho sechechnen secorsoch allcha' semueroçhta samã.

²⁸ Ñeñto'marña ñerra'm erra'tsenotes muenene' o'ch neyochresha' neperres, añ poctetsa choch ñanom soctape'ch, e'ñe'e' pocte' senteñ o'ch sesuanom ora allohuen ñeñt' atet notenes. Ñeñt'apa' atetcha' netma'ntacha atet ñerra'mrrate' eseshas muenene' o'ch satomat sepaquell atarrpo'pa' añ sepalltena choch ñanom sanorr allcha' soctape'ch errponte' tsa'tena. Ñato' eñallte' allpon quelle attoch mameshapa' o'ch sa'pue'.

²⁹ Ñerra'm ama atet ñanom soctape'chenopa' ñato' o'ch satomatañ ñanom alloch echarr sorrat sepaquell, ñerra'm cha sehuañapes quelle attoch sa'pañ sepaquellpa' attach se-cachpue'. Acheñenesha'ña ñeñt' sentene'pa' chach che'tatsetaset;

³⁰ ñetña'p' atetcha' otyeset: "Añ acheñerpa' o' tomataneña atarrpo' pa'paquell, alla huañapes quellepa' ama esoye' a'patano pa'paquell."

³¹ Ñeñt'ara cotapñatser o'ch alla netma'ntacha po'poñoneñ. Atet ñerra'mrrate' puesheñarr añcha'taret ñerra'm añ cotape'chen o'ch quellaratan po'solltarer epuet po'psheñeñ añcha'taret po'solltarer choch ñanom anorr allcha' e'ñe cohuen cotape'ch. Allempopa' atetcha' ot: "Napa' e'ñeca' charra' mila nechen nesolltarer; po'psheñeña añcha'taretpa' echenan po'solltarer epoch charra' mil. Ta'm, pocte'te' o'ch nemñe charra' mil nesolltarer ñeñt'cha' poctapue' epoch charra' mil solltarnesha' ñeñt'cha' yehuapoya. Ta'mca'ye a'mchechatuette'ca'ye—shonte'."

³² Allempoña o'ch atet cotape'chuapa' ñerra'm ama erro't apenaye' eñchepa' allempo ama aponmareñteneta' ñaña'p' o'ch mueñan allponsheña ñeñt'cha' atet otosahuet: "Yapa' añecop yen o'ch ya'pocstaterr ñoñets e'ñe cohuen e'ñe atfa, amach yeçllaranna'tatsto."

³³ Ñeñto'mar notenes, ñerra'm eseshas ama e'ñe pocteye' senteñe o'ch sesuanom ora ñeñt' allpon sechen, ñaña'p' amach errotenot neyochresha' neperrso.

Arrpa' all atma'ntatarettet atet ñerra'm pos o'ch huañ po'poserrteñapa' o'huañcha' sherba'

(Mt. 5.13; Mr. 9.50)

³⁴ Ñehua, yapa' yeñoteñ pospa' atarr cohuen sherbenan allohuen acheñenesha' arr patsro. (Allohuen ñeñt' po'ñoch neyochresha' nepen ñetña'p' atarr sherbenet atet ñerra'mrrate' pos atarr cohuen sherbeney.) Tarraña pospa' ñerra'm o'ch huañerr po'poserrteña amach errotenot ellopa' ya'poserrtatere.

³⁵ Atfoña amach es sherberro ama't e'ñe coñe'ta. Ama't attoch yetnarrataterr allo patspa' ama't ñeñtecpapa' amach sherberro; ñeñto'marña ama't ñeñtecpapa' amach yañño'tatsche. Ñeñto'marña o'ch yehuapore'ter a'yo. Ñerra'm eseshaste' ne'mñotene'pa' çhaponasepa'ch seyochro ñeñt atet neyçhatenes.

15

Acheñ ñeñt ama ame'ñetsopa' arrpa' all atma'ntatarettet atet ñerra'm carrnero ñeñt chenquëtsa

(Mt. 18.10-14)

¹ Shonte' ñeñt cobrets quelle gobiernocop ñeñtara ñeñt atarr shecare'tyets ñaña shonte' ochñañenesha', ñetña'pa' huaçha'tet Jesúsesho o'ch e'mñoteññañeta' ñeñt atet serrpare'tatenan allohuen acheñenesha'.

² Añña fariseonesha' ñaña ñeñt atarr etsotayenayeñ ñoñets ñeñt atet anaret judione-shacop, ñetña'pa' ama't mameshapa' ama pocteye' enteñeto. Ñetña'pa' atta sasare'teñet Jesús'pa' ñeñt'pa' atet otanna'tyenet:

—Añ acheñer ama't ñeñt atarr ochñañenesha'pa' eso'marte'ña e'ñe cohuen agapyen-net, ñaña alla rrallme'chapreteñet.

³ Ñeñto'mar Jesús'pa' alla toma'ntaterraneterr; ñeñt'pa' atet oterraneterr:

⁴ —Sapa' ñerra'm eseshas echene' shonte' secarrneror, çharroch çharra' sechen tarraña ñerra'm pomocarrña machayota sa'chencachpa' ama't atet sepeno. O'ch sesa'nom allohuen po'potantañ ñeñt o' noventa nuebama' all amayo ama't atarr a'yopa' o'ch ahues e'nerraya' pomocarr ñeñt chenquëtsa. Allcha' se'name'tyera'pa' attotach senter.

⁵ Allña senterpa' o'ch senatner, e'ñech socsheñeshocmañen saner.

⁶ O'chña seçhapater sepaçllopa' allña'pa' o'ch seçhore'tuer samo'tsesha' o'ch onaçha'tet. Allña'pa' o'ch sotuerr: “Te'pa' o'ch socshapreterrna necarrneror, te'pa' o' nenterrña ñeñt na'chencaten.”

⁷ Ñeñto'marña te'pa' notenes: Yamo'mte' ñeñt pue'taño'tsen attec-mach atarr nanac cosherrana ama't puesheñarra acheñ ñeñt atarr ochñañ ñerra'm esempoçh o'ch cotape'cherret ello e'ñe cohuen ñocop. Elloch metana'tuerran ñeñt atto coshenana po'potantañ ñeñt shonte' ñeñt e'ñe pocte' es pa'yenet ñocop ama't ñetpa' shontet atet ñerra'm noventa nueve carrnero ñaña ñetpa' ama't ama pallteneto o'ch cotape'cherret ello cohuen.

Arrpa' all atma'ntatarettena puetallarr quelle ñeñt a'chencaten pamo'mte'

⁸ Ñeñtara cotapñats, te'pa' ñato' atetcha' netma'ntacha po'poñoneñ atet ñerra'm puesheñarr coyanesha' ñerra'm echenan çharratlla po'çllayor ñeñt atarr morrentena. Ñerra'm çho a'chencach puetallarrpa' ama'tcha' a'llchatanoña po'lampareñ attoch tar-rapo'tenan pa'paquëll allcha' e'name'tyerran puetallarr po'çllayor. Attotcha'ña enter.

⁹ O'chña enterpa' allempoñapa' o'ch agotan pamo'tsesha' e'ñe pacmaneshoche', atetcha' otanet: “Te'pa' o'ch socshapreterrna ñeñt puetallarr neçllayor ñeñt na'chencat, te'pa' o' nenter.”

¹⁰ Te'pa' o'ch noterrser, elloña atarrcha' nanac coshateret Yompor po'mllañoñeñreneshohuen ñerra'm esempo ama't puesheñarra acheñ ñeñt atarr ochñañ'pa' o'ch cotape'cherret ello e'ñe cohuen Yomporecop.

Arrpa' all atma'ntatarettena puesheñarr yacma puechemer ñeñt atarr ottatsñañ

¹¹ Elloña Jesús'pa' alla toma'ntaterraneterr; ñeñt'pa' atet oterraneterr:

—Eñall puesheñarr acheñ echenan epsheña puechemer.

12 Ñeñña puechoyomer penpa' atet otan pompor: "Apacha' ñeññ ora allpon pechen te' napa' nemneñ o'ch ðapuen e'ñe tayecma ñeññ allpon ðo'patatenna." Allempoña pompor ora ñeññ allpon echyenpa' o' apa'yesan epsheño'mar puechemerasha' ñeññ allpon o'patatyenanet e'ñe puesheña'ttset.

13 E'ñe allponmatatsa ñeñña puechoyomer penpa' o' e'ñe pomhuahuanman ora allohuen ñeññ allpon aþ pompor allo agapan shonte' quelle attoch ta ðachayo po'poñ anetso. Allempoña chap ðachayopa' allña'pa' sosya'tsañechna atet ða'yesos. Attoña ama't shonte' po'çllayor ñeññ anem o' e'ñe a'gasta'huahue e'ñe pottatse'teñoñ.

14 O' e'ñe a'gasta'huan ora po'çllayorpa' allempoña allpa' o' orrta muecheñets all ñeññe anetsro. Ñaña'pa' o'huañ erraye' entan puerrar ñeññcha' rren.

15 Allempoña ñapa' o' ahuo' allo'tsen ane'tañ all e'nyenan taruas. Ane'tañña'pa' aña aþ po'taruas o'ch auyesos a'yenet allcha' cohuanþesyesoñ po'chañchor.

16 Ña pa'chporrñoñpa' atarr mueneñ o'ch rrapretosan chañcho puerrar attoch yetosa. Ama't chañchopa' pa'talle'tsa puerrar pen ñapa'cho'ña ñeññaña atarr muenen o'ch rros tarraña ama't chañcho ama eseshaye' apuenaye puerrar ñeññcha' rra'.

17 Atteñapa' machayota chapoña pueyoçhro, atet ot: "Apa pa'taruasañer ama't shontetpa' echyenet puerrar, ello puechare'tyena. Naña arrpa' o' nerromuerrmoch nachporrñoñ.

18 Te'pa' o'ch ahuerren apuesho; te' napa' atetcha' notuer: Apacha' napa' o' neþohua ñeññ ama cohuenayaye Yomporecop ama't ñaña þocop.

19 Napa' ama cohuenayayno attoch pechemer peþapuerren. Te' napa' aña poctetsa nocop þapa' þa'taruasañrach peþapuerren."

20 O'ña atet cotape'chua ello e'ñe cohuen Yomporecoppa' allempoñapa' ahuen pomporesho.

'Ama't atarr ellaþarmeñ allempo entapueñ pompor e'ñe puehueñoñ mata poctapueñpa' a'chono'tapueñ, tso'ttsapa'tapueñ. Ñeññpa' atet huomcha'tapuenan puechemer atto e'ñe cohuen agapapueñ.

21 Puechemerña'pa' atet otueñ: "Apacha' napa' o' neþohua ñeññ ama cohuenayaye Yomporecop ama't ñaña þocop. Na te'pa' ama cohuenayayno attoch pechemer peþapuerren."

22 Tarraña pomporña'pa' e'ñe allorocma otan pueñañresha'chno: "O'ch sena' e'ñe tayecma shetamuets ñeññ atarr cohuen cochnesha', o'ch sechorratapuennana nechemer. O'ch senatapueñ ñaña anillo potaþo, o'ch senatapueñ ñaña sapatets pa'tco.

23 O'ch sennana' ñaña nehuacsher ñeññ atarr ne'soya'taten o'ch semtse o'ch yer-rallme'ch o'ch yocshame'tamþsapueña.

24 Tarro'mar añ nechemer ama't o' rromhuañ, te'ñapa' o' alla tanterra. Ama't o' chenca'huañpa' te'ñapa' o' alla nenter." Allempoñapa' atarr nanac coshame'tamþsapueñet.

25 Ñehua, po'psheñeñ puechemer ñeññ popo'nar ñaña'pa' pa'mro'tsen allempo çhen puechoyomer. Allempoña err pa'mroñ e'ñe ya'rroterrtsa pocollopa' o' e'mhuerran coshamñats all requerquenet ñaña ashe'rarañ.

26 Allempoñapa' chore'tuerran cheshachorpa' a'þto'tuer: "¿Eso'mare'tña coshame'tenet? ¿Eso'tña atarr coshame'tamþenet?"

27 Cheshachorña'pa' atet otapuer: "O' huena pemo'nasheñ, þomporpa' o' muetsatan becer ñeññ se'soya'taten tarro'mar atarr coshapuenana puechemer. Ama çhoye' rromueno, e'ñe huomech agapapueñ."

28 Ñaña'pa' ñeñña atarr atsre'matuerre' ama mueno o'ch be'tosuerr all o' çhen pa'mo'nasheñ. Atteñapa' cha'nom pomporpa' allach otere't: "Pebe'tosuerr." Ñaña'pa' ama mueno o'ch be'tosuerr.

29 Ñañaapa' atet otuerran pompopor: "Napa' peñotenen o' shonte' char e'ñe cohuen name'ñenpa; napa' ama't parrochapa' ama esempo natpare'tenpe. Tarraña ama't atet nepenpeñpa' nañapa' ama't esempapa' ama p'apuennoña ama't patrra cabra attoch nocshame'ta naña epan ñeñt' parro neyemuetyena na.

30 Te'ña o' huena ñeñt' pechemerma't pepen ama't ora o' a'gasta'huonañ peçllayor e'ñe puecañoresha'teñoñ, te'ña p'apa' o' pemtsatapueñ becer ñeñt' ye'soya'taten."

31 Pomporna'apa' atet otererr: "Po'ñoçh nechemercha' p'apa' çhocma arro'tseney parro. Amahuaca'ye nechemercha' peñoteñe'te' ñeñt' allpon nechenpa' e'ñerramche' p'ocma.

32 Ñeñto'marña te'pa' añ poctetsa o'ch yocshame'tam'psapueña pemo'nasheñ, o'ch atarr nanac yocshena tarro'mar ama't o' rromhuañ te'ña'apa' o' alla tanterra; ama't o' chenca'huañ te'ña'apa' o' alla yenter."

16

Atet atma'ntatare'ttena atet pena ñeñt' cohua'm'psatsre'tene' pamo'mte'

1 Elloña Jesús'pa' alla toma'ntaterranerr pueyochresha', ñeñt'pa' atet serpare'taterraneterr:

—Eñall yacma puesheñarr ñeñt' atarr eçllayoret. Ñapa' echenan pa'cheñer ñeñt' po'taruas pene' o'ch cohua'm'psan ora allpon ñeñt' eçhyen pamo'mte'. Ñaña ñach quellquene' po'potantañ ñeñt' allpon te'ba'yeññañet pamo'mte'. Atteña allempoña puesheña'tets acheñenesha'pa' a'meta'm'peñeta' pamo'mtayesho, atet otoñet pamo'mte': "O'ca'ye atta a'chencatatsre'tapña ñeñt' penen ñeñt'cha' pecua'm'psatsre'tene'."

2 Allempoña pamo'mte' atet e'mare'chpa' allenta agotach. Allempoña huapapa' atet otañ: "Eso'maruaña'ca'yeña atet p'a'chencatatsre'tenen. Te'pa' o'ch peñotatnomuen e'ñe ora allohuen ñeñt' allpon petaruasen tarro'mar te'pa' ama nemno o'ch allo'na pecua'm'psatsre'tenen." O' atet otue pamo'mte', ñaña'apa' allenta ahuer.

3 Allempoña pa'taruasañer ñap'topa' atet co'tape'chen: "Te'pa' amach allo'na netaruasa'nenamo'mtayesho; o'ca'ye mopa'tam'perrenña allo neganena. Te'pa' errotenuachña'ca'ye ne'pate'. Napa' ama necheno nehuamenc attoch namre't ñeñt'cha' netaruas neperreñ, ñaña ama nemno o'ch netaruas ne'pa' o'ch atta nenamare'tyen quelle atet pa'yena po'psheñne'çhno ñeñt' po'taruas pene' o'ch enamare'tyeset quelle, tarro'mar na ñeñt'pa' atarr apenco'chen nenteñ."

4 Allempoña o' e'ñe co'tape'chuepa' atet ot: "Te'ña po'ñoçhpa' o'ca'ye neñoçh atet'cha'ca'ye ne'pa' attoch acheñenesha'pa' e'ñech cohuen agapnet pa'pacillo tsapatonet allempoch huañ neçllayor ñeñt' allpon naguën te' netaruasot."

5 Allempoña atet co'tape'chenpa' atet'cho' p'a. Ñeñto'marña agotatan allohuen allponsheña ñeñt' te'ba'yets pamo'mtayesho. E'ñe puesheña'ttsa ñanom a'p'to'tyesap, atet otapanet: "Papa' çerrpona't petebeñña namo'mte'?"

6 Ñañaapa' atet otos: "Napa' netebeñ'ca'ye çharroch çharra' cilindro aceite'." Ñeñt' patron pa'cheñerña'apa' añ allo quellquëññañ ñeñt' allpon teben ahua'toteñ. Allempoña'apa' atet otererr: "Te'pa' o'ch p'anorr tecmapa' o'ch pe'sherrña ñeñt' çharroch çharra' cilindro o'ch pequellquërr amnaroch çharra' o'ca'ye allponamaña ñeñt' peteben."

7 Allempoña'apa' oterranerr ñaña po'psheñeñ: "Papa'cho'ña çerrpona't petebeñña namo'mte'?" Ñañaapa' atet otos: "Napa' netebeñ çharroch çharra' arroga trigo." Ñeñt' patron pa'cheñerña'apa' añ ñaña allo quellquëññañ ñeñt' allpon teben ahua'toteñ allempoña ñapa'cho'ña atet otererr: "Papa'cho'ña p'anorr tecma o'ch pe'sherrña ñeñt' çharroch çharra' arroga o'ch pequellquërr poscoch çharra'; te'pa' o'ca'ye allponamaña ñeñt' allpon petebeñ namo'mte'."

⁸ Allempo pamo'mte' eñotan ñeñt pa'taruasañer atta shecare'teñ, ñaña'apa' atet oten: "Añ acheñer ama't puehquëño'tpa' e'ñe eñoteñ o'ch entan ñeñt'cha' atarr sherberre' ñocop tsapatonef." Po'ño'ch acheñenesha' arr patsro ñeñt ama' ame'ñetso ñetñapa' atarr eñoteñet attoch e'ñech aña e'nenet ñeñt'cha' atarr sherberrets ñocpuet tsapatonef. Tarraña ñeñtña ame'ñetsapa' ama tama eñoteñeto, ama es co'tape'cheneto o'ch e'nenet ñeñt'cha' atarr sherberrahuet ñamet tsapatonef.

⁹ Ñeñto'marña te'pa' o'ch notenes:

—Ñeñt allpon pa'namen sechyen seçllayorohuen ñeñt'pa' añecpuepa'chña sherbenes alloch seyempueñ po'potantañ allochñapa' attochña e'ñech cohuen muererrset. Sapa' añecpuepa'chña setaruasatña sa seçllayor ñeñt atarr sherbets Yomporecop ama't yeñoteñ quellepa' atarr a'gasta'po' ama't ñaña añecop ñeñt ama pocteye' enteno Yompor. Allochñapa' eñallcha' socop ñeñt'cha' e'ñe cohuen sagüerre' e'ñe all Yomporepahuo esempoch se'cha'cherr all, allempopa' o'huañcha' allo'na sherbenes quelle ñeñt patso'marecpa. Attoch allohuenes e'ñech cohuen socrra'huerra Yomporepahuo ñeñt'pa' ama ahuañaño.

¹⁰ Elloña o'ch notas:

—Ama't e'ñe coñe'ta yechen ñerra'm añecop yesherbateñ ñeñt cohuen enten Yompor, ñaña'apa' eñoteny atet ñerra'm ama't atarr aton yechen atterach yesherbateñ ñocop. Tarraña ama't e'ñe coñe'ta yechen ñerra'm ama añecpaye' yesherbateñe ñocop, ñaña'apa' e'ñech eñoteny attoña ama'tcha' atarr aton yecheneñpa' atterach amach es yesherbateñe ñocop.

¹¹ Ñaña ama't e'ñe allpona quelle yechen arr patsro ama't e'ñe patso'marecpa tarraña ñerra'm ama añecop yesherbateñe ñeñt cohuen enten Yompor allempopa' amach errotentof alla apuerryerroña ñeñt po'ño'ch atarr sherbets ñeñt apueney ña.

¹² Ñaña ñerra'm ama es yesherbateññañe ñeñt po'psheñño atet ñerra'm ñeñt Yomporo, allempopa' amach errotentof apyeña ñaña ñeñt e'ñe yocop ñeñt'cha' e'ñe cohuen yocshatene'.

¹³ Ñeñt'pa' atet'cha' netma'ntacha:

—Ama't puesheñarrofeyapa' amach errotentof e'ñe cohuen yetaruasoña epsheño'mar yamo'mtayecop. Tarro'mar ñerra'm atet ye'papa' puesheñarr e'ñech cohuen yemorrenteño' yocsheñeshocmañen yesherbeñ, po'psheñeñña'apa' amach e'ñeye' yemorrenteño; çhach yottena ñerra'm çha yetsena'teñ. Ñeñto'mar atet'pa' amach cohuenaye' yesherbeñe. Ñerra'm aña e'ñe sema'yo'chrena ñeñt e'ñe socpa attoch segana aton quelle, ñeñt atet'pa' amach errotentof sema'yo'chroña ñaña añecop ñeñt atarr sherbets Yomporecop.

¹⁴ Añña fariseonesha' ñeñt e'muene' Jesús ñeñt atet serrpare'tatenan acheñenesha', ñetñapa' aña atarr ye'chapretenet quelle. Ñeñto'marña ñet allempopa' puesasare'teño'fet Jesús'pa' çha atarr che'tatseteñet.

¹⁵ Jesús'apa' atet otanet:

—Sapa' çha sottenañ ñerra'mrrate' atarr cohuensoñ attoña acheñenesha'pa' e'ñe cohuen entyensetañ. Tarraña Yomporñapa' e'ñe eñotennas seyo'cher ñeñt atto sapa' atarr seshcare'tyeñ acheñenesha'. Tarraña ñeñt e'ñe ñañañeta atarr cohuen entyetsat arr patsro, ñetñapa' atarr tsena'tenanet Yompor.

Moisés po'ño'pa' ñeñt atet anaret ñeñt'pa' ñeñt'ña e'ñe yemtete't tarrempohua allempo orrterra Yompor po'cohuenña ñeñt atto ayochreshattena ña

¹⁶ Allempoña Jesús'pa' atet serrpare'taterranerr acheñenesha' po'po'ñonef:

—Añña ñoñets Moisés po'ño'ñ ñeñt atet anaret ñaña añ ñoñets ñeñt quellca'yese't ñeñt a'mta'yese't Yompor po'ño'ñ, ñet'pa' ñeñt e'ñe serrpare'tete't tarrempohua allempo orrtosa Juan. Allempoteñ serrpare'tatosanet Juan'pa' ñapa' añ serrpare'tatosanet atet

penaña Yompor po'cohuenña atto atarr ayochreshattena ña, ñeñtara cohuen ñoñets alloch sequeshperra. Ñaña allohuen acheñenesha' e'ñe pueyočhrocmañenet ñeñta atarr muenenet.

17 'Tarraña ama't atteñpa' ñeñt atet anaret Yompor po'ñoñ ama't patrra quellec puehempotollohuenpa' amach chenquerro. Tarro'mar Yompor po'ñoñpa' amach erroteno ya'huañatere ñeñt atto sherbeney. Patsña epuet enet ñeñtpa' huañerrcha'.

*Atto Jesúsapa' yečhatosanet ama asanna'tpahuoyaye
(Mt. 19.1-12; Mr. 10.1-12)*

18 'Ama a'huañatpahuoyaye Yompor po'ñoñ ñeñt atet yotene' ama asa'pahuo yetapor tarro'mar ñerra'm esesha' serre' puetapor o'ch yorerran po'psheññ coyanesha' ñeñtcha' puetapor perretpa' ñeñtñapa' čhach ochña'tamperrana puetaporeshe'mañ; ñeñtpa' ama cohuenaye' enteñe Yompor. Ñaña ñeñtcha' yorerre' coyanesha' asaret, ñeñt yacmarpa' čhach chetapreten taporets; ñeñtpa'čo'ña ama cohuenaye' enteñe Yompor.

*Atet ařaretta puešeñarr yacma ñeñt atarr ečllayoret; atet ařaretta ñaña po'psheññ
yacma ñeñt atarr huocchañetets, ñeñtpa' añ pa'so'cheñ Lázaro*

19 Elloña Jesúsapa' atet serrpare'tatanet:

—Eñall puešeñarr ñeñt atarr ečllayoret ñeñt chorrenaya shetamuets atarr cochneshare' ñeñt atarr cohuen apomotyesaret. Epaye' coshatse'tatyen ñeñt allpon echyen. E'ñe pocsheñoťpa' e'ñe ellapene't rrallme'chats.

20 Eñall ñaña puešeñarr ñeñt atarr huocchañetets ñeñtñapa' čha ora puetsaren, ñeñtpa' añ pa'so'cheñ Lázaro. Ñaña' allach ellapene't a'yot yetarroť allotecma be'ten ečllayoret pa'paclo.

21 Ñapa' añach atarr ye'chena o'ch rra'yesan ama't coñeña'ttsa rreñets ñeñt a'shore'tatyen ečllayoret po'mesařnačo. Allña ochečpa' o'ch huapoña o'ch tso'na'teññaña' pueptsarña.

22 Atteña o' čhap pamťarr allempo rroma ñeñt huocchañeshar. O' rroma mel-lañoťeñnesha'ña huačha'tapa' o' aneret e'ñe Abrahamuesho, allña'pa' o' čhapachet atarr cosheñtso. Atteñapa' čhap allempo rroma ñaña ñeñt atarr ečllayoret, ñeñtñapa' pam-pueñeta'.

23 Ñaña'pa' alla čhap coñcha'puetso ñeñt o'patenaya ñeñt rromuets ñeñt ama ame'ñetso. Allña'pa' atarr mueročhtosa all coñchosa. Atteñapa' cohua' enoneťpa' allotña entosan Abraham allařaro'tsen ento. Allña'pa' allo'tsen epuet Lázaro.

24 Ñeñtña ečllayoret allenta chore'tan Abraham, ñeñtpa' atet och: "Nompore Abraham pemuera'yechna, pemñaye'chon Lázaro o'ch huapa arr attoch esha'tosan potař oño, ama't potařotapa' o'ch onenapna' oñ attoch a'yamoserrapona' neñeñ o' e'ñe neporrarra'nmahuap. Atarr nanac o' nemueročhtosa arr tso."

25 Abrahamñapa' atet och: "Nechemerñecha' te'pa' o'ch peyerposa ora allpon pa'namen ñeñt pechyese't ñeñt atarr cochneshare' pentyese't allempo pocrre't patso. Lázaroñapa' ama es eche'te ama't coñe'ta ñeñt atarr cohuen enten ñaña. Te'ña ñapa' o' atarr acshataretterra, řaña'pa' o' atarr řa'coñchataretterra.

26 Elloña te'pa' ama't e'ñe eseshapa' amach errotenoť čhapanřsapeto allo'tsenep řarro'mar řapa' atsereto'tsenřa yonťa'n. Sapa'čo'ña te'pa' ama't e'ñe puešeñarroťesapa' amach errotenoť sečhapanřpesyo yaña. Amate' erroť yepere'te ñeñtpa' atet anaret attoch yello'tsentataretterra."

27 Allempoña ečllayoretpa' atet oterranerr Abraham: "Tarraña ama't atteñ nomporepa' te'pa' o'ch notař o'ch pemñer Lázaro all patsro nomporepa'paclo.

²⁸ Tarro'mar all napa' nechen amnarsheña nemo'nasheñ. Ñeñto'marña nemneñ o'ch ahuerr o'ch cotape'chaterraneta' e'ñe cohuen te't ñetpa'cho'ña esempopa' alla chapuet arr coñcha'puetso."

²⁹ Abrahamñapa' alla otererr: "Ñetpa' echenet Yompor po'ñoñ ñeñt quellquë't Moisés ñaña allohuen ñeñt a'mtaye't Yompor po'ñoñ ahuat. Te'pa' e'mñoterrñañetepa' Yompor po'ñoñ ñeñt echenet."

³⁰ Ñañaapa' atet oterranerr Abraham: "Ñato' amach e'mñoterrñañeto Yompor po'ñoñ, tarraña nompore Abrahama ñerra'm esesha' tanterrtsa rromot ñeñtcha' orrterrahuet allempoñapa' po'ñoñ ñeñtcha'ña cotape'chaterrahuet ello e'ñe cohuen Yomporecop."

³¹ Abrahamñapa' alla otererr: "Ñerra'm amach e'mñoterrñañeto Yompor po'ñoñ ñeñt atet quellquë't Moisés ñaña allohuen ñeñt a'mtaye't Yompor po'ñoñ ahuat, te'ña ama't esesha'ch tanterrtsa rromotpa' amach eshec chapanetoña pueyoçhreto attoch cotape'cherret ello e'ñe cohuen Yomporecop."

17

Atto çhocmach huaponaya ñeñtcha' yetpatyene' o'ch atet patyeseñ ñeñt ama pocteye' enteno Yompor

(Mt. 18.6-7, 21-22; Mr. 9.42)

¹ Allempoña Jesúsapa' alla serrpare'taterranerr pueyoçhresha', ñeñtapa' atet otanet:

—Chocmach huaponaya ñeñtcha' yetpatyene' o'ch atet patyeseñ ñeñt ama pocteye' enteno Yompor. Tarraña napa' o'ch notas, atarrcha' yoroçheno'tsen ama't erra'tsena acheñer ñeñt orrtatene' ñeñtcha' topatyene' po'psheñeñ ñeñt name'ñenaya o'ch atet patyenanet ñamet ñeñt ama't mamesha ama pocteye' enteno Yompor.

² Ama't ñeñt e'ñe errote' name'ñenaya ñerra'm esesha' o'ch orrtatanet attoch o'ch atet patachet ñeñt ama pocteye' enteno Yompor, ñeñtña acheñerpa' atarrcha' yoroçheno'tsen tarro'mar ñapa' aña o'patenaya coñcheñets ñeñt atarr huomenc. Ama't ñocoppa' ama tama yoroçhenayayñe ñerra'm ama atet patenana' po'psheñeñ, e'ñech allorocma çharachetañ mapue' añecmuen pa'çhnoço allpon ñerra'm puetsë'tamets o'ch huapore'chet oño epo allcha' ño'shach mapue'.

³ Ñeñto'marña sapa' e'ñech señoa, amach sorratatsto attoch sa'shoratach po'psheñeñ ama't erra'tsena.

Elloña napa' o'ch alla noterrser, ñerra'm esempo samo'ts erro't ponas sa ñeñt ama pocteye' enteno Yompor, socoppa' añ poctetsa o'ch soctape'chater e'ñe cohuen o'ch poter ñeñt atet o' pòhuonaçpa' ama't mameshapa' ama pocteye' enteñe Yompor. Allochñapa' ñerra'm o'ch alla cotape'cherran cohuen Yomporecop, sañapa' añ poctetsa o'ch alla e'ñe cohuen sepretner.

⁴ Ama'tcha' atonoche'tats atet penset, ama'tcha' pamtarrpa' cançhroche'tatscha' atet penset ñerra'm o'ch alla llequërrana ñeñt atet pennaset, ñerra'm ama't pamtarr cançhroche'tats o'ch alla oterret: "Napa' o' atet neponaç ñeñt ama pocteyaye tarraña te'ña ellopa' amach alla atet neperre'te", socoppa'cho'ña añña e'ñe poctetsa o'ch alla e'ñe cohuen sepretner ñeñt atet sepene'.

E'ñe yeyemteño't Jesús ñeñta ahuamencat yepene' attoch es yorrtatyen ñocop

⁵ Allempo atet otarettenet añña puellsensarnesha'ñapa' atet ochet Po'partsesharet Jesús:

—Elloña yapa' ahuamencatcha' pepa'y allochñapa' e'ñech cohuen yeyemterrpa.

⁶ Partseshañapa' alla oterraneterr:

—Ñerra'm po'ñoñ e'ñe na seyemtenañ napa' e'ñeca'ye na'poctatenña neñoñ ñeñt atet notenes, ama'tcha' allponatollota seyemtena ñerra'mrrate' mostazllometoll, sañapa' ama't erra'tsena senamuennonñ ama't ñeñt atarr echarr sentenpa' nañapa' atetcha'

nepennaseñ. O'ch netma'ntatasa atet ñerra'm o'ch sot añ tsachecop sicómo'rech: "Bera'nmuepa'ch arroñ all ten, arrepa'chña tomhuerrerr a'yo sa'po", tsachñapa' atetcha'cho'ña pãñ e'ñe atet soteñ.

Atto atma'ntatarettena ataruasañpa' añ poctetsa ñocop e'ñech etsotenan ñeñt atet muateñ pamo'mte'

⁷ Ellopa' alla toma'ntaterraneterr, ñeñtãpa' atet otterranneterr:

—Ñerra'm eseshas echene' sa'taruasañer, ñato' ñapa' ellapene'tcha' llampue' sechamuelleñ amapa' ñato' ellapene'tcha' cohuanñpene' sayaraçhno ellerronetña allempoch huerra po'taruasotpa' sañapa' ama't puesheñarroñesapa' amach sotapuerena señañra: "Te'pa' o'ch pebe'tosuerr o'ch yerrallme'chnen parro."

⁸ Elloña ñeñtãpa' o'chcho' alla sotapuererr: "Te'ñapa' o'ch peptare'tuerren ñeñtcha' nerra'nen, allotñapa' o'ch pã'cohuenetuerr peshtam attoch e'ñe cohuen pesherbã'huerrren choñcha'ña naphuerre' nerrar ñeñtcha' nerra'nen. O'chña nerruanen napa' allempoñapa' choñcha'ña rrallme'chnets pãña."

⁹ Ama'tña sapa' atetca'ye sepena. Ñaña sa'taruasañer ñerra'm esempoch e'nuan ora po'taruas ñeñt seyecheña, sañapa' ama't puesheñarroñesapa' amach sotereña: "Parasyos o' pe'nuon netaruas." Ama't ama atarr socshateñe ñeñtãpa' e'ñe pocte' ñocop tarro'mar ñapa' allpona o' e'nua ñeñt allpon seyecheña.

¹⁰ Sapa'cho'ña Yompor pa'taruasañer sepene'. Ñaña ama't allempoch setsotuen ora allohuen ñeñt atet otenes Yompor atterepa'chña sentena ama atarr atonaye' sesherbena. Aña setsoten ñeñt e'ñe poctetsa allohuen añecop ñeñt pa'taruasañer pen Yompor.

Atto Jesús pa' e'ñe po'ñoñoña a'crratyasapan aptsarñatechno ñeñt çharrasheña

¹¹ Allempo sechena Jesús Jerusaléno arr oñem allohua temuena Samaria epuet Galilea.

¹² Allempoñapa' çhap paterr anetso. Allñapa' huaçha'toña çharrasheña ñeñt osyen puetsarñats ñeñt otenet lepra. Ñeñtña aptsarñatechno a'yota tomçha'tyesoset.

¹³ Ñetñapa' allotña rranare'tyesosetpa' atet ochet Jesús:

—Maestro Jesúsocha' pemueraye'chosya yaña.

¹⁴ Jesúsñapa' allenta cohuananetpa' atet otosanet:

—Te'pa' o'ch ahues o'ch segatyena' sañeña judionesha' po'cornanesharesho attoch ñetpa' o'ch eñotaset te'pa' o' socrrerra.

Atet otanet Jesús, ñetña ahuanmatsetpa' e'ñe allorocma acrra'yesuerrochet.

¹⁵ Puesheñarrña allempo eñota o' correrrapa' alla puettallerrapa' o' alla ahuerr Jesúseshoneñ atarr nanac pocsheñesha' aye'choçhtatnerran Yompor.

¹⁶ E'ñe pueparasyoso'teñesha' rromosa Jesús pa'rrpõt. Ñehua, ñeñt atet patsapa' ñeñtãpa' ñeñtña samario'marnesha'.

¹⁷ Allempoña Jesús pa' atet otan acheñenesha' ñeñt allo'tsa'yen:

—Ama't çharrasheña ñeñt o' na'crratyasua te'. ¿Po'potantañña esconsheñapa'? Ñetñapa' ama es yerpa'pesnomayeña attoch aye'choçhtatoñet Yompor.

¹⁸ E'ñe puesheñarraña ñeñt puerrerrtsa attoch atarr aye'choçhtatan Yompor ama't ñapa' ama judioneshayaye.

¹⁹ Allempoña Jesús pa' atet otan ñeñt a'crraterr:

—Te'ñapa' o'ch petanterra, e'ñech cohuen peserr tarro'mar pãpa' e'ñe peyemteñoñen na o' pocrerra.

Atto fariseonesha'pa' a'põt'chet Jesús: ¿Esempto'tcha' orrtierraña Yompor po'cohuenña allempoch atarr amçha'taretterra ña?

(Mt. 24.23-28, 36-41)

²⁰ Parrochña fariseonesha'pa' a'põt'chet Jesús:

—¿Esempo'tcha' orrterraña Yompor po'cohuenña allempoch atarr añcha'tare'tterra ña?

Jesúsñapa' atet otanet:

—Yompor po'cohuenña atto ayochreshattena ñapa' ñeñtpa' ama atteyaye ñerra'mrrate' ñeñt es yentyen yeclloyot.

²¹ Ñeñto'marña amach errotenot oteto: “Arrca'yeña añcha'tare'ttenaña Yompor”, amapa' “Tarroca'yeña añcha'tare'ttenaña Yompor.” Tarro'mar Yompor po'cohuenña ñeñt atto ayochreshattena ñapa' ñeñtpa' o'ca'ye motetnoma orrtatsa e'ñe sesho ama't seyo'chro.

²² Elloña ñapa' atet oterranerr pueyochresha':

—Cherrcha' esempohuañen allempoch atarr se'nerren atarrcha' semnerren Ñeñten Acheñetostse't o'ch norrterrnsa ama't e'ñe pam'tarra. Tarraña ama't e'ñe allempa amach senterrno.

²³ Saña allempopa' atetcha' otasetañ: “Te'pa' o' orrterraña Cristo allo'tsenca'ye”, amapa' “Tarro'tsenca'yeña Cristo.” Saña'pa' amach setatstoña all, amach soctatscheña ñeñt sets all.

²⁴ Tarro'mar ñerra'm esempo cherr allempoch nohuerra na Ñeñten Acheñetosets e'ñe allohuen acheñenesha'pa' e'ñech entuapuerrnet tarro'mar allempopa' atetcha' perra ñerra'mrrate' meratste', o'ch meratsta huomencpa' e'ñech a'puetaresuan ora enet erraparen.

²⁵ Ñehua, na te' ñeñt atet anaret nocop ñanompa' atarrcha' na'muero'chtatareta, ama't namo'tsesha' ñeñt corretsa te'pa' amach eseshaye' naguënaye.

²⁶ Tarraña allempoch nohuerra po'pocheño na Ñeñten Acheñetosets, allempopa' e'ñech atet perret e'ñe atet pete't ahuat allempo corre't Noé.

²⁷ Allempopa' ama es pue'cha'yeneto aña e'ñe cotape'chete't atto atarr pa'namen muenenet ñeñtcha' rra'yenet, orrare'tyesete't, sena'tanatyena yacmanesha'chno, coy-anesha'chnopa'cho'ña apanatyesete't ñeñt yoranatyesahuete't. Ñetñapa' ñeñta e'ñe cohuen entete't. Atteñapa' chap allempo be'tosos Noé po'huarcopahuo. Allempoñapa' huata, cho'pa oñ erracmañen, e'ñe a'cllatuan allohuen acheñenesha' erraparen.

²⁸ Attecma perreterr allempo corre't Lot, aña e'ñe cotape'chyerretterr shonte' rrallme'chyesete't ñaña shonte' orrare'tyesete't, atarr es rañta'yese't, ñaña pomatsre'tyesete't. Shonte' esocmañen ñeñt pa'namen nare'tyesete't, tomatyesete't ñaña shonte' pocollachno. Ñetñapa' e'ñe ñeñta cohuen entete't.

²⁹ Atteñapa' chap allempo cha'nom Lot ñeñt anetsrot. E'ñe ñeñte yetrocma allempo cha'nom Lot allot, Yomporña pue'ntañot a'shoranet tso' ñeñt shemashrepñeñeno' huorten, ñeñtña e'ñe a'cllatuerrahueter allempo.

³⁰ Attecmach perreterr allempoch norretuerra na Ñeñten Acheñetosets.

³¹ Tarraña allempoch norrterra na sapa' arepa'chña aña soctape'cheno ñeñt patso'marecpa, atet ñerra'mrrate' puesheñarr ñato' a'yote'tsenach pa'paclo't arepa'chña be'tosatsterro ama't e'ñe mamesha pa'paclo' attoch yoratsre'tnoma. Amapa' ñerra'm puesheñarr pa'mro'tsenpa' arepa'chña onatsterro.

³² Seyerpuepa'chña atet pa' ahuat Lot puetapor ñeñt atarr morrentnomaya ñeñt patso'marecpa.

³³ Ñaña ñerra'm esesha' e'ñe aña e'nenet o'ch correna atomat attoch e'ñe coshenet arr patsro, ñetñapa' a'chencaterretcha' ñañeñeta. Tarraña ñerra'm esesha' e'ñe pocte' entene' o'ch es sehuanmuet ñeñt atet muenenet ñeñt e'ñe ñocpueta arr patsro ñeñtña acheñerpa' corretsach pocsheñeshocmañen e'ñe tayoteñ errponañohuen.

³⁴ Po'ño'chca'ye o'ch notas atetcha'ca'ye perra allempoch nohuerra, puesheña'tetspa' anmare'tterretcha'; ama't ñeñt e'ñe pamo'ts pene', ñeñtñapa' allach asa'nmare'tterra.

Atet ñerra'm tsapo all manrrenet epsheño'maret, puesheñarrpa' anmare'terrach, po'psheñeñña' allach asa'nmare'terra.

³⁵ Amapa' ñato' allempopa' allo'tsencha' epsheña coyanesha' ñeñt' parro puetse'tets mapyo ñeñtpa'cho'ña puesheñarrpa' anmare'terrach ñaña po'psheñeñña' allach asa'nmare'terra.

³⁶ Amapa' ñato' allempopa' allo'tsencha' ñaña epsheña ñeñt' e'ñe parro taruasenet pa'mro. Puesheñarrña' anmare'terrach, po'psheñeñña' allach asa'nmare'terra.

³⁷ Allempoña pueyochresha'pa' a'pto'chet, atet ochet:

—Partseshacha' ñeñtpa' ¿erra'tcha'ña atet perra?

Jesúsñapa' atet otanet toma'nteñtso:

—Ñerra'm erro'tsencha' ñeñt' rromue'pa' allcha'ña shontaña tse'm.

18

Atto atma'ntatarettena rretorranesha' ñeñt' chocma enamare'tene' juez attoch yepue'

¹ Allempoña Jesúsapa' alla serrpare'taterraneterr toma'nteñtso attoch eñochet ñeñt' poctetsa yocop chocmach yema'yochena amach yemuenme'chatsche ma'yochatsa.

² Ñeñto'marña allempopa' atet otanet:

—Paterr anetso allo'tsen puesheñarr juez ñeñt' po'taruas pene' o'ch e'ñe cohuen a'poctatan ñoñets acheñeneshacop ñerra'm esempo e'moñe'tannenet. Tarraña ñeñtña juezpa' atarr atsrre'mñañ. Ama't Yomporpa' ama añcha'na'tpahuoye' enteñe ama't e'ñe mamesha. Acheñenesha'pa'cho'ña ama't puesheñarrapa' ama acua'penaye' entenaneto.

³ Ñeñtña anetsropa' all ye'chena ñaña puesheñarr rretorranesha'. Ñaña' eñall po'psheñeñ ñeñt' e'moñe'tene', chocmach erro't peññañ ñeñt' ama pocteyaye. Rretorranesha'ñapa' chocmach sene't juezesho. Allcha' chocma atet otare'tenan juez: "Te'pa' nemneñ o'ch e'ñe cohuen peyenpa'n attoch pa'poctaton cohuen ñoñets añecop ñeñt' ne'moñe'tene'."

⁴ Juezñapa' ama't allponmat ama mueno o'ch yepue'. Tarraña rretorranesha' ñapa' chocmach sen juezesho enamare'tene' attoch a'poctatoñ ñoñets añecop ñeñt' e'moñe'tene'. Atteñapa' chap allempo cotape'ch juezpa' atet ot: "Napa' po'ño'ch ama't Parets ama nemcha'teñe; acheñenesha'pa'cho'ña ama't mameshapa' ama acua'penaye' nentaneto.

⁵ Tarraña añ rretorranesharpa' atarr atsrre'mo'chtana'tenen, epaye' huapame'tennana, o'ca'ye atarr a'mñechatna. Ñeñto'marña te'pa' o'ch neyenpue' allochñapa' amach alla huerrnane'te."

⁶ Allempoña Jesúsapa' atet oterrerr:

—Ama't se'mueñeña ñeñt' atet oten juez ñeñt' atarr atsrre'mñañ. Te'pa' oten ahuo'ch a'poctatan rretorraneshacop ama't ñapa' ñeñt' acheñer ñeñt' atarr atsrre'mñañ.

⁷⁻⁸ Ñeñto'marña te'pa' o'ch noterrerr: Yomporpa' elloña nanaccha' cohuen a'poctatonay ñeñtey o' acrerrey ya ñeñteycha' e'ñe puechemer pen ñerra'm yapa' chocmach ye'chore'teñ ama't yeto ama't ñaña tsapo. Napa' po'ño'ch o'ch notas, Yomporñapa' amach atomato, choch ye'mñote'; ñapa' e'ñechca'ye allorocma e'mñotey o'ch e'ñe cohuen a'poctatonay ñeñt' yocop. Tarraña te'pa' o'ch notas, ñerra'm esempoch nehuerra Ñeñten Acheñetosets, errponsheñate'ña nentuerrña arr patsro ñeñt' e'ñe cohuen name'ñenaya.

Atet ma'yochena fariseonesha' ñeñt' e'ñe cohuen entetsa, all ma'yocha ñaña po'psheñeñ e'ñe puellquñesha' ñeñt' atarr ochñañ entetsa

⁹ Po'pocheñoña Jesúsapa' atet serrpare'tatan allpon acheñenesha' ñeñt' e'ñe ñeta yemtetset tarro'mar ñetpa' e'ñe cohuen entyenet e'ñe ñañeñeta. Ñetñapa' ama't mameshapa'

ama cohuenaye' enteñetoña po'potantañ acheñenesha'. Ñeñto'marña Jesúsapa' alla toma'ntatanet, ñeñtpa' atet otanet:

¹⁰ —Eñall epsheña acheñ ñeñt sets Parets pa'paclo allcha' ma'yochoset. Puesheñarr ñeñtpa' fariseo ñeñt e'ñe ñañeña cohuen entetsa; po'psheñeñña' ñeñt puehquẽño'te'na cobra'yenan acheñenesha' quelle ñeñt gobiernocop.

¹¹ Ñeñtña fariseopa' tomos all ma'yochosañ, ñeñtpa' atet otos: “Nompore, napa' o'ch neparasyoso'tosep tarro'mar napa' atarr cohuen acheñren, napa' ama atteyayno Nompore ñerra'm po'potantañ acheñenesha'. Ñetpa' atarr es puerratañpsanna'tyenet, ama pocteye' es panna'tyenet, atarrcha' cheta'yeñet coyanesha'chno ñeñt ama puetaporeyaye. Napa' ama atteye' Nompore nepeno. Napa' ama neshcare'teno atet pena añ acheñer ñeñt puehquẽño'te'na cobra'yene' acheñenesha' quelle gobiernocop.

¹² Napa' pate'tets semanapa' epochcha' ne'tore'tena Nompore p'ocop, ñaña ama't ora ñeñt allpon naguën chocma napuenep allpon poctetsa p'ocop ama't nediezmo Nompore.” Allohua huañ atet ma'yochena fariseo.

¹³ Po'psheñeñña ñeñt cobrets quelle ñaña' alla tomos a'yo't. Ñapa' eñotena atarr ochña't ñeñto'marña ñapa' ama cohueso enonet Yomporeshonet. Ña puellquẽño'tpa' nosan pot puesomapo. Ña puema'yocheño't atet otos: “Nompore, te'pa' o'ch pemor-renterra attoch e'ñe pe'pretna'huerrnan allohuen no'chñar tarro'mar napa' atarrca'ye ochña'ten.”

¹⁴ Jesúsña' atet o'terraneterr:

—Napa' o'ch notas, ñeñtña atet a'metene' po'chñar ñeñtña acheñerpa' e'ñe pocte' enteñ Yompor. Ñeñto'marña allempo ma'yochuapa' o' ahuerr pa'paclo e'ñe cohuen a'pretna'huare'terra po'chñar. Po'psheñeñña fariseo ñeñt ama a'metosaye po'chñar, Yomporña' arepa'tcha' pocteye' eñche. Tarro'mar allohuen ñeñt e'ñe cohuen entetsa e'ñe pommo'cheño't ñeñtña tsapatonetpa' amach esoshe'maye' entereto. Tarraña allohuen ñeñt ama esoshe'maye' entetso te', ñeñtña tsapatonetpa' atarrcha' cohuen enteret.

*Atto Jesúsapa' bensare'tam'psapan cheshanesh'a' ñeñt huapatoñet
(Mt. 19.13-15; Mr. 10.13-16)*

¹⁵ Ñaña allempopa' shonte' hua'cha'tachet cheshatollesha' Jesúsesho. Ñetpa' añecopña hua'cha'tachet o'ch a'p'lla'yesapanet Jesús attoch bensare'tam'psapanet. Jesúsña puey-ochresha' allempo entapan ñeñt hua'cha'tate' cheshaneshachno, ñetña'pa' ama pocteye' eñcheto o'ch anmoset cheshatollesha' Jesúsesho ñeñto'marña ama amnataretapueto.

¹⁶ Tarraña Jesúsña' allenta chore'tapanet, atet otapanet:

—Pocte'ña'cho' semnachñaca'yeña cheshanesh'a' onosetepa' e'ñe nesho. Amachca'ye cha sepatare'tatstapaneto tarro'mar allohuen ñeñt atarr neyemtenaya na e'ñe atet ñerra'mrrate' cheshatoll, ñetcha' o'patenetña Yompor po'cohuenña ñeñt atto ayochresha'ttena ña pue'ntaño't.

¹⁷ Po'ño'chpa' o'ch notas, ñerra'm esesha' ama e'ñeye' pueyemteño'teye' aguẽññañeto Yompor po'cohuenña amach atet perreto ñerra'm cheshatoll e'ñech yemtenana ñeñt cohuan'pene', ñetña'pa' amach pueyochreshaye' perraneto Yompor atto atarr ayochresha'ttena ña.

*Atto puesheñarr ñeñt huepueshameñ ñeñt atarr ec'llayoret ñaña'pa' eñorana'tosana Jesús
(Mt. 19.16-30; Mr. 10.17-31)*

¹⁸ Po'pocheño'ña puesheñarr ñeñt atarr añcha'taretetsa a'p'to'tosan Jesús, atet otos:

—Maestro, p'apa' atarr cohuen acheñre'p, te'pa' o'ch potapuen ¿errofena'tcha' ne'pañña na e'ñe cohuen attochña napa' corretsanch e'ñe tayoteñ ama't errponañohuen?

¹⁹ Jesúsña' atet o'tap:

—Eso'mare't p̄otenenña napa' atarro' cohuen acheñren. Arr arromñañenesha' ama't e'ñe puesheñarrapa' ama eñalleña ñeñt e'ñe cohuen acheñer. Ñapñaña Yompor ñeñt e'ñe po'ñoç cohuen.

²⁰ Papa' e'ñe peñotuen Yompor po'ñoñ all oteneý ñeñtcha' atet yepena e'ñe cohuen; ñeñtpa' atet oteneý: “Amach yechtapretyesatsto taporets; amach yemtsanna'tatsto; amach yetyesatsto; amach yetoma'tam̄psatsche yamo'ts e'ñe atfa; ñaña yemor-renteño'tpa' yem̄cha'na'chcha' yompor ñaña yachor.”

²¹ Ñeñtña a'p̄to'tene'pa' atet otererr:

—Napa' e'ñeca'ye cheshoteñ ora añechnopa' e'ñeca'ye netsotueñ.

²² O'ña atet otua Jesúsñapa' alla otererr:

—Eñallmeñca'ye paterr ñeñt pepalltena ñeñt ama atteye' pepena'. Te'pa' añcha'ña atet pe'pa' o'ch e'ñe pepomhuerr ora allpon ñeñt pechyen o'ch p̄apa'yera' huocchañneshachno ñeñt atarr es palla'yetsa attochña p̄apa' pecherrcha' ñeñt atarr nanac sherbets Yompor pue'ntaño. Allempochña pehuerrapa' o'ch p̄oçterren attoch e'ñe neyochresha' neperre'p̄ e'ñe poctacma.

²³ O'ña e'mhuan ñeñt atet och Jesús'pa' ñaña'pa' cha atarr lleca tarro'mar ñapa' atarr eçllayore't, shonte' pa'namen echyen.

²⁴ Jesúsña eñch ñeñt atet atarr llecapa' ñaña'pa' puellcapreteño'tpa' atet ot:

—Ñeñt atarr eçllayore'tpa' atarr nanac echarr attoch agapoñet Yompor po'cohuenña ñeñt atto ayochreshattena ña.

²⁵ Ñehua, ñeñtpa' atetcha' netma'ntacha. Po'ñoç yapa' yeñoteñ berr añecmuen allpon ñerra'm huaquesh* atarrca'ye torrapo' o'ch esho'tosa añeñollponatollo atet ñerra'mrrate' acosh puetatollo. Ñeñtpa' atetca'ye penaña acheñ ñeñt eçllayore't ello atarr torrapo' o'ch agapan ñaña Yompor po'cohuenña ñeñt atto ayochreshattena ña (tarro'mar ñetpa' ama mueneñeto o'ch sehuanmuet ñeñt atarr morrentenet ñet attoch pueyochresha' perranetañ Yompor).

²⁶ Ñeñtña e'muene' atet oten Jesús ñetña'pa' atet ochet:

—Tarraña ñerra'm atette'pa' amate' esesha' a'queshp̄atare'tterrtso ama't puesheñarra tarro'mar yapa' yeñoteñca'ye huaqueshpa' amaca'ye esho'tenoña acshequeto.

²⁷ Jesúsñapa' atet oterraneterr:

—Sa arromñañeneshaspa' amach es errotenaye' apen senteno. Tarraña Yomporpa' ama eñalle ñocop ñeñt atarr torrapo' enten.

²⁸ Pedroñapa' atet och:

—Partseshacha' po'ñoç yapa' o' e'ñe yesuanom ora allohuen ama't yepaclohuen attoch e'ñe yoçterre'p̄.

²⁹ Jesúsñapa' alla oterraneterr:

—Po'ñoçhpa' o'ch notas, allohuen erra'tsencha' acheñer ñeñtcha' e'ñe sehuanmue' allohuen ama't pa'paclohuen, ñato' puetapor, pa'mo'nasheñnesha' ñato' pompor, pachor, ñato' ama't ñaña puechemeresha' attoch e'ñe cohuen sherbaterrñañet Yompor po'cohuenña atto ayochreshattena ña,

³⁰ ama't erra'tsencha' ñeñtcha' sohuanmue' allohuen, elloña ñetpa' o'ch alla aguërret shonte' esocmañen ñeñt atarr cohuen ama't te' allempo e'ñe correnet, elloña tsapatoneñapa' o'ch aguërret ñeñt alloch ñetpa' corretsetach beñecpuen.

*Allempo Jesús'pa' alla eñotaterraneterr ñapa' chocmach amtsare'tterra
(Mt. 20.17-19; Mr. 10.32-34)*

* **18:25** Ñehua, Jesús añ toma'ntatanet camello ñeñt payara penet all pa'nyo, ñeñt e'ñe allpon ñerra'mrrate' huaquesh.

31 Ñeñt pueyochresha' ñeñt çharra' puechena epsheña, Jesúsña'papa' ahuanmanet el-lonet, allña'papa' atet otosanet:

—Te' po'ñoçhpa' o'ch ahueney Jerusaléño. All ora allpon quellca'yesone't ñeñt a'mta'yesaye't Yompor po'ñoñ ahua't ñeñt'cha' atet na'paretterra na Ñeñtencha' Acheñetosets, te'ña'papa' o'ch e'ñe etsotuerra ñeñt atet anaret nocop.

32 Tarro'mar te'pa' pomuerrnetcha' po'poñ acheñesho ñeñt ama judioneshayaye. Allohuen acheñenesha'pa' o'ch achm'are'ternnet, o'ch atserrpatse'ternnet, pue'moñe'teñoçetanpa' o'ch a'coshare'ternnet.

33 O'ch nashtaretterra, atotcha'ña muetserrnet. Tarraña poma'pamtañoña'papa' o'ch alla netanterra.

34 Ama't atet otuanet, ñetña'papa' ama eseshaye' eñotaye ñeñt atet serrpare'tatanet. Ama't puesheñarroçetapa' ama't mameshapa' ama çhapanetoña pueyoçhreto ñeñt atet otenanet.

Atto Jesús'papa' cohuaterran puesheñarr aporo'yet ñeñt jerico'marnesha' (Mt. 20.29-34; Mr. 10.46-52)

35 All oñenet o'ña çhappochet anetso Jericó'papa' allña e'ñe toñetopño'papa' all anen puesheñarr aporo'yet ñeñt çhocma enamuetts quelle.

36 Ñeñtña aporo'yet'papa' o' e'mapan shonte' acheñenesha' ñeñt metaçhets all toño, ñaña'papa' allenta a'p'to'tanet:

—¿Eso'mare't shonte' metaçhenña acheñenesha'?

37 Ñetña'papa' atet ochet:

—Añca'ye huetsa Jesús ñeñt nazareto'marnesha'.

38 Ñaña'papa' allenta rrana huomencpa' atet otapan Jesús:

—Pemueraye'chnomna Jesúsocha' ñaña. Papa' ñeñt'papa' Davidna'tarep.

39 Acheñenesha' ñeñt otaçhetsa ñetña'papa' çha muene' che'ptare'tnomet, atet otoset:

—O'hua pemma.

Aporo'yetña'papa' elloña alla rranerrerr atet oterranerr Jesús:

—Ñeñt'papa' Davidna'tarep, pemueraye'chnomnañaca'ye.

40 Allempoña Jesús alla tomos otosan acheñenesha':

—Sanmon arr nesho.

O'huapapa' Jesúsña'papa' atet otaç:

41 —¿Eso'tña penmen ñeñt'cha' atet neçosep?

Ñaña'papa' atet och:

—Añca'ye Ayochreshate nemnen o'ch pecuatnomuen attoch o'ch cohuen nenterrapa.

42 Jesúsña'papa' alla otererr:

—Pecuerrepa'ch, tarro'mar atto atarr peyemtapna na ñeñtca'yeña o' e'ñe a'crraterreç.

43 E'ñepa'tcha' allorocma e'ñe cohuen enterra. E'ñe cohuerrtsapa' çha co'ta'nmue' ñaña Jesús, allenta atarr aye'choçhtatnoman Yompor all co'ta'nenan Jesús. Atto' enteñ allohuen acheñenesha' ñetpa'çho'ña e'ñe cohuen aye'choçhtatneññañet Yompor.

19

Atto Jesús epuet ñaña Zaqueo eñorana'tannenet

1 Allempoña Jesús'papa' çhap all anetso Jericó, all oñmos anetso'mar.

2 Allña'papa' allo'tsen puesheñarr yacma ñeñt soçhetsa Zaqueo ñeñt pa'm'cha'tareter peñ allohuen ñeñt cobra'yene' acheñenesha' quelle gobiernocop. Ñaña'papa' atarr ec'llayoret.

3 Zaqueoña'papa' atarr mueneñ o'ch entapan ñeñt otenet Jesús. Ñehua, ñapa' amach errotenot entapano Jesús tarro'mar shonte' acheñ ñeñt emchorra'nenaya all oñen ñaña Zaqueopa' allponmetolla.

⁴Ñeñto'marña ñapa' mata allenetcha' oñem, a'tapos tsacho ñeñt pa'so'cheñ sicómo'rech allotcha' entapan Jesús tarro'mar allcha' oñem.

⁵Allempoña chap Jesús e'ñe ñesho, cohuostsa enonetpa' alla entos, ñaña' atet otos:
—Zaqueo, pesuerra tecma. Te' napa' e'ñe poctennana o'ch nechap pepaclo.

⁶Ñaña' allenta sohuerra tecma e'ñe pocsheñsha' agapañ.

⁷Allempoña acheñenesha' atet eñchet, ñetña' ama't mameshapa' ama pocteye' es entaye. Ñetpa' atet otanna'tyeset:

—Eso'marcha'ca'yeña be'tosofña Jesús allcha' mos añ acheñer pa'paclo ñeñt atarr nanac ochñať.

⁸Zaqueoña' allenta tomhuerrpa' atet otapan Partseshá':

—Te'pa' o'ch pe'mñotosen Ayochreshate. Ñeñt ora allpon nechyen, te'ñapa' o'ch napa'yer pueshmet huocchañnesha'chno. Po'ño'ch allempo es neprratam'pesyeseť puesheña'tetspa' te'ñapa' pa'tatsoche'tatscha' napuerranet.

⁹Jesúsña' atet otos:

—Te'ñapa' o' chapanet allohuenacop ñeñt ye'chetsa añ pocollro alloch a'queshpataretterret. Ama't ñapa'cho'ña Abrahamca'ye po'm'reneñ.

¹⁰Na Ñeñten Acheñetosets ñeñto'marña nohuapa añe patsro o'ch ne'nyesos acheñenesha' ñeñt chenquetsa ñeñtcha'ña na'queshpatyesos.

Arrpa' all atma'ntatarettena charrasheña ñeñt aparettatsa quelle e'ñe allpone-shapa'ttsocma

¹¹Acheñenesha' o' e'mñotenet shonte' ñeñt atet serrpare'tatanet Jesús ñeñt atet pena Yompor po'cohuenña, ñaña Jesús'pa' o' chapmoch Jerusaléño. Ñeñto'marña ñetña' cha otenapuetañ allempocmach etsota allempopa' ñach añcha'tarettsa Yomporeshot arr patsro. Ñeñto'marña elloña ñapa' toma'ntatanet po'poñ.

¹²Ñeñt'pa' atet otanet:

—Eñall puesheñarr acheñ ñeñt e'ñe cohuen añcha'na'tpo' entyen allohuen acheñenesha' ama't e'ñe pamo'tseshohuen. Ñeñtña' acheñerpa' arr sechena ba'chayo po'poñ anetso allotcha' apet llesens attoch esempoch huerrapa' o'ch añcha'taretetuerra all pa'nyo.

¹³Allempo ama sena'pa' agotatnoman charrasheña pa'taruasañer ñeñtcha' apa'yesnom allponeshapa'tets quelle e'ñe puesheña'ttsocmuet. Allempo apa'yesnomanetpa' atet otyesnomanet: “Añ quellepa' o'ch setaruasach nocop. Esemposch nehuerrapa' allempochña e'ñe neñotuerrnas e'ñe puesheña'ttsos errponte' quelle segana'yesa ñeñt nocop.”

¹⁴Tarraña patantarr acheñenesha' ñeñt pa'nyo'marnesha', ñetña' atarr e'moñe'teñet. Ñeñto'mar allempo ta ñeñt anetsro, ñetña' mueñet allponsheña ñeñtcha' eñososets all sen o'ch oteñeta' allo'marnesha': “Yapa' ama yemno o'ch sene' añ acheñer o'ch añcha'taretta yocop.”

¹⁵Tarraña ama't atet petañ ñocopña' chocmach apet llesens attoch huerra o'ch añcha'taretetuerra all pa'nyo pamo'tseshacop. Allempoña cherrpa' agotatuerran pa'taruasañrenesha' ñeñt apa'yesnom quelle ahuaña. Ñapa' añecopña agotatyerranet o'ch eñotuerranet errponte' quelle ganatyesañet po'çllayor e'ñe puesheña'ttset.

¹⁶Attoña ap'cha'huerranet ñeshopa' ñeñt ñanom huapatsapa' atet otos: “Ayochreshate, ñeñt allpon papa'nmuen ahuaña quelle, ñaña' ello neganaterperr peçllayor charroch.”

¹⁷Pamo'mte'ñapa' atet otuer: “E'ñe pocte', papa' atarr cohuen pesherbeneñ. Ama't allponatolla napa'nmañ ahuaña, pa'ña' atarr cohuen pesherbaton. Ñeñto'marña te'pa' o'ch nenuerre'p' charracop anets allcha' pa'ñcha'taretterra pa'.”

18 Allempoñapa' o' huapa ñaña po'psheñeñ pa'taruasañerpa' ñapa'cho'ña atet otos: "Ayochreshate, na ñeññ allpon papa'nmuén ahuaña quelle, nañapa' ello neganater naperr peçllayor anmaroch."

19 Pamo'mte'ñapa' atet otuer: "E'ñe pocte', te'pa' o'ch nenuerreḗ ḗaña amnarecop anets allcha' ḗa'micha'tareḗterra ḗaña."

20 Allempoñapa' huapa po'psheñeñ pa'taruasañer, ñapa'cho'ña atet otos: "Ayochreshate, arrpa' ñeñña allponara ñeññ e'ñe allpona papa'nmuén ahuaña quelle. Napa' alla nañño'tennaḗ e'ñe cohuen nepennaḗ pañello."

21 Napa' cha nemicha'teneḗ tarro'mar neñoteneḗ papa' amaca'ye matsrre'mñape. Papa' chocmaca'ye peprratamḗpesyen ama't ñeññpa' ama ḗoyaye, ñaña chocmaca'ye peḗotatyenna ñeññ ama ḗaye' nare'tatyenaye."

22 Pamo'mte'ñapa' atet otuer: "Paña po'ñoçhpa' amaca'ye cohuenaye' pesherbennen ama't e'ñe mamesha. E'ñe atet ḗotenen napa' atarro' atsrre'mñañen te'ñapa' po'ñoçh atetcha'ca'ye natsrre'moçhtana'tuerreḗcha'. Ñerra'm po'ñoçh peñotennañ napa' atarr atsrre'mñañeneñ, ñerra'm po'ñoçh chocma neprratamḗpesyeneñ ñeññ ama noyaye, ñaña napa' ñerra'm po'ñoçh chocma neḗotatyeneñ ñeññ ama naye' nare'tatyenaye,

23 ñerra'm po'ñoçh atet pentennañpa', eso'maruañaca'yeña ama bancoye' penennanoña neçllayor allochñapa' te'ña o' nehuerrapa' nagapuerreñcha' neçllayor allo atontateñet."

24 Allempoña pamo'mte'pa' atet otan ñeññ tomcha'tyets all: "Te'pa' o'ch seprratamḗpesuer quelle, o'ch sapuer ñeññ ganatene' çharroch neçllayor."

25 Ñetñapa' atet ochet: "Ayochreshate, ñapa' echenanca'yeña shonte' quelle ñeññ ganena çharroch."

26 Pamo'mte'ñapa' atet oterraneterr: "Tarraña ama't atteñpa' te'pa' o'ch notas, ñeññ es echets shonte' e'ñe puesherḗbateñoḗet pamo'mte' ñetña ellonetpa' o'ch alla aparetterret po'poñ aton. Tarraña ñeññ ama es echetsopa' ama't allponatolla ñeññ eçhyenetañ aprratamḗpsareḗterretcha'.

27 Ñaña te'pa' añña ñeññ ne'moñe'tene' ñeññ ama muenenaye o'ch na'micha'tareḗta ñocpuet, te'ña sapa' o'ch sehuapatamet attoch semtsanatosanet e'ñe arr nesho."

Allempo çhap Jesús Jerusaléño

(Mt. 21.1-11; Mr. 11.1-11; Jn. 12.12-19)

28 Allempoñapa' ahuerre Jesús Jerusalénoneñ.

29 Çhapmochet aspeno ñeññ pa'so'cheñ Olivopen allo'tsen anets ñeññ Betfagé ñaña Betania. O' çhapmochet all Jesúsñapa'

30 atet otosan epsheña pueyochresha':

—Sapa' o'ch sota o'ch seçhap a'yenteye' e'ñe allara anetso. O'ch seçhap allpa' allcha' sentos ashen rre'ptor all huanquëñet; ñeññpa' ama't puesheñarra acheñ ama monteña'. Ñeñña ashenpa' o'ch sepyamḗpsospa' o'ch sanerrnan arr.

31 Ñerra'm esesha'ch sotapue': "¿Eso'mare't sepyamḗpeñña ashen?" sañapa' atetcha' sotosanet: "Yepartsesharca'ye muenene'ña añ ashen."

32 Allempoña ñeññ mueñapa' ñetñapa' ahuanmuet all anetso. Allñapa' atetcho' entoset e'ñe atet otanet Jesús, allo'tsenca'ye ashen rre'ptor all huanquëñet.

33 Allempo pueyamḗpsosetpa' pamo'mte'ñapa' atet otapanet:

—¿Eso'mare'tcha'ña sepyamḗpsosnayña yashanor?

34 Ñetñapa' atet otosñañetña ashen pamo'mte':

—Yepartsesharca'ye muenene'ña añ ashen.

35 Allempoñapa' anerretña ashen Jesúsesho. Nohuerret pa'shtam ashnache'ñopa' montatueret Jesús.

³⁶ Allempo monta'nma Jesús allenet sen, acheñenesha'ñapa' totma'tyesoñet pa'shtam toño allcha' oñem.

³⁷ Atteñapa' o' chapmochet Jerusaléño. Allempo a'nososet Olivoṗnot shonte' acheñenesha' ñeñt ame'ñenaya Jesúsapa' ñetñapa' alloñeñ e'ñe cosha'rrtoset. E'ñe pocsheñesha' ahuanenet, pano'tatse'teñesha' aye'chochtatneññañet Yompor, tarro'mar atarr cohuen entnenet atfo Jesúsapa' atarr orrtatenanet Pompor po'partsoña.

³⁸ Ñetñapa' atet otyesnenet:

—¡Aye'chochtaterrapo'ch Ancha'taret Jesús ñeñt llesensen Yompor! ¡Cosherrretpa'ch ama't ñeñt pue'ntaño'tsen! ¡Aye'chochtaterrapo'ch ñaña Yompor Parets ñeñt pue'ntaño'tsen!

³⁹ Fariseonesha'ña puesheña'tets ñeñt allo'tsa'yen ñeñt ama ame'ñenaye Jesús, ñetñapa' atet otapet Jesús:

—Maestro, peche'ptare'taye'chyesnomñaca'yeña peyochresha'chno attoch amach allo'na atfa a'chotatsetnenpeto.

⁴⁰ Tarraña Jesúsñapa' atet otosanet:

—Napa' o'ch notas, ama'tcha' atet notatstanetañpa' muema'rrtetañcha', mapye'chnoñapa' puerranare'teñoñetpa' na'chotenayach.

⁴¹ Allempo o' e'ñe chapmochet atfo entosan anets Jerusaléñ, Jesúsñapa' atarr ya'na'tosan jerusaléño'marnesha'.

⁴² Allpa' atet eñorosa ñocpuet:

—Atarr nemneñeñ ama't e'ñe tayecma po'ñoñ sapa'cho'ña o'te' señotereñ errotencha' seperra attoch Yomporpa' o'ch a'queshṗaterrsoñ e'ñech socsheñesha' socrrerrañ. Tarraña saña teme'ttsen ñeñtñapa' ama't mameshapa' ama'chennaso seyo'chro.

⁴³ Tarro'mar napa' o'ch notas, po'ñoñ o'ch chap allempoch ñeñt se'moñe'tene'pa' concha'tamṗerrnasetcha' sa'netser attoch e'ñe rrochtamṗerrset allenñateñ safepoṗpa' hua'cha'tonasetcha', attoch amach errenet seyeterro ama't e'ñe puesheñarrotesa.

⁴⁴ A'mata'tuerrnasetcha' ora allohuen sa'netser attoch sepacle'nachña e'ñe sa'tpetse'tuerre' allohuenes ama't sacñeñaretolleshohuen. Allo sorraten sepaquëll ama't pa'rra mapue'pa' amach a'puerro, tarro'mar sapa' ama semno o'ch saguërrñañ Yompor pue'muereña allempo mueneñeñ o'ch yenpuerrsoñ saña.

*Atfo Jesúsapa' a'cohuentatosan Parets pa'paquëll
(Mt. 21.12-17; Mr. 11.15-19; Jn. 2.13-22)*

⁴⁵ Allempo chap Jerusaléño Jesúsñapa' ahuos Parets pa'paclo. Be'tosospa' allotñapa' cha'nma'cha'tatuosan ñeñt pomatsre'tyetsa all.

⁴⁶ Allñapa' atet otosan ñeñt pomatsre'tyetsa:

—Yompor po'ñoñ ñeñt atet anuaret ahua'toteñ, allñapa' atet oten Yompor: “Añ ñeñt nepaquëll nepenpa' añe'cpaca'yeña sherben allecmach ma'yochennet”; tarraña sañapa' atet sepeññañña Yompor pa'paquëll atet ñerra'mrrate' eñeñ ñeñt e'potyetsa mapuet-pono'mar.

⁴⁷ Pa'te'tets yet Jesúsapa' chocmach sene't Parets pa'paclo all ye'chatenanete't Yompor po'ñoñ. Añña ñeñt pa'm'cha'tare'ternesha' pen allohuen judionesha' po'cornaneshar ñaña añ ñeñt atarr etsotayenayeñ ñoñets ñeñt atet anaret ñaña po'potantañ ñeñt añcha'tare'tetyetsa all anetso, ñetñapa' Jesúsapa' atarr o'patyenet attoch muetsatachet.

⁴⁸ Tarraña ñetpa' ama errot peto tarro'mar allohuen acheñenesha'pa' atarr yemteññañet Jesús atfo atarr cohuen serrpare'tatenanet Yompor po'ñoñ. Ñetpa' ñeñtña atarr cohuen entyenet.

20

*Atto allsensarettena Jesús
(Mt. 21.23-27; Mr. 11.27-33)*

¹ Po'pocheño pamtarr Jesúsñapa' alla yečhaterranerr acheñenesha' Parets pa'paclo. Allpa' añ serrpare'tatenanet cohuen ñoñets alloch yequeshperra. Atteñapa' huačha'toña shonte' amčha'tareñnesha' —ñeñt pa'mčha'tareñnesha' pen allohuen judionesha' po'cornaneshar ñaña allponsheña ñeñt atarr etsotayenayeñ ñoñets ñeñt atet anaret ñaña po'potantañ ñeñt pompornesha' pa'yen allohuen judionesha'.

² Ñetñapa' atet otoset Jesús:

—Ñehua, yapa' añecop yehuena yemneñ o'ch pōtey ¿erroťe't apuenpetña llesens? ¿Esesha'tña pa'puene'ña llesens attot pōrrtatyenña ñeñt čhocma attecma pepa'yena?

³ Jesúsñapa' atet otapanet:

—Ñehua, napa'čo'ña nemneñ o'ch na'pō'tapas saña ama't patrra ñoñets. Sapa'čo'ña o'ch sotosen,

⁴ ahuañmo'cha allempo apate't Juanañ Yomporecop ñeñtpa' ¿eseshatña llesense' ñato' Yompor amapa' acheñate' apue'ña llesens? Nemnen o'ch sotosen ñeñt atet soctape'chen sa.

⁵ Ñetñapa' e'ñe a'nahua otanna'tyeset:

—Ta'm errotča'ca'ye yochte'. Ñerra'm čha yoch Yomproshotča'ye apetña llesens, ñaña'pa' čhate'ca'ye otey: “Ñehua, sañapa' eso'mare'tña ama se'mñocheña ahuaña allempo serrpare'tatosan acheñenesha'.”

⁶ Elloña ñerra'm čha yoch acheñeshoča' apet llesenspa' acheñenesha'ñapa' čhate' e'moñe'tyet. Pue'moñe'teñoťetaypa' čhate' rrollapechyet tarro'mar ñetpa' e'ñe cohuen eñchete't Juanañ, čhocma otyenet ñapa' ñeñtca'yeña a'mtose' Yompor po'ñoñ.

⁷ Ñeño'marña ñetpa' atet ochet Jesús:

—Ta'm yapa' amaca'yeña yeñoteñe; errotte' huapaña Juan, errotte' apetña ñaña llesens.

⁸ Allempoña Jesúsapa' atet oterraneterr:

—Napa'čo'ña te'pa' amach notaso saña allot aparetenña naña llesens attot atet nepa'yena.

*Atet atma'ntatarettena ñeñt ataruasañečno ñeñt ama cohuenayaye
(Mt. 21.33-44; Mr. 12.1-11)*

⁹ Allempoña Jesúsapa' alla serrpare'taterranerr acheñenesha' toma'nteñtso, Ñeñtpa' atet otanet:

—Eñall puesheñarr acheñ ñeñtña nare'tanatatnomue' shonte' uvach, pa'muerñapa' e'ñe ora uvachmatatue. E'ñe allponmatatsapa' o' na'nman po'potantañ ñeñtča' taru-asatats uvachmo ñeñtča' coyerrahuet allpon ñerra'm esempoch toteñet. Allempoña ñapa' ahua' bačhayo po'poñ anetso alla atomat.

¹⁰ Chap allempo yen uvachllompa' ñaña'pa' mueñerran po'psheñeñ pa'taruasañer o'ch enamuerpa' uvachllom po'psheñeñ pa'taruasañresho ñeñt cohuañpene' uvachma'. Allempoña čhen allpa' enamhuenan ñeñt allpon o'patena pamo'mtayet arepa'tča'ña es apapuenayeña uvachllom, elloña ñeñtapa' čha nalle'tapueñet, o' alla mueño'teret e'ñe atta.

¹¹ Allempoña ñeñt pamo'mte' pen uvachma'pa' o' alla mueñerranerr po'psheñeñ pa'taruasañer. Allempo čhenerr allpa' ñapa'čo'ña čha es otnare'tapetpa' o'čo' nalle'tapet o' matateret e'ñe atta.

¹² Allempo poma'pocheño o' alla mueñerranerr po'psheñeñ pa'taruasañer. Ñeñtpa'čo'ña allempo čhenerr ñaña allpa' ñaña'pa' čha atarr atserrpatse'tapetpa' o'čo' alla matateret.

13 'Allempoña ñeñt pamo'mte' penetpa' atet ot: "Te'pa' errotuachñaca'yeña nepe'te'. Te'pa' o'ch nemñe ñeñt e'ñe na nechemer ñeñt atarr nemorrentena. Ñato'rraña ñeñt'pa' mecha'na'tapetcha'."

14 Arepa'tcha'ña ama't mameshapa' mecha'na'tapeto. Allempo entapoñet puechemerpa' atet otanna'tyeset: "Añmapa' ñeñtca'yeña puechemer ñeñtcha' o'paterraya pompor puenarenñ esempo. Ñapa'cho'ña te'pa' o'chca'ye yemtsañ allochñapa' yachca'yeña e'ñe o'paterrayaña pompor puenarenñ."

15 Allempoñapa' o' rromapet o' chetare'tnomet narmetsmo a'yoñ, allña muetsapoñetña ñaña puechemer. Arrpa' allohua atet toma'ntata Jesús e'ñe ñañaña.

Jesúsñapa' atet oterranerr acheñenesha':

—Ñehua, te'pa' o'ch notas, ñeñt pamo'mte' pen ataruasañechnopa' atetcha' p'ohuerranet.

16 Ñerra'm esepoch huerranet, pamo'mtayetpa' a'cllatuerranetcha', narmetsma'ña o'ch apuerran po'potantañ.

Acheñenesha'ñapa' allempo e'mueñet Jesús atet oten, ñetñapa' atet ochet:

—¡Ñeñt'pa' arepa'chña atteye' patsterro, Neyompor-re!

17 Jesúsña atta cohuanetpa' atet otanet:

—Ñerra'm ama atet pueperra'chepa' eso'mare'tña otenña Yompor po'ñoñ ñeñt anuaret ahuatoteñ, ñeñt'pa' e'ñechca'ye po'ñoñ atet perra. Tarro'mar ñeñt'pa' atet oten nocop, all atma'ntatareten mapue'. Ñeñt'pa' e'ñe atet anuaret Yompor po'ñoñ ahuatoteñ:

Añ mapue' ñeñt ama pocteye' entyeno ñeñt tomatyene' pocoll, ñeñtña te'pa' o' anaretterra ñeñtcha' ello atarr cohuen sherberrets e'ñe atet ñerra'm quellpach allo e'ñe cohuen echarr orratenet pocoll.

18 Elloñapa' atet otanet:

—Allohuen ñeñt epoto'tetsa añ mapyopa' atarrcha' atserrpenanet, ñaña añ mapue'pa' ñerra'm eseshesho mata'nompa' e'ñech a'tpetse'tuosanet.

Atto a'p'to'chet Jesús, pocte'te' o'ch tsa'tet impuesto

(Mt. 21.45-46; 22.15-22; Mr. 12.12-17)

19 Añña ñeñt atarr etsotayenayeñ ñoñets ñeñt atet anaret ñaña ñeñt pa'm'cha'tareñenesha' pen allohuen judionesha' po'cornaneshar, ñetña allempopa' o' eñochet ñetca'ye atma'ntataretenet, ñeñt'pa' ñocpuetca'ye atet eñoreñaña Jesús. Allempoña ñetpa' atarr mueneñetañ o'ch rremuet Jesús e'ñe allorocma tarraña ama eseshaye' rromaye tarro'mar ñetpa' mecha'teñet acheñenesha'. Ñehua, acheñenesha' e'ñeca'ye cohuen enteñet Jesús.

20 Tarraña ñetpa' aña atarr e'nenet attoch ama't parrochapa' o'ch eñorachet ñeñt ama pocteyaye ama't ñaña gobiernocop, allochñapa' attoch rremuet o'ch pomueñeta' añcha'tareñesho ñeñt nen gobierno' Romoñ ñeñt añcha'tareñtetsa allo'marecop. Atteña ñetñapa' e'ñe a'nahua mueñet allponsheña acheñ Jesúsesho ñeñt ottetsañ ñerra'mrrate' atarr cohuen acheñ, tarraña ñetpa' añecpa amñareñtet attoch e'ñe puehquëñoñ po'ñoñotetpa' o'ch eñorachet ñeñt ama cohuenayaye.

21 Allempoña chapuet ñeshopa' atet otoset:

—Maestrocha' yapa' yeñoteneñ ñeñt atet peñen ñaña atto peychatyen Yompor pocta'ña ñeñt'pa' e'ñe cohuenacma. Papa' allohuen acheñ e'ñe cohuen pentueñ; ama aña ñapueñ pemorrenteno ñeñt atarr añcha'na'tpo' entyen allohuen acheñenesha'.

22 Ñeñto'marña te'pa' yemneñ o'ch peñotatapuey erra'tsente'ña e'ñe po'ñoñ co-huentetsa. ¿Pocte'te' o'ch yetsa'ta impuestos añecop ñeñt añcha'tareñtetsa Romo, ñeñt ama judioneshayaye? Ñato' amate' pocteyaye yocop ñeñtey judioneshay o'ch yetsa'ta añcha'tareñ romo'marnesha' ñeñt ama judioneshayaye.

23 Jesúsñapa' eñotanet ñeñt atet shecare'teñetañ, ñañaapa' atet otanet:

24 —Ñehua, segaten puetallarr quelle.

Gatuetpa' atet otanet:

—Ñehua, sapa' o'ch soten, ¿essha't sentenña ñeñt atma'ntatarettetsa all? ¿Esha't pa'so'cheñ ñeñt aquellcarettetsaña all?

Ñetñapa' atet ochet:

—Añcha'taretca'ye atma'ntatarettetsaña all ñaña ñoca'yeña pa'so'cheñ ñeñt aquellcarettetsa all.

25 Jesúsñapa' alla oterraneterr:

—Ñeñtepnapa' añ poctetsa o'ch yañ añcha'taret ñeñt ño ñeñt atet poctetsa gobiernocop; tarraña ellonet ñeñt Yomporo o'ch yañ ñaña ñeñt atet poctetsa ñocop.

26 Attoña ama't puehquëñoñet atet otyenetpa' ama errotenoñ eñoracheto ñeñt ama pocteyaye ama't ñaña gobiernocop tarro'mar allohuen acheñenesha' ñeñt allo'tsa'yen e'ñe cohuen enteñet atet anapuenanet Jesús. Ñeñtña ashcañnesha'pa' atta cohuanrrorteñet tarro'mar atarr cohuen anapuenanet Jesús. Ñeñto'marña ñetpa' ama errotenaye' otenaye' entereterro.

Atto a'pto'chet Jesús, ñerra'm po'ñochte' atanterrapo' rromot, ta'm, allempopa' errotencha'ña yeperra

(Mt. 22.23-33; Mr. 12.18-27)

27 Allempoñapa' hua'cha'toña ñaña patantarr ñeñt saduceoneshatets. Ñehua, ñeñt saduceoneshatets ñetñapa' ellonet echenet poctañña ñeñto'mar atet otenet amate' errotenoñ yetanterroña rromot ama't errponaña.

28 Ñetñapa' atet otoset Jesús:

—Maestrocha' ahuat Moiséspa' atet quellconay ñoñets ñeñt poctetsa ñeñtcha' atet yeña. Ñeñtpa' atet otenña Moisés po'ñoñ: Ñerra'm esempo rroma yacma o'ch sa'nman puetapor tarraña ama chemere'tnomopa' añ poctetsa pa'mo'nasheñcha' alla yorerre'ña po'norrar allochñapa' attoch eñalletteraña ñeñtcha' puechemer perr pa'mo'nasheñeñ. Ñeñtpa' atetca'ye quellca'nmonayña Moisés ahuat.

29 Ñehua, te'pa' eñall cancherrsheña ñeñt e'ñe poctacma pa'mo'nasheñecmuet. Ñeñt pueheñarr popo'naretpa' o' yoran coyanesha' ñeñt puetapor pa'. E'ñe allponmatatsapa' o' rromaña, yacma ama chemere'tnomo.

30 Allempoña ñeñt po'rrocho'merpa' o' yorerran pa'mo'nasheñeñ puetapor. E'ñe allponmatatsapa' ñapa'cho'ña o' rromuerrerr ñaña, ñeñtpa'cho'ña ama chemere'tnomo.

31 Allempoña po'psheñeñ pa'mo'nasheñpa' o' alla yorerranerr ñaña po'norrar. E'ñe allponmaterrtsapa' ñapa'cho'ña o' rromuerrerr ñaña, ñeñtpa'cho'ña ama chemere'tnerrerro o' atta rromuerrerr. E'ñe attecma pohuet cancherrsheño'maretpa' e'ñe pueyuarochet ñeñtara pueheñarr coyanesha'. E'ñe allohuenetpa' e'ñe attecma pet colla'huet ama't pueheñarrotetapa' ama chemere'tnomueto.

32 Allempoña o' rromaña ñaña coyanesha'.

33 Te'ña ñerra'm po'ñochte' yetantena yerromñoñpa' añña coyanesha' allempopa' ¿essha'tcha'ña puetapor perre' tarro'mar allohuenet cancherrsheño'maretpa' e'ñe pueyuarochet?

34 Allempoña Jesús otanet:

—Ñehua, atet ye'chen acheñenesha' arr patsro, chocmach sena'tenet, coyanesha'pa'cho'ña apueñet ñeñtcha' puerrollar pa'.

³⁵ Tarraña esempohuañen allempoch tanterret po'pocheño allohuen ñeñtcha' e'ñe pocte' entuerr Yompor allochñapa' attoch o'ch alla correrret po'pocheño, ñetña allempopa' ama't puesheñarrofeta amach sena'terreto, ama't coyanesha'pa'cho' amach eseshaye' apuerraye ñeñtcha' yorerrahuet.

³⁶ Tarro'mar allempopa' amach arromña'tterreto ama't ahuata attoch e'ñech atet perret ñerra'm mellaño'feñnesha'. Yomporñapa' o'ch e'ñe puechemer perranet e'ñe poctacma tarro'mar allempopa' o' tanterret rromotpa' o'huañcha' arromña'tterret ama't errponaña.

³⁷ Elloña ama't Moisés atet eñotatane't acheñenesha' po'ño'ch ñeñt colla'huatsa allempo, ñetñapa' corretseta. Ñehua, all aquellcare't tsachmo'r ñeñt e'ñe ño'ta huortets. Al-loñaca'yeña Yomporpa' eñorana'tanaña Moisés; ñeñt'pa' atetca' otña Yompor allempo: "Napa' ñeñten Po'yomporer pen Abraham ñaña Isaac, ñaña Jacob."

³⁸ Jesúsñapa' alla oterraneterr:

—Ñehua, yapa' yeñoteñ Yomporpa' ama añeye' Po'yomporer penaye ñeñt rromuets e'ñe poctacma ñapa' añca'yeña Po'yomporer pene' acheñ ñeñt corretsach. Yomporñapa' e'ñe entenanet allohuenetpa' e'ñe corretseta.

³⁹ Añña puesheña'tets ñeñt atarr etsotene' ñoñets ñeñt atet anaret, ñetñapa' atet ochet: —E'ñe Maestrocha' e'ñe po'ño'ch atet pōten.

⁴⁰ Ñeñto'mar allempoteñpa' ama't puesheñarrofetapa' ama eseshaye' a'p'to'tenaye' enterraye.

Atto Cristo ñeñt Po'partseshar pe't David, elloñapa' o' alla po'm'reneñ per (Mt. 22.41-46; Mr. 12.35-37)

⁴¹ Allempoña Jesús'pa' atet otan ñeñt atarr etsotayenayeñ ñoñets ñeñt atet anaret:

—Eso'mare'tña otyenet ñeñtcha' Cristotsets ñapa' aña po'm'reneñ pene' David tarro'mar ñeñtcha' Cristoterrets ama aña po'm'reneñ peñe David tarro'mar ñapa' Po'partseshare'ñaña pe't David.

⁴² Tarro'mar ama't Davidpa' allempo quellquë't all libro Salmo allempopa' atetca'ye eñose'tña añecop ñeñtcha' Cristoterrets:

Yompor Parets'pa' atet otennan ñeñt Nepartseshar nepen na (ñeñtara ñeñtcha' Cristoterrets): "Te'pa' o'ch panorruerr arr necohuenro't allcha' pecohuentapreterrna.

⁴³ Attochña ama't ñeñt pe'moñe'tene' napa' o'ch name'ñatuerranet allochñapa' o'ch atet perret ñeñt pemnen pa."

⁴⁴ Ñeñt'pa' atetca'ye ote'tña David ñeñtcha' Cristoterrets'pa' ñeñtca'yeña Po'partseshar pe'tña ama't allempoteñ. Ñehua, ama't seño'teñeña Cristo ñeñt Po'partseshar pe't David ñeñtña te'pa' o' alla po'm'reneñ per ñaña.

Atto Jesús'pa' a'metare'tenan ñeñt etsotayenayeñ ñoñets ñeñt atet anaret, ñeñt atet ye'chenet ñetpa' ñeñt'pa' ama cohuenaye' entapretenaneto Yompor (Mt. 23.1-36; Mr. 12.38-40; Lc. 11.37-54)

⁴⁵ Elloña shonte' acheñenesha' ñeñt e'mño'tene' allempo atet otenan Jesús pueyochresha':

⁴⁶ —Amach semeñe'tapretatsche ommoña'tenesha' pocta'pña ñeñtareta ñeñtet atarr etsotayenayeñ ñoñets ñeñt atet anaret. Tarro'mar ñetpa' añe'ñaña atarr cohuen entenet o'ch chorrenet atarrom shetamuets o'ch atta yorma'tatsetenet pa'shtam. Ñaña pommo'cheño'tetpa' atarrcha' mueneñet o'ch e'ñe pueñcha'na'teño' e'ñech cohuen huom'cha'tenanet acheñenesha' all chopeñe'chyenet. Ñaña ñetpa' añe'nach atarr muenenet o'ch anorr'cha'tyenent judionesha' po'prahuo allecma anorryen ñeñt atarr añcha'na'tpo' entyen allohuen acheñenesha' ñaña e'ñe attecma penet ñaña all rrallme'chapretenet.

⁴⁷ Tarraña ñetña'pa' rretornanasha'naña puerratañpesyenetña pa'paquëll. Elloña e'ñe pommo'cheño'tetpa' aña atarr muenenet o'ch atet penet ñerra'mrrate' ñetpa' atarro' cohuen acheñret ñeñto'marña arrcha' ma'yochenet all shontena acheñenesha', amach tematenayaya ma'yocheneto. Ñeñto'marña te' napa' o'ch notas, ñeñt atet petsa pommo'cheño'tpa' elloña atarrcha' a'coñcha'taretterret.

21

Atto rretornanasha' ñeñt atarr huocchañetets ñapa'cho'ña nosan quelle ñeñt Yomporecop

(Mr. 12.41-44)

¹ Allempo allo'tsen Jesús Parets pa'paclo, ñaña'pa' arrenet cohuen allecma nenet quelle Partsocop. Allña'pa' entenan eçllayoretenasha' ñeñt na'yene' shonte' po'çllayor Partsocop.

² Jesúsña allpa' atta cohuenanet, huapa ñaña puesheñarr rretornanasha' ñeñt atarr huocchañetets. Ñapa'cho'ña nosan eptallatoll quellayetoll ñeñt cobretall.

³ Jesúsña'pa' atet ot:

—Te'pa' o'ch notas, añ rretornanasha' ama't atarr huocchañ ñapa' po'ñoçhca'ye atarr aton nosan quelle, ello metana'tuosan allohuen po'potantañeçhno allpon quelle ñeñt na'yenet ñet.

⁴ Tarro'mar allohuenet ñeñt na'yenet quelle, añaca'ye na'yenet ñeñt a'pchatyenet, ñaña'pa' ama't atarr huocchañpa' e'ñe pomhuahuospan allohuen ñeñt echyen ñeñt muenatenaneñ allo'ch yoran attoch correna arr patsro.

Atto Jesús'pa' eñotatanet e'ñech a'mata'taretetuerra Partsopo'

(Mt. 24.1-2; Mr. 13.1-2)

⁵ Allempoña puesheña'ttets ñetña'pa' aña atarr serrpare'tyenet atto Parets pa'paquëllpa' atarr a'cohuentateñ. Mapyet ñeñt allo orratenet Partsopo' ñeñt'pa' atarr coçhneshare' a'pa'yese'tet. Shonte' coçhneshare' ñaña allo'tsa'yen ñeñt pomyen acheñenesha' all Partsocop. Jesúsña'pa' atet otanet:

⁶ —Ora ñeñt allpon e'ñe coçhneshare' sentyen te' çherra' allempoch e'ñe a'mata'taretetuerra. Ama't puenarra mapyetpa' amach a'puerroña all allo orratenet Partsopo'.

Atto Jesús'pa' eñotatanet shonte'ch entyerret pa'namen ñeñt'cha' eñotaterrahuet o' çherrmoch allempoch mellapoterra

(Mt. 24.3-28; Mr. 13.3-23)

⁷ Pueyochresha'ña'pa' a'p'to'chet:

—Maestro, ñeñt'pa' ¿esempo'tcha'ña atet perra? Ñaña allempopa' ¿eso'tcha'ña yentyerr ñeñt'cha' yeñotaterre' po'ñoçhpa' o'ch çherrmoch allempoch e'ñe etsoterra ñeñt atet p'teney te'?

⁸ Jesúsña'pa' otanet:

—E'ñech señoterra, allochña'pa' amach esesha' seshquërraye. Tarro'mar shonte'ch orrtertsa ñeñt'cha' ayçha'nata'terre' neso'cheñ, ñeñt'cha' otyerrets: “Napa' ñeñt'enca'yeña Cristotets; te'pa' o'ca'ye çherr allempoch norrtterra na ñeñten Cristotets.” Tarraña saña'pa' ñato'tña se'ññotenaneta'.

⁹ Ñaña allempopa' o'ch se'mare'tyerr o' quellareñtsotyerr allemeñ anetso'mar ñaña o'ch se'mare'tyerr o' orrtterra ñaña atparñats erraparen, saña allempopa' amach çha seyorenatsto ama't e'ñe mamesha. Ñeñt'pa' atet'cha'ca'ye e'ñe po'ñoçh perra. Tarraña allempopa' amach çhena' allempoch e'ñe mellapoterra.

¹⁰ Jesúsña'pa' alla otarraneterr:

—Pa'namen acheñ ñeñ e'ñe po'poñe'ttsoema mereñtsoret ñetpa' quellaranna'terretcha'. Ñaña pa'namen anetso' añcha'taretechnopa' quellaraterrancha' pueyochreneshachno.

¹¹ Pella'yerrach pats huomenc ora errañaren, ñaña orrterrach allemeñ muecheñets o'ch e'ñe chaporrñatsotyerr errañaren. Orrterrach ñaña pa'namen atснаñtsochno ñeñ atarr apatanna'tpo'. Allempopa' atarrcha' añcha'noçhterra entot. Orrterrach ento ñeñ ama't ahuatapa' ama puentareto ñeñtcha'ña eñotaterrahuet o' e'ñe çherrmoch allempoch mellapoterra.

¹² 'Ñehua, allempoch ama orrtena' atetpa' saña allempopa' rremanaterrsetcha' attoch mueroçhtaterrset, sanmare'tterrach judionesha' po'prahuo allcha'ña e'ñe otteñe'cherrset, attochña abe'terrset cárcelo allcha' coñchaterrset. E'ñe same'ñeñoten na sapa' sanmare'tterrach añcha'taretneshesho'mar ñaña allo'tsa'yen ñeñ nanac añcha'taretnesha'.

¹³ Tarraña allempopa' atarrcha' cohuen attoch sa'metosnanña neñoñ.

¹⁴ Ñeño'marña allempo sanmare'tetyesa allcha' otteñe'cherrset ama't mameshapa' amach sellca'psatsto, amach sota'psa'tatsto, erro'tuachca'ye notoste' añcha'taretesho allempoch a'p'to'tare'tapuen.

¹⁵ Tarro'mar allempopa' nachca'yeña se'ñoratose'ña all attoch e'ñe cohuen seño'tyesña atetcha' sanapyesosanet. Allochñapa' ñeñ se'moñe'tene'pa' amach erro'tenaye' otenaye' entenseto. Ñaña amach erro'tenot otaseto ñeñ atet soten sapa' ñeñtpa' amaca' po'ñoçhaye' atet soteno.

¹⁶ Elloña allempoch atet perrsetpa' ñeñ e'ñe sompor sepen ñaña sachor ñato' ñeñtchca'ye sepomuerre' tarro'mar ñapa' amaca'ye ame'ñenno, amapa' ñato' semo'nasheñ, amapa' ñato' po'potantañ samo'tsesha', amapa' ñato' ñeñ e'ñe parro seyemtena ñeñtchca'ye sepomuerre' tarro'mar ñetpa' ama parrocmaye' attecma soçtape'cheno. Ñaña patanta'ttsospa' muetsatyerrsetcha'.

¹⁷ Shonte'ch acheñenesha' ñeñtcha' se'moñe'terre' tarro'mar sapa' naca'ye e'ñe same'ñena.

¹⁸ Napa' atarrcha' necuañpenes attoch amach erro'tenot sechenquërro ama't e'ñe ahuata. Attoña ama't e'ñe pueparra sechpa' ñeñtpa'cho'ña amach na'chencaterrnaso.

¹⁹ Tarraña ama'tcha' atarr mueroçhtaterrset çhocmachña e'ñe seyemteñoten napa' e'ñech sa'huinta'huanomña allohuen mueroçhteñets. Attochña sapa' corretsasach e'ñe po'ñoçh.

²⁰ 'Ñerra'm esempoch senterr añ anetser Jerusaléñpa' o'ch e'ñe rroçhtañpera solltar-nesha' allempoña sapa' señoche'pa'ch o' çherrmoch attoch e'ñe a'mata'taretetuerra ñeñ anetser Jerusaléñ.

²¹ Allempoña ñeñ allpon Judeo'tsa'yenpa' ñetñapa' allorocmuepa'ch yettra'tuerret ahuanerretepa'ña aspentareronet. Ñaña ñeñ allpon anetso'tsa'yen Jerusaléño, ñetpa'cho'ña ahuanemyesetepa'ch ñamet allot. Ñaña ñeñ allpon allampaño'tsa'yen all arepa'chña tatsterretoña all Jerusaléño.

²² Tarro'mar allempopa' Yomporcha'ña tsa'taterrayaña allohuen israelena'tarnesha', tarro'mar allempopa' o'ch e'ñe etsoterra ora allpon ñeñ atet anuarettatset atetcha' perra allempo.

²³ Allempopa' atarrcha' llequëñets añecop ñeñ açhomenare' coyanesha' ñaña ñeñ allohuen emaretetolleshaçno. (Tarro'mar ñocpuetpa' atarr torrapo' attoch yettra'tet ñamet.) Tarro'mar allempopa' o'ch orrterra ñeñtcha' atarr mueroçhtaterrahuet arr patsro. Atarrcha' a'coñchatare'tterra allohuen acheñenesha' allempo.

²⁴ Ñaña allempo shonte' acheñpa' e'ñech muetsanatuerranet ñeñtcha' quellarerrahuet. Po'potantañña' rremanatuerranetcha' ñeñ quellarenahuet o'ch an-

maretterret po'poñ anetso ßachayo all yeçha'yena pa'namen acheñ. Acheñenesha' ñeñt ama judioneshayayepa' ñeñtcha'ña e'ñe a'mtsoññetuerre'ña jerusaléno'marnesha', attoch e'ñe a'mama'tueretña ñeñt anetser Jerusaléñ. Atetcha'ca'ye perra ñeñt allponmat onañchareñ ñeñt ama judioneshayaye o'ch añcha'noçhterret all Jerusaléno.

Atetcha' perra allempoch huerra Cristo Ñeñt Acheñetosets

(Mt. 24.29-35, 42-44; Mr. 13.24-37)

²⁵ 'Allempopa' orrterrach ento ñeñt ama't ahuatapa' ama sentare ñeñtcha'ña señoaterre', ñeñtpa' e'ñech atsnesho, orrterra ñaña arrorresho ñaña rantoçhnesho. Ñaña arr patsro ora allpon pa'namen acheñenesha' pueyorñoçtetpa' atarrcha' nanac lleca'rrterret. Añcha' atarr yore'tame'terrahuet atto ñeñt añecmuen sa'ppa' o'ch emo'yarterra, atarrcha' huomenc ma'moretterr allempo.

²⁶ Acheñenesha' e'ñe pomñchañoçtetpa' çhach muene' oñanatyerret tarro'mar allem-popa' o'ch eñoterret atarrcha' mueroçhterret allohuenet arr patsro. Ñaña ñeñt huomenc orra'yetsa ento te', allempoña ama't ñeñtpa' pella'yerrach.

²⁷ Allempoñapa' entapuerrnetcha' na Ñeñten Acheñetosets o'ch nesuanmperra oso e'ñe nepartsoteñoñhuen e'ñe necohuenteshesha'.

²⁸ Ñerra'm esempoch senterr o' motetnerra orretyetsa ñeñt allpon o' notuas, allempoña sapa' e'ñech socsheñesha' secuanrrorterr enonet tarro'mar allempo o'ch çherrmoch allempoch sa'quespataretterra e'ñe poctacma.

²⁹ Allempoña Jesúsapa' alla serrpare'taterraneterr toma'nteñtso, ñeñtpa' atet oter-raneterr:

—Señotenté' atet pena tsach, higoçh.

³⁰ O'ch senteñ allempo tapna'tyen pasopanerpa' sañapa' ñeñtñaña señoatene'ña o' çhenmoch allempoch huorateterrerr.

³¹ Attecmach perra ñerra'm esempoch sentyerr ñaña allpon ñeñt o' notuas sapa' ñeñtcha'ña señoaterre' po'ñoçh o'ca'ye çherrmoch allempoch e'ñe etsoterra allempoch añcha'taretterra Yompor.

³² 'Napa' po'ñoçh o'ch notas, acheñenesha' ñeñt corretsa te' ñetpa' amach e'ñe rromhueneta'pa' allempocmach e'ñech etsoterra allohuen añeçhno.

³³ Esemppopa' añ enet ñeñt sentenpa' e'ñech chenca'huerra; patspa'çho'ña attecmach perra e'ñech chenca'huerra. Tarraña ñaña neñoñpa' amach chenquërro ama't e'ñe errponaña.

³⁴ 'Tarraña te'pa' o'ch notas, sapa' çhocmachña e'ñe señoatnoma attoch sapa' amach añña soçtape'chatsto ñeñt sosya'tsañeçhno, posa'tare'teñets, ñaña atto e'ñe cohuen socrrena añ patsro. Tarro'mar ñerra'm ñeñt e'ñe soçtape'chenpa' machayotach huaponasa añ yeter

³⁵ atet ñerra'mrrate' tamell e'ñech machayota rreman ñeñtecop amencaret. Ñeñte yetarocmach çherrana ora allohuen ñeñt yeçha'yetsa añe patsro erraparen.

³⁶ Añcha'ña sapa' çhocmachña señoer'tena ñaña añcha'ña senamuen Yompor attoch sa'huanta'huanom allohuen ñeñtcha' sehuapoya pa'namen mueroçhteñtsoçhno al-lochñapa' sañapa' e'ñech señoañesha' satomhuerr nesho na Ñeñten Acheñetosets.

³⁷ Chocma atet pe't Jesús, ellapene'tcha' yeçhatats Parets pa'paclo, ellerronetñapa' o'ch ahuer Olivoño ñapa' allca'ye e'ñe a'pue't.

³⁸ Tsapa't puetaren ahuatecmach huapa'muene't ñaña shonte' acheñenesha' ñeñt e'mñotyeyesayet all serrpare'tatanete't Yompor po'ñoñ all Parets pa'paclo.

22

Atto atarr o'pateñet Jesús o'ch muetsatateret

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Allempoña chapmoch allempoch cherrerr pascuapo, allempoch rrerranerr judionesha' pan ñeñt ama anareteyaye chase'.

² Tarraña allohuen ñeñt pa'mcha'tareternesha' pen allohuen judionesha' po'cornaneshar ñaña allohuen ñeñt atarr etsotayenayeñ ñoñets ñeñt atet anaretet ñocpuet, ñetña' Jesús a atarr o'patenet o'ch muetsatachet tarraña ñetpa' aña mecha'na'tenet acheñenesha'.

³ Allempoña oneñetpa' chorrenana Judas ñeñtara ñeñt sochetsa Iscariote. Ñehua, añ ñeñt Judaspa' Jesús pueyochresha' ñeñt parro yemtena po'potantañ ñeñt llesensen Jesús ñeñt allohuenet charrasheñet puechenet epsheña.

⁴ Ñeñtña Judaspa' ahua' allo'tsa'yen ñeñt pa'mcha'tareternesha' pen allohuen judionesha' po'cornaneshar ñaña allo'tsa'yen judionesha' po'guardiarnesha' ñeñt cohuanpene' Parets pa'paquell. Allempo chap allpa' Judasña'pa' serrpare'tos epuet ñeñt añcha'taretnesha'. Attoña eñotatosanet ñapa' mueneñca'ye o'ch poman Jesús attoch rromuet. Allempo ñetña'pa' otanna'tyeset:

—Te'pa' errotuachñaca'ye yepe'te' attoch yerrmue'.

⁵ Allempoña ñeñt atarr añcha'taretnesha'pa' atarr coshenet, ñetña'pa' a'pochtachet chochca'ye tsa'chetña Judas allpon quelle.

⁶ Ñapa' e'ñe pocte' eñch. Allempoña ñapa' aña atarr e'nen errotenotcha' pomanña Jesús e'ñe a'nahua attoch amach eñche allohuen acheñenesha'.

Atto Jesús'pa' rrallme' chatnenan pueyochresha' attoch chocmach yerpueret ñeñt yoten te' Santa Cena

(Mt. 26.17-29; Mr. 14.12-25; Jn. 13.21-30; 1Co. 11.23-26)

⁷ Allempoña chapa'muen ñeñt yetñatsro allempoch rrerreterr pan ñeñt ama anareteyaye chase' allempoch muetserreterr ñaña carrnero; ñeñt'pa' pascuapo.

⁸ Chapa'muen ñeñt yeterpa' Jesúsña'pa' atet ota'muenan pueyochresha' epsheña Pedro ñaña Juan:

—Sa te'pa' o'ch ahues allcha' sa'potos rreñets ñeñtcha' yerra' pascuapo.

⁹ Ñetña'pa' atet ochet:

—¿Erra'tña pocollro pemneñña allcha' ya'pota'ña rreñets?

¹⁰ Ñaña'pa' atet oterraneterr:

—Te'pa' o'ch ahua'muenes anetso allcha' sepocte' puesheñarr yacma ñeñt anmamñene' oñ porrto. Ñeñtña acheñerpa' o'ch socta'ner; allcha' be'tosuerr pocollopa' allcha'ña sebe'tosos samña.

¹¹ Allña'pa' atetcha' sotos ñeñt apacllatesha': "Yemaestrorpa' atet oteney atetcha' yotosep: '¿Erro'tsena'tña pecuarto allcha' nerrallme'chos pascuapo epan neyochresha'?"

¹² Ñeñt apacllatesha'pa' gatapascha' eno po'cuarto ñeñt atarr a'yohuen e'ñe cohuen a'paret. Allcha'ña sañño'tosña ñeñtcha' yerra' pascuapo.

¹³ Allempo atet otuanet Jesús'pa' pueyochresha'ña'pa' atetcho' pet, cha ahuanmatset. E'ñe atet otapanet, ñetña'pa' e'ñe'cho' atet entoset. Allcha' añño'tosñañetña rreñets allcha' rrallme'chenet ñeñte pascuapo.

¹⁴ O'ña chap allempoch rrallme'chet. Jesúsña'pa' allña anorros epuet allohuen pueyochresha'.

¹⁵ Allña'pa' atet otosan pueyochresha':

—Napa' atarr cohuen nenteñ o'ch yerrallme'chen parro añ pascuapo tayepa'tña'pa' ama chena' allempoch muetsataterret.

¹⁶ Tarro'mar napa' o'ch notas, napa' po'pocheño amach alla nerrallme'cherrete pascuapo. Esemphuañencha' etsoterra ñeñt po'ño'ch toma'ntenaya pascuapo e'ñech allempocma añcha'taretetuerra Yompor. Allempoña'pa' e'ñech parrocmá o'ch alla yocherrerr.

17 Jesúsña allempopa' chetan orramets, parasyoso'tan pompor, allempoñapa' atet otanet:

—Añ orrpapo'pa' o'ch sagaḡpa' o'ch sepatanna'ta sa allohuenes.

18 Te'pa' o'ch notas, tayoteñ napa' amach alla norrerre'te añ orrpapo' ñeñt narmetsos tarremphuach allempoch ello norrererr esempohuañencha' añcha'taretetuerra Yompor.

19 Allempoñapa' cheterranerr ñaña pan, parasyoso'terranerr pompor. Chetan panpa' shota'ch. Shotatuepa' apa'yesan pueyochresha' ñeñtpa' atet otanet:

—Añpa' ñeñtcha' nechets sepen ñeñtcha' e'ñe nepom attoch e'ñe nerroma socop. Ñerra'm esempoch serren añ pan e'ñech seyerpueñoñen na o'ch serreñ.

20 Allempoña rrohueta o' chetan ñaña orramets, ñeñtpa'cho'ña atet oterraneterr Jesús:

—Añpa'cho'ña ñeñtcha' nerras sepen ñeñtcha' ashatarettatsa socop. Ñeñtpa' alloch na'pocatonas e'ñe cohuen etserra Nomporesho.

21 Te'pa' o'ch señoch ñaña ñeñtcha' nepomuerre'pa' e'ñeca'ye parro yerrallme'chen.

22 Po'ñoçca'ye te'pa' allo'na sen etsotnomtsa ñeñt atet onañchareñ nocop, na Ñeñten Acheñetosets, attotcha' muetsaterrnet. Tarraña nocoppa' e'ñe pocte'; añña po'ñoç acheñer ñeñtcha' nepomuerre' ñocoppa' atarr llequëñets.

23 Allempoña atet otua Jesús, pueyochresha'ñapa' allenta otanna'tyeset e'ñe ñañeñeta:

—Ta'm, eseshaycha'ca'ye pomuerre'ña Ya'yochreshater.

Atto pommo'cheñoñetpa' otanna'tyenet erra'tsenoteyte'ña ñeñtey atarr asherben enten allohuen acheñenesha'

24 Allempoña pueyochresha' e'ñe pommo'cheñoñetpa' atet otanna'tyenet e'ñe ñagattseta:

—Erra'tsenoteyte'ña ñeñtey atarr asherben enten allohuen acheñenesha' ñato' na, ñato' pa.

25 Allempoña Jesúsapa' atet otanet:

—Sapa' señoteñte' ñeñt atet pena po'poñ acheñenesha' ñeñt ama judioneshayaye. Ñet ñeñt pa'm'cha'tareter penet e'ñech pa'm'cha'noçhteñocmañen pomnaren pa'yenan allohuen pueyochresha'çhno. Tarraña ama't atet penetañ pommo'cheñoñpa' añach atarr muenen allohuen acheñenesha'pa' e'ñech mecha'na'tuenanet ñaña ñetpa' mueneñet acheñenesha'pa' o'ch entenanet, atarro' sherba'yenanet.

26 Sapa' arepa'chña atteye' seḡanna'tatsto e'ñe sommo'cheñoñ. Ñerra'm erra'tsenotes ñeñtes atarr añcha'taretoyen entetsa, ñeñtes acheñespa' socoppa' añ pocetsa o'ch atet senterra ñerra'm ama esoshe'mayayso atet ñerra'm ñeñt atarr huepuesha'. Ñaña ñerra'm erra'tsenotes ñeñtes muenene' o'ch atarr asherben entenset, ñeñtesña acheñespa' añ pocetsa o'ch atet senterra ñerra'm ama esoyayso, allochñapa' attoch e'ñe cohuen setorrena po'potantañecop.

27 Ñehua, yeñoteñ acheñenesha' arr patsro añca'ye atarr añcha'na'tpo' entenet ñeñt e'ñe cohueno anorrçha'tyets all rrallme'chenet, amaña aye'ña añcha'na'tpoye' enteneto ñeñt puesherbeñoñ epatyene' rreñets ñeñt anorrçhets ñeñt rrallme'chets. Tarraña napa' o'ch notas: Ñeñtecopca'yeña nohuapaña sesho attoch nema'yochrena torraya ñeñtcha' po'ñoç atarr sherberrets socop.

28 Tarraña sañapa' ñeñtes atarr nellcapretenaya ñeñt atarr llequëñets nenten na.

29 Ñeñto'marña te'pa' o'ch nena'nerres sa ñeñtescha'ña napuerr attoch sa'm'cha'tarettapreterrna e'ñe atet pena Nompore o' na'n naña ñeñtencha' añcha'tarettapreterraya.

30 Allcha' sanorrçha'tyesuerr e'ñe sa seconaño allcha' e'ñe sa'm'cha'taretetyesuerra. E'ñe puesheña'ttsos añecopcha'ña sa'm'cha'taretetyesuerra ñeñt mereñtsorecop israelena'tar ñeñt çharra' mereñtsor ñeñt puechetsa epsheña. Attoña allpa' o'ch

na'nícha'tare'tterra e'ñe necohuenño e'ñech cohuen yeparrocmatuerr; allñapa' e'ñech yocsheñeshocmañen yerrallme'chuerr e'ñe parro.

Atto Jesúsapa' eñotatan Pedro ñapa' chocmach a'nasocha
(Mt. 26.31-35; Mr. 14.27-31; Jn. 13.36-38)

³¹ 'Simón, po'ñoçh te'pa' o'ch notaþ, oneñe'tpa' atarrca'ye enamuenen na socop, añ muenen o'ch topatenes o'ch atet þatenes ñeñ't atet cotape'chen ña ñeñ't ama pocteye' enteno Yompor. O'ch atarr huomenc topatenes atet ñerra'm ñeñ't shoshnene' po'trigo e'ñech huomenc pa'shmuenan puehoshnat.

³² Tarraña Simón o'ch notaþ, te'pa' napa' o' nema'yochua þocop attoch amach e'ñe poctacma a'huañañþsonapeña þa atto atarr peyemtenna. Tarraña ama'tcha' huaponapañ topateñets ñeñ't atarr huomenc, þaña allempopa' o'ch alla þoctape'cherr cohuen Yomporecop. Allempoña' o'ch alla e'ñe cohuen peyenpuer pemo'nasheñesha' attoch ñetpa'cho'ña o'ch alla huomenc perret pueyoçher Yomporecop.

³³ Pedroña'pa' atet och:

—Partseshacha' napa' amach na'ypo'ñape, chocmach noctapþ ama't errach anmapet; ñerra'm cárceloch anmapet allcha' mueroçhtatapet, napa'cho'ña nemnen allcha' yemue-roçhta parro. Ama'tcha' cho muetsapetpa' yerromuepa' parro.

³⁴ Jesúsña'pa' atet otererr:

—Pedro, o'ch notaþ, e'ñech añe tsaprocma amach eñena' atollop, þaña'pa' o'ch ma'poch þa'nasotenna. Ñeñ'tpa' atetcha' þoten, napa' año' pentarno.

Atto chapmoch allempoch atarr atserrþaretterra Jesús ñeñ't atarr topateñets enten

³⁵ Elloña Jesúsapa' yerpaterrana pueyochresha'; ñeñ'tpa' atet otterraneterr:

—Ñehua, ahuaña allempo nemñas atet notapas amach es sanmatsto ama't coñe'ta, ama't sebolsa, ama't seçllayor ama't ñaña sesapat. Ñehua allempopa' ¿eñalle'tña ñeñ't sepalltena?

Ñetña'pa' atet ochet:

—Allempopa' amaca'ye cho es yepallto ama't e'ñe mamesha.

³⁶ Jesúsña'pa' alla otterraneterr:

—Tarraña te'pa' o'ch notas po'poñ, ñerra'm eseshaste' ñeñ'tes echene' seçllayor te'pa' o'chca'ye sanem all sechopeñe'chyen ama't ñaña sebolsa. Ñaña ñerra'm ama secheno socchellpa' pocte'ca'ye o'ch sepom seshtam alloch seyora socchell.

³⁷ Tarro'mar te'pa' o'ch alla noterrser: Te'pa' o'chca'ye e'ñe etsoterra ñeñ't atet anuaret Yompor po'ñoñ nocop. Allca'yeña oten napa' errotuanencha' perrnet atet ñerra'mrrate' napa' ñeñ'ten amtsañen. Te'pa' ñeñ'tca'ye o' etsotmocha ñeñ't e'ñe atet anaret nocop.

³⁸ Allempoña ñetña'pa' atet otereterr:

—Partseshacha' yapa' yechenca'yeña epmeta cochell.

Jesúsña'pa' atet otanet:

—Ñeñ'tachca'ye.

Atto Jesúsapa' ma'yochuena all oteñet Getsemani
(Mt. 26.36-46; Mr. 14.32-42)

³⁹ Allempoña'pa' o' rrallme'chuanenet ñeñ'te pascuapo, Jesúsña'pa' cha'nerrpa' ahuen-err Olivoþno; ñapa' attecma pena chocmach sen all. Pueyochresha' ñapa' co'ta'huaneñet.

⁴⁰ Allempoña çhenet allpa' Jesúsña'pa' atet otuenan pueyochresha':

—Te'pa' arrcha' sema'yochuena attoch e'ñe sa'huanta' ñeñ'tcha' sehuapoya te' ñeñ'tcha' atarr huomenc setpate'.

⁴¹ Allempoña ñapa' ahua' mame' a'yenteye'. Ñaña'pa' all concorpa'huena o' ma'yochuena.

⁴² Puema'yocheñoŕ atet otuen:

—Apa, ñerra'm p̄ach pocte' ente' arepa'chña pemnatatsche o'ch çhapona ñeñŕ atarr amueroçhtatañ nenten.* Tarraña ñerra'm p̄ach muenats añcha'ña atet pepaton ñeñŕ pemnen p̄a, amachña añeyaye ñeñŕ nemnen na.

⁴³ Allempoñapa' huapoña mellañoŕeñ Yompor pue'ntañoŕ ñeñŕña ahuamencaŕ p̄ose' attoch ahuantan puellquëña.

⁴⁴ Ñapa' atarr nanac puellquëñesha' ma'yochena; puema'yocheñoŕpa' atarr nanac ñorra'ten. Po'ñorrañapa' çha huatena atet ñerra'mrrate' errasats tsopsa'tets patso.

⁴⁵ Allempoña ma'yochuapa' tanterra, ahuer pueyochreshesho. All entuerranet ñetñapa' çha atarr manrrenet ama't e'ñe puellquëñeshet.

⁴⁶ Ñaña'apa' atet otuerranet:

—Sapa' eso'mare'tña çha atarr semanrra'ten. Te'pa' o'ch setanterra'pa' çhoña sema'yochrra'ta attoch sa'huanta' ñeñŕcha' sehuapoya topateñets atarr huomenc.

Allempo rromoset Jesús

(Mt. 26.47-56; Mr. 14.43-50; Jn. 18.2-11)

⁴⁷ All atet otyenan pueyochresha'pa' allempoñapa' huaçha'toña shonte' acheñenesha'. Ñeñŕ huaçha'tatahuet ñeñŕpa' ñeñŕ soçhetsa Judas ñeñŕara ñeñŕ pueyochresha' peneñ ñeñŕ çharrasheña ñeñŕ a'pchenahuet epsheña. Ñaña'apa' çha ponmosaya Jesús, puetso'tstsapa'teñoŕ huomñcha'tos.

⁴⁸ Jesúsña'apa' atet otaŕ:

—E'ñe'tcha' petso'tstsapa'teñoŕen pepomuerren na Ñeñŕen Acheñetosets.

⁴⁹ Añña ñeñŕ yemtenaya Jesús allempo atet eñchet o'ch rromoset Jesús, ñetñapa' atet ochet:

—Ayochreshate ¿amate' pocto o'ch yemoñsaŕa yocchello?

⁵⁰ Puesheñarrña pueyochresha' allenta chetan po'cchell ahuo'ch çhonto'tapan cornesha' pa'cheñer puetepa'tcha' tsorroñ po'cohuenroŕ. Ñeñŕpa' año pa'cheñer ñeñŕ pa'mñcha'tareŕer pen allohuen judionesha' po'cornaneshar.

⁵¹ Jesúsña allempo entan pueyochresha' atet p̄apa' ñaña'apa' otanet:

—Ñeñŕepa'ta, amach atet seŕpatsto.

Allempoña ñeñŕ tsorrqueta'tetpa' alla a'p̄lerrñañ puet o' alla orrater o' e'ñe correrra.

⁵² Ñeñŕ huaçha'toya ñeñŕcha' rremose' Jesús'pa' ñeñŕpa' añca'ye ñeñŕ pa'mñcha'tareŕernesha' p̄a'yen allohuen judionesha' po'cornaneshar, ñaña ñeñŕ judionesha' po'guardianeshar ñeñŕ cohuanpene' Parets pa'paquëll ñaña ñeñŕ pompornesha' pen allohuen judionesha'. Allempo huaçha'toñetpa' Jesúsña'apa' atet otapanet:

—Eso'mare't sehuaçha'tennanaña e'ñe occhelletareroches ñaña etsach-peretareroches attoch serrma'n. Napa' ¿e'ñe't atet sentenen ñerra'mrrate' eñeten?

⁵³ Napa' allponmatuanen allo'tsenen Parets pa'paclo e'ñe parro sesho, eso'mare'tña amaña allempocmaye'ña serrma'ne'te. Tarro'mar te' o' çhap allempo ñeñŕ poctetsa socop ñeñŕto'mar te' o' çhap allempoch oneñetpa' o'ch orrtatennas po'huamenc, ñeñŕpa' e'ñe atet ñerra'm checmete'.

Atto Pedropa' a'nasotana Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Allempoñapa' rremoset Jesús'pa' arr aneret añcha'tareŕ pa'paclo ñeñŕ pa'mñcha'tareŕer pen allohuen judionesha' po'cornaneshar. Pedroña'apa' ñapa'çho'ña cote'tarraña ñapa' chenta' en a'yot.

* **22:42** Ñeñŕ amueroçhtatañ ñeñŕpa' po'ñoçh arr atma'ntatareŕ ñerra'mrrate' ñeñŕ atarr pesherr yorren orrañtso.

⁵⁵ Petotña rroch pampopa' all a'torenet tso' all anorrcha'tyen acheñenesha' ñeñt shotetsa. Pedroñapa' all anorros ñaña all shotosa.

⁵⁶ Allempoña huapa coyanesha' ñeñt añcha'tareť pueñañra. Entosan Pedro all shote- napa' alla cohuos, atet otos:

—Añpa'cho'ña encanesharpa' ñeñttramtso yemtaye'tña Jesús.

⁵⁷ Tarraña Pedroña cha a' nasochapa' atet otanña coyanesha':

—Napa' amaca'ye nentare.

⁵⁸ E'ñe o'chtapa' huapa ñaña po'psheñeñ entuererrpa' ñapa'cho'ña atet otuererr:

—Papa'cho'ña parroca'ye e'ñe peyemtena.

Pedroñapa' atet otan ñeñt yacmar:

—Napa' amarramche' erra neyemtenoña na epan ña.

⁵⁹ O' tama o'chterrerrpa' o' alla huerrerr po'psheñeñ, ñapa'cho'ña atet otuererr:

—Po'ño'chca'ye añmapa' ñeñtca'ye e'ñe yemtenaya tarro'mar ñapa'cho'ña galileo'marnesha'ca'ye atet ñerra'm Jesús.

⁶⁰ Pedroñapa' alla oterranerr ñeñt yacmar:

—Amarramche' neñoteñeña este'ña atarr pōtenen.

E'ñe allempo atet eñorena Pedro, e'ñepa'tcha' allempocma eñeña atollop.

⁶¹ Allempoña Partsesha' Jesúsapa' cohua' allente'tsen Pedro. Pedroñapa' allenta yer- puerrana atet oteñ Partsesha': "Amach eñena' atollop ñeñte tsaprocma pañapa' o'ch ma'poch pa' nasotenna."

⁶² Allempoña Pedropa' ahuo' a'yo all e'ñe puellquēnesha' yahuosa huomenc.

Atto atarr achmāre'teñet Jesús

(Mt. 26.67-68; Mr. 14.65)

⁶³ All yottam̄psateñet Jesús añcha'tareť pa'paclo añña solltarnesha' ñeñt co- huan̄psachet ñetñapa' atarr achmāre'teñet Jesús all cohuan̄peñet. Atarr chota'teñet.

⁶⁴ Huancac̄le'cheñet, pachmāre'teñoťetpa' atet oteñet:

—Ñehua, te'ña eñoratenperrepa' Parets allochñapa' attoch pōtey esesha'te'ña pechota'tyene'.

⁶⁵ Elloña pachmāre'teñoťetpa' pa'namen esocmañen otyeñet, sochatse'tyeñet.

Allempo chapata'mueñet Jesús all apcha'muena allohuen judionesha' pa'mcha'tareťernesha' ñeñt a'pocatyene' ñoñets

(Mt. 26.59-66; Mr. 14.55-64; Jn. 18.19-24)

⁶⁶ Tsapatña allempo puetarenpa' apcha'muena allohuen ñeñt pompornesha' pen judionesha' epuet ñaña ñeñt pa'mcha'tareťernesha' pen allohuen judionesha' po'cornaneshar epuet ñaña ñeñt atarr etsotayenayeñ ñoñets ñeñt atet anareť. All apcha'muena allohuen judionesha' pa'mcha'tareťernesha' ñeñt a'pocatyene' ñoñets, all anma'mueñetña Jesús. Allñapa' a'pō'tare'tapet, atet otapet:

⁶⁷ —Yapa' te'pa' yemneñ o'ch pōtosey ñerra'm po'ño'chte' pa' ñeñtep̄ Cristotets.

Jesúsñapa' atet otosanet:

—Ama't notatstas na po'ño'ch ñeñten Cristotets sañapa' amachca'ye pōcteye' sentno attoch same'ña'na.

⁶⁸ Ñaña napa'cho'ña ama't o'ch es na'pō'tas saña sañapa' amachca'ye sanapnoña naña. Tarro'mar sapa' amachca'ye semno sa'rroyerren.

⁶⁹ Tarraña te'pa' ama'tcha' atet sepa'noñ te'ñapa' o' e'ñe chap allempoch o'ch alla nanorruerr Nompōr po'cohuenrot ñeñt atarr ahuamencattetsa, ama't na Ñeñten Acheñetosets.

⁷⁰ Allempoña allohuenet atet oteñet:

—Ñeñtepnapa' ¿pa'tarraña Puechemer penña Yompōr?

Jesúsñapa' atet oterraneterr:

—E'ñeca'ye po'ñoçh ñeñt atet sotenen sa.

⁷¹ Allempoña ñetpa' atet otanna'tyeset:

—Te' yapa' ama yemneñe po'potantañ ñeñtcha' a'metare'tam̃psose'tarro'mar te' yapa' allohueney e'ñe ye'mhuen ñeñt atet otena añ acheñer, ñapa' Yomporo' Puechemer. Ñapa' çhaca'ye atarr achm̃are'tenan Yompor.

23

*Allempo çhapata'mueñet Jesús allo'tsen añcha'taret Pilato
(Mt. 27.1-2, 11-14; Mr. 15.1-5; Jn. 18.28-38)*

¹ Allempoña allohuenet tantrra'tuet, e'ñe parroçma anmet Jesús allo'tsen añcha'taret Pilato (ñeñt nen gobierno Romot ñeñt añcha'taretetsa allo'marneshacop).

² Allña'pa' atarr otteñe'choset, toma'tam̃pesyesoset, ñeñt'pa' atet otyesoset:

—Ya añ acheñer çhocma yenteñ yeçhatyenan yamo'tseshachno judionesha' ñeñt ama't mameshapa' ama cohuenayaye, ñaña atet oteneñ año'ch yetsa'tatsto impuesto ñeñt romo'marneshacop ñeñt nen añcha'taret Romot. Ama't ñapa' atet otena ñapa' ño' Cristotets ño' atarr añcha'taretetsa arr.

³ Allempoña añcha'taret Pilatopa' a'p̃to'tapan Jesús:

—Papa' ¿pa'tña judionesha' pa'm̃cha'tareterep̃?

Jesúsña'pa' atet och:

—Atetca'ye atet p̃otenen.

⁴ Añña ñeñt pa'm̃cha'tareternesha' pen allohuen judionesha' po'cornaneshar ñaña acheñeneshachno, ñetña'pa' atet otanet Pilato:

—Ñehua, napa' amaca'yeña nentoñeña ñeñt atto ama pocteye' es penoña añ acheñer.

⁵ Judionesha'ña pa'm̃cha'tareternesha'pa' alla otereterr Pilato:

—Tarraña yañapa' çhocmaña yenteñ ñeñt atet yeçhatyenan acheñeneshachno attoch atpare'tatenanet gobierno. E'ñe Galileoteñ atet pena, ama't te'pa' o' çhap ñaña arr Judeo e'ñe attecma o' yeçhatuerrerr ñeñt ama cohuenaye' yenteno ya.

Allempo çhapata'mueñet Jesús allo'tsen ñaña añcha'taret Herodes

⁶ Atto' e'mñnoten judionesha' atet otyenet e'ñe Galileoteñ yeçhaten, allempoña Pilatopa' atet a'p̃to'tanet:

—Jesús'pa' ñapa' ¿galileo'marnesha'tña?

⁷ Allempoña eñotachet ñapa' po'ñoçhca'ye galileo'marnesha' allempoña Pilatopa' atet cotape'ch ñeñt'pa' Herodesocpaca'ye tarro'mar ñapa' ñeñt añcha'taretetsa galileo'marneshacop. Ñeñto'marña ñapa' mueñan Jesús Herodesesho tarro'mar Herodespa' allempo çhap Jerusaléno all emo'ten.

⁸ Herodesña'pa' e'ñe pocsheñesha' agapanen Jesús tarro'mar ahuaototeñ atarr mueneñ o'ch eñch tarro'mar ñapa' atet e'mare'tenan Jesús ñeñt atet pa'yena. Ñapa' añecopña atarr mueneñ o'ch orrtatoñ ñaña ñeñt atet pa'yena orrtatyese' ñeñt ama puentareto.

⁹ Atarr es a'p̃to'tare'tapanenña Jesús tarraña ñapa' ama anapanoña Herodes ama't e'ñe parrocha.

¹⁰ All tom̃cha'toset ñaña allohuen añcha'taretnesha' ñeñt pa'm̃cha'tareternesha' pen allohuen judionesha' po'cornaneshar ñaña allo'tsen ñeñt atarr etsotayenayeñ ñoñets, ñetña allpa' otteñe'chuereterr Jesús all Herodesesho, pa'namen otyesuerreterr.

¹¹ Allempo Herodes ñaña allohuen po'solltarneshar ñetpa'cho'ña puerrapsoñet ñamet. Achm̃are'chet all che'tatseteñet. Pueche'tatseteñoñet chorrachet añcha'taret pa'shtam ñeñt atarr cohuen. Allempoña Herodespa' o' alla mueño'ter Pilatesho.

¹² Ñeñto'marña Herodes epuet Pilatopa' e'ñe allempocma amo'tstannerret tarro'mar ahuañmo'chapa' cha e'moñe'tannenet.

Atto am̄cha'tareť Pilatopa' otanet ama'tpa' čhosa muetse' Jesús

(Mt. 27.15-26; Mr. 15.6-15; Jn. 18.39-19.16)

13 Allempoña Pilatopa' alla apčhaterran ora allohuen judionesha' pa'm̄cha'tareťernesha' ñeñť po'cornaneshar pa'm̄cha'tareťernesha' ñańa po'potantań judionesha' pa'm̄cha'tareťernesha' ama't ñańa allohuen acheñenesha'.

14 Pilatońapa' alla otapuerraneterr:

—Ań acheñer ñeñť sehuapatennan ñeñť soten sa ahuo' yečhatyesan acheñenesha' ñeñť ama cohuenaye' senteno sa, te'ńa napa' o' na'p̄to'tare'tue ama't allempo allo'tsa'yenes tarrańa nańapa' ama't parrochapa' ama nentońeńa ñeñť atet sotyen atto' pena ñeñť ama cohuenayaye.

15 Ama't ñańa Herodespa' ama entońeńa ñeñť ama pocteye' yečcateno, ñeñťo'marńa o' alla mueñer nesho. Po'ńo'čpa' amaca'ye eńalleńa ñeñť atet pen ñeñť ama cohuenaye' yenteno allohueney attotcha' yemtsatach.

16 Ñeñťo'marńa na te'pa' attachca'ye necońchach mame'pa' o'ch alla na'rroyer.

17-19 Tarrańa allohuen judionesha' puerrannarteńoťet atet ochet Pilato:

—Pemtsatachńaca'ye, ańcha'ńa p̄a'rroyerrnay Barrabás.

Ñehua, ñeñť Barrabás ahuańmo'choťeń yottam̄peñet tarro'mar ña yečhatene' acheñenesha' atpare'chetepa' am̄cha'tareť ñeñť nen gobierno' Romoť. E'ńe patpare'teńoť o' muetsan acheñ. Ñehua, ñetpa' atet yečhenet. Pate'tets pascuapo ñeñť am̄cha'tareť ñeñť nen gobierno' Romoťpa' o'ch a'rroyerrńańet judionesha' puesheńarr pamo'ts ñeñť ayottam̄psareťtetsa ñerra'm erra'tsen muenenet ñet, ñeñťpa' añecop a'rroyenanet attoch coshatenan judionesha'.

20 Ñeñťo'marńa Pilatopa' atarr mueneńeń o'ch a'rroyerranet Jesús, ñeñťo'marńa alla a'p̄to'terranerr allohuen acheñenesha'.

21 Tarrańa ñetńapa' ama't mameshapa' amańa pocteye' enteńeto. Ellońa ñeñťapa' rrannartet allohuenet, atet oterete't:

—¡Pecorso'tam̄psach! ¡Pecorso'tam̄psachńaca'ye!

22 Poma'pocheńo Pilatopa' alla oterraneterr:

—¿Eso'mare'tńa semneńńa o'ch necorso'tam̄psach? Napa' amaca'ye nenteńńańeńa ñeñť atto ama pocteye' es peno attoch yemtsatach. Ñeñťo'marńa napa' attachca'ye, necońchach mame' allempopa' o'ch alla na'rroyer.

23 Tarrańa ñetpa' ama cačhpueńeto otare'tet. Ellońa ñetpa' e'ńe puerrannarteńoťet atarr enamueńet attoch corso'tam̄psach.

24 Ñeñťo'marńa Pilatopa' ame'ńachet. Attońa ñapa' atet eńora:

—Te'pa' o'ch atet neponas ñeñť atet atarr semnen sa.

25 Ñeñťo'mar allempo a'rroyanet Barrabás ñeñť enamueńet ama't ñeñť patparńoť yottam̄peñet ñańa puentseńoť acheñ. Tarrańa Jesúsńapa' o' apanet attoch muetset ñeñť atarr muenenet ñet.

Atto corso'tam̄psoset Jesús

(Mt. 27.32-44; Mr. 15.21-32; Jn. 19.17-27)

26 Allempo anmet Jesús a'yo allcha' corso'tam̄psoset. Allńa oñenetpa' allńapa' poctet puesheńarr yacma ñeñť cireneo'marnesha' ñeñťpa' ań pa'so'cheń Simón ñeñť errte' huerrtsa a'yoť. Ñeñťńa rremapetpa' o' chechatnomet Jesús po'corsoch ñeñťńa anmue'ńa chenta'.

27 Allńapa' coťa'huanem̄ shonte' acheñenesha', shonte' coyaneshačhno ñeñť atarr ya'na'tnene' Jesús chenta', atarr gogaretyesnenet puellquėńoťet.

28 Tarrańa Jesúsapa' allenta cohua'nmanet, atet otnomanet:

—Nočhanesha ñeñťes jerusalėńo'marneshas, amach atarr seya'na'tatsteno na. E'ńe socpa atarr seyahuenta sacńeťareťolleshohuen.

29 Tarro'mar esempopa' chocmach huaponasa ñeñtcha' atarr sellcaterre'. Allempoña coyanesha' ñeñt ama achoyore'tñepa' ñocpuetñapa' e'ñech cohuen entare'tterret allempo tarro'mar ñetpa' ama eñallete puechoyoreshet ñeñtcha' atarr muerochtterrtsa. Ñeñto'marña allempopa' otyerrcha' allohuen acheñenesha': "O' atarr cosheñtso'tsenterra muechoñnanesha', ama't allohuen ñeñt ama achoyore'tñe, ama't allohuen ñeñt ama es moma'yeneto."

30 Tarro'mar allempo puemuerochteño'tet e'ñe puellquëño'tetpa' atarrcha' ya'ñameterret. Pueya'ñameteño'tetpa' e'ñech pocte' entyerret ñegatañperretepa'to' attoch pampueranet e'ñe poctacma. Allochñapa' o'huañcha' allo'na atarr nanac muerochtenet.

31 Tarro'mar te'pa' atto muerochtatennet na ama't napa' e'ñe cohuen es norrtatyeneñ, e'ñe atteneñ ñerra'm tsach e'ñe cohuen emmo'rate'. Ñeñto'mar te' napa' neñoteñ elloña atarrcha' amuerochtatare'tterra ñeñt ama cohuenaye' es orrtateno; ñeñtñapa' e'ñe atet pena ñerra'm tsach rromuech. Arrpa' allohua atet otnomanet Jesús allempo aneñet allcha' corso'tamñsuset.

32 All aneñet ñaña epsheña ñeñt amtsañ ñeñtcha' epuet corso'tamñsuset.

33 Allempoña chapachet all oteñet Poñetalleño, allña corso'tamñsusetña epuet ñaña epsheña ñeñt amtsañ, puesheñarr nosñañet po'cohuenrot, po'psheñeññapa' nosñañet pue'chco'terot.

34 E'ñe allempo corso'tamñsusetpa' Jesúsñapa' atet ma'yochamñsosana ñeñt e'moñe'tene', ñeñtpa' atet ot:

—Nompurcha' te'pa' pe'pretnanetepa'ch tarro'mar ñetpa' po'ño'chpa' ama eñoteneto ñeñt atet ye'chcatenet, ñeñt ama pocteyaye.

Allempoña solltarnesha'pa' yellsheñe'chatoñet pa'shtam po'suertot attoch orrta puesheña'tets ñeñtcha' yorayese' puema'tets.

35 Acheñenesha'ñapa' atta cohuanrrorteñet all tom'chenet a'yenet. Pa'm'cha'tare'terneshet ñetñapa' atarr es otnare'teñet, atet otatse'tyeñet.

—Te'ña p'apa' o' p'a'queshp'atyes po'potantañ, te'ñapa' p'a'queshp'aterra e'ñe p'añeña ñerra'm po'ño'chte' ñeñte'p acren Yompor ñeñtcha' Cristotosets.

36 Solltarnesha'pa' cho'ña atarr achm'are'teñet, che'tatseteñet. Pueche'tatseteño'tetpa' ponem'yetpa' aposet vinos ñeñt atarr chella'se'.

37 Pachm'are'teño'tetpa' atet otyeñet:

—Ñerra'm p'a po'ño'chte' ñeñte'p pa'm'cha'tare'ter pen judionesha', te'ñapa' p'a'queshp'aterra p'añeña.

38 Ñehua, poño't all corsocho all noñet tsachtall aquellcare't ñeñtña quellecpa' atet oten: "Añpa' ñeñtca'ye judionesha' Pa'm'cha'tare'ter." Ñeñtña quellecpa' ñeñt anare't ma'po'mar ñoñets—griegach, latinach ñaña hebreyach, e'ñe attecma oten.

39 Puesheñarrña amtsañ ñeñt parro corso'tamñpeñet, ñapa'cho'ña achm'are'ch. Potnare'teño'tpa' atet oteñ:

—Ñerra'm po'ño'chte' Cristo'ppa' p'a'queshp'aterra p'añeña, yapa'cho'ña o'ch p'a'queshp'aterrey.

40 Po'psheñeñ amtsañpa' che'ptare'ch. Pueche'ptare'teño'tpa' atet och:

Papa' eso'mare'tña ama pem'cha'na'teñeña Yompor, ama't parro amuerochtatare'tey.

41 Tarraña yocoppa' e'ñeca'ye pocte' yemuerochttena tarro'mar ñeñt'pa' añ tsa'tatenyet ñeñt allpon yeye'chcatyen ñeñt ama cohuenayaye ama't e'ñe mamesha. Tarraña añ acheñer ñeñt parro muerochtatenyet ñapa' ama es ye'chcateno ama't mamesha ñeñt ama pocteyaye.

42 Allempoña ñapa' atet otan Jesús:

—Napa' peyerpa'huerrno'tach allcha' p'a'm'cha'tare'tetuerra.

⁴³ Jesúsñapa' atet och:

—Napa' po'ñoçhca'ye notañ, e'ñe ñayecma parro'tseneycha' cosheñtso.

Atto rroma Jesús all po'corsocho

(Mt. 27.45-56; Mr. 15.33-41; Jn. 19.28-30; Heb. 9.11-14)

⁴⁴⁻⁴⁵ Allempoña çhap pocto atsne'pa' o'huañ atsnom, o' e'ñe checmetua errañaren añe patsro. O'ña ellerrotnenmochapa' o' alla puetarerr. Allempoña ñeñt' besom allo yottañpeññañet Parets pa'paquell po'ponro ahuepa't rrrarra'nom e'ñe poctacma, o' e'ñe ellopa'tetsta.

⁴⁶ Allempoña Jesúsapa' rrana. Puerranarotpa' atet ot:

—Nompocha' te'pa' o' nepomuerra e'ñe pöcop e'ñe necamquëñoñuen.

E'ñe ñeñña otuapa' o' rroma.

⁴⁷ Solltar po'captáner ñeñt' romo'marnesha' ñeñt' corso'tañpse', allempo atet ent atet o' pa, ñaña'pa' allenta aye'choçhtatan Yomporpa' ñapa' atet ot:

—Añ yacmarpa' po'ñoçhuaca'ye e'ñe attoña o' yemtsatater, amaca'yeña eñalleña attoch yemtsataterëñ.

⁴⁸ Ñaña allohuen acheñenesha' ñeñt' allo'tsa'yen ñeñt' ente' ñeñt' atet o' p'ach o' yoroçhtach, ñetña'pa' puellquëñesha' na'yesnerret pot puesomapo ahuanerret.

⁴⁹ Allohuen ñeñt' atarr yemtaye't Jesús ahuañoñeñ ñaña allohuen coyaneshaçhno ñeñt' coña' huanmue' Galileo't ahuañoñeñ, ñetña'pa' alla tomçha'tyenet a'yenet allot' atta cohuanrrorteñet ñamet.

Atto pampuet Jesús

(Mt. 27.57-61; Mr. 15.42-47; Jn. 19.38-42)

⁵⁰ Eñall puesheñarr yacma ñeñtara judionesha' ñeñt' e'ñe cohuen acheñ e'ñe pocte' es pa'yen, ñeñt'pa' añ pa'so'cheñ José ñeñt' arimateo'marnesha'. Ñapa'cho'ña puesheñarr ñeñt' pa'm'cha'tareter pen allohuen judionesha' ñeñt' parrocmach çhocmach apçhenet epuet po'potantañ am'cha'taretnesha' attoch a'poctatenet ñeñt' llequëna allohuen judionesha'.

⁵¹ Ñehua, ña ahuaña allempo apçhenet parro po'potantañ am'cha'taretnesha' atto o'pateñet Jesús o'ch muetsatachet, ñaña'pa' ama't mameshapa' ama pocteye' eñche. Tarro'mar ñapa' ñeñt' atarr cohuen' Yompor esempohuañencha' o'ch atarr ayochreshaterra.

⁵² Ñeñña Josépa' o' ahua' Pilatesho o'ch oteña' pocte'ch eñch ñach a'suatose' Jesús ñeñt' rromuets corsocho.

⁵³ Pilatoña'pa' e'ñe pocte' eñch, ñeñto'marña ñapa' a'suater corsocho't allempoña'pa' epatse'ch shetamtso ñeñt' e'ñe cohuen, allempoña'pa' aneñ allcha' pampueña'. All eñareñ mapuetpon all ama apampare'ttena' po'poñ arromñañ, allca'yeña nenana'ña Jesús.

⁵⁴ Ñehua, allempo pampuet Jesúsapa' ñeñt'pa' añe yetro allempo çhocma añño'tena judionesha' ñeñt' tsapatecop allempoch ameserreterr. Ñehua, allempo pampa'huet Jesúsapa' o' ellerren, ñeñto'mar judionesha'pa' o' moñtan ñeñt' tsapatecop allempoch amesa'muenet e'ñe poctacma.

⁵⁵ Ñeñña coyaneshaçhno ñeñt' atarr yemtenaya Jesús ñeñt' coña' huanmue' ahuañoñeñ Galileo't, ñetña'pa' coña' huanmet all pampueñeta' attoch eñchet allcha' neret Jesús.

⁵⁶ Allempoña ñet onaçherret allotpa' o' çhaçherret pocollo, ñetña'pa' allohuenetpa' yorayesuerret ñeñt' atarr eñmosa'teçhno alloch a'yana'tereta' Jesús ora po'chtsohuen attoch e'ñe cohuen eñmosa'ttatereta'. Ñeñt'pa' e'ñeca'ye atet yeçhenaña judionesha'. Ñetpa' alla añño'tuaneñetña eñmosa'teçhno tarro'mar tsapa'tpa' amach serreto puepampro tarro'mar tsapa'tcha' çhapa'muen ñeñte yetro allempo çhocma amesen judionesha' ñeñt' atet anare'ttenet ñocpuet.

24

Atto tanterra Jesús

(Mt. 28.1-10; Mr. 16.1-8; Jn. 20.1-10)

¹ Allempo o' huañ yetñats allempo amesenet, allempo mo'tta'muena yetñats temenc coyaneshachnoñapa' e'ñe ahuatecma ahuanma'muenet all pampueñet Jesús. Anma'mueññañet eñmosatechno ñeñt' o'patateñet alloch a'yana'toset. Allñapa' co'a'nma'muenanet po'potantañ coyaneshachno.

² O'ña chacha'ta'muenet allpa' mapue'ña ñeñt' allo mopam̄pset Jesús ñeñt' puepampuer p̄chet ama atteraye' entoseto ñeñt' atet p̄am̄pset po'poñ ellerro. Entoset mapue' o' a'rrote'tare'ttena a'yenet.

³ Allempoña ñetpa' esho'trra'toset mapuetpono ñeñt' puepampuer p̄chet amaña esha' entosayeña arromñañ all net.

⁴ Ñetñapa' cha muene' yoruoset ama eñoteñeto errotcha'ña p̄oset. E'ñe allempo atet cotape'chyenet ahuepa'tcha' orrtapanet epsheña yacma alla tomcha'toset e'ñe allo'tsa'yenet, atarr cohuen popuetyenet pa'shtamuet.

⁵ Ñetña pueyorño'tetpa' atta mo'crra'tyeset patso. Poñchañotet ama eshcaye' co-hua'p̄seto allenet ten. Ñeñña yacma epsheñapa' atet otosanet:

—Ñeñt' ama arromñañeshayaye, eso'mare'tña se'name'teñña arr allecma nannena arromñañenesha'.

⁶ Te' ñapa' amaca'ye allo'tsenarayaye arr, o'ca'ye tanterra. Ama't seyerpueñoña ñeñt' atet otase't ama't ahuañmo'choteñ allempo Galileo'tsenmeñ.

⁷ Ñeñtpa' atetca'ye otase't ñapa' ña Ñeñt' Acheñetosets chocmach pomueret attoch erro'tuanen per po'poñ acheñ ñeñt' atarr ochñañenesha' attoch corso'tam̄peret, tarraña poma'pamtañoñapa' chocmach tanterra.

⁸ Allempoña ñetpa'cho'ña allenta yerpueret atet otanete't ahuañmo'choteñ Jesús.

⁹ Allempoña coyaneshachnopa' ona'cherret puepampro't, cha'cherret pocollopa' serrpare'tatueret Jesús puellsensarnesha' ñeñt' charrasheña ñeñt' puesheñarraña o' puecherra ñaña po'potantañechno ñeñt' pueyochresha' pen. Coyaneshachnoñapa' serrpare'tueret allohuen ñeñt' atet enta'muenet Jesús puepampro.

¹⁰ Ñeñt' serrpare'tatenaya' Jesús puellsensarnesha' ñeñtpa' añ María Magdalena ñaña Juana ñaña po'psheñeñ María ñeñt' Jacobo pachor ñaña po'poñechno coyaneshachno.

¹¹ Tarraña Jesús puellsensarnesha' allempo serrpare'tatosanet coyaneshachno ñeñt' atet entua'muenet, ñetñapa' ama't mameshapa' ama ame'nyetoña coyaneshachno, cha otenapuetañ attate' otatse'tyen coyaneshachno.

¹² Tarraña Pedroñapa' allenta ta e'ñe matenacma. O'ña chap ñaña puepampropa' mo'cosa, cohuos o'pononet all net. Ñapa'cho'ña ama entose, shetamtsa entos allo ep̄atse'chet alla o'shshe'ma'yena a'yenet. Ñapa'cho'ña ahuer pocollo ama eñoteñe ñato' erro'tsente'.

Atto Jesús pa' rremuerrana' epsheña pueyochresha' toño allempo senet Emaúso

(Mr. 16.12-13)

¹³ Ñeñte yetrocma epsheña pueyochresha' ñetñapa' arr senet anetso ñeñt' pa'so'cheñ Emaús. Ñehua, ñeñt' pa'so'cheñ anets Emaúspa' Jerusaléño'teñpa' allo'tsente' charra' puechena paterr kilómetro choycha' chapats anets Emaúso.

¹⁴ Ñetñapa' e'ñe pueserrparñesha' senet, añ serrpare'tyesnenet ñeñt' allpon atet o' pohua.

¹⁵ All senet e'ñe pueserrpare'teñshetpa' anapanna'tyesnenet Jesúsñapa' alla rremuer-raneta'. Allempoñapa' chope'chnomuet e'ñe parro o' ahuanmuet anetsonet.

16 Tarraña ama't entapetañña Jesús pa' ñetñapa' čha ottenet ñerra'mrrate' ama am-natarefteneto attoch cheme'tapet, ama esesha' cheme'taye.

17 Jesúsñapa' atet otosan pueyochresha':

—¿Eso'tña seserrpare'tyesnen? ¿Eso'mare'tña čha atarr sellca'нена?

18 Puesheñarrña ñeñt sochetsa Cleofas, ñañapa' och:

—¿Ama't peñoteñeña allohuen ñeñt Jerusaléño'tsen ahuañoñeñ o' e'ñe e'mare'tuet ñeñt atet o' metua all? Papa' ¿paptate'ña ñeñtep taya čhapats all Jerusaléño ñeñtep ama eñotosaye ñeñt atet o' pohuerret Jerusaléño?

19 Ñañapa' atet otnomanet:

—¿Eso'tña ñeñt atet o' pohuerretña all?

Ñetñapa' alla otnereterr:

—Añca'ye yeserrpare'tnen Jesús ñeñt nazareto'marnesha' ñeñt a'mtene' Yompor po'ñoñ ahuaña. Po'huamencoť orrtatennay po'partsoña ñeñt ama't ahuaťa yapa' ama yentare. Ñaña atet yečhatyese't ñeñtpa' atarr cohuen. Ñeñtpa' e'ñe pocte' entapreteñ Yompor; acheñenesha'pa'čho'ña e'ñe pocte' enteñet.

20 Tarraña ya'mcha'tareťernesha' ñaña ñeñt pa'mcha'tareťernesha' pen allohuen judionesha' po'cornaneshar, ñetñapa' o' pomueret Jesús attoťca'yeña o' muetsatateret, ñeñto'marña o' corso'tamperet.

21 Tarraña yapa' ñeñtca'yeña atarr yemneneñ ñato' ñach ya'rroyatatosayeñña al-lohueney ñeñtey israelena'tarey (atto amcha'nočhtana'tenya romo'marnesha' ya ya'netsro). Tarraña te'ñapa' čhaña o' muetseret. Te'pa' o'ca'ye ma'pamta'muen.

22-23 Ñaña te'ña coyaneshachnoña ñeñt parro yeyemtena, ñetñapa' ahuaťecma ahuanma'muenet o'ch enta'mueñet puepampro ñetñapa' año' eseshaye' entosayeña puepampro all neretañ. Allempoña huačherret puepamproť atet serrpare'tatuerryet, allñapa' año' orrtahuet mellañoñeñ ñeñto'ña otahuet Jesús pa' o'ca'ye tanterra o' alla betterra. Ñeñto'marña yapa' ñeñtña atarr yeyore'tene'.

24 Allempoña ñaña allponsheña ñeñt parro yeyemtena, ñetpa'čho'ña allenta ahuanmuet ñamet puepampro. E'ñe atet otuerrey coyaneshachno, ñetpa'čho'ña ama eseshaye' entosaye.

25 Jesúsñapa' alla otnerraneterr:

—Sapa' ama es sečhenoyoña seyočhro, atarr se'charrtaten seyočher attoch e'ñe same'ña'huaña ora ñeñt atet eñosyeseť Cristocop allohuen ñeñt a'mta'yesaye't Yompor po'ñoñ ahuaťoñeñ.

26 Ama't señoteñeña ñeñtcha' Cristotatspa' atetca'ye anareťña ñocop ñapa' atar-rcha'ca'ye amuročhtatareťetuanena čoch rromats. Elloñapa' o'ch alla čherr esempo allempochña e'ñe cohuen a'cohuentatareťterra.

27 Allempoña Jesús pa' o' yerpatnerraneterr ora allohuen ñeñt atet anareť añecop ñeñtcha' Cristotats. E'ñe Moisés po'ñoñoñeñ yerpatnomanet ñaña po'potantañečhno po'ñoñ ñeñt eñosyestse't Cristocop, ñeñtara ñeñt a'mta'yesaye't Yompor po'ñoñ ahuať.

28 Allempoñapa' čhapmochet anetso all sechenet. Jesúsñapa' čha otetnena ñerra'm ñapa' amtoche'ch.

29 Ñetña alla puepateñoťetpa' atet ochet:

—Allahca'ye yečhap arr parro o'ca'ye tsapuenmoch.

Allempoña Jesús pa' be'tosos allcha' čhapuet.

30 Allempoña anorrčha'toset allcha' rrallme'choset. Jesúsñapa' chetosan pan, parasyoso'tampsosan pan, shota'tospa' apa'yesosanet.

31 Allempo atet p̄osa, pueyochresha'ña epsheñapa' čha e'ñe cheme'toset añpa' ñeñtepa'tca'yeña Jesús. E'ñe allorocma ñetpa' o' amnatareťterret attoch e'ñe cheme'teret. E'ñe cheme'terretpa' allepa'tcha' ma'natamperranet.

³² Allempoña ñetpa' atet otanna'tyeset:

—Ñeñto'marepa'tca'yeña atarr nanac coshatosey ñorra' ama't cha yellquëna yeyochro allempo serrpare'tatnomuey toño all yerpatnomya Yompor po'ñoñ ñeñt atet ana'yesaret e'ñe ñocop.

³³ Ñetña e'ñe allorocma tantrra'terretpa' o' alla ahuanerret Jerusaléño. Allña'pa' o' cherret allo'tsa'yen po'potantañ puellsensarnesha' ñeñt o' charrasheñaña puechena puesheñarr. Allo'tsen ñaña po'potantañechno.

³⁴ Allña ñetpa' atet otueret po'potantañ:

—Po'ñoçca'ye o' tanterraña Yepartseshar. Elloneñña'pa' orrterrana ñaña Simón.

³⁵ Allempoña ñetpa' serrpare'tueret ñeñt atet enteret toño ñaña all shota'tosan pan, attoña ñetpa' allña e'ñe cheme'tosetña Jesús.

*Atto Jesús'pa' orrterrana allohuen pueyochresha'
(Mt. 28.16-20; Mr. 16.14-18; Jn. 20.19-23)*

³⁶ Ñeñta atarr otatsetyenetpa' Jesúsña'pa' chepa'tcha' tomhuets e'ñe all chorren allohuen pueyochresha'chno. Alla huom'cha'tuenanet, puehuom'cha'tueñoñanetpa' atet otuenanet:

—Te'pa' chosaña e'ñe cosherrtsa seyo'chro.

³⁷ Tarraña ñetña'pa' cha atarr yore'tuenanet, cha atarr mecha'trra'tet, cha otenapuetañ choyeshe'matste' orrterranel.

³⁸ Jesúsña'pa' atet otuenanet:

—Eso'mare'tña saña'pa' chaña seyoren. Eso'mare'tña saña'pa' chaña atarr se'charrtatenña seyo'cher.

³⁹ Te'pa' o'ch secuapuennan not ama't ñaña netac attoch e'ñe seño'tapuerren naca'ye. Sa'p'lapuennan nechets, secua'yesapuennan nechets allochña'pa' o'ch e'ñe seño'tapuenen. Napa' ñeñten echtsofen, choyeshe'matspa' amaca'yeña echtsofeyayeto ñaña amaca'ye anpatayaye atet o' sentapuenen napa' echtsofenca'ye ñaña anpatenca'ye.

⁴⁰ Allempoñapa' gatuenanet pot ñaña pa'tac.

⁴¹ Ñetña'pa' atta cohuanrrortapueñet. Ama't atarr coshapueñetaña'pa' amaña e'ñeye' ame'ñapueñeto ñato' po'ñoçhte' Jesús. Atta echarrtatenet pueyo'cher tarraña Jesúsña'pa' atet oterranelerr:

—¿Arrpa' ama't secheno ama't coñe'ta rreñets?

⁴² Ñetña'pa' aña apapueñet pashe'parr cac achmare't ñaña pets pocoyem' all nenan po'moñ.

⁴³ Ñeñta agaphuenpa' o' rrohueñ all chorrenet attoña ñetpa' entapueñet.

⁴⁴ Allempoñapa' atet oterranelerr:

—Ñeñt atet notase't allempo orameñ allo'tseney e'ñe parro, ora allohuen ñeñt atet anaret ahua'otetñ Yompor po'ñoño nocop, ñeñtña te'pa' o' e'ñe etsotuerra—e'ñe Moisésoteñ po'ñoñ ñeñt atet anaret ama't ñaña ora allohuen ñeñt quellca'yesone't ñeñt a'mta'yesaye't Yompor po'ñoñ, ama't ñaña ñeñt aquellcarettatse't libro Salmos, te'pa' ñeñtña o' e'ñe etsotuerra ñeñt atet ana'yesaret nocop ahua'otetñ.

⁴⁵ Allempoñapa' o' chapatanet pueyo'chreto allohuen ñoñtso'chno ñeñt aquellca'yesaret ñocop.

⁴⁶ Jesúsña'pa' alla oterranelerr:

—Po'ñoçhpa' allohuen ñoñets ñeñt aquellca'yesaret atetca'ye oten ñeñtcha' Cristotsets'pa' chocmach po'ñoçh rromos, tarraña poma'pamtañoña'pa' o'ch alla tanterra.

⁴⁷ Attochña serrpare'teret Cristo e'ñe Jerusaléño'teñ erraparen ora allemeñ allohuanen acheñenesheso'mar. Attochña'ña acheñenesha'pa' o'ch co'tape'cherret ello e'ñe cohuen Yomporecop allochña'pa' attochña o'ch e'ñe a'pretna'huaretterret allohuenet po'chñaret.

⁴⁸ Jesúsña' atet oterraneterr:

—Te'ña sapa' o'ch sa'poterrnan ora ñeñt allpon atet sentyesne't ama't teme'ttsen.

⁴⁹ Ñaña sa te'pa' ellonet o'ch atet notnerres, po'ño'chca'ye napa' nemño'huerrnascha' Yompor Puecamquẽñ entot ñeñtcha' e'ne sechorra'yesaya e'ne puesheña'ttsos ñeñt atet oten Yompor ñeñtcha' e'ne apa'yerres. Tarraña saña'pa' allasach anetso Jerusaléño, esempohuach chorratasa Parets Puecamquẽñ ñeñtcha'ña ahuanencat sepa'yesose' ñeñtcha' apuerres Yompor pue'ntañot.

Allempo a'terr Jesús pue'ntañ

(Mr. 16.19-20)

⁵⁰ Allempoña Jesús err Jerusaléño't, ahuanerran pueyochresha'chno a'yo anetso Betanio. Allña'pa' echantosan potpa' bensare'tam'pesyesosonet.

⁵¹ E'ne puebensare'tam'peño'tanetpa' allña'pa' a'tenoche' pue'ntañ o' sohuanenanña pueyochresha'chno.

⁵² Ñetña allempo atet entapueret Jesús ahuer pue'ntañopa' pa'ye'chochtateñsha' ma'yochnerretpa' ahuanerret Jerusaléño e'ne pocsheñeshocmañenet.

⁵³ Ñetña allempopa' ellapenete't Parets pa'paclo all atarr aye'chochtateññañet Yompor. Ñeñt'pa' attetepa'ch Nompore. Allohua.

COHUEN ÑOÑETS ÑEÑT̃ QUELLCA' SAN JUAN

Ñeñt̃ Po'ñoñ pen Parets ñeñt̃ña acheñetosets ñeñt̃ara ñeñt̃ Cristoterrets

¹ Ahuatoteñ e'ñe ñanom pa'motroteñ Cristoñapa' eñalla epuet Pomp̃or Parets. Ñaña'pa' ñeñt̃ara ñeñt̃cha' Po'ñoñ pa' Parets tarro'mar ñach eñotaterre' acheñenesha' atet oteñ Yomp̃or Parets. Tarraña ñapa'cho'ña e'ñe attecma partsoten atet partsoten Pomp̃or ñeñt̃ atarr nanac Parets.

² Allempo errte' ayeçhcataretta pats, ñaña'pa' e'ñe parro allo'tsen epuet Pomp̃or Parets.

³ Ñeñto'marña allohuen esocmañen ñeñt̃ eñall, ñapa' ña e'ñe yeçhcatue' ñeñt̃ atet muenet epuet Pomp̃or. Ñeñt̃ allpon eñallpa' ama eñalle ñeñt̃ ama yeçhcato ña, ama't esotolla, ñocma pueyeçhcatar.

⁴ Ñaña'pa' añepa't ñeñt̃ alloch e'ñe yocrrena. Ñeñt̃ña alloch e'ñe yocrrenapa' ñeñt̃cha' yeñotaterre' allohuen ñeñt̃ cohuen enten Pomp̃or Parets. Ñeñto'mar ñapa' atet pena ñerra'mrrate' puetare' tarro'mar ñapa' ñach a'puetarsam̃perre' allohuen yoc̃ta'p̃ña.

⁵ Ama't atet pena sosya'tsañeçhno añe patsro ñerra'mrrate' checmete', ñaña'pa' e'ñe a'puetaresuos. Checmete'ñapa' ama't ahua'tapa' amach errotenot a'cheçmetam̃perrano ñeñt̃ puetarñats̃er ñeñt̃ Yomp̃or po'cohuenña.

⁶ Ama't allempo ama orrtena' Cristo ñeñt̃cha' puetarñats̃otosets arr patsro, ñanempa' añ orrtatsa puesheñarr yacma ñeñt̃pa' añ pa'so'cheñ Juan; ñapa' Yomp̃or llesense'.

⁷ Ñapa' añecop huapa ñach a'potose' attoch huapa Cristo arr patsro ñeñt̃cha' a'puetarsam̃perre' allohuen yoc̃ta'p̃ña. Attoña ña po'ñoño'tpa' ame'ñatosana acheñenesha'.

⁸ Tarraña Juanpa' ama añeyaye ñeñt̃cha' puetarñats̃otosets arr patsro; ñapa' añecpa huapa attoch a'potosan ñeñt̃cha' a'puetarsam̃psañtostsa.

⁹ Allempoña çhap añe patsro ñeñt̃ puetarñats̃otosets tarro'mar añ puetarñats̃er ñeñt̃ e'ñe po'ñoçh ñeñt̃cha' a'puetarsam̃p̃sose' allohuen acheñenesha' poc̃ta'p̃ña, ñeñt̃pa' al-letsa, o'ch orrtosa añe patsro.

¹⁰ Ama't añ patspa' ño pueyeçhcatareñ, acheñenesha'ña arr patsropa' arepa'tcha' cohuenaye' agapapeto tarro'mar ama eseshaye' eñotapaye.

¹¹ Ama't arr çhapañ e'ñe ña pamo'tseshesho, pamo'tsesha'ñapa' arepa'tcha' cohue-naye' agapapeto.

¹² Tarraña puesheña'tets ñeñt̃ e'ñe cohuen agapyesapue', ama't allohuen ñeñt̃cha' ame'ñerraya ña, ñet̃ña'pa' apuerranet llesens attoch e'ñe puechemer perranet Yomp̃or Parets.

¹³ Ñeñt̃ atto puechemer perrey Yomp̃or ñeñt̃pa' ama atteyaye atet ye'ñalletena ya ñeñt̃ey arromñatey. Tarro'mar ñeñt̃ atto ye'ñalletena arr patsropa' ñeñt̃pa' atet anaretey ya ñeñt̃ey arromñatey. Ñaña atto puechemer o' perrey Yomp̃or, ñeñt̃pa' ama añoteyaye ñeñt̃ atet cotape'chateney po'psheñeñ acheñ poc̃ta'p̃ña. Yapa' añot̃ña o' puechemer perrey Yomp̃or atto o' muenaterrey e'ñe ña poc̃ta'p̃ña.

¹⁴ Cristoña ñeñt̃ Po'ñoñ pen Yomp̃or o' acheñetos arr patsro, o' yeyçhañ e'ñe parro mame' añe patsro. Ñapa' atarr amuerañtosa. Ñaña atto yeçhatosey Yomp̃or po'ñoñ ñeñt̃ña ñoñetspa' e'ñe po'ñoçh atet, ama shequëñtsoyaye ama't mamesha. Ñaña yapa' çhocma yentoñe't po'cohuenña. Ñeñt̃ña po'cohuenña'pa' atet ñerra'm Pomp̃or ñeñt̃ po'patror pene' ña.

¹⁵ Allempoña Juan puerranarot̃pa' a'potan Cristo, ñeñt̃pa' atet eñora ñocop:

—Añmapa' ñeñtca'yeña notase't ahuaña, ñeñtcha' huapatsa chenta' ñapa' atarr ahua-mencatesha', nañapa' ama tama ahua-mencateyayno, tarro'mar ñapa' ahuatoteñ eñalla. Ama't allempo ne'ñalleta na, ñañapa' eñalla. Ñeñtpa' allohua atet ot Juan ñenmañ Cristocop.

¹⁶ Ñapa' atarr amuerañtosa ñeñto'marña allohueneypa' atarr bensare'tamñpeney. Allo'na sen yebensare'tamñpesnene'.

¹⁷ Ñoñets ñeñt atet anaret ahuatoteñpa' ñeñt quellconay Moisés ahuañ. Tarraña Jesucristopa' ñaña orrtatose'ña muereñets ñaña ñapa' añ orrtatonay ñoñets ñeñt e'ñe po'ñoñ Yompor po'ñoñ alloch yequeshperra.

¹⁸ Yompor Paretspa' ama't ahuañapa' ama eseshaye' puentare. Po'patrroña ñeñt Cristotosets ñeñtpa'cho'ña Parets ñeñt e'ñe parro atecmuet; ñapa' ña yeñotaterre'ña atet penaña Pompor Parets.

*Juan ñeñt apatañtetsa Yomporecop, ñapa' atarr cohuentatosan Jesucristo
(Mt. 3.11-12; Mr. 1.7-8; Lc. 3.15-17)*

¹⁹ Allempo judionesha' pa'mñcha'tareñernesha' ñetñapa' mueñet acheñ Jerusaléñoñ ñeñtcha' ahuanmatsa Juanesho. Añ mueñet judionesha' po'cornaneshar ñaña levitaneshash' ñeñt po'taruas pene' o'ch torrenet Parets pa'pacillo. Ñetpa' añecop amñareñtet ñetcha' a'pñto'toset Juan ñapa' esesha'te'ña. O'ña chapuet ñeshopa' atet otoset:

—Papa' ¿eseshape'tña, ama't añeyaype ñeñteñcha' Cristoterrets?

²⁰ Juanñapa' ama a'nasoto; atto a'metapa' ñapa' atet otapanet:

—Napa' amaca'ye añeyayno ñeñtcha' Cristoterrets.

²¹ Ñetñapa' alla otereterr:

—Ñeñteñapa' ¿eseshape'tña, ama't añeyaype Elías ñeñt a'mñtaye't ahuañ Yompor po'ñoñ?

Ñañapa' atet oterraneterr:

—Amaca'ye ñeñteyayno.

Ñetñapa' alla a'pñto'tereterr:

—Amapa' ñato' ¿añeñte' ñeñteñcha' a'mñterre' Yompor po'ñoñ ñeñt yecuen?

Ñañapa' alla oterraneterr:

—Amaca'ye ñeñteyayno.

²² Ñetñapa' alla otereterr:

—Ñeñteñapa' ¿eseshape'tña pa? Yapa' yemneñca'ye o'ch pñotey allochñapa' o'ch yotera' ñeñt yemñene'. ¿Erroñena'tcha' ña pñoteyña pñocop?

²³ Ñañapa' atet oterraneterr:

—Napa' nocopca'ye eñose'tña Isaías ñeñt a'mñtaye't Yompor po'ñoñ ahuañ. Allempopa' atetca'ote't:

E'morrterrach puesheñarr po'ñoñ all amayo allcha' serrpare'taterranña acheñenesha'.

Puerranarotpa' añcha' toma'ntaterranet toñ ñapa' atetcha'ca'ye oterranet:

“Sa'cohuenetyes toñ allcha' oñmos Partsesha' o'ch e'ñe sa'pa'charretyesoñ pa'teñ.”

²⁴ Ñehua, ñeñt amñareñtatsa Juanesho, ñetpa' añca'ye mueñenahuet ñeñt fariseonesha' ñeñtara judionesha' pa'mñcha'tareñernesha'.

²⁵ Ñetñapa' alla otereterr Juan:

—Arepa't Cristoyaypepa' eso'maruañaca'yeña pñapatenña Yomporecop, arepa't Elíasoyaype, arepa't añeyaype ñeñtcha' a'mñterre' Yompor po'ñoñ.

²⁶ Juanñapa' atet oterraneterr:

—Napa' ama't napatyen Yomporecoppa' e'ñeca'ye oñochaya napatyenanet. Tarraña o'chap sesho po'psheñeñ ñeñt ello atarr sherbets, tarraña sapa' amaca'ye señoñeñña sa.

²⁷ Ñapa' ama'tcha' chenta huapapa' ñapa' ñeñtca'yeña ello atarr sherbets; nañapa' ama es nesherbena attoch ama't po'sapatreñapa' o'ch nepyanñpes.

²⁸ Ñehua, allpa' atetca'ye penet all oteñet Betábara allara Jordanaso yonita'n tarro'mar Juanpa' allca'ye apatyenanña acheñenesha' Yomporecop.

Jesuspa' ñeñt atma'ntataret carrnero ñeñt amtsarettatse't ochñartsocop

²⁹ Tsapatña Juan allempo entapan Jesús ñeshoneñ en, ñaña' atet otan acheñenesha':

—Añca'yeña ñeñt o' llesenserr Yompor ñeñtcha' Po'carrneror pen, ñach yahuanmamperre' yo'chñar allohueney ñeñtfe' añe patsro'tsa'yeney, tarro'mar ñach rromuerrets yo'chñarecop atetcha' perra atet amtsarettena carrnero ochñartsocop.

³⁰ Añmapa' ñeñtca'yeña notase't ahuaña: “Ñeñtcha' huapatsa chenta'pa' ñapa' atarr ahuamencatesha', ñaña' ama tama ahuamencateyayno, tarro'mar ñapa' ahuatoteñ eñalla. Ama't allempo ne'ñalleta na, ñaña' eñalla.”

³¹ Ama't na ahuañmo'chapa' ama neñoteñe esesha'te'ña ñeñtcha' huapatsa chenta' ñeñtcha' Cristoterrets. Tarraña napa' añecpaña nohuena nach apatyenomue' acheñenesha' oño, attochña norrtaterrñañ israelena'tarneshacop ñeñt po'ño'ch Puechemer pen Yompor.

³² Allempoña Juanpa' eñotatan acheñenesha' ñapa' atet otanet:

—Na ahuaña allempo napata' Jesús'pa' Yomporña Puecamquëñ e'ñe atet nenta'p ñerra'mrrate' ye'p o' sohua'nma entot, chap e'ñe Jesúsesho.

³³ Ama't allempo napa' ama neñoteñe ñeñtfe'ña Yompor Puechemer tarraña Yompor ñeñt o' llesenserren attoch napatyes acheñenesha' oño, ñapa' atetca'ye otenen: “Esem-poch pent o' sohua'nma Necamquëñ o'ch chap e'ñe ñesho ñeñtcha' chorrosaya, ñapa' ñeñtcha'ca'yeña chorraterrahuetña Parets Puecamquëñ.”

³⁴ Na po'ño'chpa' o'ca'ye neñch ñeñto'mar te'pa' neñotatenes ñeñtca'yeña Yompor Puechemer.

Ñeñt ñanom pueyochresha' pa' Jesús

³⁵ Tsapatña'pa' po'pocheño all ten Juan epuet epsheña pueyochresha'.

³⁶ Cohueñan Jesús all chopeñe'chen a'yeneñ, alla oterraneterr:

—Añca'yeña ñeñt Po'carrneror pen Yompor.

³⁷ Ñeñtña epsheña pueyochresha' allempo e'met atet oteñ Juan, ñetña'pa' allenta cota'nmet Jesús.

³⁸ Puetallesnomtsaña Jesús'pa' entapanet cota'neñet chenta' ñaña'pa' atet otapanet:

—¿Eso'tña semnen?

Ñetña'pa' atet ochet:

—Maestro, ¿erra'tña pe'chap?

³⁹ Ñaña'pa' atet otanet:

—Socterrenca'ye o'ch senteña'.

Ñetña'pa' allenta cota'neret Jesús o'ch enteñeta' all a'posa. Alla a'poset ñamet ñeñte yetro tarro'mar allempopa' o' mamamena o'ch ellerren.

⁴⁰ Ñehua, ñeñtña epsheño'maret ñeñt e'mue' atet oten Juan ñeñt cote' Jesús, puesheñarr ñeñt'pa' Andrés ñeñt Simón Pedro pa'mo'nasheñ.

⁴¹ Andrés'ña'pa' allorocma ahuer e'nerraya' Simón; o'ña entera'pa' atet otuerr:

—Yapa' o'ca'ye yenter Mesías. (Ñehua, ñeñtña ñoñets Mesías añca'ye otenet ñeñtcha' Cristoterrets.)

⁴² Andrés'ña'pa' allenta anerran pa'mo'nasheñ Simón Jesúsesho. Jesús'ña'pa' cohua-pue'pa' atet otap:

—Pa'tña Simón, ñeñte'p puechemer pen Jonás. Te'pa' nesocherre'pcha' Cefas (ñeñtara so'chñets ñeñt otenet griega'cho Pedro).

Atto Jesús'pa' chore'tan Felipe ñaña Natanael attoch pueyochresha' perranet

⁴³ Tsapaña Jesús pa' sechena o'ch ahuer Galileo. Allña entuenan Felipe ñaña pa' atet otueñ:

—Ama't pemno o'ch pōctenen.

⁴⁴ Ñehua, Felipe pa'cho'ña galileo'marnesha', ña pa'netserpa' añ pa'so'cheñ Betsaida ñeñtara ñaña Andrés pa'netser ñaña Pedro.

⁴⁵ Felipe ñapa' entuenan Natanaelpa' atet otueñ:

—Yapa' o'ca'ye yenter ñeñt ñocop quellquē't Moisés all orrtatan ñoñets ñeñt atet anaret, ñaña ñocop quellquē't ñeñt a'mta'yesaye't Yompor po'ñoñ. Añepa'tca'ye Jesús ñeñt huetsa Nazaretot ñeñt José puechemer.

⁴⁶ Natanael ñapa' atet otapan Felipe:

—Nazaretot pa' ama't ahua'tapa' amaca'ye huenoña ñeñt e'ñe cohuen acheñ.

Felipe ñapa' atet otererr:

—Po'ño'ch orraca'ye o'ch penteña'.

⁴⁷ Natanaelpa' allenta ahua' o'ch entenana' Jesús. Jesús ñapa' entapan Natanaelpa' ñaña pa' atet eñora ñocop:

—Añca'yeña po'ño'ch puesheñarr israelnesha' ñapa' amaca'ye shequēno ama't mame-sha.

⁴⁸ Natanael ñapa' atet otosan Jesús:

—Napa' ¿errotenote'tña peñotenen? Amaca'ye pentarno.

Jesús ñapa' atet otererr:

—Allempo ama a'sechenpa' Felipe nesho, allempo pa'pa' alla pa'nen mañto higocho ñaña pa' nentene'ca'ye.

⁴⁹ Natanael ñapa' atet otererr:

—Maestrocha' pepa'tña Yompor Puechemerep. Pepa'tña Añcha'taret ñeñt atarr cohuen allohuen israelnesha'.

⁵⁰ Jesús ñapa' otererr:

—Napa' o' nota'pa' napa' nentene'p allempo pa'nen mañto higocho, ñeñto'marte'ña o' pame'ña'na. Te'ña pa' o'ch notas, elloña te'pa' nanaccha' senterrnan nepartsoña ñeñt ama tama sentennana'.

⁵¹ Jesús ñapa' alla otererr:

—Po'ño'chca' notenes, senterrcha' enet atoraret ñaña Yompor po'mllaño'teñrenesha' a'ta'chenet ñaña sohua'chenet e'ñe nesho, na Ñeñten Acheñetosets.

2

Allempo sena'ta puesheñarr yacma all anetso añ pa'so'cheñ Caná allara Galileo

¹ O'ña ma'pamuetuerr allempo cherr Jesús Galileo, allña anetso Caná atarr coshaprechet puesheñarr yacma ñeñt sena'tetsa. Jesús ña pachorpa' allo'tsen.

² Jesús ña epuet pueyochresha'pa' ñetpa'cho'ña ahua'ñare'ttet allcha' rrallme'chapreteneta'.

³ Allña pa' cha huaña'pset vinos. Jesús ñapa' atet och pachor:

—Te'pa' ama eñalle vinos, o'cha huaña'pset.

⁴ Jesús ñapa' atet otan pachor:

—Achocha' eso'mare'tña atet pōctenenña na. Nocoppa' amaca'ye chena' allempoch es norrtatyes.

⁵ Tarraña ama't atet otaña' pachorña pa' atet otan ñeñt sherbets all:

—Ñerra'm errotencha' otas nechoyorpa' saña pa' e'ñech atet sepa.

⁶ Ñehua, allpa' allo'tsen pechapmā orrot mapyem. Ñeñtña orrotechnopa' tama ateshamerr, puenā'ttso orrot pa' ñato' sente' oñ epa galon amapa' ma'pate' galon sets oñ attoch chorreresua. Ñeñt orrotechnopa' allecma nenet oñ alloña a'cohuentatena judionesha' Partsocop ñeñt atet anarettenet ñocpuet.

⁷ Allñapa' atet otan Jesús ñeñt sherbets all:

—Te'pa' o'ch se'chorrayes oñ orroto.

Ñetñapa' atetcho' pet e'ñe e'chorraresuahuet oñ.

⁸ Allempoña o' e'chorraresuetpa' Jesúsñapa' atet oterraneterr:

—Te'ñapa' o'ch seshe' coñe'tpa' o'ch sanemñ allo'tsen ane'tañ.

Ñetñapa' atetcho' pet.

⁹ Allempoña ane'tañpa' allenta amllan oñ ñeñt a'pnasaret vinos ñañapa' ama eñocherrotte' o' huapatetña vinos. Aña eñotene' ñeñt sherbenahuet all ñeñt etasote' oñ. Allempoña amlla'huan vinospa' ñañapa' allenta agotan ñeñt sena'tetsa.

¹⁰ Ñeñt'pa' atet och:

—Ñerra'm cho yorrrpa' añcha'ña ñanom yorrrtat ñeñt e'ñe cohuen vinos. O'chña yonuahue ahua'ñaref e'ñe cohuen vinospa' allempochña yapanet ñaña ñeñt ama e'ñe cohue-nayaye. Tarraña ñañapa' amaña atteye' pepeno. Ñeñt'apa' cha'tña ñañño'tuaña vinos ñeñt e'ñe cohuen tayaño' porrtach. (Ane'taññapa' atet otan ñeñt sena'tetsa tarro'mar ñapa' ama eñoteñe.)

¹¹ All ñanom entatanet Jesús po'partsoñapa' ñeñt'pa' arr Cano allara Galileo. Attoca'yeña orrtatanetña Jesús po'partsoteña. Allempoña pueyochresha'pa' o' eñochet po'ñoche'pa't ñapa' Parets attoña e'ñe ame'nyet.

¹² Allempoña Jesús'pa' ahuo' Capernaumo pachore'na ñaña pa'mo'nasheñechno, ñaña allohuen pueyochresha'. Allñapa' alla allponmateneta'.

Atto Jesús'pa' a'cohuentatosan Parets pa'paquëll

(Mt. 21.12-13; Mr. 11.15-18; Lc. 19.45-46)

¹³ Allempoña chapmoch pascuapo allempoch alla cosherrerr judionesha'. Jesúsñapa' ahuerr Jerusaléno.

¹⁴ Allña Parets pa'paclopa' entuenan ñeñt pomuene' po'huacsher, ñaña carrnero, ñaña yeḗ; ñaña ñeñt cañya'yenahuet po'çllayoret'pa' ñetpa'cho'ña alla anorrchenet.

¹⁵ Allñapa' pellta'tosan apech pashtarech. E'ñe matatuosan allohuen ñeñt pomatsre'tyetsa Parets pa'paclo, e'ñe ahuanerret po'huacsher ñaña po'carrneroret. Ñaña ñeñt cañya'yenahuet po'çllayoret'pa' e'ñe yo'patsetam'pesuosanet po'çllayoret patso. E'ñe a'coye'tam'pesuosanet all na'yenet po'çllayoret.

¹⁶ Allpa' atet otosan ñeñt pomuene' yeḗ:

—Te'pa' sahanerr añ arroḗ. Amach atet seḗatstono Nomp'or pa'paquëll atet ñerra'mrrate' ñeñt e'ñe pocollenochaya allecma pomatsre'tyenet.

¹⁷ Allempoña pueyochresha'pa' allenta yerpuet ñoñets ñeñt anaret ahuaḗoteñ ñocop, ñeñt'pa' atet oten: "Napa' atarrcha' nempa'tonaḗ pepaquëll ama'tcha' ñeñto'mare'na muetserrnetañ."

¹⁸ Allempoña judionesha' pa'm'cha'tare'ternesha'pa' atet ochet:

—Añña porrtatosnay pepartsoña allochñapa' attochña yeñotaḗ po'ñochpa' ḗapa' allsen-sareteḗte', te'ñapa' atto' peḗosnayte' añechno.

¹⁹ Jesúsñapa' atet oterraneterr:

—Sapa' ama'tcha' sa'matoñ añ Parets pa'paquëllpa' poma'pamtañoña napa' o'ch alla naḗomater.

²⁰ Judionesha'ñapa' alla otereterr:

—Añ atto e'nuoñet Parets pa'paquëllpa' atarr atomat aḗorrareḗta e'ñe pa'tatsoch çharrohua char puechena pechap. Ta', ḗañapa' ¿po'ñochcha' e'ñech poma'pamtañoocma yetpa' o'ch alla ḗatomatuer?

²¹ Ñehua, Jesús'pa' añepa't otanet ña po'chets ñeñt'epa't pa'paquëll pen Parets.

²² Ñehua, chap allempo muetseret Jesús allempoña tanterrapa' pueyochresha'chnoñapa' allenta yerpuerret ñeñt atet ote't Jesús allempo. Ñeñto'marña allempo

Jesús pueyochreshachnopa' atarr yemterrñañet Yompor po'ñoñ ñeñt' anuaret' ahuaototeñ, ama't ñaña Jesús po'ñoñ atarr ame'ñeret.

Jesúsapa' e'ñe eñotueney allohueney ñeñt' atet yoctape'chyen yeyochro

²³ Allempoña allo'tsen Jesús Jerusaléño, all coshapretenet pascuapo shonte' acheñenesha' enteññañet ñeñt' atto orrtatenanet po'partsoña all, ñeñto'marña allpa' shonte' ame'ñaya.

²⁴ Tarraña Jesúsapa' ama yemtanete'te ñet, tarro'mar ñapa' eñotanete't atet allohueney acheñey chocma yoctape'chyen ñeñt' yemnen ya.

²⁵ Ñapa' ama e'nenano ama't puesheñarra ñeñt'cha' ote' ñeñt' atet yoctape'chyen allohueney acheñey. Tarro'mar ñapa' chocma eñoteney atet yoctape'chyen allohueney acheñey.

3

Allempo Nicodemopa' huapa Jesúsesho

¹ Allempopa' eñall puesheñarr yacma ñeñt' fariseo ñeñt' sochetsa Nicodemo. Ñeñt'ñaapa' puesheñarr ñeñt' añcha'taretetsa judioneshacop.

² Ñañaapa' huapa Jesúsesho tsapopa' atet otos:

—Maestrocha' yeñoteneþ þapa' añ pellsensene' Yompor attoch peychatosey cohuen tarro'mar yapa' yeñoteñ añach orrtatyene' partsoteñets ñeñt' ahuaamencat pen Yompor.

³ Jesúsñaapa' atet otaþ:

—E'ñe po'ñoñ notañ, esesha'ch ama eñalleterrtso ello ñetñaapa' amach errotenot pueyochresha' perraneto Yompor.

⁴ Nicodemoñaapa' atet otererr:

—Amate' errotenot ye'ñalleterrroña po'pocheñoña' o'ca'ye yepo'nme'ten. Errotenotuáte'ñaca' yeçherrerrña yachor pa'to attotcha' ye'ñalleterrerr po'pocheño.

⁵ Jesúsñaapa' atet otererr:

—E'ñe po'ñoñ noteneþ, erra'tsencha' ama eñalleterrtso oñot' ñaña Yompor Puecamquëñoñ, amate' errotenot pueyochresha' perraneto Yompor ñeñto'marña amach eshec o'patapreteretoña Yompor po'cohuenña ñeñt' atto ayochreshattena ña.

⁶ Ñeñt' atto eñalletena arromñañenesha'pa' ñeñt'pa' arromñaña. Tarraña ñeñt'cha' eñalleterrtsa Parets Puecamquëñoñ, ñeñt'pa' ñeñt'ña camuecñetsotets ñeñt'ñaapa' ama arromñañeshayaye.

⁷ Ñeñt' atet noteneþ, “allohuenespa' añ sepalltena o'ch se'ñalleterrerr ello”, þapa' amach cha pe'charrtatsto peyochro, amach cha þotatsto año'te' errotenot pe'ñalleterrroña ello po'pocheño.

⁸ Ñeñt'pa' e'ñe atet pena ñerra'mrrate' mōrr. Mōrrpa' erra muene'pa' allcha' mōrraren. Pe'muente' atet ma'moreten, ama peñoteñe errotte'ña huena ñaña errate'ña sen. Atetcha' perra ñaña allohuen erra'tsencha' eñalleterrtsa Yompor Puecamquëñoñ.

⁹ Nicodemoñaapa' alla a'þto'tererr:

—Ñeñt'pa' ¿errotena'tña añ?

¹⁰ Jesúsñaapa' atet otererr:

—Þapa' ama't añepeñ israelnesha' po'maestror, ama't peñotenoña añ.

¹¹ E'ñe po'ñoñ noteneþ: Allohueney ya ñeñt' yeñotenpa' ñeñt'cha'ña yeserrpare'ten ñaña ñeñt' yentyenpa' ñeñt'cha'ña ya'poten tarraña sapa' ama çhennasoña seyoçhro añ ñeñt' ya'poten.

¹² Ñerra'm añña notenes ñeñt' atet yeyçhena añe patsro, saña ñerra'm ama same'ñennopa' errotenotuáte'ñaca' ye notasña ñaña ento'mar ñeñt' Yomporecop.

13 'Ama eñalle ama't puesheñarra ñeñtcha' a'tapuets ento ñaña ñeñtcha' sohuerrtsa ñeñtara entot. Naptaña na Ñeñten Acheñetosets ñeñten sohuatsa entot, napta nentar Nompör pue'ntañö tarro'mar napa' ñeñt na'netser nepen.

14 Ñehua, ahuañ Moiséspa' yeçhcatan ñeñt atma'ntataret shecheñ all amayo, ñeñtña'pa' huanquë' tsachopa' o' echantam̄pes enonet. Atto Moisés echantam̄psan shecheñ all amayopa', napa'cho'ña ñeñt poctetsa nocop atetcha' perrnet naña, corsocho'tcha' echantam̄psareten.

15 Allochñapa' allohuen ama't erra'tsena ñeñtcha' name'ñerraya na, ñetñapa' amach chenquërreto, e'ñech corretseta pocsheñeshocmañen e'ñe tayoteñ errponañohuen.

Atto atarr morrentenya Yompör allohueney acheñeneshay

16 'Atto atarr morrentenya Yompör allohueney acheñeneshay arr patsro ñeñto'marña apuey Puechemer ñeñt po'parror pen, allochñapa' allohuen ñerra'm esesha' ame'ñerraya ña amach chenquërreto, ñetñapa' corretsetach pocsheñeshocmañen e'ñe tayoteñ erponañohuen.

17 Yompörpa' amaca'ye añecpaye' mueñanoña Puechemer arr patsro attoch mueñosan acheñenesha' coñcheñtso. Ñapa' añecopña mueñe attoch ñach a'qeshpatose'ña acheñenesha' arr patsro.

18 'Erra'tsencha' ame'ñerraya ña ñetñapa' amach amñareñterreto coñcheñtso. Tarraña ñeñtcha' ama ame'ñerrayo ñocpuetñapa' anareñtet attoch amñareñterret coñcheñtso tarro'mar ñetpa' ama ame'ñoñeto Yompör Puechemer ñeñt po'parror pen.

19 Ñaña'pa' o' huapa arr patsro attoch yeçhatosey ñeñt e'ñe cohuen enten Yompör, attoña a'puetarsam̄psosnay yocapña. Tarraña shonte' acheñenesha' ñetñapa' ama mueneto o'ch a'puetarsam̄psareñtet poctapñet. Ñetpa' aña muenenet checmete' tarro'mar amaca'ye masosyaye' coñape'chyeneto. Ñeñto'marña ñetpa' atto'tcha'ña amñareñterret coñcheñtso.

20 Allohuen ñeñt ama masosyaye' coñape'chyeneto ñetpa' ama cohuenaye' enteñetoña Cristo ñeñt a'puetarsam̄pene' allohueney yocapña. Ñeñto'marña ama eneto allo'tsen ñeñt a'puetarsam̄psañtetsa taye'to'te' orrtatareñtet poctapñet ñeñt ama masosyo.

21 Añña ñeñt e'ñe atet pene' ñeñt po'ño'ch cohuen enten Yompör, ñetpa' e'ñe pocte' enteñet o'ch onet allo'tsen ñeñt a'puetarsam̄psañtetsa tarro'mar ñetpa' añ muenenet o'ch eñotateret po'potantañ ñetpa' Yompör ahuañencat penahuet ñeñto'marña ñetpa' añ orrtatyenet ñeñt cohuen enten Yompör.

Allempo Juan ñeñt apatañtetsa Yompörecop, ñapa' alla cohuentaterranerr Jesús

22 Allempoña Jesús'pa' ahuererr Judeo epuet pueyochresha'. Allña'pa' alla allponmat epuet pueyochresha'. Allña Jesús'pa' apatyesan acheñenesha' Yompörecop.

23 Ñaña allempo Juanpa'cho'ña arr apatyenan acheñenesha' all oteñet Enón e'ñe alla allame'tets Salimo, tarro'mar allpa' shonte' oñe'chno. Acheñenesha'pa'cho'ña shonte' hua'cha'tyeset attoch apatareñtetyeset Yompörecop.

24 Ñehua, allempopa' ama yottam̄peñeta' Juan.

25 Allempoña Juan pueyochresha'pa' serrpare'tet epuet judionesha'. Allpa' añ serrpare'tatanna'tet este' poctetsaña attoch ya'cohuentatareñta Partsocop, añte' ñeñt atto apatyen Juan amapa' ñato' añte' atto apatyen Jesús.

26 Ñeñto'marña ahuanmuet Juaneshopa' ñetñapa' atet otoset:

—Maestrocha' ñeñt epa'ñ ahuaña yom̄ta'n Jordanaso, ñeñt peserrpare'tatosey, ñapa'cho'ña ñepa'tca'yeña apatyets ñaña. Ñeñto'marña allohuenetpa' o'ca'ye ahuanmuet ñesho.

27 Juanñapa' atet otapanet:

—Ama't puesheñarroṭeyapa' ama ahuamencateyayye ñerra'm ama Yompor ahuamencat yeṭaye.

²⁸ Sapa' ama't señoṭeñe ñeññ atet notuanmas ahuaña, napa' ama añeyayno ñeññencha' Cristoterrets. Napa' atta mueñan nanom attoch nota.

²⁹ Jesúsapa' e'ñech atet netma'ntacha atet ñerra'mrrate' yacma ñeññ sena'tetsa. Ñehua, ñeññ sena'tetsa ñeñññaca'yeña aguëne'ña coyanesha' ñeññcha' puetapor pa'. Tarraña ñeññña pueyempa' ñeññ parro epuet ten ñerra'm añ e'm pueyem po'ñoñ ñeññ sena'tetsapa' ñaña' atarrcha' coshapretana pueyem. Ñeñño'marña na te'pa' atarr nocshapreteña Jesús.

³⁰ Jesúsapa' e'ñe pocte' allo'nepa'ñaca'yeña enteñet po'ñoçhpa' ñaca'yeña atarr sherbets. Nañapa' e'ñe pocte' allo'nepa'ña entennet napa' ama e'ñeye' nesherbena. Arrpa' allohua atet ot Juan Cristocop.

Atto yeñoteñ ñeññ huetsa entot Yomporeshot ñeññca'yeña atarr sherbets

³¹ Ñehua, yeñoteñ ñeññ huetsa entot Yomporeshot eñchetepa' ñapa' atarrca'ye añcha'taret. Tarraña ñeññ patso'marnesha' ñeññpa' alla eñorena patso'mar. Ñeññ huetsa entot Yomporeshot eñchetepa' ñapa' atarrca'ye añcha'taret.

³² Tarro'mar allohuen ñeññ entyen Pomporesho ñaña ñeññ allpon e'myen all, ñapa' ñeññca'yeña serrpare'tateney, tarraña ama't puesheñarroṭapa' ama eseshaye' çhapahuetoña pueyoçhreto ñeññ atet otenanet.

³³ Ñeññ çhapa pueyoçhro ñeññ atet serrpare'tatenanet ñeññ huapatsa Yomporeshot ñetñapa' atet otet: Yomporpa' e'ñeṭe' po'ñoçh atet oten Puechemerecop.

³⁴ Tarro'mar ñeññ llesensa' Yomporpa' Yomporo po'ñoño eñorena tarro'mar Yomporpa' ama atpareṭayaya chorratenanetoña Puecamquëñ.

³⁵ Yomporpa' atarrca'ye nanac muerenanaña Puechemer. Ñeñño'marña apuhueñ allohuen allpon eñall allochñapa' ñach pomnaren penahuet.

³⁶ Esha'ch ame'ñenaya Yompor Puechemer ñetpa' corretsetach pocsheñeshocmañen tayoteñ ama't errponañohuen. Añña ñeññ atpare'tene' Yompor Puechemer ñetpa' amach enterreto ñeññ correñtsor. Ñetñapa' çhachca'ye coñchaterranet Yompor.

4

Allempo Jesúsapa' serrpare't epuet coyanesha' samario'marnesha'

¹⁻³ Allempoña Jesúsapa' atarr ayochreshatta nanac, ello metanenan atto yochresha'ten Juan. Ñaña atarr apatyenan acheñenesha' Yomporecop. Ñehua, ama ñaye' apatenahueto, ñaña apatenahueto pueyochresha'. Ñeñño'marña allempo e'mare'ch fariseonesha' ñeññara judionesha' pa'ñcha'tareternesha'. Jesúsña allempo eñoch atto fariseonesha' o' eñochet ña atarr nanac ayochreshatta, ñaña' allenta queçhpa'nerran Judea, o' alla ahuer Galileo.

⁴ Toññapa' e'ñe arr oñen Samario'mar, ñeñño'marña all oñerrña Jesús.

⁵ O'ña çhap Samariopa' allotñapa' o' ahuen paterr anetso ñeññpa' añ pa'so'cheñ Sicar. Añña anets Sicarpa' allame'ttso'tsena Jacob po'patseñ ñeññ apa'nman puechemer José ahuat.

⁶ Allñapa' all poten oñ ñeññ po'ñeñ pe't Jacob. Jesúsñapa' nanac tsanom puechope'cheñoñ ñeñño'marña anorros e'ñe allame'tets apco'sato. Allempopa' e'ñe pocto'tsen atsne'.

⁷⁻⁸ Allñapa' machayoṭa huapa puesheñarr coyanesha' ñeññ samario'marnesha' ñeññcha' etenaya' oñ. Jesúsñapa' atet otaṭ:

—Napa' nemneñ o'ch paṭosen oñ.

Ñehua, allempopa' pueyochrenesha'ñapa' o' ahuanmuet anetso o'ch raññeneta' ñeññcha' rret.

⁹ Coyanesha'ña samario'marnesha'pa' atet otos:

—Papa' judionesha'ppa' eso'mare'tcha'ña penamapuenña oñ o'ch napa'p. Papa' peñotenen napa' ñeññen samario'marneshan.

(Ñeñño'marña atet otos tarro'mar judionesha'pa' ama amo'tstanneneto epuet samario'marnesha'.)

¹⁰ Jesúsñapa' atet otererr:

—Ñerra'm peñoteñeñ ñeññ e'ñe atta apueney Yompor, ñaña ñerra'm peñotenoñ na ñeññen potene' p'apuen oñ, p'apa' o'ch penamuenoñ na nañapa' o'ch napospañ oñ cohuen alloch e'ñe p'ocrañ.

Ñeññ oteñ o'ch a'p cohuen oñ, añ oteñ Yompor po'cohuenña, tarraña coyanesha'ñapa' ama eñoch,

¹¹ ñeñño'marña atet otererr:

—Ama Ayochreshate pecheno alloch pet oñ. Oñpa' nanacrramtso o'pono'tsen. Er-rotuamtsoch peyoraña oñ ñeññ e'ñe cohuen alloch e'ñe yocra.

¹² Ahuat yatañ Jacoboñ ñeññ yapa'nmue' añ oñ ñapa' ñeññ orre't ñaña puechemer-neshañ ñaña po'huacsherneshañ. Papa' añe'phuate'ca'ye ñeññep' ello metanene' yatañ Jacoboñ atto am'cha'tarette't ña.

¹³ Jesúsñapa' atet otererr:

—Allohuen ñeññ orrene' añ oñpa' elloch alla oñpa'terreter.

¹⁴ Tarraña ñerra'm esesha' orre' oñ ñeññcha' napanet na ama't ahuatapa' amach oñpa'terreto. Ñeññcha' napanet na oñ, e'ñe pueyochretopa' puenasanetcha' atet ñerra'mrrate' allot'poten oñ, amach huañerro ama't ahuata. Attochña ñetpa' corretsetach tayoteñ ama't errponañohuen.

¹⁵ Coyanesha'ñapa' alla otererr:

—Ñeññep'ñapa' Ayochreshate p'apuen ñeññ oñer allochñapa' amach alla no'ñpa'terrerro allochñapa' amach alla nohuerre'te eterrayerr arr oñ.

¹⁶ Jesúsñapa' atet otererr:

—Te'pa' orrerrep', o'ch pe'chore'tera' perrollar, allempochña alla pehuerra arr.

¹⁷ Coyanesha'ñapa' atet otererr:

—Napa' amarramtso arrollare'teno.

Jesúsñapa' atet otererr:

—E'ñe po'ño'ch atet poten año' arrollare'teyaype.

¹⁸ Tarro'mar amnarsheña perrollareshe'mañ ñeññ pueyoruarep'. Ñaña ñeññ pey-orene' te'pa'cho'ña ama perrollareyaye. Ñeññpa' e'ñe po'ño'ch atet poten.

¹⁹ Allempoña e'man atet oteñpa' coyanesha'ñapa' atet otererr:

—Ayochreshate, te'ña po'ño'chpa' o' neñota'p' p'apa' añe'pepa't ñeññep' a'm'tene' Yepapar po'ñoñ.

²⁰ Yatañneshañ samario'marnesha'pa' ñetpa' concorpuete't ma'yochatset arr añ as-pentero. Tarraña sa ñeññes judioneshaspa' sapa' cha soten aña paterr p'octetsa Jerusaléno'chña yeconcorpuena' allohueney.

²¹ Jesúsñapa' alla otererr:

—No'cheshacha' p'ame'ñona ñeññ atet notene'p' tarro'mar te'pa' o' chap ñerra'm esem-poch sema'yocheña Yompor, ama sepallteno o'ch seconcorpueña Apa añ as-pentero ama't ñaña Jerusaléno.

²² Saña ñeññes samario'marneshas aña semchatse'tyen ñeññ ama señoteno. Yaña ñeññey judioneshay añ yeconcorpana'tena ñeññ e'ñe po'ño'ch yeñoten, tarro'mar judione-sha'pa' ñetpa' o' orrtateret ñeññcha' a'qeshp'atañtertsa.

²³ Tarro'mar te'pa' o' chap ñeñtcha' e'ñe po'ñoçh aye'choçhtaterre' Yompor, arrcha'ca'ye aye'choçhtatoñet e'ñe ñet pueyoçhreto. Ñeñtcha' atet aye'choçhtaterrñañet ñeñtña e'ñe po'ñoçh atet muenen Yompor.

²⁴ Yompor Paretspa' ñapa' ña camuecñetsotets amaca'ye entpahuoyaye. Ñeñto'marña ñeñtcha' e'ñe po'ñoçh aye'choçhtaterre' ña, arrcha'ca'ye aye'choçhtatoñet e'ñe ñet pueyoçhreto, ñeñtpa'cho'ña amaca'ye entpahuoyaye. Tarro'mar ñeñtcha' atet aye'choçhtaterrñañet ñeñtña po'ñoçh atet muenen Yompor.

²⁵ Coyaneshañapa' alla otererr:

—Napa' neñoteñ añ Mesíaspa' huapach ñeñtara ñeñt yoten Cristo. Ñerra'm ña huapat-sapa' e'ñech serrpare'tatuerrey ora allohuen ñeñt esocmañen eñall.

²⁶ Jesúsñapa' alla otererr:

—Napa' naca'ye ñeñten peserrpare'tatene'.

²⁷ E'ñe allempo atet otenpa' pueyoçhreshañapa' huachherret. Ñetñapa' atta cohuan-rroretueret all serrpare'tatenan coyaneshañapa'. Tarraña ñetpa' ama't puesheñarrofapa' ama eseshaye' otuerraye ¿eso'tña pemnen? Ama't puesheñarrofetapa' ama otuereto ¿eso'mare't peserrparenña epaḡ coyaneshañapa'?

²⁸ Coyaneshañapa' alla na'nerran porretpa' o' ahuerri alla pa'netsro. Allñapa' otuerran pamo'tsesha':

²⁹ —Te'pa' soçterren o'ch senteña' puesheñarr encaneshañeñt o' serrpare'tatuosen ora allpon ñeñt atet neḡa'yegara. Ñato' ñeñtfe'tña Cristotets ñeñt atarr yecuen o'ch huapa.

³⁰ Ñetñapa' allenta onaçha'tet anetsotpa' o' ahuanmuet Jesúsesho.

³¹ Allempo ama çhaçheneta' ñesho pueyoçhreshañapa' atet otyeñet:

—Maestro ma'mate'tach rreñets.

³² Tarraña ñapa' atet otanet:

—Napa' nechenca'ye ñeñt nerran nepen ñeñtña sapa' amaca'ye señoñe.

³³ Pueyoçhreshañapa' atet otanna'tyeset:

—Amate' eseshañapa' huapatoyeña puerran.

³⁴ Jesúsñapa' alla oterraneterr:

—Añca'yeña nerran nepen o'ch neḡa' atet muenen Nompor ñeñt nellensene', tarro'mar ñeñtpa' attoçhña e'ñe netsotuoñ po'taruas.

³⁵ Ama't sotoñoña sa: “Palltenmeñ pa'tatsmña arrorr o'ch e'ñe ya'yapaçha'hua yenareñ.” Te'ñapa' o'ch notas: Te'pa' secue'ca'ye a'yo o'ch sentap shonte' acheñ ñeñt onaçhets, o'ca'ye çhap allempoch ame'ñerrnet. Te' ñetpa' e'ñeca'ye atet nentenatet ñerra'm yenareñpa' o' pomella'huen o'ca'ye çhap allempoch yapçha'hue.

³⁶ Ñeñt apçhets nocop ñeñtpa' atsa'tarettetcha' ñeñtcha'ña atarr coshaterrahuet. Ñaña allohuen ñeñt ame'ñatenet ñetñapa' napanetcha' alloch e'ñe correrret tayoteñ ama't errponañohuen. Ñeñto'marña añ ñeñt nare'tets ñaña ñeñt apçhets nocoppa' e'ñech parroçma coshapretannenet, ama't ñeñt ñanom epatue' neñoñ ñaña ñeñtcha' torratta chenta' ñeñt nocop.

³⁷ Tarro'mar ñeñtpa' e'ñe po'ñoçh atet yepena ñeñt atet oten añ ñoñets ñeñt çhocma yotanna'tyena ya: “Puesheñarrpa' o'ch nare'tatsetyes, po'psheñeñña ñeñtcha' apçha'yets.”

³⁸ Ñaña sapa'cho'ña o'ch nemñas samña o'ch same'ñatera acheñenesha' ama't ama san-maye' ñanom torratto all nocop, po'psheñeñña ñeñt ñanom torrattset all. Tarraña te'pa' sach ame'ñaterrahuet attoçh setorrappretera ñeñt ñanom torrattset all nocop. Te'pa' sach apçherrets all ama't ama saye' nare'tatsettsete all. Ama't po'psheñeñ nare'tatsettsete, te'ñapa' sach taruasapreterahuet all.

³⁹ Coyanesha'pa' e'ñe po'ñoñoña ame'ñatana pamo'tsesha' samario'marnesha' allempo serrpare'tatuerranet atto Jesús'pa' o' serrpare'tatos ora allpon ñeñt atet puepa'yesara.

⁴⁰ Ñeñto'marña samario'marnesha' allempo hua'cha'tet ñeshopa' atarr nanac a'patare'tapet Jesús a'posanetepa'to' all pa'netsreto. Ñaña'pa' e'ñe epomta a'posa all.

⁴¹ Po'potantañe'chnopa' shonte' ñeñt ame'ñapaya atto serrpare'tatosanet Jesús all pa'netsreto.

⁴² Ñetña'pa' atet oteñet coyanesha':

—Te'ñapa' ama e'ñe pa' peñoño'feye' yame'ñeno. Te'pa' e'ñe ya e'muene' yañña allo-huene'y. Ñeñto'marña te'yapa' o' yeño'ch po'ño'ch ñapa' ñach ya'queshp'aterre' allohuene'y ñeñte'y añe patsro'tseney.

Puesheñarr yacma ñeñt sherbene' am'cha'taret ñeñtña puechemer a'crraterrña Jesús

⁴³ Allempoña epomta'muen Samario Jesús'ñapa' o' alla ahuen Galileo all pa'ney peñ ña.

⁴⁴ Tarro'mar e'ñe po'ño'ch atet eñorena Jesús ñocop, ñeñt'pa' atet ot: Ñeñtña a'mtene' Yompor po'ño'ñ pa'nyo'marnesha'ñapa' ama't mameshapa' ama mecha'na'teñeto.

⁴⁵ Allempoña çherrerr Jesús Galileo allohuene'ña galileo'marnesha'pa' e'ñe cohuen agapapueñet tarro'mar ñetpa' e'ñe entuoñet allohuene' ñeñt atet pa'yesos Jerusaléno allempo entapreteneta' pascua all. Ñetpa'cho'ña allempopa' all ahuanmuet ñamet o'ch entapreteneta' pascua.

⁴⁶ Jesús'ñapa' alla ahuererrerr po'pocheño Cano e'ñe allara Galileo all e'ñe ñanem a'pnasenana' oñ vinos. Allña'pa' allo'tsen puesheñarr ñeñt sherbene' am'cha'taret. Ñaña puechemerpa' cha'atsna'ten all anetso Capernaumo.

⁴⁷ Allempoña e'mare'tan Jesús o' huapa Judeot o' çhenerr Galileo, ñaña'pa' allenta ahuo' o'ch enteña' attoch oteña' coterepa' pa'paclo attoch a'crraterrñaña' puechemer, o'rromamoch.

⁴⁸ Jesús'ñapa' atet och:

—Ñerra'm ama nentatasñe nepartsoña ñaña ñeñt ama sentarepa' amate' same'ñennañe.

⁴⁹ Ñeñtña sherbene' am'cha'taret'pa' o' alla otererr:

—O'ch Ayochreshate p'oc'erren tayepa'tña'pa' ama rromuena' nacñe'ter.

⁵⁰ Jesús'ñapa' atet otererr:

—Te'pa' ahuerre'p, pechemerpa' o'ca'ye alla correrra.

Yacmañapa' e'ñe ame'ñana Jesús po'ño'ñ ñeñt atet och, ñaña'pa' allenta ahuer.

⁵¹ Allempoña ahuen toño'ñapa' p'oc'tenan pueñañresha'. Ñetña'pa' atet otapueñet:

—Pacñe'terpa' o'ca'ye correna.

⁵² Ñaña'pa' allenta otapanet:

—¿Esempo'tña pasateñ?

Ñetña'pa' atet otereterr:

—Ellerro allempo coyatse'ten atsne' mame'pa' allempoca'yeña metueñña po'urateña.

⁵³ Allempoña pomporpa' o' yerepya ñaña'pa' atet ot:

—Ellerropa' allponca'yeña atsne' otenña Jesús nechemerpa' o'ca'ye correrra.

Ñapa' ñeñtña ame'ñate' ama't ñaña allohuene' pamo'tsesha' ñeñt parro pa'paclo'tsa'yenet e'ñe ame'ña'huet ñamet.

⁵⁴ Arrpa' atto puepocheño Jesús'pa' entatanet po'partsoña allempo huapa Judeot o' alla çherrerr Galileo.

5

Atto Jesús'pa' a'crraterran puesheñarr atsnañeñ all Betesdaso

¹ Allempoña o' alla çherrerr allempoch alla cosherrerr allohuen judionesha' ñeñt atet anaretet ñocpuet. Jesúsña'p' alla ahuererr ñaña Jerusaléño.

² All Jerusaléño e'ñe allame'tets allotecma a'be'teñet carrnero allña'p' allo'tsen oñ apco'sattataret ñeñt sochen hebreonesha' po'ñoño Betesda. Ñeñña'p' eñall amnar puecha'petar.

³ Allña puecha'petarotpa' shonte' atснаñeñnesha' ñeñt pena'rrartetsa all –ñeñt aporo'yetechno ñaña ñeñt che'ca'repaçhno ñaña ñeñt echarreyetsa. Ñetña'p' añ cohuenet ñerra'm esempoch pelle'llchena oñ.

⁴ Tarro'mar ñerra'm esempoch pelle'llchena ñeñt oñerpa' mellañoñeño'ch sohuetsa all o'ch pelle'llchatosan oñ. Ñerra'm esesha' ñanom esha'tostsa all oño allempo pelle'llchena ñeñña'p' atснаñeñterpa' acrrerroyo'ch, ama't erra'tsena atснаñtsor rromuenahuet.

⁵ Allña'p' allo'tsen puesheñarr yacma ñeñt ma'poch çharra' puechena posoc char atсна'ten.

⁶ Allempoña entos Jesús alla ñanena ñaña'p' eñotos shonte' char atсна'ten ñeñto'marña atet otos:

–¿Ama't pemno o'ch pocrerra?

⁷ Atснаñeñña'p' atet otan Jesús:

–Amaca'ye Ayochreshate eñalle ñeñtcha' neshate' oño allempo pelle'llchena. Napa' o'ch taya ahuen po'psheñeñña'p' ahuo'tcha' esha'tosa ñanom.

⁸ Jesúsña'p' atet otererr:

–Te'pa' o'ch notosep: Petantena, pechta'nen allo pemuen, pechope'chen tayecma.

⁹ Yacmaña'p' allorocmuepa'tcha' correna, ñaña'p' allenta chetenan allo muenpa' allenta chope'chnen. Ñehua, ñeñña'p' yetropa' allempo amesen judionesha'.

¹⁰ Ñeñto'marña judionesha'p' atet ochet ñeñt o' correrra:

–Te' aña yetro allempocma yamesen. Amaca'ye pocteyaye o'ch ñanen pemue'.

¹¹ Tarraña ñapa' atet otanet:

–Ñeñt o' a'crratosenpa' atetca' otosen: “Pechta'nen pemue'pa' pechope'chnen.”

¹² Ñetña'p' allenta a'p'to'chet:

–¿Esesha'tña p'tose'ña, “O'ch pechta'nen pemue'pa' o'ch pechope'chen”?

¹³ Tarraña ñeñt a'crrataretterrtsapa' ama eñoteñe esesha'te'ña a'crraterre' tarro'mar Jesús'p' ama allo'tsenaro, ñapa' o' ahuer a'nahua, tarro'mar all shontosa acheñenesha' ñeñtcha' entenaya'.

¹⁴ O'ña atarr o'chetpa' Jesúsña'p' alla enterran ñeñt a'crraterr ñorra' e'ñe alla Parets pa'paclo. Allña'p' atet oter:

–Te'pa' o' pocrerra. Te'ña'p' amach alla po'chña'tatsterrerro ñato'rraña alla nanac pemueroçhterrerr.

¹⁵ Yacmaña'p' o' ahuer, atet otuerran judionesha':

–Jesúsepa'tca'yena ñeñt na'crraterre'.

¹⁶ Atet pena Jesús aña yetro allempo amesen judionesha' ñeñto'marña ñetpa' o'pateñet Jesús.

¹⁷ Jesúsña'p' atet otanet:

–Nompor e'ñe teme'ttsen atarr torrena ñeñto'marña napa'cho'ña atarr nemneñ o'ch netorra ñaña.

¹⁸ Ñeñto'marña judionesha' pa'micha'tareñnesha'p' ello atarr nanac o'pateñet o'ch muetset, tarro'mar ñetpa' atet otyeset:

–Ñapa' ama ñapfaye' aña yeter o' puesuero allempocma yamesen, ñapa' aña'ña oten e'ño' Pompor penan Parets, ñapa' ataca'ye mueneñ o'ch Partsocoptartena.

Atto atarr ahuañencattena Jesús ñeñt Yompor Puechemer

¹⁹ Jesúsña'p' atet oterraneterr:

—E'ñe po'ñoçh notenes, na ñeññen Puechemer pen Yompor amate' errotenoť es neřoña e'ñe noťa. Napa' añña atet neřa'yen atet nenteññañ Apa, țarro'mar ñeññ atet pen Apapa' napa'çho'ña ñeññen Puechemerenpa' atetcha' es neřa'yen naña.

²⁰ Apapa' atarr muerenna țarro'mar napa' e'ñeca'ye po'ñoçh Puechemeren, ñeñño'marña gatyenen ora allohuen ñeññ atet řa'yen ña. Elloña ñapa' añ gatyenen ñeññ nanac țorrapotyets ñeññ atet etsotayen ña; ñeññpa' añecop atet pennan attoña sapa' atarrcha' secuanrrortenen.

²¹ Ñehua, yeñoteñ Apapa' tantaterran arromñañenesha'pa' apuerranet allochña ñetpa' corretsetach. Napa'çho'ña e'ñeca'ye atet nepenaña naña ñeññen Puechemeren. Ñerra'm erra'tsencha' nemna' na o'ch napanet allochña ñetpa' corretsetach atetcha'ca'ye napueranet.

²² Apapa' ama't puesheñarrapa' amach a'metanperraneto errotencha' entyesueranet. Naña apuen llesens ñeññen Puechemeren nachña a'metanperrahuet errotencha' nentyesuerranet e'ñe puesheña'ttset.

²³ Allochña' attochña allohuenet mecha'na'tennetcha' naña ñeññen Puechemeren e'ñe atet mecha'na'tennanet Nompor Parets. Ñerra'm esesha' ama nemña'na'tenaye na ñeññen Puechemeren, Nompore'naca'yeña ama mecha'na'teneto ñeññ nellensene'.

²⁴ 'Napa' e'ñe po'ñoçh atet notenes: Ñerra'm esesha' e'mñote' neñoñ ñaña ñerra'm yemterrnanet Nompor ñeññ nellensene' ñetñapa' corretsetach pocsheñeshocmañen țayoteñ errponañohuen. Amach a'coñchatareťterreto ama't errponaña. Tarro'marña ñetpa' o' metanerretña ñeññ e'ñe po'ñoçh rromueñets, o' çherret allña ñetpa' corretsetach țayoten errponañohuen.

²⁵ E'ñe po'ñoçh o'ch noterrser: O' çherrmoch allempoch atet perra, ñeññ arromñañenesha'pa' ñetñapa' e'muerrnanetcha' neñoñ ñeññen Yompor Puechemeren. Ñeññcha' e'mñoterre' na neñoñ ñetñapa' corretsetach.

²⁶ Ñehua, Apapa' e'ñe ñoťa correna, ña napuene'ña attoch napa'çho'ña corretsanach naña ñeññen Puechemeren.

²⁷ Naña ña napuene'ña llesens attoch nemñe patanta'tets acheñenesha' coñcheñtso, po'potantaññapa' amach nemñerraneto coñcheñtso. Atetca'ye allsensaretenña na Ñeññen e'ñe Acheñetosets.

²⁸ Ñeññ atet o' notuaspa' amach çha semoññe'tatsche țarro'mar esempopa' çherrcha' ama't ñeññ puepampro'tsa'yenpa' e'muerrnanetcha' neñoñ.

²⁹ Cha'nmaçherretcha' allot apamparettete't. Ñeññ atet řa'yeyaye't e'ñe cohuen ñeññ poctetsa ñetñapa' añecopcha' tanterret attoch ello alla correrret. Ñeññña řa'yeyaye't ñeññ ama pocteyaye ñetñapa' añecpach tanterret attoch ello alla amñareťterret coñcheñtso.

Atto Jesús eñotatanet ñapa' Yomporeshoť aparetta llesens

³⁰ 'Amate' errotenoť es neřa'yesoña e'ñe noťa. Atet eñotatenen Nomporpa' attochña nemñe patanta'tets acheñenesha' coñcheñtso, po'potantaññapa' amach. Naña errotencha' nentyesuerranetpa' ñeññpa' e'ñe pocte' țarro'mar ama e'ñe na nemnenñoťeye' es neřa'yeno. Nomporña puemnenñoť es neřa'yen țarro'mar ña nellensene'.

³¹ Ñerra'm e'ñe nañeña a'potetsa, ñeññ atto na'potenapa' amate' es sherbeno.

³² Eñallña po'psheñeñ ñeññ e'ñe no Nompor ñeññña na'potene'ña na. Naña neñoteñ ñerra'm ña na'pote'pa' ñeññ atto a'potenen ñeññña e'ñe po'ñoçh sherbets.

³³ Naña sa ahuañmo'chapa' semñe acheñ Juanesho ñeññ a'řto'tose' nocop. Juanña atto a'potanpa' ñeññña e'ñe po'ñoçh atet.

³⁴ Napa' ama e'ñe nocpa ne'nenno ñeññ na'pote'; añecpa'naña notenes sa ñato' sapa' same'ñoñate' Juan po'ñoñ atto a'potan na, allochña' attoch sequeshperra same'ñeñoťen.

³⁵ Juanpa' e'ñe atet pe't ñerra'mrrate' lampareñ corretsa, attoña čhoyo'te't. Sañapa' sa muenatse't o'ch socshame'ta mame' all a'puetarsañpsas.

³⁶ Tarraña atet na'poten napa' ñeñña nanac sherbets. Ello metanenan ñeñ atet a'potan na Juan. Allohuen es nepa'yen ñeñ atet yechenna Apa o'ch e'ñe netsotoñ, añ netsotateña' ñeñña o' eñotatanet napa' Apa nellsensene'.

³⁷ Ñaña Apa ñeñ nellsensene' ñapa'cho'ña ñaca'yeña na'potene'. Sapa' ama't ahuařapa' ama se'maroñeña po'ñoñ atet e'morrtena, ñaña ama sentareña atet orrtena ña.

³⁸ Sapa' ama't po'ñoñapa' ama čhennasoña seyočhro țarro'mar na ñeñten llesensen Apa, sañapa' ama same'ñenno.

³⁹ Sapa' aña' seřorra'yesa Yompor po'ñoñ ñeñ atet anuaret ahuařoteñ țarro'mar sapa' čhate' sotenapañ e'ñe ñoñsochayořapa' sapa' corretsasate' errponohuañen. Tarraña Yompor po'ñoñ ñeñ anuaret ahuařoteñ ñeñpa' naca'yeña a'pote't.

⁴⁰ Sañapa' amaña semnoña o'ch same'ñernna attochña e'ñe socrrerañ.

⁴¹ Tarraña napa' ama añeye' ne'nenno attoch aye'chočhtatennan acheñenesha'.

⁴² Tarro'mar napa' neñotenes sapa' ama't mameshapa' ama semorrenteño Yompor ama't seyočhra.

⁴³ Napa' atto nohuapa Nomporña nellsensene' tarraña sapa' amaña same'ñenno. Ñerra'm esesha'chña huapatsañ ñeñ e'ñe ñoña huena saña ñeñpa' atarrte' same'ñyañ.

⁴⁴ Sapa' țarro'marña ama same'ñenno sapa' aña'ye se'nen o'ch e'ñe sañeña aye'chočhtatannetsa, amaca'yeña añeye'ña se'nenno attoch e'ñe cohuen entas ñapueř Yompor.

⁴⁵ Amach soctape'chatsche ñato' nach sottene'cherre' esempohuañen Apuesho. Tarraña eñallca'yeña po'psheñeñ ñeñcha' sottene'cherre' ñeñpa' aña'ye Moisés, sañapa' ñeñña atarr nanac seyemtena.

⁴⁶ Ñerra'm po'ñočh same'ñeñañ Moiséspa' napa'cho'ña same'ñennañcha' țarro'mar ñapa' nocopca'ye quellconas.

⁴⁷ Tarraña ñerra'm ama same'ñeññaño ñeñ atet quellconase't ña, ñeñto'marña napa'cho'ña amach errotenoř same'ñoñoña naña neñoñ.

6

Allempo Jesúsapa' rratenan shonte' acheñenesha'; ñeñña acheñenesha'pa' allo'tsen amnaroch mil

(Mt. 14.13-21; Mr. 6.30-44; Lc. 9.10-17)

¹ Allempoña Jesúsapa' ahuo' yomta'n sa'p Galileaso, ñeñțara sa'p otenet Tiberias.

² Allña' cota'neñ shonte' acheñenesha' țarro'mar ñetpa' o' entuoñet po'partsoña atto a'crratyerran allohuen ñeñ atсна' tyets.

³ O'ña čhap yomta'n Jesúsapa' ahuos aspeno, allña anorros epuet pueyochresha'.

⁴ Allempopa' o' čhappoch pascuapo allempoch alla cosherrerr judionesha'.

⁵ Jesúsña cohuatsa a'yopa' entapan shonte' acheñenesha' ñeñ onachets ñeshoneř. Allempoñapa' atet otan Felipe:

—Errahuachca' yerañña pante' ñeñcha' rros acheñenesha' ñeñ o' huačha'ta.

⁶ Ñehua, Jesúsapa' e'ñe po'tomña atet ot țarro'mar ñapa' eñoteñ atetcha' pa.

⁷ Felipeñapa' atet och:

—Ama't epoch čharroch čharra' denario* alloch yerañña panpa' ama't pueshmetařollapa' amate' rra'yeseo.

⁸ Pueyochresha'ña Andrés ñeñ pa'mo'nasheñ Simóm Pedropa' ñaña'apa' atet och:

* 6:7 Denariopa' quelle ñeñ allpon tsa'tenet pamțarr ñeñ taruaset all pa'nyo.

⁹—Arr puesheñarr huepueshachorpa' echenanca'ye amnar pan ñeññ cebada ñaña epa cac. Attapa' amate' yepataneto, acheñpa' shonte'ca'ye.

¹⁰ Jesúsñapa' atet otanet:

—Te'pa' sotanet anorrcha'tetepa'.

Ñehua, allpa' e'ñe cohuen emmo'raten pasetma'. Ñetñapa' anorrcha'tet. Yacmanesha'pa' ñato' amnarochte' mil eñall.

¹¹ Jesúsñapa' chetan panpa' parasyoso'tam̄pes, allempoñapa' apan pueyochresha'. Pueyochresha'ñapa' epatyaset allohuen acheñenesha' ñeññ anorrchets all. Attecma ña allempo apa'yesanet ñaña cac. Allohuenetpa' e'ñe agaphuahuet ñeññ allpon muena'yeset.

¹² Allempoña o' rrallme'chuetpa' allohuenetpa' e'ñepa'tcha' yetrra'tuahuet. E'ñe yetuahuetpa' Jesúsñapa' atet oterranerr pueyochresha':

—Te'pa' o'ch sa'yapa'cherr ñeññ shotna'tyets ñeññ sa'pchatyes allochñapa' amach es pertatso.

¹³ Allempoña a'yapa'cherret ñeññ shota'tatyaset chepa'tcha' chorrats charra' puechena epa cañter ñeññ a'pchatet all rratanet amnar pan cebada.

¹⁴ Atto orrtatanet po'partsoña acheñenesha'ñapa' atet otyeset:

—Añña po'ño'chpa' ñeññca'ye a'mtene' Yompor po'ñoñ ñeññ atarr yecuen o'ch huapa añe patsró.

¹⁵ Jesúsñapa' eñotanet ñetpa' añ muenenet o'ch huapoñetpa' o'ch rromoset o'ch noset ñeññcha' pa'mcha'tareter pet. Ñeñño'marña Jesúsapa' a'nahua ahuer all aspeno e'ñe ñapueñ.

Atto Jesúsapa' e'ñe cohuen chope'chñen enot oño

(Mt. 14.22-27; Mr. 6.45-52)

¹⁶ Allempoña ellerren pueyochrenesha'ñapa' ahuanerret sa'patopño.

¹⁷ A'tacha'tuerret po'noñtopa' o'ch ahuanperret yomta'n, Capernaumet. Allñapa' alla checmetam̄pset. Jesúsñapa' ama huerra' all allo'tsa'yenet.

¹⁸ Allñapa' orrnotam̄pesnomuet, sa'pñapa' cha emo'yarerta.

¹⁹ Ñetñapa' echotnomuet sa'p amnar amapa' pechapte' kilómetro allñapa' machayotepa'tcha' entapet Jesús chope'chñen enot oño. O' allame'ttsañña pan noññ. Ñetñapa' chepa'tcha' mecha'tapet.

²⁰ Tarraña ñapa' atet otosanet:

—Naca'ye o' nohuapa, amach atta semcha'tatstapno.

²¹ Ñetñapa' mueneñetañ o'ch agapapet noñtoñ, eñotostsetpa' o' chapña noññ yomta'n all sechenet.

Allempo acheñenesha'pa' e'nereta' Jesús

²² Tsapatña acheñenesha' ñeññ alla a'patsa yomta'n ñetpa' eñoteñet e'ñe patrra noññ allo a'tacha't Jesús pueyochresha' ñaña Jesúsapa' enteñet amaca' a'tapo noñño epuet pueyochresha' e'ñe ñaptochayeta ahuanmuet.

²³ Tarraña noñte'chnoñapa' chocma huachena Tiberiasot, o' chapuet allame'tets all rret ellerro pan ñeññ parasyoso'tam̄pes Partsesha' Jesús.

²⁴ Allempoña acheñenesha' ñeññ allo'tsen ñetñapa' o'huañ eñchet Jesús pueyochreshohuen. Ñetpa'cho'ña allenta a'tacha'tet ñamet noñño, ahuanm̄pset Capernaumet, o'ch e'nereta' Jesús.

Jesúsapa' ña yocrram̄ yepen yecamquëñecop alloch e'ñe yocrrena

²⁵ Allempoña entoset yomta'npa' atet otoset:

—Maestro, ¿esempo'tña pecherrña ña arrma?

²⁶ Jesúsñapa' atet otapanet:

—Na po'ñoçhpa' o'ch notapas, sapa' amaca'ye añecpaye' se'nenno atto o' norrtatonas nepartsoña. Sapa' añecpaca'yeña se'nenen atto o' nerratuas pan o' e'ñe seyetua.

²⁷ Te'pa' o'ch notas, sapa' amach aña sema'yoçhratsto yocrramñ ñeñt e'nuapo'. Añcha'ña sema'yoçhra socrramñ ñeñt ama e'nuapahuoyaye; ñeñtña alloch sapa' corretsasach socsheñeshocmañen e'ñe tayoteñ ama't errponañohuen. Ñeñtña socrramñpa' nach sapuerre' Ñeñten Acheñetosets tarro'mar Apapa' o' llesenserren na Ñeñten Acheñetosets arr patsro.

²⁸ Acheñenesha'ñapa' atet otereterr:

—Errotenuachca' yeñaña ñeñt cohuen enten Yompor.

²⁹ Jesúsñapa' atet oterraneterr:

—Ñeñt cohuen enten Yomporpa' o'ch same'ña'na na ñeñten llesensen.

³⁰ Ñetñapa' atet otereterr:

—Errotenotuachca' pegateyña pepartsoña ñeñtcha' yentpa' attotcha' yame'ñaña. Papa' esuañaca' petsoten.

³¹ Ya yatañneshañpa' rra'yesete't ñeñt maná all amayo atetca'ye anuaet Yompor po'ñoñ ahuatoteñ: “Rratyesanete't pan ñeñt apanete't Yompor pue'ntañot.”

³² Jesúsñapa' alla oterraneterr:

—E'ñe po'ñoçh o'ch notas: Ama Moisésoye' apahuete'teña pan ñeñt huetsa ento't. Naca'ye Nompor sapuene'ña ñeñt e'ñe po'ñoçh socrramñ sepen. Añ socrramñpa' entoña huena.

³³ Naña socrramñ sepen ñeñten o' apuerres Nompor, napa'cho'ña ento't nohuapa Yomporeshot allochñapa' acheñenesha'ña arr patsropa' ñetñapa' corretsetach.

³⁴ Ñetñapa' atet otereterr:

—Ayochreshate yapa'cho'ña çhocmach papuey ñeñt corramets.

³⁵ Jesúsñapa' alla oterraneterr:

—Napa' na corramtsotets alloch e'ñe socrra. Esesha'ch huapatsa nesho ñetña ama't ahuatapa' amach alla cheporrerrete'te. Esesha'ch name'ñerraya na ñetña ama't ahuatapa' amach alla oñpa'terrete'te. Ñehua, ñeñtpa' añ notenes, esesha'ch name'ñerraya na ñetñapa' çhocmach e'ñe cosherret pueyoçhreto, ama't ahuatapa' amach alla es e'nerrete'te.

³⁶ Tarraña napa' o' notuas: Sapa' o' sentnoñ amaña same'ñenno.

³⁷ Allohuen acheñenesha' ñeñt o'patatenna Apapa' ñetñapa' ame'ñerrnetcha'. Esesha'ch name'ñerraya ñetñapa' amach alla nehuapore'terraneto.

³⁸ Tarro'mar napa' ama añecpaye' nohuapoña ento't attoch o'ch aña atet neños ñeñt nemnen na. Napa' añecopña nohuapa o'ch atet neperr ñeñt atet muenen Nompor ñeñt nellsenserre'.

³⁹ Ñeñtpa' atet muenen Nompor ñeñt nellsenserre': Amachña çha na'chencatereña acheñenesha' ñeñt ora allpon o'patatenna na, çhochña ello netantaterrñañ esempohuañen.

⁴⁰ Añmapa' ñeñtña muenen Nompor: Erra'tsencha' neñoterre' ñerra'm ame'ñerrnetcha' na ñeñten Yompor Puechemeren, ñetñapa' corretsetach pocsheñeshocmañen tayoteñ ama't errponañohuen. Ñetñapa' çhocmach netantaterranet esempohuañen.

⁴¹ Atto Jesúsapa' otenanet, “Napa' na corramtsotets ñeñten huapatsa ento't”, judione-sha'ñapa' pocuana'teñoñet otatse'tyeñet.

⁴² Ñeñtpa' atet otyeset:

—Añmapa' añaca'ye Jesús, José puechemer, ñeñt pompor ñaña pachor e'ñeca'ye yechme'teñ. Te'ñapa' eso'mare'tña oten ñapa' ento'to' huapa.

⁴³ Jesúsñapa' atet otanet:

—Sapa' amach atta sotatse'tanna'tyesatsto.

44 Ama't eseshapa' amach errotenoť ame'ñerneto ñerra'm Nompör ñeññ nellsensene' ñerra'm ña ama cotape'chaterrahueto cohuen. Ñetñapa' netantaterranetcha' esempo-huañen.

45 Atet quellquë't ñeññ a'mtaye't Yompör po'ñoñ ahuat, po'quellcopa' atet anuaret: "Allohuenetpa' Yompörcha'ña eñotaterrahuet." Allohuen ñeññtcha' e'mñoterre' Nompör attoch cohuen cotape'chaterranet, ñetñapa' nachña ame'ñerret.

46 'Ama't eseshapa' ama puentareto Apa. Napñaña na ñeññen huapatsa Yompöreshoť nentarca'yeña Apa.

47 E'ñe po'ñoñ notenes: Esha'ch name'ñerraya ñetñapa' corretsetach pocsheñeshocmañen tayoteñ e'ñe errponañohuen.

48 Napa' na corramtsotets alloch e'ñe socrra.

49 Satañneshaña' ama't rra'yesete't ñeññ maná all amayo, ñetñapa' o' colla'huenet.

50 Tarraña ñeññen sotene' te' ñeñña e'ñe po'ñoñ socrram ñeññen huapatsa entoť allochña' esesha'ch rre'pa' ñetñapa' corretsetach tayoteñ e'ñe errponañohuen.

51 E'ñe po'ñoñ napa' na ñeññen corramtsotets alloch e'ñe socrra ñeññen huapatsa entoť. Ñerra'm esesha' rre' añ corrametspa' ñetñapa' corretsetach tayoteñ e'ñe er- rponañohuen. Añ corramets ñeññtcha' nepomuerr na acheñeneshap arr patsro alloch e'ñe correnet, ñeñña' añca'ye nechets.

52 Judionesha'ñapa' ñeñño'mara'cho' es otanna'tyeset. Ñetñapa' atet otyeset:

—Errotenotuachñaca' apueyña e'ñe ña po'chets ñeññtcha' yerra'.

53 Jesúsña' alla otterranneterr:

—Po'ñoñ o'ch notas, ñerra'm ama serrerrnano nechets Ñeññen Acheñetosets, ñerra'm ama sorrerrnano ñaña nerras, sapa' amate' errotenoť socroña sa.

54 Ñerra'm esesha' rrene' nechets ñaña ñerra'm orrennanet nerras, ñetñapa' corret- setach tayoten e'ñe errponañohuen, tarro'mar naña' netantaterranetcha' esempo- huañen.

55 Tarro'mar nechets ñeññ e'ñe po'ñoñ corramtsotets; ñerraspa'cho'ña ñeññ e'ñe po'ñoñ orrapo'.

56 Ñeññtcha' rrene' nechets ñaña ñerra'm orrennanet nerras ñetñapa' e'ñech parrocc- matennet na, napa'cho'ña e'ñech neparroccmatennet ñet.

57 Apa ñeññ nellsensene' ñapa' ama arromñateshayaye, ñaca'yeña napuene'ña atto napa'cho'ña corretsanach. Atet nepena ñaña, allohuen ñeññ pocrram nepene' napa'cho'ña añ napuennet attoch ñetpa'cho'ña corretsetach ñamet.

58 Na ñeññen socrram sepen ñeññen huapatsa entoť. Ama atteyayno ñerra'mrrate' pan ñeññ rre't satañneshañ ahuat. Ñetpa' o' colla'huenet. Esha'ch e'ñe pocrram nepene' ñetñapa' corretsetach tayoteñ e'ñe errponañohuen.

59 Arrpa' allohua ñeññ atet ye'chatenan acheñenesha' judionesha' po'prahuo all Caper- naumo.

Jesús po'ñoñ ñeñña' alloch yocrrena tayoteñ errponañohuen

60 Allempoña atet e'mueñet atet oten, shonte' pueyochresha'chnopa' atet otyeset:

—Añ ñoñetspa' amaca'ye e'ñeye' pocteyaye, amate' esesha' ame'ñayo.

61 Jesús'pa' e'ñe pueyochro eñotanet cha otatse'tyen pueyochresha'chno, ñeñño'marña atet otterranneterr:

—Ñeññ atet notenespa' are't pocteye' senteñe.

62 Ta'm, ¿erroñena'tcha' sotña ñerra'm po'ñoñ sentennoñ na Ñeññen Acheñetosets o'ch alla na'terreñ entoť alloť nohuapa ahuat?

63 Yecamquëñ alloña e'ñe po'ñoñ yocrrena. Yechetspa' ama't coñe'tapa' ama sher- beno. Neñoñ ñeññ neserrpare'tatenespa' e'ñe po'ñoñ secamquëñecop ñeñña po'ñoñ alloch e'ñe socrra.

⁶⁴ Tarraña pantanta'ttsospa' amaña same'ñenno.

Ñehua, Jesúsapa' e'ñe allempoteñ eñotenan ñeñtcha' ama ame'ñerrtso. E'ñe eñotenan ñaña ñeñtcha' pomuerre'.

⁶⁵ Jesúsapa' alla oterraneterr:

—Ñeñto'marña napa' notase't, amach esesha' name'ñerrayo ñerra'm ama Apa cotape'chaterrahueto attoch coterrnet.

⁶⁶ Allempoteñña shonte' Jesús pueyochresha'chno puerra'cherret ñesho'tpa' o'huañ chopeñe'chenet parro.

⁶⁷ Allempoña Jesúsapa' atet otan pueyochresha' ñeñt'charrasheña puechena epa:

—Sapa'cho' ¿semneñe't o'ch sepurrerra saña?

⁶⁸ Simón Pedroñapa' atet och:

—Partseshacha', esesha'huate'ñaca'ye yocta'. Paptaca'ye pechenña ñoñets attochña yapa' corretsayach tayoteñ errponañohuen.

⁶⁹ Yapa' o'ca'ye yame'ña'pa. Yapa' yeñotene'p' papa' pepa'tca'ye Cristotets, ñeñte'p' Yompor Puechemere'p'.

⁷⁰ Jesúsña atet otanet:

—Napa' naca'yeña sa'crrere'ña sa, charrasheñas sepchena epa. Ñeñtña puesheñarrpa' ñeñt'pa' oneñetena'tar.

⁷¹ Ñehua, Judasocop atet eñora. Ñeñt' Judaspa' ñeñt' Simón Iscariote puechemer. Ama't ñeñt' a'pchenahuetañ epa pueyochresha', puesheñarrpa' ñeñt'cha' pomuerre'.

7

Ama't ñeñt' pa'mo'nasheñnesha' pen Jesúsapa' ñetpa' ama eseshaye' ame'ñenayo

¹ Allempoña Jesúsapa' alla chopeñe'chyen e'ñe alla Galileo'mar. Ama mueno o'ch chopeñe'chen ñaña all Judeo'mar tarro'mar judionesha'pa' cha o'pateñet o'ch muetset.

² Allempopa' o' cherrmocherr allempoch cosherrerr judionesha'; ñeñt'cha' cosherreterr añ pa'so'cheñ Manatpuetsopo', ñeñt' atet ye'chenet ñet.

³ Allempoña Jesúsapa' atet och pa'mo'nasheñnesha':

—Te'pa' orrerre'p' arro't, ahuerre'p' alla Judeo allochñapa' peyochrenesha'chno ñeñt' allo'tsa'yen o'ch porrtatuerranet ñamet pepartsoña ñeñt' atet pe'pa'yena te' arrma.

⁴ Ñehua, ñerra'm yemneñ o'ch yorrta allohuenacoppa' ama't puesheñarro'teyapa' amachña a'nahua es ye'pa'yeno. Ñerra'm po'ño'ch porrtatyen pepartsoña arrpa' porrtachñaca'ye ñaña allohuen acheneshacop añ patsro.

⁵ Ama't pa'mo'nasheñnesha'pa'cho'ña tarro'mar atet ochet ñetpa'cho'ña amaca'ye ame'ñeñeto.

⁶ Jesúsñaapa' atet otanet:

—Allempo ñeñt' poctetsa nocop o'ch norrrta allohuenacoppa' amaca'ye e'ñeye' chena'. Tarraña socoppa' e'ñeca'ye pocte' chocmaca'ye eñall.

⁷ Tarro'mar acheneshasha'ña añ patsropa' amachca'ye erro'tenot e'moñe'tasoña sa, tarraña napa' chocma e'moñe'tyennet tarro'mar napa' añca'ye neñotatyenanet ñeñt' atet p'atse'tyenet ñeñt' ama pocteyaye.

⁸ Sapa' orras socshapretena'. Napa' e'ñe tayecmapa' amachca'ye neto coshapretatsa. Tarro'mar nocoppa' ama e'ñeye' chena' allempoch e'ñe pocta'huona.

⁹ Ate't otuanetpa' ñapa' alla a'pa mame' Galileo.

Allempo Jesús coshapretena' ñeñt' otenet Manatpuetsopo'

¹⁰ Allempoña pa'mo'nasheñechnopa' ñetñapa' ahuanmuet coshapretatset. O'ña tama o'chetpa' ahuo' ñaña, tarraña ñapa' ama orrtenaneto, a'nahua cota'nenanet chenta'.

¹¹ Judionesha'ña all coshenetpa' ñetñapa' e'neñet atet otyenet:

—Ta'mca'ye ¿erro'tsente'ña Jesús?

¹² Allña acheñenesha'pa' shonte' eñosenet ñocop. Patanta'tetspa' atet otyenet: “Ñapa' e'ñe cohuen acheñer”; po'potantañechnopa' atet otyenet: “Amaca'ye cohuenayaye, ataca'ye shecare'tyen an acheñenesha'.”

¹³ Ñetpa' atarr mecha'teñet judionesha' ñeñto'marña a'nahua atet otanna'tyenet.

¹⁴ O'ña patma'nma atto coshenet Jesúsñapa' be'tosos Parets pa'paclo, yeçhatosanet all.

¹⁵ Allñapa' epaye' cohuanrrorech judionesha'. Ñetñapa' atet otyeset:

—Ta', errofente'ca'yeña añ, ama't ama ayçhatarete quellecpa' atarropa't es eñotyen.

¹⁶ Jesúsñapa' otanet:

—Ñeñt' atto neyçhatyenes ñeñt'pa' amaca'ye noyaye noctapña, ñeñt'pa' Yomporoña poctapña ñeñt' nellensene'.

¹⁷ Ñerra'm esesha'ña muene' o'ch atet pet ñeñt' muenen Yompor ñetñapa' eñochetcha' neyçhateña' Yomporo amaca'ye notaye' neñeno.

¹⁸ Ñerra'm esesha' e'ñe ñoñota eñenpa' ñetñapa' añach e'nenet o'ch cohuentateññañ acheñenesha' e'ñe ñocop. Añña ñerra'm esesha' e'nene' o'ch cohuentatenan ñeñt' llesensene' ñapa' ñeñt'ña eñetsña ñoñtso e'ñe po'ñoçh ama shequëñtsoyaye.

¹⁹ 'Ama't apasoña Moisés ñoñets ñeñt' atet anaret. Tarraña ama't apaseñ, sañapa' ama't e'ñe puesheñarroñesapa' ama seño huenoña ñeñt' atet oten añ ñoñets, ñeñt'epñapa' eso'mare'tña te'pa' semneñña o'ch semtsan.

²⁰ Acheñenesha'ñapa' atet otereterr:

—Papa' çhate' chorrenpa' oneñeñ. Amarramche' esesha' po'patenayeña o'ch muetsapet.

²¹ Jesúsñapa' alla otarraneterr:

—Napa' ama't parrocha norrtatonas nepartsoña añ yetro allempo yamesen saña allempopa' atarr secuanrroretnoñ tarraña sañapa' ama pocteye' senteñe.

²² Moiséspa' apa'nmas ñeñt'cha' seyçha' attoch setsorrannena. Ñehua, po'ñoçh ñeñt'pa' ama ñanom Moisésoye' sapaye, ñeñt'pa' satañneshañe'ñaña seyçhatnomue' ahuatoteñ. Ñeñto'marña sapa' çhocmach setsorraten asheñorroñoll ñerra'm o'ch posocmata'muen ama't añ yetro allempocma yamesen çhocmaña setsorratenña asheñorroñoll.

²³ Atto sapa' setsorraten asheñorroñoll ama't añ yetro allempocma yamesen attoch amach satpueno ñoñets ñeñt' atet anaret Moisésot, ñeñt'epñapa' eso'maruañaca'yeña se'moñe'tenenña na allempo e'ñe na'crraten puesheñarr acheñ añ yetro allempocma yamesen.

²⁴ Ñerra'm esempo senteñ po'psheñeñ ñeñt' atet penpa' amachña ñeñto'ta soteñe'chatsche año' cohuenaye' es yeçcateno. Chochña ñanom señoçh errofente'ña ñeñt' po'ñoçh atet pena.

Atto Jesúsapa' eñotatanet ñapa' Yomporeshot huapa

²⁵ Patanta'tets jerusaléño'marnesha'pa' atet otyenet:

—Ta'm amate' añeyayeña ñeñt' o'patenet o'ch muetsset.

²⁶ Ñapa'çho'ña allo'tsenepa't arr, atta ama es pueçheno eñosets, amaña errofeye'ña oteñeto. Ñato' tarro'marte'ña ama't añcha'tareñnesha'pa' o'ca'ye eñotuet po'ñoçh ñapa' ñeñt'ca'ye Cristotets.

²⁷ Tarraña añpa' yeñoteñca'ye allot huena. Tarraña esempoch huapa ñeñt'cha' e'ñe po'ñoçh Cristotats ñapa' amach eseshaye' eñotapaye errofcha' huapa.

²⁸ Jesúsña allempo yeçhaten Parets pa'paclo, ñapa' puerranarot atet otanet:

—Sapa' sechme'tennoñte', seño tennoñte'ña na errofete' nohuapa. Tarraña napa' ama notaye' nohuapo, eñallña ñeñt' nellensene'; ñapa' e'ñe po'ñoçh ñerra'm errof ot, ama puenesho po'ñoñ. Ñeñt'ña sapa' ama seño teñeña sa.

²⁹ Nañapa' e'ñe neñoteñ, ñeshořca'ye nohuapa. Ñapa' ñeñřca'yeña nellenserre'.

³⁰ Allempocma atarr mueneñet o'ch rromuetañ țarraña ama esesha' rromaye. Tarro'mar ama čhena' allempo ñeñř poctetsa ñocop attoch rromuet.

³¹ Shonte' acheñenesha' ñeñř ame'ñaya. Ñetñapa' atet otyenet:

—Añte'ca'yeña po'ñočh Cristo ñeñř yecuen o'ch huapa. Yapa' o'ca'ye orrtatosnay po'partsoña, amate' errotenoř huapo po'psheñeñ ñeñřcha' ello metanose' po'partsoteña ñeñř atet entatyeny añ yacmar.

Allempo fariseonesha'pa' mueñet guardianesha' ñeñřcha' rromuenayañ Jesús

³² Fariseonesha'ñapa' e'mare'teñet shonte' acheñenesha'pa' e'ñe cohuen eñosyenet Jesúsocop. Ñeñřo'mar ñet ñaña ñeñř pa'mřcha'tareřernesha' pen allohuen judionesha' po'cornaneshar, ñetñapa' mueñet guardianesha' ñeñřcha' rromuenayañ Jesús.

³³ Jesúsñapa' alla otterraneterr:

—O' mameshaña e'ñe parro'tseney. O'chña mamerrerrpa' o'ch alla ahuerren allo'tsen ñeñř nellensene'.

³⁴ Allempoña ama'tcha' se'name'terrenpa' amach senterrno. Allcha' neserr napa' sañapa' amate' errotenoř sečhapo.

³⁵ Judionesha'ñapa' atet otanna'tyeset:

—Ta', ¿errach taña aña ñeñřo'mar amach yentere? Ñato' arrcha' ta griegoneshesho all parratse'tyen yamo'tsesha' o'ch yečhatenana' griegonesha' all.

³⁶ Ta', ¿este'ña aña ñeñřo'mar atet oten: “Ama'tcha' se'nerrna'pa' amach senterrno; allcha' neserr napa' sañapa' amach errotenoř sečhapo”?

Allohuen ñeñř ame'ñenaya Jesús, Parets Puecamquëñořpa' e'ñe pueñmateñořet pueyočhreto atet penet ñerra'mrrate' allot poten oñ ñeñř atarr cohuen

³⁷ O' e'ñe huañmoch all coshena judionesha'. Añe yetro allempo nanac coshenet, Jesúsñapa' tomos all, puerranaroř atet otosanet:

—Erra'tsente' acheñer oñpa'tets e'ñe pueyočhreto, onetepa' nesho orretepa'.

³⁸ Ñeñř name'ñenaya na e'ñe pueñmateñořet pueyočhretopa' atet pena ñerra'mrrate' allot poten oñ aton ñeñř atarr cohuen, țarro'mar ñeñřpa' atet oten Yompor po'ñoñ ñeñř anuaret ahuatoteñ.

³⁹ Ñehua, añ ñoñetspa' añecop serrpare'ten Yompor Puecamquëñecop ñeñřcha' chor-rerraya allohuen ñeñřcha' ame'ñerraya ña. Tarraña allempopa' ama aparettaneta' Yompor Puecamquëñ, țarro'mar Jesúspa' ama čhena' allempoch alla ahuer Yompor pue'ntaño allcha' e'ñe cohuentaterrñañet.

Allempo acheñenesha'pa' ellopa'tetstatenet počtařña Jesúsocop

⁴⁰ Allempo e'mhuet ñeñř atet oten Jesús, patantarrña acheñenesha'pa' atet otyeset:

—Po'ñočh añaapa' ñeñřte'ca'ye a'mřtene'ña Yompor po'ñoñ ñeñř čhocma yecuen.

⁴¹ Po'potantaña'pa' atet otyeset:

—Añaapa' ñeñřte'ca'yeña Cristotets ñeñř čhocma yecuen.

Po'potantaña'pa' atet otyenet:

—Ñeñřcha' Cristoterretspa' amate' arrořa huapo Galileoř.

⁴² Ama't otenoña Yompor po'ñoñ ñeñř anuaret, Davidcha' po'mřrenñoř huapaña ñeñřcha' Cristoterrets; arrořcha' huapa anetsoř ñeñř Belén ñeñř pa'netser pe'ř David.

⁴³ Ñeñřo'marña allohuen acheñenesha'pa' ellopa'tetstatenet počtařña Jesúsocop.

⁴⁴ Patanta'tetsña'pa' atarr mueneñet o'ch rromuet, țarraña ama esesha' rromaye.

Atto judionesha'pa'mřcha'tareřernesha' ama ame'ñeñeto Jesús

⁴⁵ Guardianesha'ñapa' puerraçherret allo'tsen ñeñt pa'm'cha'tareternesha' pen allohuen judionesha' po'cornaneshar epuet ñaña fariseonesha'. Ñetñapa' atet otarettapuerret:

—Eso'maruañaca'yeña amaña sehuapatere.

⁴⁶ Guardianesha'ñapa' atet otuerret:

—Ama't eseshapa' ama pueñosarofia atarr cohuen atet eñen ña.

⁴⁷ Fariseonesha'ñapa' atet oterraneterr:

—Tarro'marte' ama sehuapatere sapa'cho'ña çho'te'ca'ye shecapas saña.

⁴⁸ Ama't ñaña patantarr añcha'taretnesha'pa' ama't o' cha ame'nyeto ñamet. Ama't ñaña patantarr fariseonesha'pa'cho'ña o'te'ca'ye cha ame'nyet.

⁴⁹ Tarraña ñeñt acheñeneshar ñeñt ama eñotenaye ñoñets ñeñt atet anaret ñetñapa' a'cmarefet.

⁵⁰ Ñeñña puesheñarr fariseo ñeñt Nicodemo ñeñt tatsa ahuaña Jesúsesho, ñañaapa' atet otan pamo'tsesha' fariseonesha':

⁵¹ —Ñoñets ñeñt atet anaret yocoppa' atet oteneý, amach errotenot yecoñchache ama't puesheñarra acheñ e'ñe attota. Chochña ñanom ye'm'ñoç attoch yeñoç este' otatse'tyen ñeñt atarr sosey yenten esheccha'ña yecoñchach.

⁵² Ñetñapa' atet ochet:

—Eso'maruachca' pemoñesyaña galileo'marnesha', ñato' p'apa' galileo'marneshap'te'. Papa' amarramche' galileo'marneshayaype. Te'pa' pelleya'yes Yompor po'ñoñ allochñapa' o'ch peñoç Galileo'tpa' ama't puesheñarrapa' amach huapoña ñeñtcha' a'mtene' Yompor po'ñoñ.

Allempo puesheñarr coyanesha' huapachet Jesúsesho ñeñt chetapretene' pacma puerrollar

⁵³ Allempoña allohuenet ahuanemyerret pa'pacleto.

8

¹ Jesúsñapa' ahuerri Olivo'pno.

² Tsapaña po'pocheño e'ñe ahuatecma alla çhenerr Parets pa'paclo. Shonte' acheñenesha' alla huacheneterr ñesho. Ñañaapa' anorros allña yeçhatenaneterr.

³ Ñeñña etsotayenayeñ ñoñets ñeñt atet anaret judioneshacop ñaña fariseonesha' ñetñapa' huapatoñet puesheñarr coyanesha' ñeñt rromuet all eñchet chetapretenan po'psheñeñ pacma puerrollar. Nosñañet e'ñe rroçho.

⁴ Allñaapa' atet otoset:

—Maestro, añ coyanesha'pa' o' yentaprech e'ñe all chetapretenan pacma puerrollar.

⁵ Moisés po'ñoñ ñeñt atet anaret ñeñt'pa' atet oteneý, aña' çoch yarroлле'ch. Te'ña p'apa' çerro'te'ch'ña p'oteyña p'a?

⁶ Ñeñt'pa' tarro'mara atet otoset ñato'rraña eñorachet ñeñt ama pocteyaye allochñapa' attoch a'metam'peñeta'. Jesúsñapa' allenta mo'capa' o' quellcan pats pota'po.

⁷ Ñetñapa' alla a'p'to'tereterr. Jesúsña echanterrtsapa' atet otanet:

—Ñerra'm erra'tsenoteste' ama eñalle so'chñarpa' sarrolle'chca'ye sanom.

⁸ Alla mo'querrerr o' alla quellquerranerr pats pota'po.

⁹ Ñetñapa' o' e'met atet otanet Jesús'pa' e'ñe aco'poteñ ahuanemhuerret e'ñe puesheña'ttset. Añ ñanom ahuanerrtsa po'nmenesha'çhno, attotapa' o' ñap'f'aña Jesús epuet coyanesha'.

¹⁰ Jesúsña echanterrrerpa' atet otan coyanesha':

—Noçeshacha' çerro'tsa'yeneta'tña? Ama't puesheñarrofeta ñetpa' are'tcha'ña coñchatape.

¹¹ Ñañaapa' atet otan Jesús:

—Ama Ayochreshate eseshaye' necoñchataye.

Jesúsñapa' alla otererr:

—Napa'cho'ña amach necoñchatape. Te'ña ñerra'm ahuerreppa' amach allo'na atet pepa'nenon ñeñt ama't mamesha ama pocteyaye.

Jesúsapa' ña a'puetarsamipene' acheñenesha' poctaḥña aña patsro

¹² Jesúsña po'pocheño'pa' serrpare'taterranerr acheñenesha', ñeñt'pa' atet oterraneterr:

—Napa' na ñeñten a'puetarsamipene' acheñenesha' poctaḥña aña patsro. Eseshach nocterre' o'huañcha' allo'na cotape'chatnenanet poctaḥña ñeñt atarr sosya'tsañ; ñeñt'pa' checmeta chopeñe'chyenet. Ñetñapa' Yomporcha' po'cohuenño correrret ñeñtara ñeñt puetarets.

¹³ Fariseonesha'ñapa' atet ochet:

—Papa' pañeña a'potetsa ñeñto'marña atto pa'potenapa' ama sherbeno.

¹⁴ Jesúsñapa' oterraneterr:

—Tarraña ama't ñañeña a'potetsapa' atto na'potenapa' e'ñe sherben. Tarro'mar napa' neñoteñ allot nohuapa ñaña neñoteñ allcha' neserr. Sañapa' ama señothenno allot nohuapa ñeñto'marña ama señotheñe allcha' neserr.

¹⁵ Sa sotatseñpa' e'ñe orrena atet sepena, arromñañeneshasa atet petsa. Napa' ama't puesheñarrapa' ama notatse'tenaneto e'ñe atta.

¹⁶ Tarraña ñerra'm esempo na'metenanet ñeñt atet nentapretyenanet ñeñt'pa' e'ñe po'ñoçh atet tarro'mar napa' ama napt'eye' es nepa'yeno, napa' chocmaña epan Apa ñeñt nellensene'.

¹⁷ Ñoñets ñeñt atet anaret ñeñt sechen sa, ñeñt'pa' atet oten: Ñerra'm epsheña a'potene' e'ñe atecma ñeñt'pa' e'ñeca'ye po'ñoçh otenet.

¹⁸ Napa' ñeñt atet na'potena na, Apaña ñeñt nellensene' ñaca'yeña na'potene'ña nocop.

¹⁹ Ñetñapa' atet otereterr:

—¿Erro'tsena'tña pa Pompor?

Jesúsñapa' atet oterraneterr:

—Ama't napa' ama señothenno, Apapa'cho' ama señotheñe. Ñerra'm señothennoñ na Nompore'nate' señotheñe.

²⁰ Allempopa' atet otanet Jesús all allecma añño'tenet quelle ñeñt Yomporecop allempo yeçhatanet allara Parets pa'pacillo. Tarraña ama't puesheñarra ama eseshaye' rromaye tarro'mar ama çhena' allempoch ñeñt poctetsa ñocop o'ch rromuet.

Allempo Jesús otanet allcha' serr ñapa' acheñenesha'ñapa' amach errothenot çhapueto e'ñe allempocma

²¹ Allempoña Jesúsapa' atet oterraneterr:

—Napa' o'ch ahuerren, sapa' se'nerrencha'. Sapa' orach ochñareñes serromhua. Allcha' neserrpa' sañapa' amach seçhapo.

²² Judionesha'ñapa' atet otanna'tyeset:

—Ta'm ñapa' o'ch muetsa ñañeña, ¿ñeñto'marte' atet oten allcha' serrpa' yañapa' año'ch yeçhapo?

²³ Ñañapa' alla oterraneterr:

—Sapa' alla ayeçcañas arr patsro. Nañapa' ento'marneshan. Sapa' patso'marneshasa, nañapa' ama patso'marneshayayno.

²⁴ Napa' o' notas sapa' orach ochñareñes serromhua tarro'mar ñerra'm amach same'ñerrno na ñeñten peretnene' ochñarets, po'ñoçh sapa' orach ochñareñes serromhua.

²⁵ Ñetñapa' atet otereterr:

—Papa' po'ñoçh ¿eseshape'tña?

Jesúsñapa' alla oterraneterr:

—Napa' ñeñtenca'ye po'ñoçh çhocma sotene'.

²⁶ Atarr nanac palltena çhocmach notenes atet sepena sa, shonte'ch neños añecop atet nentyen. Tarraña ñeñt nellsensene' ñapa' e'ñe po'ñoçh atet oten ña. Napa' añca'yeña ne'ñoreñaña acheñenesha' arr patsro ñeñt atet ne'mueñaña Apa.

²⁷ Ñetñaapa' ama esesha' çchapahueto pueyoçhreto ñeñt atet otenanet Pomprecop ñeñt atarr Parets.

²⁸ Jesúsñaapa' alla oterraneterr:

—Ñerra'm esempoch sapa' sechantañpsen eno corsocho na Ñeñten Acheñetosetspa' allempochña çchaponasa seyoçhro napa' ñeñten e'ñe po'ñoçh çhocma sotene'. Chaponasach ñaña napa' ama es nepeno e'ñe noña, añña ne'ñorena atet yeçhatenen Apa.

²⁹ Ñeñt nellsensene' ñapa' e'ñe parro'tsenen. Ama a'montsenno, tarro'mar napa' e'ñe çhocma atet nepena ñeñt muenen ña.

³⁰ Allempo atet serrpare'tatenanet allempopa' shonte' ame'ñaya all.

Atto ñeñt puechemer pen Yompor ñetñaapa' atarr cohueno'tsa'yenet; ñeñtña ama puechemer peno Yompor; ñetñaapa' po'chñara taruasatenahuet e'ñe atta

³¹ Allempoña Jesúsapa' atet otan judionesha' ñeñt ame'ñenaya ña:

—Ñerra'm çhocma soctape'chon neñoñ po'ñoçhpa' neyoçhresha'ch nepenes.

³² Allempopa' señoterrcha' ñoñets ñeñt e'ñe po'ñoçh Yompor po'ñoñ. Ñeñtña ñoñets po'ñoçhpa' toramperrescha' e'ñech cohueno'tsenes.

³³ Ñetñaapa' atet otereterr:

—Yapa' Abrahamca'ye po'mrenñey. Ama't ahuata yapa' ama't puesheñarrofe'yapa' ama ehuanca'reteye attoch esesha' yetaruasate' e'ñe atta. Eso'marte' pañapa' poteneyña atoramperrescha'.

³⁴ Jesúsñaapa' alla oterraneterr:

—Po'ñoçhca'ye notenes: Allohuen ñeñt ochña'tare'tetspa' po'chñara huanquënahuet, ñetñaapa' po'chñara taruasatenahuet e'ñe atta.

³⁵ Ñeñt ataruasatare't e'ñe atta amach çhocmaye' yeçherro e'ñe parro epuet pamo'mte'. Tarraña na ñeñten Puechemeren çhocma e'ñe neyçhena epan Namomte' errponañohuen.

³⁶ Ñeñto'marña na ñeñten Puechemeren ñerra'm na setoramperre' sapa' atoramperrescha' e'ñe po'ñoçh, amach alla taruasaterrse'te so'chñar.

³⁷ Na po'ñoçhpa' neñotenes sapa' po'mrenñeseñ Abrahampa' tarraña sapa' aña semnen o'ch semtsan. Tarro'mar neñoñpa' ama't mameshapa' ama çhennaso sa seyoçhro.

³⁸ Napa' añ neñeñ ñeñt atet nentapreteñ Apa. Sapa'cho'ña aña atet sepen ñeñt atet se'mapreteñ ñeñt sompor sepen.

³⁹ Alla otereterr:

—Ya yatañpa' Abrahamca'ye.

Jesúsñaapa' atet oterraneterr:

—Sapa' ñerra'm po'ñoçh Abraham po'mrenñeseñ soctape'cheneñte' atet e'ñe cohuen co'tape'che't Abraham.

⁴⁰ Tarraña sa te'pa' çha so'patenna o'ch semtsan na ñeñten seserrpare'tatene' ñoñets ñeñt e'ñe po'ñoçh ñeñt atet ne'mueñaña Yompor. Abrahampa' amaca' atteye' pe'te.

⁴¹ Sapa' e'ñe aña soctape'chen atet pena sompor.

Ñetñaapa' alla otereterr:

—Yapa' amaca'ye ellapnaneshoteye' ye'ñallete. E'ñe ñapta Yompor yepeñ ñeñtara Parets.

⁴² Jesúsñaapa' alla oterraneterr:

—Ñerra'm po'ñoçh Sompör sepeñeñ Parets atarrte' semorrentennañ na tarro'mar napa' Partseshotca'ye nohuapa o' neçhap arr. Napa' amaca'ye noçaye' nohuapo, napa' Yomporña nellense'.

⁴³ Eso'mare'tña sapa' ama çhennasoña seyoçhro ñeñt notenes. Ñato' tarro'marte'ña ama semno o'ch se'mñnoten ñeñt atet notenes.

⁴⁴ Sapa' oneñetaca'ye ñeñt sompor sepen. Ñeñto'marña sapa' aña semnen o'ch sepa ñeñt muenen sompor. Ñapa' ahuatoteñ e'ñe pa'motroteñ amtsañta. Ñapa' ama't mameshapa' ama eñora'penoña Yompor po'ñoñ ñeñt e'ñe po'ñoçh tarro'mar ñoñets ñeñt e'ñe po'ñoçhpa' amaca'ye atanenoña ña pueyoçhro. Ñerra'm çho eñorenapa', shequëñtsach eñorena tarro'mar ñapa' e'ñe shequëñtsa eñoten. Po'ñoçh sequëñtspa' pomporca' penanña oneñet.

⁴⁵ Tarro'mar napa' añ notenes ñeñt e'ñe po'ñoçh sañapa' amaña same'ñenno.

⁴⁶ Ama't puesheñarrotesa sa, napa' amach errotenoç sotno napa' eñallo' no'chñar. Atto napa' añ notenes ñeñt e'ñe po'ñoçh eso'mare'tña sañapa' ama same'ñenno.

⁴⁷ Erra'tsente' Yomporena'tarpa' ñetñapa' çhochca'ye e'mñoteññañet Yompor po'ñoñ. Ñeñto'marña sapa' ama se'mñoteññañe po'ñoñ, amaca'ye Yomporena'tareyayso.

Allempo Cristopa' atet otanet: Allempo ama eñalletena' Abraham, nañapa' eñallana

⁴⁸ Judionesha'ñapa' atet otereterr:

—E'ñe po'ñoçh atet yoteneþ, þapa' samario'marneshaþ, oneñeña pechorrenaya.

⁴⁹ Jesúsñapa' otarraneterr:

—Napa' ama çhoye' chorrenno oneñet. Napa' atarr nanac nemcha'na'teñ Nompör Parets. Sañapa' ama semcha'na'tenno na.

⁵⁰ Napa' ama añeye' ne'nenno attoch necohuentata nañeña. Eñallña ñeñt necohuentatene' na. Ña eñoretsa atet es entyen arr patsro.

⁵¹ Po'ñoçhca' notenes: Ñerra'm esesha' e'ñe cotape'cherre' neñoñpa' ñetña ama't ahuatapa' amach e'ñe poctacma rromuerreto.

⁵² Judionesha'ñapa' alla otereterr:

—Te'ña po'ñoçh yapa' o' yeñotaþ þapa' çha chorrenþa oneñet. Ama't Abrahampa' o' rromuen ñaña ñeñt a'mta'yesaye't Yompor po'ñoñ ñeñtpa'çho'ña o' colla'huenet. Te'ña þapa' atet þoteneý esesho'ch cotape'cherre' peñoñpa' ama't ahuatapa' año'ch rromuerreto.

⁵³ Papa' çhate' þotenapañ ellote' peñtaneñ atto añcha'tarette't Abraham ama't ñapa' o'ca'ye rromuen. Ñeñt a'mta'yesaye't Yompor po'ñoñpa' ñetpa'çho'ña o' colla'huenet. Papa' çhate' þotenapañ amate' arromñañeshayape.

⁵⁴ Jesúsþa' atet otarraneterr:

—Ñerra'm na cohuentatetsa nañeña, necohuentateña e'ñe napa' amate' es sherbeno. Nompörpa' ña necohuentatene' ñeñfara ñeñt soteneñ Seyompor-ro' sepeñ saña.

⁵⁵ Sapa' amaca'ye señoñe tarraña napa' neñoñca'ye. Ñerra'm na otetseñ ama neñoñe napa'çho'ña atteneñte' ñerra'm sa, çhate' neshcare'tensoñ. Napa' e'ñe po'ñoçh neñoñeñ ñeñto'mar çhocma noctape'cheññañ po'ñoñ.

⁵⁶ Abraham ñeñt sa satañpa' atarr nanac cosha allempo eñoçh o' çhap allempo ñeñt poctetsa nocop o'ch nohuapa arr patsro. Allempoña eñoçh napa' o' neçhap arr patsro atarr nanac cosha.

⁵⁷ Judionesha'ñapa' alla otereterr:

—Papa' ama peçhena' amnaroch çharra' pecharña þañapa' eso'mare'tña þoteneýña þapa' pentero' Abraham, ñeñtpa' ahuatrramche' corre't.

⁵⁸ Jesúsñapa' alla otarraneterr:

—Po'ñoçhca' napa' o'ch notas: Ama eñalletena'ña Abraham, nañapa' eñallana.

⁵⁹ Ñetñapa' allenta chetet mapue'pa' o'ch rrolle'chetañ tarraña Jesúsña a'nahua cha'nerr Parets pa'paclo'tpa' o' ahuer o' sohanerranet.

9

Allempo Jesúsapa' a'crraterran puesheñarr aporo'yet ñeññ atta eñalletña

¹ All oñen Jesúsapa' allña entnoman puesheñarr yacma aporo'yet. Ñeñña aporo'yetpa' atta eñalletña.

² Pueyochresha'ñapa' allenta a'p'to'chet:

—Maestro, ¿essha'tña ochña'tats ñato' ña amapa' pamo'mte'te' ñeñto'mar eñalletaña atet aporo'yet?

³ Jesúsñaapa' atet otanet:

—Amaca'ye po'chñaro'teyaye ama't ñaña pamo'mte'; ñeñtpa' añecopña allochñapa' o'ch norrtatoñ Yompor po'partsoña ñesho.

⁴ Ñeññ poctetsa o'ch norrtatoñ po'partsoña ñeññ nellense' tayepa'tñaapa' puetarmeñ. Ñerra'm o'ch checmetenpa' amach eshcaye' yetaruaso.

⁵ Tayepa'tña aña patsro'tsenmeñenpa' na ñeñten a'puetarsam'pene' acheñenesha' pocta'ña aña patsro.

⁶ Allempoña atet otuapa' allenta a'chonon pa'snom patso o' a'cha'cha'tach. Ñeñña cha'cha'te'pa' alloña a'yac'le'chanña aporo'yet.

⁷ O'ña a'yac'le'chuepa' atet och:

—Te'pa' orrap oño all apco'sattatareto ñeñtpa' añ pa'so'cheñ Siloés. Allcha' pe'pac'le'cha. (Ñehua, aña'ye otenetña Siloés ñeññ oñ ahua'ñare't.)

Ñañaapa' allenta ahua' oño allcha' e'pac'le'chena'. E'pac'le'chuatsapa' e'ñe errtsapa' allentepa'tcha' cohuenterraña pa'clle' e'ñe cohuen enterra.

⁸ Pamo'tsesha'ña ñaña po'po'ne'chno acheñ ñeññ e'ñe cheme'tene' all allempo enam-aren quelle, ñetñapa' atet otyeset:

—Aña' ¿ama't a'neyayaña ñeññ anorrtse't ñeññ enamare'tatse't quelle?

⁹ Patantarr acheñenesha'pa' atet otyenet:

—Ñeññca'ye.

Po'potanta'ne'chnopa' atet otyenet:

—Amaca'ye ñeññeyaye, attaca' ñeññema'ttena.

Aporo'yetñapa' atet otanet:

—Napa' ñeññenca'ye.

¹⁰ Ñetñapa' atet otyeset:

—¿Erro'teno'te'tña o' pecuerr?

¹¹ Ñañaapa' atet oterraneterr:

—Añ yacmar ñeññ otenet Jesús ñaca'ye a'cha'cha'te'ña pa'snomo patspa' alloca'yeña a'yac'le'chen. Allempoñaapa' oten nepac'le'chenepa'to' oño Siloéso. Nañaapa' allña ne'pac'le'chena'. E'ñe e'pac'le'chuatsanpa' allentepa'tcha' necuerr.

¹² Ñetñapa' alla otereterr:

—¿Erro'tsena'tña ñeññ yacmar?

Ñañaapa' ot:

—Ta'm, amaca'ye neñoteñe.

Atto fariseonesha'pa' a'p'to'tare'tenan aporo'yet ñeññ a'crraterr Jesús

¹³ Allempoña ñeññ poro'ye'chatse'tpa' anmet allo'tsen fariseonesha'.

¹⁴ Ñehua, allempo a'cha'cha'tan Jesús pa'snomo pats allo a'yac'le'chan aporo'yet ñeññ cohuaterre' allempopa' añ yetro allempo amesenet.

¹⁵ Fariseonesha'ñapa' ello alla otereterr:

—¿Errotenote'tña o' cohuaterrpet?

Ñaña'pa' atet otosanet:

—Añoca'ye a'yacлле'cherrnet senmatso ñeñt a'cha'cha'taret epuet pats o'ña ne'pacle'cherrapa' allenta necuerr.

¹⁶ Patantarrña fariseonesha'pa' atet otyeset:

—Ñeñt yacmarpa' amate'ca'ye Partseshote'ye' huapo ñeñto'mar ama esoye' ente-nanoña ñeñt anaret paterr yet allempocma yamesen.

Po'potantañña'pa' atet otyeset:

—Ta', elloña ñerra'm ochñañ acheñ amate' errotenot orrtatonayeña partsoteñets.

Attoña e'ñe all ellopa'tetstatet pocta'ña ñocop.

¹⁷ Ellopa' alla otereterr ñeñt poro'ye'chatse't:

—¿Errotena't pötenña pa añecop ñeñt o' cohuaterrep?

Ñaña'pa' atet ot:

—Ñapa' ñeñtca'ye a'mtene' Yompor po'ñoñ.

¹⁸ Judionesha'ña'pa' atet otyeset:

—Ñapa' amaca'ye po'ño'ch aporo'yetye'ye, e'ñeca'ye cohuen entena.

Allempoñapa' chore'toñet pamo'mte' ñeñt o' cohuerr.

¹⁹ Ñetña'pa' atet otapoñet pamo'mte':

—Añpa' ¿añe'tña sacñe'ter ñeñt sotyese't ahuo' eñalletaña sacñe'ter aporo'yet? Te'ña'pa' ¿errotenote'tña o' cohuerr?

²⁰ Pamo'mte'ña'pa' atet otosanet:

—Po'ño'ch añca'yeña yacñe'ter ñeñt atta eñalletatsa aporo'yet.

²¹ Atto o' cohuerrpa' yapa' amaca'yeña yeñoteñe. Ta', esesha'te' o' cohuater, yapa' ama yeñoteñe. Sa'p'to'ch e'ñe ña, ñapa' o'ca'ye atta po'napen, ñoñachca'ye eñora.

Judionesha'ña allempopa' atet otyeset:

—Po'ño'chepa'tca'ye aporo'yet o' cohuerr.

²² Ñehua, pamo'mte' atet otanet tarro'mar ñetpa' mecha'teñet judionesha'. Ñehua, judionesha' ñetpa' atet a'pöctatenet ñerra'm esesha' otets: Jesús'pa' ñeñtca'ye Cristotets, ñeñtña atet otetspa' o'ch mueño'chet ñet po'prahuot.

²³ Ñeñto'marña pamo'mte'pa' atet otanet:

—Ñapa' o'ca'ye atta po'napen, ñoñachca'ye eñora.

²⁴ Puepocheñopa' alla chore'tereterr ñeñt poro'ye'chatse't atet otapet:

—Te' papa' o'ch pecohuentaterrñañ Yompor. Yapa' yeñoteñ añ yacmapa' atarrca'ye ochñañ.

²⁵ Ñaña'pa' atet otarraneterr:

—Ta', ñato' ochñañeñte' napa' ama neñoteñe. Napa' añca'ye neñoten napa' aporo'yeten te'ña'pa' o' cohuen necuerr.

²⁶ Ñetña'pa' alla otereterr:

—¿Errote'tña perrep? ¿Errotenote'tña o' cohuaterrep?

²⁷ Ñaña'pa' otarraneterr:

—Ama'tña napa' o'ca'ye notuas sañapa' are'tña señoñe. ¿Eso'mare'tña semneñ o'ch alla noterrser? Ñato' ¿añecopfe' semneñ o'ch yochresha'tasa saña?

²⁸ Ñetña allenta otnare'chetpa' atet otereterr:

—Papa' pueyochresha' penep ñeñt yacmar, yañapa' Moisés'ca'ye pueyochreshay.

²⁹ Yapa' yeñoteñ Paretsa' eñorana'tana Moisés, tarraña ñeñt yacmarpa' ama yeñoteñe errote'ña huapa.

³⁰ Ñeñt poro'ye'chatse'tpa' atet otarraneterr:

—Errotenotuaca'ye ama señoteñeñe'ña errotte' huapaña ama't napa' o'ca'ye e'ñe cohuen cohuafterren.

³¹ Yapa' yeñoteñ ñeñt ochñañ acheñpa' amaca'ye e'mñoteñe Yompor, tarraña ñerra'm ya yemcha'na'teñoñ Yompor atet yepena ñeñt muenen ñapa' chocmach e'mñoteney.

³² Ya ama't ahuañapa' ama ye'mareña esesha'pa' o' cohuafterranña ñeñt atta eñalletña aporo'yet.

³³ Ñerra'm ñapa' ama Yomporeshoñ huapañe amañe' errotenoñ cohuafterrnoñe.

³⁴ Ñetñapa' alla otereterr:

—Papa' pe'ñalleta e'ñe ochñañartsoñ. Te'ñapa' cha pemneñ o'ch peychatey ya.

Allenta mueño'chet e'ñe ñet po'prahuoñ.

Ñeñt ama ame'ñetso Jesúsñapa' atet entenanet ñerra'm aporo'yet

³⁵ Jesúsñapa' o' e'mare'ch ñeñt aporo'yettatse'tpa' o' mueño'chet. Allempoña enter Jesúsapa' atet oter:

—¿Pame'ñeña't ñeñt Yompor Puechemer?

³⁶ Ñaña'apa' atet och:

—Ayochreshate, ¿esesha'tña ñeñt Yompor Puechemer ñeñtcha' name'ña?

³⁷ Jesúsñapa' atet otererr:

—Ñeñt pecuen, ñeñten atet potene', naca'ye.

³⁸ Ñaña'apa' allenta concorpa ñeshopa' atet otererr:

—Name'ñerrpach Partseshacha'.

³⁹ Jesúsñapa' alla otererr:

—Napa' añecopña nohuapa arr patsro allochña'pa' atoch acrare'tterra acheñenesha' errotencha' nentyesanet, allochña'pa' ñeñt ama entetsopa' o'ch e'ñe cohuen enterra. Ñeñtña entetsaña'pa' o'ch alla aporo'yettterra.

Ñeñt'pa' añ toma'ntata, ñeñt atarr ochñañ entetsa ñerra'm ame'ñerrana Jesús, ñetpa' cherranetcha' Yompor po'cohuenña pueyo'chreto. Ñeñtña ama ochñañeye' entetsañe ñeñto'marña ñetpa' amach ame'ñereto Jesús, ñetñapa' amach cherraneto Yompor po'cohuenña pueyo'chreto.

⁴⁰ Patanta'tetsña fariseonesha' ñeñt allame'ttso'tsa'yenet ñesho, ñetñapa' e'mueñet ñeñt atet oten Jesús. Ñetpa' atet ochet:

—Ta'm yapa' ¿amañe' aporo'yete'ye' pentenye?

⁴¹ Jesúsñapa' atet otanet:

—Ñerra'm po'ño'ch sa aporo'yet sentenañ amañe' eñallmeñeña so'chñar. Tarraña sapa' atet soten, sapa' año' aporo'yete'yayso, e'ño' cohuen secuen, ñeñto'marña te'pa' o'ch notas, so'chñarpa' chocma eñall.

10

Atto Jesúsapa' añ toma'ntatanet all yottampeñet carrnero

¹ Allempoña Jesúsapa' alla ye'chaterraneterr, ñeñt'pa' atet toma'ntaterraneterr:

—Po'ño'chca' notenes: All yottampeñet carrnero ñerra'm esesha' ama be'tetso alote'cma be'tenet ñerra'm po'pshemñañaña a'tenet, ñeñtña po'ño'chpa' eñe'ca'ye ñeñt aprratam'psañtetsa.

² Tarraña ñerra'm esesha' be'tets e'ñe alote'cma be'tenet ñeñtña po'ño'chpa' ñeñt cohuan'pene' carrnero.

³ Ñeñt cohuan'pene' yetarrpa' ñerra'm esempo hua'cherra ñeñt cohuan'pene' carrnero ñapa' chocmach toram'psapuerranet. Carrneropa' e'ñe eñoteññañet pamo'mte' po'ñoñ. Ñaña'apa' o'ch chore'tyesan po'carrneror pa'so'chñopa' o'ch cha'nma'cha'tatan po'carrneror.

4 Allempoña čha'nmatue allohuen a'yoŕpa' ñañaŕa' o'ch ota. Po'carrnerorñapa' al-lentach cota'huanemñ chenta'. Ñetñapa' e'ñe cheme'teññañet pamo'mte' po'ñoñ.

5 Tarraña ahuaŕñaŕa' ama coteñe, čhach matamñpesya ŕarro'mar ama eñotenano ahuaŕña po'ñoñ.

6 Ñeñŕpa' atet oterranerr fariseonesha' toma'nteñtso ŕarraña ñetñapa' ama eñotoñeto ñeñŕ otenanet.

Atto Jesúsŕa' añ toma'ntena ñeñŕ e'ñe cohuen cohuañpene' po'carrneror

7 Alloŕñapa' alla oterraneterr Jesús:

—Po'ñočhca' notenes: Napa' na yetarrotets alloŕčha' be'ten carrnero.

8 Allohuen ashcañnesha' ñeñŕ huapyestse't allempo ama nohuena' na, ñetpa' eñeŕareret ñeñŕtet aprratamñsañtetsa, ŕarraña ñetpa' ama e'mñnotenanoña carrnero.

9 Napa' na yetarrotets. Ñerra'm esesha'ch be'tets nesho ñeñŕpa' qeshperrach, be'terretcha' ñaña čha'nerretcha' enterretcha' e'ñe cohuen puerrar.

Ñehua, ñeñŕpa' añ otenanet: Ñerra'm esesha'ch ame'ñaya ña ñetñapa' qeshperretcha'. Ñachña cohuañperrahuet e'ñe cohuen amach es pallterreto.

10 Jesúsñapa' alla oterraneterr:

—Eñeŕpa' amaca'ye huenoña e'ñe atŕa, añecopña huena o'ch etyes, o'ch es muetsa, o'ch es a'chencatua. Tarraña napa' añecopña nohuapa attochña sapa' corretsasach socsheñeshocmañen e'ñe ŕayoteñ errponañohuen.

11 Napa' na ñeñŕten cohuen cohuañpene' carrnero. Ñeñŕ e'ñe cohuen cohuañpene' carrnero ñapa' e'ñe ñañaña a'rroyerŕtsa o'ch rroma po'carrnerorecop.

12 Tarraña po'psheñeñ ñeñŕ atsa'tarettatsa attoch cohuañpenan carrnero ñeñŕpa' ama pamo'mtayeyaye; ñañaŕa' ñerra'm entapan ma'yarrpa' čhach mata o'ch sa'nmanña carrnero. Ma'yarrñapa' o'ch rroma'yesosan carrnero, patantarrña carrneropa' o'ch atŕa a'parratse'tach.

13 Ñeñŕ atŕa atsa'tarettetsapa' po'ñočhpa' ama lleca'penanoña carrnero ama't mame-sha. Ñeñŕo'marña čhach sa'nmanña carrnero.

14 'Napa' na ñeñŕten cohuen cohuañpene' carrnero. Napa' e'ñe nechme'teñ ñeñŕ necarrneror. Ñeñŕña nopa' e'ñe cheme'tenen naña.

15 Atet pena Apa e'ñe eñotenen, nañapa' e'ñe neñoteñ naña Apa. Napa' e'ñe ñañaña o'ch na'rroyerra attoch nerroma necarrnerorecop.

16 Eñall po'poñečhño ñeñŕčha' necarrneror neperr, ñetpa' ama parrocmateneto arr allo'tsen ñeñŕ necarrneror nepen te'. Añ poctetsa o'ch nerraneta' attoch e'mñnoterrnanet neñoñ, allochñapa' o'ch e'ñe parrocmaterret. Puesheñarrana ñeñŕtenčha' cohuañperrahuet.

17 'Apapa' ello atarr morrentenna ŕarro'mar napa' na'rroyena ñañaña o'ch nerroma acheñeneshap, elloñapa' o'ch alla netanterra.

18 Ama't esesapa' amach puerratamñpesnoña nocreña, napa' na ñeñŕten a'rroyetsa e'ñe ñañaña. Napa' anareten attoch na'rroya o'ch nerroma; anareten ñaña attoch ellopa' o'ch alla netanterra. Ñeñŕpa' Apaña notene' atetčha' neŕa. Arrpa' allohua atet toma'ntatenanet allohuen ñeñŕčha' ame'ñerraya ñeñŕña po'carrneror pen ñeñŕčha' atarr cohuen cohuañpen.

19 Ñeñŕ atto serrpare'tatenanet Jesús, allña judionesha'pa' ellopa'tetstatenet poctañña Jesúsocop.

20 Shonte' acheñenesha' ñeñŕ atet otyesets:

—Añmapa' čhaca'ye chorreña oneñeñ, čhaca'ye mospuena. Eso'mare'tña se'mñoteñ.

21 Po'potantañečhnoñaŕa' ñetpa' atet otyenet:

Ñerra'm cho chorreña oneñetpa' amate' errotenoť eñoñoña atet e'ñe cohuen. Oneñetpa' amate' errotenoť cohuaterranoña aporo'yet.

Allempo judionesha'pa' achm̄are'teñet Jesús

²² Allempoñapa' cherrerr allempo alla cosherrerr judionesha' Jerusaléño allempoch yerpuerret ñeñt atto nete't ahuat Parets pa'paquëll ñocop. Allempo alla cosherreterrpa' allempopa' huapo.

²³ Jesúsñapa' alla chopeñen Parets pa'paclo all oteñet Salomón puecha'petaro.

²⁴ Allñapa' arrotam̄pesya judionesha'pa' atet ochet:

—Esempohuachñaca'ye pe'nuaña ñeñt atto pemoññe'tatenya. Ñerra'm po'ñochte' pa Cristotetspa' poteyñaca'ye e'ñe po'ñoçh.

²⁵ Jesúsñapa' atet otanet:

—Ama't notatstas sapa' amachca' same'ña'no. Napa' e'ñe neyemteñoť Apa atet es nepa'yen. Ñeñt norrtatyenpa' ñeñtcha'ña señoate' napa' ñeñten Cristotets.

²⁶ Tarraña sapa' ama same'ñenno tarro'mar sapa' ama necarrneroreyayso ñeñt atet o' notuas.

²⁷ Ñeñt po'ñoçh necarrnerorpa' e'mñnotennanet neñoñ, nañapa' neñotenanet. Ñetñapa' cotennet.

²⁸ Nañapa' napuerranetcha' attochña ñetpa' corretsetach tayoteñ errponañohuen, ñetñapa' ama't ahuatapa' amach chenquërreto. Ama't eseshapa' amach puerraterrnetoña e'ñe na notot.

²⁹ Nomporpora' ña napuene'ña ñeñt name'ñenaya. Ñapa' atarr ahuamencatesha'. Ña po'huamencpa' ama eseshaye' metanenaye. Ama't eseshapa' amate' errotenoť puer-ratam̄psetoña Nompopor e'ñe ña potot.

³⁰ Napa' e'ñe parro attecman epan ña.

³¹ Ñeñto'marña allempo judionesha' ñetpa' chetet mapue' allo'ch rrolle'chet.

³² Jesúsñapa' atet oterraneterr:

—Shonte' coçhnesha' norrtatyesonas Nompopor po'huamencot. ¿Erra'tsenote'tña añ ñeñt e'ñe coçhnesharoť sapa' semneñ o'ch sarrolla'n?

³³ Judionesha'ñapa' atet otereterr:

—Ama porrtateñoťeye' coçhnesha' yemneñe o'ch yarroлле'taḡ. Yapa' añecopña yemneñ o'ch yarroлле'taḡ atto pa'apa' atarr paçm̄are'teñ Parets. Papa' acheñoťaca'ye pemneñ o'ch pepartsocoptarta.

³⁴ Jesúsñapa' alla oterraneterr:

—Ñoñets ñeñt atet anaret ahuatoteñ socop allpa' atetca'ye anuaret añecop ñeñt e'ñe ñenmať a'pote' Yompopor po'ñoñ, ñeñtapa' atet otanete't Yompopor: “Sapa' atetcha' entenes acheñenesha' ñerra'mrrate' yompores.”

³⁵ Yompopor po'ñoñ ñeñt anuaret ahuatoteñ ama puenesho. Atet otanete't ñetpa' yomporo'ch entenanet acheñenesha',

³⁶ naña ñeñten o' nerren Yompopor ñeñten o' mueñerren arr patsro, sapa' achm̄arñaatch sepenen tarro'marotña napa' noten Yompopor Puechemeren.

³⁷ Ñerra'm amate' añeye' norrtateno Yompopor po'partsoña ñeñtēpñapa' amach same'ñatsetno.

³⁸ Tarraña atto po'ñoçh norrtateññañ po'partsoña ama't ñeñtapa' same'ñya, ama't napa' ama ame'ñoen sentenno. Attochña po'ñoçh çhaponasa seyoçhro atto Apapa' e'ñe parrocmatenna, napa'cho'ña neparrocmaten epan Apa.

³⁹ Ellopa' mueneñetañ o'ch rromuet tarraña ñet allempopa' cha a'qeshḡachet.

⁴⁰ Allempoña Jesúsapa' ahuer yom̄ta'n Jordanaso all e'ñe ñenmať apatyese't Juan Yomporecop. Allñapa' alla a'pa.

⁴¹ Shonte' huacha'tyestsas ñeshopa' ñetñapa' atet otyesoset:

—Juanpa' ama't coñe'ta ama orrtatano partsoteñets, tarraña allohuen allpon otyesye't Juan añecop ñeñtcha' Cristoterrets ñeñña te'pa' e'ñe po'ñoçh atet pena.

⁴² Allñapa' shonte' acheñenesha' ñeñt ame'ñaya Jesús.

11

Allempo rroma Lázaró

¹ Allempo atsna'ten puesheñarr yacma ñeñt'pa' añ pa'so'cheñ Lázaró ñeñt yeçhetsy anetso Betania epuet epsheño'mar po'çh, puesheñarrpa' María, po'psheñeña' Marta.

² Ñehua, ñeñña Mariápa' ña a'yatcate'ña Partsésa' eñmosafo pa'tco allempoña e'ñe ña pue'chopa' alloña a'porrarra'tquër, ña po'se Lázaropa' çha atsna'ten.

³ Po'çhanesha'ñapa' allenta mueñet acheñ Jesúsesho, ñetñapa' atet otoset Jesús:

—Partseshacha', ñeñt atarr pemorrentenapa' çha atsna'ten.

⁴ Jesúsña e'mare'chpa' ñapa' atet otapanet:

—Ña amaca'ye añecpaye' atsna'teno o'ch rroma, tarrecpa atet pena allcha' norrtatoñ Yompor po'partsoña, allochñapa' o'ch cohuentatennanet na ñeñten Yompor Puechemeren.

⁵ Jesúsapa' ama't atarr morrentenanañ Marta ñaña pa'mo'nerr ñaña Lázaró,

⁶ tarraña allempoña e'mare'tan Lázaropa' çha atsna'ten, ñapa' amaña allorocmaye' to, ñapa' alla epomterr e'ñe all allo'tsen.

⁷ Allempoña epomta'muenpa' atet ota'muenan pueyochresha':

—Te'pa' o'ch ahuerrey alla Judeo allo'tsen Lázaró.

⁸ Pueyochresha'ñapa' atet ochet:

—Maestrocha' allpa' çhaca'ye o'patenpa judionesha' o'ch rrolle'tapet attoch muetsapet. Ta'm, ¿paña te'pa' o'ch alla pesechenerr o'ch alla ahuerperr?

⁹ Jesúsñapa' atet otan pueyochresha':

—Ama'tña yetpa' o'ca'ye ellapen puetarsats. Ñerra'm yehope'ch yeto amach yepoto'teno tarro'mar e'ñe yenten puetare' añe patsro.

¹⁰ Añña ñerra'm yehope'ch tsapo yepoto'tena tarro'mar ama a'puetarsam̄psareteye. (Atto Jesúsapa' e'ñe eñotatenanet allponmatmeñ ñocop attoch e'ñe etsotuan Yompor po'taruas tarro'mar ama çhena' allempo ñeñt poctetsa ñocop attoch muetsat.)

¹¹ Allempo otua atetpa' o' alla oterranerr pueyochresha':

—Lázaró ñeñtey e'ñe parrocmá atarr yemorrentannena ña te'pa' çhaca'ye muen, ñeñto'marña te' napa' o'ch ahuen o'ch alla nopuera'.

¹² Allempoña pueyochresha' ñetñapa' atet otereterr:

—Ñerra'm Partseshacha' çhate' e'ñe cohuen muenpa' ñeñtepñapa' correrrach.

¹³ Ñehua, Jesúsapa' añ otenanet atto Lázaróña' çhoca'ye rromuen; ñetñapa' çha otenapuetañ añte' otenanet ñeñt atto çhocma e'ñe yemuen betnatotey.

¹⁴ Allempoña Jesúsapa' alla oterraneterr attoch e'ñe eñochet:

—Te'pa' po'ñoçhca'ye o' rroma Lázaróñ.

¹⁵ Napa' te'pa' atarr nocshena tarro'mar ama allo'tsenno all. Atarr cohuen nenteñ socop allochñapa' attoch e'ñe cohuen same'ñerrna. Ama'tpa' te'pa' o'ch ahuey Lázaróñesho, o'ch yenteña'.

¹⁶ Tomásña ñeñt otenet Epanesha' ñapa' atet otan po'potantañ ñeñt parro yochreshat-socmuets:

—Ama'tpa' ahuanmapo'ch yerromuepa' yaña epay Jesús.

Allempo Jesús eñotatanet ñapa' ña atantatañtetsa alloch e'ñe yocrrena

¹⁷ Allempoña çhap Jesús all, ñapa' eñotos o'ca'ye pa'tatsmat pampa'huet.

¹⁸ Ñehua, Betania allame'ttsañ Jerusalén —o' ma'pañña kilómetro attoch yeçhap Jerusaléño.

¹⁹ Allñapa' shonte' judionesha' ñeñt' huaçhetsa allo'tsen Marta epuet pa'mo'nerr María ñeñt'cha' emya'tenahuet atfo ya'na'teñet po'sayañet Lázaroñ ñeñt' o' rromuerr.

²⁰ Allempoña Martapa' e'mare'tan Jesús o' huena ñaña'ña' allenta ahuo' o'ch poctenan Jesús. Maríañapa' allo'tsena pocollo all anen.

²¹ Martaña allempo poctenan Jesús atet otapueñ:

—Ñerra'm Partseshacha' arro'tsenpeñcha' amate' rromuerrñeña nesayañ.

²² Ama't te'pa' napa' neñoteneñ ñerra'm erra'tsencha' penamñ Yepapar, ñapa' çhocmach atet ponañ.

²³ Jesúsñapa' atet och:

—Po'ñoçhpa' tanterrach pesayañ.

²⁴ Martañapa' atet otererr:

—Po'ñoçh napa' neñoteñ tanterrach esempohuañen allempoch atantatareñey allo-hueneñ.

²⁵ Jesúsñapa' atet otererr:

—Napa' na ñeñten e'ñe po'ñoçh atantatañen, napa' ñeñten alloch e'ñe socrrena. Erra'tsencha' name'ñenaya na ama'tcha' rromuenetañpa' ñetpa' ellochña alla correrret.

²⁶ Ama't ñaña allohuen ñeñt' corra'yetsa te' erra'tsencha' name'ñerraya na ñetñapa' corretsetach tayoteñ e'ñe errponañohuen. Papa' ¿pame'ñenna't ñeñt' atet noteneñ?

²⁷ Martañapa' atet otererr:

—Partseshacha' napa' neñoteneñ e'ñe po'ñoçh p'apa' ñeñteñ Cristotosets, p'apa' Yepapar Puechemereñ, pa' atarr yecuen ahuatoteñ o'ch pehuapa arr patsro.

Allempo Jesús yahuosa Lázaroñ puepampro

²⁸ Allempo atet otuepa' ñapa' allenta ahuerri pocollo, atet otuerran pa'mo'nerr María, ñeñt'pa' atet och a'nahua:

—Te'pa' o' huena Maestro, o' agotatueneñ.

²⁹ Maríaña e'mare'te'pa' atantoche' allenta ahuo' ñaña o'ch poctenan Jesús.

³⁰ Ñehua, Jesús'pa' ama' çhena' anetso, allo'tsenara all pocteneñ Marta.

³¹ Judionesha'ña ñeñt' allo'tsa'yen pocollo ñeñt' emya'tene' ñetñapa' enteñet atantoche' María puema'yoreñ çha'nem ñetñapa' allenta cota'huanmet. Ñetpa' çha' otenapuetañ arrcha' ta po'sayañ puepampro o'ch ya'na'teña'.

³² Allempoña çhap María allo'tsen Jesús, all entospa' concorposa pa'rrp'ot. Ñapa'çho'ña atet otos:

—Ñerra'm Partseshacha' arro'tsenpeñcha'pa' amate' rromuerrñeña nesayañ.

³³ Allempo entosan Jesús all atarr yahuena María ñaña judionesha' ñeñt' cotose' ñetpa'çho'ña e'ñe parro attecma yahuanrrortenet, ñaña'ña' pueyoçhropa' atarr llecapretosanet ñeñto'marña çha' enarosa.

³⁴ Ñaña'ña' atet otapanet:

—¿Erra'tña sepampuer?

Ñetñapa' atet ochet:

—Ñehua, Ayochreshate o'ch ahuey o'ch penteña'.

³⁵ Allempoña Jesús'pa' yahuosa ñaña.

³⁶ Judionesha'ña'pa' otyeset:

—Ñapa'çho' atarrepa'tca'ye morrenteña.

³⁷ Pueseña'tetsña'pa' atet otyeset:

—Añmapa' ñeñt'ca'ye cohuaterre'ña aporo'yet. Ñerra'm arro'tseneñcha'pa' amachca'ye muenacheñe o'ch rromuerreñña Lázaroñ.

Allempo Jesús tantaterran Lázaroñ

³⁸ Jesúsña e'ñe puellquëño'pa' enarerrerr. Allempoñapa' çhap puepampro all mapuet-pono e'ñe all yottam'peñet mapyo.

³⁹ Allñapa' atet otosanet Jesús:

—Te'pa' sa'rrote't mapue' a'yenet.

Martaña ñeññ arromñañ po'çhpa' atet oterranerr Jesús:

—Partseshacha' o'te' çha pomaña' o' pa'tatsmat pampa'huet.

⁴⁰ Jesúsñaapa' otererr:

—Ama'tña napa' o'ca'ye notuosep ñerra'm pame'ña'nachpa' pentoñcha' Yompor po'partsoña.

⁴¹ Allempoñapa' a'rrote'tet mapue' a'yenet, Jesúsñaapa' cohua' enonet atet ot:

—Apa, neparasyoso'tap tarro'mar te' papa' pe'mñotenen ñeññ atet nenamuenep.

⁴² Ñehua, napa' neñoteñ çhocma pe'mñotenen. Añña acheñenesha' ñeññ tom'cha'tets arr ñocpue't neparasyoso'tene'p allochñapa' attoch eñotenpet pa' ñeñte'p nellensene'.

⁴³ Ñeñña otuapa' allempoñapa' rrana huomencpa' atet ot:

—¡Lázaroñe, te'pa' o'ch notap petantena, pe'cha'nen!

⁴⁴ Allempoñapa' çhepa'tcha' çha'netsña Lázaro ñeññ o' rromhua, e'pota'taret'poto ñaña pa'rrp'ot, ñaña pa'clloy'otpa' e'tac'le'charet'pañello. Jesúsñaapa' atet oterraneterr:

—Te'pa' çhosañaca'ye toram'perre' eshec'cha' chope'chnerr o'ch ahuerr.

Atto atarr o'pateñet Jesús o'ch muetsatateret

(Mt. 26.1-5; Mr. 14.1-2; Lc. 22.1-2)

⁴⁵ Allempoña shonte' judionesha' ñeññ cotose' María ñeññ ente' Jesús atto orrtatosanet po'partsoña ñetpa'çho'ña e'ñe allempocma ame'ñeret ñamet Jesús.

⁴⁶ Tarraña po'potantañe'chnoñapa' ahuanmuet fariseoneshesho ñetñapa' serrpare'tatoset fariseonesha' ñeññ atet o' p'ohua Jesús.

⁴⁷ Allempoña fariseonesha' ñaña ñeññ pa'm'cha'tare'ternesha' pen allohuen judionesha' po'cornaneshar, ñetñapa' ap'çhachet allohuen ñeññ a'p'octatene' ñoñets judioneshacop. Ñetña allempopa' atet otyeset:

—Errotuachñaca' yepe'ña, ñeññ yacmarpa' çhocmaca'ye orrtatyenanet partsoteñets.

⁴⁸ Ñerra'm atta yeque'çhpue' allohuenña acheñenesha'pa' çhate' ame'ñyet ña, allempoña po'ño'çhpa' çhate' huapa am'cha'tare'tnesha' romo'marnesha' çhate' puerratañ'psosyet Parets pa'paquëll ama't ñeññ anaret Partsocop, ama't e'ñe ya ya'netserpa' çhate' puer-ratañ'psosyet.

⁴⁹ Puesheñarrñapa' ñeññ sochetsa Caifás allempopa' ñeññ pa'm'cha'tare'ter pen allohuen judionesha' po'cornaneshar ñañaapa' atet otanet:

—Sapa' ama es seño'teno, ama't coñe'ta.

⁵⁰ Ama't pocte' senteñeña ñerra'm puesheñarr yacmapa' o'ch rroma allohuen acheñeneshacop, allochñapa' allohuen yamo'tsna'tarpa' amach chenca'huerreto.

⁵¹ Ñapa' ama ño'taye' eñosoña atet. Ña allempopa' ñeññ pa'm'cha'tare'ter pen allohuen judionesha' po'cornaneshar ñeñño'marña ñapa' Parets eñosate'. Ñapa' añ a'potanet atto Jesús'pa' ñach rromuerrets allohuen pamo'tsna'tarneshacop.

⁵² Amach e'ñe ñap'ta pamo'tsna'tarecpayaya rromoña Jesús, añecpa'nachña rroma allohuenacop ama't erra'tsencha' puechemer perr Yompor arr patsro, ñachña parrocmata'terrahuet.

⁵³ E'ñe allempoteñña atarr o'pateñet Jesús o'ch muetsatachet.

⁵⁴ Ñeñño'marña Jesús'pa' o'huañ chope'ne'ch allo'tsa'yen judionesha' all Judeo. O' ahuo' amayarero'mar, çhap paterr anetso ñeññ pa'so'cheñ Efraín. Allñapa' alla a'posa epuet pueyochresha'.

⁵⁵ Allempoña o' cherrmocherr pascuapo allempoch alla cosherrerr judionesha'. Al-lampaño'marnesha' ñeñt allo'tsa'yenet shontet ahuanmuet Jerusaléño. Ama chena' pascuapo ñetpa' añecopña ahuanmuet attoch a'cohuentatoset e'ñe ñetañeña Partsocop.

⁵⁶ Ñetñapa' Jesús a e'noset, a'p'to'tanna'tyesoset allempo tom'cha'toset Parets pa'paclo; allñapa' otanna'tyenet:

—¿Erroña't sotenña sa, ta'm huapachña Jesús, ñato' amach huapoña arr?

⁵⁷ Ñehua, ñeñt pa'm'cha'tareternesha' pen allohuen judionesha' po'cornaneshar ñaña fariseonesha' ñetpa' atet otyeset acheñenesha':

—Ñerra'm eseshascha' eñote' erro'tsente'ña Jesús pa' o'ch sotey ya allochñapa' o'ch yerrmach.

12

Atto puesheñarr coyanesha'pa' a'yatca'tosan Jesús eñmosaño
(Mt. 26.6-13; Mr. 14.3-9)

¹ O' pechapmatama o'ch chapa'muen pascuapo, Jesús pa' alla cherr Betanio. Allñapa' allo'tsen Lázaro ñeñt rromats ahuaña ñeñt alla tantaterr Jesús.

² Allñapa' all rrallme'chatneñet. Martañapa' ña nenahuet rreñets. Lázaroñapa' ña rrets epuet Jesús ñaña po'potantañechno.

³ Allña Mariapa' chetan pueñarr eñmosaño ñeñt otenet nardo puese' e'ñe ñeñtoche' ñeñtñapa' atarr tsa'te'. Ñaña'p' alloña a'yatca'tan Jesús. E'ñe ña pue'chopa' alloña a'porrarra'tquër. Ñeñtñapa' ora eñmosaño'tatan pocollohuen.

⁴ Judas Iscariote ñeñt Simón puechemer ñeñtara pueyochreshar ñeñtcha' pomuerre' ñaña'p' atet ot:

⁵ —Eso'marte'ña añ eñmosaño'p' ama choye'ña yepome, chochña'cho' yepomeña'p' yeganañcha' shonte' quelle ñeñt trescientos denario allempopa' yapa'yeseñcha' huocchañnesha'chno ñeñt atarr es pallta'yetsa.

⁶ Ñapa' ama puellquëñofoye' huocchañnesha'chnocop atet oto. Ñapa' tarro'mara atet ot, ñapa' atarrca'ye eñet. Ñapa' e'ñe ñacma anmarmpene' quellayepo'r ñeñt allohuenacop, ñapa' alloña etenña quelle ñeñt esha'tenet all.

⁷ Tarraña Jesúsñapa' atet otanet:

—Semnachñaca'yeña coyanesha' ñeñt atet penen. Ñapa' añecop añño'tennan ahuañoteñ eñmosaño tarremphua allempoch a'yana'terrneterr ñeñtcha' epuet pampa'pesnet.

⁸ Tarraña ama'tcha' cho pomosaneñ eñmosaño alloch es apa'yeseñeñ huocchañnesha'chno, tarraña chocmachca'ye eñallña huocchañnesha'chno arr patsro. Tarraña ñaña'p' po'ño'chpa' amachca'ye allo'na sentenno arr patsro.

Allempo o'pateñet Lázaro o'ch alla muetseret

⁹ Shonte' judionesha' allempo e'mare'chet o' alla cherr Jesús all Betanio, ñetñapa' hua'cha'tet. Ama e'ñe ñap'ecpa Jesúsocop hua'cha'teto o'ch enteñeta', añecpa'ñaña hua'cha'tet o'ch enteñeta' ñaña Lázaro ñeñt rromats ahuaña ñeñt tantaterr Jesús.

¹⁰ Ñeñtña pa'm'cha'tareternesha' pen allohuen judionesha' po'cornaneshar ñetñapa' añe'na o'patenet Lázaro ña'nach muetset.

¹¹ Tarro'mar allempo tanterra Lázaro shonte' judionesha' ñeñt ame'ñaya Jesús ñeñto'marña ñetpa' o' quechpa'hueretña ñet po'cornaneshar.

Allempo chap Jesús Jerusaléño
(Mt. 21.1-11; Mr. 11.1-11; Lc. 19.28-40)

¹² Tsapaña shonte' acheñenesha' ñeñt shontetsa pascuacop Jerusaléño, ñetñapa' e'mare'teñet Jesús o' chapmoch ñaña Jerusaléño.

13 Ñetñapa' tsorro'tyesnomuet shequëpan ñeññ anemyeset allo topanetyesnomuet toñ allcha' oñmos Jesús. Ñetñapa' puerranarshet ahuanmuet o'ch poctet Jesús ñeññpa' atet otyesnomuet:

—¡Acsherrapo'ch allohueney! ¡Aye'chochtaterrapo'ch Jesús ñeññ llesensen Yompor! ¡Aye'chochtaterrapo'ch Jesús ñeññcha' Pa'mcha'tareter perr israelnesha'!

14 Ñehua, Jesúsñapa' all entnoman paterr ashnatollpa' allenta monta'nma allo. Ñeññpa' añecop atet pa ñeññ atet anuaret ahuatoteñ e'ñe ñocop, ñeñññapa' atet oten:

15 Amach cha semcha'tatsto síono'marneshacha' ñeññarasa jerusaléño'marneshas. Secue'tach te'chca'yeña huaponasaña ñeññcha' Sa'mcha'tareter seperr. Ñapa' añaca'ye monta'nena ashen rre'ptorechor.

16 Ñehua, ñeññ ñoñets allempoña pueyochresha'pa' ama çhapaneto pueyoçhreto. Tarraña tsapañoneña allempo rroma Jesús, o' alla tanterra alla ahuer pue'ntaño all atarr cohuentatapuer Pompor, ñetñapa' allempaña çherranetña pueyoçhreto te'ña po'ñoçhpa' o'ca'ye etsoterra e'ñe atet anuaret ñocop ama't ahuo'toteñ.

17 Acheñenesha' ñeññ allo'tsa'yen allempo çhore'tenan Lázaroñ puepamproñ atto tantater, ñetñapa' ñeñña a'poñayeset.

18 Ñeñño'mare'naña ahuanmaña shonte' acheñenesha' o'ch poctet tarro'mar ñetpa' o' e'mare'chet ñamet ñapa' orrtatenanet po'partsoña.

19 Allempoña fariseonesha'pa' atet otanna'tyeset:

—Señchfe'ca'ye'm yapa' amate' erroñ es yeño ama't coñe'ta. Secue' shonte'ca'ye ñaña acheñenesha' erraparenot o' e'ñe co'ta'huanmet.

Allempo griegonesha'pa' mueneñet o'ch eñchet Jesús

20 Patanta'tets griegonesha'pa' ahuanmuet ñamet o'ch coshapreteneta' pascua; ñetpa' añecop ahuanmuet o'ch concorposet all.

21 Ñetñapa' ponmosyet Felipe ñeññ betsaido'marnesha' ñeññara galileo'marnesha'. Ñeñññapa' atet otoset:

—Nompocha' yapa' añca'ye yemnen o'ch yeserrpare'tos epay Jesús.

22 Felipeñapa' allenta otenana' Andrés. Ñetña e'ñe epsheño'maretpa' ahuanmuet o'ch oteñeta' Jesús.

23 Jesúsñapa' atet otapanet:

—Te'ña po'ñoçhpa' o' etsoterra allempoch na Ñeññen Acheñetosetspa' o'ch alla cohuentaterren Nompopor.

24 Ñeññpa' e'ñech po'ñoçh atet netma'ntatasa atet pena puerets. Ama't erra'tsena puertsor ama çho pampallme'cho patso allcha' puetsohua pa'tall ñeññach patrrara pue'llomer. Tarraña ñerra'm çho pampallme'cha patso allcha' puetsa' pa'tall attochña chop. Ama't puellmarra pampallme'chatsa atarrcha' aton ellom're'terr. Ñeññpa' añ notenes e'ñe pocte' o'ch nerroma na ñeññen puesheñarrana attochña shonterra ñeññcha' name'ñerraya.

25 Ñeñño'marña notenes: Ñeññ atarr morrentenaya atto coshena arr patsro, ama pocteye' entenano o'ch es sohuanom Yomporecop, ñeññña pocreña atarr morrentena, ñeññ atet petsapa' çhach a'chencatena e'ñe ñañeña. Tarraña ñeññ ama morrentenaye atto coshena arr patsro, e'ñe pocte' enteñ o'ch es sohuanom Yomporecop ama't pocreño'huen, ñeññ atet petsa ñetñapa' corretsetach pocsheñeshocmañen tayoteñ e'ñe errponañohuen.

26 Ñerra'm esesha' muenats o'ch torrenet nocop, co'ta'netepa' attochña e'ñe neyochresha' neperranet. Tarro'mar ñerra'm erro'tsenencha' na ñeññ torretsa nocop ñetpa'çho'ña allo'tsenetcha' ñamet. E'ñe allohuen erra'tsencha' torrerrtsa nocop, Nomporna'pa' atarrcha' cohuentaterranet.

Allempo Jesús eñotatanet ñapa' choch muetseret

²⁷ 'Te' na neyočhropa' čha atarr nellquëna. Tarraña ama't atteñpa' Nomporna napa' amach čha notatsche amach muenatano o'ch huapona ñeñt' atarr amueročhtatañ nenten. Ñeñt' atetpa' amach notatsche tarro'marña napa' ñeñtecopca'yeña nohuapa nach amueročhtatare'ttertsa. Añcha'ña noch Nompor:

²⁸ —Te'pa' pepa'chña Apa aye'chočhtatare'ttertsa.

Allempoñapa' čha e'morrtatsa ñoñets entoť, Yomporñapa' atet ot:

—Napa' o' necohuentatua, elloña o'ch alla necohuentaterrerr nañeña.

²⁹ Shonte' acheñenesha' ñeñt' tomčhets all, ñetña atet e'mueñetpa' atet otyeset:

—Chote'ca'ye tecorena.

Po'potantaññapa' atet otyeset:

—Añca'ye eñorana'tenaya Yompor po'mllañoťeñer.

³⁰ Jesúsñapa' atet oterraneterr:

—Ama nocpaye' huenoña añ ñoñets. Ñeñt'pa' e'ñe socop huena.

³¹ Te'pa' o' anare'tta allohuen acheñenesha' arr patsro ñeñt' ama name'ñenaye ñetpa' amñare'tterretcha' coñcheñtso. Ñaña oneñet' ñeñt' pa'mcha'tare'ter pen acheñenesha' arr patsro, te' ñocoppa' o' anare'tta ahuapore'tare'tterrach esempohuañen.

³² Na ñerra'm esempoch echantam̄perrnet corsocho allempoña napa' nečhore'tercha' allohuen pa'namen acheñ attoch ame'ñerrnet.

³³ Ñapa' añecopña eñorana'tenanet attoch eñotatanet ñapa' corsochoch rromuerr.

³⁴ Acheñenesha'ñapa' atet otyeset:

—Yapa' yeñoteñ añ ñoñets ñeñt' atet anare't ahuatoteñ, ñeñt'pa' atet oten ñeñt'cha' Cristoterrets ñapa' ama arromñaťeshayaye ama't errponaña. Ta', ¿eso'marte' pañapa' p̄oten ñeñte'p̄ o' Acheñetosetspa' echantam̄psare'te'po'ch corsocho allcha' perromuerr? Ta', ¿eseshate'ña ñeñt' po'ñočh Acheñetosets? amapa' ¿ñeñtarate' ñeñt'cha' Cristoterrets?

³⁵ Jesúsñapa' atet oterraneterr:

—Mameshaña palltena arro'tsenmeñen na ñeñten a'puetarsam̄psañtetsa. Soctape'cherrnan e'ñe tayecma neñoñ tayepa'tña arro'tsenmeñen ñeñtencha' a'puetarsam̄perre' soctapña allochñapa' attoch amach čha sechenca'huerro. Po'ñočh ñeñt' ama ame'ñetso ñetpa' ama eñoteñeto attoch chenca'huerret. Ñeñto'marña ñetpa' e'ñe atet penet ñerra'mrate' checmeta chope'chenet ama eñoteñeto errene'tcha' tet.

³⁶ Na ñeñten sa'puetarsam̄pene' soctapña' te'pa' arro'tsenmeñen. Soctape'cherrnan neñoñ tayepa'tña' arro'tsenmeñen. Allochñapa' o'ch seyečhquerra sa acheñres ñeñtescha' atarr cohuen orrtatyerre' ñeñt' cohuen enten Yompor tarro'mar sapa' e'ñech puetaro socrena.

Otua Jesús atetpa' ahuerr a'nahua; acheñenesha'ñapa' ama eñocheto errate' ahuerr.

Atto judionesha'pa' ama ame'nyeto Jesús ñeñt'pa' añ etsoterrtsa ñoñets ñeñt' anaretet ñocpuet

³⁷ Jesúspa' ama't shonte' orrtatyenanet po'partsoña tarraña amaña eseshaye' ame'ñenayoña ña.

³⁸ Ñeñt'pa' attoca'yeña etsotaña Isaías po'ñoñ ñeñt' a'mtaye't ahuat Yompor po'ñoñ. Ñeñt'pa' atet ote't' ñocop:

Amach Nomporcha' eseshaye' yame'ñayo ñeñt'cha' atet yeserrpare't. Ama Nomporcha' eseshaye' poctenaye pa'pehuamenc.

³⁹ Ñeñto'marña amate' errotenoť ame'ñeto. Tarro'mar ellonet' Isaíaspa' atet ote't':

⁴⁰ E'ñe patpare'teñoťet Yomporñapa' muenatanet o'ch echarrtet pueyočhret. Attochña ñetpa' čhach ottenet ñerra'm aporo'yetet ñeñt' ama es enteno. Ñeñto'marña ama muenatenaneto o'ch es entet taye'to'te' chap Janet pueyočhreto.

Ñeñto'marña ama't mameshapa' amach es cotape'cheneto nocop attoch na'queshpatteranetañ.

41 Isaiáspa' tarro'mar atet ote't ñapa' e'ñe entane't Cristo po'cohuenña ñeñto'marña eñose'tña ñocop.

42 Tarraña shonte' acheñenesha' ñeñt ame'ñaya Jesús ama't ñaña añcha'tarete'chno. Tarraña ñetpa' mecha'chete't fariseonesha' ñeñto'marña ama a'metete'te. Añ mecha'tenet taye'to'te' mueño'tanet judionesha' po'prahuot.

43 Tarro'mar ñeñt ame'ñetsañ ñetpa' añe'na muenenet o'ch e'ñe cohuen entenanet acheñenesha'. Ama añeye'ña mueneneto o'ch e'ñe cohuen entanet Parets.

Atto Jesús po'ñoñ ñeñtcha'ña otteñe'cherre' acheñenesha' esempohuañen

44 Jesúsña rranapa' atet oterrerr:

—Ñerra'm esesha' name'ñenaya na, ama naptaye' ame'ñenneto. Añe'naña ame'ñenet Nomp por ñeñt nellsensene'.

45 Esesha' nentene' napa' añe'naña entenet ñaña Nomp por ñeñt nellsensene'.

46 Napa' añecopña nohuapa arr patsro nach a'puetarsañpene' acheñenesha' poctapña, allochñapa' ñerra'm esesha'ch name'ñaya na amach allo'tsenareto checmeto. Ñeñt checmeto'tsena ñetpa' ama eñoteñeto ñeñt cohuen enten Yomp por.

47 Ñerra'm esesha' e'mue' neñoñ tarraña ama't ama ame'ñerrnaneto neñoñ, napa' amach naye' mueñenahueto coñcheñtso. Tarro'mar napa' ama añecpaye' nohuapo arr patsro attoch nemños acheñenesha' coñcheñtso. Napa' añecopña nohuapa o'ch na'queshpatos acheñenesha' arr patsro.

48 Esesha'chña nachmene' ñeñtcha' ama ame'ñerraye neñoñ, ñocpuetñapa' eñall attoch amñare'tterret coñcheñtso. Ñeñtara añ ñoñets ñeñt neñen na te'pa' ñeñtcha'ña mueñaterrahuetña coñcheñtso esempohuañen.

49 Tarro'mar napa' ama e'ñe notaye' neñeno. Apaña ñeñt nellsensene' ñapa' ñaña notene' atetcha' notas ñaña atetcha' ne'ñorana'tasa.

50 Napa' neñoteñ ñeñt atet otenen ña ñeñtapa' ñeñtcha'ña allochña sapa' corretsasach socsheñeshocmañen tayoteñ e'ñe errponañohuen. Ñeñt atet neñen napa' añca'ye neñen ñeñt atet otenen Apa.

13

Allempo Jesúsapa' e'patca'tyesan pueyochresha'

1 Ama't ama čhena' pascuapo allempoch cosherrerr judionesha', Jesúsñapa' eñoteñ e'ñech ñeñtेशhaña allo'tsen arr patsro o'ch ahuer Pomproesho. Ñapa' čhocma atarr morrentenana allohuen ñeñt pueyochresha' pen arr patsro. Ñeñto'marña allempopa' e'ñe poctacma morrentuenanet.

2-4 Ñehua, Judas Iscariote ñeñt Simón puechemer, oneñeñña' ahuepa't cotape'chach pueyo'chro o'ch pomuerran Jesús. Jesúsñapa' e'ñe eñoteñ ñapa' tarro'mar llesenserña Pompor allohuenacop. Tarro'mar ñapa' e'ñe eñoteñ Yompreshotca'ye huapa, elloñapa' o'ch alla ahuer ñesho. Ñeñto'marña allempo rrallme'chneñet Jesúsña o' tompa' rrotana paterr pa'shtam ñeñt nen enot o' chetan paterr e'shmoco'tametspa' o' chana allo.

5 Alloñapa' o' shan oñ huantejo alloña e'patca'tyesañña pueyochresha'. E'shmoco'tamñtsoñapa' alloña a'porrarra'tcayerranet ñeñt allo chanena.

6 Atteñapa' ponmana Simón Pedro, ñaña'apa' atet och:

—Parteshacha' amaca'ye pocteyaye o'ch pe'patca'tonña netac. Tarro'mar papa' pa atarr sherbets, napa' amaca'ye esoyayno.

7 Jesúsñapa' atet och:

—Ñeñt atet nepenes te' sapa' amach señoche. Esemppopa' čhaponasach seyochro.

⁸ Pedroña'apa' atet otererr:

—Ama't ahuata napa' amach nemnatape o'ch pe'patca'tenña na tarro'mar napa' amaca'ye nemno o'ch nepencna'ntatañ.

Jesúsña'apa' atet otererr:

—Ñerra'm amach ne'patca'tapepa' amach erro'tenoñ e'ñeye' peyemtenno.

⁹ Simónña Pedropa' atet otererr:

—Ñerra'm po'ño'chte' atet Partseshacha' amachña ñapña netac pe'patca'tono nota'nachña e'ñe ora noñohuen.

¹⁰ Jesúsña'apa' atet otererr:

—Ñeñt' o' apuapa' amaca'ye es pallteneto, añaca'yeña palltenet o'ch e'patca'chet. Ateñ sepena sa a'cohuentatuaretes sa soctapñoñ. Sapa' e'ñe cohuen a'cohuentatuaretesañ tarraña ama allohuenacmaye' a'cohuentatuareteso.

¹¹ Nehua, Jesús'apa' e'ñe eñotenan ñeñt'cha' pomuerre' ñeñto'marña atet otanet: “Ama allohuenacmaye' a'cohuentatuareteso.”

¹² Allempoña e'patca'tuanet pa'tacpa' cheterran pa'shtampa' o' alla anerr. Allempoña'apa' atet oterraneterr:

—Te'pa' o'ch neñotatas ñeñt' ney'chatenes ñeñt' atto ne'patca'tenes.

¹³ Nehua, sapa' sotenen Maestro, ñaña sotenen Partsessa'. E'ñe pocte' po'ño'ch sotenen tarro'mar po'ño'chpa' ñeñtenca'ye.

¹⁴ Atto na ne'patca'tas sa, ama't na ñeñten Separtseshar sepen ñaña Semaestror sepenen, sapa'cho'ña ñeñt' e'ñe poctetsa socop se'patca'tanna'tepa'ch samña. Nehua, ñeñt' po'ño'ch notenes, ñeñtpa' atet: Amach sañeña atarr cohuen entetso, attochña e'ñe cohuen sesherbannena.

¹⁵ O' neñotatas atet'cha' seña samña. Sapa'cho'ña attepa'ch seña atet o' nepohuas sa.

¹⁶ Po'ño'chca'ye o'ch notas: Ñeñt' ayochreshat ñerra'm ama esoye' enteno ñañaña ama't e'ñe mamesha, ñeñña pueyochreshachno pen e'ñepa'ch attecmet amach esoye' enteneto e'ñe ñañeñeta. Ama't na ñeñten allsensareten ama esoye' nenteno ama't mamesha, ñeñt'cha' nellsensa'yes namapa' amuepa'chña esoye' enteneto e'ñe ñañeñeta.

¹⁷ Ñerra'm ñeñña sechapoya seyo'chropa' ñeñt' atet ney'chatenes, sañapa' atarrcha' cosheñtso'tsenes ñerra'm e'ñe po'ño'ch atet sephua.

¹⁸ 'Ama allohuenacpayaysoye' neñeno. Napa' neñotenes e'ñe puesheña'ttsospa' atet soctape'chyen seyo'chro. Ama't neñotensoñ ateseña' tarraña e'ñe atta na'creres allochña'apa' attoch etsoterra Yompor po'ñoñ ñeñt' atet anuaret nocop ahuatoteñ, ñeñtpa' atet oten: “Ñeñt' parro yerrallme'chenpa' ñepa'tcha'ña tanterrtsa nocop.”

¹⁹ E'ñe tayoteña'apa' atet notenes ama't ama etsotena' allochña'apa' esempoch etsoterra, sapa' same'ñach napa' ñeñten po'ño'ch Cristotets.

²⁰ Po'ño'chca'ye o'ch notas: Ñerra'm esesha' e'ñe cohuen aguëne' ñeñt' nellsensen na ñetpa' na'naca'yeña aguënet e'ñe cohuen. Ñaña ñeñt' e'ñe cohuen naguëne' na, ñetpa' Nompore'naca'yeña aguënet ñeñt' nellsensene' na.

Allempo Jesús'apa' eñotatanet Judaspa' ñach pomuerre'

(Mt. 26.20-25; Mr. 14.17-21; Lc. 22.21-23)

²¹ Jesúsña allempo atet otuapa' pueyo'chroña'apa' cha lleca'huena. Allempoña'apa' atet otanet:

—Po'ño'ch te'pa' o'ch notas, puesheñarrotes sapa' ñeñtescha' nepomuerre'.

²² Pueyochresha'ña'apa' allenta cohuanña'tyeset. Amaña esesha' eñotaye erra'tsenacopte'ña eñen.

²³ Puesheñarrña pueyochresha' ñeñt' atarr muerena Jesús, ñaña'apa' e'ñe epuet Jesús anen all rrallme'chenet parro.

²⁴ Ñeñto'marña Simón Pedropa' agotan ñeñt' anets epuet Jesús, ñeñtpa' atet och:

—Ñehua, p̄a' p̄to' ch yemaestror erra'tsenacopte'ña eñorena ñeñtcha' pomuerre'.

²⁵ Ñañapa' e'ñe allame'ttsa atet otan Jesús:

—Partshacha' ¿erra'tsenacpa'tña pe'ñorena ñeñtcha' pepomuerre'?

²⁶ Jesúsñapa' atet och:

—Ñeñtcha' nap añ pan ñeñtcha' ne'choma' ñeñtcha'ca'yeña nepomuerre'.

Allempoña e'choman panpa' apan Judas Iscariote ñeñt Simón puechemer.

²⁷ Allempoña aphue panpa' allempocmuepa't chorria oneñet. Jesúsñapa' atet och:

—Errotente' pepa'chpa' e'ñeñaca'yeña tayecma atet pepe'.

²⁸ Pueyochresha'ñapa' ama't puesheñarra ñeñtet allo'tsa'yenet, ñetñapa' ama eseshaye' eñotaye esocopte' atet otenan Judas.

²⁹ Puesheña'ttsetpa' cha otapuetañ Jesúsapa' ñato' añte' oteñ o'ch rañtenana' ñeñt muenenet allcha' coshapretet, tarro'mar Judaspa' ñaca'ye anmape'cham̄pene'ña quel layepo'r. Amapa' ñato' añte' oteñ o'ch es apa'yesan huocchañneshachno.

³⁰ Allempoña Judaspa' agapuan panpa' allenta'cha'nerr. Allempopa' o' tsapuen.

Atetcha' yeḡa ñeñt e'ñe etserra, yemueranna'tepa'ch

³¹ Allempoña Jesús cha'nompa' atet oterraneterr:

—Te'ña po'ño'chpa' e'ñe chapmoch allempoch cohuentaterrnan Parets na Ñeñten Acheñetosets. Attochña napa'cho'ña necohuentaterrñañcha' Nomporets Parets.

³² Atto napa' necohuentaterrñañ Nomporets, ñapa'cho'ña cohuentaterrnancha' na, ñeñtpa' e'ñech mametolla o'ch e'ñe cohuentaterrnan.

³³ Jesúsñapa' alla oterraneterr:

—Na'cñeñarneshacha' o' e'ñe coñe'tama pallta allo'tsenmeñencha' na e'ñe arr parro. Napa' o'ch ahuerren. Allempoña sapa' se'nerrna'ch. Atet noteñ ahuaña judionesha', allcha' neserr napa' sañapa' amach errotentot sechapo, te'pa'cho' sapa' e'ñe atet notenes.

³⁴ Ñaña o'ch notas atetcha' seḡannena ñeñt e'ñe etserra: Semueranna'tepa'ch. Atet nepenes sa atarr nemuerensa, sapa'cho'ña atarropa'chña semuerannena.

³⁵ Allochñapa' e'ñe semorrentanna'teñotpa' eñotasetcha' sapa' sa e'ñe po'ño'ch neyochreshas.

Atto Jesúsapa' eñotatan Pedro ñapa' chocmach a'nasocha

(Mt. 26.31-35; Mr. 14.27-31; Lc. 22.31-34)

³⁶ Simónña Pedropa' atet och:

—Partshacha' p̄apa' ¿erra'tcha'ña peserr?

Jesúsñapa' atet och:

—Allcha' neserr napa' p̄apa' amach errotentot p̄octa'noña na te'. Esempona po'ño'chpa' ama't chenta seserrcha' saña.

³⁷ Pedroñapa' atet otererr:

—Partshacha' ¿eso'mare'tcha'ña ama tayecma nocterrpe? Napa' e'ñe pocte' nenteñ yerromuepa' e'ñe parro.

³⁸ Jesúsñapa' atet otererr:

—¿Po'ño'cha't e'ñe pocte' penteñ o'ch yerroma parro? Po'ño'chca'ye te' napa' o'ch notap̄: Amach eñena' atollop p̄añapa' o'ch ma'poch p̄a'nasotenna.

14

Jesúsapa' ña toñetets alloch yeḡherr Yomporesho

¹ Jesúsapa' alla oterraneterr:

—Seyochropa' amach cha sellcatsto. Atto seyemteña Yomporets napa'cho'ña choña seyemterra.

² Nompör pa'netsro all pue'ntaño allpa' shonte' pocoll allcha' seycha'huerra. Ñerra'm ama atteñepa' napa' amate' notasñe. Ñeñto'marña napa' o'ch ahuerren attoch nañño'tuerrnas allcha' seycha'huerra.

³ Ñerra'm o'ch ahuerren napa' nañño'tuerrnascha' allcha' seycha'huerra. Ellochña no-huerrerrpa' allempochña e'ñe nahuerrsa' nesho allochñapa' allo'tseneycha' e'ñe parro.

⁴ Sapa' e'ñe señoñeñ allcha' neserr ñaña e'ñe señoñeñ attoch secherr saña all.

⁵ Tomásñapa' atet och:

—Ayochreshate yapa' amaca'ye yeñotenpe errachña peserr. Errotenotuachca'ye yeñochfe' attoch yecherr yaña.

⁶ Jesúsñapa' atet och:

—Napa' na toñetets ñeññen alloch secherr Yomporesho, napa' na ñeññen sotene' ñeññ e'ñe po'ñoñ Yompör po'ñoñ, napa' na ñeññen alloch e'ñe socrena. Amach esesha' cheritso Yomporesho ñerra'm ama nanom ame'ñerreto.

⁷ Ñerra'm o' señoñerñoñ na, Nompore'nate'ña señoñerñoñ. Tayoteñña e'ñe po'ñoñcha' o'ch señoñer tarro'mar te'pa' o' senter.

⁸ Felipeñapa' atet och:

—Partseshacha' pegatey ñeññ Apa, yapa' o' ñeññaña yepallta o'ch yeñoñ.

⁹ Jesúsñapa' atet och:

—Felipe, ahuatoteñ napa' allo'tseney parro. Pañapa' ¿ama't peñotenno? Ñeññ puentaren napa' Apa'naca'yeña o' enterret. Eso'mare'tña potenen o'ch negatapñ Apa.

¹⁰ Papa' ama'tña pame'ñenno napa' e'ñe neparrocmaten epan Apa, Apapa'cho'ña e'ñe parrocmatenna. Ñeññ atet notenespa' ama noñaye' atet notenso. Apaña ñeññ neparrocmaten, ñapa' e'ñe etsotatenan ñeññ atet neña'yen.

¹¹ Same'ña'na ñeññ notenes, napa' e'ñe neparrocmaten epan Apa, Apapa'cho'ña e'ñe parrocmatenna. Ama't napa' ama ame'ña'poye' sentenno tarraña atto po'ñoñ norrtatyeññañ Nompör po'partsoña ama't ñeññapa' same'ñyañaca'ye.

¹² Po'ñoñca'ye o'ch notas, ñerra'm esesha' name'ñerraya ñetpa'cho'ña elloch atarr cohuen orrtatyerret ñeññ atet norrtatyen te'. Tarro'mar na te'pa' o'ch ahuerren Apuesho.

¹³ Ñerra'm escha' senamuen e'ñe na neso'chño e'ñe seyemteñoñen na, napa' e'ñech atet nepennas. Attochña na ñeññen Yompör Puechemerenpa' necohuentateññañcha' Apa.

¹⁴ Ñerra'm es senamuen e'ñe neso'chño e'ñe seyemteñoñen na, napa' e'ñech atet nepennas.

Atto Jesúsapa' otnerranet o'ch mueñuerranet Parets Puecamquëñ

¹⁵ Ñerra'm sa po'ñoñ semorrentenate'pa' o'ch same'ñerrnana neñoñ ñeññ atet notenes.

¹⁶ Napa' nenamonascha' Apa ñapa' apascha' po'psheñeñ ñeññcha' soctape'chatterre' ñeññcha'ña sechorrerraya errponañohuen.

¹⁷ Ñeñña Yompör Puecamquëñ ñeññcha'ña señoñterre' ñeññ e'ñe po'ñoñ Yompör poctapña. Ñeñña ama ame'ñetso arr patsropa' ñetpa' amach errotenoñ chorrerranetoña Yompör Puecamquëñ tarro'mar ñetpa' ama enteñeto ñaña amach eñoteñeto. Tarraña sapa' o' señoñer tarro'mar ñapa' allo'tsenes parro epas allcha' chorrerrsa.

¹⁸ Napa' amach cha nehuocchapotatnerrso. Ellochña alla nohuerrerr sesho.

¹⁹ O' mameshamerra palltenmeñ ñeñña ama ame'ñetso arr patsro ñetña' amach eseshaye' nenterraye, tarraña sapa' chocmach senterren. Tarro'mar napa' corretsana, ñeñto'marña sapa'cho'ña corretsasach.

²⁰ Allempoch chorrerrsa Yompör Puecamquëñ allempochña señoñer napa' e'ñe po'ñoñ neparrocmaten epan Apa, sañapa' separrocmaterrnach, nañapa' neparrocmatennasach.

21 Ñerra'm esesha' e'ññoterre' neñoñ ñaña e'ñech atet perret ñeñt atet notenanet ñetñapa' ñeñfet e'ñe po'ñoçh nemorrentenaya. Ñeñña nemorrentenaya napa' ñetñapa' Apach atarr morrentenahuet. Napa'çho'ña atarr nemorrentenanet, nañapa' neñotaterranetcha' e'ñe po'ñoçh ñeñt atet nepena na.

22 Allempoña po'psheñeñ Judas ñeñt ama añeyaye Iscariote, ñañaapa' atet och:

—Partseshacha' yapa' çeso'mare'tcha'ña te'pa' o'ch peñotatey ya ñeñt atet pepena amachña añeye'ña peñotato ñeñt ama ame'ñetso arr patsro?

23 Jesúsñaapa' atet oterraneterr:

—Ñerra'm esesha'ch nemorrentaya na e'ñechña atet perret ñeñt atet notenanet. Apañapa' atarrcha' morrentenanet. Ñeshetoñapa' yeçhapcha' attoch yeyçherra ñet pueyoçhreto.

24 Ñeñto'marña ñerra'm esesha' ama nemorrentayo amach atet perreto ñeñt notenanet. Añ ñoñets ñeñt atet se'muennan ñeñtpa' ama noyaye neñoñ, ñeñtpa' Apoña po'ñoñ ñeñt nellsensene'.

25 'Añmapa' tarro'mar atet notenes tayepa'tñaapa' allo'tsenmeñen na arr e'ñe sesho.

26 Tarraña Parets Puecamquëñ ñeñtcha' soçtape'çaterre', Apapa' mueñerrnascha' e'ñe na neso'chño e'ñe seyemteñoñen na. Ñapa' ñeñtcha' señoataterre'ña seyoçhro ora allohuen ñeñt çocma neyçhatenes te'. Ñaña ñeñtcha' seyerpaterraya allohuen ñeñt atet notyesase't.

27 'Nocshateña nena'nerrnascha' alloch e'ñe socsherra seyoçhro, napa' çochña atarr nocshaterres seyoçhro. Ñeñt atet nocshatenes na seyoçhro ñeñtpa' ama atteyaye ñerra'mrrate' añ patso'mar cosheñets. Ñeñto'marña seyoçhropa' amach çha sellca'peno ama't mamesha, amach çha es semcha'teno.

28 Te'pa' o' se'mhue atet o' notuas, na o'ch ahuerren, ellochña alla nohuerrerr sesho. Ñerra'm po'ñoçh semorrentennañ o'te' socshañ tarro'mar napa' o'ch ahuerren Apuesho. Tarro'mar ñapa' nanac ahuamencatesha', ello metanenen na.

29 Te'pa' ama't ama etsotena', napa' o' notuas, allochñaapa' ñerra'm esempoch etsoterra, sañapa' same'ñerach.

30 'Te' e'ñe parro'tseneypa' o'huañcha' allo'na neñosnen shonte' tarro'mar o' huapmocha oneñet ñeñt pa'mcha'tareter pen acheñenesha' arr patsro. Tarraña ama't o' huapañpa' e'ñe ñoñapa' amach erroñ posno.

31 Napa' añcha'ña atet nepa' ñeñt atet otenen Apa. Attochña acheñenesha' arr patsropa' eñoçhetcha' na po'ñoçhpa' e'ñe nemorrenteña Apa. Te'pa' satomcha't o'ch ahuey arroñ.

15

Jesúsapa' toma'ntata ñapa' ña uvachreçhmo'retets

1 Jesúsñaapa' alla yeçhaterraneterr ñapa' añ toma'ntata ña uvachreçhmo'retets. Ñeñto'marña atet otanet:

—Napa' na atten ñerra'mrrate' ñeñten uvachreçhmo'retets ñeñt e'ñe po'ñoçh cohuen sherbets. Nomporñaapa' ña amre'tene' ñeñt uvachreçhmo'r.

2 Sa ñeñtes neyemtenaya na sapa' attes ñerra'mrrate' uvachmo'r puetaquër. Allohuen puetaquër erra'tsen ñeñt ama me'tetso, Nomporñaapa' çochña peçhamñpsoñ puetaquër. Ñaña allohuen ñeñt me'tetspa' çochña peçtacre'tyeset mamesha'tets attoch e'ñe cohuen e'shtacre'chet allochñaapa' attoch atarrcha' nanac me'ten.

3 Ñeñt atet neserrpare'tatenes ñeñt neñoñpa' alloña o' sa'cohuentataretetua atet ñerra'mrrate' uvach o' e'ñe e'shtacre'tuet e'ñe cohuen.

⁴ Te'pa' atfoña separrocmatenna atfoña napa'cho'ña neparrocmatennasa. Atet pena tsachtaquër ñerra'm ama parrocmateno pue'choroť amach me'to e'ñe ñoña, sapa'cho'ña ñerra'm ama separrocmatenno amach erroťenoť seme'toña samña e'ñe soťa.

⁵ 'Napa' na atfen ñerra'mrrate' uvachrechmo'r pue'chor, sapa' sa puetacres. Esha' neparrocmaterre' ñaña napa' e'ñech neparrocmatenonet, ñeñťcha'ña nanac me'tats. Ñerra'm a'yo'tsensa neshoť amate' erroťenoť sorrtatyesoña ñeñť cohuen enten Yompor.

⁶ Esha'ch ama neparrocmaterraye ahupore'tareťcha' atet ñerra'mrrate' tsachtaquër ñeñť ama me'tetso čochña pecha'tamřsetña puetaquër o'ch e'ñe porrar- rque'chua allempochña a'yapačhetpa' o'ch chamuet tso allcha' poyua.

⁷ 'Ñerra'm separrocmaterrna ñerra'm čocma soctape'chennan neñoñ escha' senamuen napa' napascha'.

⁸ Atfo nanac cohuen seme'tenpa' ñeñťpa' allochña secohuentateññañ Nompotarro'mar sapa' añcha' sorrtatyen ñeñť cohuen enten ña. Ñaña sapa' atfochña eñoterresacheñenesha' po'ñočh ñeñťes neyochreshas.

⁹ Atfo Apapa' atarr nanac muerenna na, napa'cho'ña atarr nanac nemuerensa samña. Chocmuepa'ch seyemtennana ñeñť atfo napa' čocma nemorrentensa.

¹⁰ Ñerra'm same'ñennana neñoñ ñeñť atet notenes e'ñech señotenen napa' atarr nemorrentensa. Atet nepena na e'ñe name'ñeññaña Nompot po'ñoñ ñeñť atet otenen, ñeñťo'marña napa' e'ñe neñoteñ ñapa' atarr morrentenna namña.

¹¹ 'Añmapa' tarro'mar atet notenes allochñapa' ñeñť nočsheña napa' coshaterrescha' samña. Allochñapa' sapa' o'ch e'ñe socsherra e'ñe poctacma.

¹² Añña ñeñť notenes: Atarropa'ch semorrentannena allohuenes atet nepena namña atarr nemorrentensa samña.

¹³ Añmapa' ñeñťña e'ñe po'ñočh morrenteñets, o'ch ya'rroya yañeña o'ch yerroma añecop ñeñť atarr yemorrentyena.

¹⁴ Ñerra'm e'ñe atet seřohuen ñeñť atet notenes sañapa' ñeñťes e'ñe neyemtena.

¹⁵ Te'pa' o'huañ atteye' nentenes ñerra'mrrate' ñeñť ya'taruasañer yepen, tarro'mar ñeñť ya'taruasañer yepen ñapa' ama eñotenanoña ñeñť atet coťape'chen pamo'mte'. Tarraña na te'pa' e'ñe neyem nepenes tarro'mar ñeñť atet ne'mueññañ Apapa' sapa'cho'ña o' neñotaterres.

¹⁶ Sapa' ama saye' na'crreraye, napa' naña sa'crrere'ña sa. Atfoña o' napuerresña llesens atfoch seta me'tarsats atfoch e'ñe cohuen es sorrtatyen ñeñť cohuen enten Yompor. Ñeñťpa' ñeñťcha' se'mer seperr ñeñťña se'merpa' amach ahuañañaťterro ama't ahuaťa. Allochñapa' ama't erra'tsena senamueñ Apa e'ñe na neso'chño e'ñe seyemteñoťen na, ñapa' apascha'.

¹⁷ Añca'yena notenes: Chocmuepa'ch atarr cohuen semorrentannena.

Allempo Jesúsapa' eñotatan pueyochresha' čocmach e'moñe'tenanet acheñenesha' arr patsro

¹⁸ Jesúsña' alla oterraneterr:

—Ñerra'm acheñenesha' añ patsro e'moñe'tenset sapa' señočepa'ch na e'ñe nanom e'moñe'tenet.

¹⁹ Ñerra'm sa e'ñe parro attecmañeñ ñeñť ama ame'ñetso arr patsro, ñetñapa' e'ñeťe' cohuen muerensetañ tarro'mar e'ñeca'ye ñeñťena'tarecmas. Tarraña sapa' ama e'ñe attecma'ye' separro'marneshacmateno atet pena allohuen acheñenesha' ñeñť ama ame'ñetso arr patsro. Sañapa' o' na'crreres ellonet nocop. Ñeñťo'marña acheñenesha' añ patsropa' o' e'moñe'taset samña.

²⁰ Seyerpach añ ñoñťsor ñeñť o' notuas: "Allohuen ñeñť yochreshats erroťencha' perrñañet ñeñť yochresha'tenahuet, ñetpa'cho'ña e'ñech attecma ařaretterret ñamet."

Atto napa' cotare'tennet pue'moñe'teñoŕetan, sapa'cho'ña pue'moñe'teñoŕetaspa' cotare'tasetcha' saña. Atto napa' ama ame'ñerrnaneto neñoñ, sapa'cho'ña amach ame'ñerrnaseto saña señoñ.

21 Ñeñŕpa' atetcha' perrset ŕarro'mar sapa' naca'ye same'ñena ŕarro'mar ama eseshaye' eñotenaye Yompor ñeñŕ nellsensene'.

22 Ñerra'm ama nohuapañe amach neserrpare'tatosanetañe, amate' eñallñeña attoch neyohua'yesanet po'chñaroŕet. Ñeño'mar te'pa' ama eñalle attoch a'nasotet po'chñaret.

23 Ñeño'marña ñerra'm esesha' ne'moñe'tene' na, Nompore'naña e'moñe'tennanet.

24 Ñerra'm amach norrtatanetañe cohuenñats ñeñŕ ama't ahuata po'psheññechnopa' ama orrtatanete'te e'ñe attotapa' amate' eñallñeña attoch neyohua'yesanet po'chñaroŕet. Tarraña te'ña ñetpa' ama't e'ñe entennetañpa' chaña e'moñe'tennet ñaña Nompore'na e'moñe'tennanet.

25 Tarraña ñeñŕpa' ŕarro'mara atet penet allochñapa' attoch etsoterra ñoñets ñeñŕ e'ñe atet anuaret ahuatoŕeñ, ñeñŕpa' atet oten nocop: "E'ñech attota e'moñe'terrnet."

26 Ñeñŕcha' soctape'chaterre' e'ñe cohuen seyoçhro ñeñŕcha' nemñohuerrnas Apueshoŕ. Ñeñŕpa' ñeñŕña Apa Puecamquẽñ ñeñŕcha'ña señoŕaterre'ña ñeñŕ e'ñe po'ñoçh Yompor poçtaŕña ŕarro'mar ñeñŕpa' Apueshoŕ huena. Ñerra'm esempoch çhaponasa ñachña na'poŕose'.

27 Sapa'cho'ña sa'poŕancha' ŕarro'mar e'ñe allempoŕeñ netorrosa, sapa' e'ñe allempoŕeñ parro'tseney.

16

1 Ñeñŕpa' ŕarro'marña o' atet notuas allochñapa' amach alla ello sepurrerro.

2 ŕarro'mar esempopa' çhapcha' allempoch huapore'tas judionesha' po'prahuoŕ. Po'ñoçh çhapcha' allempo esesha'pa' ñato' o'ch muetsaset çhach otenapuetañ ñetpa' allote' sherbeñetña Yompor.

3 Ñeñŕpa' ŕarro'marcha' atet paset ñetpa' ama eseshaye' eñotenaye Apa ama't napa' ama eñotenneto.

4 Añechnopa' o' notuas allochñapa' ñerra'm esempoch çhap, sapa' seyerpuerrnach ñeñŕ atet notase't.

Atto Paretŕ Puecamquẽñ ñach yoctape'chatyese' e'ñe cohuen

'Ahuañmo'cha añechnopa' ama notase'te ŕarro'mar allempoŕeñpa' e'ñe parroçma allo'tseney.

5 Na te'pa' o'ch ahuerren allo'tsen ñeñŕ nellsense'. Saña ama't puesheñarroŕesapa' amaña sa'pŕo'tenno, errachña neserr.

6 Te'ña ñeñŕ atet notenes saña seyoçhropa' chaña atarr sellquẽna.

7 Te'pa' añ notenes ñeñŕ e'ñe po'ñoçh. Socoppa' añ nanac poçtetsa napa' o'ch ahuerren. ŕarro'mar ñerra'm amach neserro amate' erroŕenoŕ huaponasoña Yompor Puecamquẽñ ñeñŕcha' soctape'chaterre' cohuen. Tarraña ñerra'm neserrcha' napa' añcha' nemñahuerrnas Yompor Puecamquẽñ ñeñŕcha' soctape'chaterre' cohuen seyoçhro.

8 Ñerra'm esempoch huapa Yompor Puecamquẽñ acheñenesha'ña arr patsropa' ñachña çhapatahuetña pueyoçhreto attoch eñoçet ñet po'ñoçhepa't eñallet po'chñaret. Ñaña añcha'ña çhapatanet pueyoçhreto ñeñŕ e'ñe poçte' entyen Yompor. Ñaña añcha'ña çhapatanet pueyoçhreto attoch ñetpa' eñoteretcha' po'ñoçhpa' coñcheñŕsach amñareŕterret ñeñŕ ama name'ñenayo na ñeñŕen Yompor Puechemeren.

9 Yompor Puecamquẽñpa' eñotaterrancha' acheñenesha' po'ñoçh ñetpa' ama poçteye' entenaneto Yompor ŕarro'mar ama ame'ñenneto na ñeñŕen Yompor Puechemeren.

10 Ñaña ñach eñotaterrahuet ñeñt e'ñe pocte' entyen Yompor tarro'mar napa' amach allo'tsenarano sesho. Napa' o'ch ahuerren Apuesho amach alla senterrne'te.

11 Paretsña Puecamquëña' ñachña eñotaterrahuet po'ñoçhpa' coñcheñtsach amñare'tterret ñeñt ama ame'ñetso tarro'mar oneñe't ñeñt pa'mcha'tareter pen shonte' acheñenesha' arr patsro, ñocoppa' e'ñe po'ñoçh anuaret amñare'tterrach coñcheñtso.

12 'Shontemeñ ñeñtcha' notaseñ tarraña te' sapa' amate' errotenot çhaponaso seyoçhro.

13 Tarraña ñerra'm esempoch huaponasa Parets Puecamquëñ, ñeñtcha'ña señotaterre' ñeñt e'ñe po'ñoçh Yompor po'ñoñ tarro'mar ñapa' ñachca'ye señotatene' ñeñt e'ñe po'ñoçh Yompor po'ñoñ ñeñt ama shequëñtsoyaye. Ñapa' amaca'ye e'ñe ñoña eñeno. Añca'yeña eñen ñeñt atet e'muen Partsesho. Ñapa' añcha' serrpare'tatas ñeñtcha' atet perra tsapatonet.

14 Ñapa' nachca'ye cohuentaterre'; e'ñe eñotennan ñeñt atet nepena na, ñapa' ñeñtcha'ña eñotatyeres.

15 Ora allohuen ñeñt atet pena Apapa' napa'çho'ña e'ñe atet nepena namña. Ñeñto'marña napa' notenes eñotennan ñeñt atet nepena na, ñapa' ñeñtcha' señotatyerre'ña samña.

Ñeñña sellquëña' puenaserrach socsheña

16 Jesúsña atet oterraneterr:

—Te'pa' mameshaña o'huañcha' allo'na sentnemen tarro'mar napa' o'ch ahuerren Apuesho. Tarraña sapa' e'ñe mameshapa' o'ch alla yentannerra.

17 Pueyochresha'ñapa' atet otanna'tyeset:

—¿Erroten'te'ña añ ñeñto'mar atet otene'y, mameshamapa' o'huaño'ch allo'na yentneñ tarraña mameshapa' ahuo'ch alla yentannerra? ¿Erroten'te'ña añ ñeñto'mar ñapa' atet otene'y, ñapa' ahuo'ch ahuer Pomposho?

18 Alla otanna'tyenet:

—¿Eso'marte'ña atet otene'y, mameshamapa' o'huañcha' allo'na yentneñ? Amaca'yeña yeñoteñe este'ña otene'y.

19 Jesúsña eñotanet ñetpa' çho mueneñetañ o'ch a'p'to'chet. Ñaña' otanet:

—¿Ñeñte'tña sotannena ñeñt atet notenes, o' mameshaña o'huañcha' allo'na sentnemen, tarraña mameshapa' o'ch alla yentannerra?

20 Po'ñoçhca'ye o'ch notas: Sapa' sellquëño'tpa' seyahuerrach. Acheñenesha'ña arr patsro ñeñt ama ame'ñetso ñetña' çhach atarr coshet. Sapa' sellquërrach tarraña sellquëña sapa' puenaserrnasach socsheña.

21 Ñeñtpa' o'ch netma'ntatasa ñerra'mrate' coyanesha' allempo cheññaña allempoch emare'ten, çhach lleca tarro'mar o' çhaponña allempoch atsotenana puechoyoretoll. Tarraña allempochña eñalletatuepa' o'ch alla atarr cosherra o'ch pueserranña atto atarr llecach pue'maretoll, elloñapa' atarrcha' cosherra tarro'mar o' eñalletatuan pue'maretoll arr patsro.

22 Jesúsña alla oterranerr pueyochresha':

—Te'ña sapa' nanac llequëñtso'tsenes, tarraña elloñapa' o'ch alla yentannerra. Allempoña sapa' o'ch alla atarr socsherra seyoçhro. Ñeñña socsheña' ama't e'ñe puesheñarra amach errotenot puerratamperrseto.

23 'Allempopa' amach sepallteno o'ch alla es sa'p'to'terrnerr. E'ñe po'ñoçh te'pa' o'ch notas: Ñerra'm es senamueñ Apa e'ñe na neso'chño e'ñe seyemteño'ten na ñaña' apascha' ñeñt senamueñ.

24 Sa teme'ttsenpa' ama es senamueno e'ñe seyemteño'ten na e'ñe neso'chño. Te'ña ñerra'm senampa' saga'pcha' allochña'pa' o'ch socsha e'ñe poctacma.

Atto Jesucristo a'mchechatuerran allohuen ñeñ e'moñe'tene' Yompor arr patsro

²⁵ 'Ñeñ allpon neserrpare'tatiesase't ñeñtpa' e'ñe toma'nteñtsočno notyesase't. Tarraña chapcha' esempo allempopa' amach alla neserrpare'taterrserro toma'nteñtso. Allempopa' añcha' neserrpare'tatas Apacop ñeñtpa' amach toma'nteñtsoyaye, allochñapa' e'ñech seño'tue.

²⁶ Allempopa' senamueñcha' Apa e'ñe seyemteño'ten na e'ñe neso'chño. Allempopa' amach pallteno o'ch nema'yochañpensa Apuesho.

²⁷ Apañapa' atarrcha' morrentensa atto sapa' semorrentenna, e'ñe seyemtenna atto napa' Apuesho' nohuapa.

²⁸ Po'ño'ch napa' Apuesho' nohuapa, o' nechap añe patsro. Elloñapa' o'ch alla nesa'nerr añ pats, o'ch alla ahuerren Apuesho.

²⁹ Pueyochresha'ñapa' atet ochet:

—Te'ñapa' ama toma'nteñtsoye' peñeno ñeñto'mañña yapa' e'ñech yeño'tue.

³⁰ Te'pa' yeñotene' p'apa' ñeñte'p' eñotue' ora allohuen esocmañen. Ñeñto'mañña yapa' amaca'ye pallteno o'ch alla ya' p'to'terrperr po'poñone't. Tarro'mar te'pa' yeñotene'p' p'apa' Partsesho' pehuapa.

³¹ Jesúsñapa' atet otarraneterr:

—Sapa'taya'tña o' same'ña'na.

³² Te'pa' o' e'ñe chapmoch sa ama't puesheña'ttsospa' o' chaponasañ chach sematrra'tyesa allemeñ. Chach sahuanyesa allcha' semna'yes sa. Nañapa' sa'ypo'ña'huanmuencha'. Tarraña napa' ama e'ñe nap'teyaye, epanña Apa.

³³ Ora allohuen añechnopa' o' e'ñe notuas allochñapa' e'ñe seyemteño'ten napa' chocmach socshena seyo'chro. Po'ño'ch añ patsropa' chocmach semuero'ch'tena. Tarraña e'ñe seyo'chro sapa' chocmuepa'chña socshena tarro'mar napa' o' na'mchechatue allohuen ñeñ e'moñe'tene' Yompor añe patsro't.

17

Allempo Jesús'pa' ma'yochañpenana pueyochresha'chno

¹ Allempoña atet otuanet añe'chno Jesús'pa' allenta cohua' enonetpa', ñeñtpa' atet otan Pompor puema'yocheno't:

—Apacha' te'pa' o' chapona allempoch etsota ñeñ nocop. Te'pa' pecohuentatonepa'ch na tarro'mar Pechemer pepenen allochña napa'cho'ña necohuentatona'p'cha' p'ama.

² Atto p'apuen llesenspa' alloña pomnaren nepeñña allohuen acheñenesha'. Allochñapa' allohuen acheñ ñeñ p'o'patatenna, naña ñetpa' napuenanetcha' alloch ñetpa' corretsetach pocsheñeshocmañen tayoteñ e'ñe errponañohuen.

³ Añmapa' ñeñña alloch ñetpa' corretsetach tayoteñ e'ñe errponañohuen ñerra'm esempo eñoterrpet p'a ñeñte'p' p'apuet e'ñe po'ño'ch Yomporretets ñaña ñerra'm eñoterrnet na ñeñten Jesucristo p'a pellsensaren.

⁴ Napa' o' e'ñe necohuentatuona'p' arr patsro. O' e'ñe netsotuona'p' ñaña petaruas ñeñ atet p'oten.

⁵ Te'ña Apacha', pecohuentaterrnanepa'ch e'ñe alla pesho e'ñe atet allempo atarr a'cohuentatarteen pesho ahua't allempo ama eñalletena' añ pats.

⁶ Allohuen acheñ ñeñ neyochresha' pe'patenen nañapa' añ neñotatenanet ñeñ atet pepena p'a tarro'mar ñetpa' ñeñtet e'ñe allpona p'o'patatna arr patsro. Ñetñapa' pepa'tña o'patenahuet ñeñcha' neyochresha' pe'paten naña. Te'ña ñetpa' e'ñe ame'ñernapet peñoñ.

⁷ Naña ñetpa' e'ñe eñotueñet allohuen ñeñ atet ne'ñorenanet ñaña ñeñ es norrtatye-nanetpa' ñeñtpa' e'ñe ora peshotecma huena.

8 Napa' añña ne'ñorenanet ñeñt atet p̄otenen p̄a. Te'ña ñetpa' e'ñe cohuen ame'ñnennet. Ñaña e'ñe po'ñoçh eñoteñet napa' e'ñe peshoñ nohuapa, p̄a ñeñtep̄ nellsenserre'.

9 'Te'ña napa' o'ch nema'yocham̄pesnomanet ñet. Ama allohuenacpaye' acheñenesha' arr patsro nema'yochenp̄o, e'ñe añecpa nema'yochenp̄a ñeñt neyochresha' pepatenen tarro'mar ñetpa' ñeñtareta peyochresha' pepen p̄aña.

10 Tarro'mar allohuen ñeñt e'ñe nocmapa' p̄apa'cho'ña e'ñe p̄ocma. Ñeñtña e'ñe p̄ocmapa' napa'cho'ña e'ñe nocma. Ñetña te'pa' e'ñe cohuentatapretennet.

11 'Te'ña nocoppa' o' çherrmoch e'ñech ñeñteshaña añe patsro'tsenen tarro'mar napa' o'ch alla ahuerren pesho. Tarraña ñetpa' allo'tsenaretach arr patsro. Pa Apa Partso, pecuam̄psepa'ch allohuen ñeñt neyochresha' pepatenen. Pehuamencotcha'ña pecuam̄psanet. Allochña ñetpa' o'ch e'ñe parrocmatet e'ñe atet yepena yaña.

12 Allempoteñ e'ñe parro'tseney p̄oña pehuamencot necuam̄psanete't. Napa' çhocma nemoñenanet. Ñeñto'marña ama't puesheñarro'teta ñetpa' ama na'chencataneto, ñapña chenca añ ñeñt o'patena chenquëñets. Ñeñtpa' attochña Apa etsoterra peñoñ ñeñt anuaret ahuatoteñ.

13 'Tarraña te' napa' o'ch ahuerren pesho. Napa' añecopña neñen añeçhno añ patsro attoch ñetpa' atarrcha' cosherret pueyoçhreto e'ñe atet nocshena na.

14 Napa' añ ne'ñorana'tenanet ñeñt e'ñe p̄o peñoñ. Acheñenesha'ña ñeñt ama ame'ñetso añ patsro, ñetña' çha e'moñe'tenanet tarro'mar ñetpa' ama allo'na parro'marneshateneto ñeñt ama ame'ñetso, atet nepena naña ama neparro'marneshateneto.

15 Ama aye' nenamuenpe attoch p̄ahuananeta' añ patsro, añña nenamuenep̄ o'ch pecuam̄psanet. Amach pemnatatsche oneñe' o'ch alla a'puerrataterranet.

16 Ñetpa' ama allo'na parro'marneshateneto ñeñt ama ame'ñetso arr patsro atet nepena naña ama neparro'marneshateneto.

17 Pame'ñeñotet p̄a peñoñ p̄a'cohuentam̄psanetepa'ch e'ñe p̄ocop. Pa peñoñpa' ñeñtña e'ñe po'ñoçh ama shequëñtsoyaye.

18 Atto p̄a pemñan na arr patsro, te'ña napa' o'ch nemñanet ñamet attoch serpare'tatyaset acheñenesha' arr patsro.

19 Ñeñto'marña ñocpuet nañapa' o' na'rroyerra p̄ocop, attochña ñetpa'cho'ña a'cohuentataretterretcha' Partsocop. Ñeñtpa' e'ñe po'ñoçh atet p̄oteny p̄a peñoño' ama shequëñtsoyaye.

20 'Tarraña amach e'ñe añecpa nema'yoch ñeñt e'ñe neyochresha' nepen te', añecpa'nachña nema'yocham̄pesnoma allohuen ñeñtcha' name'ñerraya tsapatonet e'ñe neyochresha' po'ñoño'.

21 Allochña allohuenetpa' parrocmatetcha' atet pepena p̄a Apa e'ñe peparrocmatenana ñaña napa' e'ñe neparrocmatenna. Allochña ñetpa' o'ch e'ñe parrocmaterryet e'ñe parro epay. Attochña acheñenesha'ña arr patsropa' ñetña' eñoteretcha' p̄a ñeñtep̄ nellsenserre'.

22 Atet pepena p̄a pecohuentapretenna napa'cho'ña e'ñe necohuentapretenanet ñet, attochña ñetpa' e'ñech parrocmatet atet yepena yaña e'ñe yeparrocmaten.

23 Napa' neparrocmatenanet, p̄aña' peparrocmatenna. Allochña allohuenetpa' e'ñech parrocmatuenet e'ñe poctacma. Attoch acheñenesha' arr patsro ñetpa' eñoteretcha' p̄apa' p̄a nellsenserre'. Ñaña eñoteretepa'ch p̄apa' atarr pemorrentenanet e'ñe atet atarr pemorrentenna na.

24 'Apacha' allohuen ñeñt peyochresha'tatenna na, napa' añ nemnen erro'tsenencha' ñetpa'cho'ña allo'tsenacmayepa'chña e'ñe parro. Allochña' attoch enterrnanet necohuenña allo o' alla pecohuentaterran na, tarro'mar p̄apa' pemorrentenna allempoteñ ama ayeçhcatarettena' añ patser.

²⁵ Apa, þa ñeñteþ e'ñe pocte' es pets, acheñenesha' ñeñt ama ame'ñetso arr patsro ñetpa' ama eñotenpeto. Nañapa' e'ñe po'ñoçh neñoteneþ. Añña ñeñt e'ñe neyemtenaya ñetña' eñotenpet þapa' þa nellsensene'.

²⁶ Napa' naña e'ñe eñotatenahuet ñet ñeñt atet pepena þa. Ellopa' allach neñotateraneterr. Allochña' ñetpa'çho'ña e'ñech morrentanna'terret e'ñe atet pepena þa atarr pemorrentenna na. Attochña napa' e'ñech neparrocmatenanet ñet. Ñeñtpa' allohuach nema'yochaþa Nompore.

18

Allempo rromoset Jesús

(Mt. 26.47-56; Mr. 14.43-50; Lc. 22.47-53)

¹ Jesúsña allempo ma'yochuanmapa' allenta ahuanman pueyochresha' o'ch ahuanmuet yomta'n amañesre'to. Ñeñt amañesre'te'pa' añ pa'so'cheñ Cedrón. Allña yomta'npa' allo'tsen narmetsma', all çhapña Jesús epuet pueyochresha'.

² Ñehua, Judas ñeñtcha' pomuerre' Jesús ñapa' e'ñe puentarña all, tarro'mar ahuañmo'çoteñ Jesúsþa' allecma apçhatenan pueyochresha'.

³ Judasña' allenta anman solltarnesha' ñaña guardianesha' ñeñt mueñen fariseonesha' ñaña ñeñt pa'mcha'tareternesha' pen allohuen judionesha' po'cornaneshar. Ñetña' çhaçha'tet all elampañeñareret. Orra'yesnenet ñaña po'urare. Orra'yesnenet ñaña alloch quellaret.

⁴ Jesúsña' e'ñe eñoteñ ora ñeñtcha' çhapoya allempo. Ñaña poctanetpa' atet otapanet: —Sapa' ¿eseshatña se'nen?

⁵ Ñetña' atet otoset:

—Añca'ye ye'nen Jesús ñeñt nazareto'marnesha'.

Ñañapa' alla oterraneterr:

—Napa' añenca'ye.

Judas ñeñt pomue'pa' ñapa'çho'ña allo'tsen.

⁶ Allempo otenanet Jesús: “Napa' añenca'ye”, ñetña' o' cheterret pa'che'ñoneþpa' allepa'tcha' a'trra'tet.

⁷ Elloña' alla oterraneterr:

—¿Eseshatña se'nen?

Ñetña' alla otereterr:

—Yapa' añ ye'nen Jesús ñeñt nazareto'marnesha'.

⁸ Jesúsña' alla oterraneterr:

—Napa' o'ca'ye notuapas napa' añen. Ñerra'm nate' se'nenpa' neyochresha'ña' semnatanet ñetpa' o'ch ahuanerret.

⁹ Ñeñtpa' tarro'mar atet ot allochña' attoch etsota Jesús po'ñoñ atet o' otu-anom: “Ñeñt allpon neyochresha' peþatenen napa' ama't puesheñarrapa' amach na'chencache.”

¹⁰ Allempoña Simón Pedro ñeñt occhelletpa' ñaña' po'cchella cheta'pa' o'ch çhonto'tapanen cornesha' pueñañra puetepa'tcha' tsorroñ. Ñeñtpa' añ pa'so'cheñ Malco, ñeñtpa' año pueñañra ñeñt pa'mcha'tareter pen allohuen judionesha' po'cornaneshar.

¹¹ Tarraña Jesúsþa' atet otan Pedro:

—Peshaterr þocchell allecma peneñ. Pocte'ca'ye o'ch çhapona ñeñt amuerochtatañ* tarro'mar ñeñtpa' atet muenatenen Nompore.

* 18:11 Ñeñt amuerochtatañ ñeñtpa' po'ñoçh ñeñtpa' añ atma'ntatareñ ñerra'mrrate' ñeñt atarr pesherr yorren orranitso.

Allempo anmet Jesús allo'tsen ñeñ pa'mcha'tareter pen allohuen judionesha' po'cornaneshar

(Mt. 26.57-58; Mr. 14.53-54; Lc. 22.54)

¹² Allempoña solltarnesha' epuet po'captáner ñaña judionesha' po'guardianeshar ñetñapa' rromoset Jesús pa' o' huanquët.

¹³ Ñanompa' arr anmet allo'tsen Anás, tarro'mar ñapa' ñeñ Caifás pa'go'. Ñeñña Caifás pa' ña pa'mcha'tareter pen allohuen judionesha' po'cornaneshar allempo ñeñte chararo.

¹⁴ Caifás pa' ñapa' ñeñña cotape'chataye't judionesha' allempoteñ o'pateñet Jesús, ñeñpa' atet otanete't: Añ poctetsa puesheñarr ñeñ acheñerpa' o'ch rroma allohuen acheñeneshacop.

Atto Pedropa' a'nasotana Jesús

(Mt. 26.69-70; Mr. 14.66-68; Lc. 22.55-57)

¹⁵ Simón Pedro ñaña po'psheñeñ pueyochresha' ñetñapa' co'a'nmet ñamet Jesús chenta'. Ñeñña puesheñarrpa' e'ñe cheme'teñ cornesha' ñeñ nanac añcha'tarettetsa allempo. Ñapa'cho'ña o' be'tososet epuet Jesús all aconcha'tam̄psarettena cornesha' po'pamp.

¹⁶ Pedroña' alla tomos a'yot allot be'tenet. Po'psheñeñña pueyochresha' ñeñ e'ñe cheme'ten cornesha' ñeñ nanac añcha'tare't, ñaña' cha'nerr a'yot, allña' eñosuerr epuet coyanesha' ñeñ cohuene' yetarr. Allempoña' errana' ñaña Pedro.

¹⁷ Coyanesha'ña ñeñ cohuene' yetarrpa' atet otapan Pedro:

—¿Ama't papa'cho'ña pueyochresha'te'ca' penepña añ encaneshar?

Ñaña' atet otos:

—Napa' amaca'ye pueyochreshayayno.

¹⁸ Ñeñña taruaset all epuet guardianesha' ñetñapa' all tsoma'tenet quellmesha, a'huortatenet tarro'mar allpa' nanac senteten. Allña tomchenet all shotenet. Pedropa'cho'ña allo'tsen all shotena ñaña.

Allempo Jesús pa' a'p̄to'tare'teñ cornesha' ñeñ nanac añcha'tarettetsa

(Mt. 26.59-66; Mr. 14.55-64; Lc. 22.66-71)

¹⁹ Cornesha'ña ñeñ nanac añcha'tarettetsa, ñapa' allenta a'p̄to'tapan Jesús pueyochreshacop ñaña añecop ñeñ atet ye'chatyen.

²⁰ Jesúsña' atet otos:

—Napa' ama a'nahuayaya neserrpare'tateñe acheñenesha' arr patsro. Chocma ney'chatyen judionesha' po'prahuo'mar ñaña Parets pa'paclo allecma shontena judionesha'. Ama't parrochapa' ama esempo neñosoña a'nahua.

²¹ Eso'mare'tña ñañeña pa'p̄to'ten. Añcha'ña pa'p̄to'tyes ñeñ ne'maye't errotente' neserrpare'tatyesanete't. Ñetpa' eñoteñette'ña ñeñ atet notyesanete't.

²² Allempoña atet otuanet Jesús pa' puesheñarrña guardia ñeñ allame'ttso'tsenapa' ñaña' allenta tacle', atet och:

—Amarramch' atteye' yanapueñeña cornesha' ñeñ nanac añcha'tare't.

²³ Jesúsña' atet och:

—Ñerra'm añte' neñen ñeñ ama cohuenayayepa' p̄oten all ama cohuenaye' neñeno. Ñerra'm cohente' neñenpa' eso'marte'ña petacllenen.

²⁴ Allempoña Anás pa' allenta mueñe e'ñe ehuncaret pa'ñachoresho Caifásesho. Ñeñña Caifás pa' ñeñ e'ñe pa'mcha'tareter pen allohuen judionesha' po'cornaneshar.

Allempo Pedropa' alla a'nasoterranerr Jesús

(Mt. 26.71-75; Mr. 14.69-72; Lc. 22.58-62)

²⁵ Simón Pedroña' alla ten all shotena. Ñetñapa' atet ochet:

—Papa'cho'ña ¿ama't pueyochresha' penpe?

Ñaña'pa' cha a'nasochapa' atet ot:

—Napa' amaca'ye.

²⁶ Cornesha'ña ñeñt nanac añcha'taret puesheñarrña ñeñt pa'taruasañer ñeñt pamo'ts tsorrqueta't Simón Pedro, ñaña'pa' atet och:

—Napa' ¿ama't pa nentoña narmetsmo? Papa' allo'tseneñca'ye.

²⁷ Pedroñapa' alla a'nasotererr. E'ñe allempocmaña eñen atollop.

Allempo chapata'mueñet Jesús allo'tsen añcha'taret Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Allempoña Jesús'pa' anereterr Caifáseshoñ. E'ñe ahuatema anma'mueñet añcha'taret po'palaciopahuo. Ñeñtña añcha'taretpa' ñeñt nen gobierno' Romoñ ñeñt añcha'tarettetsa allo'marneshacop. Allohuen judionesha' ñetña'pa' ama be'tososeto añcha'taret pa'paclo tarro'mar ñeñt añcha'taretpa' romo'marnesha' ama judioneshayaye allochña ñetpa' año'ch cha a'sosyateto ñañeñeta Partsocop esheccha' e'ñe cohuen rrallme'chet pascuapo.

²⁹ Ñeñto'marña Pilatopa' cha'nmanet a'yot allo'tsa'yenet, atet otapanet:

—¿Errotenote'tña sotteñe'cheñña añ acheñer?

³⁰ Ñetña'pa' atet otyesoset:

—Ñerra'm ama añ pa'yeno ñeñt ama pocteyayepa' amate' errotenot o' yehua-pacheñeña pesho.

³¹ Pilatoñapa' atet oterraneterr:

—Chosa sañeña anmue' sachña ente' errotenote' ñeñt atet pena ñeñt atet anaret ñoñets socop attotcha' sotteñe'ch.

Judionesha'ñapa' atet otyeset:

—Yocop ñeñtey judioneshaypa' ama pocteyaye o'ch yemtsach acheñ ama't puesheñarra.

³² Ñeñto'marña ñetpa' atet otyeset allochña'pa' attoch etsota Jesús po'ñoñ atet otuanet ahuaña allempo ñanom eñotatanet ñapa' corsochoch rroma.

³³ Allempoña Pilatopa' alla be'terrerr pocollo. Ñaña'pa' agotatan Jesús'pa' atet och:

—Papa' ¿pa't añcha'tarettetsaña judioneshacop?

³⁴ Jesúsñapa' atet och:

—Añpa' ¿e'ñe't pōta pōtenña atet, ñato' esesha'te' pōtene'ña añ nocop?

³⁵ Pilatoñapa' atet otererr:

—Napa' amaca'ye judioneshayayno, ama es neñotenoña socop. Paña pamo'tsna'tar ñaña ñeñt pa'mcha'tareternesha' pen judionesha' po'cornaneshar ñetña te'pa' o' po-muerrpet nesho. ¿Eso'tña pepen ñeñt ama't mameshapa' ama pocteye' entapretenpeto?

³⁶ Jesúsñapa' atet otererr:

—Atto na'mcha'tarettena napa' ama añe patsroyaye. Ñerra'm añe patsrach na'mcha'tarettenañpa' allempoña neyochreshachnopa' moñsa'netañcha', allempopa' amach pomnoñeña judionesha'. Tarraña atto na'mcha'tarettena napa' ama arro'marecpayaye.

³⁷ Pilatoñapa' atet otererr:

—Ñeñtepñapa' pepa'tca'yeña añcha'taret.

Jesúsñapa' atet otererr:

—Na po'ño'chpa' añcha'taretenca'ye e'ñe atet pōtenen pa. Napa' ñeñto'marña ne'ñalletosa añe patsro attoch nach a'pōtose' ñeñt e'ñe po'ño'ch Yompor pocta'ña. Allohuen ñeñt muenene' ñeñt e'ñe po'ño'ch Yompor pocta'ña, ñetña'pa' e'mñotennet.

³⁸ Pilatoñapa' alla otererr:

—¿Erra'tsena'tña ñoñets ñeñt e'ñe po'ñoçh?

*Atto añcha'tareť Pilatopa' otanet ama'tpa' çhosa muetse'ña Jesús
(Mt. 27.15-31; Mr. 15.6-20; Lc. 23.13-25)*

Ñeñta otuapa' o' alla çha'nerrerr allo'tsa'yen judionesha'. Allñapa' atet otuerranerr judionesha':

—Napa' amaca'ye nenteññañeña ñeñt atto ama pocteye' es peno attoch yemtsatach.

³⁹ Tarraña atet seyçhenpa' e'ñe pate'tets char allempoch çherrerr pascuapo nañapa' çhocmach na'rroyernas puesheñarr socop ñeñt ayottamñpsarettetsa allempo, ñeñtara ñeñt samo'ts sepen. Te'pa' ¿añe't semnen o'ch na'rroyernas ñeñt Sa'mcha'tareťer sepen sa ñeñtes judioneshas?

⁴⁰ Allempoña ñetpa' puerrannarteñoťetpa' atet otyeset:

—Tarraña Jesúsapa' amach pa'rroyatsche, añcha'ña pa'rroyernay Barrabás.

Ñeñña Barrabásapa' ñeñt atarr aprratamñpsañtetsa.

19

¹ Allempoña Pilatopa' atet otan po'solltar-renesha':

—Te'pa' o'ch sanem Jesús allcha' sashte'.

² Solltarnesha'ña pa'llocchame'teñoťet Jesúsapa' pellta'toñet choyo'mets agreçh ñeñña choyo'mtachet ñeñt atet choyo'mtana ñeñt po'ñoçh añcha'tareťtetsa. Chorrachet ñaña shetamuets ñeñt quelluemamueno tsamamtena ñeñt pa'shtam pen ñeñt po'ñoçh añcha'tareťtetsa.

³ Pa'llocchame'teñoťetpa' e'ñe atet pachat ñerra'mrrate' ñeñt po'ñoçh añcha'tareťtetsa. Allña ponemyetpa' pachmare'teñoťetpa' atet oteñet:

—Puetare' añcha'tareťecha', atarruaca' cohuenepťe' pa' ñeñteř judionesha' pa'mcha'tareťereř.

Allñapa' taclapecheñet.

⁴ Pilatoñapa' alla çha'nerrerr allo'tsa'yen judionesha'. Allñapa' atet oterraneterr:

—Secue', te'pa' o'ca'ye alla nehuapaterrnaserr Jesús allochñapa' o'ch señoçh napa' amaca'ye nenteññañeña ñeñt atto ama pocteye' es peno attoch yemtsatach.

⁵ Allempoña çha'nom ñaña Jesús achoyo'mtataret agreçh ñeñt apellta'taret, achor-ratareťa ñaña shetamuets ñeñt quelluemamueno tsamamtena. Pilatoñapa' atet oterraneterr:

—Secue' añca'yeña ñeñt yacmar.

⁶ Ñeñña pa'mcha'tareťernesha' pen allohuen judionesha' po'cornaneshar ñaña guardianesha' allempoña ñetña eñchetpa' puerranarotetpa' atet otyeset:

—Ñapa' ¡pecorso'tamñpsachñaca'ye!

Alla oterete't:

¡Pecorso'tamñpsachñaca'ye!

Pilatoñapa' oterraneterr:

—Añca'ye seña', sañeña corso'tamñpse' tarro'mar napa' amaca'ye nenteññañeña ñeñt atto ama pocteye' es peno attoch yemtsatach.

⁷ Judionesha'ñapa' atet otereterr:

—Yapa' yechenca'ye paterr ñoñets ñeñt atet anaret. Ñeñña ñoñetspa' atet oteneý añ poctetsa ñapa' çhocmach rroma tarro'mar ñapa' pachmare'teñoť oten ñapa' ño' Parets Puechemer.

⁸ Allempoña Pilato e'man atet ñoñetspa' çha yoruen.

⁹ Alla be'terrerr pocollo atet otuerranerr Jesús:

—Papa' ¿erro'marneshape'tña pa'?

Jesúsñapa' ama anape.

¹⁰ Pilatoñapa' alla otererr:

—Amahuachñaca'yeña ðanapnote'. ¿Ama't peñoteñeña napa' allsensareten attoch na'rroyerpe, allsensareten ñaña attoch necorso'tamperpe?

¹¹ Jesúsñapa' atet otererr:

—Amach errotenot peþa'noñeña ñerra'm ama Yompor þapayñe llesens atet. Ñeñto'marña ñeñt nepomue' peshopa' ñetpa' ello metanennapet þo'chñar.

¹² Elloña Pilato atarr mueneñeñ o'ch a'rroyerran Jesús tarraña judionesha'ñapa' puer-ranarotetpa' atet otyerreterr:

—Ñerra'm añ þa'rroyerrpa' þapa' ama pemno o'ch þa'mcha'tareter pepe' ñeñt atarr añcha'tarettetsa Romo. Tarro'mar allohuen ñeñt ñañeña netsa añcha'taretpa' chocma mueneñ o'ch atpare'teñet ñeñt atarr añcha'tarettetsa Romo.

¹³ Pilatoña allempo e'man ñeñt atet otenet allenta cha'nmaterran Jesús a'yoñ ñañapa' anorruerr all po'conaño allecma a'pocatanen ñoñets, ñeñt otenet Mapyetaten. Hebreyaçhopa' oteñet Gabata.

¹⁴ Allempopa' añ yetro allempo añño'tena judionesha' ñeñt attecma penet pascuapo. O'ña çhap pocropa', Pilatoñapa' atet oterranerr judionesha':

—Secue'ñaca'yeña añ ñeñt sa'mcha'tareter sepen.

¹⁵ Ñetñapa' alla rrannarterretterpa' atet otyerreterr:

—¡Ñapa' çhepa' rromats! ¡Pecorso'tamþsachñaca'ye allcha' rroma!

Pilatoñapa' atet oterraneterr:

—Sapa' ¿atfe't semnen o'ch necorso'tamþsonas sa'mcha'tareter?

Ñeñña pa'mcha'tareternesha' pen allohuen judionesha' po'cornaneshar ñetñapa' atet otyeset:

—Yapa' amaca'ye eñalleña po'poñ ya'mcha'tareter, ñapñaña ya'mcha'tarete yepen ñeñt atarr añcha'tarettetsa Romo.

¹⁶ Allempoña Pilatopa' apanet Jesús attoch corso'tamþset. Ñetñapa' anmet allcha' corso'tamþeñeta'.

Atto corso'tamþsoset Jesús

(Mt. 27.32-44; Mr. 15.21-32; Lc. 23.26-43)

¹⁷ Atto sen Jesús allpa' anenan po'corsoch. Chapachet all oteñet Poñetalleþno, ñeñt otenet hebreaçho Gólgota.

¹⁸ Allña corso'tamþsoset epuet ñaña epsheña acheñ. All corso'tamþsetpa' rroçhtamþsatset epsheña.

¹⁹ Pilatoñapa' quellcatan ñoñets ñeñtpa' atet ot: “Añmapa' Jesús ñeñt nazareto'marnesha' ñeñt Pa'mcha'tareter pen judionesha'.” Ñeñña ñoñetspa' e'ñe corsocho ne'.

²⁰ Shonte' judionesha' ñeñt lleya'yese' ñeñt quellec tarro'mar all corso'tamþsetpa' e'ñe allame'ttsa anetso. Ñeñña quellecpa' e'ñe mapo'mar ñoñets aquellcarrera —hebreaçh, griegaçh ñaña latinaçh, e'ñe attecma oten.

²¹ Ñeñña pa'mcha'tareternesha' pen allohuen judionesha' po'cornaneshar ñetñapa' atet ochet Pilato:

—Amachca' pequellcatstoña atet. Añcha'ña pequellca' ñocop, “ñapa' ñañeñaca'ye otetsa judionesho' Pa'mcha'tareter.”

²² Pilatoñapa' atet otanet:

—Ñeñt o' nequellcatuapa' o'ca'ye aquellca'huaretta.

²³ Allempoña corso'tamþsesuet Jesús pa' solltarnesha'ñapa' yoroñet ñeñt chorrena. Apanna'tyeset puema'tets pa'tatssheño'maret. Ñeñña pa'shtampa' ama eñalle all seþchena, ora apomotarete e'ñe patrira shetamuets e'ñe poñe'moteñ.

²⁴ Atet otanna'tyeset:

—Amachca'ye yerrarratsche, chochña yeyellsheñe'chatoñ pa'shtam yesuertoť attoch orrta erra'tsenofeycha' yore'.

Ñeñtpa' tarro'mar atet p̄ohuet allochñapa' attoch etsoterra Yomp̄or po'ñoñ ñeñť atet anuaret ahuaťoteñ, ñeñtpa' atet oten: “Ñetpa' apanna'tyerretcha' ñeñť nechorrena. Neshtamñapa' yellsheñe'chatonetcha' po'suertoť attoch orrta ñeñťcha' yore'.” Ñeñtpa' atet o' e'ñe perra solltarnesha'.

²⁵ Allña e'ñe allame'tets Jesús po'corsochopa' all tomchen coyanesha'. Allo'tsen pachor, ñaña pachor pa'mo'nerr, ñaña po'psheñeñ María ñeñť Cleofas puetapor, ñaña María Magdalena.

²⁶ Jesúsña entan pachor ñaña pueyochresha' ñeñť nanac morrentena all tomchenet allame'tets. Allñapa' atet otan pachor:

—Achocha' añca'yeña pechoyor.

²⁷ Allempoñapa' atet otan ñeñť pueyochresha':

—Añca'ye ñeñťcha' p̄achor pepa'.

Allempoña ñapa' anerran Jesús pachor e'ñe ña pa'paclo allcha' cohuañpes.

Atto rroma Jesús all po'corsocho

(Mt. 27.45-56; Mr. 15.33-41; Lc. 23.44-49)

²⁸ Allempoña Jesúsapa' o' eñoch o' etsotua ora allohuen ñeñť ñocop, ñañaapa' atet ot:

—Cha no'ñpa'ten.

Ñeñtpa' tarro'mar atet ot allochñapa' attoch etsoterra Yomp̄or po'ñoñ ñeñť atet anuaret ahuaťoteñ.

²⁹ Allñapa' allo'tsen pajo' all chorre' chase'. Allña e'chomuetña ñeñť atsotso'tpo'. O'ña tsotso'tatuet ñeñťñapa' net tsachp̄o ñeñť otenet hisopochep̄ alloña chapachet Jesús puenamo.

³⁰ Allempoña Jesúsapa' agapan chase' ñañaapa' atet oterrerr:

—Te'ñapa' o' e'ñe etsotuerra allohuen ñeñť atet anaret nocop.

Allempoña o' epapa' cha rromats.

Allempo puesheñarr solltarpa' enos po'panmeto puep̄otot

³¹ Allempopa' o' chap allempoch añño'terrerr judionesha' tsapatecop allempocma amesenet. Ñeñťo'marña ñetpa' ama pocteye' eñcheto o'ch alla ellapen ñeñťcha' rromanatats corsocho añ yetro allempo amesenet. Ñeñťña yetro allempo amesenet o'ch alla atarr cosherreterr ñaña pascua. Ñeñťo'marña Pilatopa' enamueñeta' attoch cheno'tatoñet pa'tap o'ch rromuet e'ñe mamecma allochñapa' o'ch anmaretterret corsochoť.

³² Allempoña ponem̄ya solltarpa' cheno'tosan pa'tap ñeñť parro corso'tam̄peñet e'ñe epsheño'mar.

³³ Allempoña ponem̄yet ñaña Jesúsapa' ñañaapa' entoset o' rroma. Ñeñťo'marña ñapa' ama chenam̄pseto pa'tap.

³⁴ Tarraña puesheñarrña solltarpa' chocma enos po'panmeto puep̄otot. Alloťña atarr cha'nom po'rras ama't ñaña oñsasen.

³⁵ Ñeñťña ente'pa' ñapa' serrpare'tatanet atet ent. Ñapa' e'ñe eñoteñ e'ñe po'ñoch ñeñť atet oten. Ñeñťo'marña yapa' yeñoteñ ñeñť atet serrpare'tenpa' e'ñe po'ñoch. Attochña sapa'cho'ña same'ñerach ñeñť atet oten ña.

³⁶ Ñeñtpa' atet p̄a attoch etsoterra Yomp̄or po'ñoñ ñeñť anuaret ahuaťoteñ, ñeñtpa' atet oten: “Ña ama't patr̄ra puenep̄pa' amach chenam̄pereto.”

³⁷ Ama't ñaña Yomp̄or po'ñoñ ellonetpa' atet ote't ahuať: “Ñetpa' enteretcha' ñeñťcha' enerret.”

*Atto pampuet Jesús**(Mt. 27.57-61; Mr. 15.42-47; Lc. 23.50-56)*

³⁸ Allempoña José ñeñt arimateo'marnesha'pa' ñaña'pa' ahuos Pilatesho o'ch oteña' pocte'ch eñch ñach a'suatose' Jesús ñeñt rromuets corsocho. Ñehua, ñeñt Josépa' cotenan ñaña Jesús tarraña e'ñe a'nahua, tarro'mar ñapa' mecha'tenan judionesha'. Allempo atet enamosan Pilato, Pilatoña'pa' e'ñe pocte' eñch, ñeñto'marña alla ahuerr corsocho, cherr allpa' a'suatosan Jesús corsocho' all rromuen.

³⁹ Allña'pa' huapa ñaña Nicodemo ñapa' añ huapatoñ eñmosañ, atsetaret ñeñt otenet mirra epuet ñaña áloe. Allo'tsenté' ma'poch charra' kilo. Ñehua, ñeñt Nicodemopa' ñeñtara ñeñt huapatsa ñanom Jesúsesho tsapo.

⁴⁰ Ñetña anerretña Jesús rromue'. Allña'pa' e'patse'tueret shetamtsotomo epuet ñaña eñmosañ. Ñeñt'pa' atet ye'chena judionesha' ñerra'm cho pampueñet arromñañ.

⁴¹ E'ñe allame'tets all corso'tañpset allña'pa' allo'tsen narmetsma'. Allña narmetsmopa' allo'tsen mapuetpon allña pampa'neretña Jesús allempo rroma. Ñeñt mapuetponpa' e'ñe etserra eñaret, tarraña allpa' ama pampueñeta' ama't patra arromñañ.

⁴² Allempopa' tarro'mara alla na'neret allame'tets tarro'mar allempopa' añ yetro allempoch añno'tena judionesha' tsapatecop allempocma amesenet.

20*Atto tanterra Jesús**(Mt. 28.1-10; Mr. 16.1-8; Lc. 24.1-12)*

¹ Allempo motta'muenerr yetsñats temenc, Maríaña Magdalenapa' ahuatecma ahua'muen puepampro, allempopa' ama e'ñe puetaresuena'. Allña'pa' amuepa'tcha' atteraye' entosanoña mapue' allo yottañpset. Ama allo'tsenarayaye, atta apmesaret a'yenet mame'.

² Ñeña pa'che'ñera alla materra o' ahuerr allo'tsen Simón Pedro ñaña po'psheñeñ pueyochresha' ñeñt atarr morrentena Jesús. Maríaña'pa' atet otuerranet:

—O' anerrnayette' Yepartseshareñ puepampro'. Ama yeñoteñe, errate'ña neret.

³ Allempoña Pedro epuet po'psheñeñ pueyochresha' ñetña'pa' allenta ahuanmuet ñamet puepampro o'ch enteñeta'.

⁴ Epsheño'maretpa' matra'tet all. Po'psheñeñña pueyochresha'pa' ñaña'pa' ota, metanan Pedro. Ñaña'pa' ñanmacma chap puepampro.

⁵ Epostsaña o'pononet o'ch cohuos all net Jesús ama entose, aña entosñañ allo epet alla o'yerrmuena. Tarraña ama be'toso.

⁶ Allempoña chap ñaña Simón Pedro ñeñt onets chenta'. Ñaña'pa' allenta be'tosos puepampro ñapa'cho' aña entosñañ allo epet Jesús alla o'yerrmuena.

⁷ Aña allo huancoñet poñpa' ama parrocmaye' allo'tseno epuet allo epet. Ñeñtña'pa' ñapueñ a'tpuetena a'yenet.

⁸ Allempoña'pa' be'tosos ñaña po'poñ pueyochresha' ñeñt ñanom chapats puepampro. Ñapa'cho'ña entos ama eñalle Jesús. Allempaña ame'ñya po'ño'che'pa't o' tanterraña Jesús rromot.

⁹ Tarro'mar ñet allempopa' ama chenaneñoña ñeñt atet anuaret ahuatoteñ Jesúsocop all oten Jesús'pa' chocmach tanterra po'rromñoñ.

¹⁰ Allempoña pueyochresha'pa' ahuanerret pa'paclo.

*Allempo tanterra Jesús'pa' añ ñanom orrterra María Magdalena**(Mr. 16.9-11)*

¹¹ Maríaña'pa' allo'tsenara a'yot allame'tets puepampro all nanac yahuena. Allña yahuenapa' o' epa, o' cohua' o'pononet puepampro all net Jesús.

12 Allñapa' aña ent epsheña mellañoñeñ, pa'shtamuet atarr huallama'tareret. E'ñe ñopa'tets anorryenet puesheñarrpa' poñoñ anen, po'psheñeññapa' pa'rrpōt anen all ñanet ahuaña Jesús.

13 Ñetñapa' atet ochet María:

—¿Eso'mare't nochesha nanac peyahuena?

Ñañapa' atet otanet:

—Ahuo't anerrnanette' Neparthseshareñ ama neñoteñe errate'ña o' net.

14 Ñeñña otuapa' puetallerra pa'che'ñoneñ allentepa'tcha' enterran ñaña Jesús e'ñe all. Tarraña ñapa' ama cheme'che.

15 Jesúsñapa' atet och:

—¿Eso'mare't nochesha atarr peyahuena? ¿Esesha'tña pe'nen?

Ñañapa' cha otenapañ añte' ñeññ cohuanmpene' narmetsma' all. Ñeñño'marña ñapa' atet och:

—Ayochreshate ñerra'm ñate' anmue'pa' pegaterren errate' peneña', ñachña erraya'.

16 Jesúsapa' atet otererr:

—¡María!

Ñaña puetallerrtserrpa' cha e'ñe cheme'terre' ñeñño'marña atet ot po'ñoño he-breya'cho:

—¡Raboni! —ñeññ atet otenet ñet Maestro.

17 Jesúsapa' atet otererr:

—Amach cha permatsetno, napa' ama na'tena' Apuesho. Arrña orrañ masheñneshesho o'ch pōtenaneta' napa' o'ch na'terr Nompore'sho ñeññ Neyomporer nepen ñeññara ñeññ Seyomporer sepen saña.

18 Maríaña Magdalenapa' ahuer serrpare'tatuerrñañ pueyochresha' ñeññpa' atet otuerranet:

—Napa' o'rramtso nenta'mueñña Yepartseshar.

Serrpare'tatuerranet ñeññ atet och Jesús.

*Atto Jesúsapa' orrterrana allohuen pueyochresha'
(Mt. 28.16-20; Mr. 16.14-18; Lc. 24.36-49)*

19 Ñeñte yetrocma allempo motta'muena yeññats temenc, ellerroneña pueyochresha'chnopa' apcha'nenet. Ñetpa' cha yore'tenanet judionesha' ñeñño'marña ñetpa' e'ñe echarr yottañpenet. Ama't atet yottañpenetañpa' Jesúsñapa' chepa'tcha' be'tosuet. E'ñe rro'cho tomhuen allempoñapa' atet otuenanet:

—Te'ña po'ño'chpa' chosa cosherrtsa seyo'chro.

20 Allempoña atet otuenanetpa' gatyuesuananet pot ñaña all enare't puepoto. Pueyochresha'ña atarr nanac coshapueñet allempo entapueñet Po'partsesharet.

21 Allempoña Jesúsapa' oterraneterr alla:

—Te'ña po'ño'chpa' chosa e'ñe cosherrtsa seyo'chro. Atto na mueñan Apa, napa'cho'ña te'pa' o'ch nemñas saña.

22 Allempoña otuenanet atetpa' allenta a'torahuananet atet oterraneterr:

—Te'ñapa' chorrasespa'ch Parets Puecamquëñ.

23 Ñerra'm esesha' sepretnataten po'chñarpa' Yomporpa'cho'ña o' peretner. Ñerra'm esesha'ña ama sepretnataten po'chñarpa' Yomporpa'cho'ña ama peretneñe.

Allempo Tomásapa' entapueñan ñaña Jesús o' tanterra

24 Pueyochresha'ña Tomás ñeññ otenet Epanesha' ñañapa' ama allo'tsenayaye all apchenet allempo huena Jesús.

25 Ñapa' atña serrpare'tater po'potantañ ñeññ parro yochreshatsocmuet, ñeññpa' atet ochet:

—Yapa' o'ca'ye yenterña Yepartseshar.

Ñaña' cha otanet:

—Napa' ñerra'm amach nentoñe pot all patet clavo, ñerra'm amach cho na'p'loñe e'ñe na notot all patet, amach cho neno not puepotot all enetpa' amate' errotenot name'ñaso.

²⁶ Allempoña posocmaterrpa' pueyochresha' ñapa' alla apcherretterr o'pono. Allempopa' allo'tsen ñaña Tomás. Ama't yetarrpa' e'ñe echarr ayotetuaret Jesúsña' all be'tosuenerr tomhuenerr e'ñe allpa' alla otuenaneterr:

—Te'ña po'ñoçhpa' çhosa cosherrtsa seyochro.

²⁷ Allempoña' atet otuenan Tomás:

—Pecuon not all pata'net, pa'p'lle'ca'ye. Pa'p'lla'n ñaña nepotot all enanet. Amachña cha pe'charrtatatsto peyoçher choña pame'ña.

²⁸ Allempoña Tomás'pa' atet och:

—¡Nepartseshare, te'ña po'ñoçhpa' Neyomporer nepeneþ!

²⁹ Jesúsña' alla otererr:

—Papa' cho e'ñe penterren ñeñto'maraña te'pa' pame'ñenna. Tarraña elloña añ atarr cosheñtso'tsen ñeñt ama't ama cho entennopa' ame'ñennet.

Añ libropa' añecop anaret ñeñtcha' yame'ñatene'

³⁰ Po'ñoçh shonte' po'poñeçhno ñeñt atet gatyesan Jesús pueyochresha' po'partsoña. Neñt'pa' ama aquellcareteyaye añ libro.

³¹ Allpon ñeñt aquellcarettatsa arr libro ñeñt'pa' añecop anaret ñeñtcha' same'ñate' po'ñoçh Jesús'pa' ñeñt Cristotets, ña po'ñoçh Yompor Puechemer. Tarro'mar e'ñe same'ñeñoa Cristo saña' corretsasach tayoteñ e'ñe errponañohuen.

21

Allempo Jesús'pa' orrterrana cançherrsheña pueyochresha'

¹ Allempoña Jesús'pa' orrterrannerr pueyochresha' e'ñe sa'patoþño Tiberiaso. Allpa' atet orrterrannet:

² Ñehua, allempo shontenet allpa' allo'tsen Simón Pedro ñaña Tomás ñeñt otenet Epanesha' ñaña Natanael ñeñt cano'marnesha' e'ñe allara Galileo. Ñaña allo'tsen Zebedeo puechemeresha' ñaña allo'tsen po'poñ epsheña pueyochresha'.

³ Simónña Pedropa' atet otanet:

—Napa' o'ch neterrayena'.

Po'potantañeçhnopa'cho'ña atet ochet:

—Yapa'cho'ña o'ch yoçtaþ.

Allempoña' ahuanmuet a'taça'toset noñto. Tarraña ama't arepenetañ terrayatsetpa' amaña es rromueneto.

⁴ Allempoña o' puetarenmoch Jesúsña' tomhuen pueme'taro. Tarraña pueyochreshaçhnoña' ama esesha' cheme'tapaye.

⁵ Jesúsña' atet otosanet:

—Neyochreneshacha' ¿ama't eñalleña secacar ñeñtcha' serra'muen?

—Ñetña' atet ochet:

—Amaca'ye eñalle.

⁶ Ñaña'pa' atet oterraneterr:

—Sehuapore't seterraya noñt po'cohuenrot allpa' serrmue'chca'ye.

Atet otanetpa' atetcho'pet. Arepa'tcha' eshcaye' cheterreto po'terraya o' rromuet nanac aton cac — shonte'.

⁷ Allempoña pueyochresha' ñeñt atarr morrentena Jesús'pa' ñaña'pa' atet otan Pedro:

—¡Yepartsesharepa'tca'ye!

Simónña Pedropa' allempo eñotan Partseshepa't huetsa ñaña'puema'yoreñ chor-rerrana pa'shtam tarro'mar ñapa' muelle'mco'ta terrayen. Ñaña'puema'yorñecma omacha oñopa' ahuo' Jesúsesho.

⁸ Po'potantañechnoña pueyochresha'pa' chenta' onaçherret noñto. Ñato' cien metro'te' allo'tsen attoch çherret toñña'so. Chetare'tnerret po'terraya e'ñe chorre' cac.

⁹ Allempo sohua'rretuerret patsopa' all entuerret quellmesh all huorten all achmare'ttena cac; allo'tsen ñaña pan.

¹⁰ Jesúsñapa' atet oterraneterr:

—Sacra' patantarr cac ñeñt serrmuen e'ñe errte'.

¹¹ Allempoña Simón Pedropa' alla a'terr noñto, chetan terraya noñto't o' ne' masto, e'ñe chorre' atesha' cacaçhno — allo'tsen ciento cincuenta tres ñeñt allpon rromuet cac. Tarraña ama't shonte' rromuet cacpa' ama rrarratano terraya.

¹² Jesúsñapa' alla oterraneterr:

—Te'pa' sonaçherr o'ch serra'muen.

Puerñcha'na'teño'tet ama't puesheñarroteta ama esesha' otenaye: ¿Eshape'tña ña? tarro'mar eñoteñet po'ñoçhpa' Partsesha'ca'ye.

¹³ Allempoña huapanet Jesús allame'tets, chetosan pan apa'yesosanet. Apa'yesosanet ñaña cac.

¹⁴ Ñeñtpa' allempo poma'pocheño'hua orrterrana pueyochresha' allempo tanterra rromot.

Allempo Jesús'pa' otenan Simón Pedro atarrte' morrenteña

¹⁵ Allempoña rrohua'muenet Jesúsñapa' atet otan Simón Pedro:

—Simón, Jonás puechemere, ñapa' ¿atarrte' pemorrentenna, ellote' peñtana'tueñ añenesha'?

Ñaña'pa' atet otan Jesús:

—Po'ñoçhca'ye Partseshacha' peñotenen napa' nemorrentenña.

Jesúsñapa' atet otererr:

—Ñeñtepñapa' e'ñech cohuen peserrpare'tatyes allohuen ñeñt name'ñenaya; ñetpa' e'ñe atet nentenanet ñerra'mrrate' necarrneroretollesha'.

¹⁶ Puepocheñoñapa' alla otererr:

—Simón, Jonás puechemere, ¿po'ñoçha't atarr pemorrentenna?

Ñaña'pa' alla otererr:

—Po'ñoçh Partseshacha' e'ñe peñotenen napa' nemorrentenña.

Ñaña'pa' alla otererr:

—Ñeñtepñapa' e'ñech cohuen pecuamñson allohuen ñeñt name'ñenaya; ñet po'ñoçhpa' e'ñe atet nentenanet ñerra'mrrate' necarrneroreçhno.

¹⁷ Poma'pocheñoñapa' alla otererr:

—Simón, Jonás puechemere, ¿ama't e'ñe mamecpa pemorrentenno?

Pedroñapa' llequënana atto alla poma'pocheño otererr e'ñe ñeñtara, ¿pemorrentenna't?, ñeñto'marña ñapa' otererr:

—Partseshacha' allohuenpa' e'ñepa't peñotueñ. E'ñe peñotenen napa' nemorrentenña.

Jesúsñapa' alla otererr:

—Ñeñtepñapa' e'ñech cohuen pecuamñson necarrneroreçhno.

¹⁸ Po'ñoçhca'ye te'pa' o'ch notañ, ña allempo huepueshenña' pechorre't e'ñe ñota, all peseche'tpa' all pechopeñe'chyese't. Tarraña esempoch pepo'nme'tenpa' ñaña'pa' o'ch attaña peyopen peque' attochña o'ch po'psheññaña pechorratenaya allempopa' anerrpetcha' all ama pesecheno.

¹⁹ Ñeñtpa' tarrecop atet eñorana'tenanet allochñapa' attoch eñochet erro'tenotcha' rromuerr Pedro atto'tcha' cohuentaterran Yompor. Ñeñta otuepa' alla oterran Pedro:

—Papa' chocmuepa'ch e'ñe p̄octenen.

Atto Jesús eños Juanacop ñeñt̄ pueyochreshar atarr muerena

²⁰ Pedroñapa' puetallerrtsa entapan o' coña'nem̄ po'psheñeñ pueyochresha' ñeñt̄ atarr morrentena Jesús, ñeñt̄ e'ñe anorrtse't̄ epuet ahuañmo'cha allempo rrallme'chete't̄ ñeñt̄ara pueyochresha' ñeñt̄ otaye't̄ ahuaña: “Partseshacha' ¿erra'tsenacpa'tña pe'ñorena ñeñt̄cha' pepomuerre'?”

²¹ Allempoña entap̄ Pedro, ñañaapa' allenta otan Jesús:

—Partseshacha' ñocoppa' ¿ama't eñalleña ñeñt̄cha' huapoya ña?

²² Jesúsñapa' atet̄ otererr:

—Ñerra'm na muenate' ñapa' allach a'pa esempohuañeña nohuerrapa' ñeñt̄pa' e'ñe pocte' ñocop, ñeñt̄pa' ama p̄ocpayaye. Pocoppa' añ p̄octetsa chocmuepa'ch p̄octenen.

²³ Ñeñto'marña epa'hua añ ñoñets errap̄aren allo'tsa'yen masheñnesha', ñeñto'marña ñetpa' atet̄ otanna'tyenet, ñeñt̄ pueyochresha'pa' año'ch rromuerro ama't errponaña. Tarraña Jesúsapa' ama atteye' oteno amach rromuerro. Ñapa' aña oteñ: “Ñerra'm na muenate' ñapa' allach a'pa esempohuañeña nohuerrapa' ñeñt̄pa' e'ñe pocte' ñocop, amaña po'psheññecpayaye.”

²⁴ Napa' ñeñten pueyochreshan ñeñten atet̄ eñotatets atet̄ ñeñtarana quellquë' añ. Te'ña ya allohueney yeñoteñ ñeñt̄ atet̄ na'potapa' ñeñt̄pa' e'ñe po'ño'ch atet̄.

²⁵ Shonteñ po'ñoñechno ñeñt̄ atet̄ p̄a'yesa Jesús. Ñerra'm e'ñech yequellca'hueñ ora allohuen ñeñt̄ atet̄ p̄a'yese't̄ Jesús eñalleñte' shonte' nanac libros. Napa' noten shonteñte' nanac librosapa' e'ñech epa'huañ ora errap̄aren aña patsro ñerra'm allponcha' yequellcañ libros. Ñeñt̄pa' attetepa'ch Nompore. Allohua.

ATET PA'YESA JESÚS PUEYCHRESHA' LOS HECHOS

Atet otnerranet Jesús huapanetcha' Parets Puecamquëñ

¹ Te'pa' masheñe Teófilo, nequellcoṭpa' o'ch neserrpare'taterrperr po'pocheño. Ahuaña ñeñt nequellconap all neñotataṭ ora allpon atet pe't Jesús allempo añe pat-sro'tsenmeñ. Ñaña ora allpon yeḥate't Jesús, ñeñtpa'cho' o' notuaṭ nequellcoṭ.

² Tarraña allempoteñ a'terr pue'ntañopa' palltena o'ch notap ñaña. Te' añ nequellcoṭpa' o'ch notap. Tarraña ama't allempo ama a'terra' Jesúsapa' añña ñeñt pueyochresha'pa' o' otuanet atetcha' pet. E'ñe Parets Puecamquëñoṭpa' o' llesensa'huanerran pueyochresha' ñeñt acra' ña.

³ Ama't pomueroḥteñoṭ o' rromua ahuaña, allempoñapa' o' orrterrana pueyochresha' e'ñe beṭnaṭoṭ. Ñeñto'marña ñetpa' eñochet e'ñe po'ñoḥ añpa' ñeñtara Jesús ñeñt rromats ahuaña. Tarro'mar pa'tatsoch ḥarramatnerr atto orrtame'tnerranet mamesha'tets. Ñaña ḥocma eñchete't allame'tets. Allempoña ñapa' a'poṭanet atet penaña Parets po'cohuenña atto ayochreshattena ña.

⁴ Allempo allo'tsenet e'ñe parro epuet pueyochresha'pa' atet otanet:

—Amach erra setatsto arroṭ, allasach arrma Jerusaléño. O'ch secueñ esempoch ḥaponasa ñeñt Parets Puecamquëñ. Tarro'mar Paretsapa' o' otuas o'ch mueñonas Puecamquëñ. Ñeñto'mar napa' o' na'potuonas Parets po'ñoñ ahuaña.

⁵ Allempopa' añña ñeñt notuas: Juanañpa' añoñña apate't oño, tarraña na tsapaṭoneṭpa' añcha'ña nechorratasa Parets Puecamquëñ. Añpa' allohua atet ot Jesús.

⁶ Po'pocheño all apḥenet aspenṭo pa'so'cheñ Olivopen. Pueyochresha'ñapa' atet a'ṭo'chet Jesús:

—Te'pa' Partseshacha' ñato' pocte' penteñ o'ch ṭapaterrey ñeñtey israelneshay yepat-señ. Allochñapa' amach esesha' poñeña yeyore'tame'tenaye.

⁷ Jesúsñapa' atet otanet:

—Ñeñt socoppa' ama pocteyaye o'ch señoḥ. Añña Yompor po'partsoteñoṭ e'ñe eñotueñ. Ñapa' o' ne' allempoch etsotuerra ora allohuen añeḥno.

⁸ Jesúsapa' alla oterranneterr:

—Añña pocte' o'ch señoḥ, ñerra'm esempoch huaponasa Parets Puecamquëñ sesho, ñach ahuamencat sepose'. Allempopa' sa'poṭoncha' neñoñ erraṭparen—Jerusaléño, ñaña ora Judeo, ñaña Samario, ñaña ora allohuanen pats.

Arrpa' atet perra Jesús allempo a'terr pue'ntañ

⁹ Ñeñta otuanenanetpa' allempoñapa' a'tenochayo' enonet. Añña pueyochresha' pocuanrrorteñoṭetpa' o' ma'natena oso. O'huañ orrta, ama't mamesha.

¹⁰ Ama't allempo o'huañ orrta Jesús, ñetpa' allo' cohuanrrortenet enonet allenet o' chenca'huanena Jesús. Allempoñapa' cohuerretset patsonetpa' alla entet epsheña yacma o' tomḥa'toset e'ñe parro. Pa'shtamuetpa' nanaco' huallama'tareret.

¹¹ Ñetñapa' atet otosanet:

—Esuañaca' galileo'marneshacha' secuanrrortenna enonet. Añ Jesús ñeñt o' a'terr entopa' huerrerrcha' po'pocheño atet senteñ o' ahuerrento.

¹² Allempoña o' a'ten Jesúsapa' añña pueyochresha'pa' o' ahuanerret alla Jerusaléño. O' onacherret Olivopnoṭ allot a'terr Jesús. Tarro'mar ñeñt aspenet Olivopenpa' allame'ttso'tsena Jerusaléñoṭ, Olivopnoṭpa' ñato' allo'tsente' paterr kilómetro attoch yeḥap Jerusaléño.

13 O'ña čhačherret anetso Jerusaléño all pocollo allecma a'puenetpa' o' be'tosča'tuerret, a'tapuet eno all tama a'yohuen ħať. Allña'pa' apčhet allohuenet. Ñeñť apčhatsa ñeñťpa' añečno: Pedro, ñaña Jacobo*, ñaña Juan, ñaña Andrés, ñaña Felipe, ñaña Tomás, ñaña Bartolomé, ñaña Mateo, ñaña Jacobo ñeñť Alfeo puechemer, ñaña Simón ñeñť cananistanesha' ñeñť atarr tórratseť pa'netsrecop, ñaña allo'tsen Judas ñeñť Jacobo pa'mo'nasheñ.

14 Allña apčhenetpa' e'ñe ñeñťa neteť pueyočhro cohuen ñoñets. Alloťpa' e'ñe poma'yochreñoťet cohuenpa' čhocma ma'yocheteť. Allo'tsen ñaña coyaneshachno, ama't Jesús pachor María, ñaña pa'mo'nasheñnesha' allo'tsenet ñamet.

Atet pa Jesús puellsensarnesha' allempo net Matías ñeñťcha' epuet a'potoñet Yompor po'ñoñ

15 Parrochña Pedropa' o' tomos o'ch serrpare'tatanet. Allempopa' ñato' allo'tsente' ciento veinte acheñenesha'. Allempoñapa' otanet:

16 —O'ch masheñneshacha' notas: Po'ñočh o' etsotua Yompor po'ñoñ ñeñť anareť ahuaťoteñ. Tarro'mar Parets Puecamquėñoť eñoseť David. Ama't ahuaťpa' oteť David atetcha' pa Judasoñ ñeñť anmue' ñeñť rromue' Jesús. Ñehua, pocte'ñačho' o'ch etsota Yompor po'ñoñ.

17 Judasoñpa' ahuaña allempo allo'tseney e'ñe parro ñapa'čho'ña acreñña Jesús o'ch pueyochresha' pe'.

18-19 Ñehua, Judasoñpa' tsa'chet allpon quelle atto poman Jesús. Tarraña ñeñť quellepa' allo rañťet pats. Tarraña allempo shora'nom Judasoñ čhap patsopa' potsa'nmos pa'ť, o' yo'pahua ora. Allempoña e'mare'ch allohuen jerusaléño'marnesha' atto Judasoñpa' o' rroma. Añña pats ñeñť rañťet Judasoñ po'čllayoroťpa' o' sochet Acéldama. Añ ñoñets ñeñť otenet Acéldama ya yeñoño yoteñ Errasatsotnanen.

20 Añña ñeñť quellquėť ahuať David ñeñťpa' anuareťta añ libro Salmos. Añña ñeñť atet oteney:

All yečhena, puenasepa'ch amarať, all amach eseshaye' yečhatstatso. Ñeñť po'taruas pa' attoch sherħaneñ Yomporpa' tarraña ñeñťpa' apanepa'ch po'psheñeñ. Atet oten añ libro Salmos.

21-22 Alla oterraneterr Pedro:

—Ñeñťo'mar te'pa' añ poctetsa o'ch ye'ñ po'psheñeñ ñeñťcha' parro ya'poťa atto Jesús'pa' o' tanterra. O'ch ye'ner puesheñarr ñeñť čhocma parro yechopeñe'cheť ahuaña allempo arro'tsenmeñ Yepartseshar Jesús. O'ch ye'ner puesheñarr ñeñť čhocma yocťayeť ama't allempoteñ Juanañpa' apatapan Jesús tarrempoħua allempo a'terr Jesús.

23 Allempoñapa' o' neñet epsheña, puesheñarr añ pa'so'cheñ José Justo, ñeñťara José oteñet ñaña Barsabás. Po'psheñeñpa' añ pa'so'cheñ Matías.

24 Allempoñapa' o' ma'yochet. Puema'yochenoťetpa' atet otet:

—Yompor, ñeñťeř entene' allohueney yeyočer. Te'pa' o'ch peñotatey erra'tsente' pemnen pa' ñeñťcha' ello alla sherberrets pocop atet ñerra'm pellsensar.

25 Judasoñpa' o' sa'nmuey o' ahuo' all ñeñť o'patatareťtena ña e'ñe ña po'chñaroť.

26 Allempoñapa' yellsheñe'chet e'ñe ñet po'suertot attoch eñochet erra'tsente' muenenña Yompor ñeñťcha' alla sherberrayer. Allempoña yellsheñe'chenet añ orrtatsa Matías ñeñťepa't muenenña Yompor. Allempoteñ Matías'pa' ahuo' aguėñ po'poñečno ñeñť čharrasheña puechetsa paťerr ñeñť puellsensar Jesús.

2

Allempo čhapanet Parets Puecamquėñ

* 1:13 Jacobopa' ñeñťara ñeñť sochenet Santiago.

¹ Allempoñapa' o' meterrerr allponmat amnaroch çharramat, o' çhap allempo coshena judionesha' ñeñt otenet Pentecostepo. Allempoña ñetpa' alla apçherreterr e'ñe parro ñeñtet ame'ñetset.

² Allempoñapa' machayota e'mapuet atet ñerra'm huomenquëshä' ma'more'tos entot. Allohuenet ñeñt allo'tsa'yen pocollo e'ñe e'mhuet.

³ Añña ñeñtet apçhetsetpa' o' huapanet atet ñerra'm tso'. Huapapa' çha chapa'rrtosa po'huorter ñesheto. Chapyesanet e'ñe puesheña'ttsocmuet atet ñerra'm huorte'. Añña huorte'pa' alla a'prra'ta ñesheto.

⁴ Añña ñeñt çhapyesahuet e'ñe puesheña'ttsocmuetpa' añepa't Parets Puecamquëñ ñeñtcha' chorrahuet. Allempoñapa' allorocma eñosyaset po'poñ ñoñtso ñeñt ama eñosete'te ahuaña. Añña Parets Puecamquëñpa' ahuo' eñoratyesanet po'poñe'ttsocoma attoch serrpare'tachet pa'namen acheñ e'ñe ñet po'ñoñeto.

⁵ Allempo Jerusaléno' allo'tsa'yen shonte' judionesha' ñeñt huachetsa pa'namen anetsof. Ñetpa' cohuen cotape'chete't Partsocop.

⁶ Allempoña e'marettet çha ano'tenetpa' o' matrra'tosa shonte' pa'namen acheñenesha' o'ch enteñeta' ñeñt ano'tatssets. Chapuet all ano'tatsenetpa' o' entoset ñeñt ame'ñetsapa' año eñosyenet e'ñe ñet po'ñoñeto. Allempoñapa' atta cohuanrrortoset.

⁷ Puemoñne'teñoetpa' atet otyeset:

—Ta', errotenote'ca' e'myennayetña yeñoñ. Yapa' yeñotenanet ñetpa' galileo'marnesheta.

⁸ Ama't po'poñ ñeñt yenyomar ñoñetspa' e'mueñet. Allohueneypa' o' e'ñe ye'myes atet eñosyenet e'ñe cohuen yeñoño.

⁹ Allempopa' alla otanna'tyerreterr:

—Yapa' yeñen po'poñe'ttsocoma ñoñets tarro'mar yapa' pa'namen anetsof yehuena. Alot anetsrot yehuapyena ñeñtpa' pa'namen pa'so'chñeçhno—ama't Partiof ñaña Mediof ñaña Elamof ñaña Mesopotamiof, Judeof, Capadociof, Pontof, Asiof,

¹⁰ Frigiof, Panfiliof, Egiptof ñaña Africo'marof, alla allame'tets Cireneo. Ñaña ñeñt huetsa Romof ñeñt çhocma a'puetsa arr.

¹¹ Ama't ñaña judionesha' shonte', ñaña ama't ñeñt ame'ñaten judionesha'. Ñaña ñeñt huetsa Cretof ñaña Arabiof. Ya te'pa' o' e'ñe ye'myes e'ñe yocma yeñoño atet aye'choçhtateññañet Parets po'cohuenña e'ñe yeñoño.

¹² Otanna'tyerreterr alla:

—Ta'm, ñetpa' errotenette'ca'yete'. Yapa' ama't ahuañapa' ama yentareña galileo'marnesha'pa' o'ch eñosyesña e'ñe cohuen yeñoño. Ta', esocopte'.

¹³ Añña po'potantañ acheñenesha'pa' o' achmñare'tanet atet otarettet:

—Tarro'mar ottenetña' çhoca'ye posa'tyenet.

Atto Pedropa' serrpare'tatan acheñenesha'

¹⁴ Añña Pedropa' tanta o' tom e'ñe alla epuet po'poñeçhno yochreshats. Eñora huomenc, otanet:

—Masheñe judioneshacha' ñaña allohuenes ñeñtes arro'tsenes Jerusaléno, te' o'ch notas: Se'mñnoten o'ch neñotatas attof atet yepena ya.

¹⁵ Yapa' ama yeposañoñeye' o' yo'notañsa'mueno atet soteneysa, tarro'mar ama çhoye' o' yarepeno orrats.

¹⁶ Añña ñeñt sentyen te' ñeñtpa' añ o' etsota ñeñt atet ote't Joel ñeñt a'mñtaye't Yompor po'ñoñ ahuañ. Añña ñeñt quellquë't ahuañ Joel:

¹⁷ Añ atet oteney Yompor: Allempoch mellapoterrmocha, atetcha' perra, o'ch nenanet Necamquëñ pueyoçhreto, allohuen arromñañenesha' o'ch nechorratanet Necamquëñ. Añña penñreneñpa' ñetcha' a'poterret neñoñ ñeñtcha' neñotatuanet, ama't ñaña coyaneshachno a'poterrnancha' neñoñ. Añña ñeñt

- huepueshare' chocmach es norrtatyesanet ñeñtcha' entyesonet neshot. Añña ñeñt po'nmeneshare'pa' es norrtatyesanetcha' puechopoñeto.
- 18 Ama't allohuen ñeñt nesherbene', ñaña ama't coyaneshachno nenuanetcha' Necamquëñ pueyoçhreto attoch a'po-tonet neñoñ.
- 19 Allempoña enopa' o'ch nentatyesanet ñeñt ama't ahua'tapa' ama puentareto. Pat-sopa'cho'ña o'ch norrtatyesanet ñeñtcha' eñotaterrahuet. Quellareñtso'pa' norrtatcha' errasats. Puetomam'psanna'teño'tet pa'netserpa' orrterrach tso' erracmañen, chepoterrcha' amos ñaña erraparen.
- 20 Ama't ñeñt yeçhoyo'tam'pene' te' allempopa' puenaserrach checmete'. Arror-rpa'cho'ña allempopa' tsama'tterrach atet ñerra'mrrate' errasats. Atet'cha' yoroçhterra allempoch huerrmocha Yompor.
- 21 Allempopa' ama't erra'tsena çhore'te' Yompor pueyoçhrocmañen attoch a'quesh'pachpa', Yomporñapa' a'quesh'patanetcha'. Arrpa' allohua atet quellquë't ahua't Joel.
- 22 Añpa' ñeñtara alla o'terraneterr Pedro:
—O'ch masheñe judioneshacha' noterrser: Sapa' seño'teñ ahua'ñapa' orrte't Jesús ñeñt nazareto'marnesha'. Ñapa' çhocma orrtatonase't po'partsoteña, ñaña çhocma orrtatyesonase't ñeñt ama sentare ñeñtcha' seño'tate' ñapa'cho'ña nanac Parets. Pompor apuene'ña po'partsoña attoch seño'toñ Puechemer ña nanac Parets.
- 23 Añña ñeñtara Jesús sañapa' o' sepomhuer attoch corso'tam'pset. Sañapa' o' sa'p po'poñ acheñenesha' ñeñt atpare'tene' Yompor attoch ñetpa' o'ch muetset. Atet o' se'pohua, Yomporpa' ahua'toteñ eñotuase't atet'cha' se'pa, tarro'mar atet muene't ña.
- 24 Tarraña ama't rromuapa' Pomporpa' o' alla tantater. Tarro'mar amate' erroteno te'pa' alla a'po rromue'.
- 25 Ama't atet ote't David ahua't, atet ñerra'm Jesús eñoratse't. Atet ote't:
Napa' neñoteñ Nompor çhocma allo'tsenen parro epan. Ñach nanac ahua'mencat nepe' attoch amach nem'cha'to.
- 26 Ñeñto'marña nanac nocshena neyoçhro, nocsheñeshocma neñen. Ama't nerromapa' neñoteñ amach alla na'po rromue'.
- 27 Napa' neñoteñ amach a'ypo'ño no necamquëñ alla o'pono. Nomporpa' amach mueno o'ch puetsohua alla nechets tarro'mar ñapa' entenen e'ñe cohuenare' es nepen ñocop.
- 28 Añcha'ña o'ch entaterren attoch yocrrerra e'ñe cohuen. Poparrocmateño't epan ñapa' ñach nocshaterre' nanac. Allohua atet ote't David ahua't atet ñerra'm Jesús eñostse't.
- 29 Allempopa' alla o'terraneterr Pedro:
—O'ch masheñeshacha' noterrser, añ poctetsa e'ñe eñotochen o'ch notas: Yatañ David ahua'tpa' rroma. Rromapa' pampuet. All pampuetpa' yenteñ ama't teme'ttsen. Ñeñto'mar yeñoteñ ahua't allempo ote't añ ñoñetspa' ama añecpaye' serrpare'te'te e'ñe ñocop, añecopña serrpare'te't Jesúsocop.
- 30-31 Tarro'mar David ñapa' ña a'mtaye't ahua't Yompor po'ñoñ. Ñapa' e'ñe eñotue't atet'cha' pa ñeñtcha' Cristotats allempoch çhap añe patsro. Ñeñto'mar ama't ahua'toteñpa' eñose't atet'cha' tanterra ñeñtcha' Cristotats. Pomporpa' amach a'ypo'ño no Puechemer o'pono. Amach muenatoñe o'ch puetsohua po'chets. Yomporpa' ama't ahua'tpa' atet otan David o'ch noñ puesheñarr po'mrenño't ñeñtcha' am'cha'tarettatsa esempo. Davidpa' eñotane't Yompor ñapa' ama pueno po'ñoñ.
- 32 Te'ña yapa' o' yeñch Yomporpa' o' tantaterran Puechemer Jesús.
- 33 Te'ña ñapa' e'ñe allo'tsen epuet Pompor Parets all partsoten ento. Pomporpa' o' e'ñe aphue Puecamquëñ. Te'ña ñapa' añ ñeñtara Puecamquëñ o' chorratya yaña atet otnerrey

ahuaña. Ñeñto'marña o' orrtonaya atet sentyes ñorra', ñaña atet se'myes cohuen ñoñets e'ñe sa señoño.

³⁴ Ñeñto'marña yeñoteñ ama añecpaye' serrpare'te'te David e'ñe ñocop, tarro'mar ñapa' rromapa' ama tanterro allotpa' ama a'terro ento atet ñerra'm Jesús. Ñaña po'pocheño ahuatpa' eñose't David, atto' ote't:

Yompor Paretspa' atet otennan ñeñt e'ñe Nepartseshar nepen na (ñeñtara ñeñtcha' Cristoterrets): "Te'pa' o'ch ñanorruerr arr necohuenrot allcha' pecohuentapreterra.

³⁵ Attochña ama't ñeñt pe'moñe'tene' napa' o'ch e'ñe name'ñatuerranet allochñapa' o'ch atet perret ñeñt pemnen ña." Añpa' allohua atet ote't David ahuat.

³⁶ Allempoñapa' alla oterraneterr Pedro:

—Sapa' israelena'tares. Ñeñto'marña señoche'pa'ch e'ñe eñotochen atto Yompor Parets o' nan Puechemer Jesús. Ñapa' ña Partseshatets, ñeñtara Cristotats. Añ ñeñt Jesús sañapa' o' secorso'tamñpsach. Añpa' ñeñta allohua serrpare'tatanet Pedro.

³⁷ Allempoñapa' ñeñt matrra'tatsa allpa' o' çhapanet pueyoçhro añ ñoñets. Nanac llecanrrortet. Atet ochet Pedro ñaña po'potantañeçhno Jesús puellsensar. E'ñe puel-lquëño'tet atet otet:

—Masheñneshacha', erro'tenuachca'ye yeperraña te'.

³⁸ Pedroñapa' atet otanet:

—Te'pa' aña poctetsa ñeñtcha' seperra allohuenes. Te' sellquëño't o'ch soctape'cherr ello cohuen Yomporecop. Allochñapa' Yomporpa' peretna'huerrnascha' so'chñar. E'ñe same'ñeño't Jesucristo añ pocte' te' o'ch sapataretterra Partsocop. Allochñapa' Paretspa' chorratersach Puecamquëñ.

³⁹ Ñeñtapa' pocte' atetcha' seña, tarro'mar atet otnerrey Jesús o'ch chorratuerrya e'ñe puesheña'ttsoy Puecamquëñ, allohueney ñeñtey o' hua'ñerrey Yeyomporer Parets o'ch yame'ñera. Ñaña o'ch chorratuonasa ama't sa sechemerasha' Puecamquëñ, ñaña allohuen ama't ñeñt ella'paro'tsa'yenet.

⁴⁰ Allempoñapa' o' alla serrpare'taterraneterr attoch otanet pa'namen ñoñets. Attoch co'tape'chatanetpa' atet otanet:

—Amach soctape'chatsto atet co'tape'chen po'poñ acheñenesha' ñeñt ama ame'ñetso. Attotcha' sequeshperrach.

⁴¹ Allempoña allohuen ñeñt ame'ñaya Pedro atet otanetpa' o' apatarettet. Allempopa' ñato' allpon ame'ñatsa ma'pa mil acheñenesha'. Cha shontena ñeñt ame'ñatsa.

⁴² Allempoteñ ñeñt ame'ñatsapa' e'ñe ma'yochrenet atet ye'chatanete't Jesús puellsensar. Nanac cohuen entanna'tete't allecma apçhete't parro. Pueyerpueño'tet Jesús o' toma'ntatet pan atet ñerra'm Jesús po'chets. Nanac ma'yochete't e'ñe parro.

Atet corre't ahuat ñeñt ame'ñatse't

⁴³ Ñeñt Jesús puellsensarpa' orrtatanete't shonte' pa'namen ñeñt ama puentareto, orrtatanete't partsoteñets attoch eñochet añmapa' Partsepa't. Ñeñto'marña allohuen acheñenesha'pa' nanac mecha'na'tete't.

⁴⁴ Ñeñt ame'ñatsapa' çhocma apçhete't parro, pocsheño't apanna'tyesete't ñeñt es palltatse't.

⁴⁵ O'ch venda'yese'te't ñeñt echyenet ñaña allpon ñeñt o'patyese'te't ñeñtapa'cho'ña venda'yese'te't. Allpon gana'yese'te'tpa' o'ch apanna'tyesete't ñerra'm esesha' es palltatse't.

⁴⁶ Pate'tets yetpa' o'ch ahuanenet e'ñe parro Parets pa'paclo. Erro'tenopa' pueyerpueño'tet Jesús o'ch toma'ntachete't pan atet ñerra'm Jesús po'chets. Ñaña çhocmach rrallme'chapretanna'tete't pa'pacleto. E'ñe pocsheñeshet pueyoçhretopa' çhocmach rrallme'chete't. Allempopa' nanac amuerañterret.

⁴⁷ Ñaña chocmach aye'chochtatoñete't Yompor. Allohuen acheñenesha'pa' e'ñe cohuen entapretanete't ñeñt atet'pete't. Pate'tets yet' Yomporotpa' chocmach ame'ñachete't po'poñechno acheñenesha'. Atteñapa' o' cha shonta ñeñtcha' a'queshpatarettatsa.

3

Atto Pedropa' a'crraterran ñeñt echarttetsa

¹ Pamtarrpa' chap allempocma ma'yochenet Parets pa'paclo, atet'ñerra'm allempopa' ñato' o' ellerrenmoch. Pedroñapa' ahuo' Parets pa'paclo epuet Juan, o'ch ma'yochoset all.

² O'ña chapuet allpa' a'taposet Parets pa'paclo. Allempoña a'tapmochet allpa', allempocma huapachet ñaña puesheñarr ñeñt echarttetsa pa'tcoť, ama eshcaye'chope'cheno. Allempoteñ eñalleta ama chope'cheno. Chocmach pamo'tsesha'pa' o'ch aneñet allecma be'tenet Parets pa'paclo. O'ch na'nmet allotecma be'tosete't ñeñt otete't Ama Macohueno. Allñapa' allcha' enamare'tyen an quelle ñeñt be'tostse't Parets pa'paclo.

³ Ñeñtña echarttetsapa' entapan Pedro epuet Juan. Ñetpa'cho'ña be'tosmochet Parets pa'paclo. Ñaña' enamapanet quelle.

⁴ Pedroñapa' alla o'chet cohue' epuet Juan. Allempoña Pedropa' atet'otan ñeñt ama chope'chetso:

—Ñehua, pecua'y alla.

⁵ Ñeñtña echarttetsapa' alla e'ñe cohuanet, ñapa' otapañte' o'ch apet quelle.

⁶ Tarraña Pedroñapa' atet'och:

—Napa' ama necheno quelle, tarraña ñeñt nechenpa' ñeñtcha'ña napař. O'ch notař, e'ñe po'partsoteñoť Jesucristo ñeñt nazareto'marnesha' o'ch notař, pechope'cherrepa'.

⁷ Pedroñapa' chete' potot po'cohuenrotpa' o' echañch. Allempocma corra'huena pa'tcoť, ama't all meya'nen yetacpa' o' corra'huena poctacma.

⁸ Corra'huetsa pa'tcotpa' pocsheñoťpa' omacha enonet, o'ten e'ñe cohuen. Allempoñapa' chopeñe'chen. Ama't all chopeñe'chen omachme'tetsa all aye'chochtatenan Yompor. Atteñapa' be'tos Parets pa'paclo epuet Pedro ñaña Juan.

⁹ Allohuen acheñenesha' ñeñt allo'tsa'yen, ñetpa'cho' enteñet atto pa'ye'chochtateñesha' Yompor all chopeñe'chen.

¹⁰ Ñetpa' cheme'teñet añmapa' ñeñtara ñeñt anorrtse't allotecma be'tosete't Parets pa'paclo, ñeñt otenet Ama Macohueno, allecma enamare'te't quelle. Ñetñapa' atta cohuanrrorteñet.

Atto Pedropa' serrpare'tatan acheñenesha' Parets pa'paclo

¹¹ Añña ñeñt correrrtsapa' ama a'rroyen enterrano Pedro ñaña Juan. Allempoña all tomchenet all oteñet Salomón Popellrraro. Acheñenesha' po'yorñoťetpa' matrretet allo'tsen Pedro ñaña Juan ñaña ñeñt a'crraterr Pedro.

¹² Allempoña cha'cha'tet all tomchenetpa', añña Pedropa' otapanet, atet'ot:

O'ch masheñe israelneshacha' notas, eso'marte' secuanrrorteny. Chate' sotenapañ e'ñeťe' ya yehuamencoť yechope'chater, amapa' chate' sotenapañ e'ñeťe' ya, ya'cohuentateñoť yechope'chater. Añmapa' ama atteyaye.

¹³ Añcha'ña o'ch notas: Añmapa' Yompor orrtatene' ñeñt o' sentua. Añña Yomporpa' ñeñtara Po'yomporer pe't ama't Abraham ñaña Isaac ñaña Jacob, ñaña allohuen yatañeshañ. Yomporpa' e'ñe pocte' eñch o'ch cohuentatan Puechemer Jesús. Ñeñto'marña o' orrtatonas ñeñt o' sentua. Tarraña sa ñeñtara Jesús'pa' o' sepomhue. Ama't allempo Pilatopa' pocte' enteñeñ o'ch a'rroyereñ, tarraña sañapa' cha sa'nasotañpesya allohuenes.

14 Ama't ñeñt nanac Parets, ñaña ama't ñeñt e'ñe pocte' es pets, sañapa' cha sa'nasotam̄pesya. Allempo Pilatopa' ama't mueneñ o'ch a'rroyer, sañapa' aña sanam̄ ñeñt amtsañ ñeñtcha' a'rroyonaset.

15 Ñañaapa' chaña semtsach ñeñt alloch e'ñe yocrra. Tarraña ama't muetsetañpa' añña Pomporpa' o' alla tantater. Tarro'mar yapa' yeñoteñ yapa' yenter ama't allempo tantuerra.

16 Ya yeyemteñoť e'ñe Jesús o' correrra ñeñt ama chope'chetso ñorra'. Ama't sapa' señoteñ atto ahuañapa' ama chope'che'te. Tarraña te'pa' o' senter o' chopeñe'cherr. Yapa' o' yame'ñera Jesús ñeñt o' a'crrataterran ñeñt echartatse't ahuaña. Te'ña ama't sapa' o' sentuer allohuenes.

17 Te'ña masheñeshacha' napa' neñotenes ahuaña sapa' ama es sečhapoyo seyočhro allempo semtsach Jesús. Ama't ñeñt sa'm̄cha'tareťnesha' ama es čapahueto pueyočhreto ñamet.

18 Tarraña ñeñt atet seřohua te'pa' o' etsoterra Yompor po'ñoñ. Tarro'mar allohuen ñeñt a'm̄taye't Yompor po'ñoñpa' attecma otete't, ñeñtcha' Cristotats Partsocoppa' mue-ročhtachetcha' esempo. Ñeñto'marña te'pa' o' etsota Yompor po'ñoñ ñeñt aquellcareť.

19 Ñeñto'marña te'pa' añ poctetsa e'ñe sa sellquëñoťpa' o'ch soctape'cherr ello cohuen Yomporecop. O'ch sesuanom ñeñt ahuatoteñ soctañña. Attotcha' Yomporpa' e'shohuerrnascha' so'chñar.

20 Attochña separrocmateñoť epas Yomporpa' socsherrach seyočhro. Ñaña Yomporpa' o'ch alla mueñerrnaserr Cristo Jesús ñeñt anarettatsa ñaña socop.

21 Tarraña te'pa' e'ñe pocte' allach pue'ntaño tarremphua esempohuañencha' a'poctatareťetua ora allohuen ñeñt atet eñose't Yompor ahuať. Ama't ahuať Yomporpa' eñorana'tane't acheñ ñeñt e'ñe pocte' ente't Parets ñeñtcha' a'm̄te' po'ñoñ, ñeñtcha' etsoterrtsa esempohuañen.

22 Añmapa' ñeñt atet ote't ahuať Moisés: "Yompor Paretspa' orrtatonascha' ñeñtcha' a'pote' po'ñoñ, ñeñtara sa samo'tsna'tarotpa' orrtatonascha', atet ñerra'm na, Yomporpa' o' orrtaterren na namo'tsna'tarneshacop. Tarraña socoppa' añ poctetsa čocmach se'm̄ñoter erroťencha' oterres.

23 Tarraña ñerra'm esesha' amach e'm̄ñoterraye ñeñtcha' orrterrtsa, ñeñtña acheñerpa' ahuo'ch a'chencatareťerrach. Pamo'tsesha'ña israelnesha'pa' amach allo'na ente-neñeto." Añpa' allohua atet ote't Moisés ahuať.

24 Alla oterrerr Pedro:

—Ama't allohuen ñeñt a'm̄taye't Yompor po'ñoñ ahuaťpa', eñosete't ñeñt o' etsotuerra te'. Ama't Samuel ñeñt a'm̄taye't Yompor po'ñoñ ahuať, ñaña allohuen ñeñt allempoteñ a'm̄taye't Yompor po'ñoñ, añña eñosete't ñeñt o' etsotuerra te'.

25 Añña ñeñt a'm̄taye't Yompor po'ñoñ ahuaťpa' ñeñtara samo'tsna'tar sepe't ama't sa. Atet Yompor a'poctatan ñoñets ahuať satañeshacoppa' añ ñeñtara ñoñets attecma a'poctatareťta ñaña socop. Atet ñerra'm ahuať atet otan Yompor sato' Abraham: "Ñeñt puesheñarroť pemrenñoťpa' norrtatanetcha' ñeñtcha' ama't allohuen pa'namen acheñenesha'pa' coshaprechetcha'."

26 Yomporpa' o' orrtatonay Puechemer o' mueñonay ñeñtey judioneshay yanom. Allochñapa' ña o'ch coshaterrey nanac atet ñerra'm allempo o' cotape'chaterrey e'ñe cohuen, ñaña allempoteñ o' yequečhpa'huerr ñeñt ama pocteyaye Yomporecop.

4

Allempo anmet Pedro ñaña Juan allo'tsa'yen a'm̄cha'tareťnesha'

1 Allempoña serrpare'tatenanet Pedro epuet Juanpa' machayoťa huačha'toña a'm̄cha'tareťnesha'. O' huapa cornanesha', huapa ñaña guardia pa'm̄cha'tareťer ñeñt

cohuam̄pene' Parets pa'paquëll. O' huapoña ñaña saduceonesha' ñeñt̄ otets e'ñe ñet p̄oc̄taññōtpa' amach errotenōt yetanterro.

² O' huācha'tetpa' čha e'moñe'toſet, tarro'mar Pedro ñaña Juanpa' añ serrpare'tatenan acheñenesha' atto ñerra'm e'ñe yame'ñera Cristo ama't yerroma, yame'ñeñōtpa' yetanerrach.

³ Pa'tsrre'mueñōtetpa' o' arrmarett̄et epsheño'maret, abe'tarett̄et cárcelo. Allempopa' o' ellerren ñeñto'marña tsapātach a'p̄to'tyesarett̄et errotenōtte' serrpare'tenet at̄et.

⁴ Tarraña ama't at̄et āparett̄etpa' añña ñeñt̄ e'mue' at̄et serrpare'tatanetpa' shonte' ame'ñyet. Allempoña ñeñt̄ ame'ñetsa ahuañōhuenpa' o' čhap allempo amnaroch mil ñeñt̄ ame'ñatsa.

⁵ Tsapāñapa' o' ap̄cha am̄cha'tareñnesha' ama't ñaña ñeñt̄ pompornesha' penet ama't ñaña ñeñt̄ etsotene' ñoñets ñeñt̄ at̄et anaret̄. Ñeñt̄pa' arr ap̄chet e'ñe alla Jerusaléño.

⁶ Allempopa' allo'tsen ñaña cornesha' ñeñt̄ nanac am̄cha'taret̄ ñeñt̄ pa'so'cheñ Anás. Allo'tsen ñaña Caifás, ñaña Juan, ñaña Alejandro ñaña po'poñechno am̄cha'tareñnesha' ñeñt̄ e'ñe pamo'tsna'tarecma cornesha' ñeñt̄ nanac am̄cha'taret̄.

⁷ Allempoña e'ñe ap̄cha'huetpa' huapachet Pedro ñaña Juan e'ñe all ap̄chena am̄cha'tareñnesha'. Allempoñapa' a'p̄to'tarett̄et epsheño'maret. At̄et otanet am̄cha'taret̄:

—Sapa' ¿esesho'tña po'huamencot̄ o' sa'crraterña acheñ? ¿Esesha'tña sapuene'ña llesens at̄ot̄ at̄et sepena?

⁸ Allempoña Pedro e'ñe ahuamencat̄ puepeñō Parets Puecamquëñpa' at̄et otanet:

—Am̄cha'tareñneshacha' ñaña ñeñtes pompornesha' penet, te'pa' o'ch notas:

⁹ Sapa' atto sa'p̄to'teney errotenette' o' yēpa ya cohuen añecop ñeñt̄ mueročhtetsa, ñaña atto sa'p̄to'teney errotenōtte' o' ya'crrater,

¹⁰ ñehua, te'pa' o'ch se'mñnoten at̄toch neñotatas sa ama't ñaña allohuen israelnesha'. E'ñe añ Jesucristo ñeñt̄ nazareto'marnesha', ñeñt̄ña ña po'huamencot̄ te'pa' arr ten e'ñe huomech, ñeñt̄ ahuaña čha echartena. Añ ñeñt̄ara Jesús sañapa' čhaña secorso'tam̄pes at̄toch rroma. Tarraña Pomporpa' o' tantater ama't rroma.

¹¹ Sapa' čha sottena at̄et ñerra'm acheñ ñeñt̄ tomatene' pocoll. Ñeñt̄ña acheñ ñeñt̄ tomatene' pocollpa' čha huapore'tan mapue' ñeñt̄ nanac sherbets, tarro'mar ama es čhapahueto pueyočhro. Tarraña Jesúsapa' ama't at̄teñ ñerra'm mapue' ñeñt̄ ahua-pore'taret̄ ñeñt̄ara Jesús ñeñt̄ña nanac sherbets at̄et ñerra'm mapue' alloch orratet pocoll nanac echart.

¹² Po'psheñeñpa' ama eñalle alloch yequeshperra, tarro'mar ama eñalle po'psheñeñ ñeñt̄ anaret̄ ñeñt̄cha' yečhore't at̄toch o'ch a'queshpatey. Ama't ora erracmañen añe patsro ama eñalle at̄toch yequeshperra, ñap̄taña Jesús. Ñeñt̄pa' allohua at̄et otanet Pedro.

¹³ Añña Pedro ñaña Juanpa' ama pueñcha'nañōfeye' eñoseto. Ama't mameshapa' ama mecha'teneto. Allempoña am̄cha'taretechnopa' o' eñochet ama pueñcha'nañōfeye' eñenetopa' ñetpa' at̄et otet:

—Errotenotuaca'ye eñenetña at̄et. Yapa' yeñnotenat̄et ñetpa' ama ayčhatarett̄eto at̄toch eñotet quelled huomenc. Ñetpa' atteta ñerra'm po'potantañ acheñenesha' ñeñt̄ ama tama es eñotetso. Errotenōtuañaca'ye eñenetña at̄et ñerra'm ayčhataret̄et.

Allempoñapa' o' čhapanet pueyočhro atto Pedro ñaña Juanpa' ahuaña čhocma chopeñe'che't̄ epuet Jesús.

¹⁴ Añña ñeñt̄ corrrertsapa' ñapa'čho' e'ñe alla ten allame'tets. Ñeñto'marña am̄cha'tareñnesha'pa' ama errotenōt che'ptare'taneto.

¹⁵ Allempoñapa' mueñerranet a'yeneť. Allempoña am̄cha'tareñnesha'pa' serrpare'tatanna'tet e'ñe ñañeñeta.

¹⁶ At̄et otanna'tyeset:

—Errotenuachñaca' yeřanetña te'te'. Ama't arr ora Jerusaléñopa' o' e'ñe eñotuařet tet atto ñetpa' orrtatet ñeñt ama't yapa' ama yentare. Ñeñto'marña te' yapa' amach erroteno ya'nasochoña', e'ñe po'ñočh atet.

17 Tarraña ama'tcha' ama erroř yeřanetopa' te'pa' añ poctetsa o'ch yeche'ptare'tyesanet o'ch yotanet amach allo'na serrpare'tnenetoña ñeñt atet pena Jesús. Tarro'mar yapa' ama yemno allohuen acheñenesha' o'ch e'mare'taretetuet ñeñt atet penet te' ñet arr. O'ch yotanet ama't puešeñarra acheñ amach serrpare'tatatscheto.

18 Allempoñapa' alla agotare'tterret. Atet otare'ttapuerret e'ñe eche'čharro, atet otet:

—Te'pa' amach seserrpare'tatatsto ñeñt atet pena Jesús, ama't e'ñe mamesha. Ñaña amach seyčhatatsto ama't mamesha atet yečhate't Jesús ahuaña.

19 Allempoña Pedro ñaña Juanpa' atet otanet:

—Ñehua, te'pa' o'ch soctape'ch sa, allořpa' o'ch sotey, erra'tsente' pocte' enten Yompor, ñato' o'ch yame'ñasa sa amapa' o'ch yame'ñya Yompor.

20 Yapa' amach errotenoř yemmo. Añña pocte' čhocmach ya'pořa ñeñt o' yentua ñaña ñeñt o' ye'mua.

21 Allempoñapa' atta che'ptare'tuapuenanet po'pocheño, allořña'pa' a'rroyare'ttenet. Amiča'tare'tnesha'pa' ama't mueneñetañ o'ch castiganetañpa' tarraña ama errořeno, tarro'mar allohuen acheñenesha'pa' e'ñe pocte' enteñet. Acheñenesha'pa' nanac aye'chočhtatoñet Yompor añecop ñeñt o' entuet atto Yompor orrtatanet po'partsoña.

22 Tarro'mar añ yacma ñeñt o' correrrapa' ñapa' o' pa'tatsoch čharra' po'charña.

Ñeñt ame'ñetsapa' atet pet allempo enamet Yompor po'huamenc

23 Allempoña a'rroyeret Pedro ñaña Juanpa' ahuanmuet allo'tsen ñeñt parro ame'ñenet. Allempoña čhapuet allpa' serrpare'tatosanet atet otanet ñeñt pa'miča'tare'ternesha' pen allohuen judionesha' po'cornaneshar ñaña ñeñt pompornesha' penet.

24 Allempoña serrpare'tatuosetpa' ñetña allohuenet parro'pa' o' ma'yocheret Yompor. Puema'yochenořpa' atet otet:

—Yompore, ñeñteř nanac Partsoř, řa ñeñteř yečhcatue' enet ñaña ama't añ pats, ñaña ora erracmañen sa'p řa yečhcatue', ñaña ama't ora esocmañen ñeñt yentyen e'ñe alla e'ñe řocma peyečhcatuar.

25 Ahuař yatañ Davidpa' nanac sherřape't. E'ñe Pecamquēñoř pe'ñorache't, ñeñto'mar atet ote't ña ahuař:

Errotenoře' atsrre'muenaña po'poñ acheñenesha' ñeñt ama ame'ñetso. Errotenoře' o'pateñetña ama't Parets, ñeñt'pa' e'ñe orrena atet penet.

26 Ñeñt amiča'tare'ttetsa arr patsro ñetpa' apčhet attoch o'pachet Yompor, o'pachet ñaña ñeñt llesensa' ñeñtara Cristo. Añpa' allohua atet ote't David ahuař.

27-28 Alla ma'yochereterr Yompor, atet oterreterr:

—Ñeñto'marña te'pa' po'ñočh o' etsota atto arr Jerusaléño o' apčhet attoch o'patonapet Pechemer Jesús ama't ñeñt e'ñe cohuen Parets penten řa, ñeñtña Jesús ñeñt e'ñe cohuen pesherřaye't ñeñt e'ñe řo pellsensar. Atet ahuařoteñ e'ñe peñotuanete't ñetpa' o'ch etsotaterrnapet peñoñ atet ñerra'm Herodes, ñaña Poncio Pilato, ñaña po'poñečhno acheñ ñeñt ama ame'ñetso, ama't ñaña israelnesha'. Tarraña ñeñt atet o'pachetpa' te'pa' o' etsotuerra peñoñ.

29 Ama't te'pa' Yompore peñoteny ñetpa' nanac mueneñet o'ch yore'tame'tyets yaña. Te'pa' o'ch yenamař ahuamencat peřa'yepa'ch ñeñtey torretsa řocop attoch amach yemiča'tatsto. E'ñepa'ch huomencocma yeserrpare'tonař peñoñ.

30 Porrtatonayepa'ch pehuamenc attoch corra'huerra ñeñt atsna'tyets. E'ñe yečhore'teñoř Jesús porrtatonayepa'ch pepartsoña, ñaña ñeñt ama yentare

þorrtatanetcha' attoch eñochet þapa' ñeñteþ nanac Partsoþ —e'ñe yeçhore'teñoñ Pechemer Jesús, ñeñ e'ñe cohuen Parets penten þa, ñeñ e'ñe cohuen pesherbene'. Añpa' allohua atet ma'yochet.

³¹ Allempoña ma'yochuetpa' allña apçhenetpa' o' pella ora all anorrçhenet. Allempocma allohuenetpa' o' chorraret Parets Puecamquëñ, attoch e'ñe huomencocma o'ch serrpare'toñet Yompor po'ñoñ.

Atto es apanna'tyesete't pame'ñeñoñet Yompor

³² Allempoteñña ñet ñeñtet ame'ñatsete'tpa' o' parrocmatuet e'ñe cohuen. E'ñe parra cotapñats anmuete't pueyoçhreto ñeñt amuerañtetsa. Ama eseshaye' otatsete'ñeñtpa' ñapñtetach es o'patet, añña çhocma apanna'tyesete't ñerra'm esesha' es palltatsete't.

³³ Jesús puellsensarnesha'pa' e'ñe po'huamencocmañen a'poñoñete't atto tanterra Yepartseshar Jesús. Yomporpa' nanac mueranete't, ñaña nanac ahuamencat þanete't.

³⁴ E'ñe ñeshetopa' ama esesha' es palltatsete't. Añña ñeñt allpon echyesete't po'patseñ, amapa' pa'paquëllpa' o'ch venda'yesete't. Ñeñña allpon gana'yesete'tpa' o'ch huapachet

³⁵ allo'tsen allsensare't. Alloñapa' o'ch aposet ñeñt allsensare't. Allsensare'tña'pa' o'ch apa'yesan ñeñt es palltatsete't.

³⁶ Añpa' ñeñt atet pe't puesheñarr añ pa'so'cheñ José, ñeñt chipro'marnesha' ñaña ñeññara levitana'tar. Añña ñeñt allsensare'tnesha'pa' o' socheret José Bernabé. Añña so'chñets Bernabépa' ñeñt otets yeñoño amuerañana'tar.

³⁷ Ñaña'pa' echane't allpon pats. Allempoñapa' venda'huepa' o' huapatan allpon quelle ñeñt ganapa' o' aposan ñeñt allsensare'tnesha'.

5

Atet þa Ananías epuet puetapor Safira

¹ Tarraña eñall po'psheñeñ ñeñt atet þatsete't po'poñ, ñeñtpa' añ pa'so'cheñ Ananías epuet puetapor ñeñt pa'so'cheñ Safira. Añña Ananíaspa' o' vendan allpon po'patseñpa'

² o' huapatan quelle, aposan ñeñt allsensare't. Tarraña ama oraye' huapatuano quelle çhach shequënet. Tarro'mar ñet epuet puetaporpa' atet a'pochtachet o'ch yoret allpon quelle e'ñe ñocpuet.

³ Allempoña aposan allsensare't ñeñt o' allponañña quellepa', Pedroñapa' atet och:
—Eso'mare't pemnateñ oneñe't o'ch cotape'chataþ po'poñ peyoçhro. Papa' pemneñeñ o'ch peshquëñ ama't Parets Puecamquëñ atto þapa' ahuo't peyorañ allpon quelle.

⁴ Ñeñt pepatseñpa' e'ñe po'ñoçh ñeñtpa' þo. Tarraña ñerra'm ama þa muenatsñe o'ch pevendeñpa' ñeñtpa' e'ñe pocten. Ñaña ama'tcha' pevendeñpa' ñerra'm ama þa muenatsñe o'ch þapyeñ ora allpon quelle ñeñt þagappa', ñeñt e'ñe pocten ñaña. ¿Erro'tenote'ña þoctape'chña atet peyoçhro? Ama yapteye' pemnenñe o'ch peshca'yeñ, Yompore'ñaña pemneñeñ o'ch peshquëñ ñaña.

⁵ Allempoña Ananíaspa' ñeñta e'muapa' a'taco'roche' e'ñe allpa' o' rroma. Añña po'potantañ acheñenesha' allempo e'mare'chetpa' nanac yorenet huomenc.

⁶ Añña yacmanesha' ñeñt po'nare'pa' o' huapuetpa' ñetña'pa' eþatsete't ñeñt rromats o' anmet a'yo all pampueñeta'.

⁷ Tematenpa' o' huapa ñaña puetapor ñeñt rromats. Ñapa' ama eñoteñe o'te' rroma puerrollar.

⁸ Allempo huapa Pedroñapa' o' a'þto'taþ:

—Ñehua, þoten, ¿po'ñoçhte' allpona quelle sagap allempo sevenda'hua sepatseñ?

Puetaporña'pa' atet och:

—Allponaca'ye quelle ñeñt yagap.

⁹ Pedroñapa' atet otererr:

—Tarraña sapa' ahuo't sa'pochtach epaḡ perrollareñ atetcha' seḡa. Cha't sotapañ ñato' o'ch seshquëñ ñaña ama't Parets Puecamquëñ. Pecue' o' be'toscha'tuerrmoch ñeñt' o' pampa'huennaḡa' errte' perrollareñ. Papa'cho' attecmapa' anmapetcha' a'yo.

¹⁰ E'ñe allempocma puetaporpa'cho'ña o' taco'ra ñaña e'ñe alla Pedresho, o' rroma ñaña. Allempo be'toscha'tuerr ñeñt' anmue' puerrollareñ, allña'pa' entuerrñañet puetaporpa'cho'ña o' rroma. Ñapa'cho'ña anmetpa' o' pampueñeta' a'yo epuet puerrollareñ.

¹¹ Atarr mecha'na'tet allohuenet ñeñt' pame'ñeñoḡ apchetsa, ama't allohuen ñeñt' e'mare'te'pa' cha yorenet nanac. Añpa' ñeñta allohua atet ḡa Ananíasoñ.

Atto Jesús puellsensarnesha'pa' orrtatete't Yompor po'partsoña

¹² Añña ñeñt' Jesús puellsensarpa' nanac orrtatete't Yompor po'partsoña, ama't ñeñt' acheñenesha'pa' ama puentare attoch eñochet añmapa' Partsepa't. Añña ñeñt' parro ame'ñenetpa' arr apchenet all ochete't Salomón Popellrraro.

¹³ Po'potantañ acheñenesha' ama't e'ñe pocte' eñchete't ñeñt' ame'ñetsapa', allempoña ñet puenñchañoḡetpa' ama apcherreto parro.

¹⁴ Allempoñapa' allo'na atonetnena po'poñechno acheñenesha' ñeñt' o' ame'ña. Shonte' o' ame'ñana Yompor, ama't coyanesha'chno ñaña yacmanesha'chno.

¹⁵ Añña ñeñt' atsna'tyetspa' o' anmet a'yenet allecma chopeñe'chenet. Allña'pa' o' ḡanrra'tyesoset topantso, ñaña puesheña'tetspa' ñato' ora po'maye'na. Tarro'mar anmareḡetyeset allecma chopeñe'chenet allochñapa' ñerra'm mache' huena Pedropa' esheccha' ama't pa'choyeshe'ma po'poma'mteñapa' chapcha' ñesheto, ñato' attotpa' o'ch correrret.

¹⁶ Ñaña ama't allampañoḡ Jerusaléñoḡpa' huapatoñ acheñenesha' atsnañeḡechno ñaña ama't ñeñt' chorrena oneñeḡ. Allochñapa' allohuenetpa' o'ch corra'huerret.

Allempo Pedro ñaña Juanpa' abe'tarettet cárcelo

¹⁷ Allempoñapa' ñeñt' cornesha' ñeñt' nanac añcha'tareḡpa' e'moñe'tan allohuen ñeñt' ame'ñetsa. Ñaña allohuen ñeñt' parro e'ñe attecmet coḡape'chenet ñeñt' otenet saduceonesha'pa' o' e'moñe'chet ñeñt' ame'ñetsa. Tarro'mar sope'chapretenetña', acheñenesha'pa' e'ñe cohuen enteñet ñeñt' ame'ñetsa.

¹⁸ Allempoña allsensareḡnesha'pa' rromueñetpa' o' abe'tarettet cárcelo e'ñe allecma abe'teñet acheñenesha'.

¹⁹ Tarraña ama't abe'tarettetpa' tsapoñapa' o' huapanet Yompor po'millañoḡeñer ñeñt' huetsa pue'ntañoḡ o' torañperranet, o' chapaterranet a'yenetpa' atet otanet:

²⁰ —Añ poctetsa o'ch ahues Parets pa'paclopa' o'ch satomos all o'ch seserrpare'tach allohuen acheñenesha' ora atet yocrena etserra cohuen Partsocop.

²¹ Allempoña ñeñta e'mhuetpa' e'ñe ahuaḡecma ahua'muenet Parets pa'paclo, o' be'toscha'toset, allña yeḡhata'muenet.

Añña ñeñt' cornesha' ñeñt' nanac añcha'tareḡpa' o' chapamuen ñaña ellonet allotcha' agotatan añcha'tareḡnesha'. O'ch chapamuen ñaña allohuen ñeñt' coḡene'. Allotcha' agotatan allohuen añcha'tareḡnesha' ñeñt' chocma a'pochtatyene' ñoñets ñeñt' pompornesha' penet israelena'tarnesha'. O'ña chaḡha'tuetpa' o' serrpare'tatanna'tet attoch a'pochtachet atetcha' pet. Allempoñapa' o' agotachet ñeñt' abe'tatenet cárcelo.

²² Tarraña allempoña chap cárcelo ñeñt' mueñenetpa' ama es entosetoña cárcelo. O' puererreretpa' atet otueret añcha'tareḡnesha':

²³ —Yapa' allempo yeḡchap cárcelopa' o' yentos cárcel e'ñe poctacma echarr ayotañḡsareḡ, ñaña ñeñt' cohuanḡpene'pa' alla tomchenet allot be'tenet. Tarraña allempoña toretpa', o'ponoñapa' ama esesha' eñalle ama't puesheñarra.

24 Allempoña ñeñña e'mua amcha'taretnesha' ñeññ po'cařtáner penet ñeññ cohuam̄pene' Parets pa'paquëll ñaña ñeññ pa'mcha'tareternesha' pen allohuen judionesha' po'cornanesharpa' ñetñapa' atet otet:

—Esocopte'ca'ye o' čha'nmačhenette'. Te'pa' errořuanencha' pette' tsapařonet.

25 Allempoñapa' huapa puesheñarr atet otosanet:

—Añña ñeññ sabe'tat ellerro cárcelopa' te'ñapa' alla tomčhenet Parets pa'paclo yečhatetset all.

26 Allempoña añña capitán ñaña ñeññcha' yenpue'pa' o' ahuanmuet allo'tsen allsensaretnesha'. O'ña čhapuetpa' o' ahuenaneta' e'ñe cohuenacma. Tarraña ama erroř paneto țarro'mar capitánpa' čha mecha'tenan acheñenesha'. Ñato' čho'te' rrolle'chet.

27 O'ña čapaterranetpa' nosanet e'ñe allo'tsa'yen ñeññ čhocma a'pocatyene' ñoñets. Añña cornesha' ñeññ nanac amcha'tareřpa' atet otanet:

28 —Ahuañapa' ama't e'ñe eche'čharro yotuas amach seserrpare'tatsterrero ñeññ pocřapña Jesús. Tarraña sapa' ahuo't alla seserrpare'tatuerrerr ñeññ so socřapña. Ama't allohuen ñeññ yečheta arr Jerusaléno o' alla seserrpare'tatuererr. Te'ñapa' allo' seyohuerrerr ahuo' yemtsach añ Jesús.

29 Allempoñapa' otanet Pedro ñaña ñeññ epuet, ñetñapa' atet ochet:

—Añña e'ñe pocře' amach acheña yame'ño, añña Yomporcha'ña yame'ña.

30 Sapa' o' sepata'pes Jesús tsacho attoña o' semtsatach. Tarraña Pomporpa' ña tantaterre'. Añpa' ñeññara Yompor ñeññ Po'yomporer pete't ñaña ahuař yatañneshañ.

31 Te'ña Pomporpa' o' nanac ahuañenat pe', e'ñe po'cohuenrořpa' all partsoten. Allochñapa' attoch cotape'čhaterran israelena'tarnesha' ñaña attoch cotape'cherret cohuen e'ñe etserra attoch peretnerranet po'chñar. Ñeñño'marña Yomporpa' nan Jesús ñeññcha' Ya'queshpatañer yepen.

32 Ñeñño'marña te'ña yapa' ya'poteññañ atet pena Yompor. Yompor Puecamquëñpa'čho'ña ñeññ eñotatets. Ñeññara Puecamquëñ ñeññ nennay yeyoçhro, allohuene y ñeññey ame'ñenaya ña. Añpa' allohua atet otanet Pedro.

33 Allempoña ñeñña e'mhuet ñeññ atet ot Pedropa' añña amcha'taretnesha' nanac atsrre'matanet, atarr mueneñetañ ahuo'ch muetsuet ñeññ allsensaretnesha'.

34 Allempoñapa' añña puesheñarr fariseo ñeññ e'ñe parro a'pocatyene' ñoñetspa' o' tomos attoch eños. Ñeññ tomosetspa' añ pa'so'cheñ Gamaliel, ñapa' ña ñeññ yečhatets ñoñets ñeññ atet anareř, țarro'mar ñeññ po'taruas pen. Ña allohuen acheñenesha'pa' e'ñe cohuen enteñet. Gamalielñapa' o' mueñatuerran allsensaretnesha' mame' a'yenet.

35 Ñeññ epuet cotape'chatannenetpa' atet otanet:

—Masheñe israelneshacha' o'ch notas: E'ñech cohuenacma ya'pocřach ñeññ atetča' yeřpanet.

36 Sapa' ama't seyerpueñoña atto ahuaña o' orřta puesheñarr ñeññ pa'so'cheñ Teudas. Ñapa' atarr muene't o'ch ayochresha'tta. Shonto' acheñenesha' ñato' allo'tseno'te' cuatrocientos ñeññ ame'ñata. Allempoñapa' allponmaterrerrpa' o' muetsset. Ñeññña pueyochresha'pa' o' ahuanomyerret ñopa'ttsocmuet. Allempoñapa' o'huañ es cotape'chet.

37 Allempoña allponmaterrerrpa' orřta ñaña po'psheñeñ ñeññ pa'so'cheñ Judas ñeññ galileo'marnesha'. Ñapa' țarřempo orřta allempo quellcatyenet pa'so'chñeçhno amcha'tareřesho. Ñapa'čho'ña tama yochresha'tana allpon acheñenesha'. Allponmaterrerrpa' ñapa'čho'ña o' chenca. Añña ñeññ pueyochresha'pa' o' parratse'tuerret.

38 Ñeñño'marña te'pa' o'ch notas, o'ch sa'rroyer ñeññ serrpare'tene' ñeññ atet pena Jesús. Amach erroř seřatstaneto, țarro'mar ñerra'm e'ñe ñořořeta pocřapñoř atet penetpa' ñeññpa' mameshapa' o'ch huañerr.

³⁹ Tarraña ñerra'm poctaṗñetpa' Yomporeshot huenapa' amach errotenot sehua-pore'tache. Ñato' sapa' cha se'moñe'teññañ ama't Yompor poctaṗña. Añpa' ñeñt atet otan Gamaliel añcha'tareñnesha'.

⁴⁰ Ateṗ coṗape'chatanet Gamalielpa' e'ñe pocte' eñchet. Allempoñapa' alla agotaterran allsensareñnesha'. Allempoña huaçherretpa' o' nalle'tatanet añcha'tareñnesha'. O' nalle'tatuanet añcha'tareñnesha'pa' allotñapa' otarettet ñaña e'ñe eche'charro:

—Te'pa' amach seserrpare'tatsterrero ñeñt atet pena Jesús. Allempoñapa' a'rroyarettenet.

⁴¹ Allempoñapa' o' ahuanenet, o' sa'neñet ñeñt chocma a'pocatyene' ñoñets. E'ñe pocsheñeshocmañen ahuanenet tarro'mar Yompor e'ñe pocte' entanet ñeñto'mar muenatanet o'ch mueroçhtet ñocop.

⁴² Allempoteñ paṗe'tets yetpa' chocmach yeçhatete't Parets pa'pacillo ama't ñaña e'ñe alla pa'pacleto. Nanac serrpare'tete't atto Jesúsapa' ña Cristotats.

6

Arrpa' allempo net cançherrsheña ñeñtcha' epatyesahuet rreñets

¹ Allempoteñña'pa' allo'na sen atonetnomtsa ñeñt ame'ñetsa. Tarraña e'ñe allem-popa' o' sope'channa'tet. Ñehua, tarro'mar allempopa' atet pete't. Paṗe'tets yet Jesús pueyochresha'pa' o'ch apa'yesan allohuen rretorrnanesha' rreñets ñeñt pallta yesatset rreñets. Ñeñt e'muene' griegaçhpa' ñetpa' atet otyeset:

—Ñeñt yamo'ts rretorrnanesha'pa' ñetpa' ama allponeshacmaye' rreñets agapueto allpon agapyes ñeñt e'muene' hebreyach. Yamo'ts rretorrnanesha'pa' coñe'ta agapyeset. Ñeñtña rretorrnanesha' ñeñt e'muene' hebreyachpa' shonte' rreñets agapyeset. Attoña sope'channa'tet.

² Allempoñapa' ñeñt çharrasheña puechena epa ñeñtara Jesús puellsensarpa' ñetñapa' agotatuat allohuen ñeñt ame'ñetsa. O'ña apçha'huetpa' atet otarettapuet:

—Yapa' ama tama pocteye' yenteñe ama't mameshapa' o'ch ya'rroya serrpare'te' Yompor po'ñoñ. Shonte' yet ya'pertaten attoch yapa'yes allohuen rretorrnanesha' rreñets.

³ Añña pocte' masheñeshacha', o'ch se'ñ cançherrsheña ñeñtara ñeñt ey ame'ñetsa arr parro—erra'tsente' cohuen acheñ senten ñaña ñeñt chorrena Parets Puecamquëñ ñaña ñeñt atarr eñotene' ñeñt cohuentetsa Yomporcop. Añ ñeñtara cançherrsheña ñeñtcha' po'taruas pet attoch epatyeset ñeñt pallta'yetsa rreñets.

⁴ Allochñapa' yapa' añach yema'yochra ma'yochatsa ñaña o'ch ya'potoñ Yompor po'ñoñ. Ñeñtach paṗerr yetorrena. Ateṗ otanet Jesús pueyochresha'.

⁵ Allempoña acheñenesha'pa' e'ñe pocte' eñchet allohuenet. Allempoñapa' o' neñet Esteban ñeñt nanac ame'ñetsa ñeñt e'ñe chorrena Parets Puecamquëñ. Alloṗpa' neñet ñaña Felipe, ñaña Prócoro ñaña Nicanor ñaña Timón ñaña Parmenas ñaña Nicolás ñeñt antioquio'marnesha' ñeñt ahuatoteñ ame'ñate't judionesha'.

⁶ Añña ñeñt cançherrsheña acheñpa' o' ahupatarettet allo'tsen Jesús puellsensar-nesha'. Añña allsensareñnesha'pa' allenta ma'yochamṗesyet, o' net pot ñesheto, atet otarettet ñeñtcha' po'taruas pet.

⁷ Allempoñapa' o' e'ñe epa'hua Yompor po'ñoñ ora. Allempoñapa' allo'na sen shonta'nmatsa ñeñt ame'ñetsa all Jerusaléño. Allempopa' shonte' judionesha' po'cornaneshar ame'ñatsa.

Allempo rromuet Esteban

⁸ Añña Estebanpa' Yompor pomuereñoṗpa' nanac amueraña. E'ñe Parets po'huamencoṗpa' orrtatanet ñeñt ama puentareto atto eñochet añmapa' po'ñoçh Parets po'huamencoṗ orrtana.

⁹ Allempoñapa' puesheña'tets judionesha' o' achmeñet Esteban po'ñoñ. Añña judionesha' ñeñtara oteñet libertinanesha'. Ñetñapa' alla apchenet po'prahuo. Ñaña po'potantañ judionesha' ñeñt huetsa Cireneoť ñaña Alejandrioť ñaña Cilicioť ñaña Asioťpa'—ora allohuenetpa' e'ñe parrocmā achmāre'toñet Esteban po'ñoñ.

¹⁰ Tarraña Estebanpa' nanac es eñot atto serrpare'ten. Ñetpa' ama errotenoť anapeto. Estebanpa' añ chorraye't Paretš Puecamquēñ, ñeñto'marña ama errotenoť anapete'te.

¹¹ Allempoñapa' tsa'chet po'potantañ acheñ añecop attoch toma'tatoñet Esteban po'ñoñ. Ñeñt atsa'tareťpa' atet otet:

—Yapa' o' ye'm Esteban añ achmāre'ten Moisés po'ñoñ ama't ñaña Yomporpa' achmeñ. Ateť toma'tatoñet Esteban po'ñoñ.

¹² Allempoña acheñenesha' atet e'muetpa' o' e'moñe'chet Esteban. O' huapa ñeñt pompornesha' pen judionesha', huapa ñaña ñeñt etsotene' Moisés po'ñoñ. Huapapa' o' rromueñeta' Esteban o' anmet añcha'tareťneshesho allecma a'pocatenet ñoñets.

¹³ Chapuet allpa' alla toma'tatuerrñañeterr Esteban po'ñoñ, atet otoset:

—Añ Estebanpa' chocma achmāre'tenan Paretš pa'paquēll ñaña chocma achmāre'tenan Moisés po'ñoñ.

¹⁴ Alla oterreterr ñeñt atsa'tareť:

—Yapa' o' ye'm Esteban atet oten añ Jesús ñeñt nazareto'marnesha'pa' o'ch a'matam̄psey Paretš pa'paquēllpa' o'ch huapore'tatonay atet yechatye't Moisés.

¹⁵ Allempoñapa' allohuenet ñeñt allo'tsa'yen o' cohuanrrorchet Esteban. Tarraña o' eñchet e'ñe cohuen orrtena pa'clloyoť atet orrtena ñerra'mrrate' Yompor po'mllañoñeñer ñeñt huetsa entoť.

7

Atto Estebanpa' serrpare'tatan añcha'tareťnesha'

¹ Allempoñapa' añña cornesha' ñeñt nanac añcha'tareťpa' a'p̄to'tan Esteban, atet och:

—¿Po'ñocha't atet?

² Estebanñapa' atet och:

—Ñehua, masheñeshacha' allohuenes nomporneshacha' o'ch se'mñnoten, o'ch notas ñeñt atet pa'yese't ahuat yatañneshañ. Ahuatpa' Yompor ñeñt nanac Paretšpa' orrtane't yatañ Abraham all anetso Mesopotamia. Allempopa' ama chena' Haráno allcha' yeçherra.

³ Allempo orrtana Abrahampa' atet och ñeñtcha' atet pa: “Te'pa' o'ch ahuep̄ arroť o'ch pesa'nom añ peney, o'ch pesa'neñ ñaña p̄amo'tsesha', o'ch ahuep̄ allcha' notap̄.” Ateť och Yompor, atetcho' pa yatañ Abraham.

⁴ Allempoñapa' a'ypo'ña'nman all yeche't all yeçhanate't ñaña caldeo'marnesha' atto çhap allo'tsen anets Harán all yeçherra. Allempo o' rroma pomporeñpa' Yomporpa' o' alla anererr arma Canaáno all yeyçhena ya te'.

⁵ Tarraña allempo çhap arr ahuatpa' Yomporpa' ama apueña' añ pats, ama't coñe'ta. Tarraña Yomporpa' ahuo't och esempohuañen o'ch ap̄ añ pats, e'ñe ñocop, ama't puechemerecop, ñaña po'mñrenñecop. Tarraña allempopa' yatañ Abrahampa' ama chemere'tena'.

⁶ Allempocma Yomporpa' o' eñotatan Abraham attoch esempo po'mñreneñpa' ahuanmuetcha' arroť, çhapuetcha' po'poñ anetso Egipto all ama pa'nyempañooyaye, allcha' yeçha'huerret, allñapa' mueroçhtatapanetcha' allo'marnesha' acheñ. Ñaña añ eñotatan Abraham attoch ataruasatarettach e'ñe atta po'mñreneñ, e'ñe cuatrocientos char amue-roçhtataretet.

⁷ Tarraña Yomporpa' o' eñotatan Abraham ñaña po'poñ. Ahuo't och Yompor: “Tarraña napa' netsa'taterach ñeñtcha' mueroçhtate' pemñreneñ. Allempoñapa' huacherretcha' alla arr Canaáno allcha' ma'yocherrnet.”

⁸ Ñaña allempo Yomporpa' ahuo't otan Abraham po'poñ ñeñtcha' atet yecha' judionesha' allempoteñ errponohuañen, attoch eñochet Yomporpa' ama pueno po'ñoñ. Añmapa' ñeñt atet otan Abraham: "Añ pocte' o'ch setsorre allohuen asheñorrofollesha'." Ñeñto'mar allempo chemere't Abrahampa' puechemeretoll ñeñt soch Isaacpa' ahuo't tsorreñ. Po'psocmatño'pa' o' tsorre. Isaacña'pa' allempo o' po'npa' o' chemere'tana Jacob. Jacobña'pa' chemere'tana çharrasheña puechena epa ñeñtara yatañneshañ yepen ya ñeñtey israelena'tarey.

⁹ 'Tarraña allempopa' añña ñeñt yatañneshañ yepenpa' o' sope'cheñet pa'mo'nasheñ José. Ñeñto'marña o' pomet pa'mo'nasheñ. Ñeñña agapue'pa' o' aneñ baçhayo all anets Egipto.

¹⁰ Tarraña Yompor ña a'nataya. Yomporpa' o' a'pocatuon ora allohuen atto muerochtachete't. Añña ñeñt añcha'tarettatset Egiptopa' e'ñe cohuen entane't José. Añ ñeñt añcha'tarettatset Egipto ñeñtpa' oteñet Faraón. Faraónpa' eñotan José ñapa' nanac es eñoten. Ñeñto'mar añcha'tare't Faraónpa' o' nan José ñeñtcha' añcha'tarettapretaya all Egipto. Ñaña ora allpon ñeñt taruaset Faraón pa'paclo'marpa' o' nan José ñeñtcha' yechenahuet.

¹¹ 'Allempoña'pa' orrta muecheñets. Ora allohuen egipto'marnesha' nanac cheporrare'tet. Ñaña ora allohuen canaáno'marnesha'pa'cho'ña nanac cheporrare'tet. Pa'chporrño'etpa' nanac muerochtete't. Yatañneshañpa' ama echete'te pocrramet ama't coñe'ta.

¹² Allempoña'pa' yatañ Jacobpa' o' e'mare'tan orameñ rreñets Egipto. Ñeñto'marña mueñan puechemeresha' ñeñtara yatañneshañ yepen ya. Ñetpa' o' ahuanmuet Egipto o'ch rañteneta' rreñets.

¹³ Rañta'hueneta' rreñetspa' o' puerraçherret. Atomatpa' o' huañaperret pocrram'pa' o' alla ahuanerretterr Egipto. Allempoña çhaçherretterr Egipto pa'mo'nasheñet Josépa' atet otanet ñapa' ñaña pa'mo'nasheñ penet. Allempoña'pa' o' cheme'chet pa'mo'nasheñ José. Pa'mo'nasheñña'pa' o' anmanet añcha'taretesho attoch cheme'tatanet.

¹⁴ Cheme'tatuanetpa' allempoña Josépa' o' mueñerranet pa'nyeto añecop attoch ereta' pompor Jacob ñaña allohuen pamo'tsesha', atet ot José: "Onetepa' allohuenet Egipto." Ñeñto'marña allohuen cançhrrroch çharra' puechena amnarsheña pamo'tsesha' ñetña'pa' ahuanmuet Egipto allo'tsen José.

¹⁵ Allempoña'pa' çhaçha'tet Egipto. O' met allpon charpa' o' rroma yatañ Jacoboñ all Egipto. Meterrerr allpon charpa' o' colla'hua ñaña puechemereshañ ñeñtara yatañneshañ yepen. Colla'huetpa' alla apamparettet all Egipto.

¹⁶ Ñehua, meterrerr allpon charpa' o' ahuanmare'tterret puenpa'ts anetso Sicño allcha' apampare'tterret ello puenpa'ts. All apampare'tterretpa' ñeñtpa' ñeñtara pats ñeñt o' rañta'hua Abrahamañ ahuat. Añña patspa' ñeñto' vendoñ Hamor puechemereshañ ahuat all Sicño.

¹⁷ Alla otterraneterr Esteban, atet ot:

—Allponerrerr charpa' çhampoch allempo o'ch etsota atet Yomporpa' otane't ahuat Abraham allempo huomenc nane't po'ñoñ. Ñetpa' allempo nanac merete't all Egipto.

¹⁸ Atteña'pa' o' met shonte' charpa' o' orrta po'poñ añcha'tare't Egipto ñeñt ama puentarano José, tarro'mar Josépa' ahuatoteñ o' rroma.

¹⁹ Añña añcha'tare'tpa' nanac muerochtatyesonay yatañneshañ. O' nanet ñoñets attoch pamo'mtayetpa' o'ch a'ypo'ñet puechemeretoll a'yo. Añecpo'ch atet peñet attoch muetsatachet puechemeretoll. Allochña'pa' amach nanac mereto.

²⁰ E'ñe allempopa' o' eñalleta Moisés tarraña Yomporpa' e'ñe cohuen entane't Moisés. Pamo'mte'pa' e'ñe a'nahua cohue' ma'pña arrorr all pa'paclo.

²¹ Allempoñapa' o' chap allempo amach erroteno cohueñeto pa'paclo a'nahua. Allempopa' a'ypo'ñet a'yenet. Añña añcha'tareť Faraón po'señpa' ahuo' huapa all neñet ahuo' entos, nanac amuerochen eñch, allenta aner attoch ñañrecha. Atteñapa' o' atarrtach pa'paclo atet ñerra'm puechoyor e'ñe ño.

²² Ñeñto'marña Moiséspa' ayčhatareťta ora allpon ñeñť atet eñotyeseť egipto'marnesha'. Nanac eñotañteť ñerra'm allempo eñoseť, nanac eñotañteť ñerra'm allempo es pa'yeseť.

²³ Allempo chap pa'tatsoch čharra' po'charña Moiséspa' nanac yerpaneť pamo'tsesha' ñeñťara israelena'tarnesha'. Atarr secheť o'ch abchenaneta'. Allempoña parrochpa' o' ahuo' allo'tsa'yen pamo'tsesha'.

²⁴ O'ña chap allpa' all entosan puešeñarr egipto'marnesha' nanac coñchatenan puešeñarr israelena'tar. Ñaña'pa' o' moñsosana pamo'ts. O' čhote huomencpa' čha rroma. Atto chemnatanaña pamo'ts.

²⁵ Añña Moiséspa' otapañ pamo'tsesha'pa' e'ñech cohuen entapet. Otapañ o'te' eñochet Yompör mueñe' attoch a'queshpätan pamo'tsesha'. Tarraña ñetpa' ama eseshaye' pocte' entaye.

²⁶ Tarro'mar tsapañña'papa' alla ahuenerr, allempopa' o' entuenanerr epsheña pamo'tsesha' čho' orrotenet e'ñe ñañeñeta. Ñaña'pa' mueneñ o'ch amo'tstaterranet, atet otanet: "Esuañaca' masheñeshacha' sottenña arr. Añña pocte' e'ñech semo'nasheñ seřannena."

²⁷ Ñeñť chetene' pamo'tspa' o' a'mchech Moiséspa' ñaña'pa' atet ot: "Esesha'huañaca' penene'ña pa' añcha'tareť arr yocop. Esesha'huañaca' řotene' o'ch pa'tsrre'močta arr.

²⁸ Ñato' añte' pemnen o'ch pemtsan naña atet pepe' muetse' egipto'marnesha' ellerro."

²⁹ Allempoña o' e'man añ ñoñets Moisésña'pa' o' yeta pueñchañoť. O' ahuo' a'yo allo'tsen pats pa'so'cheñ Madián. O' yečha'huerra allapař. Allña'pa' all sena'tapa' o' chemereť epsheña.

³⁰ O' alla oterranneterr Esteban, atet ot:

—Allempoñapa' o' meterrerr pa'tatsoch čharra' char. Parrochpa' amarato'tsen Moisés allame'tets aspenťo Sinaířno. Allña'pa' entosan tsachmatoll all ñoña huorten. E'ñe huortot tso'pa' allot orroña Parets po'millañoťeñer.

³¹ Ñeñť entos Moiséspa' atet ot: "¿Ešte' huortetsña tarro?" E'ñe čhapatsa allame'tets o'ch enteña'pa' o' e'man ñoñets. Partsepa't eñets, atet och:

³² "Napa' ñeñten Po'yompörer pen ama't patañneshañ ñeñťara Abraham ñaña Isaac ñaña Jacob." Moiséspa' čha yoren. Pueñchañoťpa' ama cohuanu huorte'.

³³ Yompörña'pa' atet otererr: "Pueñcha'na'teñoťpa' perrote't pesapat tarro'mar all pätenpa' ñeñťpa'čho' nanac Parets tarro'mar allo'tsenen na."

³⁴ O' alla oterrerr Yompör: "Napa' nenteñ atto mueročtatennanet ñeñť nechemerasha' nepen ñeñťara israelena'tar. Napa' ne'muenanet atet yahuanrrortenet. Ñeñto'marña te'pa' o' nohuapa o'ch na'queshpätanet. Te'ña'pa' o'ch nemñař pa' Egipto." Añpa' ñeñta atet otan Yompör Moisés.

³⁵ Añña Yompör po'millañoťeñer ñeñť orrtetsa all huorten tsachmopa' ñeñťña eñotate' Moisés atet muenen Yompör. Ñeñto'mar yeñoteñ Yompörpa' ahuo't llesensan Moisés o' alla mueñer pamo'tseshesho ñeñťcha' añcha'tareťtatsa ñocpuet ñaña ñeñťcha' a'queshpätahuet allot amueročtatareťteteť. Añ ñeñťara Moisés ñeñť ama pocteye' ento ahuaña pamo'ts ñeñť otet ahuaña: "Esesha'huañaca' penene' pa' añcha'tareť arr yocop. Esesha'huañaca' řotene' o'ch pa'tsrre'močta arr."

³⁶ Añ ñeñťara Moisés ñeñť anerrahuet Egiptot. Ñeñťara Moiséspa' orrtatanet ñeñť ama puentareto all Egipto. Ñaña sa'poť ñeñť Tsasasen all orrtatanet ñeñť ama puentareto,

atfo eñotatanet añmapa' ñeñt atet pena Parets. Ñaña all chopeñe'chen amarato'mar pa'tatsoch çharra' char Moiséspa' all orrtatyesanet ñeñt ama puentareto. Añpa' ñeñt eñotatanet atet penaña Parets.

³⁷ Añ ñeñtara Moisés ahuatpa' o' otan israelnesha' atet: "Yomporpa' orrtaterrnascha' puesheñarr ñeñtcha' a'mterre' Parets po'ñoñ, ñeñtara ñeñt e'ñe samo'ts sepen e'ñech atfecma orrtaterr e'ñe atet orrtatenen namã. Ñeñtcha'ña çhocma se'mñoterrña sa."

³⁸ Ama't allempo yatañneshañ chopeñe'chete't amaratareropa' añña Moisés allo'tseneta parro ama't allpa' çhocmach apçhete't Yomporecop. Ñapa' allo'tsena aspeno Sinaíþno allempo orrtoña Yompor po'mllañoñeñer ñeñt eñorana'taya ñaña o' yeçhach ñoñets alloch e'ñe yocrra Partsocop. Ñeñtña ñoñets allempo puerrerra Moisés aspeno'tpa' o' yeçhatuerran ñaña pamo'tsesha'.

³⁹ 'Tarraña ama't atet pe't Moiséspa' yatañneshañpa' ama muenete'te o'ch ame'ñyet Moisés. Ama eseshaye' pocteye' entaye'te. E'ñe pueyoçhretopa' atarro' muenete't o'ch alla puerreret Egipto.

⁴⁰ Ama't allempo aspeno'tsen Moiséspa' yatañneshañpa' atet otoñet pa'mo'nasheñ Aarón: "Te'pa' o'ch peyeçhcatonay ñeñtcha' yeyoser yeperr ñeñtcha' yanerre' alla Egipto. Añ Moisés ñeñt yanmue' Egipto'tpa' yapa' ama yeñoteñe, ta', çerrate' o' ahuo'?"

⁴¹ Allempoñapa' o' yeçhcatanet ñeñt atet ñerra'mrrate' añ ayeçhcataret oro. O' muetset carrnero o' neññañeta' e'ñe ñesho. Nanac cohuen entet ñeñt yeçhcatet e'ñe potot.

⁴² Allempoña Yomporpa' o' a'ypo'ña'nmanet, o' muenatanet atfoch muechatse'tet ñeñt yeçhoyo'tamþene' ama't arrorr ñaña ranto. O' pet atet quellquë't ñeñt a'mtaye't Yompor po'ñoñ ahuat. Añmapa' ñeñt quellquë't ahuat, atet ñerra'm Yompor otets:

Napa' o'ch notas israelena'tarneshacha', ama't o' semtsa carrnero, amapa' huaquësh, tarraña ama nocpaye' semtso, ñeñtapa' ama neshoye' sehuapache. Ama't ora añ pa'tatsoch çharra' char all sechopeñe'chen amaratarero atet es seþa'yen.

⁴³ Añ seyomporer sepen po'poñ, ñeñt ayeçhcataret ñeñt soten allo' yeçhena seyoser ñeñt sesochen Moloc. Amapa' atet ñerra'm ayeçhcataret rantoma't ñeñt soten añmapa' seyosro' ñeñt sesochen ñaña Refán. Shonte' ayeçhcatareteçhno ñeñt seconcorpana'tena. Ñeñto'marña te'pa' o'ch nemñas nanac allaparr, all Babilonio. Añpa' allohua ñeñt atet quellquë't ahuat ñeñt a'mtaye't Yompor po'ñoñ.

⁴⁴ O' alla oterraneterr Esteban, atet ot:

—Ahuat yatañneshañpa' allempo chopeñe'chete't amaratareropa' anmuete't pocoll shetamtsopo' allecma apçhete't Yomporecop. O'ponopa' all nete't mapuettall allo' aquellcare't ñoñets ñeñt poctetsa Yomporecop. Añ pocoll shetamtsopo' Moiséspa' ña yeçhcataye't e'ñe atet oche't Yompor po'mllañoñeñer e'ñe atet gache't Yompor.

⁴⁵ Allempo rromanom Moisés puechope'chpayopa' o' na'nmet Josué ñeñtcha' anmue' yatañneshañ. Apa'nmet ñaña shetamtsopo' ñeñtñapa' çhachet allo'tseno' pats ñeñt otanete't Yompor ahuatoteñ o'ch apanet. Po'poñ acheñenesha' ñeñt yeçhetsa allpa' Yomporpa' o' muevo'tuerranet atfoch yatañneshañpa' o'ch yeçha'huerret all. Allempopa' o' çhapatet all shetamtsopo' allecma apçhenet Yomporecop. Shetamtsopahuopa' allecma apçhete't tarremphua allempo orrta David.

⁴⁶ Allempo orrta Davidpa' ñapa' e'ñe cohuen enteñ Yompor. Ñaña'pa' o' enaman Yompor pocte'te' enteñ o'ch yeçhcaton pa'paquëll ñeñt e'ñe cohuen echarr. Mueneñ o'ch yeçhcatan Yompor pa'paquëll, ñeñtara Po'yomporer pe't ñaña pa'tañ Jacoboñ.

⁴⁷ Tarraña ama't mueneñeñ ñapa' Yomporpa' ama mueno. Añña muenatoñ puechemer Salomón, ñach tomate' pa'paquëll.

⁴⁸ Tarraña Ñeñt nanac Paretspa' ama yeçheno pocollo ñeñt yeyeçhcaten ya, arromñañey. Ama't atet ote't ñeñt a'mtaye't Yompor po'ñoñ, atet ñerra'm Yompor eñets, atet oten:

49 Napa' nanac Partson. Napa' nenten enet atet ñerra'm neconañ, patsña'p' nenteñ atet ñerra'm allcha' nenen netac. Errotenohuachña' seyeçcatonña pocoll allcha' neyçha. Ama nepallteno allcha' neyçha, atet oten Yompor.

50 Napa' nehuamencoñ neyeçcatua ora allohuen ñeñt sentyen. Añpa' allohua atet ot Yompor.

51 Alla oterraneterr Esteban:

—Sapa' nanac se'charrtena, seyoçhropa' ama soctape'cheno atet ñerra'm Yomporena'tares. Ama semno o'ch se'mñotoñ Yompor po'ñoñ. Chocma satpare'teññañ Parets Puecamquëñ. Atet pe't satañneshañ ahuat te'pa' atetçho' sepena saña.

52 Ama't allohuen ñeñt a'mtaye't Yompor po'ñoñ ahuat satañneshañña'p' çha muerochtatyesanete't. Ama't ahuat allempo ama orrtena' Jesús'pa' ñeñt a'potaye't atto esempohuañen o'ch huapa Cristo ñeñt e'ñe pocte' es pets, ñeñt'pa'çho'ña satañneshañ'pa' çha muetse. Te'pa'çho'ña añ Cristo ñeñt e'ñe pocte' es pets'pa' ahuo' seponi saña attoch semtsach.

53 Alla oterraneterr Esteban:

—Ama't Parets po'mllañoñeñer ñeñt señoñate' ñeñt poctetsa Yomporecop saña'pa' satpare'toñ Yompor po'ñoñ. Añmapa' allohua ñeñt atet serrpare'tatanet Esteban.

Allempo muetset Esteban

54 Allempoña ñeñta e'mhuet atet ot Esteban'pa' nanac atsrre'matanet. Pa'tsrre'mueñoçetpa' çha rraso'tyeset pa's.

55 Allempo Esteban'pa' e'ñe chorreña Parets Puecamquëñ. Ñaña'pa' o' cohua' enonet, allña'pa' all entan Yompor po'cohuenña. Entan Jesús e'ñe po'partsoteñoç all ten Pompor po'cohuenrot.

56 Allempoña'pa' oterrer Esteban:

—Napa' o' nent enet atorare't. O' nent ñaña allo'tsen Ñeñt Acheñetosets, po'partsoteñoçpa' all ten Parets po'cohuenrot.

57 Acheñenesha'ña pa'tsrre'mueñoçetpa' rranare'tet. Puerranare'teñoçetpa' mopaqueta'tyeset, o' matrra'tet ñesho attoch o'ch rromuet.

58 O' rromuetpa' o' anmet a'yene't all ama eñalle pocoll allcha' rrolle'chet. Ñeñt'cha' rrolle'te'pa' o' rrottra'tyeset pa'shtam, o' na'yaset e'ñe allo'tsen puesheñarr yacma ñeñt hupueshameñ ñeñt pa'so'cheñ Saulo.

59 Allempoña'pa' rrolle'chet. Rrolle'chetpa' Esteban'ña'pa' o' ma'yochapa', atet ot:

—Nepartseshare Jesús'o, pagaponcha' necamquëñ.

60 Allempoña'pa' concorpa. Concorpa'pa' eñora huomenc, atet ot:

—Amach Nepartseshare petsa'tatatstaneto.

Allempoña'pa' ñeñta otuapa' o' muechecha, o' rroma.

8

Allempo Saulopa' nanac mueneñ ahuo'ch a'cllatuan ñeñt ame'ñetsa

1-2 Allempopa' añña Saulopa'* e'ñe pocte' eñch muetsetepa' Esteban.

Añña puesheña'tets ñeñt nanac ame'ñenaya Yomporpa' puellquëñeshetpa' o' huapuet, o'ch eñeta' arromña't attoch pampueñeta'. Nanac ya'na'teñet Estebanañ. Allempoteñ nanac muerochtachete't ñeñt pame'ñeñoçet Cristopa' apçhete't Jerusaléño. Ñeño'marña shonte' acheñenesha' ñeñt yetrra'tatsa po'poñ añetso'mar. O' parratse'tuet allemeña—Judeo'mar ñaña Samario'mar. Tarraña añña Jesús puellsensarnesha'pa' ama esesha' yetatso ama't puesheñarra.

3 Sauloña'pa' nanac mueneñ o'ch a'cllatuan allohuen ñeñt ame'ñetsa. O'ch be'tosamñsanet pa'pacletopa' o'ch rromanet, o'chçho' chetare'tnerranet.

* 8:1-2 Saulopa' ñeñfara Pablo.

O'chcho' be'tosuerrerr ñaña po'ppauñopa' o'chcho' rroma'huerraneterr; o'chcho' chetare'tnerraneterr, o'ch anmanet cárcelo allcha' abe'tatuanet. Ama't coyaneshačno e'ñe abe'tatuanete't cárcelo.

Atto Felipepa' serrpare'tatanete't Samario

⁴ Añña ñeñt yetrra'tatsa Jerusaléño'tpa' all chapyeset, erra ta'yenetpa' allcha' serrpare'teññañet Yompor po'ñoñ.

⁵ Ate't ñerra'm Felipe. Ñapa' o' ahuo', o' chap anetso ñeñt pa'so'cheñ Samaria. Allñapa' all serrpare'tatosanet añepa't Cristotats ñeñfara Jesús.

⁶ Felipepa' orrtatanet ñeñt ama puentareto. Ate't eñchetpa' o' eñochet añpa' po'ñoñch Parets po'huamenc orrtaten. Ñeñto'marña allohuen acheñenesha'pa' e'mñoteñet e'ñe cohuen ate't otanet.

⁷ Shonte' acheñ ñeñt chorra'yese't oneñeñ allempopa' e'ñe quechpatyesueretña oneñeñ atto chorrenana acheñ. Allempo quechpatyesueret oneñeñña'pa' o'ch rranare'tnoma. Ñaña shonte' acheñ ñeñt echarreyestse'tpa' o' corra'huerret. Ama't ñeñt checare'payestse'tpa' o' a'crratyesuahuerranet Felipe.

⁸ Ñeñto'marña nanac coshyete't Samario.

⁹ Allempopa' allo'tsen puesheñarr ñeñt achyo'tañ ahuaña ñeñt'pa' añ pa'so'cheñ Simón. Allohuenet samario'marnesha' ama't ahuatoteñpa' cohuanrrortoñete't ate't orrtate't ñeñt ama puentareto. Ñapa' o'ch shequënanet. Ñetñapa' cha otenapuetañ ñapa' nanacte' po'ñoñch ahuañenat, ate't oten ña.

¹⁰ Allohuen acheñpa' e'mñochete't ate't ote't ahuaña—ama't ñeñt amcha'tare'ttetsa ñaña ñeñt ama esoshe'mayaye acheñ. Ochete't:

—Po'ñoñch añ acheñpa' ñeñt Partsocoptartetsa.

¹¹ Ñeñto'marña acheñenesha'pa' nanac ame'ñyete't. Ama't ahuatoteñ cohuanrrortoñete't ate't orrtate't ñeñt ama puentareto.

¹² Tarraña allempo serrpare'tatanet Felipe cohuen ñoñets o' ame'ñatanet allohuen—yacmaneshačno ñaña allohuenet coyaneshohuen. Serrpare'tatanet ate't penaña Yompor po'cohuenña ñeñt atto atarr ayochreshattena ña, ñaña ate't pena Jesús ñeñt Cristotats. O' ame'ñatuanet allempoñapa' apatarettet Yomporecop.

¹³ Ama't achyo'tañ ñeñt sochetsa Simónpa' o' ame'ñerra ñaña. Ñapa'cho'ña apataretta Yomporecop. Apataretetuapa' allempoteñña'pa' yemterrana Felipe errohuanen chopeñe'chen. All orrtatanet Felipe ñeñt ama puentareto attoch eñochet añmapa' ñeñt po'ñoñch huetsa Partseshot. Simónña'pa' o'ch entan ate'tpa' ate'tcha' ot:

—Errotenotuañaca' ate't penate'.

¹⁴ Allempoña Jesús puellsensarnesha'pa' e'mare'chet Jerusaléño't shonte' samario'marnesha' ame'ñeññañet Yompor po'ñoñpa' o' mueñet Pedro ñaña Juan all Samario.

¹⁵ Allempo chap Pedro ñaña Juan Samariopa' ma'yocham'psosyet samario'marnesha' ñeñt ame'ñetsa. Enamet Yompor chorratanetepa' Parets Puecamquëñ.

¹⁶ Tarro'mar allempopa' ama chorrenaneta' Parets Puecamquëñ. O'ña apatarettetuet pame'ñeño'tet Yepartseshar Jesús.

¹⁷ Allempoña Pedro ñaña Juanpa' o' net pot ñesheto ñeñt ame'ñetsa. Nohuet pot ñeshetopa' Yomporña Puecamquëñpa' ahuepa't chorraret.

¹⁸⁻¹⁹ Añña Simón ñeñt achyo'tañtetsa ahuaña o' chapoña pueyo'chropa' ate't ot:

—Añecpuepa't nenet pot attoch chorraret Parets Puecamquëñ.

Allempoñapa' ate't otanet Simón:

—Llesenscha' nomporneshacha' o'ch nenanet ñaña not attoch chorraret Parets Puecamquëñ. O'ch napas quelle attoch sapuen llesens.

²⁰ Pedroña'pa' ate't och:

—Peçllayorpa' chenquëpa' alla, alloçpa' pechenquëpa' ðama tarro'mar ðapa' ðotenapañ o'ch perañoña Parets Puecamquëñ. Ñeñtpa' amach errotenoç petsa'cho. Aña Yomporpa' o'ch apuey e'ñe atfa.

²¹ Ama pocteyaye o'ch ðagap ða llesens tarro'mar Yomporpa' ama pocteye' entennape peyoçher.

²² Te'pa' aña poctetsa o'ch ðoçtape'cherr ello cohuen, o'ch pequeçpuerr añ sosya'tsañ o'ch penamuer Yompor peretneñets. Ñato' Yomporpa' o'ch peretnerrnað atfo ðoçtape'chen sosya'tsañ.

²³ Pedropa' alla otererr:

—Napa' neñoteneð nanac sosey ðoçtape'chen peyoçhro, çha ðottena atef ñerra'm ðo'chñarpa' huanquëneð.

²⁴ Simónña'pa' alla otererr:

—O'ch sanamon Yompor nocop atfoch amach es netantoyo atef sotenen. Aña' allohua atef pena Simón.

²⁵ Pedro ñaña Juanpa' nanac a'pofoñet Yompor po'ñoñ all Samario. Ser- rpare'tueneta'pa' alla ahuanerret Jerusaléño. All oñenet samario'marpa' ñeñt yeçhetsa toño'marpa' e'ñe acoðoteñ serrpare'tatyesianeret.

Allempo Felipepa' ame'ñatana etiopo'marnesha'

²⁶ Allempoña añ Felipepa' orroña Yompor po'mllañoñeñer atef otos:

—O'ch çhappoch poçtopa' o'ch ahueð a'yo, o'ch peçhap amarato allo'tsen toñ ñeñt sets Jerusalénoç atfoch yeçhap anetso añ pa'so'cheñ Gaza.

²⁷ Ñaña'pa' atef och Yompor po'mllañoñeñerpa' atefçho' ða. Allempoña'pa' o' ahuo'. O' çhap all toño ñeñt sets Gazopa' o' entosan puesheñarr etiopo'marnesha'. Añ etiopo'marnesha' ñeñtpa' ñeñt añcha'taref aña po'taruas pen o'ch cohuanmpenan ora allpon quelle ñeñt gobiernocop alla pa'nyo. Pa'neyya' añ pa'so'cheñ Etiopía. Ñeñt nanac añcha'tarettetsa all pa'nyopa' añ pa'so'cheñ Candace ñeñtpa' coyanesha'. Añ yacma ñeñt entos Felipepa' ñeñtpa' acaparef aheñ. Aña etiopo'marnesha'pa' errte' asuena' Jerusaléno allempo entos Felipe. Tarro'mar ta all o'ch ma'yochenana' Yompor.

²⁸ Allempoña o' alla puerrerra pa'nyo. Ñapa' alla anen po'carro. Ñeñtña carropa' cahualla matatene'. All anenpa' all lleyen an Yompor po'ñoñ ñeñtara ñoñets lleyen ñeñt quellquë't ahuat Isaías ñeñt a'mtaye't Yompor po'ñoñ.

²⁹ Aña Parets Puecamquëñpa' eñotatan Felipe, ñeñtña ote':

—O'ch penteña' ñeñt anets tarro e'ñe all carro.

³⁰ Felipeña'pa' o' mata. Matapa' çhap allame'tetspa' o' e'mosan çho' lleyen añ Yompor po'ñoñ ñeñtara ñoñets ñeñt quellquë't Isaías ñeñt a'mtaye't Yompor po'ñoñ ahuat. E'mos Felipepa' atef otos:

—¿Eñotoçhena't penteñ ñeñt atef oten ñeñt pelleyen?

³¹ Ñaña'pa' atef och:

—Errotenohuate'ca'ye neñoçña' amaca'ye eñalle ñeñtcha' neñotate'. Ñato' o'ch ða'tað ða o'ch yanorr parro.

³² O' a'tap Felipepa' o' cohuos all lleyen. Añ lleyen Yompor po'ñoño ñeñtpa' añ ñoñets ñeñt quellquë't Isaías:

Atefcha' ða ña atef ñerra'm carrnero. Ñehua, carrneropa' o'ch yanemñ allcha' yemtsepa' amach ama'toçhto. Amapa' ñerra'm yetsorroñ pue'çpa' amach ama'toçhto. Atefcha' ða ña, amach es oto.

³³ Nanac mueroçhtachet, ama pocteye' ñeñt atef ðoñet. Ama erroteno o'ch yotua ora allohuen ñeñt atef sosey ða'yes pamo'tsna'tarnesha'. O' muetsetpa', o'huañ corra aña patsro. Aña' allohua atef quellquë't Isaías.

³⁴ Allempoña ñeñt etiopo'marnesha'pa' o' a'p̄to'ch Felipe:

—Ñehua, p̄oten, ¿eseshocpa'tña eñen arr Isaías, ñato' ñocpañe' amapa' po'psheññecopte'?

³⁵ Allempoña Felipepa' o' serrpare'tach cohuen ñoñets atet pena Jesús. Eñotach añ ñeñtara Isaías po'ñoñpa' eñen Jesúsocop. Allempoñapa' o' eñotach ñaña po'poñ Yompor po'ñoñ ñeñtara ñeñt atet pena Jesús.

³⁶ Allña allenet matam̄penetpa' o' entoset oñ, atet ot etiopo'marnesha':

—Ta'm, ¿pocte'te' te' o'ch napataretta Partsocop?

³⁷ Felipeñapa' atet och:

—Ñehua, ñerra'm po'ñoñ p̄ame'ñena peyo'chrocmañenpa' e'ñe pocte' o'ch p̄apataretta Partsocop.

Etiopo'marnesha'ñapa' atet ot:

—Napa' po'ñoñ name'ñena. Te'pa' neñoteñ Jesucristo ñeñt̄pa' ñeñt̄ Yompor Puechemer.

³⁸ Allempoñapa' o' tomatoset po'carro sohua'rrtosetpa' o' ahuanmuet oño. Allña apatos Felipe.

³⁹ O' cha'nerret oño'tpa' Yompor Puecamquẽññapa' o' anman Felipe a'yo. Allñapa' machayo'ta ma'nata alla. Ñeñt̄ etiopo'marnesha'pa' ama enterrano Felipe. Allem-popa' o' ahuerret etiopo'marnesha' e'ñe pocsheñesha'. Añpa' allohua ñeñt̄ atet p̄a etiopo'marnesha'.

⁴⁰ All anetso Azotopa' all orrterraña Felipe. Allñapa' serrpare'tatosanet cohuen ñoñets alloch yequeshp̄a. Allempoñapa' o' ahuo' ñaña anetso Cesareo, nanac serrpare'tyesnom ora anetso'mar all oñomyes.

9

Allempo Saulopa' cotape'cherr ello cohuen Yomporecop (Hch. 22.6-16; 26.12-18)

¹ Allempoña Saulopa' nanac e'moñe'tenan ñeñt̄ ame'ñenaya Yepartseshar Jesús. Pa'tsrre'mueño'tpa' atet ot:

—Napa' o'ch na'cclatueña' ñeñt̄ ame'ñenaya Jesús.

Ñeñt̄o'marña o' ahuo' allo'tsen ñeñt̄ nanac añcha'taret cornesha' e'ñe all Jerusaléño.

² Chap allo'tsenpa' o' enamos orden attoch a'cclatuan ñeñt̄ ame'ñetsa. O' enam orden ñeñt̄cha' anom a'yo anetso Damasco allecma apchenet judionesha' po'prahuo. O'ch chap allpa' o'ch aposan ñeñt̄ añcha'taret̄tetsa puerahuo. Attoch apet all llesens attoch rromanatan acheñ ñeñt̄ cotene' Jesús pocta'p̄ña. Ama't coyanesha'chno ñaña yacmanesha'chno o'ch rromanatanet o'ch huancatanet o'ch anmare'tterret Jerusaléño. Ate't cotape'chña Saulo.

³ Allempoña agapuan orden allempoñapa' o' ahuo'. O' chap allame'tets Damascopa' machayo'ta ñeñt̄ nanac poptetsa ento'tpa' o' choyo'tam̄pes e'ñe ñesho.

⁴ O' choyo'tam̄pespa' ñaña'pa' alla rromopra patso. Chap patsopa' e'man ñoñets ñeñt̄ atet oten:

—Esomare't Saule pemuero'chtatennanña ñeñt̄ name'ñenaya.

⁵ Sauloñapa' atet ot:

—¿Eseshape't Ayochreshate eñets?

Ñeñt̄ eñetspa' alla otererr:

—Napa' ñeñten Jesús, ñeñtara ñeñten pemuero'chtaten. Añpa' p̄añeña mue-ro'chtatetsa. Tarro'mar cha p̄ottena ñerra'mrrate' ashen ñeñt̄ e'ñe patpare'teñoñ ñañeñachña atserrpatetsa.

⁶ Sauloñapa' po'yorño'tpa' cha pa'shmuena allempoñapa' atet ot:

—Partseshacha' te'pa' ¿erro'tena't penmen ñeñt̄cha' atet nepena?

Partsesha'ña Jesús'pa' atet otererr:

—Te'ñapa' o'ch petanta, ahuep̄ Damasco. Allcha'ña otapet ñeñ'cha' atet pepa.

⁷ Ñeñ' parro epuet sen Saulo ñet'ñapa' atta cohuanrrortenet. Pocuanrrorteño'otetpa' ama erro' oteto. Ñetpa'cho'ña e'muet ñeñ' e'morrtatsa tarraña ama es enteto.

⁸ Allempoña Saulopa' o' tanta. Tantapa' o'ch cohua'yepa' ama ento. Ñeñ'oto'marña atta echa'nmet pototpa' o' anmet Damasco.

⁹ O' chap Damascopa' ma'pamuet Saulo'ñapa' ama enteno, ñaña ama es rreno, ñaña ama es orreno, ama't coñe'ta.

¹⁰ Damasco'ñapa' allo'tsen puesheñarr ñeñ' nanac ame'ñenaya Yepartseshar Jesús. Ñaña'pa' añ pa'so'cheñ Ananías. Añña Ananías'pa' Yepartseshar Jesús orro'ña atet ñerra'm puechopoño' o' chore'chpa' atet och:

—¡Ananías!

Ananías'ña ana'ppa', atet ot:

—Napa' Nepartseshare añen.

¹¹ Yepartseshar'ñapa' alla otererr:

—O'ch notap̄ atet'cha' pepa. O'ch ahuep̄ allo'tsen toñ ñeñ' nanac pa'charr allcha' pentos Judas pa'paquell. Pechap all pa'paclopa' o'ch pa'p'to'tos erro'tsente'ña ñeñ' Saulo ñeñ' tarso'marnesha'.

Alla otererr Yepartseshar:

—O'ch notap̄ ñaña, añ ñeñ'tara Saulo e'ñe te'pa' allo'tsen ma'yochetsa.

¹² Napa' o' norrtatuon ñeñ' o' entua nesho'. O' entuan atet ñerra'mrate' acheñ añ pa'so'cheñ Ananías huapatsa. O' huapa ñeshopa' o' nosan pot ñesho o'ch alla cohuer.

¹³ Ananías'ñapa' alla anapuererr:

—Partseshacha' napa' o' ne'mare'ch atet o' pa' añ ñeñ'tara Saulo. Shonte' acheñ o' e'mare'tatnet atto ñapa' nanac muero'chtatenan ñeñ' pame'ñenaya Jerusaléño.

¹⁴ Te'pa' ñapa' echenan orden o'ch huancatyese'y allohuene'y ñeñ'tey pame'ñenaya, o'ch anmatey cárcelo. Ñeñ' pa'm'cha'tare'ternesha' pen allohuen judionesha' po'cornanesharpa' o' apet Saulo añ orden.

¹⁵ Yepartseshar'ñapa' alla otererr:

—Tarraña ama't atet te'pa' o'ch ahuep̄ all, ñeñ' atet o' notuap̄. Te'pa' o' nene' Saulo ñeñ'cha' na'potene' neñoñ am'cha'tare'tneshesho. Ama't po'poñe'chno acheñeneshopa' ñapa' a'potoncha' neñoñ. Ñaña ama't israelena'tarneshopa' o'ch a'poton neñoñ.

¹⁶ Ñaña o'ch neñotach Saulo ñapa' o'ch muero'chta nanac nocop, tarro'mar te'pa' o'ch ame'ña'na na. Añpa' allohua ñeñ' atet serrpare't Yepartseshar epuet Ananías.

¹⁷ Allempo'ñapa' o' ahuo' Ananías o'ch entenana' Saulo. Chap allpa' o' be'tosos pocollo allo'tsen Saulo. O' ponmosyapa' o' nosan pot e'ñe ñesho. Nohuan pot e'ñe ñeshopa' otosan Saulo, atet och:

—Masheñe Saule, Yepartseshar Jesús ñeñ'tca'ye porrtoya allempo poñen toño. Te'pa' añ ñeñ'tara Yepartseshar Jesús o' mueñan na o'ch non attoch alla pecuerr, ñaña attoch chorra'pa Parets Puecamquëñ.

¹⁸ Ñeñ'ta otuapa' allorocma rrata'nom pa'clloyot ñeñ' atet ñerra'mrate' es pa'tall, o' alla cohuer e'ñe cohuen. Alla cohuer e'ñe cohuenpa' allempo'ñapa' apatare'tta Yomporecop.

¹⁹ O' apatare'tetuapa' o' rrallme'cherr. O' alla cherr po'huamenc. Allempo'ñapa' allponmaterrerr alla Damascopa' o' serrpare't epuet ñeñ' ame'ñetsa.

Allempo Saulopa' e'ñe ñenmã serrpare'terr all Damasco

²⁰ Ñaña Saulopa' chocma sen judionesha' po'prahuo allcha' serrpare'tatenanet atet pena Jesús. Otanet añ Jesús'pa' po'ño'ch ñeñ'tpa' ñeñ'ña Parets Puechemer.

21 Allohuenet ñeñt e'muene'pa' otyeset:

—Ta', errotenuañaca'yeña te' ñeñt yacmar. Añmapa' ñeñtca'ye mueroçhtataye't ahuaña ñeñt ame'ñenaya Jesús all Jerusaléño. Ñeñto'marña te'pa' huena arr; mueneñ o'ch rromanatenana' ñeñt ame'ñetsa o'ch anmare'ttet cornaneshesho ñeñt pa'micha'tare'ternesha' pen allohuen judionesha' po'cornaneshar.

22 Saulopa' allo'na sen huomenc pa'nmue' pueyoçher attoch serrpare'tan Yompor po'ñoñ. Nanac serrpare'tatanet atto po'ñoçh Jesús pa' ñeñtara Cristotats. Ama't judionesha' ñeñt yeçhetsa Damascopa' ama erroteno anapeto.

Allempo Saulopa' a'yetater judionesha'

23 Atteña o' allponmatpa' añña judionesha'pa' o'pachet o'ch muetset.

24 Saulopa' e'mare'ch o' o'pachet, o'ch cohuet attoch o'ch muetset. Arr cohuet allotecma be'tenet all aconcha'tam'psare't ora anets. Ellapenete't cohume'tet ñaña arepenete't.

25 Tarraña ñeñt pueyoçhresha' Saulopa' o' anmet tsapo allo'tsen pocoll e'ñe all aconcha'tam'psare't anets, allñapa' eñall ventana allot a'suata'mperet atarret cañrot.

Allempo Saulopa' puerrerra alla Jerusaléño

26 Allempoñapa' ahuer Jerusalem. Cherr Jerusaléño pa' atarr mueneñ o'ch entenana' ñeñt ame'ñetsa. Ñeñtña ame'ñetsapa' ama mueneto o'ch entenaneta' tarro'mar nanac mecha'teñet, otenapuetañ atto'te' shequënanet o' ame'ña.

27 Añña puesheñarr ñeñt pa'so'cheñ Bernabépa' ñaña pa' o' anem' allo'tsen Jesús puellsensarnesha', o' otosanet:

—Añ Saulopa' o' entan Yepartseshar Jesús allempo sen Damasconet. Yepartse-sharepa't epuet serrpare't. Ñaña pa' ama mecha'to ñeñto'mar atarr serrpare't Damasco atet pena Jesús.

28 Allempoteññapa' e'ñe pocte' eñchet, allempoñapa' o' e'ñe parrocmatuet. Ñapa' ama mecha'teno ama't mamesha. Atarr nanac serrpare'tan Jesús po'ñoñ.

29 Chocmach serrpare'ten epuet judionesha' ñeñt e'muene' griegachpa' tarraña amach pocteye' enteñeto. Allempoñapa' o'pachet ñaña all o'ch muetset.

30 Allempoña ñeñt parro ame'ñeneta'pa' anmet Saulo po'poñ anetso Cesareo. Allo'tpa' o' mueñet ñaña anetso Tarso.

Atto Pedropa' orrtatan Yompor po'partsoña all oteñet Lido

31 Atteñapa' o' muetsoñeñtuerra ñeñt amueroçhtatañ. All Judeo ñaña Galileo ñaña Samariopa' o'huañ amueroçhtatare'ttet atet pete't ahuaña. Allohuen ñeñt ame'ñetsa allo'na senet huomenc pa'nmuet pueyoçhret. Atteñapa' o' shonta'nma ñeñt ame'ñetsa. Pame'ñeño'tetpa' allo'na senet mecha'na'tnomuet Yompor. Ñaña allo'na Parets Puecamquëñpa' nanac coshatenanet.

32 Atteña Pedropa' chocmach ta'yena emo'tyese' ñeñt ame'ñetsa. Parrochpa' o' çhap allo'tsen ñeñt ame'ñetsa all anetso pa'so'cheñ Lida.

33 Allñapa' entosan puesheñarr yacma añ pa'so'cheñ Eneas. Ñapa' ahua'toteñ echar- rtena alla panena o' posoc char.

34 O' entos Pedropa' atet otos:

—O'ch Eneaso notap, Jesucristopa' o'ch a'crraterrep. Te'ñapa' o'ch petanta o'ch pañño'ten pemue'.

Allorocma correna, o' tantena.

35 Allohuen ñeñt yeçhetsa Lido ñaña Sarónopa' allempoña eñchetpa' cha puesuerret ñeñt ahua't poçtapñet o' ame'ñerrñañet Yompor po'ñoñ.

Allempo Pedropa' tantaterran Tabita allempo rroma

³⁶ Eñall puesheñarr coyanesha' ñeñt ameñetsa añ pa'so'cheñ Tabita, añ ñeñtara so'chñets Tabita ñeñt otenet griegaçho Dorcas. Ñapa' arr yeçhena anetso ñeñt pa'so'cheñ Jope e'ñe alla allame'tets Lido. Ñaña' nanac amueraña, çhocmach yenpuenan ñeñt huocchañetyets.

³⁷ Allempopa' o' atsna't. Atsna'tpa' atteñapa' o' rroma. Rromapa' pamo'tsesha'ñapa' o' apach atet yeçhenet ñet. Apatuetpa' o' ñanet enonet all tama a'yohuen ßať.

³⁸ Allempoña ñeñt ameñetsa allpa' o' e'mare'chet Pedro allame'ttso'tsena all anets Lido. O' e'mare'chetpa' o' mueñet epsheña yacma attoch oteñeta' onepa' all allorocma.

Allempoña çhapuet Pedreshopa'

³⁹ Pedroñapa' o' coterranet. Chap allpa' o' anmet all cuarto eno allo'tsen arromñať. All tomçhen shonte' rretorrnanesha' ñeñt llecanrortetsa. Allña' all gatanna'tyenet ñeñt chorra'yenet ñeñt sepechyesanet ahuaña Tabitañ.

⁴⁰ Pedroñapa' mueñuanet allohuenet a'yenet. O' mueñuanet a'yenetpa' o' concorposa, o' ma'yocha. Ma'yochuapa' o' puetallsa arromñaťeshonetpa' atet och:

—O'ch Tabita notap, petanterra.

Allempoñapa' acuerroche'. O' enterran Pedropa' çha anerrets.

⁴¹ Pedroñapa' cheter pototpa' echanter attoch terr. Allempoñapa' o' çhore'terran ñeñt ameñetsa ñaña rretorrnaneshaçhno. O' be'tosçha'terretpa' o' gaterranet o' tanterra ñeñt rromats.

⁴² Allohuenet ñeñt yeçhetsa all Jopopa' o' e'mare'chet atet pena Pedro. Ñeñto'marña shonte' acheñ o' ame'ñeret Yepartseshar Jesús.

⁴³ Pedroñapa' alla a'pa atomat alla Jopo. O' a'pa all Simón pa'paclo. Ñeñt Simónpa' añ po'taruas pen o'ch a'cohuenetyesan pa'rrom.

10

Atet ña capitán Cornelio epuet Pedro

¹ Eñall puesheñarr capitán, añ soche't Cornelio. Ñaña' allo'tsen anetso añ pa'so'cheñ Cesarea. Allña' ña mueñanatene' çharroch çharra' guardianesha' ñeñt oteñet Guardia Italiana.

² Añña Cornelioñapa' nanac cohuen cotape'che't Partsocop, ñaña nanac mecha'na'teñ. Ama't ñeñt yeçhetsa e'ñe parro ñetpa'çho'ña cotape'chete't cohuen Partsocop. Ñapa' nanac amueraña, shonte' es apa'yeseñet ñeñt es palltatset. Ñaña çhocmach ma'yochenana Parets.

³ Atta yeçhena ama't ahuatoteñ. Parrochpa' o' coya'nen atsne'pa' orrtoña ñeñt Yompor po'millañoñeñer. Orrtoña atet ñerra'm pueçhopoñoť, tarraña ama çhoye' çhopo'teñe. Tarraña o' orrtoñapa' e'ñe cohuen eñch. O' huapapa' atet otos:

—¡Cornelio!

⁴ Ñaña' pueñcha'nañoťpa' atta cohue', allotña'pa' atet otať:

—¿Eso'tña Partseschacha' pemnen?

Mellañoñeñapa' alla otererr:

—Pema'yochenoť te'pa' o' yerpa'pa Yompor. E'ñe pocte' entennať atto es ñapa'yeyñ ñeñt es palltetsa.

⁵ Te'ñapa' añ pocte' o'ch pemñe acheñ Jopo o'ch ñagotach puesheñarr añ pa'so'cheñ Simón, ñeñtara oteñet Pedro.

⁶ Ñapa' all a'puena po'psheñeñ Simón pa'paclo. Te'pa' ñachña ñoterre' ñeñtcha' atet peperra. Ñehua, ñeñt Simón all a'puena Pedro ñeñtca'ye a'cohuenetyene'ña pa'rrom. Pa'paquellpa' ontapo'tsen. Añpa' allohua atet ot Yompor po'millañoñeñer.

⁷ Ñeñta otuapa' o' ahuerr. Ahuerrpa' Cornelioñapa' chore'tan epsheña ñeñt taruaset e'ñe alla pocollo, chore'tan ñaña puesheñarr po'solltarer ñeñtpa' aña po'taruas penet attoch cohuanpeñet po'cañtáret. Añpa' ñeñt cohuen cotape'chets Partsocop ñaña.

⁸ Allotpa' o' serrpare'tatanet ora atto orrtoña Yompor po'millañoñeñer. Ñeñta serrpare'tatuanetpa' o' mueñanet Jopo. Allempoñapa' ahuanmuet.

⁹ Tsapañapa' o' chapmochet Jopo. O' chapmochetpa' Pedroña e'ñe alla pocollopa' o' a'tap eno allcha' ma'yochosa. Allempopa' chapmoch pocto.

¹⁰ O' chapmoch poctopa' cheporra Pedro. Atarro' mueneñeñ o'ch rra'pa' tarraña ama potena'ña rreñets. Alla cohuenpa' o' huapoña ñeñt atet ñerra'm cho' es chopo'ten.

¹¹ Entoñapa' o' entan ñeñt atet ñerra'm atarr shetamuets. Eno'tpa' cha sohuanpesnena, ačharampsaret pa'tats po'toñe'marot. Añña ñeñt ačharampsaretpa' sohua'netsa patsonet e'ñe ñeshonet.

¹² Allña shetamtso e'ñe o'ponopa' allo'tsa'yen shonte' pa'namen berročno, ama't po'poñ berročno ñeñt ama arrapoye' eñche'te judionesha'. Ñaña allo'tsa'yen pa'namen shechpečno ñaña pa'namen o'tečno.

¹³ O' chap allame'tets ñesho, Pedroñapa' e'man ñoñets, atet oten:

—Pedro o'ch pemtsa añ berr o'ch perre'.

¹⁴ Pedroñapa' atet ot:

—Ama Nompocha', nerreñe. Napa' ama't ahua'tapa' ama nerrare ñeñt ama arrapahuoyaye atet yeychena ya ñeñtey judioneshay.

¹⁵ Allempoñapa' o' alla oterrerr ñeñt eñets, atet ot:

—Ñeñt o' a'cohuentatua Yomporpa' p'apa' amach potatsto añmapa' ama cohuenayaye.

¹⁶ Añpa' e'ñe ma'pocha e'mpa' allempoñapa' o' alla a'terr enonet, o' alla chenquerra.

¹⁷ Allempoñapa' Pedropa' nanac moñne'tacha, o' cotape'chpa' atet ot:

—Esuañaca' otenenña ñeñt o' nentua.

Ñeñt nanac moñne'tenapa' allempocma chap ñaña ñeñt mueñen Cornelio. Ñetpa' o' a'p'to'tnomuet errate' yečhenaña Simón. Allempoña entoñet Simón pa'paquellpa', o' chapuet allot be'tenetpa'

¹⁸ o' chore'toset atet otoset:

—¿Arre't a'puenaña ñeñt sochetsa Simón ñeñtara ñeñt otenet Pedro?

¹⁹ Pedroñapa' e'ñe alla enopa' ama't orameñ moñne'tenana ñeñt o' entuapa' añña Parets Puecamquēñpa' atet och:

—O' chap ma'psheña acheñ ñeñt pe'nene'.

²⁰ Te'pa' o'ch pesuerra tayecma o'ch pocterranet. Amach pemcha'tatsto. Napa' na mueñenahuet atto huapuet arr. Añpa' atet ot Parets Puecamquēñ.

²¹ Ñeñta otuepa' Pedroñapa' asuerroche' patso. O' chap allo'tsen añ ma'psheña atet otapanet:

—Napa' naña ñeñten se'nen. ¿Esocpa'tña sehuena?

²² Ñetñapa' atet ochet:

—Yapa' añ yemñene' capitán Cornelio. Capitánpa' oten ponepa'to'. Ñapa' orrtoña Parets po'millañoñeñer atet och: “Pagotach Pedro onepa'. Ñaña pocte' o'ch pe'mñoch ñeñtcha' atet otañ.” Atet och Parets po'millañoñeñer. Ñeñto'marña yapa' o' yehuapa. Tarro'mar capitán Corneliopa' ñapa' e'ñe cohuen cotape'chen Partsocop ñaña nanac mecha'na'teñ. E'ñe cohuen enteñ allohuen judionesha'.

²³ Allempoña Pedropa' atet otapanet:

—Ñehua, sebe'tos allach sa'pa, tsapa'tachña ahuey parro.

Allñapa' alla moset, tsapañapa' ahuanenet. Po'potantañpa'cho'ña ñeñt ame'ñetsa e'ñe alla Jopopa' o' co'ta' huanmuet ñamet.

²⁴ Tsapatña'pa' o' chapuet Cesareo. Cornelioña'pa' alla cohuenan Pedro o'ch huapa. Ñapa' o' hua'ña'huan pamo'tsesha' ñaña po'potantañ ñeñt epuet yemtena. Ñetña'pa' all cohueñet e'ñe parro.

²⁵ O' huapa Pedro. O' huapapa' Cornelioña'pa' o' tantnoma attoch o'ch poctaḡ. O' concorposñaña o'ch ma'yochaḡya.

²⁶ Tarraña Pedroña'pa' o' cheterpa' atet och:

—Petanterra, amach pema'yochatsetno. Napa'cho'ña arromña'tena.

²⁷ O' tanterrapa' serrpare'tatanna'tet mame'pa' allotña'pa' o' be'toscha'tet pocollo. Allña'pa' o' entosan shonte' acheñ ñeñt o' cha'cha't.

²⁸ Allempoña'pa' otanet Pedro:

—Sapa' seño'teñ ya judioneshaypa' ama pocteye' yenteñe o'ch yeyemcha po'poñ acheñ ñeñt ama judioneshayaye. Tarro'mar yapa' atet yey'chena amach yeya'rrotatsche acheñ ñeñt ama judioneshayaye. Tarraña te' Yomporpa' o' ye'chatuan amach yentatsche po'psheñeñ atet ñerra'mrrate' ñeñt ama cohuenayaye.

²⁹ Ñeñto'marña te'pa' o' nohuapa arr tayecma allempo agotatenet. Te'ña'pa' o'ch na'ḡto'taḡ ¿esocopte' ḡagotatenen?

³⁰ Allempoña'pa' Cornelioña'pa' atet ot:

—Ahuaña o' taya pa'tatsmat met, napa' alla nema'yochena, ñaña nema'yochenoñ o' neque'chpa' nerrar mame'. Ñeñt attecma nepena allempocma nema'yochena nepaclo atet ñerra'm te' coya'nen atsne'. Allempopa' machayota orrtona puesheñarr yacma e'ñe allame'tets. Pa'shtampa' añ chorrena ñeñt nanac cohuen poptetsa.

³¹ Ñaña'pa' otosen: “Cornelio, pema'yochenoñ te'pa' e'mueneḡ Yompor. E'ñe pocte' entennaḡ atto es ḡapa'yeñ ñeñt es palltetsa. Ñeñto'marña te'pa' o' yerpaḡa.

³² Te'ña'pa' o'ch pemñe acheñ Jopo o'ch ḡagotach puesheñarr ñeñt pa'so'cheñ Simón ñeñtara ñeñt otenet Pedro. Ñapa' alla a'puena po'psheñeñ Simón pa'paclo. Ñach huapatsapa' ñapa' serrpare'tatoseḡcha'. Ñehua, ñeñt Simón all a'puena Pedro ñeñtca'ye a'cohuenetyene'ña pa'rrom. Pa'paquëllpa' ontapo'tsen.” Aña'pa' allohua atet oten ñeñt norrtoya.

³³ Ñeñto'marña nagotatenepḡ. Te'pa' e'ñe pocte' o' pehuapa. Te'pa' Yompor eñoteny ñeñt'ey arro'tsa'yeny yemneñ o'ch ye'mñotaḡ o'ch peserrpare'tatey errponte' Yompor ye'chateneḡ.

Allempo Pedropa' serrpare'tatosanet Cornelio pa'paclo

³⁴ Pedroña'pa' alla oterrerr:

—Po'ño'ch te'pa' o' neño'ch tarro'mar o' chapona neyo'chro, ama ñapña judionesha' morrentenoña Yompor.

³⁵ Añaña ama't erra'tsen pa'namen acheñ, eñallcha'ña puesheña'tets ñeñt'cha' mecha'na'tene' Yompor ñaña ñeñt'cha' e'ñe cohuen es pets Yomporecop. Ñeñt'pa' e'ñech pocte' enteñ Yompor, ama't erra'tsena acheñer.

³⁶⁻³⁷ Alla oterrerr Pedro:

—Sapa' seño'teñe'tña Yomporpa' o' mueñonay Puechemer Jesucristo, ñeñt'ey judioneshapay. Añ ñeñt'ara Jesús'pa' o' a'poctatuonay e'ñe cohuen Partsocop attoch cosheñtso'tseneycha'. Te'ña'pa' ñach Yepartseshar yeperr allohueny. Añ cohuen ñoñetspa' o' serrpare'tuet erracmañen Judeo'mar. Ñanompa' serrpare'chete't Galileo allempo apate't Juanañ.

³⁸ Alla oterrerr Pedro:

—Seño'teñe' Yomporpa' o' nan Puechemer Jesús ñeñt nazareto'marnesha'. O' chor-racha Parets Puecamquëñ ñaña nanac ahua'mencat pe'. Allotpa' all chopeñe'chyese'tpa'

nanac amuerañte't. A'crratyesane't allohuen ñeñt muerochtatyese't oneñe't, tarro'mar Pomporpa' nanac yenpue't.

³⁹ Alla oterraneterr Pedro:

—Yapa' o' yentuoñ ora allpon atet pa'yese't all ye'chena judionesha' ñaña all Jerusaléño. Yapa' o' yentue ñeñto'marña te'pa' o' ya'potoñ ñeñt atet pa'yese't. Alloitña'pa' o' corso'tam̄pset tsacho, atto muetset.

⁴⁰ Tarraña poma'pamtañopa' tantater Pompor. Allempoña Pomporpa' orrtaterrnay e'ñe ya yocop.

⁴¹ Tarraña ama allohuenacpaye' orrterro, e'ñe yañeñacpa ñeñtey na' Yompor o'ch ya'potoñ ñeñt atet pe't Jesús. Allempoña tanterrapa' yapa' yerrallme'chapretuer ñaña yorruerr coñe'ta'tets parro.

⁴² Alla oterrerr Pedro:

—Ñapa' o' otey o'ch yeserrpare'tach acheñenesha', o'ch ya'potoñ atto yeñoch Yomporpa' o' nan Puechemer Jesús ñach acre' allohuen acheñenesha' —errotench'a' corret puesheña'ttset. Acrancha' allohuen acheñenesha' ama't ñeñt corretsa ñaña ama't ñeñt o' colla'huena.

⁴³ Alla oterrerr Pedro:

—Ñeñt ama't ahuat ñeñt a'mtaye't Yompor po'ñoñpa' ñeñtara Jesús a'potete't. Ama't ahuat ñetpa' otete't ñerra'm yame'ñera ña Pomporpa' e'ñech peretna'huerrnay yo'chñar.

Allempo ñanom chorraret Parets Puecamquëñ ñeñt ama judioneshayaye

⁴⁴ Ama't allempo serrpare'ten Pedropa' añña Parets Puecamquëñpa' ahuepa't chorraret allohuenet ñeñtet e'mñote'.

⁴⁵ Añña judionesha' ñeñt ame'ñetsa ñeñt parro huapa Pedro, ñetña'pa' atta cohuanr-rortenet, o' otet:

—Erroteno'uate'ca'ye chorraret ñamet Parets Puecamquëñ e'ñe atto'a, ñetpa' amaca'ye judioneshayayeto. Atet otet ñet.

⁴⁶ Tarraña po'ño'chpa' ahuepa't chorraret ñamet Parets Puecamquëñ tarro'mar ñetpa'cho'ña ahuepa't eñosyaset po'poñ ñoñtso. E'ñe po'poñ ñoñtso aye'chochtachet Yompor. Atto e'manet judionesha'. Allempoñapa' atet ot Pedro:

⁴⁷ —Ama't pocte' senteñe o'ch apatarettet Partsocop. Tarro'mar o' chorraret Parets Puecamquëñ e'ñe atet ñerra'm ya.

⁴⁸ Allempoñapa' otanet Pedro:

—Te'pa' e'ñe pocte' same'ñeño't Jesucristo o'ch sapataretta.

Allempoña apatarettetuetpa' atet ochet Pedro a'puepa'to' alla allponmat.

11

Allempo Pedropa' serrpare'tatuerranet Jerusaléño

¹ O' allponmat Jesúsña puellsensarnesha' o' e'mare'chet atto po'poñ acheñ ñeñt ama judioneshayaye o' ame'ñerrñañet ñamet Yompor po'ñoñ. Atto e'mare'ch Jesús puellsensarnesha' ñaña po'poñe'chno acheñ ñeñt ame'ñetsa all Judeo.

² Allempoña ahuer Pedro. Allempo cherr Jerusaléño'pa' judionesha' ñeñt ame'ñetsa allpa' o' che'ptare'tapueret Pedro.

³ O' che'ptare'chet Pedro, atet ochet:

—Eso'mare'tña petaña allo'tsen ñeñt ama judioneshayaye, ama't allpa' o'te' cha per-rallme'chapretos—anet.

⁴ Allempoña Pedropa' o' serrpare'tatuerranet ñeñt e'ñe atet pa;

⁵ atet otanet:

—Napa' allo'tsenen Jopo. Allempo nema'yochena huapona ñeñt atet ñerra'm cho' es ye'chopo'ten. Entoñapa' o' nent ñeñt atet ñerra'mrrate' shetamuets. Eno'tpa' cha

sohua'nena ačharamĭpsareĭ e'ñe pa'tats po'toĭñe'maroĭ. Añña ñeñĭ ačharamĭpsareĭpa' sohua'netsa patsonet e'ñe neshonet.

⁶ Napa' o' necue'pa' allña o'ponopa' nent pa'namen berročhno ñaña ñeñĭ puet-sato'mar, ama't po'poñ berročhno ñeñĭ ama arrapahuoye' yenteno ya ñeñĭey judione-shay. Nent ñaña pa'namen shechpečhno, ama't ñaña pa'namen otečhno.

⁷ Allempoñapa' ne'm ñoñets, atet oten: "Pedro o'ch pemtsa añ berr o'ch perre'."

⁸ Tarraña napa' not: "Ama Nompocha' nerreñe. Napa' ama't ahuaĭapa' ama nerrare ñeñĭ ama arrapahuoyaye atet yeyčhena ya judioneshay."

⁹ Allempoñapa' alla oterrerr ñeñĭ eñets entoĭ, atet ot: "Ñeñĭ o' a'cohuentatua Yomporpa' ĩapa' amach ĩotatsto añmapa' ama cohuenayaye."

¹⁰ Añpa' e'ñe ma'pocha ne'mĭpa' allempoñapa' o' alla a'terr enonet o' alla chenuerra—ora.

¹¹ Allempocma o' čhap ñaña ma'psheña acheñ. Chapuet all pocollo all nommuena. Añ ma'psheña acheñpa' arroĭ mueñonet Cesareoĭ.

¹² Añña Yompor Puecamquēñña' oten o'ch nocterranet. Oten amach neñcha'tatsto. Añ pechapsheña ñeñĭ arro'tsen te' o' yahuanma parro. Allempoñapa' yečhap pa'paclo ñeñĭ nagotatene'.

¹³ Allempoña o' yečhap pa'paclopa' ñaña' o' serrpare'tatapuey atto' orrtoña Yompor po'mllañoñeñer. Orrtoña' atet otos: "Añ pocte' o'ch pemñe acheñ Jopo o'ch ĩagotach puesheñarr añ pa'so'cheñ Simón ñeñĭtara ñeñĭ otenet Pedro.

¹⁴ Añña Pedropa' ñeñĭcha' peñotate' attoch pequeshperra ñaña allohuen ĩamo'tsesha'." Ateĭ oten Yompor po'mllañoñeñer.

¹⁵ Nañapa' o' neserrpare'tosñañ Yompor po'ñoñ. Allempo neserrpare'tenpa' añña Parets Puecamquēñpa' ahuepa't chorraret. O' chorraret ñet e'ñe attecma chorra'ya ahuaña yaña.

¹⁶ Allempoñapa' o' neyerepya atet otey ahuaña Yepartseshar Jesús: "Juanañpa' e'ñe oñoçhaya apate't tarraña na añcha'ña nechorrasa Parets Puecamquēñ."

¹⁷ Ñehua, Yomporpa' e'ñe pocte' enteñ o'ch chorraret ñet e'ñe attecma atet chorra'ya ya allempo yame'ñya Yepartseshar Jesucristo. Ñehua, ñerra'm e'ñe pocte' enteñ Yomporpa' nañapa' errotenotuáte'ca'ye neche'ptare'chña Yompor.

¹⁸ Ñeñña otuapa' allempoñapa' alla moma'huet allohuenet. Allempoñapa' o' aye'chočhtatoñet Yompor, atet otet:

—Ama't po'poñ acheñ ñeñĭ ama judioneshayaye Yomporpa' mueneñ o'ch coĭape'cherret ello cohuen alloch ñetpa'cho'ña corretsetach pocsheñeshocmañen e'ñe tayoteñ errponañohuen. Allohua ñeñĭ atet ĩa Pedro ñaña Cornelio.

Atto epa'hua Yompor po'ñoñ errañaren

¹⁹ Allempo muetset Estebanpa' allempoteñña orrta mueročhteñets. Nanac mueročhtachete't ñeñĭ ame'ñetsa. Ñeñto'marña yettra'tyeset allemeña, parratse'tyeset po'poñ anetso'mar. Puesheña'tetspa' ahuanmuet Fenicio'mar, po'potantañña' ahuanmuet Chipro, po'potantañpa' ahuanomyeset Antioquío. All chopeñe'chyesnomuetpa' all serrpare'tyesnomuet Yompor po'ñoñ, tarraña aña serrpare'tatnomuet ñapueĭ judione-sha'.

²⁰ Tarraña puesheña'tets chipro'marnesha' ñaña cireneo'marnesha' ñeñĭ ame'ñetsapa' o' chapuet Antioquío. Allña' aña serrpare'tatoset ñeñĭ griegonesha'. Añ serrpare'tet ñeñĭ atet pena Yepartseshar Jesús.

²¹ Yomporpa' nanac ahuamencat ĩanet. Ñeñto'marña shonte' acheñ ame'ñachet Yepartseshar Jesús, o' a'ypo'ña'huerret ñeñĭ ahuaĭ poçtaĭñet.

²² Añña ñeñĭ ame'ñetsa Jerusalēñopa' o' e'mare'chet atto shonte' ame'ñetsa Antioquío. Ñeñto'marña mueñet Bernabé Antioquío, o'ch yenpuenaneta'.

²³ Allempo chap Bernabé allpa' entosan po'ñoçh o' orrta Yompor puemuereña all. Ñeñto'marña nanac coshosa. O' cotape'chatosanet, atet otanet:

—Amach sequeçhpatstere Yompor po'ñoñ. Huomenccha' sepa' seyoçher.

²⁴ Añña Bernabépa' ñapa' nanac amueraña, nanac chorreña Parets Puecamquëñ. Atarr ame'ñena. Ñeñto'marña shonte' ame'ñatana acheñenesha' attoch coferet Yepartseshar.

²⁵ Allempoña ahuo' Bernabé. O' chap Tarso allcha' e'nerrana' Saulo. Allña entospa' a'secher o'ch aner Antioquíó.

²⁶ Epsheño'maret alla a'puet paterr char Antioquíó. Allñapa' nanac yeçhachete't ñeñt a'pçhatse't all pame'ñeñoçet Yompor. Shonte' acheñ ame'ñatsa all. All Antioquíópa' añ asocharettet ñeñt ame'ñetsa "Cristona'tarnesha'." Ñanom arr Antioquíó asocharettet atet.

²⁷ Allempoña Jerusaléñopa' allo'tsen puesheña'tets ñeñt a'mtene' Yompor po'ñoñ. Parrochpa' onaçha'tet. Chapuet Antioquíópa'

²⁸ añña ñeñt pa'so'cheñ Agabopa' o' tomospa' serrpare'tatosanet, atet otanet:

—Orrtach muecheñets esempo erraparen patso. Añpa' allohua ñeñt atet ot Agabo.

Añ eñotate' Yompor Puecamquëñ, ama't allempopa' ama orrtena' muecheñets. Allempo añcha'tareta Claudiopa' allempo'ña orrta muecheñets.

²⁹ Ñeñto'marña allohuen ñeñt ame'ñetsa Antioquíópa' o' a'pochtachet o'ch mueñet ñeñtcha' yenpue' pa'mo'nasheñnesha' ñeñt yeçhetsa Judeo.

³⁰ Allpon echyenetpa' allpon apa'yeset. Atet a'pochtachetpa' atetçho' pet. O' apueñet Bernabé ñaña Saulo, ñetñapa' anmet Jerusaléño, allñapa' aposet ñeñt pompornesha' pen ñeñt ame'ñetsa Jerusaléño.

12

Allempo añcha'taret Herodes muetsaterran Jacobo, yottam̄psatan ñaña Pedro

¹ Allempopa' añña añcha'taret Herodespa' rromatan puesheña'tets ñeñt ame'ñetsa attoch mueroçhtachet.

² Rromuet Jacobo o' muetset. Añ Jacoboñpa' ñeñtara ñeñt Juan pa'mo'nasheñ. Atto muetsetpa' çho pechoñet poñ.

³ Ñeñtña muetse'pa' nanac coshatan judionesha' ñeñt ama ame'ñetso. Allempoña añcha'taretpa' nanac mueneñ o'ch alla coshaterranerr judionesha'. Ñeñto'marña pascuapopa' allempoch rrerretter pan ñeñt ama a'chasareteyayepa' o' alla rromaterranerr ñaña Pedro.

⁴ Rromuet Pedropa' o' abe'tet cárcelo. Net çharra' puechena pechap solltarnesha' ñeñtcha' cohuan̄pse'. Ñanompa' o'ch neñet pa'tatssheña solltarnesha' ñeñtcha' cohuan̄pene'. Allo'tpa' o'chña muenme'cheñetpa' o'ch huena po'potantañ pa'tatssheña ñeñtcha' cohuan̄pene' ñaña. Ñeñtña çharra' puechena pechap solltarpa' attach penet, çhach camyannenet. Añ cotape'chña Herodes o'ch metua pascuapopa' o'ch orrtatan Pedro allo'tsa'yen acheñenesha'.

⁵ Atteñapa' nanac huomenc cohueñet Pedro cárcelo. Tarraña ñeñt ame'ñetsapa' atarr ma'yocham̄peñet Pedro.

Atto Yompor po'millañoçeñerpa' çha'nmaterran Pedro cárcelo't

⁶ Atteñapa' allponmat o' chap allempoch tsapa'tcha' Herodespa' o'ch orrtata'muenan Pedro allo'tsa'yen acheñenesha'. Tsapoña Pedropa' all muenpa' all rroçhtam̄peñ epsheña guardia all rromam̄peñet allo ehuançaret cadeno epo'mar pueçot. Ñaña a'yotpa' all cohuan̄peñ po'potantañ solltar e'ñe allot be'tenet.

⁷ Atteñapa' machayota puetaresua e'ñe alla o'pono. Orrtoña Yompor po'millañoçeñer. Añña mellañoçeñpa' o' a'pñlan Pedro pueçototpa' o' opuepa' atet och:

—Petanta tecma.

Añña cadena allo' huanquëñetpa' čha pueya'nets e'ñe ñoťa.

⁸ Añña mellañoťeñpa' atet och:

—Pechana'pena peshtam, o'ch penen ñaña pesapat.

Atet och mellañoťeñpa' atto'čho' pa. Allempoñapa' alla otererr:

—Te'pa' pechorrena ñaña peshtam ñeñť penen enoť. Allempoñapa' o'ch pōctenen.

⁹ Allempoñapa' o' čha'nen coťa'nenan mellañoťeñ. Pedroñapa' čha otenapañ attate' čhopo'teñ, țarraña ama čhoye' čhopo'teñe. Allempoñapa' o' ahuanenet.

¹⁰ Ahuanenetpa' o' metenet all cohuen puesheñarr guardia. Ahuerreterr allponpa' o' meterreterr all cohuen po'psheñeñ guardia. Allempoñapa' o' čhenet allot e'ñe čha'nenet allecma chopeñe'chen acheñenesha'. Chenet yetarropa' ñeñťña yetarrpa' asret nanac echarr. O' čhenet e'ñe allpa' añña yetarrpa' o' tora'nom e'ñe ñoťa. Tora'nenpa' ñetñapa' o' čha'nenet. Chenet a'yoťpa' allñapa' all chope'chnomuet e'ñe parro mame'pa' allotñapa' o' ahuerña Yompor po'mllañoťeñer allotñapa' o' ñapťamena Pedro.

¹¹ Allempoñapa' čhapaña Pedro pueyočhro, atet ot:

—Po'ñočhepa't ama čhoye' nečhopo'teñe. Yomprepa't mueñene' po'mllañoťeñer attoch a'qushpāten. Te'pa' Herodespa' amach erroť pa'no. Judionesha'pa'čho'ña e'ñe orrena o'patenna.

¹² O' čhapaña pueyočhro țematenñapa' o' čhap allo'tsen María pa'paquëll. Añña Mariapa' ñeñť pachor Juan Marcos. Čhap all pa'pacłlopa' allñapa' allo'tsa'yen shonte' acheñ all ma'yočhenet o'pono.

¹³ O' čhap allot be'tenetpa' čhore'tosanet. O'ponoťñapa' čha'nom puesheñarr shopshe-sha' añ pa'so'cheñ Rode.

¹⁴ Huapapa' o' cheme'tan Pedro po'ñoñ. Pocsheñesha' materra o'pono o'ch oterrana' acheñenesha' ñeñť o'pono'tsa'yen. Tarraña ama toram̄psano Pedro. Cherr o'ponopa' atet otanet:

—Pedrepa't o' huena, allo'tsena a'yoť.

¹⁵ Ñetñapa' čha otet:

—Amate'ca'ye ñeñťeyaye, atťa pōtyen čhate' pemospuena.

Ñaña'pa' alla otererr:

—Po'ñočhca'ye Pedro.

Ñetñapa' oterreterr:

—Amate' Pedroyaye. Ñato' añte' Yompor po'mllañoťeñer ñeñťcha' cohuanm̄pse' Pedro.

¹⁶ Atteñapa' Pedroñapa' alla čhore'terraneterr yetarroť. Allempoñapa' toram̄pset. Toram̄psetpa' añepa't Pedro. Allempoñapa' atťa cohuanrrortet.

¹⁷ Pedroñapa' o' echantan pot attoch o'ch muetsoñeñtet allochñapa' o'ch ser- rpare'tatuenanet. Allempoña o' muetsoñeñtuetpa' atet otanet atto Yomporpa' o' čha'nmater cárceloť. Otanet ñaña:

—O'ch soteña' Jacobo ñaña po'potantañ masheñnesha' atto čha'nmaterren Yompor po'mllañoťeñer.

Allempoñapa' alla ahuer Pedro.

¹⁸ Atteñapa' o' puetaren. Arrña cárcelo solltarnesha'ñapa' pueñchañoťetpa' otanna'tyeset:

—Errotenoťuañaca'ye čha'nenña Pedro. Errahuañaca'ye o' ahuen.

¹⁹ Atteñapa' o' e'nater Herodespa' ama esesha' entaye. O' alla a'pťo'tare'teretererr solltarnesha' ñeñť cohue'ne' cárcel ama esesha' entaye errotenoťe' o' ahuen. Allempoña Herodesñapa' o' mueño'tuan solltarnesha' a'yo allcha' muetsanatatuanet. O' allponmat Herodesñapa' o'čho' ahuo' Judeoť o'ch ahuo' Cesareo allñapa' allach allponmatena'.

²⁰ Allempoña Herodesñapa' nanac e'moñe'tenan tiro'marnesha' ñaña sidóno'marnesha'. Ñeñťo'marña o'huañ apanet rreñets ñeñť nanac palltenet pa'nyeto.

Ñeñto'marña ñetpa' mueneñet o'ch alla amo'tsteret Herodes attoch o'ch alla apuerranet ñeñt palltenet. Ñeñto'marña huacha'ta shonte' tiro'marnesha' ñaña sidóno'marnesha' o'ch enteñeta' Herodes. Añña Herodes pa'taruasañer añ pa'so'cheñ Blastopa' e'ñe cohuen entapanet. Ñaña'pa' o' a'pocatanet attoch ñetpa' serrpare'tet epuet añcha'taret.

²¹ Chap allempo'ch serrpare'tet epuet añcha'taretpa' Herodesña'pa' o' chorrana nanac coñnesha' pa'shtampa' anorros po'conaño'pa' eñosos. O' eños atet ñerra'm ñeñt añcha'taret nanac.

²² O'ña eñosua acheñenesha'ñapa' o' rrannartetpa' atet otyeset:

—Ama acheñenocheye' eñetso, Partsepa't eñets.

²³ E'ñepa'tcha' allempocma huapoña Yompor po'mllaño'eñer o' atсна'tatosan Herodes. O' atсна'tpa' e'ñe rrohue pueñpa' o' rroma. Tarro'mar Herodespa' mueneñ o'ch Part-socoptarta. Acheñenesha'ñapa' o' aye'chochtatoñet atet ñerra'm Parets. Amaña çhoye' otaneto eñallña paterr Yompor. Añpa' allohua atet pe't Herodesoñ.

²⁴ Allempoñapa' o' epa'hua Yompor po'ñoñ erracmañen. Allo'na ame'ña'huanena shonte' acheñenesha'.

²⁵ Añña Bernabé epuet Saulopa' o' asueneta' Jerusaléño, pomhueneta' quelle. Pomhueneta' quellepa' o' puerraçherret Jerusaléño. Añña Juan Marcospa' o' coterranet.

13

Allempo Pablo ñaña Bernabé'pa' ahuo't serrpare'tatoset anetso Chipro

¹ Ñeñt pame'ñeño'tet apçhatse't Antioquíopa' allo'tsen puesheña'tets acheñ ñeñt a'mtene' Parets po'ñoñ, ñaña allo'tsen ñeñt nanac cohuen yeçhatatse't Yompor po'ñoñ ñeñt atet ñerra'm añ: Bernabé, ñaña Simón, ñeñt Simónpa' oteñet ñaña Negro, ñaña allo'tsen Lucio ñeñt cireneo'marnesha' ñaña allo'tsen Manaén ñeñt parro cheshat Herodes ñeñt añcha'tarettetsa all Galileo, ñaña allo'tsen Saulo.

² Allempo çhocma cohuentatoñete't Yompor, ñaña errotenopa' çhoch tore'tete't.* Atteña añña Parets Puecamquëñpa' eñotatanet, atet otanet:

—Añ pocte' o'ch sene' Bernabé ñaña Saulo ñetpa' o'ch senanet nocop. Napa' o'ch napanet ñeñtcha' po'taruas pet nocop.

³ E'ñe allempopa' tore'tetset. Allempoñapa' ma'yochet. Ma'yochuetpa' o' net pot ñeshetopa' allsensarettet allcha' torroñet Yompor po'taruas.

⁴ Allsensarettet e'ñe Parets Puecamquëño'tpa' ahuanmuet Seleucio. Seleucio'tña'pa' ahuanpset boto, o' çhapuet Chipro.

⁵ Allña pueblo all çhapuetpa' añ pa'so'cheñ Salamina. Chapuet Salaminopa' o' ahuanmuet judionesha' po'prahuo allcha' serrpare'tosñañet Yompor po'ñoñ. Ñaña cotenanet Juan Marcos ñeñtcha' yenpahuat.

⁶ Atteña'pa' o' ahuanmuet serrpare'tats erracmañen all oteñet Chipre. Chapuet po'poñ anetso añ pa'so'cheñ Pafos. Allña'pa' entoset puesheñarr judionesha' ñeñt'pa' a'cho'tañ añ pa'so'cheñ Barjesús. Ñaña'pa' nanac serrpare'taten, tarraña ama Yomppureye' po'ñoñ a'mteno.

⁷ Ñaña'pa' çhocma yemtenana ñeñt añcha'tarettetsa atet ñerra'm gobierno' ñeñt allo'tsen. Añña añcha'taretpa' añ pa'so'cheñ Sergio Paulo, ñeñt'pa' nanac es eñot. Añña añcha'taretpa' o' agotatan Bernabé ñaña Saulo. Ñapa' mueneñ o'ch e'man Yompor po'ñoñ atet serrpare'tenet.

* **13:2** Añ tore'teñetspa' añecop o'ch yetorra Yomppurecop. Amach añecpayaye atomat, ñeñt'pa' añecpa mameshacop o'ch yequeçpa' yerrar.

8 Tarraña ñeñt achyo'tañpa' ama muenatano añcha'taret o'ch ame'ña. Ñaña'pa' mueneñ o'ch a'mche'ttanet attoch amach ame'ñacheto añcha'taret. Añ ñeñt achyo'tañpa' ñeñtara oteñet ñaña Elimas.

9 Allempoña Saulopa' o' huomenc cohuenan ñeñt achyo'tañ. Ñehua, Saulopa' ñeñtara oteñet ñaña Pablo. Ñaña'pa' e'ñe chorreña Parets Puecamquëñ.

10 O' cohuan achyo'tañpa' atet och:

—Papa' nanac peshquëñ acheñ, nanac peye'chcaten ñeñt ama cohuenayaye. Aña p'omp'or pepen oneñet. Nanac pe'moñe'teñ ñeñt p'octetsa Yomporecop. Esem'p'ohuachñaca' peuna'ña atto p'oten ama cohuenaye Yomp'or po'ñoñ. Aña' ñeñtña po'ño'ch ñeñt cohuentetsa.

11 Te'ña Yomp'orpa' o'ch tsa'tata'pa. Te'pa' amach pecuerro. Allponmatcha' amach penterro puetare'.

Allempocma o' checmetmara enta. All chopeñe'chenpa' at'ach otyenanet:

—Sanmuen, o'ch secha'nmuen.

12 O' entan añcha'taret atetpa' o' ame'ña. Atarr huomenc entan Yomp'or po'ñoñ. Allohua atet pete't all Pafoso.

Allempo ñanom asena' Pablo Asio

13 Allempoña Pablo ñaña ñeñt cotene'pa' o' ahuan'p'set boto o' chapuet Pergo ñeñt allara Panfilio. Chapuet Pergopa' Juanña Marcospa' o' sa'nerranet. O' alla ahuer Jerusalem.

14 Allempoña Pablo ñaña Bernabépa' ahuanerretter, o' chapuet anetso ñeñt pa'so'cheñ ñaña Antioquía ñeñt allara Pisidio. Allempopa' o' chapa'muen allempo amesen judionesha' Pabloña ñaña Bernabépa' o' ahuanmuet judionesha' po'prahuo. Allña'pa' anorr'cha'toset ñamet.

15 Allña judionesha' po'prahuopa' o' lleyoñet Moisés po'ñoñ ñaña po'poñ ñeñt a'm'taye't ahua't Yomp'or po'ñoñ. Allempoña o' lleya'huetpa' añña ñeñt añcha'tarettetsa puerahuopa' atet otanet:

—Eshaste' masheñeshare echene' ñoñets attoch soctape'chateypa' ñato' o'ch seserpare'tatey.

16 Allempoña Pablopa' o' tomospa' echantan pot attoch muetsoñeñtuet atet otanet:

—Masheñesha judioneshacha' ñaña allohuenes ñeñtes mecha'na'tene' Yomp'or, se'mñoten, o'ch notas:

17 Yapa' israelena'tarey ahua't Yomp'orpa' e'ñe pocte' entane't yatañeshañ. Nanac a'm'ratanet allempo a'puete't Egipto. E'ñe Yomp'or po'huamenco'tpa' o' ahuanerranet Egiptot.

18 Ama't atomat char allempo chopeñe'chete't amaratareropa' chocma cohuan'p'sanet e'ñe cohuen, ñato' pa'tatsoch charra' char'te' cohuan'p'sanet.

19 Allempoña chacherret alla Canaáno Yomp'orpa' o' huapore'tatuerran cancherr po'poñe'ttso'cma acheñ ñeñt ye'cha'yestse't all attoch apa'yerran yatañeshañ po'patseñ, e'ñe ñocpuet ama't ñaña puechemereshacpuet.

20 Allempoteñ ñato' cuatrocientos cincuenta char'te' o' nanet ñeñt'cha' añcha'tarettatsa ñocpuet. Atteñapa' o' chap allempo orrta ñeñt a'm'taye't Yomp'or po'ñoñ ahua't, añ pa'so'cheñ Samuel.

21 Allempoña acheñesha'pa' enamet Yomp'or o'ch apanet puesheñarr rey ñeñt'cha' nanac añcha'tarettatsa. O' nanet añ pa'so'cheñ Saúl ñeñt Cis puechemer ñeñtara pamo'tsna'tar Benjamín. Añña Saúlpa' o' añcha'tare'tta pa'tatsoch charra' char.

22 Allempoña Yomp'orpa' o' puerratan'per attoch o'huañ añcha'tare'tta Saúlpa' o' alla nerran po'psheñeñ ñeñt pa'so'cheñ David ñeñtara Isai† puechemer. Añ Davidpa' e'ñe

† 13:22 Isaípa' ñeñtara ñeñt sochenet Jesé.

pocte' eñch Yompor ñeñto'marña atet ot ñocop: "Davidpa' e'ñe attecma cotape'chen atet noctape'chen na neyoçhro. Ñeñto'mar neñoteñ ñapa' o'ch ame'ña'na na e'ñe poctacma."

²³ Alla oterraneterr Pablo:

—Ñeñt puesheñarr David po'mrenñoñ Yomporpa' o' orrtatonay yocop ñeñtey israe-lena'tarey ñeñtcha' ya'queshpaterre'. Añ pa'so'cheñ Jesús. Te'pa' o' etsota atet otye't Yompor ahuat.

²⁴ Tarraña ama çhena' allempoch serrpare'tos Jesús pa' añ ñanom orrtatsa Juanañ. Ñapa' serrpare'te't atet oche't, añ pocte' o'ch yoctape'cherr ello cohuen etserra allempoñapa' o'ch yapataretta Partsocop. Atet serrpare'tatey allohueney ñeñtey israe-lena'tarey.

²⁵ O' e'nuamochan ñeñt po'taruas pa'pa' Juanañña' atet otanet: "Napa' ama añeyayno ñeñt soten ñeñtcha' Cristotats. Ñapa' te'pa' ñeñtña nocta'nene' chenta'. Napa' ama esoshe'mano attoch ama't po'sapatreçhapa' o'ch nepyoñ."

²⁶ Alla oterraneterr Pablo:

—Sapa'çho'ña masheñneshacha' pamo'tsna'tarecmas penes Abraham. Ñaña arro'tsa'yen puesheña'tets acheñ ñeñt mecha'na'tene' Yompor. O'ch notas allohuenes, Yompor o' mueñonay cohuen ñoñets alloch yequeshperra allohueney.

²⁷ Ama't o' çhap ñeñt Cristotatspa' añña ñeñt jerusaléño'marnesha', ñaña ñeñt pa'mcha'tareñnesha' penet, ñetñapa' ama esesha' eñotaye. Ama çhapaneto pueyoçhreto atet ote't ahuat ñeñt a'mtaye't Yompor po'ñoñ ñeñt çhocma lleyenet añ yetro allempocma amesenet. Ñeñto'mar te'ñapa' o' etsotatoñet Yompor po'ñoñ. Te'ñapa' o' pomet Jesús attoch muetset.

²⁸ Ñapa' ama't ama eñalle po'chñar atfa otteñe'chet attoch muetsachet. E'ñe atto'a enamet Pilato muetsachepa'to'.

²⁹ Allempoña o' etsotatoñet ora allpon atet aquellcare't ahuatoteñ ñocoppa' o' a'suachet corsoçotpa' o' net mapuetpono.

³⁰ Tarraña Yomporpa' o' tantater ama't o' rromua.

³¹ Allempoña tantaterpa' allponmat orrtame'tnerrana ñeñt ñanom cota'nmue' Galileot allempo on Jerusaléño. Te'pa' ñetpa' o' a'potoñet atto tanterra Jesús, o' a'potoñet allohuen acheñeneshesho.

³² 'Yapa'çho'ña te'pa' o'ch yeserrpare'tatas samña añ ñeñtara cohuen ñoñets. Ama't ahuat Yomporpa' otane't yatañneshañ atetcha' pa esempo

³³ te'ñapa' o'çho' etsota yocop ñeñtey yatañneshañ po'mrenñey. O' etsota po'ñoñ allempo tantaterran Puechemer Jesús, tarro'mar atet oteney ñeñt Salmos 2, atet Yompor otan Puechemer: "Papa' Nechemerep, te'ñapa' o'ch neñotach acheñenesha' po'ñoçh papa' Nechemer nepenep."

³⁴ Ama't ahuat Yomporpa' ote't o'ch tantaterpa' amach alla rromuerre'te. Ñeñtpa' atet oteney añ ñoñets ñeñt ahuatoteñ aquellcare't: "Po'ñoçh o'ch na'natapa paña atet na'nacha David."

³⁵ Ñaña po'poñ capítulo Salmos all oten atet: "Yomporpa' amach muenatano Puechemer ñeñt nanac Parets o'ch puetsohua po'chets."

³⁶ Añ ñoñetspa' yeñoteñ ama añecpayaye David tarro'mar yeñoteñ David allempo e'nuan allpon atet muenach Yompor pamo'tsna'tarecoppa' allempoñapa' o' rroma. Allempo rromapa' o' pampuet allo'tsen pa'tañneshañ, po'chetspa' o' puetsohua epuet.

³⁷ Tarraña Jesús po'chetspa' ama puetso ama't coñe'ta tarro'mar Pomporpa' o' tantater.

³⁸ Ñeñto'marña añ poctetsa o'ch masheñneshacha' señoçh añ Jesús ñeñt atet pena. Ñach yepretnerre' yo'chñar. Ñeñto'mar te'pa' o' neserrpare'tatas.

³⁹ Añ Moisés po'ñoñ ñeñt anaret ahuatoteñpa' amach errotenot yepretnaterro allo yo'chñar. Tarraña te'pa' añña yame'ñeñoñ Jesús pa' añepa't alloch e'ñe apretna'huare'tterra yo'chñar.

⁴⁰ Alla oterrerr Pablo:

—Te'pa' secuach, o'ch soctape'ch cohuen te't huaponasa ñeñt atet ote't ñeñt a'mtaye't ahuat Yompor po'ñoñ. Atet otete't ahuat:

⁴¹ Se'mñot ñeñtes achmare'tets, te't secuanrrorteñoña sechenca'huerra. Te'pa' allempo ora socrenmeñpa' napa' o'ch norrtatonas ñeñt ama sentare. Tarraña ñato' sapa' amach same'ño ama'tcha' serrpare'tataset. Añpa' allohua huañ atet serrpare'tatanet Pablo.

⁴² Allempoña cha'nmaçherret acheñenesha'ñapa' atet ochet Pablo huapuepa'to' po'poñ semana o'ch serrpare'taterraneterr po'pocheño añ yetro allempocma amesenet.

⁴³ Allempo ahuanerretpa' shonte' judionesha' o' cota'huanerret Pablo ñaña Bernabé. Ñaña o' cota'huaner shonte' ñeñt ama judioneshayaye tarraña ñetpa' o' ame'ñatanet judionesha' ahuañacma. Añña Pablo ñaña Bernabé serrpare'tatanet o' cotape'chatanet attoch chocma o'ch cotape'choñet Yompor pomuereña.

⁴⁴ Po'poñ semana o' çherrerr allempo amesenet. Huaçhenerr shonte' acheñenesha' o'ch e'mñoteneterr Yompor po'ñoñ. Autsa ora allohuen acheñenesha' ñeñt yeçheta all e'ñe huaçha'tuet.

⁴⁵ Allempoña judionesha' ñeñt ama ame'ñetsopa' o' eñchet shonte' acheñ huaçha'tatsapa', puesope'cheñoetpa' o' cohuaña'chet Pablo. Ñeñt atet oten Pablo pa' ñetñapa' o'ch otenet ama atteyaye. Nanac achmare'chet.

⁴⁶ Tarraña ama mecha'to Pablo ñaña Bernabé. O' serrpare'tet huomenc, atet otet:

—Añ poctetsa o'ch yeserrpare'tatas sanom Yompor po'ñoñ, tarro'mar sapa' judioneshas. Tarraña ñerra'm sapa' ama semno, ñerra'm ama pocteye' señche attoch sapa' corretsasach e'ñe tayoteñ errponañohuen, amach erro't yepaso. Te'pa' añach yeserrpare'tat ñeñt ama judioneshayaye.

⁴⁷ Tarro'mar atet oteney Yompor po'ñoñoñ, arr oteney atet:

Napa' o'ch nenas sa atet ñerra'm puetare', sach a'puetarsamñsats. O'ch sa'puetarsamñsoñ po'poñ acheñ poctapña ñeñt ama judioneshayaye. Ama't allohuen acheñenesha' ora allohuanen patspa' o'ch peñotatuanet attoch queshperret.

⁴⁸ Allempoña ñeñta e'mhuet añ ñoñetspa' añña ñeñt ama judioneshayaye atarr coshet, nanac cohuen eñchet Yompor po'ñoñ. Allempoñapa' o' ame'ñenet allohuen ñeñt o' anaretta attoch ñetpa' corretsetach tayoteñ e'ñe errponañohuen.

⁴⁹ Atteñapa' o' epa'hua Yompor po'ñoñ erracmañen.

⁵⁰ Tarraña puesheña'tets judionesha' o' cotape'chachet acheñenesha' attoch o'ch huapore'tateret Pablo ñaña Bernabé. Añña ñeñt atet cotape'ch coyanesha'chno ñeñt cohuen entaprete' acheñenesha' tarro'mar añ coyanesha' e'ñe cohuen cotape'che't Partsocop. Ñaña ñeñt añcha'tarettetsa all, judionesha'pa' o' e'moñe'tachet Pablo ñaña Bernabé. Ñeñto'marña orrtatet atsrre'mueñets o' huapore'tateret Pablo ñaña Bernabé.

⁵¹ Ahuanenetpa' o' pa'shetca'tnenet po'patser pa'tco't attoch eñoch judionesha' ama pocteye' entaretteto ñeñt atet o' pohuet, te'ñapa' amach alla huaçherrete'te. Allempoñapa' ahuanmuet ñaña Iconio.

⁵² Tarraña ñeñt o' ame'ña'hua all Antioquíopa', ñetñapa' nanac coshenet, ñaña o' chorrant Paretts Puecamquëñ.

14

Allempo çhapuet ñaña anetso pa'so'cheñ Iconio

¹ Allempoña chapuet Iconiopa' o' be'toscha'tet parro judionesha' po'prahuopa' o' serrpare'tatoset all. Nanac cohuen serrpare'tatet ñeñto'marña ame'ñachet shonte' acheñenesha'—ama't judionesha' ñaña ama't ñeñt griegonesha'.

² Añña judionesha' ñeñt atpare'tene' Yompor po'ñoñ ñetñapa' toma'tam̄pset Pablo ñaña Bernabé. Nanac sasare'teñet taye'to' acheñenesha' ñeñt ama judioneshayayepa' cohuen enteññañet atto serrpare'ten.

³ Tarraña ama't e'moñe'tanet patantarr acheñenesha'pa' ñetñapa' ama mecha'teto. Alla atomatet serrpare'tet Yompor po'ñoñ. Orrtatet ñeñt acheñenesha' ama puentareto ñeñtña eñotatahuet po'ñoñ atto serrpare'tenetpa' añmapa' Yompor pomuereñoñ huanpanet añ ñoñets. Yomporpa' nanac ahuanencat panet.

⁴ Atteñapa' añña patantarr acheñenesha'pa' e'ñe cohuen enteñet atet serrpare'tatanet Pablo ñaña Bernabé. Tarraña po'potantañña' ama. Ñetñapa' añña ame'ñatahuet judionesha'. Ñeñto'marña ama patrraye' cotape'chenoña acheñenesha' all.

⁵ Atteñapa' o'pacha shonte' judionesha' ama't ñaña ñeñt ama judioneshayaye ñaña ñeñt añcha'taretechnopa' o'pacha o'ch rromuet huomencpa' o'ch rrolle'chet.

⁶ O' e'mare'chet cha o'patarettenetpa' añña Pablo ñaña Bernabépa' o' yeteretpa' ahuanmuet ñaña Listro. Chapuet Listropa' cha asuanmuetpa' o' metet ñaña Derbo. Añpa' ñeñfara anets all otenet Licaonia. Erracmañen chopeñe'chet allo'mar.

⁷ All chopeñe'chneñetpa' all serrpare'tnenet Yompor po'ñoñ.

Allempo chapuet ñaña anetso pa'so'cheñ Listra

⁸ Allempo Listro'tsenetpa' allñapa' allo'tsen puesheñarr acheñ, cha echarrtena pa'tac, ama eshcaye' chope'cheno, ama't ahuatoteñ ñapa' atta eñalletña. Ñaña'papa' alla anen.

⁹ Allña anenpa' alla e'mñnotenat atet serrpare'ten Pablo. Pabloñapa' cohue' allapa' o' eñoch añ acheñpa' o' yemtana Yompor ñapa' o'ch a'crrater.

¹⁰ Ñeñto'marña Pablopa' atet och huomenc:

—O'ch notañ, o'ch panet.

Ahupa'tcha' tanta allempocma allorocma cha chope'chnets.

¹¹ Allempo eñch allohuen acheñenesha'pa' cha rrannartet. Pocsheñoñetpa' atet otet:

—¡Partsepa't! Ñeñt Parets yepen ñeñtepa't puenasetsa acheñ. Te'pa' o' chap e'ñe yesho. Añpa' atet otet po'ñoñeto ñeñt Licaonaçh.

¹² Añña Bernabépa' o' sochet, atet otet:

—Añepa't ñeñt yeyomporer Júpiter.

Pabloñapa' sochet ñapa' añ ñeñt po'yompor-ret Mercurio. Tarro'mar sochet atet ñapa' nanac serrpare'ten cohuen atet ñerra'm po'yompor-ret Mercurio.

¹³ Nehua, acheñenesha' allpa' echenet po'prahua' allecmach ma'yochyete't po'yompor-ret ñeñt otenet Júpiter. Ñeñtapa' e'ñe ñehuapoñ anaret allempopa' o'ch taya yerroñanmos pa'netsreto. Ñeñt corneshatets puerahuopa' o' huapa. Huapatan huaquesh, huapatan ñaña shonte' ror. Mueneñ o'ch muetset huaquesh Pablocop ñaña Bernabécop tarro'mar chocma muetsete't huaquesh po'yompor-recop. Ñaña tarro'mar atet muenen acheñenesha'. Ñetpa' cha otenapuetañ Pablo ñaña Bernabépa' añte' ñeñt po'yomporer penet.

¹⁴ Allempoña eñoch Pablo ñaña Bernabé ñeñt atet pena acheñenesha'pa' nanac lleca'rrtet. Puellquëñoñetpa' o' rranre'tet pa'shtampa' o' matrra'tet allo'tsa'yen acheñenesha'. O' rrannaretnomuet, puerranarotetpa'

¹⁵ atet otet:

—Eso'marte'ca'ye masheñeshacha' atet sepena. Yapa'cho' arromñañeya atey ñerra'm sa. Ñeñto'marña o' yeserrpare'tatas cohuen ñoñets attotcha' sequechpuerr ñeñt atet sepena ñeñt e'ñe orrena. Te'pa' añña poctetsa o'ch same'ñera Yompor ñeñt ama

arromñateshayaye, ñeñtara Yompor ñeñt yeçhcate' enet ñaña pats ñaña ñeñt añecmuen sa'p. Ñaña ora allohuen ñeñt yentyen ento ñaña ñeñt yentyen patsopa' ña yeçhcatue' ñaña ñeñt sapo'tsen ña yeçhcatue'.

¹⁶ Alla oterraneterr Pablo:

—Ahuat Yomporpa' muenatan acheñenesha' o'ch pa'yeset ñeñt atet muena'yenet e'ñe ñañeñeta.

¹⁷ Tarraña ama a'ypo'ñano acheñenesha'. Chocma apanete't attoch eñochet po'ñoçh eñall Yompor. Chocma mueranete't ñeñto'marña chocma huatache't ñocpuet attoç yeçhcanete't puenarmet, atto eñalletete't puerraret atto coshete't. Añpa' ñeñta ñeñt atet otan Pablo allohuen acheñenesha'.

¹⁸ Tarraña ama't atet otan acheñenesha'pa' o' alla muenereterr o'ch muetset huaquësh ñocpuet atet pete't po'yompor-recop. Tarraña Pablo ñaña Bernabépa' ama muenataneto.

¹⁹ O' atomatpa' huaçha'ta puesheña'tets judionesha' ñeñt huetsa Antioquíot ñaña Iconioç. Coçape'chatoset acheñenesha' po'poñ. E'moñe'tachet Pablo. Atteñapa' rrolle'chet Pablo. Rrolle'tuetpa' çha otapuetañ o'te' rroma. Chetare'tnomet pueblo't a'yenet.

²⁰ Ñeñña ame'ñatsapa' alla arrotampeñet alla cohueñetpa' ñañapa' ahuepa'tcha' alla tanterra, o' alla ahuerre'r pueblo. Tsapañapa' Pablo ñaña Bernabépa' ahuanerret alla Derbo.

²¹ Chapuet Derbopa' serrpare'tuerreterr Yompor po'ñoñ ñaña all. Shonte' acheñ ñeñt allo'tsen ame'ñenet ñamet. Allempoñapa' ahuanerreterr Listro, ñaña asuerreta' Iconio ñaña Antioquíu.

²² Ora allohuanen ta'yeset yenpuet ñeñt ame'ñetsa attotcha' huomenc pet pueyoçher. O' coçape'chatanet ñaña attoch chocma yemchet Yompor ama't esempo huapanet muerochteñets. Tarro'mar e'ñe yemueroçhteñoç yeçhapcha' all añcha'tarettena Yompor.

²³ O' na'yeset puesheña'tets acheñ ñeñtcha' pompor pa'yes ñeñt pame'ñeñoç apçha'yetsa. Puetore'teñoçetpa' o' ma'yochamçpesyet ñeñtcha' pompornesha' pa'yeset, atet ochet:

—Yomporepa'ch seyenpue', ñeñtara Yompor ñeñt o' same'ña'huerra.

Atet pa'yeset ora allohuen anetso all ame'ña'yesa acheñenesha'.

Allempo çhaçherret alla Antioquíu allot ahuanmuet ahuaña

²⁴ Allempoñapa' asuanerret Pisidio'mar allotpa' ahuanerret Panfilio. Cherret anetso ñeñt pa'so'cheñ Perge.

²⁵ Serrpare'tuerreterr Yompor po'ñoñ all Pergo, allempoñapa' ahuanmuet ñaña Atalio.

²⁶ Chapuet Ataliopa' allotñapa' ahuanmçset boto, o' alla çhaçherret Antioquíu ñeñtara anets allot ahuaña ñeñt ame'ñetsa all ma'yochamçsapanet attoch yenpanet Yompor esheccha' etsotoñet po'taruas. Te'ñapa' o' e'nuet.

²⁷ O' çhaçherret allpa' apçhachet allohuen ñeñt ame'ñetsapa' serrpare'tatueret ora allohuen atto Yomporpa' yenpanet. O' serrpare'tatanet atto Yompor a'pocatanet, añe'na serrpare'tatet ñeñt ama judioneshayaye, añecop attoch ame'ñerret ñamet.

²⁸ Alla atomatet parro epuet ñeñt ame'ñetsa.

15

Allempo a'pocachet Jerusaléno ñeñtcha' atet pet

¹ Atteñapa' çhap ñaña acheñ ñeñt huetsa Judeoç. Chapuetpa' o' yeçhatoset ñeñt ame'ñetsa all, atet otosanet:

—Te'pa' aña sepalltena attoch sequeshperra o'ch setsorranna'ta ñeñtes asheñorres atet yeyçhena ya allempoteñ atet yeçhaterrey Moisés.

² Añña Pablo ñaña Bernabépa' ama pocteye' eñcheto atet. Ñetpa' atet otet:

—Ama po'ñoçhaye' añ palltetso o'ch yetsorranna'ta ñeñtey asheñorrey.

Ñetñapa' alla nanac es otanna'tet. Ama a'pochtacheto. Ñeñto'marña allempopa' o' net Pablo ñaña Bernabé ñaña po'poñechno acheñ attoch ñetpa' o'ch ahuanmuet Jerusaléno o'ch enteñeta' Jesús puellsensarnesha' ñaña ñeñt pompornesha' pen ñeñt ame'ñetsa all. Añecop tet attoch o'ch a'p'to'teneta' erra'tsente' pocte' ñeñtcha' atet pet.

³ O' so'tuanma ñeñt ame'ñetsapa' ahuanmuet. Arr oñmuet Fenicio'mar allotñapa' ahuanmuet Samario'mar. Allña oñemuanmueta' all serrpare'tyesnomuet. Añ serrpare'tyesnomuet atto o' ame'ña ñeñt ama judioneshayaye. Pame'ñeñotetpa' o' a'ypo'ña'huerret ñeñt ahuat poctapñet. Ñeñtña nanac coshate'ña allohuen ñeñt ame'ñetsa.

⁴ O' chapuet Jerusaléno'pa' e'ñe cohuen agapanet Jesús puellsensarnesha' ñaña ñeñt pompornesha' pen ñeñt ame'ñetsa all. Ñaña allohuen ñeñt ame'ñetsa allpa' o' agapanet e'ñe cohuen. Allempoñapa' serrpare'tatoset ora allohuen atet yenpanet Yompor.

⁵ Tarraña patantarr fariseonesha' ñeñt ame'ñetsapa' o' tantapa' atet ot:

—Acheñ ñeñt ama't ama judioneshayaye, añ palltetsa o'ch atsorrare'tta allohuen asheñornesha', ñaña allohuenetpa' otarettetepa' añ palltetsa o'ch ame'ñeññañet ñaña Moisés po'ñoñ ñeñt atet anaret ahuatoteñ.

⁶ Ñeñto'marña Jesús puellsensarnesha', ñaña ñeñt pompornesha' pen ñeñt ame'ñetsa allpa' o' apchet attoch a'pochtachet este' poctetsa ñeñtcha' atet pet.

⁷ Ñeñto'marña alla nanac es otanna'tyeset. Allempoñapa' o' tanta Pedro. Tantapa' atet otanet:

—Sapa' seño'teñe'tña masheñneshacha' ahuaña Yomporpa' o' na'n na. Añecop na'n o'ch neserrpare'tach ama't ñeñt ama judioneshayaye. O'ch neserrpare'tatanet Yompor po'ñoñ attoch ame'ñerret ñamet.

⁸ Ñehua, Yomporpa' entennay yeyo'cher. Ñapa' eñoteñ ama't añ ñeñt ama judioneshayaye o' ame'ñyet pueyo'chreto. Ñeñto'marña o' chorratanet Puecamquëñ attecma atet chorrenya yaña. Attoña eñotatey e'ñe pocte' entenamet ñamet.

⁹ Ñeñto'mar yeñoteñ ama yap'tayaya morrentenyo Yompor. Añña ama't ñetpa' morrentenanet ama't ñeñt ama judioneshayaye. Pame'ñeñotetpa' ahuo't e'shohuerranet po'chñar ñeñt pueyo'chro'tsa'yenet.

¹⁰ Te'ñapa' eso'mare'tña ama pocteye' senteñe ñeñt atet o' p'ohua Yompor. Añecop ñeñt ame'ñetsapa' eso'mare'tña semneñ o'ch senanet ñeñt nanac torrapo' entenet. Ama't ya judioneshaypa' amach erro'teno o'ch yetsotua allohuen ñeñt atet anaret. Ama't yatañneshañpa'cho'ña ama etsotete'te.

¹¹ Añcha'ña yeñot e'ñe Yepartseshar Jesús pomuereño'tpa' o'ch yequeshpa, attecma'ch queshpet ñamet.

¹² Ñeñta e'm allohuen ñeñt apchatsa allpa' alla moma'rrtet. Atto e'mñochet. Bernabé ñaña Pablo'pa' ña nanac serrpare'tatahuet. Añ serrpare'tatanet atto Yomporpa' nanac ahua'mencat panet ahuaña allempo serrpare'teneta' allo'tsa'yen ñeñt ama judioneshayaye. Ñeñto'marña orrtatanet ñeñt ama puentareto ñeñtcha' eñotatahuet añmapa' po'ño'ch Yomporshot huena.

¹³ O' serrpare'tuetpa' allempoñapa' atet ot ñaña Jacobo.

—O'ch masheñneshacha' se'mñnoten naña.

¹⁴ Simón Pedropa' o' serrpare'tatuas atet Yompor te'pa' o' orrtatan pomuereña añecop ñeñt ama't ama judioneshayaye. Ñaña ahuo't orrtatan pomuereña añecop ñeñtcha' ame'ñatahuet attoch aye'cho'chtatoñet Yompor pa'so'cheñ ñamet.

¹⁵ Po'ño'ch te'pa' o' etsota ñeñt atet oteneñ ñeñt a'mtaye't Yompor po'ñoñ ahuat. Añpa' ñeñt atet quellquë't ahuat atet ñerra'm Yompor otatse't:

¹⁶ Allempo o'ch meten shonte' charpa' napa' o'ch alla norrtaterr puesheñarr ñeñt David po'mrenño' ñeñtcha' ahua'mencattatsa atet ahua'mencatte't ahuat pa'tañ David.

Tarro'mar shonte' char ama't puesheñarrapa' ama orrteno David po'mrenñoñ ñeññ nanac ahuamencat.

17 Añecopcha' norrtater allochñapa' ama't po'poñechno acheñenesha' ama't ñeññ ama judioneshayaye o'ch ame'ña'hueret ñamet Yompör, ñaña allohuen erra'tsencha' muenats.

18 Atet ot Yompör ñeññara ñeññ eñotatey ahuañoteñ ñeññcha' atet pa. Añpa' allohua ot ñeññ a'mñtaye't Yompör po'ñoñ ahuat.

19 Alla oterrerr Jacobo:

—Te'pa' añña e'ñe pocte' nenten na amach ya'mñechatatsche ñeññ ama judioneshayaye ñeññ o' puesuerran ñeññ ahuat pocta'ña attoch ame'ñeret Yompör.

20 Te'pa' añña pocte' o'ch yequellcanet ñeññcha' ama patsteto ñeññpa' añ: Amach rratsteto po'chets ñeññ muetsenet ayeñcataretecop ñeññ po'yompörer pen ñeññ ama judioneshayaye ñeññara ñeññ ama ame'ñetso. Ñaña o'ch yot Janet amach chetapretatsteto taporets. Ñaña o'ch yot Janet amach rratsteto ñeññ muetsenet ñeññ atta a'pañare't, ñaña amach rratsteto ñeññ ño'shetsa oño. Ñaña amach es rratsteto es po'rras.

21 Alla oterrerr Jacobo:

—Añpa' ñeññach atet yequellcanet. Tarro'mar ahuañoteñ o' serrpare'tuoñet Moisés po'ñoñ ora allohuen anetso'mar. Ñaña pate'tets semana añ judionesha'pa' chocma lleyeññañet Moisés po'ñoñ all po'prahueto. Añpa' allohua atet ot Janet Jacobo.

22 Allempoñapa' o' a'poctachet o'ch net puesheña'tets ñeññ e'ñe allo'marnesha' ñeññcha' mueñet Antioquío, o'ch coteret Pablo ñaña Bernabé. Atetpa' e'ñe pocte' eñch allohuen—Jesús puellsensarnesha' ñaña ñeññ pompornesha' penet, ama't ñaña allohuen ñeññ ame'ñetsa all. Añ net Judas Barsabás ñaña Silas. Añña epsheña acheñpa' e'ñe cohuen eñch allohuen ñeññ ame'ñetsa.

23 Ñetpa' o' anmuet, ñeññ atet oten carta:

“Masheñeshacha' ñeññes yeçhetsa anetso Antioquío ñaña Sirio ñaña Cilicio: Allohueneñ ñeññey ame'ñetsa o'ch yehuomñcha'tas sa añ yecartot—ñeññey Jesús puellsensarneshay ñaña ñeññey pompornesha' pen ñeññ ame'ñetsa arr. O'ch yehuomñcha'tas sa ñeññes ame'ñetsa saña ñaña ama't ñeññes ama judioneshayayso.

24 O'ch yotas, yapa' o' ye'mare'ch o' chap sesho puesheña'tets acheñ arro't ñeññ muenets o'ch a'mñechatasa. Ñetñapa' o' nanac moññe'tatasa socta'ña. Tarraña te'ñapa' o'ch yotas, añ acheñpa' ama yaye' mueñenaye.

25 Ñeñño'mar pocte' yenteñ allohueneñ o'ch yene' epsheña acheñ ñeññcha' yemñonas epuet Bernabé ñaña Pablo ñeññ nanac yemuerena.

26 Tarro'mar nanac yemorrenenanet ahuañapa' all serrpare'teneta' autsañ muene' amtsanataretetuet all. Tarro'mar e'ñe puemorrenteño'tet Yepartseshar Jesucristo atet a'pare'ttet.

27 Añ yemñonas Judas ñaña Silas. Ñetpa' o'ch serrpare'tatenseta' ora atet yoten ya arr.

28 Parets Puecamquëñpa' o' eñotatey ñeññ e'ñe pocte' yenten ñeññcha' yenonas. Amach añña yenonaso ñeññ nanac torrapo'. Te'pa' añ palltetsa ñeññcha' atet sepa.

29 Amach serrratsto po'chets ñeññ muetsenet ayeñcataretecop ñeññ po'yompörer penet. Ñaña amach serrratsto ñeññ muetsenet ñeññ atta a'pañare't. Ñaña amach serrratsto es po'rras. Ñaña amach sechtapretatsto taporets. Ñerra'm amach atet sepo ñeññpa' e'ñech pocte'. Añpa' ñeññach yotas. Yomporepa'ch sa'nataya.” Añpa' allohua huañ ñeññ atet oten carta.

30 Allempoñapa' o' mueñet Judas ñaña Silas epuet Pablo ñaña Bernabé. O' ahuanerret Antioquío. Chaçherret Antioquío'pa' o' apçhatuet allohuen acheñenesha'pa' o' aposanet añ carta.

31 Ñeñt apčhatsapa' o' lleyet añ carta. Lleya'huetpa' nanac coshatanet ñeñt atet actape'chatarettet cartoť.

32 Añña Judas ñaña Silas, ñetpa'cho'ña nanac a'potoñet Yompor po'ñoñ ñamet. Ñetpa'cho'ña a'mitenet Yompor po'ñoñ. Nanac serrpare'tatet. O' cotape'chachet e'ñe cohuen ñeñt ame'ñetsa allochñapa' huomenccha' pet pueyočer.

33 O' allponmatet allpa' allempoñapa' secherret alloť amñarettet ahuaña. Ñeñt ame'ñetsa Antioquíopa' o' so'tneret e'ñe cohuen, otanet:

—Yomporepa'chña ya'nataya parro allohueney.

34 Tarraña Silaspa' mueneñ o'ch a'pa all, Judaspa' o'ch ahuerr.

35 Añña Pablo ñaña Bernabé allponmaterret Antioquí. Yečhatapretereta' epuet po'poñečno ñeñt yečhatets all. Serrpare'tapretereta' Yompor poñoñ epuet po'poñečno.

Allempo puepocheño ahuerrerr Pablo serrpare'tats allemeñ anetso'mar

36 Atteñapa' o' atomat Pabloñapa' otan Bernabé:

—O'ch ahuerrey, o'ch yabchera' ñeñt ame'ñetsa ora allohuen anetso all yeserrpare'toñ Yompor po'ñoñ ahuaña attoch yeñoč errotenette'ña te'.

37 Bernabéñapa' aña e'ñe pocte' ent o'ch coťa'ner Juan Marcos.

38 Tarraña Pablopa' ama pocteye' eñche tarro'mar ahuaña allempo čhapuet Panfilio, Juan Marcospa' čha sa'nerranet, o' puerrerra. Ama allo'na yenpuenaneto all serpare'tyeset.

39 Ama erroťeno a'pochtacheto, čha sa'nannerret. Bernabépa' aña aner Marcos. O' ahuanpset boto, čhačerret Chipro.

40 Pabloñapa' aña e'ñe pocte' ent o'ch anerran Silas. Ñeñt ame'ñetsa allpa' o' so'tneret, e'ñe cohuen oťneret:

—Yompor e'ñe pomuereñoťpa' a'natyepa'ch.

Allempoñapa' ahuanenet.

41 Asueneta' Sirio'mar ñaña Cilicio'mar. Alloťñapa' yenpuet allohuen ñeñt pame'ñeñoť apčhetsa parro. O' yenpuet añecop attoch huomenccha' pet pueyočer.

16

Allempo Timoteopa' coťa'nerran Pablo ñaña Silas

1 Pablo ñaña Silaspa' asuerreta' anetso añ pa'so'cheñ Derbe. Alloťñapa' ahuanerret alla Listro. Allñapa' allo'tsen puesheñarr acheñ ñeñt ame'ñetsa añ pa'so'cheñ Timoteo. Ñeñt Timoteopa' añ pachor pen judionesha' ñeñt ame'ñetsa. Pomporñapa' ama judioneshayaye aña griegonesha'.

2 Ñeñt ame'ñetsa Listro ñaña Iconiopa' nanac cohuen enteñet Timoteo.

3 Ñeño'marña e'ñe pocte' eñch Pablo o'ch coťa'nerranet Timoteo. Tarraña ato'tña anemhueta' allcha' tsorreñet atet yečhena joreyonesha', tarro'mar allcha' tetpa' shonte' judionesha'. (Ñehua, Pablopa' ama mueno o'ch atsrre'mach judionesha'.) Allohuenetpa' o' eñotuet ñeñt Timoteo pomporpa' ñeñt ama judioneshayaye aña griegonesha'.

4 All oñomyeset allemeñ añetsopa' otuosanet añ ñoñets atet a'pocht Jesús puellsensar-nesha' ñaña ñeñt pompornesha' penet Jerusaléño. Añ eñotatuosanet ñeñtča' atet pet.

5 Atteñapa' allohuen ñeñt ame'ñetsapa' e'ñe pame'ñeñoťet allo'na senet huomenc pa'nmuet pueyočer. Pate'tets yetpa' allo'na sen atonetnomtsa ñeñt ame'ñetsa.

Allempo Pablopa' entan macedonio'marnesha' atet ñerra'm cho čhopo'teñ

6 Allempoñapa' arr asuerreta' ñaña Frigio'mar ñaña Galacio'mar tarro'mar Parets Puecamquēñpa' ama muenataneto o'ch serrpare'toñet Yompor po'ñoñ all Asio'mar.

⁷ Allempoñapa' ahuanmuet ñaña tenonet, chapmochet Misio ñaña arr sechet Bitinio'mar, tarraña Jesús Puecamquëñpa' ama muenataneto.

⁸ Atteñapa' metuet Misio'mar o' cha'cha'tet Troaso.

⁹ Cha'cha'tet Troaso tsapoñapa' añña Pablopa' orrtoña atet ñerra'm cho es ye'chopo'ten. Atet ñerra'm pue'chopoño'tpa' o' entan puesheñarr acheñ macedonio'marnesha' alla ten, atet otare'ch: "O'ch sona'cha't arr Macedonio, o'ch seyenpuenya'."

¹⁰ Allempoña errte' orretuoña macedonio'marnesha'pa' yañapa'* o' yesecha o'ch ahuey Macedonio, tarro'mar yoten po'ño'chte' chore'teney Yompor allochñapa' o'ch yeserrpare'teññaña' po'ñoñ all Macedonio.

Allempo chap Pablo ñaña Silas Filiposo

¹¹ Allempoña Troasotpa' año ahuanpsey boto. E'ñe pa'charra yepe' o'ch ye'chap anetso añ pa'so'cheñ Samotracia. Allñapa' all yetsotnoma. Yahuanerrerr allotpa' tsapatñapa' o' ye'chap ñaña anetso Neápoliso. Allñapa' all yetsotuerrerr.

¹² Yahuanerrerr allotpa' o' ye'chap ñaña anetso añ pa'so'cheñ Filipos allpa'cho' all yetsotosa. Añ anets Filipospa' nanac atarr anets. Po'poñe'chno anets alla Macedonio'marpa' ama atarroyaye. Allñapa' allo'tsa'yen shonte' solltarnesha' ñeñt romo'marnesha'. Yapa' alla ya'llponmatos all.

¹³ Allempoña chap allempo amesen judionesha'pa' yañapa' yahuanma anetso't a'yo. O' ye'chap ontapo all ye'nen ñato' allcha' ma'yochet. Yaña allpa' yentos puesheña'tets coyanesha'chno all anorrchenet. Yañapa' o'cho' yanorrcha'tos yaña. Allempoña yapa' yeserrpare'tatanet Yompor po'ñoñ.

¹⁴ Puesheñarr coyanesha' ñeñt allo'tsen añ pa'so'cheñ Lidia ñeñt huetsa anetso't añ pa'so'cheñ Tiatira. Ñaña'p añ po'taruas pen atto vendenan shetamuets yetsñorromamuen. Ñaña'p ame'ñenana Parets. Allempoña e'mñotan Pablo ñeñt atet serrpare'ten añña Yomporpa' o' chapatoñ pueyo'chro ñeñt atet serrpare'ten Pablo.

¹⁵ Lidiaña pame'ño'ñotpa' allenta apatare'tta, ñaña o' apatare'tta ñeñt parro ye'chenet pocollo. Ñaña'p o'cho' hua'ña'nerrey pa'paclo, atet ot:

—Ñerra'm e'ñe pocte' sentenen atto name'ñera Yepapar, o'ch sehuapa nepaclo ñato' allcha' sommosa.

Ñaña'p otare'tey yonepa'to' ñeñto'marña yapa' o' ahuey.

¹⁶ Parrochñapa' allempo yeta ontapo allecma ma'yochenet toñoñapa' yentnoñ puesheñarr shopshesha' ñeñt chorrena oneñet. Añña oneñetpa' ñach eñoratene' shopshesha' ñeñto'marña ñerra'm erro'ten otanetpa' atto'ch'cho' pa. Amach pueno po'ñoñ ama't mamesha. Añña shopshesha'pa' eñall ñeñt pamo'mte' pen po'poñe'chno acheñ. Ñetñapa' nanaccha' ganatenanet quelle atto eñotañtena.

¹⁷ Ñaña'p chocmach co'ta'nomye't epay Pablo. O'ch co'ta'nmueypa' o'ch rranare'tnoma chenta'pa' atet'cha' ot:

—Añ encaneshachnopa' añ sherbenet Yepapar Ñeñt Nanac Parets. Arrpa' añecop huenet attoch o'ch serrpare'tatset attoch sequeshperra.

¹⁸ Atteñapa' ama't atomatpa' attecma'ch pena. Atteñapa' o' a'mñe'chatana Pablo. Pabloñapa' allenta puetallsapa' o' otan oneñet:

—Te'pa' e'ñe po'huamenco't Jesucristopa' o'ch nota'p, peque'chpa'ner shopshesha'.

Allempocmuepa'tcha' que'chpa'nerran shopshesha'.

¹⁹ Añña pamo'mtaynesha'pa' co'tape'chetpa' otet:

—Te'pa' llequëñtsa, o' huañerr allo yeganena quelle.

* **16:10** Ñehua, e'ñe allempocmapa' o' co'ta'nmanet ñaña Lucas, ñeñfara ñeñt quellquë' añ ñoñets.

Allempoña pa'tsrre'mueñoŕetpa' o' rromuet Pablo ñaña Silaspa' anmarettet e'ñe po'huamencocma, o' ačhapatarettet allo'tsa'yen añcha'tareñnesha' allecma a'pocatenet ñoñets.

²⁰ Allempoña ačhapatarettet allo'tsa'yen guardia pa'mcha'tareñnesha'pa' o' otoset:
—Añmapa' ñeññ judionesha'. Nanac atsrre'moçhtenet arr ya'netsro.

²¹ Ñetpa' yeçhatenyet atet yeçhenet ñet ñeññpa' ama pocteye' yenteñe ya. Yapa' romo'marneshaypa' ama cohuen yenteñe o'ch atet yeña.

²² Allohuen acheñenesha'pa' nanac atsrre'mateñet. Ñeññña guardia pa'mcha'tareñnesha'pa' atet otan pueyochresha':

—Te'pa' o'ch serrotanetpa' o'ch senallanet.

²³ Allempoñapa' o' nallet Pablo ñaña Silas nanac huomenc. Allempoña o' analaretuetpa' o' abe'tarettet ñaña cárcelo; atet ochet ñeññ cohuanmpene' cárcel:

—O'ch secuamñpsanet e'ñe huomenc.

²⁴ Allempoña atet otaretuetpa' añña ñeññ cohuanmpene' cárcelpa' o' abe'tanet nanac o'pono. Allñapa' nanac echarr pñamñpsanet ñaña o' arrmatamñpsarettet pa'tcoñ tablat e'ñe echarr.

²⁵⁻²⁶ Atteñapa' o' ma'yocha Pablo ñaña Silas. Ñaña o' morrechet, puemorrecheñoŕetpa' nanac aye'choçhtateññañet Yompor. Añña po'poñeçhno acheñ ñeññ abe'tareñ ñaña allpa' ñetñapa' o' e'mñnotanet. Allempoña çhap rroçh tsappa' machayotepa'tcha' pella pats nanac huomenc, ama't allo' tomatenet echarr cárcelepapa' çha pa'shma huomenc. Puepelleñoŕ pats huomencpa' o' torna'tua ora allpon all ayottamñpsarettenet. Ñaña ora allpon allo huanquëñet acheñpa' o' pueyna'tuen.

²⁷ Allempoña ahuo't e'mansa ñeññ cohuanmpene' cárcelepapa' ahuo't entan o' torna'tuen allo ayottamñpsarettenetpa' o' chetan po'cchell o'ch muetsa ñañaña. Ñapa' çho' otapañ ñeññ ayottamñpsaretpa' o'te' yetuena.

²⁸ Añña Pablopa' o' çhore'ch huomencpa' atet och:

—Amach erroñ peñatsto ama't mamesha. Yapa' allo'tsa'yenya allohueney.

²⁹ Allempoñapa' añña enamnom lampareñpa' mata allo'tsen Pablo ñaña Silas. Puenmchañoŕpa' çha pa'shmuen a ñaña e'ñe puenmcha'na'teñoŕpa' o' concorposa e'ñe ñesheto.

³⁰ O' çha'nmaçha'tatanetpa' atet otanet:

—Nomporneshacha' ¿ešte'ña pocte' te' ñeññcha' atet neña attoch nequeshperra naña?

³¹ Ñetñapa' atet ochet:

—Añ pocte' o'ch pame'ñera Yepartseshar Jesucristo, allochñapa' attoch pequeshperra. Ñaña attoch queshperra ñeññ parro peyçhena pepaclo.

³² Allempoña ñeññ cohuanmpene' cárcelepapa' o' a'secherranet pa'paclo, allñapa' serpare'tachet Yompor po'ñon, ñaña allohuen ñeññ pa'paclo'tsen o' e'mñnotet ñamet.

³³ Allempocma ñeñte tsaprocma o' e'pana'tyerranet all atserrparettet. Allempoñapa' o' apatareŕta ña, ñaña allohuen ñeññ pa'paclo'tsa'yenpa'çho'ña o' apatareŕtet ñamet.

³⁴ A'tapatanet pa'paclopa' rratanet. Pame'ñeñoŕ Yompor atarr nanac cosha. Ñaña allohuen ñeññ pa'paclo'tsenpa' atarr coshet ñamet.

³⁵ Tsapañ puetarenpa' añña guardia pa'mcha'tareñnesha' o' mueñet puesheñarr guardia, ñeññcha' otosets:

—O'ch sa'rroyer Pablo ñaña Silas.

³⁶ Ñeññ cohuanmpene' cárcelpa' atet otan Pablo:

—Oten añcha'tareñ seçha'nerrepa'to'. Te'ñapa' orrerres, Yompore'pach sa'nataya.

³⁷ Tarraña Pabloñapa' atet otanet:

—Yapa' romanona'tarey yaña. Ñeññ ñoñets anareñ Romoŕpa' oten ama pocteyaye o'ch yecoñchach acheñ ñerra'm ama yeñoteña' po'ñoçhte' eñall atto otteñe'cheñet acheñ.

Tarraña añña am̄cha'taretnesha' ama e'nano ñeñt̄ e'ñe po'ñoçh atet yepena. Atta nalatyet allo'tsa'yen shonte' acheñenesha' alloñapa' o'cho' atta yottam̄psatyet arr cárcelo. Te'ña ñetpa' mueneñet o'ch cha'nmaterryet e'ñe a'nahua. Ñeñtpa' ama pocteyaye atet. Te'pa' o'ch sotuer am̄cha'taret huapuetepa' arr cha'nmaterryetepa' e'ñe ñet.

³⁸ Añña guardiapa' otuerran pa'm̄cha'taretnesha' atet oten Pablo. Ñetñapa' cha yorenet allempo e'mare'chet ñetpa'cho'ña romanona'taret ñamet.

³⁹ Allempoña huaçha'tetpa' enamaretterret peretneñets. Allempoña cha'nmatenanetpa' atet otanet:

—Te'pa' orrerres, sahuannerra ñaçhayo.

⁴⁰ Allempoña cha'nenet cárcelo'tpa' ahuanerret o'ch alla abchereta' Lidia. Allempoñapa' serrpare'tuerret parro ñeñt̄ ame'ñetsa, co'tape'chatuanerret cohuen, allempoñapa' ahuanerret allo't.

17

Allempo chap Pablo ñaña Silas Tesalónico

¹ Allempoña ahuanerret allo'tpa' ahuanmuet anetso Anfípoliso, alloñapa' ahuanmuet ñaña anetso Apolonio. Alloñapa' o' chapuet ñaña anetso ñeñt̄ pa'so'cheñ Tesalónica. Allñapa' allo'tsen judionesha' po'prahua'.

² Pabloñapa' o' be'tosos ñeñt̄ attecma pena. Allñapa' serrpare'tatosanet Yompor po'ñoñ. Allñapa' ma'panerr semana. Allempoña çhen yet allempo amesenetpa' o'chcho' serrpare'tatanet Yompor po'ñoñ ñeñt̄ atet aquellcaret.

³ Allpa' añ yeçhatanet atet anaretta ñeñt̄cha' Cristotats ñerra'm esempoch huapa añ patsropa' nanaccha' mueroçhtachet. Tarraña o'ch mueroçhtatuetpa' elloch alla tanterra ama'tcha' rroma. Atet otanet:

—Te'ñapa' o'ch notas, añ Jesús ñeñt̄ara ñeñt̄ o' neserrpare'tatuaspa' ñeñt̄ña Cristotets.

⁴ Puesheña'tetspa' pocte' eñchet o' ame'ñyet Jesús ñeñto'mar ñetpa' yemteñet Pablo ñaña Silas. Ñaña shonte' griegonesha' ñeñt̄ ahuatoteñ cohuen co'tape'chets Partso-coppa' o' ame'ñeñet Jesús. Ñaña shonte' coyaneshachno ñeñt̄ e'ñe cohuen entyen acheñenesha' ñetpa'cho'ña o' ame'ñerret ñamet.

⁵ Judionesha'ña ñeñt̄ ama ame'ñetsopa' ama pocteye' enteñeto attoch acheñenesha'pa' o'ch yemchet Pablo, ñeñto'marña puesope'cheño'tetpa' o' e'moñe'chet. Ñeñto'marña a'sechet puesheña'tets acheñ ñeñt̄ ama tama es sherbetso ñeñt̄ atta ellapetse't anorrets all shontena acheñenesha'. A'sechet o'ch apçhachet shonte' acheñ attoch e'moñe'tachet Pablo. Ñetña pa'tsrre'mueño'tetpa' ahuanmuet Jasón pa'paclo all a'posa Pablo ñaña Silas. O'pachet erro'tenotpa' o'te' cha'nmaçha'tet a'yot attoch acheñenesha'pa' o'ch rromuet.

⁶ Allempoña chaçha'tet Jasón pa'paclopa' tarraña ama entaretteto. Ñapña rromuet Jasón ñaña po'poñeçhno acheñenesha' ñeñt̄ ame'ñetsa. Ñetaña anmarettatset am̄cha'taretsho. Pa'tsrre'mueño'tetpa' nanac ama'toçhetnomuet attotaçho' chapuet allo'tsen am̄cha'taretnesha'. Allñapa' atet otoset:

—O' chap acheñ ñeñt̄ muenene' o'ch a'po'poñeterñay yoc'ta'pña. Atto' pohuanmuet ama't po'poñ anetso'mar, te'pa' o' chapuet ñaña arr.

O' alla oterreterr:

—Añ Jasónpa' o' agapanet e'ñe cohuen te'pa' ñaña pa'paclo a'puenet.

⁷ Ñetpa' ama pocteye' enteñeto atto am̄cha'taret o'ch nan ñoñets all anetso Romo. Ñetpa' añña otenet eñallo' po'poñ am̄cha'taret ñeñt̄ nanac ahuamenca't ñeñt̄pa' año' pa'so'cheñ Jesús.

⁸ Acheñenesha'ñapa' ñeñt̄a e'muetpa' nanac atsrre'muet ñaña ama't am̄cha'taretnesha'.

⁹ Allempoña Jasón ñaña po'poñechno acheñpa' o' ayoram̄psarettet allpon po'çllayoret. Alloṭpa' otarettet:

—Añ quellepa' allach yapuerres ato't ahuerra' Pablo ñaña Silas. Allempoñapa' a'rroyeret Jasón ñaña po'poñechno acheñ.

Allempo chap Pablo ñaña Silas anetso Bereo

¹⁰ Allempoña acheñenesha' ñeñt ame'ñetsapa' o' mueñeret Pablo ñaña Silas Bereo. Tsapocma amñareñtenet a'nahua. O' chapuet Bereopa' be'toscha'toset judionesha' po'prahuo.

¹¹ Añña judionesha' ñeñt Bereo'tsa'yenpa' ñetñapa' e'ñe cohuen coṭape'chenet ama atteyayeto atet ñerra'm judionesha' ñeñt Tesalónico'tsa'yen. E'ñe pocsheñesha' e'mñotoñet Yompor po'ñoñ, alloṭña ñetpa' o' e'nyeset Yompor po'ñoño all aquellcareñ ahuatoteñ. Tarro'mar ñetpa' mueneñet o'ch eñochet ñato' po'ñochte' atet serrpare'ten Pablo ñaña Silas. Paṭe'tets yeṭpa' attecma pete't.

¹² Ñeñto'marña shonte' acheñenesha' ñeñt ame'ñatsa. Shonte' ñaña coyanesha'chno ñeñt griegonesha' ñeñt nanac sherbetspa' o' ame'ñenet ñamet. Ñaña po'potantañ shonte' yacmanesha' o' ame'ñenet.

¹³ Añña judionesha' ñeñt yeçhetsa Tesalónicopa' o' e'mare'chet Pablo o' alla serrpare'tuerranerr Yompor po'ñoñ ñaña Bereo. Ñeñto'marña hua'cha'tet ñamet all attoch atsrre'matachet acheñenesha' o'ch e'moñe'tachet Pablo.

¹⁴ Añña acheñenesha' ñeñt o' ame'ñapa' o' mueñet Pablo tepa'to' ontapo allo'tsen sa'p atarr. Añña Silas ñaña Timoteopa' alla a'pa Bereo.

¹⁵ Puesheña'tets acheñpa' o' coṭa'nmet Pablo. Ñetpa' alla neñeta' Pablo anetso ñeñt pa'so'cheñ Atenas. Allña so'tanna'tuet Pabloñapa' atet otanet:

—O'ch sotuer Silas ñaña Timoteo onetepa' ñamet e'ñe tayecma.

Allempo chap Pablo ñaña Silas Atenso

¹⁶ Pabloñapa' alla cohuanet Atenso. Allña cohuanetpa' shonte' entosan ayeçcataretechno all Atenso, ñeñt po'yomporer pa'yen acheñenesha'. Ñaña' nanac llecacet.

¹⁷ Pabloñapa' mueneñ o'ch be'tos judionesha' po'prahuo attoch serrpare't epuet parro judionesha' ñaña po'poñechno acheñ ñeñt cohuen coṭape'chets Partsocop. Paṭe'tets yeṭpa' o'chcho' ahuo' all shontena acheñenesha' pueblo allña'pa' o'chcho' serrpare'tet parro ñeñt allo'tsa'yen.

¹⁸ Parrochpa' aña huapatsa ñeñt ame'ñenaya Epicuro poçtaṭña, alloṭpa' o' huapa ñaña ñeñt ame'ñenaya po'poñ coṭaṭñats ñeñt otenet estoico. Ñetñapa' atet otet:

—¿Este'ca'ye coṭape'chenña añ acheñ ñeñt atta nanac eñets?

Po'potantañña'pa' atet otet:

—Ñato' añte' muenen o'ch yeçhatey po'poñ po'yomporer ñeñt ama yentare ya.

Tarro'mar Pablo'pa' añ serrpare'tatenanet atet pena Jesús ñaña ama't atto tanterra Jesús.

¹⁹ Ñetñapa' o' anmet Pablo all oteñet Areópago allecma apçhena eñotañnesha'. Allña'pa' otoset:

—Ñehua, te'pa' o'ch p̄otey este'ña p̄oçtape'chen pa. Yapa' te'pa' yemneñ o'ch yeñoch.

²⁰ Tarro'mar ñeñt peserrpare'tenpa' ama ye'mare. Yapa' yemneñ o'ch yeñoch este' nanac p̄oten.

²¹ Ñehua, allohuen atenso'marnesha' ñerra'm añ serrpare'tats ñeñt ama puentaretopa' ellapenetcha' e'mñotet. Ñeñtach paterr ma'yoçhret. Ñaña ñeñt yeçha'huerra Atensopa' ñeñt huapyetsa po'poñ anetsoṭpa' te'pa' atta penet ñamet.

²² Allempoña Pablo'pa' tomos rroçho all oteñet Areópago'pa' atet otanet:

—Atenso'marneshacha' napa' neñotenes sapa' aña atarr sema'yochrena ñeñt sey-
omporer sepa'yen.

²³ All nasuanempa' shonte' nentyesnom ñeñt sema'yochyena ñeñt seyomporer sepen.
Paterr allecma sema'yochenapa' napa' nent all oten añ ñoñets: "Añpa' añecop Yompor
ñeñt ama yeñotena'." Ñeñt sema'yochena ñeñt ama señotena'pa' ñeñtara Yompor te'pa'
ñeñtcha'ña neserrpare'tatas.

²⁴ Añ ñeñtara Yompor ñeñt yeçcate' añ pats. Ñaña yeçcatan allohuen ñeñt yentyen
añe patsro. Ña Pamo'mte' pen enet ñaña pats. Ñeñto'marña ya ñeñtey arromñañeypa'
ama pallteno o'ch yeyeçcatoñ allcha' yeçha.

²⁵ Ñaña ama pallteno o'ch es yař. Ñocop ama es pallteto. Elloña ñaña yapuene' allo-
hueney atto yocrrena, apueneñ ñaña atto yo'rrerrena. Ñapa' apueneñ ora esocmañen.

²⁶ Ora allpon pa'namen acheñ ñeñt yeçha'yetsa añe patsro Yomporpa' ña yeçcatue'
e'ñe puesheñarrofa acheñ. Ñapa' o' nohuanet e'ñech allempohua corra'yaset. Ñaña o'
na'yuanet e'ñech erra yeçha'yaset añe patsro.

²⁷ Tarro'mar Yomporpa' yeçcatan pa'namen acheñ tarro'mar añ cotape'ch al-
lochñapa' allohuen acheñpa' ñerra'm e'ñe acořa e'neretpa' po'ñoçhpa' enteretcha'. Ñapa'
allame'ttso'tsenate' yeshot.

²⁸ Tarro'mar e'ñe ñeshot te'pa' yocrrena ñaña e'ñe ñeshotpa' yechope'chen, ñaña e'ñe
ñeshotpa' ye'ñalleta. Ama't atet quellquë't ahuat puesheñarr samo'ts sa ñeñt etsotaye't
ñoñets. Añmapa' ñeñt quellquë't samo'ts ahuat: "Te'ña po'ñoçh Yomporpa' puechemere-
sha' peney."

²⁹ Alla oterrerr Pablo:

—Ñehua, ñerra'm po'ñoçh Yompor puechemeresha' peney ya, ama pocteyaye o'ch yoch
Yomporpa' arroř ayeçcataret oroř, amapa' arroř ayeçcataret asretoř, amapa' arroř
ayeçcataret mapyoř. Añmapa' ñeñt ayeçcataretpa' e'ñe ya yoctařñořa ayeçcataret,
atet es yetma'ntatena ya.

³⁰ Ahuat acheñpa' ama't ama eñotenano ñeñt cohuentetsa Yomporecop, Yomporpa'
amach erroř paneto. Tarraña te'ñapa' oteney yoctape'cherrepa' ello cohuen Yompore-
cop, allohueney acheñey ñeñtey corra'yetsa añe patsro.

³¹ Yomporpa' tarro'mar mueneñ o'ch yoctape'cherr etserra tarro'mar ñapa' o' ne'
esempoch allohueneypa' yorrterrach ñesho. Te'pa' o' nan Jesús ñach acrerre' allohuen
acheñ ñeñt e'ñe po'ñoçh atet pete't. Acrancha' ñeñt cohuen acheñ ñaña ama't ñeñt
ama cohueno acheñ. Ñeñto'marña te'pa' o' eñotatuay Jesúsapa' ñach acrerrets tarro'mar
Yomporpa' o' tantater ama't o' rromua ñaña Jesúsapa' e'ñe pocte' es pen. Te'pa' o'
eñotatuay allohueney acheñey.

³² Allempoña serrpare'tan Pablo attoch yetanterra ellopa' añña puesheña'tets
acheñpa' o' achmāre'chet. Tarraña po'potantañapa' atet otet:

—Ñehua, ñato' esempochña ye'mñoterrperr po'pocheño.

³³ Allempoñapa' ahuerr Pablo.

³⁴ Tarraña puesheña'tetspa' yemchet Pablo ñaña o' ame'ñet. Añña puesheñarr ñeñt
ame'ñatsa añ pa'so'cheñ Dionisio ñeñtara ñeñt añcha'tarettetsa ñeñt a'poctatene' ñoñets
all oteñet Areópago. Ñapa' o' ame'ña, ñaña po'psheñeñ coyanesha' ñeñt pa'so'cheñ
Dámaris. Ñaña po'poñeçhno acheñ o' ame'ñet ñamet.

18

Allempo çhap Pablo Corinto

¹ Allempo ahuo' ñaña anetso all oteñet Corinto.

² Chap Corintopa' entosan puesheñarr judionesha' añ pa'so'cheñ Aquila. Ñapa' errete' huetsa Italiot epuet puetapor ñeñt pa'so'cheñ Priscila. Año'mar huenet Italiot tarro'mar amcha'taret Claudiopa' o' nan paterr ñoñets all Italo. Ñeñt pa' atet ot: Allohuen judionesha' pa' ahuanerretepa'to' Romot. Aquilapa' arr eñalletña Ponto. Pabloñapa' ahuo' o'ch entenana' Aquila epuet puetapor.

³ Ñetpa' ñeñña po'taruas penet atto yeçcatenet shetamtsopo'. Pabloñapa' alla a'pa epuet attoch taruaset parro.

⁴ Pate'tets semana allempo çhen yet allempo amesenet Pabloñapa' o'chçho' ahuo' judionesha' po'prahuo. Allña' allcha' serrpare't epuet judionesha' ñaña ñeñt ama judioneshayaye. Ñapa' atarr mueneñ o'ch ame'ñatanet.

⁵ Allempoñapa' huapa ñaña Silas epuet Timoteo. Taya huapuet Macedoniot. Allempopa' añ nanac torrena Pablo serrpare'te'. Ñapa' añ eñotatenan judionesha' Jesús pa' ñeñtaraca'ye Cristoterrets ñeñt atarr cohuenet ahuatoteñ.

⁶ Judionesha' ñapa' nanac e'moñe'chet Pablo, o' achm'are'chet. Allempoña Pablo pa' o' pa'shman pa'shtam attoch eñochet nanac atpare'tenet. Allempoñapa' atet otanet:

—Sapa' sañeñach a'chencatuerrtsa. Tarraña napa' amach es seyohua'no. Te'pa' tayoteñ añach neserrpare'tat ñeñt ama judioneshayaye.

⁷ Allempoñapa' ahuer. Chap añ ñeñt pa'so'cheñ Justo pa'paclo ñeñt ame'ñenaya Yompor. Pa'paquëllpa' allame'ttso'tsen allo'tsen judionesha' po'prahua'.

⁸ Ñeñt amcha'tarettetsa judionesha' po'prahuo ñeñt pa' añ pa'so'cheñ Crispo. Crispopa' o' ame'ñerrana Yepartseshar Cristo ñaña allohuen ñeñt pa'paclo'tsen. Shonte' corinto'marnesha' e'ññoñet Yompor po'ñoñ, o' ame'ñerret ñaña o' apatarettet Yomporecop.

⁹ Atteñapa' orrtoña Pablo atet ñerra'm çho es yeçhopo'ten. Yomporpa' ahuo't otan Pablo:

—Amach pemcha'tatsto, çhocmach peserrpare't, amach atta pemamtetatsto.

¹⁰ Napa' o'ch necuam'penep' attoch amach esesha' erro't es pepaye. Tarro'mar napa' nechen shonte' acheñ añ anetsro't ñeñtcha' name'ñaya.

¹¹ Allña' allena alla paterr char ñaña meterrerr pechapña arrorr. Allpa' nanac yeçhatanet Yompor po'ñoñ.

¹² Allempoña amcha'taretteta Galión e'ñe alla Acayopa' judionesha'ña o' apçhetpa', o'pachet Pablo. Allempoña o' rromuetpa' anmet amcha'taretesho allecma a'poc'tatenet ñoñets.

¹³ Chapuet allpa' atet otoset:

—Añ acheñpa' añ yeçhatenan acheñenesha' atto'ch ame'ñyet Yompor, tarraña ñeñt pa' ama atteyaye atet oteney Moisés po'ñoñ ñeñt atet anaret.

¹⁴ Ahuo'ch eñoseñ Pablo pa' Galiónña' atet otanet:

—O'ch notas ñeñtes judioneshas, ñerra'm añ acheñ añte' o' pohua ñeñt ama cohuenopa' amapa' atet ñerra'm çho muetsenan acheñ, ñehua, pocte' napa' o'ch ne'mñotas atto sotteñe'cheñ.

¹⁵ Tarraña ñerra'm amate' atteyaye, añpa' e'ñe socpa—atet seyçhaten sa ñeñtes judioneshas, amapa' esesha'te' same'ñena, amapa' ñeñt atet oten ñoñets ñeñt atet anaret socop. Ñeñto'marña napa' notenes ñeñt pa' socpa. Ñeñto'marña napa' amach neñoso añecop ñeñt e'ñe socpa.

¹⁶ Allempoñapa' o' çha'nmaçha'taterranet.

¹⁷ Allempoña acheñenesha' añ rromuet Sóstenes. Sóstenes pa' ñeñt amcha'tarettetsa judionesha' po'prahuo. O' rromuetpa' o' nalle'chet e'ñe alla allame'tets amcha'taretesho. Amcha'taret Galiónpa' ama cohua'psaneto.

Allempo çherrerr Pablo Antioquío

18 O' atomaterrerr Pablo alla Corinto allempoñapa' o' so'tnerran ñeñt ame'ñetsa. Aña coterre' Priscila ñaña Aquila. Allotpa' año ahuañpset boto, arrcha' tet Sirio'mar. Arr asuanmuet anets Cencrea. Allñapa' o' shopena'tatosa Pablo. Añecop shopena'tata attoch eñochet o' etsotuan po'ñoñ ña ñeñt atet otan ahuaña Yompor ñeñtcha' atet pa Yomporecop.

19 Allempoña chapuet Efesopa' allñapa' o' sa'nerran Aquila ñaña Priscila. Ñañaapa' o' ahuo' judionesha' po'prahuo allcha' serrpare'tet parro judionesha'.

20 Allñapa' otare'chet Pablo a'puepa'to' alla atomat, tarraña Pablopa' amo' mueno.

21 Allempoña so'tnerranetpa' atet otanet:

—Napa' o'ch alla ahuerren Jerusaléño allcha' nocshapretuerra añ yeter ñeñt anaret Partsocop allempoch alla cosherrerr judionesha'. Ñerra'm Yomporcha' muenatspa' ñato' o'ch nohuerrerr esempo.

Allempoñapa' ahuañperrerr boto.

22 Allempoñapa' arr etsotamñpsosa Cesareo. Cesareoñapa' asuanom Jerusaléño allcha' abechnoman ñeñt ame'ñetsa all. Allempoñapa' o' alla ahuer Antioquíó.

Allempo poma'pocheño ahuererr Pablo serrpare'tats allemeñ anetso'mar

23 Antioquíopa' alla allponmatnerr, alloñapa' o' ahuererr. Arr asuanerr Galacio'mar allotpa' ahuer Frigio'mar. Ñeñt ame'ña'yetsa allpa' o' yenpanet attoch huomenc perret pueyocher.

Allempo Apolos atarr cohuen serrpare'tatosanet all anetso Efeso

24 Ñehua, allempopa' eñall puesheñarr judionesha' añ pa'so'cheñ Apolos ñeñt huetsa Alejandriot. Ñañaapa' o' chap Efeso. Atarr cohuen serrpare'tenan Yompor po'ñoñ, atarr etsotenan Yompor po'ñoñ ñeñt atet aquellcaret ahuatoteñ.

25 Ñapa' ayçhataret ñeñt atetcha' perra Yepartseshar ñeñtara ñeñt Cristotats. Ñapa' e'ne po'ñoçh serrpare't huomenc, yeçhatanet ñeñtcha' atet perra Jesús. Añaña ama e'ne eñotueno ora atet pena Jesús. Aña eñoten atet yeçhate't Juanañ ñaña atet apate't Juanañ.

26 Ñapa' serrpare'te't huomenc judionesha' po'prahuo. Allempoña e'm Priscila ñaña Aquila, ñetñapa' anmet ellonet allcha' eñotachet e'ne ora ñeñt atet pa Yompor ñeñtaña palltena o'ch eñoch e'ne poctacma.

27 Allempoñapa' secha Apolos Acayo. Añaña ñeñt ame'ñetsapa' o' yenpuet. Ñetpa' o' quellquët carta añecop ñeñt ame'ñetsa all Acayo attoch ñetpa' o'ch agapet Apolos e'ne cohuen. Allempoña o' chap all Acayopa' nanac yenpan ñeñt ame'ñenaya cohuen ñoñets all.

28 O' eñotatanet po'ñoçh Jesúsapa' ñeñtca'yeña Cristoterrets ñeñt atarr cohuenet ahuatoteñ. Yompor po'ñoñoñ ñeñt aquellcaret ahuatoteñ o' gatyasanet atto Jesús o' etsotatuan ñeñt aquellcaret ahuatoteñ. Ñeñt allo'tsa'yen allohuen acheña' e'ne po'huamencocma yeçhatanet. Allempoña ama't puesheñarra judionesha'pa' ama erroñ otenaye' enteto.

19

Allempo çherrerr Pablo Efeso

1 Allempo Corinto'tsenmeñ Apolos, Pabloñapa' alla chopeñe'chen aspentarero. Atteñapa' o' alla çherr Efeso. Allñapa' all entosan allponsheña ñeñt ame'ñetsa. Tarraña ñetpa' allpon eñotenet allpon serrpare'tate't Juanañ.

2 Pabloñapa' a'pto'tan ñeñt ame'ñetsa, atet otanet:

—Sapa' allempoteñ same'ña, ¿ahuo't chorrasaña Parets Puecamquëñ?

Ñetñapa' o' anapuet:

—Yapa' ama ye'mareña ñato' eñallte' Parets Puecamquëñ.

³ Pabloñapa' alla oterrerr:

—¿Erroñenoñe'tña sapataretta?

Ñetñapa' atet otet:

—Yapa' yame'ñeñoñ atet otye't Juanañ attoña yapataretta.

⁴ Pabloñapa' alla oterrerr:

—Añoña apaten Juanañ atto o' cotape'cherret ello cohuen Yomporecop alloñapa' o'ch apatarettet attoch ame'ñeret ñeñtcha' huapatsa chenta'. Añoña ñeñt huapatsa chenta'pa' añepa't Jesús.

⁵ E'muet atetpa' apatarettetret pame'ñeñoñet Yepartseshar Jesús.

⁶ Allempoña Pablopa' o' a'pñlanet potot. Allempoñapa' ahuepa't chorraret Parets Puecamquëñ. Allempoñapa' o' eñosyaset po'poñ ñoñtso, o' a'potoñet atto eñorana'tanet Yompor.

⁷ Ñeñt eñosyaset po'poñ ñoñtsopa' allo'tsen ñato' çharrasheña puechena epsheña.

⁸ Pablopa' nanac serrpare'tate't all Efeso. Pate'tets semana o'chcho' be'tosos judionesha' po'prahuo o'chcho' serrpare'tatanet atet pena Yompor po'cohuenña ñeñt atto atarr ayochreshattena ña. Ama mecha'te'te ama't mamesha. O'chcho' yeçhatanet allochñapa' o'ch ame'ñatanet. Atteñapa' o' ma'pña arrorr.

⁹ Tarraña puesheña'tets acheñpa' nanac atpare'chete't ama ame'nyeto atet serrpare'tatanet Pablo. Patpare'teñoñetpa' ama't all shontena acheñenesha'pa' o' sasare'toñet Jesús poçtañña. Allempoñapa' ahuer Pablo. Ñeñtña ame'ñetsapa' o' coteret. O' ahuanmuet allo'tsen Tiranno pue'scuela. Allñapa' pate'tets yetpa' añoña Pablopa' o'chcho' serrpare'tatanet pue'scuelpahuo.

¹⁰ Atteñapa' o' met epa char. Allohuen asio'marnesha' o' e'mare'toñet Yompor po'ñoñ—allohuen judionesha' ama't ñaña allohuen ñeñt ama judioneshayaye.

¹¹ Yomporpa' nanac ahuamencat pan Pablo. Ñeño'marña nanac orrtatanet Yompor po'partsoña ñeñt ama puentareto.

¹² Atteñapa' añoña acheñenesha'pa' o'chcho' anerret ñeñt es a'pñla'yen Pablo, atet ñerra'm es pañell amapa' pañoshe'm. O'chcho' anmet allo'tsen ñeñt atsna'tets. O'ch çapachet allpa' o'chcho' correrraña atsnañe't. Ama't po'neñeñetpa' o'chcho' queçhpa'nerranet.

¹³⁻¹⁴ E'ne allempopa' allo'tsen puesheña'tets judionesha' ñeñt achyo'tañnesha' ñeñt çhocma chopeñe'chets erracmañen. Ñehua, ñetpa' añ puechemereshanet ñeñt puesheñarr judionesha' ñeñtara ñeñt cornesha' nanac añcha'taret añ pa'so'cheñ Esceva. Allo'tsen cançherrsheña puechemerasha'. Ñetpa'cho'ña o' topachet ahuo'ch queçhpatachet ñamet acheñenesha' po'neñeñer e'ne pa'so'chño Yepartseshar Jesús. Ahuo'ch pet atet pena Pablo. Puesheñarrña ñeñt chorrena oneñeñpa' otoñet po'neñeñer:

—Napa' o'ch notap, e'ne pa'so'chño Jesús ñeñt serrpare'ten Pablo o'ch pequeçhpa'ner añ acheñer.

¹⁵ Allempoña atet ochet oneñeñpa' ahuepa'tcha' eñoraña, oneñeñpa' atet ot:

—Jesúspa' neñoteññañ po'huamenc, Pablopa'cho'ña neñoteññañ atet po'huamenc echen. Tarraña sapa' eseshasuañaca'ye. Ama neñotennaso sehuamenc.

¹⁶ Allempoña acheñ ñeñt chorrena oneñeñpa' omachana'tanet, orrotet parro epuet achyo'tañnesha'. Oneñeñpa' nanac atserrpatsetanet allohuenet. Muelle'mcot at-serrpatsetuanet o' matrra'tuet pocollo't.

¹⁷ Añoña allohuen efeso'marnesha'pa' o' e'mare'chet atet o' pet—allohuen judionesha' ñaña ñeñt ama judioneshayaye. Atarr yore'tanet. Allempoñapa' añcha'na'tpo' enteñet Yepartseshar Jesús.

¹⁸ Shonte' acheñ ñeñt ame'ñetsset allempoñapa' huapyeset, o' a'meta'yesoset atto achyo'tyesete't.

¹⁹ Patantarrpa' o' huapatyeset po'libro ñeñt' allo eñotet achyo'tatset. E'ñe all shontena acheñenesha' o' chama'tuet po'libro. Allempoñapa' o' somuerret errponte' tsa'tena allpon libropa' o' sala amnaroch çharra' mil poçllayoret. Ñeñt' allpon tsa'tena allohuen libro.

²⁰ Ñeñto'marña atarr amcha'na'tpo' entoñet Yompor po'ñoñ. Atarr ame'ñet.

²¹ Allempoña e'ñe Yompor Puecamquëño'tpa' o' secherrerr Pablo o'ch ahuererr Macedonio ñaña Acayo, allotña o'ch asuanerrpa' o'ch ahuer ñaña Jerusaléño. Allotñapa' atet ot Pablo:

—Te'pa' aña palltetsa o'ch ahuen ñaña Romo.

²² O' mueñan epsheña acheñ ñeñt' yenpuene' ñeñt'cha' ñanom tatsa Macedonio. Añña ñeñt' epsheñapa' añ pa'so'cheñ Timoteo ñaña Erasto. Pabloñapa' o' a'pohuerra allponmat Asio.

Allempo nanac ama'toçhtena acheñenesha' all Efeso

²³ Allempopa' o' atsrre'ma puesheña'tets acheñ. Añ atsrre'matahuet atto' pena ñeñt' ame'ñetsa.

²⁴ Allo'tsen puesheñarr añ pa'so'cheñ Demetrio ñeñt' ñanom e'moñe'te' ñeñt' ame'ñetsa. Ñapa' añ po'taruas pen o'ch yeçcatyesan pocollatollesha' añ toma'ntatena pocoll ñeñt' allecma muechatse'tenet ñeñt' po'yachorer penet ñeñt' otenet yachor Diana. Añ pocollatollesha'pa' arroto' ayeçcataretta asertalot. Shonte' acheñ ñeñt'ara po'taruas penet, Demetrio ña apahuete't po'taruas atet. Shonte' quelle ganete't po'taruaso't.

²⁵ Atteñapa' Demetriopa' o' apçhatuan allohuen pa'taruasañer ñaña po'psheñneçhno, ñetpa'cho'ña ñeñt'ara po'taruas penet. Apçhatuanetpa' atet otanet:

—Masheñeshacha' sapa' señoñeñ añ yetaruas ñeñt'pa' alloch yegana shonte' quelle.

²⁶ Te'pa' señoñeñ ñaña añ ñeñt' otenet Pablopa' ahuo't otuan acheñenesha' añ ñeñt' yeyoser ñeñt' yeyeçcaten yapa' ñapa' oten amo' Partsoyaye. Ñapa' o' cotape'chatuan shonte' acheñenesha', te'pa' shonte' o' ame'ñatua. Ñetpa' o' huapore'tuerret shonte' ñeñt' yapuenanet ñeñt'cha' ma'yochet. Sapa' o' sentue atet penet arr Efeso ñaña o' se'mare'ch atet pa'yenet ora erraparen Asio'mar.

²⁷ Alla oterraneterr Demetrio:

—Ñeñto'mar te'pa' o'ch notas, ñato' o'ch huañerr yetaruas alloch yeganerra quelle. Tarraña ñeñt'pa' ama pocteyaye. Ñato' ellopa' o'ch a'ypo'ña'hueret ñaña yachor Diana ñeñt' puerahuo'tsen. Ñato' allempopa' ama't yachor Dianapa' o'huañcha' amcha'na'tpo' eñchet, ama't ñaña ora allohuen asio'marnesha' ñeñt' po'yachorer pene'.

²⁸ Ñeñta e'm allohuen acheñenesha'pa' nanac atsrre'matanet. Pa'tsrre'mueño'tetpa' o' rranare'tyeset, alla oterrete't:

—¡Paretsña'cho' yachor Diana!

²⁹ Shonte' acheñ nanac ama'toçhtenet allohuenet. O' rromuet Gayo ñaña Aristarco ñeñt' macedonio'marnesha' ñeñt' parro chopeñe'chen Pablo. O' matrra'tet allo'tsen pocoll atarrpo' allecma apçhena acheñenesha'.

³⁰ Pabloñapa' mueneñeñ o'ch be'tos ñaña all ama'toçhtenetpa' tarraña añña ñeñt' ame'ñetsapa' ama muenacheto.

³¹ Ñaña puesheña'tets ñeñt' amcha'tarettetsa all Asio ñeñt' muerenaya Pablopa' o' mueñoñet ñoñets attoch amach tatsto all apçhenet te't muetseñet.

³² Allña apçhenetpa' atta rranare'tyenet. Puesheña'tetspa' atet otyeset atet cotape'chyenet ñet, po'potantañña' atet otyeset po'poñ ñeñt' atet cotape'chyenet ñamet. Allohuenet ama't ama eñotueñeto esocopte'ña apçhenet, tarraña atñaña nanac ama'toçhtenet.

³³ Puesheña'tets judionesha' o' cheta'nmet Alejandro o' huapachet attoch eñosachet. Ñaña'pa' o' echantosán pot attoch o'ch muetsoñeñtet añecop attoch o'ch a'pochtatan ñoñets judioneshacop.

³⁴ Tarraña allempo acheñenesha' ñeñt ama judioneshayaye o' eñchet Alejandro ñapa' judionesha' ñetña'pa' alla rranare'terreterr. Atarr tematen rrannartenet. O'chcho' alla oterret allohuenet parro:

—¡Paretsña'cho' yachor Diana! ¡Paretsña'cho' yachor Diana!

³⁵ Allempoña'pa' puesheñarr añcha'tareñt ñeñt taruassets gobiernocoppa' o' emma'huanet, atet otanet:

—Masheñeshacha', o'ch notas ñeñtes yeçhetsa arr Efeso. Ama't allohuen acheñenesha' errañparen e'ñe eñotueñet efeso'marneshaypa' yapa' ñeñtey cohuanmpene' yachor Diana ñeñt puerahuo'tsen, ñeñtara yachor Diana ñeñt nanac Parets, ñeñt sohuatsa entoñ.

³⁶ Ñeñtpa' yeñotueñ allohueney acheñey. Amate' errotenoñ yoto ama atteyaye. Ñeñto'marña e'ñe pocte' o'ch semtsoñeña. Amachña cha sama'toçhtatsto.

³⁷ O' alla oterraneterr añcha'tareñt, atet otanet:

—Secua' ahuo't sehuapach arr añ epsheña acheñ. Tarraña ñetpa' ama es yoreneto yachor po'prahuoñ ñaña ama achmñare'teñeto yachor.

³⁸ Ñeñto'marña te'pa' o'ch notas, ñerra'm mueneñ Demetrio ñaña pa'taruasañreçhno o'ch otteñe'chatanetpa' te'pa' e'ñe pocte' temantanetepa'. Tarro'mar te'pa' atorareñt allcha' a'pochtateñt ñoñets. Ñeñtcha' a'pochtateñt ñoñetspa' allo'tsena.

³⁹ Tarraña ñerra'm este' semnen o'ch sa'pochtateñt po'poñpa' ñeñtpa' añ pocte' o'ch sa'pochtateñt allecma apçhena ñeñt nanac añcha'tareteçhno.

⁴⁰ Ñato' temanta'yeta tarro'mar yapa' e'ñe attoña yama'toçhtena.

⁴¹ Ñeña otuanetpa' o' mueñhuerranet. Allempoña'pa' ahuanomhuerranet.

20

Allempo çherrerr Pablo alla Macedonio

¹ Allempoña o' muetsoñeñtuerret Pabloña'pa' agotatuan ñeñt ame'ñetsa. O' cotape'chatnenanet e'ñe cohuen. Allempoña e'ñe puemorrenteñoñanet e'ñe cohuen so'tuanenanetpa' o' ahuen, o'ch ahuer Macedonio.

²⁻³ All oñerr Macedonio'marpa' nanac serrpare'tatnerranet Yompor po'ñoñ. Atteña'pa' o' çherr Grecio ñeñtara all oteñet Acayo. Allpa' alla a'pohuerra ma'pñña arrorr. Autsaño' tamñpsatsañ ñaña Sirio botopa' tarraña o' e'mare'ch allpa' cha o'pateña judionesha' o'ch rromapet. Ñeñto'marña alla secherra Macedonio (tarro'mar allpa' patso'marach chope'chnerr).

⁴ Allempoña ahuer Macedoniopa' allpon acheñ o' coteret. Ñeñtpa' ñeñtara añeçhno: Sópater ñeñt bereo'marnesha', allotpa' ñaña Aristarco ñaña Segundo ñeñt tesalónico'marnesha', allotpa' ñaña Gayo ñeñt derbo'marnesha', allotpa' ñaña Timoteo, ñaña allo'tsen Tíquico ñaña Trófimo ñeñt asio'marnesha'. Allpon acheñ coterre'.

⁵⁻⁶ Arr cha'cha'tet Filiposo. Allempoña ñetpa' ahuanmuet o'ch otet, arrcha' cohuosyet Troaso. Yapa' alla ya'pa Filiposo epan Pablo allponmat.* Allempoña o' huañ allempo coshenet allempo rrenet pan ñeñt ama achasareteyaye allempoña'pa' o' yahuanma yaña. Allempo ahuanmpsey botopa' pa'mnarmatñoñapa' o' yeçhap yaña Troaso. Allña'pa' allo'tsa'yen ñeñt otatsa ahuaña. Allña'pa' alla ya'posa cançherrmat.

Allempo Pablo'pa' emo'tnom anetso Troaso

* **20:5-6** Lucas ñeñt quellquë' añ ñoñets ñapa' cota'nman ñaña Pablo.

⁷ Allempoña chap allempo motta'muena yetñats temencpa' yapcha allohueney ñeñtey ame'ñetsa. Yeyerpueñoñ Yepartseshar Jesúsapa' o' yerra' pan ñeñt ashota'tareñ ñeñt atet anareñ Yomporecop. Allempoña Pablopa' nanac serrpare'tatanet. Ñapa' otanet:

—O'ch ahuenen tsapat.

Ñeñto'marña ama't o' rroch tsapuenpa' alla serrpare'tatenanet.

⁸ Allña yapchena pocollo enopa' nanac a'yohuen bat. Allpa' shonte' lampareñ ñeñt corra'yetsa.

⁹ Allñapa' allo'tsen puesheñarr huepuesha' añ pa'so'cheñ Eutico. Ñañaapa' alla anen ventanoñ. Atto nanac serrpare'ten Pablopa' Euticoñapa' ahuo't alla ma' anañot. Ahuo't alla ma'pa' machayoña shora'nom patso. Ma'pa piso allot shora'nom. Allempoña echantosepa' o' rroma.

¹⁰ Allempoña sohuerra ñaña Pablo. O' huapa o' mo'capa' a'chono'tos allempoñapa' otanet:

—Amach sellcatsto, Yomporpa' o'ch alla tantater.

¹¹⁻¹² Añña huepuesha'ña ñeñt o' shora'nemuapa' o' alla aneret e'ñe huomech. Allempoña allohuenetpa' atarrepa'tcha' coshet. Allempoñapa' o' alla a'terr Pablo. Allñapa' o' rrallme'chet. O'ña rrallme'chuetpa' o'huañ tematen all serrpare'tatannenet. Atteñapa' o' puetarespenet. O'ña puetaresuenpa' o' ahuen Pablo.

Allempo ahuanerret Troasot arr cha'cha'tet anetso Mileto

¹³ Allempoña yapa' o' yahuanma o'ch yota o'ch yerrma' añecmuen noñt ñeñt otenet bote o'ch ahuanpsey Asóno allcha' yecuos Pablo. Tarro'mar otey Pablopa' ñapa' arro'ch oñom patso'mar o'ch chap Asóno. Allostñapa' o'ch a'tap ñaña boto, tarro'mar atet o' ya'pocstat epay Pablo ahuañacma.

¹⁴ Atteñapa' o' yechap Asóno. Allñapa' all yentanna'ta epay Pablo. Allostñapa' a'tap ñaña boto, allostñapa' ahuanpsey parro. Atteñapa' o' yechap Mitileneo.

¹⁵ Mitileneotñapa' o' alla ahuanperryerr boto. Tsapatñapa' a'yo'mara yoñem Quío. Allostña tsapatenerpa' alla yetsotosa Samsó. Yen'terrerr Samsotpa' alla yamesuerrerr Trogilio. Allostña tsapatenerpa' alla yetsotuerrerr Mileto.

¹⁶ Allñapa' ot Pablo amach yetatsto Efeso tarro'mar ñapa' ama mueno o'ch alla yatoma'tare'tnom Asio'mar. Ñapa' aña mueneñ o'ch yechap tecma Jerusaléño añecop o'ch yentapreterra' Pentecostepo.

Allempo e'ñe ñeñteshaña serrpare'tatnerranet Pablo Efeso

¹⁷ Ñeñto'marña allempo Mileto'tsenepa' Pabloñapa' agotatan ñeñt pompornesha' pen ñeñt ame'ñetsa Efeso, onetepa' Mileto all o' yechap ya.

¹⁸ Allempoña o' hua'cha'tet Pabloñapa' o' serrpare'tatanet, atet otanet:

—Sapa' señotenen atet o' nepohuanma sesho, ama't ahuañoteñ allempo ñanom nechap Asio all sey'chena.

¹⁹ Sapa' señotenen añecop netorrena Yomporecop ama añecpaye' netorreno attoch acheñenesha'pa' o'ch entenen e'ñe cohuen ñeñt e'ñe orrena. Napa' ama't neya'chpeñesha' netorrena Yomporecop tarraña judionesha'pa' nanac o'patennet. Ama't pa'namen nehuapoya e'ñe nemuerochteño'tpa' chocma netorrena Yomporecop.

²⁰ Señotenen ñaña napa' o' neserrpare'tatuas ora allohuen ñeñt pocetsa socop. Ama es na'nasotamñpsaso ama't coñe'ta. Napa' o' ney'chatuas allohuenes parro allempo sapchena ñaña o' ney'chatyesnomues e'ñe sepaclo'mar.

²¹ O' neserrpare'tatuas añ pocte' o'ch soctape'cherr ello cohuen Yomporecop ñaña añ pocte' o'ch same'ñera Yepartseshar Jesucristo. Ñeñtapa' atet o' notuas allohuenes ñeñtes judioneshas ñaña ama't ñeñtes griegoneshas.

²² Te'pa' o'ch ahuerren Jerusaléño, tarro'mar o' sechatterren Yompor Puecamquëñ. Tarraña o'ch necherr Jerusaléñoapa' ama neñoteña' ñeñtcha' allohuen nehuapoya all.

²³ Aña neñoten o' eñotaten Parets Puecamquëñ ñeñtcha' atet p̄a'net o'ch yotam̄pesnetpa' o'ch mueroçhtatnet. Ora allpon anetso attec̄mach p̄a'net.

²⁴ Tarraña ama't atetpa' napa' ama nem̄cha'teno. Ama'tcha' nerromapa' pocte' nenteñ o'ch nerroma. Te'pa' añ palltetsa o'ch ne'nua netaruas. O'ch netsotatuon ora allohuen ñeñt atet llesensa'n Yepartseshar Jesús. Ñeñt atet llesensa'n Yepartseshar Jesús'pa' ñeñt'pa' attoch neserrpare'tach acheñenesha' ñeñt cohuen ñoñets atto Yompor pomuereño'tpa' a'queshp̄aterreycha'.

²⁵ O' alla oterraneterr Pablo:

—Te'pa' neñoteñ sapa' amach senterrno po'pocheño, ama't allohuenes allo' nechopeñe'chuanom serrpare'tnomue' Yompor po'cohuenña. Aña neñoten amach senterrno.

²⁶ Ñeñto'marña te'pa' o'ch neñotatas ñerra'm eseshas chenquërrtsapa' tarraña napa' ama es na'chencatam̄psase'te tarro'mar napa' çhocma neserrpare'tatase't attoch amach sechenquëro.

²⁷ O' neserrpare'tatuas ora allohuen atet co'tape'chateney Yompor. Ama es na'nasotam̄psaso ama't coñe'ta.

²⁸ Allempoñapa' alla oterraneterr ñeñt pompornesha' penet:

—Te'pa' seño'tach. Te'pa' añ pocte' o'ch secuam̄peñ cohuen allohuen ñeñt ame'ñenaya Yompor. Atetcha' sepa' atet ñerra'm ñeñt cohuan̄pene' po'carrneror. Sapa'cho'ña atetcha' sepa' sam̄a o'ch secuam̄peñ ñeñt ame'ñetsa. Ñeñtcha' setaruas sepa' atet llesenses Parets Puecamquëño't. Tarro'mar Yepartseshar Jesús'pa' o' rroma ñocpuet ñamet.

²⁹ Napa' neñoteñ allempoch ama allo'tsennopa' o'ch huaponasa ñeñtcha' seshquë', ñapa' mueneñcha' o'ch a'psatas Yompor po'ñoñ. Atetcha' huapuet atet ñerra'm ma'yarrpa' ñerra'm huapapa' o'ch a'chencatuan allohuen carrnero.

³⁰ Ama't e'ñe sagattsapa' orrtetcha' ñeñtcha' seshquë', ñeñt ama Yomporeyaye po'ñoñpa' ñeñt'pa' serrpare'tatase'tcha'. Tarro'mar ñetpa' mueneñetcha' o'ch ame'ñatua'set e'ñe ñet poçtap̄ña.

³¹ O' alla oterraneterr Pablo:

—Te'pa' seño'tach. Chocmach seyerpa'na tarro'mar sapa' seño'teñ o' ma'pa char çhocma noctape'chatas cohuen—ama't ye'to, ama't ñaña tsapo. Ama't neya'chpeñesha' çhocma noctape'chatase't.

³² 'Te' Yomporpa' cohuan̄psasepa'ch. Yomporepa'chña po'ñoñ seño'tate' puemuereña. Yomporepa'chña po'ñoñ seyçhate' attoch huomenc sepa' seyocher. Yomporepa'chña po'ñoñ sa'queshp̄aterre' atet ñerra'm ñeñt allohuen ñeñt pame'ñeño'tet o' a'cohuentatuare'tterret.

³³ Ñaña napa' ama neye'chapreto po'psheñeñ po'çllayor, amapa' pa'shtam ama neye'chapreto.

³⁴ Sapa' seño'tenen ñeñt allpon nepalltenapa' e'ñe notot netaruasa' atto nechen ñeñt nepallta'yena. Ñaña e'ñe na netaruaso'tpa' es napa'yeñ ñaña ñeñt noctene'.

³⁵ E'ñe na netaruaso'tpa' çhocma neñotatenes ñeñt poctetsa o'ch yetaruasa' attoch es yechyes alloch yeyenpue' ñaña po'psheñeñ ñeñt es palltetsa. Añ pocte' o'ch yeyerpueña atet otye't Yepartseshar Jesús. Ñapa' atet ote't: “Nanac yocshena ñerra'm esempo es yapa'yeñ po'psheñeñe'chno, añña ama tama yocsheno ñerra'm esempo po'psheñeñpa' o'ch es apueney ya.”

³⁶ Ñeñta otuapa' o' concorpa o' ma'yochatnenanet.

³⁷ Añña acheñenesha'pa' pomorrenteño'tet Pablo'pa' o' yahuanrrortet. A'çhono'chetpa' o' tso'ttsapa'chet.

³⁸ Atarr llequët nanac. Atet o' otanet Pablo ñeñña nanac llecatahuet tarro'mar ñapa' otanet "amach senterrno arr patsro." Allempoña' o' co'a'neñet Pablo arrohua allo'tsen bote.

21

Allempo o'ch alla çherrerr Pablo Jerusaléño

¹ Allempoña o' yesa'nenanetpa' o' ahuañperryerr boto. Alloñapa' paçharra yepe'pa' o' yeçhap Coso. Tsapañapa' arr yeçhap Rodaso. Alloñapa' arr yetsotosa Pátaro.

² Pátaroña' o' yentos po'poñ bote ñeñcha' tatsa Fenicio. Yañapa' o'cho' ya'tapos alloñapa' ahuañperryerr boto.

³ Allempoña yetañpena sa'popa' yentnom coñe't pats ñeñ pa'so'cheñ Chipre, e'ñe arro't yentnom ye'chcoterot. Afteña' o'cho' yemñapes boto, arr yesechena Sirio. Allempoña' arr yetsotosa all oteñet Tiro, tarro'mar allpa' o'ch a'suatatsre'tet boto't.

⁴ Yañapa' o' yesua attoch yentnom ñeñt ame'ñetsa all. Allña' alla ya'posa cançherrmat. Ñeñña ame'ñetsa allpa', ñetña' ochet Pablo:

—Amach petatsto Jerusaléño.

Tarro'mar Parets Puecamquëña' ahua't eñotatanet atetcha' pet Pablo all Jerusaléño.

⁵ Tarraña allempoña o' met cançherrmatpa' o' alla yahuanerrerr. Allempoña allohuen yacmanesha'pa' co'a'nemyet pueblo't a'yenet, ñaña puetaporeshohuenet ñaña puechemerneshet. Allña' all yeconcorposa ontapopa' o' yema'yochosa all.

⁶ Allempoña o' yema'yochuapa' o' yeso'tenanet. Allempoña yapa' o' ya'tenerr boto, ñetña' o' ahuanerret pa'paclo.

⁷ Allempoña o' yenerr Tiro'tpa' arr yetsotuener Tolemaido. Allña' all yehuomcha'tnom ñeñt ame'ñetsa. Allña' all yepatrranom yet.

⁸ Tsapañapa' o' yahuanenerr, allempoña' arr yeçhap Cesareo. Allña' o' yebe'tosos Felipe pa'paclo, allpa' allcha' yommosa. Añ Felipepa' ñeñt serrpare'tene' cohuen ñoñets. Ñaña ñeñtara Felipe ñeñt net ahuaña ñach epatyeshahuet rreñets epuet po'psheñneçhno pechapshaña.

⁹ Añ ñeñtara Felipepa' echenan pa'tatssheña po'sñesha'. Ñetpa' ama arrollareteto. Ñetña' nanac a'poteññañet ñamet Yompor po'ñoñ.

¹⁰ Allempoña ya'llponmatos allpa' o' huapa ñeñt a'mítene' Yompor po'ñoñ añ pa'so'cheñ Agabo. Ñapa' Judeot huapa.

¹¹ Allempo huapapa' o' pueyosan Pablo po'chanar. Añña chanaretspa' Agabo ñañaña huancatatsa e'ñe potot ñaña pa'tco't. O' huanca'huapa' atet otan Pablo:

—Ñeñtpa' atet oten Parets Puecamquëñ, ñeñte' echene' añ chanaretspa' judionesha' ñeñt Jerusaléno'tsa'yenpa' atetcha' huancapet atet nehuanca te' nañeña. Ehuanca'retcha' o'ch pomapet allo'tsen acheñenesha' ñeñt ama judioneshayayeto.

¹² Ñeñña atet ye'mpa' yotare'ch Pablo:

—Amach petatsterro Jerusaléño.

Ñaña ñeñt acheñenesha' ñeñt allo'tsa'yenpa' atet otare'chet Pablo ñamet.

¹³ Allempoña Pablopa' otanet:

—Eso'mare'tña nanac seyahuena, te'pa' o'ch sellcaten. Napa' e'ñe pocte' nenteñ huanca'netepa'. Ñaña e'ñe pocte' nenteñ nerromuepa' Jerusaléño, attoch nerroma e'ñe neserrpare'teño' Yepartseshar Jesús po'ñoñ.

¹⁴ Pabloña' ama e'mñoty. Allempoña ama erro't yepepa' o'huañ erro't yoch, aña yoter:

—Ñehua, ñerra'm atette' muenen Yomporpa' ama'tpa' attepa'ch.

¹⁵ Allempoña' o' yañño'tatsre'tena. Allempoña o' yañño'tatsre'tuapa' yahuanenerr Jerusaléño.

16 Añña puesheña'tets cesareo'marnesha' ñeñt ame'ñetsapa' allenta cota'nenyet, arr nehuerryeta' all yeçhena Mnasón ñeñtara ñeñt chipro'marnesha'. Ñaña'p' ahuatoteñ ame'ña'hua. Pa'pacloñapa' all ya'posa.

Allempo Pablop' emo'tuerr Jacobo ñeñt Jesús pa'mo'nasheñ

17 Allempoña o' yeçherr Jerusaléñopa' añña ñeñt ame'ñetsa allpa' e'ñe pocsheñesha' agapyet.

18 Tsapaña puetarenpa' yahuanma parrocm Pablo o'ch yenteña' Jacobo. Añña allohuen ñeñt pompornesha' pen acheñenesha' ñetpa'cho'ña alla yentosanet, allo'tsa'yenet ñamet.

19 Pabloñapa' o' huomcha'tosanet allohuenet. Huomcha'tuanetpa' allempoñapa' serrpare'tatuerranet e'ñe ora allpon Yompor po'huamenco' o' etsotuoñ e'ñe ñocop. Serrpare'tatuerranet atto acheñenesha' ama't ñeñt ama judioneshayayetopa' o' ame'ñatuanet ñamet.

20 Ñeña e'mhuetpa' nanac aye'choçhtatoñet Yompor. Tarraña allempoñapa' atet ochet:

—Tarraña masheñe, ahuo't peñoç te'pa' shonte' mil judionesha' o' ame'ñenet ñamet. Ñetpa' e'ñe huomenco otenet añ palltetsa allohueney ñeñtey judioneshay o'ch yeçhua atet otye't Moisés.

21 Ñetpa' o' e'mare'tonapet peñoñ añe'no' peyçhaten judionesha' ñeñt yeçha'yetsa po'poñ anetso all yeçha'yena ñeñt ama judioneshayaye atto año' pocte' o'ch puesuerret Moisés po'ñoñ. Ñaña o' e'mare'tapet ahuo' potuanet amach tsorratsteto puechemeretollesha', ñaña amo'ch patsteto atet yeçhena ahuatoteñ.

22 Allempoñapa' alla otereterr Pablo:

—Ñehua, te'pa' çerro'te'tcha'ña yeñaña te' tarro'mar po'ñoçhpa' o'ch e'mare'tapet o' peçherr arr?

23 Ñehua, te'pa' o'ch pe'mñotey o'ch yotañ ñeñtcha' atet peña. Ñehua, arrpa' arro'tsen pa'tatssheña ñeñt netset ñetañeña ñeñtcha' atet pet Yomporecop, ñeñt atet yeçhena ya ñeñtey judioneshay.

24 Te'pa' añ pocte' ñeñtcha' atet peña. O'ch panemñ añ pa'tatssheña e'ñe epaspa' o'ch sa'cohuentatena' ñeñt atet anaret Yomporecop ñeñt atet yeçhena ya ñeñtey judioneshay. Ñaña añ pa'tatssheñapa' o'ch petsa'tanet attoç shopena'tatet, ñaña ora ñeñt palltetsapa' o'ch petsa'tanet. Allochñapa' allohuen judionesha' o'ch eñoçet po'ñoçhpa' ama atteyaye ñeñt atet e'mare'tet pocop, tarro'mar allempopa' o'ch eñotapet papa'cho'ña o' peçhua ñeñt atet oteney Moisés po'ñoñ.

25 Tarraña añecop ñeñt ama judioneshayaye ñeñt o' ame'ñapa' yapa' o' yemñanet carta, o' yotuanet cartot ñeñt pocte' yenten ñocpuet ñeñtcha' atet pet. Ñeñtpa' añeçhno: Amach rratsteto po'chets ñeñt muetsenet ayeçhcataretocop ñeñt po'yomporer penet. Ñaña o' yotuanet amach rratsteto es po'rras, ñaña amach rratsteto ñeñt muetsenet ñeñt atta a'panaret. Ñaña o' yotuanet amach chetapretatsteto taporets. Ñeña yotanut yecartot.

Allempo rromapueret Pablo all Parets pa'paclo

26 Allempoña Pablop' o' anman añ pa'tatssheña. Tsapaña' o' a'cohuentatet e'ñe parro, ñeñt atet yeçhena judionesha'. Allempoñapa' ahuanmuet Parets pa'paclo o'ch eñotatenaneta' esempoch o'ch met allponmat e'ñe allempoch o'ch a'cohuentatuet. Allempochña Pablop' o'ch muetsatanet Partsocop carrnero puesheña'ttsocmuet, ñeñtpa' atet pena judionesha' Yomporecop.

27 Tarraña o' taya çhampoch cançherrmat allempoch o'ch a'cohuentatuetpa' añña judionesha' ñeñt huetsa Asiotpa' o' eñchet Pablo all Parets pa'paclo. Ñetña' o'

atsrre'matachet acheñenesha' attoch o'ch e'moñe'chet Pablo. Allempoñapa' o'ch rromuet Pablo.

²⁸ Pa'tsrre'mueñoŕetpa' o' rranare'tyeset, otyeset:

—Masheñesha judioneshacha' o'ch seyenpa'y. Te'pa' o' yenter añ acheñ ñeñŕ ye'moñe'tene' ñeñŕey judioneshay ñeñŕara ñeñŕ o' puesuerran Moisés po'ñoñ ñaña ñeñŕ o' a'sosyatuan Parets pa'paquëll. Te'pa' o' erracmañen atet o' yeçhatyesuan acheñenesha'. Elloña te'pa' o' abe'tatan ñaña acheñ ñeñŕ ama judioneshayaye arr Parets pa'paclo. Allochñapa' ahuo'ch a'sosyatuan Parets pa'paquëll.

²⁹ Tarro'mar atet otet o' eñchet Pablo epuet Tróximo all chopeñe'chen epuet Jerusaléño. Tróximo ñeñŕpa' efeso'marnesha', ama judioneshayaye. Ñetpa' çho' otenapuetañ ñato' Pablopa' o'te' abe'tatan Tróximo all Parets pa'paclo ñeñŕ ama pocteye' enteno judionesha'.

³⁰ Allempoñapa' allohuen acheñenesha'pa' o' atsrre'muetpa' matrra'tet allo'tsen Pablo o' rromuetpa' o' cheta'nmet a'yenet Parets pa'pacloŕ. Allorocma yotetuet Parets pa'paclo.

³¹ O' muetsamochet Pablopa' añña ñeñŕ solltarnesha' pa'mñcha'tareŕterpa' o' e'manet atet nanac ama'toçhtena allohuen acheñenesha' all Jerusaléño.

³² Ñañaapa' o' anman allpon solltarnesha' ñaña allpon capitáñnesha'pa' o' matrra'tet allo'tsa'yen acheñenesha'. Allempoña acheñenesha'pa' o' entapan solltarnesha' epuet pa'mñcha'tareŕterpa' o'huañ çhota'chet Pablo.

³³ Allempoña çhap añcha'tareŕterpa' o' rromatan Pablopa' o' huanquët epa cadeno. Allempoñapa' a'pŕo'tanet:

—¿Eso'tña pa'so'cheñ añ acheñer?

Ñaña o' a'pŕo'tanet:

—¿Ešte'ña o' pŕohua ña?

³⁴ O' anapyeset po'poñe'ttsocma. Puesheña'tets acheñpa' otyeset atet coŕape'chet ñet, po'potantañña' atet otet po'poñ ñeñŕ atet coŕape'chenet ñamet. Nanac ama'toçhtenet ñeñŕo'marña ama eñoçheto e'ñe po'ñoçh ñeñŕ atet o' pŕohua Pablo. Ñeñŕo'marña añcha'tareŕterpa' anmatan Pablo pocollo all shontena solltarnesha'.

³⁵ Allempoña o' çhapuet alloŕ a'tenet pocollopa' añña solltarnesha'pa' o' enatnomet Pablo eno, tarro'mar ŕaye'to' acheñenesha' pa'tsrre'mueñoŕetpa' muetseñet.

³⁶ Tarro'mar acheñenesha'pa' o' coŕa'huanmet. Puerranare'teñoŕ otyesnomuet:

—¡Semtseñaca'ye!

Allempo Pablopa' e'ñe cohuen eños ñocop allo'tsa'yen ñeñŕ e'moñe'tene'

³⁷ A'tapachet pocollopa' Pabloña' otosan solltarnesha' pa'mñcha'tareŕter, eños grieçho, ot:

—Te' napa' nemneñ o'ch notaŕ paŕterr ñoñets.

Añcha'tareŕterña' och:

—¿Po'ñoçha't pe'muen grieçh?

³⁸ Alla otererr añcha'tareŕ:

—Papa' ¿ama't añeyaype egipto'marnesha' ñeñŕ atsrre'mate' ahuaña acheñenesha' atto ñetpa' atpare'chet gobierno', ñeñŕara ñeñŕ ahuanmue' pa'tatsoch mil amtsañnesha' a'yo amarato?

³⁹ Pabloña' alla otererr:

—Napa' amaca'ye ñeñŕeyayno, napa' judioneshan ñeñŕen tarso'marneshan, ñeñŕara anets nanac atarr ñeñŕ allara Cilicia. Napa' o'ch notare'taŕ attoch pemnatén o'ch neños acheñenesha'cop.

⁴⁰ Allempoñapa' o' muenatan Pablo o'ch eños. Pabloñapa' alla tomos allotecma a'tenetpa' echantosan pot attoch muetsoñeñtua acheñenesha'. Allempoña o' muetsoñeñtuetpa' Pabloñapa' o' eños hebrea'cho, atet otanet:

22

¹ —Masheñeshacha' ñaña nomporneshacha', o'ch se'mñoten ñeñtcha' atet neños e'ñe nocop.

² Allempoña e'mhuet atto o' serrpare'tatanet e'ñe ñet po'ñoñetopa', allempoñapa' o' e'ñe muetsoñeñtuet poctacma. Pabloñapa' alla o'terraneterr:

³ —Napa' judioneshan, arr ne'ñalleta Tarso e'ñe alla Cilicia. Tarraña arrña e'ñe eñotñan Jerusaléño. Ñeñt neyçhate' napa' ñeñtapa' Gamaliel. E'ñe ña pueyçhateñoenpa' netso-tuoñ e'ñe poctacma ñeñt Moisés po'ñoñ ñeñt atet anaret ñeñtcha' atet pa yatañneshañ. Nanac nema'yochra ñeñt Yomporecop ñeñt atet sepena te' sa.

⁴ Napa'cho'ña ahuañmo'chapa' nanac nemueroçhtache't ñeñt cotene' Jesús pocta'ña. Napa' o'ch nerrmanatanet, allotñapa' o'chcho' nehuancatanet, ñaña o'chcho' nabe'tatanet ñaña cárcelo. Ñaña nemtsatatie't—yacmanesha' ama't ñaña coyanesha'chno.

⁵ Ama't cornesha' ñeñt nanac añcha'tare'tpa' eñotuane't ñeñt atet nepe't. Ñaña allohuen ñeñt pompornesha' penetpa' e'ñe eñotuennet ñamet ñeñt atet nepe't. Ñet allem-popa' ahuo't apnet orden ñeñtcha' napueña' yamo'ts judionesha' ñeñt Damasco'tsa'yen. Añ orden ñeñtapa' alloch mueñanet attoch o'ch nerrmanatie ñeñt ame'ñaye't Jesús. Ehuancare'tetpa' o'ch nahuanmanet Jerusaléño allcha' yecoñchatuanet.

Allempo Pablopá' serrpare'tatanet atto ello cotape'cherran cohuen Yomporecop (Hch. 9.1-19; 26.12-18)

⁶ 'Atteñapa' o'cho' ahuen Damasco. Allempoña neçhapmoch Damascopa' allempo o' çhapmoch pocto. Ñeñtña nanac poptetsa ento'tpa' machayotepa'tcha' çhoyo'tamñsapuen.

⁷ Allempoña çhoyo'tamñsen e'ñe neshopa' nañapa' alla nerrmopra patso. Allempoña neçhap patsopa' ne'm ñoñets ñeñt atet oten: “¿Eso'mare't Saule, pemueroçhtatennaña ñeñt name'ñenaya?”

⁸ Nañapa' o' not: “¿Eshape't Ayochreshate eñets?” Ñeñt eñetspa' alla o'terrnerr. “Napa' ñeñten Jesús en ñeñten nazareto'marneshan, narramche'ña atarr pemueroçhtaten.”

⁹ Ñeñtña allo'tsenen e'ñe parropa' ñetpa'cho'ña entetca'yeña ñeñt neçhoyo'te' ñeñtña'pa' çha yore'tanet tarraña ñetñapa' ama eñochetoña ñeñt atet notare'tta.

¹⁰ Nañapa' o' alla noterrerr: “¿Esté' Partseshacha' poctetsa ñeñtcha' atet ne'pa?” Part-sesha'ña Jesús pa' alla o'terrnerr: “Te'ñapa' o'ch petanta o'ch ahuep Damasco. Allcha'ña otapet allohuen ñeñt anaret ñeñtcha' atet pe'pa.”

¹¹ Allempoñapa' o'huañ nenta tarro'mar o' rrechaten ñeñt po'ptetsa ñeñt neçhoyo'tamñse'. Ñeñtña noctene' ñetñapa' echa'nomnet notot. Attoña çhapatnet Damasco.

¹²⁻¹³ 'Yeçhap Damascopa' allempoñapa' huapa puesheñarr añ pa'so'cheñ Ananías. Añña Ananías pa' nanac ame'ñenana ora allohuen ñoñets ñeñt atet anaret yocop ñeñtey judioneshacpay ñeñtcha' atet ye'pa. Añña judionesha' ñeñt ye'cha'yetsa Damascopa' nanac cohuen enteñet Ananías. Nañapa' huapa neshopa' allenta ponmosnapa' otosen: “Te'pa' masheñe Saule pecuerrepa'ch.” Nañapa' allorocmuepa'tcha' necuerr, allempoñapa' neñch Ananías.

¹⁴ O' alla o'terrnerr Ananías: “Añ Yompor ñeñt Po'yomporer pe't yatañneshañ, ñaca'yeña pa'cierre'ña pa' ama't ahua'toteñ añecop o'ch peñotuerrñañ atet muenen ña. O' muenata'p

ñaña o'ch penterrñañ pãña Puechemer ñeñt e'ñe pocte' es pets. Ñaña o' muenatap o'ch pe'mñotoñ e'ñe ña po'ñoñ ñeñt atet o' otuap.

15 Te'pa' ñeñtpa' atetcha' pepa, o'ch pã'potoñ Jesús po'ñoñ erracmañen ñeñt atet o' pentua ñaña ñeñt atet o' pe'mua.

16 Te'pa' añ palltetsa o'ch petanta, e'ñe pame'ñeñoñ Yepartseshar Jesúsapa' o'ch pãpataretterra, attochña e'shohuaretterra pã'o'chñar." Neñtpa' allohua atet oten Ananías.

Atto Pablopa' eñotatanet ñapa' ña serrpare'tatene' ñeñt ama judioneshayaye

17 O' alla oterraneterr Pablo:

—Allempoña o' met allponmatpa' o' nohuerrerr arr Jerusaléño. Parrochña allempo nema'yochena Parets pa'paclopa' allña' orrtona atet ñerra'm cho es ye'chopo'ten.

18 Allempoña o' orrtona Yepartsesharpa' atet oten: "Tayecma o'ch ahuerrep arrot Jerusaléño, tarro'mar arrpa' amach esesha' pe'mñotaye allempoch pã'potoñ neñoñ."

19 Nañapa' alla notererr: "Partseshacha' ama't atetpa' allohuen acheñenesha'pa' e'ñe eñotuennet atet o' ne'pohua. Eñotuennet atto napa' nebe'tose't judionesha' po'prahuo atto nenalle'tache't ñeñt pame'ñenaya, ñaña atto nabe'tatanete't cárcelo.

20 Ama't allempo muetset Estebañañ ñeñt pã'potaye't peñoñpa' napa'cho'ña allempopa' e'ñe pocte' neñch muetsetepa'. Napa' allña necuamñpsanet pa'shtam ñeñt rrolle'te'. All necuapretpa' napa'cho'ña e'ñe pocte' neñch atetpa'ña pet."

21 O' alla oterrnerr Yepartseshar: "Ama't atetpa' te'pa' o'ch ahuep o'ch nemñañ alla'par allo'tsa'yen acheñenesha' ñeñt ama judioneshayayeto."

Allempo solltarnesha' pa'mcha'tareterpa' abe'tatan Pablo o'pono

22 Ñeñta otua Pablopa' añña acheñenesha' ñeñta e'muetpa' o'huañ e'mñochet. O' alla rrannarterreterr, atet otet:

—¡Semtseñaca'ye! Ama pocteyaye o'ch corra ñeñt atet acheñ arr patsro.

23 Pa'tsrre'mueñoetpa' alla rrannarterreterrpa', o' gogo'tyeset pa'shtam enonet, allotpa' a'rrotsetyeset ñaña patspa' o' huapore'tyeset enonet.

24 Allempoñapa' añña ñeñt solltarnesha' pa'mcha'tareterpa' o' abe'tatan Pablo o'pono. O'ch ashtet attotcha' a'meta'huan ñeñt atet o' pãohua. Ñapa' mueneñ o'ch eñoch esocopte' nanac ama'tochtenet ñocop.

25 Allempoñapa' o' huanquët Pablo attoch ashtet. Huanca'huet Pabloñapa' otan capitán ñeñt tets allame'tets:

—Ta', ¿pocte't senteñ o'ch sashte' acheñ ñeñt romanona'tar, ñaña ama señoña' ñeñt atet pena? Ñoñets ñeñt atet anaret Romotpa' ta', ¿pocte'te'?

26 Ñeñta e'm capitánpa' o' ahua' allo'tsen pa'mcha'tareterpa' atet otos:

—¿Errotena't pãotape'cheññañ añ acheñer? Añpa' romanona'tarca'ye.

27 Añña ñeñt solltarnesha' pa'mcha'tareterpa' o' huapapa' atet otosan Pablo:

—¿Po'ñocha't romanona'tarep?

Pabloñapa' o' ana'p:

—Napa' ñeñtenca'ye.

28 Ñeñña añcha'taretpa' alla oterranerr Pablo:

—Napa' o' netsa'ta shonte' quelle attoch a'punta'net attoch napa' romanona'tar penet.

Pabloñapa' alla otererr:

—Napa' attot ne'ñalleta, tarro'mar na nomporpa' romanona'tar.

29 Añña solltarnesha' ñeñt autsa ashtayen Pablopa', allorocmo' alla cheta'yerret a'yenet. Ñeñt pa'mcha'tareterpa' ñapa'cho'ña cha yoren, tarro'mar o' chapoña pueyo'chro o' huanca'huet acheñ ñeñt romanona'tar.

Allempo eños Pablo allo'tsa'yen ñeñt chocma a'pocatyene' ñoñets

³⁰ Tsapaña puetarenpa' añña añcha'taretpa' o' agotatan cornanesha' ñeñt pa'mcha'taretnesha' pen allohuen judionesha' po'cornaneshar, ñaña o' agotatan ñeñt chocma a'pocatyene' ñoñets judioneshap. Allempoña apchetpa' o' pueyanperet Pablo allo huanquëtpa' o' anmet allo'tsa'yen añcha'taretnesha'. O' chapachetpa' o' tomatoset e'ñe allame'tets. Añña añcha'taretnesha'pa' mueneñ o'ch eñoch e'ñe po'ñoch esocopte' otteñe'cheñ judionesha'.

23

¹ Pabloñapa' o' cohua'yesan allohuen ñeñt chocma a'pocatyene' ñoñets. Allempoñapa' atet otanet:

—Masheñneshacha', napa' chocma nocrena cohuen Yomporecop, ama't ahuatoteñ ama't ñaña teme'ttsen. Yomporpa' entennante' e'ñe cohuen neyocher.

² Añña cornesha' Ananías ñeñtara ñeñt nanac añcha'taretpa' atet otan ñeñt tets e'ñe allame'tets Pableshe, atet otanet:

—Chosañaca'ye asnama'te'.

³ Allempoña Pablopa' otan añcha'taretnet, atet och:

—Yomporpa' tsa'tatuerrpepa'ch, tarro'mar ama't porrtenañ e'ñe cohuenpa' peyo'chropa' ama masosyape. Ñaña ñeñto'marña anarete'pa' arr attoch papa' peñotaten ñato' chate' nepena ñeñt ama pocteyaye ñeñt atet oteney ñoñets ñeñt atet anare't. Tarraña pañapa' o' atta pasnama'taten. Tarraña ñeñtpa' ama pocteyaye ñeñt atet oteney ñoñets ñeñt atet anare't.

⁴ Añña ñeñt tomcha'tets allame'tetspa' o' che'ptare'chet Pablopa' atet ochet:

—Papa' atarro't cohuen penteña o'ch pesochatse'ch cornesha' ñeñt nanac añcha'taretnet ñeñt nen Yompor.

⁵ Pabloñapa' anapanetpa' atet otanet:

—Napa' ama masheñneshacha' neñoteñe añmapa' ñeñte' cornesha' ñeñt nanac añcha'taretnet. Ñerra'm neñoteñeña' amach nochñe atet, tarro'mar anare't Yompor po'ñoño atet: “Ama asochatse'tpahuo acheñ ñeñt añcha'tarettetsa socop.”

⁶ Allempoñapa' o' cotape'ch Pablo. Añña ñeñt chocma a'pocatyene' ñoñets patantarña' saduceonesha', po'potantañapa' fariseonesha'. Allempoña Pablopa' o' eñoch atetpa' allempoñapa' o' eños huomencpa', atet otanet:

—Masheñneshacha', napa'cho'ña fariseoneshan. Natañneshañpa'cho'ña fariseoneshet. Ñeñto'marña te'pa' otteñe'chennet tarro'mar napa' name'ñena atto ñerra'm yerroma, Yomporpa' tantaterreycha' esempohuañen.

⁷ Ñeña otua Pablopa' allempoñapa' ama patraye' cotape'cheto ñeñt actape'chatañnesha'. Añña ñeñt fariseonesha' ñetpa'cho'ña cotape'chet paterr, po'potantañña ñeñt saduceonesha'pa', ñetpa'cho'ña o' cotape'chet po'poñ. Amaña patraye' cotape'cheto.

⁸ Ama patraye' cotape'cheto tarro'mar saduceonesha' ñetpa' cotape'chenet ñerra'm yerromapa' amach yetanterro. Ñaña ñetpa' otenet ama eñalle Yompor po'mllañoñeñer ñeñt huetsa ento't, ñaña ñetpa' otenet ama eñalle yecamquëñ. Tarraña fariseonesha' ñetpa' cotape'cheñet po'ñoch ñerra'm yerromapa' yetanerrach. Ñaña ñetpa' otenet po'ñoch eñall Yompor po'mllañoñeñer ñeñt huetsa ento't, ñaña po'ñoch eñall yecamquëñ.

⁹ Allempoñapa' ñetañeño' nanac ama'tochtet. Atteñapa' puesheña'tets fariseonesha' ñeñt nanac etsotene' ñoñets ñeñt atet anare't o' tomosetpa' eñososet Pablocop, atet otet:

—Añ acheñer yapa' ama yenteññañe erra'tsente'ña po'chñar. Po'ñochpa' ñato' orrtoña Yompor po'mllañoñeñer ñeñt huetsa ento't amapa' ñato' es ñeñt camquëñets ñato' ñeñt orrtenoya. Ñeñto'marña yapa' amachña cha yepatare'tatsche Yompor ñerra'm ña'te' atet muenatene'.

¹⁰ Allempo nanac ama'toçhtenetpa' añña solltarnesha' pa'mcha'tareterpa' o' cotape'ch, atet ot:

—Ñato' o'ch rraquët Pablo.

Ñeñto'mar o' chore'tan po'poñ solltarnesha' o'ch huapuet o'ch chetereta' Pablo al-
lotpa' o'ch aneret pocollo all shontena solltarnesha'.

¹¹ Tsapaña tsapopa' o' alla orrteññañerr Pablo Yepartseshar, atet otos:

—Amach pellcatsto, tarro'mar Romopa'cho'ña all palltena o'ch pa'poton neñoñ atet o'
pa'potuon arr Jerusaléño.

Allempo judionesha'pa' atarr o'pachet Pablo o'ch muetset

¹² Tsapaña puetarenpa' añña judionesha'pa' atarr o'pachet Pablo ahuo'ch muetset.
Ñetpa' o' a'pochtachet, atet otet:

—Yapa' amach yerrerroña' ñerra'm amach o' yemtso Pablo ñaña amach es yorrerro.
Atteña ñerra'm amach attetopa' ama'tpa' esepa' yetantoya.

¹³ Ñeñña o'patenayapa' ñato' metente' pa'tatsof çharrasheña.

¹⁴ Allempoña o' a'pochtatueta' ahuanmuet ñaña allo'tsa'yen cornanesha' ñeññ
pa'mcha'tareternesha' pen allohuen judionesha' po'cornaneshar ñaña allo'tsa'yen ñeññ
pompornesha' penet. O' çhapuet allpa' atet otoset:

—Yapa' o' ya'pochtatueta atet: Yapa' yoten ñerra'm amach o' yemtso Pablopa' amach
yerrerro. O' ya'pochtata ñaña atet: Atteña ñerra'm amach attetopa' ama'tpa' esepa'
yetantoya.

¹⁵ Alla oterreterr:

—Ñehua, te'pa' o'ch yotas ñeññcha' atet sepa. O'ch soteña' ñaña ñeññ çhocma
a'pochtatyene' ñoñets allo'tpa' e'ñe parrocmapa' o'ch semña ñoñets allo'tsen solltarnesha'
pa'mcha'tareter, o'ch soch huapachetepa' Pablo sesho attoch o'ch señoñoñ este' o' pohua.
Tarraña ama'tcha' atet seshcanetpa' yañapa' allo'tsa'yeneycha' toño attoch yapa' o'ch
yerrmañ.

¹⁶ Añña Pablo pa'ñachorpa' o' e'mare'ch çha o'pateññañet pa'go'pa' o' ahuo' solltarne-
sha' pa'paclopa' o' otenana' pa'go' Pablo.

¹⁷ Alloña Pablopa' o' chore'tan puesheñarr capitán, atet och:

—Añ huepuesha'pa' o'ch pañemñ allo'tsen pa'mcha'tareter tarro'mar ñapa' atarr
mueneñ o'ch es a'metena'.

¹⁸ Capitánña'pa' o'cho'ña anman huepuesha' allo'tsen pa'mcha'tareter. Allempoña
çhappa' atet otosan pa'mcha'tareter:

—Añ Pablo ñeññ ehuanca're'tpa' ahuo't chore'ten allo'tpa' oten ahuo'ch nanemñ añ
huepuesha' pesho tarro'mar ñapa' nanac mueneñ o'ch es a'metena' pesho.

¹⁹ Añña amcha'tare'tpa' o' echa'nman huepuesha' pototpa' o' anemñ a'yenetpa' atet
otos:

—Ñehua, o'ch poten este' pemnen o'ch poten.

²⁰ Huepuesha'ña'pa' atet och:

—Añña judionesha'pa' o' a'pochtachet attoch o'ch enamapet o'ch pemñe Pablo tsapa't
allo'tsa'yen ñeññ çhocma a'pochtatyene' ñoñets. Ñaña o'ch otapet añecpo'ch pemñe atto'ch
eñochet e'ñe po'ñoçh este' o' pohua.

²¹ Tarraña amach pa'me'ñatstaneto erro'tencha' otospet tarro'mar metente' pa'tatsof
çharrasheña judionesha' ñeññcha' camroya toño ñeññcha' rromapue' go'. Ñetpa' o'
a'pochtachet amach rrerreto ñaña amach es orreto ñerra'm amo'ch muetseto go'. Ñaña
o' a'pochtachet ñerra'm amo'ch attetopa' ama'tpa' esepa'to' tantahuet. Te'pa' aña palltetsa
ñeññcha' atet potanet.

²² Amcha'tare'tña'pa' atet otan huepuesha':

—Tarraña amach esesha' potatsto pa'pa' o' potuenna'.

Ñeñta otuepa' allempoñapa' o' mueñer.

Allempo chapachet Pablo allo'tsen gobernador Félix

23-24 Allempoña amcha'taretpa' agotatan epsheña po'captáner. Allempoña o' chapueta' atet otapanet:

—Cherra'ch a las nueve tsappa' o'ch secamrat doscientos solltarnesha' ñaña setenta ñeñt montenaya cahuall, allotpa' ñaña doscientos ñeñt orrene' muetsamets alloch quellaret. Allotpa' o'ch sanem paterr cahuall amapa' epa alloch monta'nma Pablo. Allotñapa' o'ch sahanma Cesareo attoch sechapach cohuen Pablo allo'tsen gobernador Félix.

25 Allotpa' quellcan ñaña carta ñeñtpa' atet ot:

26 “Gobernador Félix ñeñteḡ nanac cohuenepḡ amcha'tareḡ, na Claudio Lisiaspa' o'ch nehuomcha'taḡ añ necartoḡ.

27 Añ yacmapa' ahuo't rromue' judionesha' o'ch muetsetañpa' nañapa' o' neñoche ñapa' romanona'tar. Nañapa' nehuapa epan nesolltarnesharpa' o' na'rroyatatos.

28 Napa' nemneñ o'ch neñoche esocopte' nanac otteñe'cheñet, ñeñto'marña napa' o' nanemñ allo'tsa'yen ñeñt chocma a'pocatyene' ñoñets ñeñt atet yechenet ñet.

29 Tarraña napa' neñotoñ ñeñtecop otteñe'cheñet, tarro'mar ñetpa' otenet ama atteye' peno atet anareḡet ñocpuet. Ñeñtecpaña otteñe'cheñet tarraña ama añecpayaye attoch o'ch yemtsach amapa' o'ch yeyottamḡsach.

30 Allempoña napa' o' ne'mare'ch judionesha'pa' cha o'pateña o'ch muetset. Ñeñto'mar te'pa' o'ch nemñe pesho tayecma. Ñaña o' notueña ñeñt otteñe'chene' arrpa', te'pa' a'meteñetepa' pesho esocopte' otteñe'cheñet. Te'pa' ñeñtach notaḡ.” Allohua huañ po'carta.

31 Allempo atet otanet pa'mcha'tareḡterpa' añña solltarnesha'pa' e'ñe a'nahua anmet Pablo tsapocma. Allotñapa' o' chapueta' all anetso pa'so'cheñ Antípatris.

32 Tsapañña añña solltarnesha' ñeñt chope'chets pa'tcopa' allotpa' puerra'cherret Antípatrisoḡ. Allotpa' añña anmue'ña Pablo Cesareohua ñeñt montetsa cahuallo.

33 Allempoña chapueta' Cesareopa' o' aposet gobernador carta. Ñaña o' chapachet Pablo e'ñe ñesho.

34 Allempoña gobernadorpa' o' lleya'huan cartapa' a'ḡto'tan Pablo:

—¿Erra'tsena'tña anetsroḡ pehuapa?

Ñaña'pa' atet och:

—Arroḡ nehuapa Cilicioḡ.

Allempoña gobernadorpa' o' eñoche allot huapa

35 allempoñapa' otan Pablo:

—Te'pa' allach ya'pocachña' ato't hua'cha'ta' ñeñt ḡotteñe'chene'.

Allempoñapa' o' mueñan po'solltarneshar cohuanḡḡsetepa' Pablo allara amcha'tareḡ Herodes po'palaciopahuo.

24

Allempo judionesha'pa' otteñe'choset Pablo allo'tsen amcha'tareḡ Félix

1 Pa'mnarmatñoñapa' huapa ñeñt pa'mcha'tareḡter pen allohuen judionesha' po'cornaneshar, ñeñtpa' añ pa'so'cheñ Ananías. O' huapa ñaña allponsheña ñeñt pompornesha' penet. Allotpa' huapa ñaña puesheñarr ñeñt pa'so'cheñ Tértulo ñeñtpa' ñeñtcha' eñosapretahuet. Allempoña huapuetpa' o' ahuanmuet allo'tsen gobernador attoch otteñe'choset Pablo.

2 Allempoñapa' huapachet ñaña Pablopa' o' chore'chet ñanom Tértulo attoch eños ñanom. Ñaña'pa' añecpa eños attoch otteñe'chet Pablo. Ñanompa' o' eños e'ñe cohuen gobernadorocop ñeñt Félix, atet ot:

³ —Pa gobernadoro, nanac cohuen yenteneþ tarro'mar e'ñe þotoť yocrrena e'ne cohuen ama eñalle attoch yečllaranna'ta. Ñaña þapa' o' þa'pocatonay e'ñe cohuen ñeñť yepalltena arr yenyo. Ñeñto'mar ya te'pa' yemneñ o'ch yeparasyoso't þocop attoch čhocma peyenpueney cohuen.

⁴ Te'pa' attoch amach alla nellaþso eñosetspa' napa' nemneñ e'ñe pemorrenteñoťpa' o'ch pe'mñnoten mame' ñeñťcha' notaþ.

⁵ Yapa' yeñoteñ añ yacmapa' nanac atsrre'močtena, nanac moññe'tatyenana ora allohuen judionesha' atto te'pa' ama patrraye' coťape'cheneto. Ñaña añmapa' ñeñť pompopor pen allohuen ñeñť coťene' pocťaþña ñeñť huapatsa Nazaretot.

⁶ Elloña te'pa' mueneñeñ o'ch a'sosyatuanenñ ñaña Parets pa'paquell, tarraña yañapa' o' yerrmue'. Ñaña yapa' yemneñeñ o'ch ya'pocťacheñ atet anaret yocoppa'

⁷ tarraña o' huapa añcha'taret Lisias epuet po'solltarnesharpa' e'ñe po'huamencocma o' puerratamþenyeta'.

⁸ Alloťña' atet otey ñeñťey otteñe'chene' yehuapuepa'to' pesho. Te'pa' þachña a'þto'tare'te' attoch peñoč þaña ora allohuen atťot yotteñe'cheñ. Añpa' allohua atet eños Tértulo ñeñť eñosapretahuet.

⁹ Judionesha'pa'čho'ña atet otet:

—Po'ñočhca'ye atet.

¹⁰ Allempoña gobernadorpa' o' yochan Pablo attoch eños ñaña. Allempoña Pablopa' atet ot:

—Napa' e'ñe nocsheñesha' o'ch neños pesho e'ñe nocop, tarro'mar napa' neñoteneþ o' shonte' char atto þa'mičha'tareťtena arr yenyo.

¹¹ E'ñe taya o' met čharramat puechena epomuet atto o' nema'yochuena' Parets pa'paclo all Jerusaléño. Ama't esesha' þa'þto'tpa' atetcha' otapet.

¹² Tarraña allempo ñetpa' ama entneto o' esesha' notnare't, ñaña ama na'tsrre'močtana'che acheñenesha'. Ñaña ama na'tsrre'močto ama't Parets pa'paclo, ama't ñaña judionesha' po'prahuo, ñaña ama't all chopeñe'chyen acheñenesha'.

¹³ Ñeñto'marña te'pa' amate' erroťen eñotatapeto añmapa' ñeñť e'ñe po'ñoč attota otteñe'chennet.

¹⁴ Napa' te'pa' añach na'meta' pesho, napa' name'ñena ñeñť e'ñe alloch yequeshperra. Po'ñoč napa' añ name'ñena ñeñťara Yompopor ñeñť Po'yomporer pe't yatañneshañ. Ñaña añ name'ñena ora allohuen ñoñets ñeñť atet anaret judioneshacop. Ñaña añ name'ñena ñeñť atet quellquē't ahuať ñeñť a'mťaye't Yompopor po'ñoñ.

¹⁵ Ñaña napa' añ name'ñena ñeñť attoch esempohuañen Yomporpa' tantaterrancha' allohuen acheñ—ñeñť e'ñe cohuen acheñ ñaña ama't ñeñť ama cohuenayaye acheñ. Ñetpa'čho'ña ñeñťara ame'ñenet.

¹⁶ Ñeñto'marña napa' čhocma nema'yochrena attoch Yomporpa' enten e'ñe cohuen, ñaña attoch acheñenesha'pa'čho'ña o'ch entennet e'ñe cohuen ñamet.

¹⁷ 'Napa' shonte' char čhocma nechopeñen erraþaren anetso'mar. Te'pa' o' taya nohuerra arr attoch napa'yesuer namo'tsesha' quelle ñeñť huocchañnesha'čno. Añ quellepa' ñeñťara apa'yesen ñeñť ame'ñenaya Yompopor. Napa'čho'ña eñalleñ ñeñťcha' nepomañ Yomporecop.

¹⁸ O' taya čhapmočaň allempoch o'ch na'cohuentatuañ Yomporecoppa' judionesha'ñapa' o' entnet all Parets pa'paclo. Tarraña allempopa' ama tama shonteyaye acheñ ñeñto'mar ama tama esesha' ama'točťetso.

¹⁹ Tarraña e'ñe allempopa' o' čhačha't ñaña judionesha' ñeñť huáčhetsa Asioť. Ta', te'ñapa' eso'marte'ña ama ñetaye'ña huapatseto arr attoch ñerra'm po'ñoč mueneñet o'ch otteñe'chnet na.

²⁰ Tarraña te'pa' ama huapueto ñetpa' ñehua, te'pa' otetepa' ñeñt' huača'tatsa te'. A'metetepa' ñerra'm po'ñochte' este' nepanta' allempo natomos allo'tsa'yen ñeñt' chocma a'pocatyene' ñoñets.

²¹ Allempopa' aña neños paterr huomenc atto notanet. Añecop napa' otteñe'chennet tarro'mar napa' name'ñena atto ñerra'm yerromapa' yetanerrach esempo. Ñehua, ñato' ñeñtecpate' otteñe'chennetña te'.

²² Ñeñta otua Pablopa' aña Félixpa' ama mueno o'ch alla serrpare'terretter, tarro'mar ñapa' o' eñotmoch atet ame'ñena ñeñt' cotene' Cristo. Ñeñto'marña atet otanet:

—Ñehua, te'pa' ñeñt'ach yot. EsemPOCHña huapa ñaña añcha'taret Lisiaspa' allemPOCHña ya'pocata ñoñets.

²³ Allempoña atet oterran po'captáner:

—Te'pa' allach secuanpererr Pablo. Amach tama sa'montsatsche. Ñaña chocmach semnach ñeñt' yemtenaya o'ch es aḗ ñeñt' palltena.

²⁴ Allponmaterrerrpa' o' huerra Félix Cesareo epuet puetapor ñeñt' pa'so'cheñ Drusila, ñeñt'pa' judionesha'. O'ña cherr Félix o' agotatuenan Pablo tarro'mar ñetpa' mueneñet o'ch serrpare'tatanet ñamet Pablo errotenete' ame'ñenana Jesucristo.

²⁵ Allempoña chap Pablopa' o' serrpare'tatanet cohuen ñeñt' atet yepena ya ñeñtey ame'ñetsa. Ñaña atet otanet aña' yema'yočhra attoch e'ñe pocte' es yeḗa'yen, ñaña amach yeḗatsto ñeñt' ama cohuenayaye tarro'mar Yomporpa' tsa'tatuerryach allemPOCH acerrran allohuen acheñenesha'. Ñeñta otua Pablopa' aña Félixpa' cha yoren. Allempopa' alla oter:

—Te'pa' orrerreḗ, esemPOCHña e'ñe pocta'huerrnanerrpa' o'ch alla nečhore'taterrperr.

²⁶ Félixñapa' atta cohuenan Pablo ñato' o'ch aḗ quelle añecop attoch a'rroyer. Ñeñto'mar errotenopa' o'chcho'ña agotach attoch serrpare'tet epuet.

²⁷ Atteñapa' o' met epa charpa' o' canyerra gobernador, huapa po'psheñeñ añcha'taret añ pa'so'cheñ Porcio Festo. Ñaña' nanac mueneñ o'ch coshatan judionesha' ñeñto'marña ama a'rroyerrano Pablo, atet ot:

—Allepa' preso.

25

Allempo chapachet Pablo allo'tsen añcha'taret Festo

¹ Allempoña añcha'tareḗta Festo all Cesareopa' poma'pamtañoña' o' ahuo' Jerusaléño.

² O' chap Jerusaléño'pa' aña cornanesha' ñeñt' nanac añcha'tareḗnesha' ñaña epuet ñeñt' nanac sherbets judioneshacoppa', o' serrpare'tatapet Festo atto otteñe'cheñet Pablo.

³ Ñetpa' atet ochet Festo agotatanepa'to' Pablo attoch huapa Jerusaléño, tarro'mar ñetpa' ahuañacma a'pocatauet o'ch cohuet Pablo toño attoch muetsapueret all.

⁴ Festoñapa' atet otanet:

—Pablopa' allo'tsena all yottampeñet Cesareo. Napa' o' nesecherra o'ch ahuerren Cesareo. Ñato' e'ñech na'llponmatena o'ch ahuerren.

⁵ Te'pa' ñeñt' nanac añcha'tareḗtetsa socoppa' coḗa'nerrnetepa' allochña'pa' otteñe'cheñetepa' Pablo all, ñerra'm po'ñochte' eñall alloch otteñe'chet.

⁶ Festoñapa' alla a'pa Jerusaléño allponmat. Ñato' po'psocmatño amapa' po'charramatño'pa' o' ahuerren Cesareo. Cherr Cesareopa' tsapatña e'ñe ahuatecmapa' o' anorros allecma a'pocatenet ñoñets. Alloña agotatan Pablo.

⁷ Allempoña huapachet Pablopa', añña judionesha' ñeñt' huača'tatsa allpa' čha arrotam̄pesyet. Allempoñapa' otteñe'chošet. Shonte' esocmañen nanac sosey toma'tam̄pesyesoset Pablo, tarraña ama errotenoť eñotacheto añcha'tareť Festo attoch otoset e'ñe po'ñočh.

⁸ Pabloñapa' o' eños ñaña ñocop atet ot:

—Napa' ama čho nachm̄are'teno ñoñets ñeñt' atet anaret judioneshacop. Ñaña napa' ama čho na'sosyateññañe Parets pa'paquell. Ñaña napa' ama čho natpare'teno ñoñets ñeñt' nen añcha'tareť Romoť.

⁹ Tarraña Festopa' nanac mueneñ o'ch coshatan judionesha', ñeñto'marña otan Pablo:

—¿Pocte't penteñ o'ch ahuep̄ Jerusaléño allña' allcha' nentonaṗ atto po'ñočhte' alloch otteñe'chapet?

¹⁰⁻¹¹ Pabloñapa' alla anapuererrr, atet ot:

—Napa' añña pocte' nenten o'ch a'pocaton añcha'tareť ñoñets ñeñt' romo'marnesha', tarro'mar amať errotenoť neto Jerusaléño, tarro'mar ama erroť nepeñeña judionesha', ama't papa' peñotueñ. Ñeñto'mar añña pocte' nenten o'ch a'pocaton añcha'tareť ñoñets ñeñt' romo'marnesha'. Te'pa' arro'tsenen pesho ñeñteṗ eñets epaṗ añcha'tareť romo'marnesha' ñeñt' pocte' nenten na, ñach a'pocate'ña ñoñets nocop. Tarraña ñerra'm po'ñočhte' añ o' neṗohua ñeñt' ama pocteyaye amapa' atet ñerra'm alloch muetsanet ñeñt'pa' e'ñe pocte' muetsanetepa'. Tarro'mar ama nemno o'ch na'quesṗata nañeña. Tarraña ñerra'm e'ñe attoťapa' ama pocteyaye o'ch pepomuen judioneshesho. Ñeñto'mar napa' nemneñ o'ch a'pocaton añcha'tareť ñoñets ñeñt' romo'marnesha' e'ñe ñapueť.

¹² Allempoña Festopa' o' serrpare'tet epuet ñeñt' parro coťape'chatannenet. Allempoñapa' atet otan Pablo:

—Te'pa' nanac añcha'tareťesho pesechenapa' ama'tpa' allcha'ca'ye peta.

Atto eños Pablo allempo huapa añcha'tareť Agripa

¹³ O' allponmaterrerrpa' huapa añcha'tareť Agripa epuet po'ch Berenice. O' čhapuet Cesareo all emo'teñeta' añcha'tareť Festo.

¹⁴ O' allponmatosetpa' allempoña Festopa' serrpare'tatanet atto otteñe'cheñet Pablo, atet otanet: Arrpa' allo'tsen puesheñarr yacma ñeñt' na'nom Félix ahuaña all yot-tam̄peñet.

¹⁵ Allempoña napa' Jerusaléno'tsenenpa', añña cornanesha' ñeñt' pa'm̄cha'tareťernesha' pen allohuen judionesha' po'cornanesha; ñaña po'potantañ ñeñt' pompornesha' penet, ñetñapa' o' serrpare'tatnet attoť otteñe'cheñet Pablo, ñaña otnet napa' nemtsachepa'to' Pablo.

¹⁶ Nañapa' atet notanet: “Ñeñt' ñoñets anaret Romoťpa' ama pocteyaye o'ch yemtsach acheñ ñerra'm ama eñorena' e'ñe ñocop attoch eñotatanet attoť otteñe'cheñet.”

¹⁷ Ñeñto'marña allempo huača'ta judionesha' nesho, allempoña na tsapaťña' o' nanorros allecma ya'pocaten ñoñets. Allempoña napa' o' nagotach Pablo.

¹⁸ Añña ñeñt' huača'tatsapa' allenta tom̄cha'toset attoch o'ch alla otteñe'chueñeterr Pablo, tarraña amaña añeye' a'meta'yeseťo atto ñeñt' pocťetsa o'ch yemtsach acheñ.

¹⁹ Aña a'meta'yeseť ñeñt' e'ñe ñocpueta atet yečhenet ñet judioneshet. Ñaña aña a'meta'yeseť ñeñt' pocťap̄ña puesheñarr ñeñt' pa'so'cheñ Jesús, tarraña ñeñt'pa' o' rroma, tarraña Pablopa' čha oten ñeñt'pa' o' tanterra.

²⁰ Ñeñto'marña napa' ama tama neñoche attoch na'pocťat ñoñets ñocpuet. Ñeñto'marña atet noch Pablo po'tom̄ña: “¿Pocte'te' penteñ o'ch ahuep̄ Jerusaléño allcha' ya'pocťatena' ñoñets?”

²¹ Tarraña Pablopa' ama mueno. Ñapa' aña muena' allach arr; allotcha'ña esempopa' entateñetepa'to' añcha'tareť Augusto all Romo. Ñeñto'marña napa' not: "Te'pa' allepa' arrma, esempochña napa' o'ch nemñe añcha'tareťesho Romo."

²² Allempoña añcha'tareť Agripapa' atet otan Festo:

—Napa' atarr nemneñ o'ch ne'mñ naña erroťente' serrpare'ten Pablo.

Allempoña Festopa' atet och:

—Tsapaťcha'ña pe'mñota'mueñ.

²³ Tsapaťña' huapa' muena añcha'tareť Agripa epuet ñaña po'ch Berenice. Ñetña'pa' ĉha cohuenetyesoset. Allempoña'pa' be'tosĉha'toset allecma serrpare'tatannena añcha'tareťnesha'. O' be'tosĉha'tet epuet ñaña solltarnesha' pa'mñcha'tareťernesha' ñaña po'poñeĉhno acheñenesha' ñeñť nanac sherbets all anetso. Allempoña Festopa' o' agotatenanerr Pablo.

²⁴ Allempoña huapa Pablopa' Festoña'pa' eñoratsapa' atet ot:

—Añcha'tareťe Agripa, ñaña allohuenes ñeñťes arro'tsa'yenes: Te'pa' o' sentue añ yacma ñeñť nanac e'moñe'ten allohuen judionesha'. Ñetpa' o' otteñe'ĉhuet e'ñe nesho allempo Jerusaléño'tsenen ñaña arrpa' o' otteñe'ĉhueñeta' allempo neĉherr ñaña arr. Ama't arrpa' o' ĉe'ĉhame'tueñeta', atet otyeset: "ĉhosa muetse', tarro'mar añ acheñerpa' ama pocteyaye o'ch alla corra."

²⁵ Tarraña allempoña napa' na'pťo'tare'ĉhpa' ama nentoñeña ñeñť atto pocte' o'ch nemtsach. Ñaña e'ñe ña muenats o'ch entateñeta' añcha'tareť Augusto all Romo ñeñto'marña napa' pocte' nenteñ o'ch nemñe all.

²⁶ Tarraña napa' ama neñoteñe ñeñťcha' atet nequellcoñ ya'mñcha'tareťer ñocop tarro'mar ama eñalle erroťenotcha' yotteñe'ĉeñ. Ñeñto'marña te'pa' o' neĉhore'tach arr all seshontena te'.

Alloťña Festopa' atet otan añcha'tareť Agripa:

—Te'pa' p'ach ñanom a'pťo'tare'te' attoch napa' o'ch neñoch erroťencha' nequellca' carta añcha'tareťecop.

²⁷ Napa' noctape'ĉeñ ama pocteyaye o'ch yemñe acheñ ehuancařeť ñerra'm ama eñalle erroťenot o'ch yotteñe'ĉeñ.

26

¹ Allempoña añcha'tareť Agripapa' atet otan Pablo:

—Ñehua, te'pa' pocte' nenteñ o'ch peños p'aña p'ocop.

Allempoña Pablo e'ñe puehuomñcha'teñoťpa' o' echantan pot, allempoña'pa' eños ñocop, atet ot:

² —Te'pa' nocshena añcha'tareťe Agripa tarro'mar eñall attotcha' neños pesho nocop, añecop tarro'mar ĉha otteñe'ĉenen judionesha'.

³ Napa' nocshena tarro'mar te'pa' o' peñoch p'aña atet yeyĉhena ya ñeñťey judione-shay. Ñaña o' peñoch attot ama patrraye' yoctape'ĉhyeno. Ñeñto'marña te'pa' o'ch nenamař attoch pe'mñoten cohuen.

Atet atarr cotape'ĉe't Pablo allempo ama ame'ñerra'

⁴ 'Allohuen judionesha'pa' eñotuennet atet nocre't ahuat, ama't allempoteñ ne'ñalleta nenyó, ñaña ama't allempo cheshenna' allempo yeyĉe't Jerusaléño epan namo'tsna'tarnesha'.

⁵ Ama't ahuatoteñpa' eñotuanete't napa' fariseoneshan ñeñťara ñeñť nanac etsotene' cotapñats nanac echarr allo yoctape'ĉhen Partsocop. Ñeñť atet entnete't atet nocre'tpa', atetĉha'ñācho' a'meťa'netañ.

6 Ñeñto'mar te'pa' arro'tsenen attoch sa'pto'tare'ten, atto napa' name'ñena ñerra'm yerromapa' Yomporpa' tantaterreycha' esempohuañen. Añmapa' ñeñtara atet otane't ahuat Yompor yatañneshañ.

7 Ama't çharrasheña puechena epa ñeñtara ñeñt yatañneshañ yepen ñeñt chemere'tyesahuetpa', ñeñtña po'mrenñetpa' e'ñe ame'ña'huenet ñeñt atet o' notuas. Ñeñto'marña ñet te'pa' nanac ma'yoçhrenet Yomporecop—yeto ama't ñaña tsapo. Tarraña ama't atet penetañ allohuen judionesha'pa' te'ñapa' e'moñe'tennet ama't napa' ñeñtara name'ñena atet ame'ñenet ñamet. Attoña añcha'tarete Agripa otteñe'chennetña te'.

8 ¿Eso'marte' sapa' soten amach erro'tenot tantaterrano Yompor arromñañnesha'?

Atto Pablopa' atarr mueroçhtatane't ñeñt ame'ñenaya Cristo

9 'Napa'cho'ña ahuañmo'chapa' notenapañ ñato' ñeñtfe' poctetsa o'ch yemueroçhtach ñeñt co'tene' Jesús pocta'ña ñeñtara Jesús ñeñt nazareto'marnesha'.

10 Ñeñto'marña napa' nanac nemueroçhtatyese't acheñ Jerusaléño ñeñt ame'ñaye't Jesús pocta'ña. Shonte' acheñ ñeñt nabe'tate't cárcelo, tarro'mar cornanesha' ñeñt pa'mcha'tare'ternesha' pen allohuen judionesha' po'cornaneshar, ñetñapa' o' apnet orden ñeñtecop. Ñaña allempo otyese't añcha'tare'tnesha' ahuo'ch muetsachet ñeñt ame'ñenaya Jesús pocta'ñapa', napa'cho'ña o'chcho' not, pocte'ñacho' muetsetepa'.

11 Chocma nemueroçhtatanete't ama't judionesha' po'prahuo'mar, ñaña nanaccha' nemne't o'ch nachm'are'tach ñeñt ame'ñatse't. Nanac natsrre'mueño'tpa' noctare'tanete't erracmañen anetso'mar.

Allempo Pablopa' ello serrpare'taterraneterr atto ello co'tape'cherran cohuen Yomporecop

(Hch. 9.1-19; 22.6-16)

12 Alla o'terraneterr Pablo:

—Atteñapa' o'cho' ahuen ñaña Damasco. Allempopa' napa' nechen orden ñeñt apuen ñeñt pa'mcha'tare'ternesha' pen allohuen judionesha' po'cornaneshar.

13 Ñaña añcha'tarete te'pa' o'ch nota' ñeñt atet norrtoya allempo. Allempoña o' yeçh'apmoch Damasco allempopa' o' çhap pocto. Ñeñtña nanac poptetsa ento'tpa' machayote'pa'tcha' çoyo'tam'psapuen ama't ñeñt epan nesen. Atet poptenapa' metanenan atsne'.

14 Allempoña yapa' alla yerrmopra'yesa patso. Allempoña alla yerrmopra'yena patsopa', nañapa' o' ne'm ñoñets hebrea'cho ñeñt'pa' atet oten: “Eso'mare't Saule pemueroçhtatennañña ñeñt name'ñenaya. Añpa' pañeña mueroçhtatetsa. Tarro'mar çha pottena ñerra'mrrate' ashen ñeñt e'ñe patpare'teño' ñañeñachña atserrpatetsa.” Añpa' atet oten ñeñt norrtoya.

15 Nañapa' not: “¿Eseshape'tña Ayochreshate eñets?” Nañapa' alla o'tnerrerr: “Napa' ñeñten Jesús en ñeñtara pemueroçhtaten.

16 Te'pa' petanterra alla, ñeñto'mar te'pa' o' norrta pesho attoch o'ch nena'p pa, p'ach torratta nocop, ñaña p'ach a'pote' ñeñt o' pentua te' ñaña ñeñt'cha' neñotata'p allempoch norrtterrerr pesho.

17 Te'pa' o'ch nemña'p allo'tsa'yen ñeñt ama judioneshayayeto, tarraña napa' çhocmach necuam'psa'p ñerra'm esempo o'pata'pa judionesha' ñaña ama't ñeñt ama judioneshayaye.

18 Tarro'marcha' nemña'p allo'tsa'yen ñeñt ama judioneshayayeña' allochñapa' attoch peserrpare'tatuanet attoch çhapanet pueyo'chro, attoch o'huañcha' chope'chet checmeto. Añcha'ña o'ch alla chope'cherret puetaro. Ñaña attoch o'huañcha' ahua'mencat panet oneñe't, añcha'ña ahua'mencat penahuet Yompor. Allochñapa'

o'ch ame'ña'huerrnet na, allempoñapa' neḡretna'huerranetcha' po'chñar, attoch o'ch parrocmatuerret e'ñe attecma atet ñerra'm ñeñt' o' na'cohuentatua.”

Atto Pablopa' ama atpare'tenano ñeñt' atet gateñ Partsasha' Jesús

¹⁹ Alla oterraneterr Pablo:

—Ñeñto'marña añcha'tarete Agripa te' napa' ama natpare'teñe Jesús ñeñtara ñeñt' norrtoya entot.

²⁰ Ñanompa' o' neserrpare'tatanet Damasco attoch coḡape'cherret ello cohuen Yomporecop. Allochñapa' o'ch ḡa'yenet ñeñt' cohuentetsa Yomporecop, attoch yeñoch po'ño'ch o' coḡape'cherret etserra. Attecma neserrpare'tatanet ama't Jerusaléno, ñaña ora erracmañen Judeo'mar, ama't ñaña allo'tsa'yen ñeñt' ama judioneshayaye.

²¹ Attoña judionesha'pa' o' rroma'net Parets pa'paclo o'ch muetsanetañ.

²² Tarraña Yomporpa' ahuo't a'natna nanac attó teme'ttsen nocrrena, attoch neserrpare'tach allohuen acheñenesha'—ama't ñeñt' ama esoshe'mayaye, ñaña ama't ñeñt' añcha'taretnesha'. Tarraña ama aḡeye' neychatenaneto ñeñt' ama cohuenayaye. Añña attecma neychatenanet atet serrpare'te't ama't ñeñt' a'mtaye't Yompor po'ñoñ ahuat. Ñeñtpa' ama't Moiséspa' atet ote't ñeñt'cha' atet perra esempo.

²³ Ñeñtara serrpare'tatanete't ahuo'ch huapa Cristo añ patsropa' nanaco'ch muerochtachet, allotpa' ahuo'ch rroma, tarraña ñapa' tanerrach. Attó'chña tanterra ñanompa' o'ch a'puetarsamḡsanet pueyo'cher allohuen judionesha', ñaña ama't po'poñe'chno acheñ.

Allempo Pablopa' atarr mueneñ o'ch ame'ñatana añcha'taret Agripa

²⁴ Allempoña atet eñen Pablo ñocoppa', Festoñapa' atet och e'ñe huomenco:

—Chate' Pablo pemospuena tarro'mar nanac es ḡoḡape'chenpa' ñato' ñeñt'ete' o' mo-spaterreḡ.

²⁵ Pabloñapa' atet och:

—Ama Ayochreshate Festo ḡhoye' nemospueno. Añña neserrpare'tatenes ñeñt' e'ñe po'ño'ch.

²⁶ Ama't añcha'taret Agripapa' e'ñe eñotueñ atet noten. Ñeñto'marña te'pa' o' neyemcha ña tarro'mar napa' neñoteñ, ñapa' o' entuon ñeñt' atet nepena, ñaña tarro'mar ama a'nahua es neḡa'yeno.

²⁷ Añcha'tarete Agripa, ḡapa' ¿ḡame'ñeña't ñeñt' a'mtaye't ahuat Yompor po'ñoñ? Napa' neñoteneḡ ḡapa' ḡame'ñeña.

²⁸ Allempoña Agripapa' atet otan Pablo:

—Cha't ḡotenapañ tayecmapa' o'ch ḡame'ñatna Cristo.

²⁹ Pabloñapa' alla otererr: Ama't tayecma amapa' tsapatoneḡpa' napa' atarr nemneñ Yomporpa' o'ch ame'ñaterrḡa, ñaña ama't allohuenes ñeñtes ne'mñotene' te'. Atarr nemneñ o'ch same'ñerra allohuenes atet ñerra'm na, tarraña ama'tcha' atteseñ ñerra'm na, sapa' amuepa'chña ehuancaḡeyayso.

³⁰ Allempoñapa' o' tom'cha'terret allohuenet—añcha'tarete Agripa, ñaña gobernador Festo, ñaña Berenice ñaña allohuen ñeñt' allo'tsa'yen.

³¹ Allempoña ahuanerretpa' atet otanna'tyeset:

—Añ yacmapa' ama es peno attoch o'ch yemtsach amapa' attoch yemñe cárcelo.

³² Allempoña añcha'tarete Agripa otan Festo:

—Amach ña muenetsñe o'ch a'ḡoḡatenana' ñoñets añcha'taretesho Romopa' yapa' o'te' ya'rroyereñ e'ñe tayecma.

¹ Allempoña o' a'pocstatuet o'ch mueñet Pablo anetso Romo allara Italiapa' o' anmet allo'tsen capitán ñeñt pa'so'cheñ Julio, ñeñt po'capitaner penet ñeñt emchorrenaya amcha'taret Augusto. Ñaña o' anmet po'poñechno ñeñt ayottam̄psaretechno o' apueñeta' Julio, allñapa' ñach cohuan̄pesnomahuet.

² Allempopa' allo'tsen ñaña Aristarco ñeñt macedonio'marnesha' ñeñt huetsa Tesalónicoť. Ñeñtcha' parro yoc'ta'neñ Pablo.* Allempoñapa' o'cho' yebe'toscha't boto ñeñt huetsa anetsoť Adramitioť, ñeñtña botepa' o'ch etsotyesnoma allemeña sohua'puetso'mar ora Asio'mar. Allempoñapa' o'cho' ahuan̄psey boto.

³ Tsapañapa' arr yetsotosa all oteñet Sidóno. Allña capitán Juliopa' morrentnomana Pablo ñeñto'mar o' muenach o'ch emo'tnoman pamo'tsesha', ñeñt yecha'yetsa all Sidóno, attoch ñetpa' o'ch apapet Pablo ñeñt palltena.

⁴ Allempoña ahuan̄perryerra' nanac yorrnotam̄pesnoma. Morrrpa' ama muenatye o'ch yemet attoch o'ch ahuey e'ñe pa'charr all oñenet, ñeñto'marña yepotesam̄pesuanma coñe't pats ñeñt pa'so'cheñ Chipre. Tarro'mar yepotesuanma attoch ñeñt patspa' o'ch a'npam̄psey m̄orr.

⁵ Allempoñapa' arr yoñemuanom allame'tets Cilicio'mar, ñaña allame'tets Panfilio'mar. Allempoñapa' ye'chap ñaña Miro all yetsotosa, allara ñeñt pa'netser Licia.

⁶ Allña capitán Juliopa' entosan po'poñ bote ñeñt huetsa Alejandrioť ñeñtcha' tatsa Italio. Ñaña allempopa' otey ahuo'ch ya'tacha't all.

⁷ Allempoña o' allponmat ahuan̄psey e'ñe aco'papa' e'ñe yemuerochenñoña yemet ñaña Gnidot. Allo'tpa'cho'ña ama muenaterryerro m̄orr o'ch ahuaryerr e'ñe pa'charr, ñeñto'marña yepotesam̄pesuanerrerr coñe't pats ñeñt pa'so'cheñ Creta attoch ñeñt patspa' o'ch a'npam̄psey m̄orr. Allñapa' allpono'mar yoñom allecma etsotenet ñeñt pa'so'cheñ Salmón.

⁸ Yemuerochenñoña yemetua ñaña allot e'ñe aco'pa. Atteñapa' ye'chap ñaña all oteñet Cohuen Sohua'puetso. Allo'tpa' e'ñe allame'tsa anetso Lasea.

⁹ Yemuerochtame'teño'tpa' o' ya'llponmatnom ñeñto'mar allempopa' o' chen allempo nanac amcha'no'chtana o'ch ahuan̄psey sapo'mar. Ñaña o' met allempo anaret judione-shacop allempocma ahuantenet pa'chporrña Yomporecop, ñeñto'marña yapa' o' yeño'ch o' chen allempo nanac orrnotena sapo'mar. Ñeñto'marña Pablopa' o' yerpatanet,

¹⁰ atet otanet:

—Masheñeshacha', napa' noctape'chen arepoña es yehuapoya toño allempoch ahuan̄perryerr. Napa' noctape'cheñ ñato' o'ch yechencatsre'tnoma, ama't ñaña yebotepa' chach chenca; ama't yapa'cho'ña arepoña cha yechenca.

¹¹ Tarraña capitánñapa' o' ame'ñenana atet otanet ñeñt maneja'nene' bote ñaña ñeñt atet otanet ñeñt pamo'mte' pen bote. Ama ame'ñyeto atet otanet Pablo.

¹² Ñaña all Sohua'puetso Cohuenpa', ama tama cohuenayaye o'ch allaya allempo chen orrnoteñtsopo. Ñaña allohuenetpa' o' e'ñe pocte' entuet o'ch ahuan̄perryerr allot. Arro'chña ye'chap sohua'puetso all oteñet Fenice, tarraña allara anetso Creta. O' sechet Sohua'puetso Feniceo tarro'mar allpa' ama tama orrnoteno. Allñapa' allach ya'posa tarremphua o'ch metuen orrnoteñtsopo.

Allempo huomenquëshatañpesnomuet sapo'mar

¹³ Allempoñapa' o' huapa m̄orr po'pshem̄tañoť, tarraña ñeñtpa' mamesha m̄orraren. Allempoñapa' otyeset:

—Te'pa' pocte' o'ch ahuaryerr.

Allempoñapa' o'cho' cheterret ñeñt rremuene' botepa' o'cho' ahuan̄perryerr. Allo'tñapa' e'ñe topña'so'mara yoñmañpes allara anetso Creta.

* 27:2 Lucas ñeñt quellquë' añ ñoñets ñapa' cota'nman ñaña Pablo.

14 Tarraña e'ñe o'chtapa' ahuepa'tcha' huapa ñaña mōrr onnatōt allente'tsen anets Creta. Allempoñapa' o'cho' yorrnotam̄pesnoma nanac huomenc.

15 Botepa' ama eshcaye' to allenet anman̄penyet allempoña ama errot yepepa' o' anman̄psey orrno a'yenet.

16 Orrnoñapa' o' chapatey po'pshem̄tañōt allo'tsen coñe't rrochpe'chañ añ pa'so'cheñ Clauda. O' chapatey allo'tem̄ta'n ama tama hueno mōrr. Allña e'ñe yemüerochenñōta yechant noññ ñeññ cheta'nen atarr bote. Allo'tpa' yesha'ch atarr boto.

17 Allempoña o' yesha'tua noñtpa' ñetñapa' huancatse'tet atarr bote attoch amach tare'che orrno. Ñaña ñetpa' añ mecha'tet ñato' botepa' o'ch chap muelle'sato allo'tsen mueñ ñeññ ama echarroyaye ñeññ otenet Sirte. Ñeñño'marña o' pueyhuet enot sheta-muets ñeññ chope'chatene' bote attoch botepa' amach errenet to.

18 Allempoñapa' ahuepa'tcha' yorrnotam̄pes nanac huomenc. Tsapañña' chetanatet cargapa' saprochet sa'po.

19 Poma'pamtañoñapa' o' saprotet ñaña ñeññ allpon echyen bote.

20 Allempopa' allponmat ama orrterro atsne' ama't ñaña rantochno, ama't mamesha. Nanac yorrnotam̄psa. Atteñapa' yot:

—Te'pa' amach erroteno yequeshperro.

21 Ñaña allponmat ama es yerro. Allempoña Pablopa' tompa' ot:

—Ñerra'm amach masheñneshacha' satpa'noñe atet notaseñ, amach yonñe Cretot, te'pa' amate' es yeyore'tenayñe ñaña allempopa' amate' yechencatsre'tañe.

22 Tarraña te'pa' o'ch notas, amach sellcatsto tarro'mar yapa' yequeshpach allo-huene. Añachña chencatsre'tatsa bote.

23 Napa' neñoteñ tarro'mar tsapopa' orrtona mellañoñeñ ñeññ huetsa Yomporeshot ñeññara Yompor ñeññ puechemer nepene', ñaña ñeññara ñocop netorrena.

24 Ñeññ norrtoyapa' atet oten: “Amach Pablo pelcatsto tarro'mar pechapcha' allo'tsen añcha'taret all Romo. E'ñe potpa' Yomporpa' o'ch a'natana allohuen ñeññ epaḡ se-chope'cham̄pen boto.”

25 Ñeñño'marña notenes amach sellcatsto. Tarro'mar napa' neyemteña Yompor, ñerra'm erroten otenpa' atetcha' pa.

26 Tarraña ama't atetpa' chocmach yepotam̄psa allempo o'ch yechapmoch patso. Añpa' allohua atet otanet Pablo.

27 Allempoña o' met charramat puechena pa'tatsmat, atta yetam̄pena sa'po ñeññ otenet Adria. Allempopa'cho'ña yorrnotam̄pesnoma. Allempo chap rroch tsapopa' añña ñeññ taruaset botopa' atet otet:

—Ñato' o' yechapmoch allo'tsen pats.

28 Allempoñapa' o' topaso'tet sa'p. Allempoñapa' ahuo't eñochet allo'tsen ma'poch charra' puechena pechap metro. Allempoñapa' o'cho' ahuaryerr allpononetpa' allpa'cho'ña o'cho' topaso'tuereterr. Allña'pa' otet allo'tsen epoch charra' puechena cancherr metro. Allempoñapa' añ mecha'tet taye'to' yeto'mam̄psa mapyo.

29 Allempoñapa' o'cho' a'shore'tet puequë'nare'tot pa'tatsm̄aga ñeññcha' rremue' bote. Allempoña a'shore'tuetpa' o' cohuet ato't puetarena'.

30 Añña ñeññ taruaset botopa' a'suaterret e'ñe a'nahua noññ tarro'mar ñetpa' añ muenenet o'ch cachpa'nmuert alla bote. Ama't ahuepa't a'suaterret noñtpa' ñetpa' cha ottenet ñerra'mrrate' po'poñ a'shore'tenet ñeññcha' rromue' bote poñe'magot.

31 Allempoña Pablopa' eñotanet atet cotape'chen ñeññ taruaset botopa' atet otan capitán ñaña po'poñechno solltarnesha' atet otanet:

—Ñerra'm ama alla a'pueto botopa' sapa' amate' errotent sequeshperro ama't pueheñarrotesa.

32 Allempoña solltarnesha'pa' o' tsorran̄pset noññ pochar attoch ahuo' a'yenet.

³³ E'ñe puetaresuanetsapa' añña Pablopa' atet otanet allohuenet:

—Te'pa o'ch serra'muen tarro'mar o' charramat puechena pa'tatsmat sema'yochreño'f po'poñpa' ama semueno, ama es serreno.

³⁴ Ñeñto'marña o' nota'muenes serra'muen attoch cherr sehuamenc, tarro'mar amach eseshas chencatso, ama't puesheñarrotesa.

³⁵ Ñeñta otuanet o' chetan panpa' o' ma'yocha e'ñe alla all shontena acheñenesha'. Alotpa' shotan panpa' o' rre'.

³⁶ Allempoñapa' o' ye'chatanetpa' o' rret ñamet.

³⁷ Ñeñtey boto'tseney allohueneypa' allo'tsen doscientos setenta seis acheñenesha'.

³⁸ Allempoña ocha'huanet puerrarpa' alla saprroteneterr trigopo'r oño attoch o'huañcha' tama eñerrta bote.

Allempo tarampsanet sa'p po'bote

³⁹ Allempoña e'ñe puetaresuenpa' o' entet pats, tarraña ama puentareto ñeñt pats, tarraña allempo o' entet ñaña a'yohuen mueyapo's allñapa' a'yohuen ñaña pueme'tar. Allempoñapa' cotape'chetpa' otet:

—Ñato' ye'chapcha' all allochñapa' allcha' yetsotosa cohuen.

⁴⁰ Alotñapa' tsorro'tet ñaña ñeñt rromuene' botepa' o' a'ypo'ña'nmet alla sa'po. Allempoñapa' o' pueyamperet allo huanquët ahuaña bote puepopa'ñ. Allempoñapa' echantet ñaña poñe'mago't shetamuets attoch morrpa' o'ch matatan bote. Allempoñapa' o'cho' ahuañpsey pueme'taronet.

⁴¹ Allempoñapa' o' chap bote all epchacra'stena sa'p all nanac epopa' rrochoñapa' cha muelle'sattena. Chap all botepa' cha a'chtosa poñe'mago't, ama erro't yepere. Arro'tña puequ'e'nare'to't nanac emo'yarertena sa'p. Po'huamencpa' o' tarampsey yebote.

⁴² Allempoña solltarnesha'pa' mueneñ o'ch muetsanatuan ñeñt ayottampsare't taye'to' ñerra'm patetpa' ahuo'te' yetet.

⁴³ Tarraña capitánpa' nanac mueneñ o'ch a'queshpatan Pablo ñeñto'marña ama muenataneto o'ch muetsanachet. Atet otanet:

—Ñerra'm esesha'te' eñotene' patatsapa' o'ch sepa'ta sanom attoch se'p'chata yom'ta'n.

⁴⁴ Alotñapa' samña ñeñtes ama eñotenaye patatsapa' ñato' o'ch sanemyes tabla amapa' po'poñe'chno ñeñt echyen bote, allochñapa' attoch se'p'chata samña.

Allempoñapa' o'cho' pechatuet allohuenet.

28

Allempo chapuet coñe't pats pa'so'cheñ Malta

¹ Allempoña o' yequeshp'a'hua allohueneypa' allempoñapa' otyet añ coñe't patspa' año' pa'so'cheñ Malta.

² Añña acheñenesha' ñeñt ye'chetsa allpa' nanac muerapyet ñeñto'marña a'toronayet tso' allcha' yeshotosa, tarro'mar allempopa' cha huatena o' yesnate't. Tarraña e'ñe cohuen agapapuey allohuen acheñenesha'.

³ Pabloñapa' allenta tsella'tpechospa' o' a'tamo'ye' tso. Allempoñapa' machayota' cha'nom sheche'p e'ñe tso't. Ahuo't atserr e'man tso'pa' o' cha'nompa', cha a'chan Pablo pototpa' alla a'sope'ch.

⁴ Acheñenesha' ñeñt ye'chetsa allpa' eñchet Pablo cha a'sope'cheñ sheche'p pototpa' atet otanna'tyeset:

—Añ acheñpa' amtsañte'ca'ye ñeñto'mar te'pa' ama't o' queshp'a'hua sa'potpa' te'ña Yomporpa' o'ch tsa'tacha.

⁵ Tarraña Pablopa' pa'shque'cherra sheche'pñapa' o' shora'nerr tso, amaña erro'teye' pe ama't mamesha.

⁶ Allempoña acheñenesha'pa' atta cohueñet Pablo ñato' machayoŕach añecmuenta potpa' o'ch ŕaco'ra rromue'. Allempoñapa' o' cohua'huet o'chet ama es atsoto, allem-poñapa' o' coŕape'cherret po'poñ, atet otet:

—Añpa' po'ñoŕ Paretste'.

⁷ Ñeñña ane'tañtetsa allpa' añ pa'so'cheñ Publio. All yeŕhap yapa' allotpa' allame'ttsa all yeŕhena Publio, allpa' allo'tsen po'patseñ. Ñapa' o' agapapuey e'ñe cohuen ñeñto'mar allpa' yema'pamuetnom pa'paclo.

⁸ E'ñe allempopa' añña Publio pomporpa' ŕha atsna'ten, nanac huoraten ñaña ŕha chemotse'ten, ama achñeno. Allempoña Pablopa' o' ahuo' o'ch enteña'. Allempoña ŕhap Pablopa' ñaña ma'yocham'psosya. Allempoña Pablopa' o' a'p'llana'chpa' añña ñeñt atsna'tetspa' allenta correna.

⁹ Allempoña e'mare'ch allohuen acheñenesha' atet o' p'osa Pablopa' huapyesa acheñenesha' ñeñt atsna'tyets. Ñetpa'ŕho'ña e'ñe a'crratyesuanet Pablo.

¹⁰ Ñeñto'marña acheñenesha'pa' shonte' regala'yesyet pa'namen. Ñaña allempo ahuañperryerr botopa' nonayet allpon ñeñt yepalltena.

¹¹ Allempoña o' met ma'p'ma arrorrpa' o' alla ahuañperryerr po'pnañ boto. Ñeñña botepa' ñeñt cohue' o'ch metuen allempo orrnoteñtsopoten. Añ botepa' ñeñt huapatsa ahuaña Alejandriot. Ñaña añ botepa' echenan poñe'magoŕ acheñma't ñeñt epuesha' ñeñt toma'ntatenet po'yosret; ñeñtpa' añ pa'so'cheñ Cástor; po'psheñeñpa' añ pa'so'cheñ Pólux.

¹² Allempopa' arr yetso'nom all oteñet Siracusa. Allña'pa' alla yema'pamuetnom.

¹³ Allotpa' allampaño'mara yocŕatop'ñe'ch pats, atteñapa' yeŕhap all oteñet Regio. Allpa'ŕho' all yetso'nom. Tsapañña' o' m'orrarenerr mamesha'tets. M'orrpa' ar-roŕ huena yeŕha'ñeñta'noŕ. Allempoñapa' o'ŕho' alla ahuañpenyerr. Allotña'pa' e'ñe puepomtañocma yeŕhap all oteñet Puteoli. Allpa' all yetso'tosa.

¹⁴ Allña'pa' yentos ñeñt ame'ñetsa. Ñetpa' a'patapyet all yeŕhena, ñeñto'marña yapa' alla yecan'cherrmatnom ñesheto. Attotapa' o'ŕho' yeya'rrota ñaña Romo.

¹⁵ Añña ñeñt ame'ñetsa all Romopa' ahuo't e'mare'tyets o' yeŕhap allampaño'pa' al-lenta't onaŕha'tet o'ch poŕtapyet. Puesheña'tetspa' o' ŕhapuet all oteñet Foro ñeñtara Apio. Po'potantañña'pa' alla't ŕhapyeset rrocho all oteñet Ma'ppahua Pocoll. Allña'pa' all poŕta'yets. Allña'pa' all entosanet Pablopa' nanac parasyoso'tan Yompor ŕarro'mar allempopa' nanac coshatapet Pablo.

¹⁶ Allempoña o' yeŕhap Romopa' atet otapet Pablo yeŕhosepa'to' ellonet, tarraña ŕhocma net solltar ñeñtcha' cohuañpse'.

Allempo Pablopa' serrpare'tatosanet allempo ŕhap anetso Romo

¹⁷ Poma'pamtañoñapa' añña ñeñt añcha'tarettetsa judioneshacop allpa' Pabloña'pa' agotatanet allohuenet. Allempoña o' e'ñe apŕha'huetpa' Pabloña'pa' atet otanet:

—Masheñneshacha', ama't napa' ama erroŕ nepeñeña judionesha' ñaña ama ŕho ne-huapore'tateno ñeñt atet yeŕhe't yatañneshañpa' te'ña judionesha'pa' o' atta rroma'net all Jerusaléno, o' pomnet allo'tsen romanonesha'.

¹⁸ Ñetpa' a'p'to'tare'tnet, tarraña amaña entoneto atto alloch muetsatnet, ñeñto'mar ñetpa' mueneñetañ o'ch a'rroyerrnetañ.

¹⁹ Tarraña judionesha'pa' ama poŕteye' eñcheto o'ch a'rroyerrnet. Ñeñto'marña napa' nesecha o'ch entatenneta' añcha'tareŕ arr Romo. Tarraña napa' ama ŕho notteñe'cheñe namo'tsna'tar.

²⁰ Ñeñto'marña te'pa' o' nagotatuas allochña'pa' o'ch neserrpare'tatuas ñeñt atet pennet. Ñaña napa' name'ñena atto ñerra'm yerromapa' Yomporpa' o'ch tantaterrey

esempohuañen. Ñeñto'marña te'pa' o' sentuan napa' ehucareten, tarraña ama't allohuen judionesha'pa' attecma ame'ñenetañ.

²¹ Ñetñapa' atet ochet Pablo:

—Tarraña yapa' ama yaguëna' carta Judeot ñeñt atet otenet p̄ocop. Ñaña ñeñt ame'ñetsa ama't huapyenet arrpa' ama esesha' erroť otetso p̄ocop ñeñt ama cohue-nayaye.

²² Yapa' aña yeñoten po'ñoçh çhocma e'moñe'teñet erracmañen ñeñt co'tene' Jesús poctapña. Ñeñto'marña yapa'cho'ña yemneñ te'pa' o'ch ye'mñotaḡ yaña errotente' p̄octape'chen ḡa.

²³ Allempoñapa' a'pochtachet allempoch huaçha'tet allo'tsen Pablo allempo'ch serrpare'tatanet. Allempoña o' çhap allempoch huaçha'tetpa' allempopa' shonte' acheñ huaçha'tatsa Pableshe. Allempoña Pablopa' e'ñe ellapen serrpare'tatahuet; a'poťanet atet pena Yompor po'cohuenña ñeñt atto ayochreshattena ña. Ñaña lleyatyesanet Moisés po'ñoñ all oten atetçha' ḡa ñeñtçha' Cristotats. Ñaña lleyatyesanet po'ñoñ ñeñt a'mtaye't ahuat Yompor po'ñoñ all oten ñaña atetçha' ḡa ñeñtçha' Cristotats. Ñapa' nanac mueneñ o'ch ame'ñatanet atto Jesús pa' po'ñoçh ñeñt Cristotats.

²⁴ E'ñe allempopa' ame'ña'yesyet puesheña'tets, tarraña po'potantañpa' ama es ame'ñatso.

²⁵ Atteñapa' ñañeñeta achm̄are'tanna'tyeset. Allempo ahuanerrmochetpa' allempoña Pablopa' otanet:

—E'ñe po'ñoçh atet ote't Isaiás ahuat allempo Parets Puecamquëñoťpa' otan sa-tañneshañ:

²⁶ O'ch soteña' judionesha' añ ñoñets: Ama'tcha' çhocma e'mñnotenetpa' ama't ahuatapa' amach çchapaneto pueyoçhreto. Ñaña ama'tcha' çho es entuetpa' amach çchapaneto pueyoçhreto.

²⁷ Alloťpa' o'ch sotenaneta', te'pa' pueyoçhretopa' nanac echarrtenet attoch amach es çchahueto pueyoçhreto. Te'pa' amach mueneto o'ch es e'mñotet taye'to' çchapanet pueyoçhreto. Te'pa' amach mueneto o'ch es entet taye'to' çchapanet pueyoçhreto. Attetach amach es cotape'cherreto nocop ama't mamesha attoch na'queshp̄aterranet. Añpa' allohua atet ote't Isaiás ñeñt a'mtaye't Yompor po'ñoñ ahuat.

²⁸ Allempopa' alla o'terraneterr Pablo:

—Te'pa' o'ch neñotatas añ, tayoteñ Yompor po'ñoñpa' o'ch yeserrpare'tach po'poñ acheñ ñeñt ama judioneshayaye. Tarro'mar ñetpa' ñerra'm e'moñet Yompor po'ñoñpa' o'ch ame'ñet. E'ñe pame'ñeñoťetpa' queshperretçha'.

²⁹ Ñeñta otuanet Pablopa' aña judionesha'pa' e'ñe pachm̄are'tanna'teñoťetpa' o' ahuanerret.

³⁰ E'ñe epa char all yeçha Pablo Romo. Allpon pallta'yese'tpa' e'ñe tsa'tuauye't. Ñaña e'ñe cohuen agapyesane't ñeñt huapyestse't.

³¹ Ñaña e'ñe cohuen serrpare'tatanete't atet pena Yompor po'cohuenña atto ayochreshattena ña, ñaña yeçhatanete't atet pena Yepartseshar Jesucristo. Tarro'mar allpa' ama esesha' epatare'taye'te. Allohua.

AÑ SAN PABLO PO' CARTA ÑEÑT̃ QUELLCAN ROMO'MARNESHA' ROMANOS

Atto Pablopa' quellcanet carta añecop ñeñt̃ ame'ñetsa netso Romo

¹ Masheñeshacha' ñaña nochaneshacha' ñeñtes allohuenes yeçhetsa anetso ñeñt̃ añ pa'so'cheñ Roma ñeñtes Yomporpa' ahuo't nanac muererrsa, attoña o' hua'ñerres attoch sapa'cho'ña o'ch e'ñe poctacma pueyochresha' perres. Na Pablon sequellquene'ña añ carta, ñeñten nanac torretsa Jesucristocop tarro'mar ñeñtecopña llesenserrenña Yompor, nach ma'yoçhrerraya serrpare'tyene' añ cohuen ñoñets ñeñt̃ huetsa Yompore-sho't alloch po'ñoçh yequeshperra.

² Añ cohuen ñoñetspa' ñeñtara ñoñtsor ñeñt̃ ama't ahua't Yomporpa' e'ñe eñotatuane't ñeñt̃ a'mta'yesaye't po'ñoñ ñeñtcha' atet perrnay te' añeñpo. Ñeñto'marña ñetpa' quellca'yesete't ñeñt̃ atet otanete't Parets.

³ Ñaña añ cohuen ñoñets alloch yequeshperra, ñeñt̃pa' añ serrpare'ten Jesucristo ñeñt̃ Puechemer pen Yompor. Tarraña allempo acheñetos arr patsropa' ñapa' e'ñe David po'mrenño't eñalleta, ñeñtara David ñeñt̃ añcha'tarettatse't ahua't.

⁴ Tarraña Parets Puecamquëño'tpa' nanac ahua'mencattache't añecop ñeñt̃ cohuenetyetsa Partsocop. Ñaña chemerrña allempo Pomporpa' ahuo't tantater po'rromño'tpa' allempoña e'ñe eñotuare'tta ñapa' po'ñoçh Yompor Puechemer ñeñtara Jesucristo ñeñt̃ Yepartseshar yepen.

⁵ Ñaña yame'ñeño't ñeñtara Jesucristo, Pomporña e'ñe puemuereño'teypa' ahuo't apuey llesens, allochñapa' yach ame'ñatyenahueta ama't erraparen allohuen anetso'mar. Attochña e'ñe cosha'yeññañet Yompor Puechemer.

⁶ Ate't ñerra'm sa ñeñtes yeçhetsa Romo, sapa'cho'ña ahuo't sa'hua'ñare'tterra attoch socter Jesucristo.

⁷ Te'pa' e'ñe nehuom'cha'teño'tes sa, napa' o'ch notas: Yomporepa'chña seben-sare'tam'pene' ñeñt̃ nanac Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyoçhro allohuenes.

Atto Pablopa' mueneñ o'ch emo'tenana' romo'marnesha'

⁸ Ñehua, e'ñe ñanompa' añcha' notas, e'ñe neyemteño't Jesucristopa' çhocma neparasyoso'teñ Yompor allohuenacpas, tarro'mar ora allemeñ anetso'marpa' çhocma serrpare'tyenet atto sapa' ahuo' e'ñe cohuen same'ñena.

⁹ Yomporpa' e'ñe eñotenen, napa' çhocma nema'yochena socop. Ñaña añ Yomporpa' ñeñt̃ña nanac nesherven, e'ñe neyoçhrocmañen neserrpare'tateño't po'ñoñ, ñeñt̃ atet perrnay Jesucristo ñeñtara ñeñt̃ Puechemer pen ña.

¹⁰ Napa' çhocma nenamueñ Yompor attoch ama't esempopa' o'ch nabçhensa' ñerra'm ñach muenats.

¹¹ Napa' atarr nemneñ o'ch nabçhensa', o'ch neyçhatensa' attoch Parets Puecamquëño'tpa' allote' sesen huomenctatsa ñocop.

¹² Ñehua, añ noten, e'ñe yame'ñeño't parropa' e'ñe pocte' o'ch yeyçhatanna'ta ñeñt̃ cohuentetsa Yomporecop attoch yeyenpannena e'ñe yame'ñeño't Yompor.

¹³ Ñaña te'pa' o'ch masheñeshacha' ñaña nochaneshacha' notas, ama't ahuañmo'cho'teñ nesechenañ o'ch nabçhensa' tarraña teme'ttsenpa' ama erro't nepeñe. Napa' añecop nesechena ñaña attoch seshopa'cho'ña o'te' name'ñateña' acheñenesha' atet ne'pa'yena po'poñ anetso'mar.

14 Tarro'mar ñeñt poctetsa nocoppa' o'ch neñotach allohuen acheñenesha' añ cohuen ñoñets attoch yequeshperra, ama't griegonesha' ñeñt nanac ayçhatarettetsa amapa' ñaña acheñenesha' ñeñt ama ayçhatareyaye, ama't ñaña acheñenesha' ñeñt nanac es eñotenet amapa' ñaña ñeñt ama es eñotetso.

15 Ñeñto'marña e'ñe nocsheñeshocmañen nemneñ o'ch neserrpare'tatas saña añ cohuen ñoñets alloch yequeshperra ñeñtes yeçhetsa anetso Romo.

E'ñe añ yame'ñeñto ñeñt cohuen ñoñets, ñeñtpa' allochña Yomporpa' a'queshpaterrey

16 Tarro'mar napa' ama apenca'pahuoye' nenteno añ cohuen ñoñets atto Jesucristo rroma yocop alloch yequeshperra, tarro'mar ñerra'm esesha' ame'ñenaya añ cohuen ñoñets, ñeñtpa' ñeñtña Yompor po'huañenc alloch a'queshpaterrey allohueney ñeñtey ame'ñenaya ña, ñeñtey judioneshay e'ñe yanom allotpa' ñaña ñeñt ama judioneshayaye.

17 Ñaña añ ñeñtara cohuen ñoñetspa' eñotateney, e'ñe yeyemteñoña Jesucristopa' Pomporñapa' e'ñech pocte' enteney, allochñapa' allo'nach yesen e'ñe yemtenaya ña. Tarro'mar añpa' ñeñtara anuaret ahuatoteñ e'ñe Yompor po'ñoño allohuenacpay, ñeñt otets atet: Ñeñtey ame'ñenaya Yomporpa' e'ñech pocte' entueney ñaña e'ñe yeyemteñoñ ñapa' yañapa' corretsayach, ama't tayoteñ errponohuañen.

Atto allohuen acheñenesha' atpare'chete't Yompor

18 Tarro'mar yapa' yeñoteñ Yompor ñeñt pue'ntaño'tsen e'ñe po'yoroçhenño'tsa'yena allohuen acheñenesha' ñeñt ama pocteye' es peneto ñocop, ñeñt sosya'tsañach eñotyenet. Ñaña e'ñe atet puepate'teño'tetpa' ñeñtñaña ama muenatenahueto o'ch orrtanet Yompor po'cohuenña ñeñt e'ñe po'ñoçh.

19 Ñehua, ama't sosya'tsañach eñotyenetpa' tarraña ñetpa' e'ñe eñotueñet ñaña atet penaña Yompor, tarro'mar ñapa' ñaña eñotatenahueto e'ñe pueyoçhreto ñeñt atet penaña ña.

20 Ama't yeñoteñ Yomporpa' ama entpahuoyaye tarraña yenteññañ pueyeçhcataro't po'partsoña ñaña allotña yenteññañña po'huomenc atarr. Ama't ahuatoteñ allempo e'ñe errte' yeçhcatene' pats, allotteña yenteññañña po'ñoçh po'partsoteña ñeñtña' erponohuañen. Ñeñto'marña acheñenesha' ñeñt yeçhene' sosya'tsañapa' amate' errotenot oteto amo' eñoteñetoña ñeñt atet penaña Yompor po'partsoteña.

21 Ñaña ama't eñoteñetañ ñeñt atet penaña Yomporpa' tarraña ama mecha'na'teñetoña Parets, ñaña ama coshateñeto ñeñt ora añecop. Attoña o'huañcha' cotape'chenet ñeñt sherbets Partsocop. Ñeñto'marña pueyoçhretopa' o'huañcha' eñoteñet ñeñt cohuentetsa Yomporecop; atet ñerra'm pueyoçhretpa' nanac a'checmetam̄psaret.

22 Ama't otenetañ atarro' es eñotenet, tarraña po'ñoçh ñetpa' ahuo't atta allo'na otatsña'etnenet.

23 O'huañcha' cosheñet ñeñt po'ñoçh Parets ñeñt ama arromña'eshayaye. Añachña e'ñe coshenet ñeñt yeçhcatyenet ñet. Tarraña ñetpa' e'ñe arromña'oto atet es yeçhcatyenet atet ñerra'm acheñma't ñaña otma't, ñaña po'yallopma't ñaña es berrma't. Ñetñapa' ñeñtach e'ñe ma'yochyenet ñeñto'ña e'ñe po'yomporer penet.

Atto acheñenesha' allo'na senet muenatse'tyese' ñeñt nanac sosey enten Yompor

24-25 Attoña o'huañcha' ame'ñeñet ñeñt po'ñoçh Parets, añachña ame'ñenet ñeñt ama po'ñoçhoyaye. O'huañcha' ma'yocheñet ñeñt e'ñe Yompora', añachña ma'yocheññañet ñeñt e'ñe ña pueyeçhcatuar. Ñaña o'huañcha' sherbeñet ñeñt e'ñe Yompora', añachña sherbeññañet ñeñt e'ñe ña pueyeçhcatuar. Tarraña Yomporepa'chña ñapue't aye'choçhtatarettatsa tayoteñ ama't errponohuañen. Ñeñtpa' attetepa'ch. Tarraña atto a'ypo'ñeñet Yomporpa' ñapa'cho'ña e'ñe pa'ypo'ñeñotanet ñañaapa' ahuo't muenatyesanet o'ch allo'na senet muenatse'tyaset ñeñt nanac sosey enten Yompor.

Ñeñt atto muenatse'tyenet atto o'ch agapannenet, ñeñtōtpa' nanaccha' apenco'chen ye'chenet.

²⁶ Ñeñtō'marña Yompor e'ñe pa'ypo'ñeñofanetpa' ahuo't muenatanet o'ch allo'na senet muenatse'tyestset ñeñt nanac apenco'chen enten ña. Attoña ama't coyanesha'pa' o'huañcha' aguënan puerrollar atto ñeñt e'ñe pocte' atet anareteyeñ. Ñagattsetach muenannetset o'ch agapanna'tyenet ñeñt e'ñe parro pacmacmuet. Ama't ñeñt'pa' ama atteye' anareteye.

²⁷ Ñaña ama't yacmapa' attecma'ch penet. O'huañcha' aguënan puetapor atto ñeñt e'ñe pocte' atet anareteyeñ. Añachña atarr muenen o'ch aguënan pacma e'ñe ñagattsa pacmacma, ama't ñeñt'pa' ama atteye' anareteye. Ñeñt atet p'annenet yacma parro yacmacmapa' ñeñt'pa' nanac apenco'chen enteñ Yompor. Ñañeñetach coñchatetset ñeñt atet p'atse'tyenet.

²⁸ Attoña ama't mamesha o'huañcha' mueneñet o'ch yerpa'pesyet Yompor. Ñeñtō'marña Yomporña'pa' pa'ypo'ñeñofanetpa' ahuo't muenatanet o'ch cotape'chatse'tyeset ñeñt ama pocteye' enteno ña. Añachña p'atse'tyenet ñeñt ama a'p'apahuoyaye.

²⁹ Añachña nenet pueyo'chreto ñeñt esocmañen ñeñt ama't mameshapa' ama pocteyaye ñeñtara pa'namen sosya'tsañe'chno. Ñeñt'pa' añe'chno: agapanneñets ñeñt ama puerrollareyaye ñaña ñeñt ama puetapoye'ye, ñaña cotape'chatse'tyeñets ñeñt ama cohuenayaye, ñaña ye'chatse'tyeñets, ñaña ye'moñe'tanneñōtpa' o'ch erro' yepoñ po'psheñeñ, ñaña yeye'chapreteñōtpa' o'ch ye'moñe'ch po'psheñeñ, ñaña muetsanna'teñets, eñoseñe'cheñets, ñaña shecanna'teñets, ñaña atsrre'mo'chen entanna'tueñets, ñaña a'me'am'psare'tanna'teñets,

³⁰ ñaña sasare'tanna'teñets, ama't Yomporpa' ello e'moñe'teñet, ñaña ama't po'psheñeñpa' amach mecha'na'teñeto ama't mamesha, attachña e'ñe ñañeñapa' cohuen entetset, ellopa' ommo'chenetcha'. Añach e'nyenet ñeñt ama cohuenayaye, attōtcha'ña ama ame'ñeñeto ama't pomporet ama't ñaña pachoret.

³¹ Amach chenaneo pueyo'chreto ñeñt cohuentetsa Yomporecop, amach a'p'octateneto po'ñoñ ñeñt atet otenet. Amach es amorrentenaye' enteneto ama't mamesha, amach es a'p'rettenaye' enteneto ama't mamesha, ñaña amach es amuerenaye' enteneto ama't memesha.

³² Ñeñt p'atse'tyetsa atetpa' ama't eñoteñetañ e'ñe Yomporeshōt anaretetua ama't coñcheñets añecop ñeñt p'atse'tyetsa atetpa' tarraña ñetñapa' ñeñtarach atet p'atse'tyesnenet. Ama't pamo'tseshetpa' ñerra'm e'ñe attecma p'ohuenet ñametpa' chemerrña allempopa' ñeñt'ach erronaye' coshapretannenet.

2

Atto ama't judionesha'pa'cho'ña atpare'toñete't Yompor po'ñoñ

¹ Ñeñtō'mar te'pa' o'ch notas allohuenes ñeñtes judioneshas, ñato' sapa' chate' sotenapañ sapa'cho'ña año'te' atteye' sey'cheno sosya'tsañ atet pena po'potantañ. Tarraña amate' erro'teno't soto atet tarro'mar allohueneypa' e'ñe attecma yepena. Ñerra'm cha yoten po'psheñeñpa' ama cohuenayaye, tarraña atetpa' yañeña atet otetsa ama't erra'tseno'teya ñeñtey atet otets.

² Tarraña ama't atetpa' yeñoteñ Yomporpa' chocmach tsa'taterrana allohuen ñeñt atet es p'atse'tyets, erro'tencha' e'ñe pocte' ent ña.

³ Sapa' chate' sotenapañ saptate' atarr morrentensa Yompor, amachña tsa'taterrso sa, ama't sapa'cho'ña attecma se'p'atse'tyeten sosya'tsañ ñeñt atet pena po'potantañ, tarraña sapa' cha sotenanet ñetpa' amo' cohuenayayeto.

⁴ Amapa' sapa' chate' sotenapañ Yompor puemuereñoñ nanacpa' amach tsa'taterrso tarro'mar teme'ttsen ama erroñ penso, atfa cohuenes. Ama't señoiteñe añecopña teme'ttsen muerensa Yompor attoch ellopa' o'ch e'ñe soctape'chuerr cohuen allohuenes.

⁵ Tarraña ñerra'm atfa se'charrtena seyo'chro, amachña soctape'chuerro cohuen, allempochña allo'nach sesen atontatnomue' attoch tsa'tatuerrsa Yompor esempohuañencha' tsa'tatuerrya allohueney erroñencha' e'ñe pocte' entyesuerrey e'ñe puesheña'ttsoy. Allempoña allohuen acheñenesha'pa' o'ch e'ñe eñotueret ñeñtcha' e'ñe atet tsa'tatuerrya e'ñe puesheña'ttsoy, ñeñtpa' e'ñech pocte'.

⁶ Ñaña tsa'tuerryach allohueney ñeñtey corra'yetsa arr patsro erroñente' ye'pa'yena e'ñe ñocop.

⁷ Ñerra'm chocma yoctape'chen e'ñe cohuen Yomporecop, ñaña ñerra'm chocma yocteññañ po'cohuenña, ñaña ñerra'm añ ye'nen attoch ñapa' e'ñech cohuen entuerrey, ñaña attoch aphuerreycha' ñeñt alloch yocrrerra errponohuañen, allempoña po'ño'chpa' aphuerreycha' attoch yapa' corretsayach yocsheñeshocmañen tayoten e'ñe errponañohuen.

⁸ Tarraña ñerra'm yapa' aña cohuen yenten ñeñt yemnen ya, Yomporña po'ñoñña'pa' ñerra'm cha yatpare'teñ, aña yoc ten ñeñt ama cohuenayaye Yomporecoppa' ñaña po'yoro'chenoñ po'ño'chpa' chocmach tsa'tatuerrya.

⁹ A'coñchatare'terrach allohuen ñeñt cotene' ñeñt ama cohuenayaye arr patsro, amue-rochtatare'terretcha' allohuenet ñeñt atet petset, ama't ñanom atet ñerra'm judionesha' allotpa' ñaña ñeñt ama judioneshayaye.

¹⁰ Tarraña allohuen ñeñt cotene' ñeñt cohuentetsa Yomporecop arr patsropa' Yomporña'pa' cohuencha' enterranet, aphuerranetcha' alloch e'ñe cohuentapreteret, aphuerranetcha' ñaña attoch cosha'huerret e'ñe cohuen pueyo'chreto. Atetcha' perran allohuen ñeñt e'ñe cohuen corra'yetsa, ama't ñanom atet ñerra'm judionesha' allotpa' ñaña ñeñt ama judioneshayaye.

¹¹ Tarro'mar Yomporpa' ama ñap'ta judionesha' morrenteno, añña ñaña allohuen acheñenesha'pa' e'ñe morrentueña. Ñaña attecma Yomporpa' ama ñap'ta coñchatenano ñeñt ama judioneshayaye, ñapa' ama't judionesha'pa' e'ñech coñchatuer.

¹² Ama't atet ñerra'm ñeñt ama judioneshayaye ñeñt ama echenaye Moisés po'ñoñ, ñerra'm añ cotenet ñeñt ama cohuenayayepa' elloña ñetpa' chenca'huerretcha', tarraña ñetpa' amach aye'e' a'chencaterrahueto Moisés po'ñoñ. Tarraña judionesha'ña'pa' ama't echeññañetañ Moisés po'ñoñ, tarraña ñerra'm attera, añach cotape'chyenet ñeñt ama cohuenayaye, ñetpa' añachña a'chencaterrahueto ñeñtara Moisés po'ñoñ.

¹³ Tarro'mar Yomporpa' ama pocteye' entenano ñeñt atfa e'muene' orrena po'ñoñ all serrpare'teññañet. Añña pocte' enten Yompor, o'ch atet penet ñeñt e'ñe atet oten po'ñoñ.

¹⁴ Ñehua, o'ch yoctape'ch ñeñt atet pena acheñenesha' ñeñt ama judioneshayaye, añenesha' ñeñt ama echenaye Yompor po'ñoñ. Ñetpa' ama't ama echeneto Yompor po'ñoñpa' erroñenopa' e'ñe pueyo'chreto' poctape'cheño'etpa' ahuo'tcha' atet pa'yenet ñeñt e'ñe cohuentetsa Yomporecop, ñeñt e'ñe atet o' anuaretetua Yompor po'ñoño ñeñt atet poctetsa ñocop. Ama't ama echeneto Yompor po'ñoñ ñeñt atet aquellcare'tpa' tarraña pueyo'chretoña'pa' e'ñe eñoteñet erra'tsent'e' ñeñt cohuentetsa.

¹⁵ Ñeñt atet pa'yene' ñeñt cohuentetsa, yapa' yeñoteñ pueyo'chretoña eñoteñet ñeñt atet cohuentetsa, ñeñtara ñeñt atet oten Yompor po'ñoñ ñeñt o' anaretetua. Ñehua, o'ch yetma'ntacha atet ñerra'mrate' Yompor po'ñoñpa' e'ñech pueyo'chreto aquellcare'ttena. Tarro'mar e'ñe ñet pueyo'chreto'pa' eñotenet ñerra'm esempopa' o'ch pohuerret ñeñt ama cohuenayaye, ñaña eñotenet ñerra'm esempopa' o'ch atet penet ñaña ñeñt e'ñe cohuen.

16 Tarro'mar yeñoteñ esempohuañen Yomporpa' eñotatuerreycha' ñeñt ora allpon ya' nasotena te'. Yompor Puechemerña ñeñt Jesucristo ñach otats attoch tsa'tatya. Ñeñtpa' e'ñe atet ñeñt o' notuas ñeñtara noten allempo neserrpare'ten añ cohuen ñoñets alloch yequeshperra.

Atto judionesha' ama't echenetañ Yompor po'ñoñ patpare'teñoñetpa' nanac ayohuarettenet

17 Te'pa' o'ch alla neserrpare'taterrser ñeñtes judioneshas. Ñehua, sapa' cha soten sapa' judioneshaso' ñaña aña atarr seyemtena ñeñt nonase't Moisés, ñaña atarr sommo'chena tarro'mar sapa' soteneñ e'ño' puechemer penes Yompor.

18 Ñaña soteneñ e'ño' señoñueñ ñeñt atet muenen ña. Ñaña po'ñoñ ñeñt atet anaretpa' ñeñto'ña seychatene' ñeñt atarr cohuentetsa Yomporecop.

19 Ñeñto'marña sapa' soteneñ, po'ñoñ atarro' es señoñen, attoch seychateñ po'potantañ ñeñt ama es eñoteneto. Cha sottena ñerra'm ñeñteso' echa'nene' ñeñt ama entetso, amapa' ñerra'm ñeñteso' choyo'tam'pene' ñeñt chopeñe'chets checmeto.

20 Ñaña sapa' chate' sotenapañ po'ñoñ atarrte' cohuen seychateñ po'potantañ ñeñt ama eñotenaye ñeñt cohuentetsa, ñeñt atet petsa ñerra'mrrate' cheshatollesha' ñeñt ama eñotenana' ñeñt cohuentetsa. Ñaña sapa' soteneñ po'ñoñcho' esocmañeno' señoñuahuen, ora ama't allpon ñeñt po'ñoñhotets, tarro'mar sapa' secheññaño' Yompor po'ñoñ ñeñto'ña esocmañen señoñatene'.

21 Ñehua, te'pa' o'ch notas, sapa' ama't o' atarr seychateñ po'potantañpa' tarraña amaña seychatenoña e'ñe sañeña ñeñt cohuentetsa Yomporecop. Ñaña sapa' ama't o' atarr seserrpare'ten atto ama etanna'tpahuo, tarraña sañapa' chocma setanna'tyena.

22 Ñaña sapa' ama't seserrpareneñ atto amo' achtapretpahuo taporets, tarraña elloña sapa' chocma sapretannena setapor. Ñaña sapa' ama't setsena'teneñ ñeñt ayeçhcataret, tarraña sañapa' ahuo't seyorayesña puerahuot ñeñt atarr coçhnesha' ñeñt allo arca'tam'penet ñeñt po'yoser penet. Ñeñt atet etetspa' ñeñtpa'cho'ña attecma enteñ Yompor ama a'papahuoyaye atet.

23 Ñaña sapa' nanac sommo'chena tarro'mar sapa' secheññaño' Yompor po'ñoñ ñeñt atet anaret ama't ahuatoteñ. Tarraña ama't atteñpa' amaña atteye'ña sepeno ñeñt atet oteneñ añ ñoñets ñeñtcha' atet sepa. Yomporña' cha sottatateñ ñerra'mrrate' ñapa' ama es eñotpeno ama't mamesha.

24 Ama't atet oten Yompor po'ñoñ ñeñt atet anuaret ahuatoteñ, ñeñtpa' atet oten: "Ama't ñeñt ama judioneshayayepa' achm'are'teñet Yompor e'ñe sesharmoro't, e'ñe sepatse'tyeño't ñeñt ama't mameshapa' ama pocteye' enteneto ama't ñame'ttseta."

Atto ñeñt po'ñoñ puechemer pen Yompor

25 Po'ñoñña ñerra'm añ semnen o'ch setsoteññañ Moisés po'ñoñ ñeñt atet anuaretpa' añ poctetsañ o'ch setsorrannena, tarro'mar ñeñtpa' sherbeneñ. Tarraña ñerra'm elloña satpare'teññañ po'poñ Moisés po'ñoñ ñeñt atet oteneñ ñeñtcha' atet ye'papa' ama't atto o' sa'tsorrare'tetuapa' ñeñtpa' e'ñe orrena, attecma ñerra'm ama atsorrare'teyayye.

26 Ñeñto'marña yeñoteñ ñaña, ama't ñeñt ama atsorrare'teyayepa' ñerra'm añ atet penet ñeñt atet oteneñ Yompor po'ñoñotpa' ama't ama atsorrare'teyayye, Yomporña' atetcha' enteneñ ñerra'm e'ñe puechemer peney po'ñoñ. Attecma'ch enteneñ ñerra'mrrate' ñeñt atsorrare't, tarraña e'ñech puechemer perrey po'ñoñ.

27 Ñeñto'marña yeñoteñ ama't ñeñt atta corretsa atet eñalleta, ama atsorrare'teyaye, ñerra'm añ atet penet po'ñoñ ñeñt atet oteneñ Yompor po'ñoñotpa' ñetña' pen-caterrsetcha', tarro'mar ñetpa' ello metanennaset ñeñt allpon cohuen o' se'pohua Yomporecop. Tarro'mar sapa' satpare'teññañ po'ñoñ ñeñt atet anaret. Metanenset

sa, ama't sapa' secheññañeñ Yompor po'ñoñ ahuatoteñ, ñaña ama't sapa' e'ñe atsorru-areteseñ.

28-29 Ñeñt e'ñe po'ñoçh puechemer pen Yomporpa' ama ñap̄tayaye ñeñt eñalletetsa judionesheshot. Añña po'ñoçh e'ñe puechemer pen ñeñt e'ñech cohuen cotape'chenet pueyoçhreto ñocop. Ñaña tsorranneñets e'ñe at̄ta yechtsopa' ama esoyaye Yomporecop. Añña sherbets Yomporecop at̄to cohuen es yoctape'chen e'ñe yeyoçhroç. Ñaña ñeñt̄pa' huena e'ñe Parets Puecamquëñoç, ama añoçeye' hueno o'ch e'ñe yeḡa'yesua ñeñt aque-llca'yesaret esheccha'ña puechemer perrey Yompor. Ñerra'm at̄et̄cha' yoctape'cherr co- huen yeyoçhro Yomporecoppa' at̄toçña Yomporpa' e'ñech poçte' entuerrey, ama'tcha' acheñenesha'pa' ama poçteye' entenyeto.

3

1 Te'ña sapa' çhate' sotenapañ judionesha'pa' amate' atarr sherbeno amapa' çhate' sotenapañ ñeñt̄ at̄to tsorranenetpa' amate' es sherbeno. Tarraña ñeñt̄pa' ama at̄teyaye. Po'ñoçhca'ye atarr sherḡa'yen judionesha'.

2 Ñehua, o'ch yot ñanom ñeñt̄ at̄to sherbenet. Ñet̄ña aparetet Yompor po'ñoñ ñanom at̄to ñet̄cha' a'potenet ñeñt̄ara ñoñets.

3-4 Tarraña ama allohuenacmaye' ame'ñeneto ñeñt̄ at̄et̄ oteneY Yompor po'ñoñoç. Tarraña ama't at̄et̄ ḡohuanenetpa' amate' errotenoç a'psateretoña Yompor ñeñt̄ at̄et̄ oteneY po'ñoñoç, ama't mamesha. Ñapa' çhocmach a'poc̄tatuonay po'ñoñ ñeñt̄ at̄et̄ o' otueneY. Ama't allohuen erra'tsen acheñerpa' ama'tcha' ama a'poc̄tatueneto ñeñt̄ at̄et̄ eñorenepa' tarraña señoçhepa'ch, Yompora e'ñe ñap̄ta, ama puenesho po'ñoñ. Ama't at̄et̄ oteneY Yompor po'ñoñ ñeñt̄ at̄et̄ aquellca'huaret̄ ahuatoteñ, ñeñt̄pa' all at̄et̄ oteneY: Allohuen acheñenesha'pa' eñotetepa'ña at̄to Yomporpa' ama puenesho po'ñoñ, ñaña ñerra'm esesha' at̄ta otatse'tyets at̄to Yomporpa' año' poçteye' es peno, tarraña eñochetepa'ña Yomporña e'ñe poçte' es pets.

5 Ñeñto'mar napa' o'ch notas, e'ñe ya yepeñoç ñeñt̄ ama cohuenayaye, at̄toña yor-rtateññañ Yompor ñapa' ñaña e'ñe cohuenare' es ḡa'yets. Ñehua, ñerra'm yo'chñaroç at̄et̄ yeyenpapreteñ Yompor orrtate' po'cohuenña' sañapa' çhate' sotenapañ, Yomporpa' amate' poçteyayeña o'ch tsa'taterrya yo'chñaro'mar. Ñehua, añpa' at̄ta notenes at̄et̄ tarro'mar ñeñt̄pa' at̄et̄ eñosatse'tyen acheñenesha'.

6 Po'ñoçh yeñoteñ e'ñe poçte' at̄et̄cha' tsa'taterrya Yompor. Tarro'mar ñerra'm ama poçteyaye ñeñt̄ at̄et̄ pena Yomporpa' ñeñt̄epña' amate'çho' erroteno eñoteñe ñaña at̄et̄cha' entyesuerrey allohueney esempohuañen.

7 Ñaña yaña ñerra'm esempo yeñosatse'tyen es ñeñt̄ ama at̄teyayepa' at̄toña yor-rtateññañ Yompor ñapa' ñaña e'ñe po'ñoçhare' ñeñt̄ at̄et̄ es otyen. Ama't e'ñe yeñosatse'teñoçpa' nanaccha' yecohuentateññañ Yompor. Ñehua, ñato' sapa' çhate' at̄et̄ soten, ñerra'm at̄et̄ yeyenpapreteñ orrtate' Yompor po'cohuenña, amate' poçteyayeña o'ch at̄tera enteneY Yompor ñerra'm ñeñt̄ey atarr sosey es ḡa'yets.

8 Sapa' aña sotatse'tyen, ama'tpa' aḡapo'ch ñeñt̄ ama cohuentetsoña allochñapa' e'ñe at̄toçpa' o'ch yorrtaten ñeñt̄ cohuentetsa. Puesheña'tets acheñ e'ñe pueyl- latatse'teñme'chatset neñoñpa' otyenet, ñeñt̄ñaçho' atarr otenña Pablo. Tarraña Yomporcha'ña tsa'taterrahuet ñeñt̄ at̄et̄ otatse'tyenet. Ñaña ñeñt̄pa' e'ñe poçte' atsa'tatere'tterre'tepa'chña.

At̄to allohueney ñeñt̄ey acheñey çhocma ochñat̄ecmay

9 Ñehua, sapa' çhate' sotenapañ yapa' po'ñoçhte' Yomporpa' enteneY ñeñt̄ey judione- shay e'ñe cohuenare' es yeḡa'yen. Ñaña çhate' sotenapañ po'potantañ ñeñt̄ ama

judioneshayayepa' ñetñapa' amo' atteye' entenaneto Yompor. Tarraña ama't mameshapa' ama atteyaye. Tarro'mar napa' o' neñotatuanmas atto ama't allohueney ñeñtey acheñey chocma ochñaecmay ama't ñeñtey judioneshay. Ama't ñaña ñeñt ama judioneshayayepa' e'ñe attecmay ochñaecmay.

¹⁰ Ama't Yompor po'ñoñ ñeñt atet aquellca'huareť ahuatoteña' e'ñe attecma oteneý, ñeñtpa' atet oten:

Ama't puesheñarroteyapa' ama eñallyeña ñeñtey e'ñe pocte' pene' ñeñt poctetsa Yomporecop.

¹¹ Ñaña ama't puesheñarroteya ama chennayo yeyochro attoch yeñotoñ Yompor po'cohuenña. Amachña aye' ye'нено ñeñt atet muenen Yompor, ama't puesheñarroteya.

¹² Ama't allohueney ahuo't yesa'neñ Yompor, ama't mamesha o'huañ yesherba' ñocop, ama't allohueney. Ama't puesheñarroteya ama eñallyeña ñeñtey e'ñe cohuen es pets Yomporecop.

¹³ Atto e'ñe ya yeñosatse'teñoť sosya'tsañechno yeñyañña' cha ottena ñerra'mrrate' apampaña ñeñt atorañpsareť. Atto yeñen yenamotpa' nanaccha' yeshcannena. Atto yeshquēñ yamo'ts yenamotpa' chach yottena ñerra'mrrate' shecheř amt-sañeř atserr yepene' puenamoť.

¹⁴ Ñaña ñetpa' añach eñotenet parrnomarña, ñaña chach chemama'tannenet.

¹⁵ Ñaña pa'tsrre'mueñoťetpa' machayotach muetseñet acheñ.

¹⁶ Pottatse'teñoťetpa' chach nanac muerochtatyeñet acheñenesha', nanaccha' lle-catyēñet.

¹⁷ Ama't ahuatoteña' ama aye' ye'cheneto attoch e'ñe muetsoññoťpa' cohuen yem-tannenet.

¹⁸ Ñaña ama't mameshapa' amach añcha'na'tpahuoye' enteñeto Yompor. Arrpa' allo-hua ñeñt notenes e'ñe Yompor po'ñoñoť ñeñt atet aquellca'huareť ahuatoteñ.

¹⁹ Ñaña yapa' yeñoteñ ñeñt atet otyen Yompor po'ñoñ ñeñt aquellca'huareť ahuatoteña' añecopña oten ñeñt echene' po'ñoñ, amaña añecpayaye ñeñt ama echaye'te po'ñoñ allempo. (Atet ñerra'm judionesha'pa' ama't ahuatoteñ echeññañet Yompor po'ñoñ, ñeñtara ñoñets ñeñt o' notuanmas ñorra' arr.) Ñeñto'marña ama't puesheñarroteya sa ama't ñeñtes judioneshaspa' amate' errotenoť soto, sapa' e'ño' cohuen entenes Yompor. Attoña yeñoteñ ama't allohueney ñeñtey corretsa añe patsropa' ama pocteye' entenye Yompor ñeñt atet yeřa'yena.

²⁰ Tarro'mar yeñoteñ e'ñe yetsotateñoťa añ ñoñets ñeñt atet anareť ahuatoteña' amach errotenoť ama't puesheñarroteya e'ñe ya'poctatoña yañeña attoch e'ñe pocte' enteney Yompor. Añecpaña sherbeneý añ ñoñets ñeñt atet anareť, ñeñtcha' yeñotatene' po'ñoch yapa' nanac ochñať enteney Yompor.

Atto Yomporpa' e'ñech pocte' entueneý, e'ñe yeyemteñoťa Jesucristo

²¹ Tarraña te'ña Yomporpa' o' eñotateý atto ellonetpa' eñall po'poñ attoch pocte' entueneý Yompor, ñeñtpa' ama ayeýe o'ch yetsotatuē ora ñoñets ñeñt atet anareť ahuatoteñ. Tarraña Yompor po'ñoñ ñeñt anuareť ama't ahuatoteña' ñeñtarecpa eñe añecop.

²² Attochña Yomporpa' e'ñech pocte' entenanet ama't allohuen erra'tsencha' yemte-naya Puechemer ñeñtara Jesucristo. Ama't allohueney attecmaç e'ñe pocte' entueneý, e'ñe yeyemteñoťa Jesucristo.

²³ Tarro'mar allohueney attecmaç e'ñe yo'chña'tuen. Ama yetsoteññañe Yompor po'cohuenña ñeñt e'ñe atet muenen ña.

24 Ñeñt attoch e'ñe pocte' enteney Yomporpa' ñeñtpa' atet: E'ñe puemuereñoŕey ahuo't apuey Puechemer ñeñt Cristo Jesús atto ñachña e'ñe yetsa'tuoya allohuen yo'chñar. Ñeñtpa' e'ñe atta apuey Yompor, ama eso yetsa'teño ama't coñe'ta.

25 Ñaña Yomporpa' ahuo't orrtatan Puechemer Cristo ñeñtcha' rromosets añe pat-sro, o'ch ashataretta po'rras e'ñe yocop. Allochñapa' e'ñech e'shohuaretterra yo'chñar ñerra'm yeyemterach ña. Ñaña ahuo't atet pa Yompor attoch yeñoŕch, ñapa' e'ñe pocte' atet pe't ahuaŕ, tarro'mar acheñenesha' ñeñt corratse't ahuaŕpa' Yomporpa' atta ahuan-tenanet po'chñar, ama ahuenaye' atsa'tatareŕtuerreto po'chñaret. (Tarro'mar ñapa' e'ñe eñoteñ, Cristochña tsa'tuerrahuet po'chñaret ñamet ñeñt allpon ame'ñaye't ña ahuaŕ.)

26 Ñaña ahuo't atet pa Yompor allochñapa' attoch yeñoŕch ñapa' e'ñe pocte' atet pena; teme'ttsen attochña e'ñech pocte' enteney e'ñe yeyemteñoŕ Jesús.

Atto e'ñe yeŕpa'yeñoŕa yañeña ñeñt cohuen yenten ya, Yomporñapa' amach cohuenaye' entenye

27 Ñehua, atto e'ñe yeyemteñoŕa Cristo Yomporñapa' e'ñech pocte' enteney, ñeñto'marña o'huañcha' eñalleta ñeñt allo yommo'chena e'ñe yañeña, ñeñt e'ñe yetsotateñoŕ. Tarro'mar e'ñe yeŕpa'yeñoŕa yañeña ñeñt e'ñe cohuen yenten ya, Yomporñapa' amach pocteye' entenye.

28 Ñeñto'marña te'pa' e'ñe po'ñoŕch yeñoteñ e'ñe yeyemteñoŕa Cristopa' e'ñech pocte' enteney Yompor ama't ama yetsoteno ñoñets ñeñt atet anareŕ ahuaŕoteñ.

29 Ñehua, o'ch noterrser masheñnesha judioneshacha', ñato' sapa' çhate' sotenapañ Yomporpa' saptate' Seyomporer sepeñ ñeñtes judioneshas, amate'ña añecpa'nayaye ñeñt ama judioneshayaye. Tarraña napa' o'ch notas, ama't ñeñt ama judioneshayayepa' ñetpa'çho'ña Po'yomporer peñet.

30 Tarro'mar e'ñe patrra Yompor. Ñaña ama't erra'tsena judionesha' ñeñtcha' ame'ñerraya Cristopa' Yomporñapa' e'ñech pocte' entenanet. Ñaña attecma ama't erra'tsena ñeñt ama judioneshayaye ñeñtcha' yemterraya Cristo, ñetpa'çho'ña e'ñech pocte' entenanet Yompor.

31 Ñato' sa te'pa' çhate' sotenapañ yeyemteñoŕ Cristo, te'pa' Yompor po'ñoñ ñeñt atet anareŕ ahuaŕoteñpa' o'ch yehuapore'ch, o'huañcha' sherba'y. Tarraña o'ch notas, elloña attoña e'ñe yeñoten, ñeñto'marña Yompor po'ñoñpa' atarr sherbeney.

4

Atto Yompor ahuaŕpa' e'ñe pocte' entane't Abraham

1-2 Ñehua, te'pa' o'ch neyerpatasa ñeñt atet pe't ahuaŕ yatañ Abraham. Ñapa' ama añoŕeye' pocte' eñche'teña Yompor e'ñe ñañeña puetsotateñoŕ ñeñt cohuen ente't ña. Ñeñto'mar yatañ Abrahampa' ama eñalle ama't mamesha attoch ommo'chena ama't Yomporesho.

3 Tarro'mar yeñoteñ ñeñt atet oten Yompor po'ñoñ ñeñt aquellca'huareŕ ahuaŕoteñ. Ñeñtpa' atet oten: "Abrahampa' e'ñe atta yemtane't ñeñt atet oche't Yompor, ñeñto'mar allempoteñña Yomporpa' e'ñe pocte' eñche't e'ñe atta."

4-5 Ñeñto'marña yeñoteñ yapa'çho'ña ama añoŕeye' e'ñe pocte' entenye Yompor e'ñe yetorreñoŕ ñeñt cohuen yenten yañeña. Añoŕcha'ña e'ñech pocte' enteney Yompor e'ñe atta, ñerra'm esempo yapa' o'ch e'ñe yeyemtera ñeñt atet oteney; allochñapa' attoch e'ñech pocte' entueneŕ ya ñeñteŕ ochñateŕ. Tarro'mar e'ñe pocte' enteney e'ñe atta, ama es yetorreñoŕeye' ñeñt cohuen yenten yañeña. Ñehua, ñato' o'ch yetma'ntacha atet. Ñerra'm esempo yetaruasen yepatronaresho, ñerra'm allempoch tsa'tyey yetaru-asoŕpa' ama yoteno e'ñe atta apuenyet quelle, yetaruasotña tsa'tenyet. Tarraña attoch

pocte' enterrey Yomporpa' ama atteyaye. Ñapa' e'ñe atta pocte' enteney, ama e'ñe ya yetorreñoŕeye' ñeñt' cohuen yenten ya attoch pocte' enteney Yompor.

⁶ Ñaña ama't yatañ Davidpa' ñeñtecpaña eñose't ahuat. Ñapa' atet ote't nanac cosheñtso'tseney ñeñtey e'ñe pocte' enteney Yompor e'ñe atta, ñeñtpa' ama añoŕeyaye o'ch es cohuen yeŕa'yes e'ñe yañeña.

⁷ Ñeñtpa' atet ote't David:

Nanac cosheñtso'tseney ñeñtey o' aŕretna'huare'tterra yo'chñar, ñeñtey amach allo'na yerpuernnaye'te Yompor yo'chñar.

⁸ Ñaña nanac cosheñtso'tseney ñeñtey Yomporpa' amach allo'na otteñe'chnenye yo'chñar'o'mar. Arrpa' allohua ñeñt' atet ot ahuat yatañ David.

⁹ Ñaña añ cosheñetspa' yeñoteñ ama ñap'tecpayaya ñeñt' judioneshacop ñeñtara ñeñt' atsorraretnesha'. Añecpa'ñaña ñeñt' ama judioneshayaye ñeñt' ama atsorrareteyayeto. Ñehua, ñeñtpa' attoña yeñoteñ. O' notuanmas atto Abrahampa' e'ñe atta yemtane't ñeñt' atet oche't Yompor, ñeñto'marña Yomporpa' e'ñe pocte' eñche't e'ñe atta.

¹⁰ Ñehua, te'pa' o'ch yoctape'ch allempo Yomporpa' e'ñe pocte' entane't Abrahampa' allempo Abrahampa' ama atsorrare'ttena', tarro'mar allempopa' ama orrtena' atteñats.

¹¹ Tarraña elloñapa' ahuo't tsorratena Abraham; ñeñtpa' ñeñt'cha' eñotaterrahuet po'ñoçh Yomporpa' o' pocte' entenan Abraham e'ñe pueyemteñoŕa, ama't allempo ama atsorrare'ttena'. Ñeñto'marña atet ŕa ahuat attoch pompor ŕohueret ama't ñaña allohuenet ñeñt' ama atsorrareteyaye; tarraña ama't ama atsorrareteyayeto, e'ñe pueyemteñoŕeta Yomporpa' e'ñech pocte' entenanet e'ñe atta.

¹² Ñaña ñeñto'mar atet ŕa attoch pompor ŕohuer allohuen ñeñt' atsorrare't, tarraña añach ñapue't pompor perre' ñeñt' po'ñoçh yemtenaya Yompor. Tarro'mar ama añecpaye' pompor peñeto atto atsorrare'ttenet, añecopña pompor peñet e'ñe pueyemteñoŕeta Yompor ñeñt' e'ñe atet pete't pompor et Abraham, ama't allempo ama atsorrare'ttena'.

¹³ Yapa' yeñoteñ ahuat Yomporpa' ahuo't otan Abraham o'ch apuer erracmañen pats allohuen puechemereshohuen esempohuañen. Ñaña atet otan Yompor Abrahampa' ama puetsotateñoŕeye' añ ñoñets ñeñt' atet anare't ocheña Yompor. Añña e'ñe pueyemteñoŕa Yompor atet och, tarro'mar Yomporpa' e'ñe pocte' eñch.

¹⁴ Ñerra'm po'ñoçh yetotateñoŕa añ ñoñets ñeñt' atet anare't aphuerryeñ añ patspa' yapa' e'ñete' orrena yeyemteñañ Yompor; tarro'mar ñerra'm atteñpa' Yomporpa' amate' a'pocatanñeña po'ñoñ ñeñt' atet otan ahuat Abraham.

¹⁵ Ñaña ñerra'm añ yoc'ten añ ñoñets ñeñt' atet anare'tpa' nanaccha' a'coñchatare'tey ñerra'm ama yetotueno ora allpon ñoñets. Ñaña ñerra'm ama eñallñe añ ñoñets ñeñt' atet anare'tpa' amate' erro'teno't coñchatyeto tarro'mar amate' eñallñe ñoñets ñeñt'cha' ya'pote' ñeñt' ochñartsotets.

Attoch a'naterrya Yomporpa' ñeñtpa' e'ñech yeyemteñoŕa ña

¹⁶ Ñeñto'marña yeñoteñ attoch a'naterrya Yompor ñeñt' atet otahuapa' ñeñt' po'ñoçhpa' e'ñech yeyemteñoŕa ña attochña e'ñe puemuereñoŕey e'ñech a'naterrya allohueney. Amach ñap'tayaya judionesha' ñeñt' cotene' añ ñoñtsor ñeñt' atet anare't, añecpa'ñaña allohueney ñeñtey'cha' yemterraya Yompor e'ñe attecptar atet pe't ahuat yatañ Abraham. Tarro'mar ñapa' po'ñoçh yatañ yepeñ allohueney.

¹⁷ Ama't Yompor po'ñoño ñeñt' atet anuare't ahuatoteñpa' all orrtena ñeñt' atet Yomporpa' otan ahuat Abraham, ñeñtpa' atet oche't: "Shonte' pa'namen acheñpa' ñetñapa' pomporcha' ŕohuerrpet. Añpa' e'ñe na atet o' neŕonaŕ." Ñeñto'mar yeñoteñ Abraham e'ñe pueyemteñoŕ Yomporpa' atet eñche't Yompor ñapa' pomporcha' per shonte' pa'namen acheñ. Ñeñt'ñapa' ñeñtara Yompor ñeñt' nanac ahua'mencat ñeñt'

eñotene' o'ch tantaterran ama't ñeññ rromuets, ñaña ñeññ eñotene' e'ñe po'ñoñoŋpa' o'ch orrtatan ama't ñeññ ama eñalle te'.

¹⁸⁻¹⁹ Allempo Yomporpa' atet otan Abraham "peshoŋpa' merenach shonte' pa'namen acheñ ñeññcha' pomporterraya" allempo Abrahampa' o' nanac po'nme'ten—čharroch čarra' charŋe' echen. Tarraña Abrahampa' ama't eñotena o' nanac po'nme'ten, o' meten allempo attoch chemere'ten, ñaña puetapor Sarapa'cho'ña o' nanac po'nme'ten, amate' errotenoŋ cheyore'terro, tarraña Abrahampa' ama quečhpuenano atto yemtenana ñeññ atet otue Yompor. E'ñe pueyemteñoŋ Yomporpa' allo'na sen cohueñe' Yompor o'ch aŋ ama't paŋrra puechemer.

²⁰ Ama echarrteno pueyočhro ama't mamesha añecop ñeññ atet o' otue Yompor. Allo'na sen yemuetnomaya Yompor ñeññ nanac ahuañencat pene'. E'ñe pueyemteñoŋan Yompor, ñapa' čhocmach otaŋpa'styesanete't Yomporpa' ñaŋpa' atarr ahuañencat.

²¹ Tarro'mar eñoche't e'ñe Yompor po'huamencoŋ, po'ñočhpa' o'ch aŋ ama't paŋrra puechemer ñeññ atet o' otue.

²² Ñeñño'marña Abraham e'ñe pueyemteñoŋan Yompor Yomporña' e'ñe pocte' eñche't.

²³ Tarraña añ ñoñetspa' ama ñaŋpŋecpayaye Abrahamacop anarete.

²⁴⁻²⁵ Yocpa'ñaña anarete't allohueney ñeññey yemtenaya Yompor, atto ñapa' a'rroyonay Puechemer ñeññ Jesús ñeññcha' rromats e'ñe ya yo'chñarecop, ñeññara Jesús ñeññ Yepartseshar yepen, ñaña atto Yomporpa' tantaterran Puechemer po'rromñoŋ, attoch yeñoŋ yo'chñarpa' o' e'ñe atsa'taretetua. Ñeñño'marña te'pa' e'ñe yeyemteñoŋ Yompor ñeññ atto a'poctatonay, yapa'cho'ña e'ñech pocte' enteney yaña.

5

Atto e'ñe yeyemteñoŋ Yompor, e'ñech pocte' enteney, atarrcha' cosheñtso'tseney

¹ Ñeñño'marña te'pa' yeñoteñ e'ñe yeyemteñoŋa Jesucristo, Yomporña' e'ñe pocte' enteney, o'huañcha' yoročheno'tseney Yomporeshoŋ, tarro'mar Yepartseshar Jesucristopa' ahuo't a'poctatuerrnay yo'chñar Yomporesho.

² E'ñe attoña Cristopa' čhapterrey Yompor pueñuereño attoch čhocma ben-sare'tamŋpeney; ñeññpa' e'ñe yeyemteñoŋ Cristo. Ñaña yapa' e'ñech yocsheñesha' yecueñ esempohuañencha' e'ñe poctacma yecohuentapretera Yompor.

³ Ñaña ama't yemueročhteñoŋ o'ch yocshena tarro'mar yeñoteñ e'ñe yemueročhteñoŋpa' allempoña yoctape'chen attoch ahuañencat pa'y Yompor attochña ya'huanten allohuen ñeññ echarr yentyen.

⁴ Ñaña attoña ya'huanten allohuen ñeññ echarr yentyenpa' yapa' yeñoteñ Yomporña' e'ñech cohuen entuerrey. Ñaña ñerra'm yeñoteñ Yomporpa' e'ñe cohuen enterrey, yapa' e'ñe yeyemteñoŋ o'ch yecuer ñeññ o'patatenya Yompor.

⁵ Ñaña e'ñe yecueñoŋ ñeññ o'patatenya Yompor ñapa' čhocmach a'poctatenan po'ñoñ ñeññ atet oten yocop. Yapa' ama't esempapa' amach es ye'naterraye'te po'poñ, tarro'mar Yomporpa' ahuo't apuey Puecamquēñ ñeññcha' yečhetsa yeyočhro ñeññcha'ña yeñotatene' atto Yomporpa' nanac morrentenya.

⁶ Yapa' yeñoteñ nanac morrentenya Yompor tarro'mar ahuaŋpa' ama es yoctape'chpeno ama't mamesha Yomporecop attoch yequeshperrañ. Tarraña Yomporña' e'ñe allempocmapa' ahuo't mueñan Puechemer Cristo añe patsro ñeññcha' rromosets e'ñe yocop ñeññey ama es coŋape'chetso cohuen ama't mamesha Yomporecop.

⁷ Ñehua, yapa' arromñaŋeypa' yeñoteñ atarr torrapo' attoch yerroma po'psheññecop, ama't añ acheñrecop ñeññ atarr cohuen. Tarraña errotenopa' ama tama torrapahuoye' yenteno o'ch yerroma añ acheñrecop ñeññ atarr amueraña.

⁸ Tarraña yapa' ama't allempo ora yeḡatse'tyen sosya'tsañpa' e'ñe allempocmaña Cristopa' ahuo't rroma yocop. Attoña Yomporpa' eñotaterrey yapa' nanac morrentenya.

⁹ Ñeñto'marña te'pa' e'ñe pocte' enteney Yompor tarro'mar Cristopa' ahuo't rroma yocop. Elloña attotña a'qeshḡatey allochñapa' amach a'coñchatareḡeye ama't erponaña.

¹⁰ Ama't allempo ora ye'moñe'teñ Yomporpa' Puechemerña po'rromñoḡpa' ahuo't e'ñe yamo'tstannerra epay Pompor. Elloña te'pa' atto correna Cristopa' attoña yapa'cho'ña a'qeshḡaterreycha'.

¹¹ Elloña te'pa' e'ñe yocsheña Yompor tarro'mar Puechemer ñeñtara Yepartseshar Jesucristopa' ahuo't amo'tstaterrya e'ñe ña Pompor.

Atto yamo'mte' Adánpa' ñapa' cha a'chencatey; Yamo'mte'ña Cristopa' ñaña ya'qeshḡaterre'

¹² Ahuat puesheñarr yacma ñeñt pa'so'cheñ Adánpa' ahuo't orrtatan atpare'teñets añe patsro Yomporcop. Ñeñto'marña allempoteñ allohueney ñeñtey acheñeypa' e'ñe attecma yeḡohua. Ñaña allempopa' ahuo't anareḡta attoch yo'chñaroḡpa' o'ch yerroma. Ñeñto'marña allohueney ñeñtey acheñeypa' o'patuaya rromueñets tarro'mar allohueneypa' ñeñta yeñot ñeñt atet ḡa ñanom yamo'mte' Adán.

¹³ Ñaña allempoteñ corre't Adán, acheñenesha' arr patsropa' ñeñta eñotet ñeñt atet atpare'tan Adán Yompor. Tarraña allempopa' ama eñalletena' ñoñets ñeñt atet anareḡt alloch a'coñchatareḡterret.

¹⁴ Tarraña attera o'patenanet rromueñets e'ñe allempoteñ corre't Adán ñeñta attera ñaña tarrempohua allempo corre't ñaña Moisés ñeñt nahuet ñoñets. Ama't ama atpare'teññañeto Yompor po'ñoñ e'ñe atet atpare'te't Adán, tarraña attera o'patenanet rromueñets. (Ñeñto'mar yeñoteñ Adán po'chñaroḡpa' ahuo't anareḡta attoch o'patuaya allohueney rromueñets.) Ñeñtña yamo'mte' Adánpa' aña o'patatuaya ñeñt ama cohuenayaye, tarraña Yamo'mte'ña Cristopa' allempo huapapa' ñapa' añña o'patatosya ñeñt e'ñe cohuenare'.

¹⁵ Tarro'mar e'ñe paḡparñesharmorō Adánpa' ama atteyaye ñerra'm ñeñt atet atarr muerenya Cristo. Tarro'mar e'ñe puesheñarra po'chñaroḡ o'patya rromueñets allohueney pa'namen acheñey. Tarraña elloñapa' eñall po'psheñeñ, ñeñtara Jesucristo ñeñt yemuererraya. Attoña Yomporpa' orrtatonay puemuereña yocop alloña nanac cohuen es apatuene y e'ñe atta allohueney pa'namen ñeñtey acheñey.

¹⁶ Ñaña ñeñt atet muererrya Yompor, ñeñtḡpa' ama atteyaye ñerra'm ñeñt atet o'patuaya ochñarets ama't e'ñe puesheñarroḡta. Tarro'mar ñeñt atet ḡa Adán ama't parrochapa' ñeñtaña yo'patatuenaya coñcheñets. Tarraña ñeñt atet a'qeshḡaterrey Yomporpa' ñeñtḡpa' atet ḡa. Ama't shonteñ yo'chñarpa' ñañapa' e'ñech pocte' enteney e'ñe atta tarro'mar ñeñtḡpa' o' a'pocatuonay Cristo.

¹⁷ Ñaña atto e'ñe puesheñarroḡta po'chñaroḡ o'patenya rromueñets, tarraña elloña nanac muererrya Yompor attotña a'rroyerrnay Puechemer ñeñtara Jesucristo ñeñt o' a'pocatuerrnay yo'chñar Yomporesho attochña yapa' corretsayach.

¹⁸ Ñeñto'marña yeñoteñ atto e'ñe puesheñarroḡta po'chñaroḡ ahuo't o'patatyet coñcheñets, attecma ñaña puesheñarr ñeñt Jesucristopa' ahuo't ḡohua ñeñt e'ñe cohuen, alloña a'pocaterrey, attochña yapa' corretsayach yocsheñeshocmañen tayoteñ errponohuañen.

¹⁹ Atto e'ñe puesheñarra ñeñt Adán ñeñt atpare'tene' Yompor, ñeñto'marña ñesharmorō Yomporña' e'ñe ochñaḡoche' entuene y ama't shonte' pa'namena'tsocmay ñeñtey acheñey. Tarraña puesheñarr ñeñt Cristo ñeñt e'ñe cohuen

ameñenaya Yompor, ñeññapa' alloch eñe pocte' enteney Yompor, ama't shontey pa'namena'ttsocmay ñeñfey acheñey.

²⁰ Ñaña allempo chap allempoch anaretta ñoñets ñeññcha' eñotaterrahuet ñeññcha' atet pet ñaña ñeññcha' ama atet aþapahuo elloña allempopa' ñetpa' o' eñoterret atarr atparñafterret. Tarraña ama't atto nanac yatpare'tena elloña Yomporpa' nanac muererrya.

²¹ Attoña eñe yeþatse'tyeñoñ ñeññ ama cohuenayayepa' ahuo't anaretta rromueñets ñeññcha' yo'patenaya ñeññapa' coñcheñets. Tarraña elloña Jesucristo ñeññ Yepartseshar yepen ahuo't orrtatonay atto Yomporpa' nanac muererrya attoña a'pocatuerrnay yo'chñar. Attochña yapa' corretsayach yocsheñeshocmañen fayoteñ errponohuañen.

6

Atto ñeññ toma'ntena allempo yapataretta Cristocop

¹ Te'pa' eñe yeñoteñ ama't atet yeþatse'tyese't ñeññ ama cohuenayaye, Yomporpa' elloña nanac muererrya, atto peretna'huerrnay yo'chñar. Tarraña ama't atteñpa' amach yotaþsa'tatsto "ñeññepñapa' o'ch allo'na yeþatse'tyesnena ñeññ sosya'tsañ tarro'mar Yomporpa' nanquëpa't muerenana ñeññ þatse'tyene' ñeññ ama cohuenayaye ñaña ellopa' o'chcho' alla muererrya."

² Tarraña amach errotenoñ allo'na yeseno þatse'tyesnomue' ñeññ ama cohuenayaye tarro'mar o' ya'ypo'ñerr yo'chñar allempoteñ o' yaguër Cristo.

³ Ama't señoñeña ñeññ toma'ntena allempo yapataretta Cristocop. Añ toma'ntena atto o' yeparrocmaterr epay Cristo, atet ñerra'mrrate' cho yerromapreteña Cristo allohueney ñeñfey apatarettetsa eñe yame'ñeñoñ Cristo Jesús.

⁴ Allempo yapatarettapa' eñe atet ñerra'mrrate' cho yerromapreteña Cristo ñaña atet ñerra'm cho yepampapreteña Cristo. Allempoña Yomporpa' ahuo't tantaterran Puechemer eñe po'huamencot ñeññ atarr cohuen, yapa'cho'ña ñeññara po'huamencarotña eñe cohuen o' etserrataterrnay yocþañña, ñeññcha' atet yocrrena.

⁵ Tarro'mar eñe yeparrocmateñoñ epay Cristo o' yerromaprecha. (Attochña ya'ypo'ñerr ñeññ ama cohuenaye' entapretenye Cristo.) Ñaña ñerra'm yerromapreteña Cristo yeñoteñ o' yetantapretera attochña yocrrerra eñe cohuen ñocop.

⁶ Tarro'mar yeñoteñ ñeñfey acheñey ñeññ yeyochro'tsen ñeññ yocþape'chataye't sosya'tsañ ahua't ñeññpa' o' a'mchechataretetuerra atet ñerra'mrrate' acorso'tamþsaretta epuet Cristo. Attochña o'huañcha' cotape'chatse'tatnenedy yo'chñarañeña. Amach allo'na taruasatnenedy yo'chñar.

⁷ Ñato' o'ch yetma'ntacha atet pena arromñañ. Ñehua, yapa' yeñoteñ ñerra'm esesha' rromatspa' amach errotenoñ allo'na cotape'chyesnenano sosya'tsañ. Yapa'cho'ña atetcha' yentena ñerra'mrrate' cho yerromuen, amach errotenoñ allo'na yocþape'chyesneno ñeññ sosya'tsañ enten Yompor.

⁸ Ñaña atto o' yerromaprecha Cristo, yapa' yeñoteñ ñaña eñe yeparrocmateñoñ Cristopa' alloña corretsayach, atet pena ñapa' eñe corretsa.

⁹ Tarro'mar yapa' yeñoteñ Cristopa' o' tanterra po'rromñoñ, amach alla rromuerre'te. Amach errotenoñ alla o'patere'te rromueñets.

¹⁰ Tarro'mar ñapa' atto rroma yo'chñarecoppa' ñeññpa' eñe parrocha rroma ama't allohuenacop. Ñaña atto correna te' ñeññpa' eñe ora Pomporecpa.

¹¹ Yapa'cho'ña attecmuepa'ch yentena yamía yañeña. Eñe yerromapreteñoñ Cristo Jesús pa' o'ch ya'ypo'ñerr yo'chñar ñeñño'marña amach errotenoñ alla taruasaterryerro yo'chñar. Ñaña te'pa' eñe yeparrocmateñoñ Yepartseshar Cristopa' o'ch yocrraprecha eñe cohuen Yomporecop.

Attoch amach semnatatsche so'chñar o'ch alla taruasaterrnaserr sa'rromñatechets

¹² Ñeñto'marña te'pa' o'ch notas, amach semnatatsche so'chñarpa' o'ch alla taruasaterrnaserr sa'rromñatechets. Allochñapa' amach allo'na sepatse'tyesneno ñeñt atet muenatse'tatyenes sechets.

¹³ Amach semnatatsche sechets o'ch aña torrena ñeñt ama cohuenaye' enteno Yompor. Añcha'ña o'ch saphuer Yompor sechets allochñapa' ñachña torratenaya añecop ñeñt e'ñe cohuen enten ña. Ñato' o'ch yetma'ntacha atet ñerra'mrrate' cho yerromuen tarraña te'pa' o'ch alla yocrrerra cohuen Yomporecop.

¹⁴ Tarro'mar te'pa' amach errotent' allo'na taruasatnenye yo'chñar, tarro'mar te'pa' añ yeyemtena Yompor atto muerenyapa' ahuo't a'pocatonay yo'chñar. Ama aye' yeyemteno ñoñets ñeñt atet anaret ñeñtcha' atet yepohua esheccha' cohuen enteney Yompor.

¹⁵ Te'pa' yeñoteñ ama aye' yeyemteno ñoñets ñeñt atet anaret. Añña yeyemtena Yompor puemuereño' e'ñe yenpueney. Tarraña ama't atteña' ama pocteyaye o'ch allo'na yesen patse'tyerrayerr ñeñt ama cohuenaye' enteno Yompor ama't mamesha.

¹⁶ Ñato' o'ch yetma'ntacha atet. Ñehua, yapa' yeñoteñ ñerra'm esesha' yemnen ñeñtcha' yetaruasatene' añe patsro, ñeñt'pa' po'ño'ch ñeñtcha' yepatronar yepen, ñaña e'ñech pauner yentatena attochña ñeñt'ach yame'ñena ñeñt yepatronar yepen. Ñaña attecma'ch yepena ñerra'm añ yemnen yo'chñarach yetaruasatene', tarraña ñerra'm añ yetaruasatene' yo'chñarpa' ñeñt'pa' tsa'taterryach rromueñtso ñeñt'ara coñcheñtso. Tarraña ñerra'm añ yame'ñena Yompor ñeñt atet otene' po'ño'no'ñ, ñeñt'pa' alloch yorrtatyen e'ñe cohuen ñeñt e'ñe atet muenen ña.

¹⁷ Ñaña sapa' ahua'tpa' aña setaruasataye't so'chñar, tarraña te'ñapa' e'ñe seyo'chrocmañen o' same'ñera ora ñeñt atet pena Yompor pa'poteñ ñeñt'ara ñeñt serrpare'tatase't. Ñeñto'marña te'pa' napa' atarr nocshena, atarr neparasyoso'teñ Yompor socop.

¹⁸ Ñaña te'pa' o'huañcha' taruasaterrnerr so'chñar. Añcha'ña setaruasaterre' Yompor erra'tsente' muenen ña.

¹⁹ Ñehua, Yompor poc'ap'ño'pa' atet netma'ntatensa atto yocrrena acheñey arr patsro allochñapa' cohuencha' çhaponasa seyo'chro Yompor poc'ap'ña. Ñeñt notenes po'ño'chpa' ñeñt'pa' atet sepe't ahua't e'ñe poc'te' sente't e'ñe ora sechtsohuen allo'na sete't patse'tnomue' sosya'tsañ ñeñt ama cohuenaye' enteno Yompor. Te'pa'cho'ña attecma'epa'ch e'ñe poc'te' senteñ ora sechtsohuen o'ch sepomuerra Yomporecop, allochñapa' attoch sa'cohuentataretterra e'ñe cohuen Partsocop ñeñt e'ñe atet muenen ña.

²⁰ Ñehua, ahua't allempo aña setaruasataye't so'chñarpa' ama aye' soc'tape'che'te ñeñt e'ñe cohuen enten Yompor.

²¹ Tarraña ñeñt atet sepatse'tyese't sosya'tsañ ahua'tpa' ama es sherbase'te ama't mamesha, ñeñt'ara ama't te'pa' pencna'ntatenes. Yapa' yeñoteñ ñeñt'pa' allach tsa'taterryañ rromueñtso, ñeñt'ara coñcheñtso.

²² Tarraña te'pa' o'huañcha' alla taruasaterryerr yo'chñar. Añcha'ña yetorratene' Yompor po'taruas attoch yesherbeñ. Allochñapa' ñach yetsa'tenaya alloch ya'cohuentataretterra e'ñe cohuen ñocop añe patsro. Allochñapa' attochña aphuerrey allochña yapa' corretsayach yocsheñeshocmañen tayoteñ errponañohuen.

²³ Tarro'mar yo'chñarpa' allach tsa'taterrya rromueñtso, ñeñt'ara coñcheñtso. Tarraña e'ñe yeparrocmateño' epay Yepartseshar Cristo Jesús'pa' Yomporña'pa' aphuerreycha' e'ñe at'a allochña yapa' corretsayach yocsheñeshocmañen tayoteñ errponañohuen.

7

Atto o'huañ amcha'noçhtana'tenya añ ñoñets ñeñt atet anaret ahua't Moisésesho'

¹ Te'pa' o'ch masheñneshacha' ñaña nočhaneshacha' netma'ntatasa po'poñ coťapñats. Ñehua, sapa' o' e'ñe señoťueñ atet pena ñoñets ñeñť atet anaret arr patsro ñeñťcha' atet yepena. Sapa' señoťen añ ñoñetspa' sherben tarremphuach allempo yocrrena añe patsro. Tarraña ñerra'm esempo yerromapa' añ ñoñetspa' amach erroťenoť allo'na yame'ña'neño. O'huañcha' yame'ñeña.

²⁻³ Atet ñerra'mrrate' ñeñť oteneť paťerr ñoñets ñeñť atet anaret. Ñeñťpa' atet oteneť: Coyanasha' arrollare'tañpa' amach satstano puerrollar allempo correna añe patsro. Ñaña ñerra'm allempo correna puerrollar, ñerra'm o'ch yorer po'psheñeñ ñeñťcha' puerrollar perrpa' ñeñťpa' ama pocteyaye tarro'mar ñeñťpa' o'chña'tampeñets enteñ Yompor. Tarraña ñerra'm esempoch rromapes puerrollarpa' allempoñapa' o'huañcha' ame'ñatacha añ ñoñets ñeñť atet anaret puerrollarecop. Ñaña ñerra'm allempo yorer po'psheñeñ ñeñťcha' puerrollar perrpa' allempo ñeñťpa' e'ñe pocte' tarro'mar allempo, ñeñťpa' ama o'chña'tampeñťsoye' enteñe Yompor.

⁴ Ñeñťo'marña o'ch masheñneshacha' ñaña nočhanesha notas, yapa'cho'ña o'huañcha' amcha'nočhtana'tenya añ ñoñets ñeñť atet anaret ahuat Moiseseshoť, tarro'mar ñeñťey o' yame'ñerrapa' o' yerromapretera Cristo. Ñeñťo'marña te'pa' e'ñe pocte' o'ch yo'patera po'psheñeñ. Ñaña ñeñť o' yo'patera te', ñeñťpa' Cristo ñeñťara ñeñť tanterrtsa rromoť. Allochñapa' attoch yorrtatyen ñeñť e'ñe cohuen atet muenen Yompor.

⁵ Tarro'mar ahuat allempo e'ñe yañeña yocťapña ora yocťenpa' ama't yeñoteneñ añ ñoñets ñeñť atet anareťpa' atťera muenateney o'ch allo'na taruasatneneť yo'chñar. Attoña allach čapaterryeñ rromueñťso attoch e'ñe yechenca'huerrañ.

⁶ Tarraña te'pa' e'ñe yerromapreťeñoť Cristo añ ñoñets ñeñť atet anareťpa' o'huañ amcha'nočhtana'tenya atet ñerra'm ahuat. Ñeñťo'marña te'pa' e'ñe cohuen yocrrena Yomporecop. Te'pa' ama añecpayaye ñeñť atet yepe't ahuat attoch e'ñe ya'mueročhtame'teñoť yetsotatuañ ñeñť atet otye't ñoñets ñeñť atet anaret. Añecopña yocrrena e'ñe cohuen Yomporecop tarro'mar te' Parets Puecamquēñpa' o' etserrataternay yocťapña.

Atto yo'chñarpa' atarr mopa'teney; amach muenatenye o'ch atet yeťohua ñeñť atet oteneť ñoñets ñeñť atet anaret

⁷ Ñehua, ñato' sapa' čate' sotenapañ napa' noteneste' Yompor po'ñoñ ñeñť atet anareťpa' ñeñťpa' amate' cohuenayaye. Tarraña ñeñťpa' ama atťeye' notenso ama't mamesha. Atet napa' ñerra'm ama eñallñeña añ ñoñets ñeñť atet anaret, napa' amate' čhaponañeña neyočhro ñeñť ama pocteye' enteno Yompor. Atet ñerra'm ama eñallñeña añ ñoñets ñeñť yotene' "amach yeye'čhapretanna'tatsto", napa' amate' čhaponañeña neyočhro ñeñť ama pocteye' enteno Yompor ñerra'm esempo es yeye'čhapretannena.

⁸ Tarraña allempo čhaponañeña neyočhro po'ñočh atet oteneť ñoñets ñeñť atet anaret ama es aye'čhapretanna'tpahuo, no'chñar ñeñť neyočhro'tsenpa' elloña nanaccha' es ye'chatse'tatyenen. Ñerra'm ama neñotenñe añ ñoñets ñeñť yotene' ama es aye'čhapretanna'tpahuo, ñerra'mañpa' amate' neñotenñe ñeñť atet neye'čhapreteña po'psheñeñ ñeñťpa' ñeñťña po'ñočh no'chñar entapretenen Yompor.

⁹ Ahuat napa' allempo ama neñotena' ñoñets ñeñť atet anaret, nañapa' nanac cosheñťso'tsennoñ allempo. Tarraña allempoña neñoter ñeñť atet oteneť ñeñťcha' atet yeťa cohuen ñaña ñeñť ama atet aťapahuopa' allempoteñña napa' neñotena po'ñočhpa' shonte' no'chñar ñeñť neyočhro'tsen. Allempoteñña napa' atarr nellquerra nanac. Neñoteñ aña no'patenaya rromueñets ñeñťara coñcheñets.

¹⁰ Ñaña añ ñeñťara ñoñets ñeñť atet anaret allo'ch yocrrenañ e'ñe cohuenpa' tarraña arepa't atťeyaye, naña no'chñar allo natpare'ten ñoñets ñeñť atet anaret ñeñťach nan-mayeñ rromueñťso.

11-12 Tarro'mar allempoteñ neñoterr añ ñoñets ñeñt atet anaretpa' no'chñar ñeñt neyoçhro'tsenpa' elloña nanac coťape'chatse'tatenen sosey. Ama't nanac cohuenen Parets po'ñoñ ñeñt atet anareteñ, ñaña atet otene Parets ñeñtcha' atet yeťa' cohuen, ñaña ñeñtcha' ama atet aťapahuoyaye, ñeñtpa' e'ñe cohuen, pocten. Tarraña na no'chñarpa' ama muenatenno o'ch cohuen es neťa', ñeñtpa' attepa't sheca'ne't. Napa' ama erroť nepeno, neñoteñ aña no'patenaya rromueñets ñeñtara coñcheñets.

13 Te'ña sapa' čate' sotenapañ añ ñoñets ñeñt e'ñe otets cohuenpa' ñeñtapa'tña yo'patatenaya rromueñets. Tarraña ñeñtpa' ama atteyaye. Añña ñeñt yo'patatenaya rromueñets, ñeñtpa' yo'chñar. Ñaña Yompor po'ñoñ ñeñt atet anareť ñeñt e'ñe cohuenpa' ñeñtña o' a'poterrnay yo'chñar. Attochña yeñoterr yo'chñarpa' nanac sosey entapreteney Yompor.

Atto eñall epa ñeñt huomenc yepene' yeyoçhro

14 Yapa' yeñoteñ añ ñoñets ñeñt atet anaretpa' Partseshoť e'ñe cohuen anareteñ, tarraña atet ñerra'm napa' arromñaťoťa atet nepena, čocmach neťatse'tyen ñeñt ama cohuenaye' enteno Yompor. E'ñe atet nepena ñerra'mrrate' aña netaruasatene' no'chñar.

15 Ama neñoteñe eso'marte'ña atet nepena, tarro'mar ama't ñeñtcha' atet o' neťohuapa' ama't napa' amach e'ñe pocteye' nenteñe. Tarro'mar ama't nemneñeñ añte' atet neťohua ñeñt e'ñe cohuen enten Yompor, tarraña arepa'tña atteye' nepeno. Añeťa't atet nepen ñeñt ama nemnenñe, ñeñt po'ñoçh ama cohuenaye' enteno Yompor.

16 Ñaña esempo o'ch neťohua ñeñt ama cohuenayaye, ñeñt ama't napa' ama nemnenñe, nañapa' neñoteñ attoťña o' natpare'tua ñoñets ñeñt atet anareť ñeñt e'ñe cohuen.

17 Ñeñto'marña neñoteñ ñerra'm esempo o' atet neťohua ñeñt ama't napa' net-sena'ten, ñeñtpa' neñoteñ ama e'ñe naye' atet petso. Añña atet neťatene' no'chñar ñeñt allo'tsenara neyoçhro.

18 Napa' neñotena e'ñe atta eñalletñan, neyoçhroñapa' ama eñalle attoch cohuen enten Yompor, ama't coñe'ta. Ama't nemneñeñ o'ch atet neťañ ñeñt e'ñe cohuen enten Yompor, tarraña ama erroť nepeñe atet patsa ñeñt atet cohuentetsa.

19 Ñeñt atet nepenapa' ama't napa' ama pocteye' nenteñe. Tarro'mar ama't nemneñeñ o'te' atet neťohua ñeñt e'ñe cohuen enten Yompor, tarraña arepa'tña atteye' nepeno. Añach atet nepena ñeñt ama nemnenñe ñeñt po'ñoçhpa' ama cohuenaye' enteno Yompor.

20 Ñeñto'marña neñoteñ, ñerra'm esempo o' atet neťohua ñeñt ama't napa' ama nemnenñe, ñeñtpa' neñoteñ ama e'ñe naye' atet petso. Añña atet neťatene' no'chñar ñeñt allo'tsenara neyoçhro.

21 Ñeñto'marña te'pa' neñotena ñerra'm esempo yemneñeñ o'te' atet yeťañ ñeñt e'ñe cohuen enten Yompor, tarraña yo'chñar ñeñt yeyoçhro'tsenpa' čocmach coťape'chateney ñeñt ama cohuenaye' enteno Yompor.

22 Tarraña atto Yompor o' coťape'čaterrey cohuen yeyoçhropa' ñeñtpa' alloch e'ñe yocsheññaña po'ñoñ.

23 Tarraña ama't atetpa' yapa' yeñotena eñall po'poñ ñeñt huomenc yepene' yeyoçhro ñeñt čocmach e'moñe'tenan ñeñt atet yocťape'chen cohuen Yomporecop. Ñaña yo'chñar ñeñt huomenc yepene' yeyoçhropa' ñeñtña nanac mopa'tene' yechets.

24 ¡Ee-say! Nanac llequēntso'tseney ya. Esha'huachca' ya'huañamperre'te' yo'chñar ñeñt nanac yemueročtatene' ñeñtcha' yanerre'te' rromueñtso.

25 Nanac neparasyoso'teñ Yompor tarro'mar neñoteññañ Puechemer ñeñt Yepartse-shar Jesucristo ñeťa'tña e'ñe ya'huañamperre' yo'chñar. Ñeñto'marña e'ñe yeyoçhropa' yemneñeñ o'ch yocťape'cherrñañeñ Yompor po'ñoñ, tarraña yo'chñarñapa' ñeñtña čocmach yetaruasatene' e'ñe yechtso.

8

Atto Parets Puecamquëñpa' ñeñña huomenc yepene' yeyochro

¹ Ñeño'marña te'pa' yeñoteñ amach a'coñchatareñeye ama't puesheñarroñeya ñeñtey o' yeparrocmaterra Cristo Jesús. Ñehua, ñeñtey o' yeparrocmaterra Cristo, ñeñtpa' añ, atto o' cotape'chaterrey Parets Puecamquëñ, amaña añeye' yocape'chatenaye yo'chñar ñeñ yeyochro'tsen.

² Tarro'mar te'pa' atet ñerra'm napa' e'ñe neparrocmateñoñ Cristopa' añña Parets Puecamquëñpa' ñeñña huomenc nepene' neyochro, allochña napa' corretsanach tayoteñ ama't ñaña errponohuañen. Attoña o' a'huañañperren atto no'chñarpa' ñeñña huomenc nepaye't neyochro, ñeñtcha' nanmayeñ rromueñtso, ñeñtara coñcheñets.

³ Ñehua, añ ñoñets ñeñt atet anaret ñeñtcha' yetsotatenepa' amach errotenoñ a'queshpaterreye, tarro'mar ya arromñañey yo'chñarpa' ama muenatenye o'ch atet yeñohua ora ñeñt atet oteney añ ñoñets. Tarro'mar añ ñoñetspa' ama eñalle attoch huomenc ñonay yeyocher esheccha' yetsotue ora allpon ñeñt atet oteney ñeñtcha' atet yeñohueneñ. Tarraña atto Yomporpa' ahuo't a'pocatuonay yo'chñar ñeñtpa' atet pa. Ñapa' ahuo't mueñonay e'ñe ña Puechemer ñeñtcha' eñalletostsa arr patsro e'ñe atet ñerra'm ya ñeñtey arromñañey, ñeñtey ochñañey. Allochñapa' ñach rromosets yo'chñarecop; allochñapa' attoch tsa'tuonaya yo'chñar. Attochña a'huañañperrey atto yo'chñara ñeñña huomenc yepene' yeyochro.

⁴ Atet o' ñonay Yompor attoch te' yapa' o'ch atet yeña cohuen ñeñt atet oteney Yompor po'ñoñ, allohueneñ ñeñtey atet petsa atet cotape'chateney Parets Puecamquëñ, ñeñtey o'huañ atet yeñatse'tyesa ñeñt atet cotape'chatse'tateney yo'chñar ñeñt yeyochro'tsen.

⁵ Tarro'mar ñeñt atet petsa ñeñt atet cotape'chatenanet sosya'tsañ ñeñt pueyochro'tsenetpa' añachña e'nenet ñeñt atet muenatse'tatenanet po'chets. Tarraña ñeñt atet petsa ñeñt atet cotape'chatenanet Parets Puecamquëñpa' añcha'ña e'mñotenet ñeñt atet muenatenanet Parets Puecamquëñ.

⁶ Tarro'mar ñerra'm añach ye'nen ñeñt atet muenatse'tateney yechetspa' ñeñtpa' ñeñtcha'ña yanerre' rromueñtso ñeñtara coñcheñtso. Tarraña ñerra'm añ ye'mñotenet ñeñt atet cotape'chateney Parets Puecamquëñpa' ñeñtpa' ñeñtcha'ña allochña yapa' corretsayach e'ñe cohuen yocsheñeshocmañen.

Atto ñerra'm añach ye'nen ñeñt muenatse'tateney yechetspa' amach errotenoñ yame'ñeroña Yompor

⁷⁻⁸ Tarro'mar ñerra'm añach ye'nen ñeñt atet muenatse'tateney yechetspa' ñeñtpa' atet yepena ñerra'mrate' cha ye'moñe'teñ Yompor, ñeño'marña chach yatpare'teññañ po'ñoñ. Amach errotenoñ yame'ñeroña Yompor ñerra'm añach ye'nen ñeñt atet muenatse'tateney yechets. Ñaña ñerra'm attach yepenapa' amach errotenoñ yocshacheña Yompor.

⁹ Tarraña sapa' ama añeye' soctape'chatenaye sechets; añña soctape'chatene' Parets Puecamquëñ ñerra'm po'ñoñ Puecamquëñpa' o' yeçherra seyoçhro. Tarraña ñerra'm eseshas ama echenaye Cristo Puecamquëñ seyoçhropa' ñeñtesña po'ñoñcha' ama puechemereyayso Yompor.

¹⁰ Ñehua, ya arromñañeypa' chocmach yerroma arr patsro ochñartso'marecop. Tarraña ñerra'm Cristo yeçhena yeyochro yecamquëño'tpa' chocmach yocrena tarro'mar Yomporpa' e'ñe pocte' enteney.

¹¹ Yapa' yeñoteñ Yomporpa' ahuo't tantaterran Puechemer ñeñt Cristo Jesús po'rromñoñ. Ñaña ñerra'm Yompor Puecamquëñ yeçhena ya yeyochro, ama't arromñañeypa' yapa'cho'ña tantatuerreycha' yerromñoñ. Parets Puecamquëño'tña' yocra'huerrach, ñeñtara Puecamquëñ ñeñt yeçheta te' yeyochro.

12 Ñeñto'marña masheñnesha ñaña noçhanesha, te'pa' añ e'ñe poctetsa o'ch e'ñe atet yepena ñeñt atet cotape'chateney Parets Puecamquëñ, ama pocteyaye o'ch atet yepena ñeñt atet cotape'chateney yechets.

13 Tarro'mar ñerra'm allo'na yocrra'nena ñeñt atet cotape'chateney yechetspa' ñerra'm yerromapa' yechenca'huerrach yo'chñaroñ, tarraña ñerra'm Parets Puecamquëñoñ o'ch ya'ypo'ñerr ñeñt atet patse'tateney yechetspa' yañapa' corretsayach.

Atto ñeñtey e'mñotene' ñeñt atet cotape'chateney Parets Puecamquëñ, ñeñteyñapa' o' po'ñoçh puechemer perrey Yompor

14 Tarro'mar allohueney ñeñtey e'mñotene' ñeñt atet cotape'chateney Parets Puecamquëñ, ñeñteyñapa' o' po'ñoçh puechemer perrey Yompor.

15 Ñeñto'marña amach alla yemcha'terrorro atet ñerra'mrrate' ñeñt ñañrets, atarrcha' mecha'tenan pamo'mte'. Tarro'mar yapa' allempoteñ o' yaguërrñañ Yompor Puecamquëñ yañapa' o' puechemer perrey po'ñoçh. Ñeñto'marña amach yemcha'nañoñeye' yema'yocheñoñpa' o'ch yeçhore'ch, o'ch yoch: "Apa."

16 Tarro'mar ñeñtara Parets Puecamquëñ ñeñtña yeñotatene' yeyoçhro po'ñoçhpa' o' puechemer perrey Yompor.

17 Ñaña yapa' yeñoteñ atto o' puechemer perrey Yomporpa' yapa'çho'ña yagapa-pretercha' Cristo ora ñeñt allpon o'patatenya Yompor. Ñerra'm çho yemueroçhta Cristo'marecop te', atet pe't ña atarr mueroçhte't ahuat añe patsro, esempohuañen yapa'çho'ña yecohuentapreterach.

Atto ama't yemueroçhetuanena añe patsro, ñeñtpa' ama esoye' yenteñe

18 Ama't yemueroçhetuanena añe patsro, ñeñtpa' ama esoye' nenteñe. Tarro'mar neñoteñ esempohuañenpa' elloçña nanac yecohuentapretera Cristo.

19 Ama't ora allpon ñeñt yentyen arr patsro ñeñt yeçhcatua Yomporpa' ñetpa'çho'ña elloña atarr cohueñet esempohuañencha' Yomporpa' orrtatuerreycha' ñeñtey o' puechemerasha' perrey, attoch allempoçña o'ch yecohuentapretera Cristo.

20 Tarro'mar ahuat allempo atpare'te't Adán, Yomporñapa' ahuo't a'huañatan atto atarr sherbañ nanac ñeñt ora allpon pueyeçhcatar. Allempoñapa' o'huañ tama sherba'. Tarraña pueyeçhcatarpa' ama errot po, tarro'mar atet muenen Yompor. Tarraña ama't atet panetañpa' elloña te'pa' çhocma cohueñet attoch esempohuañen Yomporpa' o'ch alla a'cohuentatuerranet.

21 Tarro'mar ora allpon ñeñt yentyen añe patsropa' atet anaretet ñamet çhocmach mellasha'tuet, allempoñapa' o'huañcha' sherbet. Tarraña ñerra'm esempohuañencha', ñeñtey o' puechemer perrey Yompor o'ch yecohuentapretera Cristo, ñaña allempoña ora allpon Yompor pueyeçhcatarpa' ñetpa'çho'ña o'ch alla a'cohuentataretetuerret ñamet.

22 Yapa' yeñoteñ ora allpon ñeñt yentyen añe patsropa' çhocma mueroçhe'tyenet ama't teme'ttsen, tarro'mar ama a'cohuentataretterra'. Nanac llecanrroreyenet atet ñerra'mrrate' coyanesha' ñerra'm o' çhap allempoch cheyore'ten nanaccha' atsotenana pue'mar. Nanac llequëntso'tsen tarremphuach allempoch eñalletatuan pue'mar. Allempoñapa' nanaccha' cosheñtso'tsen, tarro'mar o' eñalletatuan pue'mareñoll. Atetcha' peraña ñaña Yompor pueyeçhcatareçhno, nanaccha' cosha'rterret esempohuañencha' allempoch a'cohuentataretetuerret.

23 Ama ñapñayaya Yompor pueyeçhcatar mueroçhtetso. Yapa'çho'ña çhocma yemueroçhetyena arr patsro, amach e'ñeye' yeñmateno yeyoçhro. Tarraña ama't atetpa' o' yechen Parets Puecamquëñ ñeñt yeçhetsa yeyoçhro ñeñt ñanom apueney Yompor,

alloñña' orameñ ñaña ñeñt' o'patatenya pa'namen. Ñeñto'marña yeñoteñ esempo-huañenpa' aphuerreycha' ora allpon ñeñt' o'patatenya. Ñeñto'marña yecueñ esempohuañen Yomporpa' o'ch orrtatuerrnay ñaña atto yapa' o' puechemerasha' perrey. Allempoña ya yechetspa' a'po'poñetuerrnaycha' attochña yecohuentapretera Cristo.

²⁴ Allempoteñ o' yaguërrñañ Yompor Puechemer ñeñt' Cristo yapa' yeyemteññaña ñeñt' o'patatenya ñeñt'cha' atet perrnay esempohuañen. Ñeñto'marña allempoteñ o' ya'queshpataretterra chocmach yecueñ esempohuañen allempoch a'po'poñetuerrnay yechets attochña yecohuentapretera Cristo. Po'ñoçhpa' ama a'po'poñetuerrnaya' yechets, ñeñto'marña teme'ttsen yecueñ. Ñerra'm o' a'po'poñetuerrnayeñ yechetspa' allempoñapa' amate' palltenañe o'ch yeyemteññaña ñeñt' atet muenateney ña.

²⁵ Tarraña ñerra'm chocma yeyemteña Yompor ñeñt' atet oteney yeñoteñ atetcha'ña perrnay esempohuañen. Ñehua, ama't ama orrtena', te'pa' yeyemteñoñ ñapa' e'ñepa'chña yocsheñeshocmañen yecueñ. Amachña cha yemuenme'chatsche.

Atto enamuenay Parets Puecamquëñ Yomproshot

²⁶ Ñaña attecma Yompor Puecamquëñ ñach yeyenpuene' ñerra'm esempo ama errof es apen yenteno. Ñehua, atet ñerra'mrrate' allempo yellquëñesha' yema'yochena ñato' ama yeñoteñe escha'ña yenamña Yompor ñeñt' e'ñe pocte' enten ña. Allempoña Parets Puecamquëñpa' ñachña enamats yocop e'ñe puellcapreteñoñey ya, e'ñech pue'narña'teñoñ, amach çhoye' eñoreno attoña enamatenay Yompor yocop.

²⁷ Tarraña Yomporpa' cohuenay allohueneñ ñeñt' atet yocape'chen yeyoçhro, ñeñto'marña ñapa' eñoteñ ñeñt' atet enamuenay Puecamquëñ, tarro'mar Puecamquëñpa' añach enamuenay ñeñt' e'ñe pocte' enten Yompor yocop ñeñtey o' pueyochresha' perrey Parets.

Ñeñtey e'ñe eñotuaye't ahuat Yomporpa' ñapa' atarr coçhnesha' o'patatenya

²⁸ Ñaña ama't es yehuapoya, yapa' yeñoteñ Yomporpa' ñach a'pocstatene' yocop, allohueneñ ñeñtey morrentenaya ña, ñeñtey acraretey o'ch atet yepeññañ ñeñt' atet muenen ña.

²⁹ Tarro'mar allohueneñ ñeñtey e'ñe eñotuaye't Yompor ahuat, ñeñteycha' ame'ñerraya esempo, ñaña' co'ape'che't ahuat yocop ñeñt'cha' atet muenatey, allochña' yach co'ape'cherrets cohuen attochña yeyeçhquërra e'ñe ora atet ñerra'm Puechemer ñeñt' Cristotets. Allochña' allohueneñ yepo'narcha' yepañ Cristo ama't shontey ñeñtey ame'ñetsa.

³⁰ Ñehua, allohuen ñeñt' atet co'ape'che't Yompor yocop ahuatpa' allempoña ahuo't çhap allempoch çhore'terrey o'ch yame'ñera. Allochña ñeñtey açhore'tareteypa' ñaña' oten yocop e'ño' pocte' enteney e'ñe yeyemteñoñ Cristo. Allochña' allohueneñ ñeñtey e'ñe pocte' enteney, Yomporña' oten yocop yecohuentapretero'ch Cristo esempohuañen.

³¹ Ñeñto'mar te'pa' o'ch notas, Yomporpa' atarr cohuen morrentenya. Ñaña yapa' yeñoteñ atto nanac morrentenya Yomporpa' ama't eseshapa' amach errotenoñ a'huañañperetoña atto morrentenya.

³² E'ñe puemorrenteñoñey ya ama't e'ñe ña Puechemerpa' ama mopa'tam'pesye, elloña a'rroyonay Puechemer ñach rromosets yocop allohuenacpay. Atto atarr morrentenya attoña yapa' yeñoteñ elloña attecma esocmañencha' apa'yeney e'ñe allempoteñ apuerrey ñaña Puechemer Cristo.

³³ Ñeñtey acrrer Yompor ñeñteycha' puechemer perr, ama't esesha' muenenayeñ o'ch otteñe'chenyetañ, tarraña ñeñt'pa' ama esoye' yenteñe yocop, tarro'mar Yomporpa' oten e'ño' pocte' enteney. Amach errotenoñ esesha' yetsa'taterrayo yo'chña,

³⁴ tarro'mar Cristo Jesús pa' ña rromats yo'chñarecop, elloña ñaña tanterrtsa po'rromñoñ, ñaña te'pa' ña partsotapretenaya Pompor po'cohuenrot; alloteñña ñapa' eñorena yocop Pomporesho attoch es e'ñe a'pocstatennay.

³⁵ Atarr nanac morrentenya Cristo. Ama't eseshapa' amach errotenoñ puerratañpesyetoña atto nanac morrentenya Cristo. Ñaña ama't erroteno'tsenya amach huañerroña atto nanac morrentenya Cristo. Ama'tcha' añ yeçhapoya mueroçhteñets, ama'tcha' nanac llequëñtso'tseney, ama'tcha' ñerra'm esempo pue'moñe'teñoñetay coñare'tenyet, ama'tcha' ñerra'm esempo yepallta'yena ñeñtcha' yerren, ama'tcha' ñerra'm esempo yepallta'yena ñeñtcha' yechorrena, ama't ñerra'm esempo añcha'noçheno'tseney, ama'tcha' ñaña allemPOCH muetsayet, amach errotenoñ puerratañpesyetoña atto nanac morrentenya Cristo.

³⁶ Atetcha' perryetña ya esempo e'ñe atet anaret Yompor po'ñoño ñeñt aquellca'huaret ahuatoteñ. All anuaret ñeñt atto puesheñarr ñeñt ame'ñatse'tpa' otane't Yompor, ñeñt pa' e'ñe atet ot:

E'ñe yame'ñeñoñep ñapa' yellapene'tcha' e'ñe autsa yemtsanate' ñeñt ye'moñe'tene'.

Ñetpa' e'ñe amtsen entenyet e'ñe atet ñerra'm carrnero ñeñt çhocmach aneñet allcha' muetsanachet.

³⁷ Ama't yemueroçhetuahuapa' elloña nanaccha' ahuañmenca't perrey Cristo ñeñt nanac amorrentña yenten.

³⁸ Ñeño'marña napa' neñoñeñ, ñeñtey ame'ñenaya Cristo Jesús ñeñt Yepartseshar yepenpa' ama't erroteno'tsenya amach errotenoñ huañerroña ñeñt atto nanac morrentenya Yompor. Ama't allemPOCH yerroma, ama't allemPO ñaña yocrenmeñpa' çhocmachña morrentenya. Ama't Yompor po'millañoñeñnaneshar ñeñt huetsa pue'ntañoñpa' amach errotenoñ puerratañpesyetoña ñeñt atto morrentenya. Ama't ora allpon ñeñt añcha'noçhetyetsa, ama't ñaña ora allpon ñeñt añcha'taretetyetsa arr patsropa' ñetpa'cho'ña amach errotenoñ puerratañpesyetoña ñeñt atto Yomporpa' nanac morrentenya. Ama't ñeñtcha' yehuapoya te' ama't ñaña ñeñtcha' yehuapoya tsapañonet, ñeñt pa'cho'ña amach errotenoñ a'huañamPesyetoña atto Yomporpa' atarr morrentenya.

³⁹ Ama't errponenañaren yetuanena atarr eno, amapa' ñaña o'pono patso ama't ñaña oño o'pono, allpa'cho'ña amach errotenoñ yesa'nmoña atto Yomporpa' nanac morrentenya. Ama't ora allpon ñeñt yeçcatua Yompor añe patsropa' ñetpa'cho'ña amach errotenoñ a'huañamPesyetoña ñeñt atto nanac morrentenya Yompor, allohueney ñeñtey ame'ñenaya Puechemer ñeñt Cristo Jesús ñeñt Yepartseshar yepen.

9

Atto Pablo pa' atarr llequëñana pamo'tsna'tarnesha' ñeñt israelnesha' ñeñt acrañ Yompor ñeñtcha' pueyochresha' pañ

¹ Ñaña ñeñtcha' notas te'pa' ñeñt pa' e'ñe po'ñoçh atet, ama çhoje' neshquënso, tarro'mar napa' o' name'ñera Cristo. Ñaña Parets Puecamquëñ ñeñt yeçhetsa neyoçhro, ñeñtña e'ñe eñotenen ñeñtcha' atet notas ñeñt pa' e'ñe po'ñoçh atet.

²⁻³ Napa' atarr nanac nellquëña nemo'nasheñnesha' ñeñtara judionesha' tarro'mar ñetpa' shontetañpa' ama ame'ñeñeto Cristo. Ñeñta nenen neyoçhro atto atarr nellquëñanet. Ñerra'm errotenoñ na'queshpatanet o'te' na'queshpaterranetañ. Ama't pocte' nenteñeñ o'ch na'cmareñtañ nañeña attoch nechenquërra allochñapa' amach nentere Cristo, ñerra'm atet neñapa' ñetpa' ñato' o'te' na'queshpaterranetañ. Tarraña ama't atet neñatstañpa' amach errotenoñ na'queshpaterraneto.

⁴ Ñaña namo'tsesha' judionesha' ñeñtara israelena'tarnesha' ñeñt acrañ Yompor ahuat ñeñtcha' puechemerasha' pañ, ñaña ñetpa' çhocma entoñetañe't Yompor

po'partsoña ahuat. Ñaña ñet Yomporpa' chocma a'pocatanetañe't ahuat attoch chocmach a'natenanet. Ñaña ñetpa' apanetañe't Yompor po'ñoñ ahuat, ñeñña eñotatahuate't ñeññ atet pocte' enten Yompor. Ñaña ñeññara judionesha' ñeññ eñotaye't attoch nanac e'ñe cochnesho't sherbeñetañ Yompor pa'paclo. Ñaña ñeññara judionesha' Yompor ahuatpa' ahuo't otanetañ ñeññcha' atet apuerranet esempohuañen.

⁵ Ñaña ñeññ ñanom yamo'mtayñenashañ* yepe't ñeññ nanac sherbaye't Yompor ahuatpa' ñetpa' ñeññara judionesha' pamo'tsna'tarneshañ. Ñaña ama't judiona'taresho'tpa' ahuo't eñalletosa Cristo arr patsro ñeññara ñeññ nanac Partotets ñeññ pomnaren pene' allohuen esocmañen. Ya'ye'chochtatoñepa'ch tayoteñ ama't errponohuañen. Ñeññpa' attetepa'ch Nompore.

⁶ Tarraña ama't allohuen judionesha'ña ama'tcha' ama ame'ñereto Cristopa' Yomporña' amach erroteno't huañerroña po'ñoñ ñeññ atet otanete't ahuat; ñeññpa' chocmach etsota ñeññ atet otanet, tarro'mar ñapa' ama puenesho po'ñoñ. Ñaña allohuen ñeññ israelena'tarpa' ama allohuenacmaye' Yomporena'tareyayeto.

⁷ Ñaña ora allpon po'mrenña Abrahampa' ama allohuenacmaye' po'noch Abraham puechemer entapreteñe Yompor. "Aña e'ñe puechemer entapreteñ Yompor ñeññ Isaac po'mrenña", ñeññ atet otan Yompor Abraham ahuat.

⁸ Ñeñño'marña yeñoteñ allohuen Abraham po'mreneña' ama allohuenacmaye' po'noch puechemer penaneto Yompor. Añachña puechemer pen ñeññ yemtenaya Yompor ñeññ atet otenanet.

⁹ Ñehua, yapa' yeñoteñ atet ahuat Yomporpa' otan Abraham ñeññcha' aþ, ñeññpa' atet ot: "Tsapa't charo atet ñerra'm te' añempo, o'ch nohuerra allempoñapa' petapor Sarapa' cheyore'tcha' ñeññpa' asheñorrcha' ñeññcha' Isaacatats." Arrpa' allohua ñeññ atet Yomporpa' otan Abraham.

¹⁰⁻¹³ Elloña te'pa' o'ch alla neyerpaterrser attto yatañ Isaacpa' ahuo't yoran Rebeca ñeññcha' puetapor pa'. Ñaña allempo Rebecapa' totana Isaac puechemer ñeññ epuesha' Yomporña' otan Rebeca, atet och: "Ñeññcha' eñalletatsa ñanom pechoyorpa' añcha' pomnaren pene' ñeññcha' eñalletatsa chenta'." Arrpa' allohua ñeññ atet Yomporpa' otan Rebeca. Ñaña allempo ama eñalletena' puechoyoresha' Yomporña' ahuo't ye'choña pa'terr puechoyor ñeññ muenen ña, ama't allempopa' ama es ye'chcateneta' ama't ñeññ cohuen enten Yompor amapa' ñeññ ama cohuenayaye. E'ñe atta ahuo't ye'chana puesheñarr ñeññ muenen ña; chesha'tollpa' ama pueye'chcateño'feye' cohuen ye'chyña Yompor, tarro'mar chesha'tollesha'pa' ama es ye'chcateneta' ama't coñe'ta. Attoña ahuo't etsota Yompor po'ñoñ ñeññ atet aquellca'huare't ahuatoteñ, ñeññpa' atet oten Yompor: "Jacobpa' atarr nemorrenteña, pa'mo'nasheñña Esaúpa' ama tama nemorrenteño." Atet pa' attoch ye'noch Paretspa' ña acrañtetsa ñapue't añecop ñeññ e'ñe ye'chena ña.

Atto Yomporpa' e'ñe pocte' entan o'ch puechemer pan ñaña ñeññ ama judioneshayaye

¹⁴ Te'ña ñato' sapa' chate' sotenapañ ñeññ atet ote't Yompor, ñeññpa' amate' pocteyaye. Tarraña o'ch notas ñeññpa' e'ñe pocte' atet ote't Yompor.

¹⁵ Tarro'mar yapa' yeñoteñ atet Yomporpa' otan ahuat Moisés, ñeññpa' atet och: "Ñerra'm esesha' neye'cha na ñeññcha'ña neyenpa'. Ñaña ñerra'm esesha' neye'cha na ñeññcha'ña atarr nemorrentena'."

¹⁶ Ñeñño'marña yapa' yeñoteñ ñerra'm esesha' muenen Yompor ñeññcha'ña a'natena, ñeññpa' e'ñe pocte'. Ñeññpa' ama año'feyaye ñeññ atet yemnen ya acheñey, ñaña ama ya'muerochtame'teñoña ye'chenyoña Yompor. E'ñechña puemuereñoña ye'chenana erra'tsen muenen ña.

* 9:5 Pablo otatse't yamo'mtayñeshañ tarro'mar ñapa' judionesha'.

17 Ñaña yeñoteñ ñeñt atet Yomporpa' otan ahuat ñeñt añcha'tarettatset Egipto. Ñeñtpa' atet otan añcha'taret Faraón: "Na pene', ñeñtep añcha'tarettetsa, attoch peshoch norrtat nehuamenc acheñenesesho. Attochña ñetpa' o'ch serrpare'tyesonet erracmañen atto na ñeñten nanac ahuamencattetsa."

18 Ñeñto'marña yapa' yeñoteñ ñerra'm esesha' muenen Yompor o'ch a'natanetpa' ñeñtcha'ña a'natena. Ñaña ñerra'm esesha' muenen Yompor o'ch echarrtenet pueyoçhreto, ñachña muenatenahuet.

19 Te'ña ñato' sapa' çhate' sotenapañ: "Ñerra'm Yompor ñach yemnatene' ñeñt e'ñe atet muenen ñapa', yapa' amach errof yepe, ñeñto'marña amate' pocteyaye o'ch enteney yapa' amo' cohuenayaye, ñerra'm ña yemnatatene' o'ch es atet yeña." Ñato' sapa' attate' soçtape'chatsetyen seyochro.

20-21 Tarraña masheñeshacha' ñaña noçhaneshacha', o'ch notas, Yomporpa' ama asasare'tpahuoyaye. Ñato' o'ch netma'ntatasa atet: Ñato' esesha'pa' o'ch yeçhcatan coyemñ ñeñt patsrro'. Ñeñt e'ñe atet muenen ña, ñapa' ñeñtcha' atet yeçhcat. Ñato' o'ch yeçhcatan eprroga coyemñ, puerrogarrpa' atarrcha' cohuen, e'ñech cohuenot sherbenan pamo'mte'. Alloñtapa' ñeñt a'pchat patspa' o'ch alla yeçhcaterranerr po'prroguen puecoyemñ. Ñato' ñeñtpa' amach tama cohuenaye' pe, tarro'mar ñeñt yeçhcate'pa' ama mueno o'ch orrtach acheñenesesho. Tarraña coyemña' ñerra'm eñoreña'pa' amach sasare'tanoña pamo'mte', amach oche: "Eso'marte' peyeçhcaten atet, ama cohuenaye' peña'no." Tarro'mar ñerra'm pamo'mte' muenets atetcha' ñan puecoyemñ, coyemña'pa' amach errof es po. Ñeñto'marña yeñoteñ Yomporpa' ama't errofen muena' o'ch atet ñonay, ñeñtpa' e'ñe pocte' ñocop, tarro'mar Parets añecoppa' ña otets ñapuef. Ñaña yapa' amach yesasare'che, tarro'mar Paretspa' ama asasare'tpahuoyaye.

22 Ama't atteña' elloña Yompor ahuatpa' atarr ahuantane't atto nanac atpare'che't ñeñt o'pate't chenquenets. Ñerra'm ña muenatseñ e'ñe pocten attoch tsa'taterranetañ e'ñe allempocma po'yoroçhenño. Attochña entatanetañ po'huamenc tarraña ama atteye' ñaneto, atña ahuantanete't po'chñaret.

23 Allochña'pa' attoch esempopa' çhap o'ch orrtaterrnay allohueney po'cohuenña, ñeñtey o' muererrya yaña, ñeñtey ahuat Yomporpa' coçape'chonaye't yecohuentapretero'ch esempohuañen.

24 Atet ñerra'm ya ñeñtey judioneshay, ama't ñaña ñeñt ama judioneshayaye, tarro'mar ama judioneshayaya ñapuef çhore'tenoña Yompor ñeñtcha' ame'ñaya. Allohueneyña te'pa' o' çhore'terrey o'ch e'ñe yame'ña'huera.

25 Ama't atet ote'teña Yompor ahuat, allempo otan Oseas ñach serrpare'te' ñeñt atet och Yompor, ñeñtpa' atet ot Yompor:

Ama't ñeñt ama nechemereyaye te'pa' tsapaonetña'pa' e'ñech nechemer neçohuerranet.

Ama't po'poñ acheñ ñeñt ama nemorrenteno te'pa' tsapaonetña'pa' e'ñech nemor-rentuerranet ñamet.

26 Ama't e'ñe all ahuat Yomporpa' otanete't: "Sapa' ama nechemereyayso", te'ña allpa' o'ch eñotueret, te'ña'pa' e'ño' puechemerasha' o' çohuerranet Yompor, ñeñt Yompor ñeñt ama arromña'feshayaye ama't ahuata.

27 Elloña Isaías ñeñt a'mtaye't Yompor po'ñoñ ahuatpa' ñapa'çho'ña atet eñose't, ñeñtcha' atet perra israelena'tarnesha', ñeñtpa' atet ot: "Israelena'tarnesha'pa' mer-enach nanac shonte' atet ñerra'mrrate' atet yenteññañ ontap po'mñer nanac shonte'. Tarraña ama'tcha' shontetaña'pa' amachña allohuenacmaye' a'quesçpataretterreto; patanta'ttsachña ñeñtcha' a'quesçpatarettertsa.

28 Tarro'mar Yomporpa' e'ñech tsa'tatuerrana shonte' acheñ arr patsro ñeñt atet otane't ñeñt e'maye't po'ñoñ. Amach allo'na ahuinta'nenaneto po'chñar."

29 Ñeñtpa' e'ñech atet perra ñeñt atet ote't Isaiás, ñeñtpa' atet ot:
Ñeñt nanac Paretspa' ahuo't a'queshpaterrey ama't puesheña'ttso'teya. Ñerra'm ama atet
pa'yeñepa' allohueneypa' e'ñech yoclla'huerrañ e'ñe poctacma, atet panet ahua't
allemo a'cclatuare'tta allohuenet ñeñt ye'chatse't a'ñetso Sodomoma ñaña Gomorro.

Arrpa' atto Yomporpa' ama pocteye' entenano judionesha'

30 Ñeñto'marña te'pa' yeñoteñ acheñenesha' ñeñt ama judioneshayaye ama't ama
e'neñeto attoch e'ñe pocte' entanet Yomporpa' ñetñapa' ahuepa't enteret ñeñt e'ñe atto
pocte' enteney Yompor allohueneypa' ñeñtpa' ñeñña atto yeyemteña ñeñt atet oteney
Yompor.

31 Tarraña judionesha' ama't e'neñetañ attoch pocte' entenanet Yomporpa' tarraña
ñetñapa' ama entereto, tarro'mar aña e'ñe yemtenet o'ch e'ñe etsotuetañ ora allpon
ñoñets ñeñt atet anare'ttenet; tarraña ama es etsotuenaye ora allohuen.

32-33 Yeñoteñ ama enterreto attoch pocte' entenanet Yompor; tarro'mar ama
yemteñeto Yompor ñeñt atet otenanet. Ñetpa' aña e'ñe yemtenet o'ch ye'chcatyenet
ñeñt e'ñe cohuen entenet ñet. Ñeñtpa' e'ñe atet pohuet ñeñt atet oten Yompor po'ñoñ,
ñeñt anuare't ahua'toteñ, ñeñtpa' atet ot Yompor ahua't:

Napa' o'ch nemñanet puesheñarr ñeñtcha' atarr sherberrets all a'ñetso ñeñt pa'so'cheñ
Sión ñeñtara Jerusaléñ. Tarraña ñetpa' chach tsena'chet. Puetsena'teño'tetpa'
o'huañ yemtennanet ñeñt atet noctape'chatanetañ. Tarraña ama't erra'tsena
ñeñtcha' ame'ñerraya ñapa' ñetñapa' ellopa' amach alla es e'nerrete'te.

Ñeñtpa' atet toma'ntachet ahua't: Cristopa' ñach anare'ttatsa arr patso atet ñerra'mrrate'
mapue' ñeñt atarrcha' sherben. Tarraña judionesha'ña' ama asherbenaye' eñcheto
ama't mamesha, cha ottet ñerra'mrrate' atta epoto'tatse'tyeset ñesho ñeñt atma'ntatare't
mapue'.

10

1 O'ch masheñeshacha' ñaña no'chaneshacha' notas, napa' neyo'chrocmañen nem-
neñ namo'tsesha' ñeñtara israelena'tarpa' o'te' queshpa'huerrret ñamet. Ñeñto'marña
ño'cquetpa' chocma nema'yocham'penanet Yompor.

2 Napa' neñotenanetañ e'ñe po'ño'ch mueneñetañ o'ch e'ñe sherberet Yompor; tarraña
ama't atet muenenetañpa' po'ño'chpa' ama chenanetoña pueyo'chreto ñeñt po'ño'ch atet
muenen Yompor.

3 Po'ño'chpa' ama chenaneto pueyo'chreto ñeñt atet muenen Yompor atetcha' ye'pa
attoch pocte' enteney ama't e'ñe allohueneypa'. Ñetpa' otenapuetañ e'ñe pueye'chcateño'tet
ñeñt cohuen entenet ñetpa' Yomporña' pocte'te' entapretenanet. Elloña ñetpa' ama
mueneñeto o'ch yemterñañet ñeñt atet oteney Yompor; ñeñtcha' attoch e'ñe po'ño'ch
pocte' enterrey ña.

4 Tarro'mar te'pa' o' huapa Cristo ñaña atet oteney Yompor ñerra'm yame'ñerrñaña
Puechemer ñeñt Cristotetspa' attochña e'ñech pocte' enterreyña, ama't erra'tsena
ñeñtcha' ame'ñerraya. Allochñapa' o'huañcha' aña yeyemtena o'ch atet ye'pohuen e'ñe
cohuen ora allpon ñoñets ñeñt atet anare't attochña pocte' enterryeñ Yompor.

Arrpa' attoch e'ñe pocte' enteney Yompor ama't eseshaya

5 Ama't Moiséspa' atet ote't ahua't: “Ñerra'm ye'pohuenach e'ñe poctacma ñeñt atet
anare'tpa' esheccha'ña corretsayach errponohuañen.”

6 Tarraña attoch po'ño'ch pocte' enteney Yompor ñeñtpa' e'ñech yeyemteño't ña ñeñt
atet oteney: “Amach yoc'tape'chatsto yeyo'chro, ñato' este' yepalltena tarro'mar ama
yepallteno o'ch ahuey ento attoch ya'suater Cristo arr patsro.

⁷ Amaña yepallteno o'ch ahuey ñaña arromñañeshesho ñeñt' o'pono'tsa'yen patso o'ch yetantatera' Cristo tarro'mar ñapa' ahuatoteñ o' tanterra, ama arromñañesho'tsenayaye."

⁸ Tarro'mar Yomp'or po'ñoñpa' atet oten: "Añ cohuen ñoñets alloch yequeshperra, ñeñtpa' ama torrapahuoyaye attoch yenter, tarro'mar ñeñtpa' e'ñe yesho'tsen. Ñaña ama echarroyaye attoch ye'ñoroña, tarro'mar ñeñtpa' e'ñe yeyochro'tsen." Ñeñtpa' ñeñtara ñoñets ñeñt' o' neserrpare'tatas atet añ poctetsa o'ch yame'ñera Cristo.

⁹ Tarro'mar ñerra'm cho ye'ñorena atto Jesús'pa' Yepartseshar yepeñ, ñaña ñerra'm e'ñe yeyochrocmañen yame'ñeña atto Yompor'pa' ahuo't tantater po'rromño'tpa', allochñapa' yapa'cho'ña a'queshpatareteycha'.

¹⁰ Tarro'mar ñerra'm yame'ñera Cristo yeyochrocmañen, Pomporñapa' e'ñech pocte' enteney, ñaña ñerra'm chochña ye'ñorena atto o' yame'ñera Cristo, attochña yapa' a'queshpatareteycha'.

¹¹ Ñaña Yomp'or po'ñoñ ñeñt' aquellca'huaret ahuatoteñ, ñeñtpa' atet oten: "Ama't erra'tsena ñeñt'cha' ame'ñerraya Yompor'pa' ñetña ellopa' amach alla es e'nerrete'te."

¹² Tarro'mar ama judioneshayaya ñapue't ame'ñenayoña Yomp'or. Ama't ñeñt' ama judioneshayaye, ñetpa'cho'ña attecma ame'ñeñet Yomp'or. Tarro'mar e'ñe patr'ra Yepartseshar ñeñt' e'ñe allohuenacpay. Shonte'ch esocmañen apa'yesuay ama't eseshaycha' ñeñtey enamueñe'.

¹³ Tarro'mar atet oten Yomp'or po'ñoñ: "Allohuenoteypa' ama't erra'tsenoteta chore'te' Yomp'or pueyochrocmañen attoch a'queshpataretterretpa' Yomporñapa' a'queshpaterranetcha'."

¹⁴ Tarraña amach erroteno't ye'chore'cheña Cristo ñerra'm ama cho yeyemteño. Ñaña amate' erroteno't yeyemteroña ñerra'm ama es ye'mare'tperro Cristocop. Ñaña amach erroteno't ye'mare'che ñerra'm ama eñalle ñeñt'cha' a'pote' po'ñoñ.

¹⁵ Ñaña amach erroteno't a'poteññañetoña Yomp'or po'ñoñ, ñerra'm ama ña llesense-nahueto. "Nanac cosheñtso'tseney ñerra'm esempo huapa ñeñt'cha' a'potose' cohuen ñoñets ñeñt' huetsa Yomporesho't alloch yocsherra e'ñe cohuen yeyochro'." Añpa' allohua ñeñt' e'ñe atet aquellca'huaret Yomp'or po'ñoño ahuatoteñ.

¹⁶ Tarraña ama't ñeñt' pue'maran Yomp'or po'ñoñ amaña allohuenacmaye' ame'ñereto añ cohuen ñoñets ñeñt' huetsa Yomporesho't. Ama't atet ote't' Isaías ahua't, ñeñtpa' atet ot: "Ama Nompore eseshaye' ame'ñenayo ñeñt' atet o' neserrpare'tatuanet." Arrpa' allohua ñeñt' atet ote't' Isaías ahua't.

¹⁷ Tarraña ama't atteñpa' elloña napa' o'ch notas, e'ñe yeserrpare'teño't Cristo po'ñoñ, acheñenesha'ñapa' o'ch e'mñoteñet. Allochñapa' e'ñe pue'mñoteño'tetpa' o'ch ame'ñeret Cristo.

¹⁸ Nato' sapa' chate' sotenapañ judionesha'pa' nato' amate' pue'mareto añ cohuen ñoñets ñeñt' huetsa Yomporesho't. Tarraña napa' o'ch notas, po'ño'chca'ye pue'maret tarro'mar atet oten Yomp'or po'ñoñ:

Ñeñt' a'potene' Yomp'or po'ñoñpa' o' eñotatyaset erracmañen arr patsro, o' epa'huamocha Yomp'or po'ñoñ erraparen.

¹⁹ Te'ña sapa' nato' chate' sotenapañ judionesha' ñeñt'ara israelena'tarpa' nato' amate' chenaneo't pueyochreto ñeñt' atet cotape'chen Yomp'or. Tarraña napa' o'ch notas, po'ño'chca'ye eñoteñetañ Yomporñapa' o'ch ame'ñaterrana ñaña po'poñ acheñ ñeñt' ama judioneshayaye. Nehua, ñanompa' o'ch neyerpaterrsa ñeñt' atet ote't' Moisés. Moisés ahua'tpa' ahuo't quellcanet añ ñoñets ñeñt' atet och Yomp'or, ñeñtpa' atet ot Yomp'or:

Napa' o'ch name'ñatera po'poñ acheñenesha' ñeñt' sapa' atta senteñ atet ñerra'mrrate' ama nechemereye' nepenaneto ñaña atta senteñ ñerra'mrrate' ama es eñoteneto.

Tarraña napa' o'ch name'ñatuerranet ñetpa' sañapa' e'ñe sempa'teño'tenpa' o'ch

se'moñe'terranet, tarro'mar allempo ñetpa' o'ch nechemerasha' neperranet ñamet. Arrpa' allohua ñeñt Moisés po'ñoñ ñeñt atet och Yompor ahuat.

²⁰ Allotpa' ñaña Isaiás ahuat ñaña'papa' ama mecha'tenano judionesha'. Ñapa' ahuo't eñotatanet ñeñt atet och Yompor, ñeñtpa' atet ot Yompor:

Po'poñ acheñ ñeñt ama judioneshayaye ama't ñetpa' ama eseshaye' ne'nenaye, ñetñapa' o' enterrnet. Ama't ama eseshaye' na'p'to'tenaye errotente'ña na ñeñt atet nepena, tarraña ñaña'papa' o'ch neñotaterranet ñeñt atet nepena.

²¹ Ñaña ellonet Isaiáspa' serrpare'te't atetcha' perra judionesha' ñeñt atet eñorena Yompor ñocpuet, ñeñtpa' atet ot Yompor: "Ñapa' nellapene'tcha' chore'tame'tene' añ acheñeneshar attoch ñetpa' o'ch ame'ñerrnet. Tarraña amachña eseshaye' name'ñenayo, chachña po'poñ entuennet allohuenet."

11

Atto judionesha'pa' a'ypo'ñare'ttenetañ, tarraña ama poctacmaye' a'ypo'ñenanetoña Yompor

¹ Tarraña ama't atteñ, napa' o'ch notas, po'ño'ch Yomporpa' ama e'ñe poctacmo' a'ypo'ña'huerrano pueyochresha'chno, ñeñtareta ñeñtet israelena'tarnesha'. Atet ñerra'm na, napa'cho'ña israelena'taren tarro'mar napa' po'mrenñen Abrahamañ ñeñtara Benjamíneñ mereñtsoren.

² Yomporpa' ama a'ypo'ña'huerrano pueyochresha'chno. Ñetpa' e'ñe eñotuanete't ahuat ñeñtcha' pueyochrenesha'chno pa'. Ñaña napa' neñoteñ amach a'ypo'ña'huerraneto, tarro'mar ñeñtpa' atet aquella'huaret Yompor po'ñoño ama't ahuatoteñ. Sapa' ama't seyerpuenoña ñeñt atet pe't Elías ahuat. Ñapa' ahuo't otteñe'chan israelnesha' e'ñe puema'yocheño't Yompor.

³ Ñeñtpa' atet otan Yompor ahuat: "Nompore, namo'tsesha' ñeñtara israelena'tarpa' epaye' muetsanatennapet ñeñt pa'm'tene' peñoñ. Ama't ñaña Nompore ñeñt altar ñeñt allot yeshbenpeñpa' o' e'ñe tore'tatuonapet. Ama't napa' o' e'ñe naptaña ñeñten pame'ñenaya. Ama't te' Nompore napa'cho'ña o'patennet ahuo'ch muetsanet naña." Arrpa' allohua ñeñt atet otteñe'chane't Elías pamo'tsesha' Yomporesho ahuat.

⁴ Arrñapa' atto eñorana'tana Yompor Elías ñeñtpa' atet och: "Amaca' paptayaya ñeñtep name'ñenaya, elloña eñallmeñ can'chroch mil israelena'tarnesha' ñeñt name'ñenaya ñeñt ama concorpana'tenana' ma'yochaya ñeñt aye'chcataret ñeñt sochenet Baal. Ñetñapa' nenenanet ellonet nocop." Arrpa' allohua ñeñt atet neyerpatensa atet ote't ahuat Yompor allempo eñorana'tana Elías.

⁵ Ñaña atet ñerra'm te'pa' attecma pena Yompor. Ama allohuenacmaye' a'ypo'ñenanetoña Yompor. Ñaña'papa' ama't puesheña'ttsapa' ahuo't ye'cherranet allochñapa' attochña e'ñe puemuereño'tanetpa' o'ch a'queshp'aterranet.

⁶ Tarraña e'ñe puemuereño'tanet ahuo't a'queshp'atanet. Amaña año'teyaye atto cohuen es ye'chcatyenet ñet. Tarro'mar ñeñt cohuen ye'chcatyenet ñerra'm allo a'queshp'atenetañpa' Yomporña puemuereña'papa' amate' a'queshp'atañeye' yenteñe.

⁷ Ñeñto'marña yeñoteñ, israelena'tarpa' ama allohuenacmaye' enterreto ñeñt e'nenet. Ñehua, ñeñt e'nenetpa' ñeñtpa' attoch e'ñe pocte' enterranet Yompor. Puesheña'ttsa enterre' ñeñt ye'chena Yompor. Tarraña po'potantañña'papa' ama enterreto ñeñt atet muenen Yompor ñeñt attoch e'ñe pocte' entuerrey tarro'mar ñetpa' chocma echarrenanet pueyochreto o'ch pet ñeñt atet muenen Yompor.

⁸ Ñetñapa' o' e'ñe atet pohuet ñeñt e'ñe atet anuaret Yompor po'ñoño ama't ahuatoteñ. Ñeñtpa' atet oten: "Yomporpa' ñach ama muenatahueto o'ch es chapahuet pueyochreto. Ama'tcha' cho es entenetañ ñeñt atet pena Yomporpa' amach chenaneo't pueyochreto

ñeñt atet muenen Yompor. Ñaña ama'tcha' e'mñoteññañetañ Yompor po'ñoñpa' amach çhapaneto pueyoçhreto ama't ahuatã ñeñt atet muenen Yompor. Ama't teme'ttsenpa' attecma penet." Arrpa' allohua ñeñt atet ote't Isaiás ñeñtcha' atet perra judionesha'.

⁹ Elloña Davidpa'çho'ña ñapa' atet ote't ahuat, ñeñtpa' atet ot:

Judionesha'pa' nanac a'nateña Yompor. Shonte' esocmañen echenet ñeñt alloch rrallme'chapretannenet. Tarraña ñeñtpa' çha shequënanet tarro'mar ñetpa' otenapuetã Yomporpa' e'ñete' pocte' entenanet. Tarraña ñeñtpa' ama atteyaye. Ñeñtpa' ñeñtcha'ña a'chencaterrahuet. Attoch e'ñe tsa'tatuerranet.

¹⁰ Ellopa' alla oterrerr David ñocpuet, ñeñtpa' atet ot:

Arepa'ch es çhapaneto pueyoçhreto ñeñt atet muenen Yompor, attetach ñerra'mrrate' aporo'yef ñeñt amach enteno. Chocmuepa'ch amuroçhtatarettenet e'ñech attet ñerra'mrrate' eñerr a'mo'ca'nenahuet ñeñt nanac amuroçhtatañ.

Atto Yomporpa' a'ypo'ñaneñ judionesha', ñeñtpa' añecop attoch a'quesçpaterran ñaña ñeñt ama judioneshayaye

¹¹ Tarraña ama't atarr atpare'tena judionesha', napa' o'ch notas, amach e'ñe a'ypo'ña'huereto poctacma Yompor. Tarro'mar e'ñe pa'tpare'teño'tet ñetpa' attoña Yomporpa' ahuo't ame'ñaterrana po'poñ acheñ ñeñt ama judioneshayaye attoch a'quesçpaterranet ñamet. Attochña judionesha'pa'çho'ña e'ñe puempa'teño'tet Yomporpa' ñato' o'ch alla ame'ñeret Yompor e'ñe cohuen.

¹² Atto atpare'tenan judionesha' Yomporpa' po'poñeçhnoña acheñenesha' arr patsropa' ahuo't çhapanet attoch ame'ñeret ñamet Yompor. Ñehua, atto ama't pa'tpare'teño'tetpa' yenpueñet po'poñ acheñ ñeñt ama judioneshayaye, yapa' yeñoteñ esempohuañen allempoch alla ame'ña'hueret Yomporpa' elloña pame'ña'hueño'tetpa' nanaccha' yenpueret po'poñ acheñ ñeñt ama judioneshayaye.

¹³ Ñeñtpa' atet notenes ñeñtes ama judioneshayayso tarro'mar napa' allsensareten nach serrpare'tene' Yompor po'ñoñ socop ñeñtes ama judioneshayayso. Ñeñto'marña napa' nocshena, atarr cohuen asherben nenteñ ñeñt atet llesensenen Yompor.

¹⁴ Tarro'mar allochña'pa' attoch name'ñatera ñeñt ama't ama judioneshayaye. Attochña ñato' judionesha' ñeñt e'ñe namo'tsna'taranetpa' e'ñe puempa'teño'tet Yomporpa' o'ch alla mueneret o'ch ame'ñeret ello atet sepene sa. Allochña'pa' attochña a'quesçpataretterret ñamet, ama't puesheña'ttsoa.

¹⁵ Tarro'mar ñeñt atto Yomporpa' ahuo't a'ypo'ñan judionesha', ñeñtpa' añecop attoch amo'tsterrana po'poñeçhno acheñenesha' arr patsro ñeñt ama judioneshayaye. Ñaña yapa' yeñoteñ ñerra'm esempohuañen allempoch judionesha'pa' o'ch alla ame'ña'hueret Yompor, attochña o'ch alla aguërranet; ñetña allempopa' çhach otterret ñerra'mrrate' rromot o' tantuerret.

¹⁶ Tarro'mar atto ñeñt ñanom judioneshatatset ahuatpa' ñetpa' anarettete't Partsocop, allochña'pa' po'mrenñenesha'pa'çho'ña ñetpa' acrare'tterretcha' ñamet e'ñe attecma. Ñato' o'ch yetma'ntacha atet pete't ahuat pocrramñ ñeñt nete't Partsocop. Ñeñt ñenma't pocrrametpa' ahuo'ch yoreñet coñe't ñeñt nanac cohuen ñeñtcha' nenet Yomporecop. Ñaña atto ñeñt ñanom pocrramñ yorenet Partsocoppa' ñeñtpa' e'ñe cohuen, añña allot yoret pocrrametpa' ñeñtña pocrramet orapa' e'ñech cohuenare'. Ñaña ñato' o'ch yetma'ntacha po'poñ ñeñt atet pena tsachreçh. Ñehua, ñerra'm erra'tsen tsach ñerra'm puerçhoçhno e'ñe cohuenare' puetaçreçhnopa'çho'ña e'ñech cohuenare'.

¹⁷ Te'pa' ñeñtes ama judioneshayayso napa' o'ch notas, Yomporpa' ahuo't ellopa'tetstatan patantarr judionesha' ñeñt atpare'tene' ña. Allochña'pa' attoch sapa' o'ch separrocmaterr epas ñeñt ame'ñenaya Yompor. Ñato' o'ch netma'ntacha atet pena tsach ñeñt otenet olivoçh. Ñehua, judionesha'pa' ñetpa' attet ñerra'mrrate' olivoçh ñeñt e'ñe

cohuen narmets. Tarraña ñato' ñeñt allpon puetaquërpa' ahuo't pecha'tam̄pset ahuo't huapore'chet. Allochñapa' attoch a'tapa'llateret epuet ñeñt puetsa'to'mar olivochtaquër ñeñt ama narmetsoyaye. Sa ñeñtes ama judioneshayaysopa' sapa' aña puetaquër sepene' ñeñt puetsa'to'mar olivochtaquër. Te'ñapa' o' a'tapa'llataterret olivochtacro allot apecha'taret ñeñt ahupore'taret. Allochñapa' attochña sapa'cho'ña o'ch separrocmaterr epas ñeñt ame'ñenaya Yompor, ñaña attoch sagapapreter Yompor pa'nateña ñeñt atet otane't Yompor judionesha' pa'tañneshañ ahua't.

18 Tarraña ama't atteña' sapa' amach sañeña nanac asherben sentatsterro. Ñaña amach sotatsto o'huañte' sherbenña añ judionesha' ñeñt toma'ntenaya olivochtaquër ñeñt ahupore'taret, tarro'mar sapa' señoche'pa'ch allotca'yeña huenaña sa sehua-menc tsachrecho't ñeñt atma'ntataret judionesha' pa'tañneshañ ahua't. Ama atteyayso ñerra'm ñeñt e'ñe pueta'cres o'ch ahua'mencat sepoñ puerech, tarro'mar ama atteyaye, puerechña e'ñe ahua'mencat sepene'ña sa.

19 Ñeñtes ama judioneshayayso, sapa' chate' sotenapañ so'te'ña nanac sherbets ñeñto'maro' Yomporpa' ahuo't pecha'tam̄psan judionesha' olivochtacro't allochñapa' atto'ch sapa' o'ch e'ñe separrocmaterr.

20 Tarraña napa' o'ch notas, ama't po'ño'ch o' a'ypo'ñare'tta judionesha' añecopña a'ypo'ñare'tterret e'ñe pa'tpare'teño'tet Yompor. Ñehua, te'ña sapa' e'ñe seyemteño'ta Yompor o' separrocmaterr sa. Ñeñto'marña o'ch notas, amach sommo'chatsto, e'ñepa'chña señcha'na'teño't same'ñeña Yompor.

21 Tarro'mar atto Yomporpa' ahuo't huapore'tan olivochtaquër ñeñt e'ñe pueta'cra ñeñt toma'ntenaya judionesha' ñeñt ama ame'ñenayo ña, sapa'cho'ña ñerra'm attach sepene samapa' ahupore'taret'escha' saña.

22 Señoche'pa'ch po'ño'ch Yomporpa' atarr cohuen amueraña. Tarraña ama't amueraña'pa' ama allocchama'metsoyaye, tarro'mar ñapa' chocmach tsa'taterrana ñeñt ama ame'ñenayo ña. Ñerra'm chocmach seyemteña atto nanac muerensa ñaña'pa' e'ñech cohuen entenes. Ñerra'm amach atet se'papa' sapa'cho'ña ahupore'taret'escha' atet ñerra'm tsachtaquër.

23 Ñaña ama't judionesha' ñeñt a'ypo'ñare'ttetsapa' ñerra'm o'ch alla ame'ña'hueret Yompor, ñaña'pa' o'ch alla parrocmataterret po'pocheño. Tarro'mar Yomporpa' nanac ahua'mencat, ña po'huamenco'tpa' o'ch alla parrocmataterret po'pocheño.

24 Tarro'mar sa ñeñtes ama judioneshayayso Yomporpa' e'ñe pocte' eñch o'ch parrocmataterres, ama't sapa' atet entenes ñerra'mrrate' nanac alla'paro'tsenes atet pena ñeñt puetsa'to'mar olivoch. Ñaña sapa' apechta'cre'chare'tes po'pcha'ño't, ñaña'pa' ahuo't a'parrocmaterres olivochtacro ñeñt narmets olivoch ama't sapa' ama e'ñe pueta'creyayso ñeñt narmets olivoch. Atto pocte' eñch Yompor ñeñt atet p'onas sa, elloña judionesha'pa' nanaccha' cohuen enterranet o'ch alla parrocmataterret, o'ch alla puetaquër p'aterranet olivoch ñeñt e'ñe ño puetaquër.

Atto judionesha'pa' a'queshp'atare'tterretcha' ñamet esempohuañen

25 Te'pa' o'ch masheñeshacha' ñaña no'chaneshacha' neñotatas ñeñt ahua'toteñ ama eñotpahuoyaye. Ñeñtes ama judioneshayayso napa' nemneñ o'ch e'ñe seño'ch allochñapa' attoch amach sota'psa'tatsto sapa' atarro' es seño'ten. Ñeñt atet a'tpare'tena patantarr israelena'tarpa' ñeñtpa' mamecpa atet muenatenanet Yompor tarrempohuach allem-poch e'ñe etsotua attoch ame'ña'huerra allpon acheñenesha' ñeñt ama judioneshayaye.

26 Allempochña allohuen israelena'tarnesha'pa' a'queshp'atare'tterretcha' ñamet. O'ch etsoterra e'ñe atet aquellca'huaret Yompor po'ño'ñ ahua'toteñ, ñeñtpa' atet ote't Yompor:

Ñeñtcha' a'queshpatterahueta' huapach. Arro'tcha' huapa ñeñt anetserpa' añ pa'so'cheñ Sión. Ñeñto'marña pamo'tsna'tarcha' p̄osan israelena'tarnesha'. O'ch huapapa' a'huañañperrancha' Jacoboñ po'mñreneñ* ñeñt atto nanac atpare'teñet Yompor.

27 Allempochña nahuanmañperranet po'chñaretpa' allempochña etsoterra ñeñt atet notanete't ahuat ñeñtcha' atet neperranet esempo. Arrpa' allohua ñeñt atet ot Yompor ahuat.

28 Tarraña te' Yomporpa' atet entenanet ñerra'mrrate' ñeñt e'moñe'tene' tarro'mar ñetpa' ama mueneto o'ch ame'ñeññañet po'ñoñ ñeñt alloch po'ñoñch yequeshperra. Tarro'mar atet pena allochñapa' o'ch sa'queshpataretterra samña ñeñtes ama judioneshayayso. Tarro'mar Yomporpa' ahuatoteñ acrane't judionesha' ñeñtcha' atarr morrentena tarro'mar ñeñt pa'tañneshañ pete'tpa' ña a'crahuete't ahuat ñeñtcha' atarr morrentena.

29 Tarro'mar Yomporpa' ama puenesho po'ñoñ. Ate't otanete't ahuat ñeñtcha' o'pataterranetpa' e'ñech etsotuerra. Ñaña atet otanete't ñeñtcha' atet chore'terranet attoch e'ñe ame'ña'hueretpa' ñeñtpa'cho'ña e'ñech etsotuerra.

30 Ahuat sapa' atarr satpare'che't Yompor, te'ñapa' judionesha' atet petsa atet satpare'te't sa ahuat. Tarraña te'pa' allempo atpare'ta judionesha'pa' ñeñtpa' attoch Yomporpa' o'ch muererrsa samña.

31 Ñaña te'pa' atto judionesha' attecma atpare'teñet Yompor atet satpare'che't samña ahuat, ñetpa'cho'ña muererranetcha' atet muerensa samña te'.

32 Tarro'mar atet penaña Yompor. Ñapa' muenatenan ora pa'namen acheñ o'ch atpare'tyeñet allochñapa' attochña ellopa' o'ch alla muererraneterr allohuenet.

Atto Yomporpa' ama eñotpahuoyaye ñeñt e'ñe atet cotape'chen ña

33 Yomporpa' puemorrenteño'tpa' esocmañen apa'yeney, ñeñtara Parets ñeñt atarr eñotañtetsa. Shonte' esocmañen eñoten pa'namen. Ya arromñañteypa' amate' erro'tenot yeñotuoñeña ñeñt atet penaña ña. Ñaña ama't mameshapa' amate' erro'tenot chaponayoña ya yeyo'chro ñeñt ora allpon ñeñt atet cotape'chyen ña.

34 "Tarro'mar yapa' ama't puesheñarro'teya amate' erro'tenot yeñotuoña ora ñeñt atet cotape'chen Yompor. Ñaña yapa' ama't puesheñarro'teya amate' erro'tenot yoc'tape'chacheña Parets.

35 Ñaña yapa' ama't puesheñarro'teyapa' amate' erro'tenot yetsa'choña Yompor attoch aphuerrey ñeñt yemnen ya."

36 Tarro'mar ama't allohuen ñeñt allpon es eñalleteyetsa e'ñe Yomporeshotecma huena, e'ñe ña po'huamencot eñalletena, ñaña e'ñe ñocop ye'chcatue. E'ñepa'ch ya'ye'cho'chtateññañ tayoteñ ama't errponañohuen. Ñeñtpa' attetepa'ch Nompore.

12

Atto añ poctetsa o'ch e'ñe yaphuer Yompor yechets

1 Ñeñto'marña te'pa' o'ch masheñneshacha' ñaña no'chaneshacha' notas, atto Yomporpa' atarr muerenya, yapa' añ e'ñe poctetsa o'ch yaphuer Yompor yechets. O'ch yaphuer allohuen yechets atet ñerra'mrrate' ñeñt muetsete't ahuat Yomporecop ñeñtcha' nenet ñocop. Tarraña ya yechets e'ñech betnatot yaphuer Yompor tarro'mar ñeñtpa' e'ñech ñocpa, ñeñtcha' nanac coshatene' ña. Attochña e'ñech yeyo'chrocmañen cohuen yoc'ter Yompor.

* 11:26 Ñeñt otenet israelena'tarnesha', ñaña sióno'marnesha', ñaña Jacob po'mñreneñ, ñaña jerusaléño'marnesha' ñetpa' ñeñfareta judioneshet.

² Allochñaapa' amach allo'na atet es yepatse'tyesneno ñeñt atet yeychen ya aña patsro, ellochña yoctape'cherr etserra attoch etserrataterrnay Yompor yoctapña. Attochña e'ñe cohuen señoch erra'tsente'ña muenen Yompor ñeñt e'ñe cohuen enten ña, ñaña ñeñtcha'ña coshatene' e'ñe poctacma.

Atto Yomporpa' ama pocteye' entenye o'ch yot yañeña yo'ña nanac sherbets

³ Yompor puemuereñoenpa' ahuo't llesensenen attoch nach torretsa ñocop. Ñeñto'marña te'pa' notenes ñeñt atet muenen Yompor. Ama't puesheñarrotesapa' amach sentatsto sañeña ñeñteso' ello nanac sherbets. Añcha'ña pocte' sentena allpon sesherben atto puesheña'ttsos Yomporpa' ahuo't apa'yesas attoch e'ñe seyemteñoñ setorra'yesa ñocop.

⁴ Ñato' o'ch yetma'ntacha ñeñt atet pena yechets. Ñehua, yechetspa' ama e'ñe patrrayaya, atet ñerra'm yeclle' ñaña yot ñaña yetac. Ñaña ama e'ñe patrrayaye sherbenye, e'ñe po'poñe'ttsocma sherbeney. Tarraña ama't po'poñe'ttsocma sherbeneypa' e'ñe yocma yechets yepohueñ, tarro'mar e'ñe patrra yechets atet petsa.

⁵ Ñaña attecma yepena allohueney ñeñtey ame'ñenaya Cristo. Ama't shonteyeñ ñaña ama'tcha' po'poñe'ttsocma yetorra'yesa ñocoppa' ñaña'ña e'ñech patrra enteney, atet ñerra'mrrate' e'ñe po'chets peney. Attochña e'ñech yeparrocmaten e'ñe puesheña'ttsoy epay Cristo. Attoña e'ñe yeparrocmateñoñ Cristopa' o'ch yeparrocmatuahua allohueney ñeñtey ame'ñenaya Cristo.

⁶ E'ñech po'poñe'ttsocma yetorra'yena Yomporecop, tarro'mar ñapa' ahuo't apa'yesey e'ñe po'poñe'ttsocma ñeñtcha' atet yesherbe' e'ñe cohuen. Ñehua, ñerra'm añ apueney alloch ya'potoñ po'ñoña' ya'potepa'ch errponcha' yemtatenya.

⁷ Amapa' ñerra'm añ apueney attoch yesherbe' po'psheññechno e'ñepa'chña cohuen yesherbenanet. Amapa' ñerra'm añ apueney attoch yeychateñ po'psheññechno e'ñepa'chña cohuen yeychatyenanet.

⁸ Amapa' ñerra'm añ yeñoten attoch yoctape'chatyesanet ñeñt cohuentetsa Yomporecop, e'ñepa'chña cohuen yoctape'chateñ acheñenesha'. Amapa' ñerra'm añ yeñoten attoch es yapa'yes acheñenesha' ñeñt es pallta'yetsapa' e'ñepa'chña yeñmañeshocmañen es yapa'yenanet, amachña cha yempa'tana'tatsche. Amapa' ñerra'm añ yeñoten attoch ya'mcha'tarettena, e'ñepa'chña yocsheñeshocmañen ya'mcha'tarettena, amachña cha yemuenme'chatsche. Amapa' ñerra'm añ yeñoten attoch yeyenpue' ñeñt muerochtetsa, e'ñepa'chña yocsheñesha' yeyenpuenanet.

Atetcha' pa'yesa ñeñt pueyochresha' pen Cristo

⁹ Amorrentanna'tpahuepa'ch yentannena e'ñe yeñmañeshocmañen. Ñaña allohuen ñeñt ama cohuenaye' enteno Yompor o'ch e'ñe ya'mñechya nanac attoch ya'ypo'ñe'. Tarraña allohuen ñeñt e'ñe cohuen enten Yomporpa' amach cha ya'ypo'ñatsche.

¹⁰ Ñaña añ poctetsa amorrentanna'tpo'ch yentannena allohueney atet ñerra'm po'ñoñ e'ñe yemo'nasheñ yepannena. O'ch atet yeñch po'psheñeñ ñapa' atarr sherben, amachña yañeña nanac asherben entetso.

¹¹ Amach cha secllana'tatsto torraya ñeñt cohuen enten Yompor. Añcha'ña e'ñech seyoçhrocmañen sesherbe' Yepartseshar atto ahuamencat penes Parets Puecamquëñ.

¹² Ñaña e'ñepa'ch socshena tarro'mar yapa' e'ñe yeyemteñoñ yecuenña ñeñt o'patatenya Yompor. Ñaña ñerra'm esempo huaponasa muerochteñets e'ñepa'chña sa'huante'. Ñaña chocmuepa'chña sema'yocheña Yompor.

¹³ Ñaña ñeñt pueyochresha' pen Yompor ñerra'm esempo es pallta'yenet, sañapa' sapa'yesanetcha' ñeñt pallta'yenet. Ñaña e'ñepa'chña cohuen sagapannena sepaclo.

14 Ñaña añ poctetsa o'ch senamoñ Yompor attoch a'natana ñeñt se'moñe'tene'. Amachña cha sarrnomare'tatscho.

15 Ñaña ñerra'm esempo esesha' atarr coshetsa, sapa'cho'ña socshapretanetepa'ch. Ñaña ñerra'm esempo esesha' yahuetsa puellquëñoť, sapa'cho'ña sellcapretanetepa'ch.

16 Amachña cha atsrre'mo'chen sentanna'teno. Ñaña amach aña se'natsto attoch sommo'chena. Añcha'ña pocte' senten o'ch seyemteña ñeñt ama esoshe'maye' entyeneto. Ñaña amach sentatsto sañeña, so'ña e'ñe sapuet atarro' es señoten.

17 Ñaña ñerra'm po'psheñeñ erroťen p'aspa' sapa' amach setsa'tatatsche ama't coñe'ta. Sapa' añcha'ña e'ñe sema'yochra ñeñt chocma sepena ñeñt cohuen enten allohuen acheñenesha'.

18 E'ñe puešheña'ttsospa' chochña se'nyes ñeñtcha' atet sepa'yey ñeñt pocte' enten allohuen acheñenesha'; attochña e'ñe cohuen sentannena. Allochñapa' o'ch socrrena e'ñe cohuen muechet e'ñe sagattsa ñeñt parro'marneshas.

19 Te' o'ch masheñeshacha' ñaña no'chaneshacha' e'ñe nemorrenteñoťespa' o'ch notas, ñerra'm esempo po'psheñeñ erroť p'aspa' sañapa' ama't coñe'tapa' amach setsa'tatatsche. Añcha'ña semnat Yompor atto ñapa' tsa'taterranetcha'. Tarro'mar ñeñt'pa' atet oten Yompor po'ñoñ ñeñt anuaret ahuatoteñ. Allempo atet otanete't Yompor, ñeñt'pa' atet ot: "Napa' naña ñeñten atsa'tatañen, napa' nach tsa'tatuerrahuet." Arrpa' allohua ñeñt atet ote't Yompor.

20 Añcha'ña atet sepoñ ñeñt se'moñe'tene' ñeñt e'ñe atet oteney Yompor po'ñoñ. Ñehua, ñeñt'pa' atet oten: "Ñeñt se'moñe'tene' ñerra'm esempo cheporrenapa' sañapa' sapepa'ch ñeñtcha' rra'. Ñaña ñerra'm esempo oñpa'ten sañapa' sapepa'ch ñeñtcha' orr. Ñerra'm atetcha' sepe'pa' ñaña'ña o'ch penquëna nanac. Atarrcha' atserr e'man atto penquëna. Allempoñapa' ñato' e'ñe puepenquëñoťpa' ñeñtcha'ña cotape'chaterre' cohuen."

21 Ñeñto'marña notas, ñerra'm esempo po'psheñeñ erroť p'aspa' sapa' amach sañeña muenatstaye o'ch alla setsa'tatera. Añcha'ña atet sepa' ñeñt e'ñe cohuentetsa. Ñerra'm atet yepenapa' e'ñe yepeñoť cohuenpa' o'ch ya'huañat ñeñt ama cohuenayaye.

13

Atto añ poctetsa o'ch yame'ñeña ñeñt añcha'taretetyetsa añe patsro allochñapa' attoch yocrrena e'ñe cohuen muechet

1 Ñaña añ poctetsa e'ñe puešheña'ttsoypa' o'ch yame'ñya ñeñt añcha'taretetyetsa ñeñt pueyochresha' pen gobierno'. Tarro'mar amach eñallñeña ñeñtcha' añcha'taretetyetsa ñerra'm ama Yompor muenatenahueto o'ch atet pet. Tarro'mar ñeñt añcha'taretetyetsa arr patsropa' ñetpa' Yompor muenatenahueto o'ch atet pet.

2 Ñeñto'marña yeñoteñ ñerra'm esesha' atpare'tene' ñeñt añcha'tarettetsa arr patsro ñapa' añe'na atpare'ten Yompor, tarro'mar Yomporpa' ña muenatenahueto o'ch añcha'taretetyenet arr patsro. Ñaña ñeñt atpare'tene' ñeñt añcha'tarettetsa arr patsro ñapa' e'ñe ñañeña patpare'teñoť atsa'tatarettach.

3 Ñaña ñerra'm chocma ye'pa'yen ñeñt cohuen enten añcha'taretpa' amach añcha'no'chenaye' yenteñeña ñeñt añcha'tarettetsa, tarro'mar e'ñe atto'tapa' amach erroť pa'ye. Tarraña ñeñt atpare'tene' ñeñt atet muenen añcha'taretpa' ñetñapa' atarrcha' añcha'no'chen enteñeña añcha'tareť tarro'mar añcha'taretpa' chocmach tsa'taterranaña ñeñt atpare'tene' ña. Ñehua, ñerra'm ama semno o'ch añcha'no'chen señch añcha'taretpa' e'ñechña cohuen es sepa'yen, attochña añcha'taretpa' e'ñech cohuen entenes, amach erroť p'aso ama't mamesha.

4 Tarro'mar ñeñt añcha'tarettetsa arr patsropa' añ torrenet ñeñt atet muenatenanet Yompor, allochñapa' attoch a'poctatenet esheccha' e'ñe cohuen yocrrena arr

patsro. Tarraña ñerra'm añ atet sepen ñeñt ama cohuenayayepa' pocte'ñacho'ña allochñapa' attoch semicha'teñ amcha'taret, tarro'mar ñapa' ama orrena amcha'taretteno, chocmach tsa'tatana ñeñt atpare'tene'. Tarro'mar ñapa' Yompom muenatene' ñapa' ñach tsa'tatenaya allohuen ñeñt atet pene' ñeñt ama cohuenayaye.

⁵ Ñeñto'marña añ pocte' o'ch yame'ñya ñeñt amcha'taretetsa arr patsro, allochñapa' attoch amach tsa'taterrye Yompom e'ñe ya yatparñoñ. Elloña ñeñt atet yame'ñena, tarro'mar e'ñe yeyochropa' yeñotena ñeñtpa' e'ñe pocte' o'ch e'ñe yame'ñena.

⁶ Ñeñto'marña ñaña añ poctetsa o'ch yetsa'ta impuesto, ñeñt atet anaret ñoñets ñeñt cobrenyet amcha'tareteshot tarro'mar ñeñt amcha'taretetyetsa añ patsro, ñeñtpa' atet muenatenanet Yompom ñeñtcha' atet torrenet ñeñt po'taruas penet.

⁷ Chocmach setsa'ta allohuen ñeñt atet anaret ñoñets atto cobrenyet atet ñerra'm allpon quelle ñeñt enamueney amcha'taretnesha' atet ñerra'm impuestočno, chocmach setsa'cha. Ñaña achen ñeñt amcha'na'tpo' entenetpa' chocmuepa'ch semicha'na'tueñ. Ñaña achen ñeñt atarr amorrentaretapa' chocmuepa'ch semorrentueña.

⁸ Amach esesha' setebatsto, ama't puesheñarra. Añcha'ña sepa ñeñt poctetsa socop, o'ch semorreñcha samo'ts. Tarro'mar ñerra'm e'ñe yemorrenteña yamo'tspa' attochña yetsotua ora Yompom po'ñoñ ñeñt atet anaret ñeñtcha' atet yepenamet e'ñe cohuen.

⁹ Atet ñerra'm paterr ñoñets ñeñt atet anaret ñeñtpa' atet oten: "Amach sech-tapretanna'tatsto setapor." Po'poñ ñoñetspa' ñeñtpa' atet oten: "Amach semt-sanna'tatsto." Po'poñpa' atet oten: "Amach setyesatsto"; po'poñpa' atet oten: "Amach setoma'tam̄psatsche samo'ts." Po'poñpa' atet oten: "Amach seye'chapretanna'tatsto", ñaña eñall po'poñečno ñoñets ñeñt atet yechateney. Allohuen añ ñoñets ama't po'poñe'ttsochma atet yechateney, tarraña po'ñoçhpa' e'ñe patrra oteney, ñeñtpa' atet oteney: "Atarrepachña yemorrenteña yamo'ts e'ñe atet atarr yemorrentena yañeña." Ñerra'm chocma yemorrenteña yamo'tspa' allempoña po'ñoçhpa' yetsotuach ora allohuen ñeñt atet yechatyeny po'poñe'ttsochma ñoñets ñeñt atet anaret.

¹⁰ Tarro'mar ñerra'm po'ñoçh chocma yemorrenteña yamo'tspa' amach yemno o'ch erro'yepanet te't cha yelcatenanet. Añečno atetpa' ama morrenteñtsoyaye. Ñeñto'marña yeñoteñ ñerra'm po'ñoçh chocma yemorrenteña yamo'tspa' ñeñtpa' attochña e'ñe yetso-tua ora allohuen ñoñets ñeñt atet anaret ahuatoteñ Yomporeshot.

¹¹ Atetcha' sephua ñeñt atet o' notuas, tarro'mar yeñoteñ o' chapmoch allempoch huerra Cristo, ñeñto'mar socoppa' añ poctetsa o'ch alla setanterra Cristocop amachña seçllañoña es sepa'yeno atet ñerra'm cha semuen. Tarro'mar ahuañmo'cha allempo ñanom yame'ñera Cristopa' allempo atarr atomat palltenmeñ attoch ya'qeshpataretterra. Tarraña te'pa' ama atarr atomatmeñeyaye. O' mameshamerra attoch ya'qeshpataretterra.

¹² Arr patsropa' eñall shonte' sosya'tsañečno. Ñato' o'ch yetma'ntacha atet ñerra'mrrate' yapa' checmeta yeyçhena. Tarraña te'pa' e'ñe atet pena ñerra'mrrate' o' metuamoch checmete' o' puetarenmoch, tarro'mar yapa' yeñoteñ o' chapmoch allempoch huerra Cristo. Ñeñto'marña añ poctetsa o'ch yesuanom allohuen ñeñt ama cohuenayaye ñeñt atet atma'ntataret checmete'. Añcha'ña atet yepa'yen ñeñt cohuen enten Yompom ñeñt atet atma'ntataret puetare'. Attochña yetorrena Yomporecop atet ñerra'mrrate' cho yeçllarena ñocop.

¹³ Añepachña yepa'yen cohuen ñeñt atet penet yeño, ñeñt ama apencoçhenayaye ñeñtpa' ama atteyaye ñerra'm ñeñt atet penet tsapo. Amach yocapretatsto all nanac coshena aposañeçhno, e'ñe porrare'teñoñet all atarr pa'namen coshatse'tyenet. Ñaña amach yeçhta'yestatsto coyaneñeçhno, amach atet yepatsto ñeñt pa'namen

sosya'tsañechno. Amach ye'natsto atsrre'mochen, ñaña amach ye'moñe'tanna'tatsto e'ñe yesope'cheñoť.

¹⁴ Añcha'ña ahuamencat sepene' Yepartseshar Jesucristo, allochñapa' attoch amach semnatatsto sechets o'ch muenatse'tatas ñeñť ama cohuenayaye.

14

Atto eñall ñeñť epuoye' ame'ñenayañ Cristo tarro'mar ama huomencaye' penano pueyočher Yomporecop

¹ Ñaña te'pa' o'ch notas po'poñ ñeñťcha' atet sepa. Ñerra'm eñall sesho acheñ ñeñť ame'ñetsañ tarraña ñapa' ama huomencaye' penano pueyočher Yomporecop tarro'mar ama e'ñe eñoteñe po'ñočh atet yeyemteña Cristo, sañapa' o'ch sagaḡ e'ñe cohuen attochña e'ñech parrocmá seyemteña Cristo. Tarraña amach añečpa sagape attoch sapa' o'ch sotnare'ch tarro'mar ñapa' po'poñoneť cotape'chyen.

² Atet ñato' eñall acheñ ñeñť ama huomencaye' penano pueyočher Yomporecop tarro'mar ama e'ñe eñoteñe ñeñť atet po'ñočh yeyemteña Cristo; ñeñťo'marña ñapa' čhach oten ama pocteyaye o'ch yerra'yes berr po'chets, añach paťerr yerren narmet-sočhno. Elloña po'psheññechno e'ñe pueyemteñoťet Cristo ñetñapa' otenet e'ñe pocte' o'ch yerra'yes ama't erra'tsena rreñets.

³ Ñeñťey pa'namen es rra'yetspa' amuepa'ch yentatsche ñeñť tore'tetsa ñapa' ama es eñoto. Ñaña ñeñť es tore'tetsapa' amuepa'ch otatsetye ya ñeñťey pa'namen es rra'yets ama pocteyaye o'ch yerratse'tyes pa'namen ñeñť ama arrapahuoyaye. Tarro'mar Yomporpa' ñaña o' aguërrey attoch pueyochresha' perrey.

⁴ Ñeñťo'marña yapa' yeñoteñ ama pocteyaye o'ch yotanna'tena e'ñe yagattsa Yompor pueyochresha'pa' ama pocteyaye ñeñť atet penet. Tarro'mar ñetpa' Ayochreshatecpuet tarro'mar ñapa' ñaña ñapueť otets atto pocte' entenan pueyochresha' amapa' ñerra'm ama pocteye' entenano pueyochresha'. Ñaña Ayochreshat Cristopa' čhocmach e'ñe pocte' entenan pueyochresha' tarro'mar ñapa' ñach ahuamencat pahuet pueyočhro.

⁵ Ñaña ñato' eñall acheñ ñeñť ama e'ñe eñotenaye ñeñť atet e'ñe po'ñočh yeyemteña Cristo, ñeñťo'marña ñetpa' čha otenet añ poctetsa o'ch yonañcha'yen paťe'tets yet ñeñťcha' atet yetsotayes attochña e'ñe pocte' enteney Yompor. Ñaña ñato' po'psheññechno ñeñť atet ñerra'm yapa' otenet ama yepallteno o'ch yonañcha'yen paťe'tets yet ñeñťcha' atet yetsotayes tarro'mar allpon yetpa' Yomporecma pueyečcatuar. Tarraña puesheña'ttsoypa' yeñochepa'ch ñeñť e'ñe pocte' yentyen ya e'ñe yeyočhro ñeñťcha' atet yeḡa.

⁶ Tarro'mar ñerra'm esesha' onañcha'yene' yet ñeñťcha' atet etsotayes, ñapa' atet oten ñeñťpa' atet yame'ñeña ya Yompor. Attecma yepena yaña ñeñťey ama onañcha'yenaye yet, yapa'čo'ña atet yame'ñeña Yompor. Ñaña ñeñťey pa'namen es rra'yetspa' yapa'čo'ña atet yame'ñeña Yompor, tarro'mar yeparasyoso'teñesha' Yompor es yerra'yen. Attecma pena ñaña ñeñť es tore'tetsa, ñetpa'čo'ña atet ame'ñeñet Yompor ñaña ñetpa' e'ñe pueparasyoso'teñeshet Yompor es tore'tyenet.

⁷ Tarro'mar ama e'ñe ya yemneññoťeye' atet es yeḡa'yeno añe patsro. Atto yocrrena añe patsropa' ñeñťpa' ama e'ñe yapťecpayaye, ñaña allempoch yerromapa' ñeñťpa'čo'ña ama yemneññoťeye' yerromueno.

⁸ Tarro'mar atto yocrrena allponmat añe patsro ñeñťpa' añecop attoch yesherbeñ Yepartseshar. Ñaña allempo yerromuenpa' ñeñťpa' tarro'mar atet muenateney Yepartseshar. Ñeñťo'marña yapa' yoten allempo yocrrena añe patsro ñeñťpa' ama yapťecpaye' yocrreno, ñeñťpa' Yepartsesharecop. Ñaña allempo yerromuen, ñeñťpa'čo'ña ama

yaptecpayaye, ñeñtpa'cho'ña Yepartsesharecop. Ñeñto'marña ñeñtpa' chocma atet pena tarro'mar ñapa' e'ñe o'paterrya ñaña e'ñe ñocpay.

⁹ Tarro'mar Cristopa' ñeñtecop rroma, elloñapa' alla correrra attochña ñapa' ñach yamo'mte' yepen allohueney. Ama't allempo yocrrenmeñ, ama't ñaña allempo yerromuen, atterach yamo'mte' yepeñ, tarro'mar ñapa' pueñotuaran atet peney rromueñets ñaña atto yocrrena ñeñtey arromñañey.

¹⁰ Ñeñto'marña amach yotatsche yemo'nasheñ ñeñt atet pena ñapa' ñeñtpa' ama pocteyaye. Ñaña amach yotatsche ñapa' ama es eñoteno. Tarro'mar Cristo ñapa' ñach yoterre' errotench'a' entyerrey esempohuañen allempoch yapcherra allohueney ñesho.

¹¹ Tarro'mar Yompor po'ñoñ ñeñt anuaret ahuatoteñpa' ñeñt allpa' Yompor otatset atet:

Napa' na ñeñten ama arromñañeshayayno ñaña ama puenesho neñoñ. Po'ñoçhpa' atetcha' perra esempohuañen. Ora allohuen acheñenesha'pa' concorpanrrorter-rnetcha'. Allñapa' otuerrnetcha': "Pa Yomporep ñeñtep atarr Partsop."

¹² Attoña yeñoteñ allohueney puesheña'ttsoy Yomporpa' a'metataterreycha' ñeñt atet o' yeñohuahuaena arr patsro.

Atto ama pocteyaye e'ñe atet yepeñoñ ya o'ch alla ya'puerratater yemo'nasheñ

¹³ Ñeñto'mar ama pocteyaye o'ch yañeña yotanna'ta ñeñt atet yentannena arr patsro. Añcha'ña yañeña e'ñech yeñotena ñeñt atet yeña'yena ya tarro'mar ñeñt atet yeña'yena yapa' ñato'rraña chate' ya'puerratater yemo'nasheñ ñerra'm ñapa' ama pocteye' entenano ñeñt atet yeña'yen ya.

¹⁴ Napa' e'ñe neyemteñoñ Yepartseshar Jesús neñoteñ e'ñe pocte' o'ch es yerra'yes tarro'mar neñoten allohuen rreñetspa' e'ñe arrapahuocma Yomporecop. Tarraña ñerra'm esesha' ama arrapahuoye' entenaye ñeñt allohuen rreñetspa' e'ñe ñocoppa' ama pocteyaye o'ch rrenan ñeñt rreñets.

¹⁵ Ama't e'ñe poctet o'ch yerra'yes, tarraña ñerra'm yemo'nasheñpa' ama arrapahuoye' enteñe, yapa' e'ñe ya yerreñoñpa' ñato' o'ch yeye'chateña allempoñapa' o'ch rre' ñaña, ñaña'pa' chach enteñ ñeñtpa' ochña'teñets Yomporecop. Atteñapa' ñato' o'ch alla puesuerran Yompor. Ñato' yerreñoñ ama't e'ñe cohueñeñpa' o'te' yequeçpatater yemo'nasheñ Yompor. Ñeñto'marña notenes, amach yerratsto allempo, te't ñeñto'mara yequeçpatater yemo'nasheñ Yompor. Ñaña ñerra'm atet yepeñ yemo'nasheñpa' po'ñoçhpa' ama yemorrenteño, ñeñtara yemo'nasheñer ama't Cristopa' ñocpa'na rroma.

¹⁶ Ñeñto'marña notenes, ama't poctet ñeñt atet yeña'yena, tarraña ñerra'm yemo'nasheñpa' ama pocteye' enteñe, ñaña'pa' ñeñto'tach sasare'teney. Ñehua, ama't e'ñe poctet o'ch atet yepenañ, tarraña amach atet yeñatsche.

¹⁷ Tarro'mar ñerra'm añ yocteññañ Yompor po'cohueñña atto pueyochresha' peney, ñeñt atto es yerra'yen amapa' atto es yetore'tyena, ñeñtpa' ama esoyeña Yomporecop. Añña ñeñt nanac sherbets attoch yocteññañ Yompor po'cohueñña, ñeñtpa' atto e'ñe pocte' es yeñannena añe patsro, ñaña atto e'ñe cohuen yentannena attochña yocrrena e'ñe cohuen muechet, ñaña attochña Parets Puecamquëñpa' chocmach coshateney yeyoçhro.

¹⁸ Ñerra'm atetcha' yame'ñeña Cristo, Pomporña'pa' e'ñech cohuen enteney, ama't allohuen acheñenesha'pa'cho'ña e'ñech cohuen enteneyet.

¹⁹ Ñeñto'marña napa' notenes, añepa'chña ye'nen ñeñt attoch e'ñe yeparrocmaterr allohueney ñaña attochña e'ñe cohuen yeyenpannena. Allochña'pa' allo'nach e'ñe huomenc yeñanna'tnena yeyoçher Yomporecop.

²⁰ E'ñe ya yerreñoñ po'chetSPA' amach ya'huañatatsterrñañe po'psheñeñ ñeñt atet ame'ñenanañ Yompor. Ama't allohuen rreñtsoçhno cohuenacmañ ñeñtcha' yerra'yeneñ,

tarraña ñerra'm yerreñoť o'ch alla ya'puerratater po'psheñeñ attoch o'huañcha' ame'ñenana Cristo, ñeñtepnapa' e'ñe pocte' amach yerratsto ñeñtcha' a'puerrataterre' po'psheñeñ, tarro'mar atetpa' ama cohuenaye' enteñe Yompor.

²¹ Ñeñto'marña notenes, ama't erra'tsena ñeñť atet yepeñoť po'psheñeñpa' o'ch alla ya'puerratater, ñeñtepnapa' amach atet yeťatsto, allochñapa' amach puerrerro ama't puesheñarra ñeñť ame'ñenaya Cristo. Atet ñerra'm allempo yerren berr po'chets ñaña allempo yorren co'nes,* ñerra'm atet yepeñoť o'ch alla ya'puerratater yemo'nasheñ, ñeñtepnapa' añ poctetsa amach yerratsto berr po'chets, amach yorratsto ñaña co'nes, tarro'mar allempopa' ama cohuenaye' enteñe Yompor.

²² Ñerra'm e'ñe pame'ñeñoť Yompor peñotena ñeñť atet pepa'yena ñeñtpa' e'ñe pocte' entapretenep Yompor, tarraña papa' e'ñech peyočhro poctape'cheñ Yompor atet, amachña čha pe'matare'tatstoña allo. Nanac cosheñtso'tseney ñerra'm yeñotena po'ñočh e'ñe pocte' entapreteney Yompor ñeñť atet es yepa'yen, tarro'mar yeyočhropa' ama epuoye' es yepa'yeno.

²³ Tarraña ñerra'm esesha' ñeñť epuoye' es rra'yenpa' ñocoppa' ama pocteyaye o'ch rren, ñañaapa' ñeñtaña po'chñar pen. Tarro'mar ama pueñmañeshocmañenaye' es rreno, ñaña yapa' yeñoteñ ñerra'm ama yeñmañeshocmañenaye' es yepa'yeno, ñeñtpa' ñeñta yo'chñar entennay Yompor.

15

Atto añcha'ña ye'nen ñeñť e'ñe pocte' enten yemo'nasheñ

¹ Ñeñto'marña napa' notenes, ñeñtey e'ñe huomenc pene' yeyočher Yomporecop, ñeñtey ama epuoye' yame'ñeño Yompor, añña poctetsa o'ch yeyenpueñ yemo'nasheñ ñeñť ama huomencaye' penaye pueyočher Yomporecop ñeñť chocma epuoye' ame'ñenana Yompor. Ñeñtpa' atetcha' yeyenpueñ, amachña añña atet es yepa'yeno ñeñť atet yemnen ya.

² Añcha'ña ye'nen o'ch atet yepen ñeñť e'ñe pocte' enten yemo'nasheñ. Ñeñtpa' atetcha' yeyenpueñ allochñapa' o'ch e'ñe huomenc pa'nman ñaña pueyočher Yomporecop, allochñapa' amach allo'na epuoye' ame'ñenano Yompor.

³ Amach añña atet es yepa'yeno ñeñť atet yemnen ya tarro'mar Cristopa' ama añña atet pa'yese'te ñeñť atet muene't e'ñe ñañaña. Añña pa'yese't ñeñť muenache't Pompor. Tarro'mar ñapa' ñeñtecopña muerochte't ñeñť atet muenache't Pompor. Ñeñto'marña Cristopa' atet otane't Pompor, ñeñtpa' atet och: "Pa e'moñe'tetañpa' attoña sasare'tennet." Attoña e'ñe etsoterra ñoñets ñeñť atet aquellca'huare't ama't ahuatoteñ.

⁴ Ñaña allohuen añ ñoñets ñeñť atet aquellca'huare't ahuatoteñ, ñeñtpa' yocpa'ñaña atet anare't. Allochñapa' attoch yapa'čho'ña o'ch yečhaterryet ñeñť atet muenen Yompor. Allochñapa' attochña huomenc yepen yeyočher Yomporecop. Ñaña añ ñoñets ñeñť atet aquellca'huare't ahuatoteñpa' nanaccha' coshaterrey allochñapa' attotcha'ña e'ñe yocsheñesha' yeyemteññaña Yompor ñeñť o'patatenya.

⁵ Yompor ñapa' ñeñť ahuaencat yepene' ñaña ñapa' ñeñtña yocshatene' yeyočhro. Ñaña ñepa'chña e'ñe señotaterre', allochñapa' attoch e'ñe cohuen seyčherr ñeñť atet muenen Cristo Jesús, allochñapa' e'ñech cohuen sentannena.

⁶ Allochñapa' allohuenespa' e'ñech parrocmá sa'ye'chočhtateññañ Yompor, ñeñtara Yepartseshar Jesucristo Pompor.

Atto ama't ñeñť ama judioneshayayepa' ahuo't aserrpare'tatarettet añ cohuen ñoñets alloch yequeshperra

* 14:21 Ñehua, Pablo añ toma'ntatanet vino ñeñť poco'nes penet all pa'nyo.

7 Ñeñto'marña napa' notenes, eñech cohuen es sepanna'tyena allohuenes eñe atet cohuen o' perrey Cristo, allochñapa' attoch seyemteñoñ parro cohuencha' sa'cshapretarettena Yompor.

8 Ñaña te'pa' o'ch notas, Cristopa' ahuo't huapa arr patsro attoch torrosa judioneshacop. Allochñapa' attoch allohuen acheñenesha'pa' o'ch chapamet pueyoçhreto, Yomporpa' ama puenesho po'ñoñ. Ñeñ eñe atet otane't judionesha' pa'tañneshañ ahuatpa' ñeñtcha' atet muenaterranet esempo, ñeñtpa' chocmachña eñe etsoterra poctacma.

9 Ñeñtecopña huapa ñaña attochña acheñenesha' ñeñt ama judioneshayaye ñetpa'cho'ña o'ch aye'choçhtatoñet ñamet Yompor tarro'mar Yomporpa' ahuo't muerenanet ñamet. Attoña etsoterra ñoñets ñeñt quellca'huet ahuañ atet ñerra'mrrate' eñe Cristo ote' Pompor, ñeñtpa' atet ot:

Ñeñto'marña napa' o'ch na'ye'choçhtatonañ allo'tsa'yen acheñenesha' ñeñt ama judioneshayaye, allñapa' na'çhoteneñcha' nemorreñesha'.

10 Ñaña po'poñ ñoñets ñeñt atet aquellca'huañet ahuañoteñ, ñeñtpa' atet oten:

Ñaña sa ñeñtes po'poñ acheñes ñeñtes ama judioneshayaysopa' socshepa'ch samã, atet coshena judionesha' ñeñt pueyochresha' pen Yompor.

11 Ñaña po'poñ ñoñets ñeñtpa' atet oten:

Ñeñtes ama judioneshayaysopa' sa'ye'choçhtatoñepa'ch Yompor, ama't allohuenes pa'namen acheñres sa'ye'choçhtatoñepa'ch Yompor.

12 Elloña Isaíaspa'cho'ña atet ote't ahuañ:

Esempopa' orrterrach puesheñarr ñeñt Isai* po'mreñeñ. Ñapa' orrterrach allochñapa' ñeñtcha' pa'mñcha'tareter perr allohuen pa'namen acheñenesha', ñaña allohuenet ñachña atarr yemterret. Arrpa' allohua ñeñt atet a'potete't Cristo ahuañ.

13 Yomporpa' ñachña atarr ayemuetpoterrtsa. Ñaña ñepa'chña socshatene' eñe poc-tacma. Allochñapa' amach eñalle ama't coñe'ta ñeñtcha' sellcatene' atto same'ñeña ña. Allochñapa' Paretsña Puecamquëñpa' ñachña ahuañencat sepene'. Attochña eñech socsheñesha' secuen ñeñt o'patatensa Yompor.

Atto Pablo pa' ahuo't llesenseñ Jesucristo attoch amach pueñcha'ñoñeye' alla yerpater-raneto ñeñt e'ñe pocte' enten Yompor

14 Ñaña te'pa' o'ch masheñnesha ñaña noçhanesha notas, napa' neñotenes sapa' atarr semorrentannena ñaña neñotenes o' eñe çhaponasa seyoçhro ñeñt atet muenatenes Yompor. Allochñapa' attochña eñe cohuen soctape'chatannena erra'tsente' cohuentetsa Yomporcop.

15 Tarraña ama't atetpa' ama nemñchañoñeye' o' notuanmaso pa'namen arr necartoñ ñeñt atet pocte' enten Yompor. Attoña o' alla neyerpaterrser ñeñt atet muenen Yompor. Ñeñto'marña atet nepenes, tarro'mar eñe Yompor pueñereñoñenpa'

16 ahuo't muenatenen nach torretsa Jesucristocop. Erracmañen allemeñ anetso'mar netorrena, allo'tsa'yen acheñenesha' ñeñt ama judioneshayaye. Napa' na a'potenahuet Yompor po'ñoñ ñeñt po'ñoçh alloch yequeshperra. O'ch name'ñatuera ñeñt ama judioneshayaye, allempoñapa' attochña nehuapatamet Yomporesho atet ñerra'mrrate' cho es yapueñ Yompor, ñaña'pa' ñeñtcha'ña atarr coshatene'. Alloñapa' Paretsña Puecamquëñña' ñachña a'cohuentatuerrahuet. Attochña eñe cohuen enteñet Yompor.

17 Ñeñto'marña te'pa' eñe neyemteñoñ Cristopa' eñe pocte' nenteñ o'ch eñe nocsheña ñeñt allo netorrena Yomporcop.

* 15:12 Isaíaspa' ñeñtara Jesé. Ñehua, ñapa' ñeñt puechemeran David ñeñt añcha'tarettatse't Jerusaléño.

18 Napa' aña paterr noten atto Cristopa' e'ñe ahuamencat penen, ñeñto'marña chocma name'ñateña ama't ñeñt ama judioneshayaye. Atto neserrpare'tatanet Yompor po'ñoñ, ñetñapa' ahuo't e'ñe name'ñatuanet. Ñaña atto napa' e'ñe cohuenare' es norrtatyen, ñetñapa' ahuo't e'ñe cohuen ame'ñeñet Yompor.

19 Ñaña ñetpa' añña ame'ñatahuet ñeñt atto e'ñe ahuamencat penen Cristo attoña norrtatanet Yompor po'partsoña ñeñt ama puentareto. Ñetpa' ñeñtña eñotatuahuet, ñeñtpa' po'ñoñ e'ñe Parets Puecamquëñoñ ñeñt e'ñe ahuamencat yepene'. Atteñapa' ora erracmañen o' neserrpare'tua añ cohuen ñoñets atto e'ñe yame'ñeñoñ Cristopa' o'ch yequeshperra. Ateña neserrpare'tyesnom allemeñ anetso'mar e'ñe Jerusaléñoñ Ilírico'marohuen.

20 Napa' añña atarr nemnen o'ch neserrpare'tyen añ cohuen ñoñets erraparen bachayo'mar all ama pue'mareto ñeñt Cristotets. Attochña napa' amach arra neseno serrpare'tats all o' serrpare'tatuahua po'psheñeñ.

21 Attochña etsoterra añ ñoñets ñeñt atet aquellca'huareñ ahuañoten, ñeñtpa' atet oten Cristocop:

Acheñenesha' ñeñt ama't ahuañapa' ama aserrpare'tatareñteneto ñeñt atet pena ña, ñetñapa' enteretcha'. Ñeñfara acheñer ñeñt ama pue'marano ñeñt atet pena ña, ñetñapa' cherranetcha' pueyoñchreto ñeñt atet pena ña.

Atto Pablopa' atarr sechena o'ch ahuo' anetso Romo o'ch emo'tenana' ñeñt ame'ñetsa all

22 Napa' shonte' neserrpare'tatyen erracmañen arr, ñeñto'marña ama eshcaye' neseno sesho. Ama't ahuañoteñ atarr nesechenañ o'ch nabchensa', ama erroñ nepeñe.

23 Tarraña na te'pa' o' ne'nua netaruas ñeñt atto neserrpare'tyen arro'mar allemeña. Ñaña napa' ahuañoteñ nesechena o'ch nabchensa'.

24 Ñeñto'marña te'pa' e'ñe po'ñoñ nesechena o'ch ahuen sesho o'ch nabchensa'. Allochñapa' o'ch yabchanna'ta allponmat, allempoñapa' ñato' attotpa' o'ch seyepa'n attoch nechap ñaña Español.

25 Ñehua, te'pa' ñanomcha' Jerusaléño neta, attoch nanmanet allpon ofrenda masheñnesha'op ñeñt ame'ñetsa all.

26 Tarro'mar allpon ñeñt ame'ñetsa Macedonio ñaña Acayo, ñetpa' e'ñe pocte' enteñet o'ch apuet allpon ofrenda, ñeñtcha' oñmachtet masheñnesha' Jerusaléño ñeñt nanac es pallta'yenet.

27 Macedonio'marnesha' ñaña Acayo'marnesha' ñetpa' ama judioneshayayeto. Tarraña e'ñe pocte' enteñet o'ch yenpueñet judionesha' ñeñt Jerusaléño'tsa'yen ñeñt nanac es pallta'yenet. Napa'cho'ña e'ñe pocte' nenteñ tarro'marña ñeñt judionesha' ñetpa' ñetña serrpare'taterret ñanom ñeñt ama judioneshayaye Yompor po'ñoñ. Ñeñt atet apareñtet ñetpa' ñeñtpa' puecamquëñecop. Ñeñto'marña te'pa' e'ñe pocte', ñeñt ama judioneshayayepa' o'ch alla yenpuerran ñaña ñeñt judionesha' ñeñt poctetsa po'chtsocpuet alloch correnet arr patsro.

28 Allempoch nechap Jerusaléño o'ch napos masheñnesha' ofrenda. O'ch naphueranet attochña e'ñe ne'nua ñeñt netaruas nepen. Allempoñapa' o'ch ahuen ñaña Español. Ñehua, amach nechena' Españolpa' o'ch nemo'tnomues allponmat, allotcha' nemterrer seshotpa' allempochña o'ch ahuen Español.

29 Ñaña neñoteñ ñerra'm esempoch nechap sesho e'ñe neserrpare'tateñoñes Cristo po'ñoñ, sapa' nanaccha' nocshaterres e'ñe nanac Yompor pa'nateñoñ.

30 Ñaña te'pa' o'ch masheñnesha' notas, e'ñe seyemteñoñ Yepartseshar Jesucristo, ñaña attoch apueney Parets Puecamquëñ alloch e'ñe yemorrentannena, sapa' chocmach sema'yochamñesna. Nanaccha' sema'yochapreña,

³¹ o'ch senamaton Yompör attoch cohuanĩpsen allochñapa' amach čha rromapno judionesha' ñeñtĩ ama ame'ñetso all Judeo. Ñaña o'ch senamaton Yompör añecop judionesha' ñeñtĩ ame'ñetsa Jerusaléno, attoch e'ñe cohuen entapretapnet ñeñtĩcha' naposonet.

³² Allochñapa' ñerra'm Yompör muenatspa' e'ñech nocsheñesha' nečhap sesho. Allñapa' namesoste' e'ñe cohuen allponmat, ñaña e'ñe yabčhanna'teñoťpa' o'te' alla e'ñe nocsherra neyočhro.

³³ Yomporepa'chña e'ñe cohuen sa'nataya allohuenes, ñeñtĩara Yompör ñeñtĩ e'ñe cohuen yocshatene' yeyočhro. Ñeñtĩpa' attetepa'ch Nompore.

16

Atto Pablo arr po'cartoťpa' e'ñe huomĩcha'tuan ora allohuen ñeñtĩ ame'ñenaya Cristo all anetso Romo

¹ Ñaña te'pa' añ necartoťpa' nemneñ o'ch neñotatas ñeñtĩ yočh yepen ya arr ñeñtĩpa' añ pa'so'cheñ Febe. Ñapa' ña sherbets Yompör pa'paclo allecma apčhenet Yomporecop añ anetso Cencreo.

² Ñapa' mueneñ ahuo'ch ahuo' sesho. Ñerra'm esempo čhap seshopa' o'ch sagař cohuen, ñeñtĩ atet poctetsa o'ch yagapannena e'ñe cohuen, ñeñtĩey ame'ñenaya Yepartseshar Cristo. Ñaña ñerra'm o'ch čhap sesho, ñerra'm escha' palltosa ama't erra'tsena, añ poctetsa sapa' o'ch seyempueñ țarro'mar ñapa' atarr cohuen ayenpañ; ama't napa' nanac yenpuenen.

³ Napa' nemneñ añ necartoť o'ch nehuomĩcha'ch nočh Priscila puerrollare'na ñeñtĩara masheñ Aquila, ñeñtĩ parro netorrena ahuañmo'cha Cristo Jesúsocop.

⁴ Ñetpa' nanac yenpuennet ahuañmo'cha allempo muene' muetsanetañ. Ñetñapa' autsa rromatsetañ attot a'qeshpatnet na allempo muene' muetsaneñ ñeñtĩ ne'moñe'tene'. Ñeñto'marña napa' atarr neparasyoso'tenanet ñaña ama naptayaya añña ñaña ñeñtĩ allohuen ñeñtĩ ama judioneshayaye, ñeñtĩ e'ñe pame'ñeñoťet apčha'yenet allemeñ anetso'mar, ñetpa'cho'ña atarr parasyoso'teñet nočh Priscila ñaña masheñ Aquila, țarro'mar ñetpa' ahuo't a'qeshpatnet, attot ellopa' o' alla neserrpare'tatererr ñeñtĩ ama judioneshayaye.

⁵ Ñaña te'pa' o'ch nehuomĩcha'ch allohuen masheñesha' ñeñtĩ pame'ñeñoťet čhocma apčhenet masheñ Aquila pa'paclo, all yečhena epuet puetapor Priscila. Ñaña arr necartoťpa' nemneñ o'ch nehuomĩcha'ch masheñ Epeneto ñeñtĩ nanac nemorrentena. Ñapa' ña ñanom ame'ñenaya Cristo all anetso Acayo.

⁶ Alloťpa' o'ch nehuomĩcha'ch ñaña nočh María ñeñtĩ nanac țorretsa sesho parro.

⁷ Te'ñapa' o'ch nehuomĩcha'ch ñaña namo'ts ñeñtĩara masheñ Andrónico ñaña masheñ Junias, țarro'mar ñet ahuañmo'chapa' ñeñtĩ parro ehuancařetey. Ñetpa' ama't allsareñesha'pa' nanac asherben entarettet, țarro'mar ñetpa' ahuaťoteñ ame'ñeret Cristo. Ama't allempo napa' ama name'ñena' ñetñapa' o' ame'ña'huet ñanom.

⁸ Alloťpa' nemneñ o'ch nehuomĩcha'ch ñaña masheñ Amplias ñeñtĩ atarr nemuerena e'ñe yame'ñeñoť Yepartseshar parro.

⁹ Alloťpa' ñaña masheñ Urbano, o'ch nehuomĩcha'ch ñaña ñeñtĩ parro yetorrena ñeñtĩ po'taruas pen Cristo Jesús. Alloťpa' e'ñe nemorrenteñoťpa' o'ch nehuomĩcha'ch ñaña masheñ Estaquis.

¹⁰ O'ch nehuomĩcha'ch ñaña masheñ Apeles ñeñtĩ čhocma ahuantene' allohuen pa'namen topateñets attoña e'ñe cohuen cotenan Cristo. Alloťpa' ñaña o'ch nehuomĩcha'ch allohuen ñeñtĩ pamo'ts pen Aristóbulo.

¹¹ Alloťpa' ñaña namo'ts Herodión, alloťpa' ñaña ñeñtĩ pamo'tsesha' pen Narciso. Ñetpa' atarr ame'ñeñet Yepartseshar.

12 Te'ñapa' nemneñ o'ch nehuom'cha'ch ñaña no'ch Trifena ñaña no'ch Trifosa. Ñet'ñapa' nanac torreññañet Yepartseshar po'taruas, allotpa' no'ch Pérsida ñapa'cho'ña nanac yemorreneteña atto nanac torrena ñaña Yepartsesharecop.

13 Ñaña arrpa' o'ch nehuom'cha'ch ñaña po'psheñeñ masheñ Rufo ñeñt pame'ñeñoñ nanac asherben yenteñ Yepartsesharecop. Ñaña pachore'na o'ch nehuom'cha'ch, tarro'mar ñapa' e'ñe atet nenteñ ñerra'mrrate' ñeñt e'ñe nachor nepen.

14 Te'ñapa' o'ch nehuom'cha'tererr po'potantañ masheñnesha' ñeñt añ Asíncrito, ñaña Flegonte ñaña Hermas, ñaña Patrobas, allotpa' ñaña Hermes, ñaña po'potantañ masheñnesha' ñeñt parrrompañ'o'tsa'yenet.

15 Te'pa' o'ch alla nehuom'cha'tererr ñeñt masheñ Filólogo ñaña no'ch Julia, allotpa' ñaña masheñ Nereo epuet ñaña po'ch, allotpa' ñaña Olimpás, ñaña ama't allohuenet masheñnesha' ñeñt parrrompañ'o'tsa'yenet.

16 E'ñe semorrentanna'teño'pa' atet'cha' sehuom'cha'tanna'tena* ñeñt atet poctetsa Partsocop. Ñaña allohuenet masheñnesha' ñeñt ap'cha'yetsset allemeñ anetso'mar e'ñe pame'ñeñoñet Cristo, ñetpa'cho'ña mueneñet o'ch huom'cha'taset ñaña arr necartot.

Atto Pablo arr po'cartotpa' o' alla cotape'chaterraneterr po'pocheño

17 O'ch masheñneshacha' ñaña no'chaneshacha' noterr'serr po'poñ añ necartot. Seño'tcha' añ acheñeneshar ñeñt muenene' o'ch ellopa'tetstatonaset soctap'ña ñeñt atto same'ñeña Cristo, tarro'mar ñetpa' mueneñet o'ch cotape'chataset ñeñt ama ateyaye ñeñt atet o' yey'chatuas. Ñeñt acheñer atetpa' o'ch sello'tsentach seshot, amach seyemtatstaneto ñeñt atet ye'chatenet.

18 Tarro'mar ñetpa' ama añeye' sherbeneto Yepartseshar Jesucristo. Aña cotape'chenet ñeñt atet muenenet ñet po'chets atto correnet. Atto serrpare'tenet co'chnesha' ñoñets, ñeñt'pa' atta shequëñet acheñenesha' ñeñt ama huomencaye' penaye pueyo'cher.

19 Ñehua, allohueney yeñotenes sapa' o' same'ñera Cristo ñeñto'marña napa' atarr nocshensa. Añña nemnen o'ch e'ñe seño't ñeñt e'ñe cohuentetsa Yomporecop. Allochñapa' amach soctape'chatsto ñeñt ama cohuenayaye.

20 Allochñapa' Yomporpa' ahuencha' a'huañañp'sonas ñeñt atto atarr shequënes oneñet, ñeñt'ara Yompor ñeñt e'ñe cohuen yocshatene' yeyo'chro. Yepartsesharepa'chña Jesucristo e'ñe sa'natenaya.

21 Te'pa' o'ch alla neñotaterr'serr añ necartot, masheñ Timoteopa'cho'ña mueneñ o'ch huom'cha'tas ñaña, ñapa' ñeñt epan netorrena. Allotpa' ñaña añ namo'ts ma'psheño'maret ñetpa'cho'ña mueneñet o'ch huom'cha'taset ñamet. Puesheñarrpa' añ masheñ Lucio, allotpa' ñaña masheñ Jasón, ñaña masheñ Sosípater.

22 Napa'cho'ña ñeñten sochetsa Tercio, e'ñe name'ñeñoñ Yepartseshar nemneñ o'ch nehuom'cha'tas añ masheñ Pablo po'cartot. Napa' ñeñten quellcaten masheñ Pablo.

23 Masheñ Gayopa'cho'ña muenen o'ch huom'cha'tas ñaña. Na te'pa' e'ñe pa'paclo'tsenen ña, tarro'mar all ne'chap. Ñapa' atet otenanet chocmach ap'chenet allohuenet pa'paclo ñeñt ame'ñetsa arr. Ñaña masheñ Erasto mueneñ o'ch huom'cha'tas ñaña. Ñapa' ña tesorerotets arr Corinto, ña añño'tene' quelle anetsocop. Ñaña masheñ Cuartopa'cho'ña mueneñ o'ch huom'cha'tas ñeñt'ara añ necartot.

24 Yepartsesharepa'chña Jesucristo sa'nataya allohuenes. Ñeñt'pa' attetepa'ch Nompore.

Atto all huañen Yompor po'ñoñ añ cartotpa' ya'ye'cho'chtatoñepa'ch ora allohueney

* 16:16 Po'ño'ch oteneñ, "E'ñe semorrentanna'teño'ñ cho'ch setso'ttsa'pa'tannena ñerra'm esempo sehuom'cha'tanna'tena." Ñeñt'pa' atet ye'chete't ahuat.

²⁵ Te'ñapa' ya'ye'chochtatoñepa'ch Yompor tarro'mar ñapa' ñach ahuaencat sepene', ñeñt e'ñe atet oten añ cohuen ñoñets alloch yequeshperra. Ñeñtara añ cohuen cotapñats ñeñt neserrpare'tatenes ñeñt e'ñe atet pena Jesucristo ñeñt ahuatoteñ ama eñotpahuo.

²⁶ Tarraña te'pa' Yompor ñeñt ama arromñateshayayepa' muenaterrey o'ch yeñoter ñeñt ama eñotpahuo ahuatoteñ. Ñehua, ñapa' ahua'pa' añ eñotate't ñeñt a'mta'yesaye't po'ñoñ, ñetñapa' ahua'ch quellquënet ñeñt atet eñotatenanet Yompor. Attochña yeñoter yaña, ama't ñaña allohuen pa'namen acheñenesha'; allochñapa' attoch e'ñe yame'ña'huerra ora erraparen, ñeñtey pa'namen acheñey.

²⁷ E'ñe puemuerenofey Jesucristo aye'chochtataretepa'ch Yompor errponohuañen, ñeñtara Yompor ñeñt ñapuet e'ñe eñotañtetsa. Ñeñtpa' attetepa'ch Nompore. Allohua huañ añ necarta.

Pablo

AÑ ÑANOM SAN PABLO PO' CARTA ÑEÑT̃ QUELLCAN CORINTO' MARNESHA' 1 CORINTIOS

Atto Pablopa' quellcan carta añecop ñeñt̃ ame'ñetsa anetso Corinto

¹⁻² Masheñneshacha' ñaña nochaneshacha' ñeñtes allohuenes e'ñe same'ñeñoŋ Yompor chocma sapčhena parro all anetso Corinto, ñeñtes o' hua'ñerres Parets attoch pueyochresha' perres atto e'ñe separrocmateñoŋ epas Cristo Jesúsapa' sañapa' sa'cohuentatareŋterra Partsocop. E'ñe parrocmahua'ñerres Parets attoch pueyochresha' perres, e'ñe attecma o' hua'ñerran allohuen ama't erra'tsena acheñer ñeñt̃ e'ñe pame'ñeñoŋ chore'tene' Yepartseshar Jesucristo ama't errate' yečha'yenet. Ñeñña Jesucristo ñeñt̃ Yepartseshar yepen ora allohueney ñeñtey ame'ñenaya. Na Pablón sequellquene'ña añ carta epan masheñ Sóstenes. Napa' Jesucristo puellsensaren tarro'mar Yomporpa' ñeñtecopña o' chore'terren attoch nesherber.

³ Te'ña e'ñe nehuomñcha'teñoŋespa' o'ch notas: Yomporepa'chña sebensare'tam̄pene' ñeñtara Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyočhro allohuenes.

Arrpa' all parasyoso'tam̄psanet

⁴⁻⁵ Te'pa' o'ch notas, napa' chocma neparasyoso'teñ Yompor socop tarro'mar ña pueuereñoŋpa' atarr bensare'tam̄penes. E'ñe separrocmateñoŋ Cristo Jesúsapa' o' eñotaterres pa'namen cočhnesha' cotapñats seyočhro. Ñeñto'mar te'pa' ama't ora allpon señosyen e'ñe ñeshoŋpa' e'ñech cohuenare' señosyen. Ñaña ama't allohuen cohuen cotapñatspa' o' señoŋtuer.

⁶ Ñeñt̃ atet yotuanmas ñeñt̃cha' atet p̄onas Cristo, te'pa' atetcho' o' etsotatuonas.

⁷ Ñeñto'marña te'pa' ama es palltetsa ñeñt̃cha' apuerrser po'poñ Yompor. Te'pa' añ palltetsa o'ch secuame'teñ esempohuañencha' huerra Yepartseshar Jesucristo.

⁸ Ñeñtara Jesús ñeñt̃cha' allo'na huomenc sepa'nene' seyočher. Attoŋach chap allem-poch huerra Yepartseshar Jesucristo. Attochña allempopa' amach eñalle alloch ot-teñe'charetas ama't mamesha.

⁹ Tarro'mar Yomporpa' ama puenesho po'ñoñ, erroŋ oŋpa' atetcha' p̄a. Ñeñtara Yompor ñeñt̃ o' hua'ñerrey o'ch yeyemterrñaña Puechemer ñeñtara Yepartseshar Jesucristo.

Arrpa' all yečhatanet attoch e'ñe patrpa cotapñats anmuet

¹⁰ Te'pa' o'ch masheñneshacha' ñaña nochaneshacha' notas ñeñt̃cha' atet sepa, e'ñech patrpa soctape'ch allohuenes. Amach allo'na soctape'chyesatsto po'poñe'ttsocma. E'ñech patrpa cotapñats soctape'ch allohuenes; erra'tsen soctape'chpa' ñeñt̃ach cohuen sent allohuenes. E'ñe patrpa soctapñoŋpa' o'ch separrocmatua allohuenes. E'ñe yame'ñeñoŋ Yepartseshar Jesucristo ñeñto'marña notenes ñeñt̃cha' atet sepa.

¹¹ Tarro'mar ñeñt̃ parro yečhena Cloépa' ñetpa' e'mare'tatnet atto' sepena. Ñeñt̃pa' atet otnet atto sa masheñneshacha' chocma po'poñ sentanna'tyena.

¹² Ñeñt̃ notenespa' ñeñt̃pa' atet sepena: Puesheña'ttsospa' atet sotyen: "Napa' añcha' name'ña masheñ Pablo." Po'potantañña' ñeñt̃pa' atet otyenet: "Napa' añcha' name'ña masheñ Apolos." Po'potantañña' ñeñt̃pa' atet otyenet: "Napa' añcha' name'ña masheñ Pedro."* Po'poñečhnoñapa' atet otyenet: "Napa' añcha' name'ña Cristo."

* **1:12** Añ Pedropa' ñeñtara otenet Cefas.

13 Ñehua, ama't señotheñeña, po'ñoçhpa' ama eñalle attoch yellopa'tetstach Cristo. Po'ñoçhpa' amaca'ye naye' corso'tam̄pseto ñeñt' e'ñe socop attoch na'queshp̄atas. Ñaña ama naye' same'ñeñoť o' sapatareťterroña Partsocop.

14 Napa' atarr neparasyoso'teñ Yompor țarro'mar napa' ama muenatno o'ch napatas ama't puesheñarroťesa Partsocop. Ñehua, napa' e'ñe epsheña napat Partsocop, ñeñtpa' masheñ Crispo ñaña masheñ Gayo.

15 Napa' e'ñe nocshena țarro'mar țe'pa' amach erroťenoť sotno e'ño' na same'ñeñoť sapatareťterra.

16 Ñehua, po'ñoçh ellopa' napach masheñ Estėfanas epuet pamo'tsesha'. Ñerra'm eñallte' po'po'neçhno ñeñt' napatpa' țarraña ñeñtpa' ama neñoteñe.

17 Napa' ama añecpaye' llesensa'noña Cristo o'ch napatyes Partsocop ñeñt' allpon ame'ñetsa, añecpaña llesensa'n attoch o'ch neserrpare't cohuen ñoñets alloch yequeshp̄erra. Ñaña ama añeye' coçhnesha' na neñoñ neserrpare'tatenso, țarro'mar ñerra'm aña neserrpare'tatenes coçhnesha' neñoñ name'ñatasapa' çhate' soten atto rroma Cristo corsochopa' ñeñtpa' amaca'ye es sherbeno attoch yame'ñera Cristo.

Añ ñoñets atto rroma Cristo corsocho, ñeñtña ñoñets Yomporo po'huamenc alloch a'queshp̄atyerran acheñenesha'

18 Po'ñoçh ñerra'm esempo yeserrparen atto Cristo rroma corsocho e'ñe ya yo'chñaroťpa' añña acheñenesha' ñeñt' chenquėtsapa' çhach otenapuetañ attate' yotatse'tyen. Tarraña ya ñeñtey a'queshp̄atareťteypa' añña ñoñets atto rroma Cristo corsochopa' ñeñtña ñoñetspa' yeñoteñ allotña huena Yompor po'huamenc attoch a'queshp̄atyerran acheñenesha'.

19 Tarro'mar añ ñoñetspa' e'ñe anuareť ama't ahuaťoteñ, ñeñtpa' atet oten Yompor: Ñeñt' entetsa ñapa' nanaco' es eñoten patso'marecoppa' napa' o'ch na'huañam̄pesuanet ñeñt' pueñoteñ. Ñaña ama't ñeñt' entetsa ñapa' nanaco' eñotañtenapa' napa' o'ch nehuapore'tam̄pes atto es eñotatse'tyenet.

20 Ñehua, ama't señotheñeña, ama't ñeñt' nanac es eñotatse'tyets arr patsro ama eñalleña ñeñt' atarr asherben enten Yompor. Ñaña ñeñt' atarr etsotayenayeñ ñoñets ñeñt' atet anuareť ahuaťoteñ ñaña ñeñt' nanac eño'ñatťetsañ aña patsro ama eñalleña ñeñt' atarr asherben enten Yompor. Ñetpa' çhate' otenapuetañ atarrte' es eñotenet țarraña Yompor o' eñotatuay po'ñoçh ñeñtpa' e'ñeca'ye orrena atet otatse'tyenet arr patsro.

21 Tarro'mar Yomporpa' e'ñe pueñoteñoť ñapa' ama pocteye' enteñe e'ñe ya yocap̄ñoťpa' o'ch yenter Yompor, ama't yapa' yoteneñ atarrte' es yeñoten. Añmapa' ñeñtña pocte' enten Yompor: ñeñtara coťap̄ñats ñeñt' atto rroma Jesucristo yocop ñeñt' çhach enteñet ñerra'mrrate' atta yotatse'tyen, añ ñeñtara coťap̄ñats ñeñtña muenen Yompor o'ch yeserrpare'toñ alloch a'queshp̄aterrey allohueney ñeñtey ame'ñenaya.

22 Ñerra'm esempo yeserrpare'tach judionesha' atto Cristo rroma yocop, ñetñapa' amach asherbenaye' entenetoña yocap̄ña țarro'mar ñetpa' añach muenet yorrtatanetepa'to' Cristo po'partsoña. Ñaña ñerra'm esempo yeserrpare'tateñ ñeñt' ama judioneshayeyeto atto Cristo rroma yocop ñetpa'çho'ña amach asherbenaye' entonayetoña yocap̄ña țarro'mar ñetpa' añach muenet yorrtatanetepa'to' ñeñtcha' eñotatahuet e'ñete' po'ñoçh atet yoten.

23 Tarraña yapa' añcha'ña yeserrpare'tatanet atto Cristo rroma corsocho yocop. Tarraña añña judionesha' puetsena'teñoťetpa' amach cohuenaye' enteñeto. Ñaña ñeñt' ama judioneshayaye ñetpa'çho'ña attach enteñet ñerra'mrrate' atta yotatse'tyen.

24 Tarraña acheñenesha' ñeñt' o' ame'ñerra ñetpa' o' çhapanet pueyoçhreto po'ñoçhpa' Cristo e'ñe Pompor po'huamencoťpa' o'ch a'queshp̄aterrey, ñaña e'ñe Pompor

pueñoteñoŋpa' o'ch a'queshpaterrey. Attecma o' chapanet pueyočhreto ñeñŋ o' ame'ñerra ama't ñeñŋ judionesha' ñaña ama't ñeñŋ ama judioneshayaye.

²⁵ Ñeñŋ ama ame'ñetsopa' ama't otenapuetañ Yompor poctapñapa' attate' otatse'tyen, tarraña ñeñŋara poctapñña e'ñe ña pueñoteñ ñeñŋña nanac sherbets. Acheñpa' ama't atarr es eñoteneñpa' tarraña poctapñetpa' ama tama sherbeno tarro'mar acheñpa' ama tama es eñoteneto. Ñaña ama't otenetañ Yompor po'huamencpa' ama a'ñshe'maye' orrtenopa' tarraña yocoppa' ello metanennay allohueney yehuamenc tarro'mar yapa' arromñaŋaya.

²⁶ Ñehua, masheñeshacha' ñaña nočhaneshacha' soctape'ch allempo hua'ñerres Cristo o'ch same'ñera. Allempo ama't acheñenesha'pa' entasete't sapa' ama esoye' señoŋte tarraña Yomporpa' o' hua'ñerres, ñaña ama't ama sesherbena, ñaña ama't ama añeyayso puechemeres añcha'tareŋ. Ñehua, ñato' puesheña'ttsospa' ñeñŋes, tarraña ama allohuenacmaye' attecmaso.

²⁷ Añña pocte' enten Yompor o'ch a'queshpatan acheñ ñeñŋ acheñenesha'pa' čhach otenapuetañ ñeñŋpa' amate' es eñoteno. Tarrecop pocte' enteñ Yompor allochñapa' o'ch pencatan acheñenesha' ñeñŋ nanac es eñotatse'tyets. Añpa'čo'ña pocte' enteñ Yompor o'ch a'queshpatan acheñ ñeñŋ acheñenesha'pa' čhach otenapuetañ ñeñŋpa' amate' esoye' aye. Tarrecop pocte' enteñ Yompor allochñapa' o'ch pencatan acheñenesha' ñeñŋ čhach otenapañ ñetpa' atarrte' es sherbenet.

²⁸ Añpa'čo'ña pocte' enteñ Yompor o'ch a'queshpatan acheñenesha' ñeñŋ entenet ñeñŋ ama esoshe'mayaye ñaña ñeñŋ atsena'tareŋ. Ñaña añ acheñer muenen Yompor ñeñŋ ama es echeno attoch sherba' ama't mamesha. Tarrecop mueneñ Yompor allochñapa' ñoŋetpa' o'ch huapore'tamŋsan acheñ poctapñña ñeñŋ añ patso'mara. E'ñech orrena enteret acheñ poctapñña.

²⁹ Ñeñŋo'marña ya acheñeypa' ama't puesheñarroŋeya ama pocteyaye o'ch e'ñe yañeña cohuen yentena tarro'mar Yomporpa' ama atteye' entenye.

³⁰ Tarro'mar ñapŋa Yompor yapuene'ña attoch yapa' corretsayach. E'ñe yeparrocmateñoŋ Cristo Jesús a'crrateney Pompor. Ñaña Yomporpa' atto nan Puechemer Cristo ñach yeñotaterre' ñeñŋ cohuentetsa Yeyompor-recop, ñaña ñeñŋara Cristo ñeñŋcha' e'ñe cohuen a'poctatene' yocop attoch cohuen entueney Pompor ñaña ñeñŋara Cristo ñeñŋña a'cohuentaterrey Partsocop, ñaña ñeñŋara Cristo ñeñŋ yetsa'terroya yo'chñar attoch yequeshperra.

³¹ Ñeñŋo'mar atet anuaretta Yompor po'ñoñ ahuat: "Ñerra'm eseshaycha' es aye'chočhtatetspa' Yomporecpuepa'chña es ya'ye'chočhtaten."

2

Arrpa' all yerpaterranet atet serrpare'tatenaneta' ahuaña ñeñŋ atto Jesucristo rroma yocop corsocho

¹ O'ch notas masheñeshacha' ñaña nočhaneshacha', ahuaña allempo nečhap seshopa' neserrpare'tatoses cohuen allempo na'potonas Yompor poctapñña. Allempopa' ama cočhneshoteye' neñoñoŋ na'potonaso Yompor po'ñoñ atet noñets cočhneshach' entyen acheñenesha'. Ñaña ama cočhneshoteye' noctapñoŋ na'potonaso Yompor poctapñña atet ñerra'mrrate' acheñ ñeñŋ nanac eñotañ entueñ allohuen acheñenesha'.

² Añña e'ñe paŋra coctapñats neserrpare'tatenes ñeñŋ atto Jesucristopa' rroma yocop corsocho. Tarro'mar allempopa' atet noten neyočhro ñeñŋach paŋerr o'ch neserrpare'tatanet.

³ Ama't allempopa' ama asherbenoteye' norrtoso sesho. Ñaña allempopa' atarr nemcha'ten, čha neyoruos nellquëñoŋ.

4 Ñaña ama ne'ñoreñoŕe' e'ñe cohuen neserrpare'tataso attoch same'ña'na e'ñe neñoñoŕa ñeñŕ atet pena ñeñŕ čhach otenapañ ñapa' nanacte' es eñoten. Añña e'ñe neserrpare'teñoŕa norrtatonas ñeñŕ atet ponay Parets Puecamquëñ e'ñe po'huamencot Yompor.

5 Ñaña ya acheñeypa' ama't cočhnesha'tatsta yocŕapñapa' tarraña napa' ama nemno e'ñe na neñoteñoŕpa' o'ch name'ñatasa. Napa' añña nemnen o'ch name'ñatasa e'ñe Yompor po'huamencot.

Yompor Puecamquëñpa' ñeñŕña es yeñotatene'

6 Tarraña ama't atetpa' esempopa' o'ch neserrpare'tach ñeñŕ o' ame'ñerra huomenc. O'ch neserrpare'tatanet e'ñe cočhnesha' coŕapñats, ñeñŕara Yompor poŕapñña ñeñŕ atarr es eñotets. Tarraña añ coŕapñatspa' amach patso'mareyaye, ñaña amach aneyaye añcha'taretečno poŕapñña ñeñŕ añe patsro'tsen. Tarro'mar ñetpa'čo'ña huañerretcha' esempo.

7 Yomporepa'chña poŕapñña ya'poŕa ñeñŕ atarr es eñotets, ñeñŕara ama't ahuaŕoteñpa' ama eñotpahuo poŕapñña. Tarraña ama't allempo ama ayečhcatarettena' patspa' ñeñŕñapa' o' anaretetua attoch cohuencha' ya'queshpataretterra esempohuañen.

8 Añña añcha'taretnesha' ñeñŕ añe patsro'tsa'yenpa' ama čhapaneto Yompor poŕapñña. Ñerra'm čhapanetañcha' ahuaña pueyočhretopa' amate' corso'tamperetañña Yepartseshar ñeñŕ atarr nanac cohuen.

9 Tarro'mar atet anuaretta Yompor po'ñoñ ahuaŕ, ñeñŕpa' atet oten:

Ama't ahuaŕa ya ñeñŕey arromñaŕeypa' ama yentare ñeñŕ o'patatenya Yompor ñeñŕ cočhnesha'tetsa yocop, ñaña ama ye'mare, ñaña ama čhaponaye'te yeyočhro ñeñŕ o'patatenya Yompor ñeñŕeycha' morrenterraya ña.

10 Tarraña ñeñŕeyña ame'ñerraya ñeñŕey allohueneypa' o' eñotaterrey Yompor e'ñe ña Puecamquëñoŕ ñeñŕ chorratenya. Po'ñočh yeñoteñ Yompor Puecamquëñpa' ña eñotuene' allohuen Yompor poŕapñña ñaña ama't ñeñŕ ama eñotpahuoŕaye.

11 Attecma yepena yaña ñeñŕey acheñey. Amach errotenoŕ po'psheñeñpa' eñotonay atet yocŕape'chen ya yeyočhro, e'ñech yapta yeñoteñ. Attecma pena ñaña po'potantañ amach errotenoŕ eñotano Yompor poŕapñña, e'ñech Yompora ñapueŕ Puecamquëñ eñotene'.

12 Yapa' o' yagapoñ Yompor Puecamquëñ, amaña acheña poŕapñña yaguërro ñeñŕ patso'marecpa. Ñeñŕara Yompor Puecamquëñ ñeñŕ čhapatene' yeyočhro ñaña ñeñŕ yeñotatene' atto ña muerenya. E'ñe puemuereñoŕey shonte' es apa'yeney.

13 Ñaña ñeñŕ ñoñets ñeñŕ yečhateney Yompor Puecamquëñpa' ñeñŕara ñoñets o'ch yeserrpare'tatas saña ama't ñaña po'potantañečno. Ñeñŕpa' ama aneyaye ñoñets ñeñŕ atet yečhatyen acheñenesha' ñeñŕ eñotañetyetsa. Ñaña ñeñŕ ñoñets atto yečhateney Yompor Puecamquëñoŕpa' ñeñŕ yeyčhatenes saña ñeñŕes o' chorrerrsa saña Yompor Puecamquëñ.

14 Tarraña acheñenesha' ñeñŕ ama chorreña' Yompor Puecamquëñpa' amach errotenoŕ čhapaneto Yompor poŕapñña ñaña amach errotenoŕ agapoñeto ñeñŕcha' apañetañ Yompor Puecamquëñoŕ. Ñerra'm yeserrpare'tatanet atto es apueney Yompor Puecamquëñoŕpa' ñetpa' čhach otyeset atto' yotatse'tyen. Tarro'mar ñapta čhenana pueyočhro ñeñŕ chorrena Yompor Puecamquëñ.

15 Tarraña añña ñeñŕ chorrena Yompor Puecamquëñpa' ñetpa' čhenanet pueyočhreto ora ñeñŕ atet pena Yompor. Tarraña ñeñŕ ama chorreno Yompor Puecamquëñ, ñetñapa' amach errotenoŕ čhapaneto pueyočhro esocopte' atet penaña ñeñŕ chorrena Yompor Puecamquëñ.

¹⁶ E'ñe attecma oteney Yompor po'ñoñ ñeñt' anuaret' ahuatoteñ, ñeñt'pa' atet oten: "Ese-sha'huate'ca' eñote'ña ñeñt' atet cotape'chen Yompor attoch ñetpa' o'ch cotape'chateret ñamet Yompor." Tarraña te'ña yapa' attecma yotape'chen atet cotape'chen Cristo.

3

Arrpa' all ama patrraye' cotape'cheno corinto'marnesha'

¹ Ñaña o'ch notas masheñeshacha' ñaña nochaneshacha' ama't ahuañoñeñ noteneñ o'ch noctape'chatas e'ñe cohuen, atet noctape'chateñ acheñ ñeñt' e'ñe chorrena Yompor Puecamquëñ. Tarraña amach erroteno't noctape'chataso tarro'mar sapa' atta socrena atet muenatenes sechets. Cha sottena atet ñerra'm cheshatoll ñeñt' ama eñotena'. Sapa' ama e'ñe chennasa' ñeñt' cohuentetsa Cristocop. Ñeñto'mar teme'ttsen atta noctape'chatenes atet ñerra'm cheshatolleshasa.

² Ñeñto'marña ahuañoñeñ atta neñotatenes ñeñt' ama torrapahuoyaye Yomporecop. Ñeñto'marña amach erroteno noctape'chaterrserro ello ñeñt' nanac echarr cotapñats. Attá sottena ñerra'mrrate' ematoll, napa' attach nemomatenes semomos atet peñet ematoll, ñeñtara yoten cotapñats Yomporecop ñeñt' ama echarro. Ñaña ama echarroye' serrar napuenso, tarro'mar amate' erroteno setsoto, ama't teme'ttsenpa' ama setsoteññañe Yompor poctapña ñeñt' nanac echarr.

³ Tarro'mar teme'ttsen atta socrena atet muenatenes sechets. Po'ñoñch ñerra'm esempo es yeye'chapretannena, amapa' ñerra'm cho ye'moñe'tannena, ñeñt'pa' atta yocrena atet muenateney yechets. Ñeñt'pa' ama'tña attera sorrteno atet pena acheñ ñeñt' ama ame'ñenayo Cristo.

⁴ Tarro'mar ñerra'm cha yotyen: "Napa' añcha' name'ña Pablo", po'psheñeñña' ñato' oten: "Napa' añcha' name'ña Apolos." Ñeñt' atet sepena chachca'ye sottena ñerra'mrrate' ñeñt' ama Cristona'tareyaye.

Puesheña'ttsoypa' añ yetorra'yena Yomporecop ñeñt' atet yechyena

⁵ Ñaña o'ch notas, yapa' ama esoyaye ama't Apolos, ama't na, añayaca'ye ñeñt'ey torretsa Yomporecop. Yapa' amñarefeya attoch o'ch yame'ñatasa. Puesheña'ttsoypa' añ yetorra'yena Yomporecop ñeñt' atet yechyena.

⁶ Atet ñerra'm napa' na ñanom same'ñate' Yompor po'ñoñ. Alotñapa' ahuo't huapa ñaña Apolos, ñapa' ña seserrpare'tate' attoch allo'na sesen huomenc pa'nmue' seyo'cher. O'ch netma'ntacha atet: Napa' atten ñerra'mrrate' ñeñt' nare'tets. Alotñapa' o'ch huapa po'psheñeñ ñeñt'cha' she'tamo're'tosets, Yomporñapa' ñach a'chpate' narmets.

⁷ Ñeñto'mar yeñoteñ ñeñt' nare'tetspa' ama esoyaye, ama't ñaña ñeñt' she'tamo're'tetspa' ama esoyaye. Añña Yompor ñeñt'ña es a'chpatets ñaña sherbets.

⁸ Ñeñto'marña yeñoteñ ñeñt'ey nare'tets ñaña ñeñt'ey she'tamo're'tetspa' e'ñe parrocma yetorrena Yomporecop. Elloña Yomporpa' apa'yereycha' puesheña'ttsoy cohuen ñeñt'cha' atarr yocshaterre'. Apa'yereycha' errotente' yetorra'yeshnoma ñocop.

⁹ Yomporpa' enteney atet ñerra'mrrate' parro yetaruasen ñocop. Sapa' Yomporpa' entenes atet ñerra'm ña pa'mres, allcha' nanac torrena ña.

Ñaña Yomporpa' entenes atet ñerra'm pocoll o'ch tomatey ña.

¹⁰ Atet ñerra'm na, Yompor puemuereño'tpa' o' ye'chaten na o'ch neño'ch e'ñe huomenc, attoch nanomcha' ame'ñaterraya acheñenesha' Jesucristo. Ñehua, o'ch netma'ntacha atet ñerra'm Yomporpa' o' ye'chatenen attoch o'ch neño'ch tomate' pocoll e'ñe huomenc. E'ñe neñoteño't o'ch natomat ñanom quellpach e'ñe echarr. Alotñapa' o'ch huapa po'psheñeñ ñeñt'cha' allo'na ye'chatnomue'. Tarraña ñeñt'cha' allo'na ye'chatnomue'pa' cotape'chepa' ñanom, pocte'te' atet peñ, ñato' amate'.

11 Ñehua, añ quellpach ñeñt anaret ñanompa' ñeñt toma'ntenaya atet ñerra'm ya ñanompa' o'ch yame'ñera Jesucristo. Ñapfach Cristo yame'ñerra. Ama eñalle po'poñ ñeñtcha' yame'ñerra, tarro'mar amach errotentof yame'ñyo po'poñ ñeñt ama Cristoyaye, añcha'ña ñeñtara Cristo ñeñt o' yotuanmas.

12 Ñeñt o' yame'ñata Cristo, ñetpa' allo'nach yeychatnenanet acoña attoch huomenc pa'nmuert pueyocher. Ñehua, o'ch netma'ntacha atet: Ñerra'm cho yeyeçcaten pocoll ñanemcha' quellpach yatomat. O'chña echarr yatomatua quellpachpa' allo'nachña yesen yeçcatnomue' pocoll. Erra'tsenpa' ñato' o'ch yeçcatenan oropo' pocoll ñeñt atarr nanac cohuen, ñato' po'psheñeñpa' o'ch yeçcatan asrepo' ñeñt nanac cohuen ñaña, po'psheñeñpa' o'ch yeçcatan cohuen mapyepo' ñeñt nanac tsa'te'. Tarraña ñato' po'psheñeñpa' o'ch tomatan tablapo' ñeñt ama tama cohuenayaye, ñato' po'psheñeñpa' aspanapo'ch, ñeñtpa'cho'ña amach tama cohuenayaye, ñato' po'psheñeñpa' attach yeçcatan atet ñerra'mrrate' posho'llpo' ñeñt ama cohuenayaye ama't mamesha.

13-14 Esemphuañeña allempoch huerra Cristopa' entatuareteycha' allohueneñ ñato' espo'te' yeyeçcatyes yepaquell, ñato' oropo', ñato' tablapo' amapa' ñato' atet ñerra'm posho'llpo'. Ñehua, añcha'ña yeñotate' tso'. Yompor poyoroçhenño'tpa' o'ch etomam'pesyesonay yepacla'chno. Ñehua, yeñoteñ ñeñt oropo' amach poyo, asrepo'pa'cho'ña amach poyo, mapyepo'pa'cho'ña amach poyo. Tarro'mar ñeñtpa' ama acraño, ñeñto'marña nanac sherben. Tarraña tablapo'pa' ñeñtpa' poyuach, aspanapo'pa'cho'ña poyuach, posho'llpo'pa'cho'ña poyuach. Tarro'mar ñeñtpa' ama es sherbeno, attochña eñtuareteycha' e'ne puesheña'ttsoy errotente' yeyeçcatyes, ñato' cohente' ñato' amate' cohuenayaye allempo es yetorra'yesnoma Cristocop. Ñerra'm esempoch etomam'pesyesonay yeyeçcatar ñerra'm amach poyo yeyeçcatar, allempochña yeñoch atto es yetorra'yesnoma Cristocoppa' ñeñtpa' e'ne cohuen. Ñeñto'marña allempopa' aphuerreycha' e'ne puesheña'ttsoy ñeñtcha' atarr yocshaterre'.

15 Tarraña ñerra'm yeyeçcatarña cha poyuapa' o'ch yeñoch atto yetorra'yesnoma Cristocoppa' ama es sherbeno, çhach a'chencatonay yeyeçcatar ñeñt Cristocpañ. Tarraña ama'tcha' a'chencatonay yeyeçcatar, yaña yecamquëñpa' queshperrach. Tarraña e'nech yemuroçhenño'ta yequeshperra atet ñerra'm cho poyen pocoll yañapa' o'ch yequeshpa'.

16 Te'pa' o'ch notas po'poñ: Sapa' ama't seño'teñeña Paretspa' o' pa'paquell perres allohuenes ñeñtes ame'ñetsa. Yeparrocmatueño' allohueneypa' te'pa' e'ne atet enterrey atet ñerra'm pa'paquell, allcha' yeçhena Puecamquëñ ña.

17 Tarraña ñerra'm esesha' alla soçtape'chaterre' ñeñt ama cohuenaye' enteno Yompor ñeñtña atet petsa çhach ottena ñerra'mrrate' cho a'matenan Parets pa'paquell. Ñerra'm esesha'ña a'matene' Parets pa'paquell ñeñtña Yomporpa' çhocmach a'chencater. Tarro'mar Parets pa'paquellpa' ñeñtpa' Partsocpa, saca'yeña o' pa'paquell perresña Parets ñeñt e'ne ñocpa.

18 O'ch noterrser po'poñ: E'nech seño'ta sañeña. Ñerra'm eseshas otets, napa' atarr es neñoten añe patsro, añ pocte' o'huañepa'ch es eñotate'tyes e'ne patso'mara. Añña pocte' o'ch orrta atet ñerra'mrrate' ama es eñoteno. Añepa'chña eñot ñeñt huetsa Yomproshot.

19 Tarro'mar ñerra'm esempo ñeñtey acheñey añe patsro ñerra'm cha yotenapañ yapa' atarrte' es yeñoten, Yomporña'pa' atet enteney ñerra'mrrate' cha yotate'tyen. Ñeñtpa' anuaret ñaña ahua'toteñ Yompor po'ñoño, ñeñtpa' atet oten: "Ama't atto es eñotate'tyenetpa' Yomporña'pa' o'ch eñotanet atfa otate'tyenet, ama't ñetpa' otena-puetañ nanacte' es eñotenet tarraña ñeñtpa' shequëñtsa."

20 Añ ñoñetspa'cho'ña anuaret ahua'toteñ, ñeñtpa' atet oten: "Ñeñt cha otenapañ

nanacte' es eñotenpa' añña Yomporpa' eñotenanet ñeñt atet cotape'chenet ñetpa' e'ñe orrena."

²¹ Ñeñto'marña te'pa' o'ch alla noterrser: Amach ellocma sa'ye'chochtatanna'tyesatsto atet yotape'chen ya ñeñtey arromña'tey. Tarro'mar allohuen ñeñt apuenes Yompor ñeñtcha' soctape'chate' cohuen.

²² Ama't na Pablonpa' Yompor o' na'n ñeñten allohuenacpas, ñaña ama't masheñ Apolos, ñaña ama't masheñ Pedro. Yomporpa' apueney allohuen ama't ñeñt yentyes añe patsro ñeñtcha' yeyenpue' ñeñt alloch yocsheña Yompor. Yocsheñepa'ch ama't allempo yocrrena, ñaña ama't allempoch yerroma, ñaña ama't ora allpon ñeñt eñall te' chocmuepa'ch coshateney. Ñaña ora allpon ñeñtcha' eñalletatsa tsapatonetpa' ñeñtpa'cho'ña coshatasepa'ch. Ama't allohuen ñeñt pa'namen eso'chno ñeñtpa' yocop ñeñtcha' yeyenpue'.

²³ Elloña yapa' e'ñe pueyochresha' p'ohueney Cristo allohueney, Cristoñapa' Parets Puechemer pene'.

4

Atet pena ñeñt torretsa Cristocop

¹ Ñeñto'marña te'pa' notenes, epsheño'marey na epan masheñ Apolos, añ pocte' o'ch senteney atet ñerra'm ñeñtey torretsa Cristocop. Ñaña añ pocte' o'ch senteney atet ñerra'm yapa' eyecharētey o'ch ya'poñoñ Yompor po'cohuenña.

² Ñehua, yeñoteñ ñerra'm erra'tseney eyecharēteypa' añcha'ña atet yepena atet yechenyet.

³ Ñato' sapa' sentenente' napa' nepena atet eyecharēten ñato' amate', ñeñtpa' ama añecpayaye ñeñt atet nellquēna na. Ama't acheñenesha' ñeñt añcha'tareteyetsa, ñerra'm erro'tente' entennet ñeñt atet nepenapa' ñeñtpa'cho'ña ama añeyaye ñeñt atet nellquēna na. Ama't napa'cho'ña ama neyemteno ñeñt atet nentena e'ñe nañeña.

⁴ Ñehua, e'ñe cohuenare' nenteñeñ allohuen ñeñt atet es ne'pa'yen, tarraña ñeñtpa' ama añeyaye alloch yeño'ch e'ñe' cohuenare' es ye'pa'yen. Añña e'ñe pocte' nenten Yepartsesharcha'ña otats e'ñe' pocte' entenen, amapa' ñato' amate'.

⁵ Ñeñto'marña notenes, amach sotatsto atet: añ acheñer nanac cohuen, po'psheñeñpa' ama cohuenayaye. Te'pa' amach sotatsto atet, tarro'mar esempohuañencha' huerra Yepartseshar. Allempopa' ñachña eñotatuerrrets ñeñt ya'nasotyena te'. Ñaña ñachña eñotatuerrrets ama't ñeñt atet yemna'yen yeyo'chro. Errponeycha' ñeñtey cohuen entuerr Yomporpa' allponeycha'cho' aye'chochtatuerr.

⁶ O' notuas ñeñt poctetsa ñeñtcha' atet sentey ya epan masheñ Apolos. Masheñeshacha' ñaña no'chaneshacha' tarro'mar atet notenes, allochñapa' attoch seño'ch añ pocte' e'ñech attecma senteñ ama't allohuen acheñ, e'ñe atet oteney Yompor po'ñoñ ñeñt atet anuaret ahuatoteñ. Allochñapa' amach yommo'chatsche acheñ ñeñt cohuen yenten e'ñe yañeña.

⁷ Sapa' atarr cohuen sentena sañeña tarraña amaña po'psheñeñeye' atarr eñotañ sentenaye ama't puesheñarra. Ama't allpon seño'tyenpa' amaca'ye e'ñe so'taye' es seño'tyeno; Yomporca'ye seño'tatene'. Po'ño'chpa' atto Yompor es eñotatenespa' eso'mare'tña sommo'chyenaña atet ñerra'm e'ñe so'ta es seño'tyen.

⁸ Cha't sotenapañ o'te' nanac setsotoñ Yompor pocta'pña. Cha sottena atet ñerra'm ama es sepallteno ama't coñe'ta Yomprosho't. Yañapa' o'huañ acua'psenaye' senterrey. Sañapa' o'cha añcha'taretoyen sorrtena. Ñehua, e'ñe pocte' sa'm'cha'tare'ttepa'tarro'mar ñerra'm po'ño'ch o'ch sa'm'cha'tare'tterrapa' ñato' attotpa' o'ch semnatey yaña o'ch ya'm'cha'tare'ttapreterra.

⁹ Tarraña napa' noctape'chen ñato' ya ñeñfey allsensareteypa' Yomporpa' ñato' o'ch muenatan acheñenesha' yapa' o'ch a'ypo'ñerryet. Acheñenesha'ñapa' çhach amtsen entenyet. Attach cohuana'tyenyey allohuen acheñenesha' arr patsro, ama't ñaña ñeñf Yompor po'millañoñeñnaneshar o'ch cohuana'tyeyet ñamet.

¹⁰ E'ñe yame'ñeñoñ Cristopa' añña acheñenesha'pa' çhach otenet yapa' amo' es yeñoteno, tarraña sapa' chaña atet sentena ñerra'mrrate' atarr nanac eñotañes. Ñaña yapa' çhach otenyet amo' esoshe'mayayye, tarraña sañapa' ataña ahuaencatoyen sentena. Ñaña sapa' nanac añcha'na'tpo' entenset, yañapa' amach acua'psenaye' entyenyeto.

¹¹ Yañapa' teme'ttsen yemuerochtena ama't yachporrñoñ, yo'ñpañoñe'na yemue-rochtena ñaña yemuelleñoñe'na. Atta epaye' atserrpenyet, ñaña ama yecheno allcha' yeycha.

¹² E'ñe yetorreñoñ nanac yetaruasen e'ñe ya yotoñ. Ñaña ñerra'm esempo sasare'tenyetpa' yañapa' o'ch yenamatenanet Yompor pa'nateña ñocpuet. Ñaña ñerra'm esempo pue'moñe'teñoñet cotare'tenyetpa' yañapa' attach ya'huantenanet.

¹³ Ñaña ñerra'm esempo sochatse'tenyetpa' yañapa' çhach yamo'tstanet cohuen. Ñaña ama't teme'ttsen entenyet atet ñerra'mrrate' es ahuaapore'taret, ñeñf ama es sherbetso ama't mamesha arr patsro.

¹⁴ Napa' ama añecpaye' nequellquënnaso añ ñoñets attoch o'ch nepencatas, añecopña nequellquënnas attoch noctape'chaterres e'ñe cohuen atet ñerra'm e'ñe nechemeres ñeñf nanac nemuerara.

¹⁵ Na po'ñoçhpa' atet nentenes ñerra'mrrate' e'ñe nechemereshas. Tarro'mar ahuaña allempo neserrpare'tatoses cohuen ñoñets ñeñf Yomporshotpa' o' name'ñatasa Cristo Jesús, ñeñfpa' atet ñerra'm çho nechemere'tensa Cristocop. Ñeño'marña te'pa' notenes, ama't eñall shonte' acheñ ñeñfcha' soctape'chaterre' ñeñf cohuentetsa Cristocop, tarraña e'ñe patrpa sompor sepen ñeñf ñanom same'ñate', ñeñfpa' atet ñerra'm na.

¹⁶ Ñeño'marña napa' notenes: Atet sentenen atet nepena na e'ñe cohuen, sapa'cho'ña atetcha' sepa saña.

¹⁷ Ñeño'marña nemñonas masheñ Timoteo; ñapa'cho'ña nechemer nepeñ. Ñapa' nanac nemorrenteña, ñapa' çhocma ame'ñenana Yepartseshar. Ñapa' ñach seyerpate' Cristo poçtañña ñeñfara coçtaññats neyçhatyey erracmañen errate' pame'ñeñoñet apçhenet Yomporcop.

¹⁸ Patanta'ttospa' nanac sommo'chena atto es señoñtyen. Sapa' cha't sotenapañ ñato' napa' amach neçhapoña sesho.

¹⁹ Tarraña po'ñoçhcha' neçhap sesho ñerra'm Yomporcha' muenats. Ama't tayecmapa' pocte' o'ch ahuen ñerra'm ña muenats. EsemPOCH neçherrerrpa' allempochña neñotos ñeñf ommo'chetsa, ñato' po'ñoçhte' ahuaencatet Yomporcop, amapa' ñato' attate' ommo'chenet.

²⁰ Amaña e'ñe ñapña yeserrpare'teñoñ yorrtateññañeña Yompor po'cohuenña attoch atarr ayochreshattena ña; po'huamencote'nachña yorrtateññañ po'cohuenña.

²¹ Ñehua, te'pa' o'ch na'p'to'tas: ¿Erroñena't semnen ñeñfcha' atet neñoses allempoch neçhap sesho? Ñato' o'ch necoñchatoses, ñato' o'ch soctape'cherr cohuen tayecma attoch esempoch neçhappa' amach eñalle attoch o'ch necoñchatoses. Allempopa' ñato' ellochña çhach nemuerossa e'ñe cohuen.

5

Atto Pablopa' ama pocteye' entano atto puesheñarr corinto'marnesha' orrtatan ñeñf ama pocteyaye tarraña pamo'tsesha'ñapa' ama erroteye' oteñeto

1 Ñehua, te'pa' o'ch notas po'poñ. Tarro'mar atet otyenet, po'ñoçh eñallo' sesho puesheñarr yacma ahuo' yorerran pachoretsore'. Ñeñtpa' nanac ochña'teñets atet, tarro'mar ama't ñeñt ama ame'ñetsopa' ama pocteye' entenetoña atet.

2 Tarraña sapa' çhocmo' cohuen senteñ ñeñt atet sepena. Eso'mare'tña ama çhoye'ña llecatenso. Tarro'mar ñeñt ochña'tets atetpa' amach allo'na senteñe attoch o'ch allo'na separrocmatnen epas.

3-4 Ama't napa' ama allo'tsenno parro, tarraña e'ñe neyerpueñoñespa' allo'tseney parro. Ama't ama allo'tsennopa' napa' o'ch notas necartoñ ñeñt pocte' nenten na, attecma ñerra'm allo'tseney parro. Napa' o' neñoçh ñeñtcha' atet sepe' ñeñt ochña'tets atet. O'ch notas ñeñtcha' atet sepe': O'ch sapçha allohuenes e'ñe same'ñeñoñ Yepartseshar Jesús; napa'çho'ña e'ñe neyerpueñoñespa' allo'tseneycha' parro. Allochñapa' e'ñe Yepartseshar Jesús po'huamenco'tpa'

5 o'ch sepoñ ñeñt yacmar o'ch sapuer oneñeñ attoch a'coñchatoñ po'chets. Allochñapa' puecamquëñpa' qeshperrach esempohuañencha' huerra Yepartseshar Jesús.

6 O'ch alla noterrser: Sapa' ama't sommo'chenañ atto e'ñe cohuenare' es sepeneñpa' tarraña ñeñtpa' ama pocteyaye, tarro'mar atta e'ñe semnateñ acheñ o'ch allo'na ochña'tnen. Ama't seño'teñe ñerra'm allo'na yemnatneñ o'ch ochña't ama't e'ñe puesheñarro'tapa' tsapa'tone'tpa' o'ch pet allohuenet atet. Ñato' o'ch netma'ntacha atet: "Ñerra'm yena' coñe't chase' allempo yeyeçcaten pan, ama't e'ñe coñe'ta yena'pa' o'ch epa'hua ora, attoch e'ñe rropa'ptatuan ora pan."

7 Ñeñto'marña o' notas o'ch sa'ypo'ñerr ñeñt ahua't soçta'pña ñeñt nanac sosey. Añcha'ña o'ch setserrataterr soçta'pña. Tarro'mar po'ñoçh etserra o' yeçcaterres Yompor. O'ch netma'ntacha atet pete't ahua't allempo o'ch çherr pascuapo çhocmach huapore'tuet allohuen pan ñeñt a'chasaret. O'ch yeçcatet etserra pan ñeñt ama a'chasaretayaye. Ñaña pascuapopa' çhocmach muetsete't carrnerotoll, tarraña te'pa' Cristoña o' amtsaretta yocop.

8 Ñaña ahua't pascuapo añ coshatahuete't pan ñeñt ama a'chasaretayaye tarraña te'pa' añcha'ña yocshatterre' attoch o'ch ya'ypo'ña'huerr ñeñt ahua't yoçta'pña ñeñt allo yo'chña'tare'te't ñaña ñeñt nanac sosey Yomporecop. Añcha'ña o'ch yoçtape'çherr etserra ñeñt e'ñe cohuenare' co'ta'pñats Yomporecop ñeñtara co'ta'pñats ñeñt e'ñe po'ñoçh cohuen.

9-10 Te'pa' o'ch notas po'poñ. Ahuaña po'poñ necarto'tpa' atet notuas: Amach seyemtatscho ñeñt cheta'yene' coyanesha' amach pue'taporeyaye. Ñehua, allempo notas necarto'tpa' añecop noten ñeñt ame'ñetsa tarro'mar ñerra'm attera cheta'yenan coyanesha', amach seyemtatsche acheñ ñeñt atet petsa. Tarraña ama añecpaye' atet noteno ñeñt ama ame'ñetso ñeñt atet petsapa' amach seyemtatsche. Tarro'mar añe patsropa' çhocmach yeyemcha ama't ñeñt ama ame'ñetso, atet ñerra'm ñeñt cheta'yene' coyanesha' ñeñt ama pue'taporeyaye, ñaña atet ñerra'm ñeñt atarr es ye'chapretetsa, amapa' ñaña eñe't, ñaña ñeñt ma'yochenaya ayeçcataret. Ñerra'm ama yeyemtaretopa' amate' erroteno yocroña añe patsro.

11 Añña notenes amach seyemtatsche ñeñt otets ame'ñenano' Cristo tarraña ñeñt attera cheta'yene' coyanesha' ñeñt ama pue'taporeyaye, amapa' ñeñt attera es ye'chapretyetsa, amapa' ñeñt attera ma'yochenaya ayeçcataret, amapa' ñeñt attera sasare'tets, amapa' ñeñt attera posa'tarets, amapa' ñeñt attera etyets. Ñeñt atet pa'yetsapa' amach seyemtatschero, ñaña ama't attpa' amach serrallme'çherro epas.

12 Ñehua, añecop atet o' notuas, tarro'mar yocoppa' ama pocteyaye o'ch yotteñe'cheñ ñeñt ama ame'ñetso. Yocoppa' añña e'ñe pocte' o'ch yotteñe'cheñ ñeñt pame'ñeño'tet atterach es pantenet.

¹³ Yomporpa' ñachña otteñe'cherre' ñeñt' ama ame'ñetso. Sapa' aña poctetsa socop sehuapore'ch ñeñt' atterach sosya'tsañach orrtatyenet.

6

Atto ama pocteyaye o'ch yetmantanna'ta

¹ Te'pa' o'ch noterrser po'poñ. Ñaña o' ne'mare'tas atto sapa' chocmo' setmantannena ñerra'm esempo erroť seřannena, ñaña ama't ñeñteso' pueyochresha' o' perrsoñ Parets. Eso'mare't chocma soteña añcha'tareť ñeñt' ama ame'ñetso o'ch a'poctatonas ñeñt' atto se'moñe'tannena. Socoppa' aña pocte' o'ch soch puesheñarr ñeñt' e'ñe parrocmá same'ñena ñetcha'ña a'poctate' ñeñt' atet seřannena.

² Ama't señoñe ya ñeñtey o' pueyochresha' perrey Paretspa' yach añcha'tareťterrtsa allohuen acheñeneshacop arr patsro esempohuañen. Ñehua, ñerra'm po'ñoč yeñoñeñ o'ch ya'ñcha'tareťterra allohuen acheñeneshacop arr patsro esempohuañenpa' eso'mare'tña ama señoñeñ o'ch sa'poctat ñoñets e'ñe sañaña ñeñt' ama torrapahuoyaye.

³ Ñaña ama't señoñeñ esempohuañenpa' yach añcha'tareťterrtsa ama't Yompor po'millañoñeñanesharecop. Ñeñto'marña te'pa' notenes e'ñe pocte' o'ch ya'poctatanna'ta ya yeñoñ ñeñt' atet yeychena te' arr.

⁴ Ñerra'm esempo esocop setmantannenapa' eso'mare'tña o'ch sene' puesheñarr ñeñt' ama cohuenaye' enteno ñeñt' ame'ñetsa, ñach a'poctate' señoñ socop.

⁵ E'ñe nepencna'ntateñoñes sapa' ñeñto'marña atet notenes: Seshopa' ¿ama'tña eñalleña ama't puesheñarra ñeñt' ame'ñetsa ñeñt' eñotene' o'ch a'poctatan ñoñets? Ñeñt' eñotene'pa' e'ñe pocte' ñach a'poctatene' señoñ ñeñtes parro same'ñena.

⁶ Tarraña te'pa' ama atteye' sepeno. Chocmo' setmantannena ama't ñeñteso' parro same'ñenañ. Sapa' ahuo'chcho' ahues tomantanna'ttsa a'yo allo'tsen acheñ ñeñt' ama ame'ñetso, ñapa' ahuo'chcho' a'poctatonas señoñ socop.

⁷ Tarraña ñeñtpa' ama pocteyaye ama't mamesha o'ch setmantannena. Tarro'mar ñerra'm chocma yetmantannenapa' ñeñtpa' ama ayeñe' yepeno atet muenen Yompor. Aña ñerra'm esempo erroť ñonas po'psheñeñpa' eso'mare'tña amaña alla sa'huantannenoña ñeñt' atto erroť es seřanna'tyena. Ñaña ñerra'm esempo es puerratanñpensetpa' eso'mare'tña amaña alla sa'huantenaneto. Añ poctetsa o'ch alla ya'huantenanet alla.

⁸ Tarraña saña'pa' ama atteye'ña sepeno. Aña sapa' chocmo' erroť seřannena, ñaña chocmo' es seřratanñpsannena ama't e'ñe sagattsa ñeñtes ame'ñetsañ.

⁹ Ama't señoñeña ñeñt' ama cohuen es petsopa' amach es o'paterroña all añcha'tareťtena Yompor. Amach semnatatsche po'psheñeñ o'ch atta shecare'tas. Po'ñoč atet notenes, ñeñt' cañoresha'tetspa' amach es o'paterro all añcha'tareťtena Yompor. Ñaña ñeñt' po'yomporer ña'yene' ayečhcateretpa' ñetpa'cho'ña amach es o'patatareťterretoña all añcha'tareťtena Yompor, ñaña ama't ñeñt' apretets taporets, ñaña yacmanesha' ñeñt' agapannetsa e'ñe ñagattset.

¹⁰ Alloťpa' ñaña ñeñt' etyets ñaña ñeñt' atarr es ye'chapretyetsa, ñaña ñeñt' posa'tare'tyets, ñeñt' atet ña'yetsapa' amach es o'patatareťterreto all añcha'tareťtena Yompor. Alloťpa' ñaña ñeñt' achmare'tets ñaña ñeñt' puerratanñpesyets ñetpa'cho'ña amach es o'patatareťterreto all añcha'tareťtena Yompor.

¹¹ Sapa'cho'ña puesheña'ttsos attecma sepe't saña ahuaña. Tarraña te'pa' o' e'shohuareťterra so'chñar, attoña o' sa'cohuentatareťterra Partsocop. E'ñe seyemteñoñ Yepartseshar Jesucristo te'ña Pomporpa' o' pocte' enterres. Ñaña e'ñe puechorreñoñes Yompor Puecamquẽña' o' pocte' enterres Yompor.

Añ pocte' o'ch e'ñe yecuen cohuen yechets tarro'mar ñeñtara yechetspa' po'chets peñ ñaña Cristo

¹² Te'pa' o'ch noterrser po'poñ. Ñehua, napa' neñotenes puesheña'ttsospa' atet sotatse'tyen, "e'ño' pocte' ye'pa'yes ama't erra'tsente' yemnen." Ñehua, yapa' yeñoteñ Yompor po'ñoñpa' ama't ama atet otenyeñe amach es ye'pa'yesatsto, ñeñto'marña "e'ñe pocteñ allohuenpa' o'ch es ye'pa'yeneñ." Tarraña ama't e'ñe pocteñ o'ch atet es ye'pa'yeneñ allohuenpa' tarraña ñerra'm ñeñtpa' ama añecpayaye alloch yeyenpueñ yamo'ts attoch e'ñe huomenc ye'pannena yeyo'cher Yomporecoppa' ñehua, ñeñtepñapa' amach atet ye'patsto. Ñaña ama't pocteñ allohuenpa' o'ch es ye'pa'yespa', tarraña ama pocteyaye o'ch nanac es yayomãtse'tyesa tarro'mar ñerra'm es nanac yayomenapa' ñeñtaña pomnaren pene'ña yechets.

¹³ Ñaña neñotenes puesheña'ttsospa' atet sotatse'tyen, e'ño' pocte' senteñ o'ch señmatat sechets e'ñe sa secañoresha'teñoñ tarro'mar ñeñtecpo' yechquëñaña sechets o'ch atet se'pateñ. Ñeñto'marña atet setma'ntatenaña sechets ñerra'mrrate' allempo sachporrena çhoch serra' serrar attochña e'ñe señmatat sañ e'ñe ora sechtsohuen tarro'mar sa'pa' ñeñtecpo' yechquëña. Tarraña te' napa' o'ch notas, ama't pocteñ o'ch yeñmatateneñ yañ arr patsropa' çhapcha' esempohuañen allempopa' o'huañcha' yemna' yañ ñaña yerrar, tarro'mar atet ne' Yompor. Tarraña ama't pocteñ o'ch yeñmatateneñ ya'pa' tarraña ama pocteyaye o'ch e'ñe yeñmataten yechets yecañoresha'teñoñ tarro'mar ama añecpaye' ayeçcatareteña yechets attoch yecañoresha'ten. Yechetspa' añecopña ayeçcatareñ attoch yetorra'yesa Yepartsesharecop. Ñaña ñapa' ñach yecuañpene'ña yechets.

¹⁴ Ñeñto'mar Yomporpa' o' tantaterran Puechemer ñeñt Yepartseshar yepen ya. Ñeñto'marña yeñoteñ yapa'cho'ña esempohuañenpa' tantaterrnaycha' yaña yechets. E'ñe po'huamenco'pa' tantatuerreycha'.

¹⁵ Ama't seño'teñeña e'ñe yeparrocmateñoñ Cristopa' ñeñt ya yechetspa' po'ñoçhpa' ñeñtara po'chets pen ñaña Cristo. Ñeñto'marña notenes, atto ñeñt po'chets pen Cristo ñeñtara ya yechetspa' eso'mare'tña e'ñe pocte' sentenña e'ñe ya yechtso'pa' o'ch yecañoresha'tach Cristo. Amaca'ye pocteyaye o'ch yetsetach Cristo po'chets epuet yecañoresha'.

¹⁶ Ñehua, ama't seño'teñeña ñerra'm esempo yo'chña't epay ottatsña'pa' epsheño'marey o'ch e'ñe yeparrocmatat yechtso. Po'ñoçh atet enteney Yompor atet oteney po'ñoñoñ ñeñt anuareñ ahua'otoñ, añmapa' ñeñt atet oten: "ñeñt epsheño'maretpa' e'ñech pa'rra po'chets penet."

¹⁷ Tarro'mar e'ñe yeparrocmateñoñ Yepartsesharpa' epsheño'mareypa' e'ñech pa'rra yoctape'chen yeyo'chro ñeñt yecamquëñecop.

¹⁸ Ñeñto'marña notenes añ pocte' o'ch sa'ypo'ñer cañoresha'teñets. Po'poñeçhno ñeñt ye'pa'yen soseypa' ñeñtpa' ama yechtsoye' ya'sosyateno. Tarraña añña cañoresha'teñetspa' ñeñtpa' e'ñe ya yechets ya'sosyateno.

¹⁹ Ama't seño'teñeña ye'narpa' ñeñtara pa'paquëll pen Parets Puecamquëñ ñeñt chorratenya Yompor. Ñeñto'mar yeñoteñ yechetspa' ama yoyaye, ñeñtpa' Yomporo tarro'mar

²⁰ ñapa' ahuo't rañterrya. Atto rañterryapa' nanac mueroçhta Puechemer attoch tsa'tuerrnaya yo'chñar. Ñeñto'marña notenes, ama't atto yocrra yechtso'pa' Yomporepa'chña yecohuentaten e'ñe yecamquëño'huen tarro'mar ñeñt epo'marpa' Yomporo.

7

Atetcha' ye'pa ñerra'm yemneñ o'ch yesna'ta

¹ Te'pa' o'ch neserrpare'tatas ñeñt atet sa'p̄to'ten ahuaña secartot. Ahuo't sa'p̄to'ten pocte'te' o'ch yesna'ta. Ñehua, ñanom o'ch notas atet, e'ñe poctetñ amate' yeyoratsche coyanesha' ñeñtcha' yetapor yeḡa'.

² Tarraña ellopa' añ pocte' ñaña allohueney yacmaneshay o'ch yeyore puesheñarr coyanesha' ñeñtcha' yetapor yeḡa'. Coyanesha'pa'cho'ña pocte' ñaña echanepa' e'ñe ña puerrollar. O' notas atet tarro'mar ñerra'm ama cho seyoro puesheñarr ñeñtcha' setapor seḡa'pa' attate' allo'na secañoresha'tnen.

³ E'ñe pocte' epas setaporpa' sagapanna'tepa'ch.

⁴ Tarro'mar coyanesha' ñeñt arrollaretpa' ama e'ñe ñapḡayaye po'chets, ñeñtpa' puerrollarot'nach. Ñaña yacmapa'cho'ña amach ñapḡayaye po'chets, ñeñtpa' puetaporo'nach.

⁵ E'ñe pocte' chocmach sagapannena. Tarraña ñerra'm erroteno esempo pocte' senteñ epsheño'mares o'ch sa'pocstat ñoñets e'ñe sañeña amach sagapanna'terro allponmat attoch añach sema'yochra ma'yochatsa. Tarraña ñerra'm o' met allponmat allempo o' sa'pocstatuepa' pocte' o'ch alla sagapannerra. Tarro'mar ñerra'm ama ahuen sagapan-nerropa' chate' oneñetpa' topatas amate' sa'huanto.

⁶ Tarraña ama notenso ñeñtach paterr pocetsa o'ch yesna'ta, añpa' atta notenes ñerra'm semneñ o'ch sesna'tapa' pocte' sena'tepa'.

⁷ Tarraña napa' e'ñe pocte' nenteñ ñerra'm allohuenes atteseñ ñerra'm na.* (Tarro'mar Yomporpa' ahuo't apuen attoch amach nemno coyanesha'.) Tarraña allohueneypa' ama attecmayaye. Tarro'mar Yomporpa' ahuo't apa'yesey ellocma atetcha' yesherbe' e'ñe cohuen.

⁸ Ñaña o'ch notas, ñeñtes ama ataporetosopa' e'ñe poctetñ amate' sesna'tatsto. Ñaña ñeñtes rretornaneshaspa' e'ñe poctetñ ñaña amate' sesome'terro. E'ñe poctetñ o'te' socrañ e'ñe atta atet nepena na.

⁹ Tarraña ama't notensoñ atetpa' ñerra'm ama erroteno sa'huantopa' e'ñe pocte' sesna'tepa'. Ama pocteyaye o'ch atta nanac yemneñ coyanesha'. Añña pocte' yesna'tepa'. Tarraña añña nanac cohuen ñaña amach yesna'to.

¹⁰ Te'pa' o'ch notas ñeñtes arrollaretes ñeñtcha' atet seḡa. Ñehua, po'ño'ch ama naye' otetso, añña Yepartsesharña otets. Añ pocte' amach sesatstere serrollar.

¹¹ Tarraña ñerra'm eseshas serre' serrollarpa' añ pocte' amach sesome'tatsterro ello, amapa' o'ch alla samo'tstera serrollareshe'mañ. Ñaña o'ch notas samña ñeñtes ataporetos, amach sesatstere setapor.

¹² Te'pa' o'ch notas ñeñt atet pocte' nenten na. Ama't Yepartsesharpa' ama otenñe ñeñt pocetsa añecop, tarraña napa' o'ch neñotatas ñeñt pocte' nenten na. Ñerra'm puesheñarr yacma ñeñt o' ame'ñerra ñeñt atapore'tañ, tarraña ñerra'm puetaporpa' ama ame'ñeno, añ pocte' amach satsterrano puetapor ñerra'm puetaporpa' ama mueno o'ch ahuer.

¹³ Attecma ñaña puesheñarr coyanesha' ñeñt o' ame'ñerra ñeñt arrollare'tañ, tarraña ñerra'm puerrollarpa' ama ame'ñeno, añña pocte' amach satsterrano puerrollar ñerra'm puerrollarpa' ama mueno o'ch ser.

¹⁴ Tarro'mar ñerra'm puetaporpa' ame'ñena, chocma eñall attoch o'ch ame'ñatana puerrollar. Attecma ñaña ñerra'm puesheñarr yacma ñeñt ame'ñetsa, chocma eñall attoch ame'ñatana ñaña puetapor. Ñaña ñerra'm sesannenapa' ñato' sechemeresha'pa' amach es eñoterro Partsocop. Tarraña ñerra'm ama sesannerropa' sacñeñarnesha'ñapa' o'ch so'patacha ñaña Parets.

¹⁵ Tarraña ñerra'm puesheñarr yacma ñeñt ama ame'ñetso, ñerra'm mueneñ o'ch serran puetapor ñeñt ame'ñetsa, ñehua, pocte' serepa'. Tarro'mar puetapor ñeñt ame'ñetsapa' ama es palltetso puerrollarecop. Ñaña Yomporpa' ama mueno ellopa' o'ch allo'na

* 7:7 Ñehua, Pablopa' ama eñalle puetapor.

ye'moñe'tanna'tnena yerrollarecop. Attecma ñerra'm puesheñarr coyanesha' ñeñt' ama ame'ñetso, ñerra'm mueneñ o'ch serran puerrollar ñeñt' ame'ñetsa, ñehua, pocte' serepa'.

¹⁶ Ateñ notenes sesannerrepa' tarro'mar ñeñtes arrollaretespa' po'ñoçhpa' amach erroteno señoche ñato' sa'queshpachcha' serrollar, ñato' amate'. Ñaña ñeñtes ataporetespa' amach erroteno señoche ñato' sa'queshpachcha' setapor, ñato' amate'.

¹⁷ Ñeñto'mar te'pa' o'ch noterrser, erroteno'tseneste' ama't allempo errte' same'ñera Yepartsesharpa' atterasepa'ch. Ñaña atet muenatyeney Yomporpa' attepa'ch yepena puesheña'ttsoy. Ñeñtpa' attecmaç neyçhatyes ama't ñaña ora allohuen ñeñt' pame'ñeñoñet apçha'yetsa allemeñ anetso'mar.

¹⁸ Ateñ ñaña ñerra'm puesheñarr yacma allempo errte' ame'ñerrtset, ñerra'm allemppopa' o' atsorraretetuet atet yeche't judionesha'pa' te'pa' ama pallteno o'ch a'huañerran all tsorret ahuañ. Attecma ñaña po'psheñeñ allempo errte' ame'ñerrtset, ñerra'm ñetpa' ama atsorrarefeto, te'pa' ama pallteno o'ch atsorrarettet atet yeçhena judionesha'.

¹⁹ Ama't ya'tsorrarettatstapa' ñeñtpa' ama es sherbeno. Ñaña ama't ama ya'tsorrarettatstopa' ñeñtpa'çho'ña ama es sherbeno. Añña nanac sherbets o'ch yeça ñeñt' atet oteney Yompor.

²⁰ Ñeñtpa' o'ch alla noterrser, añ pocte', ama't erroteno'tseneste' allempo errte' same'ñerrapa' atterasepa'ch.

²¹ Ama't allempo errte' pame'ñerra, ama't añepte' ñeñt' ataruasatareñ e'ñe attapa' e'ñe pocte', amach pellcatsto. Atterach petaruasen pepatronarecop, tarraña ñerra'm errotenoñ o'ch pa'rroyaterra pepatronaresho'pa' e'ñech pocte' a'rroyerrpetepa' allot taruasatenpet e'ñe atfa.

²² Ñato' o'ch netma'ntacha atet: Eñall puesheñarr yacma ñeñt' ataruasatareñ e'ñe atfa, tarraña o' çhap allempo agapan Yepartseshar ñeñt'cha' Pamo'mte' perr. Allempopa' ama't attera taruasateñeñ ñeñt' po'patronar pen arr patsopa' tarraña te'ña Cristopa' a'rroyatamper po'çhñar ñeñt' nanac taruasataye't ahuaña. Te'pa' añcha'ña taruasaterre' Cristo ñeñt' Yepartseshar yepen. Ñaña eñall puesheñarr yacma ñeñt'ñapa' cohueno'tsen ñeñt' ama ataruasatareñeyaye. Ñapa'çho'ña o' çhap allempoch aguërran Yepartseshar Cristo ñeñt'cha' Pamo'mte' perr. Te'ña Pamo'mte' Cristopa' ñachña taruasaterre' e'ñe cohuen ñeñt' ahuañapa' ama ataruasatareñe e'ñe atfa.

²³ Cristopa' o' rañterrya. Atto rañterryapa' nanac mueroçhta attoch tsa'tuerrnaya yo'çhñar. Ñeñto'marña notenes, amach acheña ñapueñ samo'mte' sepatsto, añña e'ñe po'ñoçh Yamo'mte' yepen Cristo.

²⁴ Ñeñto'marña masheñeshacha' ñaña noçhaneshacha' o'ch noterrser alla, ama't erroteno'tseneste' allempo errte' same'ñera Cristopa' pocte' atterasepa'ch. Tarraña Yomporrepa'chña seyenpue'.

²⁵ Te'pa' o'ch noterrser po'poñ. Añpa' ñeñt' atet sa'p'to'ten ahuaña ñato' pocto'te' ahuo'ch some'ta ñeñt' shopsheshare'. Ñehua, napa' o'ch notas, Yepartsesharpa' ama otenyeñe ñeñt'cha' atet yepe' shopshesharecop, tarraña napa' o'ch neñotatas ñeñt' pocte' nenten e'ñe na, tarro'mar Yepartseshar puemuereño'pa' ahuo't eñotañ pa'n attoch sapa' seyemuetna.

²⁶ Ñehua, ñanompa' o'ch notas: Ama't te'pa' çhocma huennaya shonte' esocmañen ñeñt' echarr yentyen ñeñto'marña pocte' nenteñ amate' sesome'to, ñaña amate' sesna'to. Añña poctetsa attate' yocrra.

²⁷ Tarraña ñerra'm o' seyore coyanesha'pa' e'ñe pocte'; te'pa' amach sesatstere. Atteña ñerra'm ama seyoreña' coyanesha'pa' pocte' ñaña; te'pa' amach seyoratsche.

²⁸ Tarraña ñerra'm esempo semne' o'ch sesna'tapa' e'ñe pocte'. Ñaña ñerra'm esempo coyanesha'pa' mueneñ o'ch some'ta, ñeñtpa'çho'ña e'ñe pocte', tarro'mar ñeñtpa' ama

ochña'teñtsoyaye Yomporecop. Tarraña ñerra'm yacmapa' o'ch sena'ta, ñaña ñerra'm coy-
anasha'pa' o'ch some'ta ñaña, allempopa' o'ch echan shonte' ñeñtcha' llecatyese' attoch
corret arr patsro. Ñeñto'marña notenes amach sesna'tatsto, coyanasha'pa' cho'ña amach
some'tatsto, tarro'mar napa' ama nemno o'ch sechen shonte' ñeñtcha' sellcatyene'.

29 Ñeñto'marña masheñshacha' ñaña nochaneshacha' nemneñ o'ch alla noterrser.
Te'pa' ama atonaye' pallteno char attoch yetorrena Yomporecop. Ñeñto'marña o'ch
notas ñeñtes o' setapore't, ama't o' setapore'tpa' añña poctetsa e'ñe tayoteñ amach patrra
sellcatsto ñeñt setaporecpa. Añecpa'nachña setorrena Yomporecop.

30 Ñaña ñerra'm esempo huaponasa llequëñetspa' amach ñeñtofa yequechpatsterro
atto yetorrena Yomporecop. Ñaña ama't esempo es nanac yocshatene'pa' amach
ñeñtofa yepsatstere Yompor. Ñaña ñerra'm esempo yapa' esocmañen yechenpa' tarraña
amach ñeñtofa yepsatstere Yompor.

31 Ñaña ñerra'm esempo es ye'pa'yen ñeñt patso'marecpapa' amach e'ñe ñeñta yoc-
shatsto ñeñt patso'marecpa. Tarro'mar ñeñt atet yeychen añ patso'marpa' ñeñtpa'
huañerrcha' esempo.

32 Ñeñto'marña notenes añechno, tarro'mar nemneñ sapa' amach eñalletatsto po'poñ
ñeñtcha' nanac sellcate'. Atet pena yacma ñeñt ama ataporetepa' añach e'ñe llequëna
ñeñt Yomporecop. E'ñech ma'yoçhrenaana attoch coshatenan Yepartseshar.

33 Tarraña yacmaña ñeñt ataporetpa' añach e'ñe llequëna ñeñt atto yocrrena añe
patsro. Ñaña añach ma'yoçhrena attoch coshatenan puetapor.

34 Ñeñto'marña amach errotenot patrra ma'yoçhreno ñeñt Yomporecop. Attecma
pena ñaña coyanasha' ñeñt ama arrollarete. Añach ma'yoçhrena ñeñt Yomporecop. E'ñe
po'chtsohuenpa' mueneñcha' o'ch a'rroya Partsocop. Ñaña ama't ora poctapño huenpa'
o'ch ma'yoçhrena Partsocop. Tarraña coyanasha' ñeñt arrollaretpa' añach lleca ñeñt atto
yocrrena añe patsro, ñaña añach lleca attoch coshatan puerrollar.

35 Ñeñt notenespa' ama añecpayaye attoch o'ch nompa'tas amach sesna'tatsto.
Añecopña atet notenes attoch napa' neyenpas, attoch çhocma cohuenare' es sorrtyen.
Ñaña çhocmach socsheñsha'pa' o'ch sema'yoçhrena Yomporecop, amach eñalletatsto
ñeñtcha' sepatene'.

36 Te'pa' o'ch noterrser po'poñ: Ñerra'm eseshas echene' seseñ ñeñt o' po'natuena,
ñaña ñerra'm pocte' senteñ o'ch some'tapa' ñehua, pocte' some'tepa'. E'ñe pocte' o'ch
semnach some'tepa' tarro'mar ñeñtpa' ama ochña'teñtsoyaye Yomporecop.

37 Tarraña ñerra'm erra'tsenotespa' sechen seseñ, ñaña ñerra'm ama semno o'ch
some'ta, ñaña ñerra'm seseñpa' e'ñe pocte' enteñ amach some'tatstopa' ñehua, pocte'
ñaña amach sesome'tatatsche. Ñerra'm po'ñoçh señoñteñ seyoçhro añpa' e'ñe pocte' atet,
ñehua, amach sesome'tatatsche. Elloña ñeñtpa' nanac cohuen.

38 Ñeñto'marña te'pa' o' notas: Ñerra'm erra'tsenotes muenate' seseñ o'ch some'tapa'
ñeñtpa' pocte'. Tarraña ñerra'm erra'tsenotes ama some'tataye seseñpa' elloña ñeñtpa'
nanac cohuen.

39 Te'pa' o'ch noterrser po'poñ. Ama't esempapa' ama pocteyaye coyanasha'pa' o'ch
serran puerrollar. Ama't errponmatcha' correna puerrollarpa' amach satstere. Tarraña
ñerra'm esempo rroma puerrollar, allempopa' e'ñe pocte' o'ch some'terra ello, tarraña
ñerra'm erra'tsencha' muenerr ñeñtcha' yorerre' ñeñtpa' ame'ñenach ñaña.

40 Tarraña ama't o' notuaseñ e'ñe pocte' o'ch some'terra rretorrnasha', elloña napa'
noctape'cheñ ñerra'm o'ch some'terra, ñato' allempopa' cosherrañcha' mame'. Tarraña
ñerra'm amach some'terro, napa' noctape'cheñ ñato' allempopa' ellochña nanaccha'
cosherra ñapueñ. Napa' noten Yompor Puecamquëñoñ neñoten atet.

8

Arrpa' all cotape' chatan corinto' marnesha' añecop ñeññ amtsaret ayeçhcataretecop

1 Te'pa' o'ch neserrpare'tatas po'poñ ñeññ atet sa'p'to'tenen ahuaña, ñeññpa' atet sotenen: Ñeññey ame'ñenaya Cristopa' ñato' ¿poc'to'te' o'ch serra' po'chets ñeññ muetsenet ayeçhcataretecop? Napa' neñotenes puesheña'ttsospa' sotyen sapa' señoteno' ñeññ cohuentetsa Yomporecop. Ñehua, po'ño'ch allohueneypa' yeñoteñ ñeññ cohuentetsa Yomporecop. Tarraña ñerra'm esempo yoten: "Napa' e'ñe neñotuen ñeññ cohuentetsa Yomporecop", ñerra'm e'ñe yommo'cheño'ña yotenpa' ñeññpa' e'ñech orrena atet yoten. Yommo'cheño'ña' amach çhoye' yeyenpannenno attoch huomenc ye'pa' yeyo'cher Yomporecop. Yemorrentanna'teño'ña' çhocña yeyenpanna'ta.

2 Tarro'mar ñerra'm esempopa' çchach yotenapañ o'te' e'ñe es yeñotua poc'tacma, tarraña yeñoteñ po'ño'chpa' çhocma yepalltena o'ch e'ñe yeñotua poc'tacma ñeññ cohuentetsa.

3 Tarraña e'ñe yemorrenteño' Yomporpa' ñapa' eñoteny yapa'çho'ña yeñoteñ ñeññ cohuentetsa ñocop.

4 Te'pa' o' notuas atet te'ñapa' o'ch neserrpare'tatas ñeññ cohuentetsa Yomporecop. Ñeññey ame'ñenaya Cristopa' poc'te'te' o'ch yerren po'chets ñeññ amtsaret ayeçhcataretecop, ñato' amate' poc'teyaye. Ñehua, yeñoteñ ñeññ ayeçhcataret ñeññ toma'ntatenet ñetpa' po'ño'chpa' ama eñalle Yompor ñeññ atet. Yapa' yeñoteñ Yomporpa' e'ñe pa'rra.

5 Po'ño'chpa' ñetpa' pa'namen po'yomporer pa'yenet ama't atet ñerra'm ñeññ ento'tsa'yen, ñaña ama't ñeññ añe patsro'tsa'yen. Ñetpa' pa'namen po'yomporer pa'yenet, ñaña pa'namen po'partseshar pa'yenet.

6 Tarraña ya yocoppa' yeñoteñ Yompor Apapa' e'ñe pa'rra, ñeññ Yompor ñeññ yeçhcatue' allohuen ñeññ yentyen, ñaña yapa' ahuo't yeçhcatey e'ñe ñocop. Ñaña yeñoteñ Yepartsesharpa' e'ñe pa'rra ñeññara Jesucristo ñeññ yeçhcate' allohuen ñeññ yentyen. Te' yapa'çho'ña apueney atto yocrrena.

7 Tarraña acheñenesha'pa' ama allohuenacmaye' yoc'tape'chueno atet. Ñeñño'marña puesheña'tetspa' ahuatoteñ yeçhete't o'ch nenet es po'chets ayeçhcataretecop. Ñeñño'marña ñerra'm esempo rrenet ñeññ po'chets ñeññ muetsenet ayeçhcataretecoppa' e'ñech atta rreñet po'tomña. E'ñe po'tomña'pa' otenet ñato' ama poc'teyaye o'ch yerren po'chets ñeññ nenet ayeçhcataretecop. Ñetpa' atta enteñet ama arrapahuoyaye ñeññ Yomporecop. Tarro'mar ama çhenaneto pueyo'çhro atto ñeññ e'ñe poc'tetsa Yomporecop.

8 Ñehua, yapa' yeñoteñ ñeññ yerrenpa' ama añecpayaye attoch e'ñe cohuen entey Yompor. Ama't yerreñ, ñaña ama't ama yerreñe ñehua, e'ñe attecma enteny Yompor.

9 Tarraña e'ñech seño'ta: E'ñech aco'pa es se'pa'yes. Ama't yapa' yeñoteñ Yomporpa' e'ñe poc'te' enteñeñ o'ch yerren po'chets ñeññ anaret ayeçhcataretecoppa' tarraña ñato' yerreño' añeçh'no'pa' çhate' alla ya'puerratatuer ñeññ ama tama huomenc penaye pueyo'cher Yomporecop.

10 Tarro'mar ñato' sapa' atette' sepena. Ñato' o'ch ahuenes puerahuo allo'tsen ayeçhcataret, allña'pa' ñato' o'chçho' serros po'chets ñeññ amtsaret ayeçhcataretecop. Ñaña ñato' sapa' e'ñech socsheñesha' serreñ tarro'mar sapa' seño'teñ ñeññpa' ama esoye' enteñe Yompor. Tarraña ñato' e'ñe allempoña serreñpa' ñato' o'ch entas po'psheñeñ ñeññ parro same'ñena. Tarraña ñapa' ñato' ama poc'teye' enteñe o'ch yerren po'chets ñeññ amtsaret ayeçhcataretecop. Ñato' o'ch peye'chateña ñaña pemo'nasheñ o'ch rreñ ñaña ñato' ama't ñapa' ama poc'teye' enteñe.

11 Tarraña ñerra'm ñapa' o'ch rrenan po'chets ñeññ anaret ayeçhcataretecoppa' ñapa' o'ch enteñ atetpa' ochña'teñets Yomporecop. Atteña'pa' ñato' o'ch alla puesuerran

Yompor. Ñeñto'marña notenes, ñato' e'ñe yeñoteñoñ ñeññ cohuentetsa Yomporecoppa' o'te' ya'chencatach yemo'nasheñ ñeññecop Jesús'pa' rroma ñaña.

¹² Ñerra'm esempo atet ye'papa' chate' yeyora yo'chñar yemo'nasheñecop tarro'mar o' yeye'chatera o'ch perra ñeññ ama pocteye' enteno ña. Ñehua, ñerra'm esempo yeyora yo'chñar yemo'nasheñecoppa' e'ñe ño'pa' o'ch yo'chña't ñaña Cristocop.

¹³ Ñeñto'marña te'pa' o'ch notas atet, ñerra'm esempo yerren po'chets ñeññ anaret aye'chcataretocop, ñerra'm yerreño'pa' ñato' ya'puerratater yemo'nasheñpa' e'ñe poctey amach yerratsto ñeññ po'chets. Ñeñto'marña napa' ama't esempapa' amach nerratsto ñeññ po'chets te'ta' neyoren no'chñar nemo'nasheñecop atto'tcha' na'puerratater.

9

Atto e'ñe poctey ñeññ torretsa Yomporecoppa' o'ch es yesherbeñ

¹ Te'pa' o'ch neñotatas po'poñ ñeññ atet nepena na. Napa' e'ñe poctey o'ch ne'pa'yes e'ñe erra'tsencha' nemnen na tarro'mar sapa' señotenen atto napa' ama eñalle ñeññ neyechare'tenaya na, tarro'mar napa' allsensareten Yomporeshot. Ñaña señotenen napa' o' orrterrana Yepartseshar Jesús, ñaña señotenen ña ahuamenca't nepene' tarro'mar e'ñe na netorreñoñ ñocop attoña same'ñerra saña.

² Ñehua, ama't po'potantaña' otyenetañ napa' amo' allsensareteyayno tarraña sapa' señotenen po'ño'ch napa' allsensaretenca'ye tarro'mar napa' ñeññen same'ñaterraya saña. Atto sapa' e'ñe cohuen same'ñera Yompor, attoña señotateña allohuen po'ño'ch napa' Yomporeshot allsensareten. Ñeñto'marña e'ñe poctey o'ch ne'pa'yes e'ñe erra'tsencha' nemnen na ñeññen allsensareten, tarraña ñeññpa' ama atteye' nepeno tarro'mar napa' ama nemno e'ñe atet nepeño' o'ch nepatare't cohuen ñoñets alloch Cristopa' a'queshpaterres.

³ Ñeñto'marña te'pa' o'ch notas ñeññcha' atet nanapanet ñerra'm esempo a'p'to'tare'tnet, pocto'te' ñeññ atet ne'pa'yena.

⁴ Po'ño'chpa' e'ñe poctey nocop o'ch serratallme'chennoñ allempo neserrpare'tatenes. Ñaña poctey sapa' o'ch sapnoñ ñeññcha' norryen.

⁵ Ñaña nocop e'ñe poctey ñerra'm eñalleñ ne'tapor o'ch nanemñ ñeññ parro yame'ñena all nechopeñe'chyen. Atet pena po'potantañ allsensaretnesha', ñaña atet pena Yepartseshar pa'mo'nasheñnesha', ñaña ñeññ atet pena Pedro.

⁶ Ñaña sapa' ñato' chate' soten e'ñe pocte' e'ñe epsheño'marey epan masheñ Bernabé yap'tach yetaruasen attoch yechen ñeññcha' yerren. Po'ño'chpa' po'potantañe'chno ñeññ torra'yetsa Yomporecoppa' ñetña'pa' arratarettenet e'ñe atta.

⁷ Po'ño'chpa' ñeññ atet pena solltarnesha'pa' ñetpa' e'ñe atta aparettenet ñeññ palltenet, amach es tsa'teneto. Ñaña atet pena ñeññ nare'tene' narmets. Ñetpa' e'ñe puenare'teño'pa' chocmach tsumueññañet puenarem pue'mer. Ñaña atet pena ñeññ po'taruas pene' o'ch cohuanpenan carrnero ñaña cabra. Ñetña'pa' chocmach orreññañet puemomos.

⁸ Sapa' chate' sotenapañ ñeññ atet notenes, ñeññpa' e'ñe'e' ñañeña noctapño' atet notyenes ñeññ atet yoctape'chyen ya allohueney ñeññey arromña'tey. Tarraña ñeññpa' amaca'ye atteyaye tarro'mar ñeññpa' ñeññtara ñoñets ñeññ atet anaret ahuatoteñ.

⁹ Tarro'mar Moisés po'ñoñ ñeññ atet anuaret ahuatoteñ, ñeññpa' atet oten: "Ñerra'm esempo satmama'tateñ huaquesh attoch es serrocllome'chach pa'tco't allempopa' amach sempanma'tatsche attoch ñapa'cho' rranepa'ña ñeññ serrocllome'chateñ." Ñehua, yapa' yeñoteñ Yomporpa' ama e'ñe ñap'te'cpa huacshecop eñose'te.

10 Po'ñoçhpa' yocpa'naña eñose't ñeñtey torra'yetsa ñocop. Tarro'mar e'ñe puemorreteñoŕey yapa' Yomporpa' e'ñe pocte' enteñ arratareŕeycha' yaña all yetorra'yena ñocop. O'ch netma'ntacha atet: Ñerra'm çho yetamuenpa' çhocmach yeyemtena ñeñtcha' yenare't all, o'ch choppa' ñeñtcha'ña yetsomuerr. Ñaña ñerra'm çho es yerrocllome'chenpa' çhocmach yeyemtena ñeñt yerrocllome'chen, tarro'mar yapa' yeñoteñ çhocmach apuerryet allpon.

11 Ñehua, o'ch alla netma'ntatererr po'poñ. Allempo yeserrpare'tatenes Yompor po'ñoñ ñeñtpa' attecma ñerra'm çho yenare'ten narmets pue'llomer sesho. Ñeñt atet nare'teñetspa' sherben attoch e'ñe yocrra Yomporecop. Ñehua, ñerra'm yapa' o' yeñotatas ñeñt sherbets errponohuañen yecamquëñecoppa' ama'tña pocte' senteñeña sapa' o'ch sapueneñ ama't coñe'ta ñeñt yepalltena alloch yocrra aña patsro.

12 Po'ñoçhpa' po'potantañeçhno ñeñt seserrpare'tatene', ñetpa' enamuenset o'ch sapanet ñeñt alloch correnet. Ñehua, ñeñtpa' e'ñe pocte'. Atto ñetpa' es enamuensetpa' elloña yocoppa'çho'ña e'ñe pocte' o'ch es yenasamas yaña.

Tarraña ama't e'ñe pocteñ o'ch es yenamaseña' po'ñoçhpa' ama't coñe'ta ama es yenamuenso. Chocma ya'huanteñ ñeñt echarr yenten yocop. Ama't e'ñe pocteñ o'ch es yenamuenespa' tarraña amaña es yenamuenso tarro'mar ñerra'm ama pocteye' señche'pa' yeñoteñ amate' se'mñoto Yompor po'ñoñ ñeñt atet yeserrpare'tatenes. Yapa' ama yemno o'ch yepatare't cohuen ñoñets alloch Cristopa' a'queshpaterres.

13 Elloña sapa' señoñeñ ñeñt torretsa Parets pa'paclopa' e'ñe allara Parets pa'paclopa' çhocmach entenet puerrar. Ñaña añ cornesha' ñeñt muetsene' huaquësh amapa' carrnero Yomporecoppa' ñetpa'çho'ña e'ñe allotpa' rrenet ñeñt amsare't Yomporecop.

14 Attecma ñaña Yepartsesharpa' nan po'ñoñ. Ñeñtpa' atet ot: Ñeñt serrpare'tene' cohuen ñoñets alloch sequeshpapa' e'ñe pocte' pueserrpare'teño't ñeñt e'mñotene'pa' pocte' o'ch apueñet ñeñt palltena alloch corra.

15 Ñehua, ama't e'ñe pocteñ o'ch sapuennonñ ñeñt nepalltenapa' tarraña napa' ama't ahuatapa' ama es notase'te o'ch es sapuen. Ama't te'pa' ama ñeñtecpaye' nequel-lquënnaso atet. Tarro'mar ama nemno o'ch huañ atto neserrpare'tatenes e'ñe atta. E'ñeçhña nocsheñesha' neserrpare'tatenes e'ñe atta. Ñerra'm o'ch huañ atto neserrpare'tatenes e'ñe attapa' aña'te' pocte' nenten o'ch nerroma. Tarro'mar napa' ama nemno ama't eseshapa' o'ch puerratañpsenña ñeñt allo e'ñe nocshena.

16 Ñaña e'ñe neserrpare'teño't cohuen ñoñets napa' amate' erro'tenot e'ñe atta nommo'cho, tarro'mar napa' e'ñe atet eyecharëten. Ñerra'm ama atet neþopa' napa' nanacte' llequëntso'tsenen.

17 Ñerra'm e'ñe na nemneñño'ta neserrpare'teneña' ñehua, pocteñ o'ch tsa'tenna Yompor attoch coshaterren. Tarraña ñerra'm atet otenen Yomporpa' ñeñtpa' ama nañeña nemneñño'teye' neserrpare'teno. Po'ñoçhpa' allsensare'ten ñeñto'marña neserrpare'taterña acheñenesha'.

18 Ñeñt ellonet apuenen Yompor ñeñtcha' atarr nocshate' na, ñeñtpa' attot neserrpare'tatenes cohuen ñoñets e'ñe atta. Ama't e'ñe pocteñ o'ch setsa'tnapa' tarraña napa' ama nemnoña atet.

19 Ñaña ama't ama eñalle puesheñarr ñeñtcha' neyechayapa' po'ñoçhpa' añña nanac ne'torratenaya allohuen acheñenesha' tarro'mar na atet muenets. Ñaña tarro'mar ne'torrena ñocpuet attoch name'ñacha shonte' acheñenesha'.

20 Ñaña allempo allo'tsenen parro epan namo'tsesha' judionesha'pa' napa' o'ch nepena atet yeçhenet ñet. Allochñapa' ñetpa' o'ch e'mñoterrnet; e'ñe pue'mñoteño'tetpa' ñato'rraña o'ch name'ñatera namo'tsesha' judionesha'. Ñerra'm esempo allo'tsenen parro epan ñeñt co'tene' Moisés po'ñoñ ñeñt atet anare'tpa' napa' ama'tcha' ama nocteno

ñeñt atet cotape'chenet ñetpa' tarraña napa' amach nachñare'taneto ñeñt atet penet ñet, allochñapa' ñato' attoṭpa' o'ch name'ñatanet ñamet.

21 Ñaña ñerra'm allempo allo'tsenen parro epan ñeñt ama cotape'chenaye ñoñets ñeñt atet anaret Partsocop, napa'cho'ña o'ch nepena atet ñerra'mrrate' ama nocteno ñoñets ñeñt atet anaret Partsocop. Ñehua, po'ñoçhpa' nocteneña ñeñt ñoñets ñeñt atet anaret Partsocop tarro'mar añcha'ña e'ñe nocten Cristo po'ñoñ. Atetcha' nepeña ñeñt ama es cotape'chetso Partsocop allochñapa' attoṭcha' name'ñaterranet ñamet Cristo ama't ñeñt ama es cotape'cheno Partsocop ama't mamesha.

22 Ñaña ñerra'm esempo allo'tsenen parro epan ñeñt ama huomenc penaye pueyoçher Yomporecoppa' napa'cho'ña o'ch nepena atet ñerra'mrrate' ama huomencayaye ñaña neyoçher Yomporecop, allochñapa' attoch noctape'chach cohuen ñeñt ama huomenc penaye pueyoçher Yomporecop. Ñaña ama't erra'tsena acheñ errotencho' cotape'chenpa' napa'cho'ña allempo allo'tsenen parro epan atetcha' nepena ñaña atet pocte' entenet ñet, allochñapa' attoch ama't errotenette' attochña na'queshpaterranetcha' ama't patanta'ttsa.

23 Atetcha' nepena attoch name'ñatanet ñerra'm esempo neserrpare'tatanet cohuen ñoñets atto Cristopa' ñach ya'queshpaterre'. Attoch napa'cho'ña e'ñe name'ñeñoñ Cristopa' nocshapretanetcha' ñerra'm ame'ñeret ñamet Cristo.

24 Te'pa' o'ch noterrser po'poñ, ñato' o'ch netma'ntacha atet. Ñehua, po'ñoçh sapa' señoñeñ ñerra'm esempo o'ch eñoçhet esesha'te' nanac matetsapa' shonte'ch acheñ matatsa. Allohuenetpa' mueneñetcha' o'ch meshe'tuet po'poñeçhno acheñ attoch ganet premio. Tarraña ama'tcha' shonte' matatsapa' eñallachña puesheñarr ñeñtcha' gananat-uaya allohuen ñeñt parro mataçha'tet. Ñeño'marña te'pa' añ poctetsa o'ch yetorra yaña e'ñe cohuen Yomporecop attoch yegana ñeñt o'patatenya ña.

25 Ñaña yeñoñeñ allohuen ñeñt po'taruas pene' johueñetspa' ñetpa' o'ch pohuanmuet ora ñeñt atet poctetsa attoch echet po'huamenc esheccha' ganet. Ñeño'marña ñetpa' o'ch queçhpa'huet ñeñt ayorampsañ yehuamenc. Ñeñtpa' añecop atet penet attoch ganet premio atet ñerra'm copa.* Ñehua, ñeñt atet penet ñet attoch ganet copa, ama't ñeñt copapa' ahuañaña, ñeñtepñapa'yapa' o'ch yetorra yaña Yomporecop attoch yegana ñeñt o'patatenya ñeñt ama ahuañaño.

26 Atet pena ñeñt matetsapa' e'ñech paçharr matena. Ñehua, napa'cho'ña e'ñech paṭrra nema'yoçhra Yomporecop. Atet ñaña ñerra'm esempo yeçhotna'tena, ñerra'm atta ya'mtapechpa' amach errotenot yegano. Ñeñtepñapa' napa' amach atta na'mtapechatsto ñeñt Yomporecop.

27 Chochña neunat ñañeña nechets. E'ñe nach taruasate' nechets Yomporecop. Atetcha' neṭa tarro'mar ama't na serrpare'tate' po'psheññeçhnopa' ñato'rraña ellopa' te't alla ahupore'tareten ñañeña tarro'mar ama netsotoñe ñeñt muenen Yompor.

10

Arrpa' all yerpatanet ñeñt atet patse'tyese't ahuañ israelena'tarnesha'

1 Ñeño'mar te'pa' masheñeshacha' ñaña noçhaneshacha' o'ch noterrser po'poñ. Nemneñ o'ch neñotatas ñeñt atet pe't ahuañ yatañneshañ. Allempo chopeñe'chyesete't amaretarero'marpa' añ anmahuete't os ñeñt cohuanpsatanete't Yompor e'ñe allohuenet. Ñaña Yomporpa' ellopa'tetstatan sa'p attoña orrtatanet toñ allcha' e'ñe cohuen oñmuet patso. Attoña metanuet sa'p ñeñt otenet Sa'p Tsasasen.

* 9:25 Po'ñoçh añpa' oten choyo'mets tarro'mar ñeñt po'premio pete't ahuañ.

² Ñaña ahuo' na'nmet Moisés ñeñtcha' pa'mcha'tareter pet. Ñaña e'ñe pame'ñeñotet Moisés allohuenetpa' ahuo't a'natenanet os. Ñato' o'ch netma'ntacha atet, ñetpa' allohuenet apatarettet oñot ñaña osoñ e'ñe pueyemteñotet Moisés.

³ Ñaña allohuenet Paretspa' apanete't puerrar ñeñt rrete't allohuenet ñeñt mueñanete't entot.

⁴ Ñaña allohuenetpa' chocmo' apanete't Parets ñeñt orrete't allohuenet. Tarro'mar ahuañ allempo potanet oñ e'ñe mapuetot allot orretpa' ñeñtña mapue'pa' toma'ntenana Cristo ñeñt Partsotets ñaña. Po'ñoñh Cristo ñeñt onahuete't ñaña ñeñtara ñapa' ña coñanmahuete't.

⁵ Ama't Yomporpa' nanaco' a'natanetañe'tpa' tarraña ñapa' amo' pocteye' entane'te atto ñetpa' atpare'tyesete't. Ñeñto'marña ahuo' a'cllatuanet e'ñe alla amarato. Puesheña'ttso' pocte' ente't Yompor ñeñt e'ñe cohuen cotape'chyestse't.

⁶ Ñaña ñeñt atet patse't ñeñt ama pocteyayepa' añ yechateney yamña amach yeye'chapretatsto yamña atet.

⁷ Ñaña amach yeyomporer yeñatsche ñeñt ayeñcataret ñeñt ma'yochyesete't ñet patanta'tets. Yapa' yeñoteñ añecop atet pete't, tarro'mar atet anuaret Yompor po'ñoñ, ñeñtpa' atet oten: "Acheñenesha'pa' o' anorrcha'tet, o'ña anorrcha'tuetpa' o' rrallme'chapretet. Allotpa' orryeset ñaña. Allempoña o' rrallme'chapretuetpa' o' tantra'terret o'cho' alla coshame'tamperret pueyeñcatar."

⁸ Ñaña ama pocteyaye o'ch yecañoresha'ten atet pete't ñet patanta'tets. Ñeñto'marña shonte' acheñenesha' colla'huatsa allempo, e'ñe vientitrés mil acheñenesha' rromats e'ñe pamtarrocma.

⁹ Ñaña ama pocteyaye e'ñe po'tomñapa' o'ch ya'llocchame'ch Yompor. Ñeñt atet pe't patanta'tets acheñenesha'pa' ñeñto'maro'ña shonte' acheñenesha' ñeñt achanatyeshcheppa' e'ñe colla'huet.

¹⁰ Ñaña ama pocteyaye o'ch yetanmare'cha Yompor. Ñeñt atet pe't ñaña patanta'tets acheñenesha'pa' ñeñto'maro'ña amñarettet ñeñt amtsañpa' o' a'cllatuanet.

¹¹ Tarro'mar ñetpa' atet huapyesanete't pa'namen allochña yapa'cho'ña o'ch yeñoch yamña ama pocteyaye o'ch atet yeña yamña. Ñeñto'marña ama't ahua'tpa' atet quellquët atet pete't allempo, ñeñtpa' e'ñe yocpa'naña ñeñtey te'pa'cho'ña huaponayach allempoch mellapoterra. Añpa' ñeñt atet yechateney yamña amach yeñatsto atet pete't ñet.

¹² Ñeñto'marña te'pa' o'ch notas, e'ñech seña. Amach sotañsa'tatsto, napa' amach neño ñeñt atet pete't ahuañ. Tarro'mar ñerra'm esempo yot atetpa' ñato'rraña machayoña alla atet yeperra yamña ñeñt ama pocteyaye.

¹³ Tarro'mar allohueneypa' chocmach huaponaya topateñets, ñeñtara topateñets ñeñt yechenoya allohueney ñeñtey arromñañe't. Tarraña Yomporpa' chocmach yeyomcha tarro'mar ñapa' ama muenatenye o'ch topatey attoch metanonay yehuamenc. Tarraña ñerra'm esempoch chaponaya topateñetspa' ñapa' chocmach orrtatonay attoch ya'huante' attoch amach metanonaye yehuamenc.

¹⁴ Ñeñto'marña masheñneshacha' ñaña nochaneshacha' notenes, e'ñe pocte' o'ch sa'ypo'ña'huerr ñeñt ayeñcatarete'chno ñeñt po'yomporer penet ñet.

¹⁵ Sapa' señoñeñ ñeñt cohuentetsa Yomporcop. Ñeñto'marña o'ch notas, ¿ama't pocte' senteñe ñeñt o' notuas?

¹⁶ Ñeñto'marña allempo yorreññañ ñeñt toma'ntenaya Cristo po'rras ñeñt atet anaret Yomporcoppa', chocch ñanom yema'yochañpesya attoch yeparasyoso'ch Yompor. Allempo yorreñ allohueneypa' e'ñech yeyemteñoñ Cristo ñeñt rromats yocop po'ñoñpa' o'ch yeparrocmatua allohueney ama't ñaña Cristo. Ñaña attecnoch yepena ñerra'm esempo yerren pan ñeñt toma'ntenaya Cristo po'chets. Allempo yeshota'ten pan,

o'ch yerreñ parro allohueneypa' e'ñech yeyemteñoñ Cristo ñeññ a'roye' po'chets yocop po'ñoñ allempopa' e'ñe yeparrocmatuen allohueney ama't ñaña Cristo.

¹⁷ Ñaña ama'tcha' shonteypa' e'ñech patrpa pan yeshota't ñeññcha' yerra'yes ama't allohueney. Ñeñño'marña yeñoteñ ama't shonteypa' e'ñe yeparrocmateñoñ Cristopa' e'ñe patrpa enteney allohueney, ñaña ñeññara e'ñech po'chets peney.

¹⁸ Ñehua, o'ch yoctape'ch ñaña ñeññ atet pe't israelena'tarnesha'. Ñetpa' o'ch muetset huaquësh amapa' carrnero Yomporecop. Alloññapa' o'ch rrenet ñeññ puecha'yetsa. Allempo rreñetpa' po'ñoñ e'ñech pueyemteñoñet Yomporpa' o'ch parrocmattet epuet Parets.

¹⁹⁻²⁰ Ñehua, po'ñoñpa' ama notenso ñerra'm esempo serren po'chets ñeññ amtsaret ayeçhcataretécoppa' o'ch separrocmat epas, tarro'mar ama't toma'ntateñetañ Paretspa' ama Partsoyaye. Añña notenes ñerra'm esempo ñeññ ama ame'ñenayo Cristopa' o'ch es muetset ayeçhcataretécop, tarraña po'ñoñpa' añeçpa muetseñet oneñeñécop, ama añeçpaye' muetseñeto Yomporecop. Ñeñño'marña napa' notenes ñato' amach serratsche tarro'mar ama nemno e'ñe serreñoñpa' te't separrocmaten epas oneñeñ.

²¹ Po'ñoñpa' amate' errotenoñ yeparrocmatoña epay Yepartseshar Cristo ñerra'm cha yeparrocmaten epay oneñeñ. Ñeñño'marña notenes amate' errotenoñ e'ñe yeyemteñoñ Cristopa' o'ch yorr ñeññ ñocop, ñaña ñerra'm aña yetsoten ñeññ oneñeñécop. Ñaña amate' erroteno yerroña parro ñeññ anaret Yepartsesharecop, ñaña ñerra'm aña yetsoten ñeññ oneñeñécop.

²² Ñerra'm atet yeçapa' çate' ya'llocchame'ch Yompor ñaña e'ñe puempa'teñoñeypa' çate' ya'tsrre'mach. Çate' yotta ñerra'm yapa' nanac ahuamencatey, ñañapa' amate' ahuamencateye' yenteñe.

Atto ama't e'ñe pocten o'ch es yeça'yeseñpa' tarraña amach yeçatsto

²³ Ñeñño'mar te'pa' o'ch alla noterrser, e'ñe pocten o'ch yerreneñ po'chets ñeññ amtsaret ayeçhcataretécop, tarro'mar Yompor po'ñoñpa' ama otenñe amach yeçatsto atet. Tarraña ama't eñalleñ pa'namen ñeññ e'ñe pocten o'ch yeçapa' tarraña ñerra'm ñeññpa' ama añeçpayaye alloch huomenc yeça' yeyoçher Yomporecoppa' ñehua, ñeññepñapa' amach atet yeçatsto. Ama't eñalleñ pa'namen ñeññ e'ñe pocten o'ch yeçapa' tarraña ñerra'm ñeññpa' ama añeçpayaye alloch yeyenpue' po'psheñeñ attoch huomenc pan pueyoçher Yomporecoppa' ñehua, ñeññepñapa' amach atet yeçatsto.

²⁴ Añcha'ña o'ch yepena attoch yeyenpue' yamo'ts attoch o'ch huomenc pet pueyoçher. Amachña aña yellcatsto ñeññ e'ñe yocpa.

²⁵ Ñaña o'ch notas ñeññcha' atet seça: Ñerra'm esempo seta allecma vendenet po'chetspa' amach sa'p'to'tatsche ñeññ vendets, amach sotatsche atet: "Añ po'chetspa' ¿añe't ñeññ amtsaret ayeçhcataretécop?" Amach sa'p'to'tatsto allochñapa' esheccha' serre' e'ñe cohuen.

²⁶ E'ñe pocte' o'ch yerren ama't erra'tsen'te' po'chets tarro'mar allohuen es yentyen arr patsro ñeññpa' Yomporo pueyeçhcatuar. Ñaña ama't ora patspa' e'ñe ñocma.

²⁷ Te'pa' o'ch notas po'poñ ñeññcha' atet seça. Ñerra'm esempo ñeññ ama ame'ñenaye Cristopa' o'ch hua'ñas o'ch serrallme'chapreteña' ñaña ñerra'm sapa' seseçapa', e'ñe pocte' o'ch ahues ñaña o'ch serra' ama't erra'tsencha' po'chets apaset. Po'tomña amach sotatsto atet: "Ta', ¿pocte'te' o'ch yerren añ po'chets? Ñato' ñeññara añ po'chets ñeññte' amtsaret ayeçhcataretécop."

²⁸⁻²⁹ Tarraña o'ch notas po'poñoneñ: Ñerra'm allo'tsen puesheñarr ñeññ ama pocteye' entenaye o'ch yerren po'chets ñeññ amtsaret ayeçhcataretécoppa' ñerra'm ñapa' o'ch otas: "Añ po'chetspa' ñeññ amtsaret ayeçhcataretécop", ñehua, allempopa' añ pocte'

amach serratsche. Amach yerratsche tarro'mar añ pocte' amach yeḡatsto ñeñt' ama pocteye' enteno po'psheñeñ, ñato' ama't yapa' e'ñe pocte' yenteñeñ o'ch yerre'.

Ñehua, ñato' sapa' o'ch sot: "Ta', ¿eso'marte' pocte' yapa' o'ch yeḡa ñeñt' atet pocte' enten po'psheñeñ? ¿Eso'marte'ña ama pocteyaye o'ch yeḡa ñeñt' atet pocte' yenten ya?"

³⁰ Ñaña ñato' o'ch sot atet: "Ñerra'm po'ño'ch neparasyoso'teño'ḡpa' nerren nerrarpa' ¿eso'marte'ña otenet ama pocteyaye o'ch nerra' ñeñt' o' neparasyoso'tamḡpesua?"

³¹ Ñeñto'mar te'pa' o'ch notas: Ama't erra'tsena es yeḡa'yenpa' añ pocte' o'ch yor-rtena e'ñe cohuen, attoch acheñenesha' o'ch aye'chochtateññañet ñamet Yompor. Ama't allempo es yerra'yen, ñaña ama't allempo es yorryenpa' añ pocte' o'ch yorrtaten e'ñe cohuen Yomporecop.

³² Añ pocte' amach yeḡatsto ñeñt' ama pocteye' enteno judionesha'. Ñaña añ pocte' amach yeḡatsto ñeñt' ama pocteye' enteno ñeñt' ama judioneshayaye. Ñaña amach yeḡatsto ñeñt' ama pocteye' enteno allohuen acheñenesha' ñeñt' ame'ñenaya Yompor. Tarro'mar ñerra'm atet yeḡa ñeñt' ama pocteye' entenetopa' ḡhate' ya'psataterranet Yompor.

³³ Ñeñto'marña napa' ama't erra'tsena neḡa'yenpa' añña nemneñ o'ch nocshach allohuen acheñ ñeñt' atet pocte' entenet ñet. Tarro'mar napa' ama ne'nen ñeñt' e'ñe nocpa, añña ne'nen ñeñt' sherbets allohuen acheñeneshacop. Tarro'marña napa' ḡhocma ne'nen atet, allochñapa' attoch na'qeshḡaterranet.

11

¹ Ñeñto'marña napa' notenes: Atet sentenen ñeñt' atet nepena napa' ñeñt'pa' e'ñe pocte' ñeñt'cha' atet seḡa samña, tarro'mar napa' añ nepena ñeñt' atet pena ñaña Cristo.

Ñeñt' poctetsa ñeñt'cha' atet ḡpa coyanesha'ḡhno allempo yapḡhena Parets pa'paclo

² Te'pa' o'ch masheñneshacha' ñaña noḡhaneshacha' notas po'poñ. Napa' e'ñe pocte' nentenes atto sapa' ama sepseno ñeñt' atet neyḡhatuanmas ñeñt'cha' atet seḡa, ñaña atto ḡhocma seyerpuenna.

³ Te'ña añmapa' ñeñt' nemneñ o'ch seño'ch samña, atto ya allohueney ñeñtey asheñorreypa' añ pomnaren yepene' Cristo. Añña coyanesha'pa' añ pomnaren penahuet puerrollar. Cristoñapa' añ pomnaren pene' Pompor.

⁴ Ñeñto'marña yoten ama pocteyaye ya ñeñtey asheñorreypa' o'ch yeca'mataño'ta allempo yema'yochena, amapa' allempo ya'poteññañ Yompor po'ñoñ. Tarro'mar ñerra'm esempo yeca'mataño'tenapa' ḡhach yottena ñerra'mrrate' po'psheñña acheñ pomnaren yepene', amach añeye' pomnaren yepenaye Cristo. Atteñapa' o'ch ḡha yepencna'ntach Cristo ñeñt' po'ño'ch pomnaren yepene'.

⁵ Yapa' añña yoten coyanesha'pa' e'ñe pocte' o'ch ca'mataño'ta ñerra'm esempo ma'yochena, amapa' ñerra'm allempo a'potenan Yompor po'ñoñ. Tarro'mar ñerra'm ama ca'mataño'topa' ḡhach ottena ñerra'mrrate' ama puerrollareye' pomnaren penaye. Ñeñto'marña yapa' atarrcha' pencna'ntateney poñ tarro'mar ama ḡho'ye' ca'mataño'teno. Ñerra'm ama ca'mataño'topa' añ poctetsa penquēpa' tarro'mar ḡha ottena atette'ña ñerra'm ashopena'taret.

⁶ Atteña ñerra'm coyanesha' ama mueno o'ch ca'mataño'tapa' ñehua, ama'tpa' shopena'tatepa'. Attochña ñerra'm o'ch ḡha pencana atto shopena'tenapa' ñehua, ama'tpa' ca'mataño'tepa'. Ñaña ñerra'm puetsorrmo'tateño'ḡpa' o'ch pencapa' ñehua, ama'tpa' ca'mataño'tepa' ñaña.

⁷ Yocopña ama pocteyaye ñeñtey asheñorreypa' o'ch yeca'mataño'ta, allempo yeser-rpare'ten Yompor pa'paclo tarro'mar ya Yomporpa' puetma'ntatarey ña, ñaña yapa' ḡhocma po'cohuenña peney. Tarraña coyanesha'pa' añña po'cohuenña pene' puerrollar.

⁸ Ñehua, tarro'mar ahuat Yomporpa' asheñorroť yečcatan coyanesha'. Asheñorrrpa' ama coyaneshoteye' yečcache.

⁹ Ñaña yeñoteñ asheñorrrpa' ama añecpaye' yečcache coyaneshacop. Añecopña yečcatan coyanesha' attoch o'ch yenpa'y ya ñeñtey asheñorrey.

¹⁰ Ñeñto'marña añ pocte' coyanesha'pa' o'ch ca'matamño'tena attoch ama't Yompor po'millañoťeñnanesharpa' o'ch eñochet añ po'ñoč pomnaren pene' puerrollar.

¹¹ Tarraña e'ñe yame'ñeñoť Yepartsesharpa' añ pocte' ya ñeñtey asheñorreypa' o'ch yeyenpueñ yaña coyanesha'. Coyanesha'pa'cho'ña pocte' o'ch yenpueney ya ñeñtey asheñorrey.

¹² Ñeñto'marña yeñoteñ ahuat Yomporpa' asheñorroť yečcatan coyanesha'. Ñaña e'ñe allempoteñ ama't ya ñeñtey asheñorreypa' ahuo't eñalletateney coyanesha'. Tarraña po'ñočhpa' yeñoteñ ñeñtpa' e'ñe Yomporeshotecma huena.

¹³ Ñehua, o'ch na'pťo'tas: Ñeñť atet seyčhena sa ¿ama't pocteye' senteñeña coyanesha'pa' o'ch ma'yochenana Yompor ñerra'm ama ca'matamño'teno?

¹⁴ Ñeñť atet yeyčhena yapa' ñeñtpa' añ yeñotatene' ñerra'm ya ñeñtey asheñorreypa' esempo atesha'ta yechpa' o'ch pencateney.

¹⁵ Tarraña ñerra'm coyanesha'ña atesha'tatsa pue'chpa' e'ñech cohuen entapreteñ allohuen acheñenesha'. Ñaña ñerra'm ateshet pue'chpa' ñeñtpa' alloch ca'matamño'tenet, tarro'mar ñetpa' atet yečcatanet Yompor.

¹⁶ Ñehua, ñerra'm eseshas ama pocteye' entaye ñeñť atet o' notuaspa' ñehua, pocte' o'ch alla noterrser, tarro'mar ñeñť atet o' notuaspa' ñeñtpa' atetcha' sepa tarro'mar ama eñalle po'poñ ñeñť pocte' yenten. Ama't ñaña allohuen ñeñť pame'ñeñoťet Yompor ñeñť apčha'yetsapa' ñetpa'cho'ña pocte' enteñet ñeñť atet o' notuas.

Añpa' ñeñť ama ařapahuo allempo yorren ñeñť toma'ntenaya Cristo po'rras

¹⁷⁻¹⁸ Te'pa' o'ch notas po'poñ ñeñťcha' atet sepa allempocma sapčhena. Tarraña ñanompa' o'ch notas, ama pocteye' nentenso ñeñť atet sepena te' allempocma sapčhena. Tarro'mar ñeñť atet sepenapa' ama añecpayaye attoch seyennpanna e'ñe cohuen, elloña ñeñtpa' čha epatenes. Tarro'mar napa' o' ne'mare'tas ñeñť atet sepena. Ñerra'm esempo sapčhena e'ñe same'ñeñoťpa' amo'ch patrraye' soctape'cheno. Elloña sapa' atto'ch nanac es sotnare'tannena. Ñeñto'marña napa' noten ñato' po'ñočhte' atet sepena.

¹⁹ Po'ñoč ñeñtey ame'ñetsapa' chocmach eñall ñeñťcha' ama pačharroye' ame'ñatso, ñeñto'marña ya allempopa' o'ch yeñoch ñeñť e'ñe pačharr cotape'chets, ñaña o'ch yeñoch ñeñťcha' ama pačharroye' cotape'chatso.

²⁰ Ñaña ñerra'm esempo sapčhenapa' e'ñe seyerpueñoť Yepartsesharpa' ahuo'ch serrallme'chen, tarraña po'ñočhpa' ama Yepartsesharecpaye' serrallme'cheno.

²¹ Tarro'mar puesheña'tets e'ñe pa'chporrñoťetpa' ahuo'chcho' rrenet ñanmacma, amo'chña parrocmaye' serrallme'cheno. Ñeñto'marña ñato' puesheña'tetspa' ahuo'ch atta nanac cheporrena, ñato' po'psheñeñña' ahuo'ch čha posa'tyes.

²² Ñeñť atet sepenapa' ama pocteyaye tarro'mar sapa' sechenca'yeña sepaquell allcha' serren ñaña allcha' es sorryen. Eso'mare'tña amaña añcha'na'tpahuoye' senteññañeña Yompor pa'paquell. Allñapa' o'ch atta sepencateñ ñaña ñeñť ama es echetso. Te'ña po'ñočh napa' o'ch notas, amaca'ye nocshapretensoña sa ñeñť atet sepena.

Atet řa Jesús allempo ñanom toma'ntatana po'rras orrpapo'
(Mt. 26.26-29; Mr. 14.22-25; Lc. 22.14-20)

²³ Añmapa' ñeñña atet yečhatnerrey Yepartseshar ñeñťcha' attoch yeyerpueña. Ñeñťara ñoñets sapa' o' neñotatuas ahuañacma. Ñeñťpa' atet oten: Ñeñte tsaprocma allempo Judaspa' pomuerran Yepartseshar Jesús, ñaña'pa' chetan pan. Chetan panpa'

²⁴ parasyoso'tam̄pes allost̄n̄apa' shota'chpa' atet̄ otanet: "Añmapa' ñeñt̄ toma'ntenaya nechets ñeñt̄cha' atserr̄paret̄tertsa socop. Añmapa' ñeñt̄cha' atet̄ sepa. Ñerra'm esempo serren pan atet̄pa' e'ñech seyerpueñoŋen napa' o'ch serre'."

²⁵ Allempoña o' rrohueta'p̄a' attecma p̄a o' chetan ñaña orramets allocma orrete'tpa' atet̄ otanet: "Añ ñeñt̄cha' sorrpa' ñeñt̄ toma'ntenaya nerras ñeñt̄cha' etserra anaret̄ allochñapa' attoch apret̄na'huaret̄terra so'chñar. Añmapa' ñeñt̄cha' atet̄ sepa: Ñerra'm esempoch sorren ñeñt̄ toma'ntenaya nerraspa' e'ñech seyerpueñoŋen napa' sorreñcha'." Añpa' allohua ñeñt̄ atet̄ otnerrey Yepartseshar.

²⁶ Ñeñto'marña te'pa' ñerra'm esempo yerren añ pan, ñaña yorren añ orrapo'pa' chocmach yeñotach acheñenesha' atto rroma Yepartseshar yocop. Ñeñt̄pa' e'ñech tayoteñ atet̄ yeña tarrem̄pohuach esempohuañencha' huerra.

Añpa' ñeñt̄cha' atet̄ yeña allempo yorren ñeñt̄ toma'ntenaya Cristo po'rras

²⁷ Tarraña ñerra'm yapa' ama yeyerpueñoŋeye' e'ñe ña yerreno pan, ñaña o'ch yorr ñeñt̄ toma'ntatana Yepartseshar po'rraspa' yapa' chaŋe' yeyora yo'chñar e'ñe ya'llocchame'teñoŋ Yepartseshar po'chets ñaña po'rras.

²⁸ Ñeñto'marña te'pa' o'ch notas, amach sorreña'pa' o'ch soctape'ch ñanom, o'ch señoŋa sañeña ñeñt̄ atet̄ o' sepoŋhua.

²⁹ Tarraña ñerra'm at̄ta ama es yepcheno rre', ama yoc̄tape'cho ñanom ñeñt̄ toma'ntatana Yepartseshar po'chetspa' ñerra'm at̄ta yerre' ñaña at̄ta yorrpa' e'ñe yerreñoŋ ñaña yorreñoŋpa' atsa'tatareŋeycha'.

³⁰ Ñeñto'marña seshopa' shonte' acheñenesha' ñeñt̄ ama a'ñshe'mtetso, ñaña po'potantañpa' cha at̄sna'tyeset, po'potantaññapa' o' rromayeset.

³¹ Tarraña ñerra'm cho ñanom yoc̄tape'ch e'ñe cohuen, o'ch yeñoŋa yañeña ñanompa' allempoña po'ñoŋhpa' amach atsa'tatareŋeye.

³² Tarraña ñeñt̄cha' atet̄ tsa'tatya te' Yomporpa' ñeñt̄pa' añecop attoch cotape'chaterrey e'ñe cohuen attoch esempohuañenpa' amach a'coñchatareŋeye epay ñeñt̄ ama ame'ñetso arr patsro.

³³ Ñeñto'marña masheñneshacha' ñaña nochaneshacha' te'pa' o'ch noterr̄serr: Ñerra'm esempo sapcha allohuenes o'ch serra' ñeñt̄ anaret̄ Yepartsesharecoppa' añ pocte' choch ñanom secuanna'ta attoch o'ch serreñ e'ñe parrocm̄a.

³⁴ Tarraña ñerra'm eseshas cheporratsapa' e'ñe pocte' o'ch serrerra' sepaclo. Tarro'mar ama pocteyaye e'ñe sapcheñoŋpa' o'ch secoñchatanna'ta. Ñaña po'poñechno ñeñt̄ palltetsapa' allach neserr̄pare'tatoses ñerra'm esempoch nechap sesho.

12

Atto Parets Puecamquēñpa' apa'yeney po'poñe'ttsocma attoch yetorra'yesa Yomporecop

¹ Te'pa' masheñneshacha' ñaña nochaneshacha' o'ch yeserr̄pare't ñaña atto Parets Puecamquēñpa' ñach ahuamencat̄ yeña'yese' attoch yetorra'yesa po'poñe'ttsocma Yomporecop. Tarro'mar napa' nemneñ o'ch señoŋch ñeñt̄ e'ñe atet̄ pennay Parets Puecamquēñ.

² Ama't sapa' señoŋeñ ahuañmo'cha allempo ama same'ñerra'pa' at̄ta sema'yochatse'tyese't̄ ayeŋchatareŋechno. Ñaña ayeŋchatareŋechnopa' ama't ama eñoŋenopa' at̄ta nanac ame'ñatasete't̄, ama't all seta'yese't̄.

³ Tarraña ñerra'm machaya esesha' eñoŋratsa, napa' nemneñ chochña e'ñe señoŋch ñato' po'ñoŋchte' añ eñoŋratene' Parets Puecamquēñ, ñato' amate'. Ñeñto'marña o'ch neñoŋtatas atet̄ attoch sapa' señoŋch: Ñerra'm esesha' achm̄are'tene' Jesús̄pa' ñeñt̄ña sapa' o'ch señoŋch ama añeye' eñoŋratenaye Yompor Puecamquēñ. Tarraña ñerra'm esesha'ña otets: "Jesús̄pa'

ñeñt' po'ñoçh Yepartseshar yepen", ñeñtña po'ñoçhpa' o'ch señoçh añ eñoratene' Parets Puecamquëñ.

⁴ Ñaña Yomporpa' ama't e'ñe patrra Puecamquëñpa' tarraña ñapa' o'ch ahuamencat' pa'yese y attoch yetorra'yesa e'ñe po'poñe'ttsocma Yomporecop.

⁵ Ama'tcha' po'poñe'ttsocma yetorra'yesañpa' tarraña ñeñtarach paterr Yepartseshar yesherba'huen allohueney.

⁶ Ñaña ama't eñalleñ po'poñe'ttsocma atto ahuamencat' pohueney allohueney tarraña e'ñe patrra Yompor ñeñt' ahuamencat' yepene' allohueney.

⁷ Ñaña allohueney Parets Puecamquëñpa' ahuo't apa'yese y attoch yorrtatyesoñ Yompor po'huamenc. Ñeñt'pa' añecop aparetey attoch yeyenpanna'ta alloch huomenc yepa'yes yeyoçher Yomporecop.

⁸ Ateñ ñerra'm ñato' puesheñarr Parets Puecamquëñoñpa' o'ch aþ attoch e'ñe eñotan ñeñt' cohuentetsa Yomporecop, attoch ñapa' o'ch cotape'chatan pamo'tsesha'. Ñato' po'psheñeñ añ Parets Puecamquëñpa' o'ch nanac çhapatoñ pueyoçhro ñeñt' cohuentetsa Yomporecop, attoch ñapa'çho'ña o'ch yenpan pamo'tsesha'. Tarraña ñeñtara Parets Puecamquëñ ñeñtña eñotatenahuet.

⁹ Ñato' po'psheñeñpa' nanaccha' yemtenana Yompor. Ñeñtara Parets Puecamquëñpa' o'ch aþ attoch yemcha nanac. Ñato' po'psheñeñpa' o'ch aþ po'huamenc attoch a'crratyesan atснаñeçhno. Tarraña ñeñtara Parets Puecamquëñ ñeñtña apuene' attoch a'crratyes.

¹⁰ Ñato' po'psheñeñpa' o'ch aþ attoch orrtatyesan Yompor po'partsoña. Ñato' po'psheñeñpa' nanaccha' cohuen a'potan Yompor po'ñoñ. Ñato' po'psheñeñpa' o'ch eñotyesan pa'namen cotapñats, attoch ñapa' o'ch eñoçh erroñte' huena ñeñt' cotapñats, ñato' Parets Puecamquëñoñ amapa' oneñeñate' poçtapñña. Ñato' po'psheñeñpa' Parets Puecamquëñcha' eñotatene' eñosysets po'poñ ñoñtso. Amapa' ñato' po'psheñeñpa' o'ch a'mñtan ñoñets atef eñenet po'poñ ñoñtso.

¹¹ Tarraña allohueneypa' e'ñe patrra Parets Puecamquëñ ñeñt'cha' yeñotatene' ñeñtara ñeñt'cha' yapa'yese' puesheña'ttsoy erra'tsencha' muena' ña attoch yetorra'yesa pa'namen ñocop.

Ama't e'ñe po'poñe'ttsocma yetorra'yena Yomporecoppa' tarraña ñapa' e'ñe attecma cohuen enteney

¹² Ñato' o'ch netma'ntacha ñeñt' atef yeçhquëna yechets. Ñehua, allemeñ yechetspa' ama'tcha' ellopa'tetstenañpa' tarraña allohuenpa' e'ñe patrra yechtsoñ. Attecma yepena yaña allohueney ñeñtey ame'ña'yenaya Cristo. Ama't shonteyeñ po'poñe'ttsocmaypa' tarraña e'ñe yame'ñeñoñ Cristopa' o'ch yeparrocmatuahua allohueney.

¹³ Tarro'mar allempo o' yapataretetuapa' Parets Puecamquëñpa' o'ch parrocmatatuerrey allohueney. Ama't ñaña po'poñe'ttsocmay acheñey atef ñerra'm patanta'ttsoypa' judioneshay, ñato' po'potantañpa' amach judioneshayaye. Tarraña allohueney e'ñe puechorreñoñey Parets Puecamquëñpa' e'ñe allempoteñpa' o'ch yeparrocmatua allohueney. Ama't ñaña acheñ ñeñt' ataruasataret e'ñe atfa ñeñt' ama esoye' enteñeto ñaña acheñ ñeñt' e'ñe cohueno'tsen. Tarraña e'ñe puechorreñoñey Parets Puecamquëñ ñeñt' e'ñe patrrapa' e'ñe allempoteñpa' o'ch yeparrocmatua allohueney.

¹⁴ O'ch alla netma'ntatererr ñeñt' atef yeçhquëna yechets. Ñehua, atef ñerra'm allemeñ yechetspa' ama patrriyey yeçhquëtso, shonte'ca'ye yeçhquëtso. Tarraña ama't shonte' yeçhquënañ yechetspa' e'ñe patrriyey yeçhets ottetsa. Attecma yepena yaña allohueney ñeñtey ame'ña'yenaya Cristo. Ama't shonteyeñ po'poñe'ttsocmaypa' tarraña e'ñe yame'ñeñoñ Cristopa' o'ch yeparrocmatuahua.

15 Ñehua, o'ch netma'ntatererr po'poñ: Ñato' atet ñerra'm yetacpa' o'ch ot: "Napa' ama es nesherbena atet sherben otats, ñeñto'marña ama pocteye' nenteñe o'ch neparrocmat epan ye'nar." Tarraña ama't atet oteneñ yetacpa' ñeñtpa' ama atteyaye, chocma parrocmaten.

16 Amapa' ñato' atet ñerra'm yetpa' o'ch ot: "Napa' ama es nesherbena atet sherben quello'yets ñeñto'marña napa' ama pocteye' nenteñe o'ch neparrocmat epan ye'nar." Tarraña ama't atet oteneñ yetpa' ñeñtpa' ama atteyaye, chocma parrocmaten ñaña.

17 Ñerra'm yechetspa' e'ñe yecloyochayapa' amate' erroteno ye'mueno. Ñaña ñerra'm yechetspa' e'ñe yetochayapa' amate' erroteno es yemosyeno.

18 Tarraña po'ñoçhpa' ama atteye' yechcatye Yompor. Ñapa' ahuo't ne' attoch yechca'yesa allemeñ yechets ñeñt atet pocte' ent ña. Ñeñto'marña yeñoteñ ama't errotencho' yetorra'yesa Yomporecop puesheña'ttsoypa' ñeñtpa' chocma sherba'yen.

19 Po'ñoçhpa' ñerra'm yechetspa' aña yechcatsa paterr atet ñerra'm e'ñe yecloyochayapa' amate' erroteno orrtoña e'ñe cohuen ora yechets.

20 Tarraña po'ñoçhpa' ama atteye' ayeçhcatareteye. Añña chocma eñalletesya allemeñ yechets. Tarraña ama't ellopa'tetstenañpa' e'ñe patrra yechets ottetsa. Ñeñtpa' attecma yepena yaña allohueney ñeñtey ame'ña'yenaya Cristo. Ama't po'poñe'ttsoçma yetorra'yesa Yomporecoppa' tarraña e'ñe yame'ñeñoñ Cristopa' o'ch yeparrocmatuahua allohueney.

21 Ñato' o'ch netma'ntatererr po'poñ: Atet ñerra'm yecle'pa' ama pocteyaye o'ch otan yot: "Napa' ama nepallteno ñeñt atet pesherven pa." Ñaña yoñpa' ama pocteyaye o'ch otan yetac: "Napa' ama nepallteno ñeñt atet pesherven pa."

22 Ñeñto'marña ama pocteyaye o'ch yoctape'chyes atet, tarro'mar ora allohuen yechetspa' e'ñe sherba'huen. Ñato' yapa' çhach yotenapañ ñato' erra'tsen yechetspa' amate' es sherbeno. Tarraña ñato' ñeñtara yechetspa' ello metana'tuenan atto sherben po'poñeçhno yechets. Attecma yepena yaña allohueney ñeñtey ame'ña'yenaya Cristo. Ñato' yapa' çhach yotenapañ ñato' erra'tsen acheñpa' amate' es sherbeno. Tarraña ñato' ñeñtña acheñpa' ello metana'tuenan atto sherben po'poñeçhno acheñ.

23 Ñaña ñerra'm erra'tsen yechets ama tama cohuenaye' yentenopa' ñato' o'ch yechorrateña e'ñe cohuen attoch ellopa' o'ch yorrta nanac cohuen. Ñaña ñato' erra'tsen yechets ñeñt yepencatene'pa' ñato' o'ch ya'nach e'ñe cohuen.

24 Tarraña ñeñt e'ñe cohuen yechetspa' amach yemno o'ch ya'nach, añña çhochña yorrtañ. Atet yechcatonay Yompor yechets attoch ama't ñeñt ama tama cohuenaye' yentenopa' o'ch yañño'teñ e'ñe cohuen attoch ellopa' o'ch orrta nanac cohuen.

25 Allempoña allemeñ yechetspa' o'ch parrocmatet e'ñe cohuen, ñaña allempopa' o'ch e'ñe cohuen yenpannet.

26 Ñeñto'marña ñerra'm esempo paterr yechetspa' atserrtena allohuen yechetspa'cho' o'ch atsotapretannet. Ñaña ñerra'm paterr yechetspa' o'ch orrta e'ñe cohuen allohuen yechetspa'cho' o'ch coshapretannet. Attecma yepena yaña ñeñtey ame'ña'yenaya Cristo. E'ñe yeparrocmatanna'teñoñ ñerra'm puesheñarr yamo'ts cha llequena ñeñt parro yame'ñenapa' allohueney ñeñtey ame'ñetsapa' o'ch yellcapretannena. Amapa' ñerra'm puesheñarroteypa' nanac yocshenapa' allohueneypa'cho'ña o'ch yocshapretannena.

27 Ñehua, añ yechets ñeñt o' notuapa' añ toma'ntena ya allohueney ñeñtey o' yame'ñera, Cristopa' o' enterrey atet ñerra'm e'ñe ña po'chtsoy, tarro'mar o' yeparrocmat epay Cristo. Ñaña ama't shonteyeñ e'ñe po'poñe'ttsoçmaypa' tarraña e'ñe yeparrocmateñoñpa' o' atet yeperra atet ñerra'm Cristo po'chtsoy.

28 Ñaña allohueney e'ñe yame'ñeñoñ Yomporpa' e'ñe po'poñe'ttsoçma yetorra'yena Yomporecop. Tarro'mar Yomporpa' atto na'yesonay pa'namen attoch yetorra'yena

ñocop. Ñanompa' ahuo't nan puesheña'tets allsensaretnesha'. Alloṭpa' ahuo't nan po'poñechno ñeñtcha' a'pote' po'ñoñ. Alloṭpa' ahuo't nan ñaña po'potantañ ñeñtcha' yečhatenahuet Yompor po'ñoñ. Alloṭpa' ahuo't nan po'potantañ ñeñtcha' orrtate' po'partsoña. Alloṭpa' ahuo't nan po'potantañ ñeñtcha' torratsa attoch a'crratyaset ñeñt atsna'tyets. Po'potantañña' ahuo't ne' ñeñtcha' torratsa yempue' allohuen acheñenesha'. Po'potantañña' ahuo't ne' ñeñtcha' yechenahuet allohuenet. Po'potantañña' ahuo't ne' ñeñtcha' eñosyets pa'namen ñoñtso.

²⁹ Po'ñočpa' ama allohuenacmaye' allsensareteye. Ñaña ama allohuenacmaye' ya'poṭeno Yompor po'ñoñ. Ñaña ama allohuenacmaye' yeyčhateno. Ñaña ama allohuenacmaye' yorrtateññañe Yompor po'partsoña.

³⁰ Ñaña ama allohuenacmaye' ya'crratyene atsnañečchno. Ñaña ama allohuenacmaye' yeñosyeno po'poñ ñoñtso. Ñaña ama allohuenacmaye' ya'mteno ñoñets ñeñt eñets po'poñ ñoñtso.

³¹ Tarraña ama't ama allohuenacma atteyepa' e'ñe pocte' o'ch yeye'chena ñeñtcha' yetorra'yena e'ñe cohuen puesheña'tsoy Yomporecop. Tarraña ellopa' o'ch neñotatas po'poñ ñeñt nanac sherbets Yomporecop.

13

Eñall paterr ñeñt nanac sherbets, ñeñtpa' añ: atto amorrentanna'tpahuepa'ch allohuene

¹ Ama't yeñosyetsatset e'ñe cohuen pa'namen acheñ po'ñoñetoña' ñerra'm ama yemorrencho yamo'tspa' e'ñe yeñosyeñoṭpa' añña Yomporpa' attach enteney atet ñerra'mrrate' con ñeñt atta ama'toçhtetsa. Tarro'mar ama yemorreneteñoṭeye' yeñosyeno pa'namen ñoñets. Ñato' ama't yapa' yeñosatsetyes e'ñe cohuen atet ñerra'm Yompor po'millañoṭeñnanesharña' ñerra'mña ama yamo'ts yemorrentenopa' e'ñe yeñosyeñoṭ Yomporpa' attach enteney atet ñerra'mrrate' patashtalla challachallatspenet. Tarro'mar ama yemorreneteñoṭeye' yeñeno.

² Ñaña ama't yapa' yeñotatset a'mte' Yompor po'ñoñ, tarraña ñerra'm ama yemorrencho yamo'ts, atetpa' amach esoye' entenye. Ñaña ama't yeñotatset o'ch ya'poṭa ñeñt ñapṭa eñoten Yompor tarraña ñerra'm ama yemorrencho yamo'tspa' ñeñtpa'cho'ña amach esoye' entenye Yompor. Ñaña ama't yeñotatset ora allpon ñeñt eñall, tarraña ñerra'm ama yemorrencho yamo'ts, ñeñtpa'cho'ña amach esoye' entenye Yompor. Ñaña ñato' nanac yeyemteñoṭ Yomporpa' aphueney allohuen ñeñt yenamueñ, ama't ñeñt echarr yentyen. Ñato' o'ch netma'ntacha atet: Ñato' o'ch yoch Yompor, añ aspenetpa' chenquëpa'. Ñato' e'ñe yeyemteñoṭ Yomporpa' o'chcho' chenca. Tarraña ama't yeyemteñoṭ Yomporpa' o' yeṭohua atet, tarraña ñerra'm ama yemorrencho yamo'tspa' attecma enteney Yompor, ama esoyaye.

³ Ñaña ama't es yapa'yetsatsech huocchañnesha' ora allohuen ñeñt yechyenna', ñerra'm ama yemorreneteñoṭeye' es yapa'yenanetopa' ama't atet yeṭatstapa' Yomporpa' amach cohuenaye' entenye. Ñaña ama't e'ñe yame'ñeñoṭ pocte' yentatsech pue'moñe'teñoṭetay o'ch chamayet ora beñatoteypa' tarraña ñerra'm ama yemorreneteño yamo'ts, ama't atet yeṭatstapa' Yomporpa' atterach amach cohuenaye' entenye.

⁴ Tarraña ñerra'm esempo po'ñoč cho yemorreneteña yamo'tspa' e'ñech acoṭa es yeṭa'yenanet, attach ya'huantenanet ñaña čhochña ya'muerañtena. Ñaña amach čha es yeye'chapreyenaneto, ñaña amach čha yommo'chana'tatstaneto.

⁵ Ñaña amach yañeña entatstatso e'ñe cohueney. Ñaña ñerra'm esempo po'ñoč cho yemorreneteña yamo'tspa' e'ñechña pocte' es yeṭa'yenanet, ñaña amach añña ye'natsto ñeñt e'ñe atet yemnen ya. Añcha'ña ye'nen ñeñt atet muenen po'psheñeñ. Ñaña ñerra'm

esempo po'ñoch cho yemorrenteña yamo'tspa' amach cha ye'moñe'tyenaneto, ñaña amach cha atsrre'moçhen yentuenaneto.

⁶ Ñaña ñerra'm esempo es pōhua po'psheñeñ ñeñt ama pocteye' enteno Yomporpa' ñerra'm po'ñoch amuerañaypa' yapa' amach cha yocshatsto. Añcha'ña yocshapretena ñerra'm esempo e'ñe cohuenare' es penet.

⁷ Ñerra'm po'ñoch cho yemorrenteña yamo'tspa' ama't cho errot pōnaypa' yapa' chocmach ya'huantoñ. Ñaña ñerra'm po'ñoch cho yemorrenteña yamo'tspa' chocmach yeyemcha ñeñt atet pena amapa' ñeñt atet oten. Ñaña ñerra'm po'ñoch cho yemorrenteña yamo'tspa' e'ñe yeyemteñoñanet chocmach yeyenpuenanet attoch huomenc pet pueyoçher ñamet Yomporecop. Ñaña ñerra'm po'ñoch cho yemorrenteña yamo'tspa' chocmach ya'huanta'huanom pa'namen topateñtsoçhno.

⁸ Atto yemorrentannenapa' ñeñtpa' amach ahuañañaatto ama't errponaña. Ñaña te'pa' ama't ya'poteññañeñ Yompor po'ñoñ tarraña esempohuañenpa' huañcha' atto ya'poteñ te'. Ñaña ama't atto te'pa' yeñosyen po'poñ ñoñtsopa' ñeñtpa'cho'ña esempohuañenpa' huañcha'. Ñaña ama't atto yeñotañtena te'pa' ñeñtpa'cho'ña esempohuañenpa' huañerrcha'.

⁹ Tarro'mar ama't allpon es yeñotyen te'pa' ama e'ñe yeñotueñe poctacma. Ñaña ama't te'pa' ya'poteññañ Yompor po'ñoñ ñeñtpa'cho'ña ama e'ñe yeñotueñe poctacma.

¹⁰ Tarraña ñerra'm esempoch huerra Cristo ñeñt e'ñe eñotañtetsa poctacmapa' allempoña yapa' o'ch e'ñe es yeñotuahua yaña.

¹¹ Ñehua, ñato' o'ch netma'ntacha atet: Napa' allempo cheshenna'pa' atta neñosatse'tyese't atet eñen cheshatollesha'. Ñaña allempopa' atta noctape'chatse'tyese't atet cotape'chyen cheshanesha'. Ñaña añach cohuen nentapretyese't atet cohuen entyen cheshatollesha'. Tarraña te'pa' o' nepo'npa' o'huañ noctape'chatse'tyes atet pena cheshatollesha'.

¹² Ñaña yapa' ama yeñotueno e'ñe ora atet pena Parets. Ñehua, ñato' o'ch netma'ntatererr atet: Yapa' cha yottena atet ñerra'mrrate' rerpatota yecueñ Yompor, amach tama yechme'teñe. Tarraña esempohuañenpa' yentercha' e'ñe allame'tets. Ñaña te'pa' atto es yeñotyen mamesha'tets, tarraña esempohuañenpa' yeñotuerrcha' ñeñt e'ñe atet pena Parets, e'ñech yeñotañnetuerra atet pena te' Yomporpa' e'ñe eñotueney ñeñt atet yepena.

¹³ Ñeñto'mar te'pa' yeñoteñ eñall ma'pa ñeñtcha' ama ahuañañaattatso ñeñtpa' añ: atto yeyemteña Yompor, ñaña atto yeyemteñoñ yecuame'teñ ñeñt o'patatenya, ñaña atto yemorrentannena. Tarraña añ ma'po'marpa' añña nanac sherbets Yomporecop atto yemorrenteña allohuen acheñenesha'.

14

Ama't yeñosatsetyes po'poñ ñoñtsopa' ñeñtpa' ama tama sherbeno

¹ Ñeñto'marña te'pa' añ poctetsa o'ch yema'yoçhrena attoch yemorrentanna'ta e'ñe poctacma. Ñaña añ pocte' o'ch yeye'chaprecha Yompor attoch o'ch apa'yese'y e'ñe Puecamquëñoñ attoch yeforra'yesa ñocop. Añña e'ñe pocte' o'ch yeye'chaprecha nanac attoch apuey o'ch ya'potoñ po'ñoñ e'ñe eñotoçhen.

² Tarro'mar ñeñt eñets po'poñ ñoñtsopa' añecpa sherben attoch eñora epuet Yompor, tarro'mar añña acheñenesha' ñeñt e'mñotenahuetañpa' amach esesha' eñotenaye ñeñt atet oten. Ama't añ ye'ñoratate' Parets Puecamquëñ ñeñt ama eñotpahuo ñoñetsña' ñerra'm acheñenesha'pa' ama eñoteñeto atet yotyenanet, ñeñtpa' e'ñe Yompora ñapuef e'muene'.

³ Tarraña ñerra'm esempo ya'potoñ Yompor po'ñoñ e'ñe eñotoçhenpa' ñeñtpa' po'ñoch choch es yeñotatenanet attoch huomenc penet pueyoçher Yomporecop. Ñaña choch

yeñotatanet ñeñt atet oteneŷ Yompor po'ñoñ ñeñtcha' atet yeŷa e'ñe cohuen. Ñaña čhoch yeñotatanet Yompor po'ñoñ attoch ñetpa' coshenet Yomporecop.

⁴ Tarraña ñeñt eñets po'poñ ñoñtsopa' ñeñtpa' amach atteŷe' peno. Añecpach eñen e'ñe ñocpa attoch huomenc pan pueyočher e'ñe ñañeña. Tarraña ñerra'm esempoña ya'poteññañ Yompor po'ñoñ e'ñe eñotočhenpa' ñeñtpa' čhoch po'ñoč es yeñotateñ allohuen ñeñt ame'ñetsa attoch huomenc penet pueyočher Yomporecop.

⁵ Ñehua, po'ñočhpa' pocte' nenteñ o'ch seños po'poñ ñoñtso allohuenes, tarraña ñeñt nanac nemnen o'ch señospa' ñeñtpa' añ: o'ch sa'potoñ Yompor po'ñoñ e'ñe eñotočhen ñeñt allo yeñen. Tarro'mar ñerra'm esempo ya'potoñ Yompor po'ñoñ e'ñe eñotočhenpa' nanaccha' yesherven Yomporecop. Tarraña ñerra'm esempoña yeñen po'poñ ñoñtsopa' amach tama yesherbena. Ñehua, pocte' enteñ Yompor ñerra'm po'ñočh eñall puesheñarr ñeñt a'mtene' ñoñets e'ñe ya yeñoño, attoch allohueney ñeñteŷ ame'ñetsapa' o'ch čhaponaya Yompor po'ñoñ yeyočhro attoch huomenc yeŷa' yeyočher.

⁶ O'ch notas masheñeshacha' ñaña nočhaneshacha' ama't napa' ñerra'm machayoča nečhap seshopa' ñerra'm ñañapa' añ neserrpare'tatoses po'poñ ñoñtso ñeñt ama yeñenopa' errotenotuate'ñaca'yeña señoč tarro'mar amaca'ŷe se'muenoña ñeñt ñoñtsor ñeñt atet notenes attoch e'ñe cohuen neŷenpas. Tarraña añña pocte' socop napa' čhocmach na'potonas e'ñe eñotočhen ama't coñeña'ttsa ñeñt atet eñotatenen Yompor. Ñaña napa' elloña čhochña es neñotatyesas po'poñ ñeñt ama señoteno sa. Ñaña napa' čhochña na'potonas mamesha'tets Yompor po'ñoñ, ñaña čhochña es neŷchatas ñeñt cohuentetsa.

⁷ Ñato' o'ch netma'ntacha ñeñt atet pena pencoll, ama't pencollpa' ama aचेñeyaye. Atet ñerra'm napa' esempo nepenclla'tenña' ñerra'm ama cohuenaye' na'poche'teno nepencollpa' amach esesha' eñotaye errotenete' nečhateñ. Amapa' atet ñerra'm napa' esempo netoca' yetarra,* ñerra' ama atteŷe' netoco atet toquēñetpa' amach esesha' eñotaye errotenete' nečhateñ.

⁸ Ñehua, ñato' o'ch netma'ntatererr po'poñ. Atet ñerra'm esempo o'ch ahuanmuet quellratsapa' čhoch ñanom puesheñarr solltarpa' o'ch corrneta't quellareñtsorečo, attoch solltarnesha'pa' o'ch eñoč o' čhap allempoch ahuanmuet quellaratset. Tarraña ñerra'm solltarpa' ama cohuen a'poche'tano po'cornetpa' añña solltarnesha'pa' amach eñočeto ñato' añecopŷe' a'toreñet attoch ahuanmuet quellaratset.

⁹ Attecma pena ñaña yocop ñerra'm esempo yeserrpare'ten po'poñ ñoñtso ñeñt ama allo eñeno aचेñenesha', ñetpa' amach errotenot čhapaneto pueyočhreto ñeñt atet yotenanet. Atetpa' čhach yottena atette'ña ama eñalle aचेñenesha' ñeñt ye'mñotene'.

¹⁰ Po'ñočhpa' eñalleñcha' shonte' po'poñe'ttsocma ñoñets ñeñt atet yeñosŷen añ patsro. Ñaña po'poñe'ttsocmay aचेñey ñeñteŷ eñotyene' ñeñt e'ñe yeñoñ allo yeñosŷen.

¹¹ Tarraña ñerra'm po'psheñeñpa' o'ch serrpare'tateŷ e'ñe ña po'ñoño ñeñt ama allo yeñeno yapa', ñeñtpa' amach yeñoche errotenete' oteneŷ ña po'ñoño. Yapa' attach ye'mueñ ñerra'mrrate' atta otatsen. Ñaña attecmay yaña ñerra'm yapa' o'ch yeserrpare'tach ñeñt ama eñetso yeñoñoŷpa' amach eñoche errotenete' yoteñ yeñoño. Ñapa'čo'ña attach e'mueneŷ ñerra'mrrate' atta yotatsen.

¹² Napa' tarro'mar atet notenes tarro'mar sapa' čhocma seŷe'chyena atto Parets Puecamquēñpa' o'ch p̄atyesas ñeñt atet semna'yen sa. Tarraña napa' añcha'ña o'ch notas, añña pocte' o'ch seŷe'chena attoch señot e'ñe cohuen alloch huomenc sepoñ pueyočher allohuen ñeñt ame'ñetsa.

¹³ Ñeñto'mar te'pa' o'ch notas: Ñerra'm esesha' eñosets po'poñ ñoñtsopa' añ pocte' ma'yochanepa' Yompor attoch eñotach o'ch a'mtan ñoñets e'ñe eñotočhen añ ñeñtara ñoñtso.

* 14:7 Po'ñočh añpa' oten arpa.

14 Tarro'mar ñerra'm esempo yema'yochena po'poñ ñoñtsopa' ama't e'ñe Parets Puecamquëñ yema'yochatate'pa' tarraña allempo po'ñoçhpa' amach añeye' yoc'tape'cheno attoch yeyenpue' yamo'ts.

15 Ñehua, ñeñto'marña te'pa' o'ch notas ñeñtcha' atet ye'pa'yesa e'ñe cohuen. Po'ñoçhpa' e'ñe pocte' o'ch ma'yochatey Parets Puecamquëñ po'poñ ñoñtso, tarraña añ e'ñe pocte' ñaña o'ch yema'yochena e'ñe eñotochen. Ñaña attecma e'ñe pocte' Parets Puecamquëño'tpa' o'ch yemorreacha Yomporecop po'poñ ñoñtso, tarraña añ pocte' ñaña o'ch yemorreachena allo e'ñe yeñen.

16 Tarro'mar ñerra'm po'poñ ñoñtsa ya'ye'choçhtateññañ Yompor atet eñoratey Puecamquëñ, tarraña ñerra'm allo'tsa'yen po'poñeçhno acheñenesha' ñeñt e'ñe errte' e'mñotetspa' amach erroteno't pocte' entapreyeto atto ya'ye'choçhtateññañ Yompor, tarro'mar ama e'muennayeto yeñoñ.

17 Ñaña ama't e'ñe cohuen yeparasyoso'teñeñ Yomporpa' tarraña ñerra'm po'poñ ñoñtsa yema'yochena, ñeñtpa' ama añeçpayaye alloch huomenc ye'poñ po'psheñeñ pueyoçher, tarro'mar ama eñoteñeto erroten'te' yoten.

18 Napa' atarr neparasyoso'teñ Yompor, tarro'mar ama't napa'çho' neñoteñ eñosets po'poñ ñoñtso. Ñato' ñeñtpa' ello metanennas allohuenes atto señosyen po'poñ ñoñtso.

19 Tarraña allempo yapçhena allohueney ñeñtey ame'ñetsapa' napa' añña pocte' nenten o'ch neserrpare't ama't e'ñe coñe'ta ñoñets ñeñt eñotochen attoch e'ñe yeñotue. Añña ama tama cohuenaye' nenteno ama'tcha' neserrpare'ten shonte' ñoñets, tarraña ñerra'm po'poñ ñoñtsa neñenpa' ñeñtpa' amach çho'ye' neyenpueñe namo'ts.

20 Ñeñto'marña masheñeshacha' ñaña noçhaneshacha' amach soçtape'chatsto atet co'tape'chen cheshaneshacha' ñeñt ama eñotenaye ñeñt atet cohuentetsa. Ñehua, po'ñoçh ñerra'm esempo yoc'tape'chyen sosya'tsañ allempoña pocte' o'ch yoc'tape'chen ñeñt atet co'tape'chen cheshatoll, tarro'mar cheshatollpa' ama tama co'tape'cheneta' sosya'tsañ. Tarraña allempo yoc'tape'chen ñeñt cohuentetsa Yomporecoppa' allempoña po'ñoçhpa' o'ch yoc'tape'chen atet co'tape'chen po'naneshacha' ñeñt atarr es eñotets.

21 Añpa' ñeñt Yompor po'ñoñ ñeñt atet anaret ahuatoteñ allempo Yomporpa' atet otane't israelena'tarnesha'. Ñeñtpa' atet otanete't: "O'ch noñmatas po'poñ acheñ ñeñtcha' seserrpare'tatene' e'ñe ñet po'ñoñeto tarraña ama'tcha' atet ne'ponaspa' amach esesha' name'ñerraye tarro'mar amach eseshaye' eñotaye ñeñt atet aserrpare'tatarettenet." Ñeñtpa' Yompor atet otahuete't ahuat.

22 Ñeñto'marña te'pa' atet notenes ama't yeserrpare'tatset po'poñ ñoñtsopa' ñeñtpa' ama añeçpayaye attoch yame'ñacha ñeñt ama ame'ñetso tarro'mar añ ñoñets ñeñt ahuatoteñ anaret ñeñtña yeñotatene'ña ama'tcha' yeserrpare'tatset po'poñ ñoñtso amach esesha' yame'ñerrayo. Ñeñtcha'ña yeñotate'ña erra'tsente' po'ñoçh ñeñt ama ame'ñetso. Tarraña ñerra'm esempo ya'poteññañ Yompor po'ñoñ e'ñe ya yeñoño ñeñt atarr eñotochen, añña ñeñt ame'ñetsa ñetñapa' e'ñech cohuen e'mñoteñet allochña huomenc yepenamet pueyoçhret Yomporecop. Ñeñtcha'ña yeñotate'ña ñetpa' po'ñoçh ame'ñenet tarro'mar ñeñt po'ñoçh ama ame'ñetso, ñetpa' amach mueneñeto o'ch e'mñotet ama't ñeñt atarr eñotochen ñoñets.

23 Ñaña o'ch notas, ñerra'm esempo sapçhena allohuenes ñeñtes ame'ñetsa, ñerra'm allohuenespa' atta señosyen po'poñe'ttsocma ñoñtsopa' ñerra'mña machaya huapa ñaña ñeñt ama ame'ñetso amapa' ñeñt errte' e'mñotetspa' ñetpa' ama'tte'ña çha otaseto çho'te' semospuena.

24 Tarraña ñerra'm esempoña sa'poten allohuenes Yompor po'ñoñ e'ñe eñotochen ñerra'm allempoña huapa ñeñt ama ame'ñetso amapa' ñeñt errte' e'mñotetspa' ñeñtña atet seserrpare'ten Yompor po'ñoñpa' ñato' allohuenetpa' o'ch çhapanet pueyoçhro, o'ch

eñotet ñañeñeta ñeñt atet cotape'chyenet ñetpa' ñeñt'pa' ama pocteyaye Yomporecop.

²⁵ Allempoñapa' ñato' o'ch yore'tanet po'chñaret ñeñt cotape'chatyenahuet pueyoçhro e'ñe a'nahua ñato' puellquëño'tetpa' o'ch concorpuet ñato' o'ch aguëret ñamet Yompor. Tarro'mar ñato' allempopa' o'ch ot: "Po'ñoçhepa't Yompor se'ñoratyene'."

Parets pa'paclopa' ama aserrpare'tpahuo e'ñe parrocoma

²⁶ Ñehua, masheñeshacha' ñaña noçhaneshacha' ñeñt'cha' atet sepa cohuen ñeñt'pa' atet: Sapa' allempo sapçhenapa' ñato' puesheña'ttsospa' o'ch semorrechena, ñato' po'psheñeñpa' o'ch yeçhatenet, ñato' po'psheñeñpa' o'ch a'potan ñeñt atet eñotateñ Yompor, ñato' po'psheñeñpa' o'ch eños po'poñ ñoñtso, ñato' po'psheñeñpa' o'chçho' a'mitan añ ñoñets. Tarraña ñeñt'pa' añecopcha' atet sepa attoch huomenc sepoñ po'psheñeñ pueyoçher.

²⁷ Tarraña ñerra'm eseshas eñosets po'poñ ñoñtsopa' ama pocteyaye o'ch seños e'ñe allohuenes, ñato' e'ñech epsheña eñosets amapa' ma'psheña allotpa' ñeñt'ach. Ñaña añ pocte' ñeñt'cha' eñosetspa' ñap'tepa'tetscha' eñoset. Tarraña añ pocte' ñaña eñallcha' ñeñt'cha' eñotatenahuet ñoñets ñeñt atet eñenet.

²⁸ Tarraña ñerra'm ama eñalle ñeñt'cha' eñotatahuet ñoñetspa' amach eñosatsteto e'ñe alla allempo sapçhena allohuenes ñeñtes ame'ñetsa. Allempopa' eñorana'chetepa' Yompor e'ñe ñap'teto e'ñe pueyoçhreto.

²⁹ Ñaña añ pocte' e'ñech epsheña, amapa' ma'psheña ñeñt'cha' a'pote' Yompor po'ñoñ. Po'poñeçhno acheñenesha'pa' añ pocte' çhoch e'mñochet, ñaña çhoch cotape'chet po'ñoçhte' atet oteney Yompor.

³⁰ Ñaña ñerra'm esempo po'psheñeñ mueneñ o'ch a'potan ñeñt eñotateñ ñaña Yompor Puecamquëñpa' añ pocte' allempopa' amach serrpare'tatsto ñeñt ñanom serrpare'tets.

³¹ Attochña o'ch sa'potuoñ allohuenes Yompor po'ñoñ e'ñe sap'tepa'tets, ñaña attoch allohuenespa' o'ch e'ñe señoçh, ñaña attoch allo'na coshatnenes Yompor po'ñoñ.

³² Tarro'mar ñeñtey a'potene' Yompor po'ñoñpa' çhocmach eñall attoch yeunata yañeña ñanom attoch çhocma yemnatannena.

³³ Yomporpa' ama mueno o'ch atfa yano'tatse'ten allohueney, añña muenen o'ch yesen e'ñe cohuen.

Ñaña atet pena allemeñ anetso ñeñt apçha'yetsa ñeñt pueyochresha' pen Parets. Ñaña allempo sapçhena allohuenes ñeñtes ame'ñetsapa'

³⁴ coyaneshaçhnopa' amach serrpare'tatsteto, tarro'mar ñeñt'pa' ama pocteyaye. Añña pocte' çhoch ame'nyet ñeñt añcha'tarettetsa, ñeñt'pa' atet oteney ñoñets ñeñt atet anaret ahuatoteñ.

³⁵ Ñehua, ñerra'm mueñenet o'ch es eñotetpa' a'p'to'chetepa' puerrollaret allempo çherret pa'paclo, tarro'mar ama pocteyaye coyanesha'pa' o'ch serrpare't allempo yapçhena ñeñtey ame'ñetsa.

³⁶ Ñehua, ñerra'm ama pocteye' senteñe ñeñt atet o' notuaspaspa' ñehua, o'ch notas atet: Yompor po'ñoñpa' ama e'ñe sa soçap'ño'te'ye' hueno, ñaña ama e'ñe sap'tecpa hueno.

³⁷ Ñaña ñerra'm esesha' otats, "napa'çho'ña na'poteññañ Yompor po'ñoñ", ñehua, eñotanepa' ñeñt atet noten necarto'tpa' ñeñt'pa' po'ñoçh atet oteney Yepartseshar ñeñt'cha' atet ye'pa. Ñaña ñerra'm esesha' otats, "napa'çho'ña chorrenna Parets Puecamquëñ", ñehua, ñapa'çho'ña eñotanepa' ñeñt atet noten necarto't ñeñt'pa' po'ñoçh atet oteney Yompor ñeñt'cha' atet ye'pa.

³⁸ Tarraña ñerra'm esesha' ama name'ñayo ñeñt atet o' notuaspaspa' ñehua, ñapa' amach se'mñotatsche.

³⁹ Ñeñto'marña te' masheñneshacha' ñaña nochaneshacha' o'ch noterrser: Añ pocte' o'ch sema'yochrena a'pote' Yompor po'ñoñ e'ñe eñotochen ñoñtso, tarraña pocte' o'ch semnatamet eñosetepa' po'poñ ñoñtso.

⁴⁰ Tarraña ama't erra'tsencha' sepa'yespa' e'ñech cohuen sesen ñeñt poctetsa, ñaña chocmach semnatanna'ta o'ch es sepa'yes e'ñe saptepa'tets.

15

Allempo tanterra Cristopa' ahuo't orrterrana shonte' acheñenesha'

¹ Te'pa' o'ch masheñneshacha' ñaña nochaneshacha' notas po'poñ. Napa' nemneñ ellopa' o'ch alla neyerpaterrser e'ñe errotente'ña ñeñt e'ñe atet pena cohuen ñoñets ñeñt neserrpare'tatuanmas, ama't ahuatoteñ. Ñeñtpa' ñeñtara cohuen ñoñets ñeñt o' same'ñerra, ñaña ñeñtara ñoñets ñeñt allo o' huomenc seperr seyocher.

² Ñaña ñeñtara ñoñets allo o' sa'queshpataretterra ñerra'm amach sequechpuere, tarraña ñato' po'ñoçhpa' ama choye' same'ñeno.

³ Ñaña ñeñt neserrpare'tatas ama't ahuatoteñpa' ñeñtara cotapñats ñeñt atet eñotatennet namã, ñeñt nanac sherbets, ñaña ñeñtara ñoñets ñeñt atet anuaret Yompor po'ñoño ama't ahuatoteñ. Ñeñtpa' atet o' neserrpare'tatuas: Cristopa' rroma yo'chñarecop,

⁴ allotpa' apampare'tta, tarraña poma'pamtañopa' alla tanterra. Ñeñtpa' attecma oten ñaña ñeñt atet anuaret ahuatoteñ Yompor po'ñoño.

⁵ Allempo tanterrapa' ñanempa' orrterrana Pedro, allotpa' orrterrana allohuen pueyochresha'.

⁶ Allotpa' orrterrana ñaña shonte' acheñenesha' ñeñt ame'ñetsa. Ñato' metanenante' quinientos acheñenesha' ñeñt enterre' allempo e'ñe parrocmuet. Ñeñt enterre' allemppa' ama't teme'ttsen shontet corra'yenet. Tarraña puesheña'tetspa' o' colla'huenet.

⁷ Allotñapa' orrterrana ñaña Jacobo, allotpa' orrterrana ñaña allohuen po'poñechno ñeñt allsensaretnesha'.

⁸ E'ñe chenta'ñapa' orrtona namã, ama't napa' ama esoyayno. Atta nentena ñerra'mrrate' sapeñtsoma'to'ta ne'ñallettera Yomporecop.

⁹ Po'poñechno allsensaretnesha'pa' ñetpa' nanac sherbenet, tarraña napa' ama't allsensareteneñpa' ama tama nesherbena. Ñaña napa' pocte' nenteñ amach otatsetneto allsensareten, tarro'mar napa' nanac na'mueroçhtache't ñeñt ame'ñenaya Yompor.

¹⁰ Tarraña ama't atet nepe'tpa' Yomporpa' atarr morrentna. E'ñe puemuereño'tpa' attoña a'pnaserren ñeñt nanac sherbets ñocop. Tarraña ama orrena morrentno Yompor, tarro'mar te'pa' nanac netorrena Yomporecop. Po'potantañ allsensaretnesha'pa' ama't torra'yenet Yomporecoppa' tarraña napa' ello nanac netorrena atet torrenet ñet. Ñehua, ama't noteneñ napa' netorrena Yomporecop, po'ñoçhpa' ama naye' torretso, añña Yompor puemuereño'tpa' ñeñtña torretsa na nechtso't.

¹¹ Ñehua, amach yoto ñeñfey nanac sherbets, ñato' na amapa' po'poñechno allsensaretnesha'. Añcha'ña yot ñerra'm ya po'ñoçh yeserrpare'teño't o' same'ña'huerrapa' ñeñtña nanac sherbets.

Atto esempohuañenpa' yetantuerrach rromot

¹² Ñehua, ñerra'm po'ñoçh o' same'ñerra ñeñt atet yeserrpare'tatenes atto Cristopa' o' tanterra allempo rroma, eso'mare'tña soten ñerra'm yerromapa' amach erroteno't yetanterro. Po'ñoçh ñeñtpa' atet oten puesheña'tets ñeñt sesho'tsen.

¹³ Ñehua, ñerra'm po'ñoçh ama eñalle attoch yetanterra yapa', Cristopa'cho'ña amate' tanterrañe ama't teme'ttsen.

14 Ñerra'm po'ñoçh Cristopa' teme'ttsen rromueneña' ñeñt atet yeserrpare'tatenes te'pa' amate' es sherbenñe. Ñaña ñerra'm po'ñoçh ama tanterrañe Cristopa' te'pa' e'ñe'e' orrena yeyemteñañ.

15 Ñaña ñerra'm po'ñoçh ama tanterrañe Cristopa' yapa' attate' yeshquënsoñ atto pena po'ñoçh Yompor, tarro'mar yapa' o' yeserrpare'tuoñ Yompor atto ñapa' o' tantaterran Puechemer Cristo. Tarraña ñerra'm po'ñoçh ama eñallñe attoch yetanterra rromotpa' ñeñña atet o' yeserrpare'tatuas atto Yomporpa' o' tantaterran Puechemer Cristo, ñeñtpa' amate' po'ñoçhoyayñe.

16 Po'ñoçhpa' ñerra'm amach yetanterro yapa', Cristopa'cho'ña teme'ttsente' ama tanterrañe.

17 Ñaña ñerra'm po'ñoçh teme'ttsen amach tanterrañe Cristopa' e'ñe'e' orrena seyemteñañ, ñaña so'chñarpa' amate' apretñareteñe teme'ttsen.

18 Ñaña allohuen ñeñt o' colla'huena ñeñt ame'ña'nmaya Cristopa' ñetpa' o'te' e'ñe poctacma chenca'huerretañ.

19 Ñaña ñerra'm añecpa yeyemteñañ Cristo allempo huomñchenya', ñaña ñerra'm po'ñoçh amach yetanterro, ñerra'm atteña' nanacte' llequëñtso'tsenyeñ. Ñeñt llequëñetspa' ellote' metanenanenñ ñeñt atet yellcatyene' añe patsro.

20 Tarraña ñeñtpa' ama atteyaye, tarro'mar po'ñoçh Cristopa' o' tanterra ñanom. Atto tanterrapa' amach alla rromuerre'te allochñapa' esempohuañen allohueney ñeñtey ame'ña'nmaya Cristopa' yapa'cho'ña attecmaçh yetanterra.

21 Atet pa' ñaña ahuañ Adán e'ñe ña po'chñaroñ o' anare'tta attoch yerroma, ama't e'ñe puesheñarroña. Te'pa'cho'ña e'ñe puesheñarroña' o' orrterra attoch yetanterra ama't esempoch yerroma.

22 Tarro'mar e'ñe po'chñaroñ Adán ñeñtey pamo'tsna'tareypa' yocoppa'cho'ña o' anare'tta attoch yerroma yaña allohueney. Tarraña te'pa' e'ñe yeparrocmateñoñ Cristopa' elloch alla yocrra'huerra allohueney.

23 Tarraña ñeñtpa' atetcha' perra: Cristo ñanom o' tanterra allochñapa' ñerra'm esempoch huerra, yapa'cho'ña ñeñtey ame'ñenayapa' attecmaçh yocrra'huerra allohueney.

24-28 Allempoña Cristopa' o'ch puerratañpesuan po'huamenc allohuen ñeñt añcha'tare'tetyetsa, ama't ñaña ñeñt añcha'noçhetyetsa, ñaña ñeñt ahuañenatetyetsa. Tarro'mar añ poctetsa Cristopa' ñach añcha'tare'tterrtsa e'ñe ñapueñ esempohuañencha' yoramñpesuan po'huamenc allohuen ñeñt e'moñe'tene'. Ñaña esempohuañen e'ñe chenta'pa' o'ch a'huañamperrey rromueñets ñeñt o'patatare'tey te' allohueney. Tarro'mar Cristopa' o' aphue Pompopor po'huamenc attoch pomnaren penan allohuen esocmañen. Ñehua, ama't oteneñ Yompor po'ñoñ Cristopa' pomnaren penano' allohuen esocmañenpa' tarraña yeñoteñ amach pomnaren paño Pompopor, tarro'mar Pompoporpa' ña apuene' po'huamenc. Esemphuañencha'ña pomnaren pohuan allohuen esocmañen allempoña Cristopa' o'ch aphuerran Pompopor ñeñt nanac Parets atto añcha'tare'ttena. Allempoña Pompoporpa' o'ch alla pomnaren perran Cristo ñeñtara Pompopor ñeñt o' ahuañenat o' pohue. Allempoña Pompoporpa' ñach añcha'tare'tterrtsa, ñaña allempopa' ñach pomnaren perre' allohuen esocmañen. Allempopa' o'ch mellapoterra.

29 Te'pa' o'ch alla noterrser po'poñ. Ñerra'm po'ñoçh ama eñalle attoch yetanterra esempohuañenpa' eso'mare'tña puesheña'tets acheña' apatare'ttenaña añecop ñeñt o' rroma. Po'ñoçh ñerra'm amach erro'tenoñ tanterro ñeñt o' rromapa' eso'mare'tña apatare'ttenetña ñeñtecop.

30 Ñaña ñerra'm po'ñoçh amach erro'tenoñ yetanterropa' eso'mare'tña pocte' nenteñ e'ñe name'ñeño'tpa' ama't chocma nemueroçhtena ñocoppa' e'ñe pocte' nenteñ.

³¹ Napa' atet noten tarro'mar pate'tets yetpa' e'ñe na'llpuepñoña ama muetsayenneto. Ñehua, neñoteñ ñeñtpa' attec mach pa'net. Tarraña masheñeshacha' ñaña nochaneshacha' errponcha' nemuerochtapa' allponcha' nocshapretensa samá, tarro'mar e'ñe yeparrocmateñoñ epay Yepartseshar Jesucristo.

³² Ñaña arr Efesopa' e'ñe na'llpuepñoña a'queshp̄atnet atet ñerra'mrrate' cho norrotena epan ma'yarr. Tarraña ñerra'm amach errotent yetanterropa' ñeñña atto na'llpuepñoña a'queshp̄atyennetpa' amach es sherba'no, tarro'mar ñeñt patso'marecpapa' ama sherbeno. Po'ñoçhpa' ñerra'm amach eñallñe attoch yetanterraña' e'ñe pocte' o'ch yoteneñ: "Te'pa' acsha'yeshapuepa'ch, ñaña o'ch yotanna'ta arrallme'chapretyeshapuepa'ch, ñaña o'ch yotanna'ta orrare'tyeshapuepa'ch tayepa'tña' huonchay. Tsapatoneña o'ch yerromapa' amach allo'na atet yepa'nenno."

³³ Tarraña amach sotaḡsa'tatso atet, tarro'mar yeñoteñ "ñerra'm esempo yeyemteña ñeñt atta cotape'chatse'tyets ñeñt ama cohuenayaye Yomporecop yapa'cho'ña chach shequenyet tarro'mar tsapatoneḡpa' ñato' o'ch alla atet yeperra yamá atet pa'yenet ñet, ama't te' yapa' e'ñe cohuen yotape'chen Yomporecop."

³⁴ Añña pocte' o'ch soctape'cherr ello, ñaña o'ch sequechpuerr ñeñt atet sepa'yese't ñeñt ama pocteyaye Yomporecop. Te'pa' sepenquēpa' tarro'mar ñato' po'ñoçh ama señoñe Yompor allohuenes.

Atetcha' yepo'poñet allempoch yetanterra rromot

³⁵ Te'pa' o'ch notas po'poñ. Ñehua, ñato' puesheñarrotespa' atet sotenen: "Amate' errotent yetanterroña rromot. Ñerra'm po'ñoçh atanterrapo' rromot, yechetsña allempopa' ¿errotena'tcha'ña orrterra?"

³⁶ Sapa' are'tña es señoñeno. Ñehua, ñato' o'ch netma'ntacha atet: Yeñoteñ ñerra'm es yenare't pue'llomerpa' amach ahuen chopo. Choch ñanom puetsa' pa'tall esheccha'ña chop.

³⁷ Ñaña ama aḡeye' yenare'teno narmets ora ñeñt e'ñe atet chopuets. Atet ñerra'm chop* yenare'tpa' pue'llom̄rach yenare'teññañ.

³⁸ Ñaña ñeñtpa' Yomporcha' a'chpate', tarraña ñeñtcha'ña chopatspa' o'ch po'poñet ñeñt atet orrtena ahuaña pue'llomer. Ñeñtpa'cho' Yompor a'po'poñetatene' tarro'mar atet muenen ña. Ñaña ñerra'm po'poñe'ttsocma es yenare't pue'llomerpa' e'ñech po'poñe'ttsocma chopyes ñaña narmets ñeñt e'ñe atet anare't.

³⁹ Añpa'cho' chetsotspa' e'ñe po'poñe'ttsocma chetsots, ama e'ñe attec mayaye. Atet ñerra'm ya acheñeypa' po'poñcho' yechets yechen. Ñaña es berroçhnopa' po'poñcho' po'chets pen. Ñaña o'teçhnopa'cho' po'poñ po'chets pen ñaña. Cacaçhnopa'cho'ña po'poñcho' po'chets pen ñaña.

⁴⁰ Ñaña ñeñt allpon ento'marnesha' ama e'ñe attec mayayeto ñerra'm patso'marnesha'. Tarraña ñeñt ento'tsa'yenpa' ellone'tcho' coçhnesha'tyenet tarro'mar atet anare'tet. Ñeñt patso'tsa'yenpa'cho'ña ellone'tcho' cohuenetyenet ñamet tarro'mar ñetpa'cho'ña atet anare'tet.

⁴¹ Ñaña atet cohuentena atsne'pa' ñeñtpa' po'poñ poptena tarro'mar atet anare't ñaña. Arrorrrpa'cho'ña po'poñone'tcho' cohuentena tarro'mar atet anare't. Rantoçhnopa'cho'ña po'poñone'tcho' cohuenetyenet. Ñaña pate'tets rantopa' po'poñe'ttsocma cohuenetyenet ñamet tarro'mar atet anare'tet.

* 15:37 Po'ñoçh añpa' oten trigo.

42 Attecmach yeperra yañña ñerra'm esempohuañencha' yetanterra. Ñeññ atet or-
 rtena te' yechetspa' allempoch yetanterrapa' amach atteraye' yorrterro. Te'pa' ar-
 romñañayapa' chocmach yerroma allotpa' o'chcho' pampa'yet allcha' puetsohuerr
 yechets. Tarraña esempoch yetanterrapa' amach alla ya'rromña'terre'te.

43 Ñaña te' yechetspa' atarr pencna'ntateney tarro'mar chocmach yatsna'ten. Ñerra'm
 yatsna'tpa' o'chcho' yerroma, allotña'pa' o'chcho' pampa'yet. Tarraña ñerra'm esempoch
 yetanterrapa' allempo yechetspa' amach alla pencna'ntaterrye'te. Allempopa' e'ñech
 cohuen yorreyena. Ñaña te'pa' ama ahuamencateye ñeñño'marña chocma yerromuen,
 allotña'pa' o'chcho' pampa'yet. Tarraña ñerra'm esempoch yetanterrapa' allempopa'
 nanaccha' ahuamencatey.

44 Atet yeyeçquëna te' arr patso'marpa' ñeññpa' chocmach yerroma, allotña'pa'
 o'chcho' pampa'yet. Tarraña ñerra'm esempoch yetanterrapa' allempopa'
 camuecñetsoñach yorrterra. Po'ñoçh yeñoteñ atet yorrtena te' yechtsotpa' yeñoteñ
 ñaña yecamquëño'pa'cho'ña yorrterrach esempohuañen.

45 Ñeñño'marña ama't Yompor po'ñoño atet anuaret ahuatoteñ, ñeññpa' atet oten:
 "Allempo Adánpa' yeçcach Yompor allempoñapa' ahuo't a'p po'rrerrña attoch corra e'ñe
 po'chtsoñ. Ñeñño'mar Adánpa' ñeññ ñanom acheñetats." Tarraña chenta'ñapa' acheñetos
 ñaña Cristo attoch ñach yapuerre' ello o'ch alla yocrra'huerra yecamquëño'.

46 Tarro'mar Yomporpa' atet na'y. Ñanompa' o'ch yocrra e'ñe yechtsot, esempo-
 huañenñapa' o'ch alla yocrra'huerra ñaña yecamquëño'.

47 Tarro'mar ñeññ ñanom acheñ ñeññara Adánpa' patsa ayeçcataret, ñeñño'marña
 ñapa' atta patso'marneshat. Tarraña puepañ ñeññ acheñetosets ñeññara Yepartseshar
 Jesucristo ñeññpa' entoñ huapa.

48 Ñaña ñeññey arromñañeneshaypa' yapa'cho'ña attaya ñerra'mrrate' Adán ñeññ
 ayeçcataret pats. Tarraña ñeññey ame'ñenaya Cristo ñeññ huaptsa ento'pa' yapa'cho'ña
 yocrra'huerrach yecamquëño' ento atet ñerra'mrrate' Cristo ñeññ huaptsa entoñ.

49 Atteña te'pa' atta yeyeçquëna yechtsot atet ñerra'mrrate' Adán ñeññ ñanom
 ayeçcataret pats tarraña esempohuañenpa' yeyeçquërrach ello atet ñerra'mrrate'
 Cristo ñeññ huaptsa entoñ.

50 Ñeñño'marña masheñneshacha' ñaña noçhaneshacha' notenes: E'ñe yechtsotpa'
 amach es yo'pato all añcha'tareñtena Yompor. Tarro'mar allempo arromñañayapa'
 amate' errotenoñ es yo'patoña ñeññ ama ahuañaño.

51 Ñehua, o'ch neñotatas ñeññcha' atet perra esempo, ñeññ ñapña eñoteñ te' Yompor.
 Po'ñoçhpa' amach e'ñe allohueney yerromhuo. Tarro'mar ñeññey orameñ corretsa
 allempoch huerra Cristopa' amach yerromo. Allempopa' attach yepo'poñet

52 e'ñech machayota e'ñe allempocma esempoch e'morrterra Yompor po'pactor
 e'ñe allohuanen. Ñehua, ñeññpa' atetcha' perra allempo. Ñanompa' o'ch e'morrterra
 Yompor po'pactor. Allempoñapa' o'ch tanrra'tuena ñeññ colla'huatsa ahuatoteñ. Allempo-
 chña tanterretpa' amach alla arromña'terrete'te. Yaña ñeññey orameñ corretsapa'
 yapa'cho'ña o'ch yepo'poñet e'ñe allempocma.

53 Tarro'mar yechets ñeññ aptsañapa' añ palltetsa o'ch puenasa ñeññ ama aptsaño.
 Tarro'mar ñeññey arromñañeypa' añ palltetsa o'ch yepnasa ñeññ ama arromñañeyaye.

54 Ñerra'm esempo yechets ñeññ aptsañapa' ñerra'm o'ch puenasa ñeññ ama apt-
 saño, ñaña ñerra'm esempoch ñeññey arromñañeypa' o'ch yepnasa ñeññ ama ar-
 romñañeyayepa' e'ñe allempopa' o'ch e'ñe etsotua ñoñets ñeññ atet anaret ahuatoteñ,
 ñeññpa' atet oten: "Allempo o'ch huañerrña ñeññ atto o'patenya rromueñets.

55 Ñeñño'marña allempopa' amach yerromuerre'te, tarro'mar amach eñalleterre'teña
 ñeññcha' alla ya'tserrperrayerr ama't yerromñoña."

⁵⁶ Tarro'mar te'pa' yo'chñarot' o'patenyaña rromueñets, tarraña allempopa' amach eñalle yo'chñar. Ñaña yatpare'teñoñ ñoñets ñeñt' atet anaretpa' ñeñtña yo'patataye'tña rromueñets allempo nanac yeyore't yo'chñar.

⁵⁷ Ñeñto'marña te'pa' yeparasyoso'chepa'ch Yompor tarro'mar atto apuey Puechemer ñeñtara Yepartseshar Jesucristo ñeñtcha' chocma ya'pocstatene' allohuen pa'namen ñeñt' yocop.

⁵⁸ Ñeñto'mar e'ñe nemorrenteñoñpa' o'ch masheñeshacha' ñaña noçhaneshacha' noterrser: Te'pa' huomenquëpa'ch sepa' seyoçher, amach sequeçpatstere. Ñaña chocmüepa'ch setorrena Yomporecop. Ñaña sapa' señoche'pa'ch ñeñt' atto yetorrena Yomporecoppa' ama orrena yetorreno.

16

Añ quellepa' ñeñt' apete't huocchañeshachno

¹ Te'pa' o'ch notas po'poñ. Añ allpon quelle ñeñt' chocma senen huocchañeshachnocop ñeñt' ame'ñetsa, ñeñt'pa' attecmaç sepa. Tarro'mar ñeñt' ame'ñetsa Galaciopa' o' neñotatuanet ñeñt'cha' atet pet, ñeñto'marña sapa'çho'ña atet'cha' sepa saña.

² Ñeñt'pa' atet'cha' sepa: Pate'tets temencpa' añ pocte' chocmach sena'yes ellopa'tets errponcha' semna'yes o'ch sena'yes Yomporecop. Ñaña errponte'ña sechyen ñeñt'cha' sena'yes Yomporecop, ñato' aton amapa' ñato' coñe't. Ñeñt'pa' o'ch sañño'tue e'ñe ellocma attotach o'ch satontatyes. Allochñapa' ñerra'm esempoch neçhap seshopa' amach pallteno e'ñe allempopa' o'ch taya sena'yes.

³ Ñaña ñerra'm esempoch neçhap seshopa' o'ch nequellca' carta ñeñt'cha' nemña Jerusaléno. Ñaña o'ch nemñe acheñ ñeñt'cha' anmue' quelle, ama't erra'tsena acheñ ñeñt'cha' pocte' senten sa.

⁴ Ñaña ñerra'm pocte' senteñ o'ch ahuen namapa' e'ñe pocte' o'ch yahuanena e'ñe parro.

Allempo sechena Pablo o'ch ahuo' po'poñ anetso'mar

⁵ Ñaña ñerra'm esempoch ahuen arrot' attoch neçhap seshopa' napa' noctape'cheñ arrcha' noñem Macedonio'mar.

⁶⁻⁷ Añ atarr nemnen ñerra'm Yompor muenatspa' allate' na'llponmat sesho, ñato' allate' nechara'pena. Tarro'mar napa' ama nemno o'ch atta nepomuetnom sesho, añña napa' nemneñ ñerra'm Yompor muenatspa' allate' natomat. Ñaña ñato' e'ñe allotpa' o'te' sanemyesen errachcho' neshecha allempo.

⁸⁻⁹ Tarraña te'pa' amach erra neto. Allanach arr Efeso tarro'mar te'pa' eñall attoch o'ch neserrpare'tatyes shonte' Yompor po'ñoñ. Ñaña te'pa' neñoteñ ñato' o'ch ame'ñenna shonte' acheñ, tarraña chocma eñall ñaña shonte' ñeñt'cha' nepatare'tene'. Tarraña o'ch çhap Pentecostepopa' o'ch ahuerren arrot'.

Atet' otanet Timoteocop

¹⁰ Ñaña o'ch notas, ñerra'm esempoch çhap masheñ Timoteopa' o'ch sagañ e'ñe cohuen, allochñapa' amach çha llecoso sesho. Tarro'mar ñapa'çho'ña nanac torrena Yomporecop atet' ñerra'm na.

¹¹ Ñaña ñerra'm esempoch çhap seshopa' añ pocte' chocmach se'mñoch e'ñe cohuen. Ñaña e'ñech cohuen seyenpue' allochñapa' ñerra'm esempo puerrerra allotpa' e'ñech pocsheñsha' çherr nesho. Tarro'mar napa' chocma necueñ masheñ Timoteo epan po'poñeçhno masheñeshachno.

12 Ñaña masheñ Apolospa' nanac nemñare'teñ o'ch emo'tensa' epuet po'poñechno masheñnesha'pa' tarraña te'pa' ñapa' ama mueno. Tarraña esempopa' chomach chap sesho ñerra'm esempoch pocta'huoña.

Allempo so'terranet po'cartoť

13 E'ñe allohuanenpa' o'ch noterrser: Te'pa' e'ñech señoa, tarro'mar chocma eñall ñeñtcha' ya'psaterre' Yompor. Ñaña e'ñe same'ñeñoťpa' huomenquēpa'ch sepa' seyočher. Ñaña amach señcha'tatsto, čochña seumencta Yomporecop.

14 Ñaña ora allpon ñeñť sepa'yenpa' e'ñepa'ch semorrentanna'teñoť es sepa'yen.

15 Te'pa' o'ch masheñneshacha' ñaña nočhaneshacha' notas po'poñ. Sapa' señoťeñ ñaña atto masheñ Estéfanaspá' ña ñanom ame'ñerřsa ahuať all Acayo. Ñaña ahuo't ame'ñerret epuet pamo'tsesha'. E'ñe allempoteñ ñetpa' ahuo't torra'yenet añecop attoch yenpuet allohuen ñeñť pueyochresha' o' perr te' Parets.

16 Ñeño'mar te'pa' o'ch notas: E'ñe pocte' o'ch se'mñoch Estéfanas, ñaña ama't allohuen po'poñechno acheñ ñeñť chocma torrapretetsa Yomporecop.

17 Napa' te'pa' atarr nocshena tarro'mar o' huapa arr nesho masheñ Estéfanas ñaña Fortunato ñaña Acaico. Tarro'mar sapa' ama't ama sehuapopa' ñetpa' o' huapuet.

18 Ñetpa' atarr coshatosnet neyočhrocmañen. Ñato' sapa'čo'ña o'te' coshataset. Co-huenepa'ch señch acheñ ñeñť atet petsa.

19 Ñaña allohuen ñeñť ame'ña'yetsa arr Asio'marpa' mueneñet o'ch huomñcha'taset ñamet añ necartoť. Masheñ Aquilapa'čo'ña mueneñ o'ch huomñcha'tas epuet puetapor Priscila. Ñaña allohuen masheñnesha' ñaña nočhaneshachno ñeñť pame'ñeñoťet apčhetset Aquilapahuo mueneñet o'ch huomñcha'taset ñamet. Tarro'mar e'ñe yeparroc-mateñoť epay Yepartsesharpa' o' huomñcha'taset añ necartoť.

20 Ñaña allohuen masheñneshachno ñaña nočhaneshachno ñeñť arro'tsa'yenpa' mueneñet o'ch huomñcha'taset ñamet. E'ñe semorrentanna'teñoťpa' atetcha' se-huomñcha'tanna'tena ñeñť atet poctetsa Partsocop.*

21 Añ coñe'tpa' o'ch nequellca' ñaña e'ñe na notoť, attoch o'ch nehuomñcha'tas ñaña.

22 Ñerra'm esesha' ama morrentenaye Yepartseshar Jesucristo ñeñťña atet petsa a'coñchatareťtepa'ch. Te'pa' ñeñťach notas, huerrnayepa'te' ñeñť Yepartseshar yepen.

23 Yepartsesharepa'chña Jesucristo sa'natenaya allohuenes.

24 E'ñe name'ñeñoť Cristo Jesús atarr nemorrentensa. Te'pa' ñeñťach notas, ñeñťpa' atetepa'chña Nompore. Allohua.

Pablo

* 16:20 Po'ñočh oteneý, "E'ñe semorrentanna'teñoť čoch setso'ttsa'pa'tannena ñerra'm esempo sehuomñcha'tanna'tena ñeñť atet poctetsa Partsocop." Ñeñťpa' atet yečhete't ahuať.

AÑ PUEPAÑ SAN PABLO PO' CARTA ÑEÑŦ QUELLQUËRRANERR CORINTO'MARNESHA' 2 CORINTIOS

Atto Pablopa' alla quellquërranerr carta añecop ñeñŦ ame'ñetsa anetso Corinto

¹ Masheñeshacha' ñaña nochaneshacha' ñeñŦes allohuenes ame'ñenaya Yompor ñaña e'ñe same'ñeñoŦ chocma sapçhena Yomporecop all anetso Corinto. Ñaña añ cartapa' añecpa'ñaña nequellquëñ allohuenacop ñeñŦ o' pueyochresha' perranet Parets ñeñŦ apçha'yetsa allemeñ anetso Acayo'mar. Na Pablon o'ch alla nequellquërrnaserr po'poñ carta epan masheñ Timoteo. Napa' ñeñŦen Jesucristo puellsensaren tarro'mar atet muenen Yompor.

² Te'pa' e'ñe nehuomïcha'teñoŦes sa napa' o'ch notas: Yomporepa'chña seben-sare'tamïpene' ñeñŦ nanac Parets epuet Puechemer Jesucristo ñeñŦ Yepartseshar yepen. Ñetepa'chña socshatene' e'ñe sa seyoçhro allohuenes.

Yomporpa' ñachña chocma yocshatene' allempo es yehuenoya

³ Aye'choçhtaterrapo'ch Yompor, ñeñŦara ñeñŦ Pompor pen Yepartseshar Jesucristo. ÑeñŦara Yompor ñeñŦ atarr amueraña, ñeñŦcha' chocma yocshaterre' allempo es yell-catene' yeyoçhro.

⁴ Ñerra'm esempo huennaya pa'namen ñeñŦ amueroçhtatañtetsa ñapa' ñachña chocma yocshaterre'. Tarro'mar o' coshaterrey Yompor, allochña yapa'çho'ña attoch yeñoteñ o'ch yocshater yamïa masheñnesha' ñerra'm esempo huapanet ñamet ñeñŦcha' mueroçhtatahuet. Añ poçtetsa o'ch yocshaterranet ñet atto Yomporpa' o' coshaterrey yamïa.

⁵ Atto nanac yemueroçhtapreteña Cristo tarraña ñachña ello atarr yocshaterre'.

⁶ ÑeñŦo'marña te'pa' o'ch notas, ñerra'm esempo nemueroçhtena na, ñeñŦpa' e'ñe po'ñoçh socop, tarro'mar ñerra'm esempo nemueroçhtena napa' ñeñŦpa' alloch socsherra samïa attotcha'ña sequeshperra. Ñaña ñerra'm esempo coshaterren Yompor ñeñŦpa'çho'ña alloch nocshaterres samïa. Allochñapa' e'ñe socsheñeshocmañen chocmach sa'huanten allohuen mueroçchteñets ñeñŦ atet nepena na.

⁷ ÑeñŦo'mar napa' neñotenes chocmach sa'huanta' ñeñŦ echarr senten. Tarro'mar napa' neñoteñ ñerra'm allpon semueroçhtapretna, elloña allempopa' o'ch alla e'ñe socshapreterrna atto Yomporpa' ñachña chocma yocshaterre'.

⁸ Ñehua, te'pa' nemneñ o'ch masheñeshacha' señoŦen ñeñŦ atet nemueroçhtosa ahuaña all anetso Asia. Allempopa' napa' atarr nanac nellquëna. Napa' notapañ çhach nerroma, amach erroŦ nepe o'ch na'queshpata nañeña.

⁹ Po'ñoçh napa' neñoteñ neyoçhro te'pa' o' çhapona ñeñŦ nocop allempoch nerroma. Tarraña añecpa huapona echarrteñets atet, allochñapa' attoch e'ñe neñoteñ Yomporcha'ña neyemtena. Amachña nañeña yemtetso. Tarro'mar Yompor po'huamencot ama't arromñaŦpa' chocmach tantater.

¹⁰ Tarraña ama't muene' nerromañ Yomporpa' allorocma tantaterren po'huamencot attoch ama nerromo. ÑeñŦo'marña napa' neñoteñ Yomporpa' chocmach a'queshpaterrey. ÑeñŦo'marña te'pa' ñachña chocma neyemtena. Neñoteñ allo'na sen na'queshpätnene' ñerra'm esempo es nohuerroyerr ñeñŦ atarr echarr.

¹¹ Ñaña añ poçtetsa o'ch sema'yochamïpenna attoch seyempa'n. Ñaña shonte' acheñenesha' ñerra'm esempo eñotennet atto Yomporpa' chocma a'natenna e'ñe puema'yocheñoŦet ñet, allempopa' chocmach parasyoso'teñet Yompor atto a'natenna.

Atto Pablopa' ama eñotenano pueshquëñ

12 Ñehua, te'pa' o'ch notas po'poñ ñeññ atet noctape'chen. Napa' ñeññña atarr nocshatene' nanac. Napa' neñotena neyoçhro po'ñoçh arr patsropa' çhocma noctape'chen ñeññ atet pocte' enten Parets. E'ñe name'ñeñoñ Yompor, napa' ama nemno o'ch esesha' neshca'yes ama't mamesha. Elloña sapa' ama nemno o'ch neshcas ama't e'ñe mamesha. Ama ñña neyemteno ñeññ atet yoctape'chen ya acheñey arr patsro, añcha'ña neyemteñoñ Yompor attoch ñach neyenpuene'. E'ñe puemuereñoñ ñachña neñotatene' ñeññ cohuen enten ña.

13 Ñehua, sapa' çhate' sotapañ napa' attate' neshquënes ñeññ notenes necartoñ. Tarraña ñeññ allpon notenes necarto'pa', o'ch selleye' allochñapa' esheccha' señoçh ñeññpa' e'ñe po'ñoçh atet, añ ñoñetspa' ama shequëñtsoyaye. Napa' necuenes esempohuañen o'ch e'ñe seyemtenna e'ñe poctacma, o'ch e'ñe señoçh ñeññ atet notenes necartoñ ñeññpa' e'ñe po'ñoçh atet. Napa' ama çhoye' neshquënso.

14 Ama't te'pa' ama e'ñe poctacmaye' seyemtenno, tarraña ñerra'm seyemtenna e'ñe poctacma, allempoñapa' ñerra'm esempoch huerra Yepartseshar Jesúsapa' atto socshenna na, napa'çho'ña allempopa' nocsherrsach samña.

Atto Pablopa' sechenañ o'ch emo'tenana' corinto'marnesha'

15-16 Napa' notenapañ çhocmate' seyemtenna, tarro'mar napa' ama çhoye' neshquënso. Ñeñto'mar napa' ahuaña nesechena o'ch ahuen Macedonio, napa' noctape'cheñ o'ch nemo'tnomues. Choncha'ña metats ñaña Macedonio, allempoña noctape'cheñ o'ch nerr Macedonio'pa' o'ch alla nemo'tnerrser. Attoch puepocheño o'ch nocshatterres, ñaña attoch seyenpa'n samña o'ch alla ahuerren Judeo.

17 Tarraña ama't atet noctape'cheneñ o'ch nemo'terrañpa' tarraña ama neseno o'ch nabçherrs'; ñeñto'marña sapa' çhate' sotenapañ napa' epuote' noctape'chen cohuen. Sapa' attate' sentenen atet ñerra'm acheñ ñeññ attach es pueçhena arr patsro. Ama'tcha' otenan acheñenesha' ñeññcha' atet pa, tarraña pueyoçhroñapa' cotape'chenayach po'poñ.

18 Tarraña napa' ama atteye' noctape'cheno. Ñerra'm es notenes ñeññcha' atet ne'papa' neyoçhroñapa' ama esoye' noctape'cheno po'poñ. Tarro'mar Yompor ñerra'm es oteney ñeññcha' atet ñonaypa' atetcha'çho' pennay tarro'mar ñapa' ama puenesho po'ñoñ.

19 Ñaña Yompor Puechemer ñeññara Cristo Jesús ñerra'm es oteney ñeññcha' atet ñonaypa' atetcha'çho' pennay, çhocmach orrtateñ e'ñe po'ñoçh, tarro'mar ñapa'çho'ña ama puenesho po'ñoñ. Ñeññara Jesucristo ñeññ çhocma yeserrpare'tatenes epan masheñ Silvano ñaña masheñ Timoteo.

20 Tarro'mar allohuen ñeññ allpon atet oteney Yompor ñeññcha' atet perrnay, Puechemerña ñeññ Cristo Jesús ñaña e'ñe etsotatuene' po'ñoñ. Ñeñto'mar ñerra'm esempo yoten "attetepa'ch Yompore yocop" yeñoteñ Cristopa' ñaña e'ñe etsotatuene' Pompor po'ñoñ yocop. Allochñapa' attoch e'ñe cohuen ya'ye'choçhtateññañ Yompor.

21 Ñeññara Yompor ñeññ ahuañencat pene' allohueney yeyoçher e'ñe yame'ñeñoñ Puechemer Cristo. Ñeññara Yompor ñeññ yellsensene' attoch ye'torra'yesa ñocop.

22 Ñaña ñapa' ahuo't apuerrey attoch yeñoter o' puechemer perrey ña. Ñeññpa' ñato' o'ch netma'ntacha atet ñerra'mrrate' aynatuaretey Yomporecop. Ñaña ahuo't apuerrey Puecamquëñ ñeññcha' yeçherrtsa yeyoçhro ñeññpa' ñeññcha'ña yeñotatene' orameñ shonte' ñeññ o'patatenya Yompor.

23 Te'pa' o'ch neñotaterrser ñeññ atet noctape'chen ñeñto'marña ama nemo'terrso ahuaña. Yomporpa' eñotenen ñeññcha' atet notas ñeññpa' e'ñe po'ñoçh atet. E'ñe nemor-renteñoñes sapa' ama neçherro all seyçhena Corinto. Tarro'mar ama neto, ñerra'm netañ o'ch neçhap seshopa' çhate' muene' neche'ptare'tyesoses e'ñe sa satpare'teñoñen.

Ñerra'm atetpa' chate' alla nellcaterres. Ñeñto'mar te'pa' o'ch notas e'ñe nemor-renteñofes sapa' attoña ama necherro sesho. Ñerra'm po'ñochte' ama atteye' notensopa' Yomporepa'chña na'chencaterre'.

²⁴ Ama añecpaye' notenso attoch sapa' o'ch sa'mcha'tareter seperren na, ñeñtes ame'ñenaya Yompor. Añcha'ña neborrapretasa attoch neyenpas. Ama't atto o' huomenc same'ñeñañ Yompor, napa' chocmach neborrena socop allochñapa' attoch señañeshocmañen socter Yompor e'ñe poctacma.

2

¹ Ñehua, ama'tcha' nemneñeñ o'ch alla nechererr sesho tarraña napa' ahuo't alla noctape'cherr ello neyo'chro, noten amach neto tarro'mar ama nemno o'ch nechap nellquëñesha' sesho te't sapa' o'te' alla nellcaterreserr saña.

² Tarro'mar noten ñerra'm ne'ñotare'teñofes na o'ch alla nellcaterrespa' attoch nellcaterres sa, sellquëñapa' amach nocshapretaso, tarro'mar sapa' sañeña e'ñe nocshatene'.

³ Ñeñto'marña ama necherro sesho ahuaña, aña nequellconas carta ñeñtcha' soctape'chaterre' e'ñe cohuen. Allochñapa' ñerra'm machayo'a necher sesho ñerra'm o'ch alla soctape'cherr cohuen, ñeñtcha'ña atarr nocshapretuerrsa. Allochñapa' amach tama nellquënso tarro'mar añ poctetsa socop chocmachña e'ñe socshaterren. Ñaña neñotenes ñerra'm esempo nocshena na sapa'cho'ña allohuenespa' o'ch e'ñe socsherra.

⁴ Ñaña allempo nequellconas añ carta ahuañapa' e'ñe nellquëñesha' nequellquënnas. Ama neñmateno neyo'chro ama't mamesha, e'ñe ñeñta nenen neyo'chro. Elloñapa' e'ñe neya'chpeñesha' nequellquënnas ñeñt carta. Napa' ama añecpaye' nequellquënnaso carta attoch nellcatas sa; añecpaña nequellquënnas attoch sapa' o'ch seño'ch atarr nanac nemorrentensa.

Arrpa' all cotape'chatanet attoch peretnet atparñañ

⁵ Ñaña añ acheñer ñeñt atpare'tetsa seshopa' ama naptayaya llecatenno na, añañ ama't sapa'cho'ña allohuenespa' chocma llecatenes. Ñehua, tarraña ama't atteñpa' ñato' o'ch notas ama allohuenacmas atet petso, te't atta atarr natontaten ñoñets ñeñt ama atteyaye po'ño'ch.

⁶ Ñaña te'pa' o'ch notas, e'ñe pocte' atto o' secoñchatue ñeñt acheñer, te'pa' allohuach. Ama't shonteseñ ñeñtes pocte' entenayeñ o'ch secoñchatererr ñeñt atparñañ, tarraña te'pa' ñeñt'ach.

⁷ Te'pa' añañ poctetsa o'ch alla sepretner, allochñapa' attoch socshater, te't atta nanac llequëna, puellquëño'tpa' o'te' alla que'chpuerran Yompor.

⁸ Ñeñto'mar te'pa' notenes añ poctetsa o'ch sorratoñ cohuen ñocop attoch eñoter po'ño'chpa' atarr semorrenteña.

⁹ Ñeñtecpaña noctape'chatas ahuaña necartot ñeñtcha' atet sepe' ñeñt atpare'tetsa attoch netpatenes o'ch neñotas ñerra'm po'ño'chte' e'ñe same'ñena ñeñt poctetsa Yomporecop, ama't erro'teno'tsensa.

¹⁰ Ñaña o'ch noterserr, ñerra'm esesha' sepretner sa, napa'cho'ña e'ñech pocte' nenteñ naña apretnare'tterrepa'ch. Ñeñt chocma natpare'tene' ahuaña te'ña ñapa' o' nepretner, ñeñt'pa' e'ñe socop. Ama't Cristopa' e'ñe entenen.

¹¹ Ñaña añ e'ñe poctetsa o'ch ye'pretnannena. Allochñapa' ama't oneñt'pa' amach alla a'psaterrye Yompor. Tarro'mar ñapa' yeñoteñ chocma e'nenan attoch shequëney.

Atto Pablopa' atarr llequënana corinto'marnesha' allempo ama huerra' Tito Corintot

¹² Te'pa' o'ch neñotaterrerserr ñeñt atet ne'pa ahuaña. Ahuaña allempo necher Troaso, napa' o'ch neserrpare'tatanetañ Cristo po'ñoñ ñeñt alloch yequeshperrapa' shonte' acheñenesha' mueneñetañ o'ch e'mñotoñet Yepartseshar po'ñoñ,

¹³ tarraña napa' ama't mamesha ama neñmateno neyoçhro tarro'mar allpa' ama nentose masheñ Tito. Ñeñto'mar ama na'po all, atta neso'tnerranet, o'ch necherr all anetso Macedonia.

Yomporpa' çhocma moñenya allempo es yehuenoya

¹⁴ Yeparasyoso'chepa'ch Yompor tarro'mar ñapa' çhocma moñenya allempo es yehuenoya. Ñaña e'ñe yeyemteñoñ Puechemer Cristo Jesús'pa' çhapaterreycha' cosheñtso. Ama't yapa' o' muenaterrey attoch ya'poterrñañ po'ñoñ errañaren, allochña'pa' attoch epa'huerra po'cohuenña erracmañen. Ñato' o'ch netma'ntacha atet ñerra'mrrate' ñeñt atarr es eñmosañtetsa, çhach epa'hua e'ñe cohuen erracmañen pueñmosañteña.

¹⁵ Tarro'mar ñeñtey a'potene' Cristo, Pomporña'pa' e'ñe atet enteney ñerra'mrrate' ñeñt eñmosañtetsa e'ñe cohuen ñocop, ñeñtcha' epa'huerrtsa erracmañen allo'tsa'yen acheñenesha' añ patsro. Patanta'tetspa' pame'ñeñoçetpa' a'queshpataretterretcha', patanta'tetsña ñeñtcha' ama ame'ñerrtsopa' ñetpa' chenca'huerretcha'.

¹⁶ Acheñenesha' ñeñtcha' chenuerrtsapa' e'ñech atet enteññañet Yompor po'ñoñ ñeñt yeserrpare'ten ñerra'mrrate' ñeñt amtsañtetsa, añña ñeñteycha' queshperrtsapa' yañapa' o' yenterrñañ Yompor po'ñoñ atet ñerra'm es ñeñt ama ahuañaño alloña yapa' corretsayach. Ñato' o'ch netma'ntacha ñerra'mrrate' ñeñt atarr eñmosañ ñeñtcha'ña ya'crraterre' errponohuañen. Esesha'huachñaca' pocte' enterrña Yompor ñeñtcha' serrpare'terre' po'ñoñ.

¹⁷ Añ pocte' enten Yompor ñeñtcha' serrpare'tene' po'ñoñ ñeñt e'ñe pueñmañeshocmañen serrpare'tene'. Atet ñerra'm ya, tarro'mar yapa' ama çhoye' yetseteno Yompor po'ñoñ acheñ poctañño ñeñt atet pena shonte' po'potantañ acheñenesha'. Ñetpa' atet penet attoch pocshateñoñ acheñenesha'pa' o'ch es apa'yenanet. Añcha'ña e'ñe yeñmañeshocmañen yeserrpare'teññañ po'ñoñ atet llesenseny Yompor. Ñapa' enteney ñeñt atet ye'ñorena ñocop e'ñe yeyemteñoñ Puechemer Cristo.

3

Atto Pablo'pa' ama pallteno o'ch quellcoñet carta attoch cohuen enteñ acheñenesha'

¹ Sapa' çhate' sotenapañ napa' o' alla neñerrerr e'ñe cohuen, ñato' nocpate', ñato' çhate' nommo'chena. Tarraña ñeñt'pa' ama atteyaye. Amapa' ñato' sapa' çhate' sotenapañ añte' nepalltena carta ñeñtcha' señoate' atto po'poñ anetso'marnesha'pa' e'ñech cohuen entapretennet atto napa' cohuen netorrena Yomporecop. Tarraña napa' ama es nepallteno. Ñehua, ñaña çhate' sotenapañ añte' nepalltena carta ñeñtcha' sequellcon sa alloch señoat'ch po'potantañ acheñ atto e'ñe cohuen sentenen na, atet pena po'psheññeçhno ñeñt serrpare'tets attoch cohuen enteñ acheñenesha' e'ñe ñañeña.

² Tarraña napa' ama nepallteno ñeñt po'poñ carta ñeñtcha' eñotate' po'potantañ acheñenesha' ñeñt atto netorrena na Yomporecoppa' ñeñtña atarr sherbets. Tarro'mar sapa' saña e'ñe sherbets atet ñerra'mrrate' necarta nepenes. Tarro'mar allempo acheñenesha' eñotenset sa atto te'pa' o' soctape'cherr cohuen Yomporecop, ñeñtcha'ña eñotatenahuet ñeñt atto netorrena na, ñeñt'pa' ñeñtña e'ñe sherbets Yomporecop. Ñato' o'ch netma'ntacha atet: Na necarta ñeñtña eñotatenahuet ñeñt'pa' all aquellcare' e'ñe neyoçhro ñeñtcha' lleyen allohuen acheñenesha' ñeñtcha'ña eñotatenahuet.

³ Ñaña sa atto te'pa' sorraten ñeñt e'ñe cohuentetsa, acheñenesha'ña'pa' o'ch eñotapretaset ñeñt'pa' po'ñoçh Cristo po'taruas pene'. Ñato' o'ch netma'ntacha atet: Sapa' atet sesherven ñerra'mrrate' yecarta ñeñtcha' eñotatenahuet, ñeñt cartapa' o' quellca'huonay Cristo e'ñe ña. Añ cartapa' ahuo't aquellca'huare'tta ahuañmo'çhoteñ allempo yapa' yeçhapatonas Yompor po'ñoñ ñeñt same'ñatate' Yompor. Tarraña añ

cartapa' ama añoye' aquellcaretto tinto, añña Yompor Puecamquëñoť anarettā, ñeñtara Yompor ñeñť ama arromñaťeshayaye. Tarraña añ cartapa' ama arreye' aquellcarete mapyettallo. Añpa' arrña aquellcareť e'ñe ya yeyoćhro ama't ñeñťey arromñaťey.

Atto Yomporpa' a'pocdaterrnay e'ñe etserra

⁴⁻⁵ Napa' neñoteñ ama nepallteno po'poñ carta ñeñťcha' eñotatenahuet. Saña ñeñťes e'ñe necarta nepenes. Ama notenso e'ñe ñañeña nohuamencoť es neřa'yen. Añña e'ñe neyemteñoť Cristo napa' netorrena Pomporecop. Ora allohuen es neřa'yen Yomporña ahuaamencat nepene'.

⁶ Ñeñtara Yompor ñeñť ahuaamencat yepene' allochñapa' attoch yeserrpare'terrñañ pocťapña ñeñť atet a'pocdaterrnay e'ñe etserra. Añpa' ama atteyaye atet řa ahuať Yompor allempo apan Moisés po'ñoñ ñeñť anarettatse't ñeñťcha' e'ñe yetsotuañ esheccha' a'quesħpateney Yompor. Ñeñť ama etsotaye'te, ñocpuetpa' o' anarettet rromuetcha', chenquërretcha'. Tarraña ñeñť atto a'pocdatuerrnay Yompor etserra, ñeñťpa' atto apueney Puecamquëñ alloch yocrra'huerra, řayoteñ errponohuañen.

⁷ Añ ñoñets ñeñť aquellcarettatsa mapyettallo, ñeñť ama etsotenaye, ñocpuetpa' o' anarettet rromuetcha', chenquërretcha'. Ñaña ahuať allempo Yomporpa' apan Moisés po'ñoñ atet, e'ñe po'cohuentenoť apan Moisés. Moiséspa' atet orrta pa'clloyoť ĉha poptena, atarr a'rrechatañ. Ama't israelnesha'pa' ama eshcaye' cohuaclle'ĉeto. Tarraña ama't atet řañpa' acořoteñ maya'huanerr ñeñť atto poptena.

⁸⁻⁹ Ama't añ coťapñatser ñeñťcha' ya'chencaterrayeñpa' tarraña Yomporpa' atarr cohuenoť orrtach allempo. Te'ña e'ñe ellonetpa' o' alla orrtaterrnayerr ña pocťapña attoch e'ñe pocte' entuerrey. Ñeñťpa' e'ñe Parets Puecamquëñoť orrtatuerrnay ñeñťo'marña ñapa' ello cohuentena nanac.

¹⁰ Ñeñť atet popta ahuať Moisés pa'clloyoť allempo ař Yompor po'ñoñ, te'ña ñeñťpa' o'huañ e'ñeye' cohuenaye' yeñĉ tarro'mar te'pa' eñall Cristo po'ñoñ ñeñť atarr cohuenyenten, ello metanenan atto cohuenta't Moisés po'ñoñ.

¹¹ Tarro'mar ñeñť atet cohuenta't Moisés ñeñťpa' acořoteñ maya'huanerr atto cohuentena. Tarraña te'pa' atto cohuentena Cristo po'ñoñ ñeñťpa' amach ahuañañaťterro, ñeñťo'marña ñeñťpa' ello metanenan Moisés po'cohuenña.

Atto Cristo po'cohuenña ñeñťpa' amach ahuañañaťterro

¹² Yapa' o' yeñoterrñañ Cristo po'cohuenña ñeñťpa' amach ahuañañaťterro. Ñeñťo'marña yapa' ama yepenquëñoťeyey' yeserrpare'teññañe po'ñoñ.

¹³ Yapa' ama atteyey' yepeno atet řa ahuať Moisés. Ñapa' ĉha huañerr atto popta pa'clloyoťpa' ahuo't ca'macclle'ĉha allochña israelnesha'pa' amach eñĉeto pa'clloyoť o' huañerr atto poptena.

¹⁴ Israelnesha'pa' ama ĉapaneto pueyoćhreto attoch coťape'ĉerret cohuen Yomporecop. Ama't teme'ttsen ñerra'm esempo lleyeññañet ñeñť a'pocdat Yompor ahuať atťaretach amach ĉapaneto pueyoćhro ñeñť atet muenen Yompor. Po'ñoĉhpa' añoťĉa'ña ĉaponaya yeyoćhro ñeñť atet muenen Yompor e'ñe yeyemteñoť Puechemer ñeñť Cristo. Israelnesha' ama cohuenaye' enteñeto Cristo ñeñťo'mar noten ñetpa' teme'ttsen atet penet ñerra'mrrate' ĉho ca'macclle'ĉenet.

¹⁵ Po'ñoĉh ama't teme'ttsen ñerra'm esempo e'mñotenet all lleyeññañet Moisés po'ñoñ amach es eñoteneto. ĉach ottenet ñerra'mrrate' ĉha es a'npuenahuet attoch amach eñotoñeto Yompor pocťapña.

¹⁶ Tarraña ama't puesheñarroťeya ñeñťey erra'tseney aĉeñrey, allempoteñ yaguër Yepartseshar Cristo, allempoteñĉa'ña ĉaponaya yeyoćhro ñeñť atet muenen Yompor; Cristopa' ñachña yehuapore'tamřse'ña ñeñť ya'npuenayeñ.

17 Ñeñt yoten Parets Puecamquëñ, ñeñtara Yepartseshar Cristo Puecamquëñ. Ñaña atarr cosheñtso'tseney ñerra'm esempo chaponaya Cristo Puecamquëñ yeyochro. O'huañcha' yemuerochtame'ta attoch puechemer perrey Yompor, e'ñech yocsheñsha' yocter Yompor.

18 Allohueney ñeñtey ame'ñenaya Yepartseshar Cristo, ña Puecamquëñpa' ñachña ya'po'poñeterre', allochñapa' allo'nach yesen cohuentapretaya Cristo. Yapa' ama atteyayye ñerra'mrrate' ñeñt a'nataclle'charef attoch amach enteññañeto Cristo po'cohuenña. Yapa' e'ñe yecueñoñ Cristo po'cohuenña, yapa'cho'ña o'ch yecohuentapreteña yaña, atet ñerra'mrrate' rerep poptetsa ñerra'm cho yecuach atrretonet.

4

Atto Pablopa' atarr cohuen yechatenanet Yompor po'ñoñ

1 Yomporpa' e'ñe puemuerenoñ muenatenen o'ch netorreññaña ñeñt nanac sherbets ñocop. Ñeñto'marña napa' ama nellquëñoñteye' neserrpare'teññañe po'ñoñ.

2 Ñeñt a'nahua es pa'yenet ñeñt apencochen yenten yocop ya ñeñtey torretsa Yomporecoppa' ñeñtña napa' o' na'ypo'ñañper. Ñaña napa' ama es neshquëñoñ nepa'yeno masheñneshacop. Ñaña napa' allempo neserrpare'tateñ acheñenesha' ama choye' na'po'poñeteññañe Yompor po'ñoñ. Añcha'ña e'ñe na'poteññañ Yompor po'ñoñ e'ñe po'ñoñch ñeñt atet oten po'ñoñ. Yomporpa' entenen ñeñt atet notenes ñeñtpa' e'ñe po'ñoñch atet. Ñaña ama't erra'tsena acheñer ñeñt eñotene' ñeñt e'ñe pocte' entenet ñet pueyoçhretopa' ñetpa'cho'ña e'ñech cohuen entapretennet.

3 Atto yeserrpare'teññañ Yompor po'ñoñ ñeñt po'ñoñch alloch yequeshperra tarraña patantarr acheñenesha'pa' amach chapaneto pueyoçhreto ñeñt alloch yequeshperra. Ñeñt atet petsapa' allo'na senet allcha' chenca'huerret.

4 Ñeñtara acheñenesha' ñeñt ama ame'ñetso, ñetpa' añña po'yomporer penet arr patsro ñeñt oneñeñ, ñeñtña ama muenatenaneto o'ch chapanet pueyoçhreto Yompor po'ñoñ; allochñapa' attotcha' amach eshcaye' cohuen enteññañeto Cristo po'cohuenña. Ñapa' attecma cohuenta ñerra'mrrate' Pompor Parets ñeñt ama entpahuoyaye. Ñeñt po'cohuenñapa' ñeñtara yoten cohuen ñoñets alloch yequeshperra. Ñato' o'ch netma'ntacha atto oneñetpa' a'nataclle'chenanet attochña amach eshcaye' cohuen enteññañeto Cristo po'puetarenña.

5 Tarro'mar ñeñtey e'ñe yeñmañeshocmañen seserrpare'tatene'pa' ñeñtpa' ama añecpaye' atet yepeno attoch senteney ya ñerra'mrrate' samo'mte' sepene. Añcha'ña yeserrpare'tatenes Jesucristo, ñachña Separtseshar sepen. Yapa' añña atarr yetorrena socop e'ñe yemorrenteñoñ Jesús.

6 Ñehua, yapa' yeñoteñ atet ot ahuat Yompor, ñeñtpa' atet ot: "Eñalletepa'ch pueta're' allochñapa' o'huañcha' checmet." Ñeñtara Yompor te'ñapa' o' a'puetarsampernay yaña yeyocher allochñapa' attoch yeñotater po'potantañ acheñenesha' atto Cristopa' ña orrtatene' Pompor po'cohuenña.

Ama't ama esoshe'mayayye e'ñe yeyemteñoñ Yomporpa' ñapa' chocmach ahuañmencat peney

7 Ñeñtpa' atto Yomporpa' ahua't chorrerriya yeyochro po'cohuenña, ama't yapa' arromñataya, ama esoshe'mayayye. Añecopña o' chorrerriya ya ama't ñeñtey ama esoshe'mayayye, allochñapa' attoch eñochet ñeñt atto atarr ahuañmencat yentenapa' ñeñtpa' ama yoyaye yehuomenc, ñeñtpa' Yomporeshoñ huena. Ñato' o'ch netma'ntacha atet ñerra'm ahuat po'poñ acheñ ñerra'm esempo atarr es morrentenetpa' o'ch esha'teñet patsrrogo ama't ñeñt coyemña' ama e'ñe cohuenayaye.

⁸ Ñehua, ama't allemãateñcha' huaponaya ñeñtcha' atarr ya'llpatate', tarraña chocmach eñall attoch yesuanemñ. Ñaña ama'tcha' atarr yellquënañ nanacpa' tarraña chocmach eñall attoch yesuanemñ allohuen ñeñt allcatañtetsa.

⁹ Ñehua, ama'tcha' cotare'teney ñeñt ye'moñe'tene' tarraña Yomporpa' amach a'ypo'ñenye ama't mamesha. Ama'tcha' o'shshe'mayet patsopa' chocmach alla yetanterra.

¹⁰ Chocmach muene' yerromañ atet pete't Jesús. Tarraña atto Jesús'pa' o' alla tanterra yapa'cho'ña attoña o' a'queshpaterrey allempe es yehuenoya. Attochña yeñotach acheñenesha' atto Jesús te'pa' o' betterra.

¹¹ Atto allponmat yocrrena añe patsro yapa' chocmach pomatatenyet yerromuepa'to'. E'ñe yemorrenteño Jesús atet penyet. Tarraña atto Jesús'pa' o' alla tanterra, yapa'cho'ña attoña a'queshpaterrey allempe es yehuenoya ama't yapa' arromñañeneshaya. Attochña yeñotach acheñenesha' atto Jesús te'pa' o' betterra.

¹² E'ñe netorreño Cristocop chocmach nanac nemueroçhetuanena autsanca' rromuets. Tarraña ñeñtpa' atarr cohuen socop tarro'mar ñeñtpa' alloch e'ñe sequespa'huerra samña.

¹³ Añmapa' ñeñt atet oten Yompor po'ñoñ ñeñt atet anuaret ahuañoteñ ñeñtpa' atet oten ñeñt quellquë' libro Salmos, "Napa' atarr neyemteña Yompor ñeñto'mar atet ne'ñorena ñocop." Yapa'cho'ña e'ñe attecma yoctape'chen yaña. E'ñe attecma yeyemteña Yompor, ñeñto'mar yapa'cho'ña attecma ye'ñorena yaña.

¹⁴ Yapa' yeñoteñ Yomporpa' ahuo't tantaterran Puechemer ñeñfara Yepartseshar Jesús. Ñeñto'mar yeñoteñ yapa'cho'ña tantatuerreycha' Yompor e'ñe atet pan Puechemer Jesús, allochñapa' ama't sapa' o'ch chapatuerres allohuenes e'ñe parro ñesho.

¹⁵ Ñeñto'marña napa' Yomporña nemnate' o'ch nemueroçhtame'ta; ñeñtpa' e'ñe socop, allochñapa' atto'tcha' Yompor puemuereña chapcha' shonte' acheñeneshesho, allochñapa' shonte'ch acheñenesha' allo'nach senet parasyoso'tnomuet Yompor, attochña e'ñe cohuen ya'ye'choçhtateññañ Yompor.

¹⁶ Ñeñto'marña napa' ama nellquëñoteye' netorreññañoña Yompor po'taruas. Ama't nechetspa' allo'na sen huañuanmats atto noumencna'ntena, tarraña necamquëñña'pa' allo'na sen huomencatnomuets e'ñe pate'tets yet.

¹⁷ Tarro'mar ñeñt atto allpon yemueroçhtame'tyena añe patsro, ñeñtpa' ama esoyaye, e'ñe mamecpa. Ñeñtpa' añecpaña huennaya allochñapa' attoch huapatuerrnay ñeñt atarr nanac cosheñets ñeñt ama ahuañaño ama't errponaña, ñeñt ello nanac atarr coçhnesha'tetsa, ñeñt atarr nanac cohuen.

¹⁸ Tarro'mar yapa' ama añeye' yeyemteno ñeñt allpon coçhnesha' yentyen arr patsro, tarro'mar añeçhno ñeñt allpon yentyenpa' huañerrcha'. Yapa' añña yeyemtena añeçhno ñeñt cohuentetsa Yomporcop ñeñtpa' ama entpahuoyaye ñaña ñeñtpa' amach huañerro ama't errponaña.

5

Atto Yomporpa' o' añño'terrnay ñeñtcha' yepaquëll yeperr all pue'ntaño

¹ Yapa' yeñoteñ ñeñtey arromñañey, yechetspa' chocmach huañerr. E'ñe mamecpa sherbeney añe patsro, atet ñerra'mrrate' yequërpachet ñeñt pocollashe'm all yem-anatena. Ñeñt pocollashe'mpa' mamecpach sherba'y. Yechetspa'cho'ña mamecpa sherbeney atto yocrrena añe patsro ñeñt yepacllashe'm yepen. Tarraña yapa' o' yeñoter ñerra'm esempoch yerroma, Yomporpa' o' añño'terrnay ñeñtcha' yepaquëll yeperr all pue'ntaño allcha' yeycha'huerra, ñeñtpa' amach ahuañañaterror. Ñeñtcha' yepaquëll yeperr allpa' ama arromñañeshaye' yeçcatenaye, Yomporña yeçcatene'.

² Po'ñoçh arr patsro yechets ñeñt' yepaquëll yepenpa' çhocmach es e'mnatatuene'. Ñeñto'marña yapa' atarr yemneñ o'ch yechorrerra ñeñt'cha' yepaquëll yeperr Yompor pue'ntañ.

³ Tarro'mar yemneñ yecamquëñpa' o'ch chorrerrana ñeñt'cha' pa'shtam perr Yompor pue'ntañ, allochñapa' yecamquëñpa' amach atta huocchapoterro çhocmach eñall ñeñt'cha' chorrena.

⁴ Tarraña atet ñerra'm te' orameñ yechets ñeñt' yepaquëll yepen atto yocrrena arr patsro, çhocmach eñall ñeñt'cha' e'mnatatuene'. Ñeñto'marña yapa' atarr yemneñ ama't ama yerromuena', yechetspa' o'ch a'po'poñeterrnay Yompor tayoteñ ama't esempo huerra, ñeñt'cha'ña pa'shtam perr yecamquëñ. Allochñapa' attoch yocrerra etserra cor-reñets ñeñt' amach ahuañaña'terro, ñeñt'cha'ña a'huañaterre'ña ñeñt' atto ya'rromña'te't. Ñato' o'ch netma'ntacha atet ñerra'mrrate' o'ch yechorra shetamuets ñeñt' e'ñe etserra emarr ñeñt'cha' yena' enot' o'ch yepmata. Allochñapa' ñeñt'cha' yena' enot', ñeñt'cha'ña a'natue'ña mellashañ ñeñt' yechorre't ahuaño'teñ. Allochñapa' attoch eñall ñeñt'cha' yechorratenaya.

⁵ Ñeñt' yemnatene' e'ñe atet ñeñt'pa' Yompor ña atet ye'patene', tarro'mar ñapa' chorrenya Puecamquëñ ñeñt'ña yeñotatene' orameñ eñall cohuenñats ñeñt' o'patatenya ñeñt'cha' aphuerrey Yompor.

⁶ Ñeñto'marña e'ñe yeyemteño't Yompor çhocmach yecueñ ñeñt'cha' atet perrnay esempo. Yeñoteñ yechets yepaquëll yepenmeñ arr patsro alla'paro'tsenmeñey attoch yey'cha'huerra Yepartsesharesho.

⁷ E'ñe yeyemteño't Yomporpa' allo'nach yesen eñotnomue' ñeñt'cha' atet perrnay ña, ama añeye' es yeñotatenaye ñeñt' yentyen arr patsro.

⁸ E'ñe yeyemteño't Yompor çhocmach yecuen ñeñt'cha' atet perrnay ña. Ñaña yapa' añ atarr cohuen yenten o'ch huañ atto yocrrena arr patsro, o'ch yesa'nom yechets ñeñt' yepaquëll yepen arr attoch ye'chap allcha' yocrra'huerra Yepartsesharesho.

⁹ Yapa' ñeñt'ach paterr yema'yochrena çhocmuepa'chña yocshateñ Yepartseshar, ama't allempo orameñ yocrrena e'ñe yechtso arr patsro, ñaña ama't allempoch yerrroma o'ch yesa'nom yechets e'ñepa'ch Yepartsesharesho'tseney attoch yocshateñ e'ñe all pue'ntañ.

¹⁰ Tarro'mar o' anare'tta allohuenacpay yehuapuepa'to' Cristesho allcha' eñotatare'tey e'ñe puesheña'ttsoy. Allochñapa' allcha'ña atet pa'yese'y errot'encha' entapretuerrey, ñato' e'ñech cohuen entapretuerrey atto e'ñe cohuen es ye'pa'yen e'ñe yechtso't allempo yocrrena arr patsro, ñato' amach cohuenaye' entapretuerrye.

Atto Pablopa' e'ñe pueñmañesha' e'ñe cohuen es orrtatyen

¹¹ Ñeñt'pa' ama't atarr yoro'chen yenteñeñña Yompor, tarraña nocoppa' ama yoro'chenayaye tarro'mar Yomporpa' entenen e'ñe cohuen ñeñt' atet nepena. Te'pa' añña paltetsa o'ch noctape'chater allohuen acheñenesha' attoch ñetpa'cho'ña e'ñech cohuen entapretennet. Ama't sapa'cho'ña te'pa' necuenes, nemneñ o'ch seño'ter saña e'ñe seyo'chro atto e'ñe neñmañesha' cohuen es ne'pa'yen.

¹² Ñeñt' atet notenes te'pa' ñeñt'pa' ama añecpayaye o'ch alla neñerrerr cohuen ñeñt' e'ñe nocpa. Añecopña o' alla neñerrerr atet allochñapa' o'ch alla socshapre'terna, allochñapa' attoch seño'ch ote' ñeñt' e'ñe ñañeña cohuen entetsa e'ñe pocta'pño'mara. Ama añeye' eñoteno pueyo'chro ñeñt' cohuentetsa Yomporecop.

¹³ Ñehua, sapa' çhate' soteney napa' cho' muene' nemospuena. Ñerra'm po'ñoçh cha nemospuenapa' ñeñt'pa' e'ñe pocte' Yomporecop. Ñaña ñerra'm ama çhoye' nemospueno atto e'ñe cohuenare' es noctape'chen ñeñt'pa'cho'ña e'ñe pocte' allo nesherbene'sa.

14-15 Ñaña atto Cristopa' atarr morrentenya ñeñña ama yemnatenaye o'ch allo'na yesen corratsa e'ñe yocpa. Ñaña atto te'pa' yeñoteñ Cristo ahuo't rroma allohuenacpay, allochñapa' atto yocrrena yapa' o'huañcha' yocrra e'ñe yocpa. Ñeñtpa' ñeñtara yoten o' yerromaprecha Cristo, allohueney ñeñtey ame'ñenaya. Añcha'ña atet yocrrena e'ñe ñocop, ñeñt rromats yocop, elloñapa' alla tanterra yocop.

16 Ñeñto'marña napa' ama't puesheñarrapa' o'huañcha' cohuen nenteñ ñeñt e'ñe cohuen enten po'potantañ acheñenesha' arr patsro e'ñe ñet poctapño'maret, ñeñtpa' arromñaña poctapña. Tarraña ama't na ahuatpa' cohuen nentapretanete't poctapña. Ñeñto'marña napa'cho'ña tsena'tatnete't Cristo allempo, tarraña te'pa' o'huañ atet neñch Cristo.

17 Ñeñto'marña ñeñtey o' yeyemtera Cristo, Yomporpa' o' etserrataterrnay yocapña e'ñe poctacma. Ñeñt atet yocape'che't ahuañ, ñeñtpa' o' huañerr, te'ñapa' o' e'ñe yocape'cherr ñeñt e'ñe cohuenare' etserra.

18 Ñeñña o' atet perrnay Yompor ñeñt muenatan Puechemer Cristo, ñachña yamo'tstaterre' Pomporesho. Ñeñtara Yompor ama't napa' ahuo't llesensa'n attoch neñotach acheñenesha' allochñapa' ñetpa'cho'ña o'ch amo'tsterranet ñamet Yompor.

19 Ñaña atto Yomporpa' muenatan Puechemer Cristo allempopa' ñachña allo'na sets yamo'tstataya allohueney acheñeneshay Pomporesho. Allochñapa' o'huañcha' allo'na ochñañenesha' enteney Yompor. Attoña yapa' apuerrey llesens ellonet attoch yach eñotatyese' pa'namen acheñenesha' allochñapa' ñetpa'cho'ña attoch e'ñe amo'tsterranet Yompor.

20 Ñeñto'marña yapa' allsensaretey ñeñtcha' yetaruas yeperr ñeñteycha' eñosets cohuen Cristocop attoch yame'ñacha allohuen acheñenesha'. Ñeñtpa' atto Yomporpa' o' huañerres o'ch same'ñera, tarraña ñeñtpa' e'ñe ya yeserrpare'tateñoñes o' huañerres Yompor. Ñeñto'mar te'pa' o'ch notas Cristocop, ñach same'ñerra allochñapa' attoch e'ñe amo'tsterrsa Yompor e'ñe poctacma.

21 Añ ñeñtara Cristo ñapa' ama't parrochapa' ama ñano ñeñt ama pocteye' enteno Pompor Parets, tarraña Pomporñapa' ahuo't muenateñ o'ch atet apareña ñerra'mrrate' acheñ ñeñt atarr ochñañ. Tarraña ñeñt atto apareñtapa' ñeñtpa' e'ñe yocop. Allochñapa' e'ñe yeyemteñoñ Puechemer Cristo, Pomporña yapuerre' alloch e'ñe pocte' enterrey.

6

Ñeñt torretsa Yomporecoppa' añ poctetsa ñocop chocmach orrtatenan ñeñt e'ñe pocte' enten Yompor

1 Te'pa' atto yetorraprecha Yompor, napa' o'ch notas, amach e'ñe orrena sagapatstoñe Yompor puemuereña.

2 Ñehua, ñeñtpa' atet oteney Yompor po'ñon ñeñt anuaret ahuatoteñ, ñeñtpa' Yompor atet otets:

Allempo sechore'tenen napa' e'ñe ne'mñotenes ñeñt atet sotenen, tarro'mar allempopa' o' chap ñeñt poctetsa o'ch saguërren. Nañapa' o'ch naguërres samña. Attoña napa' ahuo't neyenpas tarro'mar allempopa' o' chap ñeñt poctetsa attoch na'queshpaterres.

Ñeñto'marña na te'pa' o'ch notas, o' e'ñe chap allempo ñeñt poctetsa o'ch saguër Yompor, tarro'mar te'pa' o' chap allempoch a'queshpaterrey.

3 Ñehua, yapa' yeñoteñ ñeñtey ame'ñetsa ñerra'm o'ch yeña'yen ñeñt ama pocteyaye Yomporecop ñeñña ama ame'ñetsopa' chach ya'npare'teñ attoch ame'ñerret ñamet. Ñeñto'marña yapa' ama yemno ama't mamesha o'ch ya'npare'ch ama't puesheñarra

allochñapa' attoch ame'ñeret ñamet Yompor. Ñaña ya atto yetorrena Yomporecoppa' ama yemno o'ch atet entapretyet ñeñt ama cohuenayaye. Allochñapa' amach achmare'teññañeto Yompor po'taruas e'ñe ya atet yepatse'tyeñoť.

⁴ Yapa' añña yemnen ama't erroteno'tsenya chocmach yemneñ o'ch yeñotach acheñenesha' po'ñočh e'ñe cohuen yetorrena Yomporecop ñeñt atet poctetsa yocop ñeñtey torretsa Yomporecop. Ñeñtpa' añečno ñeñtcha'ña eñotaterrahuet: allpon es yehuapoyapa' chocmach ya'huanteñ e'ñe cohuen, ama't allpon atto yemuerochtame'tyena, ama't allpon ñeñt yepallta'yena, chocmach ya'huanteñ allohuen. Ama't ora allohuen ñeñt allpon ñeñt allcatañtetsa, tarraña ñeñtpa' chocmach ya'huanteñ.

⁵ Ñaña atto ashta'yenyet, atto yottampenyet, atto ama'toçhtana'tenyet pa'tsrre'mueñoťet, atto atarr nanac yetaruasen, atto yarepen torratta Yomporecop, atto yemuerochtana yachporrñoť, ñeñtña eñotatene'ña allohuen acheñenesha' atto yapa' e'ñe cohuen yetorrena Yomporecop.

⁶ Ñaña atto yeñmañesha' yocrrena, ama sosya'tsañeye' yoctape'chyeno, ñaña atto yeñoten ñeñt e'ñe po'ñočh Yompor po'ñoñ ñeñt ama shequẽntsoyaye, ñaña atto es ya'huanta'yen, amachña čha atsrre'matenye, ñaña attochña e'ñe ya'muerañtana, ñaña atto chorrenya Parets Puecamquẽñ, ñaña atto e'ñe cohuen yemorrenteña allohuen masheñneshačno, ñeñtpa'cho'ña ñeñtña eñotatene'ña acheñenesha' atto yapa' e'ñe cohuen yetorrena Yomporecop.

⁷ Ñaña atto yeñorena ñeñtpa' e'ñe po'ñočh atet. Yomporña po'huamenc ñeñt ahua-mencat yepene'. Ñaña ñeñt e'ñe pocte' enten Yompor, ñeñtpa' ñeñtña allo chocma es yepa'yen, alloña yeçllarena Yomporecop, ñeñtpa' alloña yemoñeññaña Yompor poctapña.

⁸ Erroteno e'ñech cohuen entapretyet, tarraña errotenoñapa' amach cohue-naye' entapretyeto; erroteno e'ñech cohuen eñosyenet yocop, errotenoñapa' čhach sasare'tenyet. Errotenopa' attach entenyet ñerra'mrrate' atta yeshquẽn, ama't amach čhoye' yeshquẽno.

⁹ Errotenopa' e'ñech cohuen emchorrenyet, errotenoñapa' amach acua'psenaye' entenyeto. Errotenopa' autsaycha' rromuets, tarraña chocmach allo'na yesen huomçhetsa. Erroteno ama'tcha' a'coñchatareťey, yañapa' corretsayach.

¹⁰ Ñaña erroteno ama'tcha' yellquẽnañpa' tarraña chocmach alla yocsherra. Ñaña ama't e'ñe huocchañeypa' shonte'ch coçhnesha' cotapñats yapa'yes po'potantañ. Ama't ama es yechenñe arr patsro, tarraña shonte' esocmañen es yechen Yomporeshot.

Atto Pablopa' e'ñe pueyoçhrocmañen morrentenana allohuen ñeñt ame'ñenaya Yompor

¹¹ Te'pa' masheñneshacha' corinto'marnesha o' neñotatuas ora allpon ñeñt atet noctape'chen neyoçhro. E'ñe neyoçhrocmañen nemorrentensa.

¹² Nocoppa' ama palltenmeñe ama't mamesha attoch nemorrenterra e'ñe poctacma. Añña sapa' chocmate' sepalltena attoch semorrenterra ñaña.

¹³ Napa' e'ñe nechemesha' nepenes. Ñeñto'marña o'ch nenamas, o'ch notas, atto napa' e'ñe neyoçhrocmañen nemorrentensa sa, sapa'cho'ña añ poctetsa e'ñe seyoçhrocmañenpa' o'ch semorrenterra ñaña.

Atto ama ayemuetpahuo ñeñt ama ame'ñetso

¹⁴ Te'pa' o'ch noterrser po'poñ, amach e'ñe seyemtatsche ñeñt ama ame'ñetso, tarro'mar amach patrraye' soctape'chueno. Acheñ ñeñt e'ñe pocte' es pa'yetspa' amate' errotenoť yemtanoña acheñ ñeñt ama cohuenaye' es pa'yetso, tarro'mar ama attecmaýe' es pa'yeneto. Nato' o'ch netma'ntacha atet ñerra'mrrate' checmete'pa' amate' errotenoť alla epteto parro epuet puetare'.

15 Ñeñt atet pena Cristo ñaña oneñeñ amate' errotentoh cohuen amo'tstanna'teto. Attecma ñaña ñeñt ame'ñetsapa' amach patrraye' cotape'chueneto epuet ñeñt ama ame'ñetso.

Atto yapa' pa'paquëll peney Yompor

16 Ñaña ñeñt pa'paquëll pen Yomporpa' ama atteyaye ñerra'mrrate' ñeñt ayeçhcataret ñeñt po'yomporer pa'yen po'potantañ acheñenesha' arr patsro. Tarro'mar ama't yapa' allohueney ñeñtey ame'ñenaya, yañapa' pa'paquëll peney Yompor ñeñt ama arromñañeshayaye. Añpa' ñeñt atet oten Yompor:

Napa' chocmach neyçhena e'ñe ñesheto parro allcha' nechopeñe'chen. Napa' Po'yomporer pennet, ñetpa'cho'ña e'ñe neyochrenesha' nepenanet.

17 Ñeñto'marña Yomporpa' oteney:

Añ poctetsa o'ch sesuanemñ ñeñt ama ame'ñetso, allochñapa' o'ch sellopa'tetstatua socta'ña. Amach seyçhapretatsto sosya'tsañ ñeñt orrtatyenet. Allochñapa' attochña napa' o'ch naguërres e'ñe nocsheñesha'.

18 Allochña sapa' attochña e'ñe Sompor seperren na, napa'cho'ña o'ch nechemereshas ne'pohuerres ama't ñaña allohuen nesñeneshohuen. Ñeñtpa' atet ot Yompor ñeñt nanac partsotets.

7

1 Ñehua, e'ñe nemorrenteñotes, masheñeshacha' ñaña noçhaneshacha' o' notuas atet oteney Yompor ñeñtcha' atet perrnay. Ñeñto'marña te'pa' añ poctetsa yocop yapa' o'ch yesuanem ora allohuen ñeñt chocma a'sosyatene' yechets ñaña ñeñt chocma a'sosyatene' ama't yecamquëñ. Añña e'ñe yem'cha'na'teñoñ Yomporpa' añcha'ña yema'yochrena ñeñt pocte' enten ña.

Atto Pablopa' o' alla atarr coshater corinto'marnesha' tarro'mar o' cotape'cherret cohuen e'ñe etserra

2 Napa' atarr nemneñ, masheñeshacha' o'ch alla semorrenterna e'ñe seyochrocmañen. Napa' ama't puesheñarrotesapa' ama cho errot ne'paso, ñaña ama't puesheñarrotesa ama a'neye' neyçhataso ñeñt ama cohuenayaye, ñaña ama't puesheñarrotesapa' ama çoye' neshcare'taso ama't e'ñe mamesha.

3 Ñeñtpa' ama añcepaye' notenso o'ch neyohuare'tasa. Añecopña o' alla noterrser e'ñe nemorrenteñotes ñeñt atet o' notuanmas. Po'ñoçhpa' atarr nemorrentensa e'ñe neyochrocmañen. Ñeñto'marña napa' e'ñe pocte' nenteñ e'ñech parrocmayocrena ama't ñaña e'ñech parrocmayerroma.

4 Napa' neñotenes sapa' chocmach sepa'yen ñeñt cohuentetsa Yomporcop. Ñeñto'marña napa' atarr nocshapretensa. Ama't nellquëñañ nemueroçhteño'tpa' elloña o' alla nanac socshaterren.

5 Ama't allempo necherr Macedoniopa' chocma atarr nellca'huerrerr alla. Allpa'cho'ña chocma es nehuapoya pa'namen ñeñtña ama't mameshapa' ama eshcaye' neñmatataye neyochro attoch e'ñe cohuen nellap'sos muechet.

6 Atteñapa' o' çherr masheñ Tito. Atto çherr masheñ Titopa' allempoña Yomporpa' alla coshaterren neyochro, ñeñtara Yompor ñeñt chocma yocshatene' allempo es yellcatene'.

7 Ama e'ñe añña nocshataye atto çherr Tito, añña atarr nocshatene' ñeñt atto e'ñe cohuen entapretensa', ñapa'cho'ña atarr socshater. Ñehua, ñapa' eñotatuerren atto sapa' atarr o' seyerpuenna, ñaña o' eñotatuerren atto sellquëñoñ sapa' o' alla same'ñerra e'ñe cohuen, ñaña o' eñotatuerren atto o' alla sellcapreterna ñeñt atto sellcatenen na. Ñeñt allpon serrpare'tatuerren, napa' ñeñtña ello atarr nanac nocshaterre'.

⁸ Carta ñeñt nequellconas ahuaña, ñeñtpa' cha llecatas. Ñeñto'marña allempo napa'cho'ña cha muene' llecatna naña tarro'mar o' nemñonas atet carta. Ama't te'pa' neñoteñ añ necarta cha llecatenes tarraña ñeñtpa' e'ñe mamecpa, ñeñt e'ñe pocte' nenteñ.

⁹ Attoña te' napa' e'ñe cohuen nocshena. Ñeñtpa' ama añecpaye' nocsheno atto sapa' nellcatas. Te' napa' añecopña nocshena atto sapa' e'ñe sellquëño't o' alla same'ñerra e'ñe cohuen. Tarraña atto sellquëna sapa' ñeñtpa' atet senteñ ñerra'm Yompor sellcatene' ñeñtcha'ña same'ñaterraya e'ñe cohuen ñocop. Ñeñto'marña ñeñt atet neponas, ñeñtpa' e'ñe cohuen socop, ñeñt allopa' ama choye' erroten nepenso ñeñt ama pocteyaye ama't mamesha.

¹⁰ Tarro'mar ñerra'm esempo atet yenteñ Yomporña atet yellcatene' ñeñtpa' e'ñech pocte' yenteñ tarro'mar ñeñtpa' alloch yoctape'cherr cohuen ñocop, allochñapa' attochña yequeshperra. Tarraña atto yellquëna arr patsro, ama Yomporcpaye' yellquëno ñeñtpa' ñeñtña allo'na aneñy rromueñtso, allcha' yechenquërra poctacma.

¹¹ Sa sellquëñapa' e'ñe atet senteñ ñerra'm Yompor e'ñe sellcatene'. Ñeñto'marña allempoteñ yoroçhen senten sa so'chñar ñeñto'marña sapa' semneñ o'ch alla cohuen nentapreterres. Ñaña ñeñtpa' apencoçhen senteñ ñeñt atarr atparñañ. Ñeñto'marña semchaño'tpa' atarr semneñ o'ch alla senterren, attoch e'ñe cohuen na'poctatonas. Ñaña allempoteñña e'ñe pocte' senteñ o'ch secoñchach ñeñt atparñañtetsa. Ñeñto'marña te'pa' atet o' sephuerra ñeñt e'ñe pocte' nenten, allochñapa' amach allo'na sa'yohuare'tteno.

¹² Ñaña o'ch notas, ahuaña allempo nequellquërrnaserr añ necartapa' ama atparñañecpaye' nequellquërrnaserro ñaña ama nocpaye' nequellquërrnaserro ñeñten atarr atpare'tenet. Añecpa'ñaña nequellquërrnaserr carta allochñapa' attoch çhaponasa seyoçhro po'ñoçh sapa' atarr semorrentenna. Ama't Yomporpa' eñotenes.

¹³ Ñeñto'marña attoña o' alla atarr socshaterrey.

Elloña napa' añ atarr nocshaterre' atto nenter masheñ Tito atto ña ahuo't alla atarr socshater, e'ñe pueyoçhrocmañen o' atarr cosherra.

¹⁴ Ñehua, ahuaña allempoch ahuo' masheñ Tito sesho, napa' atet noch sapa' atarr rcha' cohuen same'ñya. Allempoña çhap seshopa' e'ñe atet same'ñya ñeñt atet noch. Ñeñto'marña napa' ama't mameshapa' amach erroteno't sepencatno, ama atta nommo'chenso. E'ñe po'ñoçh atet sephuena ñeñt atet noch Tito. Ñaña ñeñt ora allpon atet notas, ñeñtpa' e'ñe po'ñoçh atet.

¹⁵ Ñaña e'ñe semcha'na'teño'tpa' ahuo't sagañ Tito e'ñe cohuen. Ñaña ñeñt ora allpon cotape'chatas Tito sapa' ahuo't e'ñe cohuen ame'ñaterrsa. Ñeñto'marña te' Titopa' e'ñe pueyerpueño'tes, ñapa' atarr morrentensa nanac.

¹⁶ Ñeñto'marña napa' atarr nocshena tarro'mar neñotenes sapa' o' same'ña'huerra e'ñe cohuen.

8

Atto macedonio'marnesha'pa' e'ñe pocsheñeshocmañen es apa'yenet Yomporcop

¹ Ñehua, te' masheñeshacha' ñaña noçhaneshacha' o'ch neñotaterrserre atto Yomporpa' orrtaterranet puemuereña allohuenacop ñeñt pame'ñeño'tet çhocma apçha'yenet all anetso Macedonio'mar.

² Ñehua, macedonio'marnesha'pa' ama't shonte' pa'namen huenanet ñeñt atarr topatenahuet, tarraña ñetpa' çhocma atarr coshenet. Ñaña ama't atarr huocchañetyenet, tarraña ñetpa' çhocma apa'yeñet po'potantañ ñeñt atarr es nanac palltetsa. Apa'yeñet e'ñe pocsheñeshocmañen atet ñerra'mrate' ñetpa' shonte' esocmañen echenet po'checom.

³ Napa' neñotenanet ñetpa' ahuo't pomyenet ñeñt' allpon muena'yenet ñet puesheña'ttset. Ama't ñocpuetpa' palltenetañ tarraña ellonetñapa' o' alla apa'yereterr po'psheñeñ po'pocheño, ama't ñocpuetpa' palltenetañ. Ñet e'ñe puemnenñoñet atet penet.

⁴ Ñetpa' chocma a'p'to'tennet pocte'te' o'ch notanet attoch yenpuet ñamet ñeñt' masheñneshachno huocchañneshachno.

⁵ Napa' e'ñe allpona notanet ñetña ellonetpa' atarr shonte' pomyeset, tarraña ama't allempo ama pomueneta' po'çllayor Yomporecop, ñetñapa' ñanmacmuet o' e'ñe pomhuerret Yomporecop, allotpa' ñaña yocop ñeñt' atet muenateney Yomporecop allohueny.

⁶ Atet nenteñ macedonio'marnesha' atarr es pomuenet Yomporecop, ñeñto'marña te'pa' o' alla notererr masheñ Tito o'ch alla ahuererr sesho, allochñapa' attoch allo'nach señoñten e'ñe cohuen pomuene' Yomporecop, ñeñt' allpon yechatensa' ahuaña Tito.

⁷ Ñaña sapa' atarr setsoteññañ allohuen ñeñt' cohuen enten Yomporecop. Ñanempa' atarr seyemteña Yomporecop, ñaña atarr cohuen seserrpare'teññañ po'ñoñ, pa'namen esocmañen es señoñten, ñaña e'ñe socsheñesha' es seña'yen Yomporecop, ñaña e'ñe cohuen semorrentenya. Ñaña e'ñe setsotuen ñeñt' atet cohuentetsa Yomporecop. Ñeñto'marña te'pa' aña sepalltena paterr attoch o'ch setsota eñote' apa'yese' po'potantañ ñeñt' es pallta'yetsa.

⁸ Napa' ama neyechare'teñoñeye' notenso atet, añña nemnen o'ch neñotatas ñeñt' atet pena po'potantañ ñeñt' e'ñe pocsheñeshocmañen es apa'yeneñt' ñeñt' es pallta'yetsa. Allochña ñerra'm ñeñt' señoñ, napa' neñotenes atetcha' señoñhuerra samña. Attoña neñotenes e'ñe po'ñoñ semueranna'tuena allohuenes.

⁹ Ñehua, sapa' o' señoñter ñeñt' atet pa' Yepartseshar Jesucristo. Ñapa' atarr amuerañtosa, ñapa' esocmañen echeneñ Pomporesho, tarraña e'ñe puemorreneteñoñey ya, ñaña'ña' atta huocchañetos. Allochña e'ñe puehuocchañeteñoñ yocop, yañapa' shonte'ch esocmañen yecherr Yomporecop.

¹⁰⁻¹² Ñehua, sa ahuaña charopa' atarr semneñ o'ch es sapa'yeni acheñenesha' ñeñt' es pallta'yetsa. E'ñe socsheñesha' sapa' ahuo't samotech es apa'yese' po'potantañ. Ñeñto'marña te'pa' añ e'ñe pocte' nenteñ socop. Te'pa' allo'nach sesen socsheñeshocmañen es apa'yehuet, e'ñe allpon semna'yen puesheña'ttsos, e'ñech allpon sapa'yesanet. Tarro'mar ñerra'm e'ñe yemneññoñ es yap Yomporecop, ñapa' e'ñech pocte' enteñ ama't e'ñe errpona yemneñ o'ch yap. Tarro'mar ñapa' amach enamyen aton ñerra'm ama yecheñe. Allochñapa' o'ch senue e'ñe poctacma. Attoñcha'ña setsotua allohuen ñeñt' atet poctetsa Yomporecop.

¹³ Napa' ama notenso tarrecopcha' es sapa'yen allochñapa' o'ch atta atarr es sepalltena sa.

¹⁴ Añecopña notenes o'ch sattecmatua. Atet ñerra'm te'pa' shonte' sechen, socoppa' añ poctetsa o'ch sapa'yeni ñeñt' es pallta'yetsa te'. Allochñapa' ñerra'm esempo es sepalltena samapa' añ poctetsa o'ch apuerret ñamet, allochñapa' attochña e'ñech sattecmaten.

¹⁵ Ñeñt'pa' atet oteney Yomporecop po'ñoñ ñeñt' atet anuaret ahuatoteñ, ñeñt'pa' atet oten: "Ñeñt' echene' shonte'pa' amach es a'pchateno. Ama't ñaña ñeñt' echene' coñe'tpa' amach es pallteno."

Atto Titopa' alla ahuererr po'pocheño Corinto

¹⁶ Napa' chocma neparasyoso'teñ Yomporecop tarro'mar añ nenan masheñ Tito pueyoñchro atto ñapa'cho'ña chocma llecapretensa atet ñerra'm na.

¹⁷ Ñeñto'marña allempo noteñ o'ch ahuererr sesho, ñapa' e'ñe pocte' enteñ. Elloña ñapa' e'ñe puemneññoñ atarr sechena o'ch alla ahuererr o'ch abcherrsa'.

18 Ñaña yapa' o'ch yemñererr masheñ Tito epuet ñaña po'psheñ masheñ. Ñehua, añ masheñerpa' allohuen ñeñt' apcha'yetsa pame'ñeñotetpa' atarr cohuen enteñet atto serrpare'tatenanet añ cohuen ñoñets ñeñt' alloch yequeshperra.

19 Elloña ñeñt' masheñerpa' allohuen ñeñt' apcha'yetsa pame'ñeñotetpa' o' net o'ch yechopeñe'ch parro attoch ñach yeyenpuene' ñeñt' atto yetorrena o'ch yeyenpueñ po'potantañ. Ñeñt'pa' añecop sherben attoch aye'chochtateññañet Yompor, ñaña añecop sherben attoch eñoteñet e'ñech yocsheñesha' yemneñ o'ch yeyenpannena e'ñe cohuen.

20 Ñeñto'marña o' net ñaña po'psheñ masheñ allochñapa' atto yapchaten quellepa' amach cha sasare'tenyeto quellayo'mara.

21 Tarro'mar yapa' añña yema'yochrena o'ch yorrtat ñeñt' e'ñe cohuen enten Yompor, ama't ñaña ñeñt' cohuen enten acheñenesha'.

22 Ñehua, te'pa' o'ch yemñonas po'poñ masheñ ñeñt'cha' tatsa, ma'psheña. Ñeñt' po'psheñ masheñpa' napa' neñoteñ ñapa' e'ñe pocsheñeshocmañen atarr cohuen es ma'yochra'yena ñeñt' cohuentetsa Yomporecop. Ñaña ama't te' atto e'mare'tenes sa e'ño' cohuen same'ñeña Yompor, elloña te' ñapa' atarr mueneñ o'ch allo'na sen torra'nmatza e'ñe cohuen Yomporecop.

23 Ñaña ñerra'm esesha' sa'p'to'tene' o'ch otaset, "¿ama't se'mare'teñe masheñ Tito, erro'tsente'?" sañapa' o'ch soch "ñapa' añ epuet torrena masheñ Pablo taruasats Yomporecop attoña e'ñe sherbeney yaña." Amapa' ñerra'm a'p'to'taset ñaña añ po'psheñ masheñecop, sañapa' o'ch señotatanet ñetpa' arroñ amñareñtenet all apchena allohuen masheñnesha'chno ñeñt' ame'ñetsa all Macedonio. Ñetpa' e'ñe cohuen orrtatenet Cristo po'cohuenña.

24 Ñeñto'marña te'pa' o'ch notas e'ñech cohuen sagañ añ masheñnesha', allochña ñetpa' esheccha' eñotaset sapa' po'ño'ch atarr semuerenanet, attochña eñotas ñaña allohuen masheñnesha' ñeñt' pame'ñeñotet apcha'yetsa alloñ amñareñtenet. Allochñapa' o'ch eñotaset po'ño'ch e'ñe cohuen same'ñena ñeñt' atet notenanet socop.

9

Yomporpa' añ atarr morrentena ñeñt' e'ñe pocsheñeshocmañen es apa'yets ñecop

1 Ñaña ñeñt'cha' sapchen alloch seyempue' masheñnesha' ñeñt' atarr es pallta'yetsa Jerusaléno, napa' neñotenes ama sepallteno o'ch alla noctape'chaterriserr necartot ñeñt'cha' atet sepa.

2 Tarro'mar napa' neñotenes ñeñt'pa' atet atarr semnen sa. Ñeñto'marña arr Macedonio chocma noteñ macedonio'marnesha' sapa' chocma semneñ o'ch es sapa'yes añecop ñeñt' atarr es pallta'yetsa. Ñeñto'marña napa' e'ñe nocsheñeshocmañen neñotateñ macedonio'marnesha' ñeñt' atet sepena sa ñeñtes acayo'marneshas ñeñtarasa corinto'marneshas. Ñehua, napa' o' neñotatanet atto ahuaña charo sapa' semneñeñ o'ch e'ñe sa'pocstat attoch es sapa'yes ñeñt' atarr es pallta'yetsa. Atto sapa' atarr semneñ o'ch seyempue' ñeñt' atarr es pallta'yetsa, ñeñto'marña all Macedonio'tpa'cho'ña te'pa' eñall shonte' ñeñt' muenets o'ch es apa'yenet ñamet.

3 Tarraña ama't napa' neñotenes atarr semneñeñ o'ch seyempue' ñeñt' atarr es pallta'yetsa, ñeñto'marña napa' o'ch nemñonas añ masheñnesha' ñeñt'cha' otatsa. Ñetpa' o'ch yenposset attoch sapcha' añecop ñeñt' es pallta'yetsa. Allochñapa' ñerra'm e'ñe cohuen sañño'tue, attochña eñotaset ñeñt' e'ñe cohuen notenanet socop, ñeñt'pa' e'ñe po'ño'ch atet sephuena.

4 Allochñapa' ñerra'm esempo nechap naña sesho epan ñaña masheñnesha'chno macedonio'marnesha' ñerra'm yentoses ama sapchatueña', allempoña yapa' chate' parrocmayepencna'ntatanna'ta. Allempoña e'ñete' orrena neyemtensa.

5 Ñeñto'marña napa' añ pocte' nenten o'ch noch po'psheñeñ masheñnesha' ñetpa' otetepa' ñanmacmuet, ñeñtcha' sabcherraya' attoch ñetpa' o'ch yenposset attoch e'ñe sapcha'hua ñeñt semnen sa o'ch e'ñe saphue ñeñt es pallta'yetsa Jerusaléño, ñeñt atet sot ahuatoteñ. Tarro'mar napa' e'ñe pocte' nenteñ sa e'ñe semneññoť e'ñech señmañesha' es sapa'yese ñeñt atarr es pallta'yetsa. Amachña čha es enamare'tyenseto attoch es sapuēnānet.

6 Chocmach seyerpuena añ ñoñets, ñeñtpa' atet oten: Ñerra'm ya atarr coñe't es yapa'yen Yomporecop, yapa'cho'ña o'ch alla yaguērr ñeñt atarr coñe't. Ñerra'm atarr aton es yapa'yen Yomporecop, yapa'cho'ña o'ch alla yaguērr ñeñt atarr aton. Ñehua, ñato' o'ch netma'ntacha atet ñerra'mrrate' cho yenare'tatse'ten ya'mro. Ñerra'm atarr coñe't yenare'tatse'tpa' atarrcha' coñe't ya'yapačherr ñerra'm esempo po'nen. Ñerra'm atarr aton yenare'tatse'tpa' atarrcha' aton ya'yapačherr ñerra'm esempo po'nen.

7 Ñaña añ poctetsa e'ñe puesheña'ttsoy o'ch yapa'yen e'ñe allpon ñeñt pocte' yentyen e'ñe ya yeyočhro. Amachña yempañoťa es yapa'yeno ñaña amachña puenamare'teñoteta es yapuēnāneto. Tarro'mar Yomporpa' añña atarr morrentena ñeñt e'ñe pocsheñeshocmañen es apa'yets.

8 Ñaña Yomporpa' shonte' esocmañen echen ñeñtcha' apuerres allochñapa' attoch čhocma sechencha' shonte' ñeñt atarr cohuen socop, ñaña sechencha' shonte' attoch seyēnpūen pa'namenot ñeñt cohuentetsa Yomporecop.

9 Añpa' ñeñt atet oten Yompor po'ñoñ ñeñt anuaret ahuatoteñ, ñeñtpa' atet oten:

Ñeñt atarr es apuene' huocchañnesha' ama't ahuatapa' amach apsaretterro ñeñt atto e'ñe cohuen es pen.

10 Yomporpa' apuēnescha' shonte' esocmañen allochñapa' attoch čhocma sechencha' shonte' attoch seyēnpūenānet pa'namenot ñeñt cohuentetsa Yomporecop. Ñaña ñapa' allo'nach sen es sapuene' pa'namen allochñapa' allo'nach sesen yēnpūene' pa'namenot ñeñt cohuentetsa Yomporecop. Ñeñtpa' ñerra'm netma'ntacha ñato' o'ch not: Ñeñtara Yompor ñeñt yapuene' puerets ñeñtcha' yenare'ten o'ch čhap allempo po'nenpa' allem-pochña yeyoren ñeñtcha' yerrar yepen, ñeñtpa' Yomporña a'torene' attoch ya'yapačheñ o'ch yeshonteñ.

11 Attochña sapa' sechencha' allohuen shonte' esocmañen allochñapa' attochña shonte'ch esocmañen sapa'yeyñ ñeñt es pa'namen pallta'yetsa. Ñerra'mña atet seřapa' yañapa' yach apuerrahuet attochña ñetpa' chore'teñet Yompor o'ch ochet "Parasyos Nompore, řa yapuene' ora allohuen."

12 Ñerra'm atetcha' sepēna es apa'yese' masheñnesha' ñeñt ame'ñetsa, ama e'ñe añēcpa sherbeno attoch es sapuēnānet ñeñt palltenet. Añēcpa'ñaña sherben attoch ñetpa'cho'ña atarrcha' chore'chet Yompor o'ch ochet: "Parasyos Nompore, řa yapatene' ñeñt allpon yepalltena."

13 Ñaña attoña ñetpa' aye'chočhtateññañetcha' Yompor, tarro'mar o'ch eñotenset sapa' po'ñočh attera same'ñeññaña Cristo po'ñoñ. Tarro'mare'ñaña ñetpa' aye'chočhtateññañetcha' Yompor, atto sapa' sapuēnānet pa'namen ñeñt allpon palltenet ñet, ñaña po'potantañēcop.

14 E'ñech pueyerpuēñoťetas sapa' ñetpa' atarrcha' nanac chore'tatonaset Yompor, tarro'mar sapa' o'ch sorrtānet Yompor puēmuereña allo atarr muerenya.

15 Yeparasyoso'chepa'ch Yompor tarro'mar ña yapuene' Puechemer, ñeshoñña huena ora muereñets ñeñt atarr cočhnesha'. Ama't yemneñeñ o'ch ya'ye'chočhtatue e'ñe poctacma, tarraña ya arromña'tēypa' amach erroť yepe, ñaña ama yeno yeñoñ attoch ya'ye'chočhtatuoñ e'ñe poctacma ñeñt atet yocshena yeyočhro.

10

Atto Pablopa' eñotatan corinto'marnesha' ñapa' e'ñe po'ñoçh allsensaret Yomporeshot

1-2 Ñehua, te'pa' na Pablon o'ch alla noctape'chaterrser e'ñe nemuereñoñes atten ñerra'm Cristo ñeññ nanac amuerañtosta. Puemuereñoñey ya ñapa' e'ñe pocte' eñche'ñ o'ch atet enteñet ñerra'm ñapa' ama esoshe'mayaye. Ñehua, sapa' patanta'ttsospa' atfach sentenen ama erroñ notenso atsrre'moçhen ñerra'm esempo allo'tsenen sesho. Tarraña ñerra'm esempo allañaro'tsenen, allempo nequellquënnas cartapa' allempoña sapa' atet sentenen ñerra'mrrate' ama çhoye' nemçha'tenso ama't e'ñe mamesha, e'ñech eche'çharr notenes necartoñ. Tarraña ñeññpa' ama atteyaye. Ama't allempo allo'tsenen sesho, ñerra'm nemneñeñ atet ne'ñoronasapa' e'ñete' eche'çharr ne'ñoennasa. Ñeñño'marña te'pa' e'ñe neyoçhrocmañen o'ch notas, soçtape'cherr cohuen e'ñe tayecma allochñapa' ñerra'm esempoch neçherr seshopa' amach çha se'ñoratno eche'çharr. Tarro'mar ñerra'm ama soçtape'cherro cohuen, po'ñoçh ñerra'm esempo neçherr seshopa' çhach se'ñoraten eche'çharr, ñeññes notene' napa' e'ño' nañeña noctaññoñ atet es nepañte'tyen ñeññ atet pa'yena acheñenesha' arr patsro, ñeññpa' e'ñe ñocpueta sherben. Tarraña napa' ama atteye' nepeno.

3 Ñehua, ama't napa' nocrrena arr patsro atet yocrrena allohueney acheñey tarraña ñeññ atet nema'yoçhrena Yomporecop, ñeññpa' ama atteyaye ñeññ atet ma'yoçhrena acheñenesha' arr patsro.

4 Tarro'mar ñeññ atet yema'yoçhrena Yomporecoppa' ñeññpa' ama añeyaye ñeññ atet yoçtape'chen ya acheñey arr patsro. Añña atto yema'yoçhrena ñocop, e'ñe ña po'huamencoñ atet yepena. Attochña yehuapore'toñ allohuen ñeññ epatare'tene' Yompor poçpañña.

5 Ñaña allohuen serrparñatsoçhno ñeññña epatare'tene' Yompor po'ñoñ ñeññcha'ña yehuapore'tua. Ñaña allohuen copaññatsoçhno atto nanac ommo'chenet, ñeññña ama muenatenahueto attoch enteret Yompor, ñeññpa'çho'ña Yomporcha'ña po'huamencoñ o'ch yehuapore'tue. Ñaña ñeññ allpon yoçtape'chyen arr patsro ñeññña atpare'tatene' Yompor poçpañña, ñeññcha'ña ya'meta'huerr Cristesho, allochñapa' attochña Cristopa' o'ch ame'ñatera.

6 Ñaña ñerra'm o' alla name'ñatuerrsa e'ñe cohuen, tarraña ñerra'm esesha' ora atpare'tetsa, napa' e'ñe pocte' nenteñ o'ch yecoñchach ñeññ atet atpare'tetsa.

7 Sapa' aña cohuen senten ñeññ allpon sentyen seclloyoñ. Ñerra'm esesha' entetsa atet ñapa' Cristo mueñene', ñeññ acheñerpa' eñoçhepa' napa'çho'ña Cristoña nemñene'.

8 Ama't atarr natontaten neñoñ atto alla noterrser napa' Cristo puellsensaren, tarraña napa' ama çhoye' neyllateno neñoñ attoch nepenca. Tarro'mar atto llesensa'n Yepartseshar Cristopa' ñeññpa' añecopña attoch neyenpas attoch allo'na sesen huomenc pa'nmue' seyoçher Yomporecop. Ñeññpa' ama añecpayaye alloch na'puerrataterres ñeññ atto same'ñena.

9 Napa' ama nemno o'ch añcha'noçhen sentenen e'ñe necartoña.

10 Tarro'mar patanta'ttsos atet sentennan necarta ñerra'mrrate' atarr eche'çharroñ es notenes ñeññ atarr echarr senten. Ñaña ñerra'm esempo allo'tsenen sesho sapa' ama ahuamencatoyenaye' sentenno ama't mamesha, ñaña atto neserrpare'tatenespa' ama't e'ñe mameshapa' ama asherbenaye' senteñe.

11 Tarraña acheñenesha' ñeññ atet otetspa' eñoçhetepa'ch ñerra'm erroñ notas necartoñ ama't atarr allañaro'tsenen atetcha'çho' po'ñoçh nepennas ñerra'm esempoch neçherr sesho.

Atto Yomporpa' ama pocteye' entenano acheñenesha' o'ch cohuen entenet e'ñe ñañañeña

¹² Napa' ama't mameshapa' ama nemno o'ch sentenen napa'cho'ña ñato' attente' ñeñt atet pena po'potantañ ñeñt atarr cohuen eñosyets e'ñe ñocpueta. Napa' ama nemno o'ch not napa' e'ñe attecma nepena atet penet ñet. Tarro'mar ñeñt atet penet ñetpa' ama cohuenayaye. Ñetpa' e'ñe ñañeñeta pocta'ñetpa' coshapretannenet e'ñe ñagattseta. E'ñe ñañeñeta pocta'ñetpa' cohuen entapretanna'tyenet, ñeñt'pa' atta otatse'tyenet.

¹³ Tarro'mar yapa' ama yoyaye yoc'pa'ña ñeñt atarr yocshapretannena. Añña Yompor pocta'ña ñeñt'pa' allohua onañchare't yocop ñeñt'cha' e'ñe cohuen yocshapretannena. Ñaña Yompor pocta'ña ñeñt atet onañchennaypa' ñeñt'pa' añecpa'ñaña sherben attoch ye'chapatonas Yompor po'ñoñ e'ñe seshohuen ñeñtes corinto'marneshas.

¹⁴ Ñeñto'marña yapa' ama cho yatontateññañe Yompor pocta'ña tarro'mar ñeñt allpon onañchennay, ñeñt'pa' e'ñech allohua yetorrena ñocop. Ñeñt'pa' añecpa'ñaña sherben attoch ye'chapat Yompor po'ñoñ ama't seshohuen. Ñeñto'marña ya ahuatpa' yanom chapate' Yompor po'ñoñ sesho ñeñtara añ cohuen ñoñets alloch yequeshperra e'ñe yame'ñeñoña Cristo.

¹⁵ Ñaña ya e'ñe yocoppa' ama yemno o'ch yommo'choña po'psheñeñ po'taruas ñeñt ñanom torratsa all Yomporcop. Tarraña yapa' yecuenes ñerra'm esempo sa o'ch allo'na sesen ame'ñetsa cohuenpa' allempoña napa' noctape'chen ellonet o'ch alla netorrerra sesho.

¹⁶ Attochña ama't allpon anetso'chno ñeñt allemeñ allo'tsa'yen ellonet seshotpa' allña nesechena ñaña allcha'ña neserrpare'tatyesosanet Yompor po'ñoñ, ñeñtara cohuen ñoñets alloch yequeshperra. Nemneñ o'ch na'potoñ Yompor po'ñoñ all ama aserrpare'tataretteneta' allochñapa' amach cha nommo'choñe po'psheñeñ po'taruas ñeñt ñanom serrpare'tats all.

¹⁷ Ñerra'm esesha' muenetseñ o'ch e'ñe cohuen eños puesheñarrocop tarraña ñeñt'pa' Yomporcopcha'ña e'ñe cohuen eñen.

¹⁸ Tarro'mar añ acheñer ñeñt eñoretza e'ñe cohuen ñocpapa' ñeñt'pa' ama pocteye' enteñe Yompor. Tarraña ama't erra'tsena acheñer Yomporcha' eñosets cohuen ñocop, ñeñtña e'ñe pocte' enten ña.

11

Atto ommoñañenesha'pa' ahuo't shequënan corinto'marnesha' ñetpa' allsensare'teto'

¹ Napa' atarr nemneñ o'ch se'mñoton atto cha muene' atta es notatse'tyen. Po'ño'ch o'ch notas, se'mñoton ñeñt atet es notatse'tyen, allochñapa' attoch neñotatas ñeñt atet noctape'chen.

² Tarro'mar napa' atarr necuenes atet ñerra'm Yompor ña secuene'. Tarro'mar napa' añ no'patatensa Cristo attoch allohuenes o'ch e'ñe napuas poctacma. Atto o'patataretes, napa' o'ch necuenes attoch amach yoratstaso po'psheñeñ. Ñehua, o'ch netma'ntatasa atet ñerra'mrrate' puesheñarr yacma ñeñt esñeñ. Po'señña' o'ch o'patacha puesheñarr yacma ñeñt'cha' puerrollar pa'. Ñapa' o'ch cohuanpenan po'señ e'ñe cohuen tarremphuach esempoch huapa ñeñt o'patenaya allempochña pomanña po'señ ñeñt ama a'p'llare'teyaye. Ñeñto'marña napa' e'ñe atet nentenes ñerra'mrrate' nesñenesha' nepenes attoch napuas Cristo ñeñt atet ñerra'mrrate' ñeñt'cha' e'ñe serrollar sepa' ñapueñ.

³ Tarraña napa' cha sellcatenen. Napa' noten sapa' o'te' cha semnatena o'ch shecaset samã, atet pa ahuat sheche'p allempo shecan Eva tarro'mar ñeñt sheche'pa' atarr etsotenan shequëñets. Ñerra'm sapa'cho'ña puehquëño'tetaspa' añach ye'chatenset ñeñt ama cohuenayaye cot'pa'ñats, ñeñto'marña o'huañcha' allo'na sesen ame'ñenaya Cristo ñapueñ ñeñt e'ñe cohuen.

4 Tarro'mar sapa' ñerra'm esempo huena po'potantañ sesho, ama't serrpare'tatensetañ ñeñt atet pe't Jesús tarraña ñeñtpa' ama atteyaye ñeñt atet yeychatuas ya ahuañmo'cha, sañapa' eso'mare'tña allorocma e'ñe socsheñsha' same'ñeña. Ama't serrpare'tatenset po'poñ coñapñats ñeñtpa' ama aneyaye Yompor poctapña, sañapa' allorocma'tña e'ñe pocte'senteñ o'ch same'ña. Ama't serrpare'tatensetañ po'poñ ñoñets alloch sequeshperrañ, ñeñtpa' ama aneyaye ñeñt e'ñe cohuen ñoñets ñeñt same'ña'hua ahuañmo'cha, tarraña sañapa' e'ñe't pocte'senteñ o'ch ame'ñataset po'poñ ñoñets.

5 Ñaña ñetpa' atta ommo'chenet allsensareteto' Yomporshot, ñetpa' atarro' sherbenet. Tarraña napa' elloña atarr asherben nentena.

6 Ama't napa' ama aychatareteno attoch neserrpare't coñheshare' ñoñets tarraña napa' e'ñe neñotueññañ Yompor po'ñoñ. Sapa' señotenen ñeñt atet notenes ñeñtpa' e'ñe po'ñoñ atet tarro'mar shonte' pa'namen norrtatyen erracmañen ñeñtña e'ñe señotatene'.

7 Ñehua, sapa' amate' pocteye' sentenno tarro'mar ama't ahuañmo'chapa' ama çhoye' necobraso atto neserrpare'tatensa' Yompor po'ñoñ ñeñt alloch yequeshperra. Ñato' amate' asherbenaye' sentenno atto ama necobraso. Tarraña ñeñtpa' añecop sherben attoch sapa' o'ch tantaterres Yompor sosya'tsañoñ allochñapa' o'ch puechemer perres saña.

8 Ñehua, po'poñ anetso all apcha'yenet pame'ñeñoñet Yompor, na errotenopa' çhocma naguënanet ñeñt allpon muenenet o'ch tsa'tnet e'ñe ñet poctapñoñet. Ñeñto'marña ama pallteno o'ch setsa'tna saña atto neserrpare'tatenes. Ñeñt napa' atet nenteñ ñerra'mrate' po'poñ anetso all apcha'yenet pame'ñeñoñet Yompor, napa' ahuo't neprratamñsanet ñet attoch nesherbasa.

9 Ahuañmo'cha allempo na'posa seshopa' ñerra'm esempo nanac es nepalltena, sapa' ama't puesheñarroñesapa' ama na'tsrre'moçhtana'taso es senamare'te' ñeñt nepalltena. Tarraña allempo atarr es nepalltenapa' o' huaçha'ta masheñsha' Macedonio, ñetñapa' o' aposnet allpon ñeñt atarr nepalltena. Attoña allponmat na'puena sesho ahuañmo'cha, napa' ama't mameshapa' ama nemno o'ch na'tsrre'moçhtana'tasa ama't e'ñe puesheñarroñesa. Ñaña napa' çhocmach atet nepena.

10 Napa' neñotena Cristopa' entenen e'ñe po'ñoñ cohuen ñeñt atet nepena, ñeñto'marña napa' ama't eseshapa' amate' errotenoñ queçhpatatnetoña atto e'ñe cohuen neserrpare'teññañ Yompor po'ñoñ e'ñe atta ñeñt allo atarr nocshena, ama't erraparen nesen Acayo'mar.

11 ¿Eso'marte'ña atet notenes? ¿Ama't señoñe? Çhate' sotenapañ amate' nemorrenseno. Tarraña ñeñtpa' ama atteyaye. Yomporña nentene' atarrca'ye nemorrentensa.

12 Napa' çhocmach atet nepena amach necobrenso ñeñt atet pena po'potantañ ñeñt pommo'cheñoñeta serrpare'tatyenset. Allochña ñetpa' amach errotenoñ otneto napa'çho'ña ahuo' na'tsrre'moçhtana'ch naña acheñesha' atet penet ñet. Tarro'mar napa' ama pocteye' nenteñe o'ch otet e'ño' atecma yetorrena Yomporcop.

13 Tarro'mar ñeñt atet acheñpa' ama Yomporreye' llesensenaye, ñetpa' aña po'taruas penet shequëñets attoch ganenet e'ñe atta. Atta mueneñet o'ch po'poñetet ahuo'ch orrtet atet ñerra'm Cristo puellsensar.

14-15 Ñehua, yapa' yeñoteñ oneñetpa' çhocma atet pena ñaña o'ch po'poñet attotcha' shequëney. Oneñetpa' çhocma orrtatennay ñeñtcha' cohuen yenten ya, o'ch orrtatennay atet ñerra'mrate' ñapa' Yompor po'puetarenñoñ amñareñ ñeñt atarr cohuen. Ñeñto'marña yeñoteñ oneñet pueyochresha' ñeñt torretsa ñocoppa' ñetpa'çho'ña atarrcha' ashcañareret, mueneñet o'ch po'poñetet attotcha' orrtet atet ñerra'm añ acheñer

ñeñt e'ñe po'ñoçh torretsa Yomporecop. Tarraña ñeñt atet petsapa' añ o'patenahuet coñcheñets ñeñt poctetsa añecop ñeñt atet p̄atse'tyetsa.

Atto Pablopa' pa'namenot mueroçhtateñet e'ñe pame'ñeñoõ Cristo

¹⁶ Ñehua, te'pa' o'ch alla noterrser. Amach sentatsetno napa' attate' notatse'tyen. Ñehua, ama't sentenen atet ñerra'm otatsñañenpa' notatse'teñoñapa' se'mñoten. Tarro'mar napa'çho'ña o'ch e'ñe cohuen neños ñeñt e'ñe nocpa atet ñerra'mrrate' çho nommo'chena mame'.

¹⁷ Ñehua, ñeñt atet notenes te'pa' ama cohuenayaye tarro'mar ama añecpaye' llesensa'noña Yepartseshar o'ch e'ñe cohuen neñen ñeñt e'ñe nocpa. Te'pa' e'ñe na notatse'teñoñ e'ñe cohuen neñen ñeñt e'ñe nocpa atet ñerra'mrrate' çho nommo'chena. Tarraña ñeñt atet notenes neñoeteñ ñeñtpa' e'ñe po'noçh netsotueñ.

¹⁸ Atto shonte' po'potantañ ommo'chyenet ñeñt atet etsotenet ñet arr patsro, napa'çho'ña o'ch neñosatse'tapretyesamet atet ñerra'mrrate' çho nommo'chapretyenamet.

¹⁹ Sapa' e'ñe atet sentena sañeña atarro' es señoten ñeño'marña e'ñe pocte' senteñ o'ch se'mñoteññañ ama't otatsñañ ñeñt atto ommo'chena.

²⁰ Ama't ñet atto pomnaren penset, sañapa' e'ñech pocte' senteñ. Ama't es puer-ratam̄psaset ñeñt allpon sechyen, sañapa' e'ñech pocte' senteñ. Ama't pa'namenot shecare'tenset, sañapa' e'ñech pocte' senteñ. Ama't atarr puetsena'teñoñetaspa' sañapa' e'ñech pomnaren sepatena. Ñerra'm esempo ama't çho taclapechenset, sañapa' e'ñech pocte' senteñ atto atarr pencna'ntatenset.

²¹ Napa' ama nepenquëñoñeye' notenso, napa' ama nemno nehuamenco'tpa' o'ch pomnaren nepenes, atet penes po'potantañ.

Ñehua, tarraña ama't errotenote' ommo'chyenetpa' napa'çho'ña o'ch atet neñosatse'tapretyesamet. Notatse'teñoñpa' çhach nottena atet ñerra'mrrate' çho nommo'chapreteña ommoñatenesha'.

²² Ñetpa' pommo'cheñoñetpa' otenet ñetpa' hebreonesheto'. Ñehua, napa'çho'ña o'ch notas, hebreoneshan namña. Ñetpa' pommo'cheñoñet otenet israelena'tareto'. Ñehua, napa'çho'ña o'ch notas israelena'taren namña. Ñaña ñetpa' otenet po'mrenñaneto' yatañ Abraham. Ñehua, napa'çho'ña po'mrenñen yatañ Abraham.

²³ Ñetpa' pommo'cheñoñet otenet ñetpa' atarro' torrenet Cristocop. Ñehua, napa'çho'ña elloña atarr nanac netorrena Cristocop. Ama't e'ñe notatse'teñoña noten, ñeñtpa' e'ñe po'ñoçh atet. Ama't allpon torrenet ñet, elloña napa' atarr nanac netorrena na. Ñaña ama't allpon amueroçhtatare'tetyenet ñet elloña napa' atarr nanac amueroçhtatare'ten. Allpon ayottam̄psare'ten all coñchatennet, ñeñtpa'çho'ña nanac atonoche'tats. Ñaña allpon ashtennetpa' ñeñtpa'çho'ña atarr nanac atonoche'tats. Ñaña ñeñt allpon autsan-cha' rromuetseñ, ñeñtpa'çho'ña atarr nanac atonoche'tats.

²⁴ Ñaña judionesha' e'ñe pue'moñe'teñoñetan napa' atet ashtennet e'ñe amnaroche'tats. Allempoña ashtennetpa' ma'poch çharra' puechena escon ñeñt atto pacapacatspennet.

²⁵ Ñaña ellonetpa' o'chçho' alla nallerrneterr ñaña tsachp̄o, e'ñe ma'poche'ttsocma nallennet. Po'pocheño'pa'çho'ña parrochpa' o'cho' alla rrolle'terrneterr. Po'pocheño'pa'çho'ña allempo nesen noñto sapo'marpa' alla nepotam̄perrerr ma'poche'ttsocma. Allempopa' alla narepen alla nellapen oño enopa'rrtatsa.

²⁶ Napa' çhocma nechopeñe'chyen ella'par allo'tsa'yen pa'namen ñeñt atarr añcha'noçhenare', atet ñerra'm allempo netam̄pena noñto oño'mar, ñaña allempo nechap all añcha'noçhtena eñe'teçhno, ñaña allempo añcha'noçhtana'tenen namo'tsesha' ñaña po'poñ acheñ ñeñt ama judioneshayaye. Ñaña ñeñt

añcha'noçhetyetsa all anetso'mar, ñaña ñeñt añcha'noçhetyetsa all puetsaño'mar, ñaña ñeñt añcha'noçhetyetsa all oño'mar. Ñaña ñeñt atto añcha'noçhtena po'potantañ ama't otenetañ masheñpa' tarraña ama masheñeyayeto, ñetpa' ama ame'ñeñeto Yompor.

²⁷ Elloña çhocma atarr netaruasen, ñaña shonte' ñeñt atarr echarr nentyen. Ñaña atonoche'tats atarr nanac na'huanten nemoñ torratta Yomporecop. Ñaña epaye' ne-mueroçhtena nachporrñoñ, ñaña no'ñpañoñ tarro'mar ama eñalle ñeñtcha' nerren ñaña ñeñtcha' norren. Ñaña epaye' mueroçhtatenen senet tarro'mar ama eñalle neshtam ñeñtcha' nechorra, o' e'ñe neptsapesua.

²⁸ Ñaña ellonet napa' çhocma nellquëña ñeñt pame'ñeñotet allemeñ apcha'yetsa. Napa' aña'ñaña çhocma nellcatene' ñeñt atarr torrapo' nentyen pa'namen.

²⁹ Ama't erra'tsena acheñer ñerra'm ama huomencaye' penano pueyoçher Yomporecop, nañapa' atarrcha' nellcapreteña. Ñeñtña atet nellcapreteña nañapa' o'ch atet ne'muen neyoçhro ñerra'mrrate' o'huañ huomenc nepa' neyoçher Yomporecop. Ñaña ama't erra'tsena acheñer ñerra'm o'ch a'puerratateret o'ch atet perran ñeñt ama pocteye' enteno Yompor, ñaña nepencapreteño'tpa' ama't mameshapa' amach pocteye' nenteñe.

³⁰ Ñato' te'pa' o'ch noterrser po'poñoneñ coñpñats. Sapa' po'ñoçh señosatse'tatyenen cohuen ñeñt e'ñe nocpa. Añña cohuen nenten attoch neños cohuen ñeñt e'ñe nocpa, ñeñtpa' atto ama ahuamencatoyenaye' enteno acheñenesha'.

³¹ Yomporpa' eñotenen ñeñt atet notenes, ñeñtpa' ama shequëñtsoyaye. Ñeñtara Yompor ñeñt Pompor pen ñaña Yepartseshar Jesucristo ñeñtcha'ña ya'ye'choçhtaterr tayoteñ errponohuañen.

³² Ñehua, napa' o'ch neyerpatasa atet a'pareten ahuañmo'cha allempo Damasco'tsenen. Ñehua, ñeñt añcha'tarettatse't all Damasco, ñeñtpa' ñeñtara añcha'taret Aretas pueyochresha'. Ñeñtña nene'ña guardianesha' ñeñt camretsa allemeñ yetarroñ. Ñetpa' añecop camrenet attoch rroma'netañpa' o'ch yottañpesnetañ allcha' coñchatnetañ.

³³ Tarraña napa' arr esha'tnet cañtro attoña çha'nmaterrnet ventanoñ allostña a'suatañperrnet conçhtot. Attoña e'ñe cohuen nequeshperra, ñeñto'marña ama eshcaye' rroma'noña guardia.

12

Atto Pablopa' a'tapataretta Yompor pue'ntaño ñeñt e'ñe poma'ptaño'hua

¹ Ñeñt atto señosatse'tatyenen e'ñe cohuen nocpa, ñeñtpa' ama es sherbeno. Tarraña ama't atteñpa' o'ch alla neserrpare'taterrser atto Yepartseshar ñaña es negatyene' ñeñtña es neñotatyene'.

²⁻³ Ñehua, napa' neñoteñ na pueheñarrana ñeñten ame'ñenaya Cristo te'pa' o' met çharra' puechena pa'tats char, allempoña napa' a'tapaten Yompor pue'ntaño ñeñt e'ñe poma'ptaño'hua. Napa' ama neñoteñe, ñato' orate' nechtso a'tapataretten, amapa' ñato' necamquëño'tate' a'tapatnet. Ñeñtpa' Yomporña eñotene'. Napa' e'ñe neñoteñ po'ñoçh a'tapataretten Yompor pue'ntaño all atarr nanac cosheñtso'tsa'yenet.

⁴ Ñoñets ñeñt ne'muena' allpa' ama aserrpare'teno tarro'mar ya arromña'tey ama pocteyaye o'ch yeserrpare't allo.

⁵ Ñeñt atet a'pareteneñ allempo, ñeñtpa' e'ñe poctet o'ch cohuen neñoseñ e'ñe nocpa, tarraña amach atet ne'patsto, añachña nocshena atto ama ahuamencatoyenaye' enteno acheñenesha'.

⁶ Ñehua, ñeñt atet a'pareteneñ allempo ñeñtpa' e'ñe poctet o'ch cohuen neñoseñ e'ñe nocop, ñeñtpa' ama çhoye' notatse'teno, tarro'mar ñeñtpa' e'ñe po'ñoçh atet a'pareten. Tarraña napa' ama nemno o'ch cohuen neños e'ñe nocpa. Añachña nemnen ñeñtcha'

cohuen entapretennet ñeñt e'ñe allpona entapretennet ñeñt atet es nepa'yen cohuen ñaña ñeñt e'ñe allpona e'mñotapretennet ñeñt atet e'ñe cohuen neserrpare'ten.

⁷ Atto Yepartseshar ñaña es negatyene' ñeñtña es neñotatyene' ñeñtpa' atarr cohuen nanac yenteñ. Tarraña napa' attoch amach nocsheno e'ñe ñañeñapa' Yomporña nemnatene' e'ñe nechtso ñeñtña atarr nemuerochtatame'tene' nanac. Ñeñt atto nanac nemuerochtana, napa' atet nenteñ ñerra'mrrate' aj nechtsotampena ñeñtpa' oneñeñeshoña huennana ñeñtña atarr atserr nepene'. Attoña Yomporpa' ama muenatenno o'ch nocshena e'ñe ñañeña.

⁸ Napa' o' ma'poche'tats nenamueñ Yompor a'huañamperreña' ñeñt atarr nemuerochtatene'.

⁹ Tarraña ñapa' ahuo't otenen: "Amach na'huañamperreña, tarraña napa' atta chocma atarr nemuerenpa, ppa' ñeññaña pepalltena. Tarro'mar ñeñt ama eñalle e'ñe ña po'huamencpa' ñeñtcha'ña orrtatene' na nehuamenc." Ñeñtpa' atet otenen Yompor. Ñeñto'marña atto napa' ama eñalle e'ñe na nehuamenc, ñeñtpa' ñeñtña atarr nocshatene' na, tarro'mar neñoteñ ñerra'm attenpa' Cristo po'huamencña ñeñt nechorrenaya; ñeñtña norrtatenpa', ama noyaye nehuamenc, ñeñtpa' Cristo.

¹⁰ Ñeñto'marña napa' añ atarr nocshatene' atto napa' ama ahuañamperreña' ñeñt ñaña atto atarr pencna'ntatennet tarro'mar ama esoye' entenneto. Ñaña napa' añña nocshatene' ñeñt allpon atarr echarrare' nentyen, ñaña atto chocmach cofare'tennet, ñaña ama't allpon ñeñt nehuenoya ñeñtña atarr nocshatene'. E'ñe pocte' nenteñ o'ch nemuerochta Cristocop. Tarro'mar neñoteñ ñerra'm esempo ama ahuañamperreña' yenteno e'ñe ya, allempoña Cristopa' ahuañamperreña' peney.

Atto Pablopá atarr llequëñana corinto'marnesha' ñeñt ame'netsa

¹¹ Sapa' atto señosatse'tatyenen e'ñe cohuen ñeñt e'ñe nocpa, tarraña ama't atteñpa' napa' e'ñe po'ñoch notatse'tyen, tarro'mar napa' ama nepallteno o'ch neños e'ñe cohuen ñeñt e'ñe nocpa. Añña palltetsa sa o'ch señosapreten cohuen ñeñt e'ñe nocpa. Tarro'mar sapa' señotenen atarr asherboyenen. Ama't po'potantañ ñeñt atarr se'mñotatene' atarr ommo'chenetañ, ñetpa' allsensarefeto' Yomporshot, ñetpa' atarro' nanac sherbenet, elloña napa' atarr asherben entenen Yompor, ama't napa' ama esoye' nenteno.

¹² Tarro'mar ahuañmo'cha allempo na'puena sesho, napa' allña norrtatyesonas Yompor po'huamenc ñeñt atarr echarrare' ñeñt sapa' ama't ahuañapa' ama sentare ñeñtcha'ña señotate' ñeñtpa' Parets po'huamenc ñaña ñeñtcha' señotate' napa' po'ñoch Yomporña nellsensene'. Ñeñto'marña e'ñe cohuen na'huantennas ñeñt atarr torrapo' sentyen.

¹³ Attecma es norrtatyennas ñeñt atet nepa'yes po'potantañ ñeñt pame'ñeñotet apcha'yetsa allemeñ anetso'mar. Añña ama na'tsrre'moçhtana'taso es senamare'tyese'. Tarraña ñerra'm ama pocteye' sentono ñeñt cohuenare' neponaspa', ñehua, ñato' o'ch sepretnerren.

¹⁴ Te'pa' poma'pocheñopa' o'ch ahuerrenerr sesho. Attecmach nepohuerrerr, amach na'tsrre'moçhtana'taso es senamare'te' ñeñt nepalltena na. Tarro'mar napa' ama añeye' ne'нено ñeñtcha' es sapuen na; napa' añña nemnen o'ch sepomhua sañeña Cristesho. Tarro'mar napa' atet nentenes ñerra'mrrate' po'ñoch e'ñe nechemer nepenes. Ñehua, cheshaneshapa' ama añeye' pallteneto o'ch es a'yapaçhet ñeñtcha' añño'tet pamo'mtayecop. Añña nanac palltetsa, pamo'mte'chña es a'yapaçhets ñeñt puechemereshacop.

¹⁵ Ñeñto'marña e'ñe nocsheñesha' o'ch nepomhua e'ñe ñañeña ñeñtpa' e'ñech socop. Allochñapa' attoch sequeshperra saña. Ñaña allpon nechyen, e'ñe nocsheñesha'pa' o'ch nepomyeñ e'ñe socop. Ama't napa' elloña atarr nemorrentensa sañapa' o'huañ e'ñeye' semorrentenna na.

¹⁶ Sapa' señothenen napa' ama na'tsrre'moçhtana'taso es senamare'te' ñeñt' e'ñe nocop. Tarraña sapa' çhate' sotenapañ napa' atarrte' neñoteñ attoch neshcare'tas ñeñt' e'ñe po'poñe'ttsoçma shecare'teñets.

¹⁷ Ñeñt' nemña ahuañmo'cha epsheña sesho, çhate' sotenapañ ñeñt'pa' tarrecpate' attoch shecare'taset.

¹⁸ Ñehua, na te'pa' o' nesechach masheñ Tito ñeñt'cha' tatsa sesho, epuet po'psheñeñ masheñ o' nemñanet epsheño'maret sesho. Sapa' çhate' sotenapañ masheñ Titopa' o'ch shecare'tensa'. Ama't señotheñaña yapa' attecma cohuen yoctape'chen yeyoçhro epan masheñ Tito ñaña attecma es yepa'yennas e'ñe cohuen.

¹⁹ Sapa' çhate' sotenapañ añecpate' neñen cohuen nocop allochñapa' attoch o'ch alla cohuen sentuerren. Tarraña e'ñe nemorrenteñoñes masheñneshacha' ñaña noçhaneshacha' o'ch notas, ñeñt'pa' ama nocpayaye. Añecopña notenes ñeñt' e'ñe socop allochñapa' o'ch alla huomenc seperr seyoçher Yomporecop. Napa' e'ñe neyemteñoñ Cristo, Yomporñapa' entenen ñeñt' atet notenes.

²⁰ Tarro'mar e'ñe nellquëñoñes sa noten, ñato' esempoch neçherr sesho, ñerra'm attera nentyesuerrerr ñeñt' atet sepatse'tyena, napa' ñeñt'cha'ña atarr nellcatuerrayerr sesho. Attoña ñerra'm sentapuerren nellquëñesha' neçherr seshopa' ñeñt'cha'ña sellcate' saña. Ñato' o'ch nentuerrerr attera se'moñe'tannena, attera es seye'chapretannena, attera sa'tsrre'mare'tatannena sañeña attoch o'ch sa'mcha'taretta; ñato' attera sesasare'tanna'tyena, attera sa'metare'tamñpsannena, ñaña e'ñe puesheña'ttsos attera atarr cohuen sentena sañeña, ñato' attera se'moñe'tanna'teñoñpa' seche'çhame'tanna'tyena.

²¹ Ñaña napa' nellquëñoñes sa noten, ñerra'm esempo neçherrerr sesho po'pocheño'pa' ñato'rraña o'te' alla pencna'ntaterrnerr Yompor e'ñe so'mara. Tarro'mar ñato' patanta'ttsos ama sequeçhpueno ñeñt' ama pocteye' enteno Yompor ñeñt' atet seyçha'yen sa sosya'tsañeçhno, ñaña atto seçhta'yeñ coyaneshachno ñeñt' ama setaporeyaye, ñaña coyanesha'pa'çho'ña aguënan yacma ñeñt' ama puerrollareyaye, ñaña atto sayomãtse'tyena ñeñt' po'ñoçh ama atet aþapahuoyaye. Ñato' attera sepatse'tyena atet sepe't ahuañ ama llecatensoña so'chñar attoch soçtape'cherr etserra cohuen. Ñeñto'marña ñerra'm esempo neçherrerr sesho ñerra'm attera nentuerrerr, nellquëñoñpa' çhate' neya'na'tuerres.

13

E'ñe allohuanen atet coçape'chatyesnerranet pa'namen esocmañen

¹ Ñato' poma'pocheño o'ch alla ahuerrenerr sesho. Ñaña o'ch notas po'poñ, ñeñt' otteñe'charettetsa, ñerra'm epsheña a'metare'tamñpene' amapa' ma'psheña, allempopa' pocte' o'ch ye'mñoçh ñato' po'ñoçhte' atet þatse'tyena.

² Ahuañmo'cha allempo puepocheño neçherr sesho, ñeñt' attera þatse'tyetsa ñeñt' ama pocteyaye, napa' o' notuanet allempo ñeñt'cha' atet aþarettet ñerra'm atteretach. Ñehua, te'pa' necarto'pa' o'ch alla noterraneterr ñet, ama't e'ñe allohuenes o'ch notas, ñerra'm esempo neçherrerr po'pocheño'pa' o'ch ne'ñoñtare'tuerres allohuenes ñeñtes attera þatse'tyetsa.

³ Allochñapa' sapa' e'ñech señothenen po'ñoçh nach eñorostsa ñeñt' atet muenatenen Cristo. Ñehua, ñeñt'pa' tarro'mar sapa' çhocma senamuenen o'ch norrtatennasa' attoch señothen napa' po'ñoçh Cristo ne'ñoñratene'. Ñaña Cristopa' e'ñe po'huamencoña çhocmach erroten es þa'yennas, ñaña atarr ahuamencat penes.

⁴ Ñehua, po'ñoçh yeñoteñ allempo corso'tamñpset Cristopa' ama ahuamencateye' enteñeto tarraña Pomporña e'ñe po'huamencoñ alla tantater. Yapa'çho'ña attecma yeñotena

ama ahuamencaŕe'ye' yenteno ñerra'm ña, tarraña te'ña yapa' o' yocrrerra po'huamencoŕ Yompor atŕe'ye' ñerra'm ña. Attoña po'huamencoŕ Yompor e'ñe cohuen yesherbeneŕ.

⁵ Te'pa' o'ch noterrser, socoppa' añ poctetsa o'ch señoŕa sañeña, ¿po'ñoŕhte' same'ñena? O'ch señoŕa esheccha' señoŕ po'ñoŕhte' sapa' same'ñena. Ama't señoŕeñe Jesucristoña sechorrenaya. Ñehua, ñerra'm po'ñoŕ ama same'ñeño, amachña errotenoŕ chorraso.

⁶ Tarraña napa' chocma necueneŕ o'ch chaponasa seyoŕhro attochña señoŕen po'ñoŕ napa' añ nellensene' Yompor.

⁷ Napa' nema'yocheñoŕpa' chocma nenamuennas Yompor socop attoch amach allo'na atŕe' seŕatsto ñeñŕ ama cohuenayaye Yomporecop. Ñeñŕpa' ama añecpayaye attoch sapa' o'ch señoŕenen napa' po'ñoŕ allsensareŕen Yomporeshoŕ. Añecopña nenamuennas Yompor socop attoch sapa' chocmach seŕa'yen ñeñŕ cohuen enten Yompor, tarro'mar ñeñŕpa' ñeñŕña e'ñe cohuentetsa Yomporecop. Ñeñŕpa' atŕeña nemnen socop ama't napa' atŕe' sentennoñ atŕe' ñerra'mrrate' ama allsensareŕeno Yomporeshoŕ.

⁸ Tarro'mar napa' ama nemno o'ch nepatare't ñeñŕ e'ñe po'ñoŕ cohuentetsa Yomporecop. Napa' añña atarr nemnen o'ch nepatuahuoñ ñeñŕ e'ñe po'ñoŕ cohuentetsa ñocop.

⁹ Ñerra'm soŕtape'cherr cohuen attochña huomenc seŕerr seyoŕher Yomporecop amach nepallteno o'ch norrtatonas nehuamenc atto allsensareŕen Yomporeshoŕ. Tarraña atŕe'pa' e'ñe pocte'. Ama't napa' ama ahuamencaŕoyenaye' sentenno, tarraña ñerra'm sapa' ahuamencaŕ perres Yompor, ñeñŕpa' e'ñe pocte' nenteñ. Ñaña atto nema'yochena socop allo'nepa'chña sesen e'ñe huomenc ŕa'nmue' seyoŕher Yomporecop.

¹⁰ Ama't ellaŕaro'tsenen o'ch nequellquërrnaserr necarta, ama't ama nesena' sesho, allochña'pa' o'ch alla soŕtape'cherr cohuen Yomporecop. Attochña ñerra'm esempo neŕherr seshopa' amach cha muene' neche'chame'tyesuerrso attoch señoŕon ñeñŕ atŕe' llesensenen Yepartseshar. Tarro'mar atŕe' allsensareŕen, ñeñŕpa' ama añecpaye' sherbeno alloch na'puerratatuerres, ñeñŕpa' añecopña sherben attoch neyenpas huomenc ŕa'nmue' seyoŕher Yomporecop.

Arrpa' all e'ñe poctacma so'tnerranet po'cartoŕ

¹¹ Te' masheññeshacha' ñaña noŕchaneshacha' allohuach notas añ necartoŕ. E'ñe neso'teñoŕespa' o'ch notas, Yomporepa'chña sa'nataya. Te'pa' ñeñŕach noterrser mame'. Allo'nepa'chña sesen coŕtape'chnomue' ñeñŕ e'ñe cohuentetsa Yomporecop. Ñeñŕ atto o' noctape'chaterrser añ necartoŕ, se'mñotonepa'ch neñoñ attoch socsherra e'ñe poctacma. E'ñepa'chña paŕra soŕtape'chuen allohuenes, attochña e'ñech cohuen sentannena. Yomporepa'ch sa'nataya ñeñŕara Yompor ñeñŕ atarr amorrentña ñeñŕña atarr yocshatene' yeyoŕhro.

¹² E'ñe semorrentanna'teñoŕpa' atŕe'cha' sehuomcha'tanna'tena ñeñŕ atŕe' poctetsa Partsocop.*

¹³ Ñaña arrpa' allohuen ñeñŕ o' pueyoŕhresha' perr Parets, ñetpa' mueneñet o'ch huomcha'taset ñamet arr necartoŕ.

¹⁴ Yepartsesharepa'chña Jesucristo sebensare'tamŕene' allohuenes, ñaña Yomporepa'chña semorrentaya attoch semorrentannena saña, ñaña Puecamquëñepa'chña sechorrenaya attoch e'ñe seŕarrocmatuahua allohuenes epas Cristo. Te'pa' ñeñŕach notas, ñeñŕpa' atŕetepa'chña Nompore. Allohua.

Pablo

* **13:12** Po'ñoŕ oteneŕ, "E'ñe semorrentanna'teñoŕ choŕ setso'ttsa'pa'tannena ñerra'm esempo sehuomcha'tanna'tena ñeñŕ atŕe' poctetsa Partsocop." Ñeñŕpa' atŕe' yeŕhete't ahuat.

AÑ SAN PABLO PO' CARTA ÑEÑT̃ QUELLCAN GALACIO' MARNESHA' GÁLATAS

Atto Pablopa' quellcan carta añecop ñeñt̃ ame'ñetsa anetso Galacio

¹⁻² Masheñneshacha' ñaña nochaneshacha' ñeñtes allohuenes same'ñeñoť apcha'yetsa allemeñ anetso Galacio'mar. Na Pablon sequellquëne'ña añ carta ñeñten Jesucristo puellsensaren. Napa' ama acheñeye' nellsensenaye, Jesucristoña nellsensene' epuet Pompore Parets ñeñt̃ tantaterre' Puechemer rromot̃. Ñaña allohuen masheñneshachno ñeñt̃ parro arro'tsenen, ñetpa'cho'ña mueneñet o'ch huom̃cha'taset ñamet añ necartoť.

³ Te'pa' e'ñe nehuom̃cha'teñoťes o'ch notas: Yomporepa'chña sebensare'tam̃pene' ñeñt̃ atarr Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyochro allohuenes.

⁴ Ñeñt̃ara Jesucristo ñeñt̃ e'ñe pocte' ente' o'ch rroma yo'chñarecop attochña yapa' cohueno'tseneycha' ama't añ patsropa' sosya'tsaño'tsenya, tarro'mar ñeñt̃pa' atet pocte' eñch Pompore ñeñt̃ara Yompore ñeñt̃ nanac Parets.

⁵ Ñeñt̃ara Paretspa' aye'chochtaterrapo'ch e'ñe tayoteñ errponohuañen. Ñeñt̃pa' attetepa'ch Nompore.

All eñotatanet atto ama eñalle po'poñ alloch yequeshperra

⁶ Te' napa' o'ch notas: Eso'mare'tña e'ñe mamecmapa' o' alla soctape'chyerr po'poñ. Sapa' cha semneñ o'ch sequechpuer Yompore ñeñt̃ o' hua'ñerres o'ch same'ñerrñaña Puechemer Cristo ñeñt̃ rromats attoch sequeshperra. Tarraña sañapa' cha semneñ o'ch alla soctape'cherr po'poñ ñeñt̃o'ch sa'queshpaterrayeñ.

⁷ Po'ñočhpa' ama't ama eñalle po'poñ alloch yequeshperrapa' añña ñeñt̃ huapyetsa seshopa' ñetpa' cha mueneñet o'ch alla moññe'taterrset soctap̃ña. Ñaña ñetpa' mueneñet o'ch a'po'poñetonaset soctap̃ña ñeñt̃ cotap̃ñats po'ñočh alloch yequeshperra e'ñe yame'ñeñoťa Cristo.

⁸⁻⁹ Tarraña napa' o'ch notas: Ama't erra'tsencha' seserrpare'tate' po'poñ cotap̃ñats ñeñt̃ ama ñeñtarayaye ñeñt̃ atet o' same'ñerra ahuañapa' ñeñt̃ acheñerpa' amuepa'ch yenpueñe Yompore. Ama't yapa'cho'ña ñerra'm o'ch alla yeserrpare'taterrser ello ñeñt̃ ama ñeñtarayaye ñeñt̃ atet o' neserrpare'tatuas ahuaña ñeñt̃ po'ñočh alloch yequeshperra yapa'cho'ña amuepa'ch allo'na yenpa'nenye Yompore. Ñaña ama't añ atet p̃atsa ñeñt̃ Yompore po'millañoťeñer entoťpa' ama't ñapa'cho'ña amuepa'ch yenpueñe Yompore. Ama't ñeñt̃pa' o' notuaseñ ahuatoteñpa' tarraña te'pa' o'ch alla noterrser; amuepa'ch yenpueñe Yompore ñeñt̃ atet petsa.

¹⁰ Te' sapa' señoťenen napa' ama añecpaye' notenso attoch cohuen entenen acheñ, añña nemnen o'ch cohuen entenen Yompore. Ñaña ama acheñeneshaye' nemneno o'ch nocshach tarro'mar ñerra'm aña orameñ nemneñ o'ch nocshach acheñpa' ñeñt̃ep̃ñapa' amate' erroťeno noto napa' pueyocher penen Cristo.

Atet̃ pa Pablo allempo errte' allsensare'tterra

¹¹ Napa' nemneñ masheñneshacha' ñaña nochaneshacha' o'ch señoť ñeñt̃ atet neserrpare'tatas ahuañapa' ñeñt̃pa' ama acheñoyaye poctap̃ña alloch yequeshperra.

¹² Napa' ama acheña neñotatenaye atet̃, ñaña napa' ama esesha' neychatenaye. Añña e'ñe Jesucristo ñaña e'ñe neñotateney' atet̃.

13 Sapa' o' se'mare'tuan atet nepe't ahuañmo'cha allempo noctoñe't judionesha' poctaþña. Napa' allempo nanac noctare'che't ñeñt ame'ñenaya Yompor. Napa' atarrcha' nemne't o'ch na'cillatuanet.

14 Napa' e'ñe netsotoñe't judionesha' poctaþña. Napa' ello nemtana'tue't shonte' nacmanesha' judionesha' ñeñt parro neyemte't. Napa' nanac nema'yoçhroñe't judionesha' poctaþña ñeñt atet yeche't ahuatnaneshañ, ñaña ñeñtara atet yeçhatyesete't ñaña puechemerashañ.

15-16 Tarraña Yomporpa' ahuo't acrerren ahuatoteñ ama't allempo ama ne'ñalletena'. Tarro'mar allempo çhap allempoch eñotaterrenpa' o' yemtaterrena Puechemer ñeñtara Jesús. E'ñe puemuereñoten nanacpa' o' çhore'terren attoch nach serrpare'te' po'ñoñ allo'tsa'yen ñeñt ama judioneshayaye. Ñaña allempo e'ñe pocte' enteñ Yompor o'ch eñotaten atetpa' napa' ama esesha' na'þto'to ama't puesheñarra.

17 Ñaña ama't Jerusaléñapa' ama neto o'ch nenteña' ñeñt allsensaretnesha' ahuatoteñ. Elloña napa' arra ahuen all oteñet Arabia, allpa' ama acheñempañooyaye. Allñapa' all na'llponmatena' e'ñe alla; allotñapa' alla nepuerrerra Damasco.

18 O'ña met ma'pa char allempañapa' ahuen Jerusaléño o'ch nenteña' masheñ Pedro.* Allñapa' alla na'pa ñesho çharramat puechena amnarmat.

19 Tarraña allempo allo'tsenenpa' ama nenteño po'psheññeçhno ñeñt allsensaretnesha', ñapta nenteña' masheñ Jacobo† ñeñtara ñeñt pa'mo'nasheñ pen Yepartseshar Jesús.

20 Po'ñoçhpa' ama't Yomporpa' eñotenen ñeñt atet notenespa' ñeñtapa' e'ñe po'ñoçh atet.

21 Allempoña nerr, arr nasuanerr Sirio'mar ñaña Cilicio'mar.

22 Tarraña ama't allempo ñeñt ame'ñenaya Cristo all Judeo'marpa' ñetñapa' ama eseshaye' nechme'tenaye.

23 Tarraña ahuo't e'mare'chet ñeñt cotare'tahuete't ahuaña te'ñapa' o' serrpare'terren attoch yame'ñerra ñeñtara cotapñats ñeñt çhocma mueneñ ahuaña o'ch huapore'tater.

24 Ñeñto'marña te'pa' e'ñe no'marpa' nanac aye'choçhtateññañet Yompor.

2

Atto po'psheññeçhno allsensaretnesha' e'ñe pocte' eñchet Pablo

1 Allempoña o' meterrerr çharrá' char puechena pa'tatspa' o' alla ahuernerr Jerusaléño epan ñaña masheñ Bernabé. Ñaña o' nanemñ masheñ Tito.

2 Napa' ahuernerr alla tarro'mar atet oten Yompor. Allempoña neçhap Jerusaléño'pa' neserrpare'tosanet ora allohuen ñeñt atet o' neserrpare'tatue ñeñt ama judioneshayaye. Neñotach ñaña jerusaléño'marnesha' ñeñt atet neserrpare'tatyeñ acheñenesha' e'ñe yame'ñeñoña Cristopa' o'ch yequeshperra. Ñehua, ñanompa' neserrpare'tach ñeñt añcha'taretetyetsa Jerusaléño e'ñe ñapto. Napa' tarro'mar notanet atet allochñapa' attoch neñoçh ñato' pocte'ch entapretnet ñeñt atet nepena, allochñapa' atto neserrpare'tatyenpa' amate' e'ñe orrena neserrpare'tyeno.

3 Allempoña neserrpare'tatuanet atetpa' e'ñe pocte' eñchet ñeñt atet neserrpare'tyen. Ñeñto'marña ama't allo'tsen masheñ Tito ñeñt ama judioneshayayepa' ama't e'ñe puesheñarroçtetapa' amaña eseshaye' notaye netsorrachepa'to' masheñ Tito tarro'mar ñapa' ama judioneshayaye.*

* **1:18** Añ Pedropa' ñeñtara otenet Cefas. † **1:19** Jacobopa' ñeñtara ñeñt sochenet Santiago. * **2:3** Añ ñoñets "at-sorraret", añ ñeñt otets atet yeche't judionesha'. Ñeñtapa' atet: Ñerra'm allempo eñalletena asheñorroçtollesha' ñeñt e'ñe judionesha'pa' añña pomporpa' o'ch tsorratenet po'çhtso. Ñehua, ñeñt tsorratenetpa' ematollach o'ch çhapa'muen po'psocmatño. Ñehua, po'çhtso allcha' tsorret asheñorroçtollpa' all e'ñeçh poteretollo e'ñe poñoçh pa'rmatollo.

4 Tarraña ama't allempopa' ama eñallñeña ñeñt' torrapo' yentyenpa' añña puesheña'tetspa' o' huapyesa yesho. Ñaña ñetpa' ama't otenetañ ahuo' ame'ñerret atet ñerra'm ya tarraña e'ñe a'nahuapa' mueneñetañ ahuo'ch nonayet ñoñets ñeñt' nanac torrapo' yenten. Ñetpa' añecpa huapuet a'nahua o'ch e'monayet atto yapa' yoten e'ñe yame'ñeñoña Cristo Jesúsapa' o'ch yequeshperra. Tarraña ñetpa' añña mueneñetañ o'ch alla nerrnayet judionesha' poctaþña ñeñt' nanac torrapo' yenten.

5 Tarraña yapa' ama yemnataneto ama't e'ñe mamesha, tarro'mar yapa' ama yemno o'ch alla ya'po'poñetaþperres ñeñt' cohuen ñoñets ñeñt' e'ñe po'ñoçh alloch yequeshperra.

6 Allempoña neñotach amcha'taretnesha' ñeñt' Jerusaléno'tsa'yen ñeñt' atet o' neþohuapa' tarraña amaña erroť otneto ñeñto' nepalltena ñeñt'cha' atet neþa. Nehua, po'ñoçh napa' ama nepallteno o'ch e'mñotaten amcha'taret tarro'mar ama ñapña amcha'taret pocte' entenoña Yompor. Ñeñto'marña ñeñt' pa'mcha'taretneshar penet ñeñt' ame'ñetsa amaña erroť otneto ñeñto' nepalltenmeñ ñeñt'cha' atet neþa.

7 Añña ñetpa' e'ñe pocte' entnet, tarro'mar o' eñoçhet napa' po'ñoçh allsensareten o'ch neserrpare'tach acheñenesha' cohuen ñoñets, ama't ñeñt' ama judioneshayaye. Attecma ñaña masheñ Pedro allsensaret o'ch serrpare'tan cohuen ñoñets judionesha-cop, napa'cho'ña attecma allsensareten o'ch neserrpare't cohuen ñoñets añecop ñeñt' ama judioneshayaye.

8 Tarro'mar ñeñt'ara Yompor ñeñt' llesense' Pedro o'ch serrpare'tatan judionesha', napa'cho'ña ñeñt'ara Yompor ñeñt' nellsense' ñaña o'ch neserrpare'tach ñeñt' ama judioneshayaye.

9 Ñeñto'marña ñeñt' amcha'taretetyetsa atet ñerra'm masheñ Jacobo ñaña masheñ Pedro ñaña masheñ Juanpa' ñetpa' e'ñe eñoçhet po'ñoçh napa' Yompor o' yenpuerren. Ñeñto'mar ñetpa' e'ñe cohuen agapyet epan masheñ Bernabé. Pagapueñoťetaypa' orratyet pot po'cohuenroť attoch yeñotanna'ta e'ñe attecma yoctape'chen Yomporecop. Allempoña ñetpa' e'ñe pocte' entyet yeserrpare'tachepa'to' ñeñt' ama judioneshayaye, atet ñerra'm ñetpa' o'ch serrpare'tachet ñeñt' judionesha'.

10 Ñetpa' añña paťerr otyet, es yapa'yeseapa'to' huocchañnesha'çhno; ñeñt'ña ama't napa' e'ñe pocte' neñch ñaña.

Allempo Pablopa' muene' che'ptare'tan Pedro

11 Tarraña allempo çhap ñaña masheñ Pedro Antioquíopa' napa' çha muene' neche'ptare'ch allempo yeserrpare'ten parro, tarro'mar allempo ñapa' añ þa ñeñt' ama pocteyaye. Ñeñt'pa' atet þa,

12 allempo e'ñe errte' çhets masheñ Pedro Antioquíopa' ñapa' allenta rrallme'chapretosan ñeñt' ama judioneshayaye. Tarraña allempoña çhaçha't ñaña puesheña'tets ñeñt' huetsa masheñ Jacobueshoťpa' allempoña masheñ Pedropa' o'huañ rrallme'chapretan ñeñt' ama judioneshayaye, tarro'mar ñapa' añ mecha'ten ñeñt' cotene' judionesha' poctaþña. Ñeñto'marña e'ñe allempopa' o'huañ rrallme'chapretanet, ñaña o'huañ yemtanet.

13 Añpa'cho'ña judionesha' ñeñt' ame'ñetsapa' ñetpa'cho'ña o' atet þa'yaset ñamet ñeñt' atet pena masheñ Pedro. Ñeñto'marña allempopa' ama't masheñ Bernabépa' o' þachet ñaña ñeñt' atet penet ñet. Po'ñoçhpa' ama't eñoteñetañ ama atet aþapahuo.

14 Tarraña allempo nentanet ama e'ñe paçharroye' peneto ñeñt' cohuen ñoñets ñeñt' po'ñoçh Yompor po'ñoñ allempoña napa' atet noch masheñ Pedro e'ñe allo'tsa'yen allohuen acheñenesha', ñeñt'pa' atet noch: "Papa' ama't judioneshapeñpa' tarraña o' peþohua ñeñt' atet pena ñeñt' ama judioneshayaye, te'ñapa' eso'mare'tña þaña'pa' pemneñ

o'ch penoñña ñeñt ama judioneshayaye añ ñoñets ñeñt atet anaret judioneshacop ñeñt ama't p̄apa' ama attey'e' pepeno atet anaret añ ñoñets."

Ama't judionesha'pa' e'ñech attecma a'queshp̄ataretterret ñerra'm ame'ñeretcha' Jesús

15 Yapa' e'ñe judiona'tareshot e'ñalletñay. Tarraña yapa' ama atteyayye ñerra'm ñeñt ama judioneshayaye ñeñt nanac ochñañ.

16 Tarro'mar ya ama't judioneshaypa' yeñoteñ e'ñe yame'ñeñoña Jesucristopa' o'ch pocte' enterrey Yompor, ñeñtpa' ama añoñeyaye o'ch e'ñe yepohua ñeñt atet anaret judioneshacop. Añña e'ñe yame'ñeñoña Jesucristopa' o'ch pocte' enterrey Yompor, ñeñto'marña o' yame'ñera Cristo, tarro'mar yeñoteñ e'ñe yetsoteñoña ñeñt atet anaret judioneshacoppa' amach pocte' enterrye Yompor ama't puesheñarroteya.

17 Ñaña te' yapa' e'ñe yame'ñeñoñ Cristopa' yeñoteñ e'ñech pocte' enterrey Yompor. Tarraña ama't atarr yeyemteñapa' chocmach yentena yapa' ochñañey. Ñeñto'marña sapa' chate' sotenapañ Cristopa' ñeñtte'ña ochña'tatañtetsa. Tarraña ñeñtpa' amaca'ye atteyaye.

18 Tarraña ñerra'm o'ch alla yoc̄tape'cherrerr ora allohuen ñoñets ñeñt atet anaret judioneshacop ñeñt o' yepuesuanom ahuañapa' elloña allempopa' o'ch alla yenterra yapa' nanac ochñañey.

19 Tarro'mar ñeñt ñoñets ñeñt atet anaret judioneshacop ahuatpa' te' napa' neñoteñ ñeñtpa' ama añecpayaye attoch o'ch ya'queshp̄aterra yañeña. Ñeñto'marña ya ñeñtey o' yame'ñera Cristo yapa' o' ya'ypo'ñañper attochña te'pa' o'ch yocrrerra cohuen Yomporecop e'ñe yeyochrohuen.

20 Ñeñto'marña yapa' o' yequechpa'huerr atet muenatse'tatyese't yechets. Ñeñto'marña o' e'ñe atet yeperra ñerra'mrrate' o' corso'tañperryet epay Cristo. Te'pa' ama't ora yocrrenañpa' tarraña ama yaye' corretso, añña Cristo ñeñt yechorrenayapa' ñeñtña corretsa te' yechtso. Te'pa' e'ñe yeyemteñoñ Yompor Puechemerpa' yocrrena e'ñe cohuen arr patsro, tarro'mar ña yemorrenterraya, ñaña ña rromats yocop.

21 Ñeñto'mar te'pa' ama yemno o'ch yehuapore'terrñañ Yompor puemuereña atto apuey Puechemer alloch yequeshperra. Tarro'mar ñerra'm eñalleñ attoch yequeshperra e'ñe yetsoteñoña ñoñets ñeñt atet anaretpa' ñeñteñapa' atto rroma Cristopa' amate' es sherbeno.

3

E'ñe yame'ñeñoña Cristopa' o' yequeshperra, ama añ yetsoteñoñe ñoñets ñeñt atet anaret judioneshacop

1 Sapa' nanac galacio'marneshacha' sepanteñ. Po'ñoñ sa o'ca'ye cha shecaset attoña te' sapa' o'huañ same'ñeñaña ñeñt e'ñe po'ñoñ alloch yequeshperra. Ama't ahuaña allempo yeserrpare'tatensa'pa' yapa' añ yeñotatuas atto po'ñoñ Jesucristopa' o' acorso'tañpsaretta e'ñe yocop. Ñeñtña po'ñoñ same'ñeñaña sa allempo.

2 Ñeñto'marña te'pa' nemneñ o'ch neñotatas ama't añ paterr ñoñets: Sapa' e'ñe seyemteñoñ ñeñt Cristo po'ñoñ attoña chorrasaña Parets Puecamquëñ. Amaña añoñey'e' chorraso e'ñe setsoteñoñ añ ñoñets ñeñt atet anaret judioneshacop.

3 Eso'mare'tña sapa' nanac sepanteñ. Atto sa ahuañapa' añ seyemtena Parets Puecamquëñ ñeñt ahuamencat añaña' eso'mare'tña te'ñapa' o'ch alla seyemterrerr e'ñe sañeña setsotateñ.

4 E'ñehuachñaca' orrena atarr semuerochetyesa. Po'ñoñ ñato' ñeñtpa' amate' e'ñe orrenayaye ñerra'm o'ch alla soctape'cherr cohuen.

5 Ñaña allempo Yomporpa' chorrata Pucamquëñpa' ñapa' añ orrtatonas partsoteñets e'ñe sesho. Ñehua, ñeñtpa' amaca'ye añoñey'e' orrto e'ñe sa setsoteñoñ ñeñt

atet anaret judioneshacop, ñeñtpa' añoĩca'yeña orrta e'ñe same'ñeñoña ñeñt atet yeser-
rpare'tatuas.

Abrahampa' e'ñe pueyemteñoĩ Yomporpa' o' pocte' eñch Yompor

⁶ Ñehua, Abrahampa' nanac yemtane't ñeñt atet och Yompor, ñeño'marña Yomporpa' e'ñe pocte' eñche't.

⁷ Ñeño'marña yeñoteñ ñeñt nanac yemtenaya ñeñt atet oten Yompor ñeñña Yomporpa' e'ñe pocte' enteñ atet ñerra'm puechemereshanet Abraham.

⁸ Yomporpa' e'ñe eñotue't ahuatoteñ ama't ñeñt ama judioneshayayepa' o'ch ame'ñeret esempo, ñaña e'ñe pame'ñeñoĩetpa' pocte'ch enterranet. Ñeño'marña ama't ahuatoteñpa' e'ñe anuaret po'ñoño. Yomporpa' atet otan Abraham: "E'ñe peshotpa' o'ch nebensare'tam̄pes allohuen pa'namen acheñ." Ñeño'marña yeñoteñ ama't ahuatoteñ Yomporpa' serrpare'tatane't Abraham ñeñt cohuen ñoñets alloch yequeshperra.

⁹ Ñeño'marña yeñoteñ te'pa' allohuen ñeñt ame'ñenaya Cristopa' e'ñe attecma cohueno'tsenacma atet ñerra'm Abraham ñeñt nanac ame'ñaye't Yompor ahuat.

¹⁰ Tarraña allohuen ñeñt yemtenaya ñoñets ñeñt atet anaret judioneshacop o'ch e'ñe etsotuet ñetñapa' o' anarettet allohuenetpa' a'coñchatare'tetcha' tarro'mar atet anuaret Yompor po'ñoño ama't ahuatoteñ, ñeñtpa' atet oten: "Allohuen ñeñt ama etsotuenaye e'ñe poctacma allohuen allpon ñoñets ñeñt atet anaret quellco, ñaña ñerra'm ama ñohueto allohuen ñeñt atet anaretpa' a'coñchatare'tetepa'ch."

¹¹ Ñeño'marña yeñoteñ amach pocteye' enterrye Yompor e'ñe yemneññoña o'ch yetsotua añ ñoñets ñeñt atet anaret, tarro'mar amach erroteno't yetsotuo ora allpon ñeñt atet anaret. Ñeño'marña ama't puesheñarrofeyapa' amach pocteye' enterrye Yompor. Ñeño'mar ama't Yompor po'ñoñopa' atet anuaret ahuatoteñ, ñeñtpa' atet oten: "E'ñe yeyemteñoña Yompor ñapa' o'ch pocte' enterrey attoch ello yocrrerra errponohuañen."

¹² Tarraña ñeñt ñoñets ñeñt atet anaret judioneshacoppa' ama atteye' oteno, ñeñtpa' atet oten: "Ñerra'm yepohuencha' e'ñe poctacma ñeñt atet anaretpa' esheccha' ello yocrrerra errponohuañen."

Cristopa' e'ñe pocte' eñch attoch ñach arrnomarettatsa yocop

¹³ Ñoñtsopa' ama't o'patatenyañ coñcheñets tarraña Cristopa' ñaña coñcherrtsa e'ñe yocop attochña yapa' amach yecoñcherro. Ñeñtpa' yeñoteñ tarro'mar ama't ahuatoteñpa' atet anuaret Yompor po'ñoño, ñeñtpa' atet oten: "Ama't erra'tsena acheñer puepen-cateñme'chatset cho echañchet tsachopa' ñeñtpa' a'coñchatare'tcha' entyes acheñenesha'."

¹⁴ Ñeño'marña yeñoteñ e'ñe pame'ñeñoĩet Jesucristopa' o'ch eñalleta attoch Yomporpa' e'ñech pocte' entanet ñamet ñeñt ama't ama judioneshayaye, attecma pe't ahuatoteñ Yompor e'ñe pocte' entane't Abraham. Ñaña e'ñe yame'ñeñoĩpa' attoña eñall attoch chorrerrya allohueney Parets Puecamquẽñ, atet Yomporpa' otan ahuat Abraham.

Ñeñt atet Yomporpa' otan ahuat Abraham ñeñcha' atet poñ

¹⁵ Ñehua, masheñeshacha' ñaña nochaneshacha' te'pa' o'ch alla neñotaterrser po'poñ. Ñehua, ñato' o'ch netma'ntacha ñeñt atet yocrrena añ patsro. Atet ñerra'm puesheñarr yacmapa' o'ch a'poctachet epuet po'psheñeñ, o'ch quellcatet, allotpa' o'ch quellca'huet pa'so'cheñ all, allochñapa' amach erroteno't esesha' a'po'poñeterroye po'ñoñ ñeñt atet o' quellcatuet, ñaña attoch amach esesha' huapore'terroye po'ñoñ. Atet yepena yaña ama't acheñaya atet petsa ellohuate'ñaca' Yomporpa' ama pueno po'ñoñ.

¹⁶ Yompor ahuatpa' atet otan Abraham ñeñcha' atet poñ e'ñe puesheñarrof po'ñrenñoñ. Tarraña ama allohuenaye' po'ñrenñecop atet oche, e'ñe puesheñarroca

atet och, ñeñtpa' yeñoteñ ñeñtara ñeñt Cristotats. Ñeñtpa' attecma oten ama't ahuatoteñ Yompor po'ñoñ.

¹⁷ Añmapa' ñeñtña atet neychatenes. Ñehua, yapa' yeñotueñ atto Yomporpa' a'pochtachet ama't ahuatoteñ epuet Abraham. Alloñtñapa' allempo o' met cuatrocientos treinta charpa' allempoñapa' chap allempoch anaretta añ ñoñets judioneshacop ñeñt atet quellcanet Moisés. Tarraña ama't o' anaretta añ ñoñets ñeñt quellcanet Moiséspa' tarraña ñeñtpa' yeñoteñ amach erroteno huapore'tatereto ñeñt atet o' anaretetua ñeñt atet o' a'pochtata Yompor epuet Abraham ama't ahuatoteñ, tarro'mar Yomporpa' ama puenesho po'ñoñ.

¹⁸ Ñaña ñerra'm eñalleñ attoch yequeshperrañ e'ñe yetsoteñoña añ ñoñets ñeñt atet quellca' ahuañ Moiséspa' ñeñtēpñapa' amate' palltenañe attoch Yomporpa' otan ahuañ Abraham o'ch eñalleta e'ñe ña po'mñrenñoñ puesheñarr ñeñtcha' ya'queshpaterre' e'ñe yame'ñoña ñeñt atet oteney.

¹⁹ Añ ñoñets ñeñt atet net allempopa' ñeñtpa' atet pa: Yomporpa' ahua't mueñan po'millañoñeñaneshar attoch ñetpa' o'ch eñorana'chet Moisés attoch ñach a'mte' añ ñoñets judioneshacop. Tarraña añ ñoñetspa' e'ñe tarremphua sherba' allempo huapa Cristo atet Yompor otan ahuañ Abraham. E'ñe po'ñoñch yame'ñoñ a'queshpaterreycha'. Te' ellonetpa' o'ch neñotatas ñeñtēcop nanña ellonet Moisés po'ñoñ. Ñehua, ñeñtpa' añecpa anaretta attoch yeñoch ñeñt allpon ochña'teñets enten Yompor ñaña attoch ñeñtcha' yeñotatene' ñerra'm esempo o' yepohua ñeñt ama pocteye' enteno Yompor.

²⁰ Tarraña allempo Yomporpa' eñorana'tana Abraham ñeñtcha' atet poñpa' allempopa' e'ñe ña ote' allame'tets. Allempo Yomporpa' ama esesha' oto po'psheñeñ ñeñtcha' a'mtahuet añ ñoñets.

Añ ñoñets ñeñt atet anaret ahuatoteñ judioneshacop añecopña sherben ñeñtcha' yame'ñaterraya Cristo

²¹ Ñehua, ñato' sapa' o'ch soten, ñeñtēpñapa' añ ñoñets ñeñt atet quellcanet Moiséspa' ta', chote' epatenan Yompor po'ñoñ ñeñt atet otan ahuañ Abraham. Ñeñtpa' amaca'ye atteyaye. Tarro'mar ñerra'm eñalleñ e'ñech ñoñtsoña ñeñt atet anaret o'ch etserratater-rnayeñ cohuen yeyocher Yomporecoppa' amate' palltenañeña po'poñ attoch pocte' enterrey Yompor; ñeñtpa' e'ñete' ñoñtsoña ñeñt atet anaretpa' o'ch pocte' enterreyeñ Yompor, tarraña ñeñtpa' ama atteyaye.

²² Tarro'mar Yompor po'ñoñ ñeñt anaret ahuatoteñpa' oteney, allohueneypa' e'ñe yo'chña'tuen, amach errotenoñ e'ñe yetsotuoñe ñeñt atet anaret Yomporecop. Ñeñto'marña ñeñtpa' ama añecpayaye alloch yequeshperra. Añña e'ñe yame'ñoña Jesu-cristopa' o'ch yequeshperra, ñeñtara Cristo ñeñt atet Yomporpa' otan ahuañ Abraham.

²³ Ahuañ allempo ama huena' Cristo ñeñtcha' yame'ñerrapa' amach errotenoñ ya'ypo'ñerro añ ñoñets ñeñt atet anaret. Atta yepe't tarremphua allempo huapa Cristo attoña e'ñe yame'ñoña ñapa' o'huañcha' allo'na añcha'noçhta ñoñets yocop.

²⁴ Ñehua, ñato' o'ch netma'ntacha atet. Añ ñoñets ñeñt atet anaret judioneshacoppa' ña yecuanp̄saye't ahuañ. Ñeñtpa' tarremphua atet pa' allempo huapa Cristo, ñaña añ ñoñetspa' añecpa sherba' attoch ame'ñaterraya Cristo, allochñapa' e'ñe yame'ñoña ñapa' o'ch pocte' enterrey Yompor.

²⁵ Tarraña te'ña o' yame'ñera Cristopa' ama yepallteno ñeñtcha' allo'na yecuanp̄se'.

E'ñe yame'ñoñpa' atetcha' enterrey Yompor ñerra'mrrate' e'ñe puechemerey Abraham

²⁶ Tarro'mar te'pa' e'ñe yeparrocmateñoñ Cristo Jesúsapa' o'ch puechemer perrey allohueney Pompor, tarro'mar e'ñe yame'ñoñ Puechemer.

27 Ñaña allohuenes ñeñtes o' sapataretterra e'ñe same'ñeñoñ Cristopa' o' chorrersa Cristo.

28 Ñaña te'pa' e'ñe yeparrocmateñoñ epay Cristo, Yomporpa' ama po'poñe'ttsocmaye' entenye, e'ñe attecma enteney allohueney, ama't judionesha', amapa' ñeñt ama judioneshayaye, amapa' ñeñt ataruasatare't e'ñe atfa, amapa' ñeñt ama ataruasatare'teye e'ñe atfa. E'ñe attecma enteney allohueney ama't asheñorrey, ama't ñaña coyanesha'. Tarraña Yomporpa' e'ñe attecma enteney. Tarro'mar e'ñe yeparrocmateñoñ epay Cristo Jesús e'ñe puesheña'ttsoypa' o'ch e'ñe yeparrocmatua allohueney e'ñe parro.

29 Ñaña ñerra'm yapa' Cristona'tareypa' añña Yomporpa' e'ñe atet enteney ñerra'mrrate' po'm'reneñ peney Abraham. Ñeñto'marña yapa' o'ch yagapapreter ñeñt atet Yomporpa' otan ahuat Abraham ñeñtcha' atet a'nacha.

4

Atto Cristopa' a'huañañperran acheñenesha' atto añcha'noçhtanete't ahuat ñoñets ñeñt atet anaret

1-2 Ñeñt notenespa' ñato' o'ch netma'ntacha atet. Ñerra'm puesheñarr yacma eñall puechemer, esempoña o'ch po'nerr allempoch o'paterrana ora allpon echen pompopor. Ñehua, ama't yeñoteñ ñapa' o'ch o'paterrana ora allpon echen pompopora' tarraña allempo ama po'nenapa' amach es o'patena' ama't coñe'ta. Ñaña allempo ama po'nenapa' amach erroteno't es pa'yesoña e'ñe ñoña, tarro'mar allempopa' chocma eñall puesheñarr ñeñt cohuanpene', ñaña allempopa' chocmach es tsa'teññañet ñeñt chesar. Allempoña atet penapa' chach ottena ñerra'mrrate' atfa ñañreteñet, ama't ora allpon echeneñ pompopora' ñocpañ. Tarraña esempoña chap pompopor ponañcho allempoch po'n puechemerpa' allempoñapa' o'ch agapan ora allpon echen pompopor.

3 Ñeñtpa' atet yepe't yanña ahuat. Allempopa' atet yepe't ñerra'mrrate' cheshanesha'. Ñaña allempopa' añña yame'ñataye't ñeñt poctapña pa'yese't ahuatnanesha' arr patsro.

4 Tarraña allempoña o' etsota allempo onañche' ahuat Yomporpa' o' mueñonay Puechemer arr patsro. Arrñapa' eñalletach puesheñarr coyanesha' ñeñt judiona'tar. Añña ñoñets ñeñt atet anaret judioneshacoppa' nanac añcha'noçhte't allempo ama't ñocop.

5 Tarraña Cristopa' añecop eñalleta attoch a'huañañperrey atto añcha'noçhtena añ ñoñets yocop. Ñeñtpa' añecop atet pa' attoch puechemer perrey Yompor.

6 Te'ña Yomporpa' o' puechemer perrey ñeñto'mar o' mueñernay Puecamquëñ ñeñtcha' yeçherrsya yeyoçhro. Ñeñña Puechemer Puecamquëñpa' ñeñtcha' yeñotatene' ñerra'm esempo yeçhore'ch ama't Paretspa' e'ñe pocte' o'ch yoch, "Apa."

7 Ñeñto'marña te'pa' yeñoteñ o' puechemer perrey Yompor, ama pueñañrayaya penye. Ñeñto'mar yeñoteñ ñerra'm po'ñoçh o' puechemer perrey Yompor, yapa' yo'patapreterach ora allpon o'patatenya te' Yompor.

Ñerra'm yapa' o'ch alla yeyemterrerr añ ñoñets ñeñt atet anaret judioneshacoppa' ñeñtpa' e'ñech orrena nanac yetorrerra

8 Ahuat allempo ama seño'terra' ñeñt e'ñe po'ñoçh Yomporpa' añña seyomporer sepe't ñeñt po'ñoçh ama Yomporeyaye. Sañapa' ñeñta nanac ame'ñatasete't.

9 Tarraña te'pa' o' senterr ñeñt e'ñe po'ñoçh Yompor, amapa' ñato' o'ch yot, Yomporpa' o' enterres sa. Te'ñapa' eso'mare'tña semneñ o'ch alla sepurrerra, o'ch alla same'ñerra añ cotapñats ñeñt ama es sherbeno sañapa' allo'ch po'ñoçh sequeshperra. Eso'mare't semneñña o'ch alla setorrerrerr nanac ñeñt e'ñe orrena.

10 Ñaña sapa' chocma sonañcha'yen yet ñeñtcha' atet setsotayen atto'ch sequeshperañ—pueña'tets arrorr, ñaña pate'tets char, amapa' allempo chocma coshena judionesha'.

11 Ñeñto'marña nellquëñoõpa' atet noten, ñeñt atto netorrena ahuaña socoppa' ñato' amach es sherberro.

Arrpa' all yerpatanet atto ñetpa' e'ñe cohuen agapet allempo ñanom asena' Galacio

12 Te'pa' o'ch masheñneshacha' ñaña nochaneshacha' notas, atarr nemneñ o'ch soctape'cherr atet noctape'chen na. Tarro'mar napa' o' na'ypo'ñerrñañ judionesha' poctapña. Te'pa' o' noctape'cherr ñeñt atet sepe't ahuañ sa, allempo ama soctape'cherrñaña' judionesha' poctapña. Ahuañmo'cha allempo allo'tsenen seshopa' e'ñe cohuen semuera'ne't.

13 Sapa' señotuenen atto napa' allempo ñanom nechap seshopa' napa' cha natsna'tos ñeñto'mar allempopa' eñall attoch neserrpare'tatas añ ñoñets alloch yequeshperra.

14 Ñaña ama't añ atsnañtsorpa' nanac sosey nenteñpa' tarraña sapa' ama setsena'tno, ñaña ama sa'ypo'ña'no. Elloña sapa' o' sagapuen e'ñe cohuen atette'ña ñerra'm Yompor po'millañoñer huetsa sesho, ñaña e'ñe atet sagapuen ñerra'mrrate' ñaña Jesucristotets.

15 Ñehua, te'pa' eso'mare'tña o'huañ tama socsha'na. Ahuañmo'chapa' nanac semuera'ne't, ñaña allempopa' ama't esa nepalltapa' sañapa' o'chcho' sapuen, ñaña ama't añcha' nepalltañe't necle'pa' napa' neñotenes ñerra'm errotenot serrotañ seclle'pa' ama't ñeñtpa' ñeñte' sapnoñe't.

16 Ñato' sapa' chate' sotenapañ chote' o' ne'moñe'tas, tarro'mar napa' o' neserrpare'tatas ñeñt e'ñe po'ñoçh atet noten.

17 Po'potantañ ñeñt seychatene' judionesha' poctapña'pa' ama't nanac ma'yoçhretenañ socoppa' tarraña ñeñtpa' ama añecpayaye attoch yenpaset e'ñe po'ñoçh. Ñetpa' añecpa mopa'tenset attoch o'ch socshapretanet nanac e'ñe ñañeñeta.

18 Ñehua, napa' e'ñe pocte' nenteñ o'ch yemneñ acheñenesha' o'ch coshapretenyet ñerra'm po'ñoçh añecop yema'yoçhrena attoch yeyenpanet e'ñe po'ñoçh. Atet napa'cho'ña nemneñ chocmach socshapretna ama't allempo ama allo'tsenye parro.

19 E'ñe nemorrenteñotes atet nentenes ñerra'mrrate' nechemereshas, ñaña te'pa' alla nemueroçhterrerr socop. Atet nanen atserr atette'ña coyanesha' atsotenaya pue'mar. Tarraña napa' chocmach nemueroçhta esempohuach e'ñe chorrasa Cristo, attoch ñach soctape'chaterre' e'ñe poctacma cohuen.

20 Esuaca' alla nene' tayecma sesho attote' neserrpare'tatas e'ñe cohuen, allochñapa' amate' cha muene' neche'ptare'taso. Tarraña ñeñtpa' amach errotenot, po'ñoçhpa' chocma sellcatenen.

Te'pa' e'ñe yame'ñeñoõ Cristopa' o'huañcha' yeyemta añ ñoñets ñeñt atet anaret; ñeñtpa' añ toma'ntena Agar ñaña Sara

21 Ñehua, te'pa' o'ch se'mñnoten sa ñeñtes muenets o'ch alla seyemterra añ ñoñets ñeñt atet anaret ahuañtoñe. Sapa' ama't señoñe ñeñt atet oten añ ñoñets ñeñt atet anaret.

22 Ñehua, te'pa' o'ch neñotatas ñeñt atet oten ñoñets ñeñt atet anuaret Yompor po'ñoño ahuañtoñe. Ñeñtpa' atet oten: Abrahampa' eñall epsheña puechemer. Puesheñarrpa' arroñ chemere't pueñañreshoñ ñeñt pa'taruasañer pe't. Ñeñt coyanesha'pa' añ sochena Agar. Po'psheñeñña'pa' e'ñe puetaporeshoñ chemere't ñeñt ama pa'taruasañreyaye.

23 Ñeñt puechemer ñeñt eñalletatsa pueñañreshoñpa' atet eñalleta ñeñt e'ñe attecma yeyeçhquëna allohueney acheñey. Tarraña po'poñ puechemer ñeñt eñalletatsa puetaporeshoñ ñeñt ama pa'taruasañreyaye ñeñtpa' añecop eñalleta attoch etsota Yompor po'ñoñ ñeñt atet otan ahuañtoñe Abraham.

24 Ñeñt atet papa' ñeñtpa' añ yeçhateney tarro'mar añ epsheño'mar coyanesha'pa' añ toma'ntena atto Yomporpa' epsheñoñ a'poctatonay. Ñeñt Agarpa' añ toma'ntena atto Yomporpa' eñorana'tanet ahuañ Sinaíño. Allempoteñ anareta añ ñoñets ñeñtcha' atet

etsotetañ. Ñeñña ñoñetspa' añ toma'ntena Agar, tarro'mar ña puechoyoresha'pa' añ añcha'noçhtana'tenahuet añ ñoñets ñeñt atet anaret.

²⁵ Agarpa' po'ñoçh shallchenana aspenet Sinaípen ñeñt Arabio'tsen. Ñaña ñeñtara Agarpa' toma'ntenana judionesha' ñeñt pa'netser pene' Jerusaléñ. Tarro'mar allohuen judiona'tarpa' teme'ttsen añ añcha'noçhtana'tenahuet añ ñoñets ñeñt atet anaret ahuatoteñ.

²⁶ Tarraña ñeñtey ame'ñenaya Cristopa' añ ñoñets ñeñt atet anaret ahuatoteñpa' ama añcha'noçhteno yocop. E'ñe yame'ñeñoña allohueney Cristopa' e'ñe cohueno'tseney. Ñaña ñeñtpa' e'ñe cohuen yenteñ atet ñerra'mrrate' yachor. Ñaña ñeñtpa' atetcha' netma'ntatererr atet: E'ñe yeparrocmateñoñ allohueney epay Cristopa' e'ñe attey ñerra'm Yompor pa'netser etserra Jerusaléñ, ñaña ñeñtpa' e'ñe atet yenteñ ñerra'mrrate' yachor.

²⁷ Ñeño'marña atet anuaret Yompor po'ñoñ ahuatoteñ, ñeñtpa' atet oten toma'nteñtso:

Coshepa' coyanesha' mueçhoþ ñeñt ama achyore'tño, ñaña pocsheñeshoþpa' rranare'tepa' ñeñt ama't ahuatapa' ama patsotarano pue'mar, tarro'mar ama't añ coyanesha' ñeñt aqueçparet mame' (ñeñtara Sarapa') shonte'ch acheñenesha' pachor perre'. Elloch metanerran allpon puechoyor echen ñeñt agapue' puerrollar (ñeñtara Agar).

Ñeñt ñoñetspa' añ toma'ntena atto te'pa' yame'ñeñoñ Cristo ñeñña nanac sherbets attoch atonterra acheñ ñeñtcha' pueyochresha' perr Yompor. Tarraña ñoñets ñeñt atet anaret ahuatoteñpa' ñeñtpa' ama tama sherbeno attoch atonterra ñeñtcha' pueyochresha' perr Yompor.

²⁸ Ñehua, o'ch notas masheñneshacha' ñaña noçhaneshacha', allohueney ñeñtey ame'ñenaya Cristo, yapa' attey ñerra'm Abraham puechemer ñeñt Isaac ñeñt eñalletatsa attoch etsota Yompor po'ñoñ ñeñt atet otoñ pompor Abraham. Tarro'mar yapa'cho'ña attoña ye'ñalletterra ello attoch etsota Yompor po'ñoñ ñeñt atet ote't ama't ahuatoteñ.

²⁹ Tarraña ñeñt eñalletatsa ahuat ñeñt e'ñe attecma yeyeçquëna allohueney acheñey (ñeñt sochet Ismael) ñapa' çhocma e'moñe'tane't ñeñt eñalletatsa atto etsota Yompor po'ñoñ. Attecmach perra ñaña te'. Ñeñtcha' eñallettertsa ñeñt e'ñe attecma yeyeçquëna allohueney acheñey ñeñtara ñeñt muenene' o'ch etsotan judionesha' poçtaþña ñetpa' çhocmach e'moñe'tenyet ñeñtey eñallettertsa Yompor Puecamquëñoñ.

³⁰ Ñehua, ama't señoñeña ñeñt atet oteney Yompor po'ñoñ ñeñt anuaret ahuatoteñ. Po'ñoçh oteney atto Yomporpa' otan ahuat Abraham ñeñtpa' atet och: "O'ch pehuapore'ch peñañra epuet puechoyor; tarro'mar ña puechoyorpa' amach es o'patapretaþo, amach atteye' þo puechoyor ñeñt eñalletatsa peþaporeshot ñeñt ama þa'taruasañreyaye."

³¹ Ñeño'marña te' masheñneshacha' ñaña noçhaneshacha' o'ch alla noterrser: Ama pallteno o'ch yame'ña judionesha' poçtaþña. Nato' o'ch netma'ntacha atet: Ama puechoyoreyaye Abraham pueñañra ñeñt pa'taruasañer e'ñe atta. Añña puechoyorey Abraham puetapor ñeñt ama pa'taruasañreyaye. Ñeñtara ñeñt yoten e'ñe yame'ñeñoña Cristopa' e'ñech cohueno'tseney.

5

Atto te'pa' atarr cohueno'tseney, te'ñapa' amach yequeçpatstere

¹ Cristopa' o' a'poçtaterrnay attoch e'ñe yame'ñeñoña' cohueno'tseneycha'. Attoch yocoppa' amach añcha'noçhteno ñoñets ñeñt atet anaret judioneshacop. Ñeño'mar te'pa' amach allo'na same'ñatsterrerro judionesha' poçtaþña ñeñt nanac amuroçhtatañ. E'ñepa'chña huomenc seþa' seyoçher Cristocop.

²Ñehua, te'pa' o'ch se'mñnoten na ñeñten allsensareten ñeñtcha' atet notas: Ñeñt atet seyemtenañ atto'ch sequehperra e'ñe setsorranna'teño'apa' tarraña ñeñto' Cristopa' amach erroteno' yenpaso.*

³Tarraña te'pa' o'ch alla noterrser, ñeñt muenets o'ch atsorrare'tapa' ñehua, po'ño'ch añ palltetsa ñaña o'ch e'ñe etsotuan ama't ñaña allohuen ñoñets ñeñt atet anare't judioneshacop.

⁴Ñeñtes muenets o'ch pocte' entas Yompor e'ñe setsoteño' ñoñets ñeñt atet anare'tpa' sañapa' o' alla sequehperra Cristo. Ñeñto'marña te'pa' amach erroteno' muererrro Yompor.

⁵Tarraña yapa' e'ñe yeyemteño' Cristopa' e'ñe yocsheñsha' yecuen esempohuañencha' ye'chacherr Yompor sho tarro'mar yeñoteñ o' pocte' entuerrey Yompor. Ñaña e'ñe ña Puecamquëño' te'pa' o' ya'pocataretterra.

⁶Ñerra'm o' yeparrocmaterr epay Cristo Jesús'pa' ama sherbeno atto yetsorranna'tena, ñaña ama't ama atsorrare'teyepa' ñeñt'pa' cho'ña ama sherbeno Yompor cop. Aña ñapue't sherbets e'ñe yame'ñeño' Cristopa' o'ch yemorrentanna'ta.

⁷Sa ahuañmo'chapa' e'ñe cohuen same'ñye't Cristo. Te'ñapa' po'ño'chca'ye o'cha a'psaterrsetña añ ñoñets ñeñt e'ñe po'ño'ch Yompor po'ño'ñ.

⁸Ñeñt'pa' ama Yompor eye' sa'psatenaye, tarro'mar ñapa' o' hua'ñerres o'ch same'ñerrñaña Puechemer Cristo.

⁹Ama't seño'teñe ama't puesheñarra ye'chatats po'poñ ñeñt ama po'ño'choyayepa' mameshapa' o'ch epa'hua erracmañen ñeñt atet ye'chaten. Ñato' o'ch netma'ntacha atet pena chase'. Ama'tcha' coñe'ta chasetoll yena'pa' mameshapa' o'ch a'chasa'huan emasa.

¹⁰Tarraña ñeñt semoñne'tatene'pa' tsa'taterach Yompor, ama't erra'tsena atet petsa. Tarraña na e'ñe neyemteño' Yepartsesharpa' neñotenes te'pa' o'ch alla sequehperr ñeñt atet ye'chatenes po'psheñeñ, o'ch alla same'ñerra ñeñt ney'chatenes.

¹¹Ñato' napa'cho'ña chate' otyennet año' neserrpare'taten o'ch yetsorranna'ta attoch ye'queshperra. Ñehua, masheñeshacha' ñaña no'chaneshacha' ñerra'm po'ño'ch ñeñtara neserrpare'tateneñ atet'pa' amate' erroteno' e'moñe'tennoñeña judionesha' ñeñt serrpare'tene' o'ch yetsorranna'ta. Tarraña po'ño'chpa' ama atteye' neserrpare'tateno. Añña neserrpare'taten atto Cristopa' rroma corsocho yocop atto tsa'tuerrnaya yo'chñar, allochñapa' e'ñe yame'ñeño'ta ñapa' o'ch ye'queshperra. Ñeñtña atet neserrpare'teño' añña ñeñt serrpare'tene' o'ch yetsorranna'tapa' ñetñapa' ñeñtña nanac atsrre'matenahuet. Ñerra'm o'huañcha' atet neserrpare'taña' o'huañte' e'moñe'tnetañ.

¹²Napa' atarr nemneñ ñeñt chocma semoñne'tatene'pa' o'te' alla que'chpa'nerres.

E'ñe yemorrenteño' yamo'tspa' o'ch e'ñe yetsotua allohuen ñoñets ñeñt atet anare't Yompor shot

¹³Tarro'mar sa masheñeshacha' ñaña no'chaneshacha' o' hua'ñerres Yompor attoch cohueno'tsenescha'. Ñapa' ama mueno o'ch añcha'no'chtana socop ñoñets ñeñt atet anare't. Tarraña ama't o' hua'ñerrey Yompor attoch cohueno'tseneypa' ñeñt'pa' ama añecpayaye o'ch ye'pa'yesa nanac sosey ñeñt atet muenateney yechets. Ñapa' mueneñ e'ñe yemorrentanna'teño'pa' o'ch yeyenpanna'ta, tarro'mar yapa' cohueno'tseney.

¹⁴Ñerra'm cho yemorrencha yamo'tspa' ñeñt'pa' attoch ama't e'ñe parrotapa' o'ch yet-sotua ora allohuen ñoñets ñeñt atet anare't ahua'toteñ Yompor shot, tarro'mar Yompor po'ño'ña' otene'y: "Atarrepach semorreñcha samo'ts e'ñe atet atarr semorrentena sañeña."

* 5:2 O'ch secue' nota 2.3.

15 Tarro'mar ñerra'm sapa' chocma se'moñe'teñ samo'ts, amapa' cha amtsen senteñ samo'ts, ñeñtpa' ama pocteyaye atet sepena, tarro'mar ñerra'm atet sepenapa' señoche'ch attotcha'ña chach sa'chencatannerra e'ñe sagattsa.

Ñeñt atet cotape'chateney Parets Puecamquëñ, ñaña ñeñt atet muenateney yechets

16 Tarraña napa' o'ch notas ñeñt poctetsa ñeñtcha' atet sepa. E'ñepa'chña cohuen socrena Partsocop ñeñt atet cotape'chatenes Parets Puecamquëñ. Allochñapa' amach allo'na sepa'yesneno ñeñt atet muenatyenes sechets.

17 Tarro'mar ñeñt atet muenatse'tateney yechetspa' ñeñtpa' ama yemtenano ñeñt atet cotape'chatyeny Parets Puecamquëñ. Añpa'cho'ña Parets Puecamquëñpa' ama yemtenano ñeñt atet muenatse'tateney yechets. Ñeñto'marña amach errotenot yoctape'cho e'ñe patrpa' cotapñats, tarro'mar ñetpa' cha e'moñe'tannenet.

18 Tarraña ñerra'm po'ño'ch yepa atet cotape'chateney Parets Puecamquëñpa' allem-popa' amach errotenot añcha'no'chto yocop añ ñoñets ñeñt atet anaret ahuatoteñ, tarro'mar ñapa' añcha' pateney ñeñt atet muenen Yompor.

19 Ñehua, yapa' o' yeñotuer ñeñt atet muenatse'tateney yechets. Ñeñt allpon yemnatse'tyenpa' ñeñtpa' atet ñerra'mrrate' erra'tsente' cheta'yene' coyanesha' ñeñt amach puetapoyeyaye, atet ñaña erra'tsente' coyanesha' ñeñt cheta'yene' yacma ñeñt ama puerrollareyaye, ñaña atet ñerra'mrrate' ñeñt nanac cotape'chyene' sosya'tsañ, ñaña ñeñt nanac yomenaya ottatsñats.

20 Ñaña ñeñt po'yomporer pa'yene' po'poñe'chno ñeñt ama po'ño'ch Yomporeyaye, ñaña atet pena achyo'tañe'chno, amapa' ñeñt atet pena pa'llerrnanesha' ñaña ñeñt atet pena amase'ñeñt. Ñaña po'poñ ñeñt atet muenatse'tyen yechetspa' ñeñtpa' atet ñerra'mrrate' e'moñe'tanna'teñets, ñaña orroteñets, ñaña ye'chapretanna'teñets, ñaña atsrre'mare'teñets, ñaña moparrñats, ñaña elloptanneñets atto amach e'ñe amo'tstanneneto, ñaña atet pena ñeñt cotape'chyene' po'poñ cotapñats ñeñt ama po'ño'choyaye.

21 Ñaña po'poñe'chno ñeñt atet muenatse'tyen yechetspa' atet ñerra'm ye'chapreteñets, ñaña muetsanna'teñets, ñaña posa'tarñats, ñaña arepsarñats porrare'teñoñ, ñaña eñallmeñ po'poñe'chno shonte' attema't ñeñt atet o' notua. Te'pa' o' alla noctape'chaterrser ñeñtara atet notuanmas ama't ahuaña, ñeñt atet petsapa' amach es o'patatereto all añcha'tareñtana Yompor.

22 Tarraña ñeñt pene' cohuen ñeñt atet yechateñ Parets Puecamquëñpa' ñeñtpa' atetcha' pena, o'ch morrentenana pamo'ts, ñaña e'ñech cosha'huenta pueyo'chro Yomporecop, ñaña amach es llecatenaye ama't e'ñe mamesha, e'ñech ahuenta'huenan allohuen ñeñt echarr entyen. Ñaña ñeñt pene' cohuen ñeñt atet yechateñ Parets Puecamquëñpa' o'ch amuerañtana, ñaña o'ch yenpa'yenan pamo'tsesha', ñaña erroñ otpa' atetcha'cho' pena.

23 Ñaña amach atsrre'ma'peno ñaña e'ñech puetpara es pa'yen. Ñerra'm ñeñtña atet o' ye'pohuapa' o'ch yetsotua allohuen ñoñets ñeñt atet anaret Yomporeshot.

24 Ñaña ñeñt po'ño'ch o' pueyochresha' perr Cristo Jesús'pa' o' huennerran ñeñt atet muenatse'tyen yechets ñeñt atto es yeye'chyena ya acheñey. Ñeñtpa' e'ñech atet yentena ñerra'm acorso'tamñsaretey.

25 Atto Parets Puecamquëñpa' o' apuerrey attoch yocrrerra e'ñe cohuen Yomporecop, te'pa' añ pocte' o'ch yepa'yena e'ñe cohuen ñeñt atet cotape'chateney Parets Puecamquëñ.

26 Amachña cha yommo'chueno, ñaña amach cha es yotnare'tanna'tyeno, ñaña amach cha ye'chapretanneno.

6

Añ pocte' chocmach yeyenpanna'ta attoch yemesha allohuen topateñets

¹ Ñaña o'ch masheñneshacha' ñaña nochaneshacha' notas, ñerra'm esempo señoteñ po'psheñeñ o' p'ohua ñeñt' ama pocteye' enteno Yomporpa' sa ñeñtes o' cotape'chaterres cohuen Yompor Puecamquëñpa' sach alla cotape'chatterahuet cohuen attoch alla tanterret Yomporecop. Tarraña e'ñe semuereñoñpa' e'ñech aco'pa soctape'chatanet cohuen. Tarraña sapa'cho'ña e'ñech seño'ta, te't sapa'cho'ña attecma se'pa saña ñerra'm esempo topatenes oneñe't o'ch p'atenes ñeñt' ama pocteye' enteno Yompor.

² Ñaña añ poctetsa chocmach yeyenpanna'ta attoch ya'huanta'hua allohuen topateñets. Ñerra'm atetña ye'pohuapa' o'ch yetsotuoñ Cristo po'ñoñ ñeñt' atet' otene'y o'ch yemorrentanna'ta.

³ Ñerra'm esesha' pommo'cheño't oten, "napa' ama cho es neye'chcateno Yomporecop ñeñt' ama pocteyaye'", ñeñtpa' ñañeñach shequë'tsa, tarro'mar po'ño'ch ñeñt' atet' acheñpa' amach es sherbeno Yomporecop.

⁴ Tarro'mar puesheña'ttsoypa' choch ñanom yeñota errotente'ña yocrrena. Ñerra'm yeñotena e'ñe po'ño'ch cohuen yoc'tape'chen yeyochropa' ñeñt'ña nanac acsha'po'. Tarro'mar ama acsha'pahuo ñerra'm esempo yeñch po'psheñeñpa' o' p'ohua ñeñt' ama pocteye' enteno Yompor.

⁵ Ñaña añ pocte' e'ñe puesheña'ttsoy o'ch ya'huanten topateñets ñeñt' yehuenoya.

⁶ Ñaña te'pa' o'ch notas po'poñ: Ñeñt' e'mñotene' Yompor po'ñoñpa' añ pocte' o'ch es cohuen apa'yaset ñeñt' ye'chatenahuet Yompor po'ñoñ.

⁷ Amach sepantatsche, o'ch seño'ch po'ño'ch Yomporpa' ama allocchame'tpahuo. Tarro'mar ñerra'm yeye'chcaten ñeñt' cohuentetsa Yomporecop arr partsropa' ñach yapuerre' ñeñt'cha' yocshatterre' tsapa'one't. Tarraña ñerra'm ye'pa'yes ñeñt' ama cohue-nayaye, ñeñtpa'cho'ña ñach yetsa'taterraya esempohuañen. Ñato' o'ch netma'ntacha atet'. Ñerra'm es yenare'tpa' ñeñt'cha'cho' emere'tats tsapa'one't.

⁸ Attecma ñaña ñerra'm añ ye'patse'tyen ñeñt' atet' muenatse'tyen yechetspa' ñeñt'ara ñeñt' ye'pa'yenapa' a'chencataterreycha'. Tarraña ñerra'm añ yoc'tape'chen cohuen ñeñt' atet' cotape'chateney Parets Puecamquëñpa' ñeñt'ara Puecamquëño'tpa' yocrrerach esempohuañen. Ñato' o'ch netma'ntatererr atet': Ñerra'm te'pa' e'ñe cohuen yenare'ten, tsapa'one'tpa' nanaccha' coshatterrey. Tarraña ñerra'm te'pa' ama cohue-naye' yenare'teno, tsapa'one'tña'pa' nanaccha' llecatterrey.

⁹ Ñaña amach yemuenme'chatsche pa'yese' ñeñt' cohuenetyetsa Yomporecop. Tarro'mar esempohuañen allempoch e'ñe pocte' enteñ Yomporpa' apuerreycha' ñeñt'cha' yocshatterre' ñerra'm amach cha yeque'chpuere. Ñato' o'ch netma'ntatererr atet': Ñerra'm te'pa' ama yemuenme'cheñe nare'tatspa' tsapa'one'tña'pa' nanaccha' shonte' me'tarsats.

¹⁰ Ñeñto'marña te'pa' o'ch notas: Chocmach yeyenpa'yes allohuen yamo'tsesha' tayepa'tña orameñ attoch yeyenpanna'ta. Ñaña añña nanac cohuen ñerra'm cho yeyenpueñ yamo'ts ñeñt' parro' o' yame'ñera Cristo.

Arrpa' all so'terranet añ cartot

¹¹ Te'pa' e'ñe na nototpa' o'ch nequellconas mame'. Sapa' o'ch sent ñeñt' atesha-cillo'yerr quellecpa' ñeñtpa' na quellquëne'.

¹² O'ch alla noterrser: Ñeñt' muenene' o'ch tsorraspa' añecpa mueneñet attoch judionesha'pa' o'ch cohuen entanet. Tarro'mar ñetpa' ama mueneñeto o'ch e'moñe'tanet judionesha'. Ñetpa' eñoteñet ñerra'm o'ch serrpare'tet atto e'ñe yame'ñeño'ta Cristo

ñeñt̃ rromats yocop o'ch yequeshpapa' añña judionesha'pa' o'ch e'moñe'tanetpa' o'ch cofare'tanet.

¹³ Tarraña ama't ñeñt̃ o' atorrare'tetuapa' ama ame'ña'hueneto allohuen ñoñets ñeñt̃ atet anare't judioneshacop. Ñetpa' añña muenenet e'ñe same'ñeñoñ ñetpa' o'ch tsorreatenset attoch ñetpa' o'ch ommo'chuernaset judioneshesho sechets.

¹⁴ Tarraña napa' ama't ahua'tapa' ama nemno o'ch atet nommo'chena. Napa' añña nemnen chocmach na'ye'chochtatoñ Yepartseshar Jesucristo ñeñt̃ rromats corsocho yocop. Ñeñt̃ña name'ñeñoñ o' neunerr ñeñt̃ atet nemnatse'tyese't ahuañmo'cha ñeñt̃ patso'marecpa. Te'pa' o'huañ nommo'cha ñeñt̃ patso'marecpa. Napa' atet nentena ñerra'm acorso'tam̃psareten.

¹⁵ Ama't ya'tsorrare'ttatstapa' ñeñt̃pa' ama es sherbeno. Ñaña ama't ama ya'tsorrare'ttatstopa' ñeñt̃pa'cho'ña ama es sherbeno. Añña nanac sherbets Yomporecop, o'ch yeterrataterr yocpa'ña, o'ch yeye'chquerra etserra Yomporecop.

¹⁶ Yomporepa'chña sa'nataya allohuenes ñeñtes atet petsa ñeñt̃ atet o' notuas ñeñt̃ cohuentetsa Yomporecop. Ñaña Yomporepa'chña semueraya allohuenes ñeñtes po'ño'ch Yomporena'tares.

¹⁷ Te'pa' ama pocteyaye ama't puesheñarrapa' o'ch alla orrtaterrnanerr ñeñt̃ atarr echarr nenten nocop tarro'mar ñeñt̃ atet ney'chatenpa' ñeñt̃ña po'ño'ch Yompor poctap'ña. Tarro'mar teme'ttsen orretyena nechets all mare'tayena all atserrpatse'tyesnet ahuañmo'cha. Te'pa' ñeñt̃ña eñotatyenahuet po'ño'ch napa' netorrena Jesúsocop ñeñt̃ Yepartseshar yepen.

¹⁸ Te'pa' ñeñtach masheñneshacha' ñaña no'chaneshacha' notas, Yepartsesharepa'chña sa'nataya, ñeñt̃ara Jesucristopa' ñepa'chña semueraya. Ñeñt̃pa' attetepa'chña Nompore. Allohua.

Pablo

AÑ SAN PABLO PO' CARTA ÑEÑT̃ QUELLCAN EFESO' MARNESHA' EFESIOS

Atto Pablopa' quellcan carta añecop ñeñt̃ ame'ñetsa anetso Efeso

¹ Masheñeshacha' ñaña nochaneshacha' ñeñtes allohuenes pueyochresha' o' perres Parets ñeñtes ame'ñenaya Cristo Jesús all anetso Efeso. Na Pablon sequellquëne'ña añ carta ñeñten Jesucristo puellsensaren tarro'mar ñeñtpa' atet muenen Yompor.

² Te'pa' e'ñe nehuom̃cha'teñoŧes sa, napa' o'ch notas: Yomporepa'chña seben-sare'tam̃pene' ñeñt̃ nanac Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyo'chro allohuenes.

Atto Yomporpa' e'ñe pa'nateñoŧey 'chocma apueney ñeñt̃ atarr cohuen sherbets yecamquëñecop

³ Te'pa' aye'cho'chtatpahuëpa'ch Yompor ñeñt̃ Pompor pen Yepartseshar Jesucristo. E'ñe yeparrocmateñoŧ epay Cristo, Pomporñapa' e'ñe pa'nateñoŧey 'chocma coŧape'chateney ora allpon ñeñt̃ esocmañen co'chnesha'tetsa all pue'ntaño ñeñt̃ atarr sherbets yecamquëñecop.

⁴ Atet̃ ahuat̃ pa'motroteñ̃ allempo ama aye'chcataret̃tena' añe patserpa' Yomporñapa' allempoteñña acram̃perrey parro epay Puechemer Cristo attoch yapa' a'parrocmataterreycha' epay Puechemer. Tarro'mar añecop acram̃perrey Puechemereshoŧ allochña yapa' añach e'ñe yema'yo'chrena ñeñt̃ cohuentetsa Partsocop. Allochñapa' attochña e'ñe pocte' entueney Yompor, amach eñalle attoch otteñe'cherrey ama't e'ñe mamesha.

⁵ Ñapa' atarr morrentenya; e'ñe puemorrenteñoŧeyypa' o' e'ñe a'pocatonay yocop ama't ahuatoteñ̃. Ñeñtpa' attochña e'ñe puechemer perrey. Ñeñtpa' añña e'ñe etsotatuerre' Puechemer Jesucristo. Yomporpa' e'ñe atet̃ a'pocatuonay tarro'mar ñeñt̃ atto morrentenya ñapa' atet̃ña muenen.

⁶⁻⁷ Aye'cho'chtatpahuëpa'ch Yompor atto ñapa' atarr nanac cohuen muerenya. Atto ñapa' ahuo't mueñonay Puechemer Cristo ñeñt̃ rromosets yocop. Atto ashataret̃ta po'rras ñeñtpa' alloña tsa'tuerrnaya yo'chñar. Te'ña ya e'ñe yeyemteñoŧ Puechemer, Pomporñapa' attoña o' e'shohuerrnaya ñeñt̃ yo'chñar yepe't̃. Ñeñto'marña yapa' yeñoteñ̃ ñapa' atarr morrentenya. Atto atarr morrentenana Puechemer Jesúsapa' yapa'cho'ña atfecma atarr morrentenya e'ñe yeparrocmateñoŧ Yompor Puechemer.

⁸⁻¹⁰ Yapa' yeñoteñ̃ Yomporpa' atarr morrentenya tarro'mar ña te'pa' o' eñotatuerrey e'ñe ora ñeñt̃ atet̃ coŧape'chen ña ama't ñeñt̃ ama eñotpahuo ahuatoteñ̃. Ñapa' o' e'ñe eñotaterrey yeyo'chro ñeñt̃ atet̃ muenen ña. Ñeñtpa' añña atet̃ muenen ña: Ñerra'm esempoch chap allempoch etsoterra allempo onañche' ahuat̃ Yomporpa', allempoña Cristo ñach etsotatuerre' allohuen ñeñt̃ allpon eñall, ama't ora allpon ñeñt̃ pue'ntaño'tsa'yen ama't ñaña ora allpon ñeñt̃ añe patsro'tsa'yen. E'ñech Cristesho a'yapa'cha'huerret̃ allcha'ña e'ñe yeparrocmatuerr̃ allohueney.

¹¹ Yomporpa' atarr co'chnesha' o'patatenana Puechemer Cristo. Ya'naña e'ñe o'patatena atto e'ñe yeparrocmateñoŧ Cristo. Ñehua, ñeñtpa' atet̃ coŧape'che't̃ Yompor ahuat̃ yocop. Ñeñto'marña te'pa' atet̃ña o' perrnaya ñeñt̃ atet̃ coŧape'che't̃ ña ñeñt̃ e'ñe pocte' ente't̃ e'ñe ña pomnenñoŧ. Tarro'mar Yomporpa' ama puenesho po'ñoñ, 'chocmach e'ñe etsotuerra ñeñt̃ allpon atet̃ onañchen ña.

12 Ñeñtpa' atet e'ñe cohuen p̄onay Yompor allochñapa' attochña ya'ye'chochtaterrñañ ora allohuen ñeñt̄ po'cohuenña pen ña, allohueney ya ñeñtey yanom o' yeyemterrñaña Puechemer ñeñt̄ara Cristo.

13 Sapa'cho'ña te'pa' o' se'muerrñañ Yompor po'ñoñ ñeñt̄ ñoñets e'ñe po'ñoçh alloch sequeshperra sam̄a. Attoña sapa'cho'ña o' same'ñera Cristo. E'ñe seyemteñoña sa, Yomporñapa' o' chorraterrsa Puecamquëñ ñeñt̄cha' señoate' po'ñoçh o' puechemer perres. Ñehua, ñeñtpa' ñeñt̄ara Parets Puecamquëñ ñeñt̄ atet ote't̄ ahuat̄ Yompor ñeñt̄cha' aphuerrey esempo.

14 Ñeñt̄ara Puecamquëñ ñeñt̄ apueneñ ñanom ñeñtpa' ñeñt̄cha'ña yeñoate' orameñ ñeñt̄ o'patatenya Yompor. Attochña ñerra'm esempo a'queshpaterrey poctacma ñeñtey o'patatena, allempochña yaguërr ñeñt̄ allpon orameñ o'patatenya. Ñeñto'marña añ poctetsa ya'ye'chochtatoñepa'ch ora allohuen ñeñt̄ po'cohuenña pen ña.

Arrpa' atto ma'yocham̄penanet Pablo

15 Ñeñto'marña na te'pa' o'ch notas, napa' o' ne'mare'tas atto sapa' atarr same'ñeña Yepartseshar Jesús ñaña ne'mare'tenes atto sapa' e'ñe cohuen semuerannena allohuenes ñeñtes pueyochresha' perres Parets.

16 Ñeñto'marña napa' chocma neparasyoso'teñ Yompor allempo nema'yocham̄pensa.

17 Ñaña nenamuennas Yompor ñeñt̄ Pompor pen Jesucristo, ñeñt̄ara Yompor ñeñt̄ atarr cohuen Partsotets. Añ nenamuennas, Yompor Puecamquëño'tpa' eñotatasepa'ch ñeñt̄ e'ñe atet pena ña pocta'pña. Attochña sapa' esheccha' señoaterrña ñeñt̄ atarr cohuen sherbets ñocop ñeñt̄ ama't̄ ahua'ta sapa' ama señoateñe.

18 Ñaña ñapa' chapatonascha' seyoçhro attochña señoaterrñañ ora allpon ñeñt̄ po'cohuenña ñeñt̄ yecuen ñeñt̄cha' aphuerrey Yompor esempo tarro'mar yapa' ñeñtecopña chore'terrey ahuatoteñ. Ñaña o'ch señoçh atarr nanac cohuen ñeñt̄cha' aphuerrey Yompor, ñeñtpa' alloch yapa' corretsayach errponañohuen allohueney ñeñtey pueyochresha' pen.

19-20 Ñaña te'pa' o'ch señoaterrñañ Yompor po'huamenc atarr nanac huomenc ama atpa'huapahuo ñeñt̄ atet ahuamencat̄ peney allohueney ñeñtey ame'ñenaya ña. Ñeñtpa' ñeñt̄ara po'huamenc ñeñt̄ atarr huomenc orrtatan allo tantaterran Puechemer Cristo allempo rroma. O' tantater ñeñt̄ara po'huamencot̄ attoña chapater ñesho allñapa' anorruerr Pompor po'cohuenrot̄ all pue'ntaño allña e'ñe partsotuerr epuet Pompor.

21 Ña te'pa' atarr am̄cha'tare'tena nanac. Atto am̄cha'tare'tena ñapa' ñeñtpa' e'ñe metana'tuenan ora allpon allohuen ñeñt̄ am̄cha'tare'tetyetsa ñaña ora allpon allohuen allsensare'tetyetsa ñaña ora allpon allohuen ñeñt̄ ahuamencatetyetsa ñaña ora allpon allohuen ñeñt̄ ayochreshatetyetsa ñaña ora allpon allohuen ñeñt̄ cohuen entyetsa ama't̄ allohuen so'chñetsoçhno. Cristoña po'huamencot̄ e'ñe metana'tuenanet allohuenet. Ñaña ñapa' ama mamecpayaya atet peno, ñapa' tayoteñña ñaña errponañohuencha' atet pena.

22 Ñaña Yomporpa' o' nan Puechemer Cristo allochñapa' ñach pomnaren pene' ora allpon ñeñt̄ esocmañen eñall. Ñaña allohuen allpon ñeñt̄ ame'ñenaya, Yomporpa' attoña apanet Puechemer allochñapa' ñach yochresha'tenahuet allohuenet.

23 Ñato' o'ch netma'ntacha atet: Allohueney allponey ñeñtey ame'ña'yenaya Cristo, Cristoñapa' e'ñe yeyoçher* yepohueñ allohueney, yañapa' Cristo po'chets yepene' allohueney. Ñeñto'mar ñeñtey ame'ñenaya Cristo e'ñe allohueney e'ñe parrocmay, Cristoñapa' e'ñe ña yechorra'huenaya, tarro'mar ñapa' e'ñe po'chets pohueney allohueney.

* 1:23 Ñehua, po'ñoçh Cristopa' arr atma'ntataret̄ atet ñerra'mrate' ñeñt̄ yoñ yepen.

2

Atto Yomporpa' e'ñe puemuerenõtey ya o' a'queshpaterrey

¹ Ama't atet ñerra'm sa. Sapa'cho'ña ahuatpa' aña soctape'chyese't ñeñt ama cohuenaye' enteno Yompor.

² Aña seyche't ñeñt atet pãtse'tyena acheñenesha' arr patsro ñeñt ama ame'ñetso. Allempo sapa' aña same'ñataye't oneñeñt ñeñt pa'micha'tareter pen allohuen ñeñt erracmañen amicha'nochetsetsa ento't ñeñt ama entpahuoyaye. Ñeñtña oneñeñt poctapñapa' ñeñt atarr coshatene' allohuen acheñenesha' ñeñt atparñaattetsa te' arr patsro.

³ Ñehua, ama't allohueney ahuatpa' e'ñe attecma yeyche't. Aña yoctape'chyese't ñeñt e'ñe atet yemnatse'tyen ya, ñeñt atet muenatse'tateney ya yechets ñaña ñeñt cohuen yente't e'ñe yañeña yoctapñot. E'ñe ya yoctapñot ñeñt atet yeyche'tpa' ñeñtña e'ñe yoctape'chatse'tatiesaye't. Ñeñto'marña Yomporpa' aña o'patatye't attoch coñchaterrey. Ñehua, ama't allohuen po'potantañ acheñenesha' ñeñt atet pãtse'tyesete'tpa' Yomporñapa' e'ñe attecma o'patatanete't ñeñtara coñcheñets. Ñerra'm allempocmach yerromaña' e'ñech yechenca'huerrañ,

⁴ tarraña Yomporñapa' atarr nanac amorrentña, atarr muerenya. E'ñe ña puemuerenõteypa' o' a'queshpaterrey.

⁵⁻⁶ Ñato' o'ch netma'ntacha atet ñerra'm o' yerroma yo'chñarot tarraña Yomporpa' o' alla tantaterrey. Ñehua, allempo tantaterran Puechemer Cristopa' ya'naña tantaterr tarro'mar e'ñe yeparrocmaten epay Cristo. Ñaña atto chapaterran Po'cristor pue'ntaño allcha' atarr cosheñtso'tsen, ya'naña o' chapaterr allcha' atarr cosheñtso'tseney yaña tarro'mar e'ñe yeparrocmaten epay Po'cristor. O'ch netma'ntacha atet ñerra'mrate' o' yechap Yompor pue'ntaño allcha' yecohuentapretera Cristo.

⁷ Attoña Yomporpa' chocmach orrtatennay puemuerena ama't errponañohuen. Attoña o' chapuonaya yeyochro Yomporpa' atarr muerenya nanac. Atto atarr muere-nana Po'cristor ya'naña atarr muereña tarro'mar yapa' yeparrocmaterrñaña Po'cristor ñeñtara Jesús.

⁸ Tarro'mar po'ñoçh e'ñe puemuerenõtey Yomporñapa' a'queshpaterrey e'ñe yeyemteñoña ña. Ama añoteye'ña a'queshpaterreye atto e'ñe cohuenare' es yeþa'yen ya. Yomporpa' e'ñe atta a'queshpaterrey.

⁹ Ñaña ama yetorreñoiteye' ñocop a'queshpaterreyeña Yompor attoch tsa'terrya ñeñt allpon yetorra ñocop. Tarro'mar ñerra'm e'ñe yetorreñoña ya'queshpatenañ, yañapa' chate' atarr cohuen yentena yañeña ñeñt atto ya'queshpatena. Allempoña Yomporpa' amate' a'queshpatañeye' yenteñe.

¹⁰ Tarraña Yomporpa' o' etserrataterrnay yoctapña allochñapa' attoch e'ñe cohuen es yeþa'yen. Po'ñoçh e'ñe yeparrocmateño't Cristo, Yomporñapa' o' etserra yechcaterrey. Tarro'mar ñapa' ama't ahuatoteña' atet cotape'che't yocop attochña yapa' e'ñepa'chña cohuenare' es yeþa'yen.

Cristopa' e'ñe cohuen amo'tstatanna'tña allohuenacop

¹¹ Ñehua, te'pa' o'ch alla seyerpuerra ñeñt atet sepe't ahuat. Allempopa' atarr al-laparo'tsa'yenes Yomporeshot. Ñehua, sapa' atet eñalletñas ama judioneshayayso. Añña ñeñt atet eñalletena judionesha' ñetpa' aña yechenet o'ch tsorrannenet. Ñeñto'marña ñetpa' otarettenet atsorrareñnesha'. Ñeñto'mar ñet sañapa' atta sochatse'tenset sapa' año' atsorratareñneshayayso año' puechemereyayso Yompor.

¹² Po'ñoçh allempo sapa' atarr allaparo'tsa'yenes Cristeshot tarro'mar ama separ-rocmaterra' epas. Ñaña ama't israelena'tarnesha' ñeñt otenet Yompor pueyochresha', sañapa' ama parro'marneshayayso. Ñaña atto Yompor a'poctatan israelena'tar allempo

otanete't ñeñtcha' atet yenpuerranet esempo, saña allempopa' ama't mameshapa' ama se'mare'tpera'. Ama es secueno ama't mamesha ñeñtcha' sa'queshpaterre' tarro'mar allempo sapa' ama eñalle Seyomporer ñeñtcha' po'ñoç seyemtena samã arr patsro't.

¹³ Tarraña te' sapa' o' señoter Cristo Jesús ñeñt rromats ñaña socpa'na. Ashataretta po'rras ama't samã so'chñarecpa'na. Ñeñto'marña yoten e'ñe po'rraso't attoña o' çhapterres samã Yomporecho ama't sa ñeñtes ahuat atarr allaparo'tsa'yenes Yompore-sho't.

¹⁴ Tarro'mar Cristopa' atarr amo'tstatanna'tña allohuenacop. Ama't ya ñeñtey judioneshay ñaña sa ñeñtes ama judioneshayayso, Cristoñapa' ahuo't parro'marneshatatey allohueney. Ñaña ñeñt atto atsrre'moçhen yentanna'tyese't ahuat ñaña'pa' o' huapore'tam̄pesyeny ñeñt yellopa'tetstатыesaye't ahuat.

¹⁵ Ñeñtpa' atet ðonay Cristo allempo rroma yocop. E'ñe ña po'chtso'tpa' o' a'huaña'm̄peney atto añcha'noçhen yenten añ ñoñets ñeñt atet anaret ahuat judione-shacop, ñeñtara pa'namen a'pocstateñtsoñ ñeñt atet anarettetañ ñocpuet ñeñtcha' atet ðohuetañ. Attoña allempoteña' o' e'ñe patrra yocape'chen ñeñt atet cotape'chateny Cristo. Allempoteña' amach alla atsrre'moçhen yentanna'tyerre'te. Nato' o'ch yot atto ahuat allohuen acheñenesha' ellopa'tetstete't e'ñe ñet pocapño'mareta, Cristoñapa' o' a'huaña'm̄psanet attoña e'ñe parrocmataturrey, e'ñe cohuen yamo'tstanna'tuerra allohueney.

¹⁶ Attoña epotanto'marey e'ñe yeparrocmateño't, Cristoñapa' e'ñe cohuen amo'tstaterrya ñaña Pomporesho. E'ñe puerromño't corsochopa' ñaña'pa' o' a'pocatonay Pomporesho. Atto ñapa' o' a'huaña'm̄perrey ñeñt ahuat atto çhocma ye'moñe'tanna'tyese't.

¹⁷ Ñeñto'marña Cristopa' huapa. Ñach yeserrpare'tatose' cohuen ñoñets atto ñapa' ña amo'tstanna'tatañtetsa. Attecma serrpare'tatosey allohueney, ama't sa ñeñtes ama judioneshayayso ñeñtes atarr allaparo'tsa'yenes atet entyenesña Yompor. Attecma serrpare'tatosey ama't yanã ñeñtey judioneshay ñeñtey e'ñe allame'ttsa entyeny Yompor.

¹⁸ Attoña allohueney ama't ñeñtey judioneshatets ñaña ñeñt ama judioneshayaye e'ñe Cristesho'tecma e'mñoteneyña Yompor tarro'mar Puecamquëña'cho'ña e'ñe patrra ñeñt yechorrenaya allohueney.

¹⁹ Ñeñto'marña te'pa' o'ch notas, sa ñeñtes ama judioneshayayso, te'pa' e'ñe parro'marneshacmay entenyña Yompor, ama't allohuen ñeñt pueyochresha' pen Parets, tarro'mar allohueney e'ñe puechemerasha' peny Yompor. Ñeñto'marña te' sa ama atteye' entenso atet ñerra'mrrate' ñeñt ama puentare ña, o'huañ atteye' entenes ñerra'mrrate' ñeñt atta huetsa po'poñ anetsot.

²⁰⁻²² Ñeñt atet entenes te'pa' ñato' o'ch netma'ntacha ñeñt atto yatomaten pocoll. Ñehua, atto cohuen torra'yese't allohuen ñeñt allpon Yompor puellsensarnesha' epuet ñaña allohuen ñeñt allpon a'm̄ta'yese't po'ñoñ, ñetpa' añ toma'ntete't ñeñt ñanom yatomaten allo echarr yepen yepaquëll. Ñaña Jesucristopa' añ toma'ntena pocoll po'quellpach ñeñt atarr echarr orrene' pocoll. Ñehua, sa ñeñt atto o' separrocmaterra Yepartseshar Cristo, pueconer penes ñaña pueyopacher penes allohuenes ñeñtes e'ñe huomenc rremuene' pocoll. Attoña e'ñe cohuen sa'yechcataretterra puepahuarr pocoll, ñeñtes pa'paquëll o' perres Parets, attoña o' yecherra Puecamquëñ sesho.

3

Atto Pablopa' allsensaretterra o'ch serrpare'tatan ñeñt ama judioneshayaye

1 Ñeñto'marña napa' chocma nema'yochena socop. Neserrpare'tateñoñes sa Cristo Jesús ñeñtes ama judioneshayayso ñeñto'marña na te'pa' yottam̄pennet.

2 Ñehua, sapa' o'te' se'mare'tuan atto Yomporpa' o' llesenserren e'ñe puemuereñoñen, nach a'potene' po'ñoñ socop sa ñeñtes ama judioneshayayso.

3 Señoteñte' ñaña atto gaterren Yompor atto te'pa' o' neñoterrñañ ñeñt ahuatoteñpa' ama eñotpahuoyaye. Ñehua, ñeñtpa' o' notuanmas mame' necartoñ.

4 Ñerra'm esempoch selleyon ñeñt nequellquënnas allempochña señoñ napa' po'ñoñ o' chapona neyoçhro e'ñe ora ñeñt atet sherbeney Cristo, ñeñt ama't ahuatoteñ ama eñotpahuoyaye.

5 Tarro'mar ahuatpa' ama çhena' allempo pocte' enteñ Parets o'ch eñotatey ya ñeñtey arromñañeneshay ama't ñeñt corretsa allempo. Ñeñto'marña allempopa' ama e'ñeye' eñotatuanete'te atet ñerra'm te'pa' e'ñe Puecamquëñoñ e'ñe eñotatuenan allohuen ñeñt pueyochresha' pen ña atet ñerra'm ñeñt puellsensarnesha' pen ñaña ñeñt a'mtene' po'ñoñ.

6 Ñeñt eñotateney te'pa' ñeñtpa' atto ama't ñeñt ama judioneshayaye, ñetpa'cho'ña o'patapreteretcha' Yompor ñeñtcha' apuerranet attecma o'patatenya yaña ñeñtey judioneshay. Te'pa' e'ñe separrocmateñoñ Cristo, te'ña sapa' e'ñe po'chets penes atet ñerra'm ya ñeñtey judioneshay. Attoña o' e'ñe yeparrocmatuahuer allohueney. Ñaña atet ote't Yompor ahuat ñeñtcha' atet cohuen perrnay esempo e'ñe Cristeshoñ attoch a'queshpaterreypa' ñeñtpa' añecpa'naña ñeñt ama judioneshayaye. Ñehua, ñet añoñ a'queshpatare'tterret atto e'ñe pame'ñeñoñet añ cohuen ñoñets ñeñt alloch yequeshperra allohueney.

7 Ñeñto'marña napa' o' napare'tterra llesens attoch nach torrerraya serrpare'terre' añ cohuen ñoñets ñeñt alloch yequeshperra. Napa' atto napare'tterra amaña añoñeye' o' napare'tterro atto e'ñe cohuen es nepa'yen ñeñt e'ñe nocpa. Ñapa' e'ñe puemuereñoñen o' ahuamencat perren,

8 ama't napa' ama esoyayno ama't mamesha, atarr coñe'tot nesherben. Ora allohuen allpon ñeñt pueyochresha' pen Parets ñeñt sherbene' ña, naña ellonetpa' e'ñe atet nentena ñerra'mrate' atarr coñe'tot nesherbeñ Parets. Tarraña ama't ama esoyaynopa' Yomporña puemuereñoñ o' muenaterren nach serrpare'tatyese' ñeñt ama judioneshayaye. Attochña nach eñotatyenahuet atto Cristopa' shonte' esocmañen echyen pa'namen ñeñtña yo'patapreteña ñeñtey yemtenaya ña. Ama't ya arromñañaya amate' errotenoñ e'ñe çhaphuonayo yeyoçhro ñeñt ora allpon o'patatare'tey e'ñe yeyemteñoñ Cristo.

9 Ñaña nach eñotatyene' ama't allohuen acheñenesha' ñeñt atet co'tape'chennay Yompor. Tarro'mar ñeñtpa' ahuatoteñ ama eñotpahuoyaye tarro'mar ama çhena' allempoch a'poterrnay Yompor, ñeñtara Yompor ñeñt e'ñe yeçhcatuahue' ora allpon ñeñt yentyen.

10 Allochñaapa' allohuen ñeñtcha' allpon ame'ñerrtsapa' ñetñaapa' orrtateññañetcha' Yompor atto ñapa' atarr esocmañen es eñoten. Attochña ama't allohuen ñeñt añcha'taretetyetsa ñaña allohuen ñeñt allsensaretetyetsa all ento, ñetpa'cho'ña eñotueñet atto Yomporpa' atarr esocmañen es eñoten ñeñt nanac sherbets yocop.

11 Ñeñtpa' atet co'tape'che't Yompor ahuat pueyochreshacop ñeñtcha' sherbats allempoteñ e'ñe errponañohuen. Ñaña añ onañche't ñeñtcha' etsoterre' poçta'pña ñeñtpa' añ Cristo Jesús ñeñtara Yepartseshar yepen.

12 Ñeñto'marña yapa' e'ñe yame'ñeñoñ Cristo e'ñech yeñmañesha' yeçhore'teñ Yompor. Amach yemcha'nañoñeye' yeçhore'teñ tarro'mar añ yeyemteññaña Puechemer Cristo ñeñt o' a'pocaterrey Pomprosho.

13 Ñeñto'marña napa' o'ch notas, atto señotenen napa' atarr nemueroçhtena socop, sapa' amach sellquëñoña se'charrtatatsto seyoçher. E'ñepa'chña cohuen socshaprentenna.

Atto Cristopa' atarr morrentenya

14 Ñeñto'marña napa' çhocma neconcorpuena Yomporeshonet allot nema'yochamþensa.

15 Ñeñtara Yompor allot huena ora allpon pa'namen acheñenesha' ñeñt e'ñe pamo'tsna'tarecma þannenet ama't ñeñt pue'ntaño'tsa'yen ama't ñaña allpon ñeñt patso'tsa'yen.

16 Atto Yomporpa' shonte' esocmañen echyen ñeñt atarr nanac cohuenñatsotets Puecamquëñoþpa' ñepa'chña atarr ahuañencaþ sepene' e'ñe seyoçhro. Nema'yochëñoþpa' atet nenamuennas Yompor.

17 Ñaña çhocmuepa'ch yeçhena Cristo e'ñe seyoçhro e'ñe seyemteñoñ ña. Allochñapa' attochña e'ñe sagapoñ Yompor puemorrenteña attoch e'ñe huomenc seþa' seyoçher Yomporcop. Atet ñerra'mrrate' tsach ñeñt atarr erçhaþ e'ñech huomenc orrena patso, allochña pue'chorpa' e'ñech cohuen ten.

18-19 Allochñapa' attochña atarrcha' huomenc çhaponasa seyoçhro atto Cristopa' atarr nanac morrentenya. Ñeñt allpon atto atarr morrentenyapa' ñeñtþa' ama ahuañaño. Ñato' o'ch netma'ntacha atto yeçhope'chen patso. O'ch ahuey tenoneþ, ama'tcha' yeçhap ðachayo amach yeñtanhuoñeña ñeñt atto morrentenya Cristo. Atteçma ñaña toponet ama'tcha' yeçhap ðachayo amach yeñtanhuoñeña ñeñt atto morrentenya Cristo. Atteçma ñaña onnatonet ama'tcha' yeçhap ðachayo amach yeñtanhuoñeña ñeñt atto morrentenya Cristo. Atteçma ñaña enonet ñaña o'pononet, ama'tcha' yeçhap atarr allapþarpa' amach yeñtanhuoñeña ñeñt atto morrentenya Cristo. Ama't ñaña allohuen ñeñt allpon ñeñt ame'ñenayapa' eñochetepa'ch ñamet atto atarr morrentenya Cristo. Tarraña ama't ama e'ñeye' eñotpahuoyaye ora allpon ñeñt atet pena Cristo puemorrenteña yocop, tarraña sapa' señoçhepa'ch ama't e'ñe allpona. Ñeñtþa' atet nenamatennas Yompor. Allochñapa' attochña e'ñe poctacma chorrerrsa Yompor.

Aye'choçhtatpahuëpa'ch Yompor allohueney e'ñe yame'ñeñoñ

20-21 Te'ñapa' aye'choçhtatpahuëpa'ch yenteñ Yompor tarro'mar ña ahuañencaþ yepene'. Ña po'huamencoþpa' atetcha' þatonay ya ñeñt allpon yenamueñ, elloña ñapa' atetcha' pennay elloch metana'tuonay ñeñt allpon yenamueñ. Ñaña elloña metana'tuennay ñeñt allpon yocþape'chyen. Elloña nanacocmañen e'ñe cohuen es pennay e'ñe po'huamencoþ ña. Ya'ye'choçhtatoñepa'ch Yompor allohueney ñeñtey yame'ñeñoñ çhocma yapçha'yena ñocop. Aye'choçhtatpahuëpa'ch tayoteñ ama't ñaña errponañoñhuen tarro'mar ña yapuerre' Puechemer ñeñt Cristo Jesús. Ñeñtþa' atetepa'ch Yomporcop.

4

Attoch e'ñe yeparroçmatuen allohueney ñeñtey ame'ñenaya Cristo

1 Ñeñto'marña te'pa' añ notenes ama't na ñeñten ayottamþsareten e'ñe netorreñoñ serrpare'te' Yeparçseshar Cristo. Te'pa' o'ch notas: E'ñech cohuen es sorrtyen ñeñt atet poctetsa añecop ñeñt o' hua'ñerr Yompor ñeñtcha' pueyochresha' perr atet ñerra'm sa.

2 Ama't mameshapa' amach sañeña entatstatso ñeñteso' atarr nanac sherbets. E'ñe semorrentanna'teñoñ e'ñech acoþa es seþanna'tyena. Chocmuepa'ch sa'huantannena ñerra'm erroþ penes po'psheñeñ, amachña se'moñe'tatsche saña. Añcha'ña e'ñech cohuen semorrentanna'tuena allohuenes.

³ Añepa'chña se'nen attoch sepaterrtat soctapña allohuenes ñeñt e'ñe atet paterr cotape'chatenes Parets Puecamquëñ. Allochñapa' e'ñe separrocmateñoñ, e'ñech cohuen sentannena, amachña cha po'poñ sentanna'tueno.

⁴ Tarro'mar po'ñoçhpa' e'ñe yeparrocmatuen allohueney ñeñtey ame'ñenaya Cristo ñaña ñeñtara paterr Parets Puecamquëñ ñeñt yechorra'yenaya allohueney. Ñaña ama't pa'nameney shontey ñeñtey o' chore'terrey Yompor tarraña e'ñe ñeñtara yeyemteñoñ yecuen allohueney ñeñt o'patatenya Yompor ñeñtcha' apa'yesuerrey.

⁵ Po'ñoçhpa' e'ñe patrra Yepartseshar Cristo ñaña ñeñtara patrra poctapña ñeñt yame'ña'huena allohueney, ñaña e'ñe allohueney attecma yapatareña e'ñe yame'ñeñoñ Cristo.

⁶ Ñaña e'ñe patrra Parets ñeñt Yeyomporer yeñohuen allohueney, ñeñtara ñeñt ya'mcha'tareter yeñohuen allohueney. Ñaña ñeñtara Yompor ñeñt yetorratyenaya pa'namen allohueney ñaña ñeñtara Yompor ñeñt yechorra'yenaya yeyoçhro allohueney.

Atto Cristopa' apa'yeney allohueney attoch yetorra'yesa e'ñe po'poñe'ttsocma

⁷ Ñaña Cristopa' apa'yeney allohueney e'ñe po'poñe'ttsocma attoch yetorra'yesa Yomporecop e'ñe pa'namenot. Puesheña'ttsoypa' o'ch apa'yesey errponte' pocte' enten ña.

⁸ Ñehua, ñeñtapa' atet oteney Yompor po'ñoñ ñeñt aquellca'huaret ahuatoteñ, ñeñtapa' atet oten Cristocop:

Allempo a'terr pue'ntañopa' ahuanerran allohuen ñeñt e'moñe'tene' attoña a'mchechuaherranet. Allempoñapa' e'ñe pocsheñeshot shonte' es apa'yesnerran acheñenesha'.

⁹ Ñehua, all oten "a'terr pue'ntaño." Ñeño'marña yeñoteñ allempo ama a'terra'pa' ñapa' entoñ asuaña, chap ama't allohuanen patso o'pono.

¹⁰ Ñeñtara ñeñt sohuatsa entoñ ñeñtapa' ñeñtara ñeñt a'terrets ama't e'ñe allohuanen ento. Attoña e'ñe erracmañen epa'huena Cristo.

¹¹ Ñaña ñeñt atet oten ñoñets ñeñt anaret ahuatoteñ atto shonte' es apa'yenan acheñenesha' ñeñtapa' añ oten ñeñt atto ñapa' e'ñe po'huamencot es apa'yeney attoch yetorra'yesa po'poñe'ttsocma ñocop. Patantarr acheñpa' atet aparettet o'ch torrenet atet ñerra'm ñeñt allsensarettetsa Yomporecop; po'potantañña'papa' añcha' torrenet o'ch a'mteññañet Yompor po'ñoñ; po'potantañña'papa' añcha' torrenet o'ch serrpare'tatoñet po'ñoñ acheñeneshesho'mar; po'potantañña'papa' añcha' torrenet o'ch cohuanmpenan allohuen ñeñt ame'ñetsa ñeñtara ñeñtcha' yeçhatenahuet Yompor po'ñoñ.

¹² Attoña ahuamencat pa'yeney allochñapa' ñach po'huamencaro yetorra'yesa po'poñe'ttsocma e'ñe puesheña'ttsocmay ñeñtey pueyochresha' o' perrey Parets. Attochña e'ñe cohuen yeyenpanneñoñtapa' o'ch huomenc yeñanna'ta yeyoçher Yomporecop allohueney ñeñtey ame'ñenaya Cristo.

¹³ Attochña e'ñe yeparrocmatuen e'ñe yame'ñeñoñ Yompor Puechemer ñeñt Cristo tarro'mar allohueneypa' o'ch yeñotuerr ñeñt e'ñe cohuenare' ñeñt atet yeçhateney Yompor Puechemer. Attochña o'ch e'ñe atet yeñohuen yaña ora allpon ñeñt cohuentetsa ñeñt atet pena Cristo ñeñt yechorra'yenaya. Ñato' o'ch netma'ntacha o'ch not, yapa' o' e'ñe yepo'n Cristocop.

¹⁴ Ya te'pa' ama atteye ñerra'm cheshaneshash' ñeñt ama es eñotetso ñeñt epuoye' cotape'chene' cohuen. Ñehua, atet ñerra'm cheshaneshash' te'pa' ñato' po'poñcha' cotape'chyenet, ñato' tsapatñapa' o'chcho' cotape'chyeneterr po'poñ. Yapa'cho'ña atet yepena yaña allempo ama yepo'nena' Cristocop. Yaña ñeñtey ama epuoye' yoçteñe

Cristopa' amach errotenoŧ ye'mñiocheña ya ashcañ attoch ame'ñatya ña poctaŧña, attoch o'ch pantatey.

15 Yapa' añachña e'ñech patrra yocŧape'chen ñeñŧ e'ñe po'ñoŧh alloch yequeshperra ñeñŧ atet oteneŧ Yompor po'ñoñ. E'ñech yemorrentanna'teñoŧ es yeŧa'yen. Attochña e'ñe yeŧohuen allohuen ñeñŧ atet coŧape'chateneŧ Cristo. Attochña yapa' e'ñech ora yocŧape'chen e'ñe atet coŧape'chen Cristo. Ñeñŧo'marña esheccha'ña yeparrocmat epay Cristo, ñeñŧña Cristopa' yeyoŧher* yepeñ ñeñŧ ŧhocma yocŧape'chatene' cohuen Yomporecop.

16 Ñato' o'ch netma'ntacha ñeñŧ atet pena yechets. Ñehua, yechetspa' amach errotenoŧ ellopa'tetsteno. Ama't allemeñ meyna'ten yechets ŧhocma parrocmaten atto rremannenet e'ñe cohuen attoña yenpannenet. Ñaña yapa' yame'ñeñoŧ Cristo e'ñe po'chets ŧohueneŧ allohueneŧ ama't pa'namen acheñrey. Attoña Cristopa' e'ñe parrocmateney ñeñŧo'marña e'ñe yemorrentanna'teñoŧ o'ch yeyenpannena e'ñe cohuen. Attochña allo'nach yesen atontatnomue' ñeñŧ atet eñotateney Yompor o'ch yemorrentannerra allohueneŧ.

Atto Yomporpa' o' etserrataterrnay yocŧaŧña ñeñŧ atet muenen ña

17 Ñeñŧo'marña te'pa' o'ch notas ñeñŧ po'ñoŧh sherbets Yepartsesharecop. Sapa' amach allo'na atet seŧa'yesneno ñeñŧ atet ŧatse'tyena ñeñŧ ama ame'ñenayo Yompor. Tarro'mar ñeñŧ atet coŧape'chatse'tyenet ñetpa' ñeñŧpa' e'ñe orrena ama't mameshapa' ama es sherbeno.

18 Ñetpa' ama ŧhenaneto pueyoŧhreto ñeñŧ Cristo poctaŧña. Ñetpa' ŧha ottenet ñerra'mrrate' atarr checmeto'tsenet. Tarro'mar ñetpa' atarr echarrtenet pueyoŧhret attoch coteret Yompor. Ñeñŧo'marña amach enterreto correñets ñeñŧ huetsa Yomporeshoŧ tarro'mar ama eñoteñeto Yompor.

19 Ñet po'chñaret ama't mamesha o'huañcha' apencoŧhen eñchet. Ñetñapa' e'ñech pocsheñsha' pomuenet po'chets attochña e'ñe ñeñŧa yoma'yenet ñeñŧ pa'namen sosya'tsañeŧhno ñeñŧ ama aŧapahuoyaye ama't mamesha.

20 Tarraña sapa' amaña atteŧe' seyŧheno. Sapa' añña seyŧhen ñeñŧ atet yeŧhateneŧ Cristo.

21 Tarro'mar napa' neñotenes sapa' o' se'mñioterrñañ Cristo po'ñoñ allempo yeyŧchatas ñeñŧ e'ñe po'ñoŧh attoch yeyemtera Jesús.

22 Sa ahuatpa' atŧa soctape'chatse'tyese't te'ña ñeñŧpa' o'ch sa'ypo'ñañper. Sapa' ñeñŧaña atarr seshcare'taye't attoña añach e'ñe semnatse'tyese't ñeñŧ ama cohuenayaye ama't mamesha.

23 Te'ña sapa' añepa'chña setserrataterre' Yompor e'ñe ora ñeñŧ atet soctape'chyen seyoŧhro.

24 Añepa'chña chorraterrsa Yompor ñeñŧcha' soctape'chaterre' cohuen e'ñe etserra. Ñeñŧpa' attochña etserrataterrnas Yompor soctaŧña e'ñe atet coŧape'chen ña. Allochñapa' attoch e'ñe pocte' es seŧa'yen arr patsro ñeñŧ e'ñe po'ñoŧh cohuen enten Parets.

Arrpa' all coŧape'chatyenanet pa'namen ñeñŧ atarr sherbets

25 Ñeñŧo'marña te'pa' añ poctetsa socop amach allo'na seshcare'tanna'tyesneno. E'ñe puesheña'ttsos erroten sotannena, e'ñepa'ch po'ñoŧh sa'poctaten señoñ samo'tseshacop. Tarro'mar e'ñe yame'ñeñoŧ Cristo e'ñe yeparrocmatuen.

26 Ñaña ñerra'm esempo sa'tsre'mapa' amach alla señoŧatoña' o'ch sorrŧat ñeñŧ ama cohuenayaye. Ñaña ŧhocmach semaŧha'nerr e'ñe mamecma amachña ñeñŧaña sel-lapŧateno.

* 4:15 O'ch secue' nota 1.23.

²⁷ Allochñapa' attoch amach yemnatatsche oneñeñ o'ch atarr topateneý, tarro'mar yocop ama pocteyaye o'ch yemnach oneñeñ o'ch atarr ahuamencat peney.

²⁸ Ñaña ñerra'm eseshas etetspa' añ poctetsa te'ñapa' amach allo'na setyesatsetneno. Ñeññ acheñerpa' taruasepa'ña e'ñe ña potot. Ama't erra'tsena ñeññcha' po'taruas pa'pa' ñeññ taruaspá' e'ñe cohuen ama apencochenayaye. Allochñapa' attotcha' echenan shonte' attoch apa'yesan ñaña po'potantañ ñeññ atarr es pallta'yetsa.

²⁹ Amach yeñosatse'tyesatsto ñeññ ama cohuenayaye ama't mamesha. Añcha'ña yeñosyen ñeññ e'ñe cohuen entuen allohuen acheñenesha' ñeññcha' yenpuene' ñeññ e'mñotets. Attochña ñetpa' o'ch huomenc pet pueyoçher Yomporecop.

³⁰ Attochña amach cha yellcateññañe Yompore Puecamquëñ ñeññ yeçhetsa yeyoçhro ñeññara ñeññ Puecamquëñ pen ñeññ atarr cohuen Parets. Tarro'mar puechorreñoçey ya, Parets Puecamquëñ ñeññpa' ñeññña yeñotatene' yapa' puechemer peney Yompore tayoteñ ñaña esempohuañencha' allempoch ya'queshpatare'terra.

³¹ Amach atsrre'moçhen sentanna'tatsto ama't seyoçhra. Allochñapa' attoch amach cha sa'tsrre'mare'tatanneno, attochña amach seche'çhame'tanneno. Ñaña amach sesasare'tanna'tatsto. Ama't mameshapa' amach se'moñe'tanna'tatsto.

³² Añcha'ña e'ñech cohuen yentannena ñaña e'ñech cohuen yemuerannena. Ñaña añña poctetsa çhocmach yeçpretnannena atto Yomporepa' o' peretnerrey yaña. Ñeññpa' añoç peretnerrey atto rroma Puechemer Cristo yocop.

5

Ñeññey puechemer pen Yomporepa' o'ch yorrtaten ñeññ atet muenen ña

¹ Yomporepa' atarr morrentenya, attoña e'ñe puechemer peney. Ñeñño'marña yocoppa'çho'ña añ poctetsa o'ch yorrtateññañ ñeññ atet cohuenare' es pa'yen ña ñeññ Yeyomporer yepen.

² Elloña Cristopa' atarr morrentenya. Ñeñño'marña e'ñe pocte' eñch attoña poma ñañaña atto rroma yocop atet pete't ahua't allempo muetsete't carrnero Yomporecop. Ñeññña e'ñe cohuen ente't Yompore e'ñe atet ñerra'mrrate' ñeññ allo atarr eñmosa'tamçsachete't ahua't ña. Atto atarr morrentenya Cristo, yocoppa'çho'ña añ poctetsa e'ñech cohuen yemorrentanna'tuena.

³ Ñaña amach yeça'yesatsto ñeññ ama pocteye' enteno ña. Ama't parrocha amach yeçtatsche ñeññ ama yeçaporeyaye, ñaña coyanesha'pa' amach agapatstano ñeññ ama puerrollareyaye. Ñaña ama't mameshapa' amach yeçatsto ñeññ atarr sosya'tsañetyets ñaña ama es aye'chapretanna'tpahuo. Ñeññ atet poctetsa allohuenacpay ñeññey pueyoçhresha' o' perrey Parets. Allochñapa' ama't parrochapa' amach errotenoç otyeto' yapa' atto yepena.

⁴ Ñaña serrpare'tatse'teñets sosya'tsañ ñeññ ama aserrpare'tpahuoyaye ñeñño'marña yapa' amach atet yeçatsto ama't mamesha. Ñaña otatse'teñets ñeññpa' ama sherbeno Yomporecop ñeñño'marña yapa' amach atet yeçatsto. Ñaña allocchame'tanneñets ñeññ ama ayellsheñe'çpahuoyaye allo, ñeññpa'çho'ña amach atet yeçatsto. Añcha'ña yapa' Yomporepa'çhña yeparasyoso'ten.

⁵ Sapa' señoçteñ ñeññ cañoresha'tetspa' amach es o'paterroña Yomporecho ama't e'ñe esempaña allcha' añcha'tare'terra Cristo epuet Pompor. Ñaña allohuen ñeññ eñotene' pa'namen sosya'tsañ, ñeññpa'çho'ña amach es o'patatare'tterrtsoña all añcha'tare'ttena Yompore. Ñaña ñeññ atarr es ye'chapretetsa añña po'yomporer pen ñeññ atarr es ye'chatse'tatene'. Ñeñño'marña ñapa'çho'ña amach es o'patateñoña Yompore all añcha'tare'ttena.

⁶ Amach se'mñotatsche acheñ ñeññ muenene' o'ch shecare'tas o'ch otas ñeññcha' atet sepatse'ta sama ñeññpa' e'ñe pocte' Yomporecop. Tarraña napa' o'ch notas, ñeññpa' ama po'ñoçhoyaye, tarro'mar Yomporpa' çhocmach coñchatuerran allohuen ñeññ atet atpare'tetsa, ñeññpa' o' e'ñe notuanmas.

⁷ Ñeñño'marña te'pa' o'ch notas, sapa' amach socshapretatstaneto ñeññ atet patse'tyenet.

Ñeññ atet yorrtatyen allempo o' yocrrerra e'ñe cohuen puetaro

⁸ Ñehua, sapa' ahuatpa' po'ñoçh e'ñe atet socshapretatse'tyese't allempo sapa' checmeta socrra'yese't. Tarraña te' e'ñe seyemteñoñ Yepartseshar o' çhapatonas seyoçhro ñeññ cohuen enten ña. Ñeñño'marña te' socoppa' añ poctetsa o'ch sorrtrateññañ ñeññ cohuen enten ña, atto sapa' o' socrrerra puetaro.

⁹ Ñehua, ñerra'm puetaroch yocrrena, ñeññpa' atetcha' yorrtatyen. E'ñech cohuenacma es ye'panna'tyena ñeññ e'ñe pocte' enten Yompor ñaña ñeññpa' ama shequëñtsoyaye ama't mamesha.

¹⁰ Ñaña socoppa' añ poctetsa o'ch sema'yoçhra eñotnomue' ñeññcha' atarr cohuen entapretenes Yepartseshar.

¹¹ Ñaña te'pa' o'ch alla noterrserri, amach socshapretatsche ñeññ atet patse'tyenet, ñeññpa' ama es sherbeno ama't e'ñe mamesha. Tarro'mar ñetpa' checmeta correnet. Sapa' añcha'ña sorrtyen ñeññ e'ñe cohuenare' allochñapa' attoch eñochet ñeññ atet patse'tyenet ñet, ñeññ ama't mameshapa' ama cohuenaye' enteñe Yompor. Ñeññpa' ñato' yapa' o'ch yot, yapa' o' ya'puetarsamñpsanet ñet ñeññ atet patse'tyenet checmeto.

¹² Ñehua, sapa' señoñeñ ñeññ atet patse'tyenet a'nahua. Ñerra'm ya'mete'pa' ñeññpa' atarr apencoçhen.

¹³ Ñaña ñerra'm ya'puetarsamñpsanet ñet ñeññ patse'tyenet ñeññ ama cohuenayaye, attoña ñetpa' o'ch çhapanet pueyoçhro ñeññ atet penet ñetpa' po'ñoçh ama cohuenayaye.

¹⁴ Ñeñño'marña socoppa' atet açhotenes añ ñoñets: Papa' ñeññep atet patse'tyetsa e'ñe attep ñerra'm çha atarr rroma pemuen. Te'ñapa' o'ch pe'manerra o'ch petanterra atto rroma pemuen. Cristopa' ñach pa'puetarsamñperre'.

¹⁵ Ñeñño'marña te'pa' o'ch notas: Señoña e'ñe erroñente' sepa'yen, ñato' cohuent'e' ñato' amate' cohuenayaye. Amach atet sepatsto atet ñerra'mrrate' ñeññ ama es eñotetso. Añcha'ña atet sepa'yen atet ñerra'm ñeññ atarr es eñotets ñeññ cohuentetsa Yomporecop.

¹⁶ Te'pa' arosña atta es pueçhatstatsa çhochña yetorra Yomporecop tarro'mar te' acheñenesha' atarr sosey yeçchatyenet arr patsro.

¹⁷ Ñeñño'marña notenes amach atta es sepçhatsto ñeññ atet pena ñeññ ama es eñotetso. Sapa' añcha'ña o'ch señoñoñ ñeññ atet muenen Yepartseshar ñeññcha' atet ye'pa ñeññ cohuen enten ña.

¹⁸ Ñaña o'ch notas, amach seposa'tatsto; ñeññpa' çhach cotape'chatenes sosya'tsañeçhno attoch a'puerrataterres. Amach seposa'tatsto, añepa'chña sechorrenaya ñeññcha' socshatene' ñeññara Parets Puecamquëñ.

¹⁹ Añepa'chña e'ñe socshapretannena ñeññ atet saçhoteñ Yepartseshar. E'ñepa'chña socsheñesha' seyoçhrocmañen semorrechena allo ya'ye'choçhtateññañ Parets, ñaña allohuen morreñtsoçhno ñeññ Partsocop.

²⁰ E'ñe yeyerpuëñoñ Yepartseshar Jesucristo çhocmuepa'ch yeparasyoso'teññañ Pompor allohuenacop pa'namenacop.

²¹ E'ñe semorreñteñoñ Cristopa' e'ñepa'chña cohuen same'ñannena. Attochña yeco-huentateññañ Cristo.

Arrpa' all cotape'chatan yacma epuet puetapor

²² Ñeñtes arrollaretes o'ch notas, añ pocte' serrollarpa' ñachña e'ñe same'ñena atet yepen ñaña Yepartseshar Cristopa' ñachña e'ñe same'ñena.

²³ Tarro'mar serrollarpa' añ poctetsa atetcha' senteñ ñerra'mrrate' samo'mte' sepeñ. Attecma yepena yaña allohueney ñeñtey ame'ñetsa, añ Yamo'mte' yepen Cristo ñeñt yecuanpene'. Tarro'mar ñapa' o' a'queshpaterrey ñeñtey o' po'chets perrey.

²⁴ Ñeñto'mar añ pocte' serrollarpa' ñach pomnaren sepene' allohuenacop, attecma yaña ñeñtey ame'ñetsapa' añcha' pomnaren yepene' Cristo.

²⁵ Te'pa' o'ch notas samña ñeñtes ataporetes, añ poctetsa e'ñech cohuen semorreñcha setapor. O'ch semuerya nanac atet peney Cristo atarr muerenya yaña ñeñtey ame'ñenaya ña. Ñeñto'marña puemorrenteñoŧey ya ñapa' e'ñe pocte' eñch o'ch rroma yocop.

²⁶ Allochñapa' attochña e'ñe e'sshohuerrnay allohuen yo'chñar o'ch a'cohuentaterrey Partsocop. Ñehua, ñeñt toma'ntena allempo yapataretterra Yomporecop. Ñaña po'ñoñpa' ñeñña e'ñe ya'cohuentaterre'.

²⁷ Allempoña o' ya'cohuentataretterra'pa' ñapa' mueneñ o'ch aguërrey allohueney ñeñtey ame'ñenaya ña. Ñaña ya atto o' ya'cohuentataretterra'pa' amach alla eñalletterte ama't mamesha ñeñtcha' ya'sosyaterrayerr. Amach alla enterrye'te atto ama cohue-naye' yorrteno ama't erro'tena. E'ñechña ya'cohuentataretterra Partsocop.

²⁸ Po'ñoçhpa' ñeñtes ataporetespa' añ poctetsa socop e'ñepa'ch cohuen semuerya setapor e'ñe atet atarr semorrentena sañeña. Tarro'mar ñerra'm atarr yemorrenteña yetapor ya'ñaña atarr morrentetsa, tarro'mar yetaporpa' ñeñtara yechets yepen.

²⁹ Ñehua, yapa' yeñoteñ ama't e'ñe puesheñarroŧeya ama yetsena'tenoña e'ñe ya yechets. Chochña e'ñe cohuen yerren esheccha' e'ñe huomencna'ntateney. E'ñech cohuen yecuen e'ñe ya yechets. Attecma peney ñaña Cristo atarrcha' cohuanpene' ya allohueney ñeñtey ame'ñenaya ña.

³⁰ Tarro'mar ñapa' ña e'ñe po'ñoçh po'chets pohueney ya. Pa'namenot po'chets pa'yeney allohueney ñeñtey ame'ñenaya ña.

³¹ Ñehua, Yompor po'ñoñ ñeñt aquellcaret ahuatoteñ ñeñtpa' atet oten: "Ñeñto'marña ñerra'm esempo yesna'ta amapa' coyanesha'pa' o'ch echan puerrollar, añ pocte' o'huañcha' tama yeyemteña yachor ñaña yompor. Allochñapa' attoch e'ñe yeparroc-maten epay yetapor. Attoña e'ñe epsheño'mareypa' e'ñech pa'rra yechets yepen."

³² Ñeñtpa' ahuatoteñ ama eñotpahuoyaye ñeñt toma'ntatenya añ cotapñats. Tarraña te'pa' napa' noten añ yetma'ntenaya ñeñt atarr cohuen ñeñt atto e'ñe yeparroc-maten epay Cristo allohueney ñeñtey ame'ñenaya ña, ñeñtara ñeñt po'chets yepene' allohueney.

³³ Ñeñto'marña o'ch alla noterrser, e'ñe puesheña'ttsospa' e'ñepa'ch cohuen semuerya setapor atet atarr semorrentena e'ñe sañeña. Ñaña ñeñtes coyaneshaspa' o'ch notas, añ poctetsa ñaña socop semorrenteñoŧpa' same'ñiyach serrollar, ñaña e'ñech cohuen senteñ.

6

Arrpa' all cotape'chatan cheshanasha' epuet pamo'mte'

¹ Te' cheshaneshacha' o'ch notas ñeñt poctetsa socop ñeñtcha' atet sepa. E'ñe same'ñeñoŧ Yepartseshar Cristo chocmuepa'ch e'ñe cohuen same'ñeña sompor ñaña sachor, tarro'mar ñeñt poctetsa socop.

² "Ñaña e'ñe semorrenteñoŧ somporpa' chocmuepa'ch semcha'na'ch ñaña sachor" tarro'mar ñeñtpa' ñeñt e'ñe ñanom atet ot Yompor ñeñtcha' atet yepen yamo'mte' allochñapa' attoch e'ñe cohuen a'natenya Yompor.

³ "Attoch pa'nateñoŧes e'ñe cohuenpa' atomatcha' socrena arr patsro."

⁴ Te'pa' o'ch notas samña ñeñtes pamo'mte' pen cheshanesha', se'moñe'teño'pa' amach sa'tsrre'mare'tatatsche sacñeñarnesha'. E'ñechña añetolloteñ e'ñe secuamipeño' co-huenpa' o'ch seyčhatyenonet e'ñe cohuen attoch ñetpa'cho'ña o'ch ame'ñeret ñamet Yepartseshar Cristo. Ñaña amach semnatatstaneto o'ch atfa atarr atpare'taset.

Arrpa' all cotape'chatan ataruasañ epuet po'patronar

⁵ Te'pa' o'ch notas samña ñeñtes ataruasataretes ñeñt poctetsa socop. Chocmach same'ñya ñeñt setaruasatene' arr patsro. Ama't erra'tsena apuenset ñeñtcha' setaruas sepa' e'ñechña semcha'na'teño' setaruasen e'ñe cohuen seyočhrocmañen. Ama't acheñecpa setaruasenpa' atetcha' setaruasen ñerra'mrrate' Cristocop setaruasen.

⁶ Amachña e'ñe puecuamipeño'fesa sema'yore'teno taruasats attoch e'ñe cohuen socshach sepatronar attoch e'ñe pocte' entenes. Añcha'ña ama't acheñecpa setaru- asenpa' e'ñechña atet sesherbeñ cohuen ñerra'mrrate' Cristo sesherben. E'ñechña seyočhrocmañen sepena cohuen ñeñt atet muenen Yompor.

⁷ E'ñe semneño'pa' e'ñech cohuen socsheñeshocmañen setaruasen tarro'mar ama ñapña acheñecop setaruaseno, Yomporecpa'naña setaruasen.

⁸ Te' sapa' e'ñe seño'teñ ama't erra'tsente' cohuen es ye'pa'yen, Yepartsesharñapa' chocmach alla aphuerrey e'ñe puesheña'ttsoy ñeñtcha' atarr cohuen yocshaterre' ama't añ acheñer ñeñt ataruasataret amapa' añ acheñer ñeñt e'ñe cohueno'tsen, attec mach apa'yerranet ñeñtcha' atarr cohuen coshaterrahuet ñet.

⁹ Ñaña te'pa' o'ch notas ñeñtes taruasatets. Sapa'cho'ña atetcha' sepoñ sa'taruasañer ñeñt atet poctetsa, amachña cha sechemama'tyenaneto. Seño'chepa'ch sapa'cho'ña sechen Samo'mte' Cristo ñeñt pue'ntaño'tsen. Ñeñtara ñeñt Pamo'mte' pen allohuen sa'taruasañrenesha'. Ñaña ñapa' ama puesheña'ttsa morrenteno.

Ñeñt apueney Yompor ñeñtcha' yemoñenaya attoch amach alla a'puerrataterrye oneñeñt

¹⁰ Allohuanen arr necarto' o'ch masheñeshacha' ñaña nočhaneshacha' notas, ahua- mencatepa'ch pas Yepartseshar tarro'mar ñapa' ña atarr ahua mencattetsa.

¹¹ Ñeño'marña añ poctetsa yocop o'ch yaguërrñañ ora allpon ñeñt apueney Yompor allochñapa' ñeñtcha'ña yemoñenaya attoch amach alla a'puerrataterrye oneñeñt. Tarro'mar yeño'teñ oneñe'pa' chocma e'nenan attoch shecare'teney.

¹² Tarro'mar po'ño'chpa' ama acheñeye' yeçllareno ñeñt entpo' po'chets. Yapa' añña yeçllaren oneñetečno ñeñt ama erro't a'papahuo e'ñe ya yoto' tarro'mar ñeñt'pa' ama entpahuoyaye po'chets erro'tente'ña. Tarraña ñeñt'pa' atarr añcha'noçhetyena ñaña atarr ahua mence'čno. Attoña pomnaren penan allohuen acheñenesha' arr patsro ñeñt patse'tyene' ñeñt ama cohuenayaye ñeñt checmeto'tsena. Ñeñtara oneñetečno ñeñt ama cohuenaye' yeçcatetso ñeñt erracmañen añcha'noçhetyetsa ento'.

¹³ Ñeño'marña notenes, o'ch saguërrñañ allohuen allpon ora ñeñt apueney Yompor al- lochñapa' ñeñtcha'ña allo yemoñena attoch amach alla a'puerrataterrye oneñeñt ñerra'm esempo atarr nanac topateney. Tarraña ama't allempo pa'nameno' atarr topateney yañapa' amach erro'teno' a'puerrataterrye.

¹⁴ Te'pa' o'ch neñotatas ñeñt apueney Yompor ñeñtña yemoñenaya attoch ama a'puerrataterrye oneñeñt allempo topateney. Ñato' o'ch netma'ntacha ñeñt atet pa'namen chorra'yena solltarnesha' allempo quellarenet.* Ñeñt ñanom ñeñt'pa' Yompor po'ñoñ ñeñt e'ñe po'noçh ama shequëñtsoyaye ama't mamesha. Ñeño'marña yapa' e'ñech yeñmañesha' es ye'pa'yen, amach yeshcare'tanna'tyesatsto. Ñato' o'ch netma'ntacha ñeñt'pa' ñeñtña yechanar yepen ñeñtcha' ahua mence'at yepe' atet ñerra'm solltar apueñet chanarets alloch chanena ñeñt quellarenet. Elloñapa' e'ñepa'ch cohuen

* 6:14 Ñehua, ñeñt'pa' atet chorra'yese't ahua't solltarnesha' allempo quellare't.

es yepanna'tyesnoma ñeñt atet e'ñe pocte' enten Yompor. Ñeñtpa' añ toma'ntena asrom atet ñerra'mrrate' ñeñt chorrena solltar ñeñt a'natene' puesomap allempo quellarena.

¹⁵ Te'ñapa' o'ch se'shpo'cha e'ñe socsheñsha' o'ch ahues allcha' seserrpare'tyena' atto Yomporpa' o' amo'tsterrya attochña e'ñe cohuen a'queshpaterrey. Ñeñtpa' añ toma'ntena atet pena solltar o'ch nan po'sapatpa' o'ch ahuo' allcha' quellarosa.

¹⁶ Elloña ñeñt nanac sherbets ñeñtpa' añ, chocmuepa'ch e'ñe cohuen yeyemteña Yompor ñeñt atet oteneý. Ñeñtpa' añ toma'ntena solltar pue'scudo allo a'natena allochñapa' attoch ama etaretteneto. Ñehua, atto huomenc topateneý oneñeñ ñato' o'ch netma'ntacha ñerra'mrrate' ñapa' cho sanapecheneý po'chopaño ñeñt huoretnets. Tarraña ya e'ñe yeyemteñoñ Yompor ñeñtpa' ñeñtña ye'scudo yepen ñeñtcha' chocma emayene' oneñeñ po'chopaño ñeñt huoretnets allo sanapecheneý.

¹⁷ Ñaña yapa' yeñoteñ Yomporpa' te'pa' o' a'queshpaterrey, ñeñtña yemoñenaya. Ñeñtpa' añ toma'ntena atet pena solltar o'ch na'nman asret poño attoch ama etto'cheto. Ñaña o'ch yerrmoñ Yompor po'ñoñ yeyochro ñeñt atet eñotateney ña Puecamquëñoñ; ñeñtpa' ñeñtña yepanmet yepen alloña yeçllareñña oneñeñ.

¹⁸ Ñaña sapa' chocmuepa'ch sema'yochena ama't erroteno'tsensa. Añcha'ña seyepuene' Parets Puecamquëñ. Allochñapa' attochña chocma sema'yochrena ma'yochatsa. O'ch senañ Yompor ora allpon ñeñt sepalltena, ñaña chocmuepa'chña e'ñe sema'yochamñpesueña allohuen ñeñt pueyochresha' pen Parets.

¹⁹ Napa'cho'ña chocmuepa'chña sema'yochamñpenna. O'ch senamon Yompor nocop allochñapa' ñachña ne'ñoratene' attoch amach nemcha'nañoña neserrpare'teññañe po'ñoñ. Allochñapa' attochña neñotatyesanet cohuen ñoñets ñeñt alloch e'ñe yequeshpa'huerra allohueney; ñeñtpa' ama eñotpahuoyaye, ama't ahuatoteñ.

²⁰ Napa' allsensareten ñeñten eñosyets e'ñe cohuen Yomporecop. E'ñe neñosyeyoñ Yomporecop ñeñto'marña te'pa' yottamñpennet. Ñeñto'marña nemneñ o'ch sema'yochamñpenna attoch amach nemcha'nañoña neserrpare'teno ñeñt e'ñe cohuen ñoñets alloch yequeshpa'huerra. Attochña e'ñe nocsheñeshocmañen neserrpare'ten tarro'mar ñeñt e'ñe cohuen atet poctetsa nocop.

Arrpa' all so'tnerranet e'ñe po'cartot

²¹⁻²² Te'ñapa' o'ch notas, o'ch nemñonas masheñ Tíquico ñeñt atarr nemorrentena. Ñapa'cho'ña chocma atarr cohuen torrena Yepartsesharecop. Ñapa' ñeñto'marña o' nemñe sesho allochñapa' ñach señotatuerrre' ñeñt atet yepena ya arr. Attochña atarr coshatuerres seyoçhro.

²³ Te'ña masheñeshacha' ñaña noçhaneshacha', Yomporepa'chña semor-rentanna'tataya e'ñe same'ñeñoñ, ñeñtara Parets epuet Puechemer Jesucristo ñeñt Yepartseshar yepen. Ñetepa'chña socshatene' seyoçhro.

²⁴ Ñaña ñetepa'chña e'ñe sa'natenaya allohuenes ñeñtes e'ñe cohuen morrentenaya Yepartseshar Jesucristo. Ñeñt atto semorrenteñapa' amach ahuañañañterro ama't e'ñe ahuata. Ñeñtach notas, ñeñtpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT̄ QUELLCAN FILIPOSO' MARNESHA' FILIPENSES

Pablopa' quellcan carta all ayottam̄psarettena; añecop quellquë' ñeñt̄ ame'ñetsa anetso Filiposo

¹ Masheñeshacha' ñaña nochaneshacha' ñeñtes allohuenes o' pueyochresha' perres Parets e'ñe separrocmateñoñ Cristo Jesús all anetso Filiposo, ama't ñaña sa'mcha'tareterneshohuen ñaña ñeñtes diáconochnos ñeñtes sherbets all puerahuo. Na Pablon epan masheñ Timoteo ñeñten sequellquëne'ña añ carta.

² Te'pa' e'ñe nehuom̄cha'teñoñes sa, napa' o'ch notas: Yomporepa'chña sebensare'tam̄pene' ñeñt̄ nanac Parets epuet Puechemer Jesucristo ñeñt̄ Yepartseshar yepen. Ñetepa'chña socshatene' e'ñe sa seyo'chro allohuenes.

Arrpa' atet ma'yocham̄penanet Pablo

³⁻⁴ Te'pa' o'ch notas, allempo nema'yocheña Yompor ñeñt̄ neyemtena na, neyerpueñoñespa' chocma nocshensa Yomporeshot. Ñeñto'marña allempo es nenamuennas Yomporpa' chocma nocshensa Yomporeshot allohuenes.

⁵ Tarro'mar allempoteñ saguër Cristopa' sapa' allo'na't sesen ame'ñatsa teme'ttsen. E'ñe same'ñeñoñpa' attoña sellcapretna attoch erroñenoñpa' o'te' epa'huerra erracmañen añ cohuen ñoñets alloch yequeshperra.

⁶ Ñaña napa' neñotenes atto Yomporpa' o' ame'ñatasa ahuaña, te'ñapa' ñepa'chña allo'na ahuañencañ sepa'nmue' e'ñe ñocop, tayoteñ ama't esempohuañencha' huerra Jesucristo pue'ntañot̄.

⁷ Ñeñt̄ atet nentapretenespa' ñeñt̄pa' e'ñe pocte' tarro'mar atarr nemorrentensa e'ñe neyo'chrocmañen. Ñeñto'marña yelcanna'teñoñpa' yeñoteñ Yompor e'ñe pueñuereñoñpa' amach a'ypo'ñerrno na ama't ñaña sa. Ateñ napa' ama't cárcelot'senen Yompor pueñuereñoñpa' amach a'ypo'ñerrno. Ñaña ñerra'm allempo achm̄are'tenet añ cohuen ñoñets alloch yequeshperra, atto napa' nemoñena añ cohuen ñoñets, Yompor pueñuereñoñpa' chocma ahuañencañ penen. Ñaña allempo name'ñateña acheñenesha' añ cohuen ñoñets alloch yequeshperra, Yompor pueñuereñoñpa' chocma ahuañencañ penen.

⁸ Ñeñto'marña te' Yomporpa' eñotenen po'ño'ch te'pa' nanac neyerpuensa. E'ñe atet nanac nemorrentensa ñerra'm atet morrentenya Jesucristo e'ñe cohuen.

⁹ Ateñ nenamuennas Yompor socoppa' atet noten, allo'nepa'ch sesen morrentanna'tnomtsa nanac ñaña allo'nepa'ch sesen eñotnomue' ñeñt̄ nanac sherbets yamo'tseshacop. Allochñapa' attoch chocma yorrtaten yemorrenteña e'ñe po'ño'ch.

¹⁰ Attochña seño'ch erra'tsente'ña nanac cohuen sherbets Yomporecop. Allochñapa' e'ñe señoñeñoñpa' añepa'chña atet sepa'yen ñeñt̄ e'ñe cohuenare'. Allochñapa' amach cha sa'yohuare'tterro ñerra'm esempohuañencha' huerra Cristo.

¹¹ Ora atet nenamuennas Yompor socoppa' atet noten, e'ñe same'ñeñoñ Jesucristo poc-tacmapa' añepa'chña cohuen atet sepa'yen ñeñt̄ nanac sherbets Yomporecop. Ñerra'm atet yepenapa' attochña e'ñe cohuen ya'cshapretare'ttena Yompor po'cohuenña.

Atto epatuan allohuenacop Yompor po'ño'ch e'ñe cárcelot̄

12 Ñeñto'marña masheñeshacha' ñaña nochaneshacha' o'ch neñotatas, ama't atto ayottam̄psareten cárcelo ñeñtpa' ama añecpayaye attoch o'ch epatare'tenan cohuen ñoñets alloch yequeshperra. Elloña e'ñe atto'pa' allo'nach sen epa'huatsa Yompor po'ñoñ.

13 Ñeñto'marña te'pa' allohuen guardianesha' ñeñt cohuan̄pene' añcha'taretepo' ñetpa'cho'ña o' e'ñe eñotuanet atto ayottam̄psareten cárcelopa' añoñña e'ñe name'ñeñoñ Cristo atet pennet. Ñaña ama't pa'namen acheñenesha' te'pa' o' eñotuanet ñeñtecop nemueroçhtena.

14 Ñeñto'marña te'pa' shonte' masheñesha' e'ñe allo'na senet yemuetnomuet Yepart-seshar Cristo poctacma, tarro'mar ñetpa' atet entennet e'ñe name'ñeñoña Cristo nemueroçhtena cárcelo. Ñeñto'marña ñetpa'cho'ña o'huañ mecha'na'tet serrpare'tet Yompor po'ñoñ.

15 Ñehua, po'ñoçhpa' eñall puesheña'tets tarrecpach serrpare'tenet Cristo e'ñe pue'matare'teñoñetan na. Tarraña po'psheñneçhnopa' e'ñech pocsheñeshocmañen a'poteññañet Yompor po'ñoñ.

16-17 Añpa' e'ñe puemorrenteñoñetan atet penet tarro'mar ñetpa' eñotennet napa' anareten atto nach moñenaya añ cohuen ñoñets alloch yequeshperra ñerra'm esempo achm̄are'teñet. Tarraña ñeñña serrpare'tene' Cristo po'ñoñ e'ñe ñocpuetapa' amach pueñmañeshacmaye' serrpare'teneto. Ñetpa' çhate' otenapuetañ allo'nach atsrre'moçhen entatnennet ama't cárcelo'tsenen.

18-19 Ñehua, ama't atetpa' nocoppa' e'ñe pocte'. Ama't erroteno serrpare'tenet cohuen ñoñets Cristocop, nocoppa' e'ñe pocte' nenteñ. Tarro'mar ama't puehquẽñme'chatsa serrpare'tenet Cristo, ama't ñaña pueñmañeshoçha' serrpare'tenetpa' napa' ñeñtcha'ña nanac nocshatene'. Ñeñto'marña napa' çhocmach nocshena tarro'mar napa' neñotenes sapa' çhocma sema'yocham̄penna ñaña neñotena Jesucristo Puecamquẽñpa' ñeñña ahuamencat nepene'. Ñeñto'marña neñoteñ añ muerochteñets tsapañonetpa' a'poctatareçha' e'ñe cohuen nocop.

Atto Pablopa' ora allpon corre't arr patsropa' ñeñtpa' e'ñe ora Cristocop

20 Ñeñto'marña e'ñe nocsheñesha' necueñ tarro'mar neñoteñ amach apencatareteno ama't mamesha. Ñaña amach nemcha'nañoñayaya ne'ñoeno e'ñe cohuen Cristocop. Attochña napa' acshapretpo' entapretennet Cristo, ama't napa' erroteno'tsenencha' ama't ñerra'm nerroma amapa' ñerra'm ora nocrenmeñ. Atet ahuañoteñpa' te'pa'cho'ña attecmuepa'ch pena.

21 Tarro'mar napa' allpon nocrena arr patsropa' ñeñtpa' e'ñe ora Cristocop. Ñaña ama't çho nerromapa' ñeñtpa' elloña nanac cohuen nocop.

22 Ñaña ñerra'm allempo nocrenmeñpa' torrenayanach Yompor po'taruas tarro'mar attoçha'ña allo'nach nesherb̄atneññañ Yompor po'ñoñ. Ñeñto'marña ñeñtcha' nanac nemna' te'pa' ama neñoteñe erra'tsente'ña ñeñt nanac sherbets, ñato' o'ch nerroma tayecma amapa' ñato' corretsanach.

23 Ñeñt nanac torrapo' nenten o'ch notas ñeñt atarr cohuen nenten, ñato' o'ch nerroma amapa' corretsanach. Napa' nemneñeñ o'huañcha' nocrra añe patsro allochñapa' o'ch neçhap tecma Cristesho, tarro'mar ñeñtpa' elloña nanac cohuen nocop.

24 Tarraña ñerra'm amach nerromopa' ñeñtcha'ña nanac sherbats socop.

25 Ñeñto'marña napa' neñoteñ amach nerromo, amach nesa'nerrso, allochñapa' allo'nach nesen seyçhatnomue' allohuenes atto ñerra'm allo'na yesen yemtaya Cristopa' çhocmachña yocshena.

26 Allochñapa' ñerra'm esempo neçherr seshopa' allempochña alla neñotaterrser nanac, attoch allo'na sesen nanacocmañen coshaya Cristo.

Chocmuepa'ch yocrrena e'ñe cohuen ñeñt atet oteney Yompor po'ñoñot

²⁷ Te'pa' añach notas, chocmuepa'ch socrra e'ñe cohuen ñeñt atet yorrtaten ñeñtey ame'ñenaya Cristo po'ñoñ. Allochñapa' ñerra'm machayota nabcherrsa' amapa' ñerra'm ama'tcha' ama yaɓchannerropa' e'ñepa'chña cohuen ne'mare'tenes atto e'ñe huomenc sepen seyoçher attoch e'ñe patrra soctape'chen. Ñaña o'ch ne'mare'tas atto sapa' sema'yoçhrena allohuenes parro attoch semoñena añ cohuen ñoñets alloch yequesh-perra.

²⁸ Ñaña amuepa'chña aña seyore'tatstaye ama't mamesha ñeñt se'moñe'tene' tarro'mar ñetpa' ñeñtcha'ña eñotatahuet po'ñoçh ñetpa' amach queshperreto. Tarraña yocopñapa' ñeñtña yeñotatene' po'ñoçhpa' yequeshpa'huerrach. Añeçhnopa' Yomporo poctapña.

²⁹ Ama patrrayaya muenatenye Yompor atto o' yame'ñera Cristo. Añña e'ñe pemuereñoŕey muenateney ñaña e'ñe yame'ñeñoŕpa' çhochña yemuerochta ñocop.

³⁰ Ñeñto'marña sapa'çho'ña e'ñe pocte' o'ch sa'mueroçhtatareŕta Cristocop e'ñe atet sentenen na ahuatoteñ ama't teme'ttsenpa' se'mare'tenen napa' allo'tsenarana all nemueroçhtena e'ñe name'ñeñoŕ Cristo.

2

Atetcha'yentena yañeña e'ñe puesheña'ttsoy atet ente't Cristo e'ñe ñañeña

¹⁻² Te'pa' o'ch notas ñaña po'poñ. Ñerra'm po'ñoçh yame'ñeñoŕ Cristo e'ñech yocshatanena allempoña po'ñoçh sapa' socshatterrencha' namña. Añña ñeñtcha' nocshatene' e'ñe poctacma ñerra'm e'ñech patrra soctape'chuen allohuenes. Ñaña ñerra'm po'ñoçh e'ñe yemorrentanna'teñoŕ e'ñech yeyemtanna'tuenapa' ñehua, te'ñapa' chocmuepa'ch semor-rentannena ama't e'ñe sagattsa ñeñtes e'ñe parro'marneshacmas. Ñaña ñerra'm allo-hueney po'ñoçh chorra'huenya ñeñtara Parets Puecamquẽnpa' ñeñtoŕcha'ña e'ñepa'ch sepatrratuen soctapñoŕ allohuenes. Ñaña ñerra'm po'ñoçh e'ñe socsheñesha' semueran-nenapa' ñeñtoŕcha'ña amach po'poñ sentanna'tuatsto.

³⁻⁴ Ñaña amach aña atarr sellcatsto ñeñt e'ñe socpa. Añcha'ña puesheña'ttsospa' sellcapreta ñeñt llecatyene' samo'ts. Ñaña amach sañeña entatstatso atet ñerra'mrrate' ñeñtes nanac sherbets. Añcha'ña atet sent samo'ts atet ñerra'mrrate' ñetña nanac sherbetset, pañapa' amach es asherbenaye' penteno.

⁵ Añña pocte' o'ch senta sañeña atet ente't Cristo Jesús e'ñe ñañeña allempo huapa aña patsro.

⁶ Ñehua, ñapa' ama't nanac Paretspa' ama ommo'chane'te po'partsoña.

⁷⁻⁸ Ñapa' e'ñe pocte' enche't o'ch atet enteñ acheñenesha' ñerra'mrrate' ñapa' ama Partsoyaye, o'ch atta orrtena ñerra'm ama esoyaye atet pena acheñ ñeñt e'ñech pauner aparettena. Tarraña añecop atet pe't attotcha' sherbenan Pompor ama't ñaña acheñenesha'. Ñaña ñapa' ama't Paretspa' o' acheñetos arr patsro, e'ñe atet orrtosa ñerra'm ya ñeñtey arromñatey. Ñaña' allo'na sen pauner entatatsa attotña e'ñe pue'mñoteñoŕ Pomporpa' e'ñe pocte' eñch o'ch rroma corsocho ñeñt nanac apencoçhen entete't ñerra'm esesha' rromats atet corsocho.

⁹ Ñeñto'marña attotña Pomporpa' o' alla nanac a'cohuentater ñaña o' alla aphuer ello pa'so'cheñ ñeñt nanac cohuen sherbets. Ñeñtña so'chñetspa' ello metana'tuanenan allohuen po'poñeçhno so'chñetsoçhno.

¹⁰⁻¹¹ Ñeñto'marña esempohuañenpa' allohuenet po'yorñoŕetpa' a'meta'hueretcha' e'ñe poctacma, Jesucristepa'tña ñeñt nanac partsotets. Allochñapa' atto e'ñe pame'ña'rrteñoŕet Jesús pa'so'chñopa' concorpa'rretueretcha' allohuenet ñeñt allpon eñall ama't allohuen ñeñt ento'marnesha' ñaña allohuen patso'marnesha'

ñaña allohuen o'pono'tseneshachno ñeñt patso'tsen. Attochña allempopa' aye'chochtataretterra Yompor ñeñt nanac Parets.

Añach yema'yoçhrena attoch allo'nach yesen ama't acoþa etsotyestnomue' ñeñt poctetsa Cristocop

¹² Te'pa' e'ñe nemorrenteñoñes masheñnesha ñaña noçhanesha o'ch notenes, ahuañmo'chapa' çhocma se'mñotne't ñeñt atet notase't allempo sesho'tsenen. Te'pa'cho'ña attecma se'mñoten ñeñtcha' atet noterrser ama't te'pa' nanac baçhayo'tsenen sesho't. Te'pa' añach notas ñeñtcha' atet seþa. Chocmuepa'ch sema'yoçhra attoch allo'nach sesen etsotnomue' ñeñt cohuen enten Yompor, tarro'mar ñapa' ñeñtecopña o' a'queshpaterres. Tarraña e'ñech semcha'na'teño't seyomcha Yompor tarro'mar yeñoteñ yoroçheno'tsenya ñerra'm ama Yompor po'huamenco yeyemto.

¹³ Tarro'mar Yompora e'ñe yemnatene' e'ñe yeyoçhro ñeñt cohuen enten ña. Ñaña ñapa' ñach ahuañmocat yepene' attoch yetsotoñ ama't ora erra'tsencha' coshatene' ña.

¹⁴ O'ch noterrser ellonet te'pa' ñeñt ama atteye' es sepeno. Ama't eseshacpa amach epuoye' es atet sepeno, señoñesho'tpa' amach es sotnare'tanna'tatsto.

¹⁵ Allochñapa' ñerra'm ama atet yepenopa' e'ñech cohuen entyeny allohuen acheñenesha', amach eñalle attoch esesha'pa' o'ch eñosyenet yocop año' pocteye' es yeþa'yeno, tarro'mar e'ñech cohuen es yocape'chyen attoch yorrtaten atet penaña ñeñt po'ñoçh o' puechemer per Yompor. Amach eñalle ñeñtcha' a'sosyatene' atto yocrrena e'ñe cohuen Yomporecop aña patsro. E'ñech cohuen yorrtena acheñenesha'cop ama't ñeñt ama ame'ñetso ñeñt atarr nanac sosey cotape'chenet. Cohuencha' yorreyena atet ñerra'mrrate' rantoçhno ñeñt a'puetarene' checmete' tsapo.

¹⁶ Attoch sa'puetarsamþsanetpa' çhoch señoñaterranet ñoñets ñeñt huetsa Yomporeshot alloch yocrrerra e'ñe cohuen. Allochñapa' ñerra'm esempohuañencha' huerra Cristopa' socshaterrencha', tarro'mar neñotercha' ama e'ñe orrena nanac netorrerrocop.

¹⁷ Ñaña ama'tcha' machayota muetsataterrnet arr atto napa' o' name'ñatasa, napa' atarr nocshena ñaña te'pa'cho'ña nocshapretensa atto same'ñerra. Añña same'ñeñapa' ñeñtcha' yehuapateññañ Yompor atet ñerra'mrrate' ñeñt amtsarettetsa ñocop. Ñaña nerraspa' ñeñtcha' orrtatsa ñerra'mrrate' ñeñtcha' ashatarettatsa all ñeñtcha' o'patateñet Yompor.

¹⁸ Neño'marña napa' nemneñ sapa' amach çha sellcatsto, çhochña socshapreterrna ñeñt atet o' notuas.

Timoteopa' nanac cohuen llecapretane't pamo'tsesha'

¹⁹ Te'pa' o'ch notas ñeñt atet noctape'chen. Añ noctape'chen o'te' nemñer masheñ Timoteo tayecma o'ch enterrsa', ñerra'm atetcha' muena' Yepartseshar Jesús. Allochñapa' ñach neñotatuere' errotente' seþa'yena, allochñapa' attoch socshaterren ñerra'm cohueno'tseneste'.

²⁰⁻²¹ Añcha' nemñonas masheñ Timoteo tarro'mar ama eñalle ama't puesheñarra ñeñt cotape'chene' cohuen atet ñerra'm ña ñeñtcha' e'ñe po'ñoçh sellcapretenaya ñeñt echarr sentyen. Tarro'mar ama't eñalleñ ñeñt parro yetorrera, ama allohuenacmaye' llecapretenseto ñeñt echarr sentyen. Añach torra'yenet ñeñt e'ñe ñocueta. Amachña añeye' llecapreteneto attoch torrenet ñeñt nanac sherbets Jesucristocop.

²² Ñaña sapa' e'ñe señoñueñ atet masheñ Timoteopa' e'ñe cohuen þa'yena allempo parro yeserrpare'tatyen añ cohuen ñoñets alloch yequeshperra. E'ñe cohuen torrapretenna atette'ña ñerra'm yechemerpa' e'ñech cohuen yenpueny yetaruas.

²³ Nehua, esempoch e'ñe neñoçh ñato' errotente' poctetsa nocoppa' napa' noctape'cheñ o'ch nemñonas masheñ Timoteo.

24 Na te'pa' aña necuen Yepartseshar Cristo ñerra'm ñach muenats, napa'cho'ña naḅcherrsa'ch amach atarr natomatatatsche.

Atto Epafroditopa' yempa'yesosan Pablo all cárcelo

25 Ñaña o'ch notas po'poñ, e'ñe pocte' nenteñ te'pa' o'ch alla nemñer sesho masheñ Epafrodito ñeñt parro yetaruaseño'pa' nanac yetorre't Yomporecop. Ñeñtara masheñ Epafroditopa' ñeñt semñon ahuaña ñach neyenpa'yesose' all es nepalltena ñeñtcha' neyenpose' arr.

26 Napa' e'ñe pocte' nenteñ te'pa' o'ch alla ahuerr sesho, tarro'mar ñapa' nanac yerpuesa attoch o'ch alla entuerres. Tarro'mar ñapa' añ nanac llecatene' atto sapa' ahuo't se'mare'ch ñapa' cha atsna'tos arr.

27 Ñehua, po'ño'ch ahuañapa' cha atsna'tos cha muene' rromañ, tarraña Yompor e'ñe puemuereño'teypa' o' alla a'crrater atto ñerra'm rromañpa' ellote' na'na llecatañ arr cárcelo.

28 Ñeñto'marña e'ñe poctennana o'ch nemñer e'ñe tayecma sesho allochñapa' o'ch socshapuera ñerra'm esempoch cherr e'ñe sesho. Allochñapa' amach ña'na allo'na nellcatnenaye.

29 E'ñech separasyoso'teñesha' Yepartseshar Cristo o'ch sagapapuer ñaña e'ñe socsheñeshocmañen. Ñaña o'ch notas, chocmuepa'ch semorrenteña ama't erra'tsena acheñer ñeñt e'ñe atet senten ñerra'm ña.

30 Atto ñapa' e'ñe puemneñño'f o'ch torra Cristocop cha atsna't ama't cha muene' rromañ. Atarr yoreretsot correrra arr, tarraña ñapa' ama ñeñtayaya mecha'to attoch ñapa' o'ch yenposen, ñeñt sapa' amate' erro't sepe attoch sehua'cha'ta ḅachayot e'ñe puesheña'ttsos attoch seyenpuenna' arr.

3

Arrpa' all eñotatyesanet ñeñt e'ñe po'ño'ch sherbets Yomporecop ñaña ñeñt e'ñe orrena cotapñats

1 Ellonetpa' o'ch alla masheñnesha ñaña no'chanesha noterrser po'pocheño, e'ñe same'ñeño't Yepartseshar Cristopa' chocmuepa'ch socshena. Ama't te'pa' o'ch alla noterrser atet tarro'mar amach nemuenme'che sotare'te' atet, tarro'mar ñeñtcha' nanac seyemta sa.

2 Ñaña te'pa' o'ch notas po'poñone't. Señota'tach ñato'tña seyemteña' ñeñt acheñeneshar ñeñt añach torrenet ñeñt ama cohuenayaye, ñeñt e'moñe'tene' cohuen serrparñats ñeñt alloch po'ño'ch yequeshperra. Ñetpa' e'ñe atet nentenanet ñerra'mrrate' ochec ñeñt nanac atsena'tare't. Ñeñt judionesha' ñeñt o' notuanmaspa' añach ma'yo'chrenet cotapñats attoch tsorrannenet atto'ch puechemer perranetañ Yompor.

3 Tarraña yapa' yaña e'ñe po'ño'ch puechemer o' enterrey Yompor, tarro'mar yapa' e'ñe yeñoteñ ama yetsorranna'teño'teye' puechemer penye Yompor. Po'ño'ch puechemer perrey tarro'mar yapa' e'ñe yocsheño'f Parets ñeñt'pa' e'ñe Puecamquëño'f huena. Ñaña puechemer o' perrey Yompor tarro'mar yapa' yocsheññaña Puechemer Cristo Jesús ñaña tarro'mar yapa' ama añaeye' yeyemteno ñeñt atet yetsotaten e'ñe yañeña, ñeñt e'ñech yechtsochaya.

4 Ñehua, ñerra'm esesha' ñetpa' cha'te' otenapuetañ añte' poctetsa o'ch yeyemtena ñeñt allo es yepenañ alloch yequeshperra e'ñe yototapa' nocoppa'cho' eñalleñ shonte' ñeñt neyemtenañ, tarro'mar ñeñt allpon o' netsotatuena'p' ello metana'tuenan allohuen po'psheññe'chno namo'tsesha'chno puetsotateñ.

5 Tarro'mar napa' o' e'ñe allpon netsotueññañ judionesha' poctapña: Ama't po'psocmatñoñeñ allempo ne'ñalletuapa' napa' atorrataolle'tareten* ñeñt atet anuaret allohuen asheñorroñtolleshacop ñeñtey judioneshay, tarro'mar e'ñe israelena'tareshot ñeñt e'ñe judiomreyot eñalletñan. Ellonetpa' ñaña napa' Benjamín po'mrenñen. Ñaña napa' e'ñe hebreoneshan tarro'mar ach ñaña apapa' e'ñe judioneshet poctacma ñeñt eñets e'ñe ya yeñoño ñeñtara hebreacho. Allo'tpa' ñaña na ahuatpa' e'ñe fariseoneshan ñeñten nanac ma'yoçhraye't attoch netsotua ora allpon ñoñets ñeñt aquellca'huaret judioneshacop.

6 Nanac netsote't judionesha' poctapña. E'ñe nemoñseñoñ yocapña napa' ne'moñe'che't allohuen ñeñt o' ame'ñerrana Cristo. Ñeñto'marña epaye'ch ne'name'tanete't attoch erroteno'tpa' o'te' erro't ne'patanet. Ñaña ora atet oteney ñoñets ñeñt atet anaret judioneshacop napa' çhocma e'ñe atet ne'pohuahue't. Ñeñto'marña ama eñalle'te ama't patra ñeñt nepalltena attoch ello po'psheñeña' o'ch otnet ñeñto' nepalltenmeñ.

7 Allempo atet netsotrrote't ñeñtecop nañapa' ñeñta notenapañ ñeñtte'ña nanac sherbets nocop. Tarraña te'ñapa' e'ñe nemorrenteñoñ Cristopa' o' neñoter ñeñt allpon o' ne'pohuahua' amach es sherberro nocop ama't coñe'ta.

8 Ama't ellonet allohuen po'poñeçhno ñeñt nente't ñeñto'ch sherbatseñ nocoppa' te'ña e'ñe neyemteñoñ Cristopa' ama asherbenaye' nenteñe, ama't coñe'ta, tarro'mar te'pa' o' neyemtera Yepartseshar Cristo Jesús ñeñt nanac sherbets. Ñapa' ello metana'tuenan allohuen po'poñeçhno ñeñt atet nente't na ñeñto'ña nanac sherbets. Ñeñto'marña nemorrenteñoñ Cristo te'pa' o' nepuesuerr ora po'poñeçhno, nocop te'ñapa' ama esoye' nenteñe esheccha' te'pa' e'ñech nocsheñesha' nocter Cristo.

9 Allochñapa' e'ñe yeparrocmateñoñ Cristo, Pomporpa' e'ñech pocte' enteney tarro'mar amach añoteye' a'queshpatterrye e'ñe yo'to'ta ama't yetsotatsetuahua ñoñets ñeñt atet anaret judioneshacop. Año'cha'ña te'pa' e'ñech pocte' enterrey e'ñe yeyemteñoña ñeñt Puechemer pen ñeñtpa' Cristo.

10 Atto e'ñe yeparrocmateñoñ Cristopa' o'ch yaguërrñañ po'huamenc atto ñapa' nanac ahuamencattena allempoteñ tanterra puerromñoñ. Ñaña e'ñe yeyemteñoñ Cristopa' e'ñech pocte' yeñch ama't e'ñe erroteno'tpa' o'ch yemueroçhta e'ñe ño'mara atto ñapa' nanac amueroçhtatarete't. Ñaña ama't yemueroçhetuaneñoñ Cristocopcha' yerromapa' ñeñtpa' e'ñepa'ch pocte' yeñch tarro'mar atetcha' yerromaprecha Cristo.

11 Attochña yapa'çho'ña yetantuerrach esempohuañen.

Ñeñtach e'ñe paterr llequë't Pablo

12 Ñehua, napa' ama noteno napa' o' e'ñe poctacma netsotuahuen ora allpon ñeñt pocte' enten Cristo. Ñaña po'ñoçhpa' ama noteno napa' e'ñe es coçhneshare' noctape'chuen. Tarraña ama't atet neñotenapa' elloña te'pa' allo'ñaña nesen ama't aco'pa o'ch netsotnom ñeñt pocte' enten Cristo Jesús, tarro'mar ñapa' ñeñtecop o' pueyochresha' perren.

13 Napa' masheñnesha ñaña noçhanesha neñotena po'ñoçhpa' ama atteye' ne'pohueno ora allpon ñeñt cohuentetsa Cristocop. Tarraña ama't atetpa' amach ñeñta neyerpuerre'te, çhochña nepuesuanom ñeñt atet ne'patse'tyese't ahuatoteñ. Te'ñapa' añach nema'yoçhrena attoch allo'nach nesen ama't aco'pa etsotayesnomue' ñeñt poctetsa Cristocop.

14 Tarro'mar ñeñtecop o' çhore'terrey Yompor pue'ntañoñ attoch e'ñe yeparrocmateñoñ epay Puechemer ñeñt Cristo Jesús, esempopa' ye'pohuerrach ora errponte'

* 3:5 O'ch secue' nota San Lucas 1.59.

e'ñe pocte' enten ña. Allochñapa' aphuerreycha' ñeñt' o'patatenya ñeñtcha' nanac yocshatuerre' allohueneñ ñeñtey o' yame'ñera.

15 Ñaña o'ch notas ñeñtes po'ñoçh o' same'ña'huera Cristo ahuañmo'chofeñ, te'pa' ñeñtña o' notuanmas e'ñepa'ch seyoçhre'cha. Ñaña ñerra'm erra'tsente' soctape'chyen ñeñt ama atteye' poctetso Yomporecoppa' ñeñtpa'cho'ña e'ñe ña Puecamquëño'pa' ñach e'ñe señoatuerre'.

16 Añcha'ña e'ñe pocte' o'ch ye'pohuena ñeñt allpon o' çhapatuonay Yompor e'ñe ye'yoçhro ñeñt ye'noten erra'tsente' e'ñe pocte' enten ña.

E'ñech cohuen yocrrena atet corre't Pablo

17 Ñaña o'ch masheñneshacha' ñaña noçhaneshacha' o'ch notas, ñeñt atet sentenen atet nocrrena napa' sapa'cho'ña atetcha' socrra sam'a allohuenes. Ñaña añcha'ña secua' ñeñt señoaten erra'tsente' ñeñt e'ñe atet corretsa cohuen ñeñt atet entenyet ya.

18 Tarro'mar añ patsropa' eñall shonte' acheñenesha' ñeñt atet penetpa' yapa' ye'noteñ ama ayemuetpahuoye' enteñeto atto Cristopa' rroma corsocho attotcha' yequeshperra. Ama't ñeñtpa' shontoch o' notuanmas ahuañapa' te'pa'cho'ña e'ñe nanac nelquëñesha'pa' o' alla noterrser.

19 Ñetpa' aña o'patenahuet attoch allohuenetpa' e'ñech chenca'huerret. Añach yoma'yenet attoch rra'yenet amapa' orrare'tyenet. Ñeñt atet yomatse'tyenetpa' ñeñtpa' atet ñerra'mrrate' ñeñta po'yomporer penet. Ama't ñeñtcha' pencatahuetañpa' tarraña ñetña'pa' ñeñt'ach atarr coshatenahuet. Ñaña añach e'ñe nenet pueyoçhro ñeñtcha' atet coshatse'tatyenahuet arr patsro.

20 Tarraña yapa' o'huañ atteye' yoctape'ch tarro'mar añ patsropa' ama't all yeyçhenañpa' tarraña po'ñoçhpa' ama ya'netsreyaye. Tarro'mar ya'netsro allcha' yeyçherra ya errponohuañenpa' ñeñtpa' all Yompor pue'ntañ. Ñeñtara pue'ntañotpa' yecueñ allot esempohuañencha' huerra Yepartseshar Jesucristo ñeñt Ya'queshpatañer yepen.

21 Ñerra'm o'ch huerra aña patsropa' ya ñeñtey arromña'feypa' ñapa' o'ch a'po'poñetuerrnay yechets, allochñapa' yapa'cho'ña yorrterrach e'ñech attey ñerra'm ña po'partsoteño'pa' nanac cohuentena. E'ñech ña po'huamenco't a'po'poñetuerey ñeñtara po'huamenco'tpa' e'ñech pomnaren p'ohuerran allohuen allpon ñeñt eñall.

4

1 Ñeñto'marña masheñneshacha' ñaña noçhaneshacha' e'ñe nemorrenteño'fespa' o'ch notas, çhocmuepa'ch huomenc se'pa'nem seyoçher Cristocop ñeñt Yepartseshar yepen. Añpa' atet notenes tarro'mar sapa' çhocma neyerpuensa ñaña çhocma socshatennen atto sapa' e'ñe cohuen same'ñena. Nanac nocshensa tarro'mar napa' nentenes atet ñerra'mrrate' necopa' ñeñt o' naguërr e'ñe netorreño' Yomporecop e'ñe so'mar. Atarr nanac nemorrentensa.

2 Ñaña o'ch noteñ noçhanesha' Evodia ñaña Síntique, amach allo'na po'poñ entanna'tatsetneneto tarro'mar e'ñe yame'ñeño' Yepartseshar Cristopa' e'ñech cohuen yemuerannena.

3 Ñaña o'ch notas, ama't erra'tsenotesa ñeñtes po'ñoçh nanac neyemtenapa' o'ch samo'tstatanna'terranet añ epsheña coyanesha' tarro'mar ahuañmo'chapa' e'ñe parrocma nanac yema'yoçhre't attoch epa'hua añ cohuen ñoñets alloch yequeshperra, ñaña epay Clemente ñaña po'potantañ ñeñt parrocmá nanac yetorre't ahuañmo'cha. Ñet pa'so'chñeçhnopa' o' aquellca'huare'tterret attoçhña ñetpa' corretsetach.

E'ñe yame'ñeño' Yomporpa' çhocmuepa'ch yocshena

4 Te'ñapa' o'ch noterrser atet, e'ñe same'ñeño' Yepartseshar Cristopa' çhocmuepa'ch socshena. O'ch alla noterrser, çhocmuepa'ch socshena.

⁵ Eñotuasepa'ch allohuen acheñenesha' atto sapa' e'ñe cohuen acheñres, amach cha po'poñ es sentatatsetuenaye, ama't erroteno'tsenes. Tarro'mar yeñoteñ po'ñoçhpa' alla'tsena Yepartseshar Cristo.

⁶ Amach es sellcatsto ama't e'ñe mamesha. Añcha'ña ama't erroteno'tsenes e'ñe sema'yocheño'tpa' çhocmuepa'ch sotue Yompor ñeñt sellcatyene' ñaña e'ñe socsheño't Yomporpa' çhocmuepa'ch senamyen ñaña ñeñt sepallta'yena.

⁷ Ñerra'm atetcha' çhocma sepena, Yomporpa' ñachña ama semnatenaye o'ch es sena'yen seyoçhro ama't coñe'ta. Attoch eñmataterrnay Yompor yeyoçherpa' ya acheñey e'ñe yoçta'ño'tapa' amate' erroteno't e'ñe yo'tapa' yeñmataterro atet. Ñeñto'marña e'ñe yeparrocmateño't epay Cristo Jesús, Pomporña'pa' cohuañpennaycha' yeyoçher attoch amach allo'na yena'nenno yeyoçhro ñeñt allcatañtetsa.

Añcha'ña e'ñe cohuen yoçtape'ch ñeñt e'ñe cohuen entuen allohuen acheñenesha'

⁸ Te'ña masheñnesha ñaña noçhanesha e'ñe allohuanenpa' o'ch noterres, añcha'ña soçtape'chyes ora erra'tsente' señoten ñeñt e'ñe cohuenetyetsa ñaña ñeñt ora cohuen entuapotetsa. Ñeñtcha'ña soçtape'chyes ora erra'tsente' ñeñt ama shequëñtsoyaye, allo'tpa' ñaña ora erra'tsente' asherben entpahuotets, allo'tpa' ñaña ora erra'tsente' ñeñt poçtetsa, allo'tpa' ñaña ora erra'tsente' ñeñt ama sosya'tsañeyaye, ñaña ora erra'tsente' amorrentanna'tatañtetsa, ñaña ora erra'tsente' ñeñt e'ñe cohuen aserrpare'tpahuotets. Ora allpon añeçhnopa' ñeñtcha'ña atet soçtape'chyes.

⁹ Ñaña o'ch noterrser po'poñ ñeñtcha' atet sepa. Allpon o' neyçhatuas, ñaña allpon o' neçhapatuonas seyoçhro, ñaña allpon o' neñotatyesas, ñaña allpon sentenen ñeñt atet es nepa'yena napa' sapa'çho'ña te'ña'pa' e'ñepa'chña atet es sepa'yen saña. Allochña'pa' Yompor ñeñt acshatañtetsa yeyoçhro'pa' ñachña parro'tsenes allohuenes.

Atto filiposo'marnesha'pa' es apueñet Pablo ñeñt pallta'yena

¹⁰ Ñaña o'ch notas, e'ñe neyemteño't Yepartseshar Cristo, napa' atarr nocshena tarro'mar sapa' o' alla seyerpuerrna. Ñehua, napa' ama notenso o'te'sepuesuerren, añña noten sapa' ama't erro't sepeñe attoch seyenpa'n.

¹¹ Ama çho es nemnapreteño'teye' notenso atet, tarro'mar na te'pa' o' çhapona neyoçhro ñeñt atet cohuentetsa, ñeñto'marña te'pa' o' attaña neyçha ama't erroteno'tsenanapa' tarraña attachña çhocma nocshena neyoçhro.

¹² Ñehua, napa' neñotena errotenopa' nanaccha' es nepallta'yese't atto yocrrena añe patsro, elloneña errotenopa' esocmañencha' nechyses't. Tarraña ama't erroteno'tsenenpa' na te'pa' o' neñoçh o'ch attaña neyçha; ñerra'm es nepalltena errotenopa' amach cha llecatenno, ama't çho esocmañen es nechyes errotenopa' amach cha nommo'cheño. Ñaña attecmaçh nocshena ama't esempo eñall shonte' nerrar ñeñtcha' neyeten, amapa' esempo ama eñalle ñeñtcha' nerren, amach es ne'nenno.

¹³ Ñeñto'marña napa' e'ñe neñoteñ, yapa' ama't erroteno'tsenyapa' çhocmaçh ahua-mencatey tarro'mar Cristopa' ñach nanac ahua-mencat yepene'.

¹⁴ Tarraña ama't o' notuanmas atetpa' e'ñe poçte' nenteñ atto sapa' sellcapretena ñeñt nemueroçhtatene' arr.

¹⁵ Ñaña sa ñeñtes filiposo'marneshas e'ñe señotueñ allempo ñanom neserrpare'tnom cohuen ñoñets alloch yequeshperra, allempo non Macedonio't, allempopa' ama't allemeñ anetso'marpa' ama eñalle acheñenesha' ñeñt atet apçherrtsa Yomporcop ñeñtcha' nellcapretenaya attoch e'ñe parroçma es yapanna'ta. Sapa' saña e'ñe sap'ta ñeñtes es napuene' ñeñt allpon nepalltena.

¹⁶ Napa' ama't ahuañmo'cha allempo Tesalónico'tsenenpa' ama parroçho'tayaya sapa' çhocma soñmaten ñeñt sapuenen añecop ñeñt nepallta'yena all.

¹⁷ Ñehua, napa' ama nocpaye' nemnapretenso o'ch es sapuenen. Añña nemnen ñaña allochñapa' socoppa'cho'ña ellopa' o'ch atonetnoma attoch coshatuerres Yompor.

¹⁸ Te'pa' o' aposen masheñ Epafrodito ñeñĩ allpon soñmaten nocop. Ñeñĩ allpon o' nagaponaspa' te'pa' ama es nepallteno ama't coñe'ta, elloña cha metanuosan allpon ñeñĩ nepalltena. Ñeñĩ allpon sapuanpa' napa' e'ñe attecoptar nenteñ ñerra'mrrate' ñeñĩ apuenet Yomporecop ñeñĩ eñmosa'ttetsa ñeñĩcha' e'ñe pocte' enten, ñaña ñeñĩcha' nanac coshatene' ña.

¹⁹ Ñaña Yompor ñeñĩ e'ñe neyemtena napa' ñachña sapuerre' saña ama't ora ñeñĩ allpon sepallta'yena sa, tarro'mar e'ñe yeparrocmateñoť epay Puechemer ñeñĩ Cristo Jesús ñeñĩ e'ñe esocmañen es echyetspa' nanacocmañencha' esocmañen apuerrey yaña.

²⁰ Aye'chochtatarettepa'ch Yompor ñeñĩ atarr Parets. Ñeñĩpa' attetepa'ch ama't tayoteñ errponohuañen.

Arrpa' all so'tnerranet e'ñe po'cartoť

²¹ Ñaña o'ch notas, o'ch sehuom'cha'ch allohuen ñeñĩ pueyochresha' o' perr Cristo Jesús. Ñaña allohuen masheñnesha' ñeñĩ e'ñe parro'tseneypa' ñetpa'cho'ña mueneñet o'ch huom'cha'taset ñamet arr necartoť.

²² Ñaña allohuen ñeñĩ pueyochresha' o' perranet Parets arr Romopa' ñetpa'cho'ña mueneñet o'ch huom'cha'taset ñamet necartoť. Ñeñĩ nanac muenets atetpa' ñeñĩpa' ñeñĩ parro yeçhena ñeñĩ atarr añcha'tarettetsa arr Romo.

²³ E'ñe Yepartseshar Jesucristopa' ñepa'chña e'ñe sa'natenaya allohuenes. Te'pa' ñeñĩfach notas, ñeñĩpa' attetepa'chña Nompore. Allohua.

Pablo

AÑ SAN PABLO PO' CARTA ÑEÑT̃ QUELLCAN COLOSASO' MARNESHA' COLOSENSES

Atto Pablopa' quellcan carta añecop ñeñt̃ ame'ñetsa anetso Colosaso

¹⁻² Masheñneshacha' ñaña noçhaneshacha' ñeñtes o' pueyochresha' perres Parets e'ñe seyemteñoñ Cristo, sa ñeñtes yeçhetsa all anetso Colosaso. Na Pablon sequellquëne'ña añ carta epan masheñ Timoteo. Napa' ñeñten Cristo Jesús puellsensaren tarro'mar atet muenatenen Yompor. E'ñe nehuom'cha'teñoñes sa napa' o'ch notas: Yomporepa'ch Parets sebensare'tam'pene' ñepa'chña socshatene' e'ñe sa seyoçhro allohuenes.

Arrpa' all parasyoso'teñet Yompor ñocpuet

³ Yapa' allempo yema'yocham'pensapa' çhocma yeparasyoso'teñ Yompor, ñeñtara Yepartseshar Jesucristo Pompor.

⁴ Tarro'mar yapa' o' ye'mare'tas atto sapa' atarr same'ñeña Cristo Jesús. Ñaña ye'mare'tenes sapa' atarr semuereña allohuen ñeñt̃ pueyochresha' pen Parets.

⁵ Ñeñt̃pa' tarro'marña sapa' atet atarr seyemteña sapa' e'ñe same'ñeñoñ Cristopa' sapa' añ atarr seyemtena ñeñt̃ o'patatensa all pue'ntaño. Ñeñt̃ña sapa' ahuañoñeñ se'mñnotenña cohuen ñoñets ñeñt̃ e'ñe po'ñoçh Yompor po'ñoñ alloch yequeshperra.

⁶ Ñeñt̃ña cohuen ñoñets ñeñt̃ çhapats sesho ñeñt̃ña te'pa' allemeñ çhapyen, allpa'çho'ña nanac ame'ñatenana shonte' acheñenesha'. Allpa' allo'na senet orrtatyestet ñeñt̃ e'ñe cohuen enten Yompor. Ñetpa' e'ñe atet penet atet sepena samña. Sa po'ñoçh allempo errtes e'muerre' Yompor po'ñoñ atto ñapa' atarr morrentenya, sañapa' e'ñe allempoteñ çhaponasa seyoçhro ñeñt̃ña ñoñetspa' e'ñe po'ñoçh Yomporo po'ñoñ. Allempoteñña sapa'çho'ña allo'na sesen orrtatyestnomue' ñeñt̃ e'ñe cohuen enten Yompor.

⁷ Ñeñtara cohuen ñoñets ñeñt̃ ñanom yeçhatas masheñ Epafras. Ñapa' ñeñt̃ e'ñe parroçma yetorrena Yomporecop, atarr yemuerannena. Ñapa' çhocma atarr cohuen torrena Cristocop ñeñt̃ña' e'ñe socop.

⁸ Ñapa' e'ñe cohuen eñotaturrey atto sapa' atarr semorrentannena e'ñe same'ñeñoñ Cristo.

Arrpa' all ma'yocham'peñet colosaso'marnesha'

⁹ Ñeñto'marña allempo ye'mare'tas allempoteñ yapa' ama yequeçhpueno sema'yocham'psaya Yompor. Yapa' añ yenamuennas Yompor: Sapa' çhocmuepa'chña eñotatenes ñeñt̃ atet muenen ña ñeñt̃cha' atet sepa'yes e'ñe cohuen ñocop. Ñaña çhaponasepa'ch seyoçhro ora allohuen ñeñt̃ atarr cohuentetsa yecamquëñecop.

¹⁰ Allochñapa' o'ch e'ñe seyçherr ñeñt̃ atet poctetsa allohuenacop ñeñt̃ey pueyochresha' pen Yepartseshar. Allochñapa' attoçhña e'ñe socshateñ. E'ñe atto es cohuen sorrtatyenpa' nanaccha' cohuenoñ sesherbeñ. Allo'nepa'chña sesen eñotnomue' ñeñt̃ atet penaña Parets.

¹¹ Ñaña añ yenamuennas Yompor: Po'partsoteña ñeñt̃ cohuenñatsotetspa' e'ñepa'chña ahuaencañ pa'yesas e'ñe poctacma allochñapa' amach çha sequeçhpatstere. E'ñeçhña socsheñesha' sa'huanta'huanomña allohuen ñeñt̃ atarr echarr sentyen.

¹² Ñaña sapa' çhocmuepa'ch separasyoso'ch Yompor tarro'mar ñapa' a'poctaterrnay attoçh yagapapreter yamña ñeñt̃ o'patatenana allohuen pueyochresha'çhno. Ñeñt̃ña' ñeñt̃ po'cohuenña pen ñeñt̃ atarr cohuentetsa allña'pa' puetaretsa.

¹³ Tarro'mar te' Yomporpa' o' cheterrey checmetoť all amĉha'noĉhtena oneñeť. Te'ña yapa' o' ĉhapterrey po'cohuenño all ayochreshattena e'ñe ña Puechemer ñeñť Jesucristo ñeñť atarr morrentena ña.

¹⁴ Ñeñťña Jesucristo ñeñťña rromats yocop ñapa' attoña e'ñe tsa'tuerrnayaña yo'chñar attoch e'ñe peretna'huerrnay yo'chñar esheccha'ña e'ñech cohuen a'queshpaterrey Yompor.

Allempo ashataretta Cristo po'rras corsocho, ñeñťña e'ñe a'mchechatue'ña allohuen esocmañen

¹⁵ Yompor Paretspa' ama entpahuo, tarraña Cristoña ama't entpo'pa' ñapa' e'ñe parro attecma ñerra'm Pompor Parets ñeñť ama entpahuoyaye. Ora allohuen allpon eñalleyestsas, Cristoñapa' e'ñe ñanom eñall ñeñťcha' pomnaren penahuet allohuenet.

¹⁶ Allohuen ñeñť allpon ayeĉhcataretetyestsas ña e'ñe yeĉhcatuahuet, ama't ora allpon ñeñť ento'tsa'yen ñeñť ama entpahuoyaye ñaña allohuen ñeñť yentyen arr patsro, e'ñe ñocma pueyeĉcatuar. Ñaña allohuen ñeñť allpon amĉha'taretetyestsas, ñaña allohuen ñeñť allpon ayochreshatetyestsas, ñaña allohuen ñeñť allpon amĉha'noĉhtetyestsas er-racmañen, ama't ñaña allohuen ñeñť allpon huomenc entyestsas, ora allohuenet ñeñťet ayeĉhcataretet e'ñe ñocma pueyeĉcatuaranet. E'ñe ñocpacma ayeĉhcataretetyesuahuet.

¹⁷ Ora allpon ñeñť esocmañen eñallpa' ñaña' e'ñe ñanom eñall. Ora allpon ñeñť esocmañen eñallpa' ñapa' ña orratyenahuet.

¹⁸ Cristoñapa' yeyoĉher* yepohueñ allohueney ñeñťey parrocmatenaya e'ñe yame'ñeñoť ña, tarro'mar ñapa' ña yoctape'chatene' e'ñe cohuen allohueney ya ñeñťey e'ñe po'ĉhets pohueney. Ñeñťo'mar Cristopa' pomnaren peney allohueney ñeñťey ame'ñenaya ña. Ñapa' e'ñe ñanom orrtatene' allochña yapa' corretsayach allohueney ñeñťey e'ñe po'ĉhets pohueney e'ñe yeparrocmateñoť epay ña. Ñaña ñapa' ñanom tanterrtsa rromoť, ñeñťña' ellochña nanac sherber. Ñeñťpa' tarro'mar atet pa allochña' ora ñeñť esocmañen allpon eñall, ñetña' Cristochña e'ñe ñanom nanac cohuen entyenet.

¹⁹ Pompor Parets e'ñe pocte' enteñ o'ch e'ñe cohuen chorrataña ora allohuen po'partsoña.

²⁰ Ñaña' e'ñe alla parrocmaten Pomporesho e'ñe parrocmata allohuen esocmañen, ama't ñeñť patso'tsa'yen, ama't ñeñť ento'tsa'yen. Allempo ashataretta Cristo po'rras corsocho, ñeñťña e'ñe a'mchechatue'ña allohuen esocmañen.

²¹ Ama't sa ahuaťpa' atarr ellaĉaro'tsa'yenes Yomporeshoť. E'ñe se'moñe'teñoť Yompor seyoĉhro sañapa' aña seyeĉcatyese't ñeñť ama cohuenayaye.

²² Tarraña te'ña Yomporpa' o' e'ñe parrocmata terres e'ñe ñesho. Ñehua, allempo amue-roĉhtataretta Cristo e'ñe ña po'chtso atto rroma, ñeñťpa' attochña e'ñe parrocmata terres saña. O' e'ñe parrocmata terres attoña sapa'ĉo'ña o' sa'cohuentataretterra Partsocop, ñaña attoch amach sa'tanmaretterro, amach eñalle attoch sotteñe'charetterra. Te'pa' atetca'ye enterresña Yompor.

²³ Ñerra'm po'ñoĉ ĉhocmach same'ñera Cristo, ñerra'm e'ñech huomenc seperr seyoĉher attochña sapa' amach sepurrerro. Cohuen ñoñets ñeñť o' se'mhua alloch yequeshperra ñerra'm amach ĉha sa'ypo'ñañpere ñeñť o' seyemterra Yomporña' enterrescha' o' e'ñe sa'cohuentataretterra. Añ cohuen ñoñets ñeñť o' se'mare'tua sa, te'ña' aserrpare'tataretterrach ñaña allohuen ñeñť corra'yetsa aña patsro. Ñeñťo'marña na ñeñťen Pablon nach sherberrets te'ña' nach serrpare'taterrahuet.

Atto Pablo a'potan ñeñť ahuaťoťeñ ama eñotpahuo

* **1:18** Ñehua, po'ñoĉ Cristopa' arr atma'ntataret atet ñerra'mrrate' ñeñť yoñ yepen.

24 Te'ña na e'ñe nemueroçhteñoñ socoppa' atarr nocshena. E'ñe nemueroçhteñoñ nechtsopa' ñeñtpa' attoña netsotatennas allpon ñeñt palltetsa attoch nemue-roçhtaprecha Cristo allohuenacop ñeñt ame'ñenaya ña ñeñt e'ñe po'chets pen Cristo ñeñt e'ñe a'parrocmataten.

25 Ñeñto'marña te'pa' nach sherberre' allohuen ñeñt ame'ñenaya Cristo. Atet llesense-nen Parets e'ñe socop, attochña napa' o'ch e'ñe na'potuerrñañ ora Yompor po'ñoñ.

26 Añcha' na'poterr ñeñt ama't ahuatapa' ama eseshaye' eñotaye'te e'ñe yatañeshapoteñ tarro'mar allempopa' ama çhena' allempoch eñotatteranet Yompor. Tarraña te'ñapa' e'ñe eñotatterey Yompor allohueney ya ñeñtey pueyochresha' pen Parets.

27 Te'ña Yomporpa' atarr mueneñ o'ch eñotatterey ñeñt atarr coçhneshare' ñeñt po'cohuenña e'ñe ahuatoteña' ama eseshaye' eñotaye'te. Te'ña ñeñt po'cohuenña' o' e'ñe orrtatere'terra añecop ama't ñeñt ama judioneshayaye. Ñeñtña ama eñotete'te ahuatpa', ñeñtña' añepa't Cristo ñeñt chorrenaya yeyoçher. Attoña e'ñe yeyemteñoñ ña yañapa' o'ch yecohuentapretera.

28 Ñeñto'marña Cristopa' çhocmach ya'poteñ. E'ñechña cohuen yoc'tape'chatyeñ allohuen ama't erra'tsena acheñer. Ñaña e'ñech cohuen yey'chatyeñña allohuen ama't erra'tsena acheñer attochña ñetpa'çho'ña e'ñech eñotyeñet ñeñt atet pena Cristo. Attoña e'ñe pueyemteñoñet Cristopa' o'ch ame'ñeñet e'ñe poctacma.

29 Ñeñto'marña napa' nanac ne'torrena ñocop. E'ñe po'huamenco ñeñt atarr ahua-men-ca't nepene' attoña napa' çhocma atarr ne'torra'yena ñocop.

2

1 Napa' nemneñ o'ch señoçh atto napa' e'ñe nellquëñoñes sa atarr nanac ne'torrena socop. E'ñe attecma ne'torrena ñaña laodiceo'marneshacop, ama't ñaña allohuenacop ñeñt ama puentarno.

2 Allochña' attochña e'ñe socsherra seyoçhrohuen atto e'ñe semorrentanna'teño'tpa' o'ch e'ñe separrocmaterr. Attochña çhaponasa seyoçhro attoch atarr es seño'tyerr. O'ch seño'terr ñeñt ama eñotete'te ahuatoteñ, ñeñtpa' ñapñaña Yompor eñotene'. Ñeñtpa' e'ñepa'tca'ye Cristesho'tsenña

3 allohuen pa'namen eñoteñets ñeñt nanac coçhneshare' yentyen. Ñeñtpa' e'ñe yeyemteñoña Cristo esheccha' yeñoterrña ñeñt ama't ahuatapa' ama eñotpahuo.

4 Ñeñto'marña napa' atet notenes allochña' sapa' amach esesha' seshquërraye ama'tcha' cotape'chatyesaset ñeñt atarr cohuen ñoñets sentyerreñ.

5 Ama'tcha' ama allo'tsenno e'ñe na tarraña neyerpueñoñes neyoçhropa' e'ñe parro'tsa'yenacmay. Sapa' e'ñech nocsheñesha' nentyenes atto e'ñe cohuenare' es sorrtatyen. Ñaña nentenes atto e'ñe same'ñeñoñ Cristo o' e'ñe huomenc sepa'yen seyoçher ñocop.

6 Atto o' sagapuer Yepartseshar Cristo Jesús, te'ña sapa' allo'nepa'ch sesen e'ñe parrocmatats epas.

7 Attochña sapa' e'ñech huomenc serrmuerrñañ po'ñoñ atet ñerra'mrrate' tsachreçh atarr huomenc rromuenan pats, e'ñe separrocmateñoñ epaspa' allo'nepa'chña atonet-nomaña ñeñt atto same'ñena. E'ñe same'ñeño'tpa' huomenquëpa'chña sepa'yenom seyoçher. Atterepa'chña allo'na sesen ñeñt atet yeçhatyenes. Ñaña çhocmuepa'chña separasyoso'chña Yompor.

E'ñe yame'ñeñoñ Cristopa' o'ch yesuanomña atet muenatyese't yechets

8 Seño'ta'tach allochña sapa' amach esesha' seshquërraye. Ñato'rraña po'poñ cotapñatso'tpa' çhate' shequërrset. Ñeñt cotapñatserpa' e'ñe orrena tarro'mar ñeñtpa'

atta shequënsset. Ñeñtpa' arromñaña a'mtene'ña poctapña ñeñt' atto shecare'tyenet. Ñeñtpa' patso'marnesha, ñeñtña' ama poctenanoña Cristo poctapña.

⁹ Tarro'mar Cristo atto acheñetos ñepa'tña chorrenayaña allohuen Yompor po'partsoña.

¹⁰ Sapa' e'ñe separrocmateño' Cristo sa'naña chorrapretenayaña Parets. Ñeñt' allohuen allpon amcha'taretetyetsa, Cristoñapa' e'ñe ñapña atarr sherben. Ñaña allohuen ñeñt' allsensaretetyetsa, ñaña' e'ñe ñapña atarr sherben.

¹¹ Sapa' e'ñe separrocmateño' Cristo te'pa' sesuanom atet muenatyesase't sa sechets. Ñeñtpa' ama año'teye' hueno o'ch setsorrotannena e'ñe sañeña sechets ñeñt' atet ye'chena judionesha'. Ñeñtpa' Cristeshoña huena e'ñe seyemteño' ña. Ñeñto'marña e'ñe separrocmateño' Cristopa' te'ña sapa' o' seyomporena'tarterra e'ñe po'ño'ch.

¹² Tarro'mar allempo sapataretta Yomporecop sapa' añ setma'ntena ñerra'mrrate' cho sepampapreteña Cristo. Elloña e'ñe sa same'ño'pa' attoña o' setantapreteraña Cristo. Tarro'mar sapa' añ same'ñate' atto Yomporpa' orrtatan po'partsoteña allo tantaterran Puechemer allempo rroma.

¹³ Ahuat sapa' so'chñarofña ama es soctape'chperra' seyo'chro ama't e'ñe mame'sha ñeñt' cohuentetsa Yomporecop. E'ñe atet sepe't ñerra'm po'poñ acheñ ñeñt' ama Yomporena'tareyaye. Ñeñto'marña sapa' cha sottet' ñerra'mrrate' secamquëñpa' cha rromuen. Tarraña te'ña Yomporpa' o' apuerres attoch sapa'cho'ña corretsasach e'ñe atet pena Cristo, tarro'mar ñapa' o' peretna'huernas allohuen so'chñar.

¹⁴ Tarro'mar ñapa' o' e'ñe e'shohuerrnay ñoñets ñeñt' o' quellca'huetañ alloch yotete'charetterrañ ya, atet oten ñoñets ñeñt' atet anaret' ahuatoteñ. Ñeñt' ñoñets Paretsña' alla a'huañatamperrey atet ñerra'mrrate' ñeñt' apatarettetsa corsocho.

¹⁵ Ñeñtña amcha'no'chetetsa añe patsro ama't ñaña ñeñt' huomenc entyetsapa' Cristoñapa' e'ñe puerratam'pesuerranet allo amcha'no'cheteyenet. Atto rroma corsocho alloña e'ñe a'mtsoñ'netuerranet. Allempoñapa' orrtatanet allohuenet acheñeneshesho attoch ñetpa' e'ño'chet ñeñtpa' o' aprrataretterra po'huamenc.

¹⁶ Ñato't same'ñeña'ña ama't erra'tsena acheñer ñeñt'cha' sote' sa amo' pocteyaye ñeñt' atto es serra'yen ama't ñaña atto es sorryen. Ñaña amach same'ñatsche ñeñt'cha' sotene' sapa' amo' setsotenoña añ yetñatser ñeñt' allpon ana'yese'et judioneshacop, ama't allempoch cherrerr pate'tets char, ama't ñaña allempoch e'ñe errote' orrterrtsa pueña'tets arrorr. Ñaña amach same'ñatsche ñeñt'cha' sotene' sapa' año' setsotenoña ñeñt' yetñatser ñeñt' anaret' allempocma yamesen.

¹⁷ Ñeñtpa' pa'choyeshe'maca'ye peñña ñeñt' huapatsa. Ñeñt' huapatsapa' po'ño'chpa' ñeñt'ca'yeña Cristo ñeñt' atarr sherbets.

¹⁸ Ñaña amach same'ñatsche ñeñt'cha' soterre' sapa' año'ch saguërroña attoch coshaterres Yompor tarro'mar sapa' año' atteye' sepeno ñeñt' atet penet ñet. Ñeñt' acheñer atet, ñetpa' añ cotape'chyenet o'ch muerochtatenet e'ñe ñañeñeta, tarraña ñetpa' pommo'cheño'fa atet penet ñeñt' po'ño'chpa' ama es sherbeno Yomporecop. Ñeñto'marca'yeña ñetpa' añaca'ye ma'yochyenet Yompor po'millaño'teñer. Ñaña ñetpa' añ nanac yemtenet ñeñt' entpesa'tyenetañ. Poctapño'tet ñeñt' e'ñe ñeta po'chtso'tet huena, ñetpa' ñeñt' atarr ommo'chenet, ñeñto'marña ñeñtpa' e'ñe orrena atet penet.

¹⁹ Ñetpa' ama parrocmateño' Cristo ñeñto'marña ama pueyo'chreye' peñetoña Cristo. Ñehua, yapa' yoten yeyo'cher* ñeñtña atarr sherbets tarro'mar ñeñt' atarrtatene'ña ora yechets. Atet pena yelloquë'm ñaña yechtsore'ch ñeñtña orrene'ña yechets ñeñto'marña e'ñe parrocmateñ attoña ora yechetspa' atarrtena. Atet penaña Cristo atet ñerra'm

* 2:19 O'ch secue' nota 1.18.

po'ñooh ñeñt yeyocher yepen. Allohueney ñeñtey ame'ña'yenaya Cristo e'ñe parrocmatateneý, allochña yapa' allo'nach yesen orrtatyesnomue' ñeñt atarr sherbets Yomporecop tarro'mar yapa' atet muenateneý Yompor.

²⁰ Sa atto o' serromapretera Cristo ñeñto'marña añ cotapñatser arr patsro ñeñt arromñañenesha poctapña, ñeñtpa' amaca'ye socpayaye. Sa atto o' serromapretera Cristo ñeñtpa' añecop attoch sequechpuerrñañ arromñañenesha' poctapña. Te'ñapa' eso'mare'tcha'ña alla same'ñerrerrña patso'mar cotapñats. Ñato'tña same'ñena'ña ñerra'm esempo otenset:

²¹ “Amach es sa'pñlatsetyesatsto, amach es serratse'tyesatsto, amach es sehta'yesatsto.” Tarraña ñeñtpa' e'ñech orrena atet otenset,

²² tarro'mar ñeñt allohuen ñeñt añe patsro'tsen ñeñtpa' e'ñeca'ye e'nuapo'. Ñerra'm ye'nuepa' o'ch e'ñe huañ. Ñeñto'marña ñeñtcha' atet sotyese' ñeñtpa' arromñañaca'ye poctapña yechatenset.

²³ Ñetpa' po'ñochpa' orrtenetañ atet ñerra'm esocmañen eñotuenetañ ñeñt cohuentetsañ tarro'mar puema'yoçhreñoñetpa' muechatse'tyenet, ñaña ñetpa' e'ñe ñañeñeta muerochtatetset po'chets, tarraña e'ñe pommo'cheñoñeta atet penet. Tarraña ñeñt atet penet ñeñtpa' amaña añeye'ña atet peneto alloch huenaterret ñeñt atet muenatse'tatyenanet po'chets pa'namen sosya'tsañechno.

3

Añach soctape'chen ñeñt atet muenen Cristo ñeñt pue'ntañ'tsen

¹ Atto po'ñooh o' setantapretera Cristo, te'ñapa' añach soctape'chen ñeñt atet muenen Cristo ñeñt pue'ntañ'tsen. Ñapa' allña atarr partsoten e'ñe Parets po'cohuenrot.

² Ento'marecopcha'ña sema'yoçhra. Sapa' amachña añña sema'yoçhratsto ñeñt patso'marecpa

³ tarro'mar sapa' o'huañcha' socshenaña ñeñt patso'marecpa. Te'ña sapa' e'ñe ates ñerra'mrrate' puesheñarr ñeñt rromuets o'huañcha' allo'na cosha'nenana ñeñt patso'marecpa. (Ñeñto'marña yapa' yoten o' yerromapretera Cristo.) Te'ñapa' ñeñtña yocshatene' ñeñt ora allpon atarr cohuen enten Cristo. Te'pa' atto yocrrerra ello e'ñe yeparrocmateñoñt Cristo ñeñt parrocmatene' Pompor Parets, ya'naña o' yeparrocmaterr epay Parets ama't ñeñtpa' ama entpahuoyaye.

⁴ Ñeñto'marña ñerra'm esempoçh orrterra Cristo ñeñt allo e'ñe yocrrena, allempoña sapa'cho'ña sorrterrach saña epas Cristo. Attochña sapa' o'ch secohuentapretera saña.

O'ch yesuanom ñeñt mellashañ cotapñats ñeñt ama pocteye' enteno Yompor

⁵ Ñeñto'marña socoppa' añ poctetsa: Ama't erra'tsena sechets ñeñt soctape'chatene' patso'marpa' çhosaña a'mchechatterre', ñeñt atto sehta'yeñ ñeñt ama setaporeyaye, ñaña pa'namen sosya'tsañechno ñeñt atet muenatse'tatyeney yechets, ñaña allpon yemnatse'tyen ñeñtpa' ama cohuenaye' entapretenye Yompor, ñaña atto es atarr yeye'chapretanna'tyena, ñeñtpa' ñeñtñañña yeyomporer yepen.

⁶ Ñeñto'marcha'ña Yomporpa' entaterranetcha' po'yoroçhenña ama't allohuen ñeñt atpare'tene'.

⁷ Sapa'cho'ña ahuatpa' e'ñe attecma soctape'chyese't allempo sapa' sosya'tsañecpa socre't.

⁸ Tarraña te'ña ñeñtpa' çhosaña a'ypo'ñañperre', ama't ora allohuen e'moñe'tanna'teñets, atsrre'mueñets, o'patarñats, achmñare'tanna'teñets, ama't allohuen eñosatse'teñtsochno ñeñt atarr sosya'tsañechno.

9 Ñaña amach seshcare'tanna'tatsto tarro'mar te'pa' o' sesuanemñ ñeñt mellashañ ñeñt atet soctape'chatyesaye't seyoçhro. Ñeñt atet sepa'yese't ahuat ñeñt ama pocteye' enteno Yompor ñeñtpa'cho'ña o' sesuanemñ.

10 Sapa' añcha'ña sechorrerraya ñeñt etserra ñeñtcha'ña soctape'chaterre' ello etserra allochña setserrataterrña soctapña. Attoña e'ñe setserrateño'pa' o'ch soctape'cherr e'ñe cohuen ñeñt atet coctape'chen Yompor ñeñt seyeçhcate'. Attochña sapa' allo'nach sesen eñotnene' ñeñt atet coctape'chen ña.

11 Atto yetserrataterr yocapña Cristocop, yaña allohueneypa' e'ñechca'ye attecma puechemer pohueneña Yompor. Ñeñto'marña yocoppa' ama eñalleña attoch yotaretta yapa' po'poño' acheñrey, yapa' ellopa'tetstatareyo' año' judioneshayayye, año' at-sorrareteyayye, ñaña po'poño' acheñrey ñeñt ahupaña po'poñ anetsot ñaña ñeñteyo' yapa' año' es yeñoteno ñaña ñeñt acheñrey ñeñteyo' ataruasatarey e'ñe atta ñaña ñeñt acheñrey e'ñe cohueno'tseney, tarro'mar Cristopa' ñeñtca'yeña e'ñe allohuenacpay, ñapa' ña e'ñe yehorra'huenaya allohueneypa'namen acheñrey ñeñt parrocmatenaya.

12 Yomporña puemorrenteño'es sapa' o' acrerres ñeñtescha' a'cohuentatarettertsa Partsocop. Atto acrerrespa' e'ñepa'chña seyçhen attoch e'ñe cohuen semuerannena, e'ñepa'chña cohuen es sorrtatyen po'potantañecop. Sapa' e'ñepa'chña pocte' señch ñerra'm po'psheñeñ o'ch entenes sapa' ama esoshe'mayayso. Ñaña sapa' amachña aña se'natsto ñeñt e'ñe socpa ñeñt atet soctape'chen sa tarro'mar sapa' ñeñtes alleshoncatets. Ñeñto'marña sapa' e'ñepa'chña sa'huanta'huanomña ñeñt atarr echarrare' sentyen.

13 Ñaña e'ñepa'chña cohuen es sa'huantannena ñerra'm esempoch señch po'psheñeñ ñeñt ama pocteye' orrtateno socop, sapa' e'ñechña cohuen sepretnannena. Atto Yepart-seshar Cristopa' o' peretna'huerres sa, sapa'cho'ña çhocmachña sepretnannena samña.

14 Ñeñt atarr nanac sherbets o'ch seyçherr attoch semorrentannena e'ñe cohuen. Tarro'mar ñerra'm po'ñoçh yemorrentannenapa' amate' erroteno't ya'ypo'ñerroña po'poñeçhno ñeñt cohuenteyetsa ñeñt atet ye'pa'yen. Attochña allo'nachña yesen etsot-nomue'ña parrocmateñets.

15 Atto Yompor o' e'ñe coshaterres seyoçhro, ñeñtcha'ña soctape'chaterre'ña e'ñe cohuen, tarro'mar ñeñtecopña o' çhore'terreyña Yompor attoch e'ñe yeparrocmatuerr allohueneypa' ñeñtey ame'ñenaya. Ñaña o'ch notas: Sapa' çhocmuepa'chña separasyoso'teñ Yompor.

16 Cristo po'ñoñpa' çhocmuepa'chña e'ñe cohuen soctape'cheñ sa seyoçhro, attochña e'ñe ora seño'teño'huenpa' çhocmuepa'ch seyçhatannena attoch e'ñe cohuen socshatan-nena. Ñaña separasyoso'teño'pa' semorrechepa'ch allohuen morreñtsoçhno ñeñt Part-socop attoch sa'ye'choçhtatoñ atto saçhoteñ. Socsheñeshohuenña seyoçhropa' separasyoso'chepa'ch Yompor.

17 Ama't esa ñeñt atet es sepa'yen ama't esa ñeñt atet señosyen, e'ñechña seyemteño't Yepartseshar Jesús attochña sapa' es sepa'yen. Ñeñto'marña sapa' çhocmuepa'ch separasyoso'teñ Yompor Parets e'ñe Yepartseshar Jesucristo pa'so'chño.

Atetcha' yocrra añecop ñeñt parro yepaclo'tsa'yen

18 Te'pa' o'ch notas samña ñeñtes arrollaretes: Ñeñt serrollar sepenpa' e'ñech cohuen same'ñeña tarro'mar atet poctetsa yocop allohuenacpay ñeñtey ame'ñenaya Yepartse-shar Jesucristo.

19 Ñaña sa ñeñtes ataporetespa' o'ch notas samña: E'ñech cohuen semuerya setapor, amachña çha muene' erro'tuanen sepeñeña setapor.

20 Ñaña sa cheshaneshacha' o'ch notas samña: Chocmach same'ñya sompor ñaña sachor amachña çha satpare'tatsto. Ñerra'm atetcha' se'papa' e'ñech cohuen coshensa ama't Yompor Parets.

21 Ñaña o'ch notas samña ñeñtes achemereshatneshas: Amachña cha sa'tsrre'mare'tatatscheña sechemerasha', te't cha nanac sellcatyenamet. E'ñe puellquëño'tetpa' chach atarr quellañtsotyaset, amach e'ñe cohuenaye' ame'ñenseto.

22 Ñaña sapa' o'ch notas samña ñeñtes ataruasataretes e'ñe atta: Chocmachña e'ñe cohuen same'ñyaña ñeñt' samo'mte' sepen aña patsro. Amachña puecuamñeño'tesaña sema'yoreñ setaruasatsto, ñeñt'pa' añecpaña atet sepena attoch e'ñe cohuen entenes samo'mte'. E'ñechña sema'yorñecma seyo'chrocmañen e'ñech cohuen setaruasen. E'ñechña sem'cha'na'teño' Yompor setaruasen e'ñe cohuen.

23 Ama't erra'tsena ñeñt' setaruas se'pa'yen e'ñechña seyo'chrocmañen e'ñe cohuen setaruasen. Tarro'mar ama't acheñecpa setaruasenpa' e'ñechña atet sepena ñerra'mrrate' Yamo'mtayecop Jesucristocop setaruasen.

24 Sapa' e'ñe seño'teñ ñapa' añ o'patatensa ñeñt'cha' atarr socshaterre' tarro'mar sapa' po'ño'ch añ sasherben Cristo ñeñt' e'ñe po'ño'ch Yamo'mte' yepen.

25 Tarraña allohuen ñeñt' atet pa'yene' ñeñt' ama pocteye' enteno Yompor, ñet'ña'pa' atsa'tataretterretcha' ñeñt' allpon pa'yesaye't ñeñt' ama pocteyaye. Ñeño'marña ama't puesheñarro'teta ñocpuetpa' amach eñalleña attoch pocte' enterranet Yompor.

4

1 Ñaña sapa' o'ch notas samña ñeñtes pamo'mte' pen ñeñt' setaruasaten. Sapa' atet'cha' sepe'ña sa'taruasañer ñeñt' e'ñe pocte' entenet ñet. Ñaña sapa' seño'chepa'ch sapa'cho'ña sechenca'yena Samo'mte' ñeñt' pue'ntaño'tsen.

2 Ñaña te' allohuenespa' o'ch notas samña: Chocmuepa'chña sema'yochrenaña ma'yochatsa, amach se'çllaño'ta sema'yocheño'ña Yompor. E'ñechña separasyoso'teñesha' sema'yocheña.

3 Ñaña o'ch sema'yocheña Yompor yocop, o'ch senamonay attoch eñalleta allcha' yeserrpare'toñ po'ño'ñ, allcha' e'ñe ya'potua ñeñt' ahuatoteñ ñeñt' ama't puesheñarrapa' ama eseshaye' eñotenaye ñeñt' atet penaña Cristo. Ñeño'marña na te'pa' ayot-tam'psareten cárcelo.

4 Ñaña añcha' senamon Yompor allochña napa' o'ch e'ñe neñotaterranet e'ñe eñoto'chen ñeñt' atet poctetsa nocop o'ch e'ñe na'potuer allohuen.

5 Ñaña añecop ñeñt' ama ame'ñetso sapa' seño'tepa'chña ñeñt' cohuentetsa ñeñt'cha' atet se'panet. Ama't taya sapa' arosña atta es pue'chatstata.

6 E'ñe semuereño'tpa' chocmuepa'chña e'ñe cohuen se'ñorana'tyenamet, allochña ñetpa' e'ñech cohuen entonaset ñeñt' atet señen. Allochña sapa' seño'chcha' eñorana'tyesahuet attoch e'ñe cohuen sanapyesanet e'ñe puesheña'ttso'cmuet.

Arrpa' all so'terranet po'carto't

7 Ñaña te'pa' o'ch notas, masheñ Tíquico ñach seño'tatenaya' allohuen ñeñt' atet nepena na arr. Ñapa' atarr yemuerannena, ñapa' chocma e'ñe cohuen yenpuenen atto yetorrena Yepartsesharecop.

8 Ñeño'marña napa' ñeñt'ecopña nemñeñña sesho ñach seño'tatenaya' ñeñt' atet yepena ya arr. Ñaña ñach socshatose' e'ñe seyo'chrohuen.

9 O'ch nemñe epuet masheñ Onésimo. Ñapa'cho'ña chocma atarr cohuen yenpuenen, nanac yemuerannena. Ñapa' e'ñe parro'marneshas. Ñet'cha'ña seño'tatose'ña allohuen ñeñt' atet yepena ya arr.

10 Ñaña masheñ Aristarcopa'cho'ña mueneñ o'ch huom'cha'tas añ necarto't. Ñapa'cho'ña e'ñe parro'cma ayottam'psare'tey. Allo'tpa' o'ch huom'cha'tas ñaña masheñ

Marcos ñeñtara añ paterr necartot. Ñapa' Bernabé puepa'ñer. Napa' o' notuas atetcha' sepe' masheñ Marcos. Ñerra'm esempoch chap seshopa' e'ñech cohuen sagañ.

¹¹ Ñaña masheñ Jesús ñeñtara sochetsa Justo, ñapa'cho'ña mueneñ o'ch huomñcha'tas añ necartot. Ñetpa' ñeñtet ñapueñ judioneshet ñeñt ame'ñetsa, ñetña netorrapretenet Yomporecop attoch atarr ayochreshattena ña. Ñetña atarr nocshatene'.

¹² Ñaña masheñ Epafras ñeñt parro'marneshas, ñapa'cho'ña mueneñ o'ch huomñcha'tas ñaña. Ñapa'cho'ña nanac torrena Cristocop. E'ñe puema'yocheñoñ huomencpa' atarr torrena socop. Puema'yocheñoñpa' chocma enamatennas Yomproshot attoch e'ñe huomenc sepa'nom seyoçher Yomporecop. Ñaña añ enamennas attoch e'ñech poctacma çhaponasa seyoçhro ora allohuen ñeñt atet muenen Yompor.

¹³ Ñocoppa' o' e'ñe neñotatuas ñeñt atet nanac torrena socop ñaña añecop ñeñt Laodiceo'tsa'yen, ñaña ñeñt Hierápoliso'tsa'yen.

¹⁴ Ñaña masheñ Lucas ñeñt apartañtetsa, nanac yemuerannena, ñapa'cho'ña mueneñ o'ch huomñcha'tas añ necartot. Masheñ Demaspa'cho'ña mueneñ o'ch huomñcha'tas ñaña.

¹⁵ Te'ña sapa' o'ch sehuomñcha'ch saña nocop masheñneshaçhno ñaña noçhaneshaçhno ñeñt Laodiceo'tsa'yen. O'ch sehuomñcha'ch ñaña Ninfas, sehuomñcha'ch ñaña allohuen ñeñt chocma apçhetsa ña pa'paclo e'ñe pame'ñeñoñet Cristo.

¹⁶ Esemppoch lleya'huet añ carta sesho alloñpa' o'ch selleyach ñaña laodiceo'marnesha' ñeñt pame'ñeñoñet Cristopa' chocma apçhenet ñamet. Ñaña po'poñ necarta ñeñt nemñen Laodiceo sapa'cho'ña selleye'ch ñerra'm esempoch huapateret Laodiceoñ o'ch çherr sesho.

¹⁷ Ñaña o'ch soch masheñ Arquipo ñeñt atet noten na, po'ñoçhpa' etsotanepa'ña ñeñt atet yecheña Yepartseshar ñeñtcha' po'taruas pa' ñocop.

¹⁸ Na ñeñten Pablon arrpa' nequellquëñoñ e'ñe na notoñpa' o'ch nehuomñcha'tnerres. Te'pa' o'ch seyerpa'na napa' ayottamñpsareten. Te'pa' ñeñtach notas, Yomporepa'chña sa'nataya. Ñeñtpa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑŦ QUELLCAN TESALÓNICO' MARNESHA' 1 TESALONICENSES

Atto Pablopá' quellcan carta añecop ñeñŦ ame'ñetsa anetso Tesalónico epuet Silvano ñaña Timoteo

¹ Masheñneshacha' ñaña nochaneshacha' ñeñŦes allohuenes apçhetsa all anetso Tesalónico e'ñe seyemteñoŦ Yompor Parets epuet ñaña Puechemer Jesucristo ñeñŦ Yepartseshar yepen. Na Pablon sequellquëne'ña añ carta epan masheñ Silvano ñaña masheñ Timoteo. E'ñe nehuomŦcha'teñoŦes sa napa' o'ch notas: Yomporepa'ch seben-sare'tamŦpene' ñeñŦara Parets epuet Puechemer Jesucristo ñeñŦ Yepartseshar yepen. Ñetepa'chña socshatene' e'ñe sa seyoçhro allohuenes.

Atto ame'ñena ñeñŦ apçhetsa Tesalónico

² Yapa' yema'yochamŦpeñoŦes sa çhocma yeparasyoso'teñ Yompor socop allohuenac-pas.

³ Tarro'mar allempo yema'yochaña Yompor çhocma yeyerpuensa atto sapa' e'ñe seyemteñoŦ Yompor atarr seŦorra'yena ñocop ñaña e'ñe semorrentanna'teñoŦpa' atarr seyenpanna. Ñaña e'ñe seyemteñoŦ Yepartseshar Jesucristo sapa' o' huomenc seŦa'nom seyoçher e'ñe ñocop.

⁴ Masheñneshacha' ñaña nochaneshacha' Yomporpa' atarr morrentensa. E'ñe yeñoteñ Yomporpa' ahuaŦoteñ acrerres sa ñeñŦescha' ame'ñerraya.

⁵ Tarro'mar añ cohuen ñoñets ñeñŦ yeserrpare'tatoses ahuaña, ñeñŦpa' ama ñoñtsenochayayo, yapa' añña ahuañencat yepene' Parets Puecamquëñ allochñapa' atto sapa' o' çhaponasa seyoçhro ñeñŦ ñoñetspa' e'ñepa't po'ñoçh ñeñŦpa' ama shequëñtsoyaye. Sapa' e'ñe señoteny ñeñŦ atet e'ñe cohuen yorrtatyesonas allempo allo'tseney sesho.

⁶ E'ñe atet sentey ya ñeñŦ atet yepena, sapa'çho'ña te'pa' e'ñech atet sepena saña, ñaña e'ñe atet cohuen orrtatyen Yepartseshar Jesucristo sapa'çho'ña te'pa' ñeñŦara sorrtatyen saña. Atto sagapoñ Yompor po'ñoñ e'ñe socsheñesha' Paretsña Puecamquëñ socshate'ña e'ñe sa seyoçhro. E'ñe same'ñeñoŦ ama't atarr sa'mueroçhtataretetyena tarraña sapa' çhocma atarr socshena.

⁷ ÑeñŦo'marña allohuen ñeñŦ ame'ñetsa Macedonio'mar ñaña Acayo'mar, ñetñapa' atet eñotenset e'ñe cohuen sorrtatyen Yomporecop, ñetpa'çho'ña te'pa' e'ñe attecma orrtatyenet ñamet Yomporecop.

⁸ Te'ña e'ñe seshoŦ o' epa'hua Yompor po'ñoñ all serrpare'tyeñet. Ama allayayo Macedonio ñaña Acayo, oraña o' e'ñe epa'hua erraŦaren allemeñ. ErraŦaren o' e'mare'tuaset sapa' atarr same'ñeña Yompor. Te'ña ñet o' e'mare'tuetpa' ñocpuetpa' ama pallteneto o'ch alla yoterraneterr ya ello.

⁹ Ñetñapa' serrpare'tyenyet atto sapa' e'ñe cohuen sagapapuey. Ñaña serrpare'tatanna'tyenet atto sapa' o' soçtape'cherr ello cohuen Yomporecop o' sequeçhpa'huerr ñeñŦ semchatse'tyese't ayeçhcatareŦ. Te'ña ñeñŦpa' o' sequeçhpa'huerr e'ñe poçtacma attotña allempoteñ e'ñe cohuen sesherber Yompor ñeñŦ ama arromñateshayaye ñeñŦ e'ñe po'ñoçh Yompor.

¹⁰ Ñaña serrpare'tyeñet atto sapa' e'ñe seyemteñoŦ atarr secueññañ Yompor Puechemer esempohuañencha' huerra pue'ntañoŦ ñeñŦara Puechemer ñeñŦ tantaterr allempo rroma, ñeñŦara Jesús ñeñŦcha' ya'quesçhŦaterre' ñerra'm esempoch yoroçhtatuer Yompor.

2

Atet ÷a Pablo allempo Tesalónico'tsen

¹ O'ch masheñneshacha' ñaña nochaneshacha' notas: Saña po'ñoçhpa' e'ñe señoñeñ ahuañmo'cha e'ñe cohuen sagapapuey, ama orrena yemo'tenso.

² Ellonetpa' e'ñe señoñeñ ama't epaye' mueroçhtatyete't Filiposo, ama't erroñuanen ÷a'yetañe't, ÷arraña Yomporña atarr ahuañmo'cha ÷a'ye't atto yapa' e'ñe yeyemteñoñ ña yeserrpare'tatas saña añ cohuen ñoñets ñeñ't huetsa Yomporeshot. Ama't allo'tsa'yen ñaña ñeñ't nanac epatarñatetyetsa, yañapa' çhocmaña yeserrpare'tatase't.

³ Ñeñ'tpa' ama panteñsoñe'ye' yocñape'chataso, ñaña ama sosya'tsañe'ye' yocñape'chataso, ñaña ama e'ñe ya yeshquëñoñ yocñape'chataso.

⁴ Elloña ya Yomporpa' e'ñe poçte' enteney ñeñ'to'mar llesensa'y yach a'poterre' po'ñoñ ñeñ't e'ñe po'ñoçh cohuen ñoñets alloch a'queshpaterrey. Ñeñ't atet ye'ñoñenapa' ama añecpayaye o'ch e'ñe orrena yocshach acheñenesha', yapa' añecopña ye'ñoñena attoch yocshateñ Yompor ñeñ't e'ñe yentuene' ñeñ't atet yocñape'chyen yeyoçhro.

⁵ Ñeñ'to'marña sapa' señoñeney ya ama't ahuañapa' ama e'ñe ya yeñoñoñ yocshatenso attoch e'ñe cohuen sentuene'ye'. Ñaña ama't ahuañapa' ama erra yeshquëñso attoch sapa' o'ch sapuey ñeñ't yemnapretenes. Ñeñ'tpa' ama't Yomporpa' e'ñe poçte' entapreteney ñeñ't atet yepenes.

⁶ Ñaña ama't ahuaña ama añe'ye' yellquëno attoch sapa' o'ch secohuentatennay ama't ñaña allohuen po'potantañeçhno. Ñaña yapa' ama't Cristo yellsensenayeñ ñeñ'to'marña yocoppa' e'ñe poçteñ o'ch atet yepennaseñ ñeñ't atet pena añcha'taret, ÷arraña yapa' amaña yemno o'ch atet yepennasa.

⁷ Tarro'mar yapa' yemuereñoñes sapa' e'ñe cohuen es yorrtatyennas. E'ñe atet yentenes ñerra'mrrate' cheshatollesha' e'ñeçh cohuen muereña pachor.

⁸ Atarr nanac yemorrentensa ñeñ'to'marña ama e'ñe ñapña cohuen ñoñets yapuenso ñeñ't Yompor po'ñoñ. Elloña yocoppa'çho'ña poçte' yenteñ o'ch yesuanom ñeñ't e'ñe yocpa attoch yeyenpas saña tarro'mar sapa' atarr yemorrentensa.

⁹ Ñeñ't atet yepena ya, amate' masheñneshacha' çha sepsenye atto nanac yetaru-ase't yeño e'ñe tsapome'tets allempo allo'tseney sesho. Ñeñ'tpa' añecop atarr yetaru-ase't allochñapa' attoch sa ama't puesheñarroñesapa' amach çha ya'tsrre'moçhtana'taso allempo yeserrpare'tatase't cohuen ñoñets ñeñ't Yompor po'ñoñ.

¹⁰ Sapa' e'ñe sentye't, Yomporpa'çho'ña e'ñe enteney atto yapa' e'ñe cohuen yorrtatyenes socop ñeñ'tes ame'ñetsa all. Ñeñ'tpa' e'ñe cohuen yorrtatyenes Partsocop ñeñ't e'ñe poçte' enten ña allochñapa' attoch amach erroñenoñ otenyeto "ama poçteyaye ñeñ't atet sepena."

¹¹ Sapa' señoñeñ yapa' e'ñe atet yentenes ñerra'mrrate' e'ñe yechemerasha' yepohuenes. Ñeñ'to'marña e'ñe cohuen yocñape'chatase't e'ñe puesheña'ttsos. E'ñe cohuen yocshaterres, e'ñe cohuen yocñape'chatase't

¹² po'ñoçh sapa' e'ñepa'chña cohuen sorrtatyenes ñeñ't atet poçtetsa añecop ñeñ't po'ñoçh ame'ñenaya Yompor tarro'mar ñapa' o' hua'ñerres o'ch so'patapretera all añcha'tarettena ña, attochña secohuentapretera saña.

¹³ Ñeñ'to'marña añecop çhocma yeparasyoso'teñ Yompor ñaña atto sapa' allempo ye'mñotaterres Yompor po'ñoñ sañapa' e'ñe cohuen saguërrñañ po'ñoñ. Ama't ya seserrpare'tatosayeñ ama acheña po'ñoñ senteñe, ñeñ'tpa' Yomporña po'ñoñ senteña allempo. Ñehua, ñeñ'tpa' e'ñe po'ñoçh Yompor po'ñoñ. Te'ña sa ñeñ'tes o' same'ñerra, Yomporña po'ñoñ o' coñape'chaterres e'ñe cohuen seyoçhro o' e'ñe huenaterres ñeñ't atet çhocma sepatse'tyese't ahuañ; te'ña sapa' añ sorrtatyenes ñeñ't e'ñe cohuen enten Yompor.

14 Sapa'cho'ña masheñshacha' e'ñe atet sa'muerochtatarettena Yomporecop e'ñe atet pe't ñeñt ñanom apchatsa Yomporecop ñeñt Judeo'tsa'yen. Ñetpa' e'ñe pueyemteño'tet Cristo Jesús, judionesha'ña ñeñt e'ñe pamo'ts penetpa' atarr muerochtatenanet. Sapa'cho'ña e'ñe seyemteño't Cristo atarr muerochtatenes samña samo'tsesha'.

15 Ñeñtara judionesha' ñeñt muetse' Yepartseshar Jesús ñaña ñet muetsanatete't ñeñt a'mta'yese't ahuat Yompor po'ñoñ. Ama't te' yapa'cho'ña pue'moñe'teño'tetay o' cotare'terryeterr yaña. Ñeñto'marña Yomporpa' ama't e'ñe mameshapa' ama cohuenaye' entenaneto tarro'mar ñetpa' añe'na e'moñe'tenet allohuen pa'namen acheñshacha'.

16 Ñetpa' atarr epatare'tenyet attoch yeserrpare'tach po'poñ acheñ ñeñt ama judioneshayaye attoch ñetpa'cho'ña o'ch a'queshpataretterret. Attoña ñetpa' atarr nanac yorenet po'chñaret. Tarraña te'ña Yomporpa' o' entatuerrmochanet po'yorochenña.

Secherra Pablo o'ch abcherraneta'

17-18 Ñaña o'ch masheñshacha' ñaña nochaneshacha' notas: Yaña po'ño'ch allempo cha'nmataterryet seshot allempoteñña ama't esempapa' ama yabchanna'terro e'ñe teme'ttsen. Chemerrña te' yapa' o' e'ñe yaptamerra. Tarraña ama't ama allame'ttsa yabchannenopa' yeyochroñapa' e'ñe parrocmatetsey. Yapa' chocma yesechenañ o'ch yabcherrsa' ama't napa' allponoche'tats nesechenañ. Tarraña oneñe'tñapa' chocma epatare'teney.

19-20 Tarro'mar sapa' saña ñeñtes atarr yocshatene'. Ama't allempoch huerra Yepartseshar Jesucristo sapa' saña ñeñtescha' atarr yeyemterra, ñeñtescha' atarr yocshaterre' allempo, tarro'mar sapa' ñeñtescha' yapataterre' ñeñtcha' atarr yocshatene'ña ya allempo.

3

1 Allempoña na o'huañ na'huanta' ñeñt atto nellquënsa ñato' erro'teno'tseneste', ñeñto'marña napa' e'ñe pocte' neñch o'ch alla na'pa napuet Atenso

2 attoch nemñonas masheñ Timoteo ñach semo'terraya', ñach seserrpare'tatose' attoch e'ñe huomenc sepa' seyocher ñeñt atto same'ñena. Ñach socshaterre' ello ñeñt atto same'ñena. Tarro'mar masheñ Timoteo ñapa'cho'ña atarr cohuen yetorrena parro Yomporecop. Atarr serrpare'tatyenanet cohuen ñoñets atto Cristopa' ña a'queshpatañtetsa.

3 Ñach soctape'chaterre' e'ñe cohuen Yomporecop allochñapa' ama't atto atarr amue-rochtataretes, amachña ñeñto'ta sepurratsterro ama't puesheñarrotesa. Ñehua, sapa' e'ñe seño'teñ chocmach huaponaya ñeñt amuerochtatañ yenten.

4 Allempo e'ñe allo'tsa'yenacmay allohueney e'ñe parro allempo yapa' atet o' yotuas chocmach huaponaya muerochteñets. Ñeñtña te'pa' atetcho' o' pñonasa, te'pa' e'ñe'te' seño'teñ e'ñe po'ño'ch atet.

5 Ñeñto'marña ahuaña allempo o'huañ na'huanta' ñeñt atto nellquënsa ñaña allempo nemñe masheñ Timoteo attoch neñotas sapa' erro'teneste'ña sa, ñato' atterate' sesen ame'ñaya Yompor. Napa' nellquëño'tpa' atet noten ñato'rraña oneñe't puetpateño'tes o'te' cha quechpaterres Yompor. Ñerra'm atet seperra napa' atet noten ñeñt atto netorrena e'ñe socoppa' ñato'rraña ñeñt'pa' e'ñe'te' orrena.

6 Tarraña allempo huerra masheñ Timoteo seshot, ñapa' serrpare'tatuerrey cohuen ñoñets, sapa' attera e'ñe cohuen same'ñena, e'ñe cohuen attera semorrentannena. Ñaña serrpare'tatuerrey atto sapa' chocma seyerpunya socsheñsha' ñaña atarr semneñ o'ch yabchannerra parro. Yapa'cho'ña e'ñe attecma atarr yemneñ yaña.

⁷ Ñeñto'marña masheñneshacha' ñaña nochaneshacha' yapa' ama't allohuen es yehuenoya ñaña ama'tcha' atarr yemuerochetuanena, te'ñapa' o' alla socshaterrey. Atto yeñoterres sapa' attera cohuen same'ñena ñeñña atarr yocshaterre'.

⁸ Atto sapa' e'ñe cohuen huomenc sepen seyocher Yepartsesharecop, napa' ñeñña e'ñe cohuen nocshatene' atto nocrrena arr patsro.

⁹ Ñeñto'marña atarr nanac yeparasyoso'teñ Yompor socop. E'ñe yeyochropa' chocma yocshensa Yomporesho ñeñto'marña chocma yeparasyoso'teñ Yompor socop.

¹⁰ Chocma yenamueñ Yompor ye'to ama't ñaña tsapo attoch yabchannerra. Atarr yemneñ o'ch yoc'tape'chaterra' erra'tsente'ña sepalltena attoch same'ñera e'ñe poc'tacma.

¹¹ Yompor Parets ñaña Yepartseshar Jesús ñetepa'chña yechapaterre'ña sesho.

¹² Yepartsesharepa'chña atontaterre'ña semorrenteña allochñapa' allo'nach nanac sesen morrentanna'ttsa e'ñe sagattsa attochña allo'nach sesen morrentenaya allohuen acheñenesha', e'ñe atet yepena ya sapa' nanac yemorrentensa.

¹³ E'ñe semorrentanna'teño't seyocherñapa' e'ñech huomenc pennas Yepartseshar Cristo. Ñerra'm atet'cha' sepa' allempopa' amach erro'teno't otteñe'chuerrsoña Yompor tarro'mar sapa' e'ñech cohuen es sorrtatyen Partsocop e'ñe tayoteñ. Attepa'chña entuerresña Yompor Parets ñerra'm allempoch huerra Yepartseshar Jesús. Esempto po'ño'chpa' huerrach epuet allohuen ñeñt pueyochreshachno pen ñeñt e'ñe pocte' enten Parets.

4

Allo'nepa'chña cohuen yesen orrtatyesnene' ñeñt atet e'ñe pocte' enten Yompor

¹ Te'ña masheñneshacha' ñaña nochaneshacha' napa' o'ch notas, e'ñe yame'ñeño'f Yepartseshar Jesús, sapa' allo'nepa'chña cohuen sesen orrtatyesnene' ñeñt atet e'ñe pocte' enten Yompor ñeñt yey'chatuas ahuañmo'choteñ.

² Sapa' po'ño'chpa' o' seño'ter ñeñt atet yey'chatuas e'ñe yame'ñeño'f Yepartseshar Jesús attochña sapa'cho'ña o'ch sorrtatyen ñeñt cohuen enten ña.

³ Po'ño'ch ñeñtpa' Yomporña muene'ña atet, sapa' o'ch sa'cohuentatare'tterra ñocop attochña ama't puesheñarro'fapa' amach sechtatscheña ñeñt ama setaporeyaye.

⁴ E'ñe puesheña'ttsospa' chochña e'ñe seño'ch attoch e'ñe cohuen seyore coyanesha' ñeñt'cha' e'ñe ñapuet setapor sepa'. Atetpa' e'ñech pocte' entapretenes Parets, ama't ñaña allohuen acheñenesha'. E'ñechña cohuen sente'ña setapor.

⁵ Amachña e'ñe añecpa seyoroña setapor attoch e'ñe socshaten sechets ñeñt atet pena po'potantañ acheñenesha' ñeñt ama eñotenaye Yompor.

⁶ Ama't puesheñarro'fesapa' amach so'chña'tam'psatscheña semo'nasheñ, amach sechtapretatsche puetapor. Allohuen ñeñt atet ye'pa'pa' chocmach tsa'taterrya Yompor esempo. Ñeñtpa' ahuañmo'choteñ e'ñe po'ño'ch o' yotuas.

⁷ Yomporpa' ama añecpaye' chore'tenye o'ch añe atet ye'pa'yes ñeñt atarr sosey, añecopña chore'tenye o'ch e'ñe ya'cohuentatare'tterra ñocop.

⁸ Ñerra'm esesha'ch atpare'tene' ñeñt atet ney'chatenes ñetpa' ama acheñeye' po'ño'ñ atpare'teneto, ñeñtpa' Yomporña po'ño'ñ atpare'tenet ñeñtara Yompor ñeñt yapuene' Puecamquëñ ñeñt'cha' ya'cohuentatene' e'ñe ñocop.

⁹ Atto semorrenteña allohuen masheñneshachnopa' te'ña sapa' ama sepallteno o'ch alla noterrser necarto't, sapa' o' eñotaterres Yompor attoch semorrentannerra allohuenes.

¹⁰ Po'ño'ch e'ñe semorrentueña allohuen ñeñt ame'ña'yetsa allemeñ Macedonio. Tarraña ama't atet sepenañpa' ellopa' o'ch masheñneshacha' ñaña nochaneshacha' alla noterrser: Allo'nepa'ch sesen morrentanna'tnomtsa e'ñe cohuen.

11 Sapa' añcha'ña se'nen attoch e'ñe cohuen muechet seyçhena sa'netsro, amachña añ sorrtatsetyeso attoch se'moñe'tannena. Ñaña o'ch alla noterrser e'ñe sa soto'pa' çhocmachña setaruasa'y es ñeñt atet o' notuas.

12 Cohuencha' setaruasa'y es allochñapa' e'ñech cohuen entenes ama't ñeñt ama ame'ñetso. Ñaña sapa' añecopcha'ña setaruasa'y es attoch amach çha es sepallteno.

Attoch tantuerra ñeñt arromñañesha' allempoch huerra Jesús

13 Masheñeshacha' ñaña noçhaneshacha' yapa' yemneñ o'ch e'ñe señoter er-roteno'tsa'yente'ña ñeñt pame'ñeñoñ rromuets. Allochñapa' amach atta atarr sell-quënaneto ñeñt atet pena po'potantañ, ñetpa' ama es yemteneto.

14 Yapa' atto yame'ñeña Jesús ña ama't rroma ellopa' alla tanterra, yame'ñeña ñaña Yomporpa' attec mach tantatuerrey allohueney ñeñteycha' e'ñe yame'ñeñoñ Jesucristo yerroma.

15 Ñeño'marña te' sapa' o'ch neñotatas ñeñt atet eñotaterrey Yepartseshar Jesucristo, ñeñt'pa' atet yeçhatey: Allohueney ñeñteycha' orameñ corretsa allempoch huerra ña ñeñteycha' ama rromhuetsa' allempo, yañapa' amach yotam'pesyoña yanom ñeñt o' rromhua, añcha' ñanom oterrtsa ñeñt o' rromhua alloñapa' yaña ñeñtey orameñ corretsa, tarro'mar allempopa' atet'cha' perra.

16 Partseshapa' ñachña eñerrets huomenc ñaña ñeñt pa'm'cha'tareter pen allohuen mellaño'teñneshach' ñachña rrananerrtsa, e'ñech allempocma e'morrterra ñaña Yompor po'pocor. Attochña ñapa' sohua'nerra pue'ntañeñ. Ñeñtña rromuets ñeñt ameña'nmaya Cristo ñetña allempopa' ñanmuetcha' tantrra'tuerret.

17 Alloñapa' yaña ñeñtey orameñ corretsa arr patsro a'tapatateycha' yaña oso e'ñe parro epay ñeñt o' tantrra'tuena rromof attochña e'ñech parrocmayepocter Yepartseshar eno. Attochña e'ñe allohueneyapa' parro'tseneycha' epay Yepartseshar e'ñe allempoteñ errponañohuen.

18 Ñeño'marña sapa' çhocmach seyerpatannena añ cohuen ñoñets attoch e'ñe cohuen socshatannena.

5

1 Te'ña masheñeshacha' ñaña noçhaneshacha' socoppa' ama pallteno o'ch alla noterrser añ necartoñ e'ñech esempo etsoterra allempoch huerraña Yepartseshar.

2 Tarro'mar sapa'çho'ña o' e'ñe señoter çherrcha' paterr yet allempoch huerra Yepartseshar Jesús. Allempopa' e'ñech machayota huerra e'ñe atet ñerra'm esempo huennaya eñeñ tsapo e'ñech machoyota huapa.

3 Allempo amach çhena' ñeñt yeter allempoch huerra Yepartseshar acheñenesha'ña arr patsro ñetñapa' atet'cha' otyerret allempo: "Te'ña yapa' e'ñe cohuen muechet yeyçhena arr patsro. Yocoppa' ama't ahuatapa' amach eñalleterroña ñeñt'cha' yey-ore'tame'terre." Tarraña e'ñech allorocma machayotach huerranet ñeñt'cha' e'ñe a'cllatuerrahuet. Allempo ama't puesheñarrapa' amach eñalleña attoch yeterret. E'ñech atet çherranet ñerra'mrrate' allempo atsotenana coyanesha' pue'mar amach eñalleña attoch yetam'psana atto atserrpeñ pue'mar attoch amach atserrpe.

4 Tarraña saña po'ñoç masheñeshacha' ñaña noçhaneshacha' sapa' ama checmeto'tsenayayso ñeñt atet pena acheñenesha' ñeñt ama ame'ñetso. Sapa' e'ñe seño'teñ ñeño'marña ama't'cha' machayota huerra e'ñe atet machayota huennaya eñeñ, sañapa' amach çha seyorenatsto.

5 Tarro'mar sapa' e'ñe same'ñeñoñ Cristo e'ñe seño'teññañ po'cohuenña ñeño'marña napa' o'ch netma'ntatasa sapa' puetarenana'tarneshas ñaña yetena'tarneshas. Po'ñoç yapa' ama tsapo'marneshayayye ñaña ama checmeto'marneshayayye tarro'mar yapa' ama añeye' ye'pa'yeno ñeñt atet patse'tyen ñeñt ama ame'ñetso.

⁶ Ñeñto'marña o'ch notas: Yapa' amach čha yečllatsto Yomporecop, tarro'mar ñerra'm atet yeřapa' čhach yottena ñerra'm čha yemuen Yomporecop atet pena po'potantañ ñeñť atta es puečha'yetsa. Yapa' amachña čha yemanrra'tatsto čhochña e'ñe yeñotena attochña yeñose're'tyesuena.

⁷ Ñehua, yeñoteñ ñeñť manrretspa' tsapoch manrrenet ñaña ñeñť posa'tare'tyetspa' tsapoch posa'tare'tyenet.

⁸ Tarraña yapa' yeťo'marneshay ñeñto'mar čhocmuepa'ch e'ñe yeñoteñoť yeñose're'tyesuena. E'ñe yame'ñeñoť Yompor ñaña yemorrentanna'teñoť ñeñťña cohuanpene'ña yeyočher Yomporecop attoch amach aña yocťape'chatsto ñeñť ama pocteye' enteno Yompor. Ñeñťpa' añ toma'tena asrom atet ñerra'mrrate' ñeñť chorrena solltar ñeñť a'natene' puesomap allempo quellarena attoch ama etare'tteneto. Ñaña yapa' yeyemteñoť Cristo te'ñapa' e'ñe a'qeshpatareťey ñeñťpa'čho'ña ñeñťña yemoñenaya. Ñeñťpa' añ toma'tena atet pena solltar o'ch na'nman asret poño attoch ama etto'tare'tteto.

⁹ Tarro'mar Yompor po'ñočpa' ama aňeye' o'patatenyo attoch coñchatuerrey; yapa' aňña o'patatenya attoch e'ñe cohuen a'qeshpaturrey allohueney e'ñe yame'ñeñoťa Yepartseshar Jesucristo

¹⁰ ñeñť rromats yocop, attochña ama'tcha' o' yoclla'huenañ allempoch huerra amapa' ñato' orameñ yocrenmeñ allempoch huerra atterayach yañapa' corretsayach epay ña e'ñe parro.

¹¹ Ñeñto'marña te'pa' notenes, sapa' čhocmuepa'ch socshatannena Yomporecop. Chocmuepa'chña huomenc seřanna'ta seyočher Yomporecop e'ñech atet seřa řayoteñ.

Pablopa' e'ñe cohuen cotape'chatyesanet

¹² O'ch masheñneshacha' ñaña nočhaneshacha' notas po'poñ, señcha'na'teñoťpa' e'ñepa'ch cohuen semorrenteña allohuen ñeñť torra'yetsa Yomporecop sesho tarro'mar ñetpa' e'ñe Partsesheshoť anarettenet ñeñťcha' aňcha'tare'ttatsa socop, ñetcha'ña soctape'chatene'ña e'ñe cohuen.

¹³ Atto atarr torrenet Yomporecop sañapa' e'ñepa'chña cohuen sentenanet, atarrcha' semorrentenanet. Ñaña ama't allohuenes e'ñe sagattsapa' e'ñepa'chña cohuen sentanena attoch e'ñe cohuen seyčhena e'ñe señmañesha'.

¹⁴ Ñaña o'ch masheñneshacha' alla noterrser ñeñťcha' atet seřa: Ñeñť atarr quellañtsotyets sesho sachña cotape'chaterrahuet cohuen attoch amach allo'na quellañtsoteneto. Ñaña ñeñť ama coshetso sachña e'ñe cohuen coshaterrahuet ñaña ñeñť ama huomencaye' penaye pueyočher Yomporecop, sachña e'ñe cohuen coshatyerahuet attoch e'ñe huomenc perret ñamet pueyočher Yomporecop. E'ñe allohuenet saña e'ñe semorrenteñoťanet ñetpa' čhocmuepa'chña e'ñe cohuen sa'huantenanet.

¹⁵ Ñaña sapa' čhocmuepa'ch e'ñe cohuen señotena allochñapa' ñerra'm po'psheñeñ erroť řonaspapa' sapa' ama't e'ñe puesheñarroťesa amach setsa'tatatsche ama't coñe'ta. Aňcha'ña e'ñechña cohuen sepeñ samo'ts ama't ñaña allohuen po'potantañ ačheñenesha'.

¹⁶ Ñaña sapa' čhocmuepa'ch e'ñe cohuen socshena.

¹⁷ Ñaña čhocmuepa'chña sema'yochena.

¹⁸ Ñaña ama't erroteno'tsensa čhocmuepa'ch separasyoso'teñ Yompor tarro'mar ñeñťpa' atet muenen e'ñe yocop allohuenacpay ñeñťey yemtenoya Puechemer ñeñť Cristo Jesús.

¹⁹ Ñaña amach satpare'tatsche ñeñť atet cotape'chatenes Parets Puecamquēñ e'ñe seyočhro, tarro'mar ñerra'm atet seřapa' čhate' sa'huañaterrñañ ñeñť atet eñotatyenes Yompor Puecamquēñoť. Ñeñťpa' e'ñe atet ñerra'mrrate' o' semayerrñañ Yompor po'urare.

²⁰ Ñaña amach atet sentatsche ñeñt atet eñoraten Parets Puecamquëñoñ ñerra'm ama asherbenaye' senteñe.

²¹ Allohuen ama't erra'tsena čochña ñanom señoč ñato' e'ñe'e' cohuen ñato'pa' amate' cohuenayaye. Ñeñt allohuen erra'tsencha' e'ñe cohuen sentyes ñeñtña'pa' amach sequečhpattstere ama't ahuata.

²² Tarraña allohuen erra'tsencha' ama cohuenaye' sentyeso ñeñtña'pa' čosaña a'ypo'ñerre'.

²³ Yompor ñeñt e'ñe yocshatene' yeyočhro, ñepa'chña e'ñe sa'cohuentaterre' e'ñe cohuen Partsocop. Chocmuepa'ch allo'na sesen e'ñe cohuen allochña'pa' ñerra'm esempoch huerra Yepartseshar Jesucristo, socoppa' amach eñalleña ama't coñe'ta attoch otteñe'chuerres ama't secamquëñoñhuen, ama't seyočhrohuen, ama't ñaña sechtsohuen.

²⁴ Tarro'mar Yompor ñeñt o' chore'terres ñapa' ña atarr ayemuetpotetsa, ñachña setsotatue'ña e'ñe ora allohuen ñeñt e'ñe cohuentetsa ñocop.

Arrpa' all so'terranet po'cartot

²⁵ O'ch masheñneshacha' ñaña nočhaneshacha' notas, čocmach sema'yochañpesya yaña.

²⁶ Ñaña te'pa' nemneñ o'ch nehuom'cha'tas allohuenes ñeñtes ame'ñetsa.*

²⁷ Ñaña te'pa' o'ch notas, e'ñe yem'cha'na'teñoñ Yepartseshar Cristo añ cartapa' o'ch selleyach allohuen masheñneshachno ñaña nočhaneshachno.

²⁸ Yepartsesharepa'chña Jesucristo sa'natenaya e'ñe allohuenes. Ñeñtach notas, ñeñt'pa' attetepa'ch Nompore. Allohua.

Pablo

* **5:26** Po'ñoč oteneý. "Čoch setso'ttsa'pa'tannena ñerra'm esempo sehuom'cha'tanna'tena ñeñt atet poctetsa Partsocop." Ñeñt'pa' atet yečhete't ahuat.

AÑ PUEPAÑ SAN PABLO PO' CARTA ÑEÑŦ QUELLQUËRRANERR TESALÓNICO' MARNESHA' 2 TESALONICENSES

Atto Pablopá' quellquërranerr carta añecop ñeñŦ ame'ñetsa anetso Tesalónico epuet Silvano ñaña Timoteo

¹ Masheñeshacha' ñaña noçhaneshacha' ñeñŦes allohuenes apçhetsa all anetso Tesalónico e'ñe seyemteñoŦ Yompor Parets epuet ñaña Puechemer Jesucristo ñeñŦ Yepartseshar yepen. Na Pablon o'ch alla nequellquërrnaserr po'poñ carta epan masheñ Silvano ñaña masheñ Timoteo.

² E'ñe nehuomñcha'teñoŦes sa napa' o'ch notas: Yomporepa'chña sebensare'tam̄pene' ñeñŦara Parets epuet Puechemer Jesucristo ñeñŦ Yepartseshar yepen. Ñetepa'chña socshatene' e'ñe sa seyoçhro allohuenes.

Allempoch huerra Cristopa' a'coñchatareŦterrach allohuen ñeñŦ ama eñotaye'te Yompor

³ O'ch masheñeshacha' ñaña noçhaneshacha' notas, e'ñe pocte' çhocmach yeparasyoso'teñ Yompor socop tarro'mar sapa' po'ñoçh allo'na sesen ame'ña'nmaya Yompor ñaña allohuenes e'ñe puesheña'ttsospa' allo'na sesen morrentanna'tyesnomtsa.

⁴ ÑeñŦo'marña yañapa' atarr yocshensa. E'ñe yocsheñoŦpa' atarr cohuen yeñosyen socop all allampaño'mar all apçha'yenet Yomporecop. Ñetpa' çhocma yeñotatyenanet atet sepena sa, ama't ñeñŦ se'moñe'tene' ñeñŦ çhocma soçtare'tene' atto mueroçhtatenset, tarraña sañapa' çhocma atarr sa'huantenanet e'ñe same'ñeñoŦ Yompor.

⁵ Ñehua, yapa' yeñoteñ Yomporpa' e'ñe pocte' es pa'yen. ÑeñŦo'marña yeñoteñ sapa' e'ñe same'ñeñoŦ ña, ñañapa' e'ñeca'ye pocte' entenes allochñapa' attoch seçherr all añcha'tareŦtena ña, sapa' ñeñŦecopña atarr sa'mueroçhtatareŦtenaña te'.

⁶ Tarraña Yomporpa' e'ñe pocte' enteñ ñach tsa'taterraya mueroçhteñtso allohuen ñeñŦ semueroçhtatene' sa te'.

⁷ ÑeñŦ atto atarr semueroçhtena te' e'ñe ñocop, Yomporña' e'ñe pocte' enteñ socop, ñachña ello socshaterre'ña sa e'ñe atet atarr coshateney ya. Yapa' ñeñŦcha'ña atarr yocshaterre' ñerra'm esempoch orretuerra Yepartseshar Jesús allempoch huerra pue'ntañoŦ. Ña po'ñoçhpa' orretuerrach epuet po'millañoŦeñnaneshar ñeñŦ atarr ahua-mencatesha' pa'yen. Ñapa' e'ñech po'yoroçhenñoŦ huerra atet ñerra'mrrate' tso' huoret-nets.

⁸ Allempoch huerrapa' coñchatuerrancha' allohuen ñeñŦ ama eñotaye'te Yompor ñeñŦ ama ame'ña'poye' entaye'te cohuen ñoñets ñeñŦ Yepartsesharecop Jesucristo.

⁹ Ñetña'pa' attoch a'coñchatareŦterretpa' chenca'huerretcha' errponañohuen. Attoch ñetpa' o'ch ellopa'tetstatareŦterret amach entereto Yepartseshar, amach enterrñañeto po'cohuenña all nanac partsotena.

¹⁰ Ñapa' tarro'marcha' huerra attoch allohueney ñeñŦey pueyochresha' pen Parets, yañapa' yecohuentatapuerrñañcha'. Allohueney ñeñŦey ame'ñaye't atarrcha' yecuan-rrortapuer. Sa'nachña cohuentatapuerre' tarro'mar sapa'çho'ña same'ñena cohuen ñoñets ñeñŦ yeñotatenes.

¹¹ ÑeñŦo'marña yapa' çhocma yema'yocham̄pensa allochñapa' attoch Yomporpa' e'ñe pocte' entenes atto ñapa' o' çhore'terres o'ch pueyochresha' perres saña. Ñaña yapa' añ yenamuenas Yompor e'ñepa'chña po'huamencoŦ etsotatonasña allohuen ñeñŦ atet soçtapa'chyen cohuen ñocop ñaña ora ñeñŦ allpon setorra'yena e'ñe same'ñeñoŦ ña.

¹² Attochña sapa' e'ñech cohuen secohuentaterrñañ Yepartseshar Jesús, ñañaapa' cohuentaterrescha' saña. Ñeñtpa' e'ñe Yompor puemuereñoŕey ñaña Yepartseshar Jesucristo.

2

Allempoch orrterra puesheñarr acheñ ñeñt atarr atparñaattetsa

¹ Te'pa' o'ch masheñeshacha' ñaña nochaneshacha' neñotatas po'poñ ñeñtpa' añ allempoch huerra Yepartseshar Jesucristo attoch ñapa' o'ch apchatuerrey allohueneŕ e'ñe ñesho.

² Te'pa' ñeñto'marña notenes: Ama't puesheñarrotesapa' ñato't cha yore'tensa'ña po'poñ cotapñats. Sapa' amach cha seyorenatsto ama'tcha' se'mare'ter o' cherr allempoch huerra Yepartseshar. Ama'tcha' otasetañ ñetpa' e'ño' Parets Puecamquëñ eñoratenahuet, sañapa' ñato'tña cha seyorena'. Ama'tcha' pueserrparñoŕet atet otaset, sañapa' amach seyorenatsto. Ama'tcha' atet otasetañ te'pa' o' chap carta ñeñt mueñen Pablo ñeñtpa' atet oten carta, te'pa' o' cherr allempoch huerra Yepartseshar, saña e'ñe seyorñoŕpa' ñato'tña ñeñtaña same'ñena'.

³ Ama't puesheñarrotesa sapa' amach se'mñotatstaneto ama't e'ñe errotencha' otyesaset, tarro'mar ñetpa' atetcha' shecare'tasetañ. Ñeñto'marña napa' o'ch notas, allempopa' amaca'ye cherra' ñeñteñpo ñeñte yetñatsroch huerra Yepartseshar, ato'tña atarr atonterra' ñeñtcha' quechpuerre' Yompor. Ñaña allempopa' orrterrach puesheñarr acheñ ñeñt atarr atparñaattetsa, ñeñtpa' chenquëñtsa o'patenaya. Ñañaapa' Yomporach atarr e'moñe'terr ñaña allohuen acheñenesha' ñeñt muechatse'tyene' pa'namen ñeñt po'yomporer pa'yenet ñachña e'ñe tanterrahuet.

⁴ Ñaña ñeñtña atparñaatpa' e'ñe pommo'cheñoŕpa' atetcha' oterran acheñenesha' ñapa' ño'ña e'ñe Yomporetets. Attochña ama't Parets pa'paclopa' o'ch anorruer; o'ch e'ñe atet perra ñerra'mrrate' ña po'ñoŕch Yomporetets.

⁵ Sapa' ama't seyerpuenoña allempo allo'tsenmeñen sesho na ama't ñeñtpa' e'ñe notuase't.

⁶ Sapa' señoŕteñte' ñeñt onare'tatene'ña ña attoŕ amo' huerro tarraña chocmach orrterra allempoch cherr e'ñe atet onañchare't ñocop.

⁷ Ama't e'ñe tayoteñ atto atpare'tenet ñoñets ñeñt atet anare'tpa' ñetña e'ñe a'nahuapa' chocma atet penet. Tarraña te'pa' eñall ñeñt onare'tatene' ñeñt acheñer ñeñtcha' atarr atparñaaterrtsa, ñeñtñaapa' chocmach atet pena tarremphuach esempoch aprratamñsare'tterra ñeñt onare'tatene' te'.

⁸ O'ch aprratamñsare'tterrapa' ñeñtña acheñer ñeñtcha' atparñaaterrtsa allempochña orrtatare'tterra. Tarraña allempoch huerra Yepartseshar Jesús ñachña e'ñe puenamoŕ po'rrerrñoŕpa' ñeñtcha' muetserre'ña ñeñt atarr atparñaattetsa. Attoch orrterra Jesús e'ñe ña po'partsoteñoŕ ñeñtcha'ña e'ñe a'mchechaterre'ña ñeñt atparñaattetsa.

⁹ Ñehua, ñeñt acheñerpa' oneñet atarr ahuamencat pene' attoch orrterra. Ñeñto'marña pa'namencha' orrtaterr ñeñt po'partsoña pen ña ñeñt ama't ahuata acheñenesha' arr patsropa' ama't puesheñarroŕetapa' ama puentareto. Tarraña ñeñt po'partsoteña pen ñapa' ñeñtpa' ama Yomporeye' apuenaye, ñeñtpa' oneñeta apuene' atto shecare'tyenan acheñenesha'.

¹⁰ Attach e'ñe pa'namenot atarr shecare'tyerran acheñenesha' ñeñt ama't mameshapa' ama pocteyaye. Añcha' ashcare'tterrtsa allohuen ñeñt ama ame'ñetso ñeñt o'patena chenquëñets. Tarro'mar ñetpa' ahuatoteñ ama ame'ña'poye' enteññañetoña Yompor po'ñoñ ñeñt e'ñe po'ñoŕch alloch a'queshpatare'tterretañ.

¹¹ Ñeñto'marña Yomporpa' muenaterranetcha' o'ch atarr ashcare'tterret, attochña ñetpa' e'ñech aña ame'ñerret shequëñets ñeñt ama po'ñoŕchayaye ama't mamesha.

12 Attochña allohuen ñeñt ama ameña'poye' entaye'te Yompor po'ñoñ ñeñt e'ñe po'ñoñch queshpeñets, ñetpa' aña coshete't ñeñt ama pocteye' enteno Yompor, ñeñto'marña ñetpa' a'coñchatare'tterretcha' allempo.

Yapa' e'ñe ahuatoteñ acrerrey Yompor attoch a'queshpaterrey

13 Tarraña saña masheñneshasha ñaña nochaneshacha', yapa' chocma yeparasyoso'teñ Yompor socop ñeñtes atarr muerena Yepartseshar. Tarro'mar Yomporpa' ahuatoteñ acrerres sa attoch a'queshpaterres e'ñe cohuen. Ñeñtpa' aña sa'queshpaterre' atto Parets Puecamquëñpa' e'ñe a'cohuentatenes ñocop atto sapa' e'ñe cohuen same'ñerrñaña po'ñoñ ñeñt e'ñe po'ñoñch alloch yequeshperra.

14 Sapa' ñeñtecopña chore'terresña Yompor allempo yeserrpare'tatase't cohuen ñoñets alloch a'queshpaterrey Yompor. Attochña sapa'cho'ña secohuentapreterach Yepartseshar Jesucristo esempohuañen.

15 Ñeñto'marña o'ch masheñneshacha' ñaña nochaneshacha' noterrser: Sapa' e'ñepa'chña huomenc sepa'nom seyoçher Yomporecop. Ñaña ora allpon ñeñt yeychatyesase't e'ñe ya yenamot yeserrpare'tatase't ama't ñaña yecartot ñeñtña' e'ñepa'ch huomenc seyoçhre'cha.

16-17 Te'ñapa' o'ch notas: Yepartseshar Jesucristo ñaña Yompor Parets ñetepa'chña e'ñe cohuen socshaterre'ña sa seyoçhro, ñetepa'chña ahuañenat sepa'yese' allochña'pa' attochña sapa' chocmach señosyen ñeñt e'ñe cohuen ñoñets ñaña e'ñechña cohuenare' es sorrtatyen. Tarro'mar Yomporpa' ñeñtña atarr yemorrentenaya, ñapa' ña ñeñt chocma yocshatene' yeyoçhro. Ñeñtña cosheñetspa' amach ahuañaña'tterro ama't errponaña. Ña e'ñe puemuereno'tpa' chocma eñotateney e'ñe cohuen ñeñt atarr yeyemtena.

3

Atto Pablopa' otanet chocmach ma'yochampeñet

1 Masheñneshacha' ñaña nochaneshacha' te'ña e'ñe allohuapa' o'ch notas: Sapa' chocmach sema'yocham'pesya yaña. O'ch senamueñ Yompor attoch epa'huerra tecma Yepartseshar po'ñoñ erraparen, cohuenepa'ch entyeññañet po'ñoñ e'ñe atet atarr cohuen señch saña allempo chap sesho.

2 Tarro'mar acheñenesha'pa' ama allohuenacmaye' ame'ñeneto, shonte' ñeñt atpare'tene' Yompor ñaña shonte' atsrre'mñañneshasha' ñeñt ama cohuenayaye. Ñeñto'marña sapa' aña senamueñ Yompor amuepa'chña cha epatare'tatsetyeto.

3 Tarraña Yepartsesharpa' ñachña atarr yeyemtena, ñachña ahuañenat sepeñe', ñach secuam'pene', ñach sa'nataya, amach muenatano o'ch chaponasa ñeñt ama cohuenayaye.

4 Ñaña yapa' e'ñe yeyemteño't Yepartseshar sapa' e'ñe yeñotenes ñeñt atet yotenes sañapa' e'ñech atet sepeña te' ama't ñaña tsapa'one't chocmachña atet sepeña.

5 Yepartsesharepa'chña Jesús e'ñe cohuen seño'tatene'ña seyoçhro atto Yomporpa' atarr morrentensa, attochña e'ñech cohuen sa'huanta'huanom allohuen topateñets e'ñe atet pe't Cristo.

Yocoppa' añ poctetsa chocmach yetaruasen

6 Te'ñapa' masheñneshacha' o'ch notas e'ñe Ya'micha'tare'ter Jesucristo pa'so'chño, sapa' ñato't seyemteña'ña ñeñt atarr quellañets ñeñt amach mueno taruasa'. Ñeñt atet petsapa' ama mueno o'ch ame'ñanaña ñeñt atet yeychatenes.

7 Sapa' e'ñe seño'teñ añ poctetsa socop o'ch atet sepeña saña e'ñe atet senteney ya. Yapa' allempo allo'tseney parro yapa' chocma yetaruasen.

8 Yapa' ama't errotena ama't puesheñarrapa' ama yerraprecheña puerrar e'ñe atta. Ñamche'ña yapa' chocma yetaruasen ye'to e'ñe tsapome'tets attot yentña ya

yerrar allempo allo'tseney sesho. Yapa' ama čhoje' ya'tsrre'močhtana'taso ama't puesheñarrořesa.

⁹ Ama't e'ñe pocten o'ch serratapyen e'ñe atta, țarraña yapa' ama yemno țarro'mar yapa'čo'ña yemneñ o'ch yetaruasos yamã allochñapa' attoch yorrtatonas ñeñt e'ñe cohuentetsa socop allochñapa' atetcha' seřa samã.

¹⁰ Allempo allo'tseney seshopa' atet yotas, ñerra'm esesha'ch atarr quelletspa' arepa'ña rratstats, rranepa' po'čllañ.

¹¹ Yapa' ye'mare'tenes puesheña'ttsos sapa' sečllañořpa' atta sellapene't, ama čhoje' setaruaseno ama't mamesha, añaña e'ñe setorra'yena sa ñeñt ama es sherbeno.

¹² Allohuenes ñeñtes atarr quellañsarerespa' te'pa' o'ch notas e'ñe Ya'mcha'tareřer Jesucristo pa'so'chño, sapa' čhoñaca'yena setaruasa'ña e'ñe cohuen señañesha' attořcha' sechen allpon ñeñt sepallta'yena arr patsro.

¹³ Ñaña sa masheñneshacha' ñaña nočhaneshacha', sapa' ñato'tña čha semuenme'chena'ña orrtatyese' cohuen ñeñt attecma seřa'yena.

¹⁴ Ñerra'm esesha'ch ama e'mñotaye atet yotenes añ yecartot, ñeñtña acheñerpa' o'ch se'ñotorrtach ñapa' chocma atet pena. Sañapa' ñato'tña seyemteña'ña ñeñt atet petsa, allochñapa' attořcha' penquerra.

¹⁵ Tarraña amach atet sentatsche ñerra'mrate' čho se'moñe'teñ. Sapa' čhochña e'ñe cohuen soctape'chater atet e'ñe cohuen yoctape'chateñ yemo'nasheñ.

Arrpa' all so'terranet po'cartot

¹⁶ Yepartseshar ñeñt e'ñe yocshatene' yeyočhro ñepa'chña socshaterre' sa seyočhro ama'tcha' errořeno'tsenes. Yepartsesharpa' e'ñepa'chña parro allo'tsenes allohuenes.

¹⁷ Na ñeñten Pablón arrpa' nequellquẽño e'ñe na notořpa' o'ch nehuomcha'tnerres. Sapa' ñeñtcha'ña señotate' aňmapa' e'ñe no necarta. Allohuen ñeñt e'ñe no necartapa' attecma nequellquẽñ.

¹⁸ Yepartsesharepa'chña Jesucristo sa'natenaya e'ñe allohuenes. Ñeñtach notas, ñeñtpa' attetepa'ch Nompore. Allohua.

Pablo

AÑ ÑANOM SAN PABLO PO' CARTA ÑEÑT̃ QUELLCAN TIMOTEO 1 TIMOTEO

Atto Pablopa' quellcan carta Timoteocop

1-2 Masheñe Timoteo ñeñteḡ e'ñe yame'ñeñoḡ e'ñe atet nenteneḡ ñerra'mrrate' e'ñe nechemer nepeneḡ, na Pablon pequellquene'ña añ carta ñeñten Jesucristo puellsensaren, tarro'mar ñeñtpa' atet llesenserren Yompor Parets epuet Puechemer Jesucristo ñeñtcha' nanac yeyemterra. Ñeñtpa' ñeñtara Yompor ñeñt Ya'queshpatañer yepen, ñaña ñeñtara Puechemer Jesucristo ñeñt Yepartseshar yepen. Te'pa' e'ñe nehuom̄cha'teñoḡeḡpa' o'ch notaḡ, Yomporepa'chña pebensare'tam̄pene' ñeñt nanac Parets epuet Puechemer Cristo Jesús ñeñt Yepartseshar yepen. Ñetepa'chña pemuere-naya. Ñetepa'chña ḡocshatene' e'ñe ḡa peyoḡhro.

Timoteopa' ña cotape'chaterrahuet cohuen all anetso Efeso all ayḡhatareḡtenet po'poñ cotap̄ñats

3 Ñaña te'pa' o'ch notaḡ, ahuañmo'cha allempo nesechena o'ch ahuen Macedoniopa' atet notnomueḡ, ḡapa' allach ḡa'pa Efeso attoch ḡach cotape'chatyese' ñeñt yeḡchatyets po'poñ cotap̄ñats, attoch ñetpa' amach allo'na yeḡchatneneto ñet poḡtap̄ñet ñeñt ama po'ñoḡoyaye. Te'pa' ñeñtecopña nequellquennaḡ añ carta allochñapa' o'ch alla neyer-paterrperr.

4 Ñaña te'pa' ḡach otyesahuet attoch amach allo'na cotape'chatyesneneto e'ñe ñet pueserrparñet ñeñt ama po'ñoḡoyaye. Ñaña ḡach otyesahuet attoch amach allo'na cotape'chatyesneneto ñeñt atet serrpare'tatyesanete't pa'tañeshañ. Tarro'mar ñeñt serrparñatspa' atta nanac moññe'tateñet acheñenesha'. Ñeñtpa' ama añecpayaye alloch e'ñe yeñoter erra'tsente' e'ñe po'ñoḡ alloch yesherber Parets ñeñt atet muenen ña. Añña e'ñe yame'ñeñoḡa Cristopa' o'ch yeñoter.

5 Yomporpa' añña muenen o'ch yeyḡhach acheñenesha' amorrentanna'tpahuepa'ch allohueney. Tarro'mar e'ñe yame'ñeñoḡ Cristo poḡtacma arrña yeyoḡhropa' e'ñech cohuenare'yoctape'chyen Yomporecop. Ñaña e'ñech yeñmañesha'yoctape'chen cohuen.

6 Tarraña puesheña'tets acheñenesha'pa' ahuo't alla queḡhpa'huerret ñeñt atet muenen Yompor. Ñeñtña atet serrpare'tatenet po'poñ cotap̄ñats, ñeñtñapa' ama es sherbeno ama't mamesha Yomporecop.

7 Ñetpa' añña muenenet ahuo'ch orrtet atet ñerra'mrrate' nanac etsotenet añ ñoñets ñeñt atet anareḡ judioneshacop ahuaḡ. Tarraña ama't atet penetañpa' amaña eñoteñeto este'ña yeḡchateneyña añ ñoñets ñeñt ḡhocma serrpare'tenet. Ama'tcha' ñeñtña nanac torrenetañpa' amachña ḡhenaneto pueyoḡhro ñeñt po'ñoḡ atet yeḡchateney ñeñt ñoñets.

Attoch yeñoch eseshacopte' sherben añ ñoñets ñeñt atet anaret

8 Ñehua, allohueneypa' e'ñe yeñotueñ, ama't erra'tsena ñoñets ñeñt atet anareḡ ñeñtcha' atet yeḡpapa' ḡhocma sherben ñerra'm añecop yesherbaten añ ñoñets ñeñt atet muenen Yompor.

9 Ñaña allohueneypa' e'ñe yeñotueñ añ ñoñets ñeñt atet anareḡ ñeñtcha' atet yeḡpapa' ama añecpaye' anareḡe acheñeneshacop ñeñt cohuenare' es ḡa'yets, tarro'mar ñetpa' o' yeḡcha'hueñet e'ñe poḡtacma. Ñeñtpa' añecpa anareḡ añ acheñerecop ñeñt ama es otapes-pahuo, ñaña ñeñt nanac atpare'tetsa, ñaña ñeñt ama es ḡhenoyo pueyoḡhro ñeñt cohuentetsa Yomporecop, ñaña ñeñt nanac ochña'tare'tets, ñaña ñeñt ama añcha'na'tpo'

entenaye Yompor po'ñoñ, ñaña ñeñt ama't Paretspa' achmāre'teñcha'. Ñaña añecpa anaret añ ñoñets añ acheñrecop ñeñt amtsañtetsa, ñaña ñeñt muetsene' pompor, ama't ñaña pachor.

¹⁰ Ñaña añecpa anaret añ ñoñets añ acheñrecop ñeñt cañoresha'tets, ñaña ñeñt aguēne' pacma, ñaña ñeñt a'yetyene' acheñ, ñaña ñeñt atfa toma'tyets, ñaña ñeñt shecare'tyets ama'tcha' atarr huomenc nenaneñña po'ñoñ Yompor pa'so'chño, ñaña ama't erra'tsente' acheñer ñeñt atpare'tene' ñeñt atet cohuen yeçhateney Yompor po'ñoñ.

¹¹ Ñaña ñeñt atet yeçhateney Yompor po'ñoñ ñeñtpa' ñeñtara cohuen ñoñets ñeñt alloch a'queshpaterrey Yompor e'ñe po'cohuenño, ñeñtara Yompor ñeñt nellsenserre' na o'ch neserrpare'toñ po'ñoñ, ñaña ñeñtara Yompor ñeñt atarr ya'ye'choçhtatyen allohueney.

Atto Pablo' atarr parasyoso'ten atto atarr ahuamencat per Yompor

¹² Tarraña ama't ña nellsenserrayēñpa' napa' nanac neparasyoso'teñ Yepartseshar Jesucristo tarro'mar atto nanac ahuamencat pa'n. Ñaña nanac neparasyoso'teñ Yompor, tarro'mar ñapa' e'ñe pocte' enterren o'ch nesherber

¹³ ama't na ahuaŧpa' nanac nachmāre'che't Cristo, ñaña nanac noctare'che't ñeñt ame'ñaye't ña, ñaña nanac na'tserrpa'yesanete't. Tarraña ama't atet nepe'tpa' Yomporpa' ama coñe'ta morrenterrno tarro'mar allempopa' ama es neçhenoyo neyoçhro, ñaña allempopa' ama name'ñe'te.

¹⁴ Tarraña Yomporpa' ama coñe'ta morrenterrno, ñeñto'marña ame'ñataterña attoñña te'pa' e'ñe neyemteño't ñapa' nemorrentera allohuen acheñenesha'.

¹⁵ Ñeñto'mar te'pa' o' neñoter añepa'tña ñoñets ñeñt e'ñe po'ñoçh: Cristo Jesús'pa' añecopña huapa añ patso attoch a'queshpatosan allohuen ochñañenesha'. Ñeñto'marña te' napa' neñotena, allohuen ñeñt ochñañenesha'pa' na ello metana'tuenahuet po'chñaret. Ñeñto'mar te'pa' aña poctetsa o'ch yame'ña'huerra ñeñtara añ ñoñets.

¹⁶ Ñeñto'mar Yomporpa' attoñña peretnerren na, ama't napa' nanac ochñañen, allochñapa' attoch eñoçhet ama't erra'tsente' acheñer ñeñt nanac ochñañpa' attera nanac morrenteña Jesucristo. Allochñapa' ñerra'm esesha'ña ame'ñerrayapa' ñetñapa' corretsetach pocsheñeshocmañen tayoteñ e'ñe errponañohuen.

¹⁷ Ñeñto'marña te'pa' nanac nocsheño't noten, amorrentpahuepa'ch Yompor ñeñt partsotets e'ñe ñapue't ahuaŧoteñ errponohuañen, ñeñtara ñeñt ama arromñañeshayaye ama't ahuaŧa, ñeñt ama't eseshapa' ama puentare, ñeñtara ñeñt e'ñe ñapue't eñotañ. Ñeñto'marña yecohuentatoñepa'ch tayoteñ errponohuañen. Ñeñtpa' attetepa'ch Nom-pore.

Añpa' ñeñt atet otan Timoteo ñeñtcha' atet pa

¹⁸⁻²⁰ Te' masheñe Timoteo ellopa' o'ch alla noterrperr po'pocheño ñeñtcha' atet pepa, tarro'mar atet nenteneŧ atet ñerra'mrrate' e'ñe nechemer nepeneŧ. Te'pa' e'ñech peyoçhrocmañen peŧorra Yomporecop atet ñerra'mrrate' çho yeçllarena. E'ñe pame'ñeño't Cristo e'ñech peñmañeshocmañen es porrtatyen. Napa' añ noctape'chen ñeñt atet eños e'ñe cohuen pōcop ahuañmo'cha ñeñt a'mtene' ñoñets Yomporesho't. Ama't papa' çhocmuepa'ch peyerpa ñeñt atet a'poctat pōcop, tarro'mar ñeñt atet eños pōcoppa' ñeñtcha' allo'na ahuamencat pepene'. Ñaña çhocmach pame'ñya Cristo e'ñe cohuen e'ñe peñmañesha', tarro'mar ñerra'm ama e'ñe yeñmañesha' yoçteñe Cristopa' ñato' acoŧoneŧpa' o'huañcha' yame'ñera Cristo. Ñeñt atet pa' ahuaña epsheña yacma ñeñt pa'so'cheñ Himeneo ñaña Alejandro, ñaña po'poñeçhno acheñ ñeñt atet petsa. Ñeñto'marña napa' napuenanet oneñe't ñeñtara epsheña yacma attoch ñapa' o'ch mue-roçhtatanet allochñapa' o'ch eñoçhet ama achmāre'tpahuo Yompor.

2

Atto e'ñe pocte' o'ch yema'yocham̄pesya ñaña ama't am̄cha'taretečno

¹ Te'pa' o'ch notap̄ po'poñ ñeñtcha' atet p̄octape'chatyes acheñenesha' ñeñtcha' atet pet. Ñanompa' ma'yocham̄pesyetepa'ch allohuen acheñenesha', ñaña enamatoñetepa'ch acheñenesha' Yompor, ñaña parasyoso'chetepa'ch Yompor.

² Ñaña ma'yocham̄pesyetepa'ch allohuen am̄cha'taretečno ama't ñaña gobierno'. Allochñapa' attoch Yomporpa' cotape'chatanet e'ñe cohuen attoch am̄cha'tarettet e'ñe cohuen, allochñapa' attoch yocrrena yaña e'ñe cohuen muechet. Ñerra'm atet penetpa' attochña eñall ñaña yocop attoch yema'yochrena e'ñe cohuen Yomporecop, ñaña attoch e'ñe cohuen yentannena.

³ Ñerra'm atetña yepenapa' e'ñech cohuen enteney Yompor ñeñt Ya'queshp̄atañer yepen.

⁴ Tarro'mar ñapa' mueneñ allohuen acheñenesha'pa' o'ch a'queshp̄aterranet, ñaña mueneñ o'ch eñotatuerranet añ ñoñets ñeñt e'ñe po'ñoçh Yompor po'ñoñ.

⁵ Tarro'mar yapa' yeñoteñ Yomporpa' e'ñe patrra. Ñaña yeñoteñ e'ñe puesheñarra ñeñt chocma eñets yocop Yomporesho, ñeñtara Yompor Puechemer ñeñt Jesucristo ñeñt acheñetosets arr patsro.

⁶ Ñaña ñeñtara ñeñt a'rroyatsa e'ñe ñañeña attoch puerromueñoñ ñapa' o'ch tsa'tuonaya yo'chñar e'ñe allohueney ñeñtey acheñey. Ñeñtapa', atet orrtatonay Pompor allochñapa' attoch yeñoçh ñeñt atet cotape'chen ña. Allempoña çhap allempo e'ñe pocte' enteñ Pompor o'ch çhap añ patsropa' allempoña e'ñe eñotatey ñeñtapa't atet cotape'chen Pompor.

⁷ Ñeñto'marña napa' na allsensaret atto nach chopeñe'chats erracmañen atto e'ñe na neserrpare'tateño'tpa' o'ch name'ñatyesanet ñeñt e'ñe po'ñoçh Yompor po'ñoñ, ama't ñeñt ama judioneshayaye. Ñeñt atet noten e'ñe name'ñeñoñ Cristo ñeñtapa' e'ñe po'ñoçh tarro'mar ñeñtapa' ama shequëñtsoyaye.

Añ poctetsa e'ñech yeñmañesha' yema'yochena

⁸ Ñaña napa' nemneñ ora ama't errate' ap̄cha'yenet Yomporecoppa' añ yacmanesha' allempo echantenet pot puema'yocheño'tetpa' e'ñepa'ch pueñmañesha' ma'yochenet, amachña çha po'poñ entueneto pueyoçhro, ñaña amach çha atsrre'moçhen entueneto.

⁹⁻¹⁰ Ateñ ñaña coyaneshachnopa' chorretepa' atet chorra'yena po'potantañ pacmanesha' ñeñt po'nanesha'. Amachña añ chorra'yestatsteto attoch aye'charettenet e'ñe ñet po'llchapota. Ñaña pue'chetpa' e'shorretepa' atet e'shorra'yena po'potantañ. Añña ama pocteyaye o'ch añ ma'yochret attoch añño'tet e'ñe cohuen pue'ch. Añotepa'chña orrtet e'ñe cohuen atto amuerañtenet, ñaña atto cohuenare' es p̄a'yenet. Amachña añ cohuen orrtatenahueto atto na'yenet oro, amapa' seretsma't ñeñt nanac tsa'te', ñaña atto es chorra'yenet ñeñt nanac coçhnesha' ñeñt nanaccha' tsa'te'. Añepa'chña atet penet ñeñt e'ñe cohuentetsa Yomporecop, ñeñt poctetsa coyaneshacop ñeñt otets ñapa' o' ame'ñerrana Yompor.

¹¹ Ñaña allempo sapçhena Yomporecoppa' añ coyaneshachnopa' e'mñnotetepa' e'ñe muetsoññen attoch es eñotet. Amachña çha atpare'teneto ama't mamesha.

¹² Ñaña allempo sapçhena Yomporecoppa' napa' ama pocteye' nenteñe coyanesha'pa' o'ch yeçhaten all chorren allohuen yacmanesha', ñaña amach pomnaren p̄atstano yacma. E'ñepa'chña mam̄tetenet allempo sapçhena Yomporecop.

¹³ Tarro'mar Adánpa' ñanom ayeçhcataret acheñ, allotpa' ñaña Eva ñeñtcha' puetapor p̄a' Adán.

14 Ñaña Adánpa' ama esesha' shecaye. Aña shecoñet puetapor Eva, allot orrta atparñats Yomporecop.

15 Ñeñto'marña te' allempo cheyore'ten coyanesha'pa' e'ñech pa'llpuepñoña cheyore'ten. Tarraña ama't atteñpa' Yomporñapa' chocmach yepueñ attoch chocma queshpenet e'ñe cohuen, ñerra'm po'ñooh chocma ame'ñenet, ñaña ñerra'm chocma amuerañtenet, ñaña ñerra'm e'ñe cohuen es orrtatyenet Partsocop, ñaña ñerra'm e'ñe cohuen yechenet.

3

Attoch yeñoch erra'tsente' pocte' ñeñicha' yena' añcha'taret puerahuo

1 Te'pa' o'ch notap po'poñ ñeñt e'ñe po'ñooh atet. Ñerra'm esesha' muenats o'ch añcha'taretta allohuenacop ñeñt ame'ñetsa ñeñt atarr muenene' o'ch torrena Yomporecop ñeñtpa' e'ñe poctet ñeñt atarr mueneneñ tarraña eñoche'pa'chña atarr torrapo' attoch e'ñe cohuen orrtatyesan ñeñt atarr sherbets.

2 Tarro'mar ñeñt muenets o'ch añcha'taretta allohuenacop ñeñt ame'ñetsapa' añcha' se'n ñeñt etsotuene' añechno. Ñeñtcha' sena' añcha'taretpa' añcha' se'n ñeñt e'ñe cohuenare' es pets. Ñeñt ama't ahua'tapa' amach eñalle attoch tanmare'cha acheñenesha' ama't mamesha. Ñaña ñeñtcha' pa'mcha'tareter pa'yes allohuen ñeñt ame'ñetsapa' añcha' sena'yes erra'tsente' senten e'ñe patrra puetapor pen (ñerra'm ataporet), ñaña ñeñt nanac ma'yochrenaya ñeñt cohuentetsa Yomporecop, ñaña ñeñt e'ñe eñotuene' ñeñt cohuentetsa, ñaña ñeñt añcha'na'tpo' entuen allohuen acheñenesha'. Ñaña añ e'ñe pocte' o'ch añcha'taretta ñeñt e'ñe cohuen aguene' acheñenesha' pa'paclo, ñaña ñeñt e'ñe cohuen yechatene' acheñenesha' Yompor po'ñoñ.

3 Ñaña añcha' se'n ñeñt ama posa'tare'tetso, ñaña ñeñt amach orroñateyaye. Ñaña añcha'ña se'n ñeñt e'ñe cohuen muerenana pamo'ts, ñaña ñeñt ama atsrre'mñateyaye, ñaña ñeñt ama nanac ye'chapretetso quelle ñeñt apencochenot o'ch gana.

4 Ñaña ñeñtcha' añcha'tarettatsapa' añcha' se'n ñeñt e'ñech cohuen ame'ñatuenana puechemerasha', ñaña ñeñt e'ñech mecha'na'tueñ allohuen ama't ñeñt parro ye'chena.

5 Tarro'mar ñerra'm ama eñotenano attoch e'ñe cohuen ame'ñatuana ñeñt parro ye'chenapa' amachca'ye cohuenaye' añcha'tarettoña allohuenacop ñeñt ame'ñenaya Yompor.

6 Ñaña ñeñtcha' añcha'tarettatsapa' amach aña senatsto ñeñt errte' ame'ñetsa, tarro'mar ñerra'm aña sena' añcha'taret ñeñt errte' ame'ñetsapa' ñeñtpa' amach e'ñe eñotuenano ñeñt cohuentetsa Yomporecop, allempopa' e'ñe ña pa'mcha'taretteño'tpa' chate' atarr ommo'cha. Tarro'mar ñerra'm cha yommo'chapa' ñeñtpa' ama pocteye' enteñe Yompor. Chate' ahua'pore'taretey atet pet ahua't oneñet e'ñe pommo'cheño'tpa' ahua't huapore'chet.

7 Ñaña ñeñtcha' añcha'tarettatsapa' añcha' sena' ñeñt ama't ñeñt ama ame'ñetsopa' e'ñech cohuen entueñet ñamet. Tarro'mar ñerra'm nanac sasare'teñ ñeñt ama ame'ñetso, e'ñe puesasare'teño'tetpa' ñato'rraña chate' oneñetpa' nanac topachpa' ellopa' o'te' alla nanac atpare'terran Yompor.

Attoch yeñoch ñaña erra'tsente' pocte' ñeñicha' yena' diácono

8 Attecmach pa' ñaña ñeñtcha' sherbets Yompor pa'paclo, ñeñt otenet diácono. Ñeñtcha' sherbatspa' añcha' se'n ñeñt añcha'na'tpo' entuen allohuen acheñenesha', ñaña ñerra'm erro't o'tpa' amach shequeno, ñaña ñeñt ama posa'tare'tetso, ñaña ñeñt ama nanac ye'chapretetso quelle ñeñt apencochenot o'ch gana.

9 Ñaña ñeñtcha' sherbats Yompor pa'paclopa' añcha' se'n ñeñt e'ñech pueñmañesha' ma'yochrenaya ora ñeñt atet yame'ñera Cristo ñeñt e'ñe po'ñooh cohuen.

10 Ñeñto'marña añ pocte' čhoch ñanom secue' ñeñtcha' sena' diácono. Ñerra'm atette' pena ñeñt atet o' notuapa' ñehua, pocte' o'ch sene' ñeñtcha' sherbats Yompor pa'paclo.

11 Attecmach ñaña coyaneshačhnopa' añcha'na'tpo'ch enteñ allohuen acheñenesha', ñaña amachña atfa nanac puetomañenteneto, ñaña ñeñt nanac ma'yočhrenaya ñeñt cohuentetsa Yomporecop, ñaña e'ñech cohuen cotape'chenet Partsocop.

12 Ñaña ñeñtcha' sena' diáconopa' añcha' sena' erra'tsente' senten e'ñe pa'rra puetapor pen (ñerra'm ataporet), ñaña erra'tsente' senten ñeñt e'ñe cohuen ame'ñatuenaya puechemerasha' ñaña ñeñt e'ñe cohuen ame'ñatuenaya ñeñt parro yečhena pa'paclo.

13 Tarro'mar ñeñt e'ñe cohuen sherbets atet ñerra'm diáconopa' e'ñech cohuen entueñ allohuen acheñenesha', ñaña o'huañcha' poñcha'nañofayaya serrpare't ama't e'ñe mamesha atfo atarr ame'ñenana Cristo Jesús.

Ñeñt atet cotape'chateney Yompor atfoch yame'ñerapa' ñeñt'pa' nanac cočhnesha' ama't ahuatoteñpa' ama eseshaye' eñotenaye

14 Te'pa' o'ch nota'p po'poñ. Napa' nesechenañ o'ch nabcherrpa'.

15 Tarraña ñerra'm ama nehuapopa' amach sepallteno sapa' o'ch señočh ñeñtcha' atet sepa, tarro'mar o' notua'p añ necarto' ñeñtcha' atet sepa ñeñtes parro same'ñeña Yompor, ñerra'm esempo sapčhena Yomporecop, ñeñtara Yompor ñeñt ama arromñaťeshayaye. Ñaña ñeñtara Yompor ñeñt e'ñe yame'ñeño' allohueneypa' čhochña yorrtatyen ñeñt e'ñe po'ñočh Yompor po'ñoñ amachña čha ya'nasoteño.

16 Ñaña yapa' yeñoteñ ñeñt atet cotape'chateney Yompor atfo yame'ñerapa' ñeñt'pa' nanac cočhnesha' ama't ahuatoteñpa' ama eseshaye' eñotenaye. Añpa' ñeñt atet ya'čhoteñ Cristo:

Ama't Paretspa' o' acheñetos añe patsro, tarraña Yompor Puecamquëño'ña nanac ahua-mencattosa ñeñt eñotatene'ña acheñenesha' ñapa' e'ñe po'ñočh cohuen. Ama't allohuen mellañoteñnesha'pa' e'ñe entuoñete't ñeñt atet pa'yese't añ patsro, ñaña ñeñt ame'ñaye'tpa' čhocma a'potet Cristo erracmañen arr patsro ama't all ama judioneshayaye. Ñaña shonte' acheñ ame'ñerraya Cristo, allotña Yompor po'cohuenño'tpa' o' alla aguër pue'ntaño.

4

Atfo esempohuañenpa' puerruerrach patantarr ama't ñeñt ame'ñetsa te'

1 Te'pa' o'ch nota'p po'poñ. E'ñe po'ñočh atet eñotateney Parets Puecamquëño'. O'ch mellapoterrmochapa' puerruerrach patantarr acheñ ama't ñeñt ame'ñetsa te'. Allempopa' o'ch alla ame'ñeret ñeñt ashcañtetsa, ñaña o'ch añ ma'yočhrerret oneñet pocta'pña.

2 Tarro'mar o'ch alla ame'ñeret acheñ ñeñt ashcañtetsa, ñeñtara acheñ ñeñt ama es čhenoyo pueyočhro ama't mamesha ama't allempo o' achm'are'tuan Yompor.

3 Ñaña ñeñtara añ acheñpa' o'ch otyenan acheñenesha', ama pocteyaye o'ch sesna'ta. Ñaña ama pocteyaye o'ch es serratse'tyes. Tarraña allohuen ñeñt yerrenpa' e'ñe pocte' o'ch yerreñ, ñeñto'mar yečcach Yompor ñeñtcha' yerren. Tarro'mar ñeñtey o' yeñoterr ñeñt e'ñe po'ñočh Yompor po'ñoñ, ñaña ñeñtey ame'ñetsapa' e'ñe pocte' o'ch yerren e'ñe yema'yocheño' Yompor.

4 Tarro'mar allohuen ñeñt yečcatua Yompor ñeñtcha' yerrenpa' e'ñe cohuenacma, ñeñto'marña amach errotenot yoto ama pocteyaye o'ch yerre'. Añña pocte' čhocmach es yerren e'ñe yeparasyoso'teño' Yompor.

5 Yema'yočhampeño' yerrarpa' e'ñe pocte' Partsocop o'ch yerreñ, tarro'mar ñeñt'pa' atet oteneý Yompor.

Atto Timoteo atarr cohuen sherbenan Jesucristo

6 Te'pa' o'ch masheñe Timoteo notap̄ po'poñ. Ñerra'm atetcha' peychatyes acheñenesha' ñeñt̄ ame'ñetsa ñeñt̄ atet̄ o' notuaḡpa' allempoña po'ñoçhpa' e'ñech cohuen pesherbeñ Yepartseshar Jesucristo. Tarro'mar atto ḡoctape'cheññan Yompor po'ñoñpa' ñeñt̄cha'ña allo'na ahuamencat̄ pepene'. Ñaña atto ḡoctape'chen e'ñe cohuen Yomporecoppa' ñeñt̄cha'ña allo'na ahuamencat̄ pepene'.

7 Ñaña amach pe'mñotatsto serrparñats ñeñt̄ ama añeyaye ñeñt̄ atet̄ yeçhateney Yompor po'ñoñ attot̄ yame'ñera Cristo, tarro'mar ñeñt̄pa' ama es sherbeno. Añcha'ña pema'yoçhra ñeñt̄ atet̄ yeçhateney Yompor po'ñoñ.

8 Ñaña añcha'ña o'ch pema'yoçhra attoch huomenc peḡa' peyoçher Yomporecop. Atet̄ pena po'potantañ acheñenesha' ma'yoçhraya attoch huomenctatet̄ e'ñe ñañeñeta po'çhets, ama't ñeñt̄pa' ama tama es sherbeno. Tarraña ḡapa' añcha'ña pema'yoçhra attoch huomenc peḡa' peyoçher Yomporecop, tarro'mar ñeñt̄pa' ello nanac sherben attoch yocrra cohuen añe patsro, ñaña sherben attoch ello yocrra'huerra cohuen esempohuañen.

9 Ñeñt̄ atet̄ noteneḡpa' e'ñe po'ñoçh atet̄, ñeñto'marña añ pocte' o'ch ame'ñyet allo-huenet.

10 Ñeñto'marña te'pa' ama't e'ñe yemueroçhteñoḡpa' çhocma yetorrena Yomporecop, tarro'mar ñapa' ñach yeyemterra e'ñe poctacma, ñeñt̄ Yompor ñeñt̄ ama arromñañeshayaye, ñaña ñeñt̄ara Yompor ñeñt̄ Ya'qeshḡatañer yepen allohueney añecop ñeñt̄ey ame'ñenaya.

11 Te'pa' ñeñt̄ atet̄ o' notuaḡpa' ñeñt̄cha' atet̄ ḡotyey acheñenesha' ñeñt̄cha' atet̄ pet, ñaña e'ñech cohuenacma peychatyesanet.

12 Ñaña çhocmach ḡorrta e'ñe cohuen acheñeneshacop, attoch ñetpa' e'mñotapet ama't ḡapa' nanac huepueshaḡ. Ñaña çhocmach ḡorrta cohuen ama't atet̄ pe'ñorena, ñaña ama't allempo es peḡa'yen. Ñaña çhocmach pemuereña acheñenesha', ñaña çhocmach ḡame'ñya e'ñe cohuen Yompor, ñaña ama't peyoçhropa' çhocmach ḡoctape'ch e'ñe cohuen ñeñt̄ atet̄ pena ñeñt̄ e'ñe po'ñoçh Cristona'tartetsa. Allochñapa' e'ñe peshoḡ añña acheñenesha' ñeñt̄ ame'ñetsapa' o'ch çchapanet pueyoçhreto ñeñt̄ atet̄ cohuentetsa Yomporecop.

13 Ñaña te'pa' ama't ama neçhena' napa', çhocmach pelleyatanet Yompor po'ñoñ allempo çhocma sapçhena allohuenes. Ñaña çhocmach peserrpare'tatanet, ñaña e'ñech cohuen peychatenanet.

14 Ñaña çhocmach peyerpa atto ahuañmo'cha Yomporpa' ahuamencat̄ ḡaḡ allempo ñeñt̄ pompornesha' pen ñeñt̄ ame'ñetsapa' ñetpa' net pot pesho. Ñaña atto eñoratanet Yompor ñetña allempopa' e'ñe cohuen eñosyeset ḡocop. Ñeñto'marña te'pa' añ poctetsa çhocmach peḡorra Yomporecop.

15 Chocmach pema'yoçhra ñeñt̄ cohuentetsa Yomporecop, ñaña çhoch ḡayomña, attoch acheñenesha'pa' entonapet ñeñt̄ atet̄ petsoten Yomporecop.

16 Ñaña çhocmach peñota ḡañeña, ñato' cohente' ḡoctape'chen, ñato' amate'. Ñaña çhocmach peñota ḡañeña ñato' e'ñete' atet̄ peychaten. Ñaña çhocmach peychat cohuen e'ñe atet̄ oteneḡ Yompor po'ñoñ attoch pequeshperra ḡa, ñaña allohuen ñeñt̄ pe'mñotene'.

5

Añpa' ñeñt̄cha' atet̄ yeḡannena ñeñt̄ey ame'ñetsa

1 Masheñe Timoteo, te'pa' o'ch noterrperr po'poñ. Amach peche'ptare'tatsche ñeñt̄ po'nare' yacma ñerra'm esempo pantenet. Elloña çhochña ḡoctape'chaterranet cohuen

e'ñe acoṑa. Atetcha' pentanet ñerra'mrrate' e'ñe ṑompor pepenanet. Añña allohuen hueparneshačhnopa' atetcha' pentanet ñerra'mrrate' e'ñe pemo'nasheñ pepenanet pocacma.

² Ñaña coyaneshačhno ñeñt' po'nare'pa' atetcha' pentanet ñerra'mrrate' e'ñe ṑachor pepenanet pocacma. Añña ñeñt' shopshare'pa' atetcha' pentanet ñerra'mrrate' e'ñe ṑoçh pepenanet pocacma. Amachña čha muene' ṑa'llocchame'tyenaneto ama't mamesha.

³ Ñaña añ pocetsa čhocmach seyempue' rretorrnanesha' ñerra'm esempo ama eñallete ñeñt'cha' yenpahuet.

⁴ Tarraña ñerra'm erra'tsen rretorrnaneshar echene' puechoyoresha' amapa' pue'ñaresha', ñeñt'pa' añ pocte' ñetach cohuañṑset pachor. Tarro'mar añ pocte' e'ñe ñet o'ch eñochet ñanamcha' añ yecuañṑes yamo'ts attochña yesherber Yompor ñaña attoch yesherbeñ yamo'mte' atto ñetpa' cohuañṑesyet yaña ahuať. Tarro'mar ñerra'm atet yeṑapa' e'ñech yocshateñ ama't Yompor.

⁵ Añpa' attoch señoçh erra'tsente' rretorrnaneshar palltetsa o'ch seyempue': Añcha' seyempa' ñeñt' rratotetsa e'ñe ñaṑña ñeñt' ama echenaye puechoyoresha', ñaña ñeñt' e'ñe yemtenaya Yompor, ñaña ñeñt' čocma ma'yochenaya Yompor paťe'tets yeť, ñaña ama't tsapo.

⁶ Tarraña erra'tsen rretorrnaneshar ñeñt' atta coshatse'tyetsapa' čhach ottena ñerra'mrrate' o' rroma, ama't allempo correnmeñ.

⁷ Te'pa' o'ch ṑotanet ñeñt'cha' atet pet attoch ama eñalle ama't eseshapa' o'ch sasare'tanet.

⁸ Ñerra'm esesha' ama muenenaye o'ch cohuañṑsan pamo'ts ama't ñeñt' parro yečhena ñeñt'ña ačeñ atetpa' amaca'ye po'ñoçhaye' ame'ñenano ñeñt' atet oteneý Yompor. Ñaña ñeñt' atet ačeñpa' amach pocteye' enteñe Yompor ama't mamesha. Ñeñt'pa' elloch metaneñ ama't ñeñt' ama ame'ñetso.

⁹ Ñaña po'poñ attoch señoçh erra'tsente' rretorrnaneshar ñeñt' pocte' ñeñt'cha' seyempa', ñeñt'pa' erra'tsente' po'nmeneshar ñeñt' echene' pechapoch čharra' po'charña, ñaña ñeñt' paťrrach puerrollar peť.

¹⁰ Ñaña erra'tsente' senten ñeñt' e'ñe cohuenare' es pets, ñeñt' e'ñe cohuen cohuañṑene' puechoyoresha', ñaña ñeñt' nanac amueraña, ñaña ñeñt' e'ñe cohuen aguene' puemo'to', ñaña ñeñt' e'ñe pueñmañesha' sherbene' allohuen ñeñt' ame'ñetsa, ñaña ñeñt' nanac yenpuene' ama't ñeñt' mueročhtetsa, ñaña ñeñt' nanac ṑa'yene' po'poñečhno ñeñt' cohuentetsa.

¹¹ Tarraña ñeñt' rretorrnaneshar attera shopsheshameñ ñeñt' ama echenana' pechapoch čharra' po'charña'pa' amach sagapatsche, tarro'mar ñerra'm machaya muenme'cherran sherbe' Cristopa' o'te' alla some'terra,

¹² čhaťe' tanmare'cha ačeñenesha' tarro'mar amach etsotano ñeñt' atet otan Cristo ahuañmo'cha.

¹³ Ñaña ñato' o'ch atta nanac quella', ñato' po'čllañoťpa' ñato' o'ch atta ta'yesa po'poñ pocollo'mar serrpare'tatse'tyesets pa'namen ñoñets, ñaña ñato' o'ch atta a'metare'tyesan ñeñt' atet ṑa'yena po'ṑsheññečhno ama't ñeñt' ama otenayaye.

¹⁴ Ñeñto'marña napa' e'ñe pocte' nenteñ ñeñt' shopsheshameñpa' some'terrepa' ñaña cheyore'terrepa' attoch añach ma'yochrena ñeñt' pa'pacllacop. Ñerra'm atet penetpa' attochña amach eñalle ama't ñeñt' ye'moñe'tene'pa' amach sasare'tye.

¹⁵ Tarro'mar puesheña'tets rretorrnanesha'pa' o' alla puerruerret o' alla coťeret oneñet.

¹⁶ Te' ellopa' o'ch notaṑ po'poñoneť. Ñerra'm eñall ama't coyanesha' ñeñt' ame'ñetsa, ñaña ñerra'm ña pamo'ts rratotatsapa' e'ñe pocte' ñañeñach cohuañṑse' pamo'ts. Allochña'pa' amach pallteno allohuen ñeñt' ame'ñetsapa' o'ch apueñet ñeñt' pallta'yena. Al-

lochñapa' attoch añcha'ña yenpuenet po'poñechno rretorrnanesha' ñeññ ama echenaye pamo'ts ñeññcha' yenpuene'.

Añ poctetsa ñeññcha' atet yepen ñeññ nanac torretsa Yomporecop

¹⁷ Te'pa' o'ch notap̄ po'poñ. Ñeññ pompornesha' pen ñeññ ame'ñetsapa' ñerra'm e'ñe cohuen añcha'tarettenetpa' e'ñe pocte' acheñenesha'pa' cohuencha' cosheñet, ñaña ellopa' añ pocte' o'ch es apueñet ñeññ palltena. Ñeññpa' ñeññcha' atet sepeñ erra'tsencha' ñeñña po'taruas pe' atto serrpare'ten, ñaña ñeññ e'ñe ma'yochrenaya yeçhatets Yompor po'ñoñ.

¹⁸ Tarro'mar ama't Yompor po'ñoñ ñeññ anuaret ahuañoteñpa' atet toma'ntatene, ñeññpa' atet oten: “Ñerra'm esempo satmama'tateñ huaquesh attoch es serrocllome'chach pa'tcoñ, allempopa' amach sempanma'tatsche. E'ñe pocte' rranepa' ñaña ñeññ serrocllome'chateñ.” Ñaña ñeññ atet oten po'poñ Yompor po'ñoñ: “Ñeññ ataruasañpa' e'ñe pocte' çhocmach agapan po'tsa' atto taruasen.”

¹⁹ Ñaña ñerra'm eñall puesheñarr ñeññ a'metare'tam̄pene' ñeññ pompor pen ñeññ ame'ñetsapa' sapa' amach same'ñatscho. Añña ñerra'm epsheña a'metare'tam̄pene' amapa' ma'psheña, allempopa' pocte' o'ch se'mñoch, tarro'mar allempopa' o'ch señoçh ñato' po'ñoçhte' atet.

²⁰ Atteña ñerra'm po'ñoçhte' atet pena, allempo allo'tsa'yen allohuen acheñenesha'pa' añ poctetsa o'ch soch ñeññ atetpa' ama aña'pahuo. Allochñapa' po'potantaña'çho'ña esheccha' mecha'na'tenet.

²¹ Añpa' çhocmach atet peña ñeññ atet o' notuañ ama't erro'tente' o' pohua ñeññ parro nanac peyemtena ahuaña. Tarro'mar Yomporpa' enteneñ epuet Puechemer Jesucristo ñeññara Yepartseshar yepen, ñaña epuet po'millañoñeñnaneshar ñeññ epuet yemtena ña. Allohuenetpa' e'ñe entuenpet ñeñño'marña te'pa' añ pocte' o'ch pepena ñeññ atet o' notuañ.

²² Te'pa' o'ch noctape'chaterrperr po'poñ ñeññcha' atet seña. Ñerra'm esempo semneñ o'ch sena'yes ñeññcha' añcha'taretterrtsa Yomporecop, amach ahuen senatstere ñeññcha' añcha'taretterrtsa, çhocña secua'yes erra'tsente' acheñer ñeññ e'ñe cohuen es pa'yets. Tarro'mar ñerra'm añña sena'yes ñeññ ama cohuen es petsopa' te't e'ñe ña po'chñarotpa' atet sepene samña. Ñeñño'marña te'pa' çhocmach pa'ypo'ñañpes ñeññ ama cohuenayaye ama't mamesha.

²³ Te'pa' o'ch notap̄ po'poñ. Atto pa'pa' çhocma pa'tsna'tame'ten, ñaña atto at-serrpare'teneñ pa'topa' añ pocte' amach porratsterrerro e'ñe ñapueñ oñ, añcha'ña epuet porr coñe't vino.

²⁴ Ñaña te'pa' o'ch notap̄ po'poñ attoch peñoçh. Eñall puesheña'tets acheñ ñerra'm esempo pena ñeññ ama cohuenayaye Yomporecoppa' yapa'çho'ña o'ch yeñotanet al-lorocma. Allempoña yapa' o'ch yot, po'ñoçh añpa' ama pocteyaye. Tarraña eñall ñaña po'poñechno acheñ ama't esempo pet ñeññ ama cohuenayaye Yomporecoppa' ñeññpa' amach esesha' eñotaye ama't puesheñarroña. Tarraña esempohuañenpa' orrtatu-areñterrach.

²⁵ Attecma pena ñaña ñerra'm esempo yepena e'ñe cohuen, acheñenesha'pa' o'ch entuenyet e'ñe cohuen. Tarraña erro'tenopa' ama't e'ñe cohuen enteney Yomporpa' acheñenesha'pa' amach e'ñe cohuenaye' entenyeto. Tarraña esempohuañenpa' çherranetcha' pueyoçhro.

6

Añpa' ñeññ poctetsa ñeññcha' atet pa ñeññ ataruasataret e'ñe atta

¹ Te'pa' o'ch notap̄ po'poñ ñeññ poctetsa ñeññcha' atet pa ñeññ ataruasataret e'ñe atta ñeññara ñeññ o' ame'ñerrana Cristo. Añ pocte' ñetpa' cohuencha' eñchet po'patronar,

attoch e'ñe ñoñotetpa' amach errotent eñalle attoch achmāre'tachet Yompor, ñaña ñeñt atet yeychaten Cristocop.

² Ñaña ñeñt ataruasataret e'ñe atfa, ñerra'm po'patronarpa' ame'ñenet ñametpa' elloña allempopa' amach atpare'tatscheto ama't mamesha, tarro'mar o' pa'mo'nasheñ peret e'ñe pame'ñeñotet Yompor. Amach otaṣsa'tatsteto "te'pa' ama'tcha' ama e'ñe name'ñyo nepatronarña' o' ame'ñerrapa' amach errot pa'no." Elloña te'pa' e'ñech yemorrenesha' yesherbeñ yemo'nasheñ e'ñe cohuen. Masheñe Timoteo, añpa' chocmach peychatanet, ñaña o'ch potanet ñeñtcha' atet pet.

Cotaṣñats ñeñt ama po'ñoçhoyaye

³ Ñerra'm esesha' yeçhatats po'poñ cotaṣñats ñeñt ama atteyaye atet yeçhateney Yepartseshar Jesucristo ñeñt po'ñoçh atet muenen Yomporpa'

⁴ Ñeñt acheñ atetpa' attach ommo'chena, po'ñoçh ñeñtapa' ama çhoye' es eñoteno. Ñeñt atet acheñerpa' añeçpach atet pena attoch es otnare'tyesan acheñenesha' e'ñe po'poñ cotaṣñatso'mara. E'ñe potnare'tanna'teñotetpa' o'ch atfa atsrre'mare'tet, ñaña o'ch atfa e'moñe'tanna'tet, ñaña o'ch atfa sasare'tanna'tyeset, ñaña allempopa' o'huañcha' eñoranna'tet.

⁵ Po'ñoçh añ acheñ ñeñt atfa cotape'chatse'tets e'ñe ñañeña poçtaṣñotpa' po'ñoçhpa' amach cotape'chenano ama't mamesha ñeñt cohuentetsa ñaña amach eñotenano ñeñt po'ñoçh alloch yequeshperra. Ñetpa' attach chocma mueneñet o'ch es otnare'tanna'tyeset. Ñaña ñetpa' añeçpach mueneñet o'ch serrpare'tet Yomporecop attoch ganet esocmañen. Ñeñto'marña ñeñt atet acheñpa' amach peyemtatscho.

⁶ Ñehua, po'ñoçh yapa' yeñoteñ e'ñe yame'ñeñot Cristopa' shonte' yechen esocmañen. Ñeñto'marña yapa' ñeñtch nanac yocshena.

⁷ Tarro'mar allempo ye'ñalleta ahuatpa' atfa ye'ñalleta muelle'mcoñ. Te'pa'cho'ña ñerra'm esempo yerromuenpa' amach errotent yahuanmo yechecom.

⁸ Ñeñto'mar yapa' amach es yellcatsto. Ñerra'm yechen ñeñtcha' yerra' ñaña ñeñtcha' yechorrapa' ñeñtch yocshena.

⁹ Tarro'mar ñeñt muenets o'ch echan esocmañenpa' amach errotent ahuantano atto topatyeney oneñet. Attach pa'namen ye'chatse'tyenet ñeñt ama es sherbetso. Elloña ñeñtapa' ñeñtcha' anmahuet chenquëñtso esempohuañen.

¹⁰ Tarro'mar e'ñe yeye'chapreteñot quellepa' allot huenaña esocmañen sosya'tsañ. Tarro'mar puesheña'tets ñeñt nanac muenets o'ch ganet shonte' quellepa' atteñapa' o'huañcha' ame'ñyet Yompor. Ñeñto'marña acoṣonetpa' o'ch huapanet shonte' ñeñtcha' nanac llecatahuet.

Añach paterr yema'yochra ñeñt cohuentetsa Yomporecop

¹¹ Tarraña ṣapa' amach atet peṣatsto tarro'mar ṣapa' anareteṣ Yomporecop. Ñeñto'marña ṣapa' añach pema'yochra ñeñt cohuentetsa Yomporecop, ñaña chocmach peyerepya Yompor, ñaña chocmach ṣame'ñya cohuen, ñaña chocmach pemorrencha ṣamo'ts, ñaña chocmach ṣa'huanta'huanom ñeñt atarr echarr pentyen amach ṣañeña e'ñe cohuen entatstatso.

¹² Ñaña chocmach ṣame'ñya cohuen Yompor atet ñerra'm cho peçllarena Yomporecop. Allochñapa' esheccha' peñoch ṣapa' corretsapach tayoteñ e'ñe errponañohuen. Ñeñto'mar Yomporpa' chore'taṣ ahuaña allempo peñotach allohuen acheñenesha' atto ṣapa' o' ṣame'ñerra.

¹³⁻¹⁴ Te'pa' o'ch masheñe noterrperr po'poñ ñeñtcha' atet peṣa. Chocmach petso-tua ora ñeñt atet oteneṣ Yompor. Amach poçtape'chatsto po'poñoneñ attoch amach eñalle attoch tanmare'taṣa acheñenesha'. Añpa' atetcha' peṣa tarremphua esempo-huañencha' huerra Yepartseshar Jesucristo. Tarro'mar ama't te' Yomporpa' enteneṣ,

ñeñtara Yompor ñeñt yapuene' yocrreña teme'ttsen, ñaña allohuen ñeñt yentyen. Ñaña Puechemer Jesucristopa'cho'ña enteneþ, añ ñeñtara Cristo ñeñt eñosets e'ne cohuen allempo a'þto'tare'teñ Poncio Pilato.

¹⁵ Esemphuañencha'ña pocte' enter Yomporpa' allempochña mueñerranerr alla Puechemer arr patsro, ñeñtara Yompor ñeñt e'ne paþrra, ñaña ñeñtara ñeñt atarr ya'ye'chochtatyen allohueneý, ñaña ñeñtara ñeñt nanac ahuamencat, ñeñt Pompor pen ama't allohuen ñeñt añcha'taretetyetsa, ñaña allohuen ñeñt ayochreshatetyetsa.

¹⁶ Ñaña ñeñtara Yompor ñeñt ñapueþ ama arromñañeshayaye, ñeñtara Yompor ñeñt yeçheta allo'tsen puetare' ñeñt nanac a'rrechatañ all amach errotenoþ yeçhapo. Ama't puesheñarra acheñpa' ama puentare all, tarro'mar amaþe' errotenoþ yeçhapo. Ñeñto'marña ya'ye'chochtatoñepa'ch Yompor, ñaña ahuamencatepa'ch tayoteñ erponohuañen. Ñeñtþa' attetepa'ch Nompore.

Arrpa' all cotape' chatan ñeñt nanac ecñlayoret

¹⁷ Te'pa' o'ch notaþ po'poñ. Ñeñt nanac ehecmañtetsa añ patsropa' o'ch þotanet amach ommo'chatsteto e'ne po'checmoþ, ñaña amach cotape'chatsteto ñato' poçñlayoroþpa' amach es pallterreto, tarro'mar ñeñtþa' huañerrcha' esempohuañen. Añña yemchetepa' Yompor ñeñt ama arromñañeshayaye ñaña ñeñt yapuene' shonte' esocmañen ñeñtcha' çhocma yocshatene'.

¹⁸ Ñaña o'ch þotanet petepa' e'ne cohuen Yomporecop, ñaña es apa'yasetepa' ñeñt es palltetsa, ñaña amuerañtetepa'.

¹⁹ Ñerra'm atetcha' petpa' eñallcha' shonte' alloch coshaterranet tsapaþonet Yompor. Ellopa' o'ch apanet ñaña attochña ñetpa' corretsetach pocsheñeshocmañen tayoteñ e'ne errponañohuen.

Ñeñt atet otan Timoteo e'ne allohuanen

²⁰ E'ne allohuanenpa' o'ch masheñe Timoteo noterrperr alla: Chocmach petsotua ora ñeñt atet oteneþ Yompor. Amach pe'mñotatsche ñeñt çhocma muenets o'ch es otnare'tanna'tyesa. Ñeñtþa' ama sherbeno ama't mamesha Yomporecop. Ama't ñetpa' otenetañ po'ñocho' es eñotenetpa' tarraña yapa' yeñoteñ ñeñtþa' ama po'ñoçhoyaye.

²¹ Tarro'mar puesheña'tets ñeñt cotene' atetpa' ama çhenaneto pueyoçhro ñeñt atet yame'ñeña Cristo.

Te'pa' Yomporepa'ch þa'nataya. Ñeñtach notaþ, ñeñtþa' attetepa'ch Nompore. Allohua.

Pablo

AÑ PUEPAÑ SAN PABLO PO' CARTA ÑEÑT̃ QUELLQUËRRANERR TIMOTEO 2 TIMOTEO

Atto Pablopa' alla quellquërranerr carta Timoteocop

1-2 Masheñe Timoteo, ñeñteḡ nanac nemuerena tarro'mar atet nenteneḡ ñerra'mrrate' e'ñe nechemer nepeneḡ. Na Pablón o'ch alla nequellquërrnaperr po'poñ carta, ñeñten Jesucristo puellsensaren tarro'mar atet muenen Yompör attoch nach eñotatyese' allohuen acheñenesha' ñeñt̃ atet oteney Yompör: E'ñe yeyemteñoñ Puechemer Cristo Jesús pa' yañapa' corretsayach yocsheñeshocmañen tayoteñ e'ñe errponañohuen. Te'pa' e'ñe nehuom̃cha'teñoḡeḡpa' o'ch notaḡ: Yomporepa'chña pebensare'tam̃pene' ñeñt̃ nanac Parets epuet Puechemer Cristo Jesús ñeñt̃ Yepartseshar yepen. Ñetepa'chña pemuerenaya. Ñetepa'chña ḡocshatene' e'ñe ḡa peyoḡhro.

Atto Timoteo e'ñe cohuen ame'ñena

3 E'ñe neyerpueñoḡeḡpa' napa' ḡhocma neparasyoso'teñ Yompör ḡocop, yeḡo ama't ñaña tsapo allempo ḡhocma nema'yocheña Yompör ḡocop. Ñeñtara Yompör ñeñt̃ ḡhocma neñmañesha' nesherven, atet sherbe't̃ ñaña ahuaḡ natañneshañ.

4 Ñaña napa' ḡhocma neyerpuena allempo peya'na'tapuen ahuañmo'cha. Ñeñto'mar te' napa' nemneñ errotenohuaca' yentannerra attoḡe' ḡocshaterren.

5 Ñaña ḡhocma neyerpuenḡa atto ḡpapa' e'ñe cohuen ḡpame'ñena, ñaña atet ame'ñena ñaña ḡpacnor Loida ñaña ḡpachor Eunice. Ñeñto'marña napa' neñoteñ ḡpapa'ḡho'ña ḡhocmate' ḡpame'ñena e'ñe cohuen.

Atto ama apenca'pahuo e'ñe yeserrpare'teñoñ Yompör po'ñoñ

6 Ñeñto'mar napa' nemneñ o'ch alla neyerpaterrperr atto ahuañmo'cha Yompörpa' ahuañmencat̃ ḡpaḡ allempo nena' ñaña not pesho. Ñeñto'marña te'pa' amach pemuenme'chatstoñe ñeñt̃ atet otaḡ Yompör.

7 Tarro'mar Yompörpa' ama añecpaye' chorratenyoña Puecamquëñ attoch yapa' o'ch ḡcha yem̃cha't, añecopña chorratenya attoch ahuañmencat̃ ḡpa'y, ñaña attoch yemorrentanna'ta allohueney, ñaña attoch e'ñe cohuen yorrtatyen ñeñt̃ atet muenen Yompör.

8 Ñeñto'marña te'pa' amach pepencatsto atto peserrpare'teññañ ñeñt̃ atet pena Yepartseshar Cristo. Ñaña amach pepencatsto e'ñe no'mar atto napa' o' cárcele'terrnet e'ñe name'ñeñoñ Cristo. Elloña ḡhochña pocte' peñch ḡpañña o'ch pemueroḡtapretna e'ñe peserrpare'teñoñ Cristo po'ñoñ tarro'mar Yompörpa' attoña ahuañmencat̃ peneḡ.

9 Ñeñtara ñeñt̃ o' a'queshḡaterrey, attoña o' ḡchore'terrey attoch yema'yoḡhra ñeñt̃ cohuentetsa Partsocop. Tarraña añmapa' ama añoteyaye atto e'ñe cohuen es yeḡa'yese't̃ ahuaḡ, añmapa' tarro'mar atet muenen ña. Yompörpa' nanac morrentye't̃ ñeñto'mar ama't ahuaḡoteñpa' ahuaḡ o'patatya Puechemer Cristo Jesús.

10 Ñeñt̃ huapatsa attoña te'pa' o' yeñoter atto nanac morrentya Pompor. Ñeñtara Puechemer Jesucristo ñeñt̃ Ya'queshḡatañer yepen, tarro'mar ñach ya'queshḡaterre' yerromñoñ attoch elloch yocrra'huerra, allempopa' amach alla ya'rromñañterre'te. Ñeñto'marña yoten te'ña yapa' o' a'huaññañperrey Cristo atto o'patye't̃ rromueñets. Te'pa' o' yeñoter tarro'mar atet yeḡchateney cohuen ñoñets ñeñt̃ huetsa Yompöreshoḡ.

11 Ñeñt̃ña añ cohuen ñoñetspa' ñeñteḡcop allsensareten attoch nach a'pote' allemeñ acheñeneshesho'mar ama't ñaña ñeñt̃ ama judioneshayaye, ñaña attoch nach yeḡchatyeshahuet ñeñtara añ ñoñets.

12 Ñeñto'marña te'pa' e'ñe neserrpare'teñoñ añ ñoñetspa' mueroçhtatennet, tarraña napa' ama nepenquëno tarro'mar napa' neñoteñ Yompor ñeñt neyemtenapa' nanac ahuaencañ. Ñeñto'marña neñoteñ e'ñe po'huamencotpa' o'ch cohuañp̄son ora all netorra'yese't ñocop ñeñt atet yechenna ama't tayoteñ esempohuañencha' huerra.

13 Papa' çhocmach poçtape'ch ñeñt atet o' neyçhatuanmañ, ñeñtara ñoñets ñeñt e'ñe paçharr cotapñats. Ñaña peparrocmateñoñ Cristo Jesúsapa' çhocmach p̄ame'ñya cohuen, ñaña çhocmach p̄a'mueraña.

14 Ñaña çhocmach peñota, amach p̄a'po'poñetatstoñe Yompor poçtapña ñeñt atet yechenpa Yompor. E'ñe po'huamencot Parets Puecamquëñ ñeñt yechetsa yeyoçhro ñepa'chña peyenpue'.

Atto puesheña'tetspa' a'ypo'ña'huaneret Pablo

15 Napa' o' notap̄ atet tarro'mar ama't p̄apa' peñoteñte' shonte' acheñ ñeñt yeçha'yetsa Asio'marpa' o' sohuannerrnet, atet ñerra'm Figelo ñaña Hermógenes.

16 Te'pa' aña çhocma nocshatene' Onesíforo tarro'mar ñapa' ama penquëno ama't napa' cárcelot'senen. Ñeñto'marña Yomporpa' a'natanepa' Onesíforo pamo'tsesha'.

17 Ahuañmo'cha allempo çhap Onesíforo arr Romopa' ñapa' nanac e'name'terren attot enterren.

18 Ama't p̄apa' nanac peñoteñ, ahuañmo'cha Efesopa' ñapa' nanac yenpa'y. Ñeñto'marña Yomporpa' muera'huerepa'ch esempohuañencha' huerra po'yoroçhenñoñ.

2

Ñeñtcha' atet yetorra e'ñe cohuen Jesucristocop

1 Nechemere Timoteo, e'ñe peparrocmateñoñ Cristo Jesúsapa' huomenquëpa'ch pepa' peyoçher tarro'mar ñapa' çhocmach yenpañ.

2 Allpon pe'mone't ñeñt atet neserrpare'tache't shonte' acheñenesha'pa' p̄apa'çho'ña te'pa' attecmaçh peyçhach po'poñeçhno ñeñt ame'ñetsa attoch ñetpa'çho'ña eñoçet yeçhatet allohuen pamo'tsesha'.

3 Ñaña o'ch notap̄ po'poñ. Papa' amach pem̄cha'tatsto attoch pemueroçhtapretya. Chochña poçte' peñch o'ch pemueroçhta atet ñerra'mrrate' çho peçllarena e'ñe cohuen Jesucristocop.

4 Ñato' o'ch netma'ntacha ñeñt atet pena solltarnesha'. Solltar ñeñt ejército'tsenpa' amach es cotape'cheno po'poñoneñ ñeñt atet pena ñeñt ama ejército'tseno. Añach pa'terr cotape'chen attoch coshatan ñeñt mandene'. Añ toma'ntena yapa'çho'ña añach pa'terr yoçtape'chen attoch yocshach Jesucristo ñeñt yeyeçhenaya yaña.

5 Ñato' o'ch netma'ntatererr po'poñ ñeñt atet pena ñeñt atarr juegoëtsa. Ñeñt atarr cohuen juegoëtsa çhocmach juegoënet e'ñe cohuen e'ñe atet anarettenet ñocpuet attoch e'ñe cohuen ganet. Ñerra'm ama e'ñe atet juegoëto e'ñe atet anarettenet ñocpuet, amach errotenoñ aparettoña ñeñtcha' coshatahuet ñeñtecop atarr juegoënet. Ñeñtpa' añ toma'ntena yapa'çho'ña ñerra'm amach atet yeperro ñeñt atet anaret Yompor po'ñoñ yocop, amach errotenoñ apuerrye ñeñtcha' nanac yocshaterre'.

6 O'ch netma'ntatererr po'poñ. Ñeñt nanac taruasets pa'mropa' ñapa' ñanomcha' rre' ñeñt nare'ten. Ñeñtpa' añ toma'ntena ñeñt nanac torretsa Yomporecop ñapa'çho'ña nanaccha' coshateñ po'taruas ñeñt atet torrena Yomporecop.

7 Ñehua, poçtape'ch ñeñt atet noteneñ tarro'mar Yepartsesharpa' çhapatonap̄cha' peyoçhro ora ñeñt atet toma'ntena añeçhno.

Añ poçte' çhocmach yeyerpueña Jesucristo

⁸ Amach pepsatsto atto Jesucristopa' tanterra allempo rroma, ñeñtara ñeñt po'mireneñ David, ñaña ñeñtara Cristo ñeñt chocma neserrpare'ten attoch yequeshperra.

⁹ Ñeñto'marña napa' attotña huanca'net atto te'pa' nanac nemueroçhtena atet ñerra'mrrate' amtsañen. Tarraña Yompor po'ñoñpa' amach errotentof huanqueto.

¹⁰ Ñeñto'marña napa' chocma na'huanten atto nemueroçhtena, allochñapa' ñerra'm erra'tsencha' acerr Yompor ñeñtcha' ame'ñerrayapa' queshperretcha' e'ñe pame'ñeñotet Cristo Jesús. Ñaña all Yompor po'cohuenñopa' correrretcha' errponohuañen.

¹¹ Añ ñoñets allo chocma ya'choteñ Yomporpa' e'ñe po'ñoçh atet:

Ñerra'm e'ñe yame'ñeñot Cristo yerromapa' yeycherrach parro epay Cristo.

¹² Ñaña ñerra'm cho yemueroçhtaprecha Cristopa' ya'mcha'tarettapreterach esempo-huañen. Tarraña ñerra'm cha ya'nasoteñapa', ñapa'cho'ña a'nasoterryach esempo-huañen.

¹³ Ama't allempo yapa' ama yeyemteño, tarraña po'ñoñ ñeñt atet otenpa' chocma po'ñoçh atet, tarro'mar amach errotentof alla a'po'poñeterrano ñañeña po'ñoñ.

Atto Yomporpa' e'ñech cohuen pa'taruasañer peny

¹⁴ O'ch alla noterrperr po'poñ: Chocmach peyerpacha acheñenesha' ñeñt atet o' notuap, ñaña o'ch potanet e'ñe Yompor po'huamencot amach allo'na otnare'tanna'tyesneneto e'ñe ñañeñeta poçta'ño'maret. Tarro'mar atto es otnare'tanna'tyenetpa' ama't mameshapa' ama es sherbeno. Ñerra'm attach penetpa' atteñapa' o'ch alla puerruerra allohuen acheñenesha' ñeñt e'mñotenahuet.

¹⁵ Tarraña papa' añcha'ña pema'yochra ñeñt cohuentetsa Yomporecop attoch ñapa' entap e'ñe cohuen ataruasañep. Amach eñalle ñeñtcha' pepencate' all petorra'yena ñocop. Attochña chocmach pesherbatoñ po'ñoñ ñeñt e'ñe po'ñoçh ama shequëñtsoyaye.

¹⁶ Ñaña papa' amach pa'na otnare'tatstahuet ñerra'm esempo es otnare'tanna'tyenet. Tarro'mar ñeñt atet serrpare'tatyenetpa' ama añeyaye alloch huomenc yepa' yeyocher Yomporecop. Ñaña ñeñt atet petsapa' atteñapa' o'ch allo'na senet puesuanmuet ñeñt atet yeçhateney Yompor.

¹⁷ Ñaña ñerra'm allo'nach yeçhatnenet ñeñt ama es sherbetsopa', atteñapa' ñerra'm o'chña epa'hua orapa' allo'nach senet puesuanmuet ñeñt atet muenen Yompor. Nato' o'ch netma'ntacha ñeñt atet pena atsnañets ñeñt otenet cáncer ñeñt pa' mamesha o'ch epa'hua ora yechtso o'ch muetsay. Ñeñt pa' atet pa' epsheña ñeñt pa'so'cheñ Himeneo ñaña Fileto, tarro'mar ñetpa' aña yeçhatenet po'poñ cota'pñats.

¹⁸ Ñetpa' atta aycha'natañeñañet Yompor po'ñoñ all oteney esempopa' yetanterrach. Ñetpa' ahuo't serrpare'tatyaset acheñenesha' atet: "All oteney Yompor attoch yetanterra esempopa' ñeñt pa' toma'nteñtsa. Ñeñt pa' aña toma'ntena atto yapataretta ahuaña oño." Ñeñto'marña patanta'tets ñeñt ame'ñetsapa' alla queçpa'hueret atto ame'ñeñet Yompor.

¹⁹ Ama't atet pañ patantarrpa' tarraña Yompor po'ñoçhpa' ama pueno po'ñoñ. Ama't Yompor po'ñoñ ñeñt aquellcaret ahuatoteñpa' atet eñotateney eñallach pate'tets acheñ ñeñt po'ñoçh ame'ñenaya. Ñeñt pa' atet oten: "Yomporpa' cheme'tenan ñeñt po'ñoçh ame'ñenaya." Añpa' arr eñotateney po'poñ Yompor po'ñoñ ñeñt aquellcaret ahuatoteñ, ñeñt pa' atet oten: "Allohueney ñeñtey cotene' Cristopa' yequeçpa'huerrepa' allohuen sosya'tsañ."

O'ch netma'ntacha ñeñt atet pena pocoll

²⁰⁻²¹ Po'ñoçhpa' choch yesuanom allohuen sosya'tsañ, allochñapa' attoch añach yema'yochra attoch yesherbe' e'ñe cohuen Yompor. Tarro'mar allohueney ñeñtey ame'ñetsapa' ama e'ñe attecmaye' yesherbeñe Yompor. Nato' puesheña'tetspa' nanaccha'

cohuen sherbeñet Yompor, ñato' po'potantañña' amach. Ñato' o'ch netma'ntacha ñeññ atet pena pocoll. Ñeññ acheñ ecñlayoretpa' arrña pa'paclopa' shonte'ch eñall pa'namen coymechno. Ñato' patantarrpa' ororro'ch ñato' po'potantañpa' asrerro'ch, ñato' po'potantañña' tsachrro'ch, ñato' po'potantañña' patsrro'ch. Tarraña allohuenpa' amach e'ñe attecma'ye' sherbenano pamo'mte'. Atet ñerra'm ñeññ ororro'pa' nanaccha' cochneshot sherbenano pamo'mte', tarraña atet ñerra'm patsrro'pa' amach tama cochneshote'ye' sherbenano pamo'mte'. Ñeñño'marña yapa'cho'ña ñerra'm yemneñ o'ch yesherbe' e'ñe cochneshot Yamo'mte' Cristopa' añ palltetsa choch ñanom yesuanom allohuen sosya'tsañ attoch añach yema'yo'chrena ñeññ cohuentetsa Yamo'mtayecop. Allochña' ama't erra'tsena es ye'pa'yenpa' e'ñech cohuenacma yocshateñ Yamo'mte' Cristo.

²² Ñeñño'marña p'apa' notene'p' o'ch pesuanom allohuen sosya'tsañ ñeññ atet muenatse'tyen huepaneshachno ñeññ ama po'ño'chaye' sherbenaye Yompor, allochña p'apa' añach pema'yo'chrena ñeññ cohuentetsa Yomporecop, ñaña choch pame'ña Yompor e'ñe peñmañesha', ñaña chocmach pemuerya allohuen pamo'tsesha'. Allochña' attoch peparrocmat epa'p' allohuen ñeññ e'ñe cohuen pueyo'cher pene' Yepartsesharecop.

²³ Ñaña ñerra'm esempo es otnare'tanna'tyenetpa' p'apa' amach pe'mñotatstaneto, tarro'mar ñeññ atet otatse'tyetspa' e'ñe orrena atet penet. Ama't p'apa' peñoteñ ñerra'm cho es yotnare'tanna'tapa' allot huena shonte' atsrre'mueñets.

²⁴ Tarro'mar ñeññ torretsa Yepartsesharecoppa' ama pocteyaye o'ch atta atsrre'mare'tyesa allemeñ. Elloña chochña ya'mueraña allohuenacop. Ñaña chochña yeychatyes e'ñe cohuen acheñenesha' ñeññ atet cohuen enten Yompor. Ñaña ama't ñetpa' erro' p'a'yetpa' yapa' e'ñe yemorrenteño'pa' o'ch ya'huantoñ.

²⁵ Ñaña añ pocte' o'ch alla yoctape'chater cohuen ñeññ ye'moñe'tene'. Tarraña e'ñech aco'pa yoctape'chatyerranet e'ñe cohuen. Ñaña o'ch yecuenanet e'ñe aco'pa esempohuañencha' chapamet pueyo'chro ñeññ e'ñe po'ño'ch cohuen enten Yompor. Ñaña o'ch yecuenanet esempohuañencha' cotape'cherret ello e'ñe cohuen Yomporecop.

²⁶ Ñerra'm atet ye'papa' ñato' atto'pa' o'ch a'rroyerranet oneñe' atto huanquënanet atto te'pa' p'a'yenet sosya'tsañ ñeññ atet muenatenanet ña.

3

Ñeññcha' atet perra esepoch mellapoterrmocha

¹ Ñehua, te'pa' o'ch neñotata'p' po'poñ ñeññcha' atet perra esepoch mellapoterrmocha. Allempopa' nanaccha' echarr attoch yoc'te' Cristo.

² Tarro'mar allempopa' atetcha' perra acheñenesha'. Allempo acheñpa' nanaccha' moparrareret, ñaña añach paterr cotape'chenet ñeññ atet muenenet e'ñe ñocpueta. Ñaña allempopa' nanaccha' ye'chapretenet quelle. Ñaña allempopa' nanaccha' ommo'chenet ñeññ echenet, atarrcha' cohuen entyerret e'ñe ñañeñeta, po'potantañña' amach esoye' asherben entyereto. Ñaña allempopa' nanaccha' achm'are'teret Yompor, ñaña allempopa' o'huañcha' ame'nyet ama't ñeññ pamo'mte' penet, ñaña ñetpa' amach es coshatenahueto ama't coñe'ta. Ñaña allempopa' nanaccha' tsena'teret allohuen ñeññ anaret Partsocop.

³ Ñaña allempopa' o'huañcha' esesha' mueranna'terrtsa, ñaña o'huañcha' muenet o'ch amo'tstanna'terret. Ñaña allempopa' nanaccha' toma'tam'psanna'tyerret ñaña allempopa' erro'tencho' muenetpa' atetcha' patse'tyenet, ñaña allempopa' nanaccha' muero'chtatanna'tyerret attoch nanac coshenet, ñaña nanaccha' tsena'terret ñeññ cohuentetsa.

4 Ñaña nanaccha' apomatatañterret, ñaña allempopa' amach es yepuer entyerreto, ñaña allempopa' e'ñech ñañeñeta nanac cohuen entetset, ñaña allempopa' ñañeñetach e'nenet alloch nanac coshenet, amachña a'ñeye' e'neneto atet muenen Yompor.

5 Ñaña allempopa' ama'tcha' ottenetañ ñerra'mrrate' ame'ñenetpa', tarraña amach po'ñoçhaye' ame'ñeneto. Tarro'mar ñetpa' amach po'ñoçhaye' mueneñeto o'ch çhapanet pueyoçhro ñeñt' cohuentetsa Yomporecop attoch huomenc pa'nmuet pueyoçher e'ñe po'ñoçh.

Ñeñt' atet acheñpa' amach pecua'psatsche.

6 Tarro'mar ñeñt' acheñ atetpa' attach mueneñ o'ch sheca'yesan acheñenesha'. Ñato' o'ch ahuanmuet po'ppauño'marpa' ñerra'm be'toset a'nahua pocollopa' añña coyane-shachno ñeñt' ama es eñotopa' o'ch atta ame'ñateñet e'ñe ñet poçta'pñet. Tarro'mar ñeñt' coyane-shachnopa' nanaccha' yorateñet po'chñar. Ñaña ñetpa' añach e'nenet pa'namen ñeñt'cha' coshatenahuet.

7 Ñeñto'marña añ coyane-shachnopa' pa'namencha' topatyenetañ coçta'pñats. Tarraña ama't ahua'tapa' amach erroteno't enterreto ñeñt' po'ñoçh Yompor poçta'pña.

8 Yacma ñeñt'cha' atet shequërre' acheñenesha'pa' ñeñt'pa' añña muenen o'ch epatare'tan añ coçta'pñats ñeñt' e'ñe po'ñoçh Yompor poçta'pña. Atet pa' ñaña ahua't Janes epuet Jambres ñeñt' muenatseñ o'ch epatare'tan Moisés. Ñeñt' yacma ñeñt' atet shequëne' acheñenesha'pa' amach coçape'chenano ñeñt' cohuentetsa ama't mamesha. Ñetpa' çhach a'po'poñetenet ñeñt' atet yame'ñena.

9 Tarraña ñet poçta'pñetpa' amach allohuenacmaye' anetso'mar epuerro tarro'mar esempopa' ñato' allohuen acheñenesha'pa' o'ch eñotuet ñeñt' atet otatse'tyenetpa' ñeñt'pa' shequënts'a. Ñato' atetcha' pa' atet pa' ahua't epsheña yacma ñeñt' muenatseñ o'ch epatare'taneñ Moisés.

Arrpa' all coçape'chatan e'ñe cohuen Timoteo

10 Tarraña pa'pa' ama atteye' pepeno. Tarro'mar pa'pa' añ poçta'nen ñeñt' atet nepena na. Ñaña pa'pa' peñotuennan ñeñt' atet neyçhatyen Yomporecop, ñaña ñeñt' atet nocrrena e'ñe cohuen Yomporecop, ñaña atto e'ñe patrra nema'yoçhrena ñeñt' cohuentetsa. Ñaña pa'pa' peñotueñ ñeñt' atet nanac neyemteña Yompor ñaña atto nanac na'huanten allohuen ñeñt' echarr nentyen, ñaña atto nanac nemorrenteña allohuen acheñenesha', ñaña atto ama't nemueroçhteño'tpa' çhocma nocteñ Cristo.

11 Ñaña peñotueñ atto pue'moñe'teño'tetanpa' çhocma coçtare'tnete't atto mueroçhtatyenesnete't. Ñaña ama't pa'pa' peñotueñ ñeñt' atet mueroçhtatyenesnet a'yo anetso ñeñt' pa'so'cheñ Antioquíó, ñaña Iconio, allotpa' ñaña Listro. Tarraña ama't atet pa'yesnete'tpa' Yomporña'pa' çhocma a'qeshp'atyenesne't allot.

12 Ñehua, yapa' yeñoteñ erra'tsencha' muenats o'ch coçan e'ñe cohuen Cristo Jesús'pa' çhocmach mueroçhtatanet ñeñt' e'moñe'tenahuet.

13 Tarraña ñeñt' ama cohuenayaye acheñpa' allo'nach senet pa'tse'tnomuet sosya'tsañ. Ñaña ñeñt' atta sheca'yetspa' allo'nach senet shecanna'tatset.

14 Tarraña pa'pa' çhocmach poçtape'ch ñeñt' atet ayçhatarete'p, ñeñt'ara ñeñt' ama't pa'pa' o' peñoter ñeñt' e'ñe po'ñoçh cohuen coçta'pñats. Tarro'mar pa'pa' peyemtenya ñeñt'ey peyçhate' ahua'toteñ.

15 Ñaña pa'pa' e'ñe cheshoteñ ayçhatarete'p Parets po'ñoñ ñeñt'ara añ ñoñets ñeñt' peñotaterre' atto e'ñe yame'ñeño'ta Cristo Jesús'pa' o'ch yeqeshperra.

16 Allohuen Yompor po'ñoñ ñeñt' aquellcare'tpa' e'ñe Partseshotecma anaret. Ñeñto'mar añ ñoñets'pa' nanac sherben ñeñt'cha' yeyçhate' ñeñt' atet muenen Yompor,

ñaña ñeñtcha' alla yocape'chaterre' cohuen ñerra'm esempo es yepanten, ñaña ñeñtcha' yeñotatene' e'ñe cohuen ñeñt atet pochtetsa Yomporecop.

¹⁷ Allochñapa' attoch ñeñtey o' puechemer perrey Yomporpa' e'ñech yeñotuen allohuen ñeñt cohuentetsa Yomporecop, ñaña attoch huomenc yeña' yeyocher allohuenacop ñeñt cohuentetsa Yomporecop.

4

Añ pocte' chocmach yeserrpare'toñ Yompor po'ñoñ ama't erroteno'tsenya

¹⁻² Te'pa' o'ch alla noterrperr ñeñtcha' atet peña: Chocmach peserrpare'toñ Yompor po'ñoñ ama't esempo erroteno'tsenya. Tarro'mar Yomporpa' enteney epuet Puechemer Jesucristo, ñeñtara ñeñt Yepartseshar yepen, ñaña ñeñtarach huerrtsa ama't esempohuañen, ñaña ñeñtarach añcha'taretetuerrtsa esempohuañen, ñeñtcha' acrerre' allohuen acheñenesha' ñeñt e'ñe cohuenare', ñaña ama't ñeñt ama cohuenayaye. Atetcha' pan allohuen ñeñt corretsmeñ allempo, ñaña ama't ñeñt o' colla'huena. Ñaña te' papa' o'ch peñotatyeshacheñenesha' ñerra'm esempo ñetpa' ama pocteye' es peneto. Pañapa' pach otyesahuet amach atet yeñatsto, allotpa' o'ch pöcrape'chatyerranet e'ñe peñmañesha'. Ñaña chocmach peychatyesanet ñeñt pochtetsa Yomporecop.

³ Tarro'mar esempohuañenpa' chapcha' allempo acheñenesha'pa' o'huañcha' muenet o'ch ame'ñet ñeñt e'ñe pacharr coñapñats, ñeñt atet yechateney Yompor po'ñoñ. Allempopa' añach e'nyerret erra'tsente' serrpare'tene' coñapñatser ñeñt e'ñe cohuen entenet ñet attotcha'ña atonterraña ñeñtcha' yechaterrahuet ñeñt e'ñe ñet poñapñet.

⁴ Allempopa' amach esesha' muenerraye o'ch e'mñotet coñapñats ñeñt e'ñe po'ñoñch. Atteñapa' o'ch añe e'ñe coñape'cherret ñeñt e'ñe ñet pueserrparñet.

⁵ Tarraña papa' añach paterr pöcrape'ch ñeñt cohuentetsa Yomporecop, ñaña chocmach pa'huanta' ñerra'm huaponaña muerochteñets, ñaña añach paterr pema'yochra serrpare'tatysets cohuen ñoñets alloch yequeshperra. Ñaña chocmach peñorra ñeñt atet petaruas apañ Yompor.

Allempo o' muetsamochet Pablo

⁶ Napa' amach erroñ nepere'te tarro'mar o' chapmoch allempoch na'mtsaretta Yomporecop. Te'pa' neñotena napa' o' muetsamochnet.

⁷ Tarraña napa' o' epaye' netorra'nma Yomporecop atet ñerra'mrrate' cho neçllarena Yomporecop. Ñaña napa' o' netsotua ora ñeñt atet oterren Yompor. Ñato' o'ch netma'ntacha ñeñt atet nepena: Ñerra'm cho erra yesechapa' chocmach yechap all yesechena. Ñaña napa' ama't mameshapa' ama nequechpue'te atto name'ñeña Yompor.

⁸ Te'ña napa' añe necuen esempoch nagap ñeñt o'patatenna Yompor ñeñtcha' nanac nocshaterre', tarro'mar napa' añ neña'yese't ñeñt atet muene't Yompor. Neñto'marña te' esempoch huerra Yepartseshar Cristopa' allempo napa' aphuerrencha' ñeñt o'patatenna. Tarraña amach napta aphuerrno ñeñt o'patatenya. Añe'nachña aphuerr ñaña allohuen ñeñt chocma cohume'tene' te' Cristo o'ch huerra. Neñtara Yepartseshar Cristo ñeñtcha' yeñotaterre' ñeñt po'ñoñch atet yeña'yena te'.

Arrpa' all otyesan Timoteo ñeñt atet aparettena

⁹ Te'pa' o'ch notap ñaña ñerra'm erroteno'tpa' o'te' pon arr tayecma.

¹⁰ Tarro'mar arr masheñ Demaspa' o' a'ypo'ña'nerren arr napuet, ñapa' o' ahuerr Tesalónico, tarro'mar ñapa' añe nanac morrentena ñeñt patso'marecpa. Añpa'cho'ña masheñ Crescentepa' o' ahuo' ñaña Galacio. Ñaña masheñ Titopa' o' ahuo' anetso Dalmacio.

¹¹ Te' arrpa' añã arro'tsen masheñ Lucas. Ñãña o'ch pã'sech masheñ Marcos ñeñtcha' epaṣṣ ṣon arr, tarro'mar ñato' ñapa' o'ch yenpa'n arr.

¹² Masheñ Tíquicopa' o' nemñe a'yo anetso Efeso.

¹³ Ñãña o'ch notaṣ ñerra'm ṣoncha' arrpa' ṣanmoncha' necapa ñeñt nena'nom Troaso e'ñe Carpo pa'paclo. Ñãña ṣanmoncha' allohuen nelibročno, ñãña nepaṣllečno. Ñeñtara añ nepaṣllechnopa' ñeñt nanac nemnen.

¹⁴ Alejandro ñeñt po'taruas pene' asrečnopa' ñapa' atta nanac a'metare'tamṣsen. Tarraña Yomporpa' tsa'taterach ñeñt atet ṣa'n.

¹⁵ Ñeñto'mar ṣapa' e'ñech peñota ñocop, tarro'mar ñapa' nanac epatare'tenan Yompor po'ñoñ ñeñt atet yeserrpare'ten.

¹⁶ Ñãña o'ch notaṣ. Ama't ahuañmo'cha allempo ñanom na'pocstat neñoñ añcha'tareteshopa' ama't puesheñarrapa' ama esesha' neñosapretaye. Elloña ñeñtapa' cha a'ypo'ña'huanet. Tarraña ama't atet ṣa'netaña' napa' ama nemno Yomporpa' o'ch tsa'taterranet.

¹⁷ Tarraña Yepartseshar Cristopa' ama a'ypo'ña'no, elloña nanac ahuañmencaṣ ṣa'n. Ñeñto'marña o' alla neserrpare'terrerr Yompor po'ñoñ attoch e'mare'ch allohuen acheñenesha' ama't ñeñt ama judioneshayaye ñeñt alloch yequeshperra. Atto nequeshperra allempo all atarr amuerochtatare'ten, napa' atet nenteñ ñerra'mrrate' Yepartse-sharpa' o' a'queshṣaterren e'ñe ma'yarr puenamoṣ.

¹⁸ Ñeñto'marña te'pa' neñoteñ Yepartsesharpa' chocmach a'queshṣaterren arroṣ all ama cohuenayaye, ñãña napa' neñoteñ chocmach cohuañpenen, attochña chapaterren all añcha'tare'tena ña pue'ntaño. Ñeñto'marña chocmuepa'ch ya'ye'chochtatoñ erponohuañen. Ñeñtṣa' attetepa'ch.

Arrpa' all huomñcha'tyesnerranet po'cartoṣ

¹⁹ Ñãña añ necartoṣpa' nemneñ o'ch nehuomñcha'ch noçh Prisca epuet puerrollar Aquila, ñãña o'ch nehuomñcha'ch Onesíforo pamo'tsesha'.

²⁰ Ñãña masheñ Erastopa' alla a'pa anetso Corinto, ñãña masheñ Trófimopa' alla nesa'neñ patsnañoṣ Mileto.

²¹ Ñãña ṣapa' ñerra'm errotenoṣpa' chocmate' pehuapa allempo ama huapuena'. Ñãña añ necartoṣpa' mueneñ o'ch huomñcha'taṣ masheñ Eubulo, ñãña Pudente, alloṣpa' ñãña Lino, ñãña noçh Claudia ñãña allohuen masheñeshachno ñeñtey ame'ñetsa arr Romo.

²² E'ñe allohuanenpa' o'ch notaṣ, Yepartseshar Jesucristopa' chocmuepa'chña e'ñe parro'tseneṣ. Ñãña Yomporpa'ch sa'natenaya allohuenes. Ñeñtṣa' attetepa'ch Nom-pore. Allohua.

Pablo

AÑ SAN PABLO PO' CARTA ÑEÑT QUELLCAN TITO TITO

Atto Pablopa' quellcan carta Titocop

1-4 Masheñe Tito ñeñteḡ e'ñe parro yame'ñeñoḡ e'ñe atet nenteneḡ ñerra'mrrate' e'ñe nechemer nepeneḡ, na Pablon pequellquene'ña añ carta ñeñten nanac torretsa Yomporecop. Ñaña napa' ñeñten Jesucristo puellsensaren. Ñapa' atto llesenserren attoch nach ame'ñaterre'ña allohuen acheñenesha' ñeñt acre't Yompore ahuatoteñ attochña ñetpa' o'ch ame'ñeret. Ñaña añecop llesensa'n attoch nach eñotaterrahuet ñeñt e'ñe po'ñoḡ atet poctetsa Partsocop, ñaña nach eñotaterrahuet e'ñe yeyemteñoḡ ña yañapa' corretsayach yocsheñeshocmañen tayoteñ e'ñe errponañohuen. Tarro'mar ñeñtpa' atet oteneḡ Yompore ama't ahuatoteñ ñeñtcha' atet ḡonay, ñaña yapa' yeñoteñ Yomporepa' ama puenesho po'ñoñ. Ñeñto'marña te'pa' o' cherr allempo e'ñe pocte' enteñ ña o'ch eñotaterrey ña po'cohuenña. Ñeñto'marña napa' o' llesenserren Yompore ñeñt Ya'queshpatañer yepen, nach serrpare'terre' po'ñoñ ñeñt atet oteneḡ. Te'pa' e'ñe nehuomcha'teñoteḡpa' o'ch notaḡ: Yomporepa'chña pebensare'tamḡpene' ñeñt atarr Parets epuet Puechemer Jesucristo ñeñt Yepartseshar yepen ñeñtara Ya'queshpatañer yepen. Ñetepa'chña pemuerenaya. Ñetepa'chña ḡocshatene' e'ñe ḡa peyoḡhro.

Ñeñt po'taruas ḡa' Tito Yomporecop all anetso Creto

⁵ Te'pa' o'ch notaḡ, napa' atto nena'nmaḡ ahuaña Creto attoch ḡach a'poctatyese' ñeñt pallta'yetsa, ñaña ḡach acra'yese' puesheña'tets ñeñtcha' pena'yese allemeñ anetso'mar ñeñtcha' pompornesha' ḡa'yese ñeñt ame'ñetsa. Añmapa' ñeñtña atet notnomueḡ ahuañmo'cha.

⁶ Ñeñtcha' pompornesha' ḡa'yeseḡpa' añcha' pena'yese acheñ ñeñt e'ñe cohuenare' es ḡa'yets, ñeñt amach eñalle attoch tanmare'teña acheñenesha'. Ñaña ñeñtcha' pompornesha' ḡa'yeseḡpa' añcha' pena'yese erra'tsente' penten e'ñe patrre puetapor pen (ñerra'm ataporet), ñaña erra'tsente' penten ama't puechemereshapa' e'ñech ame'ña'huenet, ñaña puechemereshetpa' amach atteye' enteñe acheñenesha' atet ḡa'yena po'poñeḡno acheñenesha' ñeñt atta coshatse'tyenet, ñaña ñeñt ama atpare'tetso puechemereshapa'.

⁷ Tarro'mar ñeñtcha' pa'mcha'tareter ḡa' ñeñt ame'ñetsapa' añcha' pena'yese acheñ ñeñt e'ñe cohuenare' es ḡa'yets, ñeñt amach eñalle attoch tanmare'teña acheñenesha', tarro'mar ñapa' anareḡ ñach a'poctatyene' pa'namen ñeñt poctetsa Yomporecop. Ñaña ñeñtcha' pa'mcha'tareter ḡa'yese ñeñt ame'ñetsapa' amach añeyaye acheñer ñeñt añach pocte' enten o'ch ḡhocma ḡatanet ñeñt atet muenen e'ñe ña, ñaña amach ḡha at-srre'moḡchen entueno, ñaña ñeñt ama posa'tare'tetso, ñaña ñeñt amach orroñaḡeyaye, ñaña ñeñt ama nanac ye'chapretetso quelle ñeñt apencoḡhenoḡ o'ch gana.

⁸ Añña e'ñe pocte' o'ch añcha'tareḡta ñeñt e'ñe cohuen aguene' acheñenesha' pa'paclo, ñaña ñeñt nanac muenene' o'ch e'ñe cohuenare' es ḡa'yese, ñaña ñeñt e'ñe eñotene' ñeñt cohuentetsa, ñaña ñeñt e'ñe pocte' es ḡa'yets acheñenesha'cop ñaña Partsocop, ñaña ñeñt e'ñech puetpara es ḡa'yen.

⁹ Ñaña ñeñtcha' pa'mcha'tareter ḡa'yese ñeñt ame'ñetsapa' e'ñech yemtenana poctacma añ ñoñets ñeñt e'ñe po'ñoḡ Yompore po'ñoñ ñeñt atet yeḡhateñet. Allochñapa' ñapa'ḡho'ña e'ñech attecma yeḡhatan ñaña po'potantañeḡno ñeñt e'ñe paḡharr cotapñats, ñaña ñeñt eñotene' attoch anapuenan e'ñe cohuenacma ñeñt achmāre'tene' Yompore po'ñoñ attoch ñetpa' amach erroḡtenoḡ anapeto.

¹⁰ Tarro'mar eñall shonte' ñeñt atpare'tets, ñaña ñeñt e'ñe orrena otatse'tyets, ñaña ñeñt shecare'tyets. Po'ñoçh ñeñtpa' atet pena shonte' judionesha'.

¹¹ Ñeñto'marña añ palltetsa o'huañcha' yeçhatyenet po'poñe'ttsocma coṭapñats. Tarro'mar ñetpa' atta nanac moññe'tateñet acheñenesha' poṭapña; ama puesheña'ttsayaya atet petso ama't allohuen ñeñt parro yeçha'yenet. Ñetpa'cho'ña añña yeçhatenet ñeñt ama pocteyaye. Ñaña añeçpa yeçhatenet attoch ganet quelle, tarraña ñeñtpa' apencoçhena.

Ñeñt atet pena creto'marnesha'

¹² Puesheñarr creto'marnesha' ñeñt nanac etsotene' e'ñe ñañeñeta poṭapñetpa' ñeñtña acheñer ama pocteye' entenano pamo'tsesha' ñeñto'marña atet oten pamo'tseshacop: "Allohuen namo'ts creto'marnesha'pa' ñetpa' çhocma nanac toma'tampeñet pamo'tsesha', ñaña ñetpa' nanac atsrre'mñañet e'ñe attet ñerra'mrrate' berr ñeñt nanac bellac, ñaña nanac quellañtsareret, atarr araquët ama ayetñañeto."

¹³ Ñeñt atet a'metampenan pamo'ts ñeñtpa' e'ñe po'ñoçh atet. Ñeñto'marña o'ch notaṭ, te'pa' paçh otahuet, "te'pa' amach allo'na atet seṭanna'tnenno." Allochñapa' attoch allo'na ame'ña'nmueta añ coṭapñats ñeñt e'ñe paçharr,

¹⁴ ñaña allochñapa' amach allo'na e'mñotneññañeto ñeñt pueserrparña pe't ahuatnaneshañ judionesha', ñaña allochñapa' amach allo'na e'mñotneñe acheñenesha' ñeñt atet yeçhatyenenet ñeñtcha' atet pet, tarro'mar ñetpa' çhach atpare'tenet ñoñets ñeñt e'ñe po'ñoçh Yompor po'ñoñ.

¹⁵ Ñaña o'ch señoçh: Ñeñt acheñer e'ñe cohuenare' es coṭape'chen pueyoçhro Yomporecoppa' ñocoppa' ama es eñalle attoch sosey enteñ Parets. Tarraña ñeñt nanac sosey coṭape'çhets pueyoçhro ñaña ñeñt ama ame'ñetsopa' ñocoppa' ama eñalle ñeñt cohuen enten ña. Tarro'mar poṭapñetpa' atarr sosey. Ñeñto'marña ñetpa' amach çhapaneto pueyoçhro ama't esempo o' pohuet ñeñt ama pocteye' enteno Yompor.

¹⁶ Ñeñt atet acheñpa' ama't otenetañ eñoteñeto' Yomporpa' tarraña ñeñt atet pa'tse'tyenetpa' yeñoteñ ñeñtpa' ama atteyaye. Ñeñt Yomporpa' ama pocteye' entapre-tenaneto, tarro'mar ñetpa' ama es otapahueto, ñaña ñetpa' ama es sherbeneto ama't mamesha.

2

Ñeñt e'ñe paçharr coṭapñats Yomporecop

¹ Tarraña pōcoppa' añña poctetsa o'ch peyçhateñ acheñenesha' ñeñt e'ñe paçharr coṭapñats Yomporecop.

² Ñaña ñeñt po'nmeneshaçhno yacmapa' o'ch peyçhatanet atet: Amach orrare'tatsteto attoch çhocma coṭape'çhenet e'ñe cohuen, allochñapa' pamo'tsesha'pa' añcha'na'tpo'ch enteñ, ñaña attoch nanac eñotenet ñeñtcha' atet pa'yaset ñeñt cohuentetsa Yomporecop. Ñaña o'ch pōtanet e'ñe cohuenacma, ame'ñetepa' ñeñt e'ñe paçharr coṭapñats Yomporecop, ñaña morrentanna'tetepa' ñaña ahuantahuetepa'ch allohuen topateñets.

³ Attecmach peyçhach ñaña po'nmeneshaçhno coyanesha' ñetpa' añepa'ch ortatyenet ñeñt e'ñe pocte' enten Parets ñaña ama't allohuen acheñenesha'. Amachña çhaña atomañeñteneto, ñaña ñetpa'cho'ña amach orrare'tatsteto. Añña pocte' o'ch yeçhachet pacmanesha' ñeñt cohuen enten Yompor.

⁴ Ñetpa' yeçhachetepa' pacmaneshaçhno ñeñt shopshare' ñeñt o' some'tua allochñapa' attoch e'ñe cohuen mueryet puerrollaret, ñaña attoch e'ñe cohuen mueryet puechoy-oreshet,

⁵ ñaña attoch ñetpa' eñotenet nanac ñeñtcha' atet pa'yeset ñeñt poctetsa ñaña attoch muechettenet, ñaña attoch amach muenme'cheneto ñeñt po'taruas penet pa'paclette, ñaña e'ñech amuerañtenet, ñaña e'ñech ame'ñeñet puerrollaret. Allochñapa' e'ñe ñeshotetpa' amach errotenot acheñenesha'pa' achmāre'toñeto Yompōr po'ñoñ.

⁶ Attecmach peychach ñaña yacmanesha' ñeñt huepaneshameñ attoch ñetpa'cho'ña o'ch eñochet ñeñtcha' atet pa'yeset ñeñt poctetsa.

⁷ Papa'cho'ña e'ñech cohuenare' es pepa'yes pama, allochñapa' attoch entap̄ acheñenesha' ñeñt cohuen enten Yompōr. Ñaña allpon peychatenanetpa' e'ñepa'chña pa'charr peychatenanet, amachña cha muene' peyellsheñoña peychatenaneto attoch añcha'na'tpo' entoñet Yompōr po'ñoñ.

⁸ Tarro'mar e'ñe peychateñoñ Yompōr po'ñoñ ñeñt e'ñe pa'charrpa' amach errotenot ama't eseshapa' oto añpa' ama atteyaye. Ñaña ama't ñeñt pe'moñe'tyene' ñerra'm e'ñe peychateñoñ e'ñe cohuenpa' allempoña ñetpa' o'ch penquēt, tarro'mar e'ñe peychateñoñ cohuen pa'charr. Allempoña ñetpa' amach errotenot alla sasare'terrpeterro.

⁹ Ñaña e'ñech cohuen poctape'chatyes acheñenesha' ñeñt ataruasatarettetsa e'ñe atta. O'ch potanet ame'ñyetepa' e'ñe cohuen ñeñt po'patronar penet. Ñaña añ pocte' allpon muenenet po'patronaretpa' e'ñepa'chña ame'ña'hueñet, allochñapa' attoch coshateñet po'patronar. Amachña cha anapare'teñeto.

¹⁰ Ñaña amachña cha etyeneto attoch po'patronaretpa' e'ñech yemtenanet poctacma. Allochñapa' e'ñe pame'ñeñoñet cohuen po'patronaretpa' añña acheñenesha'pa' e'ñech cohuen entapretenet Yompōr pocta'p̄ña, ñeñtara ñeñt Ya'queshpatañer yepen.

Atto Yompōrpa' orrtatan puemuereña allohuenacpay

¹¹ Yompōrpa' orrtaterrnay pomuereña e'ñe allohuenacpay pa'namen acheñenesha'cop attoch yequeshperra.

¹² Ñaña ñeñt ama cohuen enteno Yompōrpa' añ pocte' o'ch ya'ypo'ña'huer, ñaña ñeñt allpon yemnatse'tyen arr patsropa' añ pocte' ñaña o'ch ya'ypo'ña'huer, tarro'mar puemorrenteñoñ Yompōrpa' ñeñto'mar ye'chatey atet. Añña pocte' ama't añe patsropa' o'ch yepena ñeñt cohuentetsa, ñaña o'ch yepena ñeñt atet pocte' enten Yompōr, ñaña ñeñt atet muenen o'ch yetsotoñ.

¹³ Añpa' attoch yecuame'teñ e'ñe yocsheñesha' esempohuañencha' huerra po'cohuenño Jesucristo ñeñt nanac Parets ñeñt Ya'queshpatañer yepen.

¹⁴ Tarro'mar ñapa' ña pocte' ente' o'ch rroma yocop attoch o'huañcha' allo'na ye'patse'tnena sosya'tsañ. Ñaña ñapa' attoña e'shohuerrnay allohuen ñeñt ama pocteyaye. Allochñapa' attoch pueyochresha' perrey, ñaña attoch yapa' yema'yo'chrena ñeñt cohuentetsa.

¹⁵ Allohuen ñeñt atet o' notuap̄ papa' ñeñtcha'ña peychatyesanet. Ñaña o'ch poctape'chatyesanet e'ñe cohuen, ñaña ñerra'm pa'yenet ñeñt ama pocteyayepa' o'ch potanet, amach patsteto atet, tarro'mar papa' ñeñtecop anarete'p̄. Ñaña ñeñt ama pocteyayepa' amach atet pe'patsto, te't acheñenesha'pa' amate' acua'psenaye' entenpeto.

3

Ñeñt atet poctetsa allohuenacop ñeñtey ame'ñetsa

¹ Ñaña o'ch peyerpacha acheñenesha' añ pocte' o'ch ame'ñeñet ñeñt nenet nanac añcha'taret, ñaña allohuen po'psheññe'chno ñeñt añcha'taretetyetsapa' añ poctetsa o'ch ame'ñeñet. Ñaña añepa'chña pocsheñesha' chocma torra'yenet erra'tsente' cohuen enten acheñenesha'.

² Ñaña o'ch peyerpatanet amach allo'na sasare'tneñeto ama't puesheñarra, ñaña e'ñepa'chña cohuen entannenet, ñaña e'ñepa'ch acoḡa es penet po'psheññecop ñaña e'ñepa'ch cohuen amuerañtenet allohuenacop.

³ Ñeñtpa' e'ñe pocte' atetcha' ḡannenet tarro'mar yapa'cho'ña yeñoteñ ahuaḡpa' aña yeḡatse'tyese't ñeñt ama pocteyaye. Yapa'cho'ña attach ama es yepche'te allempo nanac yeḡatse'tyese't sosya'tsañ. Ñaña nanac yatpare'te't ahuaḡ, ñaña aña yechatyesyete't ñeñt ama po'ñochoyaye coḡañats. Yechetspa' aña nanac muenatse'tatyete't ñeñt ama cohuenayaye ñaña allempopa' aña nanac yocshe't pa'namen sosya'tsañechno. Ñaña allempopa' nanac atsrre'moçhen yentanna'tyese't ñaña nanac es yeye'chapretanna'tyese't. Ñaña allempopa' ñerra'm esesha' ye'moñe'te'pa' yapa'cho'ña o'chcho' ye'moñe'chcho' yaña.

⁴ Tarraña allempoña Yomporpa' eñotatay e'ñe ña puemuereñoḡpa' mueneñ o'ch yenpa'y, e'ñe allempocma yapa' attotña a'queshpaterrey, ñeñto'marña Yomporpa' ñeñt Ya'queshpatañer yepen.

⁵ Ñeñtpa' ama añoḡeyaye atto e'ñe cohuen es yeḡa'yen, añña e'ñe puemuereñoḡeya ñapa' a'queshpaterrey. Attoña e'shohuerrnayña yo'chñar attochña ellopa' o'ch yoctape'cherr e'ñe cohuen etserra ñocop, ñaña Puecamquëñoḡpa' o' e'ñe etserraterrnay yoctañña.

⁶ Ñeñto'marña Puechemer Jesucristopa' attoña a'poctatuonay yocop attoch Pomporpa' chorraterrya Puecamquëñ e'ñe poctacma. Jesucristopa' ñeñtña Ya'queshpatañer yepen.

⁷ Ñeñto'marña te'pa' yeñoteñ e'ñe puemuereñoḡey Yomporpa' o' pocte' entuerrey allohueney, ñeñto'marña te'pa' e'ñe yeyemteñoḡ chocma yecuame'ten ñeñt o'patatenya, ñeñtpa' attochña yapa' corretsayach yocsheñeshocmañen tayoteñ e'ñe errponañohuen.

⁸ Ñeñt atet notenpa' e'ñe po'ñoçh. Ñeñto'marña napa' atarr nemneñ o'ch ḡoctape'chatanet e'ñe huomenco atet, allochñapa' ñeñt ame'ñenaya Yomporpa' e'ñech aña ma'yoçhrenet o'ch penet ñeñt cohuen enten ña. Ñeñt o' notuapa' ñeñtña cohuentetsa ñaña ñeñtña nanac sherbets allohuenacop.

⁹ Ñaña o'ch notaḡ, amach ḡa'na anapare'tatstahueto ñerra'm esempo anapare'tanna'tyena acheñenesha' e'ñe ñet poctañño'maret. Ñaña amach ḡa'na anapare'tatstahueto ñerra'm esempo anapare'tanna'tyenet atet ḡa'yesete't pa'tañneshañet. Ñaña amach ḡa'na otnare'tatstahueto ñerra'm esempo pueserrpaññoḡtpa' es otnare'tanna'tyenet. Ñaña amach ḡa'na anapare'tatstahueto ñerra'm esempo anapare'tanna'tyenet e'ñe Moisés po'ñoño'mar. Tarro'mar atto yanapare'tannenapa' ñeñtpa' ama es sherbeno, ñaña ñeñtpa' e'ñe orrena.

¹⁰ Ñaña ñerra'm esesha' ñeñt muenets o'ch atta e'moñe'tatyesan acheñenesha'pa' ñeñtpa' atetcha' pepe', o'ch peñotach atetpa' ama aḡapahuo. Ñerra'm ama huenano ñeñt atet penapa' ñato' o'ch alla ḡotererr po'pocheño. Ñerra'm allempoña ama huenererroḡpa' añ pocte' o'ch sa'ypo'ñe'.

¹¹ Tarro'mar ñeñt atet acheñpa' yeñoteñ ñeñtpa' po'chñaroḡcha' nanac es panten. Ama't ñapa' eñoteñeñ ñeñt atet pena ñeñtpa' ochña'teñets.

¹² Ñehua, o'ch noterrperr po'poñ. Ñerra'm esempoch çhap pesho masheñ Artemas amapa' masheñ Tíquico ñeñtcha' nemña peshopa' ñerra'm errotenoḡpa' chocmate' ḡon, o'ch peçhap Nicópoliso, tarro'mar napa' noctape'cheñ ñato' allcha' nechara'perra.

¹³ Ñaña çhocmach peyenpue' masheñ Zenas ñaña masheñ Apolos attoch ñetpa' çhapuet all sechenet, ñaña attoch amach es pallteto. Zenaspa' ñeñt nanac etsotene' ñoñets ñeñt atet anaret.

¹⁴ Allochñapa' ñeññ parro yame'ñena allpa' añ pocte' o'ch pa'yenet ñamet ñeññ atet cohuenteyetsa, ñaña attoch ñetpa' yenpueñet ñaña ñeññ nanac es paltetsa. Allochñapa' ñetpa'cho'ña o'ch sherbeñet pamo'ts.

Arrpa' all huomcha'tyesnerranet po'cartot

¹⁵ Allohuenet ñeññ parro'tsenenpa' mueneñet o'ch huomcha'tapet ñamet añ necar-toť. Ñaña o'ch pehuomcha'ch allohuen ñeññ pame'ñeñoťetpa' chocma morrentenyet. Yomporepa'chña sa'nataya allohuenes. Te'pa' ñeññach notař, ñeññpa' attetepa'ch Nompore. Allohua.

Pablo

AÑ SAN PABLO PO' CARTA ÑEÑT̃ QUELLCAN FILEMÓN FILEMÓN

Atto Pablopa' quellcan carta Filemónacop

¹ O'ch masheñe Filemóna nequellconap̃ añ carta, na Pablon epan masheñ Timoteo. Napa' o' yottam̃pennet e'ñe neserrpare'teñoñ Cristo Jesús po'ñoñ. Te'pa' o'ch masheñe yehuom̃cha'tap̃ pa ñeñteṽ atarr yemorrentena ñeñteṽ atarr yetorrapretenaya Yomporecop.

² O'ch yehuom̃cha'teñ ñaña allohuen ñeñt̃ pame'ñeñoṽet̃ chocma apchenet pepaclo. Ñaña o'ch yehuom̃cha'teñ yoṽh Apia ñaña masheñ Arquipo ñeñt̃ nanac yetorrapretenaya ñaña Yomporecop.

³ E'ñe nehuom̃cha'teñoñes sapa' napa' o'ch notas: Yomporepa'ch sebensare'tam̃pene' ñeñt̃ara Parets epuet Puechemer Jesucristo ñeñt̃ Yepartseshar yepen. Ñetepa'chña socshatene' e'ñe sa seyoṽhro allohuenes.

Atto Filemón e'ñe pame'ñeñoṽan Cristo atarr morrentenana allohuen ñeñt̃ ame'ñetsa

⁴⁻⁵ Ñaña te'pa' o'ch notap̃ masheñe. Napa' atet̃ ne'mare'teneṽ pa' napa' nanac peyemteña Yepartseshar Jesús ñaña atarro' pemorrenteña allohuen Yomporecop pueyochreshachno. Ñeñt̃o'marña na atet̃ ne'mare'teneṽpa' chocma neparasयोso'teñ Yomporecop allempo nema'yocham̃penṽa.

⁶ Ñaña o'ch notap̃, añ nenamueñ Yomporecop p̃ocop, ñeñt̃ allpon p̃ame'ñatena e'ñe pame'ñeñoñ Yomporecop, ñetpa'cho'ña chapanetepa'ña pueyoṽhreto atto nanac shonte' e'ñe cohuen bensare'tam̃peney Yomporecop e'ñe yame'ñeñoñ Puechemer ñeñt̃ Cristo Jesús.

⁷ Ñehua, masheñe atarr nocshena atto pa'pa' atarr pemorrenteña allohuen ñeñt̃ pueyochresha' pen Parets. Atto atarr pemuerenanetpa' ñeñt̃o'marña na'ñaña atarr p̃ocshaten neyoṽhrohuen.

Atto Pablopa' otenan Filemón e'ñech cohuen aguërran pa'taruasañer Onésimo

⁸ Ñeñt̃o'marña te'pa' o'ch noterrperr po'poñ: Napa' ñeñten Cristo puellsensaren ñeñt̃o'marña p̃ocoppa' e'ñe poctet̃ o'te' atet̃ notapeñ e'ñe ne'mueñoṽcma ñeñt̃ poctetsa atet̃cha' peṽa.

⁹ Tarraña neñoteneṽ pa'pa' atarr amuerañaṽ ñeñt̃o'marña te'pa' o'ch notap̃ e'ñe pa' pemuereñoñ atet̃ñaca'yeña peṽa. Ñehua, na Pablon ñeñten atet̃ p̃otene' napa' po'nm̃ota o' yottam̃pennet e'ñe neserrpare'teñoña Cristo Jesús po'ñoñ.

¹⁰ Tarro'mar na p̃otene' añecop ñeñt̃ atet̃ nenteñ ñerra'mrrate' nechemer. Ñehua, ñapa' o' name'ñacha arr all ayottam̃psareten ñeñt̃o'marña te'pa' e'ñe nechemer nepeñ. Ñeñt̃pa' añ pa'so'cheñ Onésimo ñeñt̃ pa'taruasañer pepe't̃ allempo ama yetam̃penṽa'.

¹¹ Ña ahuatpa' ama es asherben peñche'te allempo petaruasache't̃ e'ñe at̃ta. Te'ñapa' nanaccha' asherben penter e'ñe atet̃ atarr asherben nenteñ naña.

¹² Te'pa' o' alla nemñer pesho, e'ñepa'chña cohuenacma alla p̃aguë, e'ñech atet̃ peṽapuer ñerra'mrrate' e'ñe no nechemer p̃aguën, tarro'mar ñapa' e'ñe neyoṽhrocmañen atarr nemorrenteña.

¹³ Napa' atarrcho' nemneñeñ o'ch na'pacheñ arr ñeñt̃cha' epan atto ñapa' ñaite' nesherbenañeñ. Ñehua, napa' neñoteñ ñerra'm pa' arro'tsenpeñcha'pa' p̃ate'ña nesherbenañeñ arr all ayottam̃psareten e'ñe neserrpare'teñoñ Cristo po'ñoñ. Tarraña pa'pa' amaña arro'tsenayape ñeñt̃o'marña napa' nemneñeñ o'ch na'patonapeñ pa'cheñer ñeñt̃cha' nesherbenañeñ.

14 Napa' ama't atarr nemneñeñ o'ch atet nepeñ, tarraña ama nemno o'ch atet nepa ñerra'm ama pa atet notaye, attoña e'ñe pa pōctapñōtpa' añcha'ña pōrrtatōnay pemuereña. Ama nemno o'ch e'ñe na ne'mueñocmapa' o'ch notap atetcha'ña pepa'y, ñeñto'marña te'pa' o'ch alla nemñer masheñ Onésimo pesho.

15 Ñaña o'ch notap ñato' tarrecpate' yetam̄psaḡa mame' attoch e'ñe parrocmaterrep e'ñe tayoteñ errponañohuen.

16 Te'pa' o'huañcha' atet peñch ñerra'mrrate' pa'taruasañra pepeñ ñeñt ama esoye' pente'te. Te'pa' e'ñechña atet penter ñerra'mrrate' e'ñe pemo'nasheñ ñeñt atarr pemor-rentena. Napa' atarr nemuereña elloña papa' o'ch atarr pemuerya nanac tarro'mar ñapa' ama e'ñe atta pemo'nasheñ pepeñe atet yeḡannena allohueney acheñey, te'ñapa' e'ñe yame'ñeñō Yompor o'ch e'ñe pemo'nasheñtera e'ñe pōctacma.

17 Ñerra'm po'ñoçh atette' pentenen na ñeñtey parro attecmay yeyemtannena, ñeñteḡña' e'ñechca'ye cohuen paḡuērña yemo'nasheñ Onésimo atet ñerra'mrrate' na e'ñe cohuen paḡuēn.

18 Ñerra'm çhote' errot pennaḡ ñeñt ama cohuenayaye amapa' ñerra'm çhote' tebeneḡ, te'ñapa' nach petsa'terraya.

19 Na Pablonpa' te'pa' o'ch nequellconap e'ñe na notoḡ attoch e'ñe cohuen neñotataḡ nach petsa'terraya. Tarraña ñato' o'ch neyerpataḡa atto na pa'me'ñaterraya attoch pa'queshpa'taretterra, ñeñto'marña pōcoppa' añ pōctetsa te'pa' o'ch alla pōçshaterren naña.

20 Po'ñoçh masheñe, napa' añ e'ñe nemnen te'pa' o'ch alla pōçshaterren naña e'ñe pa'me'ñeñō Yepartseshar Jesucristo. Allochña' napa'çho'ña attoch e'ñe cohuen nocsherra neyoçhro e'ñe name'ñeñō naña Cristo.

21 Napa' neñoteneḡ papa' çhocmach pe'mñoten ñeñto'marña nequellquēnnaḡ añ carta. Neñoteneḡ amach ñeñtayaya atet peḡo ñeñt o' notuaḡ, papa' ellochña atarrcha' cohuen peḡa'yes allohuen ñeñt atarr cohuentetsa.

22 Te'pa' o'ch noterrperr po'poñ: pañño'toncha' ñaña nocop allcha' neçhap ñerra'm esempoch a'rroyerrnet. Sema'yocham̄peñōfen Yomporpa' napa' añ atarr necuen ñato' esempopa' a'rroyerrnetcha'. Allempopa' esheçte' neta sesho o'ch nemo'terrsa'.

Arrpa' atto so'tner po'cartot

23 Arr necartoḡ all huom̄cha'teneḡ ñaña masheñ Epafras ñeñt parro yottaḡpenyet e'ñe yeserrpare'teñō Cristo Jesús po'ñoñ.

24 Huom̄cha'teneḡ ñaña masheñ Marcos ñaña masheñ Aristarco ñaña masheñ Demas ñaña masheñ Lucas. Ñetpa' çhocma torrapretennet Jesucristocop.

25 Te'ñapa' ñeñtach notap masheñe. Yepartsesharepa'çhña Jesucristo sa'nataya allohuenes. Ñeñtpa' attetepa'ch Nompore. Allohua.

Pablo

AÑ CARTA ÑEÑT̃ HEBREONESHACOP HEBREOS

Te'ña Yompor Puechemerpa' ña e'ñe ye'ñorana'terraya ñeñt̃ atet oteñ Pompor yocop

¹ E'ñe ahuatoteñ Yomporñapa' chocma eñorana'tyesane't ñeñt̃ pueyochresha' pe't ñeñt̃cha' a'mta'yese't po'ñoñ ñeñt̃ara profetanesha'. E'ñe pa'namenot̃ eñotatyesanete't. Ñetñapa' o'ch eñotatenyayet yatañneshañ judionesha' ñeñt̃ atet otenanet Yompor.

² Tarraña te'ña yapa' e'ñe ña Puechemer o' eñorana'terrya ñeñt̃ atet eñoreññaña Yompor yocop. Ñehua, ñeñt̃pa' ñeñt̃ara Puechemer ñeñt̃ Jesucristotets ñeñt̃ ne't Pompor ahuatoteñ, ñach o'patenaya allohuen ñeñt̃ ora allpon eñall, tarro'mar ña ye'chcataprete' ahuat Pompor añ patser ñaña allohuen ñeñt̃ esocmañen pa'namen eñalleyestsas.

³ Ñeñt̃ara Cristo atto atarr cohuentena ña pa'tsnomueño't, ñeñt̃pa' Pomporña orrtaten po'partsoña. Ñeñt̃ atet cohuen orrtatyen ñapa', Pomporpa'cho'ña e'ñe parro attecmet. Ñapa' e'ñe po'ñoño'ta orrtatuan ora esocmañen ñeñt̃ allpon pa'namen eñall tarro'mar ña po'ñoñpa' atarr huomenc. Ñeñt̃ara ñeñt̃ rromats attoch e'ñe e'shamperrey yo'chñar. Allempoña o' orrtatuan atto e'shamperrey yo'chñar allempoñapa' o' alla anorruerr Pompor Parets po'cohuenrot̃ allña atarr partsotapretuerrana Pompor po'conaño e'ñe all pue'ntaño.

Ñeñt̃ Yompor Puechemerpa' ña metana'tuene' allohuen mellaño'teñnesha' atto atarr sherben ña

⁴ Ñeñto'marña te'ña ñapa' atarr amcha'tare'ttena, ello metana'tuenan allohuen mellaño'teñnesha', tarro'mar ñapa' ñeñt̃ otenet ñapa' e'ñe Parets Puechemer. Ñeñt̃ña mellaño'teñnesha' ñetpa' ama atteye' otare'tteneto.

⁵ Ñaña ye'noteñ ñapa' ña e'ñe metana'tuenahuet tarro'mar mellaño'teñnesha' ama't puesheñarro'tetapa' ama otaneto ñeñt̃ atet otan Puechemer, ñeñt̃pa' atet ot Puechemerecop:

Papa' pa' ñeñte'p̃ e'ñe Nechemere'p̃, te'ñapa' o'ch e'ñe neñotach acheñenesha' po'ño'ch pa'pa' e'ñe Nechemer nepene'p̃.

Po'pocheño'ña' atet oterrerr Puechemerecop:

Napa' na' ñeñten Pompor, ñapa' no Nechemer.

⁶ Po'pocheño'ña allempo chapatan Puechemer po'moter ñeñt̃ atarr nanac sherbets añe patsro atet eñora ñocop, ñeñt̃pa' atet ot:

Te'pa' concorpana'te'ñepa'ch allohuen nemllaño'teñneshar.

⁷ Po'mllaño'teñneshar ñetpa' añe'pa' anare'ttenet ñetcha' sherbenet Yompor. Ñeñto'marña atet eñorena ñocpuet:

Ñerra'm erra nemñayenanet e'ñech poma'yorñecma erra senet e'ñe atet penet ñerra'm mōrr. Atarr cohuen sherbennet atet ñerra'mrate' tso' ñeñt̃ atarr cohuen huoretyets.

⁸ Tarraña Puechemerecoppa' ama atteye' oteno. Ñocoppa' atet eñora:

Papa' atarr Partso'p̃, ñeñte'p̃cha' chocma amcha'tare'ttetsa peconaño ñeñt̃ errponañohuen. Ñaña ñeñt̃ atto pa'mcha'tare'ttena pa'pa' e'ñe pocte' es pe'pa'yenanet.

⁹ Ñaña ñeñt̃ e'ñe pocte' nenten napa' ñeñt̃ña atarr pocshatene'. Ñaña ñeñt̃ ama pocteye' nenteno napa', pa'pa'cho'ña ñeñt̃ atarr petsena'ten. Ñeñto'mar napa' ñeñten Peyomporer pepenen, ahuo't atarr nanac nocshaterre'p̃. Atto atarr pocshena pa'pa' ello penñtana'tueñ allohuen po'potantañ ñeñt̃ nesher'ba'yene' ñamet.

- 10 Yomporpa' alla eñorerrerr Puechemerecop, ñeñtpa' atet otererr:
Partseshacha' pa yeçhcatue' ahuat pats, eñe echarr þorratue. Enetpa'cho'ña eñe pehuamencotecma peyeçhcatue.
- 11 Ñeñ eñe peyeçhcatuapa' ñeñtpa' huañerrcha' eñech chenca'huerra esempo, tarraña papa' ama arromñañeshayape ama't eñe errponaña. Allohuen ñeñ peyeçhcatua ñeñtpa' eñech mellasha'tua eñech atet pena ñerra'mrrate' shetamuets ñeñ atarr amllasha'tña.
- 12 Atetcha' peperr peyeçhcatar atet ñerra'mrrate' shetamtoshe'm ñeñ o' mellasha't. O'ch a'metatse'chet o'ch huapore'chet allempo chorrenet po'poñ ñeñ atarr cohuen emarr. Tarraña papa' atterapach errponañohuen. Atto þocrrena papa' ama't ahuatapa' amach ahuañañaterro.
- 13 Po'pocheño Yomporpa' alla oterranerr Puechemer, ñeñtpa' atet och:
Te'pa' o'ch alla þanorruerr arr necohuenrot allcha' pepartsotapretuerrna. Esemposhuañencha' allohuen ñeñ pe'moñe'tene' o'ch eñe na'mchechuerranet attochña pomnaren peþohuerranet.
Tarraña mellañoñeñnanesha'ñapa' ama atteye' oche ñeñ atet otan Puechemer. (Ñeño'mar yeñoteñ Yompor Puechemer ña atarr sherbets, ello metana'tuenan allohuen mellañoñeñnanesha'.)
- 14 Yeñoteñ allohuen mellañoñeñnanesha'pa' añecpa allsensarettenet atet ñerra'm Yompor Puecamquëñ, ñetcha' sherbenet Yompor. Attochña ñetcha' yenpuenet allohuen ñeñtcha' a'queshpatarettertsa.

2

Amach atta es yepçhatsto esheccha' ya'queshpataretterra

1 Te'pa' atto o' yeñoterrñañ Yompor Puechemer atto atarr nanac partsoten ñeño'marepa'chña te'pa' elloch yema'yochrerra o'ch ye'mñoter eñe poctacma ñeñ atto o' ye'muerrñañ po'ñoñ. Ye'mñoterrepa'chña eñe cohuen te't acopoteñpa' ñato'rraña o'te' alla yepserrñañ ñeñ atet o' yeçhaterrey Yompor Puechemer.

2 Tarro'mar yeñoteñ Yomporpa' ama puenesho po'ñoñ ñeñ atto eñorana'tanet ahuat. Tarro'mar allempo ñeñ ama e'mñotaye ñeñ atta atpare'te'pa' eñe tsa'tatuanete't allohuen ñeñ allpon eñe pocte' ent ña. Ama't añ ñoñets ñeñ orrtat po'mllañoñeñrenesha' çhocma tsa'tatanete't ñerra'm esempo atpare'tenet ñeñ ñoñets.

3 Ñeño'marña yapa' yeñoteñ ñerra'm ama ye'mñoterrñañe eñe ña Puechemer, yañapa' errotenuachñaca'yeña yequeshperrate'ña ñerra'm atta ama es yepçheno; eñe atta eñalleñca'yeña attoch ya'queshpataretterra eñe cohuen. Ñehua, ñenma'tpa' Yeparteshar Jesúsña serrpare'tatahuet attoch ya'queshpataretterra. Allempoña ñeñ e'muene' atet otanet Yeparteshar Jesús, ñetña'pa' o' serrpare'tatyet yaña attoch yeñoç ñeñ eñe po'noç ña a'queshpatañtetsa.

4 Ñaña Pomporña'pa' ñaña yeñotate' Puechemer po'ñoñ ñeñ atet oteneypa' eñe po'ñoç. Ñapa' orrtatyesanet po'partsoña ñaña po'huamenc ñeñ acheñenesha'pa' ama puentareto. Ñaña ña Puecamquëño'tpa' o' apa'yese' eñe puesheña'ttsoy errotench' muenatey ña ñeñtcha' atet yetorra'yese' ñocop.

Atto Jesucristopa' eñe poctacma acheñetos arr patsro attoña eñe pa'mo'nasheñ þohuerrey

5 Te'pa' o'ch noterrser po'poñoneñ añ patser ñeñtcha' huerrtsa tsapa'tone't. Ñeñtpa' ama mellañoñeñneshaye' noña Yompor ñeñtcha' pomnaren perre'. Ñapa' aña na' acheñ ñeñtpa' arromñañenesha'.

⁶ Tarro'mar atet anaret Yompor po'ñoñ ahuatoteñ allempo puesheñarrpa' atet otan Yompor:

Ama't acheñaya ama't mamesha ama esoyayye, tarraña ña Nomporepa' atarrepa't peyerpuenya. Ama't ya ñeñtey arromñañena'taraya tarraña ña Nomporepa' atarrepa't pemuerenya.

⁷ Ñeñt arromñañenesha'pa' ama tama ahuaamencateyayeto atet atarr sherben mellañoñeñnanesha'. Tarraña ñeñtpa' mamecpa atet pemnach. Tarraña ama't atteñpa' elloña o'ch alla pecohuentater atet ñerra'mrrate' esempo o'ch net ñeñtcha' añcha'tarettertsa, allempopa' o'ch nacet po'choyo'm ñeñt atarr cohuen.

⁸ Ñeñtpa' tarro'marña atet pene' arromñañena'tar allochñapa' attoch e'ñe pomnaren penan allohuen ñeñt allpon es peyeçcatua. Arrpa' allohua atet oten ñoñets ñeñt ahuatoteñ anaret.

Ñehua, ñeñt ñoñets all oten arromñañena'tar ñeñtcha' e'ñe pomnaren perre' allohuen, ñeñtpa' añca'yeña oteney allohuenacop ñeñt errañaren eñall; amach eñalleña ama't e'ñe pañra ñeñtcha' ama pomnaren perreto. Tarraña ama't atet oteneñ ñeñtpa' amaña yentera' allempoch pomnaren es perr arromñañena'tar, tarro'mar ama çerra' allempoch etsoterra ñeñtecop anaret.

⁹ Tarraña e'ñe yeñoteñ puesheñarr ñeñt arromñañecoptartostsa ñeñt atet ñosta ñeñtca'yeña Jesús. Allempo acheñetos arr patsro Pomporña muenate' amach tama ahuaamencattoso atet atarr ahuaamencattena mellañoñeñnanesha'. Tarraña ñeñtpa' mamecpa atet muenach attoch e'ñe arromñañecoptartosa arr patsro. Ñeñtpa' añecopña atet ña attoch mueroçhtosa o'ch rromos allohuenacpay ñeñtey arromñañenesha'. Yompor e'ñe puemuerenoñey ya attoña muenatan Puechemer o'ch rroma yocop. Ñeñto'marña Pomporpa' o' alla atarr cohuentaterran Puechemer allempo o' alla ner ñeñtcha' atarr añcha'tarettertsa.

¹⁰ Ñehua, Yomporpa' yeçcatan allohuen ñeñt eñalleteya. Ñaña allohuenpa' tarro'mar yeçcatue attoch cohuentateññañet ña. Ñaña ñapa' añ muenen shonte' ñeñtcha' e'ñe puechemerasha' perr ñeñtcha' cohuentapreterrera ña. Yomporpa' e'ñe pocte' enteñ o'ch muenatan Puechemer attoch mueroçhtateñ acheñenesha'. Attochña e'ñe etsotatoñ Puechemer esheccha' a'queshpatteran allohuen ñeñtcha' puechemerasha' perr, attochña e'ñe ahuanerranet allcha' cohuentapreterrerañet Pompor.

¹¹ Ñehua, Puechemer ñeñt Jesús, ñapa' a'cohuentatan acheñenesha' Partsocop, attoña e'ñe e'shampesuanet po'chñar. Te'ña ñeñtey a'cohuentatuaretey ñaña ñeñt ya'cohuentaterre' ñeñtpa' ñeñtña e'ñe ñeñtña'tarecmay tarro'mar ñeñtara Yompor yepen ñeñt Pompor pen ña. Ñeñto'marña Jesúsapa' ama puepencñoñey'e' pa'mo'nasheñ penye.

¹² Yeñoteñ ama penquënyo tarro'mar Yompor po'ñoñ ñeñt anaret ahuatoteñ ñeñtpa' atet oten ñerra'mrrate' Puechemer otets:

Napa' neserrpare'tachcha' nemo'nasheñnesha' atet e'ñe cohuenare' es peña'yen ña.

E'ñe načoteñoñeñ ñapa' çocmach na'ye'choçhtatonañ all apçhena allohuen masheñneshaçhno.

¹³ Yompor po'ñoñ ñeñt aquellcaretpa' atet oterrerr ñerra'mrrate' Cristo o' alla oterrerr: Napa'çho'ña neyemteña Yompor.

Ñaña atet oterrerr Cristo:

Te' arro'tsenen epan Nomp por puechemerasha' ñeñt cohuanpsatenen ña.

¹⁴ Ñehua, allohuen ñeñt e'ñe pa'mo'nasheñecmuet ñannetsa, ñetpa' e'ñe ñeñtña'tarecmuet. Ñeñto'marña Jesúsapa' e'ñe acheñetos attoch pa'mo'nasheñ ñosey. E'ñe arromñañena'tartosa e'ñe atet ñerra'mrrate' ya. Ñapa' tarro'marña atet ñosa

allochñapa' attoch rromos. Tarro'mar allempo rromapa' attoña puerratanmpesuan oneñeñ po'huamenc atto atarr amcha'nochtana'teney allempo yerromuen.

¹⁵ Ñeñtpa' Jesúsña a'huañatampesuose' ñeñt ama't cheshoteñ chocmach yemcha'ten atto yerromuen, ñeñtpa' atarr amcha'nochen yenteñ.

¹⁶ Ñehua, yeñoteñ ama mellañoñeñnaneshaye' llequënoña Jesús ñeñtcha' yenpos arr patsro. Yaña llecosa ñeñtey arromñañeneshay ñeñtey e'ñe po'ñoçh po'mrenñey pen Abraham; ñeñto'marña ñapa' mueneñ o'ch yenposey.

¹⁷ Ñeñto'marña ñocoppa' e'ñe poctoña o'ch acheñetos, o'ch e'ñe attetos ñerra'm ya ñeñtey pa'mo'nasheñnesha' pen. Allochñapa' e'ñe puellcapreteñoñey ya ñeñtey e'ñe pamo'ts penpa' e'ñech cohuen a'pocaterrey Partsesho. Attoña ñapa' chocma e'ñe cohuen sherbenan Pompom atet ñerra'mrrate' ñeñt corneshatyets Partsocop. Ñapa' e'ñe po'ñoçh Pa'mcha'tareter peñ allohuen ñeñt cornaneshatyets Partsocop. Ñeñto'marña ñapa' e'ñe ña tsa'tuerraya allohueney acheñeneshay yo'chñar allempo ashataretta e'ñe ña po'rras. Attoña e'ñe a'pocaterrey yo'chñar Yomporesho.

¹⁸ Ñapa' atarr muerochtosa allempo huapoñe't topateñets; ñeñtpa' attoch a'ypo'ñereñ Pompom. Ñeñto'marña te'pa' e'ñe puellcapreteñoñey ya ñapa' e'ñe eñoteñ o'ch yenpa'y attoch ahuamencat ponay yeyoçher allochñapa' amach alla a'puerrataterrye topateñets ñeñtcha' allpon yehuapoya yaña.

3

Jesús ñeñt Yompor Puechemer ña metanene' ama't Moisés atto atarr sherben ña

¹⁻² Ñehua, masheñneshacha' ñaña nochaneshacha' sapa' ñeñtes o' sa'cohuentataretterra Partsocop ñeñtes o' chore'terres Yompor o'ch chapaterres all pue'ntaño. Te'pa' o'ch notas, o'ch soctape'ch e'ñe cohuen ñeñt atet perrnay Cristo Jesús ñeñt yame'ñerra. Ñapa' atto allsensarettapa' e'ñe cohuen etsotuan ñeñt atet llesense' Pompom. Ñaña ñapa' ña Yecorneshar yepen ñeñt atarr sherbets Partsocop allohuenacpay ñeñtey ame'ñenaya Yompor. Ñapa' e'ñe attecma cohuen etsotuan ora allpon ñeñt atet muenach Pompom acheñeneshacop atet pe't ñaña Moisés ñapa'cho'ña e'ñe etsotan ñeñt atet och Yompor allohuen pueyochreneshacop. Ñehua, allohuen ñeñt pueyochrenesha' pen Yomporpa' ñetpa' pa'paquëll penanet Yompor.

³ Ñehua, yeñoteñ ñerra'm eñall puepahuarr pocoll ñeñt tomatenet e'ñe cohuen añcha'ña atarr cohuen yenten ñeñt tomatene'. Amachña aña cohuen yenteno pocoll tarro'mar pocollpa' ama ñoñaye' cohuenteno; eñallca'yeña pamo'mte' ñeñt a'cohuentatene'. Attecmaçh yeñch ñaña Jesús atarr cohuen tarro'mar ñapa' atto ame'ñatana shonte' ñeñtcha' pueyochrenesha' pa' Pompom attoña tomatosan ñaña pocoll ñeñt atarr cohuen ñeñtcha' pa'paquëll pen Pompom. Moiséspa' amachña ñañeña atarr cohuen yenteno tarro'mar ñapa' ama ñaye' tomataye ñeñtcha' pa'paquëll perr Yompor.

⁴ Ñehua, yeñoteñ allohuen pocollpa' ama ñoñaye' yeçhquëno; chocmaca'yeña eñall ñeñt yeçhcatene'. Ñeñt yeçhcate' esocmañen ñeñt eñalletyetsa ñeñtpa' Yomporña yeçhcatuahue'.

⁵ Añña Moiséspa' e'ñe cohuen etsotan ñeñt atet yehya Yompor; ñeñtpa' o'ch es eñotatyesan acheñeneshach' tarraña ñeñtpa' toma'nteñtsa. Tsapañoneña Yomporpa' o'ch eñotaterranet ñeñt e'ñe eñotochen. Ama't e'ñe cohuen etsotenaneñ Moisés allohuenacop ñeñt pa'paquëll pen Yompor allempo, tarraña ñeñt atto sherbenan Yompor pa'paclopa' ñapa' atta pueñaña peñ Yompor. Amaña Puechemereye'ña peñe.

⁶ Ñapa' añca'yena Puechemer pen Cristo ñeñtcha' sherberrets tsapatonet allohuenacop ñeñtcha' e'ñe pa'paquell perr Pompor. Ñapa' e'ñe cohuen etsoterran ñeñt e'ñe Pom-porecop. Allohueneypa' e'ñe pa'paquell pohueney Yompor allcha' yechena ña ñerra'm allo'nach huomenc yeyemuetneña attochña e'ñe yocsheñeshocma yecua'huanom ñeñt o'patatenya.

Yomporpa' e'ñech cohuen amesaterran pueyochreshachno ñeñtcha' e'ñe cohuen ame'ñerraya attoch e'ñe cohuen cosherret

⁷ Ñeñto'marña Parets Puecamquëño'pa' atet oten all aquellcaret Yompor po'ñoño ñeñt'pa' atet oten:

Ñerra'm se'mueñ Yompor atto chore'tenes te',

⁸ sañapa' chochña se'mñoach, amachña cha se'charrtatatsto seyocher. Amach cha satpare'tatsche atet pe't israelnesha' ahuat allempo chopeñe'chyesete't amayo. Allña' epaye' atsrre'moçhtana'tyesnete't.

⁹ All amayo satañneshañña' atarr topatnete't atto'ch eñotnet po'ñocho'te' atsa'tatañen. Ñetpa' atet pa'yesnete't ama't chocma entyesonete't ñeñt norrtatyesanete't. Pa'tatsoch çharra' charohua entyesonete't ñeñt chocma negatyesanete't.

¹⁰ Ñeñto'marña napa' atsrre'moçhen nentyesanet, napa' atet not: "Ñeñt atet cotape'chenet pueyoçhro ñeñt ama cohuenayaye ñetpa' atarr panteñet nocop. Ama añeye' mueneneto o'ch cotape'chet ñeñt cohuen nenten na."

¹¹ Atarr atsrre'moçhen nentanete't. Ñeñto'marña atet not ñocpuet: "Ñetña po'ñoçh ama't ahuatapa' amach neçapaterraneto allcha' pocsheñesho'pa' o'te' amesapreterretañ." Ñeñto'marña ñocpuetpa' atet nena' neñoñ e'ñe na neso'chño.

¹² Ñeñto'marña masheñneshacha' ñaña noçhaneshacha' te'pa' o'ch notas samã, e'ñech señoata seyoçhro atet soçtape'chyen e'ñe puesheña'ttsos, ñato'pa' amate' cohuenayey soçtape'cheno, ñato'pa' amate' po'ñoçhaye' same'ñeñoña Yompor. Ñerra'm po'ñoçh atet sepenapa' ñeñt'pa' ñeñtach sequeçpaterre' Yompor ama't ñeñt Yomporer ñeñt ama arromñateshayaye.

¹³ Sapa' e'ñepa'chña cohuen soçtape'chatanna'tnoma pate'tets yet tayepa'tña' orameñ yet allempoteñ o' chore'terrey Yompor. Attochña so'chñarpa' amach errotenot alla shequërrserro. Attoch amach cha se'charrteno seyoçhro allochña'pa' amach alla satpare'tere Yompor, ama't e'ñe puesheñarrotesa.

¹⁴ Allo'nepa'chña e'ñe huomenc ye'pa'nom yeyoçher. E'ñepa'chña yeyoçhrocmañen yeyemteña Cristo atet ye'pa' allempo e'ñe errtey ame'ñenaya. Ñerra'm atetcha' yeyemuetnomã allempopa' yagapapretercha' Cristo ñeñt o'patateña Pompor.

¹⁵ Ñeñto'marña o'ch alla neyerpaterrser ñeñt atet oten Yompor po'ñoñ ñeñt aquell-care't ahuatoteñ, ñeñt'pa' atet otene'y:

Ñerra'm se'mueñ Yompor atto chore'tenes te' sañapa' chochña se'mñoach, amachña cha se'charrtatatsto seyocher. Amach cha satpare'tatsche ñeñt atet pe't israelnesha' ahuat allempo chopeñe'chyesete't amayo.

¹⁶ Ñaña te'pa' o'ch neyerpaterrser ñeñt atpare'tyesaye't Yompor allempo pueçhore'teño'pa' eñorana'tanete't, ñetpa' ñeñtareta ñeñtet cha'nmaçha'taterr Moisés Egiptot.

¹⁷ Ñaña o'ch neyerpaterrser, ñeñt atarr atsrre'moçhen entyese't Yompor ahuat ama't pa'tatsoch çharra' charohua, ñetpa' ñeñtareta ñeñtet atarr ochña'tare'tatsete't. Ñeñto'marña ñet allempopa' e'ñe alla colla'huet amayo.

¹⁸ Ñaña o'ch neyerpaterrser, ñeñt otarettatsa allempo ñetpa' ama't ahuatapa' amach amnataretterreto attoch pocsheñesho'etpa' o'te' amesapreterretañ Yompor, ñeñt'pa'

ñeñtara ñeñtet atarr atparñatsete't. Ñeñt atet otarettete't allempo, Yomporña nahuet po'ñoñ e'ñe ña pa'so'chño, tarro'mar ñapa' ama puenesho po'ñoñ.

¹⁹ Attoña yeñotenanet ñetpa' ama't puesheñarrofetapa' amach eshcaye' chapueto allcha' yecha'huerretañ e'ñe cohuen pueñmañesha' tarro'mar ñetpa' ama eseshaye' cohuen ame'ñayo Yompor.

4

¹ Ñehua, Yomporpa' po'ñoñ otene yechapcha' allcha' yamesapretera allcha' e'ñe cohuen yocsha'huera Yompor ñerra'm po'ñoñcha' yame'ñera yaña. Tayepa'tña' orameñ atet otene yaña e'ñe yemcha'nañotpa' yame'nyepa'ch te't puesheña'tsotespa' amate' secherro saña all.

² Tarro'mar ñeñt atpare'taye't all amayopa' aserrpare'tatarettetañaña cohuen ñoñets Yomporeshot tarraña ama huenetoña patparñet tarro'mar ama't e'metaña' ama eseshaye' ame'ña'pahuoye' entaye. Yapa'cho'ña o' serrpare'taterryet yaña cohuen ñoñets Yomporeshot.

³ Ñeñteycha' e'ñe po'ñoñ ame'ñerraya Yompor ñeñteycha'ña cherrets allcha' yamesapretera allcha' e'ñe cohuen yocsha'huera Yompor. Ñeñña ama ame'ñetsopa' ñetpa' amach esesha' cherreso allcha' coshapreteret Yompor. Ñeñtpa' e'ñe attecma ñeñt atet otareta ahuat ñeñt ama ame'ñatso. E'ñe atet otene Yompor po'ñoñ all aquellcaret, ñeñtpa' atet oten Yompor:

Atarr atsrre'moçhen nentanete't ñeñto'marña atet nena' neñoñ ñocpuet: "Ñet po'ñoñ ama't ahuatapa' amach neçapaterraneto allcha' amesapreterrnet allcha' e'ñe cohuen cosha'huerrnetañ."

Attoña ñetpa' amach eseshaye' cherreso allcha' e'ñe cohuen coshapreteret Yompor. Ñehua, ahuat Yomporpa' ña orrtate' ameseñets e'ñe allemputeñ yeçcatuahuan pats ñaña enet. Ñeñña ameseñetspa' atarr coshateney yeyoçhroçmañen.

⁴ Tarro'mar all po'ñoñ yeñoteñ atet aquellcaret, ñeñtpa' atet oten:

O' yeçcatuan Yompor allohuen ñeñt allpon yeçcatyesua, po'cançherrmatñoña' o' ames Yompor.

⁵ Tarraña po'pocheño all oterrerr Yompor po'ñoñ ñeñt aquellcaret, ñeñtpa' atet oten:

Ñeñt ama name'ñenayopa' amach eseshaye' cherreso allcha' amesapreterrnet attoch e'ñe cohuen coshapreterrnet.

⁶ Ñeñto'mar yeñoteñ ñeñt e'mayeñ ahuat cohuen ñoñets ñetpa' amach eseshaye' cherreso allcha' amesaterranet Yompor attoch e'ñe cohuen pueyoçhrohuen cosherret tarro'mar ñetpa' ama eseshaye' ame'ña'pahuoye' entaye Yompor. Tarraña ama't atteña' yeñoteñ Yomporpa' ama puenesho po'ñoñ. Ñeñto'marña te'pa' yeñoteñ Yomporpa' atterach e'ñe cohuen amesaterran ama't erra'tsena ñeñtcha' po'ñoñ ame'ña'po' enterre', attochña ñetpa' cherretcha' allcha' e'ñe cohuen cosherret.

⁷ Ñehua, ñeñto'marña Yomporpa' onañcherran po'poñ po'yeter, ñeñtpa' o' çherr te' esheccha' ama't patantarra acheña' o'ch ame'ñeñet. Ñeñto'marña yeñoteñ Yomporpa' ora attera cohueney tarro'mar ama't metuen aton char allemputeñ atpare'chete't all amayopa' o' çhap allempo atto eñosatan David. Ñeñtpa' ñeñtara ñeñt o' notuanmas:

Ñerra'm esempoch se'mueñ Yompor atto çhore'tenes saña' çhochña se'mñoñch tayepa'tña orameñ yet allempo o' çhore'terres Yompor, amachña çha se'charrtatatsto seyoçher.

⁸ Ñehua, yeñoteñ Josué ahuatpa' e'ñe çhapatan israelnesha' puechemereshachno all patso ñeñt all sechete't ahuatoteñ allcha' yeçhoset. Tarraña ama't çhapatanetañ allpa' ama eseshaye' pocsheñeshot pueyoçhrohuen amesostsoña all. Ñerra'm e'ñech cohuen

amesatuerranetañ Josuépa' amach onañcherranñerroña Yompor po'poñ po'yeter attoch coshaterrey e'ñe cohuen yeyochrohuen.

⁹ Ñeñto'marña yeñoteñ te'pa' eñallmeñ ñeñt' o'patatenya Yompor ñeñtey pueyochresha' pen allcha' e'ñe yocsheñeshocmañen yamesuerr. Ñeñtpa' e'ñe atet ñerra'mrrate' allempo ames Yompor ahuať po'cancherrmatño.

¹⁰ Tarro'mar allohuen erra'tsencha' cherrets allcha' amesaterranet Yomporpa' ñetñapa' amach alla es llecaterrahuete'te; e'ñe pameseñoťet cohuenpa' e'ñech eñmaterret pueyochrohuenet atet ñerra'mrrate' allempo e'nuan e'ñe poctacma Yompor po'taruas, e'ñe pocsheñeshocma ames.

¹¹ Yapa'cho'ña añepa'chña ye'nen attoch ye'cherr yaña allcha' amesaterrey Yompor attochña e'ñe yocsherra yeyochro. Te'ñapa' ama't puesheñarroťeyapa' amuepa'ch alla yaťpare'terre'te te't ama ye'cherro yaña all.

¹² Yompor erroť oteneý, po'ñoñpa' atarr ahuañencať ñeñtpa' ama ahuañañaťe. Ñeñt' po'ñoñpa' e'ñe atet etsotenan ñeñt' atet muenen ña. Po'ñoñpa' allo' chocma ñerra'mrrate' cochell ñeñt' atarr etsotañtareť emoto'mar. O'ch es yepata' allopa' e'ñech be'tosua ora, e'ñech pecha'tam̄pesuoñ ama't posapohuen. Atetca'ye penaña Yompor po'ñoñ e'ñech' chaponaya e'ñe yeyochro ama't e'ñe yecamquēñoñhuen, ñeñt'cha'ña e'ñe yeñotaterre' ñeñt' yeyochro'tsen ama't ñeñt' allpon yoctape'chyen ora esocmañen.

¹³ Ama't puesheñarroťeya amach erroťenoť ye'potam̄pesyoña Yompor ñeñt' yeye'chcate'. Amate' erroťenoť ya'nasotam̄pesyoña, ñapa' e'ñeca'ye entuennayña yeyocher ñeñt' ora allpon es yoctape'chyen. Ñapa' ñach ya'metatatuerre' allohuen ñeñt' allpon yoctape'chyen.

Jesúspa' ña corneshaterrets, e'ñe metana'tuerran allohuen cornaneshachno atto atarr sherben ña

¹⁴ Ñehua, yeñoteñ eñall ñeñt' Yecorneshar yepen ñeñt' atarr Partseshatets, ñeñtpa' ñeñt'ara Jesús ñeñt' Yompor Puechemer. Ñaña'pa' o' alla' cherr allohuanen pue'ntaño e'ñe all Pomporesho, allña e'ñe cohuen a'poctatennay yocop. Ñeñto'marña yapa'cho'ña allo'nepa'ch yeyemuetneña. Amuepa'chña yeque'chpatstere.

¹⁵ Tarro'mar Jesús ñeñt' Yecorneshar yepen ñapa' e'ñe eñoteñ attoch e'ñe cohuen llecapretenya allempo ama e'ñeye' huomencaye'yenteno yeyochro. Tarro'mar ñapa'cho'ña attecma huapoñe't' allohuen pa'namen topateñets, e'ñe atet yepena ya te' chocma huennaya pa'namen topateñets. Tarraña ñapa' ama't pa'namen huapoye't' topateñets, ñapa' ama't parrocha ama' p̄ano ñeñt' ama pocteye' enteno Pompor.

¹⁶ Ñeñto'marepa'chña e'ñe yeyemteñoť Yompor Puechemer, amach yem'cha'nañoťeye' ye'chore'teñe Yompor ama't ñeñt' atarr partsotets po'conaño. E'ñe puemuereñoťey e'ñech cohuen e'mñoteneý, chocmach yenpueneý. Ñaña' ñerra'm esempo huennaya ñeñt'cha' yellcatene' ñachña e'ñe ahuañencať yepene'.

5

¹ Ñehua, yeñoteñ allohuen ama't erra'tsena ñeñt' pa'm'cha'tareter pen ñeñt' corneshatyets judioneshacop, ñeñtpa' acheña, arromñaña. Ñapa' añecop acrare'tta ñach anare'ttatsa attoch eñen acheñeneshacop Yomporesho. Allempo es apueñet Yomporpa' ñach anene' o'pono Yompor pa'paclo. Allempo muetsenet payara ñeñt' allo sherbeñet Yomporpa' ñach nene' eyarra po'r'ras allo tsa'tenana pueyochreshachno po'chñar.

²⁻³ Ñapa'cho'ña ama huomencaye' enteno pueyochro tarro'mar ñapa' arromñaña ñeñto'marña ama e'ñe pueyochreshacpayaya nenanoña eyarra po'r'ras; ñeñtpa' ñocpa'naña neñ allo tsa'tenana ñaña po'chñar Yomporesho. Atto ñapa'cho'ña ama huomencaye' enteno pueyochro ñeñto'marña ñapa' e'ñe eñoteñ o'ch llecapretana

pueyochresha' allempo es pantenet ñet ñaña allempo yečcatenet ñeñt' sosey enten Yompor tarro'mar amaña e'ñe ñeña neneto pueyočhreto; čhocmaña pueseñet Yompor.

⁴ Ñaña yeñoteñ ama't e'ñe puešeñarrapa' ama eseshaye' netso e'ñe ñañaña attoch corneshat Partsocop. Ñeñtpa' Yomporña chore'tene' ama't erra'tsena puešeñarr ñeñt'cha'ña corneshatats. Ateť pa ñaña Aarón, ñapa' Yomporña ne' atto corneshateť Partsocop.

⁵ Cristopa'cho'ña attecma pa ñaña ama ñaye' otatso, "napa' nach corneshatats." Pomporña ne' ñeñt'cha' corneshatats attoch yecohuentateññañ. Yeñoteñ Pomporpa' atet cohuentateñ tarro'mar Yompor po'ñoñ ñeñt' aquellcareť ahuat ñeñtpa' atet oten:

Papa' Nechemerep, te'ñapa' o'ch neñotach acheñenesha' po'ñočh pa' Nechemer nepeneť tarro'mar te'pa' o'ch nenať pa'ch añcha'tareťtertsa.

⁶ Po'poñ aquellcareťopa' all otererr:

Papa' attoch pecorneshaterpa' ñeñtpa' amach huañerro ama't e'ñe errponaña. E'ñe atet o' pa'llsensareťterra atet ñerra'm Melquisedec ñeñt' corneshatateť ahuat.

⁷ Allempo allo'tsenmeñ Cristo arr patsropa' ma'yochamřsa ñañaña. Ma'yochamřsa e'ñe huomenc puellquēñesha'. Pueya'chpeñesha' enaman Pompor ñeñt' atarr ahuañen- caťesha' attoch a'queshpa'ch puerromueñoť. E'ñe pom'cha'na'teñoťan Pomporpa' atet och: "Amach añeye' atet peťatstono ñeñt' nemnen na; añcha'ña atet peťon ñeñt' pemnen pa." Ñeñto'marña Pomporpa' e'ñe e'mñoch.

⁸ Ñehua, Cristo ama't e'ñe Yompor Puechemerpa' ñapa'cho'ña atarr mueročhta, attoña e'ñe yečhan attoch e'ñe cohuen e'mñotenan Pompor.

⁹ Atto yečhan pue'mñoteñpa' ñeñto'marña e'ñe etsotuan ora attoch a'queshpataña, allochñapa' attoch a'queshpaterran e'ñe poctacma allohuen erra'tsencha' e'mñoterre' ña.

¹⁰ Ñeñto'marña Pomporpa' ne' ñach corneshaterrets Partsocop e'ñe atet corneshateť ahuat Melquisedec.

Ñeñt' ama huomencaye' penaye pueyočher Yomporecop čha ottena ñerra'm ematoll

¹¹ Ñeñtpa' orameñ shontemeñ nemneñeñ o'ch notaseñ. Tarraña ama'tcha' notaseñpa' atarr torrapo' o'ch nečhapatonas seyočhro tarro'mar te'pa' o'huañ tama semne' ama't erra'tsenapa' o'ch se'mñoteñ.

¹² Sapa' ahuatoteñ same'ñenañ ñeñto'marña te'pa' socoppa' añ poctetsañ o'ch seyčatyeseñ po'potantañečno ñeñt' allpon shonte' señotyeneñ. Tarraña sañapa' amaña atteye'ña sepeno tarro'mar sapa' teme'ttsen sepalltena o'ch alla yečhaterrseterr Yompor po'ñoñ ñeñt' yečhatuaset e'ñe ñenmať ama't ñeñtpa' ama torrapahuoyaye yocop o'ch yeñoch. Sapa' ama huomencaye' sepeno seyočher tarro'mar sapa' čha sottena ñerra'mrrate' ematoll ñeñt' añach orren pachor pomosos ñeñt' ama etsotenana' o'ch rran rreñets ñeñt' yerren ya.

¹³⁻¹⁴ Ñaña yeñoteñ allohuen ñeñt' añach pocrramř pen pomosos, ñeñtpa' ematolla ama eñotenana' o'ch e'nan rreñets ñeñt' čhocma yerren. Ñaña ñeñt' ottetsa ñerra'mrrate' ematollpa' ama eñotenanoña Yompor po'ñoñ attoch pocte' eñch Yompor. Tarraña ñeñt' po'ñočh atet enten Yompor ñerra'mrrate' po'nanesha' ñetpa' e'ñech eñotenet ñeñt' pocte' enten Pomporet ñaña ñeñt' ama pocteye' enteno; tarro'mar ñetpa' ahuatoteñ ame'ñeret Pomporet. Ñeñto'marña ñetpa' allo'na senet etsotnomuet Yompor po'ñoñ ama't ñeñt' atarr echarr ñeñt'ña e'ñe pocrramř penet.

6

¹⁻³ Allo'nepa'ch yesen e'ñe yečha'nmue' Yompor poctapña ama't ñeñt' atarr echarr. Allochñapa' yepeñoť atet muenen ñapa' e'ñech po'n enteneyña Yompor. Ñehua, sapa' o' e'ñe seyčherr ñeñt' ñenmať yečhataset Cristocop, attoch sequečpa'huerrña ñeñt'

atet seyečcatyeseñ ñeñt ama a'queshpatañeyaye. Añca'yeña o' ello soctape'cherr cohuen Yomporecop čhoca'yeña o' same'ñera. O' señoterr ñaña ñeñt atet yap-atarettena Yomporecop, ñaña atto čhocma yenen yot ñesheto ñeñt ame'ñatsa. Ñaña o' sa'yčhataretterra attoch yetanterra ñaña attoch esempohuañenpa' ya'craretterrach allohueney errotencha' entyuesuerrey Yompor, ñato' cohuenta' ye'pa'yen, ñato' amate' cohuenaye' yepeno. Ñeñt o' yečhatuanmaset ahuañoñeñ Cristocoppa' amachña ñeñtaña alla seserrpare'tame'terre'te. Añcha'ña allo'nepa'chña yesen eñotnomue' po'poñečno Yompor poctapña ñerra'm Yomporcha' yemnate'.

⁴⁻⁶ Tarro'mar yeñoteñ ñerra'm esesha' o' čhapoña pueyočhro ñeñt cohuen enten Yompor ñaña ñerra'm o' agapan Yompor ñeñt apueney attochña yapa' corretsayach tayoteñ errponohuañen pue'ntaño, ñaña ñerra'm o' agapan Yompor Puecamquëñ ñaña ñerra'm čho yomenana Yompor po'ñoñ ñaña ñerra'm eñotuanman Yompor po'huamenc ñeñt ama ahuañañateyaye, tarraña ñerra'm o'ch alla puerrerret, ñetpa' amach errotenoñ alla yoctape'chaterranete'te attoch cotape'cherret etserra cohuen Yomporecop. Tarro'mar ñeñt acheñerpa' añ toma'ntena ñeñt atarr muenene' o'ch alla corso'tam'perranerr po'pocheño Yompor Puechemer; attoña o' alla achm'are'tererr allo'tsa'yen shonte' acheñenesha'.

⁷ Ñeñt atet petsapa' o'ch netma'ntacha ñeñt atet pena pats. Ñehua, allempo e'ñe cohuen huapotam'psatenan Yompor pats ñerra'm o'ch chepares pa'namen narmetsočno ñeñtcha' coshatene' pamo'mte' ñeñt nare'tene', Yomporña čhocma a'torene' ñeñt pats esheccha' pa'namen yečhquëtsa all.

⁸ Tarraña ñerra'm añ cheparsats pa'namen ajačno ñeñt ama cohuenayaye, ñeñtña patspa' amach es sherbeno. Yomporshotpa' arrnomaretterrach attoch a'poyare'terra.

Atto e'ñe yeyemteñoñ Yompor čhocmach yecuen ñeñt o'patatyenya

⁹ Tarraña ama't atet notensoñ masheñneshacha' sa ñeñtes atarr nemorrentena, napa' necuenes ñaña neñotenes sapa' o'ch alla sorrtatyerr e'ñe cohuenare' ñeñt atet orrtatyen allohuen ñeñtcha' qeshperrtsa.

¹⁰ Tarro'mar Yomporpa' e'ñe pocte' es pennay. Ñapa' čhocma po'ñočh entenes ñeñt atet setorra'yena ñocop ñaña atto semorrenteññaña allohuen ñeñt pueyochresha' pen Parets. Ñeñto'marña e'ñe same'ñeñoñ ñapa' e'ñe cohuen seyepa'yeñ allohuen masheñeshachno ñeñt pueyochresha' pen ña, ama't teme'ttsen attecma sepene.

¹¹ Añña atarr nemnen ama't allohuenespa' allo'nepa'chña sesen orrtatyenesnomue' ñeñt cohuen enten Yompor, e'ñechña socsheñeshocmañen sorrtatyesusanom allohuen ñeñt cohuen enten Yompor e'ñe atet socsheñoñ čhocma seyepa'yeñ ñeñt pueyochresha' pen Parets. Attoña e'ñe seyemteñoñ Yompor secuen ñeñt o'patatenya.

¹² Attochña amach čha sečllatsto Yomporecop, añcha'ña sepene samña ñeñt atet pa'yena po'potantañečno ñeñt pame'ñeñoñet Yomporpa' ama't errotuano'ntsa'yenet ñetpa' čhocma ahuanta'huaneñet. Attochña e'ñe o'patueññañet Yompor ñeñt oteneñ Yompor ñeñtcha' aphuerrey.

¹³ Tarro'mar yapa' yeñoteñ čhocmach aphuerrey ñeñt atet oteneñ. Ñehua, yeñoteñ Yompor ahua'tpa' atet otane't Abraham ñeñtcha' atet perrñañ tsapa'one't po'm'reñecop. E'ñe ñañaña pa'so'chño atet otan Abraham tarro'mar ama eñalle po'poñ ñeñt atarr ahuaamencatesha' atet ñerra'm ña allcha' a'pocatan po'ñoñ.

¹⁴ Ñeñto'mar e'ñe ña pa'so'chño atet otan Abraham: "Na po'ñočhpa' atarrcha' neben-sare'tam'psa'p attochña na'm'raterrna'p ñeñtcha' pem'reneñ peperr."

¹⁵ Ñeñto'marña Abrahampa' e'ñe pueyemteñoñ Yompor po'ñoñ atet oteñ ñapa' ama quečhpueñe, čhocma cohuenan ñeñt atet oteñ Yompor. Ñeñto'marña Abrahampa' po'ñočh agapater Yompor ñeñt atet oche't ahua'toteñ.

¹⁶ Ñehua, yapa' yeñoteñ acheñ arr patsro ñerra'm es muenenet o'ch es otenet e'ñe po'ñoçh, ñetpa' o'ch otenet e'ñe añ pa'so'chño ñeñt atarr ahuañmencatesha'. Ñerra'm atet penetpa' attoña eñoteñet ñeñt ñoñetspa' o' anaretta, o'huañcha' allo'na otnare'tanna'tnenet po'ñoño'maret.

¹⁷ Yomporpa'cho'ña e'ñe attecma nan po'ñoñ e'ñe ña pa'so'chño tarro'mar ñapa' mueneñ o'ch eñotateney amachña a'po'poñetañperryeña po'ñoñ, allohueney ñeñtey o'patatena ñeñt atet oteney o'ch apuerrey.

¹⁸ Ñeñto'mar yeñoteñ Yomporpa' e'ñe epoch eñotateney e'ñe po'ñoçh atetcha' perrnay, ñaña Yompor po'ñoñpa' ama çhoye' shequënye. Ñeñto'marña e'ñe yeyemteñoñ ñapa' yeñoteñ po'ñoçhpa' a'queshpaturreycha' ñeñt atet oteney. Ñeñto'marña yecueñ ama't allohueney ñeñtey e'nene' ña ñachña ya'queshpaturre'.

¹⁹ Ñeñto'marña yeñoteñ ñeñt yecuen ya o'ch a'queshpaturrey Yompor ñeñtpa' e'ñe po'ñoçh, ñeñt ama ahuañañayaye. Ñeñto'marña yeñoteñ e'ñe yeyemteñoñ ña yecamquëñña' e'ñe cohueno'tsen amach errotenoñ chenquërro. Yeyemteñoñ Yompor ñeñtpa' añ toma'ntena ñeñt orrene' barco oño ñeñt otenet ancla. Allochña barcopa' amach errotenoñ chenco. Ñeñt atto yeyemteña Yompor ñeñtña anclatetsña yecamquëñecop ñaña ñeñtpa' e'ñe po'ñoçh allo e'ñe huomenc orrena yecamquëñ tarro'mar ñeñtpa' Yomporesho' anaret e'ñe allohuanen ñeñt allo'tsen Parets pa'paclo pue'ntaño, e'ñe allohuanen allo'tsen besom allo yottañpeññañet Parets po'poner. Allca'yeña anarettenaña ñeñt toma'ntenaya ancla atto ya yeyemteña Yompor.

²⁰ Tarro'mar e'ñe all Partseshopa' allña o' çherrña Jesús ñeñt o' otamñperrya allcha' a'pocatosnay e'ñe cohuen yocop Pomporesho. Allña'pa' o' corneshatuerr Partsesho. Atto o' corneshatuerr ñeñtpa' amach huañerro ama't errponaña. E'ñe atet o' allsen-sareterra o'ch corneshatuerr ñerra'mrrate' atet corneshate't ahuañ Melquisedec.

7

Jesús'pa' atarr cohuen corneshatos Partsocop atet corneshate't ñaña Melquisedec Partsocop ahuañ

¹ Ñehua, te'pa' o'ch alla neyerpaterrsa ñeñt atet pe't ñeñt corneshatate't ahuañ ñeñtpa' añ pa'so'cheñ Melquisedec. Ñapa' ñeñt corneshatate't Partsocop ñeñt atarr partsotets. Ñaña ñapa' ñeñt añcha'tarettate't all anetso ñeñt pa'so'cheñ Salem. Allempopa' correna ñaña yatañ Abraham. Parrochña Abrahampa' ahuañ allcha' quellarenana' po'potantañeçhno ñeñt añcha'taretyetsa allo'mar. E'ñe a'mchechuhuananeta'pa' huerra. Allempo err, toñopa' all pocatapueñ cornesha' Melquisedec. Allña pocteñpa' allenta bensare'tamñsapuenan Abraham.

² Ora ñeñt allpon yoramñsan ñeñt o' quellara'huenta'pa' allempoña Abrahampa' aphuenan cornesha' Melquisedec allpon ñeñt Partsocop. Allpon aphueñpa' ñeñtpa' ñeñt allpon otenet la décima parte. Ñeñtpa' atet ñerra'm es eñall ñeñt yechen çharrapa'ttsocma, pate'tetsña'pa' o'ch yeneñ e'ñe Partsocop. Ñehua, ñeñt so'chñetser Melquisedecpa' añ otenet "ñeñt pompor pen allohuen añcha'tareteçhno ñeñt e'ñe pocte' enten Parets." Allo'pa' ñaña ñapa' arr añcha'tarettena anetso añ pa'so'cheñ Salem. Ñeñt anetser pa'so'cheñ añ otenet "muechetteñtsompañño" tarro'mar all añcha'tarettena ñapa' ña orrtatene' e'ñe cohuen morrentanna'teñets attoña yechenet e'ñe cohuen muechet.

³ Ñeñt Melquisedecpa' ama eñotpahuoyayeña ñeñt pompor pe't ñaña ñeñt pachor pe't tarro'mar ama aquellcareteyaye ñeñt pa'so'cheñ. Ñaña ñeñt pa'tañneshañ pe't ñeñtpa'cho'ña ama eñotpahuoyaye. Ama't ñaña allempoteñ eñalleta Melquisedec ama't ñaña allempo rroma ñeñtpa'cho'ña ama eñotpahuoyaye. Ñapa' tarro'mar atet pe't añ

toma'ntena ñeñt Puechemer pen Parets. Ñeñto'marña atto corneshaten ñeñtpa' amach huañerro ama't errponaña.

⁴ Señoche'ch cornesha' Melquisedec ñapa' atarr sherben. Ama't yatañ Abrahampa' chocma es apane't Melquisedec atet ñerra'mrrate' ñeñt es yenen ñeñt Partsocop. Añ aphueñ ñeñt allpon yorampsan ñeñt o' quellara'huenta'. Allpon aphueñ ñeñt atet ñerra'm cho es yenen Partsocop ñeñtpa' atet ñerra'mrrate' ñeñt allpon es yechyen e'ñe çharrapa'ttsocma, pate'tetsña'pa' o'ch yeneñ e'ñe Partsocop.

⁵ Ñehua, yeñoteñ levína'tarnesha'pa' ñeñtena'tarña anarettatset' judioneshacop ñeñtcha' corneshatets Partsocop. Ñocpuetña nanña Moisés po'ñoñ, ñeñtña ñoñetspa' atet oten ñocpuet: E'ñe pocte' secobreñ acheñenesha'. Apa'yenetepa'ña allponapa'tets ñeñt Partsocop, atet ñerra'mrrate' ñeñt allpon yechyen e'ñe çharrapa'ttsocma, pate'tetsña'pa' o'ch yeneñ e'ñe Partsocop (ñeñtara otenet diezmo). Ñeñto'marña chocma cobreñetña pamo'tsesha' ama't e'ñe ñeñtena'tarecmuet, tarro'mar Abrahampa' ñeñtara pa'to' pohueñet allohuenet.

⁶ Tarraña Melquisedec ama't ñapa' ama levína'tarneshayaye ñaña'pa' ello metana'tuenanet ñet tarro'mar ñapa' ama't yatañ Abrahampa' agapoñe't allpon ñeñtcha' a'p Partsocop. Elloña bensare'tampenan Abraham ama't Abrahampa' o' otue Yompor ñach bensare'tampe'. (Abrahampa' e'ñe pocte' enteñ tarro'mar atarr ahuamencatesha' entenan Melquisedec.)

⁷ Ñehua, yeñoteñ po'ñoçh ñeñt atarr nanac añcha'tarettetsa ñapa' ñachña bensare'tampe' po'potantañeçhno ñeñt ama tama añcha'tarettetso atet ñerra'm ña. Ñeñto'marña yeñoteñ Melquisedecpa' atarr sherben tarro'mar ama't añcha'tare't Abrahampa' ñapa' ello bensare'tampeñ.

⁸ Ñeñt yenten arr patsro ñeñt corneshatets Partsocop, ñetpa' arromña'tota atet penet. Tarraña ama't arromña'tota atet penet chocma aguëññañet acheñenesha' ñeñt apa'yenet Partsocop. Melquisedecpa'cho' ñaña agapaye't ñeñt apa'yesete't Partsocop. Tarraña Melquisedec ñeñt atet anaret Yompor po'ñoño ñocop ñeñtpa' atet oten ñerra'mrrate' ñapa' ama arromña'teshayaye.

⁹⁻¹⁰ Ñehua, ñato' o'ch yot Leví ama't allohuen pue'ñareshohuen, ñeta'naña agapampsanet Melquisedec ñeñt allpon apueñet Partsocop e'ñe allempocma agapan ñeñt a'p Abraham Partsocop. Ama't ama eñalletena' Leví allempopa' te'pa' o'ch yot ñapa' e'ñe pa'to' Abraham po'chtso'tsen allempo, allempo pocten Melquisedec. Ñeñto'mar te'pa' o'ch yot levína'tarnesha' ñeñt po'taruas pene' o'ch cobran acheñenesha' attoch allpon apa'yenet Partsocop, ñeta'netepa'tña cobra'ña allempo Melquisedec. Ñeñto'marña yeñoteñ Melquisedecpa' atarr sherben, ello metana'tuenan levína'tarnesha' ñeñt corneshatyets Partsocop.

¹¹ Ñehua, yeñoteñ ahuat allempo apare'tta israelnesha' ñoñets ñeñt atet anaret, ñeñtpa' añ orrtate' levínesha' ñeñt corneshatyestset' ahuat Partsocop. Tarraña añ ñoñets ñeñt orrtat cornaneshachno ñeñtara levínesha'pa' ñeñtpa' amach erroteno't a'cohuentaterranetoña Yomporecop. Ñerra'm po'ñoçhcha' a'cohuentatenyeñ amate' eso'mar huapoña Cristo ñeñtcha' corneshatosets ello ñeñt atet corneshate't Melquisedec, ñeñtpa' ama atteye' corneshatoso ñeñt atet corneshaten Aarón ñeñtara levína'tarnesha'.

¹² Ñehua, yeñoteñ ñerra'm esempo Yomporpa' orrtaterran po'psheñeñ ñeñtcha' corneshaterrets po'poñone't, yeñoteñ añ ñoñets ñeñt atet anaret ñeñt orrtat cornaneshha' levína'tarnesha' ñeñt ñoñtsorpa'cho'ña o'ch cha po'poñetuerr.

¹³⁻¹⁴ Yeñoteñ Yepartseshar Cristo ñeñtña otenña Yompor po'ñoñ ñeñtcha'ña ello corneshatosets. Yeñoteñ ñapa' ama levína'tareyaye, ñapa' judámereñtsoro't eñalleta, ñeñt po'poñ

mereñtsor ñeñtara israelena'tar. Ñetpa' ama anareteyayeto o'ch corneshatet Partsocop ñeñt atet anareta levína'tarneshacop. Moiséspa' ama esoye' sochaneto ñocpuet ama't puesheñarrota attoch corneshatet. Ñaña ñetpa' ama't puesheñarroteta ama eseshaye' tetso altaro allotecma sherbeñet Parets.

¹⁵ Elloña yeñoteñ o' po'poñet ñeñtcha' e'ñe cohuen corneshaterrets tarro'mar allempo orrta Cristo, ñach corneshaterrets atet anarete't Melquisedec. Ñapa' ama atteyaye ñerra'mrrate' atet anarete't levína'tarnesha'.

¹⁶ Atto corneshatos Cristo ñeñtapa' ama añecpayaye attoch allo'na corneshatnen levína'tar ñeñt atet anaretenet ñocpuet. Ñapa' añecopña corneshaterr Partsocop tarro'mar ñapa' ña atarr ahuaencatesha' ñeñt ama arromñañeshayaye ama't erponaña.

¹⁷ E'ñe Cristocop eñotateney añ ñoñets ñeñt atet anare't Yompor po'ñoño, ñeñtapa' atet oteñ Pompor:

Papa' attoch pecorneshaterrpa' ñeñtapa' amach huañerro ama't e'ñe errponaña. E'ñe atet o' pa'llsensareterra atet ñerra'm Melquisedec ñeñt corneshatatse't ahuat.

¹⁸⁻¹⁹ Ñeñt ahuatoteñ ñoñets ñeñt atet nonaye't Moisés ñeñtcha' atet yepohueneñ ñeñtña te'pa' o'huañcha' ye'cua'per tarro'mar ñeñtapa' ama eñalle po'huamenc attoch ñeñtcha' ya'cohuentaterre' Yomporecop, e'ñe orrena atarr yetorra'yese't. Tarraña te'pa' o' orrtterrnyaya po'poñ ñeñtña'pa' ello atarr sherben ñeñtcha' ya'cohuentaterre' Yomporecop esheccha' ye'cherr Yomporesho ñeñtcha'ña atarr yeyemterraña te'.

²⁰ Yomporpa' e'ñe ña pa'so'chño nan po'ñoñ allempo llesensan Cristo ñach corneshaterrets errponañohuen.

²¹ Po'potantañechno ñeñt corneshatyets ñeñtara levína'tarnesha' allempo acornesha'taretetyeset ñetpa' ama Yomporeye' nahueto pa'so'chño attoch corneshatyaset. Tarraña Cristo allempo allsensareta attoch corneshatos, ñeñt eñoraten Yompor Cristocoppa' ñeñtña'pa' atet oten:

Yompor o' nan po'ñoñ e'ñe ña pa'so'chño ñeñto'mar amach errotenot a'po'poñetuerrano po'ñoñ; (ñeñtapa' atet ot Cristocop): "Papa' attoch pecorneshaterrpa' ñeñtapa' amach huañerro ama't e'ñe errponaña. E'ñe atet o' pa'llsensareterra atet ñerra'm Melquisedec ñeñt corneshatatse't ahuat."

²² Ñeñto'marña Jesúsapa' eñotochtaterrenay po'ñoñ atto Yomporpa' a'pocaterrenay et-serra ñeñtña atarr sherbets, ello o' metana'tuerran ñeñt atet a'pocatonaye't ahuat.

²³ Ñeñt ahuatoteñ cornaneshachno ñeñtara levína'tarnesha', ñetpa' epaye' shonta'nmuet tarro'mar chocmach rromayesete't attoña o'huañcha' allo'na corneshatyenesnet. Ellopa' o'chcho' huapa po'psheñeñ ñeñtara levína'tar ñeñtcha' alla corneshaterrets. Ñeñto'mar epaye' shonta'nma ñeñt corneshatyenesnomtse't ahuatoteñ.

²⁴ Tarraña Cristopa' errponañohuencha' corneshaterr tarro'mar ñapa' ama arromñañeshayaye.

²⁵ Ñeñto'mar Cristopa' ña eñotene' attoch chocma a'queshpatenan allohuen ñeñt e'nene' Yompor ñerra'm e'ñe pueyemteñotet ña, tarro'mar ñapa' chocma allo'tsen Pomporesho allecma a'pocaterrenay ñeñt e'ñe cohuen yocop.

²⁶ Ñeñtapa' e'ñeca'ye pocte'ña yocop o'ch yechen Yecorneshar ñeñt Cristo tarro'mar ñapa' e'ñe cohuen Parets, ama eñalle po'chñar ama't mamesha ñeñtcha' a'sosyatene'. Ñapa' o' sohanerran allohuen ñeñt cotene' sosya'tsañ o' alla cherr allohuanen Yompor pue'ntaño allña partsotapretenan Pompor.

²⁷ Ñapa' ama atteye' pso ñerra'm po'potantañ cornaneshachno ñeñt ahuatoteñ. Ñet pate'tets yetpa' epaye' muetsete't payarachno; ñeñt eyarra po'rraspa' alloña peretnatane'tña cornaneshachno po'chñar. Ellonetpa' o'ch peretnateñet ñaña allohuen

acheñenesha' po'chñar ñeñtara eyarra po'rraso. Tarraña Cristo ñapa' e'ñe parrocha shatan e'ñe ñañeña po'rras allohuenacop ochñartsocop allempo rroma yocop e'ñe ña puemnenñoñ; ñeñtapa' attoña tsa'tuerrnaya yo'chñar Pomporesho.

²⁸ Moisés ñeñt atet nan ñoñets ahuatpa' ñeñtapa' acheña na'yesh ñeñtcha' corneshatyetsets atteta ñerra'mrrate' ya ñeñtey ama cohuenacmaye' es petso. Tarraña allempo met allpon charpa' allempoña Yomporpa' o' alla nerran po'ñoñ e'ñe ña pa'so'chño. Allempoñapa' nerran Puechemer ñeñtcha' corneshaterrets ñeñt e'ñe cohuenare' es pa'yets Partsocop; ñeñtapa' amach huañerro ama't errponaña. (Ñeñto'marña Cristopa' e'ñe etsotuan ñeñt nanac sherbets.)

8

Jesúspa' ña a'pocatañtertsa e'ñe etserra yocop

¹ Ora allpon ñeñt o' notuanmas ñeñtapa' e'ñe po'ñoñ atet notenes: ñeñt atto atarr sherben Cornesha' Cristo te'ña ñapa' o' alla anorruerr Parets po'cohuenrot all anen po'conañño all pue'ntañño. Allñapa' o' alla partsotuerr ñañña.

² Allñapa' o' atarr sherba'huerr e'ñe allohuanen Parets po'prahuo all e'ñe po'ñoñ allo'tsen Yompor. Ñeñtapa' ama atteyaye ñerra'm patso'mar puerahua' ñeñt tomaten acheñ. Allpa' Yomporña tomatene'ña po'prahua' e'ñe ña pue'ntañño.

³ Yeñoteñ allohuen ñeñt corneshatets Partsocop, ñetpa' añecopña anarettenet attoch ñetcha' es apuenet Yompor ñañña ñetpa' o'ch muetsenet payaraçhno Yomporecop attoch peretnatenet po'chñaret. Ñeñto'marña Cornesha' Jesús, ñocoppa'cho'ña e'ñe pocte' o'ch es apan Pompor. (Ñeñtapa' añña apuerran Pompor e'ñe ñañeña po'chets attoch rroma yocop.)

⁴ Ñehua, ñerra'm ñapa' allo'tsenaraña añe patsropa' ama't mamesha amate' pocteye' enteññeña ñeñt cornaneshatyets añe patsro, tarro'mar ñetpa' añach e'ñe cohuen entenent o'ch es apueñet Yompor ñeñt e'ñe atet nanete't Moisés po'ñoñ.

⁵ Ñeñto'marña yeñoteñ ñeñt atet sherbenet ñet ñeñtapa' atta toma'nteñet ñeñt atto po'ñoñ Cristo e'ñe cohuen sherben Parets po'prahuo ñeñt pue'ntañño'tsen. Añach sherbenet ñeñt attema'ttetsa ñeñt e'ñe po'ñoñ atet muenen Yompor. Yeñoteñ ñeñtecma sherbete't tarro'mar ahua't allempo Moiséspa' ahua'ch tomataneñ ñeñtcha' po'prahua' pa' Parets arr patsro, all aspeno Yomporña gate' ñeñt toma'ntenaya e'ñe ña po'prahua' ñeñt pue'ntañño'tsen. Allempoñapa' atet otan Moisés: "Po'ñoñhpa' e'ñech atet peyechcaton ñeñtcha' neprahua' nepa' añ patsro allcha' yeçhena Necamquëñ." Arrpa' allohua atet otan Yompor Moisés.

⁶ Tarraña Cornesha' Cristo te' atto sherberr all pue'ntañño, ñeñtapa' e'ñe po'ñoñ poc-tacma cohuen. Ello metana'tuenan ñeñt atet sherba'yese't ahua'toteñ cornaneshachno arr patsro. Tarro'mar te' ñeñt atet o' a'pocatañterray Pomporeshopa' ñeñtña e'ñe poc-tacma cohuen yocop, tarro'mar añ a'pocatañetspa' pa'namen oteney ñeñtcha' atet perrnay coshateñtso.

⁷ Yeñoteñ ñerra'm e'ñe cohuen a'pocatyene't ñeñt ñenma't allempopa' amach pallte-nañe o'ch alla a'pocatañterryeterr e'ñe ello etserra.

⁸ Yeñoteñ ñeñt ahua't a'pocatañetspa' ama e'ñeye' cohuen yenpa'ye'te tarro'mar allempo Yomporpa' ama pocteye' entane'te israelnesha'. Tarro'mar po'ñoñpa' atet oten ñeñt aquellcare't ñeñtapa' atet ot Yompor:

Chapcha' allempoch nenererr po'poñ neñoñ israelena'tarneshacop ñañña judána'tarneshacop, ñeñtapa' allochña na'pocatañterranet e'ñe cohuen etserra.

⁹ Ñeñtapa' amach atteyaye ñerra'm ñeñt atet na'pocatanet ñenma't pa'tañneshañ allempo nerraneta' Egiptot e'ñe cohuen na nehuamenco't. Tarro'mar allempo ñetpa' ama

atŕeye' p̄oneto ñeñt̄ atet̄ nenanet̄ ñeñt̄cha' a'poc̄tatahuetañ. Ñeñto'mar napa'cho'ña at̄ta na'ypo'ñanet. Ñeñt̄pa' atet̄ ot̄ Yompor allem̄po.

¹⁰ Allem̄poña' o' alla ot̄errerr̄ Yompor ñeñt̄ara:

Esempohuañenpa' o'ch̄ alla na'poc̄tatererr̄ po'poñ̄ ñeñt̄ israelena'tarneshacop. Ñeñt̄pa' atet̄cha' neperranet̄ allem̄po eshec̄cha'ña neçhapaterranet̄ neñoñ̄ e'ñe ñet̄ pueyoçhreto, ñeñt̄pa' ñato' o'ch̄ net̄ma'ntacha at̄to neñoñ̄pa' o' aquell̄caret̄terret̄ e'ñe ñet̄ pueyoçhreto ñeñt̄cha' cot̄ape'chaterrahuet̄ña e'ñe cohuen. Allem̄poña po'ñoçhpa' e'ñech̄ Po'yomporer̄ perr̄net, napa'cho'ña e'ñech̄ neyoçhrenesha' neperranet̄ ñamet̄.

¹¹ Ñaña allem̄po allohuenet̄pa' e'ñech̄ eñotuerr̄nanet̄ ñeñt̄cha' atet̄ noct̄ape'chaterranet̄ cohuen pueyoçhreto. Allohuenet̄pa' e'ñech̄ at̄tecma eñot̄err̄net̄ pompor̄neshohuenet̄ ama't̄ ñaña añeñolleshohuen ama't̄ ñeñt̄ atarr̄ sherbets̄ ama't̄ ñaña ñeñt̄ ama esoye' enteñeto. Ñeñto'marña allem̄po ñeñt̄ añcha'na'tpo' entetsapa' ama pallteno o'ch̄ yeçhatan po'potantañ̄ pamo'ts̄ ama't̄ ñaña pa'mo'nasheñ. Amach̄ esesha' ot̄errahuet̄e'te'te'pa' añ̄ poc̄tetsa o'ch̄ seño'ter̄ Yompor, tarro'mar allem̄po' o'ch̄ e'ñe eñotuerr̄net̄.

¹² Ñaña napa' e'ñe nemuereñoñanet̄pa' neçpret̄nerranet̄cha' po'ch̄ñaret, amach̄ alla neȳerpuerranete'te'po'ch̄ñaret. Arrpa' allohua atet̄ ot̄ Yompor̄ ahuat̄.

¹³ Ñeñto'marña yeñoteñ̄ ñeñt̄ at̄to Yomporpa' all̄ oten e'ñe etserra o'ch̄ a'poc̄taterrey, ñeñt̄pa' tarro'mar ñapa' o' a'ypo'ñerran̄ ñeñt̄ at̄toch̄ ñanom a'poc̄tatyeñ. Ñaña ñeñt̄ ahuatoteñ̄ a'po'tateñets̄ te'pa' o' a'ypo'eñare'terra, ñeñt̄pa' huañerr̄cha'.

9

Ñeñt̄ patso'mar Yompor po'prahua'pa' añ̄ toma'ntateññañet̄ ñeñt̄ e'ñe ña pue'ntaño'tsen po'prahua'

¹ Ñehua, yeñoteñ̄ ñeñt̄ atet̄ a'poc̄tatanetañ̄ ahuat̄ Yompor ñeñt̄pa' echenan̄ ñoñets̄ anaret̄ ñeñt̄cha' atet̄ sherb̄a'yeset̄ Parets. Ñaña arrcha' e'ñe etsotet̄ña ñeñt̄ Yompor̄ecop e'ñe ña po'prahuo, ñeñt̄ puerahua'pa' ama't̄ acheña tomatene' arr̄ patsro.

² Ñehua, ñeñt̄ puerahuat̄atse't̄ ahuat̄ ñeñt̄pa' shetamtsopo'. Ñeñt̄ tomatenet̄ ñehuapo'tpa' ñeñt̄ otenet̄ Partsopahuesho allo'tsen all̄ orratenet̄ huerare ñaña allo'tsen mesa allecma nenet̄ pan Partsocop.

³ Allohuanen̄ allohua ayottan̄psaret̄ besmo po'ppahueñ̄ shetamtsopo' ñeñt̄ otenet̄, E'ñe Partsopahuesho Po'ponro.

⁴ All̄ña'pa' allo'tsen altar, eno'tña'pa' allecma a'crratenet̄ tsach̄ puese' ñeñt̄ atarr̄ eñmosañtetsa Partsocop; ñeñt̄ña altar eno'marpa' e'ñe cohuen orotattena. Ñaña allohuanen̄ po'ppauño allo'tsen tsapot; ñeñt̄pa'cho'ña eno'marpa' orotaten. All̄ña añño'tenet̄ mapuettall̄ allo aquell̄care't̄ Yompor po'ñoñ̄ ñeñt̄ a'poc̄tat̄ Yompor̄ ahuat̄ acheñenesacop. All̄ añño'tenet̄ ñaña pajo' orotaten, all̄ña esha'taret̄ coñe't̄ maná ñaña tsapoto allo'tsen Aarón po'carr̄ ñeñt̄ tapa'llatse't̄ ahuat̄.

⁵ Tsapoto eno't̄ all̄ ten epsheña mellaño'teñma't̄ ñeñt̄ ayeçhcataret̄ ñeñt̄ otenet̄ querubíñ̄ ñeñt̄ toma'ntenaya Parets po'partsoña ñeñt̄ chorrets̄ all̄. Querubíñ̄ pa'pa'yopa' alloña ca'matenan̄ tsapot eno't̄ allot̄ e'tam̄penet̄ tsapot. All̄ña'pa' allecma peret̄nanete't̄ Yompor po'ch̄ñaret. Ñehua, te'pa' o'ch̄ noterr̄serr̄ po'poñeçhno ñeñt̄ pa'namen at̄ma'ntataret̄ all̄.

⁶ All̄pa' pa'namen añño'taret̄etyetsa ñeñt̄ all̄ puerahuo. Ñaña ñeñt̄ cornaneshatyets̄ Partsocoppa' çhocmach̄ be'tosyenet̄ ñeñt̄ all̄ puerahuo ñehuapo't̄, all̄cha'ña etsotayenet̄ ñeñt̄ atet̄ anaret̄ Partsocop.

⁷ Tarraña ñeñt̄ allohuanen̄ po'ppahueñ̄ Parets po'poner̄ ama eseshaye' be'tetsoña all̄. All̄pa' añach̄ be'tets̄ puesheñarr̄ cornesha' ñeñt̄ pa'm̄cha'tare'ter̄ pen po'potantañ̄

cornaneshachno. Ama't ñapa' paterr charpa' e'ñech parrocha be'ten. Ñaña chocmach anman eyarra po'rras alloch peretnenanet Yompor po'chñaret. Ñeñtpa' e'ñe ñocpa'na po'chñarecop ama't ñaña allohuen acheñenesha' po'chñarecpuet.

⁸ Ama't ñeñt ñehuapo'tsen puerahua' allecma sherba'yen cornaneshachno ñeñt atet anaret Partsocop, tarraña e'ñe allohuanen Parets po'ponro añach be'tets ñeñt nanac corneshatets e'ñe ñapue't. Ñeñto'marña te'pa' Parets Puecamquëñña yeñotatene' atto ama atoram̄psareteyayye allohuenacpay attoch ye'cham̄peña Yompor all partsoten.

⁹ Ñeñt allempopa' aña toma'ntena ñeñtcha' atet cohuen posa tsapa'tonet Cristo allem-poch huapa; atet ñerra'm te'ña o' huapa Cristopa' o' etsotua. Tarro'mar allempo all Parets po'prahuo ama't es apuenetañ Yomporecop ñaña ama't es muetsayenetañ Yomporecop, ñeñtpa' arepa't a'cohuentatenanoña añ poctap̄ña ñeñt atet sherbenayeyñ Yompor.

¹⁰ Tarro'mar ora atet anarettet allempo ñeñtpa' añecpa sherben ñeñt e'ñe po'chtsocpueta ñeñt atet ñerra'm ñeñtcha' rrenet ñaña ñeñtcha' orrenet ñaña atto apa'yese't Partsocop. Ñeñt orapa' añecpa sherbe't attoch a'poctatenet po'chets Partsocop. Ñaña ñeñtpa' mamecpa anare'tta esempohuañenña Yomporpa' orrtaterrnaycha' po'poñ ñeñtcha' ello nanac yesherberre'.

¹¹ Ñeñtpa' e'ñe tarremphua e'ñe etsoterra allempo huapa Cristo, ñeñtña orrtatose' ñeñt ello nanac sherbets te' yocop. Ñapa' atto corneshatospa' o' alla be'tosuerr allohuanen Partsopahuesho all pue'ntaño ñeñtña ello nanac sherbets Partsocop. Ñapa' e'ñe metana'tuerran ñeñt sherba'yestse't ahuat puerahuo Partsocop ñeñt tomaten acheñ arr patsro. Tarro'mar ñeñt Parets po'prahua' ñeñt pue'ntaño'tsenpa' ama acheñeye' tomatenaye ñaña ñeñtpa' ama añe patsroye' atomatareteyaye.

¹² Ñaña Cristo allempo be'tosuerr allohuanen Partsopahuesho ñeñtpa' e'ñe parrocha be'tosuerr all pue'ntaño. Ñaña ñapa' ama añeye' anmo eyarra po'rras — cabra amapa' huacshetoll. Ñapa' e'ñe ñañeña po'rras pomhuerr. Ñaña ñapa' e'ñe parrocha pomanña po'rras all ama't allohuen pa'namen acheñeneshecop po'chñarecop. Attoña e'ñe cohuen a'poctatonay attotcha' a'queshpaterrey, ñaña ñeñtpa' amach ahuañaña'terro ama't errponaña.

¹³ Ñehua, yeñoteñ ñeñt atto shellcapechyesane't cornesha' acheñenesha' cabra po'rraso amapa' huaquësh po'rraso amapa' huacshetoll po'tsapñero ñeñt a'poyenet altaro, ñeñtpa' attoña a'poctatenan ama't erra'tsena acheñer po'chets Partsocop, ama't erro'teno a'sosyatena Partsocop.

¹⁴ Tarraña ñeñtpa' e'ñe po'chtsochaya a'poctatarettenet Partsocop. Tarraña allempo ashataretta Cristo po'rras, ñeñtpa' ellonet añecopña nanac sherbos attoch a'poctaterrnay ama't ñeñt atet yocape'chyen yeyochro. Ñeñto'marña allempoteñpa' amach alla yeyemtererro ñeñt atet yeye'chcatyen arr patsro ñeñt ama a'queshpatañeyaye. Añcha'ña e'ñe cohuen yesherven Yompor ñeñt ama arromña'teshayaye. Cristopa' ñeñto'marña ello atarr sherbeney atto pomuerra ñañeña o'ch rroma yocop ama't ñapa' ama eñalle po'chñar ama't e'ñe mamesha. Ñeñtpa' e'ñe Yompor Puecamquëño't atet posa; ñeñtña Camuecñetsarpa' ama ahuañaño.

¹⁵ Atto Jesucristopa' ña eñosets yocop attoch a'poctatuerrnay e'ñe cohuen etserra. Tarro'mar allempo rroma Cristo ñeñtpa' añecopña sherben attoch peretna'huerrnay yo'chñar ñeñt o' allpon ye'pohuen ahuatoteñ allempoteñ yoc'ta'nom ñeñt ñanom a'poctatañtatsañ. Allochñapa' allohueney ñeñtey o' ya'hua'ñare'tterra o'ch yame'ñera, ñapa' aphuerreycha' ñeñt o'patatenya ñeñt atet otene'y attochña yapa' corretsayach errponohuañen.

¹⁶⁻¹⁷ Ñehua, yeñoteñ arr patsro chocma eñall puesheña'tets acheñ ñeñt atet petsa o'ch quellca'nman ñoñets all oten ñeñtcha' allpon puechatsre'chno apa'nman pamo'tsesha'

ñerra'm esempocho rroma. Tarraña allempo orameñ correna ñeñt quellquene' e'ñe ña po'ñoñ, añña ñeñt o'patatyenapa' amach errotent amnatareteto o'ch yoret e'ñe allem-pocma. Tarraña ñerra'm esempocho eñoteñet po'ñoñ o' rromuen ñeñt o'patatenahuet, allempoñapa' aparetetyesetcha' ñeñt allpon o'patataretetyenet. (Ñeñto'marña yapa' yeñoteñ allempo rroma Cristo atto ashataretta po'rraspa' ñeñt allpon o'patatyenya yañña ñeñtpa'cho'ña e'ñe yocma.)

18 Ñeñto'marña ahuat allempo ñenmañ a'pocstatete't Partsocop, ama't allempopa'cho'ña o'ch muetset eyarra, po'rrasoñapa' allochña shellcata'tyeset. Ñeñtpa' attoña e'ñe a'pocstatete'tña po'ñoñ.

19 Ñehua, Moiséspa' atet pa allempo. E'ñe eñotatuan acheñenesha' ora allpon atet oten Yompor po'ñoñ ñeñtcha' atet pet, allempoña ñapa' o' yoran carrnero pue'ch ñeñt e'chomaret tsama'to ñeñtña' huanquë' hisopoch puetacro, alloñapa' yoran ñaña huacshetoll po'rras ñaña cabra po'rras, tsech epuet oñ. Allña e'choman carrnero pue'ch ñeñt huanquën tsachpo allempoñapa' shellcata'tan allo libro ñeñt all anaret Yompor po'ñoñ, attoña shellcana'tampesuan ñaña allohuen acheñenesha'.

20 Allempoñapa' atet otan acheñenesha': "Añ po'rras ñeñtpa' alloña Yomporpa' a'pocstatennas ñeñt atet nenan po'ñoñ socop ñeñtcha' atet sepa."

21 Ñaña attecma pan ñaña puerahua' ñeñt shetamtsopo' o' shellcapo'ch ñeñtara errasatso. Ñaña ora allpon coymechno ñeñt allo'tsa'yen allecma sherbeñet Parets, ñeñtpa'cho'ña e'ñe shellca'ta'tue.

22 Ñehua, yeñoteñ ñeñt atet oten ñoñets ñeñt atet anaret, allohuen es po'rrasochña e'ñe a'cohuentatenet Partsocop. Allohuen pa'namen ñeñt allo'tsa'yenpa' e'ñe autsa allohuen a'cohuentatue atto ashellcana'taretta eyarra po'rraso. Ñeñto'marña yeñoteñ ñerra'm ama es muetseneto attoch shatatoñet po'rraspa' amach eseshaye' a'pretnarettetso po'chñaret.

Atto amtsaretta Cristo yo'chñarecoppa' attoña e'shohuerrnay yo'chñar

23 Ñeñto'marña yeñoteñ añe patsro puerahua'pa' eyarra po'rrasoña a'cohuentatyenetña allohuen ñeñt Partsocop. Ñeñt puerahua' añ patso'marpa' añ toma'ntena Parets po'prahua' ñeñt pue'ntaño'tsen, ñeñtpa'cho'ña attecma errasatso a'cohuentatarettena allohuen ñeñt allpon allo'tsa'yen. Tarraña ñeñt rromats Parets po'prahuacop ñeñt pue'ntaño'tsen ñeñtpa' añ muenen errasats ñeñt ello atarr cohuen sherbets.

24 Ñeñto'marña Cristopa' ñeñtecopña rroma. Tarro'mar Cristopa' ama arreye' be'tosuerro ñeñt patso'mar puerahua' ñeñt ye'chcaten acheñ ñeñt afta toma'ntenaya Yompor po'prahua' ñeñt pue'ntaño'tsen. Allña be'tosuerrña Cristo Parets po'prahuo ñeñt pue'ntaño'tsen ñeñto'marña te' ñapa' allo'tsen e'ñe allohuanen Yomporesho allña torra'huerra cohuen yocop.

25 Ñaña Cristopa' ama atteye' pso atet pena cornaneshachno ahuat. Ñetpa' chocma be'tosete't allohuanen Parets po'ponro e'ñe pate'tets char. Ñaña errasats ñeñtcha' anenet o'pono ñeñtpa' ama ñetoyaye po'rraset.

26 Tarraña Cristopa' e'ñe parrochepa anaret o'ch pomuerra ñañeña o'ch rroma attoch ashataretta po'rras. Tarro'mar ñerra'm ama atteye' anareteñepa' chocmate' rromame'tañ ama't tarrempoten allempoten e'ñe errete' aye'chcataretetsa pats. Tarraña ñeñtpa' ama atteye' po. Ñapa' añecopña huapa attoch e'ñech parrocha amtsaretta allohueney yo'chñarecop attoch ñachña yahuanmanperre' yo'chñar. Ñeñto'marña huapa allempohuach cherr yet allempoch mellapotermocha.

²⁷ Yeñoteñ ama't allohueney acheñey chocmach yerromuen. Tarraña e'ñech parrocha yerroma allempoñapa' o'ch huernaya attoch Yomporpa' eñotatyesuerrey e'ñe errotencha' entyesuerrey — ñato' e'ñech cohuen entyesuerrey amapa' ñato' amach cohuenaye' entyesuerrye.

²⁸ Attecma pa ñaña Cristo e'ñe parrocha rroma allempo amtsaretta allohuen ochñartsocop. Attoña ñapa' e'ñe ahuanmanperrey shontey allohueney yo'chñar. Ama't amtsarettañ ochñartsocop, tarraña Cristopa' allach orrterra po'pocheño. Allempoch huerra po'pocheño'pa' po'cohuenño amach añecpaye' huerro o'ch alla rromuerrerr ello ochñartsocop. Añecopcha'ña huerra po'pocheño o'ch e'ñe a'queshpaturran allohuen ñeñt chocma cohue'ña.

10

¹ Ñeñto'marña yeñoteñ Moisés po'ñoñ ñeñt atet anaret ahuat judioneshacop, ñeñtpa' ama e'ñeye' cohuenteno ñeñt atet cohuentena te' ñeñt orrtatosnay Cristo. Añ ñoñets ñeñt atet anaret ahuat ñeñtpa' aña toma'ntena ñeñtcha' e'ñe po'ñoch cohuenetuer-rtsa ñeñtcha' orrterrtsa tsapatonet. Ñeñto'marña añ ñoñets ñeñt atet anaret ahuat ñeñtpa' amach errotenot a'cohuentatanoña acheñenesha' ama't puesheñarra ñeñt muenenayeñ o'ch yemtenanañ Yompor. Ama't chocma muetsa'yesetañe't eyarračno po'chñarecop e'ñe atet oteneñ añ ñoñets ñeñt atet anaret, ñeñtpa' amach errotenot e'ñe a'cohuentatanoña acheñenesha'. Ama't pate'tets char chocma muetsa'yesetañe't ñeñt Yomporecop, ñeñtpa' ama e'ñeye' a'cohuentatane'teña acheñenesha' Yomporecop ama't puesheñarra ñeñt muenenayeñ o'ch yemtenanañ Yompor.

² Ñerra'm e'ñe po'ñoch a'cohuentatenaneña acheñenesha' eso'marte'ña o'ch alla muetsereterrña po'poñečno shonte' eyarra. Ñerra'm po'ñoch a'cohuentatenaneñ acheñenesha' ñeñt atet cotape'chyene' sosya'tsañ pueyoçhreto, eso'marte'ña alla yerpapa'taterranete'ña po'chñaret ñeñt pueyoçhro'tsa'yenet.

³ Tarraña po'ñoch epaye' yerpapa'taterranete'ña po'chñaret. E'ñe pate'tets char allempopa' o'ch alla muetserretter eyarračno añecop ñeñt atto yerpapa'taterraneterr po'chñaret.

⁴ Ñeñto'marña yeñoteñ eyarra po'rraspa' amate' errotenot ahuanmanperreyeña yo'chñar ama't toro po'rras amapa' cabra po'rras.

⁵ Ñeñto'marña Cristopa' atet otosan pompor allempo acheñetos arr patsro ñeñtpa' atet ot:

Pa te'pa' ama añeye' pemneno eyarra ñeñt amtsarettetsa pocop ñeñtcha' atarr pocshatene'. Ama't ñaña ñeñt es apa'yenet pocop. Ñeñto'marña nocop te'pa' o' pueyechatuerrnan nechets añ patsrecop ñeñt e'ñe atet pemnen pa, e'ñech nechtsot nesherbosẽ attoch e'ñe cohuen nocshatenep.

⁶ Po'ñoch te'pa' ama añeye' atarr pocshatenaye atto chamuenet eyarra pocop amapa' allempo muetsanatenet eyarra ñeñt po'chñarecpuet.

⁷ Ñeñto'marña Nompore te' napa' o'ch notap: "Napa' añecopña nohuapa arr patsro attoch netsotosnañ ñeñt atet pemnen pa, ñeñt e'ñe atet anaret peñoño nocop." Arrpa' allohua atet otan Cristo pompor.

⁸ Ñehua, ñeñt atet ot Cristo arr ñeñtpa' atto Yomporpa' ama añeye' mueneno eyarra ñeñt amtsarettetsa ochñartsocop attoch coshateñet ña. Ama't ñaña ñeñt es apa'yenet nocop ñeñtpa'cho'ña ama ñeñteye' e'nenno ñeñtcha' coshatene' ama't ñeñt achamareñ nocop ama't ñaña ñeñt amtsarettetsa ochñartsocop. Ñeñt ora añečno ñeñt atet nane't Moisés po'ñoñ atetcha' es apueñet Yompor, te'ña ñeñtpa' ama coshatenano Yompor; atet oten Cristo.

⁹ Elloña ñapa' atet oten, "Napa' añecopña nehuapa Nompore, o'ch netsotosnaþ ñeñt atet pemnen þa." Ñeñtpa' añ eñotatosey, ña a'huañatose' ñeñt ahuatoteñ atto muetsete't eyarra po'chñarecop. Attoña ñapa' nosan po'ñoñ ñach rromosets yo'chñarecop.

¹⁰ Ñeñto'marña Jesucristopa' pomosa ñañeña yo'chñarecop. Ama't parrocha rromapa' ñeñtpa' allohuenacpay. Atto ñapa' etsotenan ñeñt atet muenen Pompor yañapa' e'ñe a'cohuentaterrey Partsocop.

¹¹ Ñaña ñeñt cornaneshatyets judioneshacop ñet pate'tets yetpa' chocma tenet all altaro allotecma sherbeñet Yompor allecma muetsanaterretañe't eyarraçhno ñeñt ochñartsocop. Tarraña ama't amtsarettenañpa' amach errotenot ahuanmanoña ochñarets.

¹² Tarraña Jesucristopa' e'ñe parrocha pomuerra e'ñe ñañeña ñach amtsaretterrtsa ochñartsocop. Ama't parrocha rroma ñeñtpa' allohuenacop e'ñech errponohuañenacop. Allempoñapa' o' alla anorruerr Pompor po'cohuenrot allña partsotuerr.

¹³ Alloña cohuanan allohuen ñeñt e'moñe'tene' esempohuañenpa' a'mchechatuerranetcha'.

¹⁴ Jesucristo allempo pomuerra ñañeña, ñapa' e'ñe etsotatuerrnay attoch e'ñe a'cohuentaterrey Partsocop. Ama't parrocha rroma ñeñtpa' e'ñe allohuenacop ama't ahuatoteñ errponohuañenacop añecop ñeñt pueyochresha' pen Parets.

¹⁵⁻¹⁶ Ama't Yompor Puecamquëñ ñeñtpa'cho'ña eñotöchtatennay tarro'mar ñapa' añ eñotatye't ñeñt atet otye't Yompor, ñeñtpa' atet ot:

Esempohuañenpa' napa' o'ch na'pöctaterranet po'pocheño. Ñeñtpa' atetcha' neperanet. Allempo esheccha'ña nechapaterranet neñoñ e'ñe pueyoçhreto. Ñeñtpa' ñato' o'ch netma'ntacha atto neñoñpa' o' aquellcare'tterret e'ñe ñet pueyoçhreto ñeñtcha'ca'yeña cotape'chaterrahuetña e'ñe cohuen.

¹⁷ Ellonetpa' atet ote't allempo:

Napa' amach alla neyerpuerranete'te po'chñaret. Ama't ora atto atpare'tnete'tpa' amachña ñeñña alla neyerpuerranete'te.

¹⁸ Ñeñto'marña yeñoteñ atto Yomporpa' o' peretna'huerrnay yo'chñar amach alla yerpuerrnaye'te ñeñto'marña amach alla es yemtserre'te ñeñt yo'chñarecop.

Te'pa' ama es palltetso yocop attoch e'ñe cohuen ye'ñorana'tera Yompor Parets

¹⁹ Ñeñto'marña masheñneshacha' ñaña noçhaneshacha' te'pa' yeñoteñ e'ñe pocte' yocop e'ñe ya yeçhore'teño't Yomporpa' e'ñech yeyemteña e'ñe atet ñerra'm yamo'ts yeyemtena e'ñe allame'tets. Ñeñtpa' añ toma'tena ñerra'mrrate' o' yebe'terr e'ñe allohuanen Parets po'ponro all po'prahuo atet pe't ahua't cornanesh'a' ñeñt be'tostse't ñapue't ñeñt anmaye't eyarra po'rراس all, tarro'mar te'ña atto o' rroma Jesucristo yocop, po'rراسña ñeñña e'ñe ya'pöctaterre'ña ya attoch ye'ñorana'tera ama't ñeñt atarr Parets.

²⁰ Po'ñoçh Jesucristo e'ñe ña po'chtso't orrtaterrnay po'poñ etserra attoch yapa'cho'ña o'ch yeçhapampera Yompor attoch ye'ñorana'tera. Ñeñtpa' e'ñe cohuen attoch yeyemteña e'ñe po'ñoçh. Ñeñtpa' añ toma'tena ñerra'mrrate' Cristopa' o' çhapterrey allohua yottampeññañet besmo Parets po'ponro all po'prahuo.

²¹ Jesús te'pa' yeñoteñ ñeñña atarr Yecorneshar yepen ñeñt çhets Yompor pa'paclo, ñapa' allña añcha'taretetuerra Yomporepahuo añecop allohuen ñeñt pueyochresha'çhno pen Parets.

²² Ñeñto'marña e'ñe yeyemteño'tpa' amach yemcha'nañotayaya yeçhore'teñe. E'ñepa'chña yeñmañesha' yeyoçhrocmañen yeçhore'teñ, tarro'mar Cristo po'rراسña o' a'cohuentaterrnay yeyoçher atto te'pa' o' e'ñe cohuen yocape'chyerr, amachña allo'na yerpapa'tatnenye yo'chñar. Ñeñtpa' añ toma'tena atto yapa' e'ñe cohuen apataretey oño ñeñt poctetsa Partsocop.

23 Chocmuepa'chña yecueñña ñeñt̃ yeyemtena allochñapa' a'queshpaterreycha', amuepa'chña cha ye'charrtatatstenoña yeyocher tarro'mar Yompor ñapa' chocmach a'pocstaterney po'ñoñ ñeñt̃ atet oteneý.

24 Ñaña añepa'chña e'ñe cohuen ye'nen attoch yeyenpannena allohueney allochñapa' attoch e'ñe cohuen yeychen morrentanna'teñets ñaña e'ñech cohuen es yeyenpannena.

25 Ñaña chocmuepa'ch yesen all chocma yapchena e'ñe yame'ñeñoñ Cristo. Amachña atta yeḡatsto ñeñt̃ atet pena po'potantañ ñeñt̃ ama huetso allecma yapchena. Añcha'ña atet yepena allempo yapchena e'ñech cohuen yoctape'chatannena Yomporecop. Elloña te'pa' chocmach yapchena ñeñt̃ nanac cohuentetsa yocop tarro'mar yeñoteñ te'pa' o' cherrmoch allempoch huerra Yepartseshar Cristo.

26 Tarro'mar ñerra'm o' yeñoter po'ñoñ Cristo rromats yocop attoch a'queshpaterrey ñaña ñerra'm ñeñt̃o' yame'ñerra tarraña ñerra'm allo'na yesen ochña'tare'tnomuets e'ñe ya yemneññoḡpa' allempopa' amach eñalleña ñeñt̃cha' rromuerrtserr po'pocheño ñeñt̃cha' yetsa'terroyerr ello yo'chñar.

27 Ñeñt̃ allo'na sets ochña'tare'tnomuets añach o'paterrahuet coñcheñets ñeñt̃ atarr añcha'nochtetsa ñeñt̃ara Yompor po'yorochenña ñeñt̃ tso'pa' e'ñech e'nuerran allohuen ñeñt̃ e'moñe'tene' Yompor.

28 Ñehua, ahuat̃ ñerra'm eñall ama't puesheñarra ñeñt̃ atpare'taye't̃ Moisés po'ñoñ, ñerra'm eñall epsheña amapa' ma'psheña ñeñt̃cha' a'metanḡpene' ñeñt̃ña atparñat̃pa' ahuo'ch muetse allohuen acheñenesha'. Ama't puesheñarrapa' amach eñalleña ñeñt̃cha' morrentaya.

29 Elloña ñeñt̃ ama esoye' entenaye Yompor Puechemerpa' atarrcha' nanac a'coñchatare'tterret. Elloña po'rras ñeñt̃cha' a'cohuentaterrahuetañ Partsocop ñeñt̃pa'cho'ña ama esoye' enteñeto ama't ñeñt̃ errasatser ñeñt̃ etserra a'pocstatañtetsa. Elloña ama't Yompor Puecamquēñ ñeñt̃pa'cho'ña chach sasare'teññañet ñeñt̃ara Puecamquēñ ñeñt̃cha' morrenterrahuetañ attoch chorreranetañ. Ama't señoñeña elloña atarrcha' nanac acoñchatare'tterra ñeñt̃ atet atarr tsena'tene' Yompor Puechemer.

30 Tarro'mar yapa' yeñoteñ Yomporña atet otets: "Napa' ñeñt̃encha' coñchatterahuet, napa' ñeñt̃encha' tsa'tatterahuet." Elloñapa' atet oten Yompor: "Napa' ñeñt̃encha' otteñe'cherrahuet attochña necoñchatteranet ama't ñeñt̃ neyochreshachno nepeneñ."

31 Ñeñt̃o'marña yeñoteñ atarr yorocheno'tsen ama't allohuen ñeñt̃ aña o'patenaya ñeñt̃ po'yorochenña pen Yompor ñeñt̃ ama arromñañeshayaye.

32 Tarraña te'pa' o'ch notas, o'ch alla seyerpuerra atet seḡa ahuañmo'cha allempo e'ñe errtes eñoterre' po'ñoñ Cristepa'tña a'queshpatañ. Ñeñt̃pa' allempo ñanom a'puetarsamḡsaretta seyoḡhro soctaḡña. Allempopa' ama't atarr amuroḡttatareteseñ sañapa' e'ñe sa'huantha'huanom pa'namen topateñtsoḡhno ñeñt̃ setantyesoya; ñeñt̃pa' e'ñe atet ñerra'mrrate' sapa' cho atarr seḡllarena.

33 Patanta'ttsospa' atarrca'ye che'tatsetasete't̃ e'ñe allo'tsa'yen allohuen acheñenesha'. All atarr sa'muroḡttataretta. Elloña ñerra'm esempo muroḡttateñet po'potantañ samo'tsesha' sapa'cho'ña chocmach semuroḡttapretanete't̃.

34 Po'ñoñ ñeñt̃ armanatare'ttase't̃ o'ch ayottamḡsarettet, sañapa' e'ñe sellcapreteñoñanetpa' chocmach e'ñe cohuen seyenpuenanet. Ama't allempo puerratamḡsatsre'tase't̃ ñeñt̃ se'moñe'tyesaye't̃, sañapa' e'ñech socsheñesha' sa'huantenanet. Tarro'mar sapa' señoñeñ o' secherr ento ñeñt̃ atarr sherbets ñeñt̃ ello metana'tuene' atto sherbenes sechatser, tarro'mar ñeñt̃pa' ama aptsaño.

35 Ñeñt̃o'marña masheñeshacha' o'ch alla noterrser, amach alla sequeḡpatsterrñañe ñeñt̃ atto atarr seyemteña Cristo tarro'mar Yomporpa' ñachña atarr cohuen setsa'terraya.

³⁶ Te' sapa' aña sepalltena attoch e'ñe acoḡa sa'huantha' huanom ñeñt' atarr echarr sentyen, attochña allo'nach sesen ḡa'yesnomue' ñeñt' atet muenen Yompor, attochña Yomporpa' apuerrescha' ñeñt' e'ñe atet otenes.

³⁷ Tarro'mar yeñoteñ Yompor po'ñoñ ñeñt' aquellcareḡ ahuatoteñ ñeñt'pa' Cristocop atet oten:

O' mameshamerra o'ch orretuerra ñeñt'cha' huerrtsa, te'pa' amach alla atomato pue'ntaño.

³⁸ Tarraña Yomporpa' atet oten:

Ñeñt' e'ñe pocte' nenten na ama't erra'tsena acheñer tarro'mar e'ñe pueyemteñoḡen na, ñeñt'ña' corretsach. Tarraña ñerra'm esesha' nepuerranḡperraya ñapa' o'huañcha' allo'na coshatenen.

³⁹ Tarraña yapa' ama atteyayye ñerra'mrate' ñeñt'cha' puerranḡperraya Yompor ñeñt'cha' chenquerrtsa. Yapa' añeyca'yeña ñeñt'eycha' chocma yemterrada Yompor ñeñt'eycha' a'qeshḡatarettertsa e'ñe yecamquëñohuen.

11

E'ñe yeyemteñoḡ Yomporpa' e'ñech cohuen es yetsotayen ñocop

¹ Ñehua, allempo po'ñoḡh yeyemteña Yompor e'ñe yeñoteñ chocmach apuerrey ama't esempo ñeñt' atarr yecuen te' e'ñe yenamueñoḡ. Ama't ama yenteña' e'ñe yeyochroña yeñoteñ ñeñt' yecuen te' po'ñoḡhpa' apuerreycha' ama't esempo.

² Yatañneshañ ahuatpa' atarr yemuetyeseteḡ Yompor. Ñeñt' atto yemuetyesyeteḡ Yomporña' e'ñe pocte' entyesaneteḡ.

³ Ñaña ya e'ñe yeyemteñoḡ Yompor te'ña'pa' o' yeñoter allpon ñeñt' yentyen arr patsro ñeñt'pa' e'ñe po'ñoñoḡa yeḡhca'hua. Allempopa' ama't coñe'ta ama es orrtetso ñeñt'cha' pa'namen yeḡhcatyes ñeñt' atet yentyen te'.

⁴ Ñaña Abel ahuat atto yemtaneḡ Yompor, ñapa' apan Yompor ñeñt' atarr coshate'. Pa'mo'nasheña Caín ama't apañeñ ñaña Yompor, ñeñt'ña' ama coshatano Yompor. Ñeñto'mar Yomporpa' e'ñe cohuen agapan ñeñt' aḡ Abel; attoña Yomporpa' eñotatanet e'ñe pocte' entapretan Abel. Tarraña Abel ama't rromaña' atto atarr yemtaneḡ Yompor, ñeñt'pa' e'ñe teme'ttsen eñotateney ñeñt' cohuen enten Yompor. Ñeñt'pa' attema't ñerra'mrate' Abelpa' teme'ttsen serrpare'tateney cohuen.

⁵ Ñaña ahuat Enoc ñeñt' atarr cohuen yemtayeḡ Yompor, ñapa' e'ñe ora aner Yompor pue'ntaño e'ñe beñaḡot. Ñapa' ama choye' rromo arr patsro. E'ñe atḡa a'chencach pamo'tsesha' ama esesha' enterraye tarro'mar Yompor erraya'. Ñehua, allempo ama a'tapatera' Yompor pue'ntaño ñapa' atarr cohuen coshataneḡ Yompor allempo aña patsro'tsen, tarro'mar ñeñt'pa' atet oten Yompor po'ñoñ ñeñt' aquellcareḡ.

⁶ Ñerra'm ama yeyemteña Yompor amach erroteneḡ yochateña ama't e'ñe mamesha. Tarraña ñerra'm esesha' muenene' o'ch yemteret ñamet Yompor añ poctetsa o'ch otet po'ñoḡhpa' Yomporpa' eñall, ñaña eñoteretepa'chña Yomporpa' chocmach coshaterran allohuen ñeñt' e'nene' ña.

⁷ Ñaña ahuat Yomporpa' eñotatan Noé ñeñt'cha' atet e'choḡan oñ tsapaḡoneḡ. Allempo atet otan Noé ama't mameshapa' ama huate'te. Tarraña Noéña'pa' e'ñe yemtenana atet och Yompor allempo. Ñaña'pa' yeḡhcatuan po'compuer allochña'pa' attoch a'qeshḡatan pamo'tsesha'. Atto yeḡhcatuan po'compuer e'ñe ñapueñ e'ñe pueyemteñoḡ Yomporpa' eñotataneña allohuen po'potantañeḡhno pamo'tsesha' ñetpa' coñchatuerranetcha' Yompor. Ñeñto'marña e'ñe pueyemteñoḡ, Yomporña'pa' e'ñe pocte' entenan Noé.

⁸ Ñaña ahuať Abrahampa' allempo chore'ch Yompor o'ch mueñe allařar allcha' apuer pats, ñaña'pa' e'ñe pueyemteñoť Yompor e'ñe cohuen ame'ñya. Allempoñapa' sa'nman pa'netser o' ahuo' ama't ñapa' ama eñoteñe allcha' ta tarro'mar ama puentare all sen.

⁹ Allempo chap anetso all oteñ Yompor ñeñťcha' apuer esempohuañen, allña'pa' all yečhosa e'ñe pueyemteñoť Yompor. Tarraña ña allpa' atťa yečhosa atet ñerra'm ahua'ña. Ama't ñeñť patspa' ñeñť o'patateña Yompor ñeñťcha' apuer, tarraña allempopa' ama apueña' Yompor ñeñť atet oteñ. Ñeñťo'mar ñapa' atťa shetamtsopo'tos all manatoset. Ñaña ama't ñeñťcha' po'mreñeñ perr Isaac ñaña Jacob ñetpa'cho'ña atťera yečherret shetamtsopahuo. Ñetpa'cho'ña atťa cohueñet esempohuañencha' apuerranet Yompor ñeñť patser e'ñe atet otenanet ñamet.

¹⁰ Abraham po'ñočhpa' aña cohuen ñeñť Yompor pa'netser ñeñť e'ñe echarr ařareť tarro'mar Yompor yečhcatene' e'ñe echarr peñ.

¹¹ Puetapor Sarapa'cho'ña e'ñe pueyemteñoť Yomporpa' cheyore'terr ama't ñapa' o' atarr po'nme'ten. Ama't o' meten allempo atťo cheyore'ten coyanesha' e'ñe pueyemteñoťa Yomporpa' ña ahua'mencat pe' atťoch cheyore't. Tarro'mar ñapa' atarr ayemuetpo' entenan Yompor atet oteñ.

¹² Atťoña e'ñe Abrahamoťa atarr mererra shonte' acheñenesha' nanac ama't ñapa' o' atarr nanac po'nme'ten allempo. Allpon acheñenesha' ña e'ñe po'mreñeñ pohuenahuet ñeñť allpon shonte' nanac atet ñerra'mrate' ora allohuen rantočhno ñeñť ento'tsa'yen ñaña atet yenteññañ sa'p po'mñer ñeñť ama e'ñotuapahuoyaye.

¹³ Ñeñťet allponet atarr yemuetnomuet Yompor ama't allempo Yomporpa' ama apuenaneta' ñeñť patser ñeñť o'patatanete't. Tarraña ama't ama apareťterreta' ñeñť patser ñeñť o'patatanete't Yompor, ñetña'pa' pueyemuetneñoťet Yompor eñoteñet ñetpa' apareťterretcha' ñeñťcha' po'ñočh pa'netser perret. Ñeñťcha' atarr coshaterrahuet. Tarro'marña ñetpa' eñoteñet añ patser po'ñočh ama pa'netsreye' peñeto. Ñetpa' ahua'ñanesheta entenet arr patsro.

¹⁴ Ñehua, yeñoteñ acheñ ñeñť atet entetsa ñerra'm ahua'ñanesheta ñetpa' añña e'nenet ñeñťcha' e'ñe pa'netser perret po'ñočh.

¹⁵ Ñaña ama añeye' pa'netser peneto allot onet tarro'mar ñerra'm ñeñťa e'nenetañpa' po'ñočhpa' o'ch alla puerrerretañ allot onet tarraña ñetpa' ama ñeñťeye'ña e'name'teneto.

¹⁶ Ñetpa' añña e'nete't ñeñťcha' e'ñe pa'netser perret po'ñočh ñeñť atarr nanac cohuen, ñeñťpa' añepa't Yompor pa'netser ñeñť pue'ntaño'tsen. Ñeñťo'marña Yomporpa' e'ñe pocte' entenanet ama penquēnaneto atťo Po'yomporer peñet. Ñaña'pa' o'patatenanet ñeñťcha' e'ñe po'ñočh pa'netser perret all pue'ntaño.

¹⁷ Ñaña allempo Yomporpa' atarr topatan Abraham; ñeñťpa' atet otan Abraham: "Te'pa' o'ch pemtser pechemer Isaac e'ñe atet ñerra'm ñeñť muetsenet nocop." E'ñe pueyemteñoť Yompor Abrahamña'pa' e'ñe pocte' eñch o'ch poman puechemer Isaac o'ch muetse Yomporecop. Ñehua, Yomporpa' atet o' otuan Abraham ahuaťoteñ:

¹⁸ "E'ñe pechemereshoť Isaacpa' mererrach shonte' acheñenesha' ñeñťcha' e'ñe pemreñeñ peperr." Tarraña ama't atet oteñeñ Yompor, ñaña'pa' e'ñe pueyemteñoť Yomporpa' e'ñe pocte' eñch ahuo'ch muetsan po'paťror allempo atet otererr Yompor.

¹⁹ Tarro'mar ñapa' atet oten, Yomporpa' atarr ahua'mencatesha' ñach tantatuerre' ama't ñeñťcha' rromats. Ñeñťpa' atet ñerra'mrate' Yomporpa' o' alla tantaterrñañ puechemer rromoť, o' alla agapuer pompor po'pocheño.

²⁰ Isaacpa'cho'ña allempo po'n e'ñe pueyemteñoť Yomporpa' enaman puechemereshacop Yompor pa'nateña añecop Jacob ñaña Esaú; ñeñťcha' atet bensare'tam'perranet tsapaťoneť.

²¹ Jacobpa'cho'ña allempo rromamoch e'ñe pueyemteñoť Yomporpa' enamatno-man Yompor pa'nateña pue'ñareťolleshacop ñeñť puechemer José puechemeretollesha' puepo'nmeñoťpa' po'carra quellpuena allña ma'yochenanaña Yompor.

²² Josépa'cho'ña e'ñe pueyemteñoť Yompor allempoch rroma allapař all anetso Egipto, ñapa' atet otnoman pamo'tsesha': "Po'ñočhpá' čhocmach čhap allempoch allohuenes israelena'tarneshas seča'nerrcha' arrot Egiptoť, o'ch sahanerra allo'tsen pats ñeñť o'patatye't ahuaťoteñ Yompor ñeñťcha' apuerrey. Ñaña ñerra'm esempoch ahuerres arrotpa' sanerrnancha' nenpa'ts."

²³ Ñaña allempo eñalleta Moisés, pamo'mte'ñapa' e'ñe cohuenatoll entan ematoll. Ñetpa' e'ñe pueyemteñoťet Yomporpa' o' e'pochet. Ama mecha'teññañeto amčha'taret po'ñoñ ñeñť atet nen attoch čhocma muetsanachet allohuen asheñorroťollesha' ñeñť eñalletyetsa. E'ñe ma'pña arorr alla e'poteñet.

²⁴ Tarraña Moisés allempo o' po'n ñapa'cho'ña e'ñe pueyemteñoťa Yomporpa' ama mueno o'ch oteñet ño' pue'ñar penña amčha'taret, tarro'mar ñapa' atťa ñañreteña amčha'taret po'señ ñeñť egipto'marnesha'.

²⁵ Ñapa' añña e'ñe pocte' ent o'ch mueročhtapretana israelnesha' ñeñť e'ñe pamo'tsesha' pen ñeñťara ñeñť pueyochreshačhno pen Yompor. Ama pocteye' entano o'ch coshapretana egipto'marnesha' ñeñť atet yečhenet ñeñť ama pocteye' enteno Yompor tarro'mar ñapa' eñoteñ ñeñťpa' e'ñe mamecpa atet coshenet.

²⁶ Ñapa' atťa ahuantenan atťo atarr sasare'teñet israelnesha'. Tarro'mar ñapa' añ pocte' enten o'ch mueročhta Cristocop. Ñapa' ñeñťña atarr cohuen enten, ello metana'tuenan ñeñť atet sherben allohuen ñeñť esocmañen ñeñť atarr morrentena egipto'marnesha'. Tarro'mar ñapa' añ cohuen ñeñťcha' apuer Yompor ñeñťcha'ña atarr coshaterre'.

²⁷⁻²⁸ Ñeñťo'marña Moisés e'ñe pueyemteñoť Yomporpa' atet otan allohuen israelena'tar ñeñť Egipto'tsa'yen: "Te'pa' o'ch semtsa carrnerotoll tarro'mar Yompor otets. Ñeñťña po'rraspa' o'ch seshellcata'tyes allot sebe'ten so'ponro, allochñapa' ñerra'm esempoch huapa mellañoteñ ñeñť amñareť ñeñťcha' muetsanatuena' allohuen egipto'marnesha' po'moternesha' attochña sa ñeñťes israelena'tarneshaspa' ama't puesheñarrotēsapa' amach muetsenso." Ñaña Moisés e'ñe pueyemteñoť Yomporpa' sa'nerran anets Egipto, ama mecha'tnomano ñeñť amčha'tareťtetsa all Egipto ñeñť atarr atsrre'mñať. Moiséspa' atťa ahuanta'huanman allohuen ñeñť atarr echarr entyen tarro'mar ñapa' añ e'ñe yemtena Yompor ñeñť ama't ama entpahuoyaye.

²⁹ Ñaña allempo onacherr allohuen israelena'tarnesha' Egiptoť allempo čačha'tet atarr sa'po ñeñť otenet Sa'p Tsasasen, israelena'tarnesha' e'ñe pueyemteñoťet Yomporpa' e'ñe atťa ahuanmoset all chope'chnomuet atet ñerra'mrate' e'ñe porrare' patso chope'chenet. Egipto'marnesha'ña ñeñť cotahuetañpa' ñetpa'cho'ña ahuanmosetañ ñamet all sa'po, tarraña ñetñapa' e'ñe allohuenet ño'shrra'tuotetña all oño.

³⁰ Ñaña allempo čačha'tet all anetso Jericó ñeñťña allo'marnesha'pa' ama mueneñeto o'ch abe'tosamřsaretet. Tarraña israelena'tarnesha' e'ñe pueyemteñoťet Yomporpa' cančherrmatoset; o' cančhroch puetesamřsame'toset ñeñť anetser Jericó ñeñť atet otanet Yompor. Allempoña e'ñe pueyemteñoťet Yomporpa' ñeñťña cončhet allo acončha'tamřsaret ñeñť anetser all puetesme'tet cančhroch e'ñepa'tcha' ñoña mata'nom.

³¹ Ñaña Rahab ama't ñeñť atarr ecañoreshaťtatse't ahuaťpa' atťo atarr yemter-rana ñaña Yompor, ñeñť coyanesharpa' ama rromo allempo a'cllataretta allohuen pamo'tsesha' ñeñťara jerico'marnesha' ñeñť atarr atpare'tyesaye't Yompor all anetso. Tarro'mar ñapa' e'ñe cohuen agapan pa'paclo allponsheña israelena'tar ñeñť ñanom

amñarettatsa all anetso ñeñtcha' eñotenaya' errotenente'ña ñeñt anetser ñaña ñeñt yechetsa all, ñato' ahuaencatarerette' ñato'pa' amate'.

³² Po'potantañechnopa' shontemeñ ñeñtcha' alla neyerpaterrsañerr ñeñt atarr yem-taye't Yompor ahuať. Tarraña ama eñalle allponmat yet attoch alla neyerpatuerrsa allohuen ñeñt atarr yemtaye't Yompor, atet ñerra'm Gedeón, ñaña Barac, ñaña Sansón, ñaña Jefté, ñaña David, ñaña Samuel ñaña allohuen ñeñt a'mta'yesaye't Yompor po'ñoñ ahuať.

³³ Tarraña allohuenet e'ñe pueyemteñoťet Yomporpa' pa'namen etsotayenet ñeñt atet muenatenanet Yompor. Puesheña'ttsetpa' e'ñe a'mchechueñet po'potantañ añcha'taretneshachno ñeñt e'moñe'tenahuet. Po'potantañña' e'ñe pueyemteñoťet Yompor e'ñe cohuen añcha'tareťtenet. E'ñe pueyemteñoťet Yompor ñapa' alla yen-puerranet ñeñt atet otanete't. Ama't po'psheñeñpa' e'ñe pueyemteñoť Yompor ama muenatano ma'yarr o'ch erroť pe'.

³⁴ Ñaña ama't tso'ña ama't atarr huomenc huorten ama muenache o'ch atserrpe'. Po'psheñeñpa' e'ñe pueyemteñoť Yompor ñapa' a'queshpach attoch ama muetseto es-pado. Po'potantañpa' ama't ama eñalleto po'huamenc, e'ñe pueyemteñoťet Yompor atarr ahuaencat panet. Ñeñtña huomencñatsarpa' alloña quellarenet. Atto e'ñe a'mchechuet ñeñt e'moñe'tenahuet.

³⁵ Ama't po'potantañ coyaneshachno ñetpa'cho'ña e'ñe pueyemteñoťet Yompor, o' alla atantatareťterret pamo'ts ñeñt rromuets.

Po'potantañ ama't atarr atserrpate'tareťtenet, ñetpa'cho'ña e'ñe pueyemteñoťet Yompor ama mueneñeto o'ch quechpuet Yompor attoch a'rroyareťetyerret. E'ñe pocte' enteñet o'ch rromuet pueyemteñoťet Yompor tarro'mar ñetpa' eñoteñet allach tanterret ello ñeñt atarr nanac cohuentetsa.

³⁶ Po'potantañechno ñetpa'cho'ña e'ñe pueyemteñoťet Yompor ahuaanta'yenet pa'namen atto atarr atserrpate'tareťetyesete't — attoña atarr ache'tatsetareťtete't, all ashtareťtete't, ehuananatareťtete't, ayottam̄psareťetyesete't.

³⁷ Po'potantañ amtsanatareťtete't atto arrollapechareťtete't. Po'potantañpa' ashe-shareťetyesete't e'ñe puerrochreto atto amtsanatareťetyesete't, atarr huomenc hua-panete't topateñets. Po'potantañ espado amtsanatareťetyesete't. Po'potantañ atfa chopeñe'chyesete't, aña chorra'yesete't carrnerorrom, ñaña cabrarrrom. Atarr huoc-chañetyesete't atfaña atarr amurochtatareťtete't atto atserrpa'yesareťtete't.

³⁸ Atfa chopeñe'chyesete't amayo'mar, aspenťo'mar. Esho'tyesete't arroroťo'mar, mapuetpono'mar aña patsro. Allohuenet ñet ñeñt atto atarr amurochtatareťtete't, Yomporña'pa' atarr cohuen entanete't. Ello metana'tueñet ora allohuen acheñenesha' arr patsro.

³⁹ Allohuenet ñeñtet atarr yemtete't Yompor ahuať, Yomporña'pa' e'ñe cohuen en-tanete't, tarraña ñetpa' amaña enterretoña ora allpon ñeñt atet otanete't Yompor ahuať ñeñtcha' atet apuerranet.

⁴⁰ Tarro'mar Yomporpa' ama't ahuaťoteñ añ cotape'chen ñeñt ello nanac cohuen enten ña. Ñeñtpa' yocpa'na allohuenacpay. Ñapa' añ muenen allohueney parro o'ch etsotaterrnay ñeñt o'patatenya ñeñtcha' e'ñe cohuen ya'cohuentaterre' allohueney.

12

Chocmuepa'chña e'ñe yeyemuetneña Yepartseshar Jesús

¹ Ñeñto'marña yeñoteñ shonte' acheñ ñeñt orrtatyesaye't ahuaťoteñ; e'ñe pueyemteñoťet Yompor e'ñe etsotayesete't Yomporecop ñeñt atarr echarr. Ñaña ñet te'pa' o'ch netma'ntatanet ñerra'mrrate' allohuenetpa' o' cohupreťterryet yaña o'ch entyesyet erroťencha' yetsota yaña ñeñt atet muenateney Yompor. Ñeñto'marña

yocoppa' añ poctetsa o'ch e'ñe yesuanom ama't erra'tsena ñeñt̃ yepatare'tene' ama't ñaña yo'chñar ñeñt̃ atarr yetpatyene'. Ñaña e'ñepa'ch ya'huanta'huanom allohuen ñeñt̃ echarr yentyen. Allochñapa' attoch e'ñe cohuen yetsoteññañ ñeñt̃ atet muenateney Yompor. Ñeñt̃pa' e'ñe atet ñerra'mrrate' ñeñt̃ matetsa ñetpa' chocmach chapuet allohua onañchareñtenet ñocpuet.

² Añcha'ña chocmuepa'chña e'ñe yeyemuetneña Jesús ñeñt̃ orrtaterre' attoch yeyemtera ñaña ñeñt̃cha' yetsotaterre' ñeñt̃ atto atarr yeyemuetneña. Tarro'mar ñapa' e'ñe pocte' eñche't̃ o'ch ahuanta'huan allohuen ñeñt̃ echarr ente't̃ ama't atto rroma corsocho. Ama't ñeñt̃ atarr apencochen entyenet, ñapa' e'ñe poctacma ahuanta'huanem̃. Tarro'mar e'ñe pueyemteñoña Pompor ñapa' eñoteñ ñach apapuerre' ñeñt̃cha'ña atarr coshatuerre'. Ñeñto'marña te'pa' o' alla anorruerr Pompor po'cohuenrot̃ all anen po'conaño allña partsotuerr ñaña.

³ Ñehua, te' sapa' o'ch alla seyerpuera Jesús atto ñapa' atarr muerochtater ñeñt̃ atarr ochñañenesha' ñeñt̃ atarr e'moñe'taye't̃. Tarraña ñapa' allohuen muerochteñetspa' e'ñe ahuanta'huanem̃. Allochñapa' sapa'cho'ña amach cha semuenme'chatsche ñeñt̃cha' atarr echarr sehuapoya, attochña amach cha llecatenso.

⁴ Tarraña saña ama't atarr satpare'tyeneñ atto atarr topatase't̃ so'chñar amaña choye' muetsenseto ñeñt̃ atet apeareta Jesús, ashatare'tta po'rras ochñartsocop.

⁵ Ñaña sapa' o'te' cha sepuesua ñeñt̃ atet cotape'chateney Yompor po'ñoño allohueney ñeñt̃ey puechemer pen. Ñeñt̃pa' atet oteney po'ñoñ:

Nechemere, ñerra'm esempo cotape'chaterres cohuen Yompor amachña at̃ta sentatsche ñerra'm ama esoye' sherbeno. Ñaña ñerra'm esempo coñchatas mame' attoch o'ch alla soctape'cherr cohuen amachña ñeñto'ta cha muene' sequechpatstere.

⁶ Tarro'mar allohueney ñeñt̃ey morrentena Yompor ñeñt̃eycha'ña cotape'chaterr cohuen. Ñaña allohueney ñeñt̃ey puechemerasha' pen ñeñt̃eycha'ña coñchatyes mamesha'tets attoch o'ch alla yoctape'cherr cohuen ñocop.

⁷ E'ñepa'chña ya'huanta'huanom atto coñchateney mame' tarro'mar ñapa' añ muenen o'ch e'ñe puechemer perrey poctacma. Ñehua, yeñoteñ e'ñe pocte' atto ñeñt̃ achemeresha't̃ errotenopa' o'ch coñchachet puechemer mame' allochñapa' attoch e'ñe cohuen ame'ñenanet puechemer.

⁸ Tarro'mar ñerra'm esesha' ama coñchatenaye mame' puechemer attoch e'ñe cohuen ame'ñachet ñeñt̃pa' po'ñoçh ama puechemereye' peñe; ñeñt̃pa' cha ottena ñerra'm el-lapnanesha'. Ñeñto'mar sapa'cho'ña ñerra'm ama coñchatenso Yompor mame' attoch same'ñya e'ñe cohuen po'ñoçh amaca'ye puechemereye' penso.

⁹ Elloña yeñoteñ allempo cheshenya' ñeñt̃ yompor yepen arr patsro atto e'ñe cohuen cotape'chatyesye't̃, ñeñt̃pa' e'ñe pocte' yeñche't̃ tarro'mar yeñoteñ ñeñt̃pa' e'ñe cohuen yocop. Ñeñto'marña te'pa'cho'ña e'ñepa'chña cohuen yenteñ atto Yomporpa' o' cotape'chaterrey cohuen ñeñt̃ara Yompor ñeñt̃ pue'ntaño'tsen ñeñt̃ pamo'mte' pen yecamquẽñ attoña yapa' corretsayach.

¹⁰ Ñehua, ñeñt̃ yamo'mte' yepen arr patsro ñetpa' e'ñe allponmata cotape'chatyesyete't̃ allempo yapa' cheshenya'. Ñetpa' chocma coñchatyesyete't̃ allpon pocte' entyesete't̃ ñet. Ñaña Yompor atto allpon coñchatyeny mamesha'tets ñeñt̃pa'cho'ña e'ñe cohuenacma yocop allochñapa' yapa'cho'ña e'ñech cohuenare' es yorrtatyen e'ñe atet ñerra'm ñapa' e'ñe cohuenare' es orrtatyen.

¹¹ Ñaña yapa' yeñoteñ ñerra'm esesha' yecoñchatene' ñeñt̃pa' ama cohuenaye' yenteñe e'ñe allempo coñchatenyet, tarro'mar ñeñt̃pa' chocmach llecatenyet. Tarraña puecoñchateñoñetaypa' o'ch yeñoterr ñeñt̃ atarr cohuen enten Yompor. Allochñapa' attochña e'ñech yocsheñesha' yeychena cohuen muechet̃.

Ñato'tña atta es sepçhampena'ña ñeñt atet anaret Partseshot socop te'tña ama seçherro ñesho

¹² Ñeñto'marña te'pa' o'ch notas, o'ch alla setanterra o'ch alla sa'huamencaterra Yomporecop. Atetcha' netma'ntatasa atet ñerra'mrrate' o' alla ahuamencat seperr sot ñeñt cha yoncota'ten ñaña atto seyonllocme'chenpa' o'ch alla ahuamencat seperr selloquẽm.

¹³ E'ñepa'ch cohuen es sorrtatyen allochñapa' ñerra'm esesha' ama e'ñeye' huomencaye' penaye pueyoçher Yomporecop, sañapa' amach aña sorrtateno ñeñtcha' a'puerrataterrahuet. Añcha'ña sorrtateññañ ñeñtcha' e'ñe cohuen yenpuene'. Ñeñtpa' atetcha' netma'ntatasa ñerra'mrrate' sapa' añ se'nen toñ ñeñt atarr cohuen paçharr sets muepñarero allcha' e'ñe cohuen sechope'chen. Allochñapa' ñerra'm eseshas checa'repuets amach cha sepoto'tatse'tnomo amach cha sa'tserrpa'nmo attochña e'ñe cohuen sechope'chnom e'ñe huomenc.

¹⁴ Añepa'chña sema'yochrena attoch e'ñe cohuen samo'tstannena, e'ñech muechet seyçhena epas allohuen samo'tseshachno. Ñaña añcha'ña soctape'chyen ñeñt e'ñe cohuenare' enten Parets. Tarro'mar ñerra'm añ ama yocape'cheno ñeñt cohuenare' enten Paretspa' amach errotenot yentereña Yompor.

¹⁵ Ñaña seño'tanna'tnomuepa'ch, ñato' eseshaspa' ama a'ñeye' e'nenno Yompor ñeñtcha' yenpue'. Ñaña seño'tanna'tepa'ch ñato'tña ama't e'ñe mameshapa' sorrtatena'ña attoch se'moñe'tanna'ta. Ñerra'm atet sepenapa' aco'poteñpa' o'ch e'ñe epa'huapa' çhach ortatan atsrre'moçhen. Attoña ñerra'm shonte' acheñenesha'pa' çhach a'sosyatuanet; ñeñtpa' ama pocteye' enteñe Parets. Ñeñtpa' atetcha' netma'ntacha ñerra'mrrate' narmets ñeñt atarr pesherr ye'muen.

¹⁶ Ñaña seño'tanna'tnomuepa'ch ñato'tña esesha' chetenaya'ña ñeñt ama pue'taporeyaye. Amapa' ñato'tña atta es sepçhampena'ña ñaña ñeñt atarr sherbets Partsocop, ñeñt atet pa' ahuat Esaú. Ñapa' e'ñe pa'chporrñoña pomhuan ñeñt anaret ñocop Partseshot. Ñeñtpa' ñeñt o'patacha pompor ñeñt metana'tuene' ñeñtcha' allpon apa'nman po'poñ puechemeresha' tarro'mar ñapa' ñeñt e'ñe po'moter pen pompor. Tarraña Esaúpa' ama esoye' enteñe ñeñt anaret ñocop Partseshot ñeñto'mar e'ñe pomhuan ñeñt o'patacha pompor ama't e'ñe parrocha rrachet.

¹⁷ Tarraña e'ñe allponmatapa' yeñoteñ o' alla muenerran ñeñt anaret ñocop Partseshot, tarraña allempopa' amach errotenot alla apuereterro. Ama't pueya'chpeñesha' enamuerreñ allempopa' amate' errotenot a'po'poñeterretoña ñeñt atet o' pohuet ñenmañ.

¹⁸ Ñehua, yeñoteñ ahuat allempo Yomporpa' eñotatan israelena'tarnesha' attoch a'poctatanetañ Parets all aspeno Sinaí'pno, ñeñtpa' atarr yoroçhen. Allña aspeno ñerra'm esesha' çhapats ama't pa'rrpapa' allorocmach errottoset all. Ñeñtña aspen'terpa' all huorten tso' ñaña ama machecmeto, añcha'noçhtena, huomenqueshaten.

¹⁹ All e'morrtena ñaña poctor atarr yoroçhen. Atto eñorana'tanet Paretspa' atarr añcha'noçhen enteñet. Ñeñto'marña acheñenesha' ñeñt e'mñotene' atto eñorena Parets, ñetñapa' atet otyenet. “Ñeñtepa'ta amach allo'na eñorana'tnenye Parets.”

²⁰ Ama eshcaye' ahuantenaye' enteñeto ñeñt atet otarettenet: “Ñerra'm esesha' çhapats ñeñt aspen'tero ama't pa'rrpapa' amsaret'tetepa' — arrolle'taret'tetepa'ch amapa' enapecharet'tetepa' panmeto. Ama't ñaña eyarra muetsetepa'.”

²¹ Ama't Moisés'pa'cho'ña atarr yoroçhen enteñ, ama't ñapa' atet otanet: “Ama't napa' nem'cha'na'teño'tpa' cha neyonshema'ten.”

²² Tarraña sapa' ama sentare aspenet all añcha'noçhtena Parets. Sapa' aña senterr ñeñt Siónapen ñeñt toma'ntenaya all yeçhena Yompor ñeñt ama arromñateshayaye. Ñaña aña senterr Jerusalén ñeñt toma'ntenaya Yompor pa'netser ñeñt pue'ntaño'tsen.

Allña'pa' shonte' coshame'tam'peña mellaño'teñesha' shonte' nanac. Ñeñt' allpon allo'tsa'yenpa' ama e'ñotuapahuoyaye.

²³ Ñaña sapa' aña senterr allohuen ñeñt' puechemerasha' o' perr Parets ñeñt' ap'chetsa pame'ñeño'tet ña. Ñetña allohuenetpa' ñeñt'et aquellcare'tet pa'so'chñe'chno Yompor pue'ntaño. Ñaña sa te'pa' o' senter Yompor ñeñt'cha' yeñotaterre' allohueney erra'tsencha' cohuen entyesuerr ñaña erra'tsencha' ama cohuenaye' entyesuerr. Ñaña allo'tsa'yen allohuen acheñenesha' puecamquëñe'chno ñeñt' e'ñe pocte' enten Yompor; ñeñt'ñapa' o' e'ñe etsotatuanet all pue'ntaño.

²⁴ Ñaña te' o' senter ñaña Jesús ñeñt' eñosets yocop Yomporesho attoch e'ñe cohuen a'pocatonay etserra. Ñaña o' seño'terrñañ po'rras ñeñt' ashata'rettatsa alloña o' ap'retnare'tterraña yo'chñar. Ñeñt'pa' elloña e'ñe cohuen yenpuerrey. Ñeñt'pa' ama atteyaye ñerra'm Abel po'rras ñeñt' ashata'rettatsa ahuat.

²⁵ Ñeñto'marña te'pa' o'ch notas, se'mñoterepa'ch Yompor ñeñt' se'ñorana'tenaya te'. Tarro'mar ahuat israelena'tarnesha' ñeñt' ama e'mñotaye'te Yompor allempo eñorana'tanete't arr patsro, ñetñapa' ama eseshaye' queshp'atso. Ñeñto'marña yeñoteñ ñerra'm yapa' amach ye'mñotere yaña Yompor ñeñt' ye'ñorana'tenaya te' pue'ntaño't, elloña yapa'cho'ña ama't puesheñarro'teyapa' amach eseshay queshper'tso.

²⁶ Ahuat allempo eñorana'tanet aspen'tot, po'ñoññapa' cha pelle'llchatenan pats. Ñaña te'pa' elloña o' alla atet o'terrerr Yompor ñeñt'cha' atet perrerr, ñeñt'pa' atet oten: "Elloña esempohuañen po'pocheño'pa' o'ch alla nepelle'llchatererr pats, tarraña amach ñap'tayaya pats nepelle'llchaterro, enta'nachña nepelle'llchater."

²⁷ Ñeñt'ña po'ñoñer all oten "po'pocheño" ñeñt'ña yeñotatene' esempohuañenpa' ahua-pore'tare'tterrach allohuen ñeñt' aye'chcataret' ñeñt' apelle'llchatpo'. Allempopa' añach a'puer'tsa ñeñt' ama apelle'llchatpahuoyaye.

²⁸ Ñaña atto am'cha'tare'ttena Yompor, ñeñt'pa' ama apelle'llchatpahuoyaye. Ñeñto'marña yeparasyoso'chepa'ch Yompor tarro'mar ñeñt' o'patatenyapa' ama ahua-pore'tpahuoyaye. E'ñe yem'cha'na'teño'tpa' e'ñepa'chña cohuen yeshere'ñ Yompor ñeñt'cha' e'ñe coshatene' ña.

²⁹ Tarro'mar yeñoteñ ñeñt' Yeyomporer yepen ñapa' atarr Parets e'ñe atet ñerra'm tso' ñeñt' e'nuene' ama't erra'tsena ñeñt' ama erro't apen yenteno.

13

Atetcha' ye'pa attoch e'ñe cohuen yocshach Yompor

¹ Atterepa'ch chocma semorrentannena allohuenes atet ñerra'm e'ñe semo'nasheñ se'p'anna'tuena.

² Ñaña amach sepsatsto attoch e'ñe cohuen saga'p allohuen ama't esesha ñeñt' huapyetsa sepa'cillo. Tarro'mar ama seño'tanna'tueno; ñato'rraña añ saguën ñeñt' mueñen Yompor atet pena po'potantañ ñetpa' añepa't agapuet mellaño'teñ.

³ Ñaña chocmuepa'chña seyerepya ñeñt' ayottam'psare'tetyetsa. E'ñech cohuen sellcapretenanet atet ñerra'mrrate' sapa'cho'ña ayottam'psare'tes e'ñe parro. Ñaña ñeñt' amueroch'tatare'tetyetsa e'ñepa'ch cohuen sellcapretenanet ñamet tarro'mar sapa'cho'ña seño'teñ attecma erro'tenopa' chocmach semueroch'tena sam'a e'ñe sechtso.

⁴ Ñaña o'ch notas po'poñ: Allohuenes ñerra'm esempo sesna'tena o' e'ñe seyoranna'ta epas se'apor e'ñepa'ch cohuen sentña ñeñt' atto seyorannena. Ama't parrochapa' amuepa'chña se'nam'psanna'tatsto. Yacmapa' amach chetatstano coyanesha' ñeñt' ama pue'taporeyaye ama't e'ñe parrocha. Coyanesha'pa'cho'ña amach agapatstanoña ñaña ñeñt' ama puerrollareyaye ama't e'ñe parrocha. Tarro'mar Yomporpa' chocmach

tsa'taterrana ñeñt chetene' ñeñt ama puetaporeyaye ama't ñaña ñeñt aguëne' ñeñt ama puerrollareyaye.

⁵ Ñaña te'pa' o'ch noterrser po'poñ: Amuepa'chña aña atarr seye'chapretatsetyesatsto quelle. E'ñepa'chña aña socshena ñeñt e'ñe allpona sechyen. Tarro'mar Yomporpa' atet otene: "Napa' ama't ahuatapa' amach nequechpuerrso, amach na'ypo'ñerrso ama't ahuata."

⁶ Ñeñto'marña yeyemteño Yompor e'ñech yocsheñesho' chocmuepa'ch atet yoten: Yomporpa' ñeñña yeyenpuene' ñeñto'marña amach es yemcha'tatsto. Ama't errotuanen muene' peney po'potantañ Yomporpa' ñach yecuanipene'.

⁷ Ñaña seyerpueño' chocmuepa'ch cohuen senten ñeñt a'potene' Yompor po'ñoñ socop, ñeñtcha' señotatnomue' cohuen. Ñaña o'ch soctape'ch ñeñt atarr cohuenare' orrtatyesnomuet sesho, atto ñetpa' e'ñe cohuen yemteñet Yompor, sapa'cho'ña atetcha' sepa' saña yemtenaya Yompor e'ñe cohuen.

⁸ Jesucristo ñapa' atterach yeyemteña ama't ahuatoteñ, ama't teme'ttsen, ama't ñaña errponañohuen ñeñtach attera ayemuetpotena.

⁹ Ñeñto'marña amach seyematstoña ñeñt po'poñechno yeçhateñets ñeñt ama atteye' ayçhatareteso ahuañmo'choteñ. Tarro'mar aña poctetsa o'ch huomenc yepa' yeyoçher e'ñe Yompor puemorrenteño'tey atto atarr yenpueney e'ñe atta. Ama añoteye' huomenc yepenoña yeyoçher atto es yerra'yen amapa' atto es yetore'tyena. Tarro'mar ñeñt cotene' añ yeçhateñets rreñtsocpa'na, ñeñt yeçhateñsorpa' ama yenpuenaneto attoch huomenc pa'nmuet pueyoçher Yomporecop.

¹⁰⁻¹¹ Ñehua, yeñoteñ ñeñt corneshatets judioneshacop ñerra'm esempo muetsenet eyarra all altaro ñeñt po'chñarecuet, ñeñña eyarra po'rraspa' ñeñtpa' o'ch anem' cornesha' e'ñe allohuanen Parets po'ponro ñeñt ochñartsocpatets. Tarraña ñeñña eyarra po'chetspa' amach esesha' rrenaye. Ñeñña po'chetspa' o'ch anmet a'yo all ama acheñempaño'yaye, allcha' chamoset. Tarraña te'ña yocop ñeñt amtsarettertsa yo'chñarecop ñeñtpa' Cristo. Yapa' ñeñt po'ñoñ pocrram' pen yecamquëñ allohueney ñeñtey yemtenaya ña. Tarraña ñeñt attera corneshatets judionesha' poctapñacop all po'prahuo peñet, ñetpa' amach erroteno' pocrram' petoña Cristo.

¹² Ñaña atto anenan judionesha' eyarra po'chets a'yo all ama acheñempaño'yaye, ñeñtpa' añ toma'ntena atto Cristopa'cho'ña anmet a'yo all ama acheñempaño'yaye allcha' e'ñe puemuroçhtateño'tetpa' o'ch rroma. Attoña e'ñe ña po'rraso a'cohuentaterrey Partsocop.

¹³ Ñeñto'marña te'pa' e'ñepa'chña yesuanom ñeñt ahuat yocapña ñeñtara ñeñt ya'netser yepenpa' o'ch ahuey a'yo allo'tsen Jesús. Allcha'ña yemuroçhtapretosya yaña all atarr otnare'tyeñet.

¹⁴ Tarro'mar aña patserpa' ama aneyaye ñeñt po'ñoçh ya'netser yepen tarro'mar ñeñtpa' huañerrcha'. Yapa' aña ye'nen ñeñtcha' ya'netser yeperr ñeñtcha' yenterr Yompor pue'ntaño ñeñt ama ahuañaño ama't e'ñe errponaña.

¹⁵ E'ñe yeyemteño' Jesucristo chocmuepa'chña ya'ye'choçhtateññañ Yompor. Atto chocma ya'ye'choçhtateññañ ñeñtpa' añ toma'ntena ñeñtcha' yapueñ Yompor atet pete't ahuat o'ch muetset eyarra ñocop. E'ñepa'chña ya yenamot ya'ye'choçhtateññañ pa'so'cheñ attochña e'ñech yocshateñ.

¹⁶ Ñaña chocmuepa'chña e'ñe cohuen seyenpanna ñaña e'ñech cohuen sa'muerañtena. Tarro'mar te'pa' ñeñña atto es yapueñ Yompor ñeñtcha' atarr coshatene' ña.

¹⁷ Ñaña ñeñt sa'mcha'tareternesha' sepa'yenpa' chocmuepa'chña same'ñenanet, tarro'mar ñetpa' añecop anareñtenet ñetcha' cohuanipenet secamquëñ Yomporecop.

Ñaña Yomporpa' eñotatuerranetcha' ñeñt atet pa'yenet, ñato' eñete' cohuen cohuanpenset ñato'pa' amate' cohuenaye' cohuanpenseto. Ñeñto'marña socoppa' añ poctetsa eñechña cohuen same'ñenanet attochña ñetpa' eñech pocsheñeshocmañen torrenet socop. Amuepa'ch cha sellcatatstenaneto tarro'mar ñerra'm atetpa' amach errotenot coshaterrsetoña samña.

¹⁸ Ñaña te'pa' o'ch notas, chocmach sema'yochampanya. Yapa' yeñotena yeyochro ama eñalle attoch po'poñ yentannena. Yapa' añña yemnen chocmach yorrtatyen ñeñt atarr cohuen enten Yompor.

¹⁹ Ellopa' o'ch alla noterrser chocmach sema'yochampanya allochñapa' amach atarr atomatatstopa' o'ch alla necherrerr sesho.

Arrpa' all so'tnerranet po'cartot

²⁰⁻²¹ Te'ñapa' Yomporepa'chña eñe ahuamencať sepene' ama't allohuen pa'namenacop ñeñt atarr sherbets ñocop. Eñe yame'ñeñoť Puechemer ñeñt Jesucristo ñachña ya'cohuentatene'ña ora yocta'ña ñeñt atet yoctape'chyen yeyochro allochñapa' attochña eñe cohuen yoctape'cherr ora allohuen ñeñt cohuen enten ña. Attochña eñech cohuenare' sorrtatyen ñeñt eñe atet muenen ña. Ñeñtpa' ñeñtara Yompor ñeñt eñe yocshatene' yeyochro ñaña ñeñtara ñeñt tantaterre' Puechemer rromot ñeñt Yepartseshar yepen, Jesucristo ñeñtña atarr cohuen yecuanpene' atet ñerra'mrrate' ñeñt atarr cohuen cohuanpene' po'carrneror. Eñe po'rrasoña alloña a'pocatonay ñeñt eñe etserra ñeñtña a'pocateñetspa' ama't errponañapa' amach huañerro. Te'ña eñe tayoteñpa' yecohuentatoñepa'ch Cristo ama't errponohuañen. Ñeñtpa' attetepa'ch Nompore yocop.

²² Eñe allohuanen masheñeshacha' ñaña nochaneshacha' o'ch alla noterrser, eñepa'ch cohuen se'mñoton neñoñ ñeñt allpon o' alla noctape'chaterres tarro'mar ama atonaye' ñoñets nequellquënnaso.

²³ Ñaña o'ch neñotatas masheñ Timoteopa' o' alla a'rroyeret. Ñerra'm ahuencha' chap arrpa' epsheño'mareypa' o'ch ahuey o'ch yemo'tensa'.

²⁴ Ñaña napa' nemnen o'ch nehuomcha'ch necartot allohuen ñeñt sa'mcha'tareternesha' sepa'yen, ñaña allohuen masheñeshachno ñeñt pueyochresha' pen Parets all sesho. Ñaña italo'marnesha' ñeñt ame'ñetsapa' ñetpa'cho'ña mueneñet o'ch huomcha'taset ñamet añ necartot.

²⁵ Te'ñapa' Yomporepa'ch sa'nataya allohuenes. Ñeñtach notas, ñeñtpa' attetepa'ch Nompore. Allohua.

AÑ SANTIAGO PO' CARTA SANTIAGO

Atto Santiago quellcan carta allohuenacop ñeñi'atta parratse'tyets allemeñ

¹ Masheñeshacha' ñaña no'chaneshacha' ñeñtes Israel puechemerasha' po'mrenñes, ñeñt'charrasheña puechena epsheña ñeñña po'mreneñ sepene'ña sa, ñeñtes atta parratse'tyets allemeñ anetso'mar. Na Santiagon sequellquene'ña añ carta ñeñten torretsa Yomporecop ama't ñaña Puechemerecop Jesucristo ñeñt' Yepartseshar yepen. Te'pa' o'ch nehuom'cha'tas allohuenes añ necartot.

Attoch ya'huanten allohuen topateñets

² Ñaña te'pa' o'ch masheñeshacha' ñaña no'chaneshacha' notas, ñerra'm esempo huaponasa pa'namen topateñetspa' sapa' socshepa'ch nanac.

³ Tarro'mar sapa' señoñeñ ñerra'm cho huaponaya topateñets, ñeñtpa' añecopcha' huapa attoch topatenya' ñerra'm po'ñochte' yame'ñena. Allochñapa' attoch chocma es ya'huanten.

⁴ E'ñe pocte' allo'nepa'ch sesen ahuanta'huanmue' allohuen topateñets, allochñapa' attoch poctacma huomenc sepa' seyo'cher Yomporecop, ñaña attoch amach es sepall-teno ama't mamesha atto same'ñeña Yompore.

Yomporpa' chocma mueneñ o'ch es eñotatey

⁵ Ñerra'm eseshaste' ama e'ñeye' eñotenaye ñeñt' cohuen enten Yomporpa' sapa' añcha'ña senam Yompor, ñapa' chocmach es eñotatey, tarro'mar ñapa' e'ñech pocsheñesha' es apueney allohueney, amachña ñeñtapa' cha che'ptare'tye.

⁶ Tarraña ñerra'm esempo es senamueñ Yomporpa' e'ñech seyemteñoñ es sanañ. Amach cha se'charrtatsto seyo'chro ama't mamesha. Tarro'mar ñeñt' chocma echar-rtetsa pueyo'chropa' amach e'ñeye' yemtenano Yompor ñeñto'marña ñeñt' atet pet-sapa'chach ottena ñerra'mrrate' oñ pue'mo'yer ñeñt' allemateñ anen mōrr.

⁷⁻⁸ Ñeñt' atet petsapa' eñochetepa' po'ño'chpa' amach es ape Yompor, tarro'mar ñeñt' atet petsapa' amach patrraye' cotape'cheno. Atet ñerra'm te'pa' ñato' po'poñcha' cotape'chen, ñato' tsapañapa' o'chcho' cotape'chenan po'poñ. Ñeñt' acheñerpa' chocmach atet pa'yena.

⁹ Tarraña ñerra'm eseshas masheñre esempo atet sentena ñerra'm ama esoshe'mayaysopa' socshepa'ch, tarro'mar allempo Yomporpa' atetcha' entenes ñerra'mrrate' ñeñtes nanac sherbets.

¹⁰ Ñaña añ masheñer ñeñt' echene' shonte' po'çllayorpa' coshepa'ch ñerra'm esempo es huapoya. Allempopa' amach esoshe'maye' entereto. Tarro'mar ñeñt' eçllayoreñ ñeñtpa' mamecpa atet pena ñerra'mrrate' ta'te' puerorer ñeñt' nanac auyaña.

¹¹ Tarro'mar ñeñt' ror atetpa' ñerra'm o'ch huapa'muena atsne', ñerra'm o'ch atser-rtapa' chach a'uyatoñña pue'chor, añña puerorerñapa' o'ch shorna'tua; ñeñt'ña atto cohuentenapa' o'ch huañ. E'ñe atet penaña ñeñt' eçllayoreñ. E'ñe puechecma'teño'pa' huañerrcha' ñaña.

E'ñe yañeña yemnenñoñ topateney oneñt'

¹² Nanac cosheñtso'tsen allohuen ñeñt' ahuantene' ora pa'namen topateñets, tarro'mar ñerra'm esempo ahuanta'huan ora topateñetspa' nanaccha' cohuen entuer Yompor. Allempopa' aphuercha' Yompor ñeñt'cha' atarr coshaterre' alloch ñapa' corretsach tayoteñ ama't errponañohuen. Ñeñt'pa' aña o'patatena allohuen ñeñt' morrentenaya ña.

13 Ñaña te'pa' o'ch notas, ñerra'm esempo e'ñe sañeña semnenñoť o'ch sepa ñeñť ama cohuenayayepa' amach sotatsto, "añpa' Yomporte' o' topaten." Tarro'mar Yomporpa' ama esesha' topatenaye attoch ñapa' o'ch pa ñaña ñeñť ama cohuenayaye. Ñeñťo'marña ñapa'cho' amach errotentot topatye yañña.

14 Elloña añmapa' e'ñe sañeña semneññoť attoch huaponasa topateñets o'ch sepa ñeñť ama cohuenayaye.

15 Tarro'mar ñerra'm esempo es yemnatse'tyen yeyo'chro, ñerra'm o'ch'cho' ye'pa atetpa', ñeñťpa' ñeñťña yo'chñar yepen. Ñaña ñerra'm chocma allo'na yesen pa'nmue' ñeñť ama cohuenayayepa' e'ñe yo'chñaroťpa' o'ch yechenquerra.

16 Masheñeshacha' ñaña no'chaneshacha' e'ñe nemorrenteñoťespa' o'ch alla noterrser, amach sepantatsche sañeña. Po'ño'chpa' ama Yomporeye' yetpatenaye attoch ye'pa' ñeñť ama cohuenayaye.

17 Yomporpa' e'ñe cohuenare' es apueney ñeñťcha' allo'na yeyenpuene' ñeñťara ñeñť mueñennay pue'ntañot. Ñaña ñeñťara Yompor ñeñť ye'chcate' allohuen ñeñť ye'choyo'tam'pene' pue'ntañot. Tarraña errotentot e'ñe puechope'cheñoťpa' amach tama cho'yo'tam'penye. Tarraña Paretspa' ama atteye' peno. Ñapa' amach ellopa' alla a'po'po'ñeta'm'perrye ñeñť atet muenateney.

18 Allempo yame'ñerrñaña po'ñoñ ñeñť e'ñe po'ño'ch atet otene' ñeshoťña'pa' ye'ñallettera atet ñerra'm'rate' e'ñe puechemerey ñeñť e'ñe po'moter pen ñeñť anaret e'ñe ñocop. Tarro'mar ñeñťpa' atet muenen ña.

Añpa' ñeñťcha' atet yesherbe' Yompor e'ñe cohuen

19 Ñeñťo'marña masheñeshacha' ñaña no'chaneshacha' e'ñe nemorrenteñoťespa' o'ch neñotaterrser po'poñ. Sa allohuenes añ poctetsa chocmach pocte' señch o'ch se'mño'ch cohuen ama't erra'tsena ñeñťcha' serrpare'tatets. Añcha'ña chocmach serrmuen señoñ. Ñaña amach e'ñe attoťa sa'tsrre'ma'yeno, cho'chña ñanom es soctape'ch ñato' atsrre'mo'chente' ñeñť atet otenset, ñato' amate'.

20 Tarro'mar e'ñe ya'tsrre'mueñoťpa' amach errotentot yetsotoña ñeñť atet pocte' enten Yompor.

21 Ñeñťo'marña sapa' o'ch seque'chpa'huerr sosya'tsañ ora allohuen ñeñť shonte' sepa'yen ñeñť ama pocteyaye Yomporecop. Añcha'ña sapa' o'ch sagapoñ Yompor po'ñoñ e'ñe señmañesha'. Tarro'mar ñerra'm o'ch chaponaya Yompor po'ñoñ e'ñe yeyo'chropa' ñeñťpa' ñeñťcha' ya'queshp'aterre' esempohuañen yecamquenoť.

22 Ñaña sapa' amach e'ñe orrena se'matstoñe Yompor po'ñoñ, cho'chña sorrtatyesña ñeñť atet otene'ye. Tarro'mar ñeñť e'ñe orrena e'muene' Yompor po'ñoñpa' ñeñťpa' ñañeñach shequetsa tarro'mar chate' otenapañ ñato' ñeñťate' poctetsa ñocop attoch queshperra.

23 Ñaña ñeñť atet petsapa' chach ottena ñerra'm'rate' ñeñť atta cohuetsa rerpo.

24 Añecpach cohuenta o'ch entan errotente' orrtena pa'clloyot. O'chña entuan ñeñť atet orrtenapa' allempoñapa' o'ch ahuer. Allempoña cherr a'yopa' o'ch alla puesuerran ñeñť atet orrtena pa'clloyot.

25 Tarraña ñeñťña e'ñe pomnenñoť ma'yo'chrenaya Yompor po'ñoñ ñeñť e'ñe cohuen atet otene'ypa' ñeñťña'pa' ama atteye' peno ñeñť atet pena ñeñť e'ñe orrena e'muene' Yompor po'ñoñ ñeñť atta puesene' ñeñť atet otene'ye Yompor. Añcha'ña chocmach orrtatyanan ñeñť atet oten Yompor po'ñoñ. Elloña ñeñť atet petsapa' nanaccha' cosheñtso'tsen.

26 Ñerra'm esesha' otets ñapa' nanaco' cohuen sherbenan Yompor, tarraña ñerra'm ña ama anenano po'ñoñpa' ñeñťpa' ñañeñach shequetsa. Tarro'mar ñerra'm atterach yeñosatse'tyenpa' amach po'ño'chaye' yesherbeñe Yompor.

²⁷ Añña e'ñe pocte' enten Yompor Apa ñeñtcha' atet yesherbeñ ña e'ñe cohuen: O'ch yeyenpueñ huocchaneshachno, ñaña rretorrnanasha' ñerra'm esempo es mue-rochtatenahuet. Ñaña yapa' amach ya'sosyatatsto yechets ñeñt atet patse'tyena ñeñt ama ame'ñetso arr patsro.

2

Atto amach puesheña'ttsa cohuen yentatsto

¹ Masheñeshacha' ñaña nochaneshacha' te'pa' o'ch noterrser po'poñ. Sa e'ñe same'ñeñoñ Yepartseshar Jesucristo ñeñt e'ñe cochneshare' orrtatetspa' amach puesheña'ttsa e'ñe cohuen sentatsto. Sapa' e'ñech cohuen senteñ allohuen acheñenesha'.

²⁻³ Ñato' sa errotenopa' o'ch sapchena allohuenes Yompor pa'paclo. Allempoña sapchenapa' ñato' o'ch huapa puesheñarr ñeñt chorrenaya ñeñt nanac cohuen, ñeñt nene' anillo orotlillen. Ñato' ñapa' e'ñech cohuen sagaḡ o'chcho' sotaḡ: "Panorros arr allame'tets e'ñe cohueno." Ñato' e'ñech allempocma o'ch huapa ñaña ñeñt atarr huocchañ ñeñt cha shetsre'she'muen pa'shtam. Ñato' ñeñtñapa' chach sotaḡ: "Papa' alla patomos tarronet, amapa' alla panorros patso."

⁴ Tarraña ñerra'm atet sepenapa' ñeñtpa' amach allohuenacmaye' cohuen sentaneno. Ñaña chach sottena ñerra'mrrate' sañeña eñotene' ñeñt acheñer nanac sherbets. Tarraña ñerra'm atet yepenapa' ñeñtpa' amach cohuenaye' yocḡape'cheno.

⁵ Masheñeshacha' ñaña nochaneshacha' e'ñe nemorrenteñoñes te'pa' nemneñ o'ch se'mñoten ñeñtcha' atet notas. Elloña Yomporpa' añña nanac muenen o'ch acerran allohuen ñeñt nanac huocchañetets añ patsro, attoch e'ñe pame'ñeñoñet ñetpa' echerretcha' esocmañen Yomporeshot. Esemphuañenñapa' o'ch aguerret ñaña ñeñt o'patatenanet Yompor all añcha'tarettena pue'ntaño. Ñaña ñeñt o'patatenya allohueney ñeñtey morrentenaya ña.

⁶ Tarraña sañapa' chaña semneñ o'ch sepencach ñeñt huocchañetets. Sapa' ama't señoñeña ñeñt nanac eçllayoreḡpa' ñeñtña es aprratamḡsañ, amapa' o'ch temantas añcha'taretsho.

⁷ Ñaña ama't señoñeña ñeñt nanac eçllayoreḡpa' ñeñtña nanac achmāre'tene' Cristo pa'so'cheñ ñeñtara ñeñt nanac añcha'na'tpo' yenten ya ñeñtey Cristona'tarey.

⁸ Ñerra'm chocma semorrentannenapa' allempopa' o'ch setsotua añ ñoñets ñeñt atet anareḡ Yompor po'ñoño ahuatoteñ, ñeñtpa' atet oten: "O'ch atarr cohuen pemuerya ḡamo'ts e'ñe atet atarr pemorrentena ḡañeña." Añ ñoñets ñeñtña nanac sherbets, ello metana'tueñan po'poñechno. Ñerra'm atetcha' seḡapa' allempopa' amach es sepallteno Yomporcop.

⁹ Tarraña ñerra'm sapa' e'ñe puesheña'ttsa semorrentenapa' ñeñtpa' allotña chocma yo'chña'ten. Ñaña ñerra'm atet yepenapa' nanaccha' yeyoren yo'chñar, tarro'mar ama atet yepeno ñeñt atet oteney Yompor po'ñoñ ñeñt atet anareḡ.

¹⁰ Ñaña ama't e'ñe yeychatset allohuen Yompor po'ñoñ ñeñt atet anareḡña', ñerra'm paterrñapa' ama atteye' yepeñepa' Yomporñapa' o'ch enteney ñerra'mrrate' o' ora yepanta'huoñ.

¹¹ Añ Yompor ñeñt yotene' "amach sechtapretatsto taporets" ñeñtara Yompor ñeñt yotene' ñaña "amach semtsanna'tatsto." Ñeñto'marña ama't ama yechtapretatsto taporetsña' ñerra'm errotenopa' machayota yemtse acheñ Yomporñapa' o'ch enteney ñerra'mrrate' o' ora yatpare'tuoñ po'ñoñ ñeñt atet anareḡ.

¹² Ñeñto'marña sapa' chocmach seyerpa atto esempohuañen Yomporpa' eñotatyuesuerreycha' e'ñe errotencha' entyuesuerrey. Tarro'mar ñato' yepena ama't ñeñt atet oteney te' Cristo po'ñoñ ñeñt atet anareḡ ñeñt ama amuerochtatañeyaye.

Ñeñto'marña sapa' e'ñe señoteño' atetpa' ama't errotena señenpa' e'ñepa'chña cohuenare' señosyen. Ñaña e'ñe señoteño' atetpa' e'ñepa'ch cohuenare' es sorrtatyen.

¹³ Ñaña sapa' señochepa'ch ñeñt' ama morrentenayo te' pamo'tspa' ñapa'cho'ña esempohuañen allempoch eñotatyesserrey Yompor e'ñe errotencha' entyesserrey, ñapa'cho'ña allempopa' amach eseshaye' morrenterrayo. Añña ñeñt' morrentenaya te' pamo'tspa' esempohuañenña allempoch eñotatyesserrey Yompor e'ñe errotencha' entyesserrey, allempoña ñapa' nanaccha' amuerare'tterra.

Ñerra'm po'ño'ch yame'ñenapa' choch yorrtat ñaña ñeñt' cohuentetsa ñocop

¹⁴ Masheñeshacha' ñaña nochaneshacha' te'pa' o'ch notas. Po'ño'ch ama sherbenoña añ acheñer ñeñt' otets ñapa' ame'ñeno', tarraña ñerra'm ama orrtatenano ñeñt' cohuentetsa Yomporecop. Ñeñt'ña acheñer atetpa' amach po'ño'chaye' ame'ñeno. Amachca'ye a'queshpaterena ñeñt' atto oten e'ñe orrena ñapa' ame'ñeno'.

¹⁵ Ñehua, ñato' o'ch netma'ntacha atet. Ñerra'm pueheñarr masheñ, amapa' yo'ch palltenet ñeñt'cha' chorret, amapa' ñeñt'cha' rret allempo,

¹⁶ tarraña ñerra'm sapa' atta sotyeñ: "Ahua'ta, Yomporepa'chña pa'nataya. Eñalletepa' ñeñt'cha' pechorra, ñaña ñeñt'cha' perra'." Tarraña ñerra'm amaña es sape ñeñt' palltenapa' atetpa' amaca'ye cho'ye es sesherbena.

¹⁷ Ñeñt'pa' atet pena ñaña ñerra'm esempo atta yoten, "napa' name'ñena", tarraña ñerra'm ama yorrtateno ñeñt' cohuentetsa Yomporecoppa', ñeñt'ña atto yoten, napa' name'ñenapa' amach es sherbeno. Chach yottena ñerra'mrate' o' huañerr atto yame'ñena.

¹⁸ Ñato' o'ch netma'ntacha atet. Ñato' pueheñarrpa' o'ch otan po'psheñeñ: "Papa' e'ño' peyemteññaña ñeñt' atet oteney Yompor po'ñoñ, tarraña amaña porrtatyenoña ñeñt' atet oteney Yompor po'ñoñ. Tarraña napa' e'ñe ne'pohuen ñeñt' cohuentetsa Yomporecop. Ñehua, ¿erra'tsenoteyte'ña e'ñe pocte' enten Yompor?" Ñehua, te'pa' o'ch notap' ñeñt'ep' atet otets: Po'ño'ch ñerra'm ama yepeno ñeñt' cohuentetsa Yomporecoppa' amach erroteno' yeñotache po'psheñeñ ñato' po'ño'chte' yeyemteññaña Yompor po'ñoñ. Tarro'mar ñerra'm po'ño'ch yame'ñenapa' cho'mach yorrtat ñaña ñeñt' cohuentetsa Yomporecop.

¹⁹ Ñaña papa' peyemteño'tpa' peñoteñ Yomporpa' e'ñe pa'rra. Ñehua, ñeñt'pa' e'ñe pocte' atet, tarraña oneñetpa'cho'ña eñotenan ñaña atet. Tarraña ñapa' ama't eñotenaneñña Yomporpa' ama't e'ñe pa'rra, tarraña po'yorño'tach eñoteñ, tarro'mar ñapa' eñotena amach qeshperro.

²⁰ Te' papa' amate' peñoteña'. Chote' pemneñ o'ch neñotata'p' atto ñerra'm ama yepeno ñeñt' cohuentetsa Yomporecoppa' ama't yoteneñ yame'ñena e'ñech orrena atet yoten.

²¹ Ñehua, Yomporpa' e'ñe pocte' entan ahua't yatañ Abraham allempo muene' muetsaneñ puechemer Isaac Yomporecop,* tarro'mar ñapa' añ orrtaten ñeñt' cohuen enten Yompor.

²² Ñapa' e'ñe pocte' entan Abraham tarro'mar e'ñe pueyemteño'tpa' orrtatuan ora ñeñt' atet och Yompor. Ñeñto'marña yeñoteñ Abrahampa' e'ñe poctacma ame'ñane't Yompor.

²³ Allempo atet pe'tpa' attotña e'ñe etsotuan Yompor po'ñoñ ñeñt' atet aquell-care't ahua'toteñ Génesis, ñeñt'pa' atet oten: "Abrahampa' nanac yemtana Yompor, ñeñto'marña e'ñe pueyemteño'ta Yomporña' e'ñe pocte' eñche't. Ñeñto'mar Abrahampa' atet ochete't, añmapa' ñeñt' e'ñe parro yemtana epuet Yompor."

* **2:21** Ñehua, ahua't Yomporpa' ahua't otan Abraham muetsanepa'to' puechemer ñocop. Tarraña ñapa' añecpa atet och attoch topach ñato' po'ño'chte' ame'ñeña. Ñeñto'marña Abrahampa' autsa muetsayeñ puechemer Yomporecop, tarraña ello'pa' ama muenache Yompor.

²⁴Ñeñto'mar yeñoteñ Yomporpa' e'ñech pocte' enteney ñerra'm esempo yorrtatyeññañ ñeñt cohuentetsa ñocop. Ama't errpon yotatset yapa' e'ñe cohuen yame'ñena tarraña ñerra'm ama yeñohueno ñeñt atet muenen ñapa' amach errotent pocte' entyeña Yompor.

²⁵Tarro'mar ama't Yomporpa' e'ñe pocte' entan ahuañ coyanesha' ñeñt pa'so'cheñ Rahab, ama't ñapa' allempo pa' ñeñt e'ñe pocte' ent Yompor ñocop. Ama't ñeñt coyanesha'pa' nanac ecañoreshañ, tarraña ñapa' e'ñe añoña pocte' eñch Yompor atto ñapa' agapan e'ñe cohuen pa'paclo ñeñt mueña ahuañ Josué ñeñtcha' entenaya' ñanom pats. Allotpa' ñaña ahua't gaterranet po'poñ toñ allcha' oñerret attoch ama rromuerraneto allo'marnesha' ñeñt e'moñe'tenahuet. E'ñe atet puepeñoña Yomporña' e'ñe pocte' eñch e'ñe attecma ñerra'm Abraham.

²⁶Ñeñto'marña te'pa' yeñoteñ ama't errpon yotatset yapa' e'ñe cohuen yame'ñena, tarraña ñerra'm ama yorrtateno ñeñt poctetsa Yomporecoppa' amate' eso yesherbeña Yompor. Ñato' o'ch netma'ntacha atet. Allohueneypa' e'ñe yeñotueñ ñerra'm esempo yeñch yamo'ts o' rromapa' o'ch yeñoch ñeñtpa' o' sa'neñ puecamquëñ tarro'mar ñerra'm ñeñto' o' yerromapa' añ yechetspa' amach es sherberre'te.

3

E'ñe yeñosatse'teñoña nanac yochña'ten Yomporecop

¹Masheñneshacha' ñaña nochaneshacha' te'pa' o'ch notas po'poñ. Ama pocteyaye o'ch sechen shonte' ñeñt muenets o'ch cotape'chaten ñeñt cohuentetsa Yomporecop. Tarro'mar señoteñ ñeñtey cotape'chatets cohuen Yomporecoppa' ello nanaccha' yoroçheno'tseney ñerra'm esempo yepena ñeñt ama cohuenayaye tarro'mar Yomporpa' amach pocteye' enteney ama't e'ñe mamesha.

²Tarro'mar allohueneypa' chocma es yepanten. Ñerra'm esesha'ña ama es panteno pueñosatse'teñoña' ñeñtña po'ñoçhpa' e'ñech cohuen cotape'chen, ñaña ñeñt atet acheña' e'ñech eñoteñ attoch huenatan ora ñeñt atet muenatse'tyen yechets.

³Atet pena ñaña cahuall. Ñerra'm echenan attoch yame'ñacha, E'ñe puenamo'tpa' esheccha' yanemñ all yesechateñ. E'ñe puenamo'tpa' o'ch yame'ñacha ora pue'mocrohuen.

⁴Ñato' o'ch netma'ntacha ñaña ñeñt atet pena bote ñeñt chope'chets oño. Ñehua, botepa' ama'tcha' nanac añecmuen noñtpa' e'ñe puepopa'po'tpa' o'ch aneñet all sechateñ pamo'mte'. Ñaña ama'tcha' puepopa'ppa' añetollpach, ñaña ama't mōrrpa' mueneñeñcha' o'ch anemñ a'yenet allenet ama yesechateñe, e'ñe puepopa'po'tpa' o'ch e'ñe cohuen aneñet allenet sechateñ pamo'mte'.

⁵⁻⁶Atet pena ñaña yenam. Yenampa' ama't añetolla yechetspa' atarrcha' pa'namen esocmañen yeñosyen allot. Ñaña ñeñt atto yeñosatse'ten sosey e'ñe yenamotpa' ñeñtpa' atet pena ñerra'mrrate' tso'. Ñehua, tso'pa' ama'tcha' añetolla ya'torapa' mameshapa' o'ch epa'hua erracmañen puetsato'mar, allotpa' o'ch a'poyuonay ama't ora ñeñt nanac yemorrentena. Ñeñtpa' atet pena ñaña eñosatse'teñets. Eñosatse'teñetspa' ama'tcha' mamesha yeñosatse'tpa' mameshapa' o'ch epa'hua erracmañen. Allempoña'pa' o'ch cha a'huañerran ñeñt cohuentetsa Yomporecop. Tarro'mar ñeñt atto yeñosatse'tyenpa' allot huena esocmañen sosya'tsañeçhno ñeñt añe patsro'tsen. Ñaña ñeñtpa' a'sosyatennay ora allohuen yocta'ña. Ñaña allohuen eñosatse'teñetspa' arro't huena e'ñe oneñet pa'netsro't, allara coñcha'puetso all parraren tso' erraparen. Ñeñtcha' a'sosyatene' ora allohuen ñeñt atet yocrrena arr patsro.

⁷Ñehua, allohueney acheñeypa' e'ñe pomnaren yeñohueñ allohuen berroçhno, ñaña oteçhno, ñaña allohuen shechpeçhno, ñaña ama't ñeñt yeçha'yetsa oño'mar. Ora añeçhnopa' e'ñe pomnaren yeñohueñ.

⁸ Tarraña atto yeñosatse'tyen yenamoṭpa' ama esesha' pomnaren penaye. Tarro'mar atto yeñosatse'tenpa' amate' errotenoṭ yeunache, ñeñto'marña chocmach yeñosatse'tyen. Ñeñto'marña yeñosatse'teñapa' e'ñe atet pena ñerra'mrrate' shecheṭ ñeñt nanac amtsañ. Shecheṭ amtsañpa' ñerra'm cho aḥay mameshapa' o'ch muetsay.

⁹ Ñaña añ ñeñtara yenamoṭpa' ñato' errotenopa' o'ch ya'ye'chochtatoñ Yompor ñeñt Yepartseshar yepen. Tarraña errotenopa' ñeñtara añ yenamoṭpa' ñato' o'ch yesasare'ch yamo'ts ñeñtara ñeñt yeḥcat Yompor ñeñt puetma'ntatara atet ñerra'm ña.

¹⁰ Ñeñto'marña masheñeshacha' ñaña noḥaneshacha' sapa' amach atet seṭatsto tarro'mar ama pocteyaye e'ñe yenamoṭpa' allot yenamateññañ yamo'ts Yompor pa'nateña, ñato' elloñapa' o'chcho' alla yesasare'ter yamo'ts ñeñtara añ yenamoṭ. Sapa' amach atet seṭatsto tarro'mar po'poñ Yompor pueyeḥcatar, ñeñtpa' ama atteye' ṭanneneto.

¹¹ Ñato' o'ch netma'ntacha atet: Ama't sapa' señoṭeñ ñerra'm erroṭ poten oñ e'ñe cohuenpa' amach erroteno poto ñaña all oñ ñeñt ḥa rreno'sen.

¹² Ñaña masheñeshacha' ñaña noḥaneshacha' ama't sapa' e'ñe señoṭueñ, ñerra'm yenare't poporpa' amach pue'mer ṭanoña ñaña parte allempo me'ten, amapa' ñerra'm yenare't ompa' amach pue'mer ṭanoña ñaña poporr.* Ñaña ellopa' e'ñe señoṭueñ, ñerra'm erroṭ poten oñ e'ñe cohuenpa' amach errotenoṭ poto ñaña all oñ ñeñt ḥa poserrastena. Ñeñto'marña yeñoṭeñ yocoppa' ama pocteyaye o'ch yorrtat ñeñt epa ñeñtara yenamoṭ. Ñeñt paterrpa' atto ya'ye'chochtateññañ Yompor, po'poñña'pa' o'chcho' alla yeñosatse'terr allohuen pa'namen sosya'tsañ ñeñtara yenamoṭ.

Añpa' ñeñt atet pena eñoteñets ñeñt huetsa e'ñe yañeña yocṭaṭñoṭ

¹³ Ñehua, te'pa' o'ch noterrser po'poñ. Ñerra'm eñall sesho ñeñt otets ñapa' nanaco' eñotenan esocmañen, ñaña ñapa' e'ño' es etsotuen, ñehua, orrtepa' atet pena ñeñt e'ñe cohuen aḥeñ attoch aḥeñenesha'pa' eñochet po'ñoḥepa't eñotuenan ñeñt cohuentetsa Yomporecop. Tarraña ellopa' amachña ḥa ommo'chatsteto atto e'ñe cohuenare' es ṭa'yenet. Tarro'mar ñerra'm po'ñoḥ es yeñotenpa' o'ch yeñoch ñaña ñeñt atto es yeṭa'yen e'ñe cohuenpa' ama ommo'chpahuoyaye.

¹⁴ Tarraña ñerra'm sapa' attera nanac sa'tsrre'muena seyoḥhro e'ñe sesope'chapreteñoṭ samo'ts ñaña ñerra'm aña sema'yoḥhrena ñeñt e'ñe socpa ñeñtṭeṭña'pa' ama pocteyaye o'ch sommo'chena atto es señoṭyeneñ mamesha'tets. Tarro'mar ñerra'm ñeñt atarr yommo'chatene'pa' ñeñtpa' attaca'yeña yeshquēn.

¹⁵ Tarro'mar ñeñt atet eñoteñetspa' ama arroṭeye' hueno Yomporeshoṭ. Ñeñtpa' arroṭa huena e'ñe ya yocṭaṭñoṭ ñeñt patso'marecpa. Ñaña ñeñt atet eñoteñetspa' arroṭa huena e'ñe oneñet poḥṭaṭñoṭ.

¹⁶ Tarro'mar ñerra'm ḥocma ya'tsrre'muena yesope'chapreteñoṭ yamo'ts amapa' ñerra'm aña yema'yoḥhrena ñeñt e'ñe yocpa, ñeñtpa' allot huenaña e'moñe'tanna'teñets, ñaña allohuen sosya'tsañeḥno.

Atet pena eñoteñets ñeñt huetsa Yomporeshoṭ

¹⁷ Tarraña ñerra'm po'ñoḥ Yompor eñotañ yepene'pa' ñeñtpa' atetḥa' yepena: Ñanompa' o'ch yesuanom allohuen sosya'tsañeḥno ñeñt ama pocteye' enteno Yompor, ñaña amach allo'na atarr atsrre'moḥen yenteno, ñaña e'ñech cohuen yentueñ allohuen yamo'tsesha', amachña ḥa po'poñ yentueno. Ñaña ñerra'm po'ñoḥ Yompor eñotañ yepene'pa' ḥochña ya'muerañtena, ñaña e'ñech cohuenare' es yorrtatyen

* **3:12** Po'ñoḥ arrpa' añ toma'ntatanet higoḥ ñaña uva ñaña aceituna tarro'mar ñeñt chopuets Palestino. Ñeñtpa' atet oten: "Ñerra'm yenare't higoḥpa' amach pue'mer ṭanoña ñaña aceituna, amapa' ñerra'm yenare't uvachpa' amach pue'mer ṭanoña ñaña higo."

yamo'tseshacop, ñaña ñerra'm erroten yotenpa' e'ñech po'ñoçh atet yepena, amachña cha yeshcare'tanneno.

¹⁸ Ñeñña ma'yoçhrenaya attoch e'ñe cohuen yentannenapa' ñeñtpa' añ muenen o'ch etsotan attoch allohueneypa' o'ch yeñohuerra ñeñt atet pocte' enten Yompor.

4

Ñeñt coshatse'tyenaya ñeñt patso'marecpapa' ñeñña e'moñe'tene' ñeñt cohuentetsa Yomporecop

¹ Ñehua, te'pa' o'ch yoctape'ch po'poñ attoch señoçh errotte' huenaña e'moñe'tanna'teñets ñaña orroteñets ñeñt çhocma orrtatyenet sesho. Ñehua, ñeñtpa' arroç huena e'ñe sa seye'chapretanna'teñoç pa'namen ñeñña quellara'yetsaña seyoçhro.

² Tarro'mar ñerra'm erroteno nanac es yeye'chapretena, ñerra'm yapa' ama yecheñepa' o'chçho' ñeñto'mara yemtsanna'ta. Ñaña ñerra'm esempo es yesope'chapreten, ñerra'm yapa' ama yecheñepa' o'chçho' ñeñto'mara yorrota, amapa' o'chçho' ñeñto'mara yeçllaranna'ta. Ñehua, yapa' añoç ama yecheno ñeñt nanac yemna'yen, tarro'mar ama añ yenamueno Yompor.

³ Ñato' ama'tcha' es yenampa' amach yagape, tarro'mar ñato' añecpach es yenamueñ ñeñt ama pocteyaye ñocop. Tarro'mar ñato' añecpach es yenamueñ attoch yañapa' o'ch nanac es yocshatse'tyena allo.

⁴ Ñehua, ahuañapa' soten ahuo'ch same'ñera Cristo, tarraña te'ñapa' añ socshatse'tyena po'poñ. Ama't señoçhe ñeñt coshatse'tyenaya ñeñt patso'marecpapa' ñeñña e'moñe'tene' ñeñt cohuentetsa Yomporecop. Ñeñto'marña ñerra'm yapa'çho' o'ch alla yocshatse'terra ñeñt patso'marecpapa' o'chçho' alla ye'moñe'ter yaña Yompor.

⁵ Ñeñtpa' ama orrena oteno Yompor po'ñoñ ñeñt aquellcaret ahuatoteñ, ñeñtpa' atet oten. "Yompor Puecamqueñ ñeñt chorratenya ñapa' e'ñe puemorreneteñoçyepa' nanac mopa'teney."

⁶ Ñeñto'marña Yomporpa' çhocmach mueneñ o'ch ahuañenat pa'y attoch amach alla yepsere ña. Ñeñto'mar ama't Yompor po'ñoñoça' e'ñe anuaret ahuatoteñ ñeñtpa' atet oten: "Yomporpa' amach errotenoç yenpano ñeñt e'ñe cohuen entetsa ñañeña, amachña Yomporeye' ame'ñeno. Ñeñto'marña Yomporpa' añach nanac yenpuen ñeñt e'ñe pueñmañesha' ame'ñenaya ña."

⁷ Ñeñto'marña sapa' çhocmach e'ñe cohuen same'ñeña Yompor. Añcha'ña satpare't oneñet tarro'mar ñerra'm atetcha' sepaça', oneñetpa' queçhpa'nerrescha'.

⁸ Ñeñto'marña o'ch alla separrocmaterr epas Yompor. Tarro'mar ñapa' çhocmach alla aguères. Te'pa' ama't o'çe' sepoçhua ñeñt ama cohuenayaye Yomporecoppa' te'pa' añ poctetsa o'ch alla soçtape'cherr cohuen attoch Yomporpa' o'ch alla enterres e'ñe cohuen. Tarro'mar sapa' ama't semneñeñ o'ch semorrentera Yomporpa', tarraña çhocma semorrentena ñaña ñeñt patso'marecpa. Ñeñto'marña te'pa' añ poctetsa o'ch sa'ypo'ña'huerr sosya'tsañ ñeñt seyoçhro'tsen.

⁹ E'ñe satpare'teñoç Yomporpa' çhosa llequèrrtsa. E'ñe sellqueñoçpa' seyahuepa'ch. Ñaña amach allo'na seche'tatsetneno, çhocña seyahua. Ñaña amach allo'na nanac es socshatse'tneno, çhocña sellca.

¹⁰ Ñaña o'ch sa'meterr so'chñar Yomporesho attoch Yomporpa' o'ch alla tantaterres.

Atto ama atoppare'tpahuo yamo'ts

¹¹ Masheñeshacha' ñaña noçhaneshacha' amach sesasare'tanna'tatsto. Tarro'mar ñerra'm esesha' sasare'tene' pamo'ts, amapa' ñeñt tompare'tene' pamo'tspa' po'ñoçhpa'

o' achm̄are'tan ñaña Yompor po'ñoñ ñeñt̄ atet anaret. (Tarro'mar Yompor po'ñoñ ñeñt̄ atet anaretpa' atet oten, yemorrentanna'tepa'ch allohueney.) Tarro'mar ñetpa' chach otenapuetañ Yompor po'ñoñ ñeñt̄ atet anaretpa' ñato' amate' es sherbeno. Tarraña ñerra'm esempo atet yepenapa' chach yottena ñerra'mrrate' yañeña e'ñe es eñotets. Tarraña ñeñt̄pa' ama atteyaye. Añña pocte' chocmach yame'ñya Yompor po'ñoñ ñeñt̄ atet anuaret.

¹² Tarraña yapa' yeñoteñ e'ñe puesheñarra ñeñt̄ nene' añ ñoñets ñeñt̄ara Yompor ñeñt̄ e'ñe po'ñoñ es eñotets. Ñeñt̄ara Yompor ñeñt̄ eñotene' ñeñt̄cha' allpon a'queshp̄aterr, ñaña ñeñt̄cha' allpon chenquërrtsa. Eso'mare'tña sañapa' chate' sotenapañ ñato' e'ñech sañeña eñote' ñeñt̄ ama cohuenayaye acheñ.

Atto ama eñotpahuo ñeñt̄cha' yetantoya tsapañonet

¹³ Te'pa' o'ch notas ñaña po'poñonet. O'ch se'mñoten ñeñtes atet otets: "Te'ch amapa' ñato' tsapañcha' o'ch ahuen ñachayo po'poñ anetso, allcha' netaruasena' paterr char attoch negana shonte' quelle."

¹⁴ Tarraña ama't atet soteneñpa' amaña señoñeña ñato' escha' setantoya tsapañonet. Tarro'mar añ patsropa' e'ñe mamecpa yocrrena. Atto yocrrena arr mame' añ patsropa' e'ñe attey ñerra'mrrate' os ñeñt̄ yenta'muene't ahuatecma chach rrema'chen e'ñe patso. O'chña enome'ta'muen atsne'pa' o'ch huañerr.

¹⁵ Ñeñto'mar añña pocte' o'ch soten atet: "Ñerra'm Yomporcha' muenatspa' a'natnepa' attoch nepa'y es ñeñt̄ atet noctape'chen."

¹⁶ Tarraña sapa' ama atteye'ña sepeno. Ñeñt̄apa' attachña pa'namen sotyen e'ñe sommo'cheñoñ. Tarraña ñeñt̄ atto yommo'chyenapa' ñeñt̄pa' ama cohuenayaye.

¹⁷ Ñeñto'marñña ellopa' o'ch alla noterrser: Ñerra'm esempo yeñoteñ yeyochro ñeñt̄ cohuentetsa Yomporecop, ñerra'm amaña atet yeppa' ñeñt̄pa' ñeñt̄ña yo'chñar yepen.

5

Ñeñt̄ atet otan eçllayorettesha'

¹ Te'pa' o'ch se'mñoten ñeñtes nanac eçllayorettes. Te'pa' e'ñe seya'chpeñesha'pa' serranare'ta tarro'mar po'ñoñ chocma eñall ñeñt̄cha' sehuapoya esempo ñeñt̄cha' semueroçhtate'.

² Ama't te'pa' o' atta puetsana'tuen sechecom. Sapa' ñeñt̄aña atarr semorrentena. Ñaña ñeñt̄ nanac coçhnesha' ñeñt̄ sechorra'yenapa' o' atta pompere'chua.

³ Ñaña ama't te' seçllayorpa' o' atta chomatle'chuen. Te'pa' ama es sherbeno. Yeñoteñ e'ñe puechmatle'cheñoñ seçllayorpa' ñeñt̄cha'ña se'nuerre' samña sechets esempohuañen atet ñerra'mrrate' achamarettes tso. Te'ña ama't o' mellapoterrmochapa' sañapa' allo'na seshonta'huanen seçllayor.

⁴ Ñaña te' ñeñt̄ atta setaruasatyese't ñeñt̄ ama setsa'tyese'tepa' te'ña ñetpa' puel-lqueñoñtetpa' nanac eñenet socop. Ñeñto'marñña te' Yompor ñeñt̄ nanac Paretpa' e'muenanet ñeñt̄ atet pueya'chpeñesha' chocma eñenet socop.

⁵ Ñaña sa añe patsropa' esocmañen sechen ama es sepallteno ama't mamesha. Ñeñto'marñña ñerra'm erroten'cho' nanac cohuen sentenpa' atet'cho' sepene. Chach sottena ñerra'mrrate' chañcho ñeñt̄ nanac errataret attoch nanac ota'. Ñerra'm o'chña nanac esoya'tpa' allempoñapa' o'ch muetset. Sapa'cho'ña atet'cha' perres samña Yompor esempohuañencha' huerra.

⁶ Tarro'mar sapa' chocma semueroçhtatyeyen acheñ ñeñt̄ ama es yeçhcatetso attachña sapa' semtsatyenanet. Ñaña ñetpa' amach errotenoñ a'queshp̄ateto ñañeñeta allempo sapa' soteñe'chenanet.

Atto ama amuenme'chpahuo cohuaime'te' Cristo

⁷ Ñeñto'marña masheñneshacha' ñaña nochaneshacha' o'ch notas, chocmach e'ñe sa'huanta'huanom ñeñt' echarr sentyen, attoch secuame'ch Yepartseshar Cristo es-empohuañencha' huerra. Atetcha' sepa atet yepena ñerra'm esempo yemneñ o'ch es yenare't. Ñerra'm yemneñ o'ch es yenare'tpa' chocmach ñanom yecuen esempo-huañencha' huapotyena esheccha' e'ñech cohuen es ye'hcatsa ñeñt' nanac yemorren-tyena.

⁸ Ñeñto'marña sapa'cho'ña chocmach es sa'huanten. Amach semuenme'chatsche tarro'mar o' mameshamerrapa' o'ch huerra Yepartseshar.

⁹ Masheñneshacha' ñaña nochaneshacha' amach señanmare'tanna'tatsto, attoch Yompor ñeñt' e'ñe es eñotetspa' amach otteñe'chuerro samña ñerra'm esempoch huerra. Tarro'mar Yomporpa' o' allanerrmoch.

¹⁰ O'ch masheñneshacha' ñaña nochaneshacha' soctape'ch ñeñt' atet pa'yese't ahuat ñeñt' a'mta'yese't Yompor po'ñoñ. Tarro'mar ñetpa' nanac ahuantete't atto nanac amuerochtatarettete't. Ñeñto'marña sapa'cho'ña atetcha' sepa samña.

¹¹ Po'ño'chpa' yeñoteñ ñeñt' nanac ahuantene' muerochteñetspa' ñeñt'pa' nanaccha' cosheñtso'tsen. Ama't sapa' seño'tueñ ñeñt' atet pa' ahuat Job. Ñapa' nanac ahuantan topateñets. Ñaña sapa' e'ñe seño'tueñ ñeñt' atet poñ Yompor. Allempo muerochetua Job Yomporñapa' alla apuer esocmañen attoch eñoch Yomporpa' nanac amueraña.

¹² Ñeñto'marña sa masheñneshacha' ñaña nochaneshacha' añ pocte' sapa'cho'ña añcha' ñanom seque'chpa'hua. Ama't e'ñe erra'tsena pa'so'chñopa' ñato't senena'ña señoñ; amach sotatsto o'ch sena' señoñ Yompor pue'ntañ pa'so'chño, ñaña amach sotatsto o'ch sena' señoñ Yompor po'patseñ pa'so'chño. Añcha'ña ñerra'm esempo e'ñe pocte' es sentenpa' attach sanap: "Atette'ca'ye." Ñaña ñerra'm esempo ama es pocte' sentenopa' attach sanap: "Ama atteyaye." Allo'tpa' ñeñt'ach. Allo'chñapa' amach eñalle attoch otteñe'chuerres Yompor.

Añ pocte' chocmach yema'yochamñpsannena

¹³ Añña ñeñt' poctetsa ñeñt'cha' atet sepa. Ñerra'm erra'tsenotes muerochtatsapa' chochña sema'yocha. Ñaña ñerra'm esesha' e'ñe coshetsapa' e'ñe pocte' morrechetepa' allo ya'ye'chochtateñ Yompor.

¹⁴ Ñaña ñerra'm eseshas atsna'tetspa' añ pocte' o'ch sagotach ñeñt' pompornesha' pen ñeñt' ame'ñetsa, attochña ñetcha' ma'yochamñpsat atsnañet. Allo'tpa' e'ñe pue'chore'teño'tet Yomporpa' noñetepa' coñe't es puese' atsnañetesho.

¹⁵ Ñerra'm e'ñe pueyemteño'tet Yompor ma'yochetpa' atsnañeñña' correrrach. Tarro'mar Yomporpa' ñach ahuamencat perre'. Ñaña ñerra'm añ o' pohua ñeñt' ama pocteyayepa' allempo Yomporpa' o'ch alla peretnerrñañ po'chñar.

¹⁶ Ñeñto'marña añ pocte' o'ch sa'meta'huerr allohuenes so'chñar. Allo'chñapa' chocmach sema'yochamñpsannena attoch socrrerra e'ñe cohuen. Ñaña ama't erra'tsena acheñer ñerra'm e'ñe cohuen cotape'chen Yomporecop ñaña ñerra'm e'ñe pueyo'chrocmañen ma'yochetpa' atetña e'mñotenña Yompor.

¹⁷ Atet pa' ahuat Elías ñeñt' a'mtaye't Yompor po'ñoñ. Ñeñt'ña Elías ama't atta ñerra'm ya ñeñtey arromñatey. Tarraña allempo ma'yochana Yompor atto enam amach huaterropa' e'ñe allempoteñña ama huaterro ma'pa char ñaña meterrerr pechapña arorr ama huateno.

¹⁸ Allempoñapa' o' alla ma'yocherrerr attoch enamueran Yompor huaterrepa'. Allempoñapa' o' alla huaterra, ñaña allempopa' o' alla choparesyerr narmetso'chno.

¹⁹ Masheñneshacha' ñaña nochanesha ñerra'm sa pueñeñarrotes o'ch alla sepuer- rerra ñeñtes te'pa' cotene' cohuen Yompor po'ñoñ, tarraña ñerra'm esesha'ña alla soctape'chatterre' e'ñe cohuenpa'

²⁰ sapa' señoche'pa'ch ñeñĩ atet cotape'chatets e'ñe cohuenpa' čhoch a'queshpátenan pamo'ts puecamquëñ ñeñĩ atarr ochñaĩ ñaña čhoch peretnateññañ allohuen shonte' po'chñar. Te'pa' ñeñĩach notas. Allohua.

Santiago

AÑ ÑANOM SAN PEDRO PO' CARTA 1 SAN PEDRO

Atto Pedropa' quellcan carta allohuenacop ñeñt ame'ñetsa ñeñt atta a'parratse'tataret

¹⁻² Masheñneshacha' ñaña nochaneshacha' ñeñtes a'yetaten ñeñt sa'muerochtatene'. O' e'ñe sesuanom seney o' atfa a'parratse'tataset allemeña anetso'mar, all anetso Ponto ñaña Galacia, ñaña Capadocia, ñaña Asia ñaña Bitinia. Sapa' ñeñtes ahuatoteñ nase't Yompor Parets e'ñe ñocop. Ñapa' e'ñe eñotuase't sach a'cohuentatarettertsa Partsocop. E'ñe ña Puecamquëña' ñeñña sa'cohuentaterre'ña sa attoña e'ñe same'ña'hueraña Jesucristo. Attoña ña po'rraspa' ñeñña o' e'shohuerrnasña so'chñar. Na Pedron sequel-lquëne'ña añ carta, napa' ñeñfen Jesucristo puellsensaren. E'ñe nehuomcha'teño'es sa napa' o'ch notas: Yomporepa'chña atarr sebensare'tam'pene', ñepa'chña socshatene'ña e'ñe sa seyo'chro allohuenes.

E'ñe yeyemteño' Yepartseshar Jesucristo chocmach yecuame'ten ñeñt o'patatare'tey

³ Te'ñapa' aye'chochtaterrapo'ch Yompor Parets ñeñt Yepartseshar Jesucristo Pompor ñeñtara ñeñt Po'yomporer pen, tarro'mar o' ye'ñallettera etserra e'ñe ña nanac pemuereño'tey. Allempoteña ya e'ñe yeyemteño' ña chocmach yecuame'teñ esempohuañen tarremphua allempoch ama ya'rromña'terro. Atto Jesucristopa' o' tanterra, ñeñto'marña yapa'cho'ña yecuen yam'a attoch amach ya'rromña'terro.

⁴ Ñaña yeyemteño' chocmach yecuame'ten ñeñt o'patatare'tey pue'ntaño' tarro'mar allpa' allña añno'tare'ttenaña alloch yequeshperra. Ñeñña queshpeñetspa' amach ahuañaña'terro, ñaña ama asosyatño, ñaña ama amillasha'tño.

⁵ Sapa' e'ñe seyemteño'ña Cristo Yomporpa' a'natasepa'ch. A'natasepa'ch chocma attoch sequeshpa'huerra esempohuañencha' mellapoterra. Yompor po'huamencopa' a'natasepa'ch attoch e'ñe seño'tuerr po'ño'ch e'ñech sequeshpa'huerra.

⁶ Ñeñto'marña te'pa' allohuenespa' socshepa'ch. Ama't te'ña atto semuerochtenapa' ñeñtpa' e'ñe mamecpa. Tarraña ama't o' chaponasa pa'namen topateñetspa' sapa' chocmuepa'ch socsheña Yompor.

⁷ Tarro'mar nanac huomenc echarr yenteñ, tarraña Yomporpa' eñochcha' ñerra'm po'ño'ch e'ñe yame'ñeña ña. Ate't ñerra'm oropa' choch ñanom atserrtchet huomenc allochña'pa' o'ch eñochet ñerra'm po'ño'ch ñeñtpa' e'ñete' oroche'. Ñeñña ama't oropa' huañerrcha' esempo. Ama't nanac tsa'te' oro, tarraña atto po'ño'ch yame'ñera Cristo, ñeñña ello nanac sherbets. Ñerra'm po'ño'ch yeyemteña ña, yeyemteño' ñapa' e'ñech cohuen entyesuerrey esempohuañencha' huerra Jesucristo, attochña e'ñe cohuen yecohuentapretera, e'ñech cohuen ya'm'cha'tare'ttapretera.

⁸ Jesucristo ama't ama sentarñepa' te'ñapa' o' semorrentera. Ama't ama senteña, te'ñapa' o' same'ñera. E'ñe socsheñeshocmañen o' same'ñeña, ñeñña cosheñetspa' atarr nanac cohuen. Te'pa' amach erra yenerre'te yeño'ñ ñeñtcha' atet yoterrerr.

⁹ Attoña e'ñe same'ñeño' Cristopa' sa'queshpaterrcha' secamquëñ.

¹⁰ Ñaña o'ch notas, ama't ñeñt a'm'ta'yesaye't Yompor po'ño'ñ ahuatpa' ñeñña serpare'tete't allempo attoch orrtaterrnay Yompor pemuereña alloch yequeshperra. Tarraña ñetpa' ama e'ñeye' eñochete'te erro'tente'ña alloch yequeshperra. (Ñehua, allempopa' amaca'ye orrtena' Cristo arr patsro.) Ñetpa' ñeñña nanac e'netañe't erro'tente'ña ñeñtcha' a'queshpatañtertsa. Ñetpa' nanac a'p'to'tanna'tyesete't e'ñe ñagattseta erro'tente'ca'yeña Yompor pemuereña alloch e'ñe yequeshperra.

11 Ñetpa'cho'ña e'ñe Cristo Puecamquëñña chorrahuetë't ñeñtña eñotatahuetë't o'ch orrterra ñeñtcha' Cristoterrets arr patsro. O'ch chap a'ne patsropa' elloñapa' o'ch mue-rochtateret. O'ch amueröchtataretetuapa' allempochña orrtaterranña po'cohuenña. Tarraña ñeñt a'mta'yesaye't Yompor po'ñoñ ahuatpa' o' alla a'p'to'tanna'tyerreterr, ta', ¿essha'chña Cristoterrets? ¿Esempo'tcha'ña orrterra?

12 Yomporpa' eñotatanet ñeñt'pa' amachca'ye ahuenaye' etsoterro; shonte'ch char allempochña etsoterra atë't eñotatanet Yompor. Tarraña ñeñt eñotat allempopa' ñeñt'pa' ama ñocpuetayaye, ñeñt'pa' e'ñechca'ye yocop. Te'ñapa' ñeñt seserrpare'tatene' cohuen ñoñetspa' ñeñtña señotatene' e'ñe cohuen ñeñt atë't penaña ñeñt co'tapñats. Parets Puecamquëñ ñeñt huetsa pue'ntañot'pa' ñeñtña eñotatenahuetña attoch serrpare'tataset saña añ cohuen ñoñets. Ama't Parets po'mllañot'eñnashar ñetpa'cho'ña atarr mueneñet o'ch eñochet ñamet ñeñt o' señotuerr sa.

Añ poctetsa o'ch yepomhuerra yañeña e'ñe Partsocop

13 Ñeñto'marña te'pa' añ poctetsa e'ñe sa seño'teño'tpa' e'ñech cohuen soctape'chen. E'ñe seyemteño't ñapa' o'ch secuame'teñ esempoch huerra Jesucristo. Allempopa' ellochña nanac muera'huerrsa, cohuencha' es aphuerres.

14 Se'mñoch Yompor atë't ñerra'm ñapa' puechemerasha'ch perres. Amach aña seychatsto atë't ñerra'm ahuat allempo ama seño'teña'; allempopa' aña semnatse'tyese't ñeñt ama cohuenayaye.

15 Yomporpa' e'ñe cohuenare' es pen. Ñeñtara Yompor ñeñt o' hua'ñerrey ya. Ñeñto'marña yapa'cho'ña añ poctetsa o'ch yepomhuerra yañeña e'ñe Partsocop. Atë't ñapa' e'ñe cohuenare' es pen, yapa'cho'ña añ poctetsa o'ch ye'pa' atë't es pen ña.

16 Atë't oteney Yompor po'ñoñot' ñeñt anuaret ahuatoteñ: "Atë't nepena na ñeñten Seyomporer sepen, napa' e'ñe cohuenare' es nepen, sapa'cho'ña e'ñepa'ch cohuenare' es sepen."

17 Yomporpa' ñach tsa'taterrahuet allpon ye'chcatyesete't ñeñt ama cohuenayaye. Amach eñalleña ama't puesheñarra ñeñtcha' queshpatsa ñeñt ama ame'ñenaye ña. Atto yema'yocheña Yompor ñeñtcha' yetsa'tatuerraya, ñeñt'epñapa' te'pa' añcha'na'tpo'ch Yompor. Ama't allponmat socrena arr patsro ñeñt'pa' ama sa'netsreyaye, e'ñech tayoteñ semcha'na'tnom' Yompor.

18 Sapa' satañneshañpa' apa'nmaset poctapñña atë't pete't e'ñe orrena. Te'ña sapa' o' seño'ter Yomporpa' o' tsa'tuonasa attoch sesuanom ñeñt ahuatnaneshañ poctapñña. Ama quellayoye' tsa'tonaye. Quella'pa' ahuañaña.

19 Añña atto tsa'tonaya po'rroso Puechemer ñeñt Cristo. Po'rraspa' ñeñt nanac sherbets atë't ñerra'm carrnerotollpa' e'ñech co'chnesha' muetsete't Partsocop.

20 Ama't ama aye'chcatarettena' pats Yomporpa' o' nan Puechemer Cristo, ñach tsa'terraya yo'chñar. Ama't ahuatoteñ anare'tpa' tarraña ama orrteno a'ne patsro. Te'ñapa' orrta e'ñe yocop, tarro'mar te'pa' o' mellapoterrmocha.

21 Yame'ñeño't Cristopa' o'ch yeyemterrñaña Pompor, tarro'mar Pomporpa' o' tantater ama't o' rromhua. Tantater attoch alla e'ñe cohuentater Pompor. Ñeñto'marña te' yapa' o'ch yeyemcha Yompor, o'ch yecuame'toñ ñeñt o'patatenya.

22 Sapa' o' same'ña'hua ñoñets ñeñt e'ñe po'ño'ch Yompor po'ñoñ. Ñeñto'marña e'ñe Parets po'huamenco't o' sesuanom allpon sosya'tsañ ñeñt seyo'chro'tsen, atto'tcha' e'ñe semorrentanna'ta. Te'ñapa' semorrentanna'tepa'ch poctacma e'ñe seyo'chrocmañen.

23 E'ñe yame'ñeño't Yompor po'ñoñpa' o' ye'ñalleterra etserra. Añ eñalleteñetspa' ama atteyaye ñerra'm allempo eñalletey yachor. Atto eñalletey yachorpa' ñeñt'pa' huañerrcha'. Añña Yompor po'ñoñot'ña ye'ñalleterra ñeñt'pa' amach ahuañaña'atterro ama't errponaña.

²⁴ Tarro'mar Yompor po'ñoñ ñeñt anuaret ahuatoteñ ñeñtpa' atet oten: Allohueney ñeñtey arromñafeypa' attey ñerra'mrrate' ta'te' tarro'mar mamecpa yocrrena. Ñaña ñeñt cohuen yentyen ya, ñeñtpa' atet ñerra'mrrate' ta'te' puerorer. Ta'te'pa' o'ch hueya'hua pue'chorpa' puerorerpa'cho'ña ama't cochnesha'tenañpa' shorcha'tuach.

²⁵ Tarraña ñeñt Parets po'ñoñpa' amach ahuañañaatto ama't errponaña. Ñeñt po'ñoñpa' ñeñtara cohuen ñoñets ñeñt o' serrpare'tatuaset samña.

2

¹ Te'ñapa' añ poctetsa o'ch sesuanem allohuen ñeñt ama cohuenaye' enteno Yompor. Atto ora allpon allo seshcanna'tenapa' o'ch sequechpa'huer. Añ shecaneñets ñeñt attoch entenes po'psheñeñ e'ñe cohuenpa' ñeñtpa'cho'ña añ palltetsa te'pa' o'ch sequechpa'huer. Atto seye'chapretannenapa'cho'ña o'ch sepuesuer ñaña. Sasare'teñetspa'cho'ña o'ch sepuesuer.

² Añña poctetsa atarrcha' yeye'cheññaña Yompor po'ñoñ e'ñe atet pena ematollpa' nanaccha' ye'chenana puemomos. Yapa'cho'ña añ poctetsa o'ch yeye'chya atet ñerra'm ñeñt yemomos yepen, tarraña ñeñtpa' ñeñtara Yompor po'ñoñ. Yompor po'ñoñpa' nanac cohuenare' alloch yocshaten yecamquëñ, attotcha' allo'na yesen eñotnomue' ñeñt poctetsa Yomporecop attochña a'queshpatareycha'.

³ Sapa' o' señotuerrñañ Yompor puemuereña atto ñapa' nanac muerensa. Ñeñto'marña añ poctetsa sapa'cho'ña o'ch seye'choña po'ñoñ.

Atto Cristo atma'ntataretta mapue'; elloña ñapa' nanac sherben alloch e'ñe yocrterra

⁴ Añ poctetsa o'ch separrocmaterr epas Cristo. Cristo ñeñt atarr sherbets atet ñerra'm mapue' ñeñt nenet quellpach pa'rrpof allo orratenet pocoll ñeñt nanac echarr. Tarraña mapue' ama't nanac sherbenpa' ama añeyaye alloch e'ñe yocrra. Añña Cristo atto sherbenpa' allochña e'ñe yocrra po'ñoñ. Ama't acheñenesha' ama't ama cohuenaye' enteñeto Cristopa' Pomporñaapa' e'ñe pocte' enteñ. Pomporñaapa' ña acre' ñeñtcha' nanac sherbats ñocop atet ñerra'm mapue' ñeñt nanac cohuen allochña tomatenan pa'paquëll.

⁵ Yomporpa' pa'paquëll penan allohuen ñeñt ame'ñenaya ña. Yapa'cho'ña attey ñerra'mrrate' mapue' alloch tomatenan pa'paquëll. Tarraña yapa' atteyñ ñerra'mrrate' mapue'pa' tarraña yapa' ñeñtey o'rrerrñaatof yocrrena. Yapa'cho'ña añ poctetsa o'ch yattecmatuerr ñerra'mrrate' Parets pa'paquëll. Allñaapa' yesherberrcha' Partsocop. Yecamquëño'pa' o'ch yepomhuerra e'ñe yeyochrohuen yepomuerra attoch Paretspa' coshena. Yame'ñeñof Jesucristopa' o'ch yesherber errotentcha' muenateney Parets.

⁶ Tarro'mar atet oteney Yompor po'ñoñ ñeñt anuaret ahuatoteñ, ñeñtpa' atet oten Yompor Cristocop:

All anetso Sión ñeñtara Jerusaléñ o'ch nemñanet puesheñarr ñeñt atarr sherbets ñeñt atet ñerra'mrrate' mapue' ñeñt acrareñ ñeñt nanac sherbets ñeñt alloch natomat nepaquëll. Ñerra'm esesha' ame'ñenaya ñapa', ñetñaapa' amach alla e'nerrete'te po'psheñeñ.

⁷ Ñeñtey ame'ñenaya Cristopa' e'ñech yocsheñeshocmañen yenteñ. Añña ñeñt atpare'tene' Yomporpa' atetcha' enteñet Cristo ñerra'mrrate' mapue' ñeñt huapore'ten ñeñt tomatene' pocoll tarro'mar atet enteñet Cristo ñerra'mrrate' ama es sherbeno. Ñeñto'marña Yompor po'ñoñpa' atet oterryerr:

Añ mapue' ñeñt huapore'ten ñeñt tomatene' pocoll, ñeñtña mapue'pa' Yompor nene' ñeñtcha' nanac sherbets.

⁸ Añ ñeñtara Cristo ñeñt toma'ntenaya

Mapue' allcha' epoto'tena ñeñt ama ame'ñetso ñeñtcha'ña a'shoratahuet chenquëñtso.

Añ epoto'teñetspa' añ toma'ntena atto atpare'teññañet Cristo po'ñoñ. Ñeñto'marña atet anaret, ñerra'm ama yame'nyopa' e'ñech yechenca'huerra.

Ya ahuatpa' ama esona'tareyayye, te'ñapa' e'ñe Yomporena'tarey

⁹ Tarraña sapa' ama aneyayso ñeñt atpare'tene' Yompor. Ya ñeñtey ame'ñenaya Yomporpa' atetcha' enteney ñeñtey acrare'ttertsa ñocop. Ñaña atetcha' enteney ñeñteycha' sherberrets Partsocop, ñeñteycha' anare'ttertsa ñocop. Ñaña e'ñech Yomporena'tar enteney. Ñeñto'marña yocoppa' añ poctetsa o'ch yorrtatyesoñ po'cohuenña. O'ch yeserrpare'toñ atto ñapa' cheterrey checmetot all sosya'tsañoñ, te'ñapa' o' chapaterrey e'ñe ña po'puetarenño all e'ñe cohuentena ña.

¹⁰ Ahuatpa' ama esona'tareyayye, te'ñapa' Yomporena'tarey. Ahuatpa' ama amuerare'teyayye, te'ñapa' o' ya'muerare'tterra.

Atto cohuen es yepen attochña e'ñe cohuen yesherbeñ Yompor

¹¹ O'ch masheñneshacha' ñaña no'chaneshacha' e'ñe nemorrenteño'tes o'ch notas: Sapa' ama't seyçhenañ aña patsro ñeñtpa' ama sa'netsreyaye. Ñeñto'marña añ poctetsa o'ch sa'ypo'ñañpes ñeñt muenatse'tyese't sechets. Atet muena'yen yechetspa' ñeñña quellarene'ña yecamquëñ; mueneñ o'ch a'chencatonay yecamquëñ.

¹² Ñeñt ama ame'ñetso seshopa' añ poctetsa o'ch sorratoñ ñeñt atet e'ñe cohuenare' es sepen. Allochñapa' ñerra'm mueneñet o'ch sasare'tasetpa' o'ch entonaset atto e'ñe cohuenare' es sepen. Allochñapa' ñerra'm esempo huerra Cristo attoch eñotatuerrey ñeñt atet ye'pa'yena, ñetpa'cho'ña o'ch aye'chochtaterrñañet Yompor.

¹³ Te'pa' o'ch notas ñaña, allpon ñoñets ñeñt nen añcha'taret añ patsropa' añ poctetsa o'ch same'ñya. Yame'ñeñoñ Yepartseshar Cristopa' añ palltetsa o'ch yame'ñera ñaña allpon ñoñets ñeñt nen ñeñt atarr añcha'tare'ttetsa arr patsro.

¹⁴ O'ch same'ñera ñaña ñeñt mueñen añcha'taret ñeñtcha' a'coñchatuene' allohuen ñeñt ama pocteye' es petso, ñaña ñeñtara ñeñtcha' coshapretene' allohuen ñeñt e'ñe cohuenare' es pets.

¹⁵ Tarro'mar atet muenen Yompor: chocmach yorrtaten atet e'ñe cohuenare' es yepen. Ñato' yorrtateñoñ e'ñe cohuenpa' o'ch quechpa'huerret atto eñosatse'tyenet. Ñetpa' patpare'teñoñet eñosatse'tyenet tarro'mar ama es eñoteneto. Ñato' yorrtateñoñ e'ñe cohuenpa' o'ch yequechpatuerranet atto eñosatse'tyenet.

¹⁶ Ñaña e'ñech same'ña cohuen ama't Yompor po'ñoñpa' ama añcha'no'chenaye' senteñe socop. Tarraña ama't ama añcha'no'chteno po'ñoñ yocoppa' amach allo'na ye'pa'yesneno ñeñt sosya'tsañ. Añcha'ña o'ch atet yame'ña atto pueyochresha' perrey Yompor.

¹⁷ Añ poctetsa o'ch sem'cha'na'ch allohuen acheñ. O'ch semorrentanna'ta allohuenes ñeñtes ame'ñetsa. O'ch sem'cha'na'ch ñaña Yompor. O'ch same'ñya ñaña ñeñt añcha'taretetyetsa arr patsro.

Añ poctetsa o'ch yemurochtaprecha Cristo

¹⁸ Ñeñtes ataruasataretespa' o'ch notas, añ poctetsa socop. Sem'cha'na'teñoñpa' o'ch same'ñya samo'mte'. O'ch same'ñya samo'mte' ñeñt amueraña. Allo'tpa' o'ch same'ñya ñaña ñeñt ama't ama amueraño.

¹⁹ Ñaña ama't po'psheñeñ muroch'tateney ama't allempo yepen ñeñt cohuenare', e'ñe yame'ñeñoñ Yomporpa' amach ya'tsrre'matsto, ñeñtpa' e'ñech pocte' enteney Yompor.

²⁰ Ñerra'm esempo cho erro't yepen po'psheñeñ ñerra'm coñchatuerrey, ñeñtpa' e'ñe pocte' yecoñchepa'. Ama't ama ya'tsrre'mo allempo, tarraña amach cohuenaye' enteney Yompor, tarro'mar ñeñtpa' chocma mueneñ o'ch yecoñcha. Tarraña ñerra'm esempo

ama't yepena ñeñt' cohuenare' ñato' ama't muerochtatey po'psheñeñpa' ñerra'm ama ya'tsrre'mopa' ñeñtpa' e'ñech pocte' enteney Yompor.

²¹ Ñeñto'marña te'pa' yapa' o' hua'ñerrey Cristo attoch yame'ña'huera, allochñapa' o'ch yemuerochtaprecha ña. Ñapa' ña ñanom muerochtatsa, tarraña ñapa' yechatnerrey attoch añ poctetsa o'ch yemuerochtapretera ña.

²² Ñapa' ama eñalletatane'te po'chñar ama't coñe'ta. Ñapa' ama sheca'ye'te ama't parrocha.

²³ Ama't allempo sasare'chete'tpa' ñapa' amach ellopa' sasare'terraneto ñaña. Ama't allempo muerochtachete'tpa' ñapa' amach ellopa' o'terraneto o'ch nemuerochtaterres saña. Ñapa' aña e'ñe yemte't Pompor, tarro'mar eñoteñ Pomporpa' a'poctaterrñañcha', tarro'mar ñapa' ña e'ñe pocte' es pets.

²⁴ Ñapa' ña yecoñchaterr e'ñe ya yo'chñarof allempo muerochta all corsocho. Allempoña rroma e'ñe ña po'chtsotpa' o' ahuanmanperrey yo'chñar. Te'ña yocoppa' añ poctetsa o'ch ya'ypo'ña'huerr ora yo'chñar o'ch yeperra ñeñt' atet poctetsa Partsocop. Atto atarr atserrparetterra ahua't ñeñtpa' attoña a'queshpaterrey ya.

²⁵ "Yapa' ahua'tpa' attey ñerra'm carrnero. Ya'ypo'ña'uye't ñeñt' yecuañpene'." Tarraña te'ñapa' o' alla yoctape'cherr e'ñe cohuen, o' yeyemtera Cristo ñeñt' yecuañpene', ñeñtara ñeñt' Pamo'mte' pen ñaña yecamquëñ.

3

Arrpa' all cotape'chatan ñeñt' arrollaretnesha'

¹⁻² Sapa'cho'ña ñeñtes arrollaretes, o'ch notas saña. Añ poctetsa o'ch same'ñya serrollar. Chocmach same'ñya serrollar ama't serrollarpa' ama ame'ñenano Yompor po'ñoñ. E'ñe cohuen same'ñeño't serrollarpa' ama't ama erroten es soteno ñato' atto'tpa' o'te' ame'ñerra ñaña serrollar. Ñetpa'cho'ña o'ch cotape'cherret e'ñe cohuen ñerra'm esempo entennaset atet e'ñe cohuenare' es sepen.

³ Amach e'ñe patrira sema'yoçhratsto atto secohuentena e'ñe orrena. Atet ñerra'm sechpa' amach ñeñta sellquëno o'ch sañño'teñ e'ñe cohuen attoch enteney yamo'tsesha' e'ñe cohuen, tarraña ñeñtpa' e'ñe orrena. Ñaña amach e'ñe patrira sema'yoçhratsto attoch sech alloch secohuenta atet ñerra'm oro, tarraña ñeñtpa'cho'ña e'ñe orrena. Amach sema'yoçhratsto ñaña attoch sechorra'yesa e'ñe coçhnesha'. Añ aña'teñets ñeñt' yentapretannena e'ñe yechsopa' ñeñtpa' e'ñe orrena orrtateney e'ñe cohuen.

⁴ Añcha'ña yema'yoçhra o'ch yecohuentena yeyoçhro attoch Yomporpa' entapretey e'ñe cohuen. Añ cohunteñets yeyoçhro ñeñtpa' ama entpahuoyaye tarraña ñeñtpa' amach ahuañañaterra. Atet ñerra'm muereñets ñeñtpa' e'ñech cohuen entapretey Yompor. Ñerra'm ama atsrre'mña'feyaye ñeñtpa'cho'ña e'ñech cohuen entapretey Yompor. Ñerra'm e'ñe cohuen yoctape'chen, Yomporpa' entapretey yocta'ña atet ñerra'm ñeñt' nanac sherbets, ñaña ñeñt' nanac coçhnesha'.

⁵ Atet pa'yese't ahua't coyanesha'chno ñeñt' e'ñe cohuenare' es pa'yestse't Partsocop. Ñetpa' e'ñe pueyemteño'tet Yomporpa' e'ñe cohuen ame'ñyete't puerrollaret. Ñeña pueyoçhretpa' e'ñe a'cohuenchete't Yomporcop.

⁶ Atet pe't ñaña ahua't Sara. Ñapa' e'ñe cohuen ame'ñane't puerrollar Abraham. Ñapa' e'ñe atet entane't puerrollar ñerra'mrate' ñeñt' pamo'mte' pen, nanac ame'ñye't. Sapa'cho'ña te'pa' sachorcha' seper Sara ñerra'm ama sem'chaño'ta es pocte' sepa'yeno saña.

Attecma cotape'chatan ñaña ñeñt' ataporetnesha'

⁷ Attecmach notas saña ñeñtes ataporettes. O'ch semuerya setapor e'ñe cohuen. Sapa' o'ch senteñ saña setapor e'ñe cohuen, tarro'mar coyanesha' ama tama ahua'mencate.

Añcha'ña o'ch sagaphuer parro ñeñtcha' apas Yompor. E'ñe puemuereñotes sapa' apascha' allochña sapa' corretsasach socsheñeshocmañen e'ñe tayoteñ errponañohuen. O'ch seycha e'ñe cohuen epas setapor, attotcha' Yomporpa' e'mñotas ñerra'm esempo sema'yochya.

⁸ Te'ñapa' o'ch notas allohuenes. Añ poctetsa o'ch soctape'cherr e'ñe patrra ñeñt amuerañtetsa. Ñaña o'ch sellcapretanna'ta ñerra'm esempo es sellcatyene'. Ñaña e'ñech cohuen yemorrentanna'ta allohueneñ ñeñtey ame'ñetsa, ñaña e'ñech cohuen yemueranna'ta. O'ch es yentaprech po'psheñeñ e'ñe cohuen, amachña yañeña e'ñe cohuen entatstatso.

⁹ Ñerra'm po'psheñeñ erroť p̄aspa' sapa' amach setsa'tatatsche eso. Ñerra'm po'psheñeñ sasare'taspa' sapa' amach sesasare'tatsterraneto. Añcha'ña o'ch senamoñ Yompor a'nachepa', tarro'mar atet muenen Yompor atetcha' yeḡa. Allochñapa' ñerra'm atet yeḡapa' ñapa' o'ch a'natenya yaña.

¹⁰ Tarro'mar atet oteneñ Yompor po'ñoñ:

Ñerra'm yemneñ o'ch yeycha e'ñe cohuen, ñaña ñerra'm yemneñ o'ch yocsherrapa' ñeñtpa' añ poctetsa, amach yesasare'tatsto, ñaña añ poctetsa, amach yesh-care'tatsto.

¹¹ Ñerra'm yemneñ e'ñe cohuen yocsherra, añ poctetsa o'ch yesuanem ñeñt ama cohue-naye' enteno Yompor. Ñeñt e'ñe atet muenen Yomporpa' ñeñtcha'ña atet yeḡa. Ñaña añ poctetsa, o'ch ye'nerr attoch yentannena e'ñe cohuen epay yamo'tsesha'. Te'ñapa' allo'nepa'ch yesen entanna'ttsa e'ñe cohuen.

¹² Yomporñapa' e'ñech cohuanpeney ñeñtey e'ñe pocte' es pets. Ñapa' e'mñoteneñ allempo es yenamueñ e'ñe ñesho. Añña ñeñt petsa ñeñt ama pocteyayepa' Yomporñapa' amach cohuenaye' enteñe ama't mamesha.

Ñerra'm esempo e'ñe attota mueroçhtatenyet yapa' atarrcha' cosheñtso'tseneñ

¹³ Ñerra'm sapa' çhocma sema'yochrena ñeñt cohuentetsa Yomporecop, allempoñapa' amach esesha' errotenoť semueroçhtataye.

¹⁴ Tarraña ñato' errotenopa' o'ch mueroçhtataset ama't añ sema'yochrena ñeñt cohuentetsa Yomporecop. Tarraña ñerra'm e'ñe attota mueroçhtatasetpa' sañapa' atarrcha' cosheñtso'tsenes. Amach semcha'tatstaneto ñaña amach sellcatsto.

¹⁵ Añcha'ña o'ch seyemcha Cristo e'ñe seyoçhrohuen. O'ch senteñ Cristo atarr cohuen Parets ñeñt Yepartseshar yepen. Ñerra'm esempo esesha'pa' o'ch a'p̄to'tas ¿eso'marte'ña atarr same'ñeñaña Cristo? sapa' çhocmuepa'chña e'ñe cohuen señoñeña atetcha' sanap e'ñe cohuen. E'ñe semuereñoť e'ñech acoḡa sanapanet e'ñe cohuen e'ñe semcha'na'teñoñanet.

¹⁶ Chocmach e'ñe señañesha' seyoçhro e'ñech cohuenare' es sepen. Allochñapa' ñerra'm ama't esempo sasare'tenyetpa' ñeñtña atto e'ñe pocte' es yeḡa'yen Cristocoppa' ñeñtpa' ñeñtcha'ña pencatahuet.

¹⁷ Añ pocte' ama't yemueroçhta atto ama't e'ñe cohuenare' es yepen. Ñerra'm atet muenen Yomporpa' pocte' o'ch yemueroçhta. Añña ñerra'm e'ñe yo'chñaroḡpa' o'ch yemueroçhta, ñeñtpa' orrenach yemueroçhta.

¹⁸ Ama't Cristopa'çho'ña ahuatpa' atarr mueroçhtachete'ť. Ñapa' ña rromats e'ñe parrocha allohuenacpay attotña tsa'tuerrnaya yo'chñar. Cristo ama't ña ñeñt e'ñe pocte' es petspa' attotña rroma yocop ñeñtey ama pocteye' es petso. Tarro'mar rroma yocop attotcha' yeparrocmaterr epay Yompor. Ña ama't rroma po'çhtsoḡpa' puecamquëñña' ama rromo.

¹⁹ E'ñe puecamquëñoḡpa' arr ahuo' allo'tsa'yen ahuatñaneshañ puecamquëñnesha' ñeñt alla ayottan̄psareť, ñeñt ama çha'netso. Ñaña puecamquëñ allña' ser-ppare'tatosanet.

²⁰ Ñehua, añ puecamquëñ ñeñt̃ ahuatnaneshañ ñeñt̃ nanac atpare'taye't Yompor po'ñoñ allempo corre't Noé. Allempopa' Yompor nanac cohuame'tanetañe't o'ch ame'ñyet. Allempoteñ Noépa' ye'chcatane't po'compuer, Yomporpa' cohuame'tanete't esesha'ch ame'ñatsa. Tarraña ama eseshaye'ña ame'ñatso, e'ñe posocsheña ñeñt̃ ame'ñatsa. Añ posocsheña ñeñt̃ ame'ñaya Yomporpa' ñeñt̃ara posocsheña ama esesha' ño'sha'tso, ñetpa' qeshpet oño't.

²¹ Tarro'mar yapa'cho'ña te' ñerra'm yapatare'tta oño't Partsocop e'ñe atet pena ñerra'm ahua't Noépa' o' qeshp̃a e'ñe oño't. Ñeñto'marña yapa'cho'ña ñerra'm yame'ñeño't o' yapatare'tta Partsocop e'ñe oño'tpa' ye'ñoteñ o' yequeshp̃a. Ñehua, ñeñt̃ apatare'tteñetspa' ama añecpayaye o'ch yapa oño attoch huañ yepatser. Añcha'ña ñeñt̃ alloch yequeshp̃a. Atto yapatare'tta Partsocop o'ch yenam̃ Yompor etserrataterrnayepa' yoc̃ta'p̃ña e'ñe cohuen. Atto yapatare'tta Partsocoppa' ye'ñoteñ o' yequeshp̃a tarro'mar Jesucristo atto tanterra ama't rromhua.

²² Allempo tanterra Cristopa' o' ahuer pue'ntaño. Te'ñapa' allo'tsen epuet Pompor e'ñe po'cohuenro't, allña'pa' all partsoten. Ama't allohuen ñeñt̃ Pompor po'millaño'teñnanesarpa' ñetpa'cho'ña te'pa' e'ñe cohuen ame'ñeñet ñamet. Ñaña ama't allohuen ñeñt̃ añcha'tare'tetyetsa pue'ntaño'pa' ñetpa'cho'ña ello ame'ña'hueñet ñamet. Ama't allohuen ñeñt̃ ahuamencate'chnopa'cho'ña ello ame'ña'hueñet.

4

Atto e'ñe yemuerochteño'tpa' o'ch huomenc ye'pa' yeyocher Yomporecop

¹ Cristo allempo añe patsro'tsenpa' ñapa' e'ñe pocte' enteñ attoch muerochtateñet nanac. Ñeñto'marña sapa'cho' e'ñepa'chña pocte' senteñ o'ch semuerochta e'ñe ñocop. E'ñe yemuerochteño'tpa' o'ch huomenc ye'pa' yeyocher. Yemuerochteño't yechtsopa' o'ch yequechpa'huerr ñeñt̃ ama pocteyaye Yomporecop.

² Allochña'pa' amach allo'na ye'pa'nen o' atet muenatyese't yechets ahua't. Yocoppa' añ poctetsa o'ch yoc̃tape'chen ñeñt̃ atet muenen Yompor.

³ Te'ñapa' ñeñteshañach atet se'pa' atet se'pa'yese't ahua'toteñ ñeñt̃ atet pena te' ñeñt̃ ama ame'ñetso. Ñetpa' añ pa'namen p̃a'yenet ñeñt̃ atarr sosya'tsañe'chno ñeñt̃ allohuen pa'namen muenatse'tyeñets sosya'tsañ ñaña posa'tarñats ñaña coshatse'teñets ñaña orrare'teñets ñaña muechatse'teñets ñeñt̃ ama't mameshapa' ama pocteye' enteñe Yompor. Te'ñapa' ñeñteshañach atet se'pa' ñeñt̃ semnatse'tyen sa.

⁴ Ñeñt̃ peyemte't ahua't ñeñt̃ epa'p̃ porrare'te'tpa' te'ñapa' amach çhapaneto pueyo'chro eso'marte' o'huañ porrare'tapretanet. Attoña ñetpa' mueneñetcha' o'ch achm̃are'taset.

⁵ Tarraña te'pa' o'ch notas, ama't ñeñt̃ ama ame'ñetso, esempohuañenpa' a'metatuerranetcha' Yompor. Po'ño'ch ñapa' ñach tsa'taya ñeñt̃ ame'ñetsa. Ñaña ama't ñeñt̃ ama ame'ñatsopa'cho' ñach tsa'tatuerrahuet, ora allohuenet, ama't ñeñt̃ corretsa, ñaña ama't ñeñt̃ o' colla'huen.

⁶ Ñeñto'marña ama't ñeñt̃ arromñañesha' o' aserrpare'tatuare'ttet cohuen ñoñets. Allochña'pa' ama'tcha' a'coñchatare'ttetañ po'chtso'tet atet pena allohuen arromñañesha', puecamquëño'tetña'pa' corra'huerretcha' e'ñe atet correna Yompor.

⁷ Te'ñapa' o' mellapoterrmocha. Ñeñto'marña añ poctetsa, e'ñe ye'notateño'tpa' o'ch yema'yochera Yompor. E'ñech yetpara es yepen attotcha' amach yepseñe Yompor ma'yochaya.

⁸ Añpa' ñeñt̃ña ñanom nanac sherbets: o'ch yemorrentanna'ta nanac e'ñe yeyo'chrocmañen. Yemorrentanneño'tpa' o'ch ye'pretnanna'ta atto erro'ten ye'pannena.

⁹ Ñaña e'ñech socsheñesha' o'ch sagapannena e'ñe sepa'cillo.

¹⁰ Yompor puemuereñoŧpa' o' e'ñe apa'yeras attoch setorra'yera e'ñe ñocop. Te'ñapa' o'ch notas, o'ch seyenpanna'ta año ñeñŧ apuenes Yompor. Attochña sesherbatyesñaña Yompor puemuereña.

¹¹ Ñeñŧpa' atet ñerra'm eseshas serrpare'tatspa' Yomporepa'chña po'ñoñ seserrpare'ten. Ñerra'm eseshas yenpuene' po'psheñeñpa' Yomporepa'chña po'huamencot seyenpanna. Allochñapa' yeparrocmateñoŧ epay Jesucristopa' o'ch ya'ye'chochtatuerrñañ Yompor. Yomporepa'chña aye'chochtatuapo' allohueney. Amcha'na'tpahuepa'ch po'partsoña tayoteñ errponohuañen. Ñeñŧpa' attepa'chña Nompore.

Ñerra'm esempo sasare'tenyet atto yapa' yecristona'tarterra yañapa' atarrcha' cosheñso'tseney

¹² Amach masheñeshacha' ñaña nochaneshacha' seyorenatsto ñerra'm huaponasa topateñets nanac huomenc; tarro'marcha' huaponasa o'ch topatensa'. Amach seyorenatsto atet sepena ñerra'm esempo huaponasa ñeñŧ ama sentare. Attecma ama't masheñesha' ñeñŧo' ame'ña'huapa' attecma o' topatuanet.

¹³ Allempoteñ o' semuerochtaprecha Cristo, e'ñe semuerochteñoŧpa' socshepa'ch. Allochñapa' ñerra'm esempoch orrterra po'cohuenñapa' sapa'cho'ña socshapreterach e'ñe cohuen.

¹⁴ Ñerra'm cho sasare'tenset atto o' secristona'tarterra, sañapa' atarrcha' cosheñso'tsenes, tarro'mar e'ñe allempoteñ Yompor Puecamqueñ ñeñŧ cohuenñatsotetspa' chaponasa sesho. Po'ñoñ ñetpa' Cristo'na sasare'tenet tarraña sapa' e'ñe cohuen secohuentateññañ Cristo.

¹⁵ Añña ama cohueno o'ch yemuerochta yemtseñoŧ acheñ, ama't ñaña yeteñoŧ, ama't ñaña yepeñoŧ ñeñŧ ama cohuenayaye, ama't ñaña ya'metampeñoŧ attochcha' ye'moñe'tanna'ta. Ñerra'm attotña yemuerochtapa' ñeñŧpa' e'ñech orrena yemuerochta.

¹⁶ Añña ñerra'm añecop yemuerochta tarro'mar o' yecristona'tarta, amach yepencatsto. Chocmach yecohuentatoñ Yompor tarro'mar o' yanerrñañ pa'so'cheñ.

¹⁷ O' chapmoch allempoch Yomporpa' acranatuerrey allohueney ya. Yapa' yanomcha' a'meterr atet enteney ama't ñeñŧey puechemereshay o' perrey Yompor. Ñerra'm yapa' yanomcha' a'metamper ama't ñeñŧey ame'ñatsapa', allempopa' errotenuachca' queshperrate' ñeñŧ nanac atpare'tene' cohuen ñoñets ñeñŧ Yompor po'ñoñ.

¹⁸ Ama't ñeñŧey e'ñe pocte' es petspa' e'ñech yemuerochenñoŧa yequeshperra, allempopa' errotenuachca' chapña ñeñŧ ochñañesha' ñeñŧ atarr atpare'tene' Yompor.

¹⁹ Ñeñŧo'marña ñerra'm esempo yemuerochta e'ñe Yompor puemuereñoŧpa' allempopa' amach yelcatsto. Añña poctetsa o'ch alla yeyemtera Yompor e'ñe yocsheñeshocmañen yeyochro, tarro'mar ñapa' ña ñeñŧ yeyeçhcate'. Ñapa' ña ñeñŧ e'ñe pocte' es pets, ñapa' e'ñech a'poctatonay. Añcha'ña allo'nepa'ch yesen cotape'cherre' ñeñŧ cohuentetsa Yomporecop.

5

Atto cotape'chatan allohuen ñeñŧ pompornesha' pen ñeñŧ ame'ñetsa

¹ Te'pa' o'ch notas samña ñeñŧes pompor pen ñeñŧ ame'ñetsa sesho. Napa'cho'ña nach pompor pen ñeñŧ ame'ñetsa nesho. Napa' neñche't atet muerochte't Cristo. Tarraña ñerra'm esempo huerra po'cohuenñopa' yapa' o'ch yecohuentapretera yaña.

² Napa' te'pa' o'ch notas sa ñeñŧes pompor pen ñeñŧ ame'ñetsa. Atet pena ñeñŧ cohuanpene' po'carrneror, sapa'cho'ña secuanmpescha' e'ñe cohuen ñeñŧ ame'ñetsa

sesho, tarro'mar ñetpa'cho' po'carrneror penanet Yompor. Amachña seçllañoña secuam̄psatstaneto atet sepeñ ñeññ ama tama cohuenaye' senteno. E'ñechña socsheñsha' secuam̄penanet atet muenen Yompor. Tarraña amach sagapueñoña quelle secuam̄psatstaneto. Ñerra'm quellayecop yecuan̄peña' o'ch yepenca. Añcha'ña e'ñech yocsheñsha' yecuan̄psanet.

³ Amach cha sa'm̄cha'noçhteñoŕeye' secuam̄penaneto, ñeññes atet anaretes sach cohuan̄penahuet. Añcha'ña çhocmach yentatanet atet e'ñe cohuen es yepen. E'ñe yocape'chateñoŕ cohuenpa' o'ch yeyçhatenanet allohuen ñeññ e'ñe po'carrneror pen Yompor.

⁴ Cristoñapa' ñeññ yecuan̄pene' allohueney atet ñerra'm po'carrnerorey. Ñerra'm esempo huerra, allempopa' yapa'cho' atsa'tareteycha'. Atsa'tareteycha' po'cohuenño ñeññcha' atarr nanac yocshaterre' ñeññpa' ama ahuañaño ama't errponaña.

⁵ Ñeññes huepaneshas, te'pa' napa' o'ch notas saña. Añ poctetsa o'ch same'ñeña ñeññ po'n yacma ñeññ sompor sepen. Po'ñoçh o'ch notas allohuenes, e'ñech cohuen same'ñannena amach sañeña e'ñe cohuen entatstatso tarro'mar:

Yomporpa' ama pocteye' entenano ñeññ atet ommo'chetsa. Añña ñeññ ama esoye' entetso ñeññña atarr muerenaña Yompor.

⁶ Yapa' yeñoteñ Yomporpa' nanac ahuañencat. Yapa' ama ya yehuamencoteye' yommo'cheno. Ñeñño'marña yeñoteñ Yomporpa' ama cohuenaye' entenano ommo'cheñets. Amach yeyemtatsto e'ñe yañeña, tarro'mar yapa' ama es yesherbena. Añcha'ña e'ñe cohuen yeyemtena Yompor, allochñapa' ñerra'm esempo ña muenats, ñachña yocshatuerre'ña e'ñe cohuen.

⁷ Ora allpon ñeññ yelcatene' añ poctetsa o'ch yotue Yompor. Tarro'mar ñapa' po'ñoçh çhocma llecapretenya ñeññ yelcatene'. Allochñapa' ñachña ya'metuerre' yellquëña attoch yocsha'huerra e'ñe cohuen.

⁸ E'ñe señoateñoŕpa' señoata'ch, tarro'mar oneñeñ ñeññ se'moñe'tene'pa' çhocma chopeñe'chen errañaren atet ñerra'm ma'yarr, çhach añcha'noçhetnena e'nyese' ñeññcha' a'chencat.

⁹ Añcha'ña satpare't oneñeñ. E'ñe yame'ñeñoŕ Cristo o'ch huomenc yeña' yeyoçher. O'ch señoçh attecmaçh mueroçhtatuan allohuen masheñnesha' ama't ñeññ o' ame'ña'huerra ora errañaren añe patsro.

¹⁰ Ama't mueroçhtatyesasetcha' mame' tarraña Yomporpa' nanac amueraña. Ñapa' ñachña a'poctatuerre'ña socop, attoch huomenc perrnas seyoçher. Allochñapa' amach alla sepuesuere. Atetcha' p̄atonay Yompor, ñeññey muenene' o'ch yecohuentaprecha po'cohuenño. E'ñe yame'ñeñoŕ Cristo yecohuentapreterach po'cohuenña ñeññcha' ama ahuañañañterrtso.

¹¹ Yomporepa'chña aye'choçhtatuapo' allohueney. Añcha'na'tpahuepa'ch po'partsoña tayoteñ errponohuañen. Ñeññpa' attetepa'chña Nompore.

Arrpa' all so'tnerranet po'cartoŕ

¹² Te'ñapa' ñeññach e'ñe notas necartoŕ. Te'pa' o' notuas o'ch same'ña'huera e'ñe po'ñoçhocmañen. Ñaña o' notuas añpa' ñeññña e'ñe po'ñoçh Yompor pueñuereña alloch atarr bensare'tam̄peney. Te'ñapa' o'ch alla noterrserri, po'ñoçhpa' o'ch seyemtoña Yompor pueñuereña. Ñeññ masheñ Silvanopa' ña nequellcaten attoch neserrpare'tatas mame' añ necartoŕ. Atet nenteñ masheñ Silvano, ñapa' nanac cohuen ame'ñenana Yompor.

¹³ Ñaña ñeññ ame'ñetsa arr Babilonia* mueneñet o'ch huom̄cha'taset ñamet añ necartoŕ. Ñetpa'cho'ña o' acerranet Yompor e'ñe atet ñerra'm sa. Ñaña neyoçher Marcospa'cho'ña mueneñ o'ch huom̄cha'tas ñaña necartoŕ.

* **5:13** Anets ñeññ pa'so'cheñ Roma te'ñapa' añ toma'ntateñet anets Babilonia.

¹⁴E'ñe semorrentanna'teñoĩ o'ch sehuom̃cha'tanna'ta.†
E'ñe seyemteñoĩ Jesucristo, Yomporepa'chña socshatene'ña e'ñe cohuen seyočhro.
Te'pa' ñeñtach notas, ñeñtpa' attetepa'chña Nompore. Allohua.

Pedro

† 5:14 Po'ñočh oteneý, "E'ñe semorrentanna'teñoĩ čhoch setso'ttsa'pa'tannena ñerra'm esempo sehuom̃cha'tanna'tena." Ñeñtpa' atet yečhete'ť ahuat.

AÑ PUEPAÑ SAN PEDRO PO' CARTA 2 SAN PEDRO

Atto Pedropa' quellquërranerr carta allohuenacop ñeñt ame'ñetsa

¹ Masheñeshacha' ñaña nochaneshacha' allohuenes ñeñtes e'ñe attecma cohuen same'ñena atet yame'ñena yaña, tarro'mar allohueneypa' e'ñe ñapta Jesucristo ñeñt Yeyomporer yepen ñeñtara ñeñt Ya'queshpatañer yepen, ñeñtña e'ñe pocte' es pets. Na Simón Pedronpa' o'ch alla nequellquërrnaserr po'poñ carta, ñeñten torretsa Jesucristo-cop, ña puellsensaren.

² E'ñe nehuomcha'teñoñes sa napa' o'ch notas: Yomporepa'chña atarr sebensare'tam'pene'; ñepa'chña socshatene'ña e'ñe sa seyo'chro allohuenes e'ñe seyemteñoñ Yompor ñaña Puechemer Jesús ñeñt Yepartseshar yepen.

Atetcha' yepa'yena allohueney ñeñtey e'ñe cohuen ame'ña'yenaya Cristo

³ E'ñe yeyemteñoñ Yompor ñapa' chocma apueney allohuen ñeñt allpon yepalltena alloch yocrrena e'ñe cohuen ñocop. Ñaña apueney attoch yoctape'cherr ñeñt e'ñe pocte' enten ña. Ñeñt'pa' e'ñe ña po'partsoteñoñ apueney. Ñapa' añ muenen o'ch yecohuentapretera ña. Ñaña añ atarr muenen o'ch yorrtatapreter po'cohuenña.

⁴ E'ñe po'cohuenñoñ ñapa' atet o'tnerrey ñeñt'cha' apuerrey ñeñt'cha' nanac cohuen yenterr, ñaña ñeñt'cha' atarr nanac sherberrets yocop. Añ apuerrey po'huamenc attoch amach añ atarr yemna'yeno ñeñt yentyen arr patsro. Attochña amach atarr nanac ya'sosyateno e'ñe yañeña. Allochñapa' e'ñe yeyemteñoñ Paretspa' o'ch yaguërrñañ ñeñt e'ñe atet pena ña.

⁵ Ñeñto'marña añ poctetsa, ñanomcha'ña Cristo yeyemta. Allo'tpa' ñaña o'ch yorrtaten atto e'ñe pocte' es yepen. Allo'tpa' ñaña añ poctetsa, o'ch yeñotua e'ñe ora atet muenen Yompor.

⁶ Allo'tpa' ñaña o'ch yepuesuanom ñeñt atet yemnatse'tyen ya. Allo'tpa' ñaña e'ñech ya'huanta'huanom allohuen ñeñt atarr echarr yentyen, alloteñña' o'ch yoctape'ch ñeñt poctetsa Partsocop.

⁷ Allo'tpa' ñaña o'ch yemorrentanna'ta, e'ñech yemo'nasheñsha' yepannena. Allo'tpa' ñaña e'ñech yemuerannena.

⁸ Ñerra'm atetcha' sepa añe'chno atet ñeñt o' notuaspá', allempoñapa' allo'nach sesen parrocmatats epas Yepartseshar Jesucristo. Allochñapa' amach e'ñe orrena señoñtere, añcha'ña e'ñe sorrtatyen ñeñt atet muenen Yompor. Allempoñapa' nanaccha' sesherberr Cristocop.

⁹ Ñerra'm ama allo'na yeyemuetneño Cristopa' yapa' amach e'ñe es cohuenaye' yeñotueno. Chach yottena ñerra'mrrate' puesheñarr ñeñt ama cheme'tetso a'yo. Añach cheme'ten ñeñt alla'tsena. Amapa' chach yottena ñerra'mrrate' puesheñarr aporo'yef ñeñt ama entetso, ama't e'ñe mamesha. Tarro'mar ñapa' o'cha puesuerran atto Cristopa' e'ñe e'shohuerrñañeñ po'chñar.

¹⁰ Ñeñto'marña masheñeshacha' ñaña nochaneshacha' te'pa' o'ch alla noterrser. Allo'nepa'ch sesen yemuetnomaya Cristo atto ñapa' o' hua'ñerres attoch same'ñeño'tpa' o'ch sequeshperra. Ñerra'm atetcha' seppapa' ama't ahuatapa' amach sepsere, ñaña amach alla sepurrerro atarr toñoneñ.

¹¹ Allochña sapa' se'cherrcha' all añcha'tare'ttena Yepartseshar Jesucristo ñeñt Ya'queshpatañer yepen. Allñapa' o'ch aguërreres e'ñe pocsheñeshocmañen all partsoten. Ña po'partsoñapa' ñeñt'pa' amach ahuañaña'atterro ama't e'ñe errponaña.

12 Ñeñto'marña napa' noten, chocmach neyerpatasa atet noctape'chen. Ama't sapa' o' seño tue añechno, napa' o'ch alla noterrser. Ama't o' chaponasa seyo'chro ñeñt' ñoñets po'ño'chpa' napa' nemneñ allo'nach neyerpatnensa.

13 Napa' noten, te'pa' orameñ nocrrena e'ñe pocte' o'ch neyerpatnomsa attoch o'ch setorroña Yompor po'ñoñ.

14 Napa' neñoteñ o' mañamenapa' o'ch nerromuen, tarro'mar atet otne't Yepartseshar Jesucristo.

15 Allochñapa' amach nemnatenso o'ch sepuesuer ama't errponaña. Ama't allempoch o' nerromuenpa' sapa' allo'nach seyerpuerra ñeñt' atet o' notuanmas.

Pedropa' e'ñe entane't Cristo allempo orrtatyesanete't po'partsoña

16 Ya te'pa' o' e'ñe yeñotatas atto Yepartseshar Jesucristo ña partsotets, ñapa' ñach huerrtsa po'pocheño. Añ ñoñets po'ño'chpa' ama shequëntsoyaye ñoñets ñeñt' o' yotuas. Ñeñt'pa' ama yaye' yocpa'ña yotenso, ñaña ama ahuañneshañeyaye pueserrpareñ. Ya po'ño'chpa' e'ñeca'ye allame'ttsa yeñche'tña Yepartseshar Cristo. Yapa' e'ñe yentuoñe'tña po'partsoña.

17-18 Tarro'mar yapa' e'ñe parro allo'tseney all aspeno allempo Yompor Parets gatey Puechemer po'cohuenña. Yapa' allempopa' e'ñe ye'mhuaña ñoñets ñeñt' ye'morrtoya ento'. Yompor ñeñt' nanac partsotets pue'ntaño, po'cohuenño'pa' atet cohuentatenan Puechemer, ñeñt'pa' atet oten: "Añmapa' ñeñt' Nechemer ñeñt' nanac nemorrentena, ñapa' ña nanac nocshatene'." Ñeñt'pa' attoña aye'chochtatenan Puechemer.

19 Te'ña ñeñt' otyese't ahuañ ñeñt' a'mta'yesaye't Yompor po'ño'ñpa' te'ña e'ñe po'ño'chpa' o' e'ñe etsotuerra. Ñeñto'marña yapa' attoña yeñoteñ ñapa' e'ñe po'ño'ch otye't po'ño'ño'. Ñeñto'marña yocoppa' añ poctetsa o'ch yame'ña ñaña ñeñt' a'mta'yesaye't ahuañ Yompor po'ñoñ. Ñeñt'ña ñoñetspa' a'puetarsam'pennay yocpa'ña atet ñerra'mrrate' lampareñ a'puetarene' checmete'. Te'ña o' huapa Cristo; ñapa' ñeñt'cha'ña a'puetarerre' yaña yeyo'cher. Yapa' atarr cohuen yenteñ Cristo atet ñerra'm ranto atarremñ.

20-21 Ñaña señoche'pa'chña ñeñt' a'mta'yesaye't ahuañ Yompor po'ñoñ ñetpa' ama añaye' orrtatete'te ñeñt' atet cotape'chete't ñet. Atto ñet ma'yo'chrete't Partsocop, Paretsña Puecamquëñña eñotatahuetet atetcha' serrpare'toñet Yompor po'ñoñ. Ñeñto'marña señoche'pa'ch ama pocteyaye e'ñe yañeña yocpa'ño' o'ch ye'na'chatateññañ po'ñoñ.

2

Ñeñt' ashcañtetsa amach Yomporeye' po'ñoñ serrpare'teno (Jud 4-13)

1 Te'pa' o'ch notas ñaña po'poñ. Ahuañpa' orrte't ashcañ ñeñt' ama Yomporeye' po'ñoñ orrtatete'te, ñeñt'pa' atta shecane't israelena'tarnesha'. Sapa'cho'ña attecnoch orrtonasa ñeñt' amach Yomporeye' po'ñoñ a'poteno. E'ñe a'nahuapa' o'ch ye'chatas po'poñ poctap'ña. Tarro'marcha' ñetpa' atet pet attotcha' a'chencatatuerrres. O'ch a'nasotam'psasa atto Yepartseshar Cristopa' ñeñt'ña tsa'terroyaña yo'chñar. Tarraña ñetpa' machayotach a'chencatatuerrret ñañeñeta.

2 Esem'poch orrta, shonte'ch acheñ ñeñt'cha' ame'ñaya atetcha' ye'chatanet. Ashcañpa' e'ñech pocte' entan ama't ñeñt' atarr ye'chene' sosya'tsañ. Ñeñto'marña e'ñe ñotot' acheñenesha'pa' o'ch achm'are'teññañet Cristo po'ñoñ ñeñt' po'ño'ch Yompor po'ñoñ.

3 E'ñe pueye'cheño'pa' o'ch shecaset attoch yoram'pesuas se'cllayor. E'ñe poctap'ño'pa' shecasetcha'. Tarraña ama't ahuañoteñ Yomporpa' ote't ahuo'ch mueñanet coñcha'puetso. Yomporpa' ama orrena ote'te, ama pueno po'ñoñ; atet oten, atetcha' pa. Ñeñt' ama Yomporeye' po'ñoñ ye'chatetsopa' chenca'huerretcha'.

⁴ Tarro'mar ahuatpa' ama't Yompor po'millañoñeñaneshar allempo atpare'chete'tpa' ama esesha' queshpatse'te. Yomporpa' allempoña huapore'tanete't o'pono coñcha'puetso, allñapa' all ehucarettenet checmeto. Allo'tpa' amach cha'nerreto, allo'tña esempohuañenpa' a'coñchatare'terrach.

⁵ Ñaña acheñenesha' ahuatpa' ama esesha' queshpatso allempo nanac atpare'chete't Yompor. Ñaña' e'choñamñsanet oñ, ora erraparen patso. Ñapña Noé a'queshpat epuet cancherrsheña ñeñt pamo'tsesha'. Tarro'mar Noépa' serrpare'te't ñeñt atet poctetsa Yomporecop.

⁶ Ñaña ahuatpa' ñeñt ye'chatse't anetso ñeñt pa'so'cheñ Sodoma ñaña Gomorra, Yomporpa' etomanñsanet pa'netser. Atto etomanñpesuerranet pa'netserpa' allohuenetpa' e'ñe poctacma poyuerret. Ora e'ñe tsapñere'tuet, o' a'chencatuerranet e'ñe poctacma. Atto te'pa' eñotatenan po'psheññe'chno ñerra'm o'ch atpare'teñet Yomporpa' attec'mach perraneterr. Ñeñto'marña yeñoteñ erra'tsencha' orrtatene' ñeñt ama Yomporeye' po'ñoñ a'po'teno, ñetpa'cho'ña attec'mach chenca'huerret ñamet.

⁷ Tarraña Yomporpa' a'queshpatan puesheñarr ñeñt pa'so'cheñ Lot ñeñt e'ñe pocte' es patse't. Ñaña' epaye' entenan pamo'tsesha' atto' pa'yesete't ñeñt nanac sosey enten Yompor. Ñapa' epaye' llecachete't.

⁸ Ñapa' e'ñe cohuen cotape'che't. Pamo'tsesha'ñapa' nanac pa'yesete't ñeñt ama cohuenayaye. Ñaña' epaye' entapretanete't ñeñt cotape'chete't ñet, ñaña epaye' e'mapretanete't atto eñosatse'tyesete't. Ñaña' epaye' llecanete't tarro'mar ñapa' e'ñe cohuen cotape'che't pueyo'chro.

⁹ Ñeñto'marña Yomporpa' eñoteñ attoch a'queshpatan ñeñt e'ñe pocte' es pets, ñerra'm esempo o' huapanet topateñets huomenc. Ñaña eñoteñ attoch muero'chtatan ñeñt ama pocteye' es petso. Allo'nach muero'chtatnenanet esempohuañencha' acrare'tetuerra allohuen acheñenesha'. Allempopa' mueñuerranetcha' coñcha'puetso.

¹⁰ Po'ño'chpa' coñchatancha' ñeñt aña ma'yo'chrenaya ñeñt atta muenatse'tyets e'ñe po'chtso't, atto nanaccha' sosyare' ye'cha'yenet, añach e'ñe yomenet ñeñt e'ñe ñet pocta'ñet. Ñeñto'marña ama't Yepartsesharpa' ama añcha'na'tpahuoye' enteñeto, attoña ama't ñaña allohuen ñeñt ahua'mencatetyetsapa'cho'ña e'ñe achm'are'tueñet. Amach añcha'na'tpahuoye' enteñeto.

¹¹ Tarraña Yompor po'millañoñeñaneshar ama't nanac ahua'mencatet, ñaña ama't nanac añcha'tare'tet, ñetña'pa' ama't Yomporesho'tsenet, ama sasare'teñetoña ñeñt ahua'mencattetsa.

¹² Tarro'mar ñeñt ama Yomporeye' po'ñoñ ye'chatetso ñetña'pa' sasare'tenet tarro'mar ama es eñoteneto, e'ñe atet ñerra'm es berr ñeñt ama es eñotetso. Atet muena'yenetpa' atet'cha' penet. Ñeñt atet eñalletetsa atet ñerra'm es berr; tsapatonetpa' o'ch rromueñet. O'ch rromuetpa' o'ch muetset. Ñeñt ama Yomporeye' po'ñoñ ye'chatetsopa' ñetpa'cho'ña esempohuañen attec'mach a'cllatuare'tterret.

¹³ Tarro'mar attoch atsa'tatuare'tterret allohuen po'chñaret. Tarro'mar e'ñech el-lapenete't coshatse'tatset ñeñt ama pocteyaye. Ama't atto rrallme'chapretasetpa' nanaccha' pencatenset tarro'mar ñetpa' nanac sosyare' es penet. E'ñech pocsheñsha' mueneñet o'ch shecaset.

¹⁴ Ñeñt ama Yomporeye' po'ñoñ ye'chatetsopa' chocmach mueneñ o'ch cohua'yesan coyanesha' attoch nanac cañoresha'tenet. Amach huañeno atto cotape'chenet sosey. Nanaccha' shequ'ñet coyanesha' ñeñt ama tama es eñoto attoch agu'ñet. Añach ye'chenet atto es ye'chatse'tyenet. Tarraña ñeñt atet petsapa' o'patataretet'cha' coñcheñets.

¹⁵ Tarro'mar ñetpa' o' puesuerret ñeñt' poctetsa. O' sa'nmet Yompor nanac ellaþar. Ñetpa' co'ta'neñet atet pe't Balaam ñeñt' Beor puechemer. Ñapa' ahua'tpa' añach cohuen ente't o'ch þa'yesa ñeñt' ama pocteyaye alloña gane't shonte' quelle.

¹⁶ Allempoña atet pe't Balaam ñeñt' ama pocteyaye, pashanorñapa' o' che'ptare'ch, atto' eños atet ñerra'm acheñ eñets, ama't ashenpa' yeñoteñ ama eñeno. O'ña eñosuapa' Balaamñapa' allempoteñña o'huañ atet þa'yesan sosey.

¹⁷ Ñeñt' ama Yomporeye' po'ñoñ yeçhatenetopa' ñetñapa' amach es sherbertso. Ñetpa' ama't attetañ ñerra'mrrate' oñ allot' potenpa' te'ñapa' o' masohua. Ñetpa' amach es sherbatso ama't attetañ ñerra'mrrate' os, tarraña ñerra'm o' matach m'orr a'yopa', amach huato. Tarraña ñeñt' atet petsapa' o'patataretcha' all ama machecmeto o'pono.

¹⁸ Ñaña nanaccha' ommo'chenet atto' þa'yenet ñeñt' nanac sosyare'. Ñaña o'ch a'secheñet po'psheñeñ attoch o'ch þachet ñeñt' nanac muenenet po'chets attotcha' a'psataretterret, allempoñapa' o'chcho' alla puerrrerret. Shonte' acheñ ñeñt' e'ñe etserra puesuanmue' ñeñt' atet yeçha'yesete't ñeñt' nanac sosyare', tarraña allempoñapa' o'ch alla muenereterr ñeñt' o' puesuanmuetañ ahua't poctaþñet.

¹⁹ Ñeñt' ama Yomporeye' po'ñoñ yeçhatetsopa' o'ch alla o'terraneterr: "Ama palltenoña o'ch es yesuanom. Yapa' e'ñe cohueno'tseney. Yocoppa' ama eñalleña ñeñt'cha' yeyore'terre'." Ama't atet oteneñ ñeñt' atpare'tetspa' tarraña napa' o'ch notas, ñeñt' atetpa' aña yeçhenet e'ñe ñet poctaþña ñeñt' nanac sosyare'. Tarro'mar ñerra'm erra'tsen es yeyçhatene' ñeñt'pa' ñeñt'ña pomnaren yepene'.

²⁰ Attecma ñerra'm ya. O' yeñotuer Yepartseshar Jesucristo, ñeñt'ara Ya'queshpatañer yepen. Yeparrocmateño't Cristo o' yesuanom sosya'tsañ. Tarraña ñerra'm yo'chñarpa' alla a'psaterrey Yompor po'ñoñpa' yañapa' elloña nanaccha' yoroçheno'tseney.

²¹ Ahua'tpa' yoroçheno'tseney tarro'mar ama yentare' ñeñt' poctetsa Partsocop. Te'ñapa' o' yenter ñeñt' poctetsa. Tarraña ñerra'm te'pa' o'ch alla yepuerrerra ñaña o'ch alla yepuesuerrñañ po'ñoñ atet oteneñ Parets, te'ñapa' yañapa' elloña nanaccha' yoroçheno'tseney.

²² Yapa' po'ñoçh ñerra'm o'ch alla yepuerrerra cha yottena ñerra'mrrate' ochec. Yapa' o'ch alla yepuerrerra "atet ñerra'm ochec o'ch a'tatsta; o'ch a'tatsetuapa' tematempa' o'ch alla puerrerra allot'sen pa'tatsña." Amapa' cha yottena ñerra'm atet pena ñaña chañcho. "Chañchopa' o'ch apa; o'chña apuapa' o'chcho' alla puerrerra atstso allcha' e'yapna'tuerra o'ch alla atsotseñe'chuerr." Ama't ahua'toteñ atet otete't atet pena ochec, ñaña atet pena chañcho.

3

Esempoch huerrmocha Cristopa' orrterrach ñeñt'cha' achmare'terre' Yompor

¹ Te'ñapa' masheñneshacha' ñaña noçhaneshacha' o'ch notas, po'pocheño o' alla nequellquèrrnaserr carta. Tarro'mar añecop nemneñ o'ch alla noctape'chaterrerr; o'ch alla neyerpaterrerr soctaþña e'ñe cohuen.

² Ñaña o'ch alla noterrerr; añ poctetsa amach sepsatsche ñeñt' otye't ñeñt' a'mta'yese't Parets po'ñoñ. Atet otye'tpa' atetcha' etsoterra esempohuañen. Ñaña amach sepsatsche atet o' otuas ñeñt' Yompor puellsensarnesha'. Ñetpa' o' yeçhatuaset Yepartseshar Cristo po'ñoñ ñeñt'pa' atetcha' seþa, ñeñt'ara Cristo Ya'queshpatañer yepen.

³ Ñanom o'ch señoçh añ, ñerra'm esempoch o' huerrmocha Cristopa' huapach ñeñt'cha' achmare'tene' Yompor poctaþña. Ñeñt'pa' attach cotape'chen atet muenatse'tyenet ñeñt' cohuen entenet po'chets.

⁴ Pachm̄are'teñoŋpa' o'ch otet: "Cristopa' otrerr esempopa' ahuo'ch huerra. Te'ñapa' ¿eso'marte' amo' huerro'? Ama't yatañneshañpa' o' colla'huenet; teme'ttsen yenten ora errap̄aren e'ñe attera atet orrte't ahuaŋtoŋ allempo errte' ayečcataret pats."

⁵ Ñetpa' mueneñet o'ch puesuerret atto ahuaŋ Yompor e'ñe po'ñoñoŋta o' yečcatuan enet. Patspa'cho'ña e'ñe po'ñoñoŋta yečca'hua. Ñaña e'ñe oñoŋpa' yečca añ pats.

⁶ Ahuaŋpa'cho'ña e'ñe puechopeñoŋ oñpa' chenca'hua pats allempo e'ñe chorra oñ errap̄aren.

⁷ Ñaña Yompor po'ñoñoŋpa' te'pa' ama't patspa' esempohuañenpa' poyuerrcha'. Enetpa'cho'ña attec̄mach poyuerrcha' ñaña. Aña cohuen esempohuañencha' acrar̄et̄et̄uerra allohuen acheñenesha'. Allempochña mellapoterra. Ñeñña ama ame'ñenaye ñapa' o'ch mueñanet coñcheñtso.

⁸ Tarraña te'ña masheñeshacha' ñaña nočhaneshacha' amach at̄ta es sepčhatsto. Añcha'ña o'ch señoç; Yomporpa' entenan ama't mil char atet ñerra'm pamtarra. Ama't ñeññ ñapa' pamtar̄ enten, yocopñapa' yenteñ atet ñerra'm mil char.

⁹ Puesheña'tets acheñpa' otenet o' meten shonte' char amo' huerro. Tarraña yapa' yeñoteñ Yepartseshar čocmach a'poc̄tatan po'ñoñ o'ch huerra. Yapa' yeñoteñ tarro'mar amo' huerro añ cohuen ñato' esempoch o'ch yoc̄tape'chuerr ello cohuen Yomporecop allohueney. Ñapa' nanac muerenya ama mueno ama't eseshapa' o'ch chenquerra.

¹⁰ Tarraña ama't amo' huerro, esempopa' machayotach huerra. Atet ñerra'm eñeñ amach es yepčhenopa' machayotach huapa tsapo. E'ñeç atet perraña ñaña Yepartseshar Cristo, e'ñeç machayota huerra. Allempopa' huañerrcha' enet. E'ñe puepotr̄areñoŋpa' huañcha'. Huañcha' ora ñeññ orretyetsa ñaña ama't ora allpon eñall, paña'tuerrcha' ñaña e'yohuach. Tso'ñapa' ñach e'ñe e'yatuerre' allohuen ñeññ eñall. Patspa'cho'ña ñaña ora ñeññ ayečcataret arr patsropa' poyuach.

¹¹ O'ch poyuapa' o'ch e'yohua ora esocmañen. Ñeño'marña sapa' añ poc̄tetsa socop. O'ch soc̄tape'cherr e'ñe cohuen Partsocop, ñaña o'ch sepomhuerra sañeña e'ñe Yomporecop.

¹² Ñaña añ poc̄tetsa o'ch secuame'teñ esempoch yoročhtatuer Yompor. Sapa' o'ch setorreññaña attochña mameshapa' o'ch huerra. EsemPOCH yoročhtatuer allempopa' ñachña a'crratuerr̄e' enet. O'ch a'crratuerr̄an enetpa' allempochña potlle'chuerr e'ñe poc̄tacma. Ñaña ora ñeññ orretyetsa entopa' ñeññpa'cho'ña e'ñeç poyuahuer̄r. O'ch poyuahuer̄rpa' o'ch e'yohuerra poc̄tacma. Tso'ñapa' ñach e'ñe e'yatuahuerre' ora allohuen ñeññ eñall.

¹³ Tarraña yapa' yecueñ o'ch etsoterra atet otr̄nerrey. Ñapa' ña yotnerre', eñalleterro'ch po'poñ enet etserrare', Patspa'cho'ña o'ch eñalleterra etserra. Allñapa' añach orrtatsa ñeññ e'ñe cohuenare' es p̄a'yets.

¹⁴ Ñehua, masheñeshacha' ñaña nočhaneshacha' o'ch secuame'teñ. Secuame'teñoŋpa' o'ch sema'yochrena attoch entuerres Yompor e'ñe poc̄te', attoch amach eñalle ñeññcha' sepencate'. O'ch cohuen sentannena epas samo'tsesha'.

¹⁵ Ñaña o'ch señoç e'ñe eso'marte' amo' huerro Yepartseshar Cristo. Ñapa' atarr muerenana allohuen acheñenesha'. Ñapa' mueneñ yapa' o'ch yame'ñatuera acheñenesha' attoch yequeshpa'huerra allohueney. Ñeññara o' quellconas ñaña masheñ Pablo po'cartot. E'ñe Yompor pueñotateñoŋey atet quellconas ñaña. Yapa' nanac yemueranena.

¹⁶ Ora allpon Pablo po'cartotpa' o' eñotat̄ey atetcha' perra esempo. Pate'tets ñoñets ñeññ quellquẽ't Pablopa' nanac echarr yenteñ o'ch yeñoç e'ñe atet oteneñ. Puesheña'tets acheñ ñeññ ama tama es eñotopa' atarr moññe'toñete't Pablo po'ñoñ. Tarro'mar ñetpa' ama tama cosheññañeto Yompor po'ñoñ ñeño'marña čocmach mueneñet o'ch e'nachater̄rñañet atet oteneñ Pablo po'cartot. Ñaña po'poñ Yompor po'ñoñ ñetpa'

čhocma mueneñet o'ch e'náčhaterrñañet atet oteneý. Ñetpa' attočha' a'chencataturret ñetañeña.

¹⁷ Ñeñto'marña masheñneshacha' ñaña nočhaneshacha' te' napa' o' notuas necar-
tot ama't ama etsotena' atet notenes, attochña señoç. Te'ñapa' señoat'ach al-
lochñapa' amach shecaseto atto es panten ñeñt atpare'tets. Saña te'pa' amach se-
quečpatsterrñañe Yompor po'ñoñ atet atarr same'ñena te'.

¹⁸ Añcha'ña e'ñe Yompor pueuereñočpa' allo'nepa'ch sesen cotape'chnomue' e'ñe
cohuen, ñaña allo'nepa'ch sesen yemuetnomaya Yepartseshar Jesucristo ñeñtara
Ya'qeshpatañer yepen. Ya'ye'chočtatoñepa'ch tayoteñ e'ñe errponohuañen. Te'pa'
ñeñt'ach notas, ñeñt'pa' attetepa'ch Nompore. Allohua.

Pedro

AÑ ÑANOM SAN JUAN PO' CARTA 1 SAN JUAN

Jesucristo ñeñt' po'ñoñ pen Yompor, yañapa' allochña e'ñe yocrrerra

¹ Te'pa' o'ch neserrpare'tatas arr nequellcoť ñeñt' atet pena Jesucristo; ñapa' chocma eñall ama't ahuatoteñ ama't allempo ama ayečcatarettena' pats. Ñeñña yapa' e'ñe ye'me't atet serrpare'tatyese't allempo orrtosa arr patsro, ama't ya yecloyotpa' e'ñe yeñche't e'ñe allame'tets, ama't e'ñe ya yotoťpa' ya'plla'yese't. Ñeñña Jesucristo ñapa' ñeñña po'ñoñ penña Pompor Parets tarro'mar ñach e'ñe eñotaterre'ña acheñenesha' atet oten Pompor Parets. Ñeñña ña po'ñoñpa' po'ñoč yapa' allochña corretsayach.

² Ñeñña Jesucristo allempo acheñetos arr patsro yañapa' e'ñe yeñche't. Ñeñto'marña te' yapa'cho'ña chocma yeñotatenes samña. Ñeñto'marña yeserrpare'tatenes ñeñña Cristopa' ñeñt' alloch yocrrena ama't tayoteñ e'ñe errponañohuen. Ña ahuatpa' e'ñe parro'tsen epuet Pompor Parets. Te'ña atto orrtosnaya arr patsro yapa' e'ñe yeñche't e'ñe ye'me't atet serrpare'tatyese't. Ñeñto'marña te' ya ñeñt' atet yentyese't, ñeñt' atet ye'myese't, te'ñapa' o'ch yeserrpare'tatas samña.

³ Allochñapa' attoch allohueney yeparrocmaterr epay Yompor Parets ñaña Puechemer ñeñt' Jesucristo.

⁴ Ñeñto'marña nequellquennas ñeñt' e'ñe po'ñoč yeñoten attochña sapa'cho'ña o'ch e'ñe socsherra samña.

Yomporpa' añ toma'ntena puetare' tarro'mar ñapa' e'ñech cohuen es orrtatyen

⁵ Añ ñoñets ñeñt' ye'mapretyese't Jesucristo, te'ñapa' o'ch yeserrpare'tatas. Ñeñtpa' atet eñotateney: Yomporpa' ña e'ñe cohuenare' es pa'yets, ñapa' e'ñe atet pena ñerra'm puetare' e'ñech cohuen yenteñ. Ñapa' ama't mameshapa' ama orrtatenanoña ñeñt' ama cohuenayaye; ñeñto'marña yoten, ñeshopa' ama't coñe'tapa' ama eñalleña checmete'.

⁶ Yapa' ama't yoteneñ o' e'ñe yeparrocmaterr epay Yompor, tarraña ñerra'm ora yorrtatyen ñeñt' ama cohuenaye' enteno ña, yañapa' atta yeshquën. Ñeñto'marña ña chach yottena ñerra'm checmeta yechope'chen tarro'mar ama e'ñe yeychena' ñeñt' e'ñe po'ñoč cohuen enten Yompor.

⁷ Tarraña ñerra'm e'ñe cohuenare' es yorrtatyen atet pena Yompor, ñeñt'ñapa' e'ñe atet yepena ñerra'mrrate' arr yechope'chen puetaro e'ñe allo'tseney epay Yompor. Attoña allohueney e'ñech cohuen yeparrocmatuen ñaña Yompor Puechemer ñeñt' Jesucristo ña po'rrosoña chocma e'shennayña allohuen yo'chñar.

⁸ Tarraña ñerra'm cha yoten, "napa' amaca'ye eñalle no'chñar", ñeñt'ñapa' yañeñaca'ye shequëtsa tarro'mar Yompor pocta'ña ñeñt' e'ñe po'ñoč cohuenpa' amaca'ye chennayoña yeyochro.

⁹ Tarraña ñerra'm cho ya'meten yo'chñar, Yomporñapa' e'ñech peretna'huernay allohuen yo'chñar, e'ñech e'shohuernay allohuen ñeñt' ama pocteye' entapretye tarro'mar ñapa' ama puenesho po'ñoñ, ñapa' e'ñe pocte' es pen, ñeñto'marña ñapa' chocmach peretnerrey.

¹⁰ Ñaña ñerra'm cha yoten, "napa' ama no'chña'tpeno", Yomporñapa' cha yottatateñ ñerra'mrrate' ñapa' atarr ashcañ tarro'mar po'ñoñpa' atet oteney ya allohueneypa' e'ñe yo'chña'tuen. Ñeñña po'ñoñpa' yañapa' ama't e'ñe mameshapa' ama chappennayoña yeyochro.

2

Jesucristo ñeñt e'ñe cohuen eñets yocop Yomporesho

¹ Nechemerneshacha' te' socoppa' o'ch nequellconas attoch amach allo'na sepa' neno ñeñt ama't mameshapa' ama pocteye' enteno Yompor. Tarraña ñerra'm esesha' orrtatene' ñeñt ama cohuenayaye, ñerra'm o'ch enamuerr peretneñets, Yomporpa' o'ch peretner tarro'mar eñall yocop ñeñtcha' eñosets Apuesho. Ñeñtña' añ Jesucristo ñeñt e'ñe pocte' es pa'yets.

² Ñapa' ña apare't attoch tsa'tuerrnaya yo'chñar. Ñeñtpa' ama e'ñe yaptecpayaye, añecpa'ñaña allohueney ñeñtey añe patsro'tsa'yeney.

³ Ñerra'm e'ñe po'ño'ch yame'ñerrñaña Yompor po'ñoñ ñeñt atet otene' allempoñapa' e'ñech po'ño'ch yeñoter ñeñt atet pena ña.

⁴ Ñeñt otets, ñapa' e'ño' eñoteñ atet pena Yompor, ñerra'm attera atpare'tenan Yompor po'ñoñ ñeñt atet otene', ñeñtña atet otetspa' ñapa' attacaye shequën. Ama't e'ñe mameshapa' ama cheññañoña Yompor po'ñoñ pueyo'chro ñeñt e'ñe po'ño'ch atet otene'.

⁵ Tarraña ñerra'm esesha' e'ñe po'ño'ch ame'ñerraya Yompor po'ñoñ ñeñt atet otene', ña po'ño'chpa' o' morrenterrana Yompor e'ñe pueyo'chrocmañen. Ñeñtpa' attoña yeñoteñ po'ño'chpa' o' yeparrocmaterr epay Yompor.

⁶ Ñerra'm esesha' otets, ñapa' e'ño' parrocmaten epuet Yompor, ñeñtpeñapa' orrtatye-sanepa'ña ñeñt atet pa'yese't Yompor Puechemer ñeñt Jesucristo.

Cristopa' ña orrtaterre' etserra morrentanna'teñets attochña e'ñe cohuen yemorrentannerra

⁷ O'ch masheñneshacha' ñaña no'chaneshacha' notas, ñeñt atet notenes nequellcot te' amorrentanna'tpahuepa'ch sentannena allohuenes ñeñtpa' ama añeyaye ñoñets ñeñt ama se'mare. Ama't allempoteñ e'ñe erre't same'ñerrapa' allempoteñ se'muerrña ñeñt ñoñets ñeñtcha' atet sepa' e'ñe cohuen ñeñtara Yompor po'ñoñ ñeñt e'ñe erres e'muene' allempo.

⁸ Tarraña morrentanna'teñets ñeñt atet nequellquënnas te' ñeñtpa' e'ñe atet ñerra'mrrate' o' tayo' orrtatonasetña atet morrentanna'teñets, tarro'mar Cristo e'ñe po'ño'ch orrtatonayña e'ñe etserra attoch e'ñe cohuen yemorrentanna'terra, ñeñto'marña sapa'cho'ña te'pa' o' e'ñe etserra sorrtaterrña saña attoch semorrentannerra. Morrentanna'teñets po'ño'chpa' ñeñtña atarr sherbets tarro'mar ora allohuen ñeñt ama cohuenaye' enteno Yompor, ñeñtña' allo'na sen huañuanmats. Ñeñtpa' e'ñe atet pena ñerra'mrrate' checmete'pa' allo'na sen metuanmats. Allohuen ñeñt e'ñe po'ño'ch cohuen enten Yompor, ñeñtpa' atet ñerra'mrrate' puetare', ñeñtña po'ño'ch o' a'puetarsañperres.

⁹ Ñeñtña otets ñapa'cho'ña Yomporo' po'puetarenño'tsen tarraña ñerra'm orameñ e'moñe'tyenan pamo'ts, ñapa'cho' orameñ checmeto'tsena.

¹⁰ Tarraña ñeñt e'ñe po'ño'ch muerenaya pamo'tsesha', ñeñtña' e'ñe Yompor po'puetarenño ye'chena. Allña' ama eñalleña ñeñtcha' paterrayerr ñeñt ama pocteye' enteno Yompor.

¹¹ Ñeñtña e'moñe'tyene' pamo'ts ñapa' orameñ checmeto'tsen. Ñaña' atet pena ñerra'mrrate' pueheñarr ñeñt checmetch chopeñe'chyen, ama eñoteñe errenette'ña sen tarro'mar checmete'pa' ñeñt a'natacille'chene'.

¹² Nechemerneshacha' sa so'chñarpa' o' ap'retna'huare'tterra Cristesho't, ñeñto'marña te'pa' atet nequellquënnas.

¹³ Ñaña te'pa' o'ch notas saña allohuenes ñeñtes e'ñe pompornesha' penset. Sa te'pa' o' señoter Cristo ñeñt e'ñe ahuatoteñ eñall ama't e'ñe allempoteñ ama aye'chcatarettena' pats; ñeñto'marña te'pa' atet nequellquënnas saña. Ñaña te'pa' o'ch notas saña

allohuenes ñeñtes huepueshares, sapa' o' e'ñe satpare'ter oneñet; ñeñto'marña socop te'pa' atet nequellquënnas samña.

Ñaña sa nechemerneshacha' te' sapa' o' e'ñe señoter atet penaña Yompor Parets; ñeñto'marña te'pa' atet nequellquënnas e'ñe socop.

¹⁴ Ñaña sa ñeñtes pompornesha' e'ñe penset, sa te'pa' o' señoter Cristo ñeñt e'ñe ahuatoteñ eñall ama't e'ñe allempoteñ ama ayeçhcatarettena' pats; ñeñto'marña te'pa' atet nequellquënnas. Ñaña sa ñeñtes huepueshares, sapa' atarr ahuaencates tarro'mar Yompor po'ñoñpa' o' e'ñe çhaponasa seyoçhro ñeñto'marña sapa' o' atarr satpare'ter oneñet; ñeñto'marña te'pa' atet nequellquënnas.

¹⁵ Amachña aña atarr semorrentatsto allohuen ñeñt yentyen aña patsro tarro'mar ñerra'm aña atarr yemorrentena ñeñt aña patsro'tsenpa' Yomporña Parets po'ñoçhpa' amach yemorrenteño, (ñeñto'marña amach errotenot çhaponayoña yeyoçhro ñeñt atet muenen ña).

¹⁶ Allohuen ñeñt eñall aña patsro, atet ñerra'm ñeñt atet muenatyeney yechets, ñaña ñeñt yeye'chapretyena e'ñe ya yecueñoť, ñaña ñeñt e'ñe yemnen ya o'ch e'ñe cohuen entapretyet, ñeñtña allohuenpa' ama Yomporeshoteye' hueno, ñeñtpa' aña patsro'marnesha poçtañña.

¹⁷ Allohuen ñeñt yentyen aña patsropa' ñeñtpa' atarr ahuañaña, ñaña ñeñt yemnatse'tyen aña patsro ñeñtpa'çho'ña atarr ahuañaña. Tarraña ñeñt atet petsa ñeñt e'ñe atet muenen Yomporpa' ñeñtñaapa' amach huañerro ama't errponaña.

Atet pena coçtaññats ñeñt e'ñe po'ñoçh Yompor poçtañña ñaña atet pena po'poñ coçtaññats ñeñt shequëñtsa

¹⁸ Te' nechemerneshacha' o'ch notas po'poñoneť. Te'pa' o' mameshamerra o'ch huañerr allempochña mellapoterra. Atet se'myen te' ñeñtpa' allempochña orrterra ñeñtcha' atarr e'moñe'terre' Cristo pueyoçhreshohuen. O' e'ñe tayoteñ orretyesa shonte' ñeñt çhocma e'moñe'tene' Cristo. Ñeñto'marña te'pa' yeñoteñ o' mellapoterrmocha.

¹⁹ Ama't ahuañmo'cha e'ñe parroçma yapçhañe't ñetña te'pa' o' ahuanmuet ellonet o' sohuanerryet tarro'mar po'ñoçhpa' ama allohuenacmaye' yeparroçmaterro. Ñerra'm po'ñoçhcha' allohuenacmay yeparroçmaterreñ allempoña ñetpa' allo'tsa'yenetañaťe' ñamet yesho. Tarraña te'ña ñetpa' o' ahuanerret ellonet attoña o' yeñoterranet po'ñoçhpa' ama allohuenacmaye' yeparroçmaterro.

²⁰⁻²¹ Tarraña te'ña sapa' Cristoña seçhorratenayaña Parets Puecamquëñ. Attoña allohuenes o' e'ñe señotuer. Sapa' o' e'ñe señotuerr ñoñets ñeñt po'ñoçh, ñeñtpa' ama shequëñtsoyaye. Te' sapa' ama e'ñe sepallteñoťeye' nequellquënnaso ñeñt atet poçtetsa socop. Tarro'mar sapa' señoťeñ ñeñt ñoñets shequëñetspa' ama Yomporeshoteye' hueno tarro'mar ñeñt Yompor po'ñoñpa' ñeñtña e'ñe po'ñoçh ama shequëñtsoyaye.

²² Te'ña sapa' señoçhepa'ch ñeñt atarr nanac ashcañtetsapa' ñeñtca'yeña otets Jesúsapa' año' Cristoyaye ñeñt atarr yecuen ya ahuatoteñ ñeñtcha' llesenserr Yompor. Ñeñto'marña ñetpa' çha e'moñe'teñetña Cristo, ama çhoye' ame'ñeñeto, Pompore'naña ama ame'ñeññañeto, çha a'nasoteñet.

²³ Allohuen ñeñt a'nasotenaya Yompor Puechemer, ñetpa' Pompore'naña ama aguëññañeto. Tarraña allohuen ñeñt otets, Jesúsapa' Yomporo Puechemer ñeñt Cristotets, ñetñaapa' e'ñe aguëññañet Pompor.

²⁴ Ñeñto'marña o'ch notas, Yompor po'cohuenña ñeñt se'muerr ahuañmo'çoteñ, te'ña sa atto o' e'ñe señoter seyoçhro allo'nepa'ch sesen ame'ña'nmatsa alloçhñaapa' attoch e'ñe cohuen separroçmaterr epas Yompor Puechemer ñaña epas Yompor Parets.

²⁵ Jesucristopa' atet otnerrey o'ch apuerrey e'ñe po'ñoçh attoçhña yapa' corretsayach yocsheñeshocmañen tayoteñ e'ñe errponañohuen.

26 Ñeñt notenes añ nequellcot ñeñtpa' añecpa nequellquënnas attoch sapa' e'ñech señoter allochñapa' attoch ama sa'shcaretterro.

27 Tarro'mar Jesucristo o' chorraterresa Parets Puecamquëñ, ñeñto'marña sapa' ama sepallteno o'ch esesha' yeçhatas tarro'mar ñapa' e'ñotatascha' allohuen. Ñaña ñeñtcha' atet yeçhaterres ñapa' e'ñeca'ye po'ñoçh atet, ñeñtpa' ama shequëñtsoyaye. Ñeñt atet yeçhatenes sapa' allo'nepa'ch sesen parrocmatenaya Cristo.

28 Te'ña nechemerneshacha' allo'nepa'ch sesen parrocmatenaya Cristo allochñapa' ñerra'm esempoch huerra ñapa' ñachña e'ñe seyemtapuerra attoch sapa' amach çha sepencapuerto ñerra'm esempoch huerra.

29 Ñehua, sa te'pa' o' e'ñe señoter Jesucristo ñapa' e'ñe pocte' es pa'yen. Ñeñto'marña señochepa'ch ñaña allohuen ñeñt e'ñe pocte' es orrtatyets ñeñtñapa' e'ñe po'ñoçh puechemer peñ Yompor.

3

Yomporpa' e'ñe puechemerasha' peney

1 Te' sapa' çhosaña e'ñe cotape'cherre', Yomporpa' atarrca'ye nanac morrentenya. Ña e'ñe puemorreneteñoçey ñapa' e'ñe puechemer peney, ñeñto'marña yapa' e'ñe po'ñoçh Yomporena'tarey. Ñeñto'marña acheñenesha' arr patsro ñeñt ama ame'ñetso ñetñapa' ama eseshaye' e'ñotenayeña ñeñt atet yocotape'chyen Yomporecop tarro'mar Yomporpa'çho'ña ama eseshaye' e'ñotenaye ñeñt atet cotape'chen ña.

2 O'ch masheñneshacha' ñaña noçhaneshacha' o'ch alla noterrser, te'ña yapa' e'ñe po'ñoçh puechemer peney Yompor. Ama't ama e'ñe e'ñotatenya' erroteneycha'ña ya esempohuañen tarraña yapa' e'ñe yeñoteñ ñerra'm esempo orrterra Jesucristo, yañapa' e'ñech attey yaña ñerra'm ña tarro'mar allempo yapa' yentercha' ñeñt atet atarr co-huentena ña.

3 Allohuen ñeñt atet ame'ñetsa, ñetña e'ñe pueyemteñoçet cohuame'teñet, attoña ñetpa' e'ñech cohuen a'cohuentatare'tterret ñamet e'ñech attet ñerra'm Jesucristo ñeñt e'ñe cohuenare' es orrtatyets.

4 Allohuen erra'tsen ochña'tetspa' ñeñtñapa' çha atpare'tenan Yompor po'ñoñ ñeñt atet anaret. Tarro'mar ñerra'm esempo yatpare'ten ñoñets ñeñt atet anaret, ñeñtña yapa' çhach yeyoren yo'chñar.

5 Sapa' e'ñe señoçetñ Cristo ñapa' tarro'mar huapa arr patsro ñach ahuanerre' ya yo'chñar ama't ñapa' ama e'ñalle po'chñar ama't co'ne'ta.

6 Ñeñto'marña allohuen esesha'ch parrocmaterre' Cristo, ñetñapa' ama çhoye' ochña'tare'teneto. Tarro'mar ñeñt atarr ochña'tare'tetspa' ñeñtñapa' ama puentaranoña Cristo, ama çheññañoña pueyoçhro ñeñt atet pena Cristo.

7 Nechemerneshacha' sapa' señochepa'ch ñeñtcha' atet noterrser te', allochñapa' attoch amach esesha' seshquërraye. Po'ñoçh ñeñt orrtatyene' ñeñt e'ñe pocte' enten Yompor, ñeñtña po'ñoçhpa' e'ñe cohuen acheñer, e'ñech atet pena ñerra'm Cristo ñeñt e'ñe pocte' es pa'yets.

8 Tarraña ñeñt çhocma orrtatyene' ñeñt ama poçteye' enteno Yompor, ñeñtña acheñerpa' po'ñoçh oneñetena'tar, tarro'mar oneñetpa' e'ñe ahuatoteñ ñapa' aña orrtatyets ñeñt ama't mameshapa' ama poçteye' enteno Yompor. Ñeñto'marña Yompor Puechemerpa' huapa, allochñapa' ñach e'nuerre' atet patse'tyena oneñet.

9 Allohueney ñeñtey po'ñoçh e'ñalleterrtsa Yomporotpa' amach allo'na yo'chña'tare'tneno tarro'mar yapa' o' yeycherrñañ ñeñt atet pena Yompor Parets. Yapa' po'ñoçhpa' o' ye'ñalleterra Yomporot ñeñto'marña amach errotenot alla yo'chña'tare'terre'te.

¹⁰ Arrpa' attoña yeñoteñña ñeñt̄ Yomporena'tar ñaña ñeñt̄ oneñetena'tar. Allohuen ñeñt̄ ama pocteye' es orrtatyetso ñeñt̄ ama morrentenaye pamo'tsesha', ñetñapa' amaca'ye Yomporena'tareyayeto.

Amorrentanna'tpahuepa'ch yentannena e'ñe allohueney

¹¹ Añ ñoñetspa' e'ñe ahuatoteñ eñotatsete't̄ amorrentanna'tpahuepa'ch e'ñe allohueney.

¹² Amach atet yepatsto atet p̄a ahuať Caín, ñapa' oneñetena'tara. Ñaña'pa' mo'nasheña muetsa. Tarro'marca'yeña muetse ñapa' amaca'ye cohuenaye' cotape'che'te; pa'mo'nasheñña Abel ñeñt̄ muetsa, ñaña'pa' e'ñe cohuen cotape'che't̄ Yomporecop.

¹³ Ñeñto'marña masheñneshacha' ñaña nochaneshacha' e'ñepa'ch seño'ta sapa' ñeñto'marña e'moñe'tasña acheñenesha' añ patsro ñeñt̄ ama ame'ñetso.

¹⁴ Tarraña ya e'ñe yemorrenteño't̄ yamo'tspa' e'ñe yeñoteñ yapa' o' yeñtanerrña allcha' e'ñe poctacma yerromuerreñ. Yapa' o' yecherr allña yapa' corretsayach. Ñeñt̄ña ama muerenayo pamo'ts ñetñapa' allo'tsenareta allcha' e'ñe rromuerret e'ñe poctacma.

¹⁵ Allohuen ñeñt̄ cha e'moñe'tyen an pamo'tspa' ñeñt̄ po'ño'chpa' amtsaña enteñña Yompor. Ama't e'ñe sapa'cho'ña seño'teñ ñeñt̄ amtsaña' pueyo'chropa' ama eñalleña attoch ñapa'cho'ña corretsach tayoteñ e'ñe errponañohuen.

¹⁶ Arrpa' attoña e'ñe yeñoteñña ñeñt̄ atet penaña e'ñe po'ño'ch morrenteñets, attoña Jesucristopa' a'rroya ñañeña attoch rroma yocop. Yapa'cho'ña e'ñepa'chña pocte' yeñch o'ch ya'rroya yañeña attoch yerroma yamo'tseshacop.

¹⁷ Tarraña yaña ñerra'm yechyen attoch e'ñe cohuen yocrrena arr patsro, allempo yenteñ yamo'ts cha atarr es pallta'yenet yañapa' ama yemorrenteño, Yomporpa'cho'ña ama't e'ñe mameshapa' amaca'ye yemorrenteñoña yeyo'chro.

¹⁸ Amach nechemerneshacha' e'ñe yeño'ño'chaya yotanna'tatsto atarr yemorrentannena. Chochña yorrtatyesña yemorrenteña e'ñe po'ño'ch atet es ye'pa'yen po'psheññecop e'ñe cohuen.

Attoch e'ñe cohuen yeyemtera Yompor

¹⁹ Alloña yapa' e'ñech yeñotena yapa' e'ñe po'ño'chey ñeñt̄ey atet petsa e'ñe cohuen. Ñeñto'marña yapa' e'ñech yeñmataten yeyo'cher Yomporeshonet̄.

²⁰ Tarro'mar ñerra'm ama e'ñe yeñmañeshocmaye' es ye'pa'yeno Yomporecop, Yomporña'pa' elloña e'ñe po'ño'ch atet eñoteny tarro'mar ñapa' ña atarr eñotañesha'.

²¹ Tarraña nechemerneshacha' ñerra'm e'ñe yeñmañeshocmañen es ye'pa'yen Yomporecop ñeñt̄epñapa' Yomporcha'ña e'ñe cohuen yeyemtena.

²² Atto yame'ñerrñaña po'ño'ñ ñeñt̄ atet oteney, ñapa' atarr coshenya; ñeñto'marña ñerra'm es yenamueñ, ñapa' chocmach e'ñe po'ño'ch apueneñ.

²³ Yompor po'ño'ño' atet oteney o'ch e'ñe cohuen yame'ñerrñaña Puechemer ñeñt̄ Jesucristo. Ñaña oteney amueranna'terrapo'ch allohueney, atet oteneyña ña.

²⁴ Erra'tsencha' e'ñe cohuen ame'ñenaya Yompor po'ño'ñ ñeñt̄ atet oteney, ñetñapa' e'ñe parrocmatenet epuet Yompor. Ñeñto'marña yeñoteñ yeparrocmaten, Pares Puecamquëñ ñeñt̄ chorratenya ñeñt̄ña yeñotatene'ña e'ñe yeparrocmateña Yompor.

4

Attoch yeño'ch erra'tsente'ña ñeñt̄ e'ñe po'ño'ch eñoraten Yompor Puecamquëñ; attoch yeño'ch ñaña ñeñt̄ epatare'tene' Yompor poctapñña

¹ Ñaña te'pa' o'ch masheñneshacha' ñaña nochaneshacha' noterrser, sapa' ñato't same'ñena'ña allohuen pa'namen cotapññats tarro'mar ñetpa' ama't otenetañ Partso' Puecamquëñ eñoratenahuet, sapa' chochña seño'tyesña ñeñt̄ pa'namen cotapññatser

attochña sapa' e'ñe señoçh erra'tsente'ña ñeñt e'ñe po'ñoçh huetsa Yomporeshot. Tarro'mar shonteñ ñeñt otetseñ ñetpa' Yomporo' po'ñoñ a'mitenet tarraña ñeñtpa' ama Yomporeyaye po'ñoñ. Ñeñtpa' erraþaren o' orretyesa añ patsro.

² Arr sapa' alloch señoçh erra'tsente'ña e'ñe po'ñoçh eñoratenña Parets Puecamquëñ: Erra'tsencha' otats Jesucristopa' ña po'ñoçh partsof acheñetos arr patsro, ñeñña coþañatsarpa' e'ñe po'ñoçh Parets Puecamquëñ eñoratene'.

³ Erra'tsencha' ñeñt amach atteye' otetso Jesúsocop, ñeñña coþañatsarpa' ama po'ñoçh Parets Puecamquëñ eñoratenahueto. Ñeñtpa' ñeñña po'ñoçh e'moñe'tene'ña Cristo ñeñt atet se'mare'tyese't o'ch huapa. Te'ñapa' o' orrtonaya añ patsro.

⁴ Saña po'ñoçh nechemerneshacha' e'ñe po'ñoçh Yomporena'tares tarro'mar sapa' ama aña se'mñoteno atto pa'namenot shecare'tyensetañ. Yompor Puecamquëñ ñeñt sechorrenayapa' ñeñña sapa' atarr ahuamencattatenes. Ñeñña chorrenaya añ patso'marnesha'pa' ñapa' ama e'ñeye' ahuamencattatenaneto.

⁵ Ñeñña shecare'tyets e'ñe ñet poctañotet po'ñoçhpa' patso'marnesheta. Ñeñto'marña ñerra'm eñosetpa' añach serrpare'tyenet ñeñt patso'marecpa. Ñeñto'marña ñetpa' patso'marneshach e'mñotenahueto.

⁶ Yaña po'ñoçhpa' Yomporena'tarey. Ñeñt po'ñoçh eñotene' Yompor, ñetñaapa' e'ñech cohuen e'mñotenyet ya. Ñeñña ama Yomporena'tareyaye, ñetñaapa' amach e'mñotenyeto. Yapa' alloña yeñotenña coþañats ñeñt po'ñoçh huetsa Yomporeshot attoña yeñotenña ñaña coþañats ñeñt shequëñets.

Atto Yomporpa' ña atarr amorrentañtetsa

⁷ Masheñneshacha' ñaña noçhaneshacha' amueranna'tpahuepa'ch allohueney tarro'mar ñeñtpa' Yomporeshot huena. Allohuen amorrentñaapa' ñetpa' o' eñalleterret Yomporot, po'ñoçh o' eñoteret ñeñt atet pena Yompor.

⁸ Ñeñña ama amorrentñaopa' ñocpuepa' ama eñoteñetoña atet penaña Yompor, tarro'mar Yompor ñapa' ña atarr amorrentañtetsa.

⁹ Añpa' Yompor orrtate' yocop allochñaapa' yapa' o'ch yeñoter Yomporpa' atarr morrentenya. Attoña mueñan Puechemer arr patsro ñeñt po'paþror pen attochña yapa' corretsayach e'ñe ñeshot.

¹⁰ Arrpa' all orrtatonay Yompor ñeñt e'ñe po'ñoçh morrenteñets: Allempo ya ama't mameshapa' ama yemorrentpeño Yompor, ñañaapa' allempoteñ atarr morrentenya ya. Ñeñto'marña ñapa' mueñonay Puechemer ñeñtcha' yetsa'terroya yo'chñar.

¹¹ Ñeñto'mar masheñneshacha' atto Yomporpa' atarr nanac morrentenya, yapa'cho'ña e'ñepa'chña yemorrentanna'tuena allohueney.

¹² Yomporpa' ama esesha' puentare. Tarraña ñerra'm e'ñe yemorrentannena allohueney, po'ñoçhpa' e'ñe yeparrocmaten epay Yompor. Ña puemorrenteñaapa' e'ñech chorrenya poctacma.

¹³ Ña atto apuerrey e'ñe ña Puecamquëñ ñeñña yeñotatene'ña yapa' e'ñe yeparrocmaten epay Yompor.

¹⁴ Ñaña yapa' e'ñe yentuoñe't Yompor Puechemer ñeñto'marña ya te'pa' o' ya'pothonas saña atto Yompor po'ñoçhpa' mueñonay Puechemer ñeñtcha' ya'queshpaterre' ya ñeñtey yeçha'yetsa añ patsro.

¹⁵ Ñeñt ame'ñenaya Jesús ñapa' po'ñoçh e'ñe Yomporo Puechemer, ñetñaapa' e'ñe parrocmatenet epuet Yompor.

¹⁶ Attoña ya te'pa' e'ñe yeñoteñ ñaña yame'ñeña atto Yomporpa' atarr morrentenya. Yompor ñapa' ña atarr amorrentañtetsa. Ñerra'm e'ñe po'ñoçh yemorrentannena po'ñoçhpa' o' yeparrocmaterr epay Yompor.

¹⁷ Attoña yapa' e'ñech cohuen yemorrenteña Yompor e'ñe poctacma, allochñapa' yapa' amach yemcha'nañofayaya yeyemtero Yompor ñerra'm esempohuañen eñotatyesserrey e'ñe errotencha' entyesserrey. Tarro'mar e'ñe atet pena Jesucristo, yapa'cho'ña e'ñech atet yepena yaña arr patsro.

¹⁸ Ñerra'm po'ñoçh yemorrenteña Yomporpa' amachña cha yemcha'teñe. Tarro'mar atto e'ñe poctacma cohuen yemorrentannena epay Yompor, ñeñña po'ñoçh yehua-pore'tam'pene'ña yemchañ. Ñerra'm esempo cha es yemcha'tenpa' attoña e'ñe yañeña coñchatetsa. Ñaña ñerra'm orameñ yemcha'ten amaca'ye e'ñe yeychena'ña attoch e'ñe cohuen yemorrentannena e'ñe poctacma.

¹⁹ Yomporpa' o' e'ñe morrenterrya yanom, ñeñto'marña yapa'cho'ña te'pa' o'ch e'ñe yemorrentera yaña.

²⁰ Ñerra'm esesha' otets, ñapa'cho'ña e'ño' cohuen morrentenana Yompor, tarraña ñerra'm cha e'moñe'tyenan pamo'ts, ñeñña atet otetspa' attaca'ye shequën. Atto ama morrentenano pamo'ts ama't ñeñtpa' e'ñe enteñ, amach errotenot morrentanoña ñaña Yomporña tarro'mar ñeñtpa' amaca'ye choye' enteñe.

²¹ Yompor po'ñoñ ñeñt yotene': Ñerra'm po'ñoçh yemorrenteña Yompor, yamo'tspa'cho'ña e'ñepa'chña cohuen yemorrentenanet.

5

E'ñe yeyemteñoñ Cristo chocmach pomnaren yepen allohuen ñeñt ama pocteye' enteno Yompor arr patsro

¹ Allohueney erra'tseneycha' ame'ñerraya Jesúsapa' ña Cristotats ñeñteyña yapa' o' e'ñe puechemer perrey Yompor. Ñehua, yeñoteñ arr patsro ñerra'm yemorrenteña pueheñarr acheñ ñeñt achemerasha, puechemerasha'ña e'ñe yemorrentuena.

² Ñeñto'marña yeñoteñ ñaña ñerra'm esempo yemorrenteña Yompor ñaña yame'ñerrñaña po'ñoñ atet oteneý, aña'ña e'ñe yemorrentuena ñeñt puechemerasha' pen Yompor.

³ Atto yemorrenteña Yompor choch yame'ñerrñaña po'ñoñ ñeñt atet oteneý. O'ch e'ñe yepena ñeñt atet oteneý, ñeñtpa' ama torrapahuoyaye.

⁴ Tarro'mar allohueney ñeñtey puechemer pen Yompor, yañapa' e'ñe yeyemteñoñ Jesús chocma pomnaren yepen allohuen ñeñt ama pocteye' entyeno Yompor arr patsro.

⁵ Allohuen ñeñt ame'ñenaya Jesús ñapa' Yomporo' Puechemer, ñetña e'ñe ñap'et pomnaren penetña allohuen ñeñt ama pocteye' entyeno Yompor arr patsro.

Allpon ñeñt yeñotaterre' Jesucristopa' e'ñe po'ñoçh Yomporeshot huapa

⁶ Ñeña Jesucristo allempo huapa arr patsro eñall ñeñt yeñotaterre'ña ñapa' e'ñe po'ñoçh Yomporeshot huapa. Ñeñt ñanompa' allempo atto apatareta Yomporecop oño. Tarraña ama e'ñe ñap'ña oña yeñotataye ñapa' e'ñe po'ñoçh Yompor Puechemer. Po'rraso'ñaña yeñotate'ña allempo acorso'tam'psareterra; ñapa' e'ñe po'ñoçh Yompor Puechemer. Ñaña Parets Puecamquëñ ñeñtpa'cho'ña ña yeñotaterre'ña Jesúsapa' e'ñe po'ñoçh Yompor Puechemer tarro'mar Parets Puecamquëñpa' erroten es eñotateney ñeñtpa' e'ñe po'ñoçh atet.

⁷ Ñaña eñall ma'pa ñeñt pue'ntaño'tsen ñeñña yeñotatene'ña ya. Ñeñtpa' Yompor Parets ñaña po'ñoñ ñaña Puecamquëñ. Ñetpa' ama't ma'po'maret e'ñe patrpa atet petsa.

⁸ Ñaña arr patsro eñall ma'pa ñeñña yeñotatene' Jesúsapa' ña po'ñoçh Yompor Puechemer. Ñeñtpa' Parets Puecamquëñ, allo'pa' oñ allempo apatareta Yomporecop allo'pa' ñaña po'rras atto acorso'tam'psareterra. Ñetpa' ama't ma'po'maret eñotatenet, e'ñe patrpa eñotatyenet ñeñt Jesús ñapa' e'ñe po'ñoçh Yomporo Puechemer.

⁹ Ñehua, arr patsro chocma e'ñe pocte' yenteñ ñeñt' atet eñotateney acheñ tarro'mar ñeñtpa' chocma sherbeney. Ñaña ñeñt' atet eñotateney Yompor elloña ñeñtpa' atarr nanac sherbeney. Tarro'mar ñeñtpa' e'ñe ña Puechemerecop eñotateney Jesúsapa' Yomporo Puechemer.

¹⁰ Ñerra'm esesha'ch ame'ñerraya Yompor Puechemer, ñeñt'ña' echerrancha' e'ñe ña pueyoçhro ñeñt'cha' eñotaterre' e'ñe pocte' o'ch e'ñe yemterrana Jesucristo ñeñt' e'ñe po'ñoçh Yompor Puechemer. Ñeñt'ña ama ame'ñenayo Yomporpa' cha ottatateñ ñerra'mrrate' ñapa' atarr ashcañ tarro'mar ñeñt' acheñerpa' ama ame'ñenano Yompor ñeñt' atet eñotateney Puechemerecop.

¹¹ Yomporpa' atet eñotateney atto yapa' apuey Puechemer, e'ñe ñeshot'ña yapa' corretsayach yocsheñeshocmañen tayoteñ e'ñe errponañohuen.

¹² Ñeñt'ña aguërre' Yompor Puechemer aña'ñaña o' aguërret attochña ñetpa' corretsetach tayoteñ e'ñe errponañohuen. Añaña ñeñt' ama aguërraye Yompor Puechemer, ñet'ña' amach esesha' aguërraye alloch correrret.

All pa'namen cotape' chatnerranet e'ñe allohuanen allempo so'tnerranet po'cartot

¹³ Ñeñt' allpon o' nequellconas sa ñeñtes ame'ñenaya Yompor Puechemer, sapa' ñeñt'cha'ña señotaterre' po'ñoçh sapa' corretsasach socsheñeshocmañen e'ñe tayoteñ erponañohuen.

¹⁴ Yapa' e'ñe yeyemteño' Yompor ñeñto'marña yeñoteñ es yenam' ñeñt' pocte' enten ña, yapa' chocmach e'mñoteney.

¹⁵ Ñaña atto yeñoteñ ñapa' chocma e'mñoteney ñerra'm es yenam' ñeñto'marña yeñoteñ e'ñe allorocma o' yo'patataretta ñerra'm escha' yenamueñ.

¹⁶ Ñerra'm eseshascha' eñote' samo'ts ñeñt' atet pene' ñeñt' ama pocteye' enteno Yompor, ñeñt'ña po'chñarpa' ñerra'm ama añecpayaye alloch rromuerr attoch chenquërra e'ñe poctacma, sañapa' añcha' senamoñ Yompor attoch ñach a'crraterre' e'ñe puecamquëño'. Yomporpa' o'ch a'crrater ñerra'm po'chñarpa' ama añecpayaye alloch rromuerr attoch chenquërra e'ñe poctacma. Po'ñoçhpa' eñall yo'chñar alloch yerromuerr attoch yechenquërra e'ñe poctacma. Ñeñto'marña napa' ama añecpaye' notenso sapa' chocmach sema'yochampeña ñeñt'cha' chenquërrtsa e'ñe ña patpare'teño'.

¹⁷ Ñehua, yeñoteñ allohuen ñeñt' ama pocteye' enteno Yompor ñeñtpa' ochña'teñets enten Yompor. Tarraña eñall ñaña ochñarets ñeñtpa' ama añeyaye ñeñt' alloch yerromuerr attoch yechenquërra e'ñe poctacma.

¹⁸ Yeñoteñ allohuene y ñeñtey po'ñoçh eñalleterrtsa Yomporotpa' amach allo'na yeña'nen ñeñt' ochñarets enten Yompor. Tarro'mar Yompor Puechemerpa' chocma cohuañpeney ñeñto'marña oneñetpa' ama't e'ñe mameshapa' amach alla errot perrye'te.

¹⁹ Te'ña yapa' yeñoteñ o' yeyomporena'tarterra ya. Po'potantaña acheñenesha' arr patsro ñeñt' ama ame'ñetso, ñet'ña' aña yochresha'tenahuet oneñeñ.

²⁰ Yañapa' yeñoteñ ñeñt' Puechemer pen Yomporpa' ñaña' o' huapa. Ñaña yechapaterre'ña yeyoçhro attochña yapa' o'ch yeñoter Yompor ñeñt' e'ñe po'ñoçh Parets. Ñeñto'marña yeñoteñ o' yeparrocmaterr epay ñeñt' e'ñe po'ñoçh Yompor Puechemer ñeñtpa' Jesucristo. Attoña yapa' o' e'ñe yeñoter Yompor ñeñt' e'ñe po'ñoçh Parets, ñeñt'ña yapa' allochña e'ñe corretsayach yocsheñeshocmañen tayoteñ e'ñe errponañohuen.

²¹ Te'ña nechemerneshacha' sapa' e'ñech seño'noma, ñato'tña seyomporer sepeña'ña po'poñ ñeñt' ama po'ñoçh Partsoyaye. Te'pa' ñeñtach notas, ñeñtpa' attetepa'ch Nompore. Allohua.

AÑ PUEPAÑ SAN JUAN PO' CARTA 2 SAN JUAN

Attoch cohuen yemorrentannena e'ñe po'ñoçh atet oteney Yompor po'ñoñ

¹ Napa' na ñeñten pompor pen allohuen ñeñt ame'ñenaya Yompor, te'pa' o'ch nequellconas añ carta. O'ch nequellconap ãa ñeñteþ e'ñe noçhesha' nepeneþ, ãa ñeñteþ o'acrerr Yompor. O'ch nequellconap ñaãa ora pechoyoreshohuen ñeñt e'ñe pachor pepene'. Napa' e'ñe po'ñoçh atarr nemorrentensa, ama e'ñe napta nemorrentenso, elloña po'potantañeçhno ñeñt o' enterran ñeñt e'ñe po'ñoçh Yompor po'ñoñ, ñetpa'çho'ña e'ñe morrentuenset.

² Tarro'marña sapa' atarr yemorrentensa atto yapa' o' e'ñe çherrnaya ya yeyoçhro ñeñt e'ñe po'ñoçh Yompor po'ñoñ. Ñeñtpa' allach e'ñe a'puena yeyoçhro errponañohuen.

³ E'ñe nehuomñcha'teñoñes sa napa' o'ch notas: Yomporepa'ch sebensare'tamþene' ñeñtara Parets epuet Puechemer Jesucristo ñeñt Yepartseshar yepen. Ñetepa'chña semuerenaya attochña sapa' e'ñech cohuen socshena seyoçhro. Ñeñtpa' añecop attochña sapa' señoñterñañ ñeñt e'ñe po'ñoçh Yompor po'ñoñ attochña sapa' o'ch semorrentannerra e'ñe cohuen allohuenes.

⁴ Te'pa' o'ch notaþ, ãa ñeñteþ e'ñe noçhesha' nepeneþ na atto nentennaþ puesheña'tets ñeñt pechoyoresha' pepen, ñetpa' çhocma e'ñe cohuen cotape'cheññañet Yompor Parets po'ñoñ ñeñt e'ñe po'ñoçh atet oteney, napa' ñeñtña atarr nocshatene'.

⁵ O'ch noçheshacha' neyerpataþa, allo'nepa'ch amorrentanna'tpo' sentannena allohuenes. Ñeñt atet noteneþ arr nequellcoþpa' ñeñtpa' ama añeyaye ñoñets ñeñt ama se'mare. Ama't allempoteñ e'ñe errte' same'ñerrapa' allempoteñ se'muerrña ñeñt ñoñets.

⁶ Ñerra'm yemneñ yemorrentanna'tapa' añcha'ña atet yeþohuerra ñeñt atet oteney Yompor. Ñerra'm añ yemneñ o'ch e'ñe atet yeþohuerra ñeñt atet oteney Yomporpa' çhochña e'ñe cohuen yemorrentannerra allohueney. Ñeñtpa' e'ñe ahuatoteñ atet serrpare'tatyesasete't.

Atet pena ashcañnesha' ñeñt çhocma e'moñe'tene' Cristo

⁷ Ñeñto'marña te'pa' atet notenes tarro'mar ñeñt shequëne' acheñpa' o' epa'hua añ patsro. Shonte'ch ñeñtcha' shequëne' acheñ, ñetpa' atet otyenet Jesucristo ama partsoye' acheñetostso. Ñeñt otets atetpa' ñeñtña po'ñoçh ashcaña ñeñtña e'moñe'tene' Cristo.

⁸ Sapa' e'ñech señoñta allochñapa' amach shecaso. Ñerra'm shecas allempopa' e'ñete' orrena setorrerra Yomporecop. Añcha'ña setorrrena attochña sapa' e'ñech sagaphuerr ora allpon ñeñt alloch tsa'tuerrsa ña.

⁹ Ñerra'm erra'tsencha' ama attecmaye' yeçhatatso ñeñt atet yeçhateney Cristo, ñerra'm çha a'po'poñeteññañ po'ñoñ, ñeñt atet petsapa' amach Yomporeye' yemteno. Añcha'ña erra'tseneyte' allo'na coñene' Cristo po'ñoñ yapa' e'ñe po'ñoçh yeyemteña Yompor Parets e'ñe Puechemere'na.

¹⁰ Ñerra'm esesha'ch huapatsa sesho ñapa' atetcha' otos ñapa'çho' año' yeçhaten Yompor po'ñoñ tarraña ñapa' ñerra'm ama atteye' yeçhateno atet yeçhaten Cristopa' ñehua, amach sagapatsche sepaçllo. Ama't sehuomñcha'teñoñapa' amach sotatsche, "Yompore't ãa'natenaya."

¹¹ Amach sehuomñcha'tatsche tarro'mar ñerra'm sehuomñcha'teñ, sapa' ñeñtate' seyçhaprech ñeñt ama po'ñoçhoyaye.

Atto so'terranet po'cartot

¹² Shontemeñ po'poñechno ñeñtcha' notaseñ tarraña ama nemno o'ch e'ñe notuas arr necartot. Tarro'mar napa' nesechena o'ch nemo'tensa' allempochña attoch yeserrpare't e'ñe parro, attochña e'ñech cohuen parro yocsherra.

¹³ Añ pemo'nerr puechoyoresha'pa' ñetpa' huomñcha'tenpet ñamet arr necartot. Ñetpa'cho'ña ñeñtet o' acerranet Yompor. Te'pa' ñeñtach notas, Yomporepa'ch sa'nataya. Ñeñtpa' attetepa'ch Nompore. Allohua.

Juan

AÑ POMA'PAÑ SAN JUAN PO' CARTA 3 SAN JUAN

Atto Juanpa' eñnoten Gayopa' e'ñe cohuen ame'ñena

¹ O'ch masheñe Gayo nequellconapñ añ carta, napa' na ñeñten pompör pen allohuen ñeñt ame'ñenaya Yompör. O'ch notapñ, napa' e'ñe po'ñoçh atarr nemuerenpa.

² Ñehua, masheñe çhocma nema'yochampenpa allochñapa' Yompörpa' e'ñech a'natenpa. E'ñepa'ch cohuen pehuomçhena, tarro'mar napa' neñoteneþ e'ñe pecamquëño'tpa' e'ñe cohuen poçtape'chen Yompörecop.

³ O'ch notapñ, napa' atarr nocsha allempo huerra masheñnesha' peshot. Ñetpa' atet serrpare'tatuerrnet þapa' e'ño' po'ñoçh cohuen þame'ñena, e'ño' cohuen poçtape'cheññañ Yompör po'ñoñ ñeñt e'ñe po'ñoçh atet oteneý.

⁴ Allempo ne'mare'tas atto sapa' e'ñe cohuen soçtape'chen ñeñt e'ñe po'ñoçh atet oteneý Yompör po'ñoñ, napa' ñeññañ atarr nocshatene'; ama eñalle po'poñ ñeñt atet atarr nocshatene'. Napa' e'ñe atet nentenes ñerra'mrrate' nechemeres ñeñto'marña napa' atarr nocshensa.

⁵ Ñehua, masheñe o'ch notapñ, þapa' e'ñe poçte' atet pepena ñeñt atto þaguëñ e'ñe cohuen pepaclo masheñnesha' ñeñt huapyetsa po'poñ anetso.

⁶ Ahuaña allempo yapçhena allohueney ñeñteý ame'ñetsa, ñetña' atet serrpare'tatuerryet atto þapa' e'ñe cohuen pemuerapanet. Ñaña o'ch notapñ, çhocmach peyenpuenanet, þapanetcha' ñeñt palltenet attoch anerret Yompör po'ñoñ po'poñ anetso. Ñerra'm atet pepenapa' ñeñtpa' e'ñech poçte' enteneþ Yompör tarro'mar ñetpa' Yompör sherbenet.

⁷ Ñehua, ñetpa' o' ahuanmuet attoch serrpare'teññañeta' Jesucristo po'ñoñ tarraña ñetpa' ama mueneñeto o'ch es apapanet ñaña ñeñt ama ame'ñetso.

⁸ Ñeñto'marña yapa' e'ñe poçte' o'ch es yapapanet tarro'mar ñeñtpa' attoña yetorrapretenañeta Yompör po'ñoñ.

Atto Diótrfespa' ama't mameshapa' ama cohuenaye' entenano ñeñt ame'ñetsa

⁹ O'ch noterrperr po'poñ. O' nequellca'hua carta allohuenacop ñeñt apçhetsa all þa'netsro. O' notuanet ora allpon atet notuaþ arr necartot, tarraña Diótrfespa' çha achmare'tey. Ñapa' e'ñe pommo'cheño't e'ñe ñañeñapa' aña muenen o'ch pomnaren þa'yenan acheñenesha' ñeñt o' ame'ñerrana Yompör, ñeñto'marña ama e'mñotenye.

¹⁰ Ñeñto'marña esempoch neçhap peshopa' o'ch neyerpatosanet ñeñt atet pena Diótrfes. Ñapa' çhocma toma'tañpeney attach eñosatse'tyen yocop. Ama ñeñtayaya atet peno, elloña ama aguënano masheñneshaçhno ñeñt anene' Yompör po'ñoñ. Ama aguënaneto ñaña ama muenatenano acheñenesha' o'ch aguëñet ñamet masheñneshaçhno. Ñerra'm esesha'ña aguënahuetpa' ñaña'apa' o'chçho' muevo'terranet arro't all sapçhena.

¹¹ Ñehua, masheñe þapa' amach peýçhapretatsto ñeñt atet pentapreten ñeñt ama poçteýaye. Papa' añcha'ña peýçha' ñeñt pentapreten atto e'ñe poçte' es þa'yenet. Ñeñto'marña atet noteneþ tarro'mar erra'tsen ñeñt e'ñe poçte' es petspa' ñeñtca'yeña Yompör pueyochresha'; ñeññañ ama poçteýe' es þa'yetso ñeññañ ama't mameshapa' ama eñnotenanoña Yompör.

Atto e'ñe cohuen orrtaten Demetrio

¹² Ñehua, o'ch notapñ ñaña po'psheññecop ñeñtpa' añ pa'so'cheñ Demetrio. Ñaña po'ñoçhpa' e'ñe cohuen enteñ allohuen acheñenesha'. Ñapa' e'ñe atet pena atet oten

Yompor po'ñoñ ñeñt e'ñe po'ñoçh cohuen. Ñeñto'marña yapa'cho'ña yeñoteñ ñapa' e'ñe cohuen acheñer. Ñehua, ðapa' e'ñe peñoteny ñerra'm erroten yoten, ñeñtpa' e'ñech po'ñoçh atet.

¹³ Shontemeñ ñeñtcha' notapeñpa' tarraña amach e'ñe notuape añ necartot.

¹⁴ Tarro'mar napa' atarr nemneñ ahuenepoña neçhap pesho. Ñerra'm esempoch neçhappa' allempochña e'ñe yeserrpare'tatanna'ta parro.

¹⁵ Ñeñt arro'tsa'yen masheñnesha' ñetpa'cho'ña huomcha'tenpet ñeñtara añ necartot. Pañapa' o'ch pehuomcha'tyesanet e'ñe puesheña'tsocma masheñnesha' ñeñt parro'tseneþ. Te'pa' ñeñtach notaþ masheñe, Yomporepa'chña þa'natenaya. Allohua.

Juan

AÑ SAN JUDAS PO' CARTA SAN JUDAS

Atto Judaspa' quellcan carta allohuenacop ñeñt pueyochresha' pen Yompor

¹ Masheñneshacha' ñaña nochaneshacha', allohuenes ñeñtes o' hua'ñerres Yompor Parets attoch pueyochresha' perres, ñeñtes o' sa'cohuentatare'tterra Partsocop, ñeñtes e'ñe cohuañpen Yompor e'ñe separrocmateñoť Jesucristo. Ñeñto'marña napa' nequellquennas añ carta na Judason ñeñten torretsa Jesucristocop.

² E'ñe nehuoñcha'teñoťes sa napa' o'ch notas: Yomporepa'chña semuerenaya, ñaña nanquëpa'chña morrentensa, nanquëpa'chña coshatenes seyo'chro.

*Ñeñt ashcañtetsa amach Yomporeye' po'ñoñ serrpare'teno
(2Pe. 2.1-17)*

³ Te'pa' o'ch notas, masheñneshacha' ñaña nochaneshacha' napa' atarr nemneñ o'te' nequellconas attoch neñotatas ñeñt e'ñe erroťenotcha'ña a'queshpatare'tey e'ñe allohueney ñeñtey ame'ñenaya Jesucristo. Tarraña te'pa' añ nenten ñeñt atarr palltetsa o'ch notas, nanquëpa'ch sema'yochra añ ñeñt atto yame'ñena attochña e'ñech cohuen semoñena, attoch amach semnateñe ama't puesheñarra o'ch a'po'poñetonaset ñeñt atet yame'ñeña Jesucristo.

⁴ Añecopña notenes tarro'mar chocma orretyena acheñenesha' ñeñt ashcañtetsa ñeñt ama Yomporeye' po'ñoñ cotape'cheneto. Ñet puehquëñoťespa' ñato'rraña chate' a'po'poñeterrnayet ñeñt atto po'ño'ch yame'ñerrñaña Yompor po'ñoñ. Ñetpa' atetcha' otyeset, e'ñeca'ye pocte' o'ch sosya'tsañe'chña yeychen tarro'mar Yomporpa' chocma peretnenedey, ñapa' atarr amueraña ñeñto'mar amach coñchaterrye. Ñetpa' po'ño'ch ama pamo'mtayeye' peñeto Yompor ñeñt ñapueť Yamo'mte' yepen ya. Ñaña ñetpa' ama po'partseshareye' peñetoña Jesucristo. Tarraña sapa' señoche'pa'ch e'ñe ahuaťoteñ anuaretta ñeñt atet petsapa' ñeñtña o'patatenetña coñcheñets.

⁵ Ñehua, sapa' po'ño'ch e'ñe señoťeñ ñeñt atet pa' ahuať, tarraña te'pa' o'ch alla neyerpaterrsa atto Yomporpa' cha coñchatuerran ñeñt alla quechpuerre' ñeñt e'ñe atet oteney Yompor. Ñeñtpa' atet pa' allempo a'queshpatteran israelnesha' allempo erraneta' Egiptot all atarr amuro'chtatare'ttete't. Tarraña ama't a'queshpatteranetañ allempo, elloña tsapaťonetpa' o' alla a'cllatuerran allohuen ñeñt ama cohuenaye' ame'ñaye'te. E'ñech attecma perran allohuen ama't te' ñeñt ama ame'ñetso.

⁶ Te'pa' o'ch alla neyerpaterrsserr po'poñ ñeñt atet pa' ñaña patanta'tets mellañoťeñnesha'. Ñetpa' anaretetañ ñetcha' sherbenet Yompor, tarraña ama't atet anaretetañpa' ñetña ellopa' o' a'ypo'ña'nmuet pue'ntañ e'ñe patpare'teñoťet Yompor. Ñeñto'marña Yomporpa' alla huancanet cadeno ñeñt ama apyapahuoyaye ama't erponaña alla huapore'tanet nanac checmeto. Ñetñapa' alletach tarrempohua esempoch mellapoterra allempochña mueñerranet ñaña coñcha'puetso.

⁷ Te'pa' o'ch alla neyerpaterrsserr ñaña ñeñt atet pe't sodomo'marnesha' ñaña gomorro'marnesha' ñaña allohuen ñeñt allampaño'marnesha' all. Ñetpa' e'ñe atet pete't atet pa' patantarr mellañoťeñnesha' atto nanac yechcatenet ñeñt nanac sosey enten Yompor. Cañoresha'tyenet nanac ama't yacmapa' agapannena e'ñe parro yacmacma, ñeñtpa' amaca'ye atteye' anare'teye. Ñeñto'marña Yompor allpa' attoña coñchatanet o' etomañpsanet attoch e'ñe a'poyatatuerranet tso' ñeñt ama emaya'pahuoyaye. Ñeñto'marña yeñoťeñ allohueney eñall coñcheñets ñeñt ama ahuañaño.

⁸ E'ñe attecma p̄atse'tyena ñaña ashcañnesha' ñeñt̄ orretyetsa te'. Ñaña ñetpa' po'poñon̄ta es cotape'chyenet ñeñt̄ ama po'ñoçh atteyaye. Attoña ñetpa' a'sosyatenet po'chets e'ñe ñañeñeta. Ñeñto'marña ama't Yepartsesharpa' ama am̄cha'na'tpahuoye' enteñeto, attoña ama't ñaña allohuen ñeñt̄ ahuamencatetyetsapa'cho'ña e'ñe achm̄are'tueñet.

⁹ Tarraña ama achm̄are'tpahuoyaye ama't Yepartseshar ama't ñaña allohuen ñeñt̄ ahuamencatetyetsa. Ñehua, ama't Miguel ñeñt̄ pa'm̄cha'tareter pen mellañoñeñnesha' ñapa' ama achm̄are'tapanoña oneñet. Allempo rroma Moisés oneñeñña' huapa, ñapa' añ atarr mueneñ o'ch enana' arromñañ, tarraña Miguelña' ama muenache o'ch aner. Ama't muene' es otnare'tanna'tetaña' Miguelña' amaca'ye achm̄are'tanoña oneñet. Ñeñtpa' at̄ta och: "Ñehua, ñeñt̄ atet pepena te' Yomporpa' ñach p̄otteñe'che'."

¹⁰ Tarraña ñeñt̄ña ashcañnesha' ñeñt̄ orretyetsa te'pa' ñetña' chocma achm̄are'teñet ama't ñeñt̄ atarr ahuamencatesha' tarro'mar ñetpa' ama eñoteññañeto po'huamenc. Añach e'ñe paterr eñotenet ñeñt̄ e'ñe patso'marecpa. Ñetpa' e'ñe atet penet ñerra'mrrate' berr ñeñt̄ añach p̄a'yen ñeñt̄ atet muenatyenanet po'chets, ama es cotape'chpenayeña o'ch eñotet erra'tsente'ña ñeñt̄ po'ñoçh cohuentetsa. Ñeñto'marña ñetpa' a'chencataterretcha' e'ñe ñañeñeta.

¹¹ Atarr yoroçheno'tsa'yenet tarro'mar ñetpa' ama morrenteñeto pamo'ts, e'ñe atet penet ñerra'mrrate' atet pe't Caín allempo muetsan pa'mo'nasheñ Abel. Attoch aparettet quelle, ñetpa' añach cotape'chenet o'ch shecare'teñet acheñenesha' atet pe't Balaam. Ñeñto'marña ñetpa' chenquërretcha' tarro'mar e'ñe atet penet ñeñt̄ atet pe't Coré ñeñt̄ amtsarettatsa ahuañ e'ñe ña patpare'teñoñ.

¹² Ñeñt̄ña ashcañnesha'pa' sapa' ñeñt̄ña sepercna'ntatene' allempo sapçhena o'ch serratallme'channena ñeñtes ame'ñenaya Yompor. Sapa' serratallme'channena e'ñe semorrentanna'teñoñ, tarraña ñetpa' at̄tach nanac rratse'tyenet amach ayetñañteneto amach cohua'peñetoña ñaña po'psheñeñ ñeñt̄ cheporretsa ñeñt̄ muenets o'ch rra' ñaña. Ñetpa' e'ñe atet penetañ ñerra'mrrate' ñeñt̄ cohuan̄penayeñ carrnero ñeñt̄cha' rratenayeñ tarraña amachña carrneroye'ña rrateno, ñeñt̄apa' ñañeñetach atarr rretset. Ñetpa' ama es sherbeneto e'ñe at̄ta penet atet ñerra'mrrate' os ñeñt̄ ama huatetso at̄tach matateñ m̄orr. Ñaña e'ñe at̄tet ñerra'mrrate' narmetsoch ñeñt̄ ama ame'tño, ama'tcha' çhen pueme'teñporopa' amach me'teno. Ñaña ñeñt̄ña narmetsocherpa' e'ñech atet pena ñerra'mrrate' rromuech o'ch ya'mare ora puerçhohuenpa' o'ch e'ñe puetsohua o'ch huañ. Ñeñt̄ña ama't mameshapa' amach es sherberrye.

¹³ Amach pueñmañeshoñeye' es orrtatyenet e'ñech pommo'cheñoñeta es orrtatyenet. E'ñe atet penet ñerra'mrrate' oñ apellche' puemo'yer. Ama't mameshapa' amach muechecheno. Ñeñt̄ña emo'ypa' çhach huapore'tenan sosyare' toñña'so all pa'so'ten. Ñeñtpa' e'ñe atet penaña ashcañnesha' amach pasayaya orrtatenetoña apencoçhen. Ñetpa' e'ñe at̄tet ñerra'mrrate' shepraño' ñeñt̄ yenten o'ch shora'nom o'ch ahuo' patso ñeñt̄pa' ama es sherbeno. Yomporpa' o'patenanet o'ch mueñanet coñcha'puetso all atarr nanac checmete', allotña ñetpa' amach çha'nerreto ama't errponaña.

¹⁴ Ñaña te'pa' o'ch notas, ahuañpa' eñall puesheñarr yacma añ pa'so'cheñ Enoc ñeñt̄ Adán po'm̄reneñ po'cançhroñoñhua. Ñaña'pa' ñeñt̄ a'm̄taye't Yompor po'ñoñ. Ñapa' eñotatan acheñenesha' atetcha' a'paretterra ama't ñeñt̄ ashcañnesha'. Ñocpueta'ñaña atet ote't: "Huerrach Partsessa' e'ñe pueyochresha'çhnohuen ñeñt̄ nanac po'nnacaren patsopueñ.

¹⁵ Huerrach allochña'pa' o'ch entuerran allohuen acheñenesha' ñato' cohuenette' ñato' amate' cohuenayayeto. Allohuen ñeñt̄cha' ama cohuenaye' entuerro Yompor, ñetña'pa' amñare'tterretcha' coñcheñtso. Attoçhña tsa'tatuerrana allohuen ochñañenesha' ora

allpon p̄atse'tyesete't ñeñt̄ ama pocteye' enteno Yompor Parets ama't mamesha. Ñaña atetcha' tsa'tatuerranet ora allpon atto sasare'chete't Yompor e'ñe pachmare'teñoŕet." Arrpa' allohua huañ ñeñt̄ atet eñose't Enoc ahuat̄.

¹⁶ Ñaña ñeñt̄ ashcañnesha'pa' atarrcha'tanmare'tyeñet, çhach po'poñ entuenet. Añach cotape'chyenet ñeñt̄ muena'yenet e'ñe ñocpueta. Cho'nate' ñetpa' atarrcha' ommonañet. Ñaña ñerra'm esempo e'ñe cohuen eñosyenet acheñeneshacop, ñetpa' añecpach e'ñe cohuen eñosyenet attoch es apuenanet acheñenesha'.

Atto pa'namen cotape'chatenan allohuen ñeñt̄ ame'ñetsa

¹⁷ Tarraña sa masheñeshacha' ñaña noçhaneshacha' amachña ñeñta same'ñatsto. Sapa' añcha'ña seyerpa ñeñt̄ atet otyese't Yepartseshar Jesucristo puellsensarnesha'. Ñetpa' ahuatoteñ atet otete't ñeñt̄cha' orretyerrtsa tsapatonet̄.

¹⁸ Ñeñt̄pa' atet otyete't: "Allempoch mellapoterrmochapa' orrterrach ñeñt̄cha' achmare'terre' Parets. Añach yeçhenet ñeñt̄ muenatse'tyenet ñañeñeta, ñeñt̄pa' ama't mameshapa' ama cohuenaye' enteñe Parets."

¹⁹ Ñeñt̄ ashcañnesha'pa' çhocmach mueneñet o'ch ellopa'tetstateret ñeñt̄ ame'ñenaya Yompor. Ñeñt̄ara ashcañnesha'pa' añach cotape'chenet ñeñt̄ atet muenatenanet ñet po'çhets; ñetpa' ama chorrenaneto Parets Puecamquëñ.

²⁰ Tarraña sa masheñeshacha' ñaña noçhaneshacha' e'ñe nemuereñoŕespa' o'ch notas, amach seyçhatstaneto ñeñt̄ atet penet ñet. Sapa' e'ñechña same'ñeñoŕ Yompor huomenquëpa'ch sepa' seyoçher tarro'mar ñeñt̄ same'ñena sapa' e'ñeca'ye Partse-shoŕecma huena. Chocmach sema'yochena. Sapa' amach soŕaye' se'ñoreno allempo sema'yochena. Añcha'ña se'ñoratene' Parets Puecamquëñ ñeñt̄ atarr ahuamencatesha'.

²¹ Atetcha' sepaña sa allochñapa' çhocmach señoŕeñ atto atarr morrentenya Yompor, amach sepurratsterro. Socsheñesha'pa' çhocmach seyemteña Yepartseshar Jesucristo; ña e'ñe pemuereñoŕey esempohuañen a'queshpaterreycha', attochña yañapa' corret-sayach yocsheñeshocmañen errponañohuen.

²² Ñehua, o'ch notas ñaña atetcha' sepe' po'potantañeçhno. Patanta'tets acheñpa' atarr echarr enteñet o'ch ame'ñerrñañet Yompor po'ñoñ. Ñetpa' çhoch soctape'chaterranet e'ñe cohuen attoch ame'ñerret ñeñt̄ e'ñe po'ñoçh Yompor po'ñoñ,

²³ atarr yoroçheno'tsenet po'chñaroŕet. Ñeñoŕmarña sapa' o'ch sa'queshpataterranet, ñeñt̄pa' e'ñech atet sepenanet ñerra'mrrate' cheshatoll ya'queshpaten o'ch yechter all poyapen pocoll. Po'potantañeçhno ñeñt̄ yeçhene' atarr sosya'tsañeçhno, ñetpa' çhochña semuerenanet tarraña ama'tcha' semuerenanetañpa' amach socshapretatstanetoña ñeñt̄ atet yeçhenet sosya'tsañ. Sapa' çhochña setsena'tapretanet ñeñt̄ atet pa'yenet sosey, te't sa'naña a'shoratatenet.

E'ñe yame'ñeñoŕ Yepartseshar Jesucristo aye'choçhtaterrapo'ch Yompor

²⁴⁻²⁵ Te'ña Yompor ñeñt̄ e'ñe ñapueŕ partotets, ñeñt̄ allohuen es eñotyets, ñaña ñeñt̄ Ya'queshpatañer yepen, ñañapa' atarr ahuamencatesha', ñachña ahuamencat̄ sepene' allochñapa' amach alla seshora'nerro. Attochña sapa' çhapatuerrescha' e'ñe ñesho all atarr cohuentena ña. E'ñech socsheñeshocmañen seçhacherr, amach eñalle ama't coñe'ta ñeñt̄cha' entapreterres ñeñt̄ ama pocteye' enteno ña. Te'pa' e'ñe yame'ñeñoŕ Yepartseshar Jesucristo aye'choçhtaterrapo'ch Yompor attoch e'ñe cohuen yecohuentaterrñañ. Chocmuepa'ch e'ñe ñapueŕ Yepartseshar yepeñ, çhocmuepa'ch añcha'tarettena e'ñe tayoteñ errponañohuen ñeñt̄ atet pa' ahuatoteñ. Te'pa' ñeñt̄ach notas, ñeñt̄pa' attetepa'ch Nompore. Allohua.

ATTO SAN JUANPA' EÑOTATER YOMPOR ÑEÑT'CHA' ATET PERRTSA TSAPATONET EL APOCALIPSIS

Atto Yomporpa' gatyesan Puechemer Jesucristo

¹ Añ ñoñets ñeñt'pa' atto Yomporpa' gatyenan Puechemer Jesucristo, allochñapa' ñachña eñotatyese' allohuen ñeñt' torra'yetsa Yomporecop. Ñeñt'cha' eñotatanetpa' ñeñt'pa' ñeñt'cha' ahuen atet perra ama't esempo. Atto eñotaten na, ñapa' ahuo't mueñon po'mllañoñeñer, allochñapa' ñach negatyese' na ñeñten sochetsa Juan ñeñten torretsa ñocop, allochñapa' attoch eñoch ñaña allohuen ñeñt' torra'yetsa Yomporecop.

² Tarro'mar napa' nach eñotatahuet allohuenet ñeñt' e'ñe po'ñoñch ñeñt' atet eñotatenen Yompor po'ñoñ ñaña ora ñeñt' allpon eñotatenen Jesucristo ama't ñaña ñeñt' ora allpon gatyennet.

³ Atarrcha' cosheñtso'tsen ñeñt'cha' lleyatene' acheñenesha' añ ñoñets ñeñt' huetsa Yomporshot ñeñt' yeñotatene' ñeñt'cha' atet perra esempo. Atarrcha' cosheñtso'tsa'yen ñaña allohuen ñeñt'cha' e'mñotene' añ ñoñets ñaña e'ñech ayemuetpo' enteñet, ora allpon ñoñets ñeñt' aquellcareñ arr. Tarro'mar o' chapmoch allempoch etsotuerra añ ñoñets.

Atto Juanpa' quellcan cancherr ñeñt' anetser all apcha'yena allohuen ñeñt' ame'ñenaya Cristo

⁴⁻⁵ Napa' o'ch nequellconas carta allohuenacpas ñeñtes apcha'yetsa e'ñe same'ñeñoñ Yompor all ñeñt' po'poñe'ttsocma anets ñeñt' cancherr ñeñt' Asio'tsa'yen. E'ñe nehuomñcha'teñoñespa' o'ch notas: Yomporepa'chña semueraya epuet ñaña Puecamquëñ epuet ñaña Puechemer ñeñt' Jesucristo. Ñetepa'chña sebensare'tampene'. Añ ñeñt'ara Yompor ñeñt' chocma eñall, ama't ahuatoteñ chocma eñall ñaña ñeñt'ara ñeñt'cha' huerrtsa po'pocheño. Ñaña Puecamquëñ ñeñt'pa' ñeñt'ara cancherr ñeñt' sherba'yets e'ñe all po'conaño e'ñe po'poñe'ttsocma sherbenet. Ñaña ñeñt'ara Jesucristo ñeñt' atarr ayemuetpo' yenten ñeñt' ora allpon ñeñt' eñotateney; ñaña ñeñt'ara Jesucristo ñeñt' ñanom tanterrtsa puerromñoñ ñapa' amach alla rromuerre'te. Attoña pa'mcha'tareter peñ allohuen ama't allohuen amcha'taretechno aña patsro. Ya'ye'chochtatoñepa'ch ñeñt'ara Jesucristo ñeñt' atarr amorrentña, e'ñe ña puemorrenteñoñeypa' attoña rroma yocop allochñapa' attoch ashataretta po'rras e'ñe yocop allochñapa' attoch e'ñe e'shohuaretterra yo'chñar.

⁶ Ñaña ñapa' attoña e'ñe cohuen aguëney attochña ya'mcha'tarettapretera attochña yesherbapreterrñañ Pompor ñeñt' atarr Parets, attey ñerra'mrrate' ñeñt' corneshatets Partsocop. A'cohuentaterrapo'ch Jesucristo, amcha'tarettepa'ch tayoteñ ama't erponohuañen. Ñeñt'pa' attetepa'ch Yompore.

⁷ O'ch secueñ huerrach Cristo, oscha' a'suatamperre'. Ama't allohuen acheñenesha'pa' entuapueretcha' e'ñe pa'clloyotet. Ama't ñeñt' pata'te'pa' entuapueretcha' ñamet. Allempoña ñeñt' shonte' pa'namen acheñenesha' ñeñt' ye'cha'yetsa arr patsropa' ya'na'tapueretcha' e'ñe puellquëñoñtet. Ñeñt'pa' e'ñech atet perra.

⁸ Yompor ñeñt' nanac Parets ñeñt' Yepartseshar yepen ñapa' chocma eñall, ama't ahuatoteñ chocma eñall, ñeñt'pa' ñeñt'ara ñeñt'cha' huerrtsa po'pocheño. Ñapa' atetña ot: "Napa' e'ñe pa'motroteñ eñallen atten ñerra'mrrate' quellec A ñeñt' pa'moter pen alfabeto. Allempoteñña napa' chocma eñallen esempohuañencha' huañerr ñeñt' allpon eñall, napa' atten ñerra'mrrate' quellec Z ñeñt' all puen alfabeto." Añpa' allohua ñeñt' atet toma'ntatena Cristo.

Atto Cristopa' orrtana Juan e'ñe po'cohuentañoĩ

⁹ Te' napa' ñeñten sochetsa Juan o'ch alla noterrser. Napa' ñeñten e'ñe semo'nasheñ sepoñhuenen sa. Napa' ñeñten semueroçhtapretenaya e'ñe yame'ñeñoĩ Jesús. Ñaña e'ñe yeyemteñoĩ ñapa' e'ñech acoña es ya'huanten esheccha' ya'mcha'tarettapretera. Ñehua, napa' o'ch neñotatas ñeñt atet nepena na arr. Ahuañmo'cha napa' e'ñe neserrpare'teñoĩ Yompor po'ñoñ ñeñt atet eñotatenen Yepartseshar Jesucristo, añña ñeñt ne'moñe'tene'pa' o' huapore'tenneta' arr atarr allapa' all rroçhpe'chañeñollo ñeñt otenet Patmos.

¹⁰ Pamtarr allempo çhapa'muen aña yetro allempo çhocma yeyerpueña Yompor napa' neyerpueñoĩ ñapa' e'ñe machayoña chorratna huomenc Yompor Puecamquẽñ. Allempoñapa' machayoña ne'm ñoñets huapa necha'ñoĩ. Atarr huomenc eñen atet ñerra'mrrate' poctor e'morrtetsa huomenc. Ñeñtpa' atet oten añ ñoñets:

¹¹ –Napa' ñeñten ñanom eñallen, allempoteñña napa' çhocma eñallen ama't esempohuañencha' huañerr ora allpon ñeñt eñall, napa' atten ñerra'mrrate' quellec A ñeñt ñanom huetsa alfabetoĩ, arrohua all huañen alfabeto ñeñt yoten Z. Te' napa' o'ch notap ñeñt ora allpon ñeñtcha' negatyesañ añ poctetsa o'ch pequellca'yes pepañoillo allotpa' o'ch pemñe all anetsoçhno ñeñt cançherr ñeñt apcha'yetsa all pa'namen anetso ñeñt ame'ñetsa. Ñeñt ñanom añ pa'so'cheñ Efeso, allotpa' Esmirna, allotpa' Pérgamo, allotpa' Tiatira, ñaña Sardis, ñaña Filadelfia, allotpa' ñaña Laodicea. Ora añeçhno anetspa' ñeñt Asio'tsen.

¹² Allempoña ne'muen atet ñoñetspa' nañapa' neptallsa o'ch neñch esesha'te' ne'ñorana'tenaya. Allña' nent cançherr ñeñt all orratenet huerare allo çoyo'tenet ñeñtpa' oro ayeçhcataret.

¹³ E'ñe rroçho ñeñt cançherr all orratenet huerare all orrtena puesheñarr yacma ñeñtpa' Jesucristo ñeñtara Ñeñt Acheñetosets. Ashtamañ, pa'shtampa' e'ñe çhen pa'tcohua. Achanaret, po'chanarpa' orotommuen ñeñt allo chanena puesomapo.

¹⁴ Poñoĩ pue'chpa' e'ñe ora atarr huallama't atet ñerra'mrrate' carrnero pue'ch ñeñt e'ñe huallama't. Amapa' o'ch not pue'chpa' e'ñe ora huallama't atet ñerra'm senet ñeñt otenet nieve ñeñt atarr huallama't. Pa'cille'pa' atarr poptena atet ñerra'mrrate' tso' po'huorter nanac a'rrechatañ.

¹⁵ Pa'tacpa'çho'ña attecma poptena atet ñerra'm aser yachamuen. Allempo eñorena e'ñe atet e'morrtena po'ñoñ atet ñerra'mrrate' shonte' oñ atarr huomenc ma'moreten.

¹⁶ Pot po'cohuenrotpa' orrenan cançherr ranto. Puenamo'tpa'çho'ña all orrtena cochell ñeñt emoshenito'mar etsotañtaret. Ora pa'tsa'pot e'ñe atet poptena ñerra'mrrate' atsne' atarr huomenc a'rrechatañ.

¹⁷ Allempo neñchpa' e'ñe nemcha'na'teñoĩpa' nañapa' o' nerrmosa patso e'ñe pa'tco. Neyorñoĩpa' ama nepelleno ama't mamesha, cha nottena ñerra'mrrate' çho nerromuen. Tarraña ña potot po'cohuenrot a'plla'n, oten:

–Amach pemcha'tatsto, napa' ñeñten ñanom eñallen, allempoteñña napa' çhocma eñallen ama't esempohuañencha' huañerr ora allpon ñeñt eñall.

¹⁸ Napa' ñeñten ama arromñañeshayayno. Ama't nerromhua ahuaña tarraña te'pa' o' alla nocrrerra, amach alla nerromuerre'te ama't ahuaña. Ñaña napa' nechen llave, ñeñt nehuamenc nepen alloch pomnaren nepen rromueñets ñaña ñeñtcha' aguerre' allohuen ñeñt rromuets.

¹⁹ Te' pçocoppa' añ poctetsa o'ch pequellca'yes ora ñeñt allpon o' negatyeseñ ñaña allpon ñeñtcha' negatyerrperr ñeñtcha' atet perrtsa esempohuañen.

²⁰ Ñehua, te'pa' o'ch neñotatañ ñeñt atet toma'ntena añ cançherr ranto ñeñt penten e'ñe notot necohuenrot ñeñt ama eñotenaye' penteno. Ñeñt cançherr rantopa' añ toma'ntena ñeñt cohuañpesyenahuet ora allohuen ñeñt name'ña'yenaya allemeñ ñeñt cançherr anetso ñeñt apcha'yetsa all. Ñaña ñeñt atet pent ñeñt ayeçhcataret oroch all

orratenet huerare, ñeñtpa' añ toma'ntena ora allpon ñeñt apcha'yetsa allemeñ anetso ñeñt cancherr ñeñt name'ña'yenaya.

2

Atto Juanpa' quellcan carta añecop ñeñt ame'ñetsa anetso Efeso

¹ Ñeñt neserrpare'tatene' ñapa' alla oterrerr, ñapa' atet oten:

—An poctetsa o'ch pequellca' carta añecop ñeñt cohuanpene' allohuen ñeñt ame'ñetsa all anetso Efeso, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt orrene' cancherr ranto e'ñe all pota po'cohuenrot, ñeñtara Cristo ñeñt chope'chets rrocho e'ñe allo'tsen ñeñt ayečcataret oroch all orratenet huerare.

² Ñaña'pa' atet otenes: ‘Napa' neñotuennas ñeñt ora allpon atet sepa'yena all. Napa' e'ñe nentuennas ñeñt allpon nanac setorra'yena ñaña allpon ñeñt e'ñe cohuen acoña es sa'huanta'huanen. Ñaña napa' e'ñe nentuenes sapa' ama saguēne ñeñt ama cohuenaye' es pa'yetso. Sapa' atto setpatyeñ ñeñt otetseñ ñetpa' allsensareteto' tarraña ñetpa' atta shecare'tenet. Attoña setpateño' o' señotanet ñetpa' atta shecare'tenset.

³ Ñaña napa' neñotuenes ñeñt allpon semuerochtana nocop ñaña atto e'ñe cohuen sa'huanta'huen muerochteñets, ama semuenme'cheñe allo setorra.

⁴ Tarraña ama't atteña'pa' nentuennas paterr ñeñt ama cohuenaye' nentapretenso. Ñeñtpa' añ atto sapa' o'huañ e'ñe semorrentna ñeñt atet sepa'ahuat allempo e'ñe errete' same'ñerrna.

⁵ Te'pa' o'ch notas, o'ch seyerpuerra atto ahuañmo'cha nanac cohuen semorrentenna. Te'pa' ama atteye' sepeno. Añ pocte' o'ch alla soctape'cherr e'ñe cohuen attoch o'ch alla seperra cohuen ñeñt atet sepa'allempo e'ñe ñenmañ same'ñenna. Ñerra'm amach ello soctape'cherro cohuen napa' tayecma o'ch ahuen o'ch neprratañperres ñeñt atma'ntataret socop ñeñtara ñeñt all orratenet huerare.

⁶ Tarraña ama't atteña'pa' napa' añña e'ñe cohuen nentuennas atto sapa' ama pocteye' senteno ñeñt atet patse'tyen acheñenesha' ñeñt cotene' Nicolás poctaña. Napa'cho'ña ama pocteye' nenteno ñeñt atet patse'tyenet sosya'tsañ.

⁷ Ñeñt e'mñotene' añ ñoñetspa' chapanetepa'ch pueyočhreto ñeñt atet neñotatenanet na Necamquēnoñ, ora allohuen ñeñt pame'ñeñotet chocma apcha'yenet allemeñ anetso'mar. Ñeñt metana'tue' allohuen pa'namen topateñtsočno, ñeñt ama nepuerramperayo, ñetña'pa' naphuerranetcha' ñeñt no'patatenanet ñeñtcha' atarr yoma'huerret e'ñe poctacma Nomporecho, allpa' e'ñech cosheñtso'tsenet. Ñeñtña napa' o'ch not, napa' o'ch nemnaterranet attoch o'ch tsomhuerret añ tsach pue'mer alloch corra'huerret e'ñe poctacma amach alla rromuerrete'te ama't ahuaña.' ” Arrpa' allohua huañ atet ot efeso'marneshacop.

Atto Juanpa' quellcan carta añecop ñeñt ame'ñetsa anetso Esmirno

⁸ Allempoña ñeñt neserrpare'tatene' ñapa' alla oterrerr:

—Te'pa' o'ch pequellquerrerr carta añecop ñeñt cohuanpene' ñeñt ame'ñetsa all anetso Esmirna, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt ñanom eñall, allempoteñña ñapa' chocma eñall ama't esempo-huañencha' huañerr ora allpon ñeñt eñall. Jesucristo ñapa' ñeñt rromhuats tarraña te'pa' o' alla beñterra.

⁹ Ña te'pa' atet otenes: ‘Napa' neñotuennas ora allpon ñeñt atet sepa'yena. Neñotuennas ñaña atto atarr sa'muerochtatarettena, ñaña atto atarr huocchañes. Ñehua, ama't huocchañsoña' Yomporecho shonte' esocmañen ñeñt sechyen. Ñaña ñeñt se'moñe'tene' neñotuennas atto atarr sasare'tenset. Ama't otenetañ ñetpa' judionesheto' tarraña ñetpa'

ama Yomporeye' pueyochresha' penahueto; ñetpa' aña pueyochresha' penahuet oneñeñ ama't allohuenet.

¹⁰ Amach yore'tatstaso muerochteñets ñeñtcha' ahuen sehuapoya. Tarro'mar ñeñtcha' seyottam̄pse' patanta'ttsos, ñeñtpa' oneñeñeshoñ huena añecopña attoch topat-uas ñerra'm po'ñochte' same'ñena. Puesheña'ttsos muerochtatasetcha' e'ñe çharramat. Ama'tcha' muetsasetpa' añ pocte' o'ch serromapes atto same'ñena. Allochña napa' naphuerrescha' ñeñt no'patatensa alloch socrra'huerra e'ñe socsheñeshocmañen. Ñeñtpa' ñeñfara noten po'poñ ñoñtso naphuerrescha' seprenio ñeñtcha' socshatuerre' e'ñe poctacma.

¹¹ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoñ ora allohuen ñeñt pame'ñeñoñet çhocma apçha'yenet allemeñ anetso'mar. Ñeñt metana'tue' allohuen pa'namen topateñtsoçhno, ñeñt ama nepuer-ram̄perrayo, ñetpa' ama't puesheñarrotetapa' amach amñareñterreto coñcheñtso ama't ahuafa. Ñetpa' amach alla rromuerreterro po'pocheño.' " Arrpa' allohua huañ atet ot esmirno'marneshacop.

Atto Juanpa' quellcan carta añecop ñeñt ame'ñetsa anetso Pérgamo

¹² Allempoña ñeñt neserrpare'tatene', ñapa' alla oterrner:

—Te'pa' o'ch pequellquërrerr carta añecop ñeñt cohuan̄pene' ñeñt ame'ñetsa all anetso Pérgamo, o'ch p̄otanet atet: "Napa' o'ch nequellconas carta attoch neñotatas ñeñt atet otenes Jesucristo ñeñt orrtatene' cochell puenamoñ, po'cchellpa' ñeñt emoshem̄to'mar etsotañtatereñ.

¹³ Napa' te'pa' otenes: 'Napa' neñotuennas ora allpon ñeñt atet sepa'yena. Napa' neñotenes all seyçhena ñeñtpa' all atarr añcha'noçhtena oneñeñ. Tarraña ama't atteñpa' sapa' ama sequeçhpueno atto same'ñenna, ñaña çhocma sa'meten atto same'ñenna, ama't e'ñe allempo muetsennanet ñeñt name'ñenaya ñeñfara Antipas ñeñt çhocma neserrpare'tene' neñoñ sesho, allara ñeñt pa'netser peñ oneñeñ.

¹⁴ Tarraña ama't atteñpa' napa' nentuennas coñe't ñeñt ama pocteye' nentapretenso ñeñt atet sepatse'tena. E'ñe all Pérgamo patanta'ttsos ama semno o'ch sequëchpa' ñeñt pueyçhateñ pe't atet yeçhate't Balaam ahuat. Balaam ahuatpa' atet coçape'chatane't Balac attoch shecare'tane't israelena'tarnesha' allochñapa' attoch ñetpa' o'ch p̄atse'tyenet ñeñt ama pocteye' enteno Yompor. Ñeñt atet p̄atse'tyenet ñeñtpa' atet pete't o'ch rrallme'chapretan po'poñ acheñ ñeñt po'yomporer pene' ñeñt ayeçhcataret, ñerra'm esempo rrenet po'chets ñeñt muetsenet allo sherbeñet pueyeçhcatar. Elloña allempo ñetpa' e'ñe pocshapreteñoñetpa' o'ch agapanna'tet ama't ñeñt ama puetaporeyaye, allñapa' o'ch cañoresha'tenet.

¹⁵ E'ñe attecma seshopa'çho'ña patanta'ttsos atarr ashcaretes ñeñtes puesheña'ttsos ñeñtes ama semno o'ch sequeçhpoñ Nicolás poçtapña ñeñt atet yeçhatenes ñeñt ama pocteye' nenteno.

¹⁶ Tarraña napa' o'ch notas, sequëchpa' ñeñt añ coçapñatser, o'ch alla soçtape'cherr e'ñe cohuen. Ñerra'm amach ello soçtape'cherro cohuen, napa' e'ñe tayecma o'ch ahuen o'ch neçllarenaneta' nocchelloñ ñeñt nenamo'tsen.

¹⁷ Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoñ ora allohuen ñeñt pame'ñeñoñet çhocma apçha'yenet allemeñ anetso'mar. Ñeñt metana'tue' allohuen pa'namen topateñtsoçhno, ñeñt ama nepuer-ram̄perrayo ñetñapa' napanetcha' maná ñeñtcha' pocrram̄ perret ñeñt ama ent-pahuesho. Ñaña o'ch napanet mapyetoll ñeñt atarr huallamemen allo aquellcare'tena so'chñets e'ñe etserra. Ñeñtcha' agapue' ñeñtpa' ñap̄ta eñotenan añ so'chñets ñeñt aquellcare't all.' " Arrpa' allohua huañ atet ot pérgamo'marneshacop.

Atto Juanpa' quellcan carta añecop ñeñt ame'ñetsa anetso Tiatiro

18 Allempoña añ ñeñt neserrpare'tatene' ñapa' alla oterrerr:

—Te'pa' o'ch pequellquèrrerr carta ñaña añecop ñeñt cohuañpene' ñeñt ame'ñetsa all anetso Tiatira, o'ch potanet atet: “Napa' o'ch nequellconas carta attoch neñotatas ñeñt atet otenes ñeñt Yompor Puechemer; ñeñtara ñeñt pa'cille'pa' atarr a'rrechatañ atet ñerra'mrrate' tso' po'huorter; ñaña ñeñtara pa'tacpa' atarr poptena atet ñerra'm aser ñeñt bronce ñeñt atarr cohuen poptetsa.

19 Ñapa' te'pa' atet otenes: ‘Napa' neñotuennas ora allpon ñeñt atet cohuen sepa'yen, atto atarr semorrentannena ñaña atto atarr same'ñena, ñaña atto atarr seyennannena, ñaña atto e'ñe cohuen sa'huanta'huen ñeñt atarr echarr senten. Ñaña elloña allo'na sesen atet pa'nmue' ñeñt atarr cohuen enten Yompor.

20 Tarraña ama't atteñpa' eñall paterr ñeñt ama pocteye' nentapretenso. Ñeñtpa' atto sapa' semnateñ coyanesha' ñeñt sochetsa Jezabel atto ñapa' aña yeçhaten ñeñt ama cohuenaye' nenteno na. Ama't ñapa' oteneñ ño' a'mtene' Yompor po'ñoñ tarraña ama atteyaye, ñapa' atta shecare'tenes ñeñtes torretsañ nocop. Ñaña ñapa' aña yeçhatenes ñeñt atto secañoresha'ten, ñapa' otenes ñeñtpa' e'ñe pocte' enteñ Yompor. Ñaña aña yeçhatenes ñeñt atto serrapreten po'chets ñeñt muetsenet ayeçcataretocop, ñapa' otenes ñeñtpa'cho'ña e'ñe pocte' enteñ Yompor. Tarraña Yomporñapa' ama't mame-shapa' ama pocteye' enteñe.

21 Napa' atta necueñ allponmat, noten ñato' o'ch cotape'cherran cohuen tarraña teme'ttsenpa' ama mueno o'ch cotape'cherran cohuen. Ñapa' aña atarr cohuen enten atto cañoresha'ten.

22 Ñeñto'mar te' napa' o'ch nemnach o'ch atsna'ten attoch amach çha'nerro po'mayoç. Ñaña ñeñt epuet atet penet ñerra'm ama cotape'cherreto cohuen attoch queçhpuenet ñeñt atet yeçhatenanet ña, ñetpa'cho'ña o'ch necoñchatanet nanac.

23 Ama't ñaña puechoyoreshohuen napa' o'ch ne'nuerranet. Allochñapa' attoch allohuen ñeñt pame'ñeñoçet apçha'yetsa allemeñ anetso o'ch eñoçet ñeñt atetpa' ama aþapahuo. Napa' e'ñe nentuennas ama't ñeñt atet soctape'chen seyoçhro. Napa' ñeñtencha' saphuerre' allpon ñeñt poctetsa e'ñe puesheña'ttsocpas, ñeñt allpon atet sepa'yen.

24 Tarraña po'potantañes ñeñtes tiatiro'marneshas sapa' ama socteññañe ñeñt atet yeçhaten coyanesha'. Ama't ñaña ñeñt otenet oneñet poctapña ñeñt ama eñotpahuoyaye, puesheña'ttsa e'ñe etsotene' — ñeñtpa'cho'ña sapa' ama seycheñe. Ñeñto'mar te'pa' o'ch notas, napa' amach nenonaso po'poñ ñoñets ñeñt atarr echarr senten.

25 Añña notenes, amach sequeçhpatsche ñeñt atto soctape'chen cohuen Yomporecop, ama't tayoteñ ñaña esempohuañen allempoch nohuerra.

26-27 Ñeñt metana'tue' allohuen pa'namen topateñtsoçhno, ñeñt ama nepuerramþerrayo, ñeñt allo'na sets pa'nmue' ñeñt pocte' nenten na, ñetpa' naphuerranetcha' attoch añcha'taret entenanet allohuen pa'namen acheñenesha' ñeñt yeçha'yetsa aña patsro. Ñeñtpa' atet Nompor apuenen naña. Neyoroçhenñoç añcha'noçtapreterrnetcha'. E'ñe po'huamencotet ñerra'm ñet muenats atarrcha' mueroçhtateret allohuen pa'namen acheñenesha' arr patsro. Ñeñtpa' o'ch netma'ntacha ñerra'mrrate' ñeñt echene' po'carr asreþ, ñerra'm allo aso'tet patsro'pa' çhach a'mllo'tstach e'ñe poctacma.

28 Ñeñt metana'tue' allohuen pa'namen topateñtsoçhno elloña ñetpa' napanetcha' ranto ñeñt atarr ateshamerr.

29 Ñeñt e'mñotene' añ ñoñetspa' çhapanetepa'ch pueyoçhreto ñeñt atet neñotatenanet na Necamquëñoç, ora allohuen ñeñt pame'ñeñoçet çhocma apçha'yenet allemeñ

anetso'mar.' ” Arrpa' allohua ñeñt atet ot tiatiro'marneshacop.

3

Atto Juanpa' quellcan carta añecop ñeñt ame'ñetsa anetso Sardiso

¹ Allempoña ñeñt neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeñt cohuanpene' ñeñt ame'ñetsa all anetso Sardis, o'ch pōtanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt e'ñe chorratena Yompor Puecamquëñ cancherr ñeñtara cancherr ñeñt sherba'yets. Ñetpa' po'poñe'ttsoema sherbenet. Ñaña ñeñtara Cristo ñeñt orrene' cancherr ranto. Ñapa' te'pa' atet otenes: ‘Napa' neñotuennas ora allpon ñeñt sepa'yen. Ñaña neñotuennas atto sa acheñenesha'pa' atet entensetañ ñerra'mrrate' e'ñe cohuen socrrera Yomporecop. Tarraña ñeñtpa' ama atteye' sepeno chaña sottena ñerra'mrrate' cho serromuen, amaña es sesherbenaña Yomporecop.

² Ama't atto same'ñenañ mame' tarraña ñeñtpa' allo'na sen huañuanmats. Napa' nentuenes ama setsotenoña ñeñt e'ñe pocte' enten Nompor. Te'pa' o'ch notas, e'ñechña señaota, o'ch alla setanterra Yomporecop.

³ Chocmachña seyerpueña ñeñt atto aserrpare'tataretes ahuañmo'choteñ. Amach sepsatsche añ ñoñets ñeñt same'ñataya. Ñeñto'marña te'pa' añ poctetsa o'ch alla soctape'cherr cohuen Yomporecop. Ñerra'm ama atteye' sepeno napa' machayotach nohuerrnasa atet ñerra'mrrate' eñetpa' amach señaoteñe esempopa' machayotach huaponasa.

⁴ Tarraña ama't atteña'pa' all anetso Sardiso e'ñe puesheña'ttsaña ñeñt ama yechenaye sosya'tsañ ñeñt ama pocteye' enteno Yompor. Ñetpa' atet atma'ntatarettenet ama't pa'shtamueta'pa' ama a'sosyateñeto. Ñeñto'mar ñetpa' e'ñe pocte' nentenanet ñaña attochña nemnaterranet o'ch yechope'cherr e'ñe parro tarro'mar ñet ñeñt neshtamta-tenanetpa' ama a'sosyateñeto, e'ñe cohuenarer orrtenet e'ñe huallama'tareret.

⁵ Ñeñt metana'tue' allohuen pa'namen topateñets ñeñt ama nepuerranperrayo, ñetpa' neshtamtaterranet shetamuets ñeñt atarr huallama't. Ñetpa' amach ne'sherraneto pa'so'cheñ all aquellcarettenet Yompor po'libro attochña ñetpa' corretsetach. Ñetña'pa' nechme'taterranetcha' ñeñt na Nompor ñaña allohuen po'mllañoñeñnashar.

⁶ Ñeñt e'mñotene' añ ñoñets chapanetepa'ch pueyo'chreto ñeñt atet neñotatenanet na Necamquëñoñ ora allohuen ñeñt pame'ñeñotet chocma apcha'yenet allemeñ anetso'mar.' ” Arrpa' allohua ñeñt atet ot sardiso'marneshacop.

Atto Juanpa' quellcan carta añecop ñeñt ame'ñetsa anetso Filadelfio

⁷ Ñeñt neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeñt cohuanpene' ñeñt ame'ñetsa all anetso Filadelfia, o'ch pōtanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt e'ñe Parets ñeñt e'ñe po'ño'ch allohuen es oten. Ñeñtara Cristo ñeñt allsensaret ñach añcha'taretterrtsa e'ñe atet añcha'tarette't David. Ñato' o'ch netma'ntacha o'ch not ñapa' echenan David po'llave. Ama't erra'tsencha' o'ch toranpenanet attoch chapanet Yompor po'cohuenña ama't eseshapa' amach errotenoñt alla epatare'terraneto. Ñaña ñerra'm ñach yottañperre' ama't eseshapa' amach errotenoñt toranpereto.

⁸ Cristopa' te'pa' atet otenes sa: ‘Napa' e'ñe neñotuennas ñeñt atet cohuen es sepa'yen. Ama't ama tama ahuaencateso Yomporecop, tarraña ama't coñe'ta sehuamenc sepen chocma same'ñennana neñoñ ñaña chocma sa'meten atto same'ñenna ama sa'nasoteno. Ñeñto'mar napa' o'ch netoranpsonas allcha' sa'potennan neñoñ, ñaña ama't eseshapa' amach errotenoñt alla yottañperrnaso.

9 Ñaña añña ñeñt otetseñ ñetpa' judionesheto' — ñehua, ñetpa' ama Yomporeye' pueyochresha' penahueto tarro'mar ñetpa' añña pueyochresha' penahuet oneñet, ñetpa' atta shecare'tenset. Tarraña ñetña te'pa' o'ch name'ñatanet allochñapa' o'ch çhapanet pueyochreto sapa' ñeñtes atarr nemorrentena. Ñeñto'marña ñetpa' o'ch huapuet sesho o'ch concorposet allo'tsenes.

10 Sapa' e'ñe cohuen acoña setsoton allpon neñoñ, ama sa'ypo'ñenno na, ñeñto'marña napa'cho'ña amach na'ypo'ñaso. O'ch necuanñperres tarremphua allempoch mue-rochteñsopoterra ñeñtcha' topaterre' ora allohuen acheñenesha' ñeñt ye'cha'yetsa añe patsro.

11 O'ch e'ñe mamerrerra' o'ch nohuerrnasa. Ñeñt atto allpon same'ñena o'ch e'ñe seño'tuanem amach sequeçhpatsche. Allochñapa' ama't eseshapa' amach erroteno't puerratanñpsaso ñeñt no'patatensa ñeñtcha' atarr socshaterre'.

12 Ñeñt metana'tue' allohuen pa'namen topateñtsoçhno ñeñt ama nepuerranñperrayo ñetpa' amate' erroteno't ahupore'tare'tterreto allot, ñetpa' e'ñe attet ñerra'mrrate' all orratenet pocoll ñeñt pa'paquell pen Nompör ñeñt e'ñe huomenc echarr a'paret. Ama't eseshapa' amate' erroteno't huapore'che. Ñaña e'ñe ñesheto napa' o'ch nequellcoñ Nompör pa'so'cheñ, allotpa' o'ch nequellcoñ ñaña Nompör pa'netser e'ñe allara ñesheto, ñeñtara pa'netser ñeñt sochetsa Jerusalén, ñeñtcha' sohuerrtsa ento't e'ñe etserrare'. Allotpa' o'ch nequellca' ñaña neso'cheñ all e'ñe ñesheto ñeñt e'ñe etserrare' neso'cheñ.

13 Ñeñt e'mñotene' añ ñoñets çhapanetepa'ch pueyochreto ñeñt atet neñotatenanet na Necamquëño't ora allohuen ñeñt pame'ñeño'tet ap'cha'yenet allemeñ anetso'mar.' ” Arrpa' allohua ñeñt atet ot filadelfio'marneshacop.

Atto Juanpa' quellcan carta añecop ñeñt ame'ñetsa anetso Laodiceo

14 Ñeñt neserrpare'tatene' ñapa' alla o'terrnerr:

—Te'pa' o'ch pequellquërrerr carta añecop ñeñt cohuanñpene' ñeñt ame'ñetsa all anetso Laodicea, o'ch p'otanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt ama puenesho po'ñoñ. Ñeñt atet oteney Pomporecop ñeñt'pa' atet'cha' perrnay, ñaña ñeñt allpon oten, ñeñt'pa' e'ñe po'ñoçh atet, ñaña ñeñtara Cristo ñeñt ñanom eñall, allotña Pompörpa' ye'chcatyesan allohuen ñeñt allpon eñall.

15-16 Cristoña te'pa' atet otenes: ‘Napa' e'ñe neñotuennas ñeñt ora allpon atet se'pa'yen. Tarraña sapa' seçllaño'tetsetsa same'ñenna, ama e'ñe huomencaye' same'ñenno. Ñerra'm ama semno o'ch same'ña'na huomencpa' amachña same'ñatsetno ama't mamesha. Tarraña sapa' seçllaño'tetsetsa same'ñenna. Ñato' o'ch netma'ntacha atet. Sapa' ama atteyayso ñerra'mrrate' oñ ñeñt atarr sose', ñaña ama atteyayso ñerra'mrrate' oñ ñeñt atarr atserrsasen. Sapa' atta sepena ñerra'mrrate' oñ ñeñt mamesha shorrsastetsa ñeñt nanac netsena'ten. Ñeñto'marña napa' e'ñe atet nentenes atet ñerra'mrrate' oñ ñeñt çha aya'pesatañtena. Ñerra'm yorrpa' çhach ya'pesatey o'ch ya'tatstera. Ñeñto'marña sapa' e'ñe atet nentenes çhach nemneñ o'ch nehuapore'tañperres.

17 Sapa' ama't soteneñ año' es sepallteno e'ño' sechuen ora ñeñt allpon poctetsa socop e'ñe sa setaruasot. Tarraña ñeñt sherbets secamquëñecoppa' ama secheñe ama't coñe'ta. Napa' atta nentenes atet ñerra'mrrate' ñeñt nanac atsena'taret, atarrcha' amuerochtatarettena ñeñt e'ñe huocchañ ñaña aporo'yet attach muelle'mquën.

18 Ñeñto'marña na te'pa' o'ch noctape'chaterres sa o'ch notas sapa' ñeñt sepalltena. O'ch senamuen nesho ñeñt po'ñoçh nanac sherbets secamquëñecop. Allochñapa' attoch sechuerr shonte' esocmañen ñeñt e'ñe po'ñoçh sherbets. Ñeñt ama sherbetsopa' o'ch sa'ypo'ñer. Ñato' o'ch netma'ntacha atto allempo atserrtatenet oropa' o'ch nohuanña a'yo ñeñt ama sherbetso allempoñapa' o'ch e'ñe orochayaña ñeñt nanac sherbets.

Ñeñt atarr sherbets atet ñerra'm oro ñeñtcha'ña se'nenña nesho. Elloña napa' o'ch netma'ntatasa atetcha' sepa, o'ch serañña nesho shetamuets ñeñt atarr huallama't. Allochñapa' ñeñtcha' sechorrerra attoch o'huañcha' sepenca ñeñt atto semuelle'mquën. Attoch serañña ñaña quëll'yeñtsopar alloch separterr secle' allochñapa' attoch se cuerr o'ch senterra e'ñe cohuen.

¹⁹ Ñehua, allohuen ñeñt po'ño'ch atarr nemorrentenapa' chocmach e'ñe cohuen noctape'chaterranet ñerra'm esempo atpare'tennet. Ñaña erroteno allohuen ñeñt nemorrentena o'ch necoñchach mame', tarraña ñeñt'pa' e'ñe ñocueta allochñapa' attoch o'ch alla cotape'cherret cohuen nocop, o'ch alla ame'ñerrnet huomenc.

²⁰ Señoche'pa'ch ñeñtcha' atet netma'ntaterra. Napa' atetcha' nepena ñerra'mrrate' esesha' ñeñt chocma chore'tets yetarro't. Ñerra'm eseshas se'mapuerrnan neñoñ ñaña ñerra'm setoram'penen, nañapa' o'ch nebe'tos all, allñapa' o'ch yerrallme'chen parro.

²¹ Ñeñt metana'tue' allohuen pa'namen topateñtso'chno ñeñt ama nepuerram'perraye, ñetñapa' nemnatanetcha' o'ch añcha'tarettapreterrnet e'ñe all neconaño. E'ñech atet ñerra'mrrate' na, napa' e'ñe nemtana'tua allohuen pa'namen topateñtso'chno. Ñeñto'marña napa' na'mcha'tarettapreteña Nomp'or e'ñe all po'conaño.

²² Ñeñt e'mñotene' añ ñoñets chapanetepa'ch pueyo'chreto ñeñt atet neñotatenanet na Necamquëño't ora allohuen ñeñt pame'ñeño'tet ap'cha'yenet allemeñ anetso'mar.' " Arrpa' allohua ñeñt atet ot laodiceo'marneshacop.

4

Atto Juanpa' entan Yompor po'conaño e'ñe alla pue'ntaño

¹ Allempoñapa' alla gatyerrnerr po'poñ. Necuerrerr, allñapa' nentos yetarr atorare't allcha' nebe'tos o'ch nechap ento. Alla ne'muerrerr ñoñets ñeñt atet e'morrtetsa ñorra' atarr huomenc atet ñerra'mrrate' poctor atarr huomenc eñen. Ñeñtña ñoñetspa' atet oten:

—Apon arr, o'ch pebe'tosam'pesna o'ch negatyesa'p allohuen ñeñtcha' atet perrtsa tsapa'tonet.

² Allempoña Yompor Puecamquëñ e'ñe chorrenna, atto nechap ento all nentos puecheñarr alla anen po'conaño.

³ Ñeñt anets all po'conaño'pa' atarr nanac cohuen aspanamcoquëno pop'tamco'tena atet ñerra'mrrate' mapue' ñeñt atarr cohuen pop'tetsa ñeñt otenet jaspe. Ellonet'pa' po'poñon'to atarr nanac cohuen tsamcoquëno pop'tamco'tena atet ñerra'mrrate' mapue' ñeñt otenet cornalina. Ñaña allo arca'tam'penapa' ñeñt'pa'cho'ña atet ñerra'mrrate' ayon tarraña ñeñt'pa' atarr nanac cohuen aspano shemashro pop'tena; e'ñe atet pop'tena ñerra'mrrate' mapue' ñeñt otenet esmeralda.

⁴ Ñaña top'ño'mar ñeñt rro'chtam'pene' all shonte' po'poñ conañe'chno. Ñeñt conañe'chno top'ño'tsa'yen ñeñt rro'chtam'pene' allo'tsen epoch charra' puechena pa'tats. Ñaña ñeñt anorr'chets allohuen conañe'chno ñeñt'pa'cho'ña allo'tsen epoch charrasheña puechena pa'tats ñeñt sherbene' Yompor all pue'ntaño. Coch'neshareret pa'shtam atarr huallama'tarer, po'choyo'met oro aye'chcataret ñeñt choyo'm'tenet.

⁵ E'ñe rro'ch conañot'pa' allot huena meratste', allot huena ñaña tatste'. Allpa' atarr huomenc ma'moreten. E'ñe alla allame'tets po'conaño ñehuapo't allot'sen can'cherr huerare ñeñt huoretyets all. Ñeñt'pa' ñeñt toma'ntenaya Yompor Puecamquëñ ñeñt can'cherr ñeñt sherba'yets e'ñe po'poñe'ttso'cma.

⁶ E'ñe alla a'yenet po'conaño't all orrtena erracmañen atet ñerra'mrrate' ñeñt añecmuen rerpat ñeñt e'ñe orrtatuene' ora ñeñt allpon eñall all.

Allo'tsen po'conañ e'ñe pa'tatsshentō'marot all tom'chen pa'tats ñeñt' berrma'ttetsa. Ñeñt'ñapa' shonte' pa'cloye'chno emota cohua'yen. Pa'chco'tagotpa'cho' shonte' pa'cille' allo't cohuen.

⁷ Ñeñt' ñanom ñeñt' berrma'ttetsa all, ñeñt'pa' e'ñe atet ñerra'mrrate' ma'ñor. Po'poñpa' allo'tsen ñaña atet ñerra'mrrate' toro, po'poñ pa'tsa'pot' pa'clloyotpa' e'ñe atet orrtena ñerra'mrrate' acheñ. Po'poñ all orrtena attema't ñerra'mrrate' ñeñt' otenet contor ñerra'm esempo anena.

⁸ Ñeñt' pa'tatso'mar berrma'tpa' e'ñe apa'pa'yetarerochet, pate'tetspa' echenan pechapa'ttso'cmet pa'pue' penet. Pa'pa'yot' enotpa' e'ñe acloyetarerochet, puel-leca'notpa'cho'ña acloyetareret emoto'mar allo't cohua'yenet. E'ñe ellapenete't arepenete't all achoteñet Yompor, ama't mameshapa' ama ameseneto atto achoteñet Yompor. Ñeñt'pa' atet otenet:

Parets, parets, parets ñeñt'ara Yompor ñeñt' atarr ahuamencat nanac ñeñt' Yepartseshar yepen ñeñt' chocma eñall. Ama't ahuatoteñ eñall ñaña ñeñt'ara ñeñt'cha' ello huerrtsa po'pocheño.

⁹ Ñaña ñeñt' berrma'ttetsa allpa' cohuentateññañet Yompor ñeñt' anets all po'conañ, atarr añcha'na'tpo' enteñet, ñaña chocma puema'yocheño'tet parasyoso'teñet Parets ñeñt' ama arromña'eshayaye ama't ahuata.

¹⁰ Ñetpa' ñerra'm esempo aye'chochtateñet Parets, añña ñeñt' epoch charrasheña ñeñt' puechetsa pa'tats ñeñt' sherbene' Yompor allpa' ñetpa'cho'ña o'ch'cho' concorpa'rretenet e'ñe all ñesho, o'ch'cho' ma'yocheñet ñamet Yompor ñeñt' ama arromña'eshayaye ama't errponaña. Allo'tpa' o'ch' a'meyet po'choyo'm o'ch'cho' net e'ñe Yomporeshonet ñeñt' anets all po'conañ. O'ch'cho' aye'chochtateñet Yompor ñamet, ñeñt'pa' atet otenet:

¹¹ Yompore, ñeñt'ep' Yepartsesharep', ñeñt'ep' nanac Partsop', ya añ poctetsa o'ch' yeco-huentatonap' ñeñt'ep' añcha'na'tpahuep' ñaña atarr ahuamencatep'. Tarro'mar pa'yechatyene' ora allpon ñeñt' eñall, e'ñe pa' pemneñno't' ahuo't eñalletesa, e'ñe pa' peñoñot' ahuo't yechca'yena ñeñt' allpon eñall.

5

Atto Juanpa' entan Cristo ñeñt' atma'ntataret Carrnero, e'ñe ñap'ia toran Yompor po'libro

¹ Allempoñapa' alla necuererr ñeñt' anets all po'conañ. Potot' po'cohuenrotpa' all nent all orrenan libro apco'nottataret, e'ñe emoto'mar aquellca'huaret' o'ponot' ñaña enot'. Echenan cancherr ñeñt' allo ayomrraret' atto e'ñe echarr a'paret'.

² Ñaña all nent puesheñarr mellaño'eñ ñeñt' atarr ahuamencat. Ñaña' rana huomenc, ñeñt'pa' atet oten:

—Esha'huaca' e'ñe cohuenare' cotape'chetsña Yomporecop ñeñt'cha' tore' añ Yompor po'libro allo echarr a'paret'ena.

³ Tarraña ama't puesheñarrapa' ama eñalle ñeñt'cha' tore' Yompor po'libro. Ama't puesheñarra ñeñt' ento'tsen ñaña ama't ñeñt' patso'tsen ñaña ama't ñeñt' o'pono'tsen patso, ama eñalle ñeñt'cha' muenatet ñeñt'cha' tore' Yompor po'libro attoch' eñorachet.

⁴ Napa' ñeñt'ña atarr neyarre' atto ama't puesheñarrapa' ama neñche ñeñt' e'ñe cohuenare' es cotape'chets Yomporecop ñeñt'cha' muenatet o'ch' toran Yompor po'libro ñeñt'cha' eñorate'.

⁵ Allempoña ñeñt' epoch charrasheña ñeñt' puechetsa pa'tats ñeñt' sherbene' Yompor, puesheñarrña' oten:

—Amach peyahuatsto, tarro'mar eñall puesheñarr ñeñt' e'ñe pocte' ñeñt'cha' tore' Yompor po'libro ñeñt' cancherr allo echarr a'paret'ena, tarro'mar ñapa' ñeñt' metana'tue'

allohuen pa'namen topateñtsochno, ñeññapa' añepa't Cristo ñeññara atma'ntatareñ Ma'ñor. Ñeññpa' judámerena'tar ñeññara David po'mreneñ.

⁶ Necuererr, allñapa' nent Cristo ñeññ toma'ntenaya Carrnero. All ten e'ñe rrocho allo'tsa'yen Parets po'conañ ñaña añ pa'tatso'mar ñeññ berrma'ttetsa ñaña e'ñe allo'tsa'yen ñeññ sherbene' Yompör. E'ñe rrocho all ten Cristo ñeññ atma'ntatareñ Carrnero. Orrtena atet ñerra'mrrate' carrnero ñeññ amsareñtetsa ochñartsocöp. Ñeññ carrneropa' cancherr po'ucör, echenan ñaña cancherr pa'cille'. Ñeññ cancherr pa'cille'pa' ñeññpa' añ Yompör Puecamquëñ ñeññara cancherr ñeññcha' sherba'yesets e'ñe po'poñe'ttsoema ora erracmañen añe patsro allcha' amñareñtetyerret.

⁷ Allempoña añ Carrneropa' o' huapa o' chap allo'tsen Yompör ñeññ anets all po'conañ. Ñañaapa' chetsosan Yompör po'libro ñeññ orren po'cohuenrot.

⁸ O' chetan libropa' allempoña añ ñeññ pa'tatso'mar berrma't ñaña ñeññ epoch charrasheña ñeññ puechetsa pa'tats ñeññ sherbene' Yompör; allohuenetñapa' concorpa'rreteñet Cristo ñeññ atma'ntatareñ Carrnero. Puesheña'ttsetpa' orrenet arpa ñaña pajo' ñeññ orotaten all anaret ñeññ atarr eñmosañtetsa Yomporecöp. Ñehua, añ ñeññ eñmosañtetsa añ toma'ntena ñeññ atto ma'yochena ñeññ pueyochresha' pen Parets.

⁹ Añña ñeññ concorpa'rretsapa' ñetñapa' morrechenet ñeññ etserra morreñets ñeññpa' atet achoteñet Cristo ñeññ atma'ntatareñ Carrnero:

Papa' e'ñe cohuenare' es pepa'yen ñeñño'mar e'ñe pocte' pñach chete' Yompör po'libro, e'ñe pocte' pñach tore' allo echarr apareñttena tarro'mar pñapa' pñ amsareñtatsa, perrasoña pñapa' allo petsa'tuonaya yo'chñar allochñapa' attoch e'ñe puechemer perrey Yompör ama't allohueney ñeññey pa'namen acheñey, ama't erra'tsena mereñtsorey allot yehuena, ama't ñaña erra'tsena ñoñtsör allo yeñosyen e'ñe po'poñe'ttsoema, ama't ñaña pa'namenana'tarey allohuen errohuanen ñeññ e'ñe ya'netser yeña'yen.

¹⁰ Ñeññey allohueneypa' pñ yemnatene' o'ch ya'mñcha'tareñtapretaña attochña yesherbapreteneñ Yompör ñeññ atarr Parets. Attoña yecorneshaten Partsocöp. Ñaña attoch ya'mñcha'tareñterra añe patsro.

¹¹ Allempoña alla necuererr o' ne'muererr mellañoñeñnesha' atet eñosyenet. Shontet nanac che'muechenet all rrochtamñeñet a'yohuen errañaren. Ñaña ñeññ berrma'ttetsa all ñaña ñeññ sherbene' Yompör ñeññ allohuenet ma'potanto'maretpa' ñeññ e'ñe rrochtamñene' Yompör ñeññ anets all po'conañ.

¹² Ñeññ mellañoñeñnesha' ñetñapa' e'morrtenet huomenc all achoteñet Cristo ñeññ atma'ntatareñ Carrnero. Ñeññpa' atet otenet:

Cristo ñeññ toma'ntenaya Carrnero ñeññ amsareñtatsa, ñapa' e'ñe cohuenare' es pa'yen ñeñño'marña ñapa' e'ñe pocte' ahuañencañttena, agapanepa' shonte' esocmañen ñaña e'ñe pocte' eñotañtepa'ch, ñaña e'ñe pocte' partsotepa'ch, ñaña e'ñe pocte' añcha'na'tpahuotepa'ch. Ñaña e'ñe pocte' ya yecohuentateñoñ ya'ye'chochtatoñepa'ch.

¹³ Allempoña ne'muerrerr atet ama't allohuen ñeññ Yompör pueyeñcñar aye'chochtateññañet Yompör ama't ñeññ ento'tsa'yen ñaña ama't allohuen ñeññ patso'tsa'yen, ñaña allohuen ñeññ o'pono'tsen patso ñaña oño. Ama't e'ñe allohuen pueyeñcñar ñeññ allo'tsa'yen allohuenet aye'chochtateññañet Yompör, atet otenet:

Ya'ye'chochtatoñepa'ch Yompör ñeññ anets po'conañ ñaña Puechemer Cristo ñeññ atma'ntatareñ Carrnero. Amñcha'na'tpahuepa'ch yenteñ, yecohuentatoñepa'ch tarro'mar ñetpa' atarr ahuañencañtet tayoteñ ama't errponañohuen.

¹⁴ Ñaña ñeññ berrma'ttetsa pa'tatso'mar all ñetñapa' otenet:

—Ñeññpa' attetepa'ch.

Ñaña añña ñeñt sherbene' Yompor ñeñt epoch çharrasheña ñeñt puechetsa pa'tats o' concorpa'rrtet all ma'yocheñet Yompor ñeñt ama arromñatshayaye.

6

Atto Cristopa' toran ñeñt cançherr allo echarr aþarettena Yompor po'libro

¹ Allempoñapa' nent Cristo ñeñt toma'ntenaya Carrnero attoch ñach tore' ñeñt cançherr allo echarr aþarettena Yompor po'libro. Allempoña ñapa' o' tore paterr ñeñt e'ñe ñanom allo ayomrraret ñeñt libro. Allempoña o' tore, añña pa'tatso'mar ñeñt berrma'ttetsa, puesheñarrñapa' eños. Nañapa' o' ne'muerrerr ñeñt atet eñen huomenc, po'ñoñpa' e'ñe atet e'morrtena ñerra'mrrate' cho tatstena. Ñeñtpa' atet oten:

—¡Aþon, pecue'!

² Naña necue'pa' nent paterr cahuall atarr huallaþnanen. Ñeñtña montenayapa' echenan paterr po'ca'not ñeñt orra'nen potot. Allñapa' apet paterr choyo'mets ñeñtcha' choyo'metnoma. Nañapa' ahuo' o'ch quellara'yena' o'ch e'ñe a'mchechuan ñeñt e'moñe'tyen.

³ Allempo torerranerr ñeñt puepañ allo ayomrraret Yompor po'libro, nañapa' alla ne'muererr ñeñt puepañ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Aþon, pecue'!

⁴ Allempoñapa' cha'nerrerr po'poñ cahuall, ñeñtñaapa' atarr tsaþnanen. Ñeñtña montenaya allñapa' apet paterr espada atarr allpocha'þ. Nañapa' o' muenateñet o'ch quellaratanna'tatan acheñenesha' arr patsro attochña muetsatanna'tatenanet. Attoña ñetpa' o'huañcha' muechet yeçhenet arr patsro.

⁵ Allempo torerranerr ñeñt puema'pañ allo ayomrraret Yompor po'libro nañapa' alla ne'muererr ñeñt puema'pañ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Aþon, pecue'!

Naña necuererrpa' nenterrerr po'poñ cahuall ñeñtñaapa' atarr quellueþnanen. Ñeñt montenayapa' orra'nenan paterr pesamets.

⁶ Allo'tsa'yen ñeñt berrma'ttetsapa' e'ñe all rroçho'tpa' ne'muererr ñeñt atet e'morrterrerr ñoñets, ñeñtpa' atet oten ñoñets:

—Paterr kilo trigopa' nanquëpa'ch tsa'teterr ama't ñeñt paterr denario*, ñaña ma'pa kilo cebadapa' nanquëpa'ch tsa'terra. Tsa'terrepa'ch ñaña paterr denario. Tarraña olivose' ñaña vinospa' chocmuepa'ch eñall, amach seprratamþsatsetye.

⁷ Allempo torerranerr ñeñt puepa'tatseñ allo ayomrraret Yompor po'libro, nañapa' alla ne'muererr ñeñt puepa'tatseñ berrma'tpa' o' alla eñorerrerr. Ñeñtpa'cho'ña ñeñtara atet oterrerr:

—¡Aþon, pecue'!

⁸ Naña necuererrpa' nenterrerr ñeñt paterr cahuall atarr shemashreþnaneno puer-rama'þnen. Ñeñt montenayapa' añ pa'so'cheñ Rromueñets. Ñeñt cotene' chenta'pa' añ toma'ntena ñeñtcha' aguëne' allohuen ñeñtcha' rromuets. Ñeñtpa' apare't llesens añecop attoch a'cllatatan shonte' acheñenesha' arr patso. Ama't pasheþarr pats, allpon otenet un cuarto, allponcha' a'cllatatuerran acheñenesha'. Ñeñtpa' atetcha' a'cllatatanet, quellareñtsoterrcha', chaporrñatsoterrcha', atснаñtsoterrcha', orrterrach berr ñeñt atarr atrre'mñañ ñeñt atarr bellac arr patsro.

⁹ Allempoñapa' o' torerranerr ñeñt pa'mnareñ allo ayomrraret Yompor po'libro, naña necuererrpa' allñapa' nenterrerr altar ñeñt allecma a'crratete't ñeñt eñmosatetsa

* 6:6 Denariopa' quelle ñeñt allpon tsa'tenet pamtarr ñeñt taruaset all pa'nyo.

Yomporecop. E'ñe all patsot altaro all nent shonte' camuecñetsochno ñeñt amt-sanatareñtate't all e'ñe pueserrpare'teñoñet Yompore po'ñoñ atto a'metete't ñaña atto ame'ñeñet Cristo.

¹⁰ Añña ñeñt camuecñetsochnopa' ñetñapa' rrannartenetpa' oteñet Yompore:

—Yompore ña atarr Partsoñ, atarr ayemuetpo' atet ñoteny. Esemphuahca' pecoñchatuerña acheñenesha' all patsro, esempohuahca' petsa'tateraña ñeñt acheñer yemtsanataye't ñeñt patso'tsen. Añpa' allohua atet ot camuecñetsnesha'.

¹¹ Ñetña puesheña'ttsetpa' apareñtenet pa'shtam atarr huallama'tarer. Ñaña ñetñapa' otareñtet ato't e'ñe ameseta'. “O' mameshaña o'ch etsotua allpon po'potantañecop semo'nasheñ ñeñtcha' amtsanatareñterrttserr ñeñtes e'ñe attecma sesherbeñ Cristo.”

¹² Allempo torerranerr ñeñt po'pechapueñ allo ayomrrare't Yompore po'libro ñaña o' alla necuererrpa' nent ñaña cha puetalle'chena pats huomenc. Atsne'ñapa' o' checmet atet ñerra'mrrate' shetamuets ñeñt atarr quellue ñeñt chorrena ñeñt atarr llequëtsa. Arrorrñapa' o' cha tsama'tta atet ñerra'mrrate' errasats.

¹³ Rantochno ñaña ñeñt ento'tsa'yen allohuenpa' o'cha shorcha'tua o' cha'cha't patso. O'ch netma'ntacha atet ñerra'mrrate' parte ñeñt e'mere't o'ch huomenquëshatpa' pue'merñapa' o'ch a'shore'tamñpesue huomenquëshu', ama't atarr emeñ pue'mer.†

¹⁴ Enetpa'cho'ña o' e'ñe chenca'hua atet ñerra'm papell epare'tpa' o'huañcha' orrta. Ama't ora allpon aspenrarerpa'cho'ña o' e'ñe rrote'tyesuahua ñopa'tets. Ñaña ora allohuen oñechno ñeñt rrochpe'chañechno ñeñtpa'cho'ña o' e'ñe rrote'tyesuahua.

¹⁵ Allempoñapa' allohuen acheñenesha' ñeñt ye'cha'yetsa añe patsropa' o' e'ñe e'potrra'tuet arorofo'mar ñaña mapuetpono'mar ñeñt aspenrarero'tsa'yen. Ama't allohuen añcha'tareñnesha'chno o' e'ñe e'potrra'tuet, ñaña allohuen ñeñt atarr sherba'yets, ñaña ñeñt eçllayorete'chno, ñaña ñeñt pa'm'cha'tareter pen solltar, ñaña ñeñt atarr ahuaencat entyetsa, ñaña ama't allohuen acheñ ñeñt ama esoye' enteneto ñeñt ataruasatare't e'ñe atta, ama't ñaña allohuen ñeñt ama ataruasare'teyaye ñeñt e'ñe cohueno'tsen, allohuenet e'ñe e'potrra'tuenet.

¹⁶ Allohuenetpa' chore'teñet aspenet ñaña mapueta'chno atet otenet:

—Te'ñapa' yeñgatañperrepa' atto'tcha' e'poterrey attoch amach enterrye Parets ñeñt anets all po'conaño allochñapa' amach erroteno't coñchaterrye Cristo ñeñt toma'ntenaya Carrnero.

¹⁷ Tarro'mar te'pa' o' chap añ yetro allempoch yoro'chterra allempoch atsa'tatare'tterra allohuen acheñenesha'. Ama't eseshapa' amach erroteno't ahuanotoño Yompore po'yoro'chenña.

7

Atto Israel po'm'reneñ ñeñtcha' ayato'ma'tare'tetyetsa

¹ Allempoña napa' nent mellaño'teñnesha' pa'tatssheña. E'ñe allohuanen pats, ñeñt pa'tats po'toñño'mar allñapa' all tomyen puesheña'tets mellaño'teñ ñeñt pa'tatssheña. Ñeñt pa'tatssheña ñetñapa' ñet epatare'tenet m'orr pa'tatssheñto'marot allo't huapyena m'orr. Allochñapa' attoch amach atarr m'orrarsañpeno añ patser, ama't ñaña oñechno, ñaña ama't pa'rra tsachpa' amach m'orrarsañpeno.

² Allempoña napa' o' alla nenterrerr po'psheñeñ mellaño'teñ, arr orrtena allo't huena atsne'. Ñapa' añ orren yapets ñeñt alloch yanatan allohuen ñeñt pueyochresha' pen Yompore ñeñt ama arromñateshayaye ama't ahua'ta. Ñaña' rrana huomencpa' otan mellaño'teñnesha' ñeñt pa'tatssheño'mar ñeñt añecop ahuaencat'tenet attoch ñetcha' pomnaren pet pats ñaña oñechno.

³ Ñeñtpa' atet otanet:

† 6:13 Ñehua, Juanpa' añ toma'ntatena higo ñeñt puenarem' penet all pa'nyo.

—Amach erroṭ seṭatsto añ pats ama't oñ ama't tsach ato'tña yeyato'ma'tueya' allohuen ñeñṭ torra'yetsa Yomporecop.

⁴ Allempoña ne'muerrerr ñeñṭ atet oteñet ñeñṭcha' allpon ayato'ma'tareṭtatsa. Ciento cuarenta cuatro mil ñeñṭpa' allpon otenet. Ñeñṭ ciento cuarenta cuatro mil acheñenesha' ñetpa' e'ñe po'poñe'ttsocmuet mereñtsoret. E'ñe ñeñṭa mereñtsorecmuet ñeñṭ ḥarrasheña puechena epa ñeñṭ pa'tañ pene' Israel ñeñṭ corratse't ahuat.

⁵ Ñehua, pate'tets mereñtsorpa' allponsheña ñeñṭcha' ayato'ma'tareṭtatsa: Judána'tarpa' allo'tsencha' ḥarra' puechena epa mil acheñenesha'; Rubénna'tarpa'ḥo'ña allo'tsencha' ḥarra' puechena epa mil acheñenesha'; Gadna'tarpa'ḥo'ña allo'tsencha' ḥarra' puechena epa mil acheñenesha';

⁶ Aserna'tarpa'ḥo'ña allo'tsencha' ḥarra' puechena epa mil acheñenesha'; Nefalína'tarpa'ḥo'ña ḥarra' puechena epa mil acheñenesha'; Manasésna'tarpa'ḥo'ña ḥarra' puechena epa mil;

⁷ Simeónna'tarpa'ḥo'ña ḥarra' puechena epa mil; Levína'tarpa'ḥo'ña ḥarra' puechena epa mil; Isacarna'tarpa'ḥo'ña ḥarra' puechena epa mil;

⁸ Zabulónna'tarpa'ḥo'ña ḥarra' puechena epa mil; Joséna'tarpa'ḥo'ña ḥarra' puechena epa mil; Benjamínna'tarpa'ḥo'ña ḥarra' puechena epa mil acheñenesha'.

Atto shonte' pa'namen acheñenesha' ñetpa' e'ñe huallama'tarerochet pa'shtam

⁹ Allempoña napa' o' alla nenterrerr shonte' acheñenesha', nanac che'muechenet ama e'ñotuenteno ñeñṭ allpon allo'tsen. Shonte' pa'namen acheñenesha'. Ñeñṭpa' pa'namen anetsot huacha'tyenet, shonte' pa'namen mereñtsoret ñeñṭ huachetsa all, shonte' pa'namen ñoñets e'ñe po'poñe'ttsocma eñosyenet. Ñetña'pa' all tomchenet e'ñe ñehuapoṭ allo'tsen Yompor po'conañ allo'tsen ñaña Cristo ñeñṭ toma'ntenaya Carrnero. Ñetpa' e'ñe huallama'tarerochet pa'shtam. Pototetña'pa' añ orra'yenet atet ñerra'm shequëpan.

¹⁰ Allohuenetpa' rranenet, otenet:

Yompor ñeñṭ po'conaño'tsen ñapa' o' a'qeshṭaterrey epuet ñaña Puechemer ñeñṭ toma'ntenaya Carrnero.

¹¹ Ñeñṭ berrma'ttetsa pa'tatso'mar ñaña ñeñṭ sherbene' Yompor all, ñaña allohuen mellañoṭeñnesha' ñeñṭ tomchets a'yohuen erraṭaren, ñetña allohuenetpa' e'ñe rroçhtañpesueñet Yompor ñeñṭ po'conaño'tsen. Ñeñṭ mellañoṭeñnesha' all rrema'rrartenet Yompor po'conaño atet ma'yocheñet Yompor.

¹² Ñeñṭpa' atet aye'choçhtateññañet Yompor, ñeñṭpa' atet otenet:

Attetepa'ch yocop ya'ye'choçhtatoñepa'ch, yecohuentatoñepa'ch, amuepa'ch ahuañaño atto eñotañtena Yompor, yeparasyoso'chepa'ch, añcha'na'tpahuepa'ch yenteñ, amuepa'ch ahuañañaatto ñeñṭ atto ahuamencattena Yompor, añcha'tareṭtepa'ch tayoteñ errponohuañen. Ñeñṭpa' attetepa'ch.

¹³ Allempoña puesheñarr ñeñṭ sherbene' Yompor, ñaña'pa' a'ṭto'ten, atet oten:

—Papa' ¿ama't peñoteñeña eseshachnoṭe'ña ñeñṭ chorrenaya huallama'tarer, ñaña ama't peñoteñe erroṭte'ña huachenet?

¹⁴ Nañapa' atet noch:

—Amaca'ye Nompore neñoteñe. Pate'ca'yeña eñotene'.

Ñaña'pa' o' alla oterren:

—Añenesha' ñeñṭ chorrenaya huallama'tarer ñetña ahuanterret allempo orrterra pa'namen mueroçhteñsoçhno. Ñaña ñetpa' atto e'shohuarettet po'chñaret e'ñe Cristo po'rraso, ñeñṭña ottetsa atet ñerra'mrrate' ñetpa' o' atsama'tarettet pa'shtam attoch e'ñe cohuen a'huallama'ttarettet pa'shtamuet e'ñe cohuen.

¹⁵ Ñeñto'marña ñetpa' allo'tsa'yenet Yompor po'conaño. All chocma sherbeñet Yompor — ellapenete't, arepenete't sherbatset all Yompor pa'paclo. Yomporña ñeñt anets all po'conaño, ñachña e'ñe a'natenahuet e'ñe ñesho.

¹⁶ Ñetpa' amach muerochterrete'te pa'chporrñoť ama't po'ñpañoť. Ñaña ñetpa' amach errotenoť chemuerranete'te atsne' ñaña amach a'mñechaterranete'te ñaña huerate'.

¹⁷ Tarro'mar Cristo ñeñt atma'ntataret Carrnero ñeñt allo'tsen all Yompor po'conaño, ñachña cohuanñpenahuet e'ñe atet ñerra'mrrate' carrnero e'ñech cohuanñpeñ pamo'mte'. Ñapa' chapatanetcha' all poten oñ ñeñtcha' apahuet attoch correnet errponañohuen. Yomporña ñach a'huañamñpsahuet puellquēña ama't ahuatapa' amach yahuerrete'te.

8

Allempo Cristopa' toruan po'cančhroñ ñeñt allo ayomrrarettena Yompor po'libro allempoñapa' orrta ñaña puesheñarr mellañoťeñ ñeñt orrene' po'pajo' orotaten

¹ Allempoña Cristo ñeñt toma'ntenaya Carrnero, ñapa' allempo e'ñe toruan po'cančhroñ ñeñt allo ayomrraret Yompor po'libro, e'ñe muetsoñeñtua poctacma pue'ntaño tematuanen.

² Allempoña napa' alla nenterrerr mellañoťeñnesha' ñeñt cančherrsheña ñeñt tomčhets e'ñe all Yomporesho. Ñetña puesheña'ttset allpa' aparettet poctor.

³ Allempoña o' huapa po'psheñeñ mellañoťeñ. Huapapa' o' tomos all altaro. Añ altarpa' allecma a'crratenet tsach puese' ñeñtña atarr amostetsa all. Pamosoñña'pa' ñeñt atarr eñmosaťtetsa Yomporecop. Ñeñt mellañoťeñpa' añ orren pajo' orotaten allcha' nenan ñeñtcha' eñmosaťtetsa. Ñeñt mellañoťeñpa' allña apet shonte' eñmosať ñeñtcha' eñmosaťtate' ñeñt atto ma'yochena Parets pueyochresha'. Ñeñtña eñmosaťtetsapa' ñeñtcha' net altaro ñeñt ayečcataret oro ñeñt e'ñe ñehuapoťe'tsen Yompor po'conaño.

⁴ Ñeñt orramñpen mellañoťeñ eñmosaťpa' čha amosoñe'chnen enonet allo'tsen Yompor, ñeñtña eñmosaťtatene' ñeñt atto ma'yochena Parets pueyochresha'.

⁵ Allempoña mellañoťeñpa' cheterran pajo'pa' o' esha'tan tso' puecallamñshor ñeñt cheta' altarot e'ñe e'chorran tso' pajo. Allempoñapa' huapore'ch patso. Chap patsopa' meratstosa, tatstosa, e'morrtosa huomenc, pellatan pats.

Atto Juanpa' entan cančherrsheña mellañoťeñ ñeñt poctorets

⁶ Allempoña mellañoťeñ ñeñt cančherrsheña ñeñt epoctoretarer puesheña'ttsetpa' o' echantyeset po'poctor o'ch a'toret.

⁷ Allempoña ñeñt ñanom mellañoťeñpa' o' poctora', poctora'huatsapa' orrta ñeñt ma'po'mar ñeñtcha' ahupapore'tarettatsa patso. Ñeñtapa' añ hue' allotpa' ñaña tso' ñeñt tsetetsa errasatso. Atto ahupapore'tarettatsa patso allempo chap patsopa' e'ñe a'huortatuosan ñeñt allo'tsen all chap patso. Tso'ñapa' errañaren e'ñe a'poyuosan ñeñt allpon tsachečno ñaña allpon ta'tečno ñeñt allo'tsa'yen ama't allohuanen pats allpon ñeñt otenet la tercera parte.

⁸ Allempoña po'psheñeñ mellañoťeñ ñeñt puepañpa' o' poctorerrerr. Poctora'huerrtserrpa' orrterrerr atet ñerra'm ñeñt nanac atarr aspenet. Ñeñtña'pa' čha huorten. Ñeñt aspenetpa' ahupapore'tarettatsa sa'po. O'ña chap oñopa' errañarenña oñpa' puenasa errasats allohuanen oñ ñeñt allpon otenet la tercera parte.

⁹ Ñaña ñeñt allpon yečhetsa all oño errañaren, e'ñe colla'hua, allpon colla'huatsa ñeñt otenet la tercera parte. Ñaña ñeñt allohuen botečno ñeñt chope'chyets all oño errañaren e'ñe chenca'huet, allpon chenca'huatsa ñeñt otenet la tercera parte.

¹⁰⁻¹¹ Allempoña po'psheñeñ mellañoťeñ ñeñt puema'pañpa' o' poctorerrerr. Poctora'huerrtserrpa' orrterrerr ranto ento ñeñt añecmuen atarremñ. Shora'nerrerr čha huerarere'tnena. Chap allo'tsa'yen po'ñesočno ñaña allot potayen oñečno errañaren

arr patsro. Ñeñt'pa' arrohua chap ñeñt' allpon otenet la tercera parte. Ñeñt' rantopa' añ pa'so'cheñ Peshrrem'. Chap allo'tsa'yen oñechno ñeñt'pa' cha a'pesherrretuosan oñechno erraparen arr patsro. Ñeñt'pa' allponohua a'pesherrtatan oñechno ñeñt' allpon otenet la tercera parte. Oñ po'peshrroña ñeñt'ña a'cllatue'ña shonte' acheñenesha' all.

¹² Allempoña po'psheñeñ mellañoñeñ ñeñt' puepa'tatseñ o' poctorerrerr. Poc-tora'huerrtserrpa' allempocma cho'te' errotetyesa atsne' ñaña arrorr ñaña rantochno, o' attaña checmetyeset. Ñetpa' allpon checmetyesets ñeñt' allpon otenet la tercera parte. Ñeñt' atto choyo'tenet yeto ñaña tsapopa' o'huañ atsnomyeset. Ñeñt' allpon o'huañ choyo'tyeset yeto ñaña tsapo ñeñt'pa' allpon otenet la tercera parte.

¹³ Allempoña napa' o' alla necuererrpa' allña'pa' nenterrerr po'psheñeñ mellañoñeñ ñapueñ all anoma'mtena ento allpononet. Allña'pa' ne'muerrerr ñeñt' atet eñosnom huomenc. Panoma'mteño'tpa' atet oten:

—Llequēñtsa-bee ñeñt' allohuenacop ñeñt' ye'cha'yetsa añe patsro. O' mameshaña o'ch poctora'huerrerr po'poñ ma'psheño'mar mellañoñeñ.

9

Atto o' e'ñe ma'psheñaña mellañoñeñ ñeñt'cha' poctorerrtserr e'ñe allohuanen

¹ Allempoña po'psheñeñ mellañoñeñ ñeñt' pa'mnareña'pa' o' poctorerrerr. Poc-tora'huerrtserrpa' nañapa' all nenterrerr ranto atarrem' ñeñt' shora'nmats ento' o' e'ñe chap patso e'ñe atet orrtosa ñerra'm mellañoñeñ. Ñeñt'ña mellañoñeñ allña'pa' apet paterr llave alloch toran allo e'tam'psaret arrot' ñeñt' atarr o'pononet arrot'tena pats.

² Ñaña'pa' o' toram'psan arrot'. Ñeñt'ña arrot' allot'ña cha'nom amos shonte' atet ñerra'mrrate' cho chemue'chenet. Chepoten amos cha muene' emayenan ama't atsne', erracmañen chepoten, e'ñe chorren amos.

³ Atto atarr chepoten amospa' cha'nma'cha'tatan ñaña allot' ahuañchenclla nanac shonte', pam'cha'tyesa erracmañen patso. Ñehua, ñeñt' ahuañchencllapa' o' apet attoch epotaña atet pena ñerra'mrrate' yellas ñeñt' atarr epotañ.

⁴ Ahuañchencllaña'pa' atet otare'tta amach erro't patstano ta'te' ñeñt' patso'tsen, amach erro't patstano ñaña tsach. Ama't ñaña allohuen ñeñt' pa'namen chopyets añe patsro amach erro't patsche. Añcha'ña erro't pa' acheñ ñeñt' ama ayato'ma'tare'teyaye Yompor pueyotsaparo.

⁵ Ama muenacheto o'ch muetsan ama't patrra acheñ allempo. Ñeñt' ahuañchencllapa' aña oteñet o'ch muero'chtatan acheñ amnarmña arrorr. Ñeñt'pa' atet'cha' atserrpanet atet atserrtena yellas ñerra'm cho epota'y.

⁶ Allempoña acheñenesha'pa' e'net'cha' attoch rromuet tarraña amach erro'teno't rromueto. Ama't'cha' atarr ya'ñametare'tenetaña'pa' amach rromueto.

⁷ Ñeñt' ahuañchenclla atet orrtena ñerra'mrrate' cahual allempo o'ch natyeñet attoch quellarachet. Poñpa' e'ñe atet orrtena ñerra'm choyo'mets ñeñt' orotaten. Pa'clloyo'tpa' e'ñe atet orrtena ñerra'mrrate' acheñ.

⁸ Echet, pue'chpa' añecmuen atet ñerra'mrrate' coyanesha' pue'ch. Pa'spa' e'ñe atet orrtena ñerra'mrrate' ma'yarras.

⁹ Pa'tallpa' e'ñe atet orrtena ñerra'mrrate' asertall ñeñt'cha' moñenaya, amach etsoto allo saneñet. Ñaña ahuañchenclla ñerra'm esempo anom'chenapa' e'ñech atet e'morrtena ñerra'mrrate' shonte' carro ma'moretets allempo matateñ cahual huomenc attoch chapuet allcha' quellaroset.

¹⁰ Pa'sme'llpa' e'ñe atet orrtena ñerra'mrrate' yellas pa'sme'll allot' epotañtena. Pa'sme'llo'tsen puepotañer allot' atserrpenan acheñenesha'. E'ñech amnarmña arrorr muero'chtatenanet.

11 Ñeñt ahuañchenlla ñetpa'cho'ña añ pa'mcha'tareter penet mellañoñeñ ñeñt amcha'tarettetsa all allo'tsen arroroñ ñeñt atarr arroroñ o'pononet pats. Mellañoñeñ ñeñt pa'mcha'tareter pen ahuañchenlla, hebreyachopa' añ socheñet Abadón; griegaçhoñapa' añ socheñet Apolión. Ñeñt epo'mar so'chñets ya yeñoño ñeñt yoten amtsanatañ.

12 Allempopa' met ñeñt ñanom ñeñt allcatañtetsa, tarraña señochepa'ch palltena po'poñ epa ñeñtcha' allcatañterrtterr.

13 Allempoña po'psheñeñ mellañoñeñ ñeñt po'pechapueñ o' poctorerrerr. Poc-tora'huerrtserrpa' ñaña allpa' ne'muerrerr ñoñets ñeñt e'morrtetsa altar pa'tatso'maroñ po'ucoroñ. Añ altar ñeñt ayeçhcataret oro, ñeñt pa' e'ñe ñehuapoñe'tsen Yompor po'conaño.

14 Ñeñtña ñoñetspa' atet otenan mellañoñeñ ñeñt po'pechapueñ ñeñtara ñeñt o' poc-tora'huerrerr. Ñeñtña ñoñetspa' atet otenan mellañoñeñ:

—Te'pa' o'ch pepyañper mellañoñeñnesha' pa'tatssheño'mar ñeñt ehucarettsa all ñeñt atarr po'ñeso ñeñt pa'so'cheñ Eufrates.

15 Ñehua, ñeñt mellañoñeñ pa'tatssheño'maretpa' añecop añño'tarettenet all atomat o'ch çhap allempo onañcharet allempochña ñetpa' o'ch a'cllatueret shonte' acheñenesha'. Ñeñt ora allpon acheñenesha' ñeñt yeçha'yetsa arr patsro allponcha' colla'huerrtsa ñeñt allpon otenet la tercera parte. Te'pa' o' e'ñe etsotua ñeñt atet onañcharet ñeñt hora, ñaña ñeñt yetro, ñaña ñeñt arorr-ro ñaña ñeñt chararo. Allempoña ñeñt mellañoñeñ pa'tatssheño'marpa' o' a'rroyaretterret.

16 Ñeñt mellañoñeñ pa'tatssheño'mar ñetñapa' ahuanmet po'solltarer ñeñt monta'yesnetsa puecahualloro. Nañapa' ne'muen allpon ñeñt atet oten ñeñt allo'tsa'yen. Ñeñt pa' atarr aton shonte'. Ñeñt che'muechets all, allo'tsen doscientos millones solltarnesha'.

17 Ñeñt atet gatennet all nent ñaña cahualleçhno, ñaña nent ñeñt atet orrtena ñeñt montenaya. Puesomapoñpa' añ chorra'yenet asrom. Patanta'tetspa' añ chorra'yenet tsamamuenare', po'potantañpa' añ chorra'yenet asollemamuenare', po'potantañpa' añ chorra'yenet shemashremamuenare'. Ñaña cahualleçhno poñpa' atet orretyena ñerra'mrrate' ma'yarroto'. Puenamoñña' allot çha'nen tso' huorte' epuet ñaña amos epuet ñaña ñeñt huoretnets shemashrepñeñen ñeñt otenet azufre.

18 Añña ñeñt çha'nets puenamoñ atsetaren ma'po'marpa' ñeñt pa' ñeñtña amtsañtetsa ñeñtcha' a'cllatuerre' shonte' acheñenesha' ñeñt allpon otenet la tercera parte.

19 Ña po'huamenc allo muetsenan acheñenesha' ama puenamoñayaya atet peno, añña ama't pa'sme'llotpa'cho'ña amtsañtena. Tarro'mar pa'sme'llpa' shechpeto' ñeñt poso'sme'll pen. Ñeñt pa' alloña atserrpenan acheñenesha'.

20 Allpon acheñenesha' ñeñt qeshpatsa ñeñt ama muetsanato ñeñt amtsañtetsa ñetñapa' attera atpare'teñet Yompor. Ama coñape'cherreto cohuen attoch queçhpuet ñeñt atet patse'tyenet sosya'tsañ. Ñetpa' attera mueneñet o'ch ma'yochyet oneñeñeçhno ñeñt ama cohuenayaye. Ñaña ñetpa' attera mueneñet o'ch yeçhcatatse'tyeset pa'namen ñeñtcha' ma'yochenet atet ñerra'm oro ñaña quellema't, ñaña bronce, ñaña mapue', ñaña tsach. Allohuenet ñeñt yeçhcatyenet ñeñtña po'yomporer penet, ñeñt ma'yochenet ama't ama enteno, ama't ama e'mueno, ama't ama chope'cheno.

21 Ñaña ama queçhpueneto ñeñt atto muetsanna'tenet ñaña atto tsamñannenet ñaña atto nanac cañoresha'tenet ñaña atto etatsre'tanna'tyenet. Ora añeçhnopa' alloña ama cohuenaye' coñape'cheneto.

10

Atto Juanpa' entan puesheñarr mellañoñeñ ñeñt orrene' po'librotoll

¹ Allempoña napa' o' alla nenterrerr po'psheñeñ mellañoñeñ ñeñt atarr ahuañcattetsa. Ñaña'p' sohua'nena entot, e'ñe osot sohuañpena. Poñoñña'p' añ arca'tañpesnene' ayon. Pa'clloyotña'p' e'ñe atet poptena ñerra'mrrate' atsne' çhoyo'tetsa. Pa'tac pa'chepohuen ora atet orrtena ñerra'mrrate' tso' huortets enonef.

² Sohua'nenapa' orra'nenan po'librotoll. Ñeñña librotollpa' e'ñe cohuen atoraref ñeñt rremuen potot. O' çhap patsopa' pa'tacña po'cohuenrotpa' tomos oño, po'ptecañña ñeñt pue'chcoferotpa' tomos patso.

³ Allempoña tomospa' rranosa huomenc. Poñoñña'p' e'ñe atet e'morrtosa ñerra'mrrate' ma'yarr tecoretsa. Atto rranosapa' e'ñe atet e'morrtena ñerra'mrrate' tecore' anapuene' ñeñt cançhroche'tats tecorena.

⁴ Allempoña e'morrtta ñeñt cançherr tecore' napa' nemneñeñ o'ch nequellcañ ñeñt atet ne'm tecore', tarraña na allempopa' ne'muerrerr ñoñets all e'morrtena ento. Ñeñña ñoñetspa' atet otenen:

—Amach pequellcatsche ñeñt atet pe'mueñ tecore' çhochña pa'nasocha.

⁵ Allempoña añ mellañoñeñ ñeñt tomosets oño ñaña patso, ñaña'p' echantosana pot enonef po'cohuenrot.

⁶ Allña eñosopa' e'ñe huomenc nosan po'ñoñ Yompor pa'so'chño, ñeñtpa' atet otos:

—Yompor ñeñt ama arromñaeshayaye ñeñt yeçcate' enet ñaña ora allpon ñeñt allo'tsa'yen pue'ntaño, ñaña ñeñt yeçcate' pats ñaña ora allpon ñeñt allo'tsa'yen po'patsño, ñaña ñeñt yeçcate' oñeçhno ñaña ora allpon ñeñt allo'tsa'yen pueyeçcatareso, ñaña'p' entenen ñeñt atet noten te' ñeñtpa' e'ñech po'ñoçh atet perra. Te'pa' amach alla yecuame'tere'te atomatuanen.

⁷ Ñerra'm esempoch poctorerrerr po'psheñeñ mellañoñeñ ñeñt po'cançhroñpa' allempochña e'ñe etsotuerria Yompor poçtaña ñeñt ama e'ñeye' eñotpahuoyaye ama't ahuañoteñ ama't allempo ñanom eñotatyese'ñeñt a'mta'yese'ñeñt po'ñoñ ñeñtara ñeñt nanac torra'yestse't ñocop. Allohua ñeñt atet eños mellañoñeñ.

⁸ Allempoña napa' o' alla ne'muerrerr ñoñets ñeñtara ñeñt atet ne'm ñorra' ñeñt e'morrtetsa pue'ntañoç, alla oterrerr:

—Te'pa' o'ch peponenya mellañoñeñ ñeñt tets oño ñaña patso o'ch pechtosñañ potot po'libro ñeñt e'ñe cohuen atoraref.

⁹ Nañapa' ahuen allo'tsen mellañoñeñ, neçhap ñeshopa' notos:

—Te'pa' o'ch papuen pelibrotoll.

Ñaña'p' atet oten:

—Añca'ye peyore o'ch perre'. Penamo'tpa' atarrcha' nanac puetsarr pe'm atet ñerra'm pets po'moñ, tarraña ñerra'm o'ch çhap pa'topa' atarrcha' pesherr pe'm.

¹⁰ Allempoña napa' o' nechtosñañ po'libro pototpa' o' nerre'. Allempo nerruepa' nenamo'tña atarr puetsarr ne'm atet ñerra'm pets po'moñ tarraña allempo çhap na'topa' atarr pesherr ne'm.

¹¹ Allempoña napa' o' alla oterrneterr:

—Te'pa' añ pocte' o'ch alla peserrpare'terrerr ñeñtcha' atet etsotaterr Yompor esempohuañen. Añcha' peserrpare'tyes ñeñtcha' atet perra shonte' pa'namen acheñenesha' ñaña atetcha' perra pa'namen anetso'marnesha' ñaña atetcha' perra pa'namen mereñtsoreçhno ñeñt eñosyets po'poñe'ttsocma ñoñtso ñaña atetcha' perra pa'namen añcha'tareteçhno.

11

Atto epsheña ñeñt pueyochresha' pen Paretspa' ñetcha'ña eñerrtset Yomporcop

¹ Allempoña napa' apnet tepapets ñeñt atarr allpocha' p e'ñe atet ñerra'm carrots. Ñaña allpa' atet otnet:

—Te'pa' o'ch ahuep' o'ch petpueññaña' Yompor pa'paquell allo, ñaña altar ñeñt' allo'tsen. Ñaña o'ch pe'ñotena' errosheña' ñeñt' ma'yochetsa all.

²Tarraña amach petpam̄psatscheña ñeñt' a'yote'tsa'yen cha'petot. Tarro'mar all ñetpa' aparettetcha' po'poñ acheñ ñeñt' ama ame'ñetso. Ñetña'pa' a'mama'terretcha' all anetso ñeñt' anaret' Partsocop. Pa'tatsoch çharrama puechena epña arrorr allponmatcha' a'sosyateñet all ñeñt' anarettetsa Partsocop.

³Ñaña allempopa' o'ch nemñe epsheña ñeñt' neyochresha' nepen. Nach ahuamencat' pahuet attoch a'potet ñeñt'cha' atet perra esempohuañen. Mil doscientos sesenta yet allponmatcha' serrpare'tennanet neñoñ. Puellquëñoñet chorretcha' pa'shtamashe'm. Arrpa' allohua ñeñt' atet otnet all Yompor pue'ntaño.

⁴Ñehua, añ epsheño'mar ñeñt'cha' eñerrets Yomporecop ñetpa' atma'ntatareñtenet epcha olivoch ñaña epa all orratenet huerare ñeñt' e'ñe tomçhets all Yomprosho, ñeñt'ara Yompor ñeñt' pomnaren p'ohuene' allohuen acheñenesha' arr patsro.

⁵Ñaña añ epsheña ñeñt'cha' eñerrets Yomporecop, ñerra'm ama't esesha ñeñt' muenene' o'ch erroñ pet añ epsheña, ñetña'pa' puenamo'tpa' o'ch çha'nmatet tso' huorte' ñeñt'cha' e'nue' ñeñt' e'moñe'tenahuet. Ñeñto'mar yeñoteñ ñerra'm esesha' e'moñe'tenahuet, ñetña'pa' e'ñech rromhuet poctacma.

⁶Ñaña añ epsheña ñeñt'cha' eñerrets Yomporecop, ñetpa' atarrcha' ahuamencatet. E'ñe ñet po'huamencot' epatare'teñet o' entoñ attotcha' ama huateno e'ñech allponmat' eñorenent Yomporecop. Ñaña e'ñe ñet po'huamencot' oñña'pa' o'ch a'pnaseret errasats. Ñaña e'ñe ñet po'huamencotet o'ch çhapterret añ arr patsro pa'namen ñeñt'cha' amtsañterrtsa. Ama't esempo allempo atet muenenet ñet, allempocmach atet pet.

⁷Tarraña ñerra'm esempo e'ñe e'nuet ñeñt'cha' allpon eñoret arr patsro, allempoña'pa' o'ch çha'nom ñaña ñeñt' berrma'ttetsa ñeñt' atarr bellac. Arro'tcha' çha'nom arrotot' ñeñt' atarr o'pononet arrototena pats. O'chña çha'nompa' o'ch quellarosan añ ñeñt' epsheña ñeñt'cha' eñerrets Yomporecop. Ñeñt' berrma'ttetsa ñachña ganatsa o'ch muetsan añ ñeñt' epsheña.

⁸⁻⁹Añña epsheña ñeñt' amtsare'tpa' attach o'shshe'muet toño allecma chopeñe'chen allohuen acheñenesha'. E'ñe ma'pamuet ñaña po'poñ pueshmet yet allach o'shshe'muena all atarr anetso, ñeñt'ara anetser Jerusalén all corso'tam̄pset Yepartseshar Jesucristo ahuañ. Ñeñña anetserpa' ñato' o'ch netma'ntacha ñerra'mrate' ñeñt' atet pete't anetso Sodoma ñaña anetso Egipto. Añña epsheña ñeñt' amtsare't attach o'shshe'muet all amach esesha' muenateto o'ch pampuet. Allña'pa' allcha' huachena shonte' pa'namen acheñenesha' ñeñt'cha' cohuanrrortene', shonte' pa'namen mereñtsoreçhno ñeñt' eñosyets po'poñe'ttsoçma ñoñtso. Shonte' pa'namen anetsoçhno allot huachena.

¹⁰Acheñenesha' ñeñt' yeçha'yetsa erraparen arr patsro ñetña'pa' o'ch coshame'tam̄pesyet añ epsheña arromñañ. Atarrcha' nanac cosherret. Pochesheshoñetña ñetpa' o'ch es apanna'tyeset e'ñe atña. Ñetpa' añecopcha'ña atarr coshenet tarro'mar o' rroma añ epsheña ñeñt' atsrre'moçhen entenet ñeñt' yore'tatenahuet po'chñaret e'ñe pueserrpare'teñoñet Yompor po'ñoñ.

¹¹Allempoña o'ch met ma'pamuet ñaña po'poñ pueshmet yet, añña ñeñt' epsheña machayotepa'tcha' alla tanterret tarro'mar Yomporña alla tantaterre'. Allohuen acheñenesha' ñeñt' cohuanrrortene'pa' atarrep'a'tcha' nanac yorenent.

¹²Allempoña tanterret epsheño'maret, e'muet ñoñets ñeñt' e'morrtetsa atarr huomenc' entoñ. Ñoñetsña'pa' atet otenanet:

—Sa'tap arr ento.

Ñetña'pa' o'cho' a'tapuet, ospa' ñeñt'ña anmahuet ento.

¹³ Cohuanrrortets ñeñt e'moñe'tenahuetpa' e'ñe allempocmaña pella pats huomenc. Allña anetsopa' shonte' matna't pocoll, allpon otenet la décima parte. Ñaña cancherr mil acheñenesha' ñeñt allpon colla'huatsa. Ñeñña allpon queshpatsapa' atarr yorenec. Pueyorñotetpa' e'ñe allempocma amcha'na'tpo' eñchet Yompor ñeñt pue'ntaño'tsen. Allñapa' cohuentatoñet.

¹⁴ Allempopa' o' metuaña ñeñt puepañ ñeñt allcatañtetsa, tarraña señoche'ch pall-tena po'poñ paterr ñeñtcha' tecma allcatañtatsa ñeñtcha' puema'pañ.

Allempoch poctora'huerr mellañoñeñ e'ñe allohuanen allempochña amcha'taretetuerra Yompor arr patsro

¹⁵ Allempoña po'psheñeñ mellañoñeñ ñeñt po'canchrrroñpa' o' poctorerrerr ñaña. Poctora'huerrtserrpa' entoñapa' atarr huomenc e'morrterrerr ñeñt eñoretsa all ento. Ñeñtpa' atet otenet:

Ñeñt allpon amcha'taretetyetsa arr patsro te'ñapa' o'huañcha' allo'na amcha'taretetnenet tarro'mar ñeñt atto amcha'taretetyenetpa' ñeñtpa' allochña amcha'taretterra Yompor epuet ñaña Puechemer ñeñt Cristo. Ñeñtcha' atto amcha'taretterra Yomporpa' ñeñtpa' amach ahuañañañterro ama't errponaña.

¹⁶ Allempoña añ ñeñt epoch charrasheña ñeñt puechetsa pa'tats ñeñt anorrchets all e'ñe ñet po'conañeto allot sherbeñet Yompor all pue'ntaño, ñetñapa' rrema'rrartenet Yomporeshonet atet ma'yocheñet Yompor.

¹⁷ Ñetñapa' atet otenet:

Pa Yompor ñeñtep atarr nanac Partsop ñeñtep Yepartseshar yepenep, ñeñtep chocma eñallep ama't ahuañtoñeñ ñaña ñeñtepcha' alla huerrtserr po'pocheño añe patsro, yañapa' atarr yeparasyoso'tenep tarro'mar te'pa' o'ch alla po'patterra pa'pehuamenc attotcha' o'ch alla atarr pa'mcha'taretterra.

¹⁸ Shonte' pa'namen acheñenesha', pa'namen anets allo'tsa'yenet, ñet pa'tsrre'mueñoñetpa' e'ñe e'moñe'tuenpet, tarraña te'pa' o' chap allempoch pecoñchatuerranet. Ñaña te'pa' o' chap allempo onañchareñ añecop ñeñt colla'huetsa ahuañtoñeñ allempoch peñotatuerranet ñeñt atet pa'yesete't. Añña ñeñt torra'yestse't atto a'mtonapete't peñoñ ñeñt e'ñe peyochresha' pepe't, te'ñapa' o' chap allempoch petsa'tuerranet. Ama't allohuen ñeñt pame'ñaye't pa' ama't ñeñt atarr asherben entyesete't ñaña ñeñt ama asherben entete'te, te'ñapa' o' chap allempoch petsa'tuerranet allohuenet ñeñt pame'ñenaya pa'. Ñaña te'pa' o' chap allempoch e'ñe pa'chencatuer allohuen ñeñt a'chencatañtetsa añe patsro.

¹⁹ Allempoña añ Yompor pa'paquell ñeñt ento'tsenpa' e'ñe cohuen atorare'ttena. O'ponoña all nentoñ Yompor po'tsapot all chocma añño'tenet ñeñt aquellcareñ ñeñt a'pocpat Yompor yocop. Allñapa' meratstena, tatsllaren ma'moreten huomenc, pellena pats ñaña atet huechen huomenc.

12

Atto Juanpa' entan puesheñarr coyanesha' ñeñt emaret, pue'maretollpa' ñeñtara Cristo, añañañapa' mueneñeñ o'ch añañpes pue'maretoll

¹ Allempoña all pue'ntaño'pa' all orrtena ñeñt ama't ahuaña ama't puesheñarroñeyapa' ama yentare. Ñeñtpa' ñeñtcha'ña yeñotaterre' ñeñtcha' atet perra esempohuañen. Allñapa' all orrtena puesheñarr coyanesha'; añ po'cashe'm pen atsne'. Pa'rrpoñapa' allo'tsen ñaña arorr. Poñoñña' echoyo'met. Po'choyo'mopa' all orrtena charra' ranto puechena epa.

² Ñeñña coyanesharpa' a'chomen, o' chen allempoch eñalletatan pue'mar. Atto atsotena pue'marpa' cha rranare'tena, atarr allpatateñ pue'mar.

³ Allempoña all pue'ntaño all orrtena po'poñ ñaña ñeñt ama't ahuaŧapa' ama yentare. Ñeñtpa' añ orrtetsa añañ ñeñt atarr añcha'nochen. Ñeñt añañpa' atarr añecmuen ñaña atarr tsama't orrtena. Poñpa' cancherrmaga. Cancherrmago'mar poñpa' e'ñe echoyo'metareroche'. Ñaña po'ucorpa' allo'tsen čharra'.

⁴ Pa'sme'll ñeñt chetare'tnen alloña tarra'huanenanña shonte' rantočhno e'ñe a'shore'tuaneñ patso. Ñeñt allpon ranto ñeñt ento'tsen, allpon a'shore'tuaret ñeñt otenet la tercera parte. Ñeñtña añañpa' alla tomos e'ñe coyaneshesho ñeñt atsotenaya pue'mar all cohueñ ñerra'm o'ch eñalletatan pue'marpa' ñach añañpse'.

⁵ Allempoña coyanesha'pa' o' eñalletatan pue'mar ñeñtpa' asheñorr. Allempo eñalletua ñeñt asheñorrofolpa' e'ñe allempocma a'tapachet Yompor po'conaño tarro'mar ñapa' ñach anaretterrtsa ñeñtcha' añcha'taretterrtsa allohuen pa'namen acheñeneshacop. E'ñech po'yoročhenñot añcha'taretterranet, atet ñerra'mrrate' ñapa' a'sreperet o'ch añcha'nochtana'terranet.

⁶ Allempoña coyanesha'pa' allorocma o' yeta o' čhap allaŧar all amarato. Allña Yomporpa' e'ñe cohuen añño'tatoñ allcha' cohuañpeñet allcha' rrateñet allponmat yet ñeñt otenet mil doscientos sesenta yet.

Atto quellarenet Yompor pue'ntaño

⁷ Allempoña quellarenet Yompor pue'ntaño. Ñeñt pa'mcha'tareter pen allohuen ñeñt e'ñe cohuen mellañoñeñnesha'pa' añ pa'so'cheñ Miguel.

⁸⁻⁹ Miguelñapa' all quellara po'mllañoñeñnesharohuen. Quellareñet añañ, añaññapa' o' quellara ñaña pueyochreshohuen. Miguelpa' chetanna'tet parro epuet añañ all Yompor pue'ntaño. Ñehua, ñeñt pueyochresha' pen añañ ñeñtpa'cho'ña mellañoñeñnesha' tarraña ñeñt mellañoñeñnerpa' ama cohuenayaye. Tarraña añañ atto quellaran Miguelpa' ñapa' ama gano. Ñeñto'marña añañpa' huapore'chet entot pueyochreshohuen a'shoraretterret patso. Attoña ahuaapore'tareñaña añañ ama't atarr nanac añcha'nočheneñ. Ñehua, añañpa' ñeñt shecheŧ ahuaŧoteñ ñeñtara yoten oneñet ñaña ñeñt otenet Satanás ñeñt atarr ashcañtetsa ora erraŧaren aña patsro.

¹⁰ Allempoña napa' o' alla ne'muerrerr po'poñ ñoñets ñeñt atarr e'morrtetsa huomenc all Yompor pue'ntaño. Ñeñt ñoñetspa' atet oten:

—Te'ñapa' po'ñočh o' čhap allempoch qeshpa'huerra allohuen acheñenesha' ñeñt pueyochresha' pen Yompor, tarro'mar o'ch alla o'paterrana po'huamenc e'ñe poc-tacma o'ch alla añcha'tareterra ñapueŧ epuet Puechemer ñeñt Cristo ñeñt nen ña ñeñtcha' añcha'tarettapretenaya. Añ oneñet ñeñt čhocma atta toma'tamŧesyene' masheñneshačhno all Yomporesho yeto ama't ñaña tsapome'tets ñeñtña'pa' o' ahua-pore'tareta.

¹¹ Ñeñt masheñneshačhnor ñeñt ame'ñenaya Yompor, ñetña'pa' o' e'ñe a'mchechueret oneñet ñeñt toma'tamŧesyenahuet e'ñe atta. Añ a'mchechatterre' ñeñt atto Cristo rroma, ashatareŧta po'rras ñeñt toma'ntenaya Carrnero ñeñt muetsete't ochñartsocop. Ñaña añ a'mchechatterre' ñeñt atto masheñneshačhno čhocma eñosyenet e'ñe cohuen ñeñt atet pena Cristo po'cohuenña. Ama't amueročhtatareŧetyenetpa' ñetpa' ama quečhpueñeto atto eñosyenet e'ñe cohuen Cristocop, tarro'mar ñetpa' ama mecha'teneto ama't mame-sha o'ch romuet e'ñe pame'ñeñotet Cristo.

¹² Atarr cosheñets Yompor pue'ntaño allohuenacop ñeñt allo'tsa'yen. Tarraña atarr llequēñets allohuenacop ñeñt yeča'yetsa aña patsro ama't ñaña ñeñt oño'tsa'yen. Tarro'mar oneñetpa' o' sohuañperranet e'ñe pa'tsrre'mueñesha'. Ñapa' eñoteñ e'ñech mameshapa' o'ch alla ahuaapore'tarettererr.

Atto añañpa' attera cotare'tenan coyanesha' ñeñt o' eñalletatuan puechoyor

¹³ Allempoña añ añañ ñeñtara oneñet o' eñota ñapa' o' ahupore'tareña entoñ, ña pa'tsrre'mueñoñpa' o' alla coñare'terranerr coyanesha' ñeñt o' eñalletatuan puechoyor asheñorroñoll.

¹⁴ Tarraña coyanesha'pa' allempo coñare'tererr añañpa' ñeñña coyanesha'pa' o' apet eppa'ya pa'pue' ñeñt atesha' contor pa'pue'. Ñeñtpa' alloch anomamñpsana po'yalloñ ñeñtara añañ o'ch sa'neñ o'ch chap bañchayo all amarato all añañ'teññañet ñocop e'ñe cohuen allcha' cohuanñpeñet. E'ñech ma'pa char ñaña po'poñerrerr puehmet char, ñeñtpa' allponmatcha' rrachet all.

¹⁵ Allempoña añ po'yalloppa' e'ñe puenamoñ cha'nmatan shonte' oñ atet ñerra'mrrate' po'ñes apellchetsa. Ñapa' cha otapañ ñeñtcha' rremuerraya' coyanesha' ñeñt coñare'ten attoch a'ño'shach. Tarraña ñeñtpa' ama attetache.

¹⁶ Ama't patspa' yenpan coyanesha', attoña tara'nom all esha'tañña oñ e'ñe masohua ñeñt allpon cha'nmat po'yalloñ puenamoñ.

¹⁷⁻¹⁸ Ñeñña atarr atrre'mate'ña añañ, ello alla atarr e'moñe'terranerr coyanesha'. Allempoñapa' ahuo' allo'tsa'yen po'potantañ coyanesha' puechoyoresha' o'ch quel-larosamet ñamet. Tarro'mar ñetpa'cho'ña chocma ame'ñeñet Yompor po'ñoñ ñeñt atet anaret ñaña chocma coteññañet Jesucristo poñtañña.

13

Atto Juanpa' entan berrma't ñeñt atarr añcha'nochen ñeñt cha'nets oñoñ

¹ Allempoña napa' nañomos sa'patopño, allña'pa' nenterrerr berrma't atarr añcha'nochen ñeñt cha'nmat oñoñ. Poñpa' cancherrmñaga, po'ucorpa' çharrá'. Pate'tets po'ucorpa' e'ñe echoyo'metoche'. Puenmñaga'ttso all aquellcareñ sochatse'teñets ñeñt pa'namen sosya'tsañ allo achmñare'teñet Yompor.

² Ñeñña berrma't pue'moquër e'ñe atet ñerra'mrrate' ma'yarr tarraña pa'tacñapa' e'ñe atet ñerra'mrrate' orranatec. Puenampa' e'ñe atet ñerra'm ma'ñorenám. Añañña'pa' ñeñt apue' po'huamenc, añ ñaña llesens attoch añcha'noçhtaprecha all po'conaño.

³ Puenmñagarr poñpa' all orrtena cha atserrpena nanac huomenc cha mettaguën ñeñtcha' muetsayeñ tarraña ama rromo alla correrra. Ñeñto'marña allohuen acheñenesha' arr patsro ñetpa' atta cohuanrrorteñet cha otapuetañ ñato' çhach rroma, tarraña ama rromo. Ñeñt atto ama rromopa' acheñenesha'ña arr patsro ñeñña ame'ñatenahuet. Ñetpa' otenapuetañ ñato' ñeñte'ña Parets.

⁴ Ñeñto'marña acheñenesha' ma'yocheneñet ma'yarrma't. Ñetpa' atet otanna'tyeset:

—Ama eñalle po'poñ ñeñt nanac ahuañencat atet ñerra'm añ ma'yarrma't ñeñt yenten. Ama't e'ñe eseshapa' amate' errotent a'mchechachetona añ ñeñt atarr ahuañencat.

Ama't añañpa'cho'ña ñeñt ma'yochena acheñenesha' tarro'mar añañpa' ña ahuañencat pe' ma'yarrma't.

⁵ Añañpa' muenatenan ma'yarrma't o'ch ommo'chatse'tyesa. Pommo'chatse'teñoñpa' o'ch achmñare'tenan Yompor. Ñaña muenatan ma'yarrma't o'ch añcha'tareña pa'tatsoch çharrañña ñaña puechena epña arorr.

⁶ Atet pa' ma'yarrma't achmñare'tenan Yompor, sochatse'teññañ pa'so'cheñ. Ñaña Yompor pa'paquëll ñaña allohuen ñeñt allpon allo'tsa'yen pue'ntaño e'ñe achmñare'tueñ.

⁷ Ñaña muenateñ o'ch quellaran ñeñt pueyochresha' pen Parets. Ñaña muenateñ o'ch ganana Yompor pueyochresha'. Ñaña muenateñ o'ch añcha'tareña allohuena-cop ñeñt pa'namen acheñenesha', allpon ñeñt pa'namen mereñtsor ñeñt e'ñe eñosyets po'poñe'ttsoçma ñoñtso ñeñt ora allpon allemeñ anetso'mar.

⁸ Ora allohuen acheñenesha' ñeñt aña patsro'tsa'yen añach ma'yochenet ma'yarrma't tarro'mar ñeñt acheñenesha'pa' ama aquellcareteyayeto pa'so'cheñ Cristo po'libro all

aquellcarettena allohuen ñeñt corretsetach ñeñt ame'ñenaya Cristo ñeñt amtsarettatsa ochñartsocop atet ñerra'm carrnero. Ahuat allempo errte' ayeçhcataretta pats, Cristoña po'libropa' all aquellcaret so'chñetsochno attochña ñetpa' corretsetach.

⁹ Ñerra'm esesha' e'mñotene' añ ñoñets, çhaponëpa'ch pueyoçhro ñeñt atet yeçhateney añ ñoñets. Ñeñt ñoñetspa' atet oten:

¹⁰ Ñerra'm esesha' rromanatene' po'potantañ attoch yottamñpsatanet, ñetpa'çho'ña ayottamñpsaretterretcha'. Ñaña ñerra'm esesha' muetsanatene' po'potantañ espado, ñetpa'çho'ña amtsaretterretcha' espado. Ñeñto'mar añ ñeñt poçtetsa yocop e'ñe yeyemteño Yompor o'ch ya'huanten acopoteñ ñerra'm es yehuapoya, allohueney ñeñtey o' pueyochresha' perrey Parets.

Atto Juanpa' entan po'poñ berrma't ñeñt çha'nets o'ponot patsof

¹¹ Allempoña na allpa' nenterrerr po'poñ ñeñt berrma'ttetsa. Ñeñtpa' arrot çha'nom o'ponot patsof. Ñeñtña' e'ñe epa po'ucor atet ñerra'm carrnero po'ucor, tarraña ñeñtpa' atarr amçha'noçhen eñen e'ñe atet eñen ñerra'mrrate' añañ eñoretsa.

¹²⁻¹³ Ñapa'çho'ña atarr amçha'taretta e'ñe atet amçha'tarettena ma'yarrma't ñeñt ñanom nent ñeñt çha'nmats oño. Allña' amçha'tarettapretenana ñeñt ma'yarrma'ttetsa all. Ñeñt çha'nmats o'ponot patsof ñeñtña' muenatenan allohuen acheñenesha' ñeñt aña patsro'tsa'yen o'ch ma'yochyet ñeñt ma'yarrma't. Ñeñfara ma'yarrma't ñeñt corrrrtsa e'ñe mamecma allempo mettaguën. Ñeñt atto mettaguën ñeñtcha' muetsayen tarraña ñapa' ama rromo. Añ berrma't ñeñt çha'nmats o'ponot patsofpa' ñerra'm esempo allo'tsen parro epuet ma'yarrma't ñaña' eñall attoch orrtatenan acheñenesacop pa'namen ñeñt ama puentareto ama't ahuata. Attoña a'shoran ento' huorte' tso' ñeñtña' tso' huorte'pa' o' e'ñe çhap patso allña' cohuanrrortatan shonte' acheñenesha'.

¹⁴ Ñeñtña' allo shequënan shonte' acheñenesha' ñeñt aña patsro'tsen. Ñeñto'marña ñerra'm allempo otenan acheñenesha', o'ch seyeçhcat ma'yarrma't, ñetña' e'ñeçh poçte' enteñet. Añ ñeñfara ma'yarrma't ñeñt metto'ten espada tarraña ñapa' e'ñe mamecma o' alla corrrera.

¹⁵ Aña berrma't ñeñt çha'nmats o'ponot patsof ñeñtña' muenateñet o'ch orrrerratan ayeçhcataret ñeñt toma'ntatenet ma'yarrma't. Allochña' attoch eñorana'tanet pueyeçhcatar. Ñaña ma'yarrma'tpa' atet nanet po'ñoñ, ñeñtpa' atet oten: Ñerra'm esesha' ama ma'yochenaye ayeçhcataret muetsanachetepa'ch.

¹⁶⁻¹⁷ Elloña' o'terranerr acheñenesha':

—Te'pa' o'ch seyaco'mita'tyesa sotof secohuenrot amapa' arr seto'mo'mar. Allcha' sena'yeson neso'cheñ amapa' sena'yeson ñeñt nenúmero nepen. Atet pñatan allohuen acheñenesha' ama't ñeñt ama esoshe'mayaye acheñ, ama't ñaña ñeñt atarr sherbets, ama't ñaña acheñ ñeñt atarr eçllayoret, ama't ñaña ñeñt atarr huocchañetets, ama't ñaña acheñ ñeñt e'ñe cohueno'tsen, ama't añ acheñer ñeñt ataruasataret e'ñe atfa. Allohuen acheñenesha' ñeñt ama ayaco'mita'tarete all neññañet ma'yarrma't pa'so'cheñ amapa' ñeñt po'número pen ma'yarrma't, ñetña' amach errotenot es pomueneto ñaña amach errotenot es rañteneto ñeñt muenenet ñet.

¹⁸ Ñehua, ñeñt allpon po'número pen ma'yarrma'tpa' ñeñtpa' allo'tsen seiscientos sesenta seis. Ñeñt número añ toma'tena puesheñarr acheñ pa'so'cheñ ñeñtcha' ñanom orrrerrtsa tsapatonet. Ñerra'm esesha'ch atarr es eñoterrets eñoterrñañetepa'ch pa'so'cheñ ñeñt atma'ntataret añ número.

14

Allempo Juanpa' entan Cristo ñeñt atma'ntataret Carrnero, all ten Siónaño epuet ñaña shonte' acheñenesha'

¹ Allempoña na cohuerrotsanerrpa' alla nentererr Cristo all ten Siónaño. All or- rtena e'ñe atet orrtena ñerra'm Carrnero. All tomchen ñaña shonte' acheñenesha'. Ñeñt acheñenesha'pa' allo'tsen ciento cuarenta cuatro mil acheñenesha' ñeñt emchor- renaya Cristo. Ñeñña acheñenesha'pa' e'ñe ayato'ma'taretoche'. Pueto'muetopa' all na'yeññañet Cristo pa'so'cheñ ñeñt atma'ntataret Carrnero, ñaña Pompor pa'so'cheñ ñeñtara ya Yeyomporer.

² Allña'pa' ne'muen ñeñt huomenc e'morrtetsa, arroñ huena entoñ. Atarr huomenc e'morrtena atet ñerra'm all etsase'tena shonte' oñechno ñeñt atarr huomenc ma'moretets. Po'ma'moreteña'pa' atarr huomenc e'morrtena cha ottena ñerra'm cho tecor-rraren huomenc ñeñt yoten tatsllare'. Ñeñt ma'moretets all añepa't ma'moretets ñeñt shontetsa acheñenesha' all añepa't a'ma'moretenet arpa.

³ Allña'pa' cohuentatenet morreñets ñeñt e'ñe etserra morreñets all Yompor po'conaño. Allo'tsen ñaña pa'tatso'mar ñeñt berrma'ttetsa, ñaña allo'tsa'yen ñeñt sherbene' Yompor ñeñt epoch charra' ñeñt puechetsa pa'tatssheña. Ama't e'ñe puesheñarrapa' ama eseshaye' yechenayeña añ morreñets ñeñt etserra. Añña eñotene' ñeñt ciento cuarenta cuatro mil acheñenesha' ñeñt a'queshpatarettetsa añe patsrot.

⁴ Ñetpa' ama a'sosyateneto atto yorayeñet coyanesha' tarro'mar ñetpa' e'ñe cohuen correnet. Ñetpa' añ e'ñe cohuen coñenet Cristo ñeñt toma'ntenaya Carrnero. All ama't erra muene' sen Cristo, ñetña'pa' e'ñech coña'neñet cohuen. Ñetpa' e'ñe ñanom a'queshpatarettet attoña ñetpa' anarettenet atet ñerra'mrrate' ñeñt ñanom yapueñ Yompor ñeñt atarr cohuen, ñeñtara o'patena ñaña Cristo ñeñt atma'ntataret Carrnero.

⁵ Ama't puesheñarroñetapa' ama shequēneto ama't e'ñe mamesha. Ñetpa' e'ñe cohuen orreyenet amach errotenoñ otteñe'chareñterreto ama't ahuata all Yompor po'conaño.

Allempo Juanpa' enterranerr ma'psheña mellañoñeñ ñeñt eñosyetsnets anoma'matot

⁶ Allempoña napa' alla nentererr po'poñ mellañoñeñ all anoma'mtena allpononeñ enoneñ. Ñapa' ñeñña serrpare'tatenahuet cohuen ñoñets ñeñt ama ahuañaño ñeñt alloch yequeshperra. Añ cohuen ñoñets ñeñtcha' serrpare'tatan allohuen pa'namen acheñenesha' ñeñt yecha'yetsa añe patsro, ama't ora allemeñ pa'namen anetsochno ñeñt pa'namen mereñtsorechno ñeñt eñosyets e'ñe po'poñe'ttsocma ñoñtso.

⁷ Ñeñt atto anoma'mtena all, eñosnen, atarr huomenc e'morrtena, ñeñtpa' atet otnen: —Señcha'na'chepa'ch Yompor, chochña secohuentatoñ tarro'mar te'pa' o' chap allempoch entyesas e'ñe puesheña'ttsos erroñente' sepa'yena. Te'pa' ñachña sema'yocha ñeñt yeñcate' enet ñaña ñeñt yeñcate' pats, ñaña oñechno ama't alloñ potayen oñ.

⁸ Allempoña'pa' alla coña'nererr po'poñ mellañoñeñ ñeñt puepañ mellañoñeñ. Ñapa'cho'ña eñosnerrerr, ñeñña'pa' atet otnom:

—Te'pa' o' ahupore'tareña añ anets ñeñt atma'ntataret Babilonia ñeñt nanac atarr anets. Tarro'mar ñeñtpa' añ yechatyenan ora allpon po'poñechno anetsochno ñeñt atarr sosya'tsañechno ñeñt atet muenatse'tatyenanet ñet po'chets.

⁹ Allempoña'pa' alla coña'huererr po'poñ mellañoñeñ ñeñt puema'pañ. Ñapa'cho'ña eñosnerrerr, po'ñoñpa' atarr huomenc e'morrtena, ñeñña'pa' atet otnerrerr:

—Ñerra'm esesha' ma'yochenaya ma'yarrma't amapa' ayeñcataret ñeñt toma'ntenaya ma'yarrma't, amapa' ñerra'm esesha' muenatenet o'ch yaco'mña'chet ma'yarrma't pueyotsaparo amapa' pueto'mo ayato'ma'tareña,

¹⁰ ñetña'pa' a'coñchataretterretcha', tarro'mar Yomporña e'ñe po'yoroñenñoñpa' ñachña e'ñe coñchatuerrahuet e'ñe poctacma. Tso'pa' ñeñtcha'ña mueroñtatuerrahuet

ñaña ñeñt epuet huorten tso'pa' ñeñtpa' atarr shemasher ñeñt otenet azufre. Allcha' a'coñchatareñterret, allotcha'ña cohueretña allohuen mellañoñeñnaneshachno ñeñt pueyochresha' pen Parets. Cohueretcha' ñaña Cristo ñeñt atma'ntataret Carrnero.

11 Attoch achamareñterret, tso'ñapa' chepoten pamosoñ enonet ñeñtñapa' amach ahuañañañterro ama't errponaña. Amach huañerro ama't mamesha ñeñt atto a'coñchatareñtenet ama't yeto ama't ñaña tsapo. Tarro'mar ñetpa' aña ma'yochenet ma'yarrma't ñaña ayeñchataret ñeñt toma'ntenaya ña. Ñaña muenateñet acheñ o'ch yaco'mta'chet o'ch noñet pa'co'meto ma'yarrma't pa'so'cheñ amapa' pueto'mo. Arrpa' allohua ñeñt atet ot mellañoñeñ ñeñt anoma'mtetsa eno'mar.

12 Ñeñto'marña allohueney ñeñtey e'ñe pueyochresha' peney Parets ñeñtey ame'ñenaya Yompor po'ñoñ ñeñt atet oteney ñeñtey e'ñe yemtenaya Jesús, yocopñapa' añ poctetsa o'ch ya'huanta'huen e'ñe acoña ñeñt allpon pa'namen es yehuenoya.

13 Allempoña na allpa' ne'muerrerr ñoñets arroñ huena entoñ, ñeñtpa' atet oten:

—Te'pa' o'ch pequellca' añ ñoñets: “Te'ñapa' atarrcha' cosheñtso'tsa'yen allohuen ñeñtcha' rromayets e'ñe pame'ñeñoñet Yepartseshar Jesucristo.” Po'ñoñ atet oten Yompor Puecamquëñ, ñetpa' amesatareñterretcha'. Te'pa' amach alla torrerrete'te tarro'mar ñeñt allpon o' torra'yenet añ patsro, ñeñtpa' e'ñe eñotuareñ all Yompor pue'ntaño.

Attoch çherr ñeñteño allempoch apçherret narmets ñeñt o' pomella'huen

14 Allempoña na cohuerrtsanerrpa' nenterrerr os atarr huallama't. Ñeñtña ospa' all anen puesheñarr ñeñtpa' añepa't Jesús ñeñtara Ñeñt Acheñetosets arr patsro. Ñeñtñapa' echoyo'met, ñeñtña po'choyo'mpa' oro ñeñt choyo'mtena. Pototñapa' orrenan cochell ñeñt atore'gorroñ ñeñt atarr nanac etsotañ ñeñt otenet hoz.

15 Allempoña Yompor pa'paclo'tpa' cha'nom po'psheñeñ mellañoñeñ. Ñaña'pa' otosan ñeñt anets oso. Po'ñoññapa' atarr huomenc e'morrtena, ñeñtpa' atet otenan ñeñt anets oso:

—Pamat pöcchello ñeñt pomellets allochñapa' o'ch pa'yapa'che' tarro'mar o' çhap ñeñteño allempo yapçhen ñeñt o' pomella'hua yenareñ.

16 Allempoña ñeñt anets oso, ñaña'pa' o'cho' amatan ñeñt o' pomella'huen ora eraparen añe patsro. Ñaña'pa' o' a'yapa'chan allemateñ ñeñt pomellets añe patsro.

17 Allempoña cha'nerrerr po'psheñeñ mellañoñeñ Yompor pa'paclo't ñeñt ento'tsen. Ñapa'cho'ña orrenan po'cchell ñeñt atarr nanac etsotañ.

18 Allempoñapa' cha'nerrerr po'psheñeñ mellañoñeñ. Ñapa' arroñ huapa allo'tsen altar. Ñaña'pa' ñeñt ahuamencattetsa attoch pomnaren penan tso'. Ñaña'pa' otan ñeñt occhellet. Po'ñoññapa' atarr huomenc e'morrtena, ñeñtpa' atet oten:

—Te'pa' o'ch pmat pöcchello ñeñt atarr nanac etsotañ o'ch papçha' allo puechmā'tets uva ñeñt añe patsro'tsen tarro'mar o' atarr nanac yen.

19 Ñeñtña mellañoñeñ atet oteñetpa' atetcho' pa. Allempoña amatan po'cchello uva ñeñt añe patsro'tsen o'cho' a'yapa'chach. A'yapa'chatuepa' o' shontanña uva allcha' atmama'chet attoch cha'nmatoñet po'ñer. Ñeñtñapa' añ toma'tena atto Yompor po'yoro'chenño'tpa' atarrcha' coñchaterran acheñenesha'.

20 All atmama'teñet uva, pocollo'tpa' tama a'yente'tsen. Ñeñt atto cha'nen uva po'ñer ñeñtpa' añ toma'tena o'ch chorrerr errasats arr patsro a'yohuen ñeñt allohuanen trescientos kilómetros ñaña enonet çhapcha' e'ñe cahuall po'frenohua ñeñt çhets e'ñe yelleca'nohua.

15

Allempo Juanpa' enterranerr cancherrsheña mellañoñeñ, ñetpa' o'ch orrtaterret ñeñcha' amuerochtatañterrtsa

¹ Allempoña all ento napa' o' nenterrerr po'poñ ñeñ atarr yorochen ñeñ ama yentare ñeñcha' yeñotaterre' ñeñcha' atet perra esempo. Nenterrerr mellañoñeñnesha' cancherrsheña. Ñetña' allsensarettenet attoch orrtaterret ñeñcha' amuerochtatañterrtsa. Puesheña'ttsetpa' orrtaterretcha' ñeñcha' amuerochtatañterrtsa e'ñe po'poñe'ttsocma cancherrsheño'maret. Allempochña etsotuerra allohuen ñeñcha' atto Yomporpa' yorochtater.

² Allña napa' nenterrerr ñeñ atet orrtetsa erracmañen atet ñerra'mrrate' ñeñ añecmuen rerpat e'ñe atet huorten atet ñerra'm tso' huortets all. Allña' all tomchen allohuen acheñenesha' ñeñ e'ñe metana'tue' ora allpon ñeñ atet topatyenanet ma'yarrma't ñaña ñeñ pueyeçhcatar. Ñetpa' ama ayato'ma'tareteyayeto ma'yarrma't pueyotsaparo attoch noñet pa'so'cheñ amapa' ñaña po'número. All tomchenet e'ñe arpatochet ñeñtpa' Yompor apuenahuet.

³ Ñetña puenñtana'tueñoñet allohuen topateñets morrechenet Moisés pueomorreo ñeñ Moisés ñeñ atarr torratse't Yomporecop. Pa'queshpataretteñoñet morrechenet ñaña Cristo pueomorreo ñeñ toma'ntenaya Carrnero. Ñeñtpa' atet açhoteñet Yompor: Yompore, ñeñteþ nanac Partsoþ þa ñeñteþ Yepartseshar yepen, atarr echarr es petso-tatyen, atarr coçhnesha' es peþa'yen. Pa ñeñteþ Pa'mcha'tareter pen allohuen pa'namen acheñenesha' ñeñteþ e'ñe pocte' es peþa'yen. Ñaña e'ñe po'ñoçh atet ñeñ allpon es þotyen.

⁴ Allohuen acheñenesha' e'ñe añcha'na'tpo' entenpet, Yompore. Ama't puesheñarrapa' ama eñalle ñeñ ama añcha'na'tpahuoye' pentenaye, Yompore. Allohuen acheñenesha'pa' e'ñe þapta cohuentatennapet, tarro'mar e'ñe þapta þa ñeñteþ atarr Partsoþ. Tarro'mar allohuen acheñenesha' ñeñ pa'namen anetsot huaçha'tetcha' pesho attoch ma'yochapet þa e'ñe þapuet tarro'mar ñetpa' o' taya çapanet pueyoçhro atto þapa' e'ñe cohuen pocte' es peþa'yen.

⁵ Allempoña napa' cohuerrtsanerr nenterrñañerr Yompor pa'paquell ñeñ pue'ntaño'tsen. Ñeñña pocoll popellrrarpa' e'ñe cohuen atorare't. O'ponoñapa' allo'tsen all año'tenet mapuettall ñeñ allo aquellcare't Yompor po'ñoñ ñeñ atet anare't ama't ahuatoñeñ.

⁶ O'ponoña Yompor pa'pacloþpa' çha'nmaçherrerr ñeñ cancherrsheña mellañoñeñnesha'. Puesheña'ttset orrtaterretcha' ñeñcha' amuerochtatañterrtsa e'ñe po'poñe'ttsocma cancherrsheño'maret. Añ chorra'yenet ñeñ atarr nanac cohuen ñeñ otenet lino ñeñ ama asosyatño ama't e'ñe mamesha. E'ñe cohuen poþtama'tyena. Achanaretareret, po'chanaretpa' orotommuenare' ñeñ allo chana'yenet puesomapo.

⁷ Allempoña añ ñeñ pa'tatso'mar berrma't, paterrña'apa' apa'yesan mellañoñeñnesha' cancherrsheño'mar pajo'. Apa'yesanet puesheña'ttset po'pajo' ñeñ orotaten. Ñeñña pajo'pa' all e'chorrayesare't alloch coñchatterran Yompor pa'namen acheñenesha' ñeñ añe patsro'tsen, ñeñtara Yompor ñeñ ama arromñañeshayaye ama't errponaña ama't ahuata.

⁸ Allña Yompor pa'paclo e'ñe chorren amos. Ñeñña amospa' añepa't ottetsa Yompor po'cohuenña ñaña po'partsoña. Allña' ama't puesheñarrapa' ama muenateñeto o'ch be'toset all Yompor pa'paclo tarrempohuach esempoçh orrtatan ñeñ cancherrsheña mellañoñeñnesha' mueroçhteñets. Allempochña be'tosçherret all Yompor pa'paclo.

16

Allempo Juanpa' enterranerr cancherrsheña mellañoñeñ ñeññ echene' po'pajotollesha' all na'yenet ñeññcha' amuerochtatañterrsa pa'namenot

¹ Allempoña napa' alla ne'muerrerr ñoñets ñeññ e'morrtetsa huomenc Yompor pa'paclo. Ñeññña ñoñetspa' atet otenan mellañoñeñnesha' ñeññ cancherrsheña, atet otenanet:

—Te'pa' o'ch sahanma allcha' seyo'panat errañaren patso ñeññ sena'yen sepa-jotollesho ñeññ canchrro'mar attoch sorrtaoñ Yompor po'yoroñenña.

² Allempoña puesheñarr ñanom mellañoñeñpa' o'cho' ahuo'. Allñapa' yo'posan ñeññ po'pajotollo'tsen patso. Allempo chap patsopa' ñeñññapa' orrtatan puetsarñats ñeññ ama amapoçhatatañe ñeññpa' ama eñalle pa'par alloch partet attoch metuerranet. Ñeññpa' aña a'ptsarsat ñeññ ayato'ma'tarefetyetsa ma'yarrma't pueyotsaparo ñaña ñeññ ma'yochenaya ayeçhcataret ñeññ toma'ntatenet ma'yarrma't.

³ Allempoña po'psheñeñ ñeññ puepañ mellañoñeñpa' o'cho' ahuererr o'ch yo'puenana' oño ñeññ po'pajotollo'tsen. Allempo yo'pos oño all atarr sa'po, oññapa' cha errassastach, e'ñe atet orrta ñerra'mrrate' arromñañ po'rras. Ñeñññapa' e'ñe a'cllatuosan allohuen ñeññ allpon yeçhetsa all oño'mar.

⁴ Allempoña ñeññ puema'pañ mellañoñeñpa' o' ahuererr ñaña o'ch yo'puenana' ontapo ñeññ po'pajotollo'tsen ñaña allot potayen oñ. Ñeññña allempo ayo'paretta oño cha a'pnasatosan oñ errasats.

⁵ Allempoña napa' ne'muen ñeññ atet otenan mellañoñeñ Yompor. Ñehua, ñeññña mellañoñeñpa' atarr ahuaencat attoch pomnaren penan ora allohuen oñeçhno. Ñeññña mellañoñeñpa' atet otenan Yompor:

—E'ñe pocte' Nompore ñeññ atet pecoñchatyenanet, pa ñeññeñ çhocma eñalleñ ama't ahuatoteñpa' ñeññeñ atarr nanac Partsoñ.

⁶ Tarro'mar acheñenesha' ñeññ pe'moñe'tene'pa' çhocma muetsanatennapet ñeññ peyochresha' pepen ñaña ñeññ a'mña'yene' peñoñ, çhocma shatyeññañet po'rras. Te'ña papa' o' pñonerranet errasats. Ñeññpa' e'ñe pocte' tarro'mar ñetpa' añ o' pñohuet ñeññ ama pocteye' penteno pa.

⁷ Allempoña e'morrterrerr ñoñets arr e'morrta altarot, ñeñññapa' atet oten:

—Attesha' Yompore, pa ñeññeñ atarr nanac Partsoñ ñeññeñ Yepartseshar yepen. Ñeññ atto pentyenanet ñeññpa' e'ñe po'ñoçh atet, e'ñe pocte' ñeññ atet o' pecoñchaterranet.

⁸ Allempoña po'psheñeñ mellañoñeñ ñeññ puepa'tatseñ o' yo'puerranerr ñeññ po'pajotollo'tsen. E'ñe arr yo'pue' allo'tsen ñeññ yeçhoyo'tam'pene'. Ñeññcha' ahuaencat pe' atsne' attoch chemuerran acheñenesha' atet ñerra'm tso'.

⁹ Acheñenesha' ama't atarr etomuenanetañña atsne'pa' tarraña ama es queçhpuenayeña ñeññ atet correnet sosya'tsañeçhno. Ama eseshaye' cotape'cherraye cohuen Yomporecop attoch cohuentateññañet Yompor. Elloña ñetñapa' atarr nanac achmñare'teññañet Yompor pa'so'cheñ ama't ñeññ atarr ahuaencattetsa atto çchapanet ñeññcha' mueroçhtaterrahuet.

¹⁰ Allempoña po'psheñeñ mellañoñeñ ñeññ pa'mnareñ, ñapa'cho'ña o' yo'puerranerr ñeññ po'pajotollo'tsen. E'ñe arr yo'pue' ma'yarrma't po'conaño all amñcha'tarettena. Ñeññña all amñcha'tarettena' cha a'cheçmetue. Acheñenesha'ña allpa' epaye' mueroçhtatanet pa'namen atserrpeñets. Ñeññ atserrpeñetspa' cha muellatstame'tatyesanet, açhañeñe'chatyesanet atserr.

¹¹ Tarraña ñetpa' ama't atet o' aparettetañpa' ama queçhpuenetoña ñeññ atet patse'tyenet sosya'tsañeçhno. Elloña ñetpa' allo'na achmñare'tneñet Yompor ñeññ ento'tsen ñeññ atto atserrpenanet puetsarñats.

12 Allempoña ñeñt po'pechapueñ mellañoñeñ, ñapa'cho'ña o' yo'puerranerr ñeñt po'pajotollo'tsen. Arr yo'pue' po'ñeso ñeñt añecmuen atarres ñeñt po'ñes añ pa'so'cheñ Eufrates. Yo'pose'pa' cha emasa'huosanña po'ñes ama't atarr añecmuen. Ñeñtña allot ma-sohuapa' ñeñtña toñeterrets ñeñtña pa'teḡ perret allcha' oñem añcha'taretečno ñeñtcha' hua'cha'ttsa allot huena atsne'.

13 Allempoña napa' nenterrerr añyañ epuet ma'yarrma't epuet ñaña ñeñt a'mtene' ma'yarrma't po'ñoñ añe patsro tarraña ñeñtpa' ashcaña. Ñetña e'ñe puenamotetpa' cha'nmatyeset puesheña'tets oneñeñ ñeñt ama mapocho. Ñeñt oneñeñpa' ma'psheña. Ñetña' e'ñe atet orreyenet ñerra'mrrate' rrehuancro.

14-16 Tarraña ñeñtpa' oneñeñca'ye ñeñtcha' orrtaterre' ñeñt ama puentare allohuen acheñenesha' ñeñtcha' cohuanrrortaterrahuet. Ñetpa' o'ch chopeñe'chyerret erracmañen attoch apcheret allohuen ñeñt añcha'taretetyetsa añe patsro. Allochña'pa' attoch quellareret Yompor ñeñt atarr ahuamencat, attoch quellaret allempoch cherr ponañcho ñeñte yetroch yoroçhtater Yompor. Allohuen añcha'taretnesha' ñeñtcha' quellareret Yompor, arrcha' apçhataretterret anets ñeñt pa'so'cheñ Armagedón, allotcha' quellareret Yompor. Añ Armagedónpa' ñeñtpa' hebreonesha' sochene' añ ñeñt anetser. Ñehua, o'ch neyerpatasa ñeñt atet ote't Yepartseshar Jesús, ñapa' atet ote't: "Señoche'pa'ch napa' e'ñech machayo'ta nohuerra atet ñerra'mrrate' eñeñ amach esesha' eñotenaye esempoch huapa. Tarraña atarr cosheñtso'tsa'yen ñeñt chocma neñose'rtenaya ñeñto'marña ñetpa' e'ñe cohuen añño'tenet pa'shtam ñeñtcha' chorra'nmuert allochña'pa' amach muelle'mco'ta cha'nmueto amach cha apencoçhterreto."

17 Allempoña po'psheñeñ mellañoñeñ ñeñt pocançhroñ, ñapa'cho'ña o' yo'puerranerr ñeñt po'pajotollo'tsen. E'ñe arr yo'pue' mörresho. Allempocma e'morrta ñoñets ñeñt huetsa Yompor po'conañoñ ñeñt pa'paclo'tsen all pue'ntaño. Ñeñtña ñoñetspa' atarr huomenc e'morrtena, ñeñtpa' atet oten:

—Te'ña po'ñoçhpa' o' etsotuerra, huañerrcha' ñeñt ahua'toteñ.

18 Allempoña'pa' meramerta o' tatsllares, e'morrta ñaña ñeñt ma'moretets, atarr huomenc e'morrtena. Puetalle'cha ñaña pats nanac huomenc ñeñt ama't ahua'tapa' ama atet pueḡaro allempoteñ e'ñe pa'motroteñ eñalleta acheñenesha' arr patsro.

19 Añ ñeñt atarr anets ñeñt atma'ntataret anets Babiloniapa' ñeñtña anetserpa' o' rrara'pes ma'psheñta. Ama't ora allpon pa'namen anetsoçhno añe patsro all shonta'yena pa'namen acheñenesha', ñetpa'cho'ña e'ñe ñegatañpesuahuet. Yomporpa' añcha' yerpaterranet ñeñt allohuen allpon patse'tyenet ñeñt atarr sosya'tsañ all atarr anetso ñeñt atma'ntataret Babilonia. Ñeñt allpon allohuen allo'tsa'yenet e'ñe coñchatuerranet Yompor, o' e'ñe tsa'tatuerranet po'yoroçhenño.

20 Allempoña ama't ñeñt rroçhpe'chañečno ñaña aspentečno o' e'ñe chenca'huerra.

21 Shora'nom ñaña entot hue' ñeñt atarr añecmuesheñ ateshamerr. Pate'tetspa' eñerrtena cuarenta kilo. Ñeñtña e'ñe a'tpetse'tuose' allohuen acheñenesha'. Allempoña ñetpa' atarr achmāre'teñet Yompor tarro'mar o' coñchaterranet atarr huomenc.

17

Attoch a'coñchataretterra coyanesha' ecañoresha' ñeñt toma'ntenaya anets Babilonia all ama esesha' yerpa'penayo Yompor

1 Allempoña mellañoñeñ ñeñt cançherrsheña ñeñt echyene' po'pajotollesha', puesheñarrña'pa' o' huapa. Huapa neshopa' otosen:

—Te'pa' o'ch pōcta'n o'ch negatenḡa' allcha' a'coñchataretta añ coyanesha' ñeñt atarr ecañoresha' ñeñt ame'ñatenaya pa'namen añcha'taretnesha' ñeñt pa'namen

anetso'tsa'yen e'ñe allohuanen chen oñechno añe patsro. Ñapa' po'conañ penan oñechno all anen.

² Ñeññ amcha'tareťetyetsa añe patsropa' pame'ñeñoťet ñetpa' e'ñe po'cañoreshacma peñet ñeññ coyanesha'. Allohuen ñeññ añe patsro'tsen acheñenesha' e'ñe a'posa'tuenanet tarro'mar ñeññ atto cañoresha'tenanet ñeññpa' chochna a'posa'tenanet attoch e'ñe cohuen ame'ñeñet.

³ Allempoña ñeññ mellañoťeñpa' arr anmuen amaraťo, e'ñe Yompor puecamquēñoť anmuenet. Allñapa' nentos puesheñarr coyanesha' ñeññ anets berrma't pa'che'ño. Ñeññ berrma'tpa' atarr amcha'nochen, atarr tsañnanen. Poñpa' cancherrmāga, po'ucorñapa' charra'. Ora pue'mocro'marpa' e'ñe aquellca'huareť allemeñ. Ñeññña quellecpa' allo sochatse'teñet Yompor.

⁴ Ñeññña coyanesha'pa' añ chorrena yetsñorromamuen epuet tsamamuen. Ñaña allo añño'tena ñeññpa' atet ñerra'm orollmemen ñeññ atarr cohuen, ñaña mapyellmetollesha' ñeññ nanac poptallme'chyetsa ñeññ nanac tsa'te' ñaña po'ser ñeññ atarr cohuen orrtatene' ña. Potoť orrenan po'pajo' orotaten. Ñeññ pajo'pa' e'ñe e'chorrenan pa'namen sosya'tsañechno ñeññ atarr yetsena'ten ñeññ atto nanac cañoresha'ten.

⁵ Pueto'mpa' aquellcato'ma'tareť. Añ so'chñets ñeññ quellquēnet allpa' ñeññpa' attoch eñotatanet ñeññ ama e'ñeye' eñotpahuo, ñeññpa' atet oten: "Añpa' ñeññ toma'ntenaya anets Babilonia ñeññ nanac atarr anets ñeññara pachor pen ñaña allohuen ñeññ atarr ecañoreshať ñaña pa'namen sosya'tsañechno ñeññ atarr yetsena'tyen arr patsro."

⁶ Allempoña ñeññ coyanesha'pa' neñoť atarr posa'ten. Ñañaapa' añ posa'tena errasats ñeññ po'rras ñeññ muetsanatete't ñeññ pueyochresha' pen Parets tarro'mar ñapa' atarr cohuen entenan o'ch muetsachet ñeññ serrpare'tene' atto ame'ñeñet Jesús. Allempo neñch ñañaapa' atta necuana'ch ñeññ coyanesha'.

⁷ Ñaña allempo mellañoťeñpa' o' alla oterren:

—¿Eso'mare'tña atta pecuana'teñ? Te'pa' o'ch neñotatañ ñeññ toma'ntena añ coyanesha' ñaña ñeññ toma'ntena añ berrma't ñeññ allo anen ñeññ cancherrmāga poñ, po'ucorñapa' charra'.

⁸ Añ berrma't ñeññ penten, ñeññpa' añ toma'ntena ñeññ corratse't ahuañmo'cha te'pa' ama eñalle o' rroma. Tarraña o' mameshamerra o'ch alla tanterra o'ch cha'nerr arrorotot. Tarraña ñeññpa' mamecpach atet perra, ellochna o'ch alla rromuerrerr. Allempochña o'ch chenca e'ñe poctacma. Acheñenesha' ñeññ yecha'yetsa añe patsro ñeññ ama ame'ñetso ñetñapa' atarrcha' cohuanrrorteret añ berrma't tarro'mar ama puentareto ñeññ atet pena añ berrma't. Ama't ñeññ corratse't arr patsro, tarraña ahuañmo'chapa' o' rroma. Ama't o' rromhuañ tarraña o' alla orrterrerr. Ñeñño'marña acheñenesha'pa' atarr cohuanrrortene't. Ñehua, ñeññ cohuanrrortene'pa' ama aquellcareťeyaye pa'so'cheñ Yompor po'libro all aquellcare'tena pa'so'chñechno ñeññ pueyochresha' pen Yompor; ñetñapa' corretsetach errponañohuen. Ñeññ ama ame'ñetso ama aquellcareťeyayeto pa'so'cheñ ahuatoteñ allempoteñ e'ñe errte' ayečcatareťtetsa pats.

⁹ 'Te' ñeññcha' neñotatappa' o'ch poctape'ch e'ñe cohuen esheccha' peñot ñeññ atet toma'ntena añ berrma't poñechno. Ñeññ penten cancherrmāga poñ, ñeññpa' añ toma'ntena cancherrpena aspenet all yechna añ coyanesha'.

¹⁰ Toma'ntenana ñaña cancherrsheña ñeññ amcha'tareťtetsa añe patsro. Tarraña amnarsheñapa' o'huañ amcha'tareťta. Te'pa' o' puesheñarraña amcha'tareťtetsa. Tarraña puesheñarmeñ palltena ama orrtena'. Tarraña esempoch orrtapa' amach atarr atomat amcha'tareťto.

¹¹ Ñaña añ berrma't ñeññ toma'ntenaya puesheñarr amcha'tareť ñeññ corratse't ahuañmo'cha te'pa' o' rroma. Ama't o' rromaña' tarraña ñeññara o'ch alla orrtterra o'ch alla amcha'tareťterrerr ñeññcha' posocsheñterre' ñeññ cancherrsheña amcha'tareť

ñeñt' o' colla'hua. Tarraña ñapa'cho'ña chocmach rromuerrerr allempoch chenca e'ñe poctacma. Ñehua, ñapa' ñeñtara ñeñt' amcha'taretatse't ñaña ahuañmo'cha allempo cancherrsheitete't.

¹² Ñaña añ berrma't ñeñt' charra' po'ucor ñeñt' penten, ñeñt'pa' añ toma'ntena charrasheña amcha'taretnesha', tarraña ñetpa' ama amcha'taretteneta' tarro'mar ama orrteneta'. Tarraña esempoch orrterret allempochña amcha'taretapreteret berrma't e'ñe mame'.

¹³ Ñetpa' e'ñech patrpa' co'tape'chenet ñeñt' atet co'tape'chen berrma't, o'ch neñet berrma't ñeñt'cha' pa'mcha'tareter perret. Ñeñt'pa' atto yepueñet attoch ahuañmo'cha peñet berrma't.

¹⁴ Ñetña'pue' moñe'teño'tet Cristo ñeñt' toma'ntenaya Carrnero quellareretcha'. Tarraña Cristo ñeñt' toma'ntenaya Carrnero ñach a'mchechuerrahuet tarro'mar ñapa' atarr ahuañmo'cha. Ama't ora allpon ñeñt' ayochreshatetyetsa, Cristoña'pue' e'ñe Pa'yochreshater pohueñet allohuenet, ñaña ama't ora allpon ñeñt' amcha'taretetyetsa, ñetpa'cho'ña e'ñe Pa'mcha'tareter pohueñet allohuenet. Ñaña ñeñt' epuet parro yemtena, ñetpa' Yompor acerrahuet ñeñt' chore'ten ña ñeñt' atarr yemtenaya ña.

¹⁵ Allempoña añ mellaño'teñ alla o'terrnerr, ñeñt'pa' atet oten:

—Ñaña añ oñe'chno ñeñt' penten ñeñt' allo anen coyanesha' ñeñt' atarr ecañoreshat', ñeñt'pa' añ toma'ntena shonte' pa'namen acheñenesha' ñaña pa'namen anetso'chno all ye'cha'yenet ñaña po'poñe'ttso'cma ñoñets ñeñt' allo eñosyenet.

¹⁶ Ñaña añ berrma't ñeñt' penten charra' po'ucor ñeñt' toma'ntenaya charrasheña amcha'taretnesha', ñetña'pue' tsena'chetcha' ñeñt' coyanesha', a'ypo'ñeretcha' e'ñe muelle'mco't. E'nuerrñañetcha' e'ñe ña po'chets allempochña chamueret tso.

¹⁷ Yomporpa' ña nene' allohuen amcha'taretnesha' pueyo'chreto attoch ñetpa' e'ñech patrpa' co'tape'chenet ñeñt' atet co'tape'chen berrma't, attoch yepueñet esheccha' ahuañmo'cha peñet berrma't. Allochña'pue' attoch etsotateññañet Yompor po'ñoñ ñeñt' atet oten.

¹⁸ Ñaña añ coyanesha' ñeñt' penten ñapa' añ toma'ntena ñeñt' atarr nanac anets ñeñt' pomnaren pene' allohuen ñeñt' amcha'taretetyetsa allemeñ anetso'mar ñeñt' añe patsro.

18

Atto allohuen ec'llayoretenesha'pa' ya'na'teretcha' ñeñt' anetser Babilonia o' ahuañmo'chataretterra

¹ Allempoña o' alla nenterrerr po'psheñeñ mellaño'teñ ñeñt' sohua'net'sa ento't, ñeñt'ña'pue' atarr ahuañmo'cha. O' e'ñe chap patsopa' a'puetarsam'psosan pats e'ñe ña po'popteño't.

² Ñaña'pue' rranosa huomenc, ñeñt'pa' atet otos:

—Te'ña'pue' o' a'ypo'ñare'terra añ anetser ñeñt' atma'ntataret Babilonia ñeñt' atarr añecmuen anets. Te'pa' añecpach sherberr allcha' shonterra pa'namen oneñe'te'chno ñeñt' atarr apo'chenare' ñaña allcha' shonterra pa'namen o'te'chno ñeñt' atarr yetsena'tyen.

³ Tarro'mar añ coyanesha' ñeñt' toma'ntenaya anets Babilonia, ñapa' ahuañmo'cha e'ñe po'cañoreshacma pete't allohuenet ñeñt' amcha'taretetyetsa añe patsro. Allohuen ñeñt' añe patsro'tsen acheñenesha' e'ñe a'posa'tuanete't tarro'mar ñeñt' atto cañoresha'tanete't ñeñt'pa' cho'ch a'posa'tanete't. Ñaña allohuen ñeñt' allpon pomatsre'tyestse't, ñaña atarr ec'llayorettatahuete't tarro'mar ñapa' shonte' esocmañen muenatse'tyese't.

⁴ Allempoña o' alla ne'muerrerr po'poñ ñoñets ñeñt' e'morrtetsa ento't, ñeñt'pa' atet oten:

—Ñeñtes neyochresha' nepen, te'pa' o'ch sesa'ne'mañ añ anets ñeñt' atma'ntataret coyanesha'. Amach socshapretatsche ña po'chñar te't sa'na muero'chtapretenaya.

⁵ Tarro'mar ña po'chñarpa' allo'na sen atonetnomtsa nanac. Yomporpa' e'ñe eñoteññañ po'chñar ñeññ allpon ña'yese't.

⁶ Te'pa' atsa'tatare'tterrepa'ch allpon ñeññ atto erro't ña'yese't po'potantañ. Ñehua, ama't epoche'tats atsa'tatare'tterrepa'ch allpon ñeññ atto es ñatse'tyese't. Ñeññ atto allpon llecatyese't po'potantañ, ñapa' epoche'tatsepa'ch atsa'tatare'tterra llequeñtso.

⁷ Ñeññ allpon coshatse'tyese't, te'ñapa' ñeññepa'chña allpon llecatterayerr. Ñeññ allpon echyese't, te'ñapa' ñeññepa'chña allpon muerochtaterre'. Tarro'mar ña ahuañmo'chpa' pommo'cheño't atet ote't pueyo'chro: "Napa' atto nanen na neconaño'pa' atarr na'micha'tare'ttena. Napa' ama añeyayno ñeññ rretorrnanesha'. Na ama't ahuatapa' amach nellquërro tarro'mar amach es nemuerochtaterraye."

⁸ Tarraña ama't atet ommo'chenañpa' mamerrerrpa' o'ch çhapaña ñeññcha' muerochtaterre' pa'namen muerochteñets – rromueñets, llequeñets ñaña muecheñets. Ñapa' a'poyatatueretcha' tso. Tarro'mar Yompor ñeññ Yepartseshar yepen ñapa' ñeññ atarr Parets ñachña coñchaterre'.

⁹ Ñeññ amicha'tare'te'chno ora errañaren añe patsro, ñetña e'ñe puellquëño'fetpa' ya'na'teretcha' ñerra'm esempo enterrñañet pamosoñ ñeññ atto poyen. Ñeññara amicha'tare'tnesha' ñeññ e'ñe po'cañoreshacma pe't ahuañmo'cha ñeññ parrocmu epuet atarr coshete't.

¹⁰ Ñetpa' pueyorño'fetpa' cohuanrrorteretcha' a'yo't tarro'mar atarrcha' yorenet ñeññ atto o' a'coñchatare'tterra. Ñet puellquëño'fetpa' atetcha' otet:

—Atarr llequeñets-bee, ama't ñeññ atarr añecmuen anetser ñeññ atarr ahuañmenca't, machayota o' çherrñaña ñeññcha' coñchaterre'.

¹¹ Ñaña allpon ñeññ pomatsre'tyetsa errañaren añe patsro, ñetpa'cho'ña e'ñe puellquëño'fet ya'na'teñet, tarro'mar te'pa' ama eñalle ñeññcha' rañña'yesehuet ñeññ pomyenet.

¹² Tarro'mar ñet ñeññ po'checom penetpa' shonte' esocmañen pa'namen — oro, ñaña asre'chno ñaña mapyetollesha' ñeññ poptame'te' nanac tsa'te', ñaña serets ñeññ otenet perla, ñaña shetamtso'chno ñeññ atarr co'chnesharer — yetsñorromamuenare', tsamamuenarer, sedamamuen. Shonte' ñaña pa'namen tsache'chno ñeññ atarr eñmosate'chno, ñaña marfil ñeññ elefantas ñeññ allo't ye'chcatyenet pa'namen, ñaña pa'namen ñeññ ye'chcatyenet tsacho't ñeññ atarr nanac tsa'te', ñaña ñeññ ye'chcatyenet bronso't ñaña hierro't ñaña mapyo't ñeññ otenet mármol.

¹³ Ñaña ñeññ pa'namen po'checom penet atet ñerra'm ñeññ otenet canela ñaña pa'namen aspanatollesha' ñeññ eñmosatare' ñaña tsachese' ñeññpa'cho'ña eñmosatare' ñerra'm esempo a'crrateñet e'ñe atet ñerra'm ñeññ otenet mirra ñaña incienso. Allo'tpa' po'poñe'chno checmañatso'chno ñeññpa' añ vinos, olive'se', harina ñeññ atarr cohuen ñaña trigo. Ñaña po'poñe'chno ñeññ pomyenet ñeññpa' añ huacshe'chno, carrnero'chno, cahualle'chno ñaña carrotollesha' ñeññ matatyen cahualle'chno. Ñaña allpa' ama't acheñ pomueñet ñeññcha' taruasatenet e'ñe atta. Ñeññ acheñerpa' allña pomueññañet pocreña ñeññ atto correna arr patsro.

¹⁴ Ñeññ pomatsre'tyetsa allpa' ñetña'pa' serrpare'tenet, çha ottenet ñerra'mrrate' çho es oteñet ñeññ anetser, ñeññpa' atet oteñet:

—Ñeññ allpon atarr ñayoma'yese't atet ñerra'm puetsarr ñeññ atarr ayoma'po' te'ñapa' ama eñalle o' huañerr. Ñaña ñeññ allpon nanac cohuen pentyese't ñeññ nanac co'chnesha'tatse't, te'pa' o' chenca'huerra. Te'ñapa' ama't ahuatapa' amach alla pentere'te. Arrpa' allohua ñeññ atet oteñet ñeññ anetser.

15 Ñeñt allpon pomyenet allpa' ñetñapa' epaye' ganatanet nanac aton quelle. Tarraña ñet te'pa' po'yorñoŕet attach tomcha'tet a'yot allotcha' cohuerret ñeñt atet o' a'coñchatare'terra. Ñetñapa' epaye' ya'na'teñet e'ñe puellquëñoŕetpa'

16 atet otenet:

—Llequëñtsa-bee añ atarr anets tarro'mar ñapa' o' atet perrate' ñeñt atarr añecmuen anetser ñeñt atet ñerra'mrrate' puesheñarr coyanesha' ñeñt nanac cohuen añño'tetsa. Añcha' chorrena ñeñt atarr cochnesha' yetsñorromamuen epuet ñaña tsamamuen ñaña ñapa' nenan oro, ñaña mapyetolleshma't ñeñt atarr cochnesha' poptallme'chyetsa ñaña nenan cochnesha' seretsochno.

17 Te'ñapa' e'ñe mamecmapa' o' e'ñe huañerr ñeñt atto atarr nanac esocmañen echyese't. Arrpa' allohua ñeñt atet ot ñeñt pomatsre'tetsa all.

Allempoña allohuen ñeñt po'taruas pene' bote ñeñt anmatsetene' checmañats all ñeñt anetsro, ñetpa'cho'ña o' alla tomcha'tet a'yot — atet ñerra'm ñeñt pamo'mte' pen bote ñaña ñeñt achopeña'tnesha' ñaña marineronesha' ñeñt taruassets all boto.

18 Ñetpa'cho'ña allohuenet all tomchenetpa' rrannartenet allempo enterrñañet pamosoñ ñeñt atto poyen ñeñt anetser. E'ñe puellquëñoŕetpa' atet otenet:

—Ama eñalle po'poñ anetser ñeñt atarr cohuen atet ñerra'm añ anetser.

19 Allña'pa' atarr yahuanrrortenet. Puellquëñoŕetpa' pampato'tyeset patso. Rrannaretyesetpa' atet otyeset:

—Llequëñtsa-bee añ atarr anetser tarro'mar allohueney ñeñtey echyene' yebote ñeñt chocma yanene' oñopa' shonte' quelle ganatye't tarro'mar ñeñt anetserpa' shonte' echane't quelle nanac aton. Tarraña ama't atet pe'tpa' te'ñapa' e'ñe mamecmapa' o' e'ñe huañerr.

Atarrcha' cosheñtso'tsa'yen allohuen ñeñt pueyochresha' pen Parets

20 Te'ña sapa' socshepa'ch ñeñtes pue'ntañ'o'tsenes ñaña allohuen ñeñtes pueyochresha' pen Parets ñaña allohuenes ñeñtes allsensaretes Yomporecop ñaña allohuenes ñeñtes a'mtene' Yompor po'ñoñ tarro'mar ñeñt atto Yompor o' coñchatteran ñeñt anetser, ñeñt'pa' attoña o' chemnaterrsa sa.

21 Allempoña mellañoŕeñ ñeñt atarr ahuamencatpa' ñaña'pa' chetan mapue' ñeñt atarr añecmuenmen atet ñerra'mrrate' ñeñt allocma es puetse'tenet ñeñtñapa' huapore'ch sa'po cha chencostsa poctacma. Allempoña ñeñt mellañoŕeñpa' atet ot:

—Attecmach ahuapore'tare'terra añ atarr anetser ñeñtara ñeñt atma'ntatare't Babilonia. Amach orrterre'te ama't ahuata.

22 Te'ña allpa' amach es e'morrterrtse'te ñeñt atto toquënet arpa ñaña atto penclla'tenet ñaña ñeñt atto poctorare'tyenet po'poctoro. Ñaña ñeñt po'taruas p'aye't ñeñt es ye'chcatyesaye't pa'namen esocmañen all, te'ña ama't ahuata amach orrterre'te. Ñaña atto e'morrte't allempo es puetse'tete't allpa' te'ñapa' amach alla e'morrterre'te. E'ñe muetsoñeñtuerra.

23 Ñaña ñeñt allo choyo'tam'psete't, te'ñapa' amach alla choyo'tam'perranete'te. Ñaña ñeñt coshame'tam'psaye't ñeñt sena'tetsa ñaña coyanesha', te'ñapa' amach alla e'morrterrete'te pocshañña. Ñaña allpon ñeñt pomatsre'tyesatse't all ñeñt atarr anetsro, ñetpa' atarr asherben entete't. Ora errañaren añe patsropa' ama eñalle ñeñt atet sherbets. Ama't atarr asherben entyesetañe't tarraña chocma shecare'tyesete't allohuen pa'namen acheñenesha' ora errañaren añ patsro. E'ñe atet es ame'ñatena amase'ñe'tpa' e'ñe attecma shecare'tenanet ñeñt anetser.

24 Ñaña all anetsro, ñeñt'pa' all amtsanatare'te't ñeñt a'mtaye't Yompor po'ñoñ ñaña allohuen ñeñt pueyochresha' pen Parets. Allña ashatare'tete't po'rras ñaña ama't allohuen ñeñt amtsanatare'ttate't ora errañaren añe patsro, ñeñtara anetsro't allotña amtsanatare'tete't.

19

¹ Allempoña o' alla ne'muerrerr ñeñt e'morrtsa huomenc ento, shonte' acheñenesha' e'ñe parrocma rrannartenet, ñeñtña'p' atet otenet:

¡Aleluya! Aye'chochtatpo'ch Yompor tarro'mar ñapa' ña ñapuef a'queshpatañtetsa, aco-huentatpo'ch Yompor ñeñt ñapuef atarr ahuañenesha'.

² Ñaña ñeñt pocte' enten Yompor ñeñt'pa' e'ñe pocte' attecma, ñaña allpon ñeñt atet oten ña, ñeñt'pa' e'ñe po'ñoç attecma. Tarro'mar ñapa' o' coñchatteran coyanesha' ñeñt atarr ecañoresha'ttetsa tarro'mar e'ñe ña po'chñaro'tpa' atarr a'sosyatenan acheñenesha' ora allohuen ñeñt yeçha'yetsa añe patsro. Te'ña Yomporpa' o' e'ñe tsa'tatuera ñeñt allpon muetsanatatoñe't ñeñt torra'yestse't ñocop.

³ Po'pocheñoña'p' alla oterretterr:

—¡Aleluya! Aye'chochtatpo'ch Yompor tarro'mar te'pa' Yompor o' amosoñe'chatteran ñeñt atpare'taye't. Attoña o' chepoterr pamosoñ enonef; ñeñt'pa' ama't ahua'tapa' amach huañerro.

⁴ Allempoña añ epoch çharra' ñeñt puechetsa pa'tatssheña ñeñt sherbene' Yompor po'conaño, ñetña'p' concorpa'rrtenet epuet ñaña pa'tats ñeñt berrma'ttetsa. Allo-huenet concorpa'rrtenet all Yomporesho. Allohuenetpa' ma'yocheñet Yompor all anen po'conaño. Ñetña'p' atet oteñet:

—Aye'chochtatpaupepa'ch Yompor, attetepa'ch p'ocop errponohuañen.

⁵ Allempoña all Yompor po'conaño'tpa' alloña e'morrterrerr po'poñ ñoñets, ñeñt'pa' atet oten:

Sa'ye'chochtatoñepa'ch Yompor, allohuenes ñeñtes torra'yetsa ñocop, ama't sa ñeñtes atarr sherbets ama't saña ñeñtes ama tama sherbetso. Ama't allohuenes erra'tseneste' ñeñtes atarr añcha'na'tpo' entene' Yomporpa' te'ña'p' sa'ye'chochtatoñepa'chña.

Atto Cristopa' e'ñe cohuen aguërran allohuen ñeñt ame'ñenaya ña ñeñt atma'ntataret atet ñerra'mrrate' ña puetapor penahuet

⁶ Allempoña napa' o' alla ne'muerrerr shonte' acheñenesha' rrannartenet, atarr huomenc e'morrtena atet ñerra'mrrate' all etsase'tena shonte' oñ atarrcha' huomenc ma'moreten. Po'ma'moreteñña'p' çha ottena ñerra'mrrate' çho tecor-rraren. Acheñenesha'ña ñeñt rrannartetsapa' ñetña'p' atet otenet:

Aye'chochtatpo'ch Yompor tarro'mar te'pa' o' çhap allempoch añcha'taretterra ña e'ñe ñapuef ñeñtara Yepartseshar ñeñt atarr ahuañenesha'.

⁷ Te'ña'p' yocsherrep'a'ch, yocshame'tamperep'a'ch, yecohuentaterrñañep'a'ch tarro'mar te'pa' o' çhap allempoch yocshame'tam'pesya Cristo ñeñt atma'ntataret Carrnero. Te'ña'p' o' çhap allempoch sena'ta. Ñaña ñeñt coyanesha' ñeñt'cha' puetapor pa', ñaña'p' o' e'ñe añno'tare'tta.

⁸ Ñaña'p' o' apet ñaña ñeñt'cha' chorra ñeñt atarr cohuen huallama't atarr coçhnesha' shetamuets ñeñt otenet lino ñeñt ama asosyatño ama't e'ñe mamesha, atterach poptame'tena.

Ñehua, añ shetamuets ñeñt otenet lino ñeñt ama a'sosyatpahuoyaye ama't e'ñe mamesha, ñeñt'pa' añ toma'ntena ñeñt atto e'ñe cohuenare' es pa'yen ñeñt pueyochresha' pen Paret. Ñetña'p' añ toma'ntenet Cristo puetapor penahuet.

⁹ Allempoña mellañoñep'a'p' alla oterrerr:

—Te'pa' o'ch pequellquërrerr añ ñoñets ñeñt notenep, ñeñt'pa' atet ot: “Atarr cosheñtso'tsen allohuen ñeñt ahua'ñare'ttetsa o'ch rrallme'chaprechet allcha' coshame'tam'peñet Cristo ñeñt atma'ntataret Carrnero ñeñt sena'tatsa.”

Mellañoñep'a'p'p' alla oterrerr:

—Ora allpon ñeñt atet oteney Yompor arrpa' ñeñt'pa' e'ñe po'ñoç atet.

10 Nañapa' neconcorposa mellañoñeñ pa'rrpō ñeññ neserrpare'tatene' o'ch nema'yochyañ, tarraña ñapa' atet oten:

—Napa' amach pema'yochatsetno, napa' añana ñeññen petorrapretenaya Yomporecop ñaña allohuen pemo'nasheñneshachno ñeññ serrpare'tene' atto ame'ñeñet Jesús. Papa' añcha'ña pema'yocha Yompor ñapueñ.

Tarro'mar allohuen ñeññ a'ñtene' Yompor po'ñoñ, e'ñe ña Puecamquëñoñpa' añ serrpare'tenet ñeññ atto yame'ñeña Jesús.

Cristo ñeññ montenaya cahual ñeññ atarr huallañnanen

11 Allempoña po'pocheñopa' alla nenterrerr atoraret enet. Allñapa' allo'tsen cahual ñeññ atarr huallañnanen. Ñeññ montenaya cahualpa' añ socheñet, Ñeññ atarr Ayemuetpotetsa ñaña ñeññ e'ñe Po'ñoñch Yompor Po'ñoñ. Tarro'mar ñapa' erra'tsen pocte' ent o'ch coñchach, ñeññña ñocoppa' e'ñe pocte'. Ñaña ñerra'm ña quellaratahuet ñeññpa'cho'ña e'ñe pocte' ñocop.

12 Pa'clloyoñapa' atarr nanac a'rrechatañ atet ñerra'mrrate' tso' po'huorter. Poñoñapa' shonte' po'choyo'm ñeññ choyo'mtena. Allñapa' anaret ñaña pa'so'cheñ ñeññpa' e'ñe ñapña eñoteñ.

13 Pa'shtampa' año e'chomaret errasatso. Ñaña añ socheñet Yompor Po'ñoñ.

14 Ñaña ñeññ allpon pa'çllarañneshar pen all pue'ntaño, ñetñapa' coñeñet chenta' monta'yesnenet ñamet puecahualloro ñeññ atarr huallañnarren. Ñetpa'cho'ña ñeññ pa'shtam penet atarr huallama'tarer. Ñeññ shetamuetspa' atarr cohuen ñeññ otenet lino ñeññ ama sosyatetso ama't mamesha.

15 Ñeññ anenahuet, e'ñe puenamoñ all orrtena cochell ñeññ atarr etsotañtataret. Ñeññ cochellpa' añecop sherben alloch ame'ñatuerrana ora allpon pa'namen acheñenesha' arr patsro. Allochñapa' po'yoroñenñoñpa' o'ch añcha'taretterranet atet ñerra'mrrate' ñapa' a'sreperet o'ch añcha'nochtana'terranet. Ñaña ñach coñchaterrahuet. O'ch netma'ntacha atet ñerra'mrrate' ñach a'mama'te' uva esheccha' cha'nom po'ñer. Ñeññ atet a'mama'teñet uvapa' añ toma'ntena atto Yompor ñeññ atarr ahuamencat e'ñe ña po'yoroñenñoñpa' atarrcha' coñchaterran acheñenesha' ñeññ atpare'tetsa.

16 Ñaña pa'shtamo e'ñe pa'tapacoptaro allñapa' all aquellcareñ ñoñets ñeññcha' atet enteñet Cristo, ñeññpa' atet oten ñoñets: "Allohuen ñeññ añcha'tareteçhno añmapa' ñeññña e'ñe Pa'mcha'tareter pohueñet allohuenet. Ñaña allohuen ñeññ ayochreshateçhno añmapa' ñeññña e'ñe Pa'yochreshater pohuenet allohuenet."

17 Allempoña napa' o' alla nenterrerr mellañoñeñ ñeññ tets all ñeññ yeçhoyo'tamipene'. Ñañapa' atarr huomenc eñen, chore'tenan allohuen tse'machno ñeññ anomcha'tyetsa eno. Ñeññña' atet otenanet:

—Sehua'cha'ta allohuenes o'ch sap'cha arr o'ch serren po'chets ñeññ atarr aton rratenes Yompor.

18 Attoch serroñ po'chtsoçhno shonte' acheñenesha' ñeññ añcha'tareteçhno, ñaña shonte' ñeññ capitanyets, ñaña shonte' ñeññ atarr ahuamencat entyenet. Serroñ ñaña shonte' cahualleçhno po'chets ñaña añ po'chets ñeññ montenaya. Ama't shonte' pa'namen acheñenesha' o'ch serroñ po'chets ama't ñeññ acheñer ñeññ atarr sherbets ñaña ama't ñeññ ama sherbetso, ama't ñeññ e'ñe cohueno'tsen acheñ, ama't ñaña ñeññ ataruasataret e'ñe atfa — o'ch e'ñe serruanet po'chets allohuenet.

19 Allempoña napa' o' alla nenterrerr ma'yarrma't epuet ñaña allohuen añcha'tareteçhno ora erraparen ñeññ añe patsro'tsen epuet ñaña allohuen ñeññ pa'çllarañneshar pen. Ñetpa' añecop apçhenet allochñapa' o'ch quellareñet ñeññ

montenaya puecahuallor ñeñt atarr huallaþnanen ñaña epuet ora allpon ñeñt pa'çllarañeshar pen ña.

²⁰ Allempoña quellaranna'tet ma'yarrma'tña'pa' cha rremuet epuet ñaña ñeñt a'mtene' e'ñe ña po'ñoñ tarraña ñeñt'pa' ashcaña. Añ ñeñt ashcañerpa' e'ñe ma'yarrma't po'huamencot gatenan acheñenesha' ñeñt ama puentareto. Ñeñt'pa' alloña shequënan acheñenesha' attoch ame'ñeñet. Ñeñtña acheñenesha'pa' o' e'ñe yato'matuanet ma'yarrma't pueyotsaparo. Ñetña'pa' aña ma'yochenet ayeçcataret ñeñt toma'ntatenet ma'yarrma't. Allempoña rremuet ma'yarrma't epuet ñaña ñeñt a'mtene' po'ñoñ allempoña'pa' ahupore'tarettet epsheño'maret e'ñe betareret all parraren tso' errañaren. Ñeñt tso'pa' atarr shemasher huorten.

²¹ Po'potantañeçhnoña ñeñt epuet quellarañ ma'yarrma't ñetpa'cho'ña o' e'ñe amtsanataretuet. Año amtsanatarettet cochllo ñeñt puenamo'tsen ñeñt montenaya puecahuallor ñeñt atarr huallaþnanen. Allempoña ñeñt allohuen tse'maçhno epaye' ochare'ch po'chets allempo rret añ po'chets ñeñt o' e'ñe amtsanataretetua.

20

Attoch çherr allempoch mellapoterra

¹ Allempoña o' alla nenterrerr po'psheñeñ mellañoñeñ ñeñt sohua'netza entoñ. Ñaña pototpa' añ orren llave alloch toramþsan aroroñ ñeñt atarr o'pononet aroroñtena pats. Pototña'pa' orrenan ñaña cadena ñeñt atarr añecmuen cadena.

² Ñeñtña mellañoñeña'pa' rremosan añañ. Añaña'pa' ñeñtara shecheþ ñeñt ahuañoteñ ñeñtara yoten oneñet ñaña ñeñt otenet Satanás. Atto rremue'pa' allempoña'pa' huanquë'. Ñeñt atto ehucarettapa' e'ñech errponañohuen char ñeñt otenet mil char, atterach ehucarettena.

³ Allempo huanca'huepa' o' huapore'ch o'pono aroroñ. Allña yottamþes o' noñ alloch e'ñe echarr þamþes. Allochña'pa' amach alla shecare'terranerro allohuen pa'namen acheñenesha' arr patsro. Ñehua, ñerra'm o'ch çhap mil charpa' allempoña'pa' o'ch alla a'rroyeret. Tarraña ñerra'm o'ch alla a'rroyeretpa' ñeñt'pa' mamecpach a'rroyaretterra.

⁴ Allempoña o' alla nenterrerr ñeñt anorrçha'tyets po'conaño'mar. Ñetña'pa' allsen-sarettet attoch ñetpa' o'ch amcha'taretetyenet. Ñaña napa' o' e'ñe nentuerrñañ puecamquëñeçhno allohuen ñeñt apecha'tanatarettatset e'ñe pueserrpare'teñoñet Yepartseshar Jesús ñeñt atto a'potoñete't Yompor po'ñoñ. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metotetapa' ama ayaco'mta'tarettete'te. Ñetpa' ama ma'yochyete'te ma'yarrma't ama't ayeçcataret ñeñt toma'ntenaya ña ama esesha' ma'yochaye'te. Ñaña ñetpa' ama muenete'te o'ch ayato'ma'tarettet ma'yarrma't pueyotsaparo ama't pa'co'metotetapa' ama ayaco'mta'tarettete'te. Ñetña allpa' corretseta all amcha'tarettapreteñet Cristo shonte' char allpon ñeñt otenet mil char.

⁵ Ñetña'pa' ñanmuetcha' atantataretterret. Tarraña po'potantañeçhno arromñañnesha' ñetña allpa' ama allo'tseneto tarro'mar ñetpa' ama atantataretteyayeto tarremphuach allempoch çherr mil char.

⁶ Atarr cosheñtso'tsen allohuen ñeñt e'ñe pueyochresha' pen Parets tarro'mar ñetpa' ñanmuetcha' atantataretterret. Tarro'mar ñetpa' amach alla rromuerrete'te po'pocheño ñeñtcha' atet rromuerr po'potantañ ñeñtcha' chenquërrtsa e'ñe poctacma. Tarro'mar ñeñtcha' tanterrtsa ñanompa' ñetpa' amach erroñenoñ o'pataneto po'pocheño rromueñets ñeñtara chenquëñets. Ñetpa' añcha'ña sherbenet Yompor epuet Puechemer Cristo. Ñetpa'

Yompor po'corneshar penahuet, añcha'tarettapreteretcha' nanac aton shonte' char ñeñ mil char.

Atto Juanpa' entan oneñeñ o' ahupore'taretta all parraren tso' errañaren

⁷ Allempoch metua añ mil charpa' allempochña a'rroyeret oneñeñ all ayottam̄psarettena mil charohua.

⁸ Ñaña'pa' o'ch auyes ora errañaren pa'namen anetso'mar arr patsro allcha' she-care'tyerran pa'namen acheñenesha'. O'ch shecare'terran Gog ñaña Magog attoch a'yapaçhaterranet o'ch quellaraterranet. Ñeñ atet yenteññañ ontap po'mñer atetcha' shonerran ñaña pa'namen acheñenesha' arr patsro, ñeñ ama e'ñotuapahuoyaye.

⁹ Ateñ nentanet ñetpa' ahuanmuet mopñarero'mar o'ch parratsetet errañaren allcha' orreyeset. Ñetpa' arrentach ahuanenet Yompor pa'netsronet ñeñ atarr morrentena tarro'mar allpa' allo'tsa'yen ñeñ pueyochresha' pen ña. O' e'ñe arrotam̄pesuosyet attoch rremanatoñet Yompor pueyochresha'. Tarraña Yompor pue'ntañotpa' e'ñe allem-pocma a'shoranet tso' attoch e'ñe a'poyatatuanet.

¹⁰ Allempoña oneñeñ ñeñ shecare'tenahuetpa' o' huapore'teret ñaña all parraren tso' errañaren ñeñ huortets shemasher. Allo'tsa'yen ñaña ma'yarrma't epuet ñaña ñeñ a'mtene' po'ñoñ. Allña'pa' allempoteñ a'coñchatarefetuerret e'ñe parrocmā, yetome'tets, tsapome'tets ama't ahuaña ñeñpa' amach ahuañaña'terro ama't errponaña.

Ñeñ atto allohuen arromñañnesha'pa' tomçherretcha' Yompor po'conañ allña'pa' allcha' entyesaretterret errotente' ñeñ atet pa'yese't e'ñe puesheña'ttset

¹¹ Allempoña o' nenterrerr atarr añecmuen conañ ñeñ atarr huallama't ñaña ñeñ anets all. Ñaña e'ñe po'partsoteño a'chencatuan añ pats ñaña enet, o' e'ñe chenca'huerra poctacma. Ñocpuet ama eñalle allcha' a'puet ama't e'ñe coñe'ta.

¹²⁻¹³ Nent ñaña allohuen arromñañnesha' all tomçhenet Yompor po'conañ. Ama't allohuen arromñañnesha' allo'tsa'yenet ama't ñeñ atarr sherba'yestset ama't ñaña ñeñ ama asherboyenaye' entete'te. Ama't allpon omarrñateçhno ñeñ omarrcha'tyestset ahua'tpa' ñetña ama't oñotpa' o' alla tantrra'tuerret. Ama't allohuen arromñañnesha' ama't o' chapuet all o'patenanet rromueñets, allo'tña o' alla tantrra'tuerret allohuenet. Ñeño'mar ñet te'pa' e'ñe Yompor po'conañ tomçha'tuenet allohuenet. Allempoña allpa' tore'tet shonte' libro, ñeñña librorpa' all aquellca'huaret ñeñcha' yepaterrahuet ñeñ allpon atet patsetyese't e'ñe puesheña'ttset. Allempoña Yomporpa' all entan ñeñ libro all aquellcare't ñeñ ama cohuenaye' es petso. Ñeño'marña ñapa' attoña otteñe'cherranet o'ch mueñanet coñcheñtso. Allo'tña'pa' tore'tet po'poñ libro ñeñ libropa' all aquellcare't añ pa'so'chñeçhno attochña ñetpa' corretsetach.

¹⁴⁻¹⁵ Allohuen ñeñ ama enteññañeto pa'so'cheñ libro all aquellcare't añ pa'so'chñeçhno ñeñ corretsetach, ñetña'pa' asaprrotarettet o'pono all parraren tso' errañaren. Ñeñpa' attochña rromuerreterr po'pocheño ñeñ puepocheñ rromueñets ñeñ e'ñe poctacma chenquëñets. Ñaña añ rromueñets ñeñ o'patenaya arromñateçhno ñeñfara pa'netser pen rromueñets, ñeñpa'cho'ña ahupore'taretta o'pono all parraren tso' errañaren.

21

Atto Juanpa' entan po'poñ enet ñeñ e'ñe etserra ñaña patspa'cho'ña o' etserraterr

¹ Allempoña na ñeñten Juanan allpa' o' nenterrerr po'poñ enet ñeñ e'ñe etserra, patspa'cho'ña o' etserraterr. Tarro'mar ñeñ atet yenten enet te' ñaña pats, ñeñpa' o' e'ñe chenca'huerra o' huañerr. Ñeñ etserra patspa' allña ama't sa'p ñeñ yenten añecmuen ama eñalle.

² Nenterrerr ñaña Parets pa'netser ñeñtara Jerusalén ñeñt o' etserrater. Ñeñtña'pa' entot a'suataretterra e'ñe Yomporeshot. Ñeñtña'pa' atarr cohuen orrtena e'ñe atet orrtena ñerra'm puesheñarr coyanesha' allempo some'tenapa' o'ch año'tena e'ñe cochneshot attochña puerrollarpa' atarrcha' cohuen enteñ.

³ Allempoña napa' o' alla ne'muerrerr all e'morrtena ñoñets ñeñt huetsa entot e'ñe Yompor po'conaño. Ñeñtña'pa' atet oten:

—Te'pa' señoche'pa'ch, o' çherr allempoch yeçherra Parets e'ñe parro epuet acheñenesha'. Ñeñtcha' e'ñe parro yeçherra ñetpa' e'ñe pueyochreshoche' penanet Yompor. Ña ama't atarr Parets'pa' yeçherrach epuet acheñenesha' ñeñt e'ñe Po'yomporer penet.

⁴ Te'ña Yomporpa' o' a'huañañperrnay yellquëña, te'ña ama't ahua'tapa' amach alla yeyahuerre'te. Te' ama't ahua'tapa' amach yerromuerre'te amach yellquërre'te. Te' ama't ahua'tapa' amach eñallettere'te yahueñets ama't ñaña atserrpeñets amach eñalle. Tarro'mar añeçhno ñeñt allpon yellcatyesaye't te'ñapa' o' e'ñe huañerr.

⁵ Allempoña Yompor ñeñt anets po'conaño'pa' alla eñorana'terrnerr, ñeñt'pa' atet oten:

—Te'ñapa' o'ch señoche, napa' o' netserrataterr ñeñt allohuen esocmañen eñall.

Allempoña'pa' alla oterrerr:

—Te' p'ocoppa' añ pocte' o'ch alla pequellquërrerr ora allohuen añeçhno tarro'mar añ ñoñets ñeñtcha' atarr seyemtena ñeñt'pa' e'ñe po'ñoche atet.

⁶ Allempoña ñapa' alla oterrerr:

—Te'ña po'ñoche'pa' o' e'ñe etsotuer, o' huañerr ñeñt sentyese't ahua'toteñ. Napa' e'ñe pa'motroteñ eñallen atten ñerra'mrrate' quellec A ñeñt pa'moter pen alfabeto. Allempoteñña napa' çhocma eñallen esempohuañencha' huañerr ñeñt allpon eñall, napa' atten ñerra'mrrate' quellec Z ñeñt all puen alfabeto. Te'pa' allohuen ñeñt ama e'ñeye' coshetso pueyoçhro ñeñt çhocmach es e'nenet, nañapa' napanetcha' ñeñt alloch e'ñe eñmaterret. Tarro'mar atto ama cosheneto çha ottenet ñerra'mrrate' ñeñt atarr nanac oñpa'tets. Ñeñto'marña te' napa' notenes allohuenes ñeñtes oñpa'tets'pa' napuerrescha' oñ ñeñt ama ahuañaña'te ñeñt çhocma potets all. Ñeñtña' oñ alloña sapa' corretsasach. Tarraña ñeñtña'pa' ama't coñe'tapa' amach setsa'tero. E'ñe atta napuenes.

⁷ Allohuen ñeñt metana'tue' pa'namen topateñtsoçhno'pa' ñetña'pa' no'pataterranet ora añeçhno a'nateñets. Attochña ñetpa' e'ñech Po'yomporer pennet, nañapa' e'ñech nechemerasha' ne'pohuenanet allohuenet.

⁸ Tarraña allohuen ñeñt ama name'ñenayo ñeñt eçharrtetsa pueyoçhro, ñetña'pa' añ o'patenahuet all parraren tso' errañaren, ñaña allohuen ñeñt etsotene' sosya'tsañeçhno ñeñt atarr atsena'tpo' ñaña ñeñt amtsañnesha' ñaña ñeñt cañoresha'tets, ñetpa'çho'ña allohuenetpa' añ o'patenahuet all parraren tso' errañaren. Ñaña ñeñt amase'ñe'teçhno ñaña ñeñt po'yomporer pa'yene' ayeçhcatareteçhno ñaña allohuen ashcarña'teçhno, ñetpa'çho'ña añ o'patenahuet all parraren tso' errañaren ñeñt huortets shemasher. Ñeñt'pa' allcha' puepocheño rromuerret.

Atto Juanpa' entan Yompor pa'netser ñeñt so'hua'netsa entot ñeñtara ñeñt soçhetsa Jerusalén

⁹ Allempoña ñeñt cançherrsheña mellaño'teñnesha' ñeñt eçhyesaye't po'pajotollesha' all e'chorrayesarete't ñeñt allot e'ñe orrtatuerret allohuanen mueroçhteñets, puesheñarrña mellaño'teñpa' o' huapapa' otosen:

—Apon o'ch p'oc'ta'n o'ch negaten'pa' ñeñtcha' puetapor perr Cristo ñeñt atma'ntataret Carrnero.

10 Allempoña napa' o' alla chorraternerr Yompor Puecamquëñ ñeñña nanmue' a'yo allo'tsen ñeñ atarr añecmuen aspenet. Alloña napa' nentapoñ Parets pa'netser ñeñ sohua'netsa entot e'ñe Yomporeshot ñeñtara ñeñ Jerusalén.

11 Ñeñña anetserpa' cha popuetnena atarr cochnesha' atet cohuentena Yompor po'cohuenña. Po'popteña e'ñe atet ñerra'mrrate' mapue' ñeñ atarr poptame'te' ñeñ mapyer otenet jaspe ñeñ nanac amorrentaret. Ñeñtpa' e'ñe ora orrtatuenan allohuen ñeñt'allo'tsa'yen e'ñe all.

12 Ñeñ anetserpa' e'ñe aconcha'tam̄psaret a'yohuen. Ñeñt'allo aconcha'tam̄psaretpa' atarr añecmuen enonet. Ñaña allo'tsen charra' puechena epa yetarr allot be'tenet. E'ñe pate'tets yetarr allo'tsa'yen ñaña puesheña'tets mellañoñeñ ñeñt'cohuañpene' yetarr. Pate'tets yetarropa' all aquellca'yesaret añ pa'so'chñechno Israel po'mreneñ ñeñt'charrasheña puechena epa.

13 Ñeñt'conchet, allot huena atsne' allo'tsen ma'pa yetarr. Ñaña allenet emuena atsne'pa' allo'tsen ñaña ma'pa yetarr. Tenotem̄ta'npa'cho'ña allo'tsen ma'pa yetarr. Topotem̄ta'npa'cho'ña allo'tsen ma'pa yetarr.

14 Ñeñt'conchtar allo echarr aparettena pa'rrp̄opa' e'ñe allohuenpa' allo'tsen charra' puechena epa mapue' ñeñt'allo echarrtateñet. Ñaña pate'tets mapue' allo echarrtateñet conchetpa' all aquellca'yesaret añ pa'so'chñechno ñeñt'charrasheña puechena epa ñeñtpa' ñeñt'puellsensarnesha' Cristo ñeñt'atma'ntataret Carrnero.

15 Mellañoñeñ ñeñt'neserrpare'tatene' ñaña'pa' echenan tepapets ñeñt'oropepen allo tepuenan Parets pa'netser ñaña allo aconcha'tam̄psaret ñaña pueyottarohuen.

16 Mellañoñeñ atto tepuenan Yompor pa'netser e'ñe allponeshacma tepa'hue allemateñ — onnatonet ñaña pa'llpocha'peronet ñaña enonet e'ñe allponeshacma cha'nmach — dos mil doscientos kilómetro allemateñ.

17 Allempoña tepan ñaña conchet po'bateña ñeññapa' allo'tsen sesenta cuatro metro. Ñehua, mellañoñeñ e'ñe atet es tepa'yen atet es yetpa'yen yaña ñeñtey arromñaitey.

18 Ñaña añ conchetpa' añ ayeçhcataret mapue' ñeñt'atarr cohuen aspanamemeno poptame'tyena ñeñt'otenet jaspe. Pa'netserña'pa' añ ayeçhcataret oro — ora allohuenpa' e'ñe oroche'. Añ oropa' atarr nanac cohuen ñeñtpa' e'ñe orrtatuenan pa'namen ñeñt'allpon allo'tsa'yen. E'ñe atet ñerra'mrrate' rerpat ñeñt'atarr cohuen e'ñech orrtatuenan allohuen pa'namen ñeñt'allo'tsa'yen.

19 Ñehua, añ econach allo orratenet conchet, ñeñt'econach pueccllo'ya'tetspa' atsetareno poptena ñeñt'allo a'cohuentateñet. Ñeñt'ñanom econach pueccllo'yarr allña'pa' añ ana'yesaret atarr cohuen poptame'te' aspanamemenatollesha' ñeñt'otenet jaspe. Ñeñt'puepueccllo'yañ econach allña'pa' añ ana'yesaret atarr cohuen poptame'te' asollememenaretollesha' ñeñt'otenet zafiro. Ñeñt'econach puema'pueccllo'yañ allña'pa' añ ana'yesaret atarr cohuen poptame'te' huallamemenatollesha' ñeñt'otenet ágata. Ñeñt'puepa'tatseccllo'yañ econach allña'pa' añ ana'yesaret atarr cohuen poptame'te' aspanamemenatollesha' ñeñt'otenet esmeralda.

20 Ñeñt'econach pa'mnareccllo'yañ allña'pa' añ ana'yesaret ñeñt'atarr cohuen pa'namenot poptame'tyena ñeñt'otenet ónice. Ñeñt'po'pechapueccllo'yañ econach allña'pa' añ ana'yesaret atarr cohuen poptame'te' tsamemenatollesha' ñeñt'otenet cornalina. Ñeñt'econach po'cancherreccllo'yañ allña'pa' añ ana'yesaret atarr cohuen poptame'te' shemashrememenatollesha' ñeñt'otenet crisólito. Ñeñt'econach po'psoccllo'yañ allña'pa' añ ana'yesaret atarr cohuen poptame'te' aspanamemenatollesho asolleten ñeñt'otenet berilo. Ñeñt'econach pue'sconeccllo'yañ allña'pa' añ ana'yesaret atarr cohuen poptame'te' e'ñe shemashrememenatollesha'

ñeñt otenet topacio. Ñeñt econach po'charraclo'yañ allñapa' añ ana'yesareť atarr cohuen poptame'te' ama e'ñeye' aspanamemenareťolleshayaye ñeñt otenet crisoprasa. Ñeñt econach po'charraclo'yañ puechena puec clo'yarr allñapa' añ ana'yesareť atarr cohuen poptame'te' asollememenma'tetollesha' ñeñt otenet jacinto. Ñeñt econach po'charraclo'yañ puechena epuec clo'ya allñapa' añ ana'yesareť atarr cohuen poptame'te' yetsñorromemenatollesha' ñeñt otenet amatista.

²¹ Allohuen yetarročno ñeñt čharra' puechena epa e'ñe cohuen huallatrrren atet ñerra'm chempeshtall o'ponotpa' atarrcha' huallatllellen ñeñt otenet perla. Pate'tets yetarr e'ñe patrra perla ayečcataret. Ñaña añ calle ñeñt all chopeñe'chenet ñeñtpa' e'ñe oroche' ayečcataret atet ñerra'm rerpat ñeñt e'ñe orrtatuene' ora ñeñt allpon allo'tsa'yen all.

²² All Parets pa'netsro ama't patrra pocoll ama neñche ñeñt all ma'yocheñet Yompor. Tarro'mar allpa' ama pallteno pocoll allcha' ma'yocheñet Yompor, tarro'mar ñeñt nanac Parets ñeñt Yepartseshar yepen ñapa' e'ñe allo'tsen all ñeñtcha' ma'yochena allohuen acheñenesha' epuet ñaña Puechemer Cristo ñeñt atma'ntaret Carrnero.

²³ Ñaña Parets pa'netsro allpa' ama muenenano atsne' ama't arrorra ama mueneñeto ñeñtcha' čhoyo'tetsa all. Tarro'mar Yompor ñeñt atto poptena pa'tsnomueñoťpa' ñeñtña čhoyo'tetsa all epuet ñaña Puechemer Cristo ñeñtña lamparñetets. Ñeñtara Cristo ñeñt atma'ntaret Carrnero.

²⁴ Ñeñt atto poptena Yompor pa'tsnomueñoťpa' ñeñtña a'puetarsam̄pene' erracmañen allohuen pa'namen acheñenesha' attoña correnet e'ñe cohuen. Allohuen am̄cha'taretnesha' ñeñt atto cohuentenet añe patsro, huapatueretcha' Parets pa'netsro alloch cohuentateññañet ñamet Parets pa'netser.

²⁵ Ñeñt Parets pa'netser ñeñt pueyottar pen alloť be'tenet, amach yottam̄perre'te e'ñech ellapene't atoraret. Allpa' ama't checmetapa' ama eñalle.

²⁶ Allohuen pa'namen acheñenesha' ñeñt am̄cha'na'tpotyetsa añe patsro ñeñt atto cohuenteyenet, huapatueretcha' Parets pa'netsro alloch cohuentateññañet ñamet Parets pa'netser.

²⁷ Allpa' ama't ahuaťapa' amach orrtateto ñeñt sosya'tsañečno tarro'mar allpa' ama't puesheñarrapa' ama be'teno ñeñt cotape'chene' sosya'tsañečno ñeñt atarr tsena'ten Yompor ñeñt atet ñerra'm ashcarñať. Allpa' añe be'tets ñeñt aquellcareť pa'so'chñečno Cristo po'libro attochña ñetpa' corretsetach.

22

¹ Allempoña mellañoťeñpa' o' alla gaterrnerr po'ñes. Ñeñtpa' arroť huena conañot allo'tsen Yompor epuet ñaña Puechemer Cristo ñeñt atma'ntaret Carrnero. Ñeñt oñpa' atarr cohuen, atarr llancasaseno poptaso'tena. Oñ ñeñt atarr cohuen añ toma'tena atto apueney Yompor attochña yapa' corretsayach e'ñe yocsheñeshocmañen errponohuañen.

² Ñeñt Parets pa'netsro e'ñe rročo allecma chopeñe'chenet, allñapa' all oñen oñ. Ñeñt oñ emoto'mar popame'tar-ro all chopyen tsach. Ñeñtña tsachpa' atarr nanac me'ten, pueña'tets arrorrpa' čhocma me'ten. Paterr charpa' čharroch me'ten puechena epa. Ñeñt pue'mer ñeñtcha' apuerrey Yompor añ toma'tena alloch yocrrerra erponañohuen ñeñt ama ahuañaño ama't ahuaťa. Ñaña pasopanerpa' añecop sherben ñeñtcha' a'crraterre' allohuen pa'namen acheñenesha' e'ñe puecamquëñohuenet.

³ Parets pa'netsropa' amach eñalleterro ama't patrra ñeñtcha' a'cmareťterrtsa. Tarro'mar Yompor epuet ñaña Puechemer Cristo ñeñt atma'ntaret Carrnero, ñetña partsotetset all po'conañeto. Ñaña allohueney ñeñtey torretsa Yomporecop e'ñech cohuen yesherberr yaña all.

⁴ Yentercha' Parets yecuacлле'channerrach parro epay Yompor. Yeto'moña yapa' quellquërrancha' e'ñe ña pa'so'cheñ.

⁵ Allña' amach eñalleterro checmete'. Ñeñteycha' yeçherrtsa allpa' amach yemnerro ñeñtcha' yeçhoyo'tamñse'. Atto te'pa' çhocma yemnen lampareñ alloch yeçhoyo'tamñpena. Allempopa' amach yemnerro ñaña o'ch çhoyo'tamñpeney at-sne', tarro'mar Yompor ñeñt Yepartseshar yepen, ñapa' ñaña pa'tsnomueña ñeñtcha' yeçhoyo'tamñperre' all. Ñaña yapa' ya'nicha'tarettapreterach allempoteñ errpono-huañen.

Arrpa' all eñotateney Jesucristopa' ahuencha' huerra po'pocheño arr patsro

⁶ Allempoña mellañoñeñpa' o' alla oterrerr, ñeñtpa' atet oterrerr:

—Ora allohuen añ ñoñetspa' e'ñech seyemcha tarro'mar ñeñtpa' e'ñech po'ñoçh atet perra. Ñaña Yompor ñeñt Yepartseshar yepen ñaña'pa' çhocma eñotatenan ñeñtcha' a'mtene' po'ñoñ. Ñeñtara Yompor ama't te'pa' o' llesensan po'mllañoñeñer ñeñtcha' gatyene' ñeñt torretsa ñocop ñeñtcha' ahuen atet perra ama't esempo.

⁷ Ñaña Cristo ñapa' atet oten:

—Señoche'pa'ch napa' ahuencha' nohuerra.

Atarr cosheñtso'tsen allohuen ñeñt yemtenaya ora allpon añ ñoñets ñeñt aquellcaret all Yompor po'libro ñeñtcha' atet perra esempo. Arrpa' allohua huañ ñeñt atet eñotaten mellañoñeñ.

⁸ Na ñeñten Juananpa' naña e'muene' ñeñt ora allohuen añ ñoñets ñaña naña entene' ñeñt allpon gatyennet. Allempoña napa' neconcorposa e'ñe mellañoñeñ pa'rrpo ñeñt negatyene' ora allpon pa'namen esocmañen o'ch nema'yochyañ.

⁹ Ñaña'pa' oten:

—Amach pema'yochatsetno na, tarro'mar napa'çho'ña e'ñe parro'pa' atta netorrapretenpa' Yomporecop ñaña allohuen ñeñt pemo'nasheñeshachno pepen ñeñt a'mta'yene' Yompor po'ñoñ, epuet ñaña allohuen ñeñt atarr yemtenaya añ ñoñets ñeñt atet aquellcaret añ libro. Papa' Yomporña pema'yocha.

¹⁰ Allempoña ñeñt mellañoñeñpa' alla oterrerr:

—Ñato't çha pa'nasotena' añ ñeñt allpon Yompor po'ñoñ ñeñt o' pequellca'hua. Tarro'mar allpon ñeñt o' pequellca'hua ñeñtcha' atet perra esempo, te'ñapa' o' çhachmoch allempoch attoch e'ñe etsotuerra esempohuañen.

¹¹ Tarraña e'ñe allempoteñ allohuen ñeñt ama cohuenaye' es petso ñeñtpa' allo'nepa'ch senet patse'tyeset ñeñt ama cohuenaye' enteno Yompor. Allohuenet ñeñt añach yeçhenet sosya'tsañeçhno, ñetpa' allo'nepa'ch senet yeçhcatyesnomuet ñeñt atarr sosya'tsañeçhno. Tarraña allohuen ñeñt e'ñech cohuen es pa'yenetpa' ñetñapa' allo'nepa'ch senet e'ñe cohuen es pa'yestset. Ñaña allohuen ñeñt ma'yochrenaya ñeñt atto sherbeñet Parets, ñetpa'çho'ña allo'nepa'ch senet ma'yochrenet ñeñt atarr cohuen enten Parets.

¹² Ñaña Cristo ñapa' atet oten:

—Te'pa' señoche'pa'ch napa' ahuencha' nohuerra. Nehuapaterrnascha' ñeñt no'patatensa alloch netsa'tuerrsa e'ñe puesheña'ttsos sa errotenete' setorra'yese't. Tarraña o'ca'ye nehuapaterr ñaña alloch netsa'tatuera ñeñt ama pocteye' es petso.

¹³ Napa' e'ñe pa'motroteñ eñallen, atten ñerra'mrrate' quellec A ñeñt pa'moter pen alfabeto. Allempoteñña napa' çhocma eñallen esempohuañencha' huañerr ñeñt allpon eñall, napa' atten ñerra'mrrate' quellec Z ñeñt all puen alfabeto.

¹⁴ Atarr cosheñtso'tsen allohuen ñeñt e'ñe pocte' enten Yompor o'ch tsomhuerrñañet Yompor puenaren alloch e'ñe correrret poctacma. Allempopa' amach alla rromuerrete'te. Ñeñtpa' ñeñtcha'ña e'ñe yoma'huerrret ñesho. Ñehua, ñeñt e'ñe pocte' enten

Yompor ñeñtpa' allohuen ñeñt e'ñe e'shohuaretterra po'chñar e'ñe pame'ñeñoťet Cristo. Ñato' o'ch netma'ntacha atet: Ñetpa' o' e'ñe tsama'tuerret pa'shtamuet attoch e'ñe pocte' entanet Yompor o'ch be'toset yetarro esheccha' chapuet Yompor pa'netsro.

¹⁵ Tarraña allohuen ñeñt ama ame'ñenayo Cristo ñetñapa' a'yote'tsa'yenetach Yompor pa'netsroť. Atet ñerra'm amase'ñeťechno, ñaña ñeñt ecañoreshaťechno, ñaña ñeñt amtsañechno ñaña allohuen ñeñt po'yomporer pene' ayeťhcataret ñaña allohuen ñeñt cohuen entene' allohuen shequēntsochno. Ñetpa' e'ñe ñeñta eñotenet o'ch shecare'chet acheñenesha'.

¹⁶ Allempona Jesús pa' alla oterrerr; ñeñtpa' atet ot:

—Napa' ñaña ñeñten llesensene' nemllañoťeñer ñeñt o' eñotaterres ora añechno, allohuenes ñeñtes e'ñe same'ñeñoťen na sapa' čhocma sapčha'yena allemeñ anetso'mar. Napa' ñeñten allot huapa amčha'taret David, elloñapa' o' alla po'mreneñ perrnerr ñaña. Ñaña napa' atten ñerra'mrrate' ranto ñeñt atarr atarremñ ñeñt atarr huomenc atsnets o'ch puetarenmoch. Attoña na'puetarsampeñ allohuen acheñenesha'.

¹⁷ Allohuen ñeñt pueyochresha' pen Parets ñetpa' atma'ntatarettenet atet ñerra'mrrate' Cristo puetapor penahuet. Attoña ñet Parets Puecamquēñoť oteñet Cristo: —Apon.

Ñaña allohuenes ñeñtes e'mñotene' o'ch soch samña Cristo:

—Apon.

Ñaña allohuenet ñeñt oñpa'tets ñeñt ama eñmatetso pueyočhreto ñeñt čhocma es e'nyenet, ñetpa'čho'ña huapuetepa'. Yoretapa' añ oñ, allochñapa' ñetpa'čho'ña corretsetach. Ñeñt oñpa' e'ñech atta aparettet, amach es tsa'tayo ama't e'ñe coñe'ta.

¹⁸ Na te'pa' o'ch noctape'chach allohuen ñeñt e'mñotene' añ ñoñets all oteneñ ñeñtcha' atet perra esempo. O'ch notanet: Ñerra'm esesha' atontatene' ñet poctapñet ñeñt ama atteye' oteneñ añ ñoñets, Yomporñapa' o'ch atontatanet ñocpuet ñeñtcha' mueročtaterrahuet ñeñt atet o' aquellca'huareťta añ libro.

¹⁹ Ñaña ñerra'm esesha' čha a'chencatenan ama't patrra ñoñets ñeñt allpon aquellca'huareťta añ libro, Yomporñapa' amach muenataneto o'ch es o'patapreteret all aquellcareťtena libro allpon ñeñtñapa' corretsetach. Ñaña ñetpa' amach be'tosapo'tampereto Parets pa'netsro ñeñt atet o' aquellca'huareťta añ libro.

²⁰ Ñeñtara Jesús ñeñt yeñotatyene' ora añechno, ñaña pa' alla oterrerr:

—Napa' po'ñočhcha' ahuen nohuerrerr po'pocheño.

Yañapa' allohueney yoteñ:

—Apon Yepartseshare Jesucristo. Ñeñtpa' attetepa'ch yocop.

²¹ Yepartsesharepa'chña Jesucristo sa'natenaya e'ñe allohuenes. Ñeñtpa' attetepa'ch Nompore allohuenacpay. Arrpa' e'ñe allohua puen Yompor po'ñoñ.